


Mazatec, San
Jerónimo Tecóatl



New Testament in Mazatec, San Jerónimo Tecóatl Mazateco de S
Jerónimo Tecóatl; maa (MX:maa:Mazatec, San Jerónimo Tecóatl)

Mazatec, San Jerónimo Tecóatl
New Testament in Mazatec, San Jerónimo Tecóatl Mazateco de S Jeronimo Tecoatl; maa
(MX:maa:Mazatec, San Jerónimo Tecóatl)

copyright © 2012 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Contributor: Bible League International

Mazateco, San Jerónimo Tecóatl [maa], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, San Jerónimo Tecóatl

© 2012 Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-05-10

PDF generated using Haiola and XeLaTeX on 10 May 2025 from source files dated 10 May 2025

9f778253-d34e-5037-af35-7bca16479aa0

Contents

San Mateo	1
San Marcos	58
San Lucas	94
San Juan	154
Hechos	198
Romanos	251
1 Corintios	274
2 Corintios	296
Gálatas	311
Efesios	320
Filipenses	328
Colosenses	334
1 Tesalonicenses	339
2 Tesalonicenses	344
1 Timoteo	347
2 Timoteo	354
Tito	359
Filemón	362
Hebreos	364
Santiago	381
1 Pedro	387
2 Pedro	393
1 Juan	397
2 Juan	404
3 Juan	405
Judas	406
Apocalipsis	408

'Én ndaà-la Nainá xi kjoa ts'e Cristo koni s'ín kiskù San Mateo

*Xità jchínga-la Jesucristo
(Lucas 3:23-38)*

¹ Jè xojon xi oxkít'aà 'ín-la na'èn-jchá kjiìn-la Jesucristo, xi ya inchrobàt'aà-ne tje-la David kò ts'e Abraham.

² Jè Abraham, jè komà na'èn-la xi Isaac ki'mì; kò jè Isaac, jè komà na'èn-la xi Jacob ki'mì; kò jè Jacob, jè komà na'èn-la xi Judá ki'mì, kò jñà xità 'ndse.

³ Judá, jè komà na'èn-la xi Fares kò Zara ki'mì. Kò jè nea-la, Tamar ki'mì. Jè Fares, jè komà na'èn-la xi Esrom ki'mì; kò jè Esrom, jè komà na'èn-la xi Aram ki'mì;

⁴ kò jè Aram, jè komà na'èn-la xi Aminadab ki'mì; kò jè Aminadab, jè komà na'èn-la xi Naasón ki'mì; kò jè Naasón, jè komà na'èn-la xi Salmón ki'mì;

⁵ kò jè Salmón, jè komà na'èn-la xi Booz ki'mì; kò jè nea-la Booz, Rahab ki'mì. Kò jè Booz, jè komà na'èn-la xi Obed ki'mì; kò jè nea-la Obed, Rut ki'mì. Kò jè Obed, jè komà na'èn-la xi Isaí ki'mì;

⁶ kò jè Isaí, jè komà na'èn-la xi David ki'mì xi xitàxá ítjòn tsibìjna; koa jè David, jè komà na'èn-la xi Salomón ki'mì; kò jè nea-la Salomón, jè xi komà chjón-la Urías nga sa ítjòn.

⁷ Jè Salomón, jè komà na'èn-la xi Roboam ki'mì; kò jè Roboam, jè komà na'èn-la xi Abías ki'mì; kò jè Abías, jè komà na'èn-la xi Asa ki'mì;

⁸ kò jè Asa, jè komà na'èn-la xi Josafat ki'mì; kò jè Josafat, jè komà na'èn-la xi Joram ki'mì; kò jè Joram, jè komà na'èn-la xi Uzías ki'mì;

⁹ kò jè Uzías, jè komà na'èn-la xi Jotam ki'mì; kò jè Jotam, jè komà na'èn-la xi Acaz ki'mì; kò jè Acaz, jè komà na'èn-la xi Ezequías ki'mì;

¹⁰ kò jè Ezequías, jè komà na'èn-la xi Manasés ki'mì; kò jè Manasés, jè komà na'èn-la xi Amón ki'mì; kò jè Amón, jè komà na'èn-la xi Josías ki'mì;

¹¹ kò jè Josías, jè komà na'èn-la xi Jeconías ki'mì, kò jñà xità 'ndse, k'e nga kiikò kjo'in xità Israel ján i'nde ñánda 'mì Babilonia.

¹² Xi komà iskan k'e nga jye kiikò kjo'in xità ján Babilonia, jè Jeconías, jè komà na'èn-la xi Salatiel ki'mì; kò jè Salatiel, jè komà na'èn-la xi Zorobabel ki'mì;

¹³ jè Zorobabel, jè komà na'èn-la xi Abiud ki'mì; kò jè Abiud, jè komà na'èn-la xi Eliaquim ki'mì; kò jè Eliaquim, jè komà na'èn-la xi Azor ki'mì;

¹⁴ kò jè Azor, jè komà na'èn-la xi Sadoc ki'mì; kò jè Sadoc, jè komà na'èn-la xi Aquim ki'mì; kò jè Aquim, jè komà na'èn-la xi Eliud ki'mì;

¹⁵ kò jè Eliud, jè komà na'èn-la xi Eleazar ki'mì; kò jè Eleazar, jè komà na'èn-la xi Matán ki'mì; kò jè Matán, jè komà na'èn-la xi Jacob ki'mì;

¹⁶ kò jè Jacob, jè komà na'èn-la José. Kò José, jè xi x'in-la komà María; kò jè María, nea-laá komà Jesús xi Cristo, [xità xi xó kisikasén-ne Nainá].

¹⁷ Ngats'ìi xità jchínga-la Jesús, teñijòn skò ma-ne xi inchrobàt'aà-ne ts'e Abraham skanda David. Kò jñà xità jchínga-la Jesús xi inchrobàt'aà-ne ts'e David skanda k'e nga kiikò kjo'in jñà xità Israel ján i'nde ñánda 'mì Babilonia, tìkoáá teñijòn skò ma-ne. Kò ngui teñijòn skò ma-ne skanda k'e kits'iìn xi Cristo, [xità xi xó kisikasén-ne Nainá].

*Kíi komà k'e nga kits'iìn Jesucristo
(Lucas 2:1-7)*

¹⁸ K'e nga kits'iìn Jesucristo kiís'ín komà: María xi nea-la Jesús kò José jñà títsajna'ñó-la xíkjín nga kixan. K'e nga tìkj'e è bíttsajnakò xíkjín, María ki'ya-la nga ki'ndí 'ya xi ít'aà ts'e nga'ñó-la Inìma Tsjeè-la Nainá.

¹⁹ José, xi x'in-la komà, nga xita kixi-né, majin-la nga kjosobà tsjá-la jè María, kisikísjeèn nga tà sùikíjna-ne chjoón jè, kò mì yá xita kji'nchré.

²⁰ K'e nga k'oas'in tísikísjeèn jñà kjoa koi, jngoò àkjale-la Nainá tsohóko inga nijñá. Kitsò-la:

—José, xi ya nchrobàt'aà-ne tje-la David, kì tsakjoòn-jèn nga bijnakoi María xi chjoón-lè koma, jè ki'ndí xi 'ya, nga'ño ts'e Inima Tsjeè-la Nainá-né.

²¹ S'eé jngoò-la ki'ndí x'in, kò 'in-la Jesús k'oín. Koi k'oas'in k'oín-ne nga jè kochrjetji naxandá-la xi kjoa ts'e jé-la.

²² Ngats'ii kjoa koi, k'oaá s'in tsitasòn koni s'in kitsò Nainá xi it'aà ts'e xita xi kùchja ngajo-la Nainá kjòtseé nga kitsò:

²³ Jngoò chjoón xongó, ki'ndí k'oa kò k'oeé jngoò ki'ndí x'in xi Emanuel k'oín 'in-la.

Jè 'in xi Emanuel tsò, Nainá tíjnako-ná tsòyaá-ne.

²⁴ K'e nga jaá-la José, k'oaá s'in kis'in koni s'in kitsò-la àkjale-la Nainá, kiskoétjò María kò chixàn-kò.

²⁵ Tanga mìkii tsoyijòkò xíkjin skanda k'e-né nga kits'in ki'ndítjòn-la María. Kò k'oaá s'in tsibít'aà 'in-la nga Jesús ki'mì.

2

Kiis'in komà nga ijchò katsejèn-la Jesús jñà xita xi 'ño tjín-la kjoachjine

¹ Jesús kits'in ya naxandá xi 'mì Belén, nangui xi chja-ne Judea, k'e nga xitaxá ítjòn tíjna xi 'mì Herodes ya i'nde jè. Ijchò ján Jerusalén, xi naxandá sko-la Judea, xita xi 'ño tjín-la kjoachjine, xi inchrobà-ne ñánda bitjokàtji-ne ts'oi

² nga kjònangui. Kitsò:

—¿Ñánda tíjna xitaxá ítjòn-la ts'e xita judío xi jye kits'in? Ki'yaá jngoò-jen ni'ño ján ñánda bitjokàtji-ne ts'oi xi tsakó nga jye kits'in. Kò ngajen koi xá kjoì-najen nga jchaxkón-jen.

³ K'e nga ki'nchré Herodes xi xitaxá ítjòn tíjna, tà kitsakjòn-né kò ngats'ii xita naxandá Jerusalén.

⁴ Jè xitaxá ítjòn xi 'mì Herodes, kùchja-la ngats'ii xita sko-la nò'mì kò xita xi okóya kjotíxoma-la Nainá xi kiskii Moisés; kiskònangui-la ñánda jts'in xi Cristo, [jè xita xi xó sùikasén-ne Nainá].

⁵ Jñà xita koi kitsò-la:

—Yaá Belén, naxandá xi chja-ne Judea. K'oaá s'in tíchja xojoon xi kiskii jñà xita xi kùchja ngajo-la Nainá nga kitsò:

⁶ Jñò xi xita Belén 'mì-nò, xi nangui Judá nokjoà-nò, ngàsòn chji-la naxandá-nò koni jñà naxandá ítjòn-la nangui Judá, nga yaá kitjojin jngoò xitaxá ítjòn xi sùikinda naxandá-na Israel.

⁷ Jè xitaxá ítjòn xi 'mì Herodes, kùchja'ma-la jñà xita xi 'ño tjín-la kjochjine nga kiskònangui-la mé naxrjein-ne nga kijtseé ni'ño.

⁸ K'eé kisikasén ján Belén; kitsò-la:

—Tanguió ján, koa ndaà chjinanguio xi it'aà ts'e ki'ndí jè. K'e nga sakò-nò, tiki'nchré-ná mé-ne tikoà kjián katsejèn-la nga skoexkoán koà jeya sùikíjna.

⁹ K'e nga jye kii'nchré xita xi 'ño tjín-la kjoachjine koni s'in kitsò Herodes, k'eé kii xita koi kò jè ni'ño xi kijtseé ñánda bitjokàtji-ne ts'oi k'oaá s'in kii ítjòn-la skanda ijchò ñánda tíjna ki'ndí jè, kò yaá tsasijna jè ni'ño.

¹⁰ Jñà xita xi 'ño tjín-la kjoachjine k'e nga kijtseé ni'ño jè, taxki tsjaá komà-la.

¹¹ K'e nga jahas'en ni'ya jñà xita koi, kijtseé ki'ndí kò nea-la María. K'eé chinchaxkó'nchit'aà-la jè ki'ndí kò kijtseèxkón; jeya kisikíjna. Ikjoàn kiskix'a kaxa-la kò kitsjaà-la ton oro, kò chrjongó-la Nainá kò xkii xi 'ño ndaà jne xi 'mì mirra.

¹² Nga komà iskan kits'iì-la nijñá x̄ita xi 'ñó t̄jín-la kjoachjine nga mì t̄i k'oaá s'ín ndiyá kjoì-ne ñánda t̄jna Herodes. Xìn ndiyá kùì-ne nangui-la.

K'e nga jñà x̄ita jchínga-la Jesús kiìko ján nangui Egipto

¹³ K'e nga jye kùì-ne jñà x̄ita xi 'ñó t̄jín-la kjoachjine, jngoò àkjale-la Nainá kisìnijñá-la José, kitsò-la:

—T̄isítj̄in; chjoí jè ki'ndí ko nea-la; t'in ján nangui Egipto; yaá t̄jni skanda k'e 'an koxán-lè. Nga jè Herodes xi x̄itaxá ít̄jòn t̄jna, kohótsji ki'ndí jè nga mejèn-la nga s̄iik'en.

¹⁴ K'ée tsasítjen José, k'e nga n̄itjen kiskoé jè ki'ndí ko nea-la nga kùì ján nangui Egipto.

¹⁵ Yaá tsibítsajna skanda k'e nga k'en Herodes. K'oaá s'ín tsitasòn koni s'ín kitsò Nainá xi it'aà ts'e x̄ita xi kiìchja ngajo-la Nainá nga kitsò: “Ya nangui Egipto kichjà-la ki'ndí-na.”

K'e nga kinìk'en ndí ixti x'in

¹⁶ K'e nga kijtsee jè Herodes nga jñà x̄ita xi 'ñó t̄jín-la kjoachjine kiskoònachan-la, tsí jti komà-la. Ikjoàn kitsjaà okixi nga s̄iik'en yije ndí ixti x'in xi jò nó t̄jín-la ko ngats'iì xi isa ki'ndí isa kóhokji ján naxandá Belén, ko ya naxandá indi-la koni s'ín jye kisijin-la mé nachrjein-ne nga kijtsee ni'ño jñà x̄ita xi 'ñó t̄jín-la kjoachjine.

¹⁷ K'oaá s'ín tsitasòn 'én xi kitsò Jeremías, x̄ita xi kiìchja ngajo-la Nainá, nga kitsò:

¹⁸ Ya i'nde Ramá kina'ya jngoò-la x̄ita xi t̄isíkájno ko 'ñó t̄ikjindáya ko t̄itsiné; jè chjoón Raquel xi t̄ikjindáyakeè ndí ixti-la, nga mìkùì majehikon inima-la nga jye k'en ixti-la.

¹⁹ K'e nga jye k'en Herodes, xi x̄itaxá ít̄jòn t̄jna, jngoò àkjale-la Nainá kisìnijñá-la José ján Egipto. Kitsò-la:

²⁰ —T̄isítj̄in, chjoí ki'ndí jè ko nea-la. T'in i'ngoò k'a-ne nangui Israel. Jyeé k'en jñà x̄ita xi t̄jín-ne nga mejèn-la s̄iik'en ki'ndí jè.

²¹ K'ée tsasítjen José, kiìko-ne ki'ndí jè ko nea-la ya nangui Israel.

²² Tanga k'e nga kiì'nchré José nga jè tíhotixoma jè xi 'mì Arquelao ya nangui Judea, nga jè t̄jna ngajo-la na'èn-la Herodes, José kitsakjòn-né; mì k'oaá s'ín kiì. Ján kiì i'nde ñánda 'mì Galilea nga k'oaá s'ín kis'enojmíya-la inga nijñá.

²³ K'e nga ijchò i'nde jè, yaá tsibítsajna ya naxandá xi 'mì Nazaret. K'oaá s'ín komà mé-ne nga tsitasòn koni s'ín kitsò jñà x̄ita xi kiìchja ngajo-la Nainá, nga jè Jesús x̄ita Nazaret k'oin.

3

*'Én xi kiìchja Juan xi kis'iìn bautizar x̄ita
(Marcos 1:1-8; Lucas 3:1-9, 15-17; Juan 1:19-28)*

¹ Jñà nachrjein koi j'iì Juan xi kis'iìn bautizar x̄ita ya i'nde it'aà xìn ñánda nangui kixi choòn, nangui xi chja-ne Judea, nga kisika'bí 'én-la Nainá,

² kitsò:

—T̄ikájno jé-nò, kì t̄i jé binchaàtsji-nò nga jyeé kjòchrañàt'aà-nò nachrjein nga jchaa kó s'ín otíxoma jè xi ngajmùì nchrobá-ne.

³ Jè Isaías, x̄ita xi kiìchja ngajo-la Nainá, k'oaá s'ín kiskùì xojon-la xi it'aà ts'e Juan nga kitsò:

Na'ya-la jta-la jngoò x̄ita xi 'ñó chja ya i'nde it'aà xìn ñánda nangui kixi choòn, nga tsò:

“Tjandaà ndiyá-la Nainá ya ijìin inima-nò; kixi t̄ikjina koni jngoò ndiyá ñánda kojmeèya Na'èn-ná.”

⁴ Nikje xi tsohòkjá Juan, tsja-la cho camello-né; ko jngoò sincho chrjoa tsibíkjá ndáyá-la. Ko jñà tsojmì xi kiskine, cho langosta-né ko tsjén-la cho cera xi t̄jín ijìin ijñá.

⁵ Ijchò 'nchré-la x̄ita xi inchrobà-ne Jerusalén, k̄o nga kijndà nangui Judea k̄o ngats'iì naxandá xi ya chrañàt'aà-la xajngá nandá Jordán.

⁶ K'e nga jye tsafátakòn jé-la jñà x̄ita, Juan, ikjoàn kis'iìn bautizar ya xajngá nandá Jordán.

⁷ K'e nga kijtsee Juan nga k̄jìn x̄ita fariseo k̄o x̄ita saduceo j'iì nga koma bautizar, kitsò-la:

—jñò, k'oaá s'ín ngaya-nò koni tsà tje-la ye! ¿Yá xi okitsò-nò nga k̄inchat'aàxìn-là jè k̄jò'in xi nchrobá machrañàt'aà-nò?

⁸ Ndaà t̄jìn kjoa xi t'een nga ndaà kàta'ya-nò nga jyeé kinikájno jé-nò nga mì t̄j jé binchaàtsji-nò.

⁹ Kì k'oaá s'ín nìkítsjeèn j̄jìn inima-nò nga bixón: “Ngajen, [mìkì s'e-najen k̄jò'in nga] yaá inchrobàt'aà-najen tje-la Abraham.” K'oaá xan-nò, Nainá, skanda jñà ndajò koma-la s̄iikjaj̄iya-la nga ixti-la Abraham koma.

¹⁰ Jè k̄ichayá jyeé k̄jijnandaà nga kotesòn yá; ngats'iì yá xi 'mì ndaà toò ojà-la, skanda k̄o ima-la, jt̄sòn-né, ikjoàn s̄inchájiìn ni'ín nga k̄it̄j.

¹¹ Xi okixi, 'an koó nandá s'iìn-nò bautizar, mé-ne nga s̄ikájnoò jé-nò k̄o mì t̄j jé k̄inchátsji-nò. Tanga jè xi nchrobát̄jngui-na s'iìn-nò bautizar k̄o Inima Tsjeè-la Nainá koa k̄o ni'ín. Ìsaá t̄jìn-la nga'ño mì k'oaá-ne 'an. Skanda mìkì t̄j'nde-na nga 'an k̄jikoaa xojté-la.

¹² Jyeé k̄jinaya tsja jè pala nga s̄iitsjeè t̄jé-la trigo. K̄inchàxkó trigo ya iya ni'nga; k̄o jè t̄jé paja k̄inchàjiìn ni'ín ñánda nga mìkì bits'o n̄it̄j mé nàchrjein-ne.

K'oaá s'ín komà nga komà bautizar Jesús

(Marcos 1:9-11; Lucas 3:21-22)

¹³ Jesús j'iì-ne Galilea ya xajngá nandá Jordán nga mejèn-la nga jè Juan s'iìn bautizar Jesús.

¹⁴ Tanga jè Juan k'e nga sa ítjòn mìkì kòkjeiín-la, kitsò-la Jesús:

—'Aán xi mochjeén-na nga j̄jì s'een-ná bautizar, tanga ngaji, t̄j saá 'an f'iichòn-ná.

¹⁵ K'eé kitsò Jesús:

—Tjì-lè k̄jondaà, t'een-ná bautizar mé-ne nga k'oaá s'ín s̄ikitasoán k̄jot̄ixoma-la Nainá. K'eé kòkjeiín-la Juan.

¹⁶ K'e nga jye komà bautizar Jesús, k'e nga jye itjojiìn-ne nandá, ikjoàn kitáx'a-la ngajmì, k̄o jè Jesús kijtsee Inima Tsjeè-la Nainá xi inchrobàjen-ne ngajmì, koni k̄jì n̄ise paloma k̄jì; yaá kiskaàsòn-la Jesús.

¹⁷ K'eé kina'yà jngoò-la 'én xi ngajmì inchrobà-ne xi kitsò:

—Jè jèè xi k̄i'ndí-na xan-la xi 'ño matsjake; tsja t̄jìn-la takoàn it'aà ts'e.

4

K'e nga jè x̄ita neí kiskoòt'aà Jesús

(Marcos 1:12-13; Lucas 4:1-13)

¹ Jè Inima Tsjeè-la Nainá k̄iik̄o Jesús jngoò i'nde it'aà xìn nga jè x̄ita neí skót'aà nga mejèn-la nga kàtátsji jé.

² Ichán nàchrjein k̄o ichán n̄it̄jen tsibijnachjan Jesús k̄o k'e nga koma iskan jye k̄jòhojò-la.

³ Jè x̄ita neí xi ma-la konachan ijchò kasit'aà chrañà-la ñánda t̄jna Jesús, kitsò-la:

—Tsà kixi kjoa nga ngaji xi K'i'ndí-la Nainá 'mì-lè, tjì-la okixi jñà ndajò koi nga inchrajín kàtama.

⁴ Tanga Jesús kitsò-la:

—Tjìt'aà Xojon-la Nainá, nga tsò: “Mìtsà tà koi tsojmì xi ma chine k̄itsakon-ne x̄ita, t̄ikoáá k̄itsakon-ne nga yije 'én xi ch̄ja Nainá.”

⁵ Jè xità neí kiiko Jesús ya Naxandá-la Nainá xi xó kitjaàjìn-ne [ñánda 'mì Jerusalén]; kisikíjnasòn ingo ítjòn ñánda isa 'nga kji.

⁶ Kitsò-la:

—Tsà kixíi kjoa nga jì xi Ki'ndí-la Nainá 'mì-lè, tìkatjengui yijo-lè, nga k'oaá s'ín tít'aà Xojon-la Nainá nga tsò:

Nainá koií xá-la àkjale-la it'aà tsiji,
nga kò tsja tsoḅa'ñó-lè,

mé-ne nga nijngoò ndajo satíngui-ne ndsokoi.

⁷ Jesús kitsò-la:

—Tìkooá tít'aà Xojon-la Nainá, nga tsò: “Kì k'oaá s'ín chít'ì Nà'èn-ná xi Nainá.”

⁸ Ìjngoò k'a jè xità neí kiiko Jesús isòn nindoò xi 'ñó 'nga kji, koa tsakó yije-la ngats'ì naxandá xi tjin isò'nde kò kjoajeya-la jña naxandá.

⁹ Kitsò-la:

—Nga jíi tsjaà yije-lè naxandá koi, tsà kosixkó'nchit'aà-ná kò jeya sikíjna-ná.

¹⁰ K'eé kitsò Jesús:

—Tixín xità neí, tsit'aàxin-ná. Nga k'oaá s'ín tít'aà Xojon-la Nainá nga tsò: “Jeya tìkíjni Nà'èn-ná xi Nainá 'mì-la; tà jè tajngoò tìkitasòn-la.”

¹¹ K'eé kii jè xità neí, tsasit'aàxin-la Jesús. Ikjoàn ijchò àkjale-la Nainá xi kisis'in-la Jesús.

Kii komà nga kii síxájin-la xità Galilea Jesús

(Marcos 1:14-15; Lucas 4:14-15)

¹² K'e nga kii'nchré Jesús nga jè Juan xi kis'ìin bautizar xità ndayá tíjna'ya, kii òjngoò k'a-ne ya i'nde-la ñánda 'mì Galilea.

¹³ Tanga mì ya tsibìjna ñánda 'mì Nazaret; ján kii kíjna ñánda 'mì Capernaum, jngoò naxandá xi kijnandi ndáchikon ya i'nde xi chja-ne Zabulón kò Neftalí.

¹⁴ K'oaá s'ín komà mé-ne nga tsitasòn-ne 'én xi kiskii Isaías xità xi kiichja ngajo-la Nainá nga kitsò:

¹⁵ Jè nangui xi ts'e Zabulón kò jè nangui xi ts'e Neftalí,

ya ndiyá xi fi indii ndáchikon,

ján xijngoàà xajngá nandá Jordán ya nangui Galilea,

ñánda tjin xi mìtsà xità judío.

¹⁶ Jña xità naxandá koi xi tjjñò kjohítsjeèn-la,

kijtseè jngoò ni'ín xi 'ñó tse kji,

koa jña xità xi ya tjimaya ndiyá-la kjoabiyaà,

kjohiseèn kjohítsjeèn-la.

¹⁷ K'eé tsibíts'ia Jesús nga kiichjaya 'én ndaà-la Nainá. Kitsò:

—Tìkájno jé-nò, kì tì jé binchaàtsji-nò nga jyeé kjòchrañàt'aà-nò nàchrjein nga jchaa kós'ín otixoma jè xi ngajmii nchrobá-ne.

Kii kis'ùin Jesús nga ñijòn xità kiichja-la xi ma-la sík'en tìn

(Marcos 1:16-20; Lucas 5:1-11)

¹⁸ K'e nga tífa Jesús ya indii ndáchikon ts'e Galilea, kijtseè jò xità xi 'ndse ma, jngoò xi 'mì Simón kò tije-ne xi 'mì Pedro, kò xi òjngoò, jè xi 'mì Andrés. Jña xità koi xi sík'en tìn. K'e nga nchisíkatjen-jjìn-ndá na'ya-la,

¹⁹ Jesús kitsò-la:

—Nchrohótjngui-ná, 'aán tsjaà-nò xá nga kíxkóya xità xi 'an kjit'aà-na koni s'ín maxkóya tìn.

²⁰ Jña xità koi nitoón kisikájna na'ya-la nga kiitjngui-la Jesús.

²¹ Isa xijngoàà isa Jesús kijtseè nguì jò xità xi tìkoo 'ndse ma-ne; jngoò xi 'mì Jacobo, kò xi òjngoò, Juan 'mì; ixti-la Zebedeo. Yaá títsaya chitso kò na'èn-la. Nchibíndaàya jña na'ya-la. Jesús kiichja-la nga jña kojmeiiko.

22 X̄ita koi n̄itoón kisikájna chitso-la k̄o na'èn-la nga kiitt̄jngui-la Jesús.

Kií kis'ìn Jesús nga k̄jìn x̄ita tsakóya-la
(Lucas 6:17-19)

23 Jesús tsajmeè kóhok̄ji nangui Galilea, tsakóya 'én-la Nainá ya ni'ya ingo sinagoga nga íngó íngó naxandá. Kiichjaya 'én ndaà-la Nainá koni s'ín otíxoma Nainá; t̄ikoá kisindaà-ne ngats'ì ch'in xi t̄jìn-la x̄ita nga x̄k̄i xi ján ijòjno ijòt'aà yijo-la.

24 Kina'ya-la Jesús kóhok̄ji ya i'nde ñánda 'mì Siria, koa j'ìk̄o-la x̄ita xk'én xi k̄jìn skaya ch'in t̄jìn-la, j̄ña xi ijòjno ijòt'aà yijo-la k̄o x̄ita xi ch'in neíí t̄jìn inima-la, k̄o t̄jìn xi ch'in biyaàxín t̄jìn-la, k̄o x̄ita xi mì k̄i ndaà ma síhiníyá yijo-la. Jesús kisindaà-ne ngats'ì x̄ita koi.

25 K̄jìn x̄ita xi ya i'nde-la Galilea kiitt̄jngui-la, k̄o j̄ña x̄ita naxandá xi te ma-ne (xi 'mì Decápolis), k̄o j̄ña x̄ita naxandá Jerusalén k̄o naxandá xi i'nga xi ya chja-ne nangui Judea, k̄o xi chja-ne xijngoaà xajngá nandá Jordán.

5

Kií kitsò Jesús nga kiichjaya ya isò'nga nindoò

1 Jesús, k'e nga kiijtsee ngats'ì x̄ita xi k̄jìn ma-ne, kiimijìn-jno ya isò'nga nindoò koa yaá tsibijna. J̄ña x̄ita xi kota'yát'aà-la ijchò kinchat'aà-la.

2 Jesús k'eé tsakóya-la kitsò-la:

Kjondaà xi sakó-la j̄ña x̄ita k'e nga mé kjoa títsajjìn
(Lucas 6:20-23)

3 —Mé tà ndaà-la j̄ña x̄ita xi machiya-la nga mochjeén-la kjondaà-la Nainá; x̄ita koi, jyeé ts'e ngats'ì kjondaà xi t̄jìn ya ñánda tíhotíxoma jè xi ngajmii nchrobá-ne.

4 'Mé tà ndaà-la j̄ña x̄ita xi kjindáya; Nainá s̄ijetakòn-né.

5 'Mé tà ndaà-la j̄ña x̄ita xi indaàjìn t̄jìn inima-la; j̄ña tjoé-la nangui xi Nainá jye k'oas'ín kitsò nga j̄ña tsjá kjotjò-la.

6 'Mé tà ndaà-la j̄ña x̄ita xi 'nó mejèn-la nga k̄itasòn xi kjoa kixi xi Nainá síjé; Nainá kos̄iko nga k̄itasòn kjoa koi.

7 'Mé tà ndaà-la j̄ña x̄ita xi mahimakeè x̄ita xi kj'eí; Nainá kohimakeè ngajo-ne j̄ña x̄ita koi.

8 'Mé tà ndaà-la j̄ña x̄ita xi tsjeè t̄jìn inima-la; j̄ña x̄ita koi, j̄ña-né xi skoexkon Nainá.

9 'Mé tà ndaà-la j̄ña x̄ita xi síkijna'nchán kjoa; Nainá ki'ndí-laá kitsò-la.

10 'Mé tà ndaà-la j̄ña x̄ita xi kjo'in t̄jìn-la nga fit̄jngui kondra-la x̄ita, koi kjoa-la nga ndaà síkitasòn xi kjoakixi. X̄ita koi, jyeé ts'e ngats'ì kjondaà xi t̄jìn ya ñánda tíhotíxoma jè xi ngajmii nchrobá-ne.

11 'Mé tà ndaà-nò k'e nga j̄ña x̄ita ch'o kitsò-nò nga kotít'aà-nò k̄o k'e nga ch'o s̄ik̄o-nò, k̄o k'e nga 'én ndiso tsjât'in-nò xi kjoa ts'an.

12 Tsja t'è-là inima-nò, koa tsja t'è-là takòn. J̄nò, tseé kjondaà tjoé-nò ján ngajmii. Mìtsà tà j̄nò xi ot̄inikò-nò. K'oaá t̄is'ín kinikò j̄ña x̄ita xi kiichja ngajo-la Nainá xi chinchima ítjòn-nò.

Kiis'ín kochjeén naxa k̄o ni'ín xi t̄jìn isò'nde
(Marcos 9:50; Lucas 14:34-35)

13 'J̄nò, k'oaá s'ín ngaya-nò koni tsà naxa xi mochjeén-la x̄ita isò'nde. Tanga tsà jè naxa mì t̄i kiì s̄ijnchra-ne tsojmì, ¿kó t̄is'ín kochjeén-ne? Mì t̄i mé chjì-la; xíxteèn-ne k̄o yaá kinchanè x̄ita.

14 'J̄nò, k'oaá s'ín ngaya-nò koni tsà ni'ín xi mochjeén-la x̄ita isò'nde. Tsà jngoò naxandá xi isò'nga nindoò kijna, mikìl koma k̄jina'ma.

15 K'e nga jngoò ni'ín sit'a'í, mìtsà ya sijnangui kaxa. Yaá sijna ñánda 'nga choòn, mé-ne nga kohiseèn yije-la x̄ita xi títsajnaya ni'ya.

16 Koni ni'ín xi síhiseèn-la x̄ita, k'oaá s'ín ndaà t̄jchá yijo-nò nguixk̄on x̄ita xi kj'eí, mé-ne j̄nà x̄ita koi, jeya s̄ik̄jna Na'èn-nò xi Nainá xi t̄jna ngajm̄i k'e nga skoe-nò nga ndaà t̄tsa'nè.

Kiis'ín tsakóya Jesús it'aà ts'e kjot̄xoma-la Nainá xi kisk̄i Moisés

17 J̄nò, k̄i k'oaá s'ín n̄ik̄tsjeèn: m̄tsà koi xá j'i-na 'an nga kochrjekànguia jè kjot̄xoma-la Nainá xi kisk̄i Moisés k̄o jè xi tsakóya x̄ita xi kiich̄ja ngajo-la Nainá. Tà saá j'i s̄jngò-ná 'én xi t̄jít'aà kjot̄xoma.

18 Okix̄í xi xan-nò, koni t̄jín n̄achrjein k̄jna-isa isò'nde k̄o ngajm̄i, n̄imé xi t̄jác̄in-la jè kjot̄xoma, n̄jngò punto k̄o n̄jngò letra t̄jác̄in-la, skanda kóni nga k̄jngò yije k̄joa xi t̄jít'aà kjot̄xoma.

19 Jè x̄ita xi m̄ik̄i síkitasòn koni s'ín t̄ich̄ja kjot̄xoma, nas'ín 'nó chiba t̄ich̄ja, k̄o k'oaá s'ín okóya-la x̄ita, k'oaá t̄is'ín 'nó chiba jch̄a-la ya j̄j̄in naxandá xi jè ot̄xoma-la xi ngajm̄i nchrobá-ne. K̄o jè x̄ita xi síkitasòn kjot̄xoma-la Nainá k̄o k'oas'ín okóya-la x̄ita xi kj'eí, jè x̄ita jè, jè xi 'nó 'nga k̄jna ya j̄j̄in naxandá xi jè ot̄xoma-la xi ngajm̄i nchrobá-ne.

20 Okix̄í xi xan-nò, tsà m̄ik̄i isa ndaà s̄ik̄itasòn k̄joakix̄i koni j̄nà x̄ita fariseo k̄o x̄ita xi okóya kjot̄xoma-la Nainá xi kisk̄i Moisés, m̄ik̄i k̄it̄jás'en-j̄nò n̄anda tíhot̄xoma jè xi ngajm̄i nchrobá-ne.

Kiis'ín t̄jín it'aà ts'e k̄joajti

(Lucas 12:57-59)

21 J̄nò jye kina'yà koni s'ín ki'mi-la j̄nà x̄ita jch̄inga-nò: “K̄i x̄ita n̄ik'eèn; n̄ita yá-ne xi x̄ita s̄ik'en, k̄jo'in s'e-la.”

22 Tanga 'an k'oaá xan-nò, tsà jngò x̄ita xi k̄ojtikeè 'ndse, s'eé-la k̄jo'in. Jè xi ch'o k̄itso-la 'ndse, x̄itaxá tsjá-la k̄jo'in. K̄o jè xi 'ndse k̄itso-la: “Ngaji n̄imé ch̄j-lè”, ok'in-la nga ján k̄jo j̄j̄in ni'ín ts'e i'nde k̄jo'in.

23 Tsà k'e nga k̄ikoji tsojm̄i k̄jot̄jò-lè nga Nainá k'o'i-la ya i'nde tsjeè-la, koa ya k̄ojtsjeèn-lè nga jè 'nds̄i t̄jín-la kondra ts̄ji,

24 t̄ik̄tsajnei tsojm̄i k̄jot̄jò-lè ya i'nde tsjeè, ik̄joàn tik̄tsi'ba-la 'nds̄i koa k'eé koma s̄ik̄tsajnei tsojm̄i-lè.

25 Tsà t̄jín x̄ita xi k̄ohòngui-lè nga k̄jiko-lè ni'ya osen, k'e nga t̄jaàya ndiyá, n̄itoón jch̄ibàndaà-nò, mé-ne nga m̄i ya k̄jiko-lè nguixk̄on x̄itaxá, k̄o jè x̄itaxá m̄i ya tsjá-la kinda j̄nà policia nga m̄i ndayá k̄jiko-lè.

26 Okix̄í xi xan-lè, m̄i t̄i k̄i koma k̄it̄joo-ne ndayá skanda k'e nga k̄ich̄jít̄j̄i yijo-lè nga yije xi s̄ijé-lè x̄itaxá.

Kiis'ín t̄jín ts'e k̄joa ch̄jngui

27 J̄nò, jye kina'yà koni s'ín ki'mi-nò k̄jot̄seé: “K̄i k̄joa ch̄jngui 'nè.”

28 Tanga 'an k'oaá xan-nò, n̄ita yá-ne xi kotsejèn-jno jngò ch̄joón nga fahaj̄in-la, jye k̄joa ch̄jngui t̄is'ín koni t̄tsò in̄ima-la.

29 Tsà j̄nà x̄koòn kix̄i óts̄ji jé-nò, t̄inachrjeè; k̄j̄in t̄ikatsjoò. Isáá ndaà-ne tsà ch̄ja jngò x̄koòn m̄i k'oaá-ne tsà ya k̄ixoj̄in yije yijo-nò ya j̄j̄in ni'ín ya i'nde k̄jo'in.

30 Tsà j̄nà ndseji kix̄i óts̄ji jé-nò, t̄ichát̄jòn; k̄j̄in t̄ikatsjoò. Isáá ndaà-ne tsà ch̄ja jngò ndseji m̄i k'oaá-ne tsà ján k̄jo yijo-nò j̄j̄in ni'ín ya i'nde k̄jo'in.

Kiis'ín t̄jín kjot̄xoma it'aà ts'e x̄ita xi tsjeīn x̄ik̄j̄n

(Mateo 19:9; Marcos 10:11-12; Lucas 16:18)

31 K'oaá t̄is'ín kis'enojm̄i k̄jot̄seé, n̄ita yá x̄ita-ne xi mejèn-la ts̄jín ch̄joón-la, ít̄jòn t̄jámil'nga xojon xi tsjeīn-ne x̄ik̄j̄n x̄ita.

32 Tanga 'an k'oaá xan-nò: tsà jngò x̄ita x'in xi ts̄jín ch̄joón-la, tsà m̄tsà k̄joa ch̄jngui t̄is'ín jè ch̄joón, jè x'in-la t̄ibít'in-la nga k̄joa ch̄jngui k̄atas'ín ch̄joón. Jè ch̄joón, k'e nga k̄ixan i'ngò k'a-ne, jè x'in xi k̄ixan-k̄o, t̄ikoaá jye k̄joa ch̄jngui t̄is'ín.

Kiis'ín tjin it'aà ts'e 'én xi nokjoá nga Nainá tibeè

³³ Tikoáá jye kina'yà koni s'ín ki'mì-là jñà xitá jchínga-ná: “K'e nga bixón: tibeè Nainá, kì chonachan-jèn, tikitason 'én-nò.”

³⁴ Tanga 'an k'oaá xan-nò: K'e nga 'bioò 'én-nò, jngoò k'aá kì yá xi níkjna ítjòn. Kì k'oas'ín bixón: “Tibeè ngajmii.” Nga jè ngajmii, jè íxile kjotíxoma-là Nainá.

³⁵ Tikoáá kì bixón-jèn: “Tibeè isò'nde”, nga jè nangui, yaá nchason ndsoko Nainá. Tikoáá kì bixón-jèn: “Tibeè naxandá Jerusalén”, nga jè naxandá jè, ts'eé Xitaxá Ítjòn xi Nainá.

³⁶ Tikoáá kì skoò níkjna ítjòn k'e nga mé 'én xi 'bioò. Nga mìkii koma-nò nga sijmà o sichroba jngoò tsja skoò.

³⁷ Tà k'oaá s'ín tinókjoaa “jon”, o xi “majìn”. Jñà 'én xi kjisòn, yaá nchrobá-ne it'aà ts'e xitá neií.

Kiis'ín tikoo jñà xitá xi ch'o síko-nò

(Lucas 6:29-30)

³⁸ Jye kina'yà koni s'ín ki'mì-nò kjõtseé: “Tsà yá xi kochrje jngoò xkoiin, tinachrjeè ngajo-ne ts'e. Kò tsà yá xi skoetoòn-lè nga skónájen jngoò ni'ñoi, chjínájen ngajo-ne ts'e.”

³⁹ Tanga 'an, k'oaá xan-nò: Tikjeiin-là xitá ts'en. Tsà jngoò xitá xi sijnst'ín-t'aà kjioòn kixi, tikoáá tji-là xi ngobà nga kàt'eé-là.

⁴⁰ Tsà jngoò xitá kohòngui-nò nga mejèn-là skoé nachro-nò, tikoá tji-là nachrokisòn-nò nga kàtakjoé.

⁴¹ Tsà jngoò xitá xi kjò'ño s'ín-nò nga sijkajen jngoò hora-nò ch'á-là nga onguíko-là, jò hora isa kjün tanguíko-là.

⁴² Tsà yá xitá xi síjè-nò tsojmì, tji-là; kò tsà jngoò xitá xi mejèn-là skiñat'aà-nò tsojmì, kì 'mì-là: mìkii koma.

Kó s'ín síkoo jñà xitá xi majtikeè-nò

(Lucas 6:27-28, 32-36)

⁴³ Tikoáá jye kina'yà koni ki'mì-nò kjõtseé: “Titsjacha xitá xinguiòo kò tijticha kondra-nò.”

⁴⁴ Tanga 'an k'oaá xan-nò: Titsjacha jñà xi kondra-nò, tichikon-t'ioòn jñà xi chja'on-kò-nò, ndaà tikoo jñà xi jtikeè-nò, tits'batjiò jñà xi ch'o tsò-nò kò jñà xi ch'o síko-nò.

⁴⁵ Tsà k'oas'ín s'eén, ki'ndí-là Nainá xi tíjna ngajmii koma; Nainá síhiseèn-là ndobá-là ts'oi xitá xi ndaà kò xi mì kì ndaà; tikoáá Nainá sík'a-là jtsí jñà xitá kixi kò xi mìtsà xitá kixi.

⁴⁶ Jñò, tsà tà jñà matsjacha xitá xi matsjakeè-nò, ni mé kjondaà xi s'e-nò; nga k'oaá tis'ín jñà xitá xi síkíhjtji tsojmì ts'e Roma.

⁴⁷ Tsà tà jñà xitá xinguiòo xi 'ndsè chiba sixat'aà, ¿a k'oaá ma-nò nga 'ño ndaà titsa'nè?; nga tikoáá jñà xitá xi mìkii beèxkon Nainá, k'oaá tis'ín.

⁴⁸ Jñò, nguì kjoakixií t'een, koni jè Na'èn-ná xi tíjna ngajmii nga nguì kjoakixií s'ín.

6

Kiis'ín t'een k'e nga k'oi-là kjondaà xitá

¹ K'e nga ndaà tjin kjoa xi 'nè, tikindako-nò yijo-nò; kì tà k'eé k'oa 'nè k'e nga nguixkon xitá, tsà tà jè xi mejèn-nò nga skoe-nò xitá xi kj'eí. Tsà k'oas'ín s'een, Na'èn-ná xi tíjna ngajmii mìkii sijchikon-t'in-nò.

² K'e nga jngoò kjondaà k'oi-là xitá ima, kì kii bènojmi-là ngats'ii xitá xi kj'eí, koni s'ín xitá xi jò isén tjin-là ya ni'ya ingo sinagoga kò ya ndiyá nga tsjá kjotjò-là tsojmì xitá; tà jé xi mejèn-là nga skoe yije xitá. Tanga okixií xi xan-nò, jñà xitá xi k'oas'ín s'ín, jyeé tjin-là chji-là [nga nguixkon xitá. Mì tì mé sijchikon-t'in-ne Nainá.]

³ K'e nga tsà tsojmì k'oi kjotjò-là xita ima, mochjeén-né nga mì yá xita xi skoe; ni jè skoe xi ñó amigo chibá.

⁴ Tjà'ma-là jè kjondaà-nò; k'e nga jè Na'èn-ná skoe jè xi kjoa'ma, jè tsjá-nò chjí-nò.

*Kiís'ín t'een k'e nga bitsi'ba-lá Nainá
(Lucas 11:2-4)*

⁵ K'e nga bitsi'ba, kì k'oaá 'nè koni s'ín xita xi jò isén tjín-la. Jña xita koi, k'e nga bitsi'ba-la Nainá, tsjakeè-né nga bincha kixi ya ni'ya ingo sinagoga ko ya chrjangui-la nditsin ñánda kjin xita kotsejèn-la nga Nainá bitsi'ba-la. Xi okixi k'oaá xan-nò, jña xita koi, jyeé tjín-la chjí-la [nga nguixkon xita. Mì ti mé sïchikon-t'in-ne Nainá.]

⁶ Tanga k'e nga mejèn-lè nga kítsi'ba-la Na'èn-ná, tijás'iin ni'ya-lè, tichjoì xotjoa-la ni'ya-lè, ikjoàn tijé-la kjondaà-la Na'èn-ná xi ya tajngoò tjina'mako-lè. Jè Na'èn-ná tsjá-lè chjí-lè nga jè tíbeè xi kjoa'ma.

⁷ K'e nga bitsi'ba, kì taxki kjin 'én nokjoà, koni s'ín xita xi mìkii beèxkon Nainá. K'oaá s'ín síkítsejèn nga kjin 'én kichja-la Nainá, isaá ndaà kji'nchré-la.

⁸ Kì k'oaá 'nè koni s'ín jña xita koi; jè Na'èn-ná jye tíjin-la mé xi mochjeén-nò k'e nga tikj'eè nìjèt'aà-là.

⁹ K'e nga bitsi'ba, kiís'ín tinókjoaa:

Na'èn-najen xi tijni ngajmii,
kátayaxkón-la kjoajeya-lè nga tsjeè tijni.

¹⁰ Kátjanchrobá kjotixoma-lè,
k'oas'ín kátama i it'aà nangui koni s'ín mejèn-lè nga koma,
koni s'ín ma ján ngajmii.

¹¹ Tjii-nájen i'nde jè niño xi mochjeén-najen nga nachrjein inchijòn.

¹² Tijchàat'aà-nájen jé-najen koni s'ín nijchàat'aà-lajen jña xita xi ch'o síko-najen.

¹³ Kì kii biì'ndi yá xi mejèn-la nga kot'aà-najen nga kinchátsji jé-jen.

Tikinda-nájen xi it'aà ts'e xita nejí.

Nga tsjii kjotixoma, tsjii nga ñó ko tsjii kjoajeya nita kjé-ne. K'oas'ín kátama.

¹⁴ Tsà jño sijchàat'aà-là jé-la xita xi kjeií, tikoaá jè Na'èn-ná xi tjina ngajmii sijchàat'aà-nò jé-nò.

¹⁵ Tanga tsà jño mìkii sijchàat'aà-là jé-la xita, tikoaá Na'èn-ná mìkii sijchàat'aà-nò jé-nò.

Kiís'ín t'een k'e nga bitsajnachjan

¹⁶ K'e nga bitsajnachjan, kì k'oaá 'nè koni s'ín jña xita xi jò isén tjín-la nga síkijatjya isén-la, mé-ne nga skoe-ne xita nga ba tjín-la nga títsajnachjan. Xi okixi, k'oaá xan-nò, jña xita koi, jyeé kitjoé-la chjí-la [nga nguixkon xita. Mì ti mé sïchikon-t'in-ne Nainá.]

¹⁷ Tanga jño, k'e nga bitsajnachjan, kì k'oaá 'nè. Ta saá tanjnoò isén-nò ko tasí'a tsjaskòò,

¹⁸ mé-ne nga mìkii skoe-nò xita tsà titsajnachjan, ko jè Na'èn-ná xi tjina'mako-nò, ta jè xi tíbeè. Jè sïchikon-t'in-nò.

*Kjoa nchiná xi tjín ján ngajmii
(Lucas 12:33-34)*

¹⁹ Jño, kì tsojmì kjin binchatjò i isò'nde; bits'on-né ko makixo-né ko jña xita síchijé.

²⁰ Ta saá ján ngajmii tinchatjò tsojmì. Ján ngajmii mìkii bits'on ko mìkii makixo tsojmì; tikoaá tsjìn xita chijé.

²¹ Ya ñánda kinchatjò tsojmì-nò, tikoaá yaá síkítsejèn inima-nò.

*Kós'ín mochjeén xkoaán
(Lucas 11:34-36)*

²² Jña xkoaán, jè ma ni'ín xi síhiseèn-la yijo-ná. Koií kjoa-la k'e nga ndaà tsejèn-ná, iseèn choòn yije-la yijo-ná;

²³ tanga tsà mìkì ndaà tsejèn-la xkoiìn, tìkoaá kóhokji yijo-lè, tà jñò choòn-la. Nga tìjñò-la kjohítsjeèn-lè tìkoaá nguì tà jñò choòn-la yijo-lè.

Yá xi koma nei-la xita xi 'ñó matsjakeè ton
(Lucas 16:13)

²⁴ 'Nijngoò xita xi jò koma nei-la nga sìxá-la. Tsà jò koma nei-la, jngoò kojtikeyè koa jngoò kotsjakeè; jngoò ndaà kjit'aà-la koa ch'o sìkò xi jngoò. Jñò, tsà kjoa nchiná sùs'in-là, mìkì kos'in-la kjoa ts'e Nainá.

Kós'in sùkinda Nainá jñà xi ixti-la ma
(Lucas 12:22-31)

²⁵ 'K'oaá xan-nò, kì makájno-nò mé tsojmì xi chjinee, xi s'ioo, nga sijchá yijo-nò, kò mé nikje xi chikjá. ¿A mì 'ya-jèn k'e nga titsajnakoaán i isò'nde tjin-isa kjoa xi isa 'ñó chjí-la mì k'oa-ne koni tsojmì xi ma chine? Tìkoaá yijo-ná, tjin-isa kjoa xi isa 'ñó chjí-la mì k'oa-ne koni jè nikje xi chikjá.

²⁶ Chitsejèn-là nise xi tjíma ijìin isén; mì jnoó 'beé; mì nijin majchá-la koa mì ni'nga tjin-la ñánda bincháxkò nijin-la; tanga jè Na'èn-ná xi tjina ngajmii tsjá-la tsojmì xi kine; koa jñò, isáa chjí-nò mì k'oa-ne jñà nise.

²⁷ Jñò, nas'in takó 'ñó sùkájnoò, ni itsé koma sùkatonè-là naxhrjein-nò koni s'in tjindaà-la Nainá.

²⁸ ¿Mé-ne nùkájno-nò xi it'aà ts'e nikje xi chikjá? Chitsejèn-là naxó lirio xi majchá ijìin ijñá; mìkì sixá kò mìkì ma-la faña nikje.

²⁹ Tanga 'an, k'oaá xan-nò, ndaà tsà jè Salomón xi xitaxá ítjòn tsibijna nga 'ñó xita jeya, mì k'oaá kjoàn nikje xi tsohòkjá koni kjoàn jñà naxó nga ndaà kjoàn.

³⁰ Nainá, k'oaá s'in ndaà kjoàn s'in xka ijñá, xi jngoò naxhrjein títajnakon kò xi ma nchijòn kotsjòojin ni'in. Jñò xi xita 'mì-nò xi mìkì ndaà mokjeiín-nò, ¿a mìtsà isa nìton tsjá-nò Nainá nikje xi mochjeén-nò nga chikjá?

³¹ Kì makájno-nò, kì bixón-jèn: “¿Mé xi chjineé?, kò ¿mé xi s'ioaá? kò ¿mé nikje xi chikjá?”

³² Nga yije tsojmì koi, k'oaá tjin xi ótsji jñà xita xi mìkì mokjeiín-la it'aà ts'e Nainá. Tanga jñò tjinaá-nò Na'èn xi tjina ngajmii xi jyeé tjìin-la nga mochjeén-nò ngats'ii tsojmì koi.

³³ Ítjòn tìnchátsjioò kjoa ts'e Nainá koni s'in otíxoma kò kjoakixi-la; ngats'ii tsojmì xi mochjeén-nò tà tjoésòn-nò.

³⁴ Kì makájno-nò mé kjoa xi s'e nchijòn-lè; nga nchijòn-lè, s'ee-nò kjoa xi kòkájno-nò; tà koi kjoa tìkájno xi tjin naxhrjein i'nde.

7

Mì kù koma jñá sùkindaá jé-la xita xinguiá
(Lucas 6:37-38, 41-42)

¹ 'Kì kjo'in 'biì-la xita xinguiò kjoa ts'e jé-la mé-ne nga mì kjo'in tjoé-nò kjoa ts'e jé-nò.

² Koni s'in k'oi-la kjo'in xita xi k'eií, k'oaá tìs'in tjoé ngajo-nò kjo'in. Jè chiba xi sichibaya-la xinguiò, tije kochiba ngajo-nò.

³ [¿Mé-ne jé-la xinguii nùkinda-ne koa tsiji mìkì nùkindi?] ¿Mé-ne chitsejèn-la jè tjé xi kjinangui xkon xinguii, kò jè yá chiso xi kjinangui xkoiìn mìkì chitsejèn-la?

⁴ Tsà yá chiso kjinangui xkoiìn, ¿a koma k'oin-la xita xinguii: “Tjii'nde-ná nga kochrjekànguia tjé xi kjinangui xkoiìn?”

⁵ Ngaji xi jò ma isén-lè, ítjòn tìnaxhrjekàngui chiso xi kjinangui xkoiìn mé-ne nga ndaà kotsejèn-lè, ikjoàn tìnaxhrjekàngui tjé xi kjinangui xkon xinguii.

⁶ 'Tsojmì tsjeè xi ts'e Nainá, kì naña 'biì-la mé-ne nga mì ya sùkáfat'aà-lè kò ya skine-lè. Koa jè ndáton chjí xi nùkjiín, kì chinga nùkatjen-la mé-ne nga mì ndsokò kinchanè-ne.

*Kó s'ín sijé-lá Nainá k'e nga mé xi mejèn-ná
(Lucas 11:9-13; 6:31)*

⁷ Tíjé mé xi mejèn-nò, jè Nainá tsjá-nò; tìnchátsjioè Nainá, sakó-nò; tìnókoat'aà-là Nainá mé xi mejèn-nò mé-ne skíx'a'nde-nò koni jngòè xotjoa.

⁸ Ngats'ii xita xi síjé, tjoé-la, jè xi ótsji, sakó-la kò jè xi chjat'aà-la Nainá, táx'a'nde-la koni jngòè xotjoa.

⁹ Jñò xi xita jchínga 'mì-nò, tsà inchrájin síjé-nò ixti-nò, ¿a ndajoó k'oi-là? Majìn.

¹⁰ Koá tsà tìn síjé-nò, ¿a yeé k'oi-là? Majìn.

¹¹ Jñò nas'ín xita xi ch'o 'nè, ma-nò 'biì-là ixti-nò tsojmì xi ndaà kjoàn. Jè Na'èn-nò xi tíjna ngajmiì, isaá nìton síis'in-nò nga tsjá-nò tsojmì xi ndaà kjoàn tsà jñò síjé't'aà-là.

¹² Nita mé kjondaà xi mejèn-nò nga síkò-nò xita, k'oaá tís'ín tikò ngajo-nò. K'oaá s'ín tíchja kjoáxoma-la Nainá xi kiskii Moisés kò xojon-la xita xi kíichja ngajo-la Nainá.

*Kó kji xotjoa xi kitjás'én
(Lucas 13:24)*

¹³ Títjás'ioòn jè xotjoa xi 'nchrèya kji. Jè xotjoa kò jè ndiyá xi 'ñó tiyà, ndiyá-la kjo'in-né. Kjin xita xi ya fahas'en.

¹⁴ Kò jè xotjoa kò ndiyá xi 'nchrèya choòn, ndiyá-la kjoabinachon-né, kò chiba xita matsji-la.

*Kó s'ín jchaxkoaán xita it'aà ts'e xá xi s'ín.
(Lucas 6:43-44)*

¹⁵ Ndaà tikindaa yijo-nò it'aà ts'e xita ndiso xi tsò nga 'én-la Nainá síka'bí. K'e nga f'ìikon-nò jña xita koi, ima kjoáá s'ín koni orrè tanga inima-la, tsején ts'eén 'ya.

¹⁶ Jñò jchaxkoòn xita koi it'aà ts'e xá xi s'ín. K'oaá ngaya-la koni jngòè yá xi ndaà toò ojà-la. Jè toò uva, mìtsà jè majchá-la yá na'yá. Tíkooá jè toò ikò, mìtsà jè majchá-la yá na'yá.

¹⁷ Ngats'ii yá xi ndaà kjoàn, ndaà toò ojà-la. Tanga jè yá xi mìkii ndaà kjoàn, mìkii ndaà toò xi ojà-la.

¹⁸ Jngòè yá xi ndaà kji, mìtsà ch'o kjoàn toò xi ojà-la. Koá jè yá xi ch'o kji, mìkii ojà-la toò xi ndaà kjoàn.

¹⁹ Nga yije yá xi mìkii ojà-la toò xi ndaà, satèsòn-la ikjoàn sìnchájin ni'ín nga kitì.

²⁰ K'oaá s'ín jchaxkoòn xita koi it'aà ts'e xá xi s'ín.

*Yá xita xi kjoahas'en-jìin ñánda nga Nainá tìhotxoma
(Lucas 13:25-27)*

²¹ Mìtsà tà ngats'ii xita xi tsò-na: “Na'èn, Na'èn”, kjoas'en-jìin jè kjoáxoma-la ngajmiì. Tà jña xita xi kjoas'en-jìin xi síkitasòn koni s'ín mejèn-la Na'èn-na xi tíjna ngajmiì.

²² K'e nga kijchò nachrjein, kjin xita kitso-na: “Na'èn, Na'èn, ngajen kinokjoàya-nájen 'én-lè xi it'aà tsiji. Nga koo 'ín-lè kinachrjekàjìin-nájen inima ch'o-la neí xi mìkii ndaà; tíkooá kjin kjoáxón ki'nè-jen xi ndaà tjín.”

²³ K'ée k'oa xán-la: “Mìkii bexkon-nò. Tìnchat'aàxìn-ná jñò xi ch'o ki'nè.”

*Mé xi ngaya-la jña xita xi síkitasòn 'én-la Jesús kò xi mìkii síkitasòn.
(Lucas 6:47-49; Marcos 1:22)*

²⁴ Jè xi 'nchré koá síkitasòn 'én-na koni xan-la, k'oaá s'ín ngaya-la koni jngòè xita xi tjín-la kjohítsjeèn; yaá bíndaàsòn ni'ya-la ñánda naxi choòn.

²⁵ Ba jtsí; 'ba tjoáxón; f'ii xajngá nandá xi fahanè ni'ya; nì mé xi ma-la nga ndaà tjíndaà jè ni'ya, yaá kijnasòn ñánda naxi choòn.

²⁶ Tanga nita yá-ne xi 'nchré 'én-na kò mìkii síkitasòn, k'oaá ngaya-la koni jngòè xita xi tsjìn-la kjohítsjeèn; yaá bíndaàsòn ni'ya ñánda jncha tso mì.

²⁷ Ba jtsí; 'ba tjoáxón; f'ii xajngá nandá yaá bixòña ni'ya jè; mì tà k'oaá kji kjoá xi ma k'e nga bixòña.

²⁸ K'e nga jye kiichja Jesús, ngats'iì xit̩a xi títsajna, tà k'oaá komà-là koni tsò 'én xi tsakóya.

²⁹ K'oaá s'ín tsakóya koni jngoò xit̩a xi 'ñó t̩jín-là kjot̩ixoma, mìtsà k'oas'ín tsakóya koni xit̩a xi okóya kjot̩ixoma-là Nainá xi kiskii Moisés.

8

*Kii komà nga kjòndaà jngoò-ne xit̩a xi t̩bindojno chrjoa yijo-là
(Marcos 1:40-45; Lucas 5:12-16)*

¹ K'e nga itjojen-ne Jesús ya isò'nga nindoò, kjìn xit̩a j'it̩jngui-là.

² Jngoò xit̩a xi t̩bindojno chrjoa yijo-là ijchòkon koa tsasìxkó'nchit'aà-là, kitsò-là:
—Na'èn, tsà mejèn-lè, t̩itsjeè-ná ch'in xi t̩jín-na.

³ Jesús, k'eé tsijmeé tsja nga tsohót'aà-là yijo-là xit̩a jè, kitsò-là:
—Mejèn-na, kàtandaà-ne yijo-lè.

K'e nga okitsò Jesús, n̩itoón kjòndaà-ne.

⁴ K'eé kitsò-là Jesús:

—T̩iná'yi, k̩i yá xit̩a xi bènojmí-là. T'in ñánda t̩jna no'miì, takó-là yijo-lè nga jyeé kjòndaà-ne; koa jch'ii kjot̩jò-lè, tsojmì xi síjé kjot̩ixoma-là Nainá xi kiskii Moisés, mé-ne nga kàteè-ne j̩ña xit̩a nga jyeé kjòndaà-ne ch'in-lè.

*Kii komà nga kjòndaà-ne ch̩i'nda-là xi xit̩a sko-là soldado
(Lucas 7:1-10)*

⁵ K'e nga jahas'en Jesús ya naxandá Capernaum, jngoò xit̩a sko-là soldado ts'e Roma ijchòkon, kisijé-là kjòndaà.

⁶ Kitsò-là:

—Na'èn, xit̩a ch̩i'nda-na kijna-né ján ni'ya-na. Tsí 'ñó xk'én koa t̩ífa kjo'in nga mikii ma síhiníyá yijo-là.

⁷ Jesús kitsò-là:

—Koma kjísindaà-na.

⁸ Jè xit̩a sko-là soldado kitsò:

—Na'èn, mikii ok'in-na nga ngaji k'óin sobi ni'ya-na, ta saá t̩jiì okixi nga kàtandaà-ne, koa kondaà-ne ch̩i'nda-na.

⁹ 'An, t̩jijn-na nga t̩jín-lè kjot̩ixoma. T̩ikoaa 'an, t̩jín-na xit̩a ítjòn xi ot̩ixoma-na, t̩ikoaa t̩jín-na soldado xi 'an ot̩ixoma-là, k'e nga xan jngoò-là: “T'in”, fi-né; xan-là xi ìjngoò: “Nchroboi”, nchrobá-né; koa k'e nga xan-là jè xi ch̩i'nda-na: “K'oa t'iin”, síkitasòn-na.

¹⁰ K'e nga kii'nchré Jesús j̩ña 'én koi, tà kjòxkón-là. Kitsò-là j̩ña xit̩a xi t̩jngui-là:

—Okixi xi xan-nò, ya Israel n̩i saá jngoò xit̩a sakó-na xi k'oas'ín ndaà mokjeiín-là koni jè xit̩a jè.

¹¹ K'oaá xan-nò, kjìn xit̩a kjoii-ne nga ñijòn chrjangui-là isò'nde xi kokjen-ko Abraham ko Isaac ko Jacob ya ngajmii ñánda tíhot̩ixoma Nainá.

¹² Tanga j̩ña xit̩a xi t̩jín-ne nga ya k̩ítsajna ñánda kot̩ixoma Nainá, kit̩jokàjijn-né; ján kjoii nd̩itsin ñánda j̩nò choòn, ko yaá sk̩indàya koa s̩ijts'iin n̩i'ño.

¹³ K'eé kitsò-là Jesús jè xit̩a sko-là soldado:

—T'in-ne ni'ya-lè; koni s'ín nga ndaà mokjeiín-lè, k'oaá s'ín koma.

Jè ch̩i'nda-là t̩ik'eé kjòndaà-ne.

*Kii kis'iin Jesús nga kisindaà-ne nachíya-là Pedro
(Marcos 1:29-31; Lucas 4:38-39)*

¹⁴ Jesús kii ni'ya-là Pedro koa k̩ijtseè nachíya-là nga kijna xk'én; ch'in t̩jnga t̩jín-là.

¹⁵ Jesús tsohót'aà-là tsja jè chjoón, n̩itoón kjòndaà-ne ch'in t̩jnga-là, tsasít̩jen-ne jè chjoón, ikjoàn kisìs'in-là Jesús.

*Kii kis'iin Jesús k'e nga kjin xita xk'én j'iiko-la
(Marcos 1:32-34; Lucas 4:40-41)*

¹⁶ K'e nga jye kojñò, kjin xita xk'én j'iiko-la Jesús xi inima ch'o-la neii tjín-la. Jesús tà jngoò okixi kitsjaà nga tsatixoma-la mé-ne nga itjokajin-ne inima-la jña xita ngats'ii inima ch'o-la neii, koa kjondaà yije-ne xita xk'én.

¹⁷ Kjoa koi koni s'in komà, koi tsitasòn koni kitsò Isaías xita xi kiichja ngajo-la Nainá k'e nga kitsò: "Jè jaàxìn ch'in-ná kò jè kisikjeín kjo'in nga kjondaà-ne ñánda kitsì'on yijo-ná."

*Mé xi sjé Jesús it'aà ts'e xita xi mejèn-la fitjingui-la
(Lucas 9:57-62)*

¹⁸ K'e nga kijtsee Jesús nga kjin ma-ne xita xi kitseendi-la, kitsjaà-la okixi xita xi kota'yàt'aà-la nga kii ján xijngoaà ndáchikon.

¹⁹ K'ée j'ii jngoò xita xi okóya kjotixoma-la Nainá xi kiskii Moisés, ijchòkon Jesús, kitsò-la: —Maestro, kjítjingui-lè nita ñánda nga k'óin.

²⁰ Jesús kitsò-la:

—Jña ninda tjín-la nguijo ñánda oyjò, koa jña nise tjín-la tjé, tanga 'an xi Ki'ndí-la Xita xan-la yijo-na, tsjin-na i'nde ñánda síkjáya.

²¹ Jngoò xita xi kota'yàt'aà-la kitsò-la:

—Ná'èn, tji'nde-ná nga ítjòn kjián kihijñaà ná'èn-na.

²² Jesús kitsò-la:

—Ji, nchrobátjingui-ná, jña mik'en kàtihijin mik'en-la.

*Kii kis'iin Jesús nga kisikijnayò tjoxkón ya ijìn ndáchikon
(Marcos 4:35-41; Lucas 8:22-25)*

²³ Jahas'en Jesús jè chitso; kihijtako jña xita xi kota'yàt'aà-la.

²⁴ Tà nitoón tsatsejèn jngoò tjoxkón kò jtsí ya ijìn ndáchikon, kò jè ndáchikon taxki komà-né, mejèn bíjtsa'ma jè chitso. Tanga jè Jesús kjinafé-né.

²⁵ Jña xita xi kota'yàt'aà-la k'ée kiikon nga kisikjaá-la Jesús, kitsò-la:

—Ná'èn, tikinda-nájen. Jye titsabixònguindá.

²⁶ Kiichja Jesús kitsò:

—¿Mé-ne tsakjoòn-nò? 'Nó chiba mokjeín-nò xi it'aà ts'an.

K'ée tsasitjen Jesús, tsohótiko tjoxkón kò ndáchikon koa nitoón kisijyò-ne tjo koa kjondaàya-ne.

²⁷ Koa jña xita xi kota'yàt'aà-la tà kjòxkón-la, kitsò:

—Yá xita-ne jè skanda jè tjo kò ndáchikon síkitasòn-la.

*Kii kis'iin Jesús nga tsachrjekajin inima ch'o-la neii xi tjín-la xita Gadara
(Marcos 5:1-20; Lucas 8:26-39)*

²⁸ K'e nga ijchò Jesús ján xijngoaà ndáchikon ya nangui Gadara, jò xita ijchò kinchat'aà-la xi ya itjo-ne ya ñánda sihijin mik'en. Inima ch'o-la neii tjín-la. 'Nó jchán ts'en, kjaán-kò-ne tsà yá xi ya kjoahaya ndiyá.

²⁹ 'Nó kiichja nga kitsò:

—¿Mé xi mejèn-lè kò ngajen, ji xi Ki'ndí-la Nainá 'mì-lè? ¿A koií xá kòf'i-ne nga jchatoòn-nájen k'e nga tikj'eè bijchó nachrjein-la kjo'in?

³⁰ Ya chrañat'aà-la kjin jchán chinga nchikjèn-jno,

³¹ koa jña inima ch'o-la neii tsibítsi'ba-la Jesús, kitsò-la:

—Tsà kinachrjekajin-nájen, tji'nde-nájen nga kitjás'en-jin-jen yijo-la chinga koi.

³² Jesús kitsò-la:

—Ndaà tjín, tanguió.

Ikjoàn itjojin yijo-la jña xita koi, k'ée jahas'en-jin yijo-la jña chinga, koa ngats'ii chinga tsatikjajen-jno ya naxi skanda ijìn ndáchikon kò yaá k'en.

³³ Jñà x̄ita xi ko'ndà ch̄inga tsanga; k'e nga ijchò jjiìn naxandá, tsibénojmi yije kjoa xi komà k̄o kjoa xi komàt'in jñà x̄ita xi in̄ima ch'o-la neij̄ tíjin in̄ima-la.

³⁴ K'eé ijchò ngats'iì x̄ita naxandá ñánda tíjna Jesús; k'e nga kijtseèxkon tsibítsi'ba-la nga xìn nangui kàtjì.

9

Kií kis'iìn Jesús nga kisindaà jngoò-ne x̄ita xi mì k̄i ma síhiníyá yijo-la
(Marcos 2:1-12; Lucas 5:17-26)

¹ K'e nga jahas'en Jesús jè chitso, jahatot'aà xijngoàà ndáchikon koa ijchò-ne naxandá-la.

² Ya ijchòko jngoò-la x̄ita xi mìk̄i ma síhiníyá yijo-la; kjinason-la nachan-yá. K'e nga kijtseè Jesús nga jñà x̄ita koi mokjeiín-la it'aà ts'e, kitsò-la jè x̄ita xk'én:

—Ji ndí na'èn, tjiì-la nga'ño yijo-lè; jé-lè jye kichàat'aà-lè.

³ Jñà x̄ita xi okóya kjotíxoma-la Nainá xi kiskii Moisés, tíjin i'nga xi kitsò kjohítsjeèn-la: “X̄ita jè, Nainá chjajno-la.”

⁴ Jesús n̄itoón kijtseèya-la koni s'ín nchisíkítsjeèn, kitsò-la:

—¿Mé-ne kotsò-ne kjohítsjeèn-la in̄ima-nò nga ch'o tsò-ne?

⁵ ¿Mé xi is̄a chiba 'in tíjin, tsà xán-la jè x̄ita xi xk'én: “Jé-lè jye kichàat'aà-lè”, k̄o tsà xán-la: “T̄isítjiiin koa t̄itjei'?”

⁶ Kokoò-nò nga 'an xi Ki'ndí-la X̄ita xan-la yijo-na, tíj'nde-na nga sìjchàat'aà-la jé-la x̄ita j̄ isò'nde.

K'eé kitsò-la jè x̄ita xk'én:

—T̄isítjiiin, chjoí nachan-lè, t'in-ne ni'ya-lè.

⁷ K'eé tsasítjen jè x̄ita xk'én, kii-ne ni'ya-la.

⁸ K'e nga kijtseè jñà x̄ita nga tsasítjen-ne jè x̄ita xk'én, tà k'oaá koma-la; k'eé jeya kisikíjna Nainá nga k'oas'ín tse nga'ño tsjá-la x̄ita isò'nde.

Mé kjoa xi komà k'e nga jè Jesús k̄ichja-la Mateo
(Marcos 2:13-17; Lucas 5:27-32)

⁹ Jesús kii-ne j̄'nde jè. K'e nga tífi, kijtseè jngoò x̄ita xi 'mì Mateo xi tíjnat'aà ím̄ixa ya ñánda síkíchjítjì tsojmi, t̄on xi fì Roma; kitsò-la:

—Nchrobátj̄ingui-ná.

K'eé tsasítjen Mateo, k̄iitj̄ingui-la Jesús.

¹⁰ K'e nga tíjnat'aà ím̄ixa Jesús nga tíkjèn ya ni'ya-la Mateo, kjìn x̄ita j'ii xi t̄ikoa tsojmi síkíchjítjì k̄o x̄ita xi jé tíjin-la. T̄ikoa tsibítsajnat'aà ím̄ixa, tsakjèn-k̄o Jesús k̄o jñà x̄ita xi kota'yàt'aà-la.

¹¹ Tanga jñà x̄ita fariseo, k'e nga kijtseè x̄ita koi, kiskònangui-la x̄ita xi kota'yàt'aà-la Jesús, kitsò-la:

—¿Mé-ne k'oas'ín-ne maestro-nò nga x̄ita xi síkíchjítjì tsojmi k̄o x̄ita jé kjèn-k̄o-ne?

¹² Kii'nchré Jesús, k'eé kitsò-la:

—Jñà x̄ita xi mì ch'in tíjin-la, mì chj̄inexkii mochjeén-la, jñà-né x̄ita xi xk'én xi mochjeén-la chj̄inexkii.

¹³ Tanguió chíta'yà is̄a kó tsòya-ne Xojon-la Nainá xi tsò: “An mejèn-na nga kàtas'e-nò kjohimatakòn; k̄i ta tsjaà cho n̄ik'eèn kjotjò xi 'an 'biù-ná.” M̄itsà koi xá j'ii-na 'an nga j̄ikjaàjñàà x̄ita kixi, jñà-né x̄ita xi tíjin-la jé nga kàtasíkájno jé-la nga mì t̄i jé kohótsji-ne.

Kó kitsò Jesús k'e nga kitjònangui-la mé-ne mì bitsajnachjan-ne x̄ita-la
(Marcos 2:18-22; Lucas 5:33-39)

¹⁴ Jè Juan xi kis'iìn bautizar x̄ita, jñà x̄ita xi kota'yàt'aà-la j'iikon Jesús ñánda tíjna koa kiskònangui-la, kitsò:

—Ngajen ko x̄ita fariseo kjit'aà nachrjein bitsajnachjan-jen. ¿Mé-ne jñà x̄ita tsiji mìkii bitsajnachjan-ne?

¹⁵ Jesús kitsò-la:

—¿A baá bitsajna x̄ita k'e nga s'eí t̄jín k'e nga títsajna osen xi kòbixan? Tanga kijchò nachrjein k'e nga t̄jáchin-la x̄'in xi kòbixan, k'e-né nga kítsajnachjan x̄ita.

¹⁶ 'Jngoò nikje ibaà mìkii ma sijto-ne ko nikje x̄itse; nga jè nikje x̄itse, kjeèn-yó-né koa kotejnda-né jè nikje ibaà. Ìsa tse koma ñanda kixajnda kji.

¹⁷ T̄ikoáà mìkii ma s̄inchá xán ixii jè chrjoa jchínga, jè xán ixii kotijnda-né jè chrjoa jchínga koa x̄ixteèn jè xán. T̄ikoáà ch̄ija jè chrjoa. Jè xán ixii, chrjoa x̄itsee s̄inchá. K'oaá s'ín ndaà s̄inchá ingajò.

*Tsòti-la Jairo ko chjoón xi kitsobà nikje-la Jesús
(Marcos 5:21-43; Lucas 8:40-56)*

¹⁸ T̄ik'eé-ne nga tíchja Jesús, ijchò jngoò x̄ita sko-la jñà x̄ita judío, tsasìxkò'nchit'aà-la, kitsò-la:

—Ndí tsòti-na, sa kò jye k'en; tanga tsà j̄i k'óin ko tsà kjòt'aà-la ndsej̄i, kíjnakon ijngoò k'a-ne.

¹⁹ Tsasítjen Jesús, kiiko jè x̄ita sko-la ko jñà x̄ita xi kota'yàt'aà-la.

²⁰ K'e nga nchifi, jngoò chjoón ijchòtjingui-la; chjoón jè, jyeé ko tejò nó xk'én nga tíxixteèn-la jní. Kii kasit'aà chraña-la Jesús ya ijton íts'in nga kitsobà'ño itjòn nikje-la.

²¹ K'oaá s'ín tíhóko inima-la: “Tsà tà jè s̄ikoaà nikje-la, kondaá-na.”

²² Jè Jesús kisikáfaya, kijtsee chjoón jè, kitsò-la:

—Ndí nea, t̄ji-la nga'ño yijo-lè. Kòmandaà-ne koií-né nga mokjeiin-lè it'aà ts'an.

Tijè-ne hora kjòndaà-ne chjoón jè.

²³ K'e nga ijchò Jesús ya ni'ya-la jè x̄ita sko-la x̄ita judío, kijtsee música xi nchisíkjane nga jye kihijin mik'en koa kijtsee nga fijen fikjá x̄ita nga 'ño nchikjindáya.

²⁴ Kitsò-la:

—T̄itjoo ni'ya; jè tsòti mìtsà kòbiyaà, tà kjinafé-né.

Jñà x̄ita, tà tsijnòkeè-né k'e nga okitsò Jesús.

²⁵ Tanga Jesús tsachrje ni'ya ngats'ii x̄ita xi títsajna; k'eé jahas'en ni'ya, kiskoé tsja jè tsòti, koa jè tsòti tsasítjen.

²⁶ Nga kijnda i'nde jè, tsabísòn 'én it'aà ts'e kjoa xi koma.

Kó s'ín komàt'in x̄ita xi jò ma-ne xi mìkii tsejèn-la

²⁷ K'e nga itjo-ne Jesús i'nde jè, jò x̄ita xi mìkii tsejèn-la kiitjingui-la; 'ño kiichja, kitsò-la: —jchahimatakòn-nájen, ngaji xi ya nchrobàt'aà-ne tje-la x̄itaxá itjòn David [nga j̄i tijna ngajo-la]!

²⁸ K'e nga jahas'en ni'ya Jesús, jñà x̄ita xi mìkii tsejèn-la ijchòkon. Jesús, kiskònangui-la, kitsò-la:

—¿A mokjeiin-nò nga koma-na s̄indaà-nò?

K'eé kitsò jñà x̄ita xi mìkii tsejèn-la:

—Jon, Na'èn. Komaá-lè.

²⁹ Jesús k'eé kisiko jñà xkòn, kitsò-la:

—Jñò, koni s'ín mokjeiin-nò, k'oas'ín kàtandaà-nò.

³⁰ Jñà x̄ita xi mìkii tsejèn-la, kitáx'a-ne xkòn koa kjòndaà-ne. Jesús 'ño tsibínè-la nga kitsò-la:

—Ndaà t'een kindà nga mì yá x̄ita xi skoe kjoa koi.

³¹ Tanga jñà x̄ita koi, k'e nga itjo-ne ni'ya, t̄ik'eé tsibíts'ia nga tsibénojmi nga kijnda i'nde jè, kós'ín kis'iin Jesús.

Kó s'ín komà nga kjòndaà-ne jngoò x̄ita xi mìkii ma chja

³² K'e nga jye nchifi-ne jña xita xi mikii tsejen-la, j'iiiko jngoò-la Jesús xita xi mikii ma chja nga inima ch'o-la neii tjiin inima-la.

³³ Jesús k'e nga jye tsachrekajiin inima ch'o-la neii xi tjiin inima-la jè xita xi mikii ma chja, tik'eé komà kiichja-ne. Ngats'ii xita xi ya títajna tà kjòxkón-la. Kitsò:

—Kj'eè kii 'yaá kjoa xi k'oas'in ma i j'nde Israel.

³⁴ Tanga jña xita fariseo kitsò:

—Jè sobà xita sko-la xita neii tsjá-la nga'ño nga ma-la ochrekajiin inima ch'o-la neii xi tjin-la xita.

Kó kitsò Jesús k'e nga kjòhimakeè xita xi jìn ma-ne

³⁵ Jesús tsajmeèjii ñánda naxandá ii kò naxandá jtobá nga tsakóya 'én-la Nainá ya ni'ya ingo sinagoga ts'e naxandá koi. Kiichjaya 'én ndaà-la Nainá koni s'in otixoma Nainá; tikoá kisindaà-ne ngats'ii ch'in xi tjin-la xita nga xki xi ján ijòjno ijòt'aà yijo-la.

³⁶ K'e nga kijtsee Jesús nga jìn ma xita, kjòhimakeè nga 'ño makájno-la kò mì yá xi osiko nga jye títajhoya k'oáá ngaya-la koni orrè xi tsjin-la paxtò xi ko'ndà.

³⁷ K'eé kitsò-la xita xi kota'yàt'aà-la:

—Xi okixi, 'ño tse xá tjin xi it'aà ts'e 'Én-la Nainá koni s'in ma k'e nga jìn tsojmì majchá tanga jña xita ch'i'nda xi síxá, chiba ma-ne;

³⁸ títisi'ba-là jè Nei-la xá, kátasikasén-isa xita ch'i'nda xi koixkó tsojmì koi.

10

Kó 'mì 'ín-la xita-la Jesús xi tejò ma-ne

(Marcos 3:13-19; Lucas 6:12-16)

¹ Nga koma iskan Jesús kiichja-la xita-la xi tejò ma-ne xi kota'yàt'aà-la, kitsjaà-la kjotixoma nga koma kochrekajiin inima ch'o-la neii xi tjin-la xita koa koma-la siindaà-nè nita mé ch'in-ne nga ijòjno ijòt'aà yijo-la xita.

² Jña 'ín-la xita xi tejò jaàjii Jesús nga tsibíxáya-la: jè tjna ítjòn, Simón xi tikoá Pedro ki'mì, kò Andrés xi 'ndse ma Pedro; Jacobo kò 'ndse Juan xi ixti-la Zebedeo;

³ Felipe, Bartolomé, Tomás, kò Mateo jè xi kisikíchjiti tsojmì ts'e Roma; Jacobo, ti-la Alfeo; Lebeo xi tikoá Tadeo ki'mì;

⁴ Simón, xita xi ya fit'aà-la xita cananista; kò Judas Iscariote jè xi kisingatsja kondra-la Jesús.

Kós'ín tsatixoma-la Jesús xita-la xi tejò ma-ne xi kisikasén nga kisika'bí 'én-la Nainá

(Marcos 6:7-13; Lucas 9:1-6)

⁵ Jesús kisikasén nga tejò xita xi kota'yàt'aà-la nga kisika'bí 'én-la Nainá koa kitsjaà-la kjotixoma, kitsò-la:

—Mikii onguió ya j'nde-la jña xi mitsà xita judío; tikoá mikii bitjaàs'en-jñoò ya naxandá-la xita Samaria.

⁶ Yaá tanguichòn jña xita naxandá Israel koni orrè xi kichijà.

⁷ K'e nga onguió tinókjoaya koa tixón: “Jye kjòchrañàt'aà-nò nachrjein nga jchaa kó s'in otixoma jè xi ngajmii nchrobá-ne.”

⁸ Tindaà-nò xita xi xk'én; títseè xi tìbindojno chrjoa yijo-la; tikjaáya-là xi jye k'en; nachrekajñoò inima ch'o-la neii xi tjiin inima-la xita. Tà kjotjò kitjoé-nò nga'ño koi, tikoáá tà kjotjò tji ngajo-là jña xita.

⁹ Nimé ton ch'aà.

¹⁰ Kì na'ya ch'aà xi it'aà ts'e ndiyá. Mikii tsà jò nachro ch'aà. Tikoáá mikii xoxté tsjayaà. Tikoáá kì yá garrote ch'aà. Nga jè xita xi síxá, mochjeén-né nga k'oi-la tsojmì xi skine.

¹¹ K'e nga kijchoò naxandá ii, o xi naxandá jtobá tinchátsjioò jngoò ni'ya xi ndaà xita nei-la, yaá títajnakoo skanda k'e nga ongui-nò.

¹² K'e nga kitjás'een ni'ya, tiixat'aà jña xita nei-la ni'ya.

13 Tsà jñà x̄ita nei-la ni'ya skoétjò-nò, t̄ichikon-t'ioòn nga s'e-la kjoa'nchán, t̄anga tsà mìkiì skoétjò-nò, tà saá jñò s'e-nò kjoa'nchán nga s̄ichikon-t'in-nò Nainá.

14 Tsà mìkiì skoétjò-nò, k̄o tsà majìn-la k̄ji'nchré 'én-nò, t̄itjoo ni'ya jè, o naxandá jè, koa t̄itsajneè chijo-la ndsokò.

15 Okixíí xi xan-nò, naxandá jè, isaá tse kjo'in s'e-la jè nachrjein k'e nga s̄indaàjìn-la x̄ita, mì k'oaá-ne koni jñà x̄ita ts'e naxandá Sodoma k̄o Gomorra.

Kjo'in xi t̄jín k'e nga 'én-la Nainá bènojmiá

16 'Tiná'ya, 'an, k'oaá s'ín sikasén-nò koni tsà orrè ya j̄iìn-la cho tsején. Jñò, t̄itsajnandaà n̄ita mé kjoa-ne koni tsà ye xi 'ñó maña t̄ikoā indaàkjoā k̄atama koni tsà n̄ise paloma.

17 Ndaà t̄ikindaā yijo-nò. Jñà x̄ita koi, ján sk̄inìt'aà-nò nguixk̄on x̄itaxá koa skaàn-koo-nò ya ni'ya ingo sinagoga.

18 Skanda ján k̄jiko-nò nguixk̄on x̄itaxá gobernador k̄o x̄itaxá ítjòn, tà koií kjoa-la it'aà ts'an. K'oaá s'ín koma k̄inókjoa-là 'én xi ts'an jñà x̄itaxá k̄o jñà xi mìtsà x̄ita judío.

19 K'e nga sk̄inìt'aà-nò ñánda t̄itsajna x̄itaxá, k̄i makájno-nò kós'ín k̄inókjoā, o kós'ín kixón. Nga t̄ik'eé-ne, Nainá tsjá-nò 'én xi k̄inókjoā.

20 Nga mìtsà jñò xi k̄inókjoā; jè Inima Tsjeè-la Nainá tsjá-nò k̄johítsjeèn nga ma k̄inókjoājìin-là jñà x̄ita.

21 'Tijè-ne 'ndse s̄ingatsja 'ndse x̄ita nga s̄ik'en. Jè na'èn-la s̄ingatsja ki'ndí-la nga s̄ik'en x̄ita. Jñà ixti-la s̄ingatsja na'èn-la nga kiyá.

22 Ngats'ìi x̄ita isò'nde kojtikeyè-nò xi kjoa ts'an; t̄anga jè x̄ita xi kixi k̄jna skanda k̄johet'aà-ne, jè-né xi k̄itjokàjìin kjo'in.

23 K'e nga k̄jijingui kondra-nò x̄ita xi jngoò naxandá, t̄iyó, x̄in naxandá tanguió. Okixíí xi xan-nò, 'an xi Ki'ndí-la X̄ita xan-la yijo-na, isaá ítjòn kjoiaa nga t̄ikj'eè onguió yije kóhokji naxandá Israel.

24 'Jngoò x̄ita xi kota'yà mìtsà isa t̄jna ítjòn koni maestro-la; t̄ikoā jngoò x̄ita xi ch̄i'nda t̄jna mìtsà isa t̄jna ítjòn-la nei-la.

25 Jè x̄ita xi kota'yà kojngoó ikon tsà k'oa's'ín k̄ijchò koni jè maestro-la k̄o jè xi ch̄i'nda t̄jna tsà tà k'oa's'ín k̄jna koni jè nei-la. Jè xi na'èn t̄jna, x̄ita neij tsò-la; jñà xi ixti-la, isaá tsato ch'o k̄itso-la.

Yá x̄ita xi k̄iskón-lá (Lucas 12:2-9)

26 'Kì x̄ita tsakjoòn-là. Nga nì mé t̄jín xi t̄jtsa'ma xi mìkiì kotsejèn; ngats'ìi xi t̄j'ima, jchaá-la.

27 Jè kjoa xi k'oa xan-nò k'e nga jñò choòn, k'oaá tixón k'e nga nachrjein; koa jè xi kjoa'ma xan-nò, jñò t̄inókjoāya kóhokji isò'nga ni'ya.

28 Kì tsakjoòn-là jè xi ma-la sík'en yijo-ná, t̄anga inima-ná mìkiì koma-la s̄ik'en. Jè xi t̄iskón-là xi ma-la sík'en yijo-ná k̄o inima-ná nga kinjìin-ná ni'ín ts'e kjo'in.

29 'Maá sat̄jna jò ndí n̄ise nas'ín tà jngoò ma ton-ná. T̄anga n̄ijngoò n̄ise kiyá tsà mìkiì tsjá'nde Nainá.

30 Jñò, skanda tsjaskò t̄ixkeya yije-la Nainá.

31 Koií kjoa-la, k̄i tsakjoòn-jèn. Isaá tse ch̄jì-nò mì k'oaá-ne nas'ín k̄jìn ma ndí n̄ise.

Jñà x̄ita xi tsò nga 'an fit'aà-na (Lucas 12:8-9)

32 'N̄ita yá-ne xi tsjá 'én nga nguixk̄on x̄ita nga 'an fit'aà-na, 'an k'oaá t̄i xán nga nguixk̄on Na'èn-na xi t̄jna ngajmii nga x̄ita ts'an-ná.

33 T̄anga jè xi k̄ójna'mat'in-na nga nguixk̄on x̄ita, 'an k'oaá t̄is'ín kójna'mat'ian it'aà ts'e nga nguixk̄on Na'èn-na xi t̄jna ngajmii.

*Kii koma nga kojòya xita xi kjoa ts'e Cristo
(Lucas 12:51-53; 14:26-27)*

³⁴ 'Kì k'oaá s'ín níkítsjeèn nga kjoa'nchán j'ìikoaa isò'nde. Mì kjoa'nchán j'ìikoaa, ta saá kjoajchán j'ìikoaa.

³⁵ Koií xá j'i-na nga jñà xita, tije-ne na'èn-la koma-ne kondra-la; jè tsòti-la, tije koma-ne kondra-la nea-la; ko jè kja'nda-la, tije nachiya-la koma-ne kondra-la.

³⁶ Nga jngoò òjngoò xita, tijñà-ne xita ni'ya-la koma kondra-la.

³⁷ 'Jè xi isa tjòkeè na'èn-la ko nea-la ko 'an mìkii matsjakeè-na, mìkii ok'in-la nga xita-na xán-la; ko jè xi isa tjòkeè ti-la, o jè tsòti-la, ko 'an mìkii matsjakeè-na, mìkii ok'in-la nga xita-na xán-la.

³⁸ Jè xi kjo'in tsakjón-la nga majìn-la ojen krò-la nga 'an kjinchrobà tjingui-na mìkii ok'in-la nga xita ts'an xán-la.

³⁹ Jè xita xi ndaà ótsji kós'ín ma sùkinda yijo-la nga mì mé kjo'in sakò-la, ta saá sùichija-né ko kjo'in kíjnajìn; tanga jè xi tijnandaà nga tsjá yijo-la nga kiyá xi kjoa ts'an, sakò-la kjoabinachon nga it'aà ts'an ndaà kíjna.

*Kjondaà xi tjin-la xita xi skoétjò xikjín
(Marcos 9:41)*

⁴⁰ 'Jè xita xi skoétjò-nò, 'an kjoétjò-na; ko jè xi skoétjò-na, jè kjoétjò xi kisikasén-na.

⁴¹ Jè xita xi kjoétjò jngoò xita xi chja ngajo-la Nainá, koií kjoa-la nga 'én-la Nainá chja, k'oaá tís'ín kochikon-t'in koni jè xita xi chja ngajo-la Nainá. Ko jè xita xi skoétjò jngoò xita kixi, koií kjoa-la nga ndaà s'ín, tikoaa tà ngásòn kochikon-t'in koni jè xita kixi.

⁴² Nita yá-ne xi tsjá jngoò chitsín-la nandá 'nchán jngoò ndí xita ima-na koií kjoa-la nga 'an kota'yát'aà-na, okixi-né kochikon-t'in-né.

11

¹ K'e nga jye kitsjaà-la okixi kós'ín sùxá xita-la xi tejò ma-ne xi kota'yát'aà-la Jesús, kùkakóya ko kisika'bí 'én-la Nainá ngats'ì naxandá xi tjin ya i'nde jè.

*Jesús, kii kitsò-la xita xi ijchò kjònangui-la it'aà ts'e Juan
(Lucas 7:18-35)*

² Juan, nga ndayá tjna'ya, kù'nchré kjoa xi tís'ín Cristo [xita xi xó kisikasén-ne Nainá]. Kisikasén i'nga xita xi kota'yát'aà-la

³ nga kii kjònangui-la. Kitsò-la:

—¿A ji-né xi Cristo xi tjinè-lè nga kjoii a xi kje'ijí chíña-lajen?

⁴ Jesús kitsò-la:

—Tanguió, tènójmí-là Juan jñà kjoa xi titsa'yaà ko xi titsana'ya.

⁵ Jñà xita xi mìkii tsejèn-la, jyeé tsejèn-la; jñà xi tsá'yá kjoàn, jyeé ma fi-ne; jñà xi tìbindojno chrjoa yijo-la, tímatsjeèjno-ne yijo-la; jñà xita xi jtayaà, jyeé 'nchré-ne; ko xita xi jye k'en, nchifaáyaá-la; koa jñà xita ima, jyeé tís'enojmí-la 'én ndaà-la Nainá.

⁶ Mé tà ndaà-la jè xita xi nguì jngoò k'a ndaà mokjeiin-la it'aà ts'an nga nì mé xi osijna-ikòn-la.

⁷ K'e nga jye kii-ne xita xi kota'yát'aà-la Juan, tsibíts'ia Jesús nga tsohóko xita xi it'aà ts'e Juan, kitsò-la:

—¿Mé xi tsanguì chitsejèn-là ya i'nde it'aà xìn ñánda nangui kixi choòn? ¿A jè tsanguì chitsejèn-là jngoò xita xi yá ínaxo kji nga tsjìn-la nga ñó nga ma síjtìya-la tjo?

⁸ Tsà majìn, ¿mé-nè xi tsanguì chitsejèn-là? ¿A jngoò xita xi 'ñó ndaà kji nikje-la? Jñà xita xi 'ñó ndaà kjoàn nikje-la, yaá títsajna ya ni'ya-la xitaxá ítjòn.

⁹ ¿Mé xá xi tsanguì-nò? ¿A jè tsanguì chitsejèn-là jngoò xita xi chja ngajo-la Nainá? Okixi-né, k'oaá xan-nò, Juan, isaá tjna ítjòn mì k'oaà-ne koni jngoò xita xi chja ngajo-la Nainá.

¹⁰ It'aà ts'e Juan, yaá tíchja Xojon-la Nainá nga tsò:

'Aán sikasén ítjòn-lè x̄ita-na xi kj̄iko 'én,
jè xi koìndaàya ítjòn-lè ndiyá-lè.

11 Okixi-né, ngats'iì x̄ita xi tjín i isò'nde, ni saá jngoò x̄ita bitjokàjìn xi mangásòn koni jè Juan xi kis'iìn bautizar x̄ita; tanga ya ijìn naxandá ñánda otíxoma jè xi ngajmii nchrobá-ne, jè x̄ita xi fehet'aà-ne, isaá jeya tíjna mì k'oaá-ne koni Juan.

12 Tjen-ne nga j'i Juan xi kis'iìn bautizar x̄ita, jè kjotíxoma-la ngajmii, tse kjoasii tísakó-la skanda nàchrjein i'nde; jña x̄ita ts'en mejèn-la nga kàtachija kjotíxoma.

13 Ngats'iì x̄ita xi kiichja ngajo-la Nainá kò xojon ts'e kjotíxoma-la Nainá xi kiskii Moisés, tà 'én j'ii kò skanda k'e nga j'ii Juan xi kis'iìn bautizar x̄ita.

14 Tsà mokjeiín-nò koni tsò jè kjotíxoma kò x̄ita xi kiichjaya tikoáá kòkjeiín-nò nga jè Juan, jè-né x̄ita xi 'mì Elías xi tjínè-la nga kjoí.

15 Ndaà tiná'yaà koni xan-nò.

16 '¿Yá xi siingásòn-koaa jña x̄ita xi tjín nàchrjein i'nde? Jña kongásòn-kjoò jña ixti xi bìtsajna nditsin nga síská, chja-la xíkjin, tsò-la:

17 “Kànikjaneé-nòjen xobí tanga jño, mìkii kàchà; kàjndaá-nòjen sò xi ba tsò tanga jño, mìkii kàchihindáyaà.”

18 K'e nga j'ii Juan, mìtsà 'ño tsakjèn, ni mì xán kits'iì, koa jño bixón-nò: “Inima ch'o-la neí tjín-la.”

19 Ikjoàn j'iaa xi Ki'ndí-la X̄ita xan-la yijo-na; ma-na kjeen, tikoá ma-na 'biaa; jña x̄ita tsò-né: x̄ita chrjá'a-né, x̄ita ch'i-né, amigo-la-né jña x̄ita-la xitaxá Roma xi síkíchjítjì tsojmì kò jña xi x̄ita jé. Tanga jè kjoachjine-la Nainá, 'yaá-la nga kixi tjín k'e nga jye bitasòn.

Jesús, kii kitsò-la jña x̄ita naxandá xi mìkii 'nchréñijon
(Lucas 10:13-15)

20 Jesús k'eé tsibíts'ia nga tsohótikò ngats'iì x̄ita naxandá ñánda nga kjìn kjoxkón-ndaà kis'iìn, koií kjoa-la nga jña x̄ita xi ya i'nde-la mìkii kisikájno jé-la nga tákó jé nchihótsji. Kitsò-la:

21 —iIma xó-nò jño, x̄ita naxandá Corazín! iIma xó-nò jño, x̄ita naxandá Betsaida! Tsà ya-làne naxandá Tiro kò Sidón nga k'oas'ín kis'iaàn kjoxkón xi ndaà tjín xi komà ya ijìn naxandá tsajòn, tsà jña x̄ita Tiro kò Sidón kijtsee, jyeé-la nikje naxá íkjá kò chijo ni'ín kisikaàjno skò koni seña nga jye kisikájno kjoa ts'e jé-la, mì tì jé ótsji-ne.

22 Tanga k'oaá xán-nò, k'e nga jè nàchrjein nga sindaàjìn, isaá tse kjo'in s'e-nò mì k'oaá-ne koni jña x̄ita naxandá Tiro kò Sidón.

23 Koa jño xi x̄ita naxandá Capernaum tsajòn, ¿a k'oaá s'ín mokjeiín-nò nga jchaxkón-nò ján ngajmii? Majìn, yaá kitsajnajñoò i'nde ñánda tjín kjo'in. Tsà yaá-làne naxandá Sodoma k'oas'ín komà kjoxkón xi komà tsajòn, jè naxandá Sodoma tákó kijnaá-la skanda nàchrjein i'nde.

24 K'oaá xán-nò, k'e nga kijchò nàchrjein nga sindaàjìn, isaá tse kjo'in s'e-nò mì k'oaá-ne koni jña x̄ita naxandá Sodoma.

Ñánda sakó-ná kjoa nìkjáya ts'e inima-ná
(Lucas 10:21-22)

25 Jña nàchrjein koi Jesús kitsò:

—Na'èn xi tsiji ngajmii kò tsiji isò'nde, jeya síkijna-lè nga jña kjoa koi tsibì'ma-la jña x̄ita xi tjín-la kjoachjine kò xi 'ño tjín-la kjohítsjeèn nga jña tsakoò-la xi taxkì ndí x̄ita ima kjoa.

26 Jon, Na'èn, nga k'oaá s'ín kjòmejèn-lè.

27 Ngats'iì kjoa ts'e kjotíxoma, 'aán kisingsatsja-na Na'èn-na. Mitsà yá xi beèxkon yá-né xi Ki'ndí-la ma, tajngoò jè xi Na'èn ma; tikoáá mìtsà yá xi beèxkon yá-né xi Na'èn ma, tajngoò jè xi Ki'ndí-la beèxkon; kò jè Ki'ndí-la kòkò-la jña x̄ita xi jè mejèn-la nga skoexkon, yá-né xi Na'èn ma.

²⁸ Nchrobáchón-ná ngats'ioò xi jye ijta-nò nga nìxá kò nga kich'àjen ch'á-nò, 'aán síkjáya-nò.

²⁹ Jch'ajen-kò-ná jè yá ìbò xi 'an 'yajen mé-ne nga koma-nò kòs'ín s'een koni s'ín s'iaàn 'an. K'oas'ín t'een koni 'an nga tjin-na kjoatsejta kò indaá kjoa tjin inima-na. K'oas'ín sakó-nò kjoa nìkjáya ts'e inima-nò.

³⁰ Jè yá ìbò kò ch'á xi 'an sik'àjen-nò, jna-né, mìtsà 'ñó i'í.

12

Yá xita xi otixoma-la jña nachrjein nìkjáya

(Marcos 2:23-28; Lucas 6:1-5)

¹ Jè nachrjein nìkjáya, Jesús kò xita xi kota'yàt'aà-la ya ja ya ñánda títje trigo. Koa jña xita xi kota'yàt'aà-la Jesús kjòhòjò-la. K'eé tsate natín-la trigo, ìkjoàn kiskine.

² Jña xita fariseo k'e nga kijtseè, kitsò-la Jesús:

—Chítsején-la jña xita xi kota'yàt'aà-lè, jè kjoa xi nchis'ín; mìkì tji'nde nga k'oas'ín koma jè nachrjein nìkjáya.

³ Jesús kitsò-la:

—¿Jño, a mìtsà jye tíjìn-nò koni s'ín tíchja Xojon-la Nainá koni kis'iìn xitaxá ítjòn xi ki'mì David kò jña xita-la xi kjihjta k'e nga kjòhòjò-la?

⁴ Jahas'en ni'ya-la Nainá koa tsakjèn inchrajín tsjeè-la Nainá xi mìkì tji'nde-la nga jè David kòkjen kò xita xi kjihjta kò; ta jña nò'mù tji'nde-la nga kòkjen.

⁵ ¿A tìkooá mìtsà jye tíjìn-nò koni tsò kjotixoma xi kiskì Moisés? Nga jña nò'mù, ya ìya ìngo ítjòn, síxá-né nas'ín jè nachrjein nìkjáya, kò nas'ín síxá mìtsà jè nchihótsji.

⁶ 'An, k'oaá xan-nò, jngoò tíjna ìjndé xi ìsa jeya tíjna mì k'oaá-ne koni jè ìngo ítjòn.

⁷ Ngats'ioò jño mìkì machiya-nò kó tsòya-ne Xojon-la Nainá nga tsò: “'An, mejèn-na nga kátas'e-nò kjohimatakòn, kì tã tsjaà cho nìk'eèn kjotjò xi 'an 'biù-ná.” Tsà kochiya-nò, mì-la kù kjo'in k'oi-la xita xi mìtsà jè tjin-la.

⁸ K'oaá s'ín tjin, 'an xi Kì'ndí-la Xita xan-la yijo-na, 'aán otixoma-la nachrjein nìkjáya.

Mé kjoa xi kisakò-la Jesús k'e nga kisindaà jngoò-ne xita nachrjein nìkjáya

(Marcos 3:1-6; Lucas 6:6-11)

⁹ Ìkjoàn kù-ne Jesús ya ì'nde jè; jahas'en jngoò ni'ya ìngo sinagoga.

¹⁰ Ya tíjna jngoò xita xi kixit'aà jngoò tsja. Jña xita xi ya títsajna kiskònangui-la Jesús nga mejèn-la kòhòngui, kitsò-la:

—¿A tji'nde-né nga kjondaà-ne xita k'e nga jè nachrjein nìkjáya?

¹¹ Jesús kitsò-la:

—Jño, tsà tíjna jngoò-nò orrè kò tsà ya skaya ngajo, ¿a mìtsà konguínachrjeè nas'ín nachrjein nìkjáya?

¹² Jyeé 'ya, isaá 'ñó chí-la jngoò xita mì k'oaá-ne koni jngoò orrè. Koií kjoa-la nga tji'nde-né nga kòsìkooá xita nas'ín jè nachrjein nìkjáya.

¹³ Jesús kitsò-la jè xita xi kixit'aà jngoò tsja:

—Tjeèndojò ndseji.

Xita jè, tsijmeé tsja, nitoón kjondaà-ne; k'oaá tì kji komà-ne koni kji xi ìjngoò.

¹⁴ Jña xita fariseo, k'e nga itjo-ne ìngo, ìkjoàn tsajoóya-ne nga mejèn-la sìk'en Jesús.

K'oaá s'ín tsitasòn 'én xi kùichja Isaías xi it'aà ts'e Jesús

¹⁵ Jesús, k'e nga kijtseè nga jña xita fariseo mejèn-la sìk'en, itjo ni'ya, kù. Kjìn xita kùtjingui-la. Jesús kisindaà-ne ngats'ì xita xi xk'én.

¹⁶ Kitsjaà-la okixi jña xita nga mìkì keènojmit'in yá-né jè.

¹⁷ K'oaá s'ín komà mé-ne nga tsitasòn-ne 'én xi kùichja Isaías, xita xi kùichja ngajo-la Nainá, nga kitsò:

¹⁸ Ì tíjna jè chí'nda-na jè xi 'an jaàjñaà,

xi 'ńó matsjake,
tjín-la kjotsja inima-na xi it'aà ts'e.
'Aán tsjaà-la Inima Tsjeè-na
nga jè kichjajin-la ngats'ii xita isò'nde xi kjoakixi
mé-ne nga koma sindaàjin-la.

¹⁹ Mìtsà xita skaàn-ko, ko nì mé 'én xi 'ńó kichja,
ko mì kì kìná'ya-la ya jya ndiyá 'én xi kichja.

²⁰ Mìkiì skít'o jngoò yá inaxo xi jye mejèn tít'ò,
tikoaá mìkiì sùkìts'o jngoò nì'in xi ta nì'ndijí tìbitjo sa-la.
K'oas'in s'iin skanda k'e nga kojindaàjin xi kjoakixi.

²¹ Jñà xita naxandá xi tjín isò'nde xi mìtsà xita judío,
kòkjeiin-la nga skóna-la kjondaà xi tsjá-la.

*Mé xi komat'in jñà xita xi chjajno-la Inima Tsjeè-la Nainá
(Marcos 3:19-30; Lucas 11:14-23; 12:10)*

²² J'ìiko jngoò-la xita Jesús xi mìkiì tsejèn-la, ko xi mìkiì ma chja nga inima ch'o-la neí
tjìin inima-la. Kisindaà-ne Jesús nga komà kiichja-ne koa kjòtsejèn-la.

²³ Ngats'ii xita, tà kjòxkón-la. K'eé kitsò:

—¿A jè jèe xi ya nchrobát'aà-ne tje-la xitaxá ítjòn David [nga jè kíjna ngajo-la]?

²⁴ K'e nga kiì'nchré jñà xita fariseo kitsò:

—Xita jè, ma-la ochrjekàjin inima ch'o-la neí xi tjìin inima-la xita, k'oií-né nga jè
síkjeén nga'ńó-la Beelzebú xi sko-la xita neí.

²⁵ Jesús kijtseèya-la koni s'in nchihóko inima-la, kitsò-la:

—Ngats'ii naxandá xi jòya tjín nga kondra títsajna-la xíkjin, ti yijo-lá tísíxixòña-ne; koa
tsà jngoò naxandá ko tsà jngoò nì'ya xita sùjòya xíkjin, mìkiì koma ndaà kítsajna.

²⁶ Tsà jè xita neí tijè tíhocrjejin-ne yijo-la neí, jòya tís'in xi tijè-ne yijo-la. ¿Kós'in koma
s'e-la nga'ńó nga kotixoma?

²⁷ Jñò bixón-nò nga 'an síkjeén nga'ńó-la xi sko-la xita neí k'e nga ochrjekàjñaà inima
ch'o-la neí. Tsà k'oaá s'in tjín kjoa, jñà xita tsajòn, ¿yá xi tsjá-la nga'ńó k'e nga ochrjekàjin
neí? Koií kjoa-la, tjñà-ne xita-nò keènojímí nga mìtsà kixi kjoa nga jè sko-la neí síkjeén.

²⁸ Tanga 'an, k'e nga ochrjekàjñaà inima ch'o-la neí xi tjìin inima-la xita, jè Inima
Tsjeè-la Nainá tsjá-na nga'ńó. Jè kjoa koi tsòyaá-ne nga Nainá, jyeé i tíhotixoma i it'aà
nangui.

²⁹ ¿Kó s'in koma kjoahas'en nì'ya-la nga sùichijé-la jngoò xita nei-la nì'ya xi tjín-la
nga'ńó tsà mìtsà ítjòn kojìt'aà'ńó? K'eé koma sùichijé-la k'e nga jye kàsìt'aà'ńó.

³⁰ Nìton yá-ne xi mì 'an fit'aà-na, jè-né kondra-na; koa nìton yá-ne xi mìkiì síchjít'aà-na
nga bíxkóyako-na xita xi ts'an koma, jè tísítsjohoba xita.

³¹ 'K'oaá xan-nò, Nainá sùichàat'aà-la jñà xita nita mé jé xi kohótsji, nita mé 'én xi ch'o
tsò kichja. Tanga jè xi Inima Tsjeè-la Nainá kichjajno-la mìkiì jchat'aà-la jé-la.

³² Nìton yá-ne xi kichjajno-na 'an xi Kì'ndí-la Xita xan-la yijo-na, jchat'aà-la jé-la; tanga
jè xi kichjajno-la Inima Tsjeè-la Nainá, mìkiì jchat'aà-la jé-la nì jè nachrjein i'nde, ko nì
jè nachrjein xi iskan kjoí.

*Kós'in 'ya-la kós'in tjín inima-la jñà xita
(Lucas 6:43-45)*

³³ 'Tsà jngoò yá xi ndaà kji, ndaà toò xi ojà-la. Ko tsà jngoò yá xi mìkiì ndaà kji, mìkiì
ndaà toò xi ojà-la. Jngoò yá, jè toò-la yaxkon-la.

³⁴ Jñò, xita tje-la ye-nò! ¿Kós'in ma kìnókjoa 'én xi ndaà tsò nga ch'o tsò inima-nò? Nga
k'oaá tsò 'én xi chja jñà xita koni tsò kjòhìtsjeèn xi tjìin inima-la.

³⁵ Jngoò xita xi 'én ndaà chja, koií-né nga kjondaà tjìin inima-la; koa jngoò xita xi 'én
ts'en chja, koií-né nga kjoats'en tjìin inima-la.

³⁶ K'oaá xán-nò k'e nga kijchò nachrjein nga sindaàjìin, k'oaá s'ín tsjá kinda ngats'ii xita nita mé 'én xi taxki chja.

³⁷ Xi it'aà ts'e 'én-nò, k'oaá s'ín sindaàjìin-nò nga jcha-la tsà xita ndaà-nò, o tsà jé tjín-nò.

Yá xi tsját'in 'én jña xita ts'en xi tjín nachrjein i'ndeì

(Marcos 8:12; Lucas 11:29-32)

³⁸ Jña xita fariseo kò xita xi okóya kjotíxoma-la Nainá xi kiskii Moisés kitsò-la Jesús:

—Maestro, mejèn-najèn nga jcha jngoò-jèn seña xi ji 'nì.

³⁹ Jesús kitsò-la:

—Jña xita ts'en kò xita xi mikii 'nchréñijon-la Nainá, síjé jngoò seña xi jeya tjín; tanga nimé seña skoe; ta jé skoe ts'e Jonás, xita xi kiichja ngajo-la Nainá.

⁴⁰ Koni jé Jonás nga jàn nachrjein kò jàn nitjen tsibijnaya indso'ba jngoò tin je, k'oaá tis'ín 'an xi Ki'ndí-la Xita xan-la yijo-na, jàn nachrjein kò jàn nitjen kójna ijñaà nangui.

⁴¹ Jña xita naxandá Nínive kosítjen-né jé nachrjein k'e nga koìndaàjìin Nainá; jña tsját'in 'én jña xita xi tjín nachrjein i'ndeì, koií kjoa-la nga kisikájno jé-la nga mì tì jé tshótsji-ne k'e nga kiichjaya 'én-la Nainá Jonás; tanga nachrjein i'ndeì, 'an xi tichjàkò-nò, isaá 'ño jeya tijnàa mì k'oaá-ne koni Jonás [tanga jño, mikii mokjeiín-nò].

⁴² Tikoá jé chjoón ítjòn xi ya otíxoma nangui sur, kosítjen-né jé nachrjein k'e nga koìndaàjìin Nainá; jé tsját'in 'én jña xita xi tjín nachrjein i'ndeì, koií kjoa-la nga kjiin nangui j'ii-ne nga j'ii 'nchré-la kjoachjine-la Salomón; tanga nachrjein i'ndeì, 'an xi tichjàkò-nò, isaá 'ño jeya tijnàa mì k'oaá-ne koni Salomón [tanga jño, mikii na'ya-ná].

Inima ch'o-la neí xi f'ii jngoò k'a-ne

(Lucas 11:24-26)

⁴³ 'K'e nga jngoò inima ch'o-la neí bitjokàjìin inima-la jngoò xita, yaá ojmeè i'nde ñánda kixi choòn, ótsji'nde nga sílkáya; k'e nga mikii sakó'nde-la,

⁴⁴ jngoò k'a síkítseèn, tsò: “Kjín-la jngoò k'a-na ni'ya-na ñánda inchrobà-na.” K'e nga bijchó jngoò k'a-ne, beè ni'ya-la nga kjijña, ndaà kisatùcha kò tsjeè choòn.

⁴⁵ Ikjoàn fikjaá nguì itoò xíkjín xi isa ch'o s'ín. K'ée fahas'en-jìin inima-la xita jé; yaá bitsajna. Xita jé isaá 'ño ch'o bijnà koni s'ín tsibijna k'e nga sa ítjòn. Jño, xi xita ts'en 'mì-nò, k'oaá tis'ín komat'ioòn nachrjein i'ndeì.

Nea-la kò 'ndse Jesús

(Marcos 3:31-35; Lucas 8:19-21)

⁴⁶ Táko tik'eé tíhókò xita Jesús nga ijchò nea-la kò 'ndse. Yaá tsibitsajna ján nditsiaán nga mejèn-la kichja-la.

⁴⁷ Jngoò xita kitsò-la Jesús:

—Nea-lè kò jña 'ndsì ján nditsiaán títsajna. Ji xó kòòkò-lè.

⁴⁸ Jesús kitsò-la jé xita xi ijchòkò-la 'én:

—¿A mejèn-lè nga jchii yá-né xi nea-na kò xi 'ndsè?

⁴⁹ K'ée tsakó-la jña xita xi kota'yàt'aà-la. Kitsò:

—Chítsején-lá jña xita koi, jé-né xi nea-na kò jña-né xi 'ndsè.

⁵⁰ Ngats'ii xi síkitasòn koni s'ín mejèn-la Na'èn-na xi tjina ngajmii, jña-né xi 'ndsè xi tichja kò xi nea-na.

13

Kjoa xi mangásòn ts'e xita xi kíndi xojmá

(Marcos 4:1-9; Lucas 8:4-8)

¹ Tije-ne nachrjein, Jesús itjo-ne ni'ya, yaá tsibijnandiì ndáchikon.

² Kjín jchán xita chixoñat'aà-la; Jesús jahas'en jngoò chitso; yaá tsibijnaya. Ngats'ii xita xi i'nga, yaá tsibitsajna indiì nandá.

³ Tsibíts'ia Jesús nga kjín skoya kjoa xi mangásòn tsibénojmí kitsò:

—Jngoò x̄it̄a k̄iì k̄íjnd̄i xojmá.

⁴ K'e nga tsibíts'ia nga kiskíjnd̄i xojmá, chixò chiba ya iya ndiyá. Ikjoàn j'ù n̄ise; tsakjèn.

⁵ Ngui koa t̄jín chixò ñánda nax̄i choòn nga chiba ni'nde t̄jín-la. J̄ña xojmá koi, n̄itoón isò, koi-né nga mì nanga t̄jín nangui.

⁶ Tanga k'e nga itjokàt̄ji ts'oi nga kjòtsjè ndobá, kixiñó, ikjoàn jngoò k'aá kixì, koi-né nga tsjìn-la ima.

⁷ Ngui koa t̄jín chixò ya j̄iìn na'yá. K'e nga kjò'nga na'yá, kisik'en-ngui xka-la xojmá.

⁸ J̄ña xi chixò ñánda nangui ndaà, ndaà tsajà-la toò. Tjín xi kitsjaà jngoò s̄ind̄o nga jngoò ìjngoò xojmá, t̄jín xi kitsjaà jàn kaàn, koa t̄jín xi kitsjaà katé.

⁹ Ndaà t̄iná'yaà koni xan-nò.

Mé-ne kjoa xi mangásòn tsakóya-ne Jesús

(Marcos 4:10-12; Lucas 8:9-10)

¹⁰ J̄ña x̄it̄a xi kota'yàt'aà-la Jesús ijchòkon ñánda t̄jna koa kiskònangui-la kitsò-la:

—¿Mé-ne k'oa s'ín nokjoà-la x̄it̄a kjoa xi mangásòn k'e nga okoòyi?

¹¹ Jesús kitsò-la:

—J̄nò, Nainá jye kitsjaà-nò nga jchaa kjoa'ma-la xi bénojmiya kó s'ín otíxoma jè xi ngajm̄i nchrobá-ne. Tanga j̄ña x̄it̄a xi kj'eji, mìkiì t̄j̄iìn-la.

¹² Jè xi t̄jín-la kjohítsjeèn, k'oií isa-la skanda tsatoó s'e-la, tanga jè xi tsjìn-la, skanda t̄já'aán-la mé xi chiba t̄jín-la.

¹³ Koií kjoa-la k'e nga okoòya, koií 'én chjà-la kjoa xi mangásòn. J̄ña x̄it̄a koi, sík'aá xkon tanga mìkiì tsejèn-la. Binchá líká-la tanga mìkiì 'nchré, t̄ikoáá mìkiì machiya-la.

¹⁴ Kjoa ts'e x̄it̄a koi, k'oaá s'ín bitasòn koni kitsò Isaías x̄it̄a xi kiichja ngajo-la Nainá, nga kitsò:

J̄nò, nas'ín í'ñó-isa k̄iná'ya-nò tanga mìkiì kochiya-nò,

nas'ín í'ñó-isa chítsejèn-nò tanga mìkiì jchaa.

¹⁵ Inima-la x̄it̄a koi, tájaaj̄iìn t̄jín;

tsibíchjoàjto líká-la, tíchjoàjto xkon.

Koií kjoa-la mìkiì ndaà 'nchré kò mìkiì tsejèn-la kò mìkiì fahas'en-j̄iìn-la.

K'oaá ma-ne nga maj̄ìn-la nga 'an fit'aà-na mé-ne nga 'an s̄indaà-na.

¹⁶ J̄nò, mé tà ndaà-nò nga t̄jín xkoòn nga ma tsejèn-nò kò t̄jín líká-nò nga ma na'yá kjoa xi tíma n̄achrjein i'ndeì.

¹⁷ Okixií xi xan-nò, kj̄ìn x̄it̄a xi kiichja ngajo-la Nainá kò xi x̄it̄a kixi kjòmejèn-la nga skoe jè xi j̄nò titsa'yaà tanga mìkiì kijtsee; t̄ikoáá kj̄ìn x̄it̄a kjòmejèn-la nga kj̄i'nchré jè xi j̄nò titsana'yà tanga mìkiì kiì'nchré.

Kó tsòya-ne kjoa xi mangásòn ts'e xojmá

(Marcos 4:13-20; Lucas 8:11-15)

¹⁸ T̄iná'yaà kó tsòya-ne jè kjoa xi mangásòn ts'e x̄it̄a xi k̄íjnd̄i xojmá.

¹⁹ J̄ña xojmá xi chixò iya ndiyá, jè गया-la koni j̄ña x̄it̄a xi 'nchré 'én-la Nainá koni s'ín otíxoma tanga mìkiì machiya-la; f'ù x̄it̄a neií, ikjoàn faáx̄ìn jè 'én j̄iìn inima-la x̄it̄a.

²⁰ J̄ña xojmá xi chixò ya ñánda nax̄i choòn, jè गया-la x̄it̄a xi 'nchré 'én-la Nainá. Tsjaá ma-la nga sa 'nchré.

²¹ Tanga jè-nè nga tsjìn-la ima, ta chiba n̄achrjein chíkjoa-la. K'e nga mé kjoa xi sakó-la kò tsà x̄it̄a fit̄jngui kondra-la nga jè ngat̄j̄i-la 'én-la Nainá, n̄itoón sík̄ijna ndiyá-la Nainá.

²² J̄ña xojmá xi chixò j̄iìn ñánda t̄jín na'yá, jè गया-la x̄it̄a xi 'nchré 'én-la Nainá tanga 'ñó síkájno kjoa ts'e tsojm̄i xi t̄jín isò'nde kò jè kjoa nch̄iná konachan-la. J̄ña kjoa koi sík̄its'ón-j̄iìn 'én-la Nainá, k'oaá ma-ne nga mìkiì makj̄ìn-ya.

²³ Tanga j̄ña xojmá xi chixò ñánda nga nangui ndaà, jè गया-la x̄it̄a xi 'nchré 'én-la Nainá koa machiya-la; ikjoàn makj̄ìn-ya 'én, k'oaá गया-la koni yá xi ojà-la toò. Tjín xi tsjá katé; t̄jín xi tsjá jàn-kaàn; t̄jín xi tsjá jngoò s̄ind̄o nga jngoò ìjngoò yá.

Kjoa xi mangásòn it'aà ts'e ijñá xi mìkìi ndaà

²⁴ Jesús nguì jngoò kjoa xi mangásòn tsakóya-la xita, kitsò-la:

—Koni s'ín otíxoma jè xi ngajmìi nchrobá-ne, k'oaá ngaya-la koni jngoò xita xi 'ñó ndaà xojmá-la trigo tsibítjesòn nangui-la.

²⁵ Tanga k'e nga kjifè yije kóhótjín xita, j'ìi kondra-la nga tsibítjejiìn xka ijñá xi mìkìi ndaà ya jjiìn trigo. Ikjoàn kiì.

²⁶ K'e nga jye kjò'nga jñà trigo koa kixò-la natín, yaá tsatsejèn-jiìn ijñá xi mìkìi ndaà.

²⁷ K'ée kiì jñà ch'i'nda nga tsibénojmí-la nei-la. Kitsò-la: “Na'èn, jñà xojmá xi tsibítjiì ya nangui-lè, ndaà-né. Tanga, ¿ñánda j'ìi-ne ijñá xi mìkìi ndaà xi tsatsejèn-jiìn trigo?”

²⁸ Jè nei-la nangui, kitsò: “Jngoò-la xita kondra-na xi okis'iìn.” K'ée kitsò jñà xita ch'i'nda: “¿A mejèn-lè nga konguí-jen, chjínèjiìn-jen jñà ijñá xi mìkìi ndaà?”

²⁹ Tanga jè nei-la nangui kitsò: “Majìn, tsà chjínè jñò ijñá xi mìkìi ndaà, tsà koi nachrjein-la yaá chjínèkjoò jñà trigo.”

³⁰ Tíkooá-ne kàtamajchákjoò ingajò skanda k'e nga jye kojchá. K'e nga jè nachrjein nga sìncháxkó, 'aán koxán-la ch'i'nda xi kojìxkó: “Ítjòn xìn kìncha ijñá xi mìkìi ndaà, kò'ñójté-né mé-ne nga kitì-ne. Nga koma iskan kìncháxkó jñà trigo; yaá kìncha iya ni'nga-na.”

Kjoa xi mangásòn it'aà ts'e xojmá mostaza

(Marcos 4:30-32; Lucas 13:18-19)

³¹ Jesús ijngoò k'a tsakóya-la xita kjoa xi mangásòn, kitsò-la:

—Koni s'ín otíxoma jè xi ngajmìi nchrobá-ne, jè mangásòn-kò koni kji xojmá mostaza k'e nga jngoò xita bítjejiìn nangui-la.

³² Okixi-né xojmá jè, jè xi isa itsé kji ngats'iì xojmá xi tjín, tanga k'e nga jye majchá, isaá 'nga ma koni xka xi ma chine xi sitje indii ni'ya. K'oaá kji 'nga ma koni jngoò yá 'nga; f'iì nise xi tjímajjiìn isén, jñà chrja-la ya bíndaà'a tjé-la nise.

Kjoa xi mangásòn it'aà ts'e na'yo san

(Lucas 13:20-21)

³³ Jesús nguì jngoò k'a tsakóya-la xita kjoa xi mangásòn, kitsò-la:

—Koni s'ín otíxoma jè xi ngajmìi nchrobá-ne, k'oaá ngaya-la koni jè na'yo san, k'e nga jngoò chjoón síkájjiìn jàn chibá skoan inchrajín, masan yije-né kóhokji na'yo.

Jesús, kós'ín kisikjeén kjoa xi mangásòn

(Marcos 4:33-34)

³⁴ Ngats'iì 'én koi, Jesús, nguì kjoa xi mangásòn tsakóya-la xita; nimé 'én kiìchja xi mìtsà kjoa xi mangásòn tsibénojmí.

³⁵ K'oaá s'ín tsitasòn koni s'ín kitsò jè xita xi kiìchja ngajo-la Nainá nga kitsò: Kjoa xi mangásòn kichjà.

Koií kjoa kènojmiá kjoa xi tjí'ma skanda tjen-ne nga kisindaà isò'nde.

Kó tsòya-ne kjoa xi mangásòn it'aà ts'e ijñá xi mìkìi ndaà

³⁶ Jesús k'e nga kisihixat'aà xita xi kjìn ma; ikjoàn jahas'en ni'ya. Yaá ijchòkon xita xi kota'yàt'aà-la. Kitsò-la:

—Tènojmi-nájen kó tsòya-ne jè kjoa xi mangásòn kò jè ijñá xi mìkìi ndaà xi tjín ya jjiìn trigo.

³⁷ Jesús kitsò:

—Jè xi kíjndi xojmá xi ndaà, 'an-ná xi Ki'ndí-la Xita xan-la yijo-na;

³⁸ kò jè nangui, jè isò'nde; jñà xojmá xi ndaà, jñà-né xita xi tútsajnajjiìn kjotíxoma-la ngajmìi; jñà ijñá xi mìkìi ndaà, jñà-né xi xita-la xita neií;

³⁹ ko jè x̄ita kondra xi tsibítjē ijñá xi mìkiì ndaà, t̄ijè-ne x̄ita neí; k'e nga jye sincháxkó tsojmì xi kojchá jè ngaya-la k'e nga kjoehet'aà isò'nde; koa jñà xi bíxkó tsojmì, jñà ngaya-la àkjale.

⁴⁰ K'oaá s'ín sincháxkó ijñá xi mìkiì ndaà mé-ne nga kotsjòjìn-ne ni'ín nga kit̄i, k'oaá s'ín koma k'e nga kjoehet'aà isò'nde.

⁴¹ 'An xi Ki'ndí-la X̄ita xan-la yijo-na siikasén àkjale-na it'aà ts'e kjotíxoma-na mé-ne nga koiìxkó ngats'ìi x̄ita xi bí't'in-la x̄ita xi kj'eíí nga kátátsji jé, ko ngats'ìi x̄ita xi ch'o s'ín.

⁴² Yaá kotsjoya ngajo ñánda títi ni'ín; yaá skindàya ko s̄ijts'ìin ni'ño.

⁴³ Koa jñà xi x̄ita kixi, k'oaá s'ín ote kotsejèn koni ndobá-la ts'oí ya ñánda nga tíhotíxoma Nà'èn-la. ¡Ndaà t̄iná'yaà koni xan-nò!

Jngoò tsojmì chjí xi kisijna'ma

⁴⁴ 'Koni s'ín otíxoma jè xi ngajmì nchrobá-ne, k'oaá ngaya-la koni jngoò ton xi 'ño chjí xi t̄jna'ma j̄iìn nangui. Jè x̄ita xi sakó-la, tsjaá ma-la. T̄iyaá jngoò k'a bíjna'ma-ne. K'ée f̄i kat̄jna yije tsojmì xi t̄jín-la; ikjoàn otse nangui jè, nga ts'e koma ton xi 'ño chjí-la.

Jngoò ndát̄on chjí

⁴⁵ 'Koni s'ín otíxoma jè xi ngajmì nchrobá-ne, k'oaá t̄is'ín ngaya-la koni jngoò x̄ita xi koi xá s'ín nga tsojmì ot̄ijnaya. Ótsji ndát̄on chjí xi 'ño ndaà.

⁴⁶ K'e nga jye sakó-la xi 'ño chjí, ikjoàn f̄i kat̄jna yije tsojmì-la xi t̄jín-la; k'ée otse ndát̄on jè.

Nà'ya xi bíxkóya t̄in

⁴⁷ 'Koni s'ín otíxoma jè xi ngajmì nchrobá-ne, t̄ikoaá k'oaá s'ín ngaya-la koni jngoò nà'ya xi n̄ikatjē-j̄iìn ndáchikon mé-ne nga koma kj̄in skoya t̄in koiìxkóya-ne.

⁴⁸ K'e nga jye tse nà'ya-la jñà x̄ita xi sík'en t̄in, f̄iko ya ind̄i ndáchikon; yaá faáj̄iìn ngats'ìi t̄in xi ndaà kjoàn; n̄is̄iyá binchá; koa jñà t̄in xi mìkiì ndaà kjoàn, síkatsjoò-né.

⁴⁹ K'oaá s'ín koma k'e nga kjoehet'aà isò'nde, kit̄jojen àkjale xi kjoaáj̄iìn jñà x̄ita xi ch'o s'ín ya ñánda t̄ítsajna x̄ita kixi.

⁵⁰ Ko jñà x̄ita xi ch'o s'ín kotsjoya ngajo ñánda títi ni'ín; yaá skindàya ko s̄ijts'ìin ni'ño.

Tsojmì chjí xi x̄itse ko xi jye kòjchínga

⁵¹ Jesús kiskònangui-la jñà x̄ita, kitsò-la:

—¿A mach̄iyaá-nò ngats'ìi kjoa koi?

Jñà x̄ita kitsò:

—Jon, Nà'èn.

⁵² K'ée kitsò-la Jesús:

—Jngoò x̄ita xi okóya kjotíxoma-la Nainá xi kiskì Moisés k'e nga kota'yà kó s'ín otíxoma jè xi ngajmì nchrobá-ne, k'oaá s'ín ngaya-la koni jngoò nei-la ni'ya xi 'nchaxkó-la tsojmì, koa k'e nga mochjeén-la, ochrje tsojmì chjí xi x̄itse, o xi jye kòjchínga.

Kó kitsò x̄ita k'e nga k̄i Jesús ján naxandá-la Nazaret (Marcos 6:1-6; Lucas 4:16-30)

⁵³ Jesús, k'e nga jye tsibénojmiya kjoa xi mangásòn, k̄i-ne.

⁵⁴ K'e nga ijchò-ne nangui-la ján Nazaret, ya ni'ya ingo sinagoga, tsibíts'ia nga tsakóya-la x̄ita 'én-la Nainá. Koa jñà x̄ita t̄a kjòxkón-la, k'ée kitsò:

—¿X̄ita jè, ñánda komà-la ngats'ìi kjoachjine xi okóya? ¿Kó ma-ne nga ma-la s'ín kjoxkón xi ndaà t̄jín?

⁵⁵ ¿A mìtsà jè ti-la chjineyá? ¿A mìtsà jè nea-la xi 'mì María? ¿A mìtsà 'ndse ma Jacobo, José, Simón, ko Judas?

⁵⁶ T̄ikoaá, ¿a mìtsà i t̄ítsajnaj̄iìn-ná jñà íchjín ndichja? ¿Ñánda ma yije-la kjoa koi?

⁵⁷ K'oaá ma-ne nga mìkiì kòkjeiín-la it'aà ts'e Jesús. Tanga jè Jesús kitsò-la:

—Jngoò xita xi chja ngajo-la Nainá, nita ñá naxandá-ne yaxkón-né, tanga ya naxandá-la ko ni'ya-la mìkì yaxkón.

⁵⁸ Mìkì kjin kjojkón xi ndaà tjin kis'iin nga jña xita xi ya i'nde-la mìkì kòkjeiin-la it'aà ts'e Jesús.

14

Kii komà k'e nga k'en Juan xi kis'iin bautizar xita
(Marcos 6:14-29; Lucas 9:7-9)

¹ Jña naxrjein koi, jè Herodes xi xitaxá ítjòn tjna ya nangui Galilea, kii'nchré koni s'in bénojmi xita mé kjoa xi tís'in Jesús.

² Kitsò-la jña xita xi síxá-la:

—Xita jè, jè-né xi 'mì Juan xi kis'iin bautizar xita xi jye jaáya ijngoò k'a-la. K'oaá ma-ne nga tjin-la nga'ño nga ma-la s'in kjojkón xi ndaà tjin.

³ Nga isa kjòtseé, jè Herodes kitsjaà okixi nga kitsobà'ño Juan, ikjoàn kiskinìs'en ndayá, koi kjoa-la nga jè chjoón Herodías xi chjoón-la Felipe xi 'ndse komà Herodes k'oaá s'in kisijé.

⁴ Koi kjoa-la nga jè Juan xi kis'iin bautizar xita, kjin k'a okitsò-la Herodes: “Mìkì tji'nde-lè nga ji tijnakoi chjoón-la 'ndsì.”

⁵ K'oaá ma-ne nga jè Herodes mejèn-la kisik'en Juan, tanga jña kitsakjòn-la xita naxandá, nga jyeé tjin-la naxandá nga jè Juan, jè xita xi chjaya ngajo-la Nainá.

⁶ K'e nga ijchò nó-la jè Herodes, tsachrje s'eí-la koa jè tsòti-la Herodías kitè nga nguixkon xita xi títsajna s'eí. Jè Herodes, 'ño ndaà kisaseèn-la.

⁷ Koa kitsjaà kixi 'én-la nga tsjá yije-la mé xi sijé-la jè tsòti.

⁸ Koa jè nea-la chinchá'a ítjòn jè tsòti nga kátasjé-la sko Juan. Jè tsòti, k'ée kitsò-la Herodes:

—Tjiì-ná sko Juan xi kis'iin bautizar xita, tinaya-ná chrobate.

⁹ Jè Herodes xi xitaxá ítjòn tjna, kjòba-la k'e nga kii'nchré-la jè tsòti. Tanga koi kjoa-la nga jye kitsjaà kixi-la 'én nga nguixkon xita xi ya títsajna s'eí, k'ée kitsjaà okixi nga k'oi-la sko Juan jè tsòti.

¹⁰ Jè Herodes kitsjaà-la okixi xita-la nga tsatesin Juan ya iya ndayá.

¹¹ Ikjoàn kiiko sko Juan, tjíya-la chrobate nga kitsjaà-la jè tsòti, ko jè tsòti kisingsja nea-la.

¹² K'ée ijchò xita xi kota'yàt'aà-la Juan; kiskoé yijo-la nga jye k'en, ikjoàn kii kihijìn; nga komà iskan, kisik'i'nchré Jesús.

Kó kis'iin Jesús nga 'òn jmii xita kisikjèn
(Marcos 6:30-44; Lucas 9:10-17; Juan 6:1-14)

¹³ Jesús, k'e nga jye kii'nchré jè kjoa xi komàt'in Juan, tà tajngoò kii-ne; tsibijna'ya jngoò chitso; ijchò jngoò i'nde it'aà xìn. Tanga jña xita, nga jye kii'nchré nga kii-ne Jesús, tikoá kii'tjingui-la; saà ndsokóó kii-ne ngats'i xita xi ya chrañàt'aà-la naxandá-la.

¹⁴ Jesús, k'e nga itjojen chitso, kijtseè nga 'ño kjin ma xita xi títsajna; kjòhimakeè-né. K'ée kisindaà-ne ngats'i xita xi xk'én.

¹⁵ Nga jye kjòhoxòn jña xita xi kota'yàt'aà-la Jesús ijchò kinchat'aà-la, kitsò-la:

—Jye kjòhoxòn, ko i'nde jè, it'aà xìn-né; nimé tjin. Kot'in-la jña xita kàtji-ne nga kàtatse tsojmì xi skine jña naxandá ñánda nga chrañàt'aà.

¹⁶ Jesús kitsò:

—Mìkì kjoì-ne. Tjiì-là jño xi kokjen xita koi.

¹⁷ Xita xi kota'yàt'aà-la Jesús kitsò:

—Nimé tjin-najen. Tà 'òn ma inchrajín ko jò ma tìn xi títsajna-najen.

¹⁸ Jesús kitsò-la:

—Nchrohóko-ná ijndé.

¹⁹ K'ée kitsò-la jǎa x̄ita xi k̄jìn ma-ne nga kàt̄itsajna j̄iìn ij̄nà; ik̄joàn kiskoé j̄nà inchr̄aj̄ín xi 'òn ma-ne k̄o j̄nà t̄in xi j̄ò ma-ne; ik̄joàn kiskoótsej̄èn ngaj̄miì, kitsjaà-la k̄jondaà Nainá, ik̄joàn kisixkoaya inchr̄aj̄ín; k'ée kitsjaà-la j̄nà x̄ita xi kota'yàt'aà-la, koa j̄nà x̄ita xi kota'yàt'aà-la kisika'bí-la j̄nà x̄ita xi k̄jìn ma-ne.

²⁰ Tsakjèn yije kóhótj̄ín x̄ita kó nga k̄jòskiì. K'ée tsibíxkó-ne j̄nà xi tsiningui-ne. Ngui tejò nisiyá komà.

²¹ J̄nà x̄ita xi tsakjèn, 'òn jm̄iì ma-ne xi x̄ita x'ìn. M̄ik̄i kòxkeya j̄nà íchj̄ín k̄o ixti.

*Kjoxkón xi kis'ìn Jesús nga k̄i-ne ndsok̄o ya isòn ndáchikon
(Marcos 6:45-52; Juan 6:16-21)*

²² Nga komà iskan, Jesús kisikas'en x̄ita xi kota'yàt'aà-la ya iya chitso mé-ne nga isa ítjòn k̄ijchò-ne ján x̄ijngoàà ndáchikon; koa j̄è Jesús k'ée tíshixat'aà x̄ita xi k̄jìn ma-ne nga jye nchifi-ne.

²³ K'e nga jye kisihixat'aà yije j̄nà x̄ita, Jesús k̄imij̄ín-jno jngoò nindoò nga k̄iì k̄iichj̄at'aà-la Nainá nga t̄a j̄è tajngoò. K'e nga jye k̄oj̄nò, Jesús t̄a tajngoò tíjna ya i'nde j̄è.

²⁴ J̄è chitso jye 'ñó k̄jìn ijchò. J̄è nga'ñó-la nandá jye ngaxìn ngaj̄èn tífik̄o chitso nga j̄è t̄jò bíchjoà ikon-la.

²⁵ K'e nga taj̄nòya isa, Jesús k̄iit̄j̄ingui-la x̄ita xi kota'yàt'aà-la nga k̄iì-ne ndsok̄o ya isòn nandá.

²⁶ J̄nà x̄ita xi kota'yàt'aà-la k'e nga k̄ijtseè nga tífisòn nandá t̄a kitsakjòn-la; k'ée kiskindàya xkón, kitsò:

—Inim̄a ch'o-né.

²⁷ T̄anga Jesús n̄it̄oón k̄iichja-la, kitsò-la:

—'Ñó t'è-là takòn, k̄i tsakjoòn-jèn, 'an-ná.

²⁸ J̄è Pedro, k'ée k̄iichja-la kitsò-la:

—Na'èn, tsà j̄i-né, t̄j̄i'nde-ná nga k̄jisoàn nandá skanda ñánda t̄is̄ij̄ni.

²⁹ Jesús kitsò-la:

—Nchroboí.

J̄è Pedro itjojen-jno chitso koa tsibíts'ia nga k̄iì-ne ndsok̄o ya isòn nandá ñánda s̄ij̄na Jesús.

³⁰ T̄anga k'e nga k̄ijtseè nga j̄è t̄jò 'ñó tí'ba, kitsakjòn-né, ik̄joàn tsibíts'ia nga mejèn kiskaàj̄iindá; k'ée kiskindàya kitsò:

—j̄Na'èn, nachr̄ej̄iìn-ndá-ná!

³¹ Jesús n̄it̄oón kitsobà'ñó tsja, kitsò-la:

—j̄Chibaá mokjeiín-lè it'aà ts'an! ¿Mé-ne j̄ò kòbeè-la takoìn?

³² K'e nga jahas'en-ne chitso ingajò, n̄it̄oón kisijyò-ne t̄jò.

³³ J̄nà x̄ita xi títsaj̄naya chitso chinchaxkó'nchit'aà-la Jesús, kitsò-la:

—j̄Xi okixi, j̄i-né xi K̄i'ndí-la Nainá!

*K̄ií s'ín k̄jondaà-ne x̄ita xi xk'én ján Genesaret
(Marcos 6:53-56)*

³⁴ K'e nga jye tsatoj̄iìn ndáchikon, ijchò ján nangui Genesaret.

³⁵ J̄nà x̄ita xi ya i'nde-la, k'e nga k̄ijtseèxkon Jesús nga j̄è xi ya ijchò, kisikí'nchré x̄ikj̄ín kóhok̄ji ya i'nde ñánda chrañat'aà; ik̄joàn j'ìik̄o-la ngats'ìi x̄ita xi xk'én ya ñánda tíjna Jesús.

³⁶ Tsibítsi'ba-la nas'ín t̄a j̄è itjòn nikje-la tsobà'ñó nga kàtandaà-ne; ngats'ìi xi kitsobà'ñó nikje-la k̄jondaà yijeé-ne.

15

*J̄è kjoa xi síkits'ón x̄ita
(Marcos 7:1-23)*

1 Ijchò i'nga x̄ita fariseo kò x̄ita xi okóya k̄jotíxoma-la Nainá xi kiskìi Moisés xi inchrobà-ne Jerusalén nga kiskònangui-la Jesús, kitsò-la:

2 —¿Mé-ne j̄nà x̄ita xi kota'yàt'aà-lè, k'è nga kjèn, mì k'oaá s'ín oníjno-ne tsja koni s'ín síjé k̄jotíxoma-la x̄ita jchínga-ná?

3 Jesús k'ée kiskònangui-la j̄nà x̄ita koi, kitsò-la:

—¿J̄nò, mé-ne mìkìi nikitason-nò k̄jotíxoma-la Nainá nga koi onguítjngui-là k̄jotíxoma-la x̄ita?

4 Jè Nainá k'oaá kitsò: “Jchaxkoín na'èn-lè kò nea-lè”, kò: “Jè xi chjajno-la na'èn-la kò nea-la t̄jínè-la nga kiyá.”

5 Tanga j̄nò bixón-nó: “Jngoò x̄ita ma k̄itso-la na'èn-la, o nea-la: Mìkìi koma sìichjât'aà-lè; ngats'ìi tsojmì xi t̄jín-na, jè Nainá jye kitsjaà-la.”

6 Bixón-nó nga mì t̄jì k̄i t̄jì'nde-la nga skoexkón na'èn-la kò nea-la; mì t̄jì k̄i koma kosìkò-nò. K'oaá s'ín 'nè j̄nò nga níkjina k̄jotíxoma-la Nainá nga koi onguítjngui-lá k̄jotíxoma tsajòn.

7 J̄nò, x̄ita xi jò ma isén-nò, ndaà k̄iichja it'aà tsajòn Isaías, x̄ita xi k̄iichja ngajo-la Nainá k'è nga kitsò:

8 J̄nà x̄ita koi beèxkón-na xi tà 'én chja tanga jè inima-la k̄jìin t̄jnat'aàxìn.

9 Nìmé chjì-la nga beèxkón-na,

nga k̄jotíxoma-la x̄itaá okóya koni tsà k̄jotíxoma-la Nainá.

10 Jesús, k'ée k̄iichja-la ngats'ìi x̄ita, kitsò-la:

—T̄jíná'yaà kò ndaà k̄atachya-nò.

11 J̄nà tsojmì xi tso'ba kine-ne x̄ita, mìtsà j̄nà xi síkits'ón x̄ita nga nguixkòn Nainá; j̄nà xi tso'ba bitjo-ne xi síkits'ón.

12 J̄nà x̄ita xi kota'yàt'aà-la Jesús ijchòkon, kiskònangui-la, kitsò-la:

—¿A t̄jìin-lè j̄nà x̄ita fariseo kòjti-la k'è nga k̄i'nchré 'én koni s'ín kinokjoi?

13 Jesús kitsò-la:

—Nìton mé tsojmì t̄jè xi mìtsà jè Na'èn-na xi t̄jna ngajmì tsibítjè, t̄jánè-né skanda kò ima-la.

14 Kì k̄i 'nè kindà; j̄nà x̄ita fariseo mejèn-la okó-la ndiyá j̄nà x̄ita xi mìkìi tsejèn-la, tanga j̄nà, t̄ikoáà mìkìi tsejèn-la. Tsà jngoò x̄ita xi mìkìi tsejèn-la, mìkìi koma kòkò-la ndiyá ìjngoò xi t̄ikoá mìkìi tsejèn-la. Ingajò, yaá k̄ixoya ngajo ñánda ch'o choòn.

15 Pedro kitsò-la Jesús:

—Tènojmiya-nájen jè kjoa koi koni s'ín kasi.

16 Jesús kitsò:

—¿J̄nò, a t̄ikoáà mìkìi machiya-nò kó tsòya-ne?

17 ¿A mì fiya-nò ngats'ìi tsojmì xi ndsobaá chine-ná, ìndsò'bá fis'en, ìkjoàn bitjojìin-ne yijo-ná?

18 Tanga ngats'ìi 'én xi ndsobaá nokjoàa-ná, inima-ná bitjojìin; j̄nà 'én koi, j̄nà-né xi síkits'ón x̄ita nga nguixkòn Nainá.

19 Nga yaá bitjokàjìin inima-la x̄ita kjohítsjeèn xi ch'o tsò, koni j̄nà xi x̄ita sík'en, kò xi kjoa chijngui s'ín ts'è x̄ita xi kj'èè k̄i bixan kò xi jye chixàn, kò kjoa chijé, kò kjoa ndiso kò kjoa nga chjajno-ná.

20 Ngats'ìi kjoa koi xi inima-la bitjokàjìin-ne x̄ita, j̄nà-né xi síkits'ón x̄ita; tanga k'è nga bichiaá, nas'ín mìkìi onìjnoáà ndsaá, mìkìi síkits'ón-ná.

*Kó kitsò jngoò chjoón xi xìn nangui-la nga kòkjeín-la it'aà ts'è Jesús
(Marcos 7:24-30)*

21 Jesús itjokàjìin ya ì'nde jè; k̄i ì'nde ñánda 'mì Tiro kò Sidón.

22 Jngoò chjoón xi x̄ita Cananea xi ya ì'nde-la, inchrobà-ne ijchòkon Jesús, 'ñó k̄iichja, kitsò-la:

—Ná'èn, nga ya nchrobàt'aà-ne tje-la xitaxá ítjòn David [nga jì tijna ngajo-la] jchahìma-ná! Ndi tsòti-na ch'in neíí tíjìn inìma-la, tsee kjo'in tísíkjeíin.

²³ Tanga Jesús nì mé 'én kiìchja-la jè chjoón. Kò jñà xitá xi kota'yàt'aà-la Jesús, kitsò:

—Kot'in-la chjoón jè, kàtjì-ne; tsí ch'o kjindáya tjìngui-ná.

²⁴ K'ée kitsò Jesús:

—Nainá kisikasén-na, tà jñà j'ì katsjià xitá naxandá Israel nga kichijà koni orrè.

²⁵ Tanga jè chjoón tsasìxkó'nchit'aà-la Jesús, kitsò-la:

—Ná'èn, tìchjít'aà-ná.

²⁶ Jesús kitsò-la:

—Mikiì ndaà tjín nga chjaà'an-lá niño jñà ixti, ikjoàn k'oi-lá nañá.

²⁷ Tanga jè chjoón kitsò:

—Jon, Ná'èn, tanga jñà nañá kineé xi-la tsojmì xi bixòngui ímixa-la nei-la.

²⁸ Jesús k'ée kitsò-la:

—Jì chjoón, 'ñó ndaà mokjeíin-lè it'aà ts'an. K'oas'ín kàtama koni s'ín mejèn-lè.

Kò jè tsòti-la chjoón, tìk'ée kjòndaà-ne nga tìjè-ne hora.

Kó kis'ìin Jesús nga kìn skoya ch'in kisindaà-ne

²⁹ Jesús kiì-ne ya i'nde ñánda 'mì Tiro kò Sidón koa tsatot'aà indii nandá Galilea. K'ée kiimijìn-jno jngoò nindoò kò yaá tsibìjna.

³⁰ Kìn jchán xitá ijchòtjìngui-la ñánda tíjna; ijchòko-la xitá xi tsá'yá kjoàn, xitá xi mìkiì tsejèn-la, xitá xi kótó tsja kjoàn, xitá xi mìkiì ma chja kò xitá xi k'ejí ch'in tjín-la; yaá kisikítsajngui ndsokò Jesús. Ngats'ìi xitá koi kisindaà-ne.

³¹ Tà kjòxkón-la jñà xitá k'e nga kijtseè nga komà kiìchja-ne jñà xi mìkiì ma chja; koa jñà xi mìkiì ndaà síxá tsja, kjòndaà-ne; xi mì ma fi, komà kiì-ne; koa jñà xi mìkiì tsejèn-la, kjòtsejèn-la. K'ée jeya kisikíjna Nainá koni kisikò jñà xitá-la naxandá Israel.

Kó kis'ìin Jesús nga ñijòn jmù xitá kisikjèn

(Marcos 8:1-10)

³² Jesús kiìchja-la xitá xi kota'yàt'aà-la, kitsò-la:

—Mahimakeè-ná jñà xitá koi. Jye kò jàn nàchrjein tjín-la nga títsajnakò-na, koa nímé tjín tsojmì xi kine. Majìn-na nga tà k'oas'ín sikasén chjan-na ni'ya-la tsá ya kohindaàya ndiyá.

³³ Jñà xitá xi kota'yàt'aà-la Jesús kitsò:

—Jngoò i'nde it'aà xìn ñánda nímé tsojmì tjín, ¿kós'ín koma sakó-ná tsojmì xi kòkjen jñà xitá koi nga 'ñó kìn ma-ne?

³⁴ Jesús kiskònangui-la, kitsò-la:

—¿Kó tjín ma inchrájin xi tíyijò-nò?

Jñà xitá xi kota'yàt'aà-la kitsò:

—Itoò ma-ne inchrájin, kò tjín chiba-najen tìn jtobá.

³⁵ K'ée kitsò Jesús:

—Koa tìn-la kàtìtsajnat'aà nangui jñà xitá.

³⁶ Jesús kiskoé inchrájin xi itoò ma-ne kò jñà tìn jtobá, kitsjaà-la kjòndaà Nainá, ikjoàn kisìxkoaya, kjòngatsja jñà xitá xi kota'yàt'aà-la mé-ne nga kitsjaà-la jñà xitá xi kìn ma-ne.

³⁷ Tsakjèn yije xitá kóhòtjín skanda kó nga kjòskiì. K'e nga tsibíxkó-ne xi tsiningui-ne, ngui itoò nisiyá komà.

³⁸ Jñà xitá xi tsakjèn, ñijòn jmù ma-ne xi xitá x'in, mìkiì kòxkeya jñà íchjín kò ixti.

³⁹ Jesús kisihixat'aà xitá, ikjoàn jahas'en chitso koa kiì ya i'nde ñánda 'mì Magdala.

16

Kó kitsò Jesús k'e nga jñà xitá fariseo kò xitá saduceo kisijé jngoò seña
(Marcos 8:11-13; Lucas 12:54-56)

¹ Jǎa x̄it̄a fariseo ko x̄it̄a saduceo kiikon Jesús ñánda t̄jna nga mejèn-la skót'aà tsà kixi kjoa nga Nainá kisikasén. Kisijé jngoò-la seña xi jeya t̄jín xi ìt'aà ts'e Nainá nchrobá-ne.

² Tanga Jesús kitsò-la:

—K'e nga jye mahixòn, j̄ñò, bixón-nò: “Ndaà choòn nchijòn-lè, inì choòn ján ngajmiì.”

³ K'e nga tajñòya bixón-nò: “Mikiì ndaà choòn nàchrjein ì'nde; ngajmiì inì choòn ko ifi kjiya.” J̄ñò xi jò ma isén-nò, 'ya-nò kó choòn ngajmiì tanga mikiì fiya-nò kó tsòya-ne kjoàkón xi tíma nàchrjein ì'nde.

⁴ Jǎa x̄it̄a ts'en ko x̄it̄a xi mikiì 'nchréñjon-la Nainá, jngoò seña síjé xi jeya t̄jín; tanga nimé seña skoe, tà jè skoe ts'e Jonás, x̄it̄a xi kiichja ngajo-la Nainá.

Jesús yaá kisikítsajna x̄it̄a koi; jè, kiì-né.

*Jesús, mé kjoa xi t̄sín-gásòn-ko kjoh̄tsjeèn xi okóya x̄it̄a fariseo
(Marcos 8:14-21)*

⁵ Jǎa x̄it̄a xi kota'yàt'aà-la Jesús, k'e nga tsatot'aà xijngoaà nandá, kijchàajjìn-la mikiì ts'a inchrájin.

⁶ Jesús kitsò-la:

—Chítsejèn-là koa t̄ikindaa yijo-nò ìt'aà ts'e na'yo san-la x̄it̄a fariseo ko x̄it̄a saduceo.

⁷ X̄it̄a xi kota'yàt'aà-la Jesús tsohókò xíkjin, kitsò-la:

—Koií kotsò-ná nga mikiì kich'á inchrájin.

⁸ Jesús ñit̄oón kijtseèya-la, kitsò-la:

—¿Mé-ne kòkixón-nò nga tsjìn-nò inchrájin? 'Ñó chiba mokjeiín-nò ìt'aà ts'an.

⁹ ¿A mì machiya-nò, a mì bitsjeèn-nò k'e nga kiska'biá inchrájin xi 'òn ma-ne koa 'òn jmiì x̄it̄a x'in tsakjèn? ¿Kó t̄jín ñisijá tsibíxkó-isa?

¹⁰ ¿A mì t̄jijn-nò t̄ikoaá k'e nga kiska'biá inchrájin xi itoò ma-ne ko ñijòn jmiì x̄it̄a tsakjèn? ¿Kó t̄jín ñisijá tsibíxkó-isa?

¹¹ ¿Mé-ne nga mikiì machiya-nò nga 'an mìtsà koi xi otixan-nò ìt'aà ts'e inchrájin? Jè-né nga t̄ikindaa yijo-nò na'yo san-la x̄it̄a fariseo ko x̄it̄a saduceo.

¹² K'eé kjòchya-la nga jè Jesús k'e nga okitsò-la: “T̄ikindaa yijo-nò”, mìtsà na'yo san-la inchrájin xi tsibénojmiì-la, j̄ñà kjoh̄tsjeèn xi okóya j̄ñà x̄it̄a fariseo ko x̄it̄a saduceo.

*Kó kitsò Pedro yá x̄it̄a-ne Jesús
(Marcos 8:27-30; Lucas 9:18-21)*

¹³ K'e nga ijchò Jesús ya ì'nde ñánda 'mì Cesarea ts'e Filipino kiskònangui-la j̄ñà x̄it̄a xi kota'yàt'aà-la. Kitsò-la:

—¿Kó tsò j̄ñà x̄it̄a? ¿Yá-ná 'an xi Ki'ndí-la X̄it̄a xan-la yijo-na?

¹⁴ Kitsò j̄ñà x̄it̄a xi kota'yàt'aà-la:

—T̄jín xi tsò: “Jè Juan xi kis'iìn bautizar x̄it̄a.” Kò t̄jín xi tsò: “Jè Elías.” T̄ikoaá t̄jín x̄it̄a xi tsò: “Jè Jeremías.” Kò xi kj'eij̄ x̄it̄a tsò-né: “Jngoò x̄it̄a xi kiichja ngajo-la Nainá.”

¹⁵ K'eé kitsò Jesús:

—¿Koa j̄ñò, kó bixón? ¿Yá-ná 'an?

¹⁶ K'eé kiichja Simón Pedro kitsò:

—Ji-né xi Cristo [xi xó kisikasén-ne Nainá], Ki'ndí-la Nainá xi t̄jnakon.

¹⁷ Ikjoàn kiichja Jesús; kitsò-la:

—Mé tà ndaà-lè nga jì Simón, ki'ndí-la Jonás. Jè Nainá xi t̄jna ngajmiì tsakó-lè ngats'iì kjoa koi; mìtsà x̄it̄a isò'nde tsibénojmiì-lè.

¹⁸ 'An, k'oaá xán-lè nga Pedro 'mì-lè [nga ndajo tsò-ne]; yaá isòn ndajo jè kındaasoàn naxandá-na; nas'ín jè nga ñó-la kjoabiyaà mikiì s̄ikijne-la j̄ñà x̄it̄a naxandá-na.

¹⁹ 'Aán tsjaà-lè ibi-la xotjoa-la naxandá xi jè otixoma-la jè xi ngajmiì nchrobá-ne; ngats'iì kjoa xi koi'ndi ì isò'nde, t̄ikoaá ján ngajmiì Nainá tsjá'nde-né; kò j̄ñà kjoa xi mikiì koi'ndi ì isò'nde, t̄ikoaá ján ngajmiì, Nainá mikiì tsjá'nde.

²⁰ Jesús kitsò-la j̄ñà x̄it̄a xi kota'yàt'aà-la:

—Kì yá xi bènojmí-là nga 'an-ná xi Cristo [nga 'aán kisikasén-na Nainá].

K'oaá s'in tsibénojmí Jesús kjoabiyaà-la
(Marcos 8:31-9:1; Lucas 9:22-27)

²¹ Tìkoi-ne nàchrjein Jesús tsibíts'ia nga tsibénojmíya-la xita xi kota'yàt'aà-la nga jè, ján kjoì Jerusalén, koa jña xita jchínga kò xita sko-la nõ'mi kò xita xi okóya kjoíxoma-la Nainá xi kiskù Moisés, tseé kjo'in tsjá-la. Siik'en-né. Tanga k'e nga kijchò jàn nàchrjein, kjoaáya-la.

²² Jè Pedro k'eé kiikò Jesús ñánda it'aà xìn nga kiichjako nga mikiì ndaà tjín koni tsò. Kitsò-la:

—Nà'èn, kì k'oaá s'in nìkítsjiin. Mì k'oaá tsò Nainá nga k'oas'in komat'in.

²³ Tanga Jesús kisikáfaya, kitsò-la jè Pedro:

—Tisít'aaxín-ná jì xita neií. Tà mejèn-lè nga jé binchaàtsji-ná. Mìtsà k'oas'in nìkítsjiin koni s'in tjín kjoítsjeèn-la Nainá. Ngaji tà k'oaá s'in nìkítsjiin koni s'in tjín kjoítsjeèn-la xita.

²⁴ Jesús k'eé kitsò-la xita xi kota'yàt'aà-la:

—Tsà yá xi mejèn-la nga xita ts'an koma, kàtatsjeiin-takòn mé xi mejèn-la yijo-la; koni jngoò xita xi 'yajen krò-la, kàtijnandaà nga siikjeiin kjo'in xi kjoa ts'an; ndaà kàtjìt'aà-na.

²⁵ Nga nita yá xita xi mejèn-la kochrjetji yijo-la nga nimé kjo'in sakò-la, tà saá siichija-né kò kjo'in kíjnajiin; tanga jè xi tijnandaà nga tsjá yijo-la xi kjoa ts'an, sakò-la kjoabinachon nga it'aà ts'an ndaà kíjna.

²⁶ ¿Mé xi siikijne jngoò xita nas'in tjoé yije-la isò'nde tsà siichja inima-la? Nimé. ¿A komaá koichjí kjoabiyaà jngoò xita xi majìn-la nga kiyá? Majìn.

²⁷ 'An xi Kí'ndí-la Xita xan-la yijo-na kitjojeén ijngoò k'a-na nga kjoikoaa kjoajeya-la Nà'èn-na kò àkjale-la nga sichikon-t'ian nga jngoò ijngoò xita koni s'in kisikitasòn.

²⁸ Okixí xi xan-nò, títajnajiiin i'nga ijndé xita xi mì kì kiyá skanda k'e nga skoe-na xi Kí'ndí-la Xita xan-la yijo-na nga kitjojen ijngoò k'a nga kotiixoma.

17

Kíi komà nga jahatjìya í'ño isén-la Jesús ya isò'nga nindoò
(Marcos 9:2-13; Lucas 9:28-36)

¹ Nga komà joèn nàchrjein Jesús kiimijìn-jno jngoò nindoò xi 'nga kji; kiikò jè Pedro, Jacobo, kò Juan xi 'ndse ma Jacobo.

² K'e nga ijchò i'nde jè, Jesús, jahatjìya í'ño isén-la nga nguixkon jña xita koi. K'oaá kji komà isén-la koni kji ts'oi kò jè nikje-la kjòchroba-né koni isén ndobá.

³ Jña xita koi tà nitoón kijtseè Moisés kò Elías nga nchijoókjoò Jesús.

⁴ Pedro kitsò-la Jesús:

—Nà'èn, ndaà tjín nga i títajnaá; tsà mejèn-lè jàn ni'ya xkójndà kíndaà-jèn, jngoò tsiji, jngoò ts'e Moisés kò xi ijngoò ts'e Elías.

⁵ K'e nga tíchja Pedro, j'ii jngoò 'nguién-la ifi xi ote kji xi tsibí'ma xita koi, kò ya jjiin ifi kina'yà jngoò-la 'én xi kitsò:

—Jè jèè xi kí'ndí-na xi 'ño matsjake kò xi xó jaàjiin-na; jè tjiná'ya-là.

⁶ Jña xita xi kota'yàt'aà-la Jesús k'e nga kiil'nchré, tà kitsakjòn-né. K'eé tsoyijò tsakjàn skanda it'aà nangui.

⁷ Jesús kiikasit'aà chraña-la; kisikjaníyá-la, kitsò-la:

—Tisítjeen, kì tsakjón-jèn.

⁸ K'e nga kiskoòtsejèn xita koi mì tì yá tjín-ne. Tà jè tajngoò síjna Jesús.

⁹ K'e nga inchrohòjen-t'aà-ne nindoò, Jesús kitsò-la:

—Kì yá xita xi bènojmí-là jè kjoa xi kà'yaà skanda k'e nga kjoaáya-na it'aà ts'e kjoabiyaà 'an xi Kí'ndí-la Xita xan-la yijo-na.

10 Jñà x̄ita xi kota'yàt'aà-là Jesús kiskònangui-là, kitsò-là:

—¿Mé-ne kotsò-ne x̄ita xi okóya k̄jotíxoma-là Nainá xi kiskìi Moisés nga jè Elías k̄joií ítjòn?

11 Jesús kitsò:

—Okixi-né, jè k̄joií ítjòn Elías, k̄jò jè k̄jòindaàjìin yiye kjoa.

12 Tanga 'an, k'oaá xán-nò, jè Elías, jyeé j'ìi. Jñà x̄ita, mìkìi k̄jijtseèxkon. Ta k'oaá s'ín kisikò koni s'ín mejèn-là. K'oaá t̄is'ín k̄omat'ian 'an xi Kì'ndí-là X̄ita xan-là yijo-na; tseé k̄jò'in tsjá-na jñà x̄ita.

13 Jñà x̄ita xi kota'yàt'aà-là Jesús k'eé k̄jòch̄iya-là nga jè Jesús, k'e nga tích̄ja it'aà ts'e Elías, jè Juan xi kis'ìin bautizar x̄ita xi otsò-là.

Kós'ín koma k̄itjokàjìin in̄ima ch'o-là neíi xi t̄jín-là x̄ita

(Marcos 9:14-29; Lucas 9:37-43)

14 K'e nga ijchò Jesús ñánda títsajna x̄ita xi k̄jìn ma-ne, jngoò x̄ita ijchò kasit'aà-là nga tsasìxkò'nchit'aà-là, kitsò-là:

15 —Nà'èn, chah̄imai ki'ndí-na. Ch'in biyaàxín t̄jín-là. 'Ñó tse k̄jò'in sík̄jeíin. Jyeé kòk̄jìn k'a kaàjìin ni'ín k̄jò nandá.

16 Íi kòf'ìikò-là jñà x̄ita xi kota'yàt'aà-lè, tanga mìkìi mandaà-là.

17 Jesús kitsò:

—Jñò x̄ita xi mìkìi mok̄jeíin-nò it'aà ts'an xi ch'o 'nè. ¿Skanda mé n̄achr̄jein k̄ótijnakò-nò? ¿Skanda mé n̄achr̄jein sk̄a-na kjoa-nò? Nchrohókò-ná jè ti ijndé.

18 Jesús tsohótikò jè in̄ima ch'o-là neíi koa itjokàjìin-ne yijo-là jè ti. Tjìjè-ne hora, n̄itoón k̄jòndaà-ne.

19 Jñà x̄ita xi kota'yàt'aà-là Jesús kiskònanguit'aàxìn-là. Kitsò-là:

—¿Mé-ne ngajen mìkìi kòbitjòjìin-najen jè in̄ima ch'o-là neíi?

20 Jesús kitsò-là:

—Mìkìi komà-nò koi-né nga tà chiba mok̄jeíin-nò it'aà ts'an. Okixií xi xan-nò tsà ta ok̄ji kòk̄jeíin-nò koni k̄ji xojmá mostaza nga it̄sé k̄ji, koma k'oín-là nindoò: “T̄ixín ijndé. T'in ján xijngoaa ñánda it'aà xìn.” Koa jè nindoò k̄os̄it'aàxìn-né. Jñò, n̄imé kjoa xi 'in koma-nò tsà ndaa kòk̄jeíin-nò.

21 Jñà in̄ima ch'o-là neíi xi okjoàn, k'eé bitjokàjìin nga nokjoat'aà-là Nainá k̄jò nga bijnachjaán.

K'oaá s'ín tsibénjmi Jesús kjoabiyaà-là xi ma-ne jò k'a

(Marcos 9:30-32; Lucas 9:43-45)

22 K'e nga taña k̄itjen nga t̄jima ya i'nde Galilea, Jesús kitsò-là jñà x̄ita xi kota'yàt'aà-là:

—'An, xi Kì'ndí-là X̄ita xan-là yijo-na, yaá tsoba'ñó-na jñà x̄ita,

23 ikjoàn s̄ik'en-na. Tanga k'e nga k̄ijchò jàn n̄achr̄jein nga k̄iyá, kjoaáya-na.

Jñà x̄ita xi kota'yàt'aà-là k'e nga kiì'nchré 'én koi ta ba koma-là.

Tsojmì xi machj̄t̄jì ts'e ingo ítjòn

24 K'e nga ijchò Jesús k̄jò x̄ita xi kota'yàt'aà-là ján naxandá Capernaum, jñà x̄ita xi bíxkò t̄on ts'e ingo ítjòn kiskònangui-là Pedro kitsò-là:

—Jè Maestro-lè, ¿a mìkìi bíchjì t̄on ts'e ingo?

25 Jè Pedro kitsò:

—Jon, bíchjì-né.

K'e nga jahas'en ni'ya Pedro, Jesús, jè kiìch̄ja ítjòn-là, kitsò-là:

—¿Kó si Simón, jè x̄itaxá ítjòn xi i isò'nde ts'e, yá-né xi sík̄ichj̄t̄jì tsojmì k̄jò t̄on-sá? ¿A jñà-né xi i naxandá-là, o xi jñá-né xi xìn i'nde-là?

26 Pedro kitsò:

—Jñà xi xìn i'nde-là xi bíchjì.

K'eé kitsò-là Jesús:

—Jñà xi i naxandá-la nímé koiichjí.

²⁷Tanga mé-ne nga mì ch'o kitsò-ná jñà xità, t'in ján indii ndáchikon. Tikatjen-jìin kicha libá-lè xi tsobà'ño tìn, koa jè tìn xi chjoé ítjoìn, chíx'eì tso'ba; ya tíj'a jngoò tòn. Komaá-ne nga kichjí xi ts'an kò tsiji. Tikoji, tíchjí-la.

18

Yá xità-ne xi tíjna ítjòn it'aà ts'e Nainá
(Marcos 9:33-37; Lucas 9:46-48)

¹Jñà nachrjein koi jñà xità xi kota'yàt'aà-la Jesús ijchòkon nga kiskònangui-la; kitsò-la: —Jñà xità xi jè otíxoma-la xi ngajmii nchrobá-ne, zyá-ne xi tíjna ítjòn nga isa 'ño chjí-la?

²Jesús kiichjá jngoò-la ndí ti. Kisikasíjna jngoò osen-la jñà xità.

³Kitsò:

—Okixí xi xan-nò, jñò, tsà mì kì sikkatjìya-là kjohítsjeèn-nò kò tsà mì kì k'oas'ín s'een koni jñà ndí ixti mìkii kítjás'en-jñò ñánda tíhotíxoma jè xi ngajmii nchrobá-ne.

⁴Jè xi síkjajen-la iníma-la koni ndí ti jè, jè-né xi tíjna ítjòn-la ngats'iì xità xi jè tíhotíxoma-la xi ngajmii nchrobá-ne.

⁵Nità yá-ne xi it'aà ts'an skoétjò jngoò ndí ti koni jè, 'aán xi skoétjò-na.

Mé xi ok'in-la jñà xità xi jé ótsji-la xità xi kj'eí
(Marcos 9:42-48; Lucas 17:1-2)

⁶Nità yá-ne xi jé skínìjìin jngoò ndí xità imá xi mokjeín-la it'aà ts'an, isaá-la ndaà koma tsà singui'ño jngoò ndajò natsí ís'iin, ikjoàn sikkatjen-jìin ndáchikon ñánda nga 'ño nanga 'ncha nandá.

⁷Imá xó-ne jñà xità isò'nde nga tíjn jchán xità xi ótsji'nde-la nga mejèn-la nga sakó jé. Tanga xó k'oaa koma-ne isò'nde, tanga imá xó-nè jè xità xi ótsji-la jé xi kj'eí xità.

⁸Tsà jè ndsaa kò ndsokò ótsji jé-nò, tíchátjòn koa kjiin tikatsjò. Isaá ndaà-nè tsà xkoán titsjò nga kítjás'een ñánda s'e-nò kjoabinachon, mì k'oaa-ne tsà jò ma ndsaa kò ndsokò koa ján onguió jjiin ní'ín ts'e i'nde kjo'in nità mé nachrjein-ne.

⁹Tsà jè xkoòn ótsji jé-nò, tinachrjeè, kjiin tikatsjò. Isaá ndaà-nè tsà jngoò ma xkoòn nga kítjás'een ñánda s'e-nò kjoabinachon, mì k'oaa-ne tsà jò ma xkoòn koa ján onguió jjiin ní'ín ts'e i'nde kjo'in.

Kjoa xi mangásòn ts'e orrè xi kichijà
(Lucas 15:3-7)

¹⁰'Nijngò ndí xità koi xi nachrjenguiò; k'oaa xán-nò, ján ngajmii, jñà àkjale-la xità koi, yaá titsajna kjit'aà nga nguixkò Na'èn-na xi tíjna ngajmii.

¹¹'An xi Kí'ndí-la Xità xan-la yijo-na koií xá j'i-na nga j'i kàchrjekàjñà kjo'in jñà xità xi kichijà.

¹²'¿Kó bixón? Tsà jngoò xità xi jngoò sìndò ma orrè-la koa tsà sijchaya jngoò ján jjiin ijñá, ¿a mìtsà sìikítsajna jñà xi ñijòn-kaàn kò chrj'oòn ñijòn ma nga kjoí kátsji jè orrè xi kichijà jngoò?

¹³Tsà kotsji-la, okixí xi xan-nò, isaá tsja koma-la nei-la jè orrè xi jngoò ma, mì k'oaa-ne jñà xi kjiin ma xi mì kì kichijà.

¹⁴K'oaa s'ín mejèn-la Nainá xi tíjna ngajmii nga nijngò xità sìichja iníma-la.

Mé xi mochjeén k'e nga sìndaàjìin jngoò-la xità
(Lucas 17:3-4)

¹⁵Tsà jè 'ndsi ch'o tísíko-lè, tìnókjoa-la k'e nga tà jè tajngò tíjna; tindaàjìin-koi jè kjoa-la; tsà kji'nchré-lè, jyeé ndaà kichibà-nò 'ndsi.

¹⁶Tanga tsà mìkii kji'nchré-lè, k'eé tìnókjoa-la tsà jngoò kò tsà jò xità mé-ne nga kji'nchré yije-ne 'én xi chibà koni s'ín tíchja Xojon-la Nainá nga tsò: Mochjeén-né tsà jò kò tsà ján xità xi tsjá 'én nga koma sìndaàjìin nità mé kjoa-ne mé-ne nga chjí-la.

17 Tsà mìkì 'nchréñijon-la jñà xita koi, koatìn-la xita naxandá-la Nainá; koa tsà mìkì 'nchréñijon-la jñà xita naxandá-la Nainá, tà k'oas'ín jchatakòin koni tsà jngoò xita xi mìkì beèxkon Nainá, koni tsà jngoò xita xi tsojmì síkíchítjì.

18 'Okixí xi xan-nò, jñò, ngats'ìi kjoa xi koì'nde ì isò'nde, tikoáá ján ngajmì Nainá tsjá'nde-né; koa jñà kjoa xi mìkì koì'nde ì isò'nde, tikoáá ján ngajmì Nainá mìkì tsjá'nde.

19 'Jngoò k'a koa xan-nò: tsà jò ma-nò ì isò'nde xi tìjngoò takòn nga sijét'aà-là Nà'èn-na xi tíjna ngajmì nita mé kjoa-ne, tsjá-nò.

20 Ya ñánda títsajna jò jàn xita-na xi it'aà ts'an bixoña, yaá tijnajìin osen-la.

21 K'eé kù kasit'aà chraña-la jè Pedro, kiskònangui-la Jesús, kitsò-la:

—Nà'èn, ¿kó tjin k'a siijchàat'aà-la xinguiáa k'e nga tsà ch'o tísiko-na? ¿A skanda itoò k'a?

22 Jesús kitsò-la:

—Mìtsà xan-lè itoò k'a; xaán-lè itoò k'a xi jàn-kaàn ko te.

Jngoò chì'nda xi mì kì kisijchàat'aà-la xíkjin

23 'Koni s'ín otíxoma jè xi ngajmì nchrobá-ne, k'oáá s'ín tjin koni kis'ìin jngoò xitaxá ítjòn xi kisijé-la kindá xita chì'nda-la.

24 K'e nga tís'ín kindá j'ìi jngoò chì'nda-la xi 'ñó kjin millón ton kitjen-la.

25 Chì'nda jè tsjìn-la ton xi koìichíjì-la. Jè nei-la kitsjaà okixi nga kàtasatjna osen jè chá, ko chjoón-la ko ixti-la, ngats'ìi tsojmì xi tjin-la mé-ne nga kochjí-la ton xi kitjen-la.

26 Chì'nda jè tsasìxkó'nchit'aà-la jè nei-la; tsibítsi'ba-la, kitsò-la: “Nà'èn, tjin-lè kjondaà, chíñakjoa-ná; kichjí yijeé-lè ngats'ìi xi kitjen-na.”

27 Jè nei-la kjòhimakeè chì'nda-la, kisijchàat'aà-la nga yije kindá xi kitjen-la koa kisikijnandeí-ne.

28 Tik'e-ne nga itjo ni'ya chì'nda jè, kisatiikjoò jngoò chì'nda xíkjin xi tikoá ton kitjen chiba-la xi ts'e. Kitsobà'ñó is'ìin nga mejèn-la kinchàjta-la, kitsò-la: “Tíchjí-ná xi kitjen-lè.”

29 Koa jè chì'nda xíkjin tsasìxkó'nchit'aà-la, tsibítsi'ba-la. Kitsò-la: “Chíñakjoa-ná, kichjí yijeé-lè xi kitjen-na.”

30 Tanga jè mìkì kòkjeíin-la. Ta saà ndayá kiskinìs'en skanda k'e nga koìichjí yije-la kóhotjin xi kitjen-la.

31 K'e nga kijtsee jñà chì'nda xíkjin xi i'nga, baá koma-la. K'eé kù tsibénojmí-la nei-la ngats'ìi kjoa xi komà.

32 Jè xitaxá ítjòn xi nei-la, k'eé kiskinìkjaá chì'nda jè, kitsò-la: “Jì chì'nda xi ch'o 'nì. 'An kisijchàat'aà-lè ngayije xi kitjen-lè k'e nga tsibítsi'ba-ná.

33 Tikoáá ngaji tji'nde-lè nga jchahimachii chì'nda xingui koni s'ín kisiko-lè nga kjòhimakeè-lè.”

34 Jè nei-la kjòjtíi-la, k'eé kitsjaà okixi nga kàt'ìi-la kjo'in skanda k'e nga koìichjí yije xi kitjen-la.

35 Jesús kitsò:

—Jñò k'oáá tjs'ín sijkò-nò nga jngoò ìjngoò Nà'èn-na xi tíjna ngajmì tsà nga mì koo inima-nò sijchàat'aà-là jé-la xinguiòo.

19

Kiís'ín tsakóya Jesús it'aà ts'e xita xi tsjìn xíkjin (Marcos 10:1-12; Lucas 16:18)

1 K'e nga jye kiichja Jesús, kù-ne ya Galilea ján nangui Judea xi tíjna xijngoàà xajngá nandá Jordán.

2 'Ñó kjin xita kiitjingui-la koa yaá kisindaà-ne ì'nde jè jñà xita xi xk'én.

³ Ijchò i'nga x̄ita fariseo ya ñánda t̄jna Jesús nga mejèn-la skónachan-la. Ijkoàn kiskònangui-la, kitsò-la:

—¿A t̄jì'nde-la xi x̄in nga tsjìn chjoón-la xi n̄ita mé kjoa-ne?

⁴ Jesús kitsò-la:

—¿A k̄j'eè b̄ixkejñò Xojon-la Nainá nga tsò: “Nainá, k'e nga sa tsibíndaà x̄ita, tsibíndaà x̄in kò chjoón?”

⁵ K'oaá kitsò: “K'oaá ma-ne nga jè x̄in s̄ik̄jna na'èn-la kò nea-la nga k̄jnako chjoón-la. Ta jngoò x̄ita koma-ne ingajò.”

⁶ Mìtsà t̄jì jò ma-ne, tà jngoò koma-ne. K'ojì kjoa-la nga mì yá x̄ita t̄jì'nde-la nga s̄ītsjìn-ne x̄ik̄jín xi Nainá kis̄jngoò.

⁷ J̄nà x̄ita fariseo kiskònangui-la Jesús:

—¿Mé-ne jè Moisés kitsjaà'nde-ne nga tsò: xojon kàtasindaà nga koma tsjín x̄ik̄jín x̄ita?

⁸ Jesús kitsò-la:

—Koií-né nga tájaàjìn t̄jín inima-nò, Moisés kitsjaà'nde-nò nga kijnioò íchjín-nò, tanga k'e nga sa tàts'en-la kjoa, mì k'oaá s'ín t̄jín.

⁹ An k'oaá xán-nò, jè x̄in xi tsjín-ne chjoón-la, tsà mìtsà kjoa chijngui t̄s̄íko, kò tsà k̄j'eí chjoón k̄ixan-kò, jyeé kjoa chijngui t̄s'ín jè x̄in. T̄ikoaá tsà jè x̄in xi k̄ixan-kò jngoò chjoón xi kitsjìn x̄in-la, t̄ikoaá kjoa chijngui t̄s'ín.

¹⁰ J̄nà x̄ita xi kota'yàt'aà-la Jesús kitsò:

—Tsà k'oaá s'ín 'ín t̄jín kjoa ts'e x̄ita xi bixan, ìsaá-la ndaà s'e tsà mì k̄ixan x̄ita.

¹¹ Jesús kitsò-la:

—T̄jín x̄ita xi mìk̄i mokjeiín-la k̄joh̄tsjeèn jè; tà j̄nà x̄ita xi Nainá xó k'oaá s'ín kitsjaà-la.

¹² T̄jín x̄ita xi mìk̄i bixan nga xó k'oaá s'ín kits'ìn-ne nga mì íchjín s̄īs'in-la; t̄ikoaá t̄jín x̄ita xi x̄ita x̄ik̄jín okis̄íko nga mì íchjín s̄īs'in-la; t̄ikoaá t̄jín x̄ita xi mìk̄i bixan nga k'oaá s'ín tsibínè-la yijo-la nga mì íchjín s̄īs'in-la nga mejèn-la s̄īxá it'aà ts'e k̄jot̄ixoma-la ngajm̄i. J̄nà x̄ita xi chíkjoa-la nga mokjeiín-la kjoa koi, k'oaá s'ín kàtasíkitasòn.

Kíi kitsò Jesús nga kis̄ichikon-t'in ndí ixti

(Marcos 10:13-16; Lucas 18:15-17)

¹³ J̄nà x̄ita j'ìiko-la ndí ixti ñánda t̄jna Jesús nga mejèn-la koòt'aà-la tsja kò k̄ītsi'batjì, tanga j̄nà x̄ita xi kota'yàt'aà-la Jesús tsohótiko j̄nà x̄ita xi j'ìiko ndí ixti.

¹⁴ K'eé kitsò Jesús:

—T̄jì'nde-là j̄nà ndí ixti nga kàtjanchrobákon-na. Kì binchahikon-là. J̄nà xi k'oa s'ín t̄jín inima-la koni ts'e ndí ixti, jyeé ts'e ngats'ìi k̄jondaà xi t̄jín ya ñánda t̄hot̄ixoma jè xi ngajm̄i nchrobá-ne.

¹⁵ Jesús tsohósòn-la tsja j̄nà ndí ixti; ijkoàn k̄ī-ne ya j'nde jè.

X̄ita xi 'ñó k̄jìn tsojm̄i t̄jín-la

(Marcos 10:17-31; Lucas 18:18-30)

¹⁶ Jngoò x̄ita ijchòkon Jesús, kiskònangui-la, kitsò-la:

—Maestro, ¿mé k̄jondaà xi s'iaàn nga s'e-la kjoabinachon inima-na n̄ita k̄jé-ne?

¹⁷ Jesús kitsò-la:

—¿Mé-ne chjinangui-ná it'aà ts'e kjoa xi ndaà t̄jín? Mìtsà yá t̄jín xi ndaà x̄ita, tà jngoò Nainá. Tsà mejèn-lè nga s'e-lè kjoabinachon n̄ita k̄jé-ne, t̄k̄itasoìn k̄jot̄ixoma-la Nainá.

¹⁸ X̄ita jè kiskònangui:

—¿Ñá-laá k̄jot̄ixoma-ne?

Jesús kitsò-la:

—“Kì x̄ita n̄ik'in; k̄i kjoa chijngui 'nì; k̄i chijé 'nì; k̄i 'én ndiso nokjoi it'aà ts'e x̄ita xi k̄j'eí;

¹⁹ jchaxkoín na'èn-lè kò nea-lè; t̄ītsjachi x̄ita x̄ingui koni tsà t̄jì yijo tsjì-ne.”

²⁰ —Ngats'ìi k̄jot̄ixoma koi jyeé kis̄ikitasoàn —kitsò jè ti—. ¿Mé xi chija ìsa-na?

²¹ Jesús kitsò-la:

—Tsà mejèn-lè nga nguì kixi kijni, t'in, tatijni yije tsojmì xi tjín-lè. Jè ton-lè tika'bí-la xita ima mé-ne nga s'e-lè kjoa machikon-t'in ján ngajmii. Ikjoàn nchrobátjinguí-ná.

²² Xita jè, k'e nga kiì'nchré 'én koi, tà baá komà-la, koií kjoa-la nga 'ñó kjin tsojmì tjín-la.

²³ K'eé kitsò-la xita xi kota'yàt'aà-la Jesús:

—Okixií xi xan-nò. 'Ñó 'in koma-la jña xita nchiná nga kjoahas'en-jiiñ ñánda tíhotíxoma jè xi ngajmii nchrobá-ne.

²⁴ Nguì jngoò k'a koxan-nò, isaá mì 'in koma-la jngoò cho camello nga kjoahas'en xkon nindoò xi tjahaña-ne nikje, mì k'oaá-ne koni jngoò xita nchiná xi 'ñó tjín-la tsojmì nga koma kjoahas'en-jiiñ ñánda tíhotíxoma jè xi ngajmii nchrobá-ne.

²⁵ K'e nga kiì'nchré 'én koi jña xita xi kota'yàt'aà-la Jesús tà kjòxkón-la. K'eé kitsò:

—¿Yá-né xi kitjokàjiiñ kjo'in kjoa ts'e jé-la?

²⁶ Jesús kiskoò'an, kitsò-la:

—Jña xita mìkiì koma-la kochrjekàjiiñ kjo'in inima-la. Tanga xi Nainá komaá-la ngats'iì kjoa.

²⁷ K'eé kitsò Pedro:

—Na'èn, ngajen, jyeé kinikítsajna yije-jen ngats'iì tsojmì xi tjín-najen, koa jì tjaàtjinguí-lèjen. ¿Mé xi tjoé-najen?

²⁸ Jesús kitsò-la:

—Xi okixií xi xan-nò, k'e nga kijchò nachrjein nga koxitseyá jngoò k'a isò'nde, ko 'an xi Ki'ndí-la Xita xan-la yijo-na, k'e nga kótijnasoàn íxile xi 'ñó jeya tíjna, jñò, xi jye 'an tjaàtjinguí-ná, tikoáá yaá kitsajnasòn íxile ts'e kjotíxoma xi tejò ma-ne, nga jñò kíndaajiiñ-là jña xita xi tejò tje-la ts'e naxandá Israel.

²⁹ Ngats'iì xi kjoa ts'an kisikíjna ni'ya-la, 'ndse, ndichja, na'èn-la, nea-la, chjoón-la, jxti-la, nangui-la, jngoò sìndo k'a k'oa tjín tjoé isa-la. Tikoáá tjoé-la kjoabinachon nita kjé-nè.

³⁰ I'ndeí, kjin xita xi títsajna ítjòn, k'e nga koma iskan jña kítsajna tjinguí. Ko xi títsajna tjinguí i'ndeí k'e nga koma iskan jña kítsajna ítjòn.

20

Chì'nda xi kisixáko tsojmì tjè

¹ Koni s'ín otíxoma jè xi ngajmii nchrobá-ne, k'oaá s'ín गया-la koni tsà jngoò xita xi tjín-la nangui. Kii nga tajñòya nga kii kátsji chì'nda xi sìxáko ñánda tjín-la toò uva.

² K'e nga jye tsibíndaajiiñ-ko nga kojichjí-la koni tjín síkijne xita chì'nda nga jngoò nachrjein, ikjoàn kisikasén ñánda kisixá.

³ Jngoò k'a kii jè nei-la xá koni xi ñijaàn-la nga tajñòya. Kijtseè isa chì'nda xi tíyijòjiiñ nditsin xi tsjin-la xá.

⁴ Kitsò-la: “Tanguió tixáko-ná. 'An kichjí-nò koni tjín machjí-nò.” Kii chì'nda koi nga kisixá.

⁵ Jè nei-la xá, kii jngoò k'a k'e nga ijchò nchisen. Tikoáá kii jngoò k'a k'e nga ijchò xi jàn nga kjòhoxòn.

⁶ Jye-la ijchò tsà xi 'òn nga kjòhoxòn, itjo jngoò k'a jè nei-la xá; koa kisakò isa-la chì'nda xi tà jyò títsajna. Kitsò-la: “¿Mé-ne tà jyò títsajna-nò kó nga kò'ba-nò nachrjein nga mì nixá-nò?”

⁷ Jña chì'nda koi kitsò: “Koií-né nga mì yá tsjá xá-najen.” K'eé kitsò-la: “Tanguió ndaà tsà jñò; tanguí tixá ján jiiñ tsojmì tjè-na.”

⁸ K'e nga jye kòjñò, jè nei-la xá kitsò-la jè xita xi síkinda chì'nda-la: “Tínókjoa-là ngats'iì chì'nda. Tichjí-la. Títs'iaako-ne jña xi iskan kófahas'en xá-la; koa jña xi ítjòn kófahas'en, tikjehet'aà-ne.”

⁹ K'eé kiichja-la jña chì'nda xi jahas'en xi 'òn nga kjòhoxòn; k'oaá tjín tsibíchjí-la koni tjín chjí-la nga jngoò nachrjein nga jngoò jngoò.

¹⁰ K'e nga kjòchjí-là jñà chì'nda xi jahas'en tajñòya, k'oaá komà-là tsà ìsaá tse kochjí-là. Tanga tà ngàsòn tjin kjòchjí-là koni tjin machjí-là nga jngoò nàchrjein nga jngoò ìjngoò.

¹¹ K'e nga jye kjòchjí-là chì'nda koi ìkjoàn tsibíts'ia nga tsatít'aà jè nei-là xá.

¹² Kitsò-là: “Jñà chì'nda xi iskan kòbijchó, tà jngoò hora kàsíxá, koa ngajen kànìxá-nájen nga kò'ba nàchrjein koa kànìkjeiín-lajen ndobá nga kò'ba nàchrjein. Tà ngàsòn tjin tìbìchjí-nájen.”

¹³ Tanga jè nei-là xá kitsò jngoò-là jñà chì'nda: “Ji amigo mìtsà mé xi ch'o tìsikò-lè; k'oaá tjin tìbìchjí-lè koni tjin chjí-là nga jngoò nàchrjein nga k'oaá s'ín kàchibá.

¹⁴ Chjóí chjí-lè koa t'in-ne. K'oaá s'ín mejèn-na nga k'oa tì tjin tsjaà-là jè xi iskan kàsíxá koni tjin tìtsjaà-lè.

¹⁵ Nga kò ton-na, ¿a mì tji'nde-na nga k'oas'ín s'iaàn koni s'ín mejèn-na? ¿A maxìtakòn-né nga 'an ndaà xita?”

¹⁶ Jesús kitsò ìsa:

—K'oaá s'ín koma jñà xita xi tìtsajna tjingui nàchrjein ì'ndeì, nga koma iskan, jñà kìtsajna ítjòn; koa jñà xi tìtsajna ítjòn ì'ndeì nga koma iskan jñà kjoehet'aà-ne. [Kjìn ma-ne xi xó chja-là Nainá tanga chiba ma-ne xi tjájin.]

*K'oaá s'ín tsibénojmi Jesús kjoabiyaà-là xi ma-ne jàn k'a
(Marcos 10:32-34; Lucas 18:31-34)*

¹⁷ Jesús k'e nga nchifi ján naxandá Jerusalén, kiichjat'aaxìn-là jñà xita xi kota'yàt'aà-là xi tejò ma-ne, kitsò-là:

¹⁸ —Ì'ndeì nga tìtsahonguiá naxandá Jerusalén, 'an xi Ki'ndí-là Xita xan-là yijo-na yaá tsobà'nò-na xita skò-là nò'miù kò xita xi okóya kjotíxoma-là Nainá xi kiskii Moisés nga koi'nè-na kjoabiyaà,

¹⁹ ìkjoàn sijnngatsja-na jñà xi mìtsà xita judío nga sìsobà-na, kojà-na, koòt'aà-na krò. Tanga xi koma jàn nàchrjein kjoaáya-na.

*Kjondaà xi kisijé nea-là Jacobo kò Juan
(Marcos 10:35-45)*

²⁰ Nea-là Jacobo kò Juan ìxti-là Zebedeo ijchòkon ñánda tìjna Jesús. Tjiko ìxti-là. Tsasìxkó'nchit'aà-là Jesús nga kisijé jngoò-là kjondaà.

²¹ Jesús kiskònangui-là, kitsò-là:

—¿Mé xi mejèn-lè?

Jè chjóón kitsò:

—Ya ñánda kotíxomai, tjii okixi nga ya kàtiyijòt'aà-lè ìxti-na. Jngoò kàtijnakixi-lè koa jngoò kàtijnat'aà-lè xi ngaskón-lè.

²² Jesús kitsò-là:

—Mikiì 'yaà mé xi nijé. ¿A kichikjoaá-nò nga kotojñoò jè kjo'in xi 'an kotojñaà?

Xita koi kitsò:

—Kichikjoaá-najen.

²³ K'ee kitsò-là Jesús:

—Okixi-né, k'oaá tìs'ín kotojñoò kjo'in koni 'an, tanga xi 'an tsjaà-nò nga ya kìtsajnat'aà-ná ya kixi-na kò ngaskón-na mìtsà 'an okò-na nga tsjaà-nò. Jñà ì'nde koi, jñà tjoé-là xita xi Nainá tìtsajnandaà-là nga tsjá-là.

²⁴ K'e nga kii'nchré jñà xita-là Jesús xi i'nga xi te ma-ne, kòjti-là it'aà ts'e xita xi jò ma-ne.

²⁵ Jesús kiichja-là, kitsò:

—Jyee tìjin-nò nga jñà xita skò-là naxandá, nangui síkìtsajna xita-là xi jñà otíxoma-là. Tìkooá jñà xita xi 'nga xá tjin-là, jñà xi beè nga otíxoma-là xita.

²⁶ Tanga jñò mìkiì k'oas'ín s'een. Tsà jngoò xita xinguiqo mejèn-là 'nga kìjna, jè xi kàtasíxá-là xita xi i'nga.

²⁷ Kò jè xi mejèn-là kìjna ítjòn, chì'nda-nò kàtama.

²⁸ 'An xi Ki'ndí-la Xita xan-la yijo-na, mìtsà koi xá j'i-na nga 'an kos'in-na, tà saá 'an siixá-la xita xi i'nga kò tsjaà yijo-na nga kiyá mé-ne nga kjin xita kitjokàjìn-ne kjo'in xi kjoa ts'e jé-la.

Kó kisiko Jesús nga kisindaà-ne xita xi jò ma-ne xi mìkì tsejèn-la
(Marcos 10:46-52; Lucas 18:35-43)

²⁹ K'e nga jye nchifi-ne ya naxandá Jericó, kjin xita kitjingui-la Jesús.

³⁰ Ya indii ndiyá koni s'in tífi Jesús, jò xita xi mìkì tsejèn-la títsajna. K'e nga ki'nchré nga jè Jesús tífaya ndiyá, 'ño kiichja-la kitsò-la:

—iNa'èn, nga ya nchrobát'aà-ne tje-la xitaxá ítjòn David [nga ji tijna ngajo-la] jchahimatakòn-nájen!

³¹ Jñà xita xi tjiko Jesús tsohótiko-ne nga jyò kàtìtsajna, tanga jñà xita xi mìkì tsejèn-la, isaá 'ño kiichja, kitsò:

—iNa'èn, xi tje-la David, jchahimatakòn-nájen!

³² K'éé tsasíjna Jesús koa kiichja-la, kiskònangui-la, kitsò-la:

—¿Mé xi mejèn-nò nga siko-nò?

³³ Jñà xita koi, kitsò:

—Na'èn, mejèn-nájen nga kàtatsejèn-nájen.

³⁴ Jesús kjòhimakeè jñà xita koi. Tsohót'aà-la tsja xkon koa nitóón kjòtsejèn-la. Ikjoàn kitjingui-la Jesús.

21

Kó kitsò xita naxandá k'e nga jahas'en-jìn Jesús ján Jerusalén
(Marcos 11:1-11; Lucas 19:28-40; Juan 12:12-19)

¹ K'e nga jye kjomeè bijchó chraña-la naxandá Jerusalén ijchò jngoò naxandá xi 'mì Betfagé ya chrañat'aà-la nindoò Yá Olivo. Jesús kisikasén jò xita xi kota'yat'aà-la.

² Kitsò-la:

—Tanguió ján ndí naxandá itsé xi kijnat'aà ján koa ya sakó jngoò-nò orra xi tjit'aà'ño kò ndí búrró ki'ndí-la. Chíjnda'ño koa nchrohóko-ná.

³ Tsà yá xi kó kitsò-nò, kot'in-là: “Jè xó Na'èn-ná kochjeén-la koa nitóón xó sikasén-ne.”

⁴ K'oaá s'in komà mé-ne nga tsitasòn-ne koni s'in kiskii xita xi kiichja ngajo-la Nainá, nga tsò:

⁵ Kot'in-la naxandá Sión:

“Chítsejèn-là Xita ítjòn-lè;
nga jíi nchrobá katsejèn-lè;

imaá kji;

tinasòn jngoò-la búrró,

jngoò ndí búrró itsé xi ki'ndí-la cho ch'á.”

⁶ Kii jñà xita xi kota'yat'aà-la Jesús, k'oas'in kisikitasòn koni s'in kisatiixá-la.

⁷ K'e nga ijchòko ñánda tíjna Jesús jè orra kò ki'ndí-la, jñà kisikjeén nikje-la nga tsohótsa-la; ikjoàn tsibijnasòn-la Jesús.

⁸ Koa jñà xita xi kjin ma-ne tsohójngoò nikje-la ya iya ndiyá. Tjín i'nga xi chrja-la yá tsate, ikjoàn tsohójngoò iya ndiyá.

⁹ Jñà xita xi tjíma ítjòn-la kò xi tjingui-la tsibíts'ia nga 'ño kiichja, kitsò:

—iJeya kàtijna jè xi ya nchrobát'aà-ne tje-la xitaxá ítjòn David [nga jè kíjna ngajo-la]! iMé ta ndaà-la jè xi nchrobá ngajo-la Na'èn-ná! iJeya choòn ján ngajmii!

¹⁰ K'e nga jahas'en Jesús ya naxandá Jerusalén ngats'ii xita naxandá tà kjòxkón-la, koa kiskònangui-la xikjín. Kitsò:

—¿Yá xita-ne jè?

¹¹ Jñà xita xi kjin ma-ne kitsò:

—Jè x̄ita xi ch̄ja ngajo-la Nainá xi Jesús 'mì xi Nazaret ts'e, ya nangui Galilea.

K'e nga tsachrje ingo ítjòn j̄nà x̄ita xi ot̄jna tsojmi
(*Marcos 11:15-19; Lucas 19:45-48; Juan 2:13-22*)

¹² Jesús jahas'en ya nd̄itsin ingo ítjòn-la Nainá, tsachrje yije ngats'iì x̄ita xi ya nchi-hot̄jna kò nchihotse tsojmi ya nd̄itsin ingo. Kisìhitíkjà ím̄ixa-la j̄nà x̄ita xi sík̄jat̄j̄ya tòn kò t̄ikoáá kisìkatsjòè íx̄ile-la j̄nà xi ot̄jna n̄ise paloma.

¹³ Kitsò-la:

—Jè Xojòn-la Nainá tsò-né: “Ni'ya-na, ni'ya-la ōchikoón k'oín.” Tanga j̄nò, nguijo-la x̄ita ch̄jé t̄itsa'nè.

¹⁴ Nga ya ingo ítjòn t̄jna Jesús, ijchò kinchat'aà-la x̄ita xi mìk̄i tsejèn-la kò xi tsá'yá kjoàn; jè Jesús kisindaà-ne x̄ita koi.

¹⁵ J̄nà x̄ita skò-la nò'miì kò x̄ita xi okóya k̄jot̄ixoma-la Nainá xi kisk̄i Moisés kòk̄jan-la k'e nga k̄jt̄seè k̄joxkón xi kis'iìn Jesús kò nga k̄iì'nchré 'én-la j̄nà ndí ixti xi ch̄jaya iya ingo ítjòn, nga tsò: “J̄jeya k̄at̄j̄na jè xi ya nchrobát'aà-ne t̄je-la x̄itaxá ítjòn David [nga jè k̄j̄na ngajo-la]!”

¹⁶ K'eé k̄iich̄ja x̄ita koi, kitsò-la Jesús:

—¿A na'yà-né? ¿A ndaà tsò 'én xi ch̄ja j̄nà ixti koi?

Jesús kitsò:

—Jon, 'nchré-ná. ¿A k̄j'eè b̄ixkej̄nò Xojòn-la Nainá nga tsò?:

J̄nà ndí ixti xi jtobá kjoàn kò ki'ndí xi s̄a oki, j̄nà-né xi t̄itsaj̄nandaà nga j̄jeya s̄iik̄j̄na Nainá.

¹⁷ Jesús yaá kisik̄tsaj̄na j̄nà x̄ita koi, it̄joiìn-ne ya naxandá ítjòn Jerusalén. K̄i ján naxandá Betania. Yaá kisik̄j̄aya nga n̄it̄j̄en.

K'e nga jè Jesús kisixi yá-la toò iko
(*Marcos 11:12-14, 20-26*)

¹⁸ K'e nga taj̄nòya nga tífi-ne Jerusalén, Jesús, k̄jòhojò-la.

¹⁹ K̄jt̄seè j̄ngoè yá-la toò iko xi ya ch̄rañà ind̄iì nd̄iyá s̄j̄na. K̄i katsejèn-la tanga n̄imé toò yijà-la. Tà xkaá t̄j̄n-la. K'eé kitsò-la Jesús:

—N̄i t̄j̄ j̄ngoè n̄achr̄jein k̄j̄ja-lè toò.

Koá jè yá toò iko n̄itoón kixi.

²⁰ K'e nga k̄jt̄seè j̄nà x̄ita xi kota'yàt'aà-la Jesús, tà k̄jòxkón-la. K'eé kiskònangui-la mé-ne nga tà n̄iton kixi-ne jè yá-la toò iko.

²¹ Jesús kitsò-la:

—Xi okixi, tsà ndaà mokjeiìn-nò it'aà ts'an, tsà mì jò t̄j̄n-la in̄ima-nò, komaá-nò nga k'oas'ín s'eén koni s'ín kàsikoáa jè yá iko; t̄ikoáá komaá-nò k'oín-là jè n̄indoò: “T̄isixìn; ján t̄ikat̄j̄en-j̄iìn yijo-lè ndáchikon.” Kò k'oáá s'ín koma.

²² J̄nò, tsà ndaà mokjeiìn-nò n̄it̄a mé xi s̄j̄jé k'e nga k̄itsi'ba, k'oáá s'ín t̄joé-nò.

K̄jot̄ixoma xi t̄j̄n-la jè Jesús
(*Marcos 11:27-33; Lucas 20:1-8*)

²³ K'e nga j̄je komà kjoá koi, Jesús jahas'en ya nd̄itsin ingo ítjòn kò k'e nga tíhokóya-la x̄ita ijchòkon j̄nà x̄ita skò-la nò'miì kò x̄ita j̄chinga-la j̄nà x̄ita judío. Kiskònangui-la:

—¿Mé k̄jot̄ixoma xi tsj̄á'nde-lè koni s'ín 'nì? ¿Yá xi kitsjaà-lè k̄jot̄ixoma koi?

²⁴ Jesús kitsò-la:

—T̄ikoáá 'an skònangui j̄ngoè-nò kjoá. J̄nò, tsà kòk'oín-ná, t̄ikoáá 'an k'oáá xán-nò yá xi kitsjaà-na k̄jot̄ixoma koni s'ín s'iaàn.

²⁵ Jè Juan, k'e nga kis'iìn bautizar x̄ita, ¿yá xi kitsjaà-la k̄jot̄ixoma? ¿A Nainá-né xi t̄jna ngajmiì, o xi tà x̄ita-né?

J̄nà x̄ita koi k'eé tsajoóya-ne. Kitsò-la x̄ik̄j̄n:

—Tsà kixoán: “Nainá kitsjaà-la kjotíxoma”, kitso-ná: “¿Mé-ne mìki kòkjeín-nò it'aà ts'e?”

²⁶ Koà tsà kixoán: “It'aà ts'e xita-né”, tsakjoòn-ná tsà koi nachrjein-la jñá xita naxandá skaàn-ko-ná, nga ngats'iì, ngui k'oaá tsò nga jè Juan, jngoò xita xi kiichja ngajo-la Nainá.

²⁷ K'eé kiichja, kitsò-la Jesús:

—Mì kì 'ya-jen.

Koà jè Jesús kitsò-la:

—Tikoáá 'an mìki k'oaá xán-nò yá xi kitsjaà-na kjotíxoma koni s'ín s'iaàn.

Kjoa xi mangásòn ts'e ixti xi jò ma-ne

²⁸ Jesús kiskònangui-la, kitsò-la:

—¿Jñò, kó bixón? Jngoò xita xi jò ma ixti x'in-la kitsò jngoò k'a-la jngoò ti-la: “Na'èn, t'in, tixá-la jè toò uva-na.”

²⁹ Ti jè kitsò: “Majìn-na.” Tanga koma iskan, kisikítsjeèn; k'eé kù síxá.

³⁰ Na'èn-la k'eé kù nga kikon ti xi jngoò. K'oaá tì kitsò-la. Tanga ti jè, kitsò: “Ndaà tjin na'èn, komaá kjián.” Tanga mìki kù.

³¹ ¿Ñá-laá nga ingajò ixti xi kisikitasòn-la na'èn-la?

Jñà xita kitsò:

—Jè xi ítjòn.

K'eé kitsò-la Jesús:

—Okixí xi xan-nò, jñà xita xi síkíchítjì tsojmì ts'e Roma kò jñà íchjín ská, isaá nìton kjoahas'en ñánda nga Nainá tíhotíxoma mì k'oaá-ne koni jñò.

³² Nga jè Juan xi kis'iìn bautizar xita k'ojí xá j'iì-ne nga tsakóya-la xita kós'ín sùjchá yijo-la, tanga jñò mìki kòkjeín-nò. Koà jñà xi síkíchítjì tsojmì kò jñà íchjín ská kòkjeín-la. Tanga jñò ndaà nas'ín ki'yaà yije kjoa koi, mìki kinikájno jé-nò kò mìki kòkjeín-nò.

Jñà chi'nda ts'en

(Marcos 12:1-12; Lucas 20:9-19)

³³ Tíiná'yaà jngoò-la kjoa xi mangásòn. Jngoò xita xi tjin-la nangui, tsibítje toò uva kò tsibíndi-la íchibá, ikjoàn tsibíndaà jngoò i'nde ñánda tsi'ñongui nandá-la toò uva. Tikoá tsibíndaà jngoò torre ñánda bitsajna xita nga síkinda yije kóhotjín. Ikjoàn kisikiña-la nangui-la xita xi k'ejí nga kisixásòn. Ikjoàn kù nei-la nangui ñánda i'nde kjiìn.

³⁴ K'e nga ijchò nachrjein-la nga jye kòjchá toò uva, jè nei-la nangui kisikasén xita chi'nda-la nga kisijé-la xi jè oko-la ts'e toò uva xi kòjchá.

³⁵ Tanga jñà xita xi kisixásòn nangui kitsobà'ño xita-la jè nei-la nangui. Jngoò xi tsi'beé-la kò jngoò xi kisik'en koà jè xi jngoò ndajo tsibínè.

³⁶ K'e komà iskan jè nei-la nangui isaá kjin xita-la kisikasén tanga jñà xita xi síxásòn nangui ta ngásòn kisiko ngats'iì chi'nda xi j'iì.

³⁷ K'e nga jyehet'aà-ne kisikasén ki'ndí-la. Kisikítsjeèn kitsò: “Skoexkón-la ki'ndí-na.”

³⁸ Jñà xita xi síxásòn nangui k'e nga kijtseè jè ki'ndí-la nei-la nangui tsajoóya-ne, kitsò-la xikjín: “Jè jèe xi tjoé kjotjò-la i'nde, sik'eén kò tsaján koma i'nde.”

³⁹ Kitsobà'ño, tsachrjejiìn ya nangui ñánda tíjtje toò uva. Ikjoàn kisik'en.

⁴⁰ Jñò, kó bixón? K'e nga kjoí nei-la nangui, ¿mé xi sùkò jñà xita xi kisixásòn nangui-la?

⁴¹ Jñà xita xi nchi'nchré kitsò:

—Jngoò k'aá sùk'en jñà xita ts'en; mìki kohimakeè. Kò jè nangui-la, k'ejí xita sùkiña-la xi koiichjí kó kji oko-la k'e nga kojchá toò uva.

⁴² Jesús kitsò-la:

—¿A k'ejé bixkejñò Xojon-la Nainá nga tsò?:

Jè ndajo xi tsachrjekàngui chjinechrjó nga sa ítjòn, jè-né xi komà ndajo tàts'en chrjó-la ni'ya.

K'oaá s'ín kis'iin Nainá.

Jñá, tà maxkón-ná k'e nga 'yaá kjoa koi.

⁴³ K'oi koxan-nò jñò, tjáxin-nò kjoa machikon-t'in nga jè Nainá tíhotíxoma-nò. Jñá tjoé-la xita xi k'oas'ín sixá koni s'ín ok'in-la xá-la Nainá.

⁴⁴ Xi it'aà ts'e ndajo, nita yá-ne xi kixosòn ndajo jè, koxkoaya-né; ko tsà jè ndajo skané xita, kochijo-né.

⁴⁵ Jñá xita sko-la no'miù ko xita fariseo, k'e nga kiù'nchré koni s'ín kiùchja Jesús nga tsibénojmi 'én xi mangásòn, k'ée kjòchiya-la nga it'aà ts'e-né koni s'ín kiùchja Jesús.

⁴⁶ Tik'ée-ne mejèn kitsobà'ño Jesús tanga jñá kitsakjòn-la xita naxandá, koi-né nga k'oaá s'ín mokjeiin-la jñá xita nga jè Jesús, jngoò xita xi chja ngajo-la Nainá.

22

S'eí xi bitjo k'e nga bixan xita

(Lucas 14:15-24)

¹ Jesús tsibíts'ia ijngoò k'a nga tsakóya-la xita kjoa xi mangásòn. Kitsò:

² —Koni s'ín otíxoma jè xi ngajmiù nchrobá-ne, k'oaá s'ín mangásòn koni jngoò xitaxá ítjòn xi tsibíjna jngoò s'eí k'e nga chixàn ti-la.

³ Kisikasén chi'nda-la mé-ne nga kiù kichja-la ngats'iù xita xi xó kinokjoá-la nga ti-la túbixan. Tanga jñá xita koi, mìkiù kòkjeiin-la nga kiù s'eí.

⁴ Ijngoò k'a kisikasén chi'nda-la xi kj'eí. Kitsò-la: “Kot'in-là jñá xita xi jye kiù'nchré: Tsojmi xi skine, jyeé tjíndaà; jyeé kisik'en nchraja-na, cho xi 'ño xiné. Jyeé tjíndaà yije kóhotjín. Kàtjanchrobá s'eí.”

⁵ Tanga jñá xita koi mìkiù kisís'in. Tjín xi rancho-la kiù-katsejèn-la; tjín xi kjohima-la kiù.

⁶ Koá jñá xita xi i'nga, kitsobà'ño chi'nda-la jè xitaxá ítjòn. Kiskaàn-ko koá kisik'en.

⁷ Jè xitaxá ítjòn, 'ño kòjti-la. K'ée kisikasén xita soldado nga kisik'en yije kóhotjín jñá xita koi nga ma-la sík'en-ná, koá tsaká naxandá-la.

⁸ Jè xitaxá ítjòn, ijngoò k'a kitsò-la chi'nda-la: “Kixí kjoa, jyeé tjíndaà yije xi kjoa ts'e s'eí, tanga jñá xita xi jye kiù'nchré, mìkiù mochjeén-la nga i kjoí.

⁹ Tanguió ijngoò k'a ya ndiyá jngoò osen-la naxandá, tinókjoa-là xita nita yá-ne xi skajñoò nga s'eí tjín kjoa ts'e xita xi bixan.”

¹⁰ Jñá chi'nda-la xitaxá ítjòn kiù kixkóya xita inchò calle nita yá xi kjòtsja-la nga kiù s'eí, xita xi ndaà ko xi mìkiù ndaà; k'oaá s'ín kitseè ni'ya.

¹¹ Jè xitaxá ítjòn, k'e nga jahas'en ni'ya, kiskoòtsejèn-la jñá xita xi ijchò. K'ée kijtsee jngoò xita xi ya tjínajin nga mìkiù íkjá nikje-la xi ts'e kjoa bixan.

¹² Kitsò-la: “Ji, amigo, ¿kó s'ín komà nga kòbitjaàs'iin ijndé nga mìkiù kichíkjeí nikje xi ts'e s'eí?” Tanga xita jè, tà jyò tsibijna.

¹³ Jè xitaxá ítjòn kitsò-la jñá xita xi nchisís'in-la ímixa: “Tit'aà'ño ndsokò ko tsja. Ikjoàn tìkatjeen ján ijín jñò ya ñánda nga skìndàya ko sùjts'iin ni'ño.”

¹⁴ Kitsò-isa Jesús:

—K'oaá s'ín koma nga kjìn ma-ne xita xi nokjoà-la tanga tà chibaá ma-ne xi tjájin.

Kjoa nga machítjì tsojmi

(Marcos 12:13-17; Lucas 20:20-26)

¹⁵ Jñá xita fariseo k'ée kiù tsajoóya-ne nga mejèn-la kohòngui Jesús mé 'én xi kichja.

¹⁶ Koi kjoa-la nga kisikasén-la Jesús xita-la ko xita-la Herodes; kiskònangui-la, kitsò-la: —Maestro, 'ya-nájen nga 'én kixí xi nokjoì koá k'oaá s'ín okoòyi ndiyá-la Nainá koni s'ín tjín xi kjoa kixi. Mìkiù 'ni kindá koni tsò-lè xita; ko mìtsà jè chitsejèn-jnoi kó kjoàn xita.

¹⁷ Koatìn-nájen. ¿A ndaà tjín nga kichítjì-jen tsojmi it'aà ts'e xitaxá ítjòn ts'e Roma, a xi majin-né?

¹⁸ Jesús kjòchiya-la nga ch'o nchisíkìtsjeèn. K'ée kitsò-la:

—Jñò, x̄it̄a xi jò isén tjín-nò, mé-ne chonachan-ná.

¹⁹ Takó-ná jè tòn xi machjítjì-ne tsojmì.

K'ée j'ùikò jngoò-là tòn denario.

²⁰ K'e nga kijtseè Jesús, kiskònangui-là, kitsò-là:

—¿Yá ts'e isén jè kò jè 'ín xi jtít'aà?

²¹ Kitsò x̄it̄a koi:

—Ts'ée César, x̄it̄axá ítjòn ts'e Roma.

K'ée kitsò-là Jesús:

—Tjì-lá César xi ts'e César koa tjì-lá Nainá xi ts'e Nainá.

²² K'e nga kii'nchré 'én koi jñà x̄it̄a fariseo kò x̄it̄a-là Herodes, tà kjòxkón-là. Kitsjìin Jesús, ìkjoàn kii-ne.

Kó s'ín koma k'e nga kjoaáya ìjngoò k'a-là x̄it̄a xi jye k'en

(Marcos 12:18-27; Lucas 20:27-40)

²³ Tìkoi-ne nachrjein ijchòkon Jesús jñà x̄it̄a saduceo nga mìkii mokjeiín-là nga faáya-là jñà x̄it̄a xi jye k'en. X̄it̄a koi kiskònangui-là Jesús,

²⁴ kitsò-là:

—Maestro, Moisés kitsò-né: “Tsà jngoò x̄it̄a x'ín kiyá xi mìkii kis'e-là ìxti kò chjoón-là, jè 'ndse mik'en kixan-kò ìjngoò k'a chjoón-là 'ndse nga s'e-là ìxti xi tje ts'e 'ndse.”

²⁵ Kis'e xó jngoò k'a x̄it̄a ìjndé xi itoò komà 'ndse. Jè xi síjna ítjòn chixàn, tanga k'e nga k'en, mìkii kis'e-là ìxti koa jè 'ndse xi ma jò-ne tsibìjnako jè chjoón ka'àn.

²⁶ K'oaá tì komàt'in jè 'ndse xi ma jò-ne kò xi ma jàn-ne skanda komà itoò. Nijngoò xi kis'e-là ìxti.

²⁷ Xi jyehet'aà-ne, k'en jè chjoón.

²⁸ K'e nga tsà kjoaáya ìjngoò k'a-là mik'en, ¿ñá-laá nga itoò 'ndse xi koma chjoón-là? Nga jñà chixàn-kò nga itoò.

²⁹ K'ée kitsò-là Jesús:

—Jñò, maskáya-nò koi-né nga mìkii 'yaà kó s'ín tíchja Xojon-là Nainá kò nga'ño xi tjín-là Nainá.

³⁰ K'e nga kjoaáya ìjngoò k'a-là mik'en, íchjín, íchjá, mì tì kii kixan-ne. K'oaá s'ín s'e koni jñà àkjale xi títsajna ngajmii xi ts'e Nainá.

³¹ Jè kjoa nga faáya ìjngoò k'a-là mik'en, ¿a kj'eè bixkejñoò Xojon-là Nainá nga jè sobà Nainá xi kitsò:

³² “An-ná xi Nainá tsò-na Abraham, Isaac kò Jacob”? jñà xi jye k'en, mìtsà Nainá tsò-là xi Nainá; tà jñà xi títsajnakon xi Nainá tsò-là! [Nga ít'aà ts'e Nainá, títsajnakon x̄it̄a koi.]

³³ Jñà x̄it̄a naxandá, k'e nga kii'nchré 'én koi, tà kjòxkón-là koni s'ín tsakóya Jesús.

Jè kjotíxoma-là Nainá xi tíjna ítjòn

(Marcos 12:28-34)

³⁴ Jñà x̄it̄a fariseo k'e nga kii'nchré nga Jesús kisikítsajnajyò jñà x̄it̄a saduceo, tsibíxkóya xíkjín.

³⁵ Jngoò xi x̄it̄a ts'e, xi chjine xojon-là kjotíxoma-là Nainá xi kiskii Moisés, mejèn-là skót'aà Jesús nga skónachan-là. Kiskònangui-là, kitsò-là:

³⁶ —Maestro, ¿ñá-laá kjotíxoma xi isa tíjna ítjòn nga yije kjotíxoma ts'e Moisés?

³⁷ Jesús kitsò-là:

—“Títsjachi Nà'èn-ná xi Nainá 'mì-là, nga kò inima-lè kò kjohítsjeèn-lè kò nga tij-nakin.”

³⁸ Jè kjotíxoma xi isa 'ño tjín kò xi tíjna ítjòn.

³⁹ Jè xi ma-ne jò, k'oaá tì tsò-ne: “Títsjachi x̄it̄a xinguii xi i'nga koni tsà tì yijo tsjji-nè.”

⁴⁰ Jñà títsajna ítjòn jñà kjotíxoma koi. Yaá bitjokàt'aà kóhótjín kjotíxoma xi i'nga xi ts'e Moisés kò xi ts'e x̄it̄a xi kii'chja ngajo-là Nainá.

*Ñánda kitjen-la Cristo [xita xi xó kisikasén-ne Nainá]
(Marcos 12:35-37; Lucas 20:41-44)*

⁴¹ Tà kó yaá títsajna jñà xita fariseo. Jesús kiskònangui-la, kitsò-la:

⁴² —¿Jñò, kó bixón it'aà ts'e Cristo [jè xita xi xó sikkasén-ne Nainá]? ¿Ñánda kitjen-la? Jñà xita fariseo kitsò:

—Yaá kjinchrobàt'aà-ne tje-la xitaxá ítjòn David [nga jè kájna ngajo-la].

⁴³ K'eé kitsò Jesús:

—Tanga jè David k'e nga kiichja nga kò nga'ño-la Inima Tsjeè-la Nainá, kitsò it'aà ts'e Cristo: “Jè otíxoma-na.” K'oaá s'in kiichja David:

⁴⁴ Jè Nainá kitsò-la jè xi otíxoma-na:

“Tijnat'aà-ná i kixi-na

skanda k'e nga sikkítsajnanguia ndsokoi

jñà xi kondra-lè nga 'an jye kisikijne-la.”

⁴⁵ Jè David, tsà kòs'in kitsò-la Cristo [jè xita xi xó síkasén-ne Nainá], ¿kó s'in tjín-ne nga ya nchrobát'aà-ne tje-la xitaxá ítjòn David?

⁴⁶ Nijngò xi koma-la nga kisikátji-ne 'én koi. Tjen-ne nachrjein koi, mì tì yá xi kj'ño-ne ikon nga kiskònangui isa-la 'én xi kj'eí.

23

*Kiís'in kiichja Jesús it'aà ts'e xita fariseo kò xita xi okóya kjotíxoma-la Nainá
(Marcos 12:38-40; Lucas 11:37-54; 20:45-47)*

¹ Xi komà iskan kitsò-la Jesús jñà xita xi kjìn ma-ne kò xita xi kota'yàt'aà-la:

² —Jñà xita xi okóya kjotíxoma-la Nainá xi kiskii Moisés kò jñà xita fariseo tjín-la xá nga okóya kjotíxoma-la Nainá xi kiskii Moisés.

³ Tjiná'yaà yije-là koni s'in okóya-nò. Tanga mìkii k'oa 'nè koni s'in jñà xita koi. Kj'eí tsò kò kj'eí s'in.

⁴ Jñà xita koi bínè-la xita xi kj'eí kjotíxoma-la xi 'ño 'in tjín koni tsà ch'á i'í sík'a xi mìkii k'a-la; koa jñà xita xi okóya kjotíxoma, ni ítse síchjít'aà-la jñà xita nga sikkítasòn kjotíxoma-la.

⁵ Koni s'in s'in yije kjoa koi, tà jè-né nga mejèn-la nga isa ndaà skoe xita. Jè Xojon-la Nainá xi ót'aà tjen-la kò chrja-la, isaá ù s'in; koa jè nikje xi ókjá, isaá ndojò kjoàn s'in lixto xi ítjòn-la nikje-la, tà jè xi mejèn-la nga okó yijo-la nga tsò nga xita tsjeè-la Nainá-né.

⁶ Mejèn-la nga jñà kítsat'aà ítjòn ímixa k'e nga kjèn xita ñánda tjín s'eí kò ya ni'ya ingo sinagoga mejèn-la nga jñà kítsanè íxile xi jncha ítjòn.

⁷ Tikoaá mejèn-la nga skoexkón xita xi kj'eí, ndaà sikkítat'aà ya nditsin; kító-la: “Maestro, Maestro.”

⁸ Tanga jñò, mìkii bìl'nde nga “Maestro” kító-nò xita; ngats'ioò jñò, 'ndsè chibàkoo xinguioo; tà jngò ma xi Maestro-nò, jè Cristo [xita xi xó kisikasén-ne Nainá].

⁹ Nijngò xi “Na'èn” 'mì-là i it'aà nangui; tà jngò ma xi Na'èn-nò xi tjina ngajmii.

¹⁰ Koa ni yá xi xita skò-la kító-nò; tajngò Cristo xi skò-la tjina-nò.

¹¹ Jè xi 'ño 'nga síkijna yijo-la it'aà tsajòn, jè-né xi sikkítat'aà xita xi i'nga.

¹² Jè xi 'nga síkijna yijo-la, isaá nangui kájna nga koma iskan; kò jè xi nangui síkijna yijo-la, isaá 'nga kájna nga koma iskan.

¹³ 'iima xó-nò jñò, xita xi okoóya kjotíxoma-la Nainá xi kiskii Moisés, kò jñò xi xita fariseo, xita xi jò isén tjín-nò! Bichjoà-là ndiyá-la ngajmii jñà xita xi mejèn-la fahas'en ya ñánda nga tíhotíxoma Nainá. Jñò, mìkii bitjaàs'en-jñò kò mìkii bìl'nde-là xi kj'eí xita nga fahas'en-jiin.

¹⁴ 'iima xó-nò jñò, xita xi okoóya kjotíxoma-la Nainá, kò jñò xi xita fariseo, xita xi jò isén tjín-nò! Chjaà'an-là ni'ya-la íchjín ka'àn xi jye k'en x'in-la; ikjoàn 'ño ndojò onguíkoo

ochikon-nò nga mejèn-nò nga bitsajna'ma nga mì jcha-nò mé kjoa xi 'nè. Koií kjoa-la isaá tse kjo'in s'e-nò.

¹⁵ 'iIma xó-nò jñò, xita xi okoòya kjotíxoma-la Nainá, ko jñò xi xita fariseo, xita xi jò isén tjín-nò! Bitjaàsòn yije isò'nde ko ndáchikon nga nokjoà-là nas'ín tà jngoò xita nga ya fit'aà-nò. Ko k'e nga jye bitasòn-nò xita jè, jò k'a okji ok'in-la koni jñò nga s'e-la kjo'in ya ñánda títi ni'ín ts'e i'nde kjo'in.

¹⁶ 'iIma-xó-nò jñò, xita xi mìkiì tsejèn-nò nga mejèn-nò okoò-là ndiyá xita xi kj'eíí! Bixón-nó: “Tsà jngoò xita xi tsjá 'én-la xi it'aà ts'e ingo, mìtsà mé-ne. Tanga tsà jngoò xita tsjá 'én-la xi it'aà ts'e tsojmì chjí xi oro ts'e ingo, koií xi kjo'ño kítasòn 'én-la.”

¹⁷ jñò xi xita tònɔ ko xita xkan 'mì-nò! ¿Ñá-laá xi isa ndaà tjín? ¿A jñà tsojmì chjí xi oro a xi jè ingo xi síchikon-t'in tsojmì chjí?

¹⁸ Jñò k'oaá tì bixón: “Tsà jngoò xita tsjá 'én-la nga kítso: Tíbeè i'nde tsjeè ñánda binchasòn kjotjò xi tsjá-la Nainá, jñà xita mìkiì kjo'ño kítasòn 'én-la. Tanga tsà tsjá 'én-la xi it'aà ts'e tsojmì xi ya títsajnasòn jè i'nde tsjeè, jè xi okixi nga kjo'ño kítasòn.”

¹⁹ jñò xi xita tònɔ ko xita xkan 'mì-nò! ¿Ñá-laá xi isa ndaà tjín? ¿A jñà tsojmì xi tjín-sòn ya i'nde tsjeè a xi jè i'nde tsjeè xi síchikon-t'in tsojmì?

²⁰ Jè xi tsjá 'én-la xi it'aà ts'e i'nde tsjeè, tìkoaá tsjá 'én-la xi it'aà ts'e ngayije tsojmì xi ya tjín-sòn ya i'nde tsjeè.

²¹ Jè xi tsjá 'én-la it'aà ts'e ingo mìtsà tà jè it'aà ts'e ingo tsjá, tìkoaá tsjá 'én-la xi it'aà ts'e Nainá xi ya tíjna.

²² Jè xi tsjá 'én-la it'aà ts'e ngajmì, tsjá 'én-la xi it'aà ts'e íxile kjotíxoma-la Nainá; tìkoaá tsjá 'én-la xi it'aà ts'e Nainá xi ya tíjnasòn íxile.

²³ 'iIma xó-nò jñò, xita xi okoòya kjotíxoma-la Nainá, ko jñò xi xita fariseo, xita xi jò isén tjín-nò! Nga ma-nò 'biì-la Nainá xi teya oko-la ts'e xka menta ko xka anís ko xka comino; tanga mìkiì nìkítasòn jè kjotíxoma xi isa 'ño mochjeén koni jè kjoa kixi, kjoahimatakòn ko jè kjoa nga kixi kàtakjeín-nò it'aà ts'e Nainá. Koií kjoa xi 'ño mochjeén nga kítasòn; tìkoaá mochjeén-né nga kítasòn jñà kjoa xi i'nga.

²⁴ jñò, xita xi mìkiì tsejèn-nò nga mejèn-nò okoò-là ndiyá xita xi kj'eíí, jñò, nìkjaànguioò natse nga majìn-nò nga chíjeèn cho xi tjé, tanga mìkiì 'yaà k'e nga chíjeèn cho ch'á xi 'mì camello!

²⁵ 'iIma xó-nò jñò, xita xi okoòya kjotíxoma-la Nainá, ko jñò xi xita fariseo, xita xi jò isén tjín-nò! Onìjnoò chítisín-nò ko chroba-nò ya isò'nga-la tanga ya iya-la kitseè tsojmì xi nìchijé ko nga tse mejèn-nò.

²⁶ Jñò xi xita fariseo 'mì-nò, xi mìkiì tsejèn-nò. Ítjòn taníya chítisín-nò ko chroba-nò ya iya-la, mé-ne nga kotsjeè-ne isò'nga-la.

²⁷ 'iIma xó-nò jñò, xita xi okoòya kjotíxoma-la Nainá, ko jñò xi xita fariseo, xita xi jò isén tjín-nò! K'oaá titsjoò koni kjoàn chrjó-la mik'en xi kitsiinga isò'nga-la. Ndaà kjoàn, tanga ya iya-la kitseè nindaà-la mik'en ko ngats'iì tsojmì xi ch'o kjoàn.

²⁸ Jñò, k'oaá s'ín 'nè nga nguixkon xita, xita ndaà-nò; tanga jjiin inima-nò kitseè kjoa xi jò isén tjín-la ko kjoa nga ch'o 'nè.

²⁹ 'iIma xó-nò jñò, xita xi okoòya kjotíxoma-la Nainá, ko jñò xi xita fariseo, xita xi jò isén tjín-nò! Bindaà chrjó-la mik'en ts'e xita xi kiichja ngajo-la Nainá ko nikiinga chrjó-la xi xita kixi komà.

³⁰ Ikjoàn bixón: “Tsà jñá-la-ná xi titsajnakoaán jè nachrjein-la xita jchínga-ná mì-la kiì kinìchjít'aà-lá xita jchínga-ná nga kisik'en jñà xita xi kiichja ngajo-la Nainá.”

³¹ K'oaá s'ín 'ya-la nga tijñò 'ya-nò yijo-nò nga ixti-la maá xita xi kisik'en xita xi kiichja ngajo-la Nainá.

³² Jñò, koni s'ín tsibíts'ia xita jchínga-nò, jngoò k'a tìkítasòn yije kjoa.

³³ Jñò, k'oaá ngaya-la koni ye, nga ya tjen-nò it'aà ts'e ye. Mìkiì kojno-nò i'nde ts'e kjo'in.

³⁴ K'oií kjoa-la, 'an síkasén-nò xita xi kichja ngajo-la Nainá, xita xi tjín-la kjoachjine ko xi kokóya kjotíxoma. Tanga jñò, tjín xi sík'eèn, tjín xi kjòt'aà krò koa tjín xi kixkàn-ko ya jya ni'ya ingo sinagoga; koa konguítjngui kondra-la xita koi nga xki xi ján naxandá.

³⁵ Jñò skané yije-nò kjo'in jè jní xi kixíxteèn ts'e xita ndaà xi k'en, mats'ia-ko-ne Abel, xita kixi xi k'en ítjòn, skanda jè Zacarías, ki'ndí-la Berequías, jè xi kisik'en xita tsajòn ya i'nde jngoò osen-la ñánda tíjna Ni'ya Tsjeè-la Nainá ko ñánda binchásòn kjotjò xi tsjá-la Nainá jña xita.

³⁶ Okixíí xi xan-nò, ngats'ii kjoa koi, jña skané-la kjo'in jña xita xi tjín i'ndeí.

*Mé kjoa-ne nga kos'ín kùichjako-ne Jesús xita naxandá Jerusalén
(Lucas 13:34-35)*

³⁷ 'jñò xi xita naxandá Jerusalén tsajòn xi nìk'eèn xita xi chja ngajo-la Nainá ko binè ndajo jña xita xi Nainá síkasén-nò! ;Kjìn k'a kjòmejèn-na nga tsibíxkóya xita naxandá-nò, koni s'ín xa'nda nga bíngui jngaá-la jña ixti-la; tanga jñò, mìkiì kòkjeíin-nò!

³⁸ Chítsejèn-là ni'ya-nò nga jye tsjìin-takòn Nainá.

³⁹ K'oaá xán-nò mats'ia-ne nachrjein i'ndeí mì tì kiì jchaxkoòn-ná skanda k'e nga jè nachrjein nga kixón: “¡Mé ta ndaà-la jè xi nchrobá ngajo-la Nainá!”

24

*K'e nga kùichja Jesús it'aà ts'e ingo kó s'ín tjínè-la nga kixoña
(Marcos 13:1-2; Lucas 21:5-6)*

¹ Jesús k'e nga jye itjo-ne ingo ítjòn, jyeé tífi nga ijchò kinchat'aà chraña-la xita xi kota'yàt'aà-la. Ikjoàn tsakó-la jè ingo ítjòn ko ni'ya xi tjín-la.

² Jesús kitsò-la:

—¿A titsachítsejèn-là ngats'ii ni'ya koi? Okixíí xi xan-nò, nì tì jngoò ndajo siyijòsòn-la xíkjin. Kixoña yije-né kóhotjín.

*Seña xi s'e k'e nga nchrobá ma chraña nga kjoehet'aà isò'nde
(Marcos 13:3-23; Lucas 21:7-24; 17:22-24)*

³ Jesús, k'e nga tíjna ya nindoò Yá Olivo, ijchò kinchat'aà-la jña xita xi kota'yàt'aà-la nga kiskònanguit'aàxìn-la kitsò-la:

—Koa-tin-nájen, ¿mé nachrjein-ne nga okoma kjoa koi? ¿Mé seña xi s'e k'e nga kjoii ijngoò k'a ko k'e nga kjoehet'aà isò'nde?

⁴ K'eé kitsò-la Jesús:

—Tìkindaa yijo-nò nga mì yá xita xi skónachan-nò.

⁵ Kjìn xita kjoii xi 'in ts'an síkjeén; kítso: “An-ná xi Cristo, [nga 'aán kisikasén-na Nainá]”; koa kjìn xita skónachan-la.

⁶ S'e kjoichán ñánda chrañat'aà ko tìkoa kina'ya-la kjoa ts'e kjoichán ñánda kjìin i'nde, tanga jñò, kì tsakjoòn-jèn. Xó k'oaá koma-ne. Tanga kj'eè tsà isò'nde tífehèt'aà.

⁷ Naxandá skaàn-kjoò xi kj'eíí naxandá. Koa xitaxá koìits'ia nga skaàn-kjoòko xitaxá xi kj'eíí naxandá. S'e kjinchrá, s'e ch'in, ko k'oa ch'ón nga xki xi ján i'nde.

⁸ Ngats'ii kjoa koi, tà jè xi sa tímats'ia-ko kjo'in.

⁹ Jña xita skìnit'aà-nò ts'e xitaxá nga tsjá-nò kjo'in; síik'en-nò. Ngats'ii xita isò'nde kojtikeyè-nò koií kjoa-la nga 'an onguít'aà-ná.

¹⁰ Jè nachrjein koi, kjìn koma xi mì kiì tì kòkjeíin-la it'aà ts'an. Tijná koótjinè-ne xíkjin xita ko tsjénguikéè xíkjin.

¹¹ Kjìn xita s'e xi xita ndiso xi kítso nga Nainá chja ngajo-la. Tìkoaá kjìn xita skónachan-la.

¹² Ndaà jchán s'e kjoats'en; skanda mì tì kiì kòtsjakeè-ne xíkjin xita.

¹³ Tanga jè xi kixi kijnako kjoa xi mokjeíin-la skanda k'e nga kjoehet'aà-ne kjoa, jè xi kítjokàjìin kjo'in.

14 Koà jè 'én ndaà-la Nainá koni s'ín otíxoma Nainá, kóbíson yije-né nga tíjtsa isò'nde mé-ne nga kji'nchré-ne ngats'ìi xitá naxandá; ikjoàn k'eé kjoehet'aà isò'nde.

15 'K'e nga jchaa nga 'ñó ch'o tíma ya I'nde Tsjeè-la Nainá, koií kjoa títasòn koni s'ín kiskii Daniel, xitá xi kiichja ngajo-la Nainá. (Kàtasijiin-la jña xitá xi bíkke xojon jé.)

16 Jñò, k'e nga jchaa kjoa koi, jña xitá xi títsajna Judea, kàtanga, kàtji ñánda nindoò choòn.

17 Jè xi tíjnasò'nga ni'ya-la, kì tì kii fahas'en-ne ni'ya nga skoé tsojmì-la.

18 Jè xi tísíxájiin nangui-la, kì tì kii nchrobá-ne nga nchrohókjá nikje-la.

19 jima xó-ne jña íchjín xi ki'ndí 'ya kò xi íxti xó nchisíkaki jña nachrjein koi!

20 Tijét'aà-la Nainá mé-ne nga mì k'eé kiyó-nò k'e nga nachrjein-la cho 'nchán kò k'e nga nachrjein nikjáya.

21 Jña nachrjein koi, tseé kjo'in s'e; kj'eè kii k'oà ma skanda tjen-ne nga kisindaà isò'nde. Koà mì tì kii okoma-ne nga koma iskan.

22 Tsà mì k'oàá kító Nainá nga isa chiba nachrjein s'e kjo'in njngoò xitá kitjokàjiin kjo'in. Tanga koií kjoa-la jña xitá xi xó jaàjiin-ne Nainá, isa chiba nachrjein s'e kjo'in.

23 'K'e nga tsà yá xitá xi kító-nò: “iChítsejèn-là íí tíjna Cristo [xitá xi xó kisikasén-ne Nainá]!”, o tsà kító-nò: “ján tíjna ján!”, kì kii mokjeiín-nò.

24 Kjoii xitá ndiso xi Cristo kító-la yijo-la, tikoáá kjoii xitá xi koà ti kító nga jña xi chja ngajo-la Nainá. K'oàá tís'ín kòkò seña kò kjoxxón xi ndaà tjin nga skónachan. Skanda jña xitá xi jye jaàjiin Nainá mejèn skónachan-la tsà kòkjeiín-la.

25 Kangui nachrjeiín tibenojmíya yije-nò kjoa xi koma iskan.

26 Tsà yá xitá xi kító-nò: “iChítsejèn-là yaá tíjna Cristo ya i'nde it'aà xìn ñánda nangui kixi choòn!”, kì kii onguió; kò tsà kító-nò: “iYaá tíjnaya inga ni'ya!”, tikoáá kì kii mokjeiín-nò.

27 Koni ma ni'ín ch'on k'e nga ote ñánda bitjokàtji-ne ts'oi skanda ñánda okaàtji-ne, k'oàá s'ín koma k'e nga kjoiaa ijngoò k'a xi Ki'ndí-la Xitá xan-la yijo-na.

28 Ya ñánda kijna mik'en, yaá kítsajnajtín jña líké.

Mé xi koma k'e nga kjoii ijngoò k'a Ki'ndí-la Xitá

(Marcos 13:24-37; Lucas 21:25-33; 17:26-30, 34-36)

29 'Tijè-ne nachrjein, k'e nga kjoehet'aà kjo'in koi, jè ts'oi, mì tì kii sùhiseèn-ne, kojñò-né, mì tì kii kotsjè-ne ndobá-la. Tikoáá jè sá, mì tì kii sùhiseèn-ne. Ni'ño xi tjin ngajmii, kixongui-né. Jña nga'ño xi tjin ngajmii kitiya yijeé-la.

30 Ikjoàn skoe xitá ján ngajmii seña-na xi Ki'ndí-la Xitá 'mì-na. Ngats'ìi naxandá xi tjin j isò'nde, jña xitá skindàya-né nga 'ñó tsakjón. Koà skoe-na xitá xi Ki'ndí-la Xitá xan-la yijo-na nga kjinchrobàjñaà jjiin ifi xi tjin ngajmii; tse nga'ño kò kjoajeya kjoiiikooa.

31 Siikasén àkjale-na nga 'ñó sùkjindáya chrjo nga koiixkóya xitá-na xi 'an xó jaàjiin-na nga ñijòn chrjangui-la isò'nde, nga jngoò ijngoò ngobà-la isò'nde.

32 Chíta'yàkòò jè yá-la toò ikò mé xi okóya-ná; k'e nga ma kíndiya chrja-la, ikjoàn bíjts'én xka-la, tíjiin-nò nga jye nchrobá machraña chon ndobá.

33 K'oàá tís'ín tjin, k'e nga jchaa nga k'oas'ín tíma kjoa koi, kàtasijiin-nò nga 'an xi Ki'ndí-la Xitá xan-la yijo-na jyeé nìton kjoiaa, k'oàá ngaya-la koni tsà jye tíjna chraña xotjoa-la ni'ya.

34 Okixii xi xan-nò, k'oàá s'ín kítasòn yije kjoa koi, k'e nga tikj'eè biyaà xitá xi tjin nachrjein i'nde.

35 Jè ngajmii kò isò'nde kjoehet'aà-né, tanga jña 'én-na mikii kjoehet'aà; kítasòn-né.

36 'Tanga k'e nga okoma, mì yá xi tíjiin-la mé nachrjein-ne kò mé hora-ne; ni jña àkjale xi tjin ngajmii, kò ni jè Ki'ndí-la Nainá tíjiin-la; tajngoò Nainá xi Na'èn-ná tíjiin-la.

37 'Koni s'ín komà nachrjein-la Noé, k'oàá tís'ín koma k'e nga kjoiaa ijngoò k'a 'an xi Ki'ndí-la Xitá xan-la yijo-na.

³⁸ Jñà nàchrjein koi, k'e nga tik'èè 'ba jtsí xkón, jñà xità xi tjín k'e-ne, nchikjèn, nchi'biì, nchibixan íchjá kò íchjín skanda k'e nga jè nàchrjein nga jahas'en ni'ya chitso jè Noé.

³⁹ Xità xi tjín koi nàchrjein, mìkìlì tjiìn-là mé xi koma skanda k'e nga j'ìi jtsí xkón xi kiìchrjoako nandá ngats'ìi xità. K'oaá tjs'ín koma k'e nga kjoiaa ìjngoò k'a 'an xi Ki'ndí-là Xità xan-là yijo-na.

⁴⁰ Jè nàchrjein k'e nga 'an xi kjoiaa, jò xità xi nchisíxá ján ijìin ijñá, jngoò tjámìtjen, xi ìjngoò sijna-né.

⁴¹ Jò íchjín nchat'aà natsí xi nchi'o na'yo, jngoò tjámìtjen, xi ìjngoò sijna-né.

⁴² Titsajnakòon nga mìkìlì 'yaà mé nàchrjein-ne kò mé hora-ne nga kjoiaa 'an xi Nainá 'mì-na.

⁴³ Kátasijiìn-nò, tsà jngoò nei-là ni'ya sijiìn-là mé hora-ne k'e nga jñò kjoíi xità chijé nga siìchijé-là, siìkindáá ni'ya-là; mìkìlì tsjá'nde nga kochijé-là.

⁴⁴ Jñò, tikoáá titsajnandaà; nga 'an xi Ki'ndí-là Xità xan-là yijo-na, k'eé kjoiaa ìjngoò k'a k'e nga jñò mìkìlì titsachiñà.

*Chì'nda xi ndaà s'ín kò xi ch'o s'ín
(Lucas 12:41-48)*

⁴⁵ ¿Yá-ne xi chì'nda kixi xi tjín-là kjoachjine? Jè nei-là siìkíjna'nda jñà chì'nda-là xi i'nga xi ya síxá ni'ya-là mé-ne nga k'e kijchò chiba-là, siìkjèn chì'nda xíkjín.

⁴⁶ Mé tà ndaà-là jè chì'nda xi k'oas'ín ndaà tísíkitasòn k'e nga kjoíi-ne nei-là.

⁴⁷ Xi okixíi xi xan-nò, nei-là chì'nda jè, jè siìkíjna'nda yije tsojmì xi tjín-là.

⁴⁸ Tanga tsà jè chì'nda ts'en kitsò nga koòko inima-là: “Nei-na, kjìn nàchrjein kochrjein-là nga kjoíi-ne.”

⁴⁹ Ikjoàn koiìts'ia nga skaàn-kò chì'nda xíkjín, koa kokjen-kò kò skoíko xità ch'i.

⁵⁰ Chì'nda jè, kjoíi-ne nei-là jè nàchrjein kò jè hora k'e nga mìkìlì tíkoña-là.

⁵¹ N'ó tse kjo'in tsjá-là. Tà ngásòn okji kjo'in tsjá-là koni jñà xità xi jò isén tjín-là. Ikjoàn skindàya kò siìjts'ìin ni'ño.

25

Kjoa xi mangásòn ts'e ìxti íchjín xi te ma-ne

¹ Jè nàchrjein k'e nga kotìxoma jè xi ngajmìlì nchrobá-ne, k'oaá s'ín koma koni komàt'in jñà ìxti íchjín xi te ma-ne. Kiskoé ni'ín lámpara-là xi ts'e asitì. Kiìkoña-là jè xità xi bixan.

² Òn ma-ne ìxti íchjín xi tjín-là kjohítsjeèn koa 'òn ma-ne xi tsjìn-là kjohítsjeèn.

³ Jñà ìxti íchjín xi tsjìn-là kjohítsjeèn kiskoé lámpara-là tanga mìkìlì ts'a-là asitì.

⁴ Koa jñà ìxti íchjín xi jye tjiìn-là ts'a nomità asitì-là kò lámpara-là.

⁵ Jè xità xi tìbixan, mìkìlì xátì j'ìi, koa kjònijñá-là ngats'ìi ìxti íchjín; tsohofè í'ño.

⁶ K'e nga ijchò osen nitjen, 'nó kiìchja jñà xità, kitsò: “Jye nchrobá jè xità xi bixan. Tìtjoo ni'ya, tanguíchjaà indiaà.”

⁷ Ngats'ìi ìxti íchjín tsasítjen, koa tsibítsajnandaà lámpara-là.

⁸ Jñà xi 'òn ma-ne xi tsjìn-là kjohítsjeèn kitsò-là jñà xi tjín-là: “Tjiì itsé-nájen asitì-nò. Jè ni'ín-nájen jye tìbits'o.”

⁹ Tanga jñà ìxti íchjín xi tjín-là kjohítsjeèn, kitsò-là: “Mìkìlì koma, mìkìlì kichóya-là tsajen. Tanguí kindá ñánda satíjna.”

¹⁰ Tanga jñà ìxti íchjín xi tsjìn-là kjohítsjeèn k'e nga kiì katse asitì-là, k'eé j'ìi xità xi bixan. Koa jñà ìxti íchjín xi 'òn ma-ne xi títsandaà nga títi lámpara-là, jahas'en kò jè xità xi bixan ya ni'ya ñánda tjín s'eí. Ikjoàn kisìchjoà xotjoa-là ni'ya.

¹¹ Koma iskan j'ìi-ne jñà ìxti íchjín xi nguì 'òn ma. Kitsò: “Na'èn, Na'èn, chíx'a-nájen ni'ya.”

¹² Tanga jè xità xi bixan, tà kitsò-là: “Okixíi xi xan-nò, mìkìlì bexkon-nò yá-nò jñò.”

¹³ Jesús kitsò-ìsa:

—Jñò, titsajnaandaà, nga mìkiì 'yaà mé nàchrjein-ne koà mé hora-ne nga kjoiaa 'an xi Ki'ndí-là Xità xan-là yijo-na.

Kjoa xi mangásòn ts'e ton xi kitjoé-la jñà ch'nda

14 'Jè nàchrjein k'e nga kotìxoma jè xi ngajmiì nchrobá-ne, k'oaá ti ngaya-là koni tsà jngoò xità xi tjín-là ch'nda. Kjiìn ì'nde tífi. Kiìchja-là ch'nda-là; kisìngatsja ton-là nga jngoò ìjngoò nga kàtasíkinda.

15 'Jngoò ch'nda xi kitsjaà-là 'òn jmiì ton oro; xi ìjngoò jò jmiì kitsjaà-là; xi ma-ne jàn jngoò jmiì kitsjaà-là. K'oaá s'ín kitsjaà-là koni s'ín koma-là nga sùxáko nga jngoò ìjngoò. Ìkjoàn kiì jè nei-là xá ñánda ì'nde kjiìn.

16 Jè ch'nda xi kitjoé-la 'òn jmiì, kisìxáko ton xi kitjoé-la koà nguì okji kisìkijnesòn.

17 Ko jè ch'nda xi jò jmiì kitjoé-la, k'oaá tì kis'iìn, tìkoà nguì jò jmiì kisìkijnesòn.

18 Tanga jè ch'nda xi kitjoé-la jngoò jmiì, tà tsibìjna'ma-né ton xi kitsjaà-là nei-là. Yaá tsibìjnajiìn ìt'aà nangui.

19 'K'e nga jye kjòtsee kiì nei-là ch'nda koi, j'ii ìjngoò k'a-ne; kis'iìn-là kinda jè ton xi kitsjaà-là.

20 Ìjchò jè xi kjòngatsja xi 'òn jmiì, koà nguì 'òn jmiì ijchòkosòn. Kitsò-là nei-là: “Na'èn, 'òn jmiì ton xi jì kinìngatsja-ná, koà nguì 'òn jmiì kisìkijnesoàn.”

21 Jè nei-là kitsò-là: “Ndaà tjín; ngaji, xità ndaà-né. Ndaà kinìtasòn-ná nas'ín tà chiba ton kitsjaà-lè. 'An, isaá tse tsja isa-lè. Tìtjás'en-jììn nga tìtsjako-ná.”

22 Ìkjoàn ijchò jè ch'nda xi jò jmiì kjòngatsja, kitsò: “Na'èn, jò jmiì ton kinìngatsja-ná koà nguì jò jmiì kisìkijnesoàn.”

23 Jè nei-là kitsò-là: “Ndaà tjín; ngaji, xità ndaà-né. Ndaà kinìtasòn-ná nas'ín tà chiba ton kitsjaà-lè. 'An isaá tse tsja isa-lè. Tìtjás'en-jììn nga tìtsjako-ná.”

24 Koà k'e nga ijchò jè ch'nda xi jngoò jmiì kjòngatsja kitsò-là nei-là: “Na'èn, bexkoón-lè nga xità jti takòn-né nga bìxkoí tsojmì xi mì jì bìtjii, ko bìxkoí jñà xi mì jì chíjndii.

25 Koiì kjoa-là nga kitsakjòn-na nga tsibìjna'ma ton-lè ya jjiìn nangui. Ì tjìna-ne ton-lè xi jngoò jmiì kinìngatsja-ná.”

26 Jè nei-là kitsò-là: “ìNgaji, ch'nda ch'o-né koà xità ts'eè-né! Tsà jye tjìiìn-lè nga 'an bìxkoá ñánda mì 'an bìtjee ko bìxkoá ñánda mì 'an kíjndiaa.

27 Tsà ya tsibìjni ton-na ya banco mé-ne k'e nga kjoì-na, tjoé-na ton-na ko ki'ndí-là ton xi ts'an.”

28 Ìkjoàn kitsò-là jñà xità xi ya títsajna: “Chjaà'an-là jè ton xi jngoò jmiì; jè tjii-là ch'nda xi te jmiì ma ts'e.

29 Nga jè xi tjín-là, k'oiì isa-là skanda tsatoó s'e-la, tanga jè xi tsjìn-là, skanda tjá'aán-la mé xi chiba tjín-là.

30 Jè ch'nda xi nì mé chjì-là, tìkatjeen ján ndìtsiaán ya ñánda jñò choòn, yaá skìndàya ko yaá sùjts'iìn nì'ño.”

K'e nga jè Nainá koìndaàjììn-la ngats'ii xità isò'nde

31 'K'e nga kjoiaa ìjngoò k'a 'an xi Ki'ndí-là Xità xan-là yijo-na koni jngoò xitàxá ítjòn nga kjoìkoaa kjoajeya-na, ko àkjale tsjeè-na xi títsajnaandii-na, k'eé kótijnasoàn íxile ts'e kjotìxoma-na xi 'ño jeya tjìna.

32 Ngats'ii xità xi tjín isò'nde, yaá koxkóya nguixkoaàn; ìkjoàn sùjòya koni s'ín paxtò xi ko'ndà tíndsó nga ochrjekàjììn orrè ko tíndsó ska.

33 Jñà orrè, yaá kítsajnat'aà kixi-na, koà jñà tíndsó ska, yaá kítsajnat'aà ngaskón-na.

34 'An xi xitàxá ítjòn 'mì-na xán-là jñà xi títsajnat'aà kixi-na: “Nchrobá jñò xi Nainá kisichikon-t'in-nò; chjoé kjondaà xi tjìnaandaà-là Nainá skanda k'e nga kisindaà isò'nde, nga ya kítsajnaà ya ñánda nga jè tíhotìxoma.

35 'K'e nga kjòhojò-na, kits'ii-ná jñò xi tsoókjeen; k'e nga kjòxínda-na, kits'ii-ná nandá nga kits'iaa; k'e nga tsjìn-na ì'nde ñánda sùkjáya, kits'ii'nde-ná nì'ya-nò.

³⁶ K'e nga tsjìn-na nikje xi ónakjá, jñò kits'ìi-ná; k'e nga kjòxk'én, tsanguì nìkinda-ná; k'e nga ndayá tsohótijna'ya, tsanguì chitsejèn-ná."

³⁷ Koá jñà xi xitá kixi skonanguí-na, kitsò-na: "Na'èn, ¿kjé-né nga ki'ya-lèjen nga kjòhojò-lè, ko kits'ìi-lèjen xi chichi?, o ¿kjé-né nga ki'ya-lèjen nga kjòxínda-lè, ko kits'ìi-lèjen nandá nga ki'yoì?"

³⁸ ¿Kjé-né nga ki'ya-lèjen nga tsjìn-lè i'nde ñánda nìkjáyi, ko kits'ìi'nde-lèjen ni'ya-najen, nas'ín mìkiì yaxkon-lèjen? ¿Kjé-né nga ki'ya-lèjen nga tsjìn-lè nikje xi chíkjeí, ko kits'ìi-lèjen?"

³⁹ ¿Kjé-né nga ki'ya-lèjen nga kjòxk'ín, ko tsanguì nìkinda-lèjen?, o ¿kjé-né nga ki'ya-lèjen nga tina'yi ndayá, ko tsanguì chitsejèn-lèjen?"

⁴⁰ 'An xi xitaxá ítjòn 'mì-na xán-la: "Okixí xi xan-nò, k'e nga k'oas'ín kinìko jngoò xitá xinguiáa nas'ín takó 'ño xitá imá kji, 'aán xi k'oas'ín kinìko-ná."

⁴¹ "An xi xitaxá ítjòn 'mì-na xán-la jñà xitá xi títsajna ngaskón-na: "Tinchat'aaxìn-ná jñò xi kjo'in tíjné-nò. Tanguió ya i'nde ñánda títi ni'ín xi mìkiì bits'o nità kjé-ne, jè i'nde xi tíjndaà ít'aà ts'e xitá neji ko àkjale-la."

⁴² K'e nga kjòhojò-na, jñò, mìkiì kits'ìi-ná xi tsoókjeen; k'e nga kjòxínda-na, mìkiì kits'ìi-ná nandá nga kits'iaa;

⁴³ k'e nga tsjìn-na i'nde ñánda sìkjáya, mìkiì kits'ìi'nde-ná ni'ya-nò. K'e nga tsjìn-na nikje xi ónakjá, jñò mìkiì kits'ìi-ná; k'e nga kjòxk'én mìkiì tsà kinìkinda-ná; k'e nga ndayá tsohótijna'ya, mìkiì tsanguì chitsejèn-ná."

⁴⁴ Tìkooá jñà xitá xi títsajna ngaskón-na skonanguí-na, kitsò-na: "Na'èn, ¿kjé-né nga ki'ya-lèjen nga kjòhojò-lè, nga kjòxínda-lè nga tsjìn-lè i'nde ñánda nìkjáyi, nga tsjìn-lè nikje xi chíkjeí, nga kjòxk'ín, o k'e nga tina'yi ndayá ko mìkiì kinìchjít'aà-lèjen?"

⁴⁵ 'An xi xitaxá ítjòn 'mì-na, xán-la: "Okixí xi xan-nò, k'e nga mìkiì k'oas'ín kinìkoò jngoò xitá nas'ín takó 'ño imá kji, 'aán xi mìkiì k'oas'ín kinìko-ná."

⁴⁶ Jñà xitá ts'en koi s'eé-la kjo'in nità kjé-ne, koá jñà xi xitá kixi s'eé-la kjoabinachon nità kjé-ne.

26

Kiís'ín tsajoóya-ne xitá kondra-la Jesús nga tsoqá'ño

(Marcos 14:1-2; Lucas 22:1-2; Juan 11:45-53)

¹ Jesús k'e nga jye kùichja yije 'én koi kitsò-la xitá xi kota'yàt'aà-la:

² —Jñò, jye tíjìn-nò nga tà jò nachrjein chija ts'e s'eí Paxko; 'an xi Ki'ndí-la Xitá xan-la yijo-na, yaá kongatsja ít'aà ts'e xitá naxandá nga koòt'aà-na krò.

³ Nachrjein koi jñà xitá sko-la no'miì, xitá xi okóya kjotíxoma-la Nainá xi kiskìi Moisés ko xitá jchínga-la jñà xitá judío, yaá chixoña ya nditsin ni'ya-la Caifás xi no'miì ítjòn.

⁴ Yaá tsajoóya-ne kós'ín tsoqá'ño Jesús xi kjoa chijé, ikjoàn sikk'en.

⁵ Kitsò-la xikjín:

—Mì nachrjein-la s'eí sikk'eén nga mì kots'en jñà xitá naxandá.

Jngoò chjoón xi kisikaàjno xkù jne sko Jesús

(Marcos 14:3-9; Juan 12:1-8)

⁶ Jesús, k'e nga tíjna ján naxandá Betania, ya ni'ya-la jngoò xitá xi tsindojno chrjoa yijo-la nga sa ítjòn xi 'mì Simón,

⁷ ijchò jngoò chjoón xi 'ya jngoò lamità ndajo xi 'mì alabastro xi tíjya-la xkù jne, xi 'ño chjí-la. K'e nga tíjnat'aà ímixa Jesús, chjoón jè, tsibíxteèn-sòn sko jè xkù jne.

⁸ Jñà xitá xi kota'yàt'aà-la Jesús k'e nga kijtseè, kòjti-la, kitsò:

—¿Mé-ne nga kasíkits'ón-ne jè xkù jne?

⁹ Tsà kàsatíjna, 'ño-là tse chjí-la koá jè tòn-la komaá kochjít'aà-la xitá imá.

¹⁰ Kìi'nchré Jesús. K'eé kitsò-la:

—¿Mé-ne nìjti-là chjoón jè? Koni s'ín kasìko-na ndaà kàs'ín.

¹¹ Jñà xìtā ìmā kítsajnakō kjit'aà-nò; tanga 'an mì ì tìjnākō kjit'aà-nò.

¹² Koni s'ín kasìko-na chjoón jè, nga kàbixteèn-jno xkì jnē yijo-na, koíi okàs'ín-ne nga síkijnandaà-na nga sijnāà.

¹³ Okixií xi xan-nò, nìtā ñánda-ne nga tìjtsa isò'nde nga kobísòn 'én ndaà-lā Nainá, tìkoáá kobísòn-nè koni s'ín kasìko-na mé-ne nga s̀ikítsjeèn-ne xìtā ìt'aà ts'e chjoón jè.

Kó kis'iin Judas nga tsatjna Jesús

(Marcos 14:10-11; Lucas 22:3-6)

¹⁴ Jè xi 'mì Judas Iscariote xi yā itjojìin ts'e xìtā xi tejò ma-ne xìtā-lā Jesús, kiikon jñà xìtā skō-lā nō'miì,

¹⁵ kitsò-lā:

—¿Kó tjin ton k'oi-ná nga s̀ingatsja-nò Jesús?

Jñà xìtā skō-lā nō'miì, katé ixō ton chroba tsibíndaàjiin-ne.

¹⁶ Judas, k'eé tsibíts'ia nga tsohótsji'nde-lā kós'ín s̀ingatsja Jesús.

Kiis'ín tsibijna okixi Jesús k'e nga tsakjèn-ko xìtā-lā xi tejò ma-ne

(Marcos 14:12-25; Lucas 22:7-23; Juan 13:21-30; 1 Corintios 11:23-26)

¹⁷ Jè nachrjein xi mats'ia ítjòn ts'e s'eí k'e nga kjèn inchrájin xi tsjin-lā nā'yo san jñà xìtā judío, jñà xìtā xi kota'yàt'aà-lā Jesús ijchòkon, kiskònangui-lā, kitsò-lā:

—¿Nánda mejèn-lè nga onguí kındaà-jen tsojmì xi chjineé ts'e s'eí Paxkō?

¹⁸ Jesús kitsò-lā:

—Tanguíchòn ni'ya-lā jngòò xìtā yā ijiin naxandá. Kot'in-là: “Jè maestro k'oaá tsò: Jyeé tíma chrañà nachrjein-na nga kiyá. Yaá ni'ya-lè kjián kachrje s'eí Paxkō kō xìtā xi kota'yàt'aà-na.”

¹⁹ Jñà xìtā xi kota'yàt'aà-lā, k'oaá s'ín kis'iin koni s'ín kitsò-lā Jesús. Yaá tsibíndaà tsojmì xi kokjen kjoa ts'e s'eí Paxkō.

²⁰ K'e nga jye kòjñò, Jesús, tsibíjnat'aà ímíxa kō xìtā-lā xi tejò ma-ne.

²¹ K'e nga nchikjèn, Jesús kitsò-lā:

—Okixií xi xan-nò, jñò, ì tìjnajiin jngòò-nò xi s̀ingatsja-na ìt'aà ts'e xìtā kondra-na.

²² Jñà xìtā xi kota'yàt'aà-lā Jesús 'ñó kjòba-lā k'e nga okitsò. K'eé jngó jngó kiskònangui-lā, kitsò-lā:

—Nā'èn, ¿a 'an-ná?

²³ Jesús kitsò-lā:

—Jè xi kóngajiin-ko-na chroba, jé xi s̀ingatsja-na.

²⁴ An xi Ki'ndí-lā Xìtā xan-lā yijo-na, k'oaá s'ín komat'ian koni s'ín tíchja Xojon-lā Nainá. ¡Tanga ìmā xó-ne jè xìtā xi s̀ingatsja-na! Ìsaá-là ndaà komà tsà mìkìi kits'iin xìtā jè.

²⁵ K'eé kiichja Judas, jè xi s̀ingatsja Jesús, kitsò:

—Maestro, ¿a 'an-ná?

Jesús kitsò-lā:

—Jon, ngaji-né.

²⁶ K'e nga nchikjèn, Jesús kiskoé inchrájin, kiichjat'aà-lā Nainá nga kisichikon-t'in, kisixkoaya ikjoàn kitsjaà-lā xìtā xi kota'yàt'aà-lā, kitsò-lā:

—Chjoé, tìchioò, yijo-na né.

²⁷ Ikjoàn kiskoé jngòò chitsín, kitsjaà-lā kjondaà Nainá, k'eé kitsjaà-lā xìtā xi kota'yàt'aà-lā. Kitsò-lā:

—Ngats'ioò, t'ioò jè xi tjiya chitsín.

²⁸ Jè-né xi jní-na xi síkixiya kjoa xitse xi bindaàjiin-ko-nò. Jè jní-na xíxteèn xi kjondaà ts'e kjìn xìtā mé-ne nga jchat'aà-lā jé-lā.

²⁹ K'oaá xán-nò, mì tì kiì ski-na vino skanda jè nachrjein k'e nga skìkō ìjngòò k'a-nò vino xitse jè nachrjein k'e nga kotixoma Nā'èn-na.

*'Én xi kiichja Jesús nga jè Pedro kjó'mat'in
(Marcos 14:26-31; Lucas 22:31-34; Juan 13:36-38)*

³⁰ K'e nga jye kiseè jngoò-la sò Nainá ts'e Salmo, ikjoàn kii ján i'a nindoò Yá Olivo.

³¹ Jesús kitsò-la xita xi kota'yàt'aà-la:

—Ngats'ioò jñò, nitjen jè, kijneí takòn-ná, nga k'oaá s'ín tíchja Xojon-la Nainá nga tsò:
“Kiyá jè paxtò koa jñà orrè tsjohoya-né.”

³² Tanga koma iskan, k'e nga kjoaáya-na, kjin ítjòn-nò ján nangui Galilea.

³³ Kitsò Pedro:

—Nas'ín ngats'iì xita-lè xi i'nga tsjin takòn-lè, 'an, nimé nachrjein-ne nga tsjin takòn-lè.

³⁴ K'ée kitsò-la Jesús:

—Okixií xi xan-lè, nitjen jè, k'e nga tikj'eè kjindáya kóxtí, ngaji, jàn k'a tsjá'mat'in-ná.

³⁵ Pedro kitsò:

—Nas'ín skanda ya kiyáko-lè mikii kójna'mat'in-lè.

Ngásòn kitsò ngats'iì xita xi kota'yàt'aà-la Jesús.

*Kii kitsò Jesús nga tsibítsi'ba ya i'nde ñánda 'mì Getsemaní
(Marcos 14:32-42; Lucas 22:39-46)*

³⁶ K'ée kii Jesús ya ñánda 'mì Getsemaní ko xita xi kota'yàt'aà-la. Kitsò-la:

—Titsajna ijndé. 'An, ya kò-là kjián nga kichjàt'aà-la Nainá.

³⁷ Jesús kiikjo Pedro ko ingajò ixti-la Zebedeo. Ikjoàn tsibíts'ia nga kjòba-la koa kisikájno inima-la.

³⁸ K'ée kitsò Jesús:

—Tsí baá ma-la inima-na koni tsí mejèn kiyá. Titsajna ijndé koa titsajnakon-ko-ná.

³⁹ Jesús kiikjá chiba-isa. Ikjoàn tsohojna tsakján skanda it'aà nangui koa kisijét'aà-la Nainá, kitsò:

—Ji xi Na'èn-na xan-lè, tsà koma, kàtatjaàxìn-ná kjo'in koi, tanga mìtsà jè 'én ts'an kitasòn, jè kàtitasòn 'én tsiji.

⁴⁰ Ikjoàn j'ii ijngoò k'a-ne ya ñánda titsajna xita-la xi kota'yàt'aà-la, tanga jñà xita-la, kjiyijòfè-né. Jesús kitsò-la Pedro:

—¿A mì kachíkjoa-nò tsà tà jngoò hora kòbitsajnakon-ko-ná?

⁴¹ Titsajna-koò koa titsi'ba-là Nainá mé-ne nga mì sijkijne-nò kjoa ts'e jé. Xi okixi, jé inima-nò tijnandaà-né tanga jè yijo-nò xi tsjin-la nga'ño.

⁴² Xi ma-ne jò k'a kii ijngoò k'a Jesús nga kii kítsi'ba. Kitsò:

—Ji xi Na'èn-na xan-lè, tsà mikii koma tjáxìn-na kjo'in koi, kos'ín kàtitasòn koni s'ín mejèn-lè.

⁴³ K'e nga j'ii ijngoò k'a-ne, jñà xita xi kota'yàt'aà-la, tákó kjiyijòfè-né nga 'ño nijñá-la.

⁴⁴ Komà jàn k'a nga kii kítsi'ba. Yaá kisikítsajna xita xi kota'yàt'aà-la. Táko k'oaá ti kitsò nga tsibítsi'ba.

⁴⁵ J'ii ijngoò k'a-ne ya ñánda titsajna xita xi kota'yàt'aà-la. Kitsò-la:

—¿A tákó titsanikjáya-nò ko titsafè-nò? Jyeé ijchò hora-la, 'an xi Ki'ndí-la Xita xan-la yijo-na, yaá kongatsja jñà xita jé.

⁴⁶ Tisitjeen, chítsejèn-là, tikjaán, jyeé nchrobá chraña jè xi sijnatsja-na.

*Kii komà k'e nga kindobà'ño Jesús
(Marcos 14:43-50; Lucas 22:47-53; Juan 18:2-11)*

⁴⁷ Táko tik'eé tíchja-isa Jesús nga ijchò Judas xi ya itjojìn ts'e xita-la Jesús xi tejò ma-ne. Kjin xita tjiko xi 'ya kichà ndojò ko yá. Jñà kisikasén xita skò-la no'mii ko xita jchínga xi ts'e xita judío.

⁴⁸ Judas, jè xi tsatijna Jesús, ítjòn tsibénojmí-la kós'ín kokò-la Jesús. Kitsò-la:

—Jè xi skine'a, jè-né xi tindoba'ño.

⁴⁹ Nitoón kii kasit'aà chraña-la Jesús. Kitsò-la:

—Ndaà-lè Maestro.

Ikjoàn kiskine'a.

⁵⁰ Jesús kitsò-la:

—Amigo, ¿mé xá kjoì-ne?

Jñà xità xi tjikò Judas, nitoón kitsobà'ño Jesús.

⁵¹ Jngoò xità xi tikoa ya tsóhoko Jesús, tsachrje kichà ndojò-la. Tsajá-la jè xità chì'nda-la no'miì ítjòn; tsatet'aà líká-la.

⁵² Jesús kitsò:

—Tikájnatojò kichà ndojò-lè ya i'nde-la; jñà xi kichà skaàn-ne nga sikk'en xíkjin, ngàsòn kichà kiyá ngajo-ne.

⁵³ ¿A mi 'ya-jèn tsà 'an sijé-la Na'èn-na, tsatoó tejò jmiì àkjalé nitoón sikkasén-na?

⁵⁴ Tanga tsà k'oas'ín sijé, mìkiì kítasòn koni s'ín tíchja Xojòn-la Nainá nga mochjeén-né nga k'oas'ín koma.

⁵⁵ Jesús kitsò-la jñà xità xi kjin ma-ne:

—¿Mé-ne kos'ín kòf'i ndobà'ño-ná nga kò kichà kò yá kich'à koni tsà jngoò xità chijé? Nachrjein nchijòn tijnako-nò ján ingo ítjòn nga okoòya-nò kò mìkiì kindobà'ño-ná.

⁵⁶ K'oíi kjoa-la okoma-ne nga kítasòn 'én xi tjit'aà xojòn-la jñà xità xi kichja ngajo-la Nainá.

Tik'eé-né ngats'iì xità xi kota'yat'aà-la Jesús tsanga kò kitsjeiin takòn.

Kii komà k'e nga tsibijna Jesús nguixkon no'miì ítjòn

(Marcos 14:53-65; Lucas 22:54-55, 63-71; Juan 18:12-14, 19-24)

⁵⁷ Jñà xità xi kitsobà'ño Jesús kùkò ñánda tijná Caifás xi no'miì ítjòn. Yaá títsajna xità xi okóya kjotixoma-la Nainá xi kiskii Moisés kò xità jchínga-la xità judío.

⁵⁸ Jè Pedro, tà kjiin tà kjiin tsajmeètjngui-la skanda ijchò nditsin ni'ya-la no'miì ítjòn. Jahas'en ni'ya. Yaá tsibijnat'aà-la ñánda títsajna xità xi síkinda ni'ya ingo nga mejèn-la skoe kós'ín koma nga kjoehet'aà kjoa.

⁵⁹ Jñà xità sko-la no'miì kò xità jchínga, ngats'iì xità xi tjin-la xá ts'e xità judío, tsohótsji'nde-la nga tsját'in 'én xi kondra ts'e Jesús mé-ne nga koma sijnatsja-ne xità Roma nga sikk'en Jesús.

⁶⁰ Tanga nimé 'én kisakò-la nas'ín ijchò xità ndiso xi kondra ts'e. Xi komà iskan ijchò jò xità ndiso

⁶¹ xi kitsò:

—Xità jè kitsò-né: “An, koma-na nga sihixòña ingo ítjòn-la Nainá koa jàn nachrjein kindàyà ijngoò k'a-na.”

⁶² K'eé tsasijna kixi jè no'miì ítjòn. Kitsò-la Jesús:

—¿A nímé 'én nokjoì, koni tsò 'én xi tsjá xità koi xi kondra tsiji?

⁶³ Jesús mìkiì kichja. Jè no'miì ítjòn kitsò-la:

—Tènojmi kixi nga nguixkon Nainá xi tijnakon. Kot'in-nájen. ¿A ngaji-né xi Cristo [xità xi xó kiskasén-lè Nainá] nga Ki'ndí-la mai?

⁶⁴ Jesús kitsò-la:

—Ngaji xi k'oa si nga 'an-ná. Tikoa, k'oaá xán-nò, jñò jcha-ná xi Ki'ndí-la Xità xan-la yijo-na nga kótijnat'aà kixi-la ñánda tijná Nainá xi 'ño tse nga'ño tjin-la. Tikoaá jcha-ná k'e nga kjinchrobàjñaà jjiin ifi xi ts'e ngajmiì.

⁶⁵ Jè no'miì ítjòn tsatijndajno yijo-la nikje-la xi íkjá nga 'ño kòjti-la, kitsò:

—Xità jè, jyeé kà'yaà nga chjajno-la Nainá koni tsò 'én xi chja. ¿Mé s'eén-isa-ná xità xi kj'eii xi tsjá 'én? Jñá, jyeé kàna'ya-lá koni s'ín chjajno-la Nainá.

⁶⁶ ¿Jñò, kó bixón, mé xi sikoáá?

Ngats'iì xità kitsò:

—Tjin-la jé, ok'ín-la nga sikk'en.

⁶⁷ Ikjoàn tsibichrá'a kò tsi'beé-la. Koa tjin xi isén-la tsi'beé'a,

⁶⁸ kitsò-la:

—Jì Cristo [xi xó kisikasén-lè Nainá], kot'in-nájen, ¿yá xi tí'beé-lè?

K'e nga jè Pedro jàn k'a tsoho'mat'in Jesús

(Marcos 14:66-72; Lucas 22:56-62; Juan 18:15-18, 25-27)

⁶⁹ Jè Pedro k'e nga tíjna ndítsin ni'ya, ijchòkon jngoò chjoón chì'nda xi kitsò-la:

—Tìkoaá ngaji, yaá tjaàkoji Jesús xi Galilea ì'nde-la.

⁷⁰ Tanga jè Pedro tsoho'mat'in-né nga nguixkon ngats'ì xìta. Kitsò:

—Mìkiì be mé 'én xi tinokjoi.

⁷¹ Jè Pedro jyeé tíbitjo xotjoa ni'ya k'e kijtseè ìjngoò chjoón xi k'oa ti kitsò-la jñà xìta xi ya títsajna. Kitsò:

—Xìta jè, tìkoaá ya tsóhoko Jesús xi Nazaret ts'e.

⁷² Pedro ìjngoò k'a tsoho'mat'in. Kitsò:

—Tíbeè Nainá, mìkiì bexkoan xìta jè!

⁷³ Nga komà iskan jñà xìta xi ya títsajna ijchòkon ñánda tíjna Pedro. Kitsò-la:

—Okixi-né, tìkoaá ngaji xìta xi kota'yàt'aà-la Jesús-né. 'Yaà-lè; k'oaá tìs'ín nokjoi.

⁷⁴ K'ée ìsa 'ñó kiìchja Pedro kitsò:

—Beè Nainá, nas'ín tìk'eèn-ná, mìkiì bexkoan xìta jè!

Tìk'e-ne kiskindàya jngoò kóxtí.

⁷⁵ K'ée tsibítsjeèn-la Pedro koni kitsò-la Jesús: “K'e tìkj'eè kjindàya kóxtí, ngaji, jàn k'a tsjá'mat'in-ná.” K'ée itjo ni'ya Pedro, jàn ndítsiaán; ndaà jchán kiskindàya.

27

Kjoa xi komàt'in Jesús k'e nga kjòngatsja Pilato

(Marcos 15:1-2; Lucas 23:1-2; Juan 18:28-32)

¹ K'e nga kis'e isén, ngats'ì xìta skò-la no'miì, jñà xìta jchínga ts'e xìta judío tsajoóya-ne nga kondra kjoì-la Jesús mé-ne nga koma sìngatsja-ne jñà xìta Roma nga sìk'en.

² Tsibít'aà'ñó, kiìko nga kisìngatsja Pilato xi xìtaxá gobernador tíjna ts'e Roma.

Kiì komàt'in Judas k'e nga k'en

³ Judas, jè xi tsatíjna Jesús, k'e nga jye kijtseè nga jye kitjoèt'in kjoa nga kiyá, 'ñó kokájno-la kjoa xi kis'iin koa kisikátji-ne ton chroba xi katé ma-ne jñà xìta skò-la no'miì ko xìta jchínga.

⁴ Kitsò-la:

—Tseé jé tsohótsji-la yijo-na nga kisìngatsja-nò jngoò xìta xi nímé jé tjín-la.

Tanga jñà xìta koi kitsò:

—Ngajen, mìkiì 'ya-jen. Kjoa tsiji-né.

⁵ Judas tsibítsjo ton ya ingo ítjòn. K'ée kiì tsibítjohóngui yijo-la.

⁶ Jñà xìta skò-la no'miì, kiskoé ton, kitsò:

—Mìkiì koma ya sìjngoá ton xi tjíya kaxa-la ton kjotjò-la Nainá. Ton jè, chjí-la mik'en-né.

⁷ K'ée tsajoóya-ne nga jè ton jè, nanguií kotse jngoò 'nde-ne, xi 'mì: Ì'nde Ñánda Mandaà Tjji, mé-ne nga s'e-ne ì'nde ñánda koma sìjìin xìta xi xìn naxandá-la.

⁸ K'oií kjoa-la, skanda nachrjein ì'ndeì, tákó k'oaá 'mì ì'nde jè nga Ì'nde-la Jní 'mì.

⁹ K'oaá s'ín tsitasòn koni s'ín kitsò Jeremías xìta xi kiìchja ngajo-la Nainá nga kitsò: “Kiskoé ton chroba xi katé ma-ne, koni tjín tsibíjna-la chjí-la jñà xìta Israel,

¹⁰ ko k'oaá s'ín kisikjeén ton jè nga tsatse ì'nde-la xìta xi tjí bíndaà koni s'ín kitsjaà-na okixi Nainá.”

'Én xi kiìchja Pilato k'e nga kiskònangui-la Jesús

(Marcos 15:2-5; Lucas 23:3-5; Juan 18:33-38)

¹¹ Jesús, k'e nga síjna nguixkon jè xìtaxá gobernador kiskònangui-la, kitsò-la:

—¿A jì-né xi xitaxá ítjòn-la jñà xita judío?

Jesús kitsò:

—Ngají xi k'oa si nga 'an-ná.

¹² K'e nga nchihóngui Jesús jñà xita sko-la no'miù ko xita jchínga-la xita judío, Jesús nimé 'én kiichja.

¹³ K'eé kitsò Pilato, jè xi xitaxá gobernador:

—¿A mì na'yà-la koni tsò-lè? Kjìn 'én tsjá xi kondra tsiji.

¹⁴ Tanga Jesús nijngò 'én kiichja. K'oií kjoa-la nga jè xitaxá gobernador tà k'oaá komà-la.

Kií komà k'e nga kitjoònè kjoa Jesús nga kiyá

(Marcos 15:6-20; Lucas 23:13-25; Juan 18:38-19:16)

¹⁵ Nga xkì nó k'e nga bitjo s'eí Paxko, jè xitaxá gobernador síkijnandeí jngò xita xi títsa'ya ndayá, jè xi mejèn-la xita naxandá nga kijnandeí.

¹⁶ Tik'eé-ne tíjna'ya ndayá jngò xita xi 'ya-la nga 'ño ts'en xi 'mì Barrabás.

¹⁷ K'e nga chixoña xita naxandá, jè Pilato kiskòngui-la, kitsò-la:

—¿Yá-né xi mejèn-nò nga kijnandeí? ¿A Barrabás-né, o xi Jesús-né xi Cristo 'mì-là?

¹⁸ Koií okitsò-ne Pilato nga jyeé tíjìn-la nga tà kjoaxitakòn-né nga ya ijchò síngatsja Jesús.

¹⁹ Jè Pilato k'e nga tíjna ni'ya osen, jè chjoón-la kisikasén xá-la, kitsò-la: “Kií jì chingájin kjoa-la xita kixi jè. Nati nitjen, tsí 'ño ch'o tsò nijná xi kò'biì-na ít'aà ts'e.”

²⁰ Tanga jñà xita sko-la no'miù ko xita jchínga, chinchá'a xita naxandá nga kàtasíjé nga kàtijnandeí Barrabás ko kàtasík'en Jesús.

²¹ Jè xitaxá gobernador ijngò k'a kiskòngui-la jñà xita naxandá; kitsò-la:

—¿Ñá-laá nga ingajò xita koi xi mejèn-nò nga síkijnandiaá?

Jñà xita naxandá kitsò:

—Jè Barrabás.

²² Pilato kiskòngui-la jñà xita naxandá. Kitsò-la:

—¿Mé xi sikoá Jesús xi Cristo 'mì-là?

Ngats'ìi xita naxandá kitsò:

—¡Kàtasit'aà krò!

²³ K'eé kitsò Pilato:

—¿Mé jé xi tsohótsji, mé-ne kiyá-ne?

Jñà xita, isaá 'ño kiichja, kitsò:

—¡Kàtasit'aà krò!

²⁴ K'e nga kijtseè Pilato nga nì mé kjoa sindaàjin, tà isaá tímatse kjoasiì, kiskinikjaá nandá nga tsaníjno tsja nga nguixkòn xita naxandá [mé-ne nga skoe-ne jñà xita nga nimé jé tjín-la]. Kitsò:

—Nimé jé tjín-na xi ít'aà ts'e xita kixi jè nga mejèn-nò nìk'eèn. Kjoa tsajòn-nò.

²⁵ Ngats'ìi xita kjìn kitsò:

—Kjoabiyaà-la xita jè, kinda tsajen-nájen ko ixti-najen.

²⁶ Pilato, k'eé kiskijnandeí Barrabás; k'e nga jye kitsjaà okixi nga tsajá-la Jesús, ikjoàn kisingatsja nga sít'aà krò.

²⁷ Jñà soldado-la xitaxá gobernador kiiko Jesús ján ni'ya osen. Ikjoàn kiichja yije-la soldado xikjín nga tsibítsajnandiì-la.

²⁸ Tsachrje nikje-la koá kiskjá jngò nikje xi inì kji.

²⁹ Ikjoàn tsibí'a sko jngò corona na'yá xi jñà xó tsibíndaà-ne, koá jngò yá tsohóya tsja kixi; k'eé chinchaxkó'nchit'aà-la nga kisísobà-la. Kitsò-la:

—¡Viva xitaxá ítjòn-la xita judío!

³⁰ Tikoaá tsibíchrájno koá kiskoé yá xkajnchra xi kjiya tsja, tsatjì sko.

³¹ K'e nga jye kisisobà-la, jaàxìn-la nikje inì xi íkjá. Ikjoàn kisikákjá-ne xi nikje ts'e. K'eé kiìko nga kosit'aà krò.

*Kií kiniko Jesús k'e nga kisasit'aà krò
(Marcos 15:21-32; Lucas 23:26-43; Juan 19:17-27)*

³² K'e nga jye nchifiko Jesús, kiskaàkjoò jngoò xità xi Cirene i'nde-la xi 'mì Simón. Jñà soldado kjo'ño kis'iin-la nga kisik'ajen krò-la Jesús.

³³ K'e nga ijchòko ya i'nde ñánda 'mì Gólgota 'én xi tsòya-ne i'nde sko mik'en,

³⁴ yaá kitsjaà-la vino xi tsjájin-la ndá chikitsja. K'e nga kiskoòt'aà Jesús mìkì kits'iì.

³⁵ K'e nga jyeé tsasit'aà krò, jñà soldado kisiskáko nikje-la Jesús nga kisika'bí-la xíkjin yá ts'e koma. K'oaá s'ín tsitasòn 'én-la jè xità xi kiichja ngajo-la Nainá nga kitsò: “Kisika'bí nikje-na koa kisiskáko yá ts'e koma.”

³⁶ Ikjoàn yaá tsibitsajna nga kisikinda Jesús.

³⁷ Ya isòn sko krò tsibít'aà 'én xi k'oa kitsò mé jé xi komà-la nga kinik'en. Jñà 'én koi, tsò: “Jè jèe xi Jesús xi Xitàxá Ítjòn-la xità judío.”

³⁸ Tikoáá kisit'aà krò jò xità chijé. Jngoò kisit'aà nga kixi-la koa jngoò kisit'aà nga ngaskón-la.

³⁹ Jñà xità xi ya ja, síkatji sko nga kiichjajno-la,

⁴⁰ kitsò-la:

—Jì, k'oaá kisi nga siixòñi ingo ítjòn-la Nainá ko jàn nachrjein kındaà ngajo-ne; tikijnandejí yijo-lè. Tsà kixi kjoa nga jì xi Ki'ndí-la Nainá, chinájen-t'i yijo-lè krò.

⁴¹ K'oaá tis'ín kisisobà-la jñà xità sko-la no'miì, ko xità xi okóya kjoítixoma-la Nainá xi kiskì Moisés, ko xità jchínga ts'e xità judío. Kitsò:

⁴² —Xità jè, tsachrjekàjin kjo'in xi kje'í xità, tanga jè xi yijo-la, mìkì ma ochrjekàjin kjo'in. Tsà kixi kjoa nga jè Xitàxá Ítjòn-la Israel, kàtìtjojen-t'aà krò mé-ne nga kòkjeiín-ná it'aà ts'e.

⁴³ Xità jè, it'aà ts'e Nainá kjò'ñót'aà ikon. Tsà kixi kjoa tsjakeè Nainá, i'nde, jè kàtasiko. Nga k'oaá tì kitsò nga Ki'ndí-la Nainá ma.

⁴⁴ Skanda jñà xità chijé xi tikoá ya kjit'aà krò tikoáá tsatít'aà.

*Mé xi komà k'e nga k'en Jesús
(Marcos 15:33-41; Lucas 23:44-49; Juan 19:28-30)*

⁴⁵ K'e nga ijchò nchisen skanda xi jàn nga kjòhoxòn, kòhokji nga tíjtsa isò'nde kòjñò.

⁴⁶ Tjè-ne hora Jesús 'ño kiichja nga kitsò: “Elí, Elí, ¿lama sabactani?” 'Én jè tsòya-ne: Nainá, Nainá, ¿mé-ne kàjneitakòn-ná?

⁴⁷ Tjín i'nga xità xi ya títsajna xi kiì'nchré-la, kitsò:

—Xità jè, jé chja-la Elías.

⁴⁸ K'eé tsangachikon jngoò xi kiìkjaá tsanga; kisika'nchi-la ko vinagre; ikjoàn tsibísko-la ínaxo; kitsjaà-la Jesús nga kàt'iì.

⁴⁹ Tanga kitsò xità xi i'nga:

—Kiì k'oa niko, chítsejèn-lá, ¿a kjoí Elías nga skónájen-t'aà krò?

⁵⁰ Jesús jngoò k'a 'ño kiskindàya. Ikjoàn k'en.

⁵¹ Jè nikje velo xi tjòhóya jngoò osen ingo ítjòn kixajndà. Jòya komà skanda it'aà nangui; ts'a ch'ón koa tsàkjàn naxi

⁵² nga kitáx'a jñà itsjó-la mik'en. Kjìn xità tsjeè-la Nainá jaáya-la xi kjòtseé k'en.

⁵³ Jñà xità mik'en xi itjo-ne itsjó-la, k'e nga koma iskan nga jaáya-la Jesús, xità koi, jahas'en ya naxandá tsjeè Jerusalén; kjìn xità kijtseèxkon.

⁵⁴ Jñà xità xi nchisíkinda Jesús ko jé xità sko-la soldado, k'e nga kijtseè nga ts'a ch'ón, ngats'iì kjoa xi komà, tsí ndaà kitsakjòn. K'eé kitsò:

—Kixií-la kjoa, xità jè, Ki'ndí-la Nainá-né.

⁵⁵ Tíkooá kjìn íchjín títsajna xi kjiìn nchikotsejèn-ne xi inchrobà-tjingui-là Jesús skanda ján Galilea nga kisichját'aà-la.

⁵⁶ Yaá títsajna xi 'mì María Magdalena, María xi nea-là ma Jacobo kò José, kò nea-là ixti-là Zebedeo.

K'e nga kisihjiìn Jesús

(Marcos 15:42-47; Lucas 23:50-56; Juan 19:38-42)

⁵⁷ K'e nga jye kòjñò, j'ì jngòò xitá nchiná xi 'mì José. Yaá i'nde-là jè naxandá xi 'mì Arimatea. Xitá jè tíkooá yaá kiskoòta'yát'aà-la Jesús.

⁵⁸ K'eé kiichja-là Pilato nga kisijé-là yijo-là Jesús. Jè Pilato kitsjaà okixi nga kàtatjoé-là.

⁵⁹ José kiskoé yijo-là Jesús; kisikájté jngòò nikje sávana tsjeè.

⁶⁰ Kii kíhjiìn ya nangui-là xi ts'e José. Kiskinìs'engui jngòò ngajo itsjó xitse xi xó tsibíndaà-ne ya ingui nguijo. Ikjoàn tsohótsa xotjoa-là ngajo jngòò ndajo teè; ikjoàn kii-ne.

⁶¹ Jè María Magdalena kò María xi ijngòò, yaá tsibítsajnat'aà chrañà-là ñánda kisihjiìn Jesús.

Mé-ne soldado kisikinda-ne ñánda kisihjiìn Jesús

⁶² K'e nga komà inchijòn, jè nachrjein nikjáya, jñà xitá sko-là no'miì kò xitá fariseo kiikon Pilato.

⁶³ Kitsò-la:

—Na'èn, bítsjeèn-najen, jè xitá ndiso jèe, k'e nga sa tsibijnakon kitsò-né: “K'e nga kijchò jàn nachrjein kjoáya-na.”

⁶⁴ K'oi kjoa-là kàtamakinda itsjó-la skanda k'e koma jàn nachrjein nga mì yaá kijchò xitá-la xi kota'yát'aà-la k'e nga nitjen nga kjiiko chijé yijo-là. Ikjoàn kitsò jñà xitá-la nga keenójmí-la jñà xitá naxandá: “Jyeé jaáya-là xi it'aà ts'e kjoabiyaà.” Koá isaá ch'o komà 'én ndiso koi koni jñà xi ítjòn.

⁶⁵ Kitsò Pilato:

—Ya títsajna soldado. Tanguió tikindaa. Ñó tichjoà jè itsjó nga 'ñó kàtas'e.

⁶⁶ K'eé kii nga tsibíchjoà'ñó jè itsjó koá tsasén jngòò-la sello ya isò'nga-là ndajo xi kijtsa. Ikjoàn kisikítsajna soldado xi kisikinda.

28

Mé xi komà k'e nga jaáya-là Jesús it'aà ts'e kjoabiyaà

(Marcos 16:1-8; Lucas 24:1-12; Juan 20:1-10)

¹ K'e nga jye tsato nachrjein nikjáya, nga jye tís'e isén jè nachrjein tahàngo nga tàts'en xomàna, kii María Magdalena kò María xi ijngòò nga kii katsejèn-la itsjó-la ñánda kisihjiìn Jesús.

² K'e nga itjokàjen jngòò àkjale-là Nainá xi inchrobà-ne ngajmiì, tà nitoón ts'a jngòò ch'ón xi 'ñó ts'a nga jaàxìn jè ndajo xi kijtsa ngajo itsjó; yaá tsibijnasòn.

³ Jè àkjale ote kji koni jngòò ni'ín ch'on; kò jè nikje-là xi íkjá, chroba kji koni kjoàn 'nchán.

⁴ Jñà soldado k'e nga kijtseè, tsí ndaà kitsakjòn-la. Tsí chiba-là tsatsé-né koá yaá k'en-ña.

⁵ Jè àkjale kitsò-la jñà íchjín:

—Kì tsakjoòn-jèn. Be-ná, jè binchaàtsjioè Jesús xi kisit'aà krò.

⁶ Mì tì jí tjna-ne. Jyeé kòfaáya-là koni s'ín kitsò nga kjoáya-là. Nchrobá chitsejèn-là i'nde-là ñánda kisijna.

⁷ Nitoón tanguió, koatìn-là xitá xi kota'yát'aà-la: “Jyeé kòfaáya-là. Jè, yaá tífi ítjòn-nò ján Galilea. Yaá jchaxkoòn ijngòò k'a.” Tà k'oaá tjin 'én xi tsja-nò.

⁸ Jñà íchjín nitoón itjongui-ne nguijo; kii tsangachikon; okji tsakjón koá okji 'ñó tsja s'e-là nga kii kénojmi-là xitá xi kota'yát'aà-la Jesús.

⁹ K'e nga nchifi íchjín, tà n̄itoón kisatìkjoò Jesús koà kisìhixat'aà. Jñà íchjín, kii kinchat'aà chrañà-là, ìkjoàn chíncha-xkó'nchit'aà-là nga kijtseèxkón, k'eé kitsohòkjá ndsokò.

¹⁰ Jesús kitsò-là:

—Kì tsakjoòn-jèn. Tanguió t̄ikí'nchré jñà 'ndsè mé-ne nga kàtjì-ne ján Galilea. Yaá skoe ìjngoò k'a-na.

'Én xi kitsjaà jñà soldado

¹¹ K'e nga nchifi-ne jñà íchjín, t̄ikoaá kii i'nga-ne jñà soldado xi kisìkinda jé ìtsjó; kii ján jngoò osen naxandá nga kii kénajmí-là jñà x̄it̄a skò-là nò'miì ngats'ìi kjoa xi komà.

¹² Jñà x̄it̄a skò-là nò'miì kiikákò jñà x̄it̄a jchínga. K'e nga jye tsajoóya-ne, tseé t̄on kitsjaà-là jñà soldado,

¹³ ìkjoàn kitsò-là:

—Jñò, k'oaá tixón: “K'e nga ijchò osen n̄itjen nga titsayijòfè-jen, jñà x̄it̄a xi kota'yàt'aà-là Jesús ijchòkjaá chijé yijo-là.”

¹⁴ Tsà k̄jì'nchré jè x̄it̄axá gobernador nga titsayijòfè, ngajeén onguíchoòn-jen mé-ne nga mì k̄jò'in tsjá-nò.

¹⁵ Jñà soldado kiskoé t̄on xi kitsjaà-là kò k'oaá s'ín kitsò koni s'ín ki'mì-là. Skanda n̄achrjein ì'ndeì tákó k'oaá tsò jñà x̄it̄a judío.

*Kii kitsò Jesús nga kitsjaà-là xá x̄it̄a xi kota'yàt'aà-là
(Marcos 16:14-18; Lucas 24:36-49; Juan 20:19-23)*

¹⁶ Jñà x̄it̄a xi kota'yàt'aà-là Jesús xi nguì tejngoò ma-ne, kii ján Galilea ya nindoò ñánda nga okitsò-là Jesús.

¹⁷ K'e nga kijtseé Jesús, chíncha-xkó'nchit'aà-là nga kijtseèxkón. Tanga t̄jín i'nga xi mìkii kòkjeíin-là tsà jè-né.

¹⁸ Jesús, k'eé kii kasit'aà chrañà-là, kitsò-là:

—Jyee kitjoé yije-na nga'ñó nga 'an kotìixoma ngajmii kò ì isò'nde.

¹⁹ Tanguíchòn yije x̄it̄a xi t̄jín nga t̄jtsa naxandá xi t̄jín isò'nde; takóya-là nga ìt'aà ts'an kàtakota'yà; t'een bautizar ìt'aà ts'e 'ín-là Nà'èn-ná kò ts'e Kì'ndí-là koà kò ts'e Inima Tsjeè-là Nainá;

²⁰ takóya-là nga kàtasíkitasòn yije kjoa xi 'an tsakoóya-nò. Kì n̄jchàajìin-jèn nga 'aán t̄ijnakò-nò n̄achrjein inchijòn skanda k'e nga kjoehet'aà isò'nde. K'oaá s'ín kàtama.

'Én ndaà-la Nainá xi kjoa ts'e Cristo koni s'ín kiskii San Marcos

*Kó kitsò 'én xi kiichja Juan xi kis'iin bautizar xita
(Mateo 3:1-12; Lucas 3:1-9, 15-17; Juan 1:19-28)*

¹ I mats'ia-ne 'én ndaà-la Jesucristo xi Ki'ndí-la Nainá.

² K'oaá s'ín komà koni s'ín tjit'aà xojon-la Isaías xita xi kiichja ngajo-la Nainá nga kitsò:
'An, sikasén itjòn-lè xita-na xi kjiiko 'én,
jè xi koìindaàya itjòn-lè ndiyá-lè.

³ Na'yà-la jta-la jngoò xita xi 'ño chja
ya i'nde it'aà xìn ñánda nangui kixi choòn, nga tsò:
"Tjandaà ndiyá-la Nainá ya jjiin inima-nò;
kixi tikájna koni jngoò ndiyá ñánda kojmeèya Na'èn-ná."

⁴ K'oaá s'ín komà; j'ii jè Juan nga kis'iin bautizar xita ya i'nde it'aà xìn ñánda nangui
kixi choòn. Kiichjaya nga kátasíkájno jé-la jña xita nga mì tì jé kohótsji-ne, ikjoàn kátas'ín
bautizar yijo-la mé-ne nga siichàat'aà-la Nainá jé-la.

⁵ Kjìn xita ijchò 'nchré-la Juan xi inchrobà-ne nangui Judea ko naxandá Jerusalén. K'e
nga jye jahatakòn jé-la jña xita, jè Juan kis'iin bautizar ya nandá xajngá nandá Jordán.

⁶ Nikje xi tsohòkjá Juan, tsja-la cho camello-né; ko jngoò sincho chrjoa tsibíkjá
ndáyá-la; tsojmì xi kiskine Juan, jña cho langosta, ko tsjén-la cho cera xi tjín jjiin ijña.

⁷ K'oaá s'ín kiichja nga tsò:

—Jngoò nchrobátjngui-na xi isa tse nga'ño tjín-la mì k'oaà-ne koni 'an, skanda mì kì
tj'nde-na nga kósiñiat'aà-la nga skjnda jè xox'ín-la xojté-la.

⁸ Kixií kjoa 'an, ta nandá s'iin-na bautizar xita, tanga jè xi sa nchrobátjngui-na, koó
Inima Tsjeè-la Nainá s'iin-nò bautizar.

*Kós'ín komà k'e nga komà bautizar Jesús
(Mateo 3:13-17; Lucas 3:21-22)*

⁹ Jngoò nachrjein j'ii-ne Jesús ya Nazaret, nangui xi chja-ne Galilea; ikjoàn jè Juan
kis'iin bautizar ya nandá xajngá nandá Jordán.

¹⁰ K'e nga itjokàjiin-ne nandá Jesús, nitoón kijtseè nga kitáxa ngajmii koa jè Inima
Tsjeè-la Nainá inchrobàjen 'nè-la koni jngoò nise paloma.

¹¹ Koa kina'yà jngoò-la 'én xi ngajmii inchrobà-ne xi kitsò:

—Ji-né xi ki'ndí-na, xan-lè, xi 'ño matsjake-lè, tsja tjín-la takoàn it'aà tsiji.

*K'e nga jè xita neii kiskoòt'aà Jesús
(Mateo 4:1-11; Lucas 4:1-13)*

¹² Nga komà iskan jè Inima Tsjeè-la Nainá kiskasén Jesús ya i'nde it'aà xìn ñánda
nangui kixi choòn.

¹³ Ichán nachrjein tsibìjna; tsibìjnajiin-la cho ts'en ko jè xita neii kiskoòt'aà nga mejèn-la
nga kátátsji jé. Tanga jña àkjale kisis'in-la.

*K'e nga tsibíts'ia Jesús nga kisixá ya i'nde Galilea
(Mateo 4:12-17; Lucas 4:14-15)*

¹⁴ K'e nga jye kii ndayá Juan xi kis'iin bautizar xita, Jesús kii ján Galilea nga kiichjaya
'én ndaà-la Nainá koni s'ín otixoma Nainá.

¹⁵ Kitsò:

—Jye kjòchrañat'aà-nò nachrjein nga jchaa kós'ín otixoma Nainá. Tikájno jé-nò, kì tì jé
binchaàtsji-nò; kàtakjeiín-nò 'én ndaà-la Nainá.

Kii kis'iin Jesús nga ñijòn xita kiichja-la xi ma-la sík'en tìn
(Mateo 4:18-22; Lucas 5:1-11)

¹⁶ Jesús, k'e nga ja indii ndáchikon Galilea, kijtsee xi 'mì Simón ko 'ndse Andrés nga nchisíkatjen-nguindá na'ya-la. Xita koi, tìn sík'en.

¹⁷ Jesús kitsò-la:

—Nchrobátjìngui-ná, 'an tsjaà-nò xá nga kíxkóya xita xi 'an kjit'aà-na koni s'ín maxkóya tìn k'e nga nìk'eèn.

¹⁸ Jñà xita koi ñitoón kisikájna na'ya-la nga kiitjìngui-la Jesús.

¹⁹ Isa xijngoaà isa, Jesús kijtsee xi 'mì Jacobo ko 'ndse Juan, ixti-la Zebedeo nga títsaya chitso; nchibíndaàya na'ya-la.

²⁰ Tíkooá ñitoón kiichja-la xita koi; yaá kiitjìngui-la Jesús; kisikájna Zebedeo xi na'èn-la ma, ko xita chi'nda xi síxáko ya iya chitso.

Jngoò xita xi inima ch'o-la neí tjiin inima-la
(Lucas 4:31-37)

²¹ Ijchò naxandá Capernaum; k'e nga jye ijchò nachrjein nìkjáya, jahas'en ni'ya ingo sinagoga ts'e xita judío; ikjoàn tsakóya 'én-la Nainá.

²² Jñà xita, tà k'oaá komà-la koni tsò 'én xi tsakóya. K'oaá s'ín tsakóya koni jngoò xita xi 'ñó tjin-la kjotixoma; mìtsà k'oaas'ín tsakóya koni xita xi okóya kjotixoma-la Nainá xi kiskii Moisés.

²³ Ya ni'ya ingo sinagoga tina jngoò xita xi inima ch'o-la neí tjiin inima-la. 'Ñó kiichja nga kitsò:

²⁴ —Ji Jesús, xi Nazaret tsiji, ¿mé xi mejèn-lè? ¿Mé xi binchaàtsji? ¿A kòf'i nìkjesòn-nájen? Bexkon-lè; jì-né xi Xita Tsjeè-la Nainá.

²⁵ Tanga Jesús tsohótiko jè inima cho-la neí, kitsò-la:

—Jyò tjni, titjoiin inima-la xita jè.

²⁶ Jè inima cho-la neí kisikatsé koa kiskindàya xá, ikjoàn itjoiin inima-la xita jè.

²⁷ Ngats'ii xita xi títsajna, tà k'oaá komà-la; xki xi ján tsohóko xíkjín; kitsò:

—¿Mé kjoa-ne koi? Jngoò kjoa xitse okóya xi tjin-la kjotixoma. Skanda jñà inima cho-la neí tsjá-la okixi, ko 'nchréñijon-la.

²⁸ Jesús, ñitoón kina'ya-la kóhokji nga jngoò itjandii nangui xi chja-ne Galilea.

K'e nga kisindaà-ne Jesús jè nachíya-la Pedro
(Mateo 8:14-15; Lucas 4:38-39)

²⁹ Jesús, k'e nga itjo-ne ni'ya ingo sinagoga, kjihjtako Jacobo ko Juan, ñitoón kii ya ni'ya-la ñánda tina Simón ko Andrés.

³⁰ Jè nachíya-la Simón, kijna xk'én-né. Ch'in tijnnga tjin-la. Ñitoón kis'enojmi-la Jesús.

³¹ Ikjoàn kiikasit'aà chraña-la; kitsobà'ño tsja; kisikasítjen. Ko ñitoón kitjaàxìn-la ch'in tijnnga. Ikjoàn chjoón jè, kisìs'in-la Jesús ko xita xi kjihjtako.

K'e nga Jesús, kjìn xita xk'én kisindaà-ne
(Mateo 8:16-17; Lucas 4:40-41)

³² K'e nga jye kiskaàtjì ts'óí nga jye kòjñò, j'ìiko-la Jesús ngats'ii xita xk'én ko xi inima cho-la neí tjiin inima-la.

³³ Ngats'ii xita naxandá, yaá kitseejto xotjoa ni'ya.

³⁴ Jesús, kjìn jchán xita kisindaà-ne xi kjìn skaya ch'in tjin-la tíkooá tsachrjekàjiiin inima ch'o-la neí xi tjiin inima-la xita; Jesús mìkii kitsjaà'nde nga jñà neí kiichja nga jñà inima ch'o-la neí jyeé beèxkon yá-né Jesús.

K'e nga ijchò Jesús ján Galilea nga kisika'bí 'én ndaà-la Nainá
(Lucas 4:42-44)

³⁵ 'Ñó tajñòya tsasítjen Jesús; tákó jñò-ìsa nga itjojiìn najnchra; kii jngoò ì'nde it'aà xìn ñánda tsjin xita nga kiichjat'aà-la Nainá.

³⁶ Simón kò xita xíkjin xi i'nga, kii kátsji Jesús.

³⁷ K'e nga jye kisakò-la ñánda tíjna Jesús, kitsò-la:

—Ngats'ii xita, jí ótsji-lè.

³⁸ Kiichja Jesús, kitsò:

—Tikoá tíkjiaán jñà naxandá chrañat'aà nga kichjaya 'én-la Nainá nga koií xá j'i-na.

³⁹ K'oaá s'ín tsajmeè Jesús kóhokji ì'nde Galilea nga kiichjaya 'én-la Nainá ya ni'ya ingo sinagoga nga xki xi ján naxandá. Tikoáá tsachrjekàjiìn-ne inima cho-la neíí xi tíjiìn inima-la xita.

Kii komà nga kjòndaà jngoò-ne xita xi tìbindojno chrjoa yijo-la

(Mateo 8:1-4; Lucas 5:12-16)

⁴⁰ J'iikon jngoò xita xi tìbindojno chrjoa yijo-la. Tsasèn-xkò'nchit'aà-la Jesús, tsibít'si'ba-la, kitsò-la:

—Tsà mejèn-lè, tìtsjeè-ná ch'in xi tíjn-na.

⁴¹ Jesús kjòhimakeè-né, tsijmeé tsja nga tsohót'aà-la yijo-la xita jè, kitsò-la:

—Mejèn-na, kàtandaà-ne.

⁴² Tik'eé-ne nga tíchja Jesús, nitoón kjòndaà-ne; kitjaàxin-la ch'in; kjòtsjeè-ne yijo-la.

⁴³ Jesús kisihixat'aà xita jè nga kii-ne. Tanga ítjòn 'ño tsibít'in-la, kitsò-la:

⁴⁴ —Tiná'yi, kì yá xita bènojmí-la. T'in ñánda tíjna no'miì, takó-la yijo-lè nga jye kjòndaà-ne; jch'ii kjotjò-lè, tsojmì xi síjé kjotíxoma-la Nainá xi kiskii Moisés, mé-ne nga tsjeè kijna-ne nguixkon Nainá tikoá skoe jñà xita nga jye kjòndaà-ne ch'in-lè.

⁴⁵ Tanga xita jè, k'e nga kii-ne, tsibít'sia nga tsibénojmí yije kós'ín komát'in. K'oaá komà-ne nga jè Jesús, mì tí kii ma taxki jahas'en-jiìn-ne jñà naxandá; yaá tsibijna ñánda tsjin xita. Tanga jñà xita xi xki xi ján ì'nde inchrobà-ne, yaá ijchòkon ñánda tíjna Jesús.

2

K'e nga jè Jesús kisindaà jngoò-ne xita xi mikii ma osijna kixi

(Mateo 9:1-8; Lucas 5:17-26)

¹ Xi komà jò ján naxchrjein, ijchò ìjngoò k'a Jesús ján naxandá Capernaum. Kii'nchré xita nga ya tíjna Jesús ya ni'ya jè.

² Tik'e-ne kjìn jchán xita ijchò maxkót'aà-la skanda mì ti kii tsì'ndè-ne xotjoa ni'ya. Jesús kiichjayajiìn-la 'én ndaà-la Nainá.

³ Jngoò xita j'iiko xi mikii ma síhiníyá yijo-la. Ñijòn xita yangui.

⁴ Nga mikii komà kitjò'nde-la nga jahas'en ya xotjoa ni'ya, nga 'ño kjìn xita títsajna, yaá kiskix'a ítsjá ni'ya ya kixi-la ñánda tíjna Jesús. Yaá kiskinjen-ne jè xita xi xk'én xi kjiya-la yá.

⁵ Jesús, k'e nga kijtseè nga jñà xita koi mokjeiín-la it'aà tse, kitsò-la jè xita xi xk'én:

—Ji ndí na'èn, jé-lè jye kichàat'aà-lè.

⁶ Ya títsajna i'nga xita xi okóya kjotíxoma-la Nainá xi kiskii Moisés nga nchisíkítsjeèn jjiìn inima-la. Kitsò:

⁷ “¿Mé-ne kos'ín chja-ne jè xita jè nga Nainá chjajno-la? Nga tajngoò Nainá síjchàat'aà-ná jé-ná.”

⁸ Tik'e kijtseèya-la Jesús koni s'ín nchisíkítsjeèn jjiìn inima-la. Kitsò-la:

—¿Mé-ne kotsò-ne kjohítsjeèn-la inima-nó?

⁹ ¿Mé xi ìsa chiba 'in tíjn? Tsà xan-la jè xita xi xk'én: “Jé-lè jye kàchàat'aà-lè”, o tsà xán-la: “Chjoí naxchan-lè, tìsítjiìn, tìtjeí.”

¹⁰ Kokoò-nò nga 'an xi Ki'ndí-la Xita xan-la yijo-na, tíj'ndeé-na nga síjchàat'aà-la jé-la xita ì isò'nde.

K'eé kitsò-la jè xità xi xk'én:

11 —Jì, k'oaá xan-lè: Tísítjìn, chjoí nàchan-yá-lè, t'in-ne ni'ya-lè.

12 K'eé tsasítjen jè xità xk'én. Kiskoé nàchan-la. Itjojìn-la ngats'ii xità xi títsajna. K'e nga kijtseè kjoa koi, tà kjòxkón-la ngats'ii xità. K'eé jeya kisikíjna Nainá. Kitsò:

—Nì saá jngoò k'a 'yaá jngoò kjoa xi kos'ín ma.

K'e nga jè Jesús kùichja-la Leví

(Mateo 9:9-13; Lucas 5:27-32)

13 Jesús, ijngoò k'a itjo. Kii ján indii ndáchikon. Ngats'ii xità yaá ijchòkon, ikjoàn tsakóya-la 'én ndaà-la Nainá.

14 K'e nga nchifi, Jesús kijtseè jè Leví, ki'ndí-la Alfeo. Tíjnat'aà ímìxa ya ñánda síkíchítjì tsojmì ts'e Roma. Kitsò-la:

—Nchrohótjìngui-ná.

K'eé tsasítjen Leví, kiìtjìngui-la Jesús.

15 K'e nga tíjnat'aà ímìxa Jesús nga tíkjèn ya ni'ya-la Leví, kjìn ma xità xi síkíchítjì tsojmì kò xità xi jé tjín-la títsat'aàkò ímìxa Jesús kò xità xi kota'yàt'aà-la. Kjìn jchán ma xità xi tjìngui-la.

16 Jñà xità xi okóya kjotíxoma-la Nainá xi kiskii Moisés kò xità fariseo k'e nga kijtseè Jesús nga tíkjèn-kò xità xi tse jé tjín-la kò xità xi síkíchítjì tsojmì, kitsò-la jñà xità xi kota'yàt'aà-la Jesús:

—¿Mé-ne k'oa's'ín-ne Maestro-nò nga xità xi síkíchítjì tsojmì kò xità jé kjèn-kò-ne?

17 K'e nga kiì'nchré Jesús; kitsò-la:

—Jñà xità xi mì ch'in tjín-la, mì chjìnexkiì mochjeén-la; jñà-né xità xi xk'én xi mochjeén-la chjìnexkiì. 'An, mìtsà koi xá j'i-na nga jñà kichjà-la jñà xità xi tsò-la yijo-la nga xità kixi, koií xá j'i-na nga jñà kichjà-la xità xi beè-la ikon nga jé tjín-la.

Xità xi bìtsajnachjan

(Mateo 9:14-17; Lucas 5:33-39)

18 Jngoò k'a, k'e nga jñà xità xi kota'yàt'aà-la Juan kò jñà xi kota'yàt'aà-la xità Fariseo nchibìtsajnachjan, kiì i'nga xità koi nga kiskònangui-la Jesús. Kitsò-la:

—Jñà xità xi kota'yàt'aà-la Juan kò xi kota'yàt'aà-la xità Fariseo bìtsajnachjan-né. ¿Mé-ne jñà xità tsiji xi kota'yàt'aà-lè mì bìtsajnachjan-né?

19 Kitsò Jesús:

—¿A bìtsajnachjaán xità k'e nga xità kòbixan k'e nga ya tíjnakò-ìsa jè xità x'in xi kòbixan? Majìn, mìkiì bìtsajnachjan xità.

20 Tanga kijchò nàchrjein k'e nga tjáxìn-la x'in xi kòbixan; k'e-né nga kítsajnachjan xità.

21 'Jngoò nikje ìbaà mìkiì ma sijto-ne kò nikje xitse; nga jè nikje xitse, kjeèn-yó-né koa kotejnda-né jè nikje ìbaà. Ìsaá tse koma ñánda kixajndà kji.

22 Tìkooá mìtsà yá xi koma binchá xán ixii kò chrjoa jchínga; tsà kos'ín s'een, k'e nga jye kojchá xán, sìxajndà chrjoa jchínga, ikjoàn chija xán kò chrjoa. Jè xán ixii, chrjoa xitsee sinchá.

Kiis'ín tjín it'aà ts'e nàchrjein nìkjáya

(Mateo 12:1-8; Lucas 6:1-5)

23 Jngoò nàchrjein nìkjáya ja Jesús ya ñánda títje trigo. Jñà xità xi kota'yàt'aà-la tsate chiba natín-la trigo.

24 Jñà xità Fariseo kitsò-la:

—¿Mé-ne kos'ín-ne xità-lè jè nàchrjein nìkjáya? Mikiì tjí'nde nga kos'ín koma.

25-26 Kùichja Jesús kitsò-la:

—¿Jñò, a mìtsà jye tíjìn-nò koni s'ín tíchja Xojon-la Nainá koni kis'iìn xitàxá ítjòn xi ki'mì David kò jñà xità-la xi kjihijtako k'e nga no'miì ítjòn tsibìjna jè Abiatar? K'e nga kjòhòjò-la

nga nì mé tǵín xi kine, jahas'en ni'ya-la Nainá. Tsakjèn inchrájin tsjeè-la Nainá. Tikoá kitsjaà-la xǵta-la xi tǵiko. Mìkì tǵí'nde nga jǵnà kòkjen. Tà jǵnà nò'miù tǵí'nde-la nga kòkjen.

²⁷ Ìjngò k'a kitsò Jesús:

—Jè nàchrjein nìkjáya, koií xá kisindaà-ne nga kjòndaà ts'e xǵta. Mitsà koi xá kisindaà-ne xǵta nga kjòndaà ts'e nàchrjein.

²⁸ K'oaá s'ín tǵín, 'an xi Kì'ndí-la Xǵta xan-la yijo-na, skanda jè nàchrjein nìkjáya, 'aán otìxoma-la.

3

Xǵta xi kixit'aà jngò tsja

(Mateo 12:9-14; Lucas 6:6-11)

¹ Ìjngò k'a jahas'en Jesús ñánda tǵjna jngò ni'ya ingò sinagoga. Kò ya tǵjna jngò xǵta xi kixit'aà jngò tsja.

² Jǵnà kondra-la Jesús nchisíkínda nga mejèn-la nga skoe a sǵindaá-ne jè xǵta xi kixit'aà tsja jè nàchrjein nìkjáya, mé-ne nga koma kòhòngui-ne.

³ Jesús kitsò-la jè xǵta xi kixit'aà jngò tsja:

—Tísǵtǵjìn, tísǵjǵni ì jngò osen-la xǵta.

⁴ Jesús k'eé kitsò-la jǵnà xǵta xi i'nga:

—¿A tsǵá'nde kjotìxoma nga ndaà s'eén, o xi ch'o s'eén, jè nàchrjein nìkjáya? ¿A sǵindaá-ná xǵta, o xi sǵik'en-ná?

Jǵnà xǵta xi otì'mì-la ta jyò tsibìtsajna.

⁵ Jesús kiskoòtsejèn-jìin-la xǵta nga jti komà-la. Tikoá ba kis'e-la nga tájaàjìn tǵín inìma-la jǵnà xǵta. K'eé kitsò-la jè xǵta xi kixit'aà tsja:

—Tjeèndojoì ndsejì.

Tsijmeé tsja, nǵtoón kjòndaà-ne.

⁶ Jǵnà xǵta fariseo, k'e nga itjo-ne, tsajoóya-ne kò xǵta Herodes nga mejèn-la sǵik'en Jesús.

K'e nga kjìn xǵta kùtǵjngui-la Jesús ya indì ndáchikon Galilea

⁷ Jesús kò xǵta xi kota'yàt'aà-la chinchat'aà xìn. Ján kù indì ndáchikon. Kjìn xǵta kùtǵjngui-la xi nangui Galilea ts'e kò xǵta nangui Judea,

⁸ kò xǵta naxandá Jerusalén, kò xǵta nangui Idumea, kò xǵta xijngoaà xajngá nandá Jordán kòhòkji jngò itjandì-la naxandá Tiro kò Sidón nga kù'nchré-la kjòxkón xi kis'iin Jesús. K'oaá komà-ne kjìn jchán xǵta ijchò tǵjngui-la.

⁹ Jesús kitsò-la xǵta xi kota'yàt'aà-la:

—Kjít'aà nàchrjein tǵajnandaà jngò chitso mé-ne nga mì xǵta kojǵtínè-ná.

¹⁰ Koií kjoa-la nga jyeé kjìn jchán xǵta xk'én kjòndaà-ne. Jǵnà xǵta xk'én xi i'nga, yaá fikjanè'ño ñánda tǵjna Jesús nga mejèn-la kòt'aà-la tsja.

¹¹ Jǵnà xǵta xi inìma ch'o-la neí tǵjìn inìma-la, k'e nga beè Jesús bincha-xkó'nchit'aà-la, ìkjoàn 'ño chja, tsò:

—Jì-né xi Kì'ndí-la Nainá.

¹² Tanga jè Jesús 'ño tsohótiko nga mì jǵnà keènojmi yá-né jè.

Kó 'mì 'ín-la xǵta-la Jesús xi tejò ma-ne

(Mateo 10:1-4; Lucas 6:12-16)

¹³ Xi jye komà iskan, Jesús kùmjìn-jno jngò nindoò. Kùichja-la xǵta xi jè ndaà kisaseèn takòn. Xǵta koi, ijchò kinchat'aà-la.

¹⁴ Ìkjoàn jaàjìn tejò xǵta xi koahijtako, tǵjǵnà-ne xi sǵikasén nga kǵichjaya 'én ndaà-la Nainá

¹⁵ xi tikoá kitjoé-la okixi nga sǵindaà-ne xǵta xi ch'in tǵjn-la tikoá kòchrjekàjìn inìma ch'o-la neí xi tǵjìn inìma-la xǵta.

¹⁶ Jǵnà xǵta xi kitjaàjìn: jè Simón. Ìkjoàn tsibít'aàsòn 'ín-la; Pedro kitsò-la.

¹⁷ Kò jñà ixti-la Zebedeo xi 'mì Jacobo kò jè 'ndse xi 'mì Juan, xi tikoà tsibít'aàsòn 'ín-la; Boanerges kitsò-la. (Jè 'én jè tsò-ne: Ixti-la ch'on.)

¹⁸ Kò Andrés; Felipe; Bartolomé; Mateo; Tomás; Jacobo xi ti-la ma Alfeo; Tadeo; Simón, xita xi ya fit'aà-la xita cananista;

¹⁹ Judas Iscariote, jè xita xi kisìngatsja kondra-la Jesús.

Xita xi chjajno-la Inima Tsjeè-la Nainá

(Mateo 12:22-32; Lucas 11:14-23; 12:10)

K'e nga j'ì-ne Jesús ni'ya ñánda síkjáya,

²⁰ ìjngoò k'a kòkjìn xita skanda mì ti kii kitjò'nde-la nga tsakjèn.

²¹ K'e nga kii'nchré xita xíkjín Jesús, kjoa xi tís'ín, kii kátsji nga tsoba'ño; kitsò: Skáyaá-la.

²² Jñà xita xi okóya kjotíxoma-la Nainá xi kiskii Moisés xi j'ì-ne Jerusalén k'oáá kitsò nga jè xita neí xi 'mì Beelzebú tíjìn inima-la Jesús, nga jè xita sko-la xita neí tsjá-la nga'ño nga ochrjekàjìn inima ch'o-la neí xi tíjìn inima-la xita.

²³ Jesús kiihja-la xita koi. Tsibénojmi jngoò-la kjoa xi mangásòn. Kitsò-la:

—¿A komaá jè xita neí kochrjekàjìn-ne xi tíjè-ne yijo-la ya inima-la xita? Majìn.

²⁴ Tsà jngoò naxandá je, tsà jòya tjín nga kondra títsajna-la xíkjín, mìkii koma 'ño kítsajna;

²⁵ kò tsà jngoò ni'ya, tsà jòya tjín nga kondra títsajna-la xíkjín, tikoáá mìkii koma 'ño kítsajna.

²⁶ Tsà jè xita neí, tsà jòya tís'ín xi tíjè-ne yijo-la, mìkii koma 'ño kíjna. Jye tífehèt'aà nachrjein-la.

²⁷ Jngoò xita xi tjín-la nga'ño, mì yá xi koma kjoahas'en ni'ya-la nga sìichijé-la tsà mì ítjòn koiit'aà'ño. K'ée koma sìichijé-la k'e nga jye kàsít'aà'ño.

²⁸ 'Okixii xi xan-nó, xita xi tjín-la jé kò xi chjajno-la Nainá, jchat'aà-la jé-la.

²⁹ Tanga jñà xita xi chjajno-la Inima Tsjeè-la Nainá, mìkii jchat'aà-la nita mé nó-ne, nita mé nachrjein-ne. Kjo'in s'e-la nita kjé-ne.

³⁰ Koií k'oas'ín kitsò-ne Jesús nga jñà xita xi okóya kjotíxoma-la Nainá xi kiskii Moisés kitsò-né: “Xita jè, inima ch'o-la neí tíjìn inima-la.”

Nea-la Jesús kò 'ndse

(Mateo 12:46-50; Lucas 8:19-21)

³¹ Xi komà iskan, ijchò 'ndse kò nea-la Jesús. Ján ndítsiaán tsibítsajna. K'ée kinokjoà-la Jesús.

³² Jñà xita xi títsajnandii-la, kitsò-la:

—Nea-lè kò jñà 'ndsì, ján ndítsiaán títsajna. Ji xó ótsji-lè.

³³ K'ée kiihja Jesús, kitsò:

—¿Yá-né xi nea-na kò xi 'ndsè?

³⁴ Ikjoàn kiskoótsejèn-jìin-la jñà xita xi títsajnandii-la. Kitsò:

—Jñà xita koi xi nea-na, kò xi 'ndsè.

³⁵ Nga nita yá xita-ne xi síkitasòn koni s'ín mejèn-la Nainá, jñà-né xi 'ndsè, xi tichja, kò xi nea-na.

4

Kjoa xi mangásòn ts'e xita xi bíte xojmá

(Mateo 13:1-9; Lucas 8:4-8)

¹ Jesús ìjngoò k'a tsibíts'ia nga tsakóya ya ìndii ndáchikon. Kjìn jchán ma xita xi chixoñat'aà-la. Jesús jahas'en jngoò chitso xi kjijnajìn ndáchikon; ikjoàn tsibijnaya. Ngats'ii xita, yaá títsajnat'aà nanguií ya ìndii ndáchikon.

² Kjìn skaya kjoa xi mangásòn tsakóya-la xita. K'e nga tsibénojmi-la kitsò-la:

³ —Ndaà tìná'yaà. Jngoò xita kii kíjndi xojmá.

⁴ K'e nga tsibíts'ia nga kiskíjndi xojmá, chixò chiba ya iya ndiyá. Ikjoàn j'ìi nise; tsakjèn.

⁵ Nguì k'oa tjin chixò ñánda naxi choòn nga chiba ni'nde tjin-la. Jña xojmá koi, nitoón isò koi-né nga mì nanga tjin nanguì.

⁶ Tanga k'e nga itjokàtji ts'oi nga kjòtsjè ndobá, kixiñó, ikjoàn jngoò k'aá kixi, koi-né nga tsjin-la ima.

⁷ Nguì k'oa tjin chixò ya jjiin na'yá. K'e nga kjò'nga na'yá, kisik'en-ngui xka-la xojmá; k'oa ma-ne nga mìkiì tsajà-la toò.

⁸ Tanga jña xojmá xi chixò ñánda nanguì ndaà, tsijin, kjò'nga, tsajà-la toò, ndaà itjo. Kitsjaà katé, jàn-kaàn skanda jngoò sìndo toò nga jngoò ijngoò.

⁹ Ikjoàn kitsò Jesús:

—Ndaà tjiná'yaà koni xan-nò.

Mé-ne kjoa xi mangásòn kisikjeén-ne Jesús

(Mateo 13:10-17; Lucas 8:9-10)

¹⁰ K'e nga jye tsibìjna tajngoò Jesús, jña xita xi chraña títsajnat'aà-la ko xita-la xi tejò ma-ne, kiskònanguì-la kó tsòya-ne 'én xi tsibénojmi.

¹¹ Kitsò Jesús:

—Jño, Nainá jye kitsjaà-nò nga jchaa kjoa'ma-la kó s'ín otíxoma Nainá. Tanga jña xita xi kj'eíi, tà 'én ts'e kjoa mangásòn s'enojmi yije-la,

¹² mé-ne nga mìkiì skoe-ne nas'ín skótsejèn, tikoáà mìkiì kochiya-la nas'ín kji'nchré. Nga jña xita, majin-la síkijatjya kjohítsjeèn-la koa mìkiì jchat'aà-la jé-la.

Jesús tsibénojmi kó tsòya-ne kjoa xi mangásòn ts'e xita xi bitje xojmá

(Mateo 13:18-23; Lucas 8:11-15)

¹³ Kitsò Jesús:

—¿A mì fiya-nò jè 'én ts'e kjoa xi mangásòn? ¿Kós'ín skaya-nò ngats'ii kjoa xi i'nga?

¹⁴ Jè xi bitje xojmá, jè ngaya-la xita xi síka'bí 'én-la Nainá.

¹⁵ Jña xojmá xi chixò ya iya ndiyá, jña ngaya-la xita xi 'nchré 'én-la Nainá. K'e nga ma iskan nga jyeé 'nchré, f'ii xita neíi faáxìn jè 'én ya jjiin inima-la xita.

¹⁶ Jña xojmá xi chixò ya ñánda naxi choòn, jña ngaya-la xita xi 'nchré 'én-la Nainá. Tsjaá s'e-la k'e nga sa 'nchré.

¹⁷ Tanga jè 'én mìkiì ndaà kisijiin inima-la koni xka xi tsjin-la ima, mì 'ñó binchako 'én, ta chiba nachrjein chíkjoa-la. K'e nga mé kjoa xi sakó-la ko tsà xita fitjingui kondra-la nga jè ngatji-la 'én-la Nainá, nitoón síkijna ndiyá-la Nainá.

¹⁸ Jè xojmá xi chixò ya ñánda tjin na'yá, jña ngaya-la xita xi 'nchré 'én-la Nainá,

¹⁹ tanga 'ñó síkájno kjoa ts'e tsojmi xi tjin isò'nde; ko jè kjoa nchiná konachan-la; ko mejèn yije-la tsojmi xi tjin isò'nde. Jña kjoa koi síkits'ón-jiin 'én-la Nainá, k'oa ma-ne nga mìkiì makjin-ya.

²⁰ Tanga jña xojmá xi chixò ñánda nga nanguì ndaà, jña ngaya-la xita xi 'nchré 'én-la Nainá koa mokjeiin-la; ikjoàn makjin-ya 'én, k'oa ngaya-la koni yá xi ojà-la toò. Tsja katé, jàn-kaàn skanda jngoò sìndo nga jngoò ijngoò yá.

Kjoa xi mangásòn ts'e ni'ín xi síhiseèn

(Lucas 8:16-18)

²¹ Jesús kitsò-isa:

—¿A k'oa s'ín mochjeén ni'ín xi síhiseèn nga ya sijnanguì kaxa, o ya sijnanguì nachan? Majin, jngoò ni'ín xi síhiseèn, 'ngaá sijn mé-ne nga síhiseèn-la xita.

²² Nìme kjoa tjin xi tji'ma i'nde xi mìkiì jcha-la; tikoáà tsjin kjoa xi tji'ma i'nde xi mìkiì kotsejèn.

²³ Ndaà tjiná'yaà koni xan-nò!

²⁴ Jesús kitsò-isa-la:

—Jñò xi na'yà, ndaà tìná'yaà. Koni kji machiya-nò, k'oaá tì kji sikkíchiya-nò Nainá, skanda tsjásòn-isa-nò.

²⁵ Jè xi tjin-la [kjohítsjeèn], tjoé-isa-la; tanga jè xi tsjin-la, skanda tjá'aán-la [kjohítsjeèn] xi chiba tjin-la.

Kjoa xi mangásòn ts'e nga majchá nijin

²⁶ Kitsò Jesús:

—Koni s'ín otíxoma Nainá k'oaá tís'ín tjin koni k'e tsà jngoò xita bitje nojmé.

²⁷ Jè nojmé, síxá nga bisò, ma'nga, nas'ín jè xita xi bitje mikì tibeè kós'ín tísíxá nga jè xita ojnafè-né k'e nga nitjen; nga s'e isén osítjen;

²⁸ nga jè nangui tísíjchá; ítjòn bitjo xka-la, iskan ma'nga, ikjoàn tjo-la natín koa ikjoàn majchá nijin.

²⁹ K'e jye majchá nijin, jye ma maxkó nga jye ijchò chiba-la nga sincháxkó nijin.

*Kjoa xi mangásòn ts'e xojmá mostaza
(Mateo 13:31-32; Lucas 13:18-19)*

³⁰ Jesús ijngoò k'a kitsò:

—¿Mé xi kongásòn-ko koni s'ín otíxoma Nainá?, o ¿mé 'én xi s'ingásòn-kjoaá?

³¹ Jè mangásòn-ko koni kji xojmá mostaza; k'e nga sitje ijìn nangui, jè xi isa itsé kji i it'aà nangui.

³² K'e nga jye sitje, bisò, ma'nga skanda isaá 'nga ma koni ngats'ìi xka xi ma chine xi sitje indii ni'ya. 'Nó 'nga ma chrja-la skanda ma bíndaà'a tjé-la nise ya ngui 'nguién-la.

*Jesús, kós'ín kisikjeén kjoa xi mangásòn
(Mateo 13:34-35)*

³³ Jesús kjìn skaya kjoa xi mangásòn kisikjeén nga tsakóya 'én ndaà-la Nainá, koni kji nga ndaà fiya-la xita.

³⁴ Ngui koó kjoa xi mangásòn tsakóya-la xita; nimé 'én kiichja xi mìtsà kjoa xi mangásòn tsibénojmí; tanga k'e nga jye tijnat'aàxìn-ko xita-la xi kota'yàt'aà-la, k'eé ijngoò k'a tsakóya ndaà yije-la.

*K'e nga jè Jesús kisikijnajyò tjoxkón
(Mateo 8:23-27; Lucas 8:22-25)*

³⁵ K'e nga jye kòjñò nga tije-ne nachrjein, Jesús kitsò-la xita-la xi kota'yàt'aà-la:

—Tíkjaán, ján xijngoaà ndáchikon.

³⁶ Jñà xita xi kjìn ma-ne ta yaá kisikítsajna; kiì Jesús ko xita xi kota'yàt'aà-la nga títsajnaya chitso. Tíkoáá tsafáhjtako chitso xi i'nga.

³⁷ K'e nga jye tijnajin nandá, j'ì jngoò tjoxkón xi taxki komà-né; kiskimi'nga nandá koa jè chitso jye kitseè nandá.

³⁸ Jesús yaá kjinafè tàts'en chitso. Kijnanguisko jngoò nikje nguisko. K'eé kisikjaá-la, kitsò-la:

—Maestro, ¿a mìtsà tì'yi nga titsabixònguindá-ná.

³⁹ Jesús k'eé tsasítjen, tsohótiko jè tjo; kitsò-la ndáchikon:

—Jyò tijnì.

Nitòón kisijyò-ne tjo; kjòndaàya-ne.

⁴⁰ Jesús kitsò-la xita xi kota'yàt'aà-la:

—¿Mé-ne tsakjoòn-nò? ¿A mìtsà mokjeiín-nò it'aà ts'an?

⁴¹ Jñà xita xi kota'yàt'aà-la ndaà jchán kitsakjòn. Xki xi ján kjònangui-la xíkjin, tsò-la:

—¿Yá xita-ne jè skanda jè tjo ko ndáchikon síkitasòn-la?

5

*Xita Gerasa xi kjin inima ch'o-la neí tjiin inima-la**(Mateo 8:28-34; Lucas 8:26-39)*

¹ Jesús kò xita xi kota'yàt'aà-la ijchò ján xijngoaà ndáchikon ya nangui-la xita Gadareno.

² K'e nga itjojen chitso Jesús ijchò kasit'aà jngoò-la xita xi inima ch'o-la neí tjiin inima-la. Jè xita jè yaá itjo-ne itsjó ngajo mik'en.

³ Xita jè yaá bijnaya ya itsjó ngajo mik'en. Mi yá xi ma bit'aà'ño nas'in na'ño kicha cadena.

⁴ Kjin k'a okis'iin-kò nga tsibít'aà'ño ndsokò kò tsja na'ño kicha cadena. Niyá xi chikjoa-la nga kisi'nchré; otejtso xó cadena.

⁵ Kò nachrjein kò nitjen yaá ojmeèsòn nindoò ñánda tjin itsjó ngajo-la mik'en. Kjindáya tsò kjindáya ská nga kjaán kò yijo-la; 'beé-la ndajo yijo-la.

⁶ K'e nga kijtseè nga kjin tinchrobá Jesús, tsangachikon. Kii kasit'aà chraña-la, tsasèn-xkó'nchit'aà-la.

⁷ 'Ñó kiichja, kitsò:

—¿Mé xi tjin-lè kò 'an, Jesús, Ki'ndí-la Nainá xi 'ño 'nga tjna? Bitsi'bà-lè nga nguixkon Nainá, kì yatoòn-ná.

⁸ Koií k'oas'in kiichja-ne nga jè Jesús kitsò-la:

—Ngaji inima ch'o-la neí, titjoiin inima-la xita jè.

⁹ Jesús kiskònangui-la. Kitsò-la:

—¿Kó 'mì-lè?

Jè kitsò:

—Legión 'mì-na, koií-né nga kjin jchán ma-najen.

¹⁰ Jña inima ch'o-la neí, 'ño tsibít'si'ba-la Jesús nga mì it'aà xìn skini ya i'nde jè.

¹¹ Kò ya chraña it'aà nindoò, kjin chinga nchikjèn-jno.

¹² Jña inima ch'o-la neí tsibít'si'ba-la Jesús. Kitsò-la:

—Yaá tikasén-nájen ñánda tjin chinga; yaá kitjás'en-jin-jen yijo-la.

¹³ Jesús kitsjaà'nde-la; jña inima ch'o-la neí itjoiin inima-la xita jè; ikjoàn jahas'en-jin yijo-la chinga. Ma-la tsà jò jmi jña chinga xi tsanga; tsatikjájèn-jno ya naxi skanda jin ndáchikon, yaá k'en yije jin ndáchikon.

¹⁴ Jña xita xi ko'ndà chinga, tsanga. Kii kénajmí-la xita naxandá kò xita rancho jè kjoa xi komà. Jña xita naxandá ijchò katsejèn-la kjoa xi komà.

¹⁵ Kjin xita ijchò ñánda tjna Jesús, kijtseè jè xita xi inima ch'o-la neí tjiin inima-la nga sa itjòn. Jyò tjna. Íkjá-ne nikje-la. Ndaà tjin-ne kjohítsjeèn-la. Xita xi ijchò, ta kitsakjòn-la.

¹⁶ Jña xita xi kijtseè koni s'in komàt'in jè xita xi inima ch'o-la neí tjiin inima-la nga kjòndaà-ne kò chinga xi tsatikjá, tsibénajmí-la jña xita xi ijchò xi mìkiì kijtseè.

¹⁷ Jña xita xi ijchò tsibít'si'ba-la Jesús nga xìn i'nde kàtjì.

¹⁸ K'e nga jahas'en chitso Jesús, jè xita xi inima ch'o-la neí kisijin inima-la, tsibít'si'ba-la Jesús nga mejèn-la kjiikò.

¹⁹ Tanga jè Jesús mìkiì kitsjaà'nde-la. Kitsò-la:

—T'in-ne ni'ya-lè, ténajmí yije-la xita xingui jè kjòndaà xi kisikò-lè Nainá; kós'in kijtseè ima-lè.

²⁰ Xita jè, kii; ikjoàn tsibít'si'ia nga tsibénajmí-la jña xita naxandá Decápolis jè kjòndaà xi kisikò Jesús. Ngats'iì xita xi kis'enojmí-la tà k'oáá komà-la.

*Tsòti-la Jairo kò chjoón xi kitsobà'ño itjòn nikje-la Jesús**(Mateo 9:18-26; Lucas 8:40-56)*

²¹ Jesús tsibijna'ya chitso, inchrobà ijngoò k'a-ne ján xijngoaà ndáchikon, kjin jchán xita chixoñat'aà ijngoò k'a-la, koa yaá tsibijnandi ndáchikon.

²² Ijchòkon jngoò x̄it̄a xi 'mì Jairo xi x̄it̄a ítjòn ts'e ni'ya ingo sinagoga. K'e nga kijtsee Jesús tsasèn-xkó'nchit'aà-la.

²³ 'Ñó tsibítsi'ba-la, kitsò-la:

—Ndí tsòti-na jye kjomeè biyaà; nchroboí, tíkjaán, tjat'aà-la ndsei nga kàtandaà-ne, mé-ne nga kíjnakon-ne.

²⁴ Jesús kiiko, kjìn jchán x̄it̄a kiitj̄ingui-la; chiba-la ó'nchò'ño-né.

²⁵ Yaá tsóhojìn jngoò chjoón xi kjò tejò nó xk'én, ch'in jní tjín-la.

²⁶ Kjòtsee tísíkjeiín kjo'in ít'aà ts'e chj̄inexki; jye xó kisikje yije ton-la; mìki mandaà-ne, ta saà tíma'ño ch'in-la.

²⁷ Chjoón jè, k'e nga kiì'nchré ít'aà ts'e Jesús, kiijìn-la ngats'iì x̄it̄a kjìn; ijton ít's'in kitsobà-ne nikje-la Jesús.

²⁸ K'oas'ín tísíkijsjeèn, kitsò: “Tsà tà jè nikje-la sìkoaa, kondaá-na.”

²⁹ K'e nga kitsobà'ño nikje-la, nitoón kisijyò-la jní, koa kijtseeyaá-la yijo-la nga jye kjòndaà-ne ch'in-la.

³⁰ Jesús nitoón kijtseeya-la nga nga'ño-la itjoiìn; kisikátji, kiskoòtsejèn-jìin-la x̄it̄a kjìn, kitsò:

—¿Yá xi kàtsobà'ño nikje-na?

³¹ Jñà x̄it̄a xi kota'yàt'aà-la Jesús kitsò-la:

—¿A mìtsà 'yi nga jñà x̄it̄a ó'nchò'ño-lè? Ngaji si-né: “¿Yá xi kàtsobà'ño nikje-na?”

³² Tanga jè Jesús kotsejèn-jìin-la jñà x̄it̄a nga mejèn-la skoe yá xi kitsobà'ño nikje-la.

³³ Chjoón jè, tsí tíhotsé-né nga kitsakjòn, nga jyeé tíjìn-la kós'ín komà ch'in-la; kiì, tsasèn-xkó'nchit'aà-la Jesús; tsibénojmí kixi yije-la kós'ín komàt'in.

³⁴ Jesús kitsò-la:

—Ndí neaa, koi-né nga mokjeiín-lè ít'aà ts'an nga kòmandaà-ne. T'in-là ndaà-ne. Jyeé kòmakiì-la ch'in-lè.

³⁵ Táko t̄ik'eé tíchja-isa Jesús nga j'ìi i'nga x̄it̄a xi inchrobà-ne ni'ya-la x̄it̄a ítjòn ts'e ni'ya ingo sinagoga, kitsò-la:

—Kì t̄i kiì nìsì-la Maestro, ndí tsòti-lè jyeé k'en.

³⁶ Tanga jè Jesús, nga kiì'nchré koni kitsò okixi xi j'ìiko, kitsò-la jè na'èn-la ndí tsòti:

—Kì tsakjoòn-jèn; tà jè-né nga kàtakjeiín-lè.

³⁷ Jesús mìkiì kitsjaà'nde nga kjìn x̄it̄a kiiko. Tà jè Pedro, Jacobo ko Juan 'ndse Jacobo.

³⁸ K'e nga ijchò ni'ya-la jè x̄it̄a ítjòn ts'e ni'ya ingo sinagoga, Jesús kijtsee nga fijen fikjá x̄it̄a, 'ño nchikjindáya ko 'ño nchisikájno.

³⁹ Jahas'en ni'ya Jesús, kitsò-la:

—¿Mé-ne ko'nè-nò nga ko tà ndaà chihindáya-nò? Jè ndí tsòti mìtsà kòbiyaà; ta kjinafé-né.

⁴⁰ Jñà x̄it̄a xi títsajna tà tsijnòkè Jesús. K'eé tsachrje yije ni'ya kóhotjín x̄it̄a; tà jñà tsibìtsajna na'èn-la, nea-la, ko x̄it̄a ts'e xi tjiko. Ikjoàn jahas'en ñánda kijna ndí tsòti.

⁴¹ Kiskoé tsja, kitsò-la:

—Talita cumi —'én xi tsòya-ne: Jì tsòti, k'oaa xan-lè, tisítjìn.

⁴² Jè ndí tsòti n̄iton tsasítjen, tsajmeè-ne. Jye kjò tejò nó tjín-la. Jñà x̄it̄a xi títsajna, 'ño jchán kitsakjòn.

⁴³ Tanga Jesús 'ño kitsjaà okixi nga mì yá x̄it̄a xi keènojmí-la. Ikjoàn kitsò-la:

—Tjìi-la nga kàtakjèn ndí tsòti.

6

*Kó kitsò x̄it̄a k'e nga kiì Jesús ján Nazaret
(Mateo 13:53-58; Lucas 4:16-30)*

¹ Jesús itjoiìn-ne ya i'nde jè, kiì-ne nangui-la Nazaret, tjiko x̄it̄a xi kota'yàt'aà-la.

² K'e nga jye ijchò nachrjein nìkjáya, tsibíts'ia nga tsakóya 'én ndaà-là Nainá ya ni'ya ingo sinagoga. Kjin jchán ma xita xi kù'nchré-là koni s'in tsakóya. Jña xita, tà k'oaá komà-là, kjònangui-là xíkjin, kitsò:

—Xita jè, ¿ñánda komà-là ngats'ì 'én xi okóya? ¿Ñánda ochrje kjoachjine koi kò kjòxkón xi s'in?

³ ¿A mìtsà jè xi chjineyá xi ti-là María, xi 'ndse ma Jacobo, José, Judas kò Simón? ¿A mìtsà tikoá i títajnajjìn-ná íchjín ndichja?

Xita koi mìkì kòkjeiín-là it'aà ts'e Jesús.

⁴ Tanga jè Jesús kitsò-là:

—Jngò xita xi chja ngajo-là Nainá, nita ñá naxandá-ne yaxkón-né, tanga ya naxandá-là kò ni'ya-là kò it'aà ts'e xita xíkjin mìkì yaxkón.

⁵ Jesús nímé kjòxkón xi ndaà tjín kis'ìn nangui-là, tà chiba xita xk'én xi tsohót'aà-là tsja nga kisindaà-ne.

⁶ Tà kjòxkón-là Jesús, nga jña xita koi, mìkì mokjeiín-là it'aà ts'e.

Kós'ín tsatíxoma-là Jesús xita-là xi tejò ma-ne xi kisikasén nga kiska'bí 'én-là Nainá (Mateo 10:5-15; Lucas 9:1-6)

Jesús yaá tsajmeè naxandá jtobá xi chrañat'aà kjiyijò nga tsakóya.

⁷ Nga komà iskan, Jesús kùichja-là xita-là xi tejò ma-ne xi jè tsibíxáya-là; jò jò kisikasén, kitsjaà-là okixi nga kochrjekàjìn inima ch'o-là neí xi tíjìn inima-là xita.

⁸ K'oaá tís'in kitsjaà-là okixi nga nímé tsojmì k'oa k'e nga kjoí ndiyá. Kitsò-là:

—Tà k'oaá s'in tanguió. Tà jngò yá garrote ch'aà. Kì na'yaá ch'aà, kì inchrájin ch'aà, kì ton ch'aà.

⁹ Komaá tsjayaà xojté-nò. Tà jngò nachro ch'aà. Kì jò ch'aà.

¹⁰ Jesús kitsò-isa-là:

—K'e nga kijchò jngò naxandá, jngò ni'ya títajna skanda k'e nga konguí-nò.

¹¹ Tsà tjín naxandá ñánda mìkì skoétjò-nò, tsà majìn-là nga 'nchré-nò, titjòjñò, títajneè chijo-là ndsokòò mé-ne nga skoe-ne nga jña tjín-là jé nga mìkì 'nchréñijon. Xi ngui okixi k'oaá xan-nò k'e nga kijchò nachrjein-là jña naxandá koi, isaá tse kjo'in s'e-là koni s'in komát'in naxandá Sodoma kò Gomorra.

¹² Xita koi, kù nga tsibénojmiya-là xita nga kátasíkájno jé-là nga mì tì jé kohótsji-ne.

¹³ Kjin inima ch'o-là neí tsachrjekàjìn inima-là xita, tikoá kjin xita kisindaà-ne xi xk'én nga kiskaàjno-là asiti.

K'e nga k'en Juan xi kis'ìn bautizar xita (Mateo 14:1-12; Lucas 9:7-9)

¹⁴ Jè Herodes xi xita xá ítjòn tjina, kù'nchré it'aà ts'e Jesús nga jye xki xi ján naxandá kina'ya-là. Tjín xita xi kitsò:

—Jè Juan xi kis'ìn bautizar xita, jyeé jaáya-là. K'oaá ma-ne nga tjín-là nga'ño nga ma-là s'in kjòxkón xi ndaà tjín.

¹⁵ Tjín xita xi kitsò:

—Jè Elías.

Tikoá tjín xi kitsò:

—Jngò xita xi kùichja ngajo-là Nainá kjòtseé.

¹⁶ Jè Herodes, k'e nga kù'nchré kitsò-né:

—Jè Juan xi jaáya-là xi 'an tsatesian skò.

¹⁷ Nga isa kjòtseé, Herodes kisikasén xita nga kitsobà'ño Juan nga kiskinìs'en ndayá, koi kjoa-là ts'e chjoón Herodías xi chjoón-là Felipe nga jè Herodes chixàn-kò xi chjoón-là 'ndse.

¹⁸ Nga jè Juan xi kis'ìn bautizar xita, kjin k'a okitsò-là Herodes:

—Mìkì tjì'nde-lè nga jì tijnakoi chjoón-là 'ndsi.

¹⁹ Jè chjoón Herodías, kòjtikeè Juan, mejèn-la nga sikk'en tanga mikii ma xi siko.

²⁰ Nga jè Herodes, beèxkón Juan kò síkinda-ne nga jye tíjìn-la nga xita kixi-né kò xita tsjeè-né. Herodes k'e nga chjako Juan, matsjaà-la nga 'nchré-la, tanga mikii beè mé xi s'íin, a sikkitasòn-né, a xi majìn.

²¹ Ijchò jngoò nachrjein xi ndaà ts'e chjoón Herodías k'e nga tsachrje s'eí-la jè Herodes jè nachrjein nga kits'iin. Ijchò xita-la xitaxá ítjòn, kò xita sko-la soldado, kò xita nchiná xi tjín kóhokji Galilea nga tsakjèn-kò Herodes.

²² Tikoá ijchò tsòti-la Herodías, jahas'en ni'ya; kitè. Jè Herodes kò xita xi títsajna, ndaà jchán kisaseèn-la koni s'ín kitè jè tsòti. Herodes, xi xita xá ítjòn tjina, kitsò-la:

—Tijé-ná mé xi mejèn-lè, tsjaà-lè.

²³ K'oaá s'ín kitsjaà-la tso'ba nga tsjá yije-la nita mé xi mejèn-la nas'ín osen nangui xi jè otíxoma-la.

²⁴ Jè tsòti, itjo ni'ya, kiskònangui-la nea-la. Kitsò-la:

—¿Mé xi sikké-la?

Jè nea-la. Kitsò:

—Tijé-la sko Juan xi s'ín bautizar xita.

²⁵ Jè tsòti, nitoón jahas'en ijngoò k'a ni'ya ñánda tjina xitaxá ítjòn. Kitsò-la:

—I'ndeí mejèn-na nga niton tjii-ná sko Juan xi s'ín bautizar xita; tinaya-ná chrobate.

²⁶ Jè Herodes, xi xitaxá ítjòn tjina, ñó kjòba-la k'e nga kii'nchré-la jè tsòti. Tanga koií kjoa-la nga jye kitsjaà-la 'én-la nga nguixkon xita xi títsajna s'eí, kjo'ño kikkitasòn-la.

²⁷ Jè Herodes, tik'eé-ne kikkasén jngoò soldado, kitsjaà okixi nga kàtjanchrohóko sko Juan.

²⁸ Jè soldado kii ján ndayá nga tsatesin Juan; ikjoàn j'íiko sko Juan; tjíya-la chroba nga kitsjaà-la jè tsòti; kò jè tsòti kisingatsja nea-la.

²⁹ K'e nga kii'nchré xita xi kota'yàt'aà-la Juan nga jye k'en, kikkjaá yijo-la nga kiskinìs'en-ngui jngoò ngajo itsjó-la mik'en.

*Jè kjoxkón xi kis'iin Jesús nga 'òn jmii xita kikkjèn
(Mateo 14:13-21; Lucas 9:10-17; Juan 6:1-14)*

³⁰ K'e nga j'ii ijngoò k'a-ne jña xita xi tsibixáya-la Jesús, tsibénojmi ngats'ii kjoa xi kis'iin kò xi tsakóya ñánda kii.

³¹ Jesús kitsò-la:

—Nchrobá. Tíkjiaán nga sikkjáya í'ñoá jngoò i'nde it'aà xìn.

Koií k'oa kitsò-la nga kjìn jchán ma xita, koá tjín bijchó, koá tjín nchrobá-ne. Jesús kò xita xi tsibixáya-la skanda mì tì kii ma'a-la nga kjèn.

³² Tsibítsajnaya chitso nga ta jña kii jngoò i'nde it'aà xìn ñánda tsjìn xita.

³³ Tanga kjìn xita kijtseè k'e nga kii. Kijtseèxkon nga jè Jesús. Ikjoàn kiltjngui-la ngats'ii xita naxandá xi ya chrañat'aà-la nga kii-ne ndsoko; skanda isa ítjòn ijchò jña xita koi.

³⁴ Jesús, k'e nga itjojen chitso, kijtseè nga 'ño kjìn ma xita xi títsajna; kjòhímakeè-né. K'oaá ngaya-la koni jña orrè xi tsjìn-la paxtò xi ko'ndà. Ikjoàn tsibíts'iaqo nga kjìn 'én tsibénojmi-la.

³⁵ K'e nga jye 'ño kjòhoxòn, jña xita xi kota'yàt'aà-la Jesús ijchò kinchat'aà-la, kitsò-la:

—Jyeé kjòhoxòn, jè i'nde jè, it'aà xìn-né, nimé tjín.

³⁶ Kot'in-la jña xita kàtji-ne nga kàtatse tsojmì xi skine ya naxandá kò tsà jña ni'ya ñánda nga chrañat'aà.

³⁷ Kiihja Jesús, kitsò-la:

—Tjii-la jña xi kikkjèn xita koi.

Kitsò jña xita:

—¿A mejèn-lè nga konguí kindaa-jèn inchrajín koni tjín síkijne xita nga jò sindo nachrjein síxá?

38 Kitsò Jesús:

—Chítsejèn-là kó tjin ma inchrájin-nò.

K'e nga kijtseè kó tjin ma-ne, kitsò-la:

—'Òn ma inchrájin kò jò ma tin.

39 K'eé kitsjaà okixi Jesús nga kàtìtsajnajtín jñà xita ya ijìlìn ijñá ñánda sase choòn.

40 Íjngó íjngó sìndo tsibìtsajnajtín-ne jñà xita; kò tjin ñánda icháte icháte tsibìtsajnajtín-ne.

41 Jesús kiskoé jñà inchrájin xi 'òn ma-ne kò jñà tin xi jò ma-ne; ikjoàn kiskoòtsejèn ngajmii; kitsjaà-la kjondaà Nainá; ikjoàn kisìxkoaya inchrájin; k'eé kitsjaà-la jñà xita xi kota'yàt'aà-la nga kisìka'bì-la ngats'ii xita kjìn xi títsajna. Tìkoá kisìjòya tin xi jò ma-ne. Kitsjaà-la ngats'ii xita.

42 Tsakjèn yije kóhòtjin xita kó nga kjòskiì.

43 K'eé tsibíxkó-ne inchrájin kò tin xi kjòxkoaya jñà xi tsiningui-ne; nguì tejò nisiyá komà.

44 Jñà xita xi tsakjèn, 'òn jmii ma-ne xi xita x'in.

*K'e nga jè Jesús tsajmeèsòn ndáchikon
(Mateo 14:22-27; Juan 6:16-21)*

45 Nga komà iskan, Jesús kisìkas'en xita xi kota'yàt'aà-la ya iya chitso mé-ne nga isa ítjòn kijchò-ne ján naxandá Betsaida ya xijngoàà ndáchikon; koá jè Jesús k'eé tíshixat'aà xita xi kjìn ma-ne nga jye nchifì-ne.

46 K'e nga jye kisìhixat'aà xita, Jesús kiimijìn-jno jngoò nindoò nga kiì kiichjat'aà-la Nainá.

47 K'e nga jye kòjñò, jè chitso, jyeé ya síjna jngoò osen ndáchikon. Jesús, nga tajngoò tsibíjnat'aà nangui,

48 kijtseè chitso nga mìkiì ma fì. Nga jè tjo bíchjoà ikon-la. K'e nga tajñòya isa, Jesús kiitjingui-la xita xi kota'yàt'aà-la nga kiì-ne ndsoko ya isòn nandá. Tanga k'oaá kis'iìn koni tsà mejèn-la nga kjoì ítjòn-la chitso.

49 Jñà xita xi kota'yàt'aà-la, k'e nga kijtseè nga tífisòn nandá, k'oaá s'ín kisìkìtsjeèn, kitsò, tsà inìma ch'o-né; kiskindàya xkón

50 nga kitsakjòn-la k'e nga kijtseè kóhòtjin. Tanga Jesús nitoón kiichja-la, kitsò-la:

—'Nó t'è-là takòn, kì tsakjoòn-jèn, 'an-ná.

51 K'e nga jahas'en chitso Jesús, nitoón kisijyò-ne tjo. Tà k'oaá komà-la jñà xita xi kota'yàt'aà-la,

52 nga kj'eè kì ndaà fahas'en-jìlìn-la jè kjojkón xi kis'iìn Jesús ts'e inchrájin, koi-né nga tájaàjìlìn tjin inìma-la.

*K'e nga jè Jesús kisindaà-ne xita xk'én ján Genesaret
(Mateo 14:34-36)*

53 K'e nga jye tsatojìlìn ndáchikon, ijchò ján nangui Genesaret; yaá tsibít'aà'ño chitso-la ya indii ndáchikon.

54 K'e nga tsitajen yije chitso, jñà xita xi ya títsajna, nitoón kijtseèxkon nga jè Jesús.

55 Tìkoáá nitoón kiì kóhokji nga jngoò itjandii i'nde jè. Ikjoàn tsibít's'ia xita nga j'ìko-la ngats'ii xita xi xk'én; kjisòn-la naxan-yá ya i'nde ñánda nga 'nchré xita nga bijchó Jesús.

56 Nita ñánda naxandá nga jahas'en Jesús, tsà naxandá jtobá-né, naxandá iì-né, inchiya-né, kò tsà rancho-né, jñà xita yaá sikáyijò jñà xita xi xk'én ya jngohosen ndiyá; ikjoàn bíts'iba-la nas'ín tà jè ítjòn nikje-la tsobà'ño nga kàtandaà-ne. Ngats'ii xita xi kitsobà'ño nikje-la kjondaà yijeé-ne.

7

Kjoa xi síkíts'ón xita
(Mateo 15:1-20)

¹ Ijchò xita fariseo kò xita xi okóya kjotíxoma-la Nainá xi kiskii Moisés xi j'ii-ne naxandá Jerusalén. Yaá ijchòtjingui-la ñánda tíjna Jesús.

² Jña xita koi, kijtsee i'nga xita xi kota'yàt'aà-la Jesús nga kjèn tjéko tsja nga mikii oníjno; kitsò-la xikjín [nga mikii nchisíkitasòn koni s'ín tjín kjotíxoma ts'e xita judío xi xkón tjín].

³ Nga jña xita fariseo kò ngats'ii xita judío, k'oaá s'ín síkitasòn koni s'ín tjín kjotíxoma-la xita jchínga; tsà mì nguì ndaà koníjno tsja, mikii kokjen.

⁴ Tíkooá k'e nga f'ii-ne ndítsin, ítjòn oníjno tsja, k'ée kjèn; tjín-isa-la kjotíxoma xi kj'eí koni oníya chítsin-la, tiji-la, kò chítsin kicha-la kò nachan-la.

⁵ Koií kjoa-la jña xita fariseo kò xita xi okóya kjotíxoma-la Nainá xi kiskii Moisés kiskòngui-la Jesús, kitsò-la:

—¿Mé-ne mikii síkitasòn-ne xita xi kota'yàt'aà-lè, koni s'ín tjín kjotíxoma-la xita jchínga nga ta k'oaá s'ín kjèn tjéko tsja?

⁶ Jesús kitsò-la:

—Koni s'ín kiskii Isaías, xita xi kiichja ngajo-la Nainá, ndaà kiichja it'aà tsajòn, jñò, xita xi jò ma isén-nò, k'e nga kitsò:

Jña xita koi,

beèxkón-na xi tà 'én chja,

tanga jña inima-la kjìin títsajna;

⁷ Nímé chjí-la nga beèxkón-na,

nga kjotíxoma-la xitaá okóya koni tsà kjotíxoma-la Nainá.

⁸ Jñò, níkjina-nò xi nguì kjotíxoma-la Nainá, kò jè onguítjingui-la kjotíxoma-la xita jchínga-nò nga oníya tiji-nò, chítsin-nò; kjìn skaya kjotíxoma tjín-nò koni s'ín 'nè.

⁹ Kitsò-isa Jesús:

—Jñò, nachrjekàngui-nò xi nguì kjotíxoma-la Nainá, jè níkitasòn kjotíxoma-la xita jchínga-nò.

¹⁰ Moisés k'oaá kitsò: “Jchaxkoín na'èn-lè kò nea-lè.” K'oaá tì kitsò: “Jè xi chjajno-la na'èn-la kò nea-la, tjínè-la nga sík'en.”

¹¹ Tanga jñò bixón-nó: “Jngoò xita, ma kító-la na'èn-la, o nea-la: Mikii koma siichját'aà-lè; ngats'ii tsojmì xi tjín-na, Corbán-né.” (Én xi tsò Corbán, 'én Hebreo-né; tsòyaá-ne: jè Nainá jyeé kitsjaà yije-la.)

¹² Bixón-nó nga mì tì kii tjí'nde-la nga kosiko na'èn-la, o nea-la.

¹³ Jñò, nachrjekàngui-nò 'én-la Nainá nga níkatoya-la xinguiqo kjotíxoma-la xita jchínga-nò. Kjìn skaya kjotíxoma tjín-isa-nò xi k'oaas'ín 'nè.

¹⁴ Jesús, k'ée kiichja-la ngats'ii xita, kitsò-la:

—Ngats'ioò, tiná'yaà kò ndaà kàtachiya-nò.

¹⁵ Nímé tjín xi fahas'en-jìin yijo-la xita xi síkíts'ón. Jè-né xi inima-la xita bitjoiin-ne, xi síkíts'ón.

¹⁶ ¡Ndaà tiná'yaà koni xan-nò!

¹⁷ Jesús itjokàjìin-la xita; kii, jahas'en jngoò ni'ya; ikjoàn jña xita xi kota'yàt'aà-la kiskòngui-la kó tsòya-ne jè kjoa mangásòn xi tsibénjímí.

¹⁸ Kitsò Jesús:

—¿Jñò, a tíkooá mikii machiya-nò kó tsòya-ne? ¿A mì fiya-nò ngats'ii tsojmì xi fahas'en-jìin yijo-la xita mikii síkíts'ón

¹⁹ nga mìtsà inima-la fahas'en-jìin? Yaá fahas'en indso'ba, ikjoàn bitjo-ne k'e nga fi kítsajna ján baño.

Jesús kitsòyaá-ne: Ngats'ii tsojmì xi ma chine, tsjeè-né; mikii síkíts'ón inima-la xita.

²⁰ Kitsò-isa Jesús:

—Jè kjohítsjeèn xi bitjojìn inìma-là xità, jè xi síkìts'ón.

²¹ Koi-né nga inìma-là xità nchrobájiìn, jñà kjohítsjeèn xi ch'o tsò, koni jè kjoa chijngui ts'e xità xi jye chixàn kò xi kj'eè bixan jèn, kò xi xità sík'en,

²² kò kjoa chijé, kò kjoa tse mejèn, kò kjoa ts'en, kò kjoa konachan, kò kjoa ts'e xi otonè-là kjoa ts'e yijo-ná, kò kjoaxìtakòn, kò kjoa 'on takòn, kò kjoa 'nga ikon, kò kjoa 'én ndiso, kò kjoa tònḁo xi m̀tsà ítjòn nìkìtsjeèn.

²³ Ngats'ìi kjoa koi xi inìma-là xità bitjokàjiìn-ne, koií xi síkìts'ón xità.

*Mé xi komàt'in chjoón xi xìn nangui-là nga kòkjeín-là it'aà ts'e Jesús
(Mateo 15:21-28)*

²⁴ Kù Jesús ján naxandá Tiro kò Sidón. K'e nga ijchò ya, jahas'en jngoò ni'ya; mejèn-là nga mì yá xità xi skoe, tanga mìkì komà tsibìjna'ma.

²⁵ Nìtoón kù'nchré jngoò chjoón xi inìma ch'o-là neí tíjìn inìma-là tsòti-là. Kù ñánda tíjna Jesús nga tsasìxkó'nchit'aà-là;

²⁶ tsibítsi'ba-là nga kochrjekàjiìn jè inìma ch'o xi tíjìn inìma-là tsòti. Jè chjoón, yaá ì'nde-là ñánda 'mì Sirofenicia; 'én griego chja.

²⁷ Jesús kitsò-là:

—Tjiì'nde-là jñà kàtakjèn ítjòn xi ìxti ma. Mìkì ndaà tjín tsà chjaà'an-là niño jñà ìxti, ìkjoàn k'oi-lá ndí nañá.

²⁸ Jè chjoón kitsò:

—Ndaà tjín Na'èn; tanga jñà ndí nañá kineé xì-là tsojmì xi bixòngui ímìxa xi síkatsjò ìxti.

²⁹ K'eé kitsò Jesús:

—Ndaà kinokjò. T'in-ne ni'ya-lè. Jè inìma ch'o-là neí, jye itjokàjiìn-ne inìma-là tsòti-lè.

³⁰ K'e nga ijchò-ne ni'ya-là, jè chjoón, jè tsòti-là, yaá kijnasòn nachan; tanga jye itjokàjiìn-ne inìma-là jè inìma ch'o-là neí.

K'e nga jè Jesús kisindaà jngoò-ne xità jtayaà kò xi skí'in

³¹ Jesús kù-ne ya ì'nde ts'e Tiro; jahatojiìn ì'nde Sidón, tìkoa jahatojiìn nangui xi 'mì Decápolis, ijchò-ne ya ndáchikon ts'e Galilea.

³² Yaá ijchòkò jngoò xità xi jtayaà kò skí'in, tsibítsi'ba-là Jesús nga kòt'aà-là tsja jè xità jè.

³³ Jesús, it'aà xìn kùkò ñánda tsjìn xità, k'eé jahas'en jnótsja ya líká-là, kò ndánachrá-là kisikaàjno nìjen-là.

³⁴ Jesús kiskoòtsejèn ngajmì; ìkjoàn jaátse-là, kitsò:

—¡Efata! —tsò-ne 'én jè: ¡Kàtatáx'a!

³⁵ Nìtoón kitáx'a-ne líká-là xità jè, tìkoaá ndaà komà kùichja-ne.

³⁶ Jesús kitsò-là jñà xità:

—Kì yá xità xi bènojímí-là.

Tanga k'e nga 'ñó tsibít'in-là Jesús nga mì yá xità keènojímí-là, tanga jñà xità isaá ndaà kiskinìsòn 'én.

³⁷ Jñà xità xi kù'nchré, ta kjoxkón-là, kitsò:

—Ndaà s'ín yije. Síndaà-ne xità xi jtayaà kò xi mìkì ma chja.

8

*Jè kjoxkón xi kis'ìn Jesús nga ñjòn jmù xità kisìkjèn
(Mateo 15:32-39)*

¹ Ìjngoò nachrjein nga kjìn jchán xità kjoxkóya koa tsjìn tsojmì xi kine, Jesús kùichja-là xità-là xi kota'yàt'aà-là, kitsò-là:

² —Jñà x̄it̄a koi, mahimakeè-ná. Jyeé kò jàn nachrjein t̄jín-là nga títsajnakò-na koa n̄imé t̄jín tsojmì xi kine.

³ Tsà tà kòs'ín siikasén chjan-na ni'ya-là yaá kohindaàya ndiyá nga t̄jín xi kjìn inchròbà-ne.

⁴ Kitsò x̄it̄a xi kota'yàt'aà-là Jesús:

—¿Kòs'ín s̄ikjèn x̄it̄a koi jngoò ì'nde ìt'aà xìn ñánda n̄imé t̄jín?

⁵ Jesús kiskònangui-là, kitsò-là:

—¿Kó t̄jín ma inchrájín xi t̄iyjò-nò?

Kitsò jñà x̄it̄a xi kota'yàt'aà-là:

—Itoò ma-ne.

⁶ K'eé kitsò Jesús:

—Koat̄in-là kàt̄itsajnat'aà nangui jñà x̄it̄a.

Jesús kiskoé inchrájín xi itoò ma-ne; kitsjaà-là kjondaà Nainá ìkjoàn kisìxkoaya; k'eé kjòngatsja jñà x̄it̄a xi kota'yàt'aà-là mé-ne nga kisìka'bí-là jñà x̄it̄a xi kjìn ma-ne.

⁷ T̄ikoaá t̄iyjò chiba-là t̄in jtabá. Jesús kisìchikon-t'in; ìkjoàn kitsò-là x̄it̄a xi kota'yàt'aà-là:

—T̄ika'bió.

⁸ Tsakjèn yije x̄it̄a kóhot̄jín skanda kó nga kjòskii; k'e nga tsibíxkó-ne jñà xi kjòxkoaya nga tsiningui-ne, ngui itoò n̄isiyá koma.

⁹ Jñà x̄it̄a xi tsakjèn, kjomeè ñijòn jmiì ma-ne. Jesús, ìkjoàn kisìhixat'aà-ne jñà x̄it̄a;

¹⁰ ìkjoàn jahas'en chitso kò x̄it̄a xi kota'yàt'aà-là. Yaá kii ì'nde ñánda 'mì Dalmanuta.

K'e nga jñà x̄it̄a fariseo jngoò seña kisijé xi jeya t̄jín

(Mateo 16:1-4; Lucas 12:54-56)

¹¹ Ijchò x̄it̄a fariseo, tsibíts'ia nga tsajoókjoò-kò Jesús. Kisijé jngoò-là seña xi jeya t̄jín xi ìt'aà ts'e Nainá nchròbà-ne nga mejèn-là skoe tsà kixi kjoa nga Nainá kisìkasén.

¹² Jesús 'ñó jaátse-là, kitsò:

—Jñà x̄it̄a koi, ¿mé-ne seña xi jeya t̄jín síjé-ne? Xi ngui okixi, k'oaá xan-nò, nijngoò seña jchaa.

¹³ Yaá kisìkítsajna x̄it̄a koi; jahas'en ìjngoò k'a-ne chitso; kii ján xijngoà ndáchikon.

Nà'yo san-là x̄it̄a fariseo

(Mateo 16:5-12)

¹⁴ Jñà x̄it̄a xi kota'yàt'aà-là Jesús, k'e nga kii, kijchàajìn-là mìkii ts'a inchrájín. Tà jngoò ma inchrájín xi kjinaya-là chitso.

¹⁵ Jesús kitsò-là:

—Chítsejèn-là koa t̄ikindaa yijo-nò ìt'aà ts'e nà'yo san-là x̄it̄a fariseo kò ts'e Herodes.

¹⁶ Jñà x̄it̄a xi kota'yàt'aà-là Jesús tsohókò xíkjín, kitsò-là:

—Koií k'oa tsò-ná nga mìkii kich'á inchrájín.

¹⁷ Jesús kisijìn-là koni s'ín nchijoó, k'eé kitsò-là:

—¿Mé-ne kòbixón-nò nga tsjìn-nò inchrájín? ¿A kj'eè fiya-nò? ¿A mì machiya-nò? ¿A tsí 'ñó tájaajìn t̄jín inima-nò?

¹⁸ T̄jín xkoòn, ¿mé-ne mìkii tsejèn-nò? T̄jín líká-nò, ¿mé-ne mìkii na'yà-nò? ¿A mì bítsjeèn-nò

¹⁹ k'e kisika'biá inchrájín xi 'òn ma-ne koa 'òn jmiì x̄it̄a tsakjèn? ¿Kó t̄jín n̄isiyá tsiningui-ne xi tsibíxkó-ìsa?

Kitsò jñà x̄it̄a:

—Tejò n̄isiyá komà.

²⁰ —K'e nga kisika'biá jñà inchrájín xi itoò ma-ne, koa ñijòn jmiì x̄it̄a tsakjèn, ¿kó t̄jín n̄isiyá tsiningui-ne xi tsibíxkó-ìsa?

Kitsò jñà x̄it̄a:

—Itoò n̄isiyá komà.

21 K'eé kitsò-la:

—¿A tà kó kj'eè machiya-nò?

K'e nga jè Jesús kisindaà jngoò-ne xita xi miki tsejèn-la

22 Jesús ijchò ján naxandá Betsaida; ya ijchòko jngoò-la xita xi miki tsejèn-la. Tsibítsi'ba-la nga kátát'aà-la tsja jña xkon.

23 Jesús kitsobà'ño tsja jè xita xi miki tsejèn-la. Ikjoàn tsachrjekàjiin naxandá, tsibíchrángui xkon, ikjoàn tsohósòn-la tsja. K'eé kiskònangui-la a tsejèn chiba-la.

24 Jè xita xi miki tsejèn-la kiskoòtsejèn, kitsò:

—Jye be xita tanga k'oaá ma-na ta koni kjoàn yá kjoàn nga tjíma.

25 Jesús, ijngoò k'a tsohót'aà-la tsja jña xkon. Kitsò-la nga ndaà kàtakotsejèn, nitoón kjòndaà-ne. Ndaà kijtsee yije-ne.

26 Jesús kisikasén-ne ni'ya-la xita jè, kitsò-la:

—Kì ya bitjaàs'en-jiin naxandá, kì yá xita xi bènojmí-la.

K'e nga jè Pedro tsibénojmíya nga Jesús, jé xi Cristo

(Mateo 16:13-20; Lucas 9:18-21)

27 Itjo Jesús ko xita xi kota'yát'aà-la, kii ya naxandá jtobá xi chja-ne Cesarea ts'e Filipo. K'e nga tjímaya ndiyá, Jesús kiskònangui-la xita xi kota'yát'aà-la, kitsò-la:

—¿Kó tsò jña xita? ¿Yá-ná 'an?

28 Kitsò jña xita xi kota'yát'aà-la:

—Tjín xi tsò: “Jé Juan xi kis'iin bautizar xita.” Tjín xi tsò: “Jé Elías.” Tikoáá tjín xi tsò: “Jngoò xita xi kiichja ngajo-la Nainá.”

29 Jesús kiskònangui-la jña xita xi kota'yát'aà-la; kitsò-la:

—¿Jño kó bixón? ¿Yá-ná 'an?

Kiichja Pedro, kitsò:

—Ji-né xi Cristo [xi xó kisikasén-lè Nainá].

30 Tanga jè Jesús kitsò-la:

—Kì yá xita xi bènojmí-là xi it'aà ts'an.

K'e nga jè Jesús tsibénojmíya kjoa biyaà-la

(Mateo 16:21-28; Lucas 9:22-27)

31 Tsibítsi'ia Jesús nga tsakóya-la xita xi kota'yát'aà-la, kitsò-la:

—'An xi Kì'ndí-la Xita xan-la yijo-na, tse kjo'in siikjaán; kochrjengui-na jña xita jchínga, ko jña xita sko-la no'mii, ko xita xi okóya kjotixoma-la Nainá xi kiskii Moisés. Sjik'eén-na tanga k'e nga kijchò ján nachrjein kjoáya-na.

32 Jesús nguì ndaà tsibénojmí kjoa xi komàt'in. Jé Pedro kiichjat'aàxìn-la Jesús nga miki ndaà tjín koni tsò.

33 Tanga Jesús, kisikáfaya, kiskoòtsejèn-la xita xi kota'yát'aà-la, tsohótiko Pedro. Kitsò-la:

—Tisit'aàxìn-ná ji xita nejí. Nga ji, mìtsà k'oas'ín nikítsjiin koni s'ín tjín kjohítsjeèn-la Nainá. Ngaji tà k'oas'ín nikítsjiin koni s'ín tjín kjohítsjeèn-la xita.

34 Jesús kiichja-la xita xi kota'yát'aà-la ko xita xi tjingui-la. Kitsò-la:

—Tsà yá xi mejèn-la nga xita ts'an koma, kàtatsjeiin-takòn mé xi mejèn-la yijo-la; koni jngoò xita xi 'yajen krò-la, kàtijnandaà nga siikjeiín kjo'in xi kjoa ts'an; ndaà kàtjìt'aà-na.

35 Nga nita yá xita xi mejèn-la kochrjetjì yijo-la nga nimé kjo'in sakò-la, tà saá siichija-né ko kjo'in kíjnajiin; tanga jè xi tijnandaà nga tsjá yijo-la xi kjoa ts'an ko kjoa ts'e 'én ndaà-la Nainá, jè-né xi kitjokàjiin kjo'in nga it'aà ts'an ndaà kíjna.

36 ¿Mé xi siikijne xita nas'ín tjoé yije-la isò'nde tsà siichja inima-la? Nímé.

37 ¿A koma koichjí kjoabiyaà jngoò xita xi majìn-la nga kiyá? Majìn.

³⁸ Tsà tjin i'nga xita xi kosobà-la it'aà ts'an ko it'aà ts'e 'én-na ya nguixkon xita jé xi tjin, tikoáá 'an xi Ki'ndí-la Xita xan-la yijo-na, kosobà-na it'aà ts'e k'e nga kjoikoáa ijngò k'a kjoajeya-la Na'èn-na ko àkjale tsjeè-la Nainá.

9

¹ Jesús kitsò-isa:

—Okixií xi xan-nò, títsajnajin i'nga xita ijndé xi mikii kiyá skanda k'e nga skoe kó s'in otíxoma Nainá nga kjoikò nga'ño-la.

K'e nga jè Jesús jahatjya í'ño isén-la kóhokji yijo-la
(Mateo 17:1-13; Lucas 9:28-36)

² Nga komà joòn nachrjein, Jesús kiimijin-jno jngò nindoò xi 'nga kji; tà jña kiikò Pedro, Jacobo ko Juan. K'e nga ijchò i'nde jè, Jesús, jahatjya í'ño isén-la nga nguixkon jña xita koi.

³ Jè nikje-la 'ño kjòchroba, tsí ote ni'in né. Tsjin xita nga tíjtsa isò'nde xi ma-la ts'in nikje koni s'in kjòchroba.

⁴ Tikoáá kijtseè jè Elías ko Moisés nga nchijoókjoè ko Jesús.

⁵ Jè Pedro kitsò-la Jesús:

—Maestro, ndaa tjin nga i títsajnaá. Jàn ni'ya xkójndà kındaà-jen. Jngò tsiji, jngò ts'e Moisés, jè xi ijngò ts'e Elías.

⁶ Jè Pedro tà k'oaá kitsò. Mi ti kì beè-ne kó s'in kiichja nga 'ño kitsakjòn xita koi.

⁷ K'eé j'ii jngò 'nguién-la ifi xi tsibí'ma xita koi; yaá ijìn ifi kina'ya jngò-la 'én xi kitsò: —Jè jèè xi ki'ndí-na xi 'ño matsjake. Jè tiná'ya-là.

⁸ Tik'e-ne kiskoòtsejèn xita koi. Mi ti yá tjin-ne. Tà jè tajngò Jesús síjna.

⁹ K'e nga inchrobàjen-t'aà-ne nindoò, Jesús kitsò-la xita xi kota'yàt'aà-la:

—Kì yá xita xi bènojmi-là jè kjoa xi kà'yaá; skanda k'eé tènøjmi-là k'e nga kjoáya-na it'aà ts'e kjoabiyaá 'an xi Ki'ndí-la Xita xan-la yijo-na.

¹⁰ Jña xita xi kota'yàt'aà-la tsibí'ma jè kjoa jè, sakoáá tsajoóya-ne kó tsò-ne xi tsò-la kjoáya-la.

¹¹ Kiskònangui-la Jesús. Kitsò-la:

—¿Mé-ne kòtsò-ne jña xita xi okóya kjotíxoma-la Nainá xi kiskii Moisés nga jè Elías kjoii ítjòn?

¹² Jesús kitsò-la:

—Okixi né. Jè kjoii ítjòn Elías, jè koijndaàjin yije kjoa. ¿Koa mé-ne kòtsò-ne Xojon-la Nainá nga 'an xi Ki'ndí-la Xita xan-la yijo-na, tseé kjo'in siikjiaán, toòn skoe-na xita?

¹³ Tanga 'an, k'oaá xán-nò, jè Elías jyeé j'ii. Jña xita k'oaá s'in kisikò koni s'in mejèn-la. Tanga k'oaá s'in tíchja Xojon-la Nainá nga k'oaá s'in komat'in.

K'e nga jè Jesús kisindaà jngò-ne ti xi inima ch'o-la neii tjin inima-la
(Mateo 17:14-21; Lucas 9:37-43)

¹⁴ Jesús k'e nga ijchò-ne ñánda títsajna xita xi kota'yàt'aà-la xi i'nga, kijtseè nga kjin jchán ma xita xi títsajna. Yaá títsajnajin i'nga xita xi okóya kjotíxoma-la Nainá xi kiskii Moisés, 'ño nchijoóya-ne.

¹⁵ Jña xita k'e nga kijtseè nga ijchò Jesús, tà k'oaá koma-la. Kii yije kóhótjin nga kishixat'aà.

¹⁶ Jesús kiskònangui-la, kitsò-la:

—¿Mé xi kò ta ndaa chibàya-nò?

¹⁷ K'eé kiichja jngò xita xi ya tijnajin. Kitsò:

—Maestro, jè ki'ndí-na kòf'iko-lè. Inima ch'o-la neii tjin inima-la; mikii ma chja.

¹⁸ Njton ñánda tjina k'e nga tsobà'ño, majndoòt'aà nangui kò ochrje ndáxó tso'ba, síjts'in ni'ño, ikjoàn síjna tsjò. Koi tsijé-la xita xi kota'yàt'aà-lè nga kàtachrjekàjin inima-la jè inima ch'o-la neii tanga mikii bitjokàjin-la.

19 Kiichja Jesús, kitsò:

—Jñò, xità xi mìkì mokjeiín-nò it'aà ts'an. ¿Skanda mé nàchrjein kótijnako-nò? ¿Mé nàchrjein ska-na kjoa-nò? Nchrohóko-ná jè ti ijndé.

20 K'eé kiìko jè ti ya nguixkon Jesús; jè inìma ch'o-la neíí, k'e nga kijtseè Jesús, ijngoò k'a k'en xín ti. K'e nga kiskaàt'aà nangui tsangáyà'nde koa itjo ndáxó tso'ba.

21 Jesús kiskònangui-la na'èn-la, kitsò-la:

—¿A kjòtseé oma-la ti-lè?

Jè na'èn-la kitsò:

—Tik'e-ne nga sa ndí ti jtobá kji.

22 Jè inìma ch'o-la neíí kò kjìn jchán k'a síkatjen-jiìn ni'ín ko síkatjen-jiìn nandá nga mejèn-la sík'en. Tsà koma-lè mé xi sikoji, jchahimatakòn-nájen ko tichját'aà-nájen.

23 Jesús kitsò-la:

—¿Kó si tsà koma-lè? Ma yije-né nita mé kjoa-ne jè xi mokjeiín-la.

24 Nitoón 'ñó kiichja jè na'èn-la ti. Kitsò:

—Mokjeiín-na, tichját'aà-isa-ná nga ngui isa ndaà kokjeiín-na.

25 Jesús k'e nga kijtseè nga tíma kjìn xità, tsohótiko jè inìma ch'o-la neíí; kitsò-la:

—Ngaji, inìma ch'o-la neíí xi mìkì ma-lè nokjoì ko mìkì na'yì, 'an, k'oaá xan-lè, titjojiìn inìma-la ti jè; kì ti yaá bitjaàs'en-jiìn-ne inìma-la.

26 Jè inìma ch'o-la neíí kiskindàyaxá; ikjoàn ijngoò k'a k'en xín ti. Ikjoàn itjojiìn-ne inìma-la. Kisikájna jè ti koni tsà jye k'en, jñà xità xi nchikotsejèn, kitsò:

—Jyeé k'en.

27 Tanga jè Jesús kitsobà'ñó tsja; kiskímiì'nga; ikjoàn tsasíjna kixi jè ti.

28 K'e nga jahas'en ni'ya Jesús, jñà xità xi kota'yàt'aà-la kiskònangui-la nga tajngoò, kitsò-la:

—¿Mé-ne ngajen mìkì kòbitjojiìn-najen jè inìma ch'o-la neíí?

29 Kiichja Jesús, kitsò:

—Jñà inìma ch'o-la neíí xi okjoàn, k'eé bitjokàjiìn nga nokjoàt'aà-la Nainá ko nga bijnachjaán.

K'oaá s'ín tsibénjmi Jesús kjoabiyaà-la xi ma-ne jò k'a

(Mateo 17:22-23; Lucas 9:43-45)

30 K'e nga kiì-ne ya i'nde jè, jahatojiìn nangui Galilea. Tanga Jesús majìn-la nga xità skoe;

31 Jesús k'oaá s'ín tsakóya-la xità xi kota'yàt'aà-la. Kitsò-la:

—'An xi Ki'ndí-la Xità xan-la yijo-na yaá tsobà'ñó-na jñà xità; ikjoàn sikk'en-na. Tanga k'e nga kijchò jàn nàchrjein nga kiyá, kjoaáya-na.

32 Tanga jñà xità xi kota'yàt'aà-la mìkì kjòchiya-la 'én xi kitsò-la. Tà kitsakjòn-né, mìkì kiskònangui-la.

Yá xità xíkjin xi kína ítjòn

(Mateo 18:1-5; Lucas 9:46-48)

33 K'e nga ijchò ya naxandá Capernaum, k'e nga jye títsajna iya ni'ya, Jesús kiskònangui-la xità xi kota'yàt'aà-la, kitsò-la:

—¿Mé xi koa ta ndaà chibàya-nò k'e nga titsanchrobáya ndiyá?

34 Xità xi kota'yàt'aà-la tà jyò tsibítsajna, koi-né, k'e nga nchinchrobá ya ndiyá, tsajoóya-ne yá xità xíkjin xi kína ítjòn.

35 Jesús tsibìjna; ikjoàn kiichja-la nga tejò xità xi kota'yàt'aà-la, kitsò-la:

—Tsà yá xità xi mejèn-la nga kína ítjòn, ta saà jè kjoehet'aà-ne, chì'nda-la kátama ngats'ìi xità xi i'nga.

36 Jesús kiskoé jngoò ndí ti. Tsasíjna 'nchòhosen. Tsa'nga. Ikjoàn kitsò-la:

³⁷ —Nìtā yá-ne xi it'aà ts'an skoétjò jngoò ndí ti koni jè, 'aán xi skoétjò-na; kò jè xi skoétjò-na mìtsà tà 'an skoétjò-na, tìkoáá jè skoétjò xi kisìkasén-na.

Yá xi kondra-la Cristo kò yá xi xìtā ts'e
(Lucas 9:49-50; Mateo 10:42)

³⁸ Kùichjā Juan, kitsò:

—Maestro, jngoò xìtā kì'ya-jen xi it'aà tsiji ochrjekàjìin inìma ch'o-la neí inìma-la xìtā. Tānga mìtsà xìtā tsaján; mìkìi kits'ìl'nde-lajen.

³⁹ Jesús kitsò:

—Kì k'oaá nìkoo. Niyá-jèn xi it'aà ts'an s'ìin jngoò kjojkón xi ndaà tjin xi tijè kichjajno-ná.

⁴⁰ Jè xi mìtsà kondra tsaján, it'aà tsaján tìjna.

⁴¹ Ngats'ìi xìtā xi it'aà ts'an tsjá jngoò chitsín-nò nandá, koií kjoa-la nga xìtā-la Cristo 'mì-nò, okixìi xi xan-nò, jñà xìtā koi, tjoé-la chjì-la.

Xìtā xi bit'in-ná nga binchaàtsjiaá jé
(Mateo 18:6-9; Lucas 17:1-2)

⁴² 'Nìtā yá-ne xi jé skiniìin jngoò ndí xìtā ima xi mokjeiín-la it'aà ts'an, isaá-la ndaà koma tsà sngui'ñó jngoò ndajo natsí is'ìin, ikjoàn sikatjengui ndáchikon.

⁴³ Tsà jè ndsaa ótsji jé-nò, tichátjòn. Isaá ndaà-ne tsà xkoán titsjoò nga kitjás'en-jñoò kjoabinachon mì k'oa-ne tsà jò ma ndsaa koa ján konguió jìin ni'ín ñánda mìkìi bits'o,

⁴⁴ ya ñánda mìkìi biyaà chì'ndo xi kine-ná kò ya ñánda mìkìi bits'o ni'ín nga tìtiá.

⁴⁵ Tsà jñà ndsokoò ótsji jé-nò, tichátjòn. Isaá ndaà-ne tsà xkoán titsjoò nga kitjás'en-jñoò kjoabinachon mì k'oa-ne tsà jò ma ndsokoò koa ján konguió jìin ni'ín,

⁴⁶ ya ñánda mìkìi biyaà chì'ndo xi kine-ná kò ya ñánda mìkìi bits'o ni'ín nga tìtiá.

⁴⁷ Tsà jñà xkoòn ótsji jé-nò, tinachrjeè. Isaá ndaà-ne tsà jngoò ma xkoòn nga kitjás'en-jñoò ñánda tíhotíxoma Nainá mì k'oaá-ne tsà jò ma xkoòn koa ján konguió jìin ni'ín

⁴⁸ ya ñánda mìkìi biyaà chì'ndo xi kine-ná kò ya ñánda mìkìi bits'o ni'ín nga tìtiá.

⁴⁹ 'Ngats'ìi xìtā sa ni'ín kotsjeè-ne, koa jñà kjotjò xi tsjá xìtā, naxaá kojnchra-ne.

⁵⁰ Jè naxa, ndaà-né; tānga tsà mì tì kù jnchra-ne, ¿kós'ín siko-là nga kojnchra ijngoò k'a? Kátasijìin naxa inìma-nò koa 'nchán titsajnakò xinguiò.

10

K'e nga jè Jesús tsakóya kjoa ts'e xìtā xi tsjìin xíkjin
(Mateo 19:1-12; Lucas 16:18)

¹ Jesús itjoiìin ya naxandá Capernaum, kù ján i'nde Judea, ijchò ján nangui ijton xajngá nandá Jordán. Yaá kòkjìn ijngoò k'a xìtā; koa jè tsibíts'ia ijngoò k'a nga tsakóya-la xìtā koni s'ín kjit'aà.

² Ijchò kinchat'aà chraña i'nga-la xìtā fariseo. Nga mejèn-la skónachan-la, kiskònangui-la, kitsò-la:

—¿A tji'nde-la xi x'in nga tsjín chjoón-la?

³ Tānga Jesús kitsò-la:

—¿Kós'ín tsakóya-nò Moisés?

⁴ Kitsò xìtā koi:

—Moisés kitsjaà'nde-né nga ma sindaà xojon nga koma tsjín xíkjin xìtā.

⁵ Jesús kitsò-la:

—Moisés, koi k'oa kitsò-nò, jñò, 'ñó tájaajìin tjin inìma-nò.

⁶ Tānga k'e nga sa kisindaà isò'nde, Nainá tsibíndaà x'in kò chjoón.

⁷ K'oaá ma-ne nga jè x'in sikkìjna na'èn-la kò nea-la nga kijnakò chjoón-la.

⁸ Ta jngoò xìtā koma-ne ingajò. Mìtsà tì jò ma-ne, ta jngoò koma-ne.

⁹ K'oií kjoa-la nga mì yá xita tjí'nde-la nga siìtsjiìn xíkjin xi Nainá kisìjngò.

¹⁰ K'e nga ijchò-ne ni'ya-la, jña xita xi kota'yàt'aà-la Jesús kiskònangui ìjngò k'a-la tìkoi-ne kjoa koi.

¹¹ Jesús kitsò-la:

—Jè xita xi tsjin chjoón-la, ìkjoàn bixan-ko ìjngò xi kj'eí chjoón, kjoa chijngui tís'in ìt'aà ts'e chjoón-la.

¹² Tsà jè chjoón tsjin x'in-la ìkjoàn bixan-ko ìjngò xi kj'eí x'in, tìkoaá kjoa chijngui tís'in ìt'aà ts'e x'in-la.

K'e nga jè Jesús kisìchikon-t'in ndí ìxti

(Mateo 19:13-15; Lucas 18:15-17)

¹³ Jngò k'a jña xita j'ìiko-la ndí ìxti jè Jesús nga mejèn-la siìchikon-t'in; koòt'aà-la tsja. Tanga jña xita xi kota'yàt'aà-la Jesús mìkì kitsjaà'nde-la. Tsohótiko-né.

¹⁴ K'e nga kijtseè Jesús, kòjti-la, kitsò-la:

—Tjiì'nde-là ndí ìxti kàtjanchrobákon-na. Kì binchahikon-là. Jña xi k'oaá s'in tjin inima-la koni ts'e ndí ìxti, jña xi tjin-la kjondaà nga Nainá tíhotixoma-la.

¹⁵ K'oaá xan-nò xi ngui okixi, jña xi mìkì kòkjeiín-la koni jngò ndí ìxti nga skoé kjondaà-la Nainá nga jè kotixoma-la, mìkì kjoahas'en-jìin ñánda tíhotixoma Nainá.

¹⁶ Jesús tsa'nga jña ndí ìxti; tsohósòn-la tsja; ìkjoàn kisìjèt'aà-la Nainá nga kàtasìchikon-t'in jña ìxti.

Xita xi 'ñó kjìn tsojmì tjin-la

(Mateo 19:16-30; Lucas 18:18-30)

¹⁷ K'e nga tífi ìjngò k'a-ne Jesús, tsangachikon jngò xita xi ijchò tjingui-la. Tsasìxkó'nchit'aà-la; ìkjoàn kiskònangui-la; kitsò-la:

—Ji Maestro ndaà, ¿mé xi s'iaàn nga s'e-na kjoabinachon nita kjé-ne?

¹⁸ Jesús kitsò-la:

—¿Mé-ne nga xita ndaà 'mì-ná? Nijngò xita xi ndaà, ta jngò jè Nainá xi ndaà.

¹⁹ Jyeé tjiìn-lè kó tsò kjotixoma: “Kì xita nì'in; kì kjoa chijngui 'nì; kì chijé 'nì; kì 'én ndiso nokjoi ìt'aà ts'e xita xi kj'eí; kì chonachan-jèn; chaxkoín na'èn-lè ko nea-lè.”

²⁰ Jè xita nchiná kitsò:

—Maestro, ngats'ìi kjotixoma koi, jyeé kisìkitasoàn kó nga sa chítia.

²¹ Jesús tsja komà-la, kiskoò'an, ìkjoàn kitsò-la:

—Ìjngò kjoa chija-lè. T'in, tatijni yije tsojmì xi tjin-lè. Ìkjoàn tika'bí-la xita ima mé-ne nga s'e-lè kjoa machikon-t'in ján ngajmì. Ìkjoàn nchrobátjingui-ná.

²² Jè xita nchiná, tà kjòbaá-la nga kii'nchré 'én koi. Tà ba kis'e-la nga kii, koi xó nga 'ñó kjìn tsojmì tjin-la.

²³ Jesús kiskoòtsejèn tjingui-la, kitsò-la xita xi kota'yàt'aà-la:

—'Íin jchán koma-la jña xita nchiná nga kjoahas'en-jìin ñánda tíhotixoma Nainá.

²⁴ Jña xita xi kota'yàt'aà-la Jesús, k'e nga kii'nchré 'én koi, tà k'oaá komà-la. Tanga jè Jesús ìjngò k'a kitsò-la:

—Jño xi ki'ndí-na xan-nò, 'ñó 'ín koma-la jña xita xi ton-la 'nót'aà takòn nga kjoahas'en-jìin kjotixoma-la Nainá.

²⁵ Ìsaá mì 'in koma-la jngò cho camello nga kjoahas'en xkon nindoò xi tjahaña-ne nikje, mì k'oaá-ne koni jngò xita nchiná xi 'ñó tjin-la tsojmì nga koma kjoahas'en-jìin ñánda tíhotixoma Nainá.

²⁶ Jña xita xi kota'yàt'aà-la Jesús, isaá ndaà kjòxkón-la. Ìkjoàn kiskònangui-la xíkjin, kitsò:

—¿Yá-né xi kítjokàjìin kjo'in?

²⁷ Jesús kiskoò'an, kitsò:

—Jñà x̄it̄a mìkìi k̄oma-la; t̄anga Nainá k̄omaá-la; it'aà ts'e Nainá n̄it̄a mé k̄joa-ne, k̄oma yijéé-la.

²⁸ K̄iichja Pedro, kitsò:

—N̄a'èn, ngajen, jyeé kinìkítsajna yije-jen ngats'iì tsojmì xi t̄jín-najen nga t̄jaàt̄jingui-lèjen.

²⁹ Jesús kitsò:

—Okixi xi xan-nò, n̄it̄a yá x̄it̄a-ne xi kisikíjna ni'ya-la, 'ndse, ndichja, nea-la, na'èn-la, chjoón-la, ixti-la k̄o nangui-la xi k̄joa it'aà ts'an k̄o it'aà ts'e 'én ndaà-la Nainá

³⁰ i isò'nde, isaá tsato tjoé ngajo-la xi ni'ya 'mì, xi 'ndse, ndichja, nea-la, ixti-la k̄o nangui-la, nas'ín k̄j̄it̄jinguikeè x̄it̄a kondra. T̄anga jè isò'nde xi sa nchrobá, s'eé-la k̄joabinachon n̄it̄a kjé-ne.

³¹ K̄j̄in x̄it̄a xi t̄ítsajna ítjòn i'nde, k'e nga k̄oma iskan jñà k̄ítsajna t̄jingui. K̄o xi t̄ítsajna t̄jingui i'nde k'e nga k̄oma iskan jñà k̄ítsajna ítjòn.

K'oaá s'ín tsibénojmí Jesús k̄joabiyaà-la xi ma-ne jàn k'a

(Mateo 20:17-19; Lucas 18:31-34)

³² Jesús, tsó'ba ítjòn-la x̄it̄a xi kota'yàt'aà-la nga nchifi ján naxandá Jerusalén. Jñà x̄it̄a xi t̄jingui tà nchimaxkón-la nga nchifi. K'eé k̄iichjat'aà-xìn ìjngoò k'a-la x̄it̄a-la xi tejò ma-ne, ìkjoàn tsibénojmí ìjngoò k'a-la jè k̄joa xi komàt'in. Kitsò-la:

³³ —I'nde ján t̄itsahonguiá naxandá Jerusalén; 'an xi Ki'ndí-la X̄it̄a xan-la yijo-na, yaá tsobà'ñó-na x̄it̄a sk̄o-la n̄o'mi k̄o x̄it̄a xi okóya k̄jotíxoma-la Nainá xi kiskìi Moisés nga koi'nè-na k̄joabiyaà, ìkjoàn s̄ìngatsja-na jñà xi mìtsà x̄it̄a judío

³⁴ nga s̄iisobà-na, k̄iichrájno-na, kojà-na, ìkjoàn s̄iik'en-na. T̄anga k'e k̄j̄ichò jàn nachrjein k̄joaáyaá-na.

Kjondaà xi 'in t̄jín xi kisijé Jacobo k̄o Juan

(Mateo 20:20-28)

³⁵ Jacobo k̄o Juan ixti-la Zebedeo ijchò kinchat'aà-la Jesús, kitsò-la:

—Maestro, mejèn-najen nga k'oi-najen jè kjondaà xi sijé-lèjen.

³⁶ Jesús kiskònangui-la, kitsò-la:

—¿Mé-ne xi mejèn-nò nga tsjaà-nò?

³⁷ Jacobo k̄o Juan kitsò:

—K'e nga jeya kijni nga t̄ihotíxomai, k̄i'nde-najen nga ya kitsat'aà-lèjen, jngoò k̄j̄inat'aà-lè kixi-lè koa jngoò k̄j̄inat'aà-lè ngaskón-lè.

³⁸ K'eé kitsò Jesús:

—Mìkìi 'yaà mé xi n̄jé. ¿A k̄ichik̄joaá-nò nga s'ioya jè ch̄itsín ts'e k̄j̄o'in xi 'an skiaa, a ch̄ik̄joa-nò nga k̄oma bautizar ts'e k̄j̄o'in xi 'an tímat'ian?

³⁹ Kitsò jñà x̄it̄a koi:

—K̄ichik̄joaá-najen.

Kitsò-la Jesús:

—Jñò, k̄omaá s'ioo koa k̄oma-nò bautizar it'aà ts'e k̄j̄o'in xi 'an kotojñà,

⁴⁰ t̄anga xi 'an tsjaà-nò nga ya k̄ítsajnat'aà-ná ya kixi-na k̄o ngaskón-na mìtsà 'an oko-na nga tsjaà-nò. Jñà i'nde koi, jñà tjoé-la x̄it̄a xi Nainá t̄ítsajnandaà-la nga tsjá-la.

⁴¹ K'e nga k̄i'chré jñà x̄it̄a-la Jesús xi i'nga xi te ma-ne, k̄j̄ti-la koni kitsò Jacobo k̄o Juan.

⁴² T̄anga jè Jesús k̄iichja-la, kitsò-la:

—Jye t̄j̄iín-nò nga jñà x̄it̄a sk̄o-la naxandá xi 'ya-la nga k̄jotíxoma t̄j̄iya tsja, nangui síkítsajna x̄it̄a-la xi jñà otíxoma-la. T̄ikoáá jñà x̄it̄a xi 'ñó jeya t̄ítsajna, beètoòn-né jñà xi x̄it̄a ima.

⁴³ T̄anga jñò mìkìi k'oas'ín s'een; tsà jngoò x̄it̄a x̄inguiòo mejèn-la 'nga k̄ijna, jè xi k̄átasíxá-la x̄it̄a xi i'nga.

⁴⁴ Koa jè xi mejèn-la kίjna ítjòn, chi'nda-la kàtama ngats'ìi xita xi i'nga.

⁴⁵ Ndaà tsà 'an xi Ki'ndí-la Xita xan-la yijo-na, mìtsà koi xá j'i-na nga 'an kos'in-na; tà saá 'an siixá-la xita xi i'nga, kò tsjaà yijo-na kò inima-na nga kjìn xita kítsajnadejí kjoa ts'e jé-la.

K'e nga kisindaà-ne Jesús jè xita xi mìkii tsejèn-la xi 'mì Bartimeo
(Mateo 20:29-34; Lucas 18:35-43)

⁴⁶ K'e nga ijchò naxandá Jericó nga jye nchibitjojìn najnchra, Jesús tjikò xita xi kota'yàt'aà-la kò kjìn xita tjingui-isa-la. Ya indii ndiyá tjna jngòò xita ima xi mìkii tsejèn-la xi 'mì Bartimeo, ti-la ma xita xi 'mì Timeo, nga tísíjé kjotjò tsojmi.

⁴⁷ Jè xita xi mìkii tsejèn-la k'e nga kii'nchré nga jè Jesús xi Nazaret ts'e tífi, nitoón kiichja-la, kitsò-la:

—jJesús, nga ya nchrobàt'aà-ne tje-la xitaxá ítjòn David [nga ji tjna ngajo-la], jchahimatakòn-ná!

⁴⁸ Kjìn ma xita xi tsohótikò Bartimeo nga jyò kàtjna. Tanga jè Bartimeo isaá 'ñó kiichja. Kitsò:

—ji xi ya nchrobàt'aà-ne tje-la xitaxá ítjòn David, jchahimatakòn-ná!

⁴⁹ K'ée tsasíjna Jesús, kitsò:

—Tínókjoa-là.

Ikjoàn kinokjoà-la jè xita xi mìkii tsejèn-la. Kitsò-la:

—'Nó te-la takòin, tísítjiiin, chja-lè Jesús.

⁵⁰ Jè xita xi mìkii tsejèn-la kisikatjen inchrokisòn-la, nitoón tsasítjen, kii kasit'aà-la ñánda síjna Jesús.

⁵¹ Jesús kiskònangui-la, kitsò-la:

—¿Mé xi mejèn-lè nga sikkò-lè?

Jè xita xi mìkii tsejèn-la kitsò:

—Maestro, mejèn-na nga kàtatsejèn-na.

⁵² Jesús kitsò-la:

—T'in-ne; koi-né nga mokjeiín-lè it'aà ts'an nga kòmandaà-ne.

Jè xita xi mìkii tsejèn-la nitoón kjòtsejèn-la. Kii'tjingui-la koni s'ín ndiyá tífi Jesús.

11

K'e nga jè Jesús jahas'en-jiin naxandá Jerusalén
(Mateo 21:1-11; Lucas 19:28-40; Juan 12:12-19)

¹ K'e nga jye kjomeè bijchó chraña-la naxandá Jerusalén, jña naxandá xi 'mì Betfagé kò Betania, ya it'aà nindoò Yá Olivo, Jesús kisikasén jò xita xi kota'yàt'aà-la;

² kitsò-la:

—Tanguió ján ndí naxandá itsé xi kijnat'aà ján. K'e nga kijchoò yaá síjnat'aà'ñó jngòò búrró ki'ndí xi nì saá yá bijnasòn-la. Chíjnda'ñó, nchrohókoo.

³ Tsà yá xi kjònangui-nò, tsà kitsò-nò: “¿Mé-ne konikò-nò búrró?”, tìn-là: “Jé xó Na'èn-ná Jesús kochjeén-la, koa nitoón xó sikkasén-ne.”

⁴ Kii jña xita xi kota'yàt'aà-la. K'e nga ijchò jngòò ni'ya, yaá tít'aà'ñó jngòò búrró jè xotjoa-la ni'ya ya iya ndiyá. K'e nga kiskíjnda'ñó.

⁵ Jña xita xi ya títsajna kitsò-la:

—¿Mé s'een-nò, mé-ne chíjnda'ñó-nò ndí búrró?

⁶ K'oaá s'ín kitsò-la koni s'ín tsibénojmi-la Jesús; kitsjaà'nde-la nga kiikò.

⁷ K'e nga ijchòkò ñánda tjna Jesús jè ndí búrró, jña nikje ts'e xita kisikjeén nga tsohótsa-la jè ndí búrró; ikjoàn tsibijnasòn-la Jesús.

⁸ Kjìn xita tsohójngòò nikje-la ya iya ndiyá. Jña xita xi i'nga, xka chrja-la yá tsohójngòò xi tsate ya jjiin ijjá.

⁹ Jñà x̄it̄a xi t̄it̄jòn k̄o xi t̄j̄ngui 'ñó ch̄ja, nga kitsò:

— ¡Mé tà ndaà-là jè xi nchrobá ngajo-là Nainá, jè xi otíxoma-ná!

¹⁰ ¡Mé tà ndaà-ne nga jè kotíxoma ngajo-là x̄it̄a jchínga-ná David! ¡Kàtas'e kjoajeya ján ngajmii!

¹¹ Jesús jahas'en-jìin ya naxandá Jerusalén. Ikjoàn jahas'en nditsin ingo ítjòn. Xk̄i xi ján kiskoòtsejèn. Ikjoàn itjo-ne; kiìk̄o x̄it̄a-là xi tejò ma-ne ján naxandá Betania, koi-né nga jye kjòhoxòn.

*K'e nga jè Jesús kitsò-là jngoò yá-là toò iko nga ch'o kàtama-la
(Mateo 21:18-19)*

¹² K'e koma nchijòn nga itjo ìjngoò k'a-ne ján naxandá Betania, Jesús kjòhoxò-là.

¹³ K'ée kijtseè jngoò yá-là toò iko xi kjiin síjna. Kii katsejèn-là tsà yijà-là toò, tanga nimé tjín-là; tà xkaá tjín-là. Mìtsà naxhrjein-là toò.

¹⁴ K'ée kitsò-là jè yá toò iko:

— Nì t̄i yá xi skine-ne toò-lè.

X̄it̄a xi kota'yàt'aà-là Jesús kiì'nchré 'én koi.

*K'e nga tsachrje ingo ítjòn jñà x̄it̄a xi otíjna tsojmi
(Mateo 21:12-17; Lucas 19:45-48; Juan 2:13-22)*

¹⁵ K'e nga ijchò naxandá Jerusalén, Jesús jahas'en ya nditsin ingo ítjòn; ikjoàn tsibíts'ia nga tsachrje jñà x̄it̄a xi tsojmi otíjna k̄o xi otse tsojmi. Kisihitíkjá ím̄ixa-là jñà x̄it̄a xi sík̄jat̄ija t̄on t̄ikoáá kisihitíkjá íxile-là x̄it̄a xi otíjna nise paloma.

¹⁶ Mì t̄i kii kitsjaà'nde-là x̄it̄a xi tsojmi otíjna nga ch'á fahatoyako ingo ítjòn.

¹⁷ Ikjoàn tsakóya-là x̄it̄a. Kitsò-là:

— Jè Xojon-là Nainá tsò-né: “Ni'ya-na, ni'ya ts'e ochikoón k'oín nga i kichjat'aà-na ngats'ìi x̄it̄a naxandá xi tjín kóhok̄ji isò'nde.” Tanga jñò, nguijo-là x̄it̄a chijé titsa'nè.

¹⁸ K'e nga kiì'nchré jñà x̄it̄a sko-là no'miù k̄o x̄it̄a xi okóya kjotíxoma-là Nainá xi kiskii Moisés, tsohótsji'nde-là kós'ín s̄iik̄o nga s̄iik'én Jesús nga tsakjón-là. Koií kjoa-là nga jñà kjotíxoma xi okóya Jesús ndaá tsò, k̄o jñà x̄it̄a xi 'nchré-là tà k'oaá ma-là 'én xi okóya.

¹⁹ K'e nga jye kòjñò, Jesús k̄o x̄it̄a xi kota'yàt'aà-là itjojiin naxandá Jerusalén, xìn kii.

*Mé xi komà-là jè yá toò iko xi tsjìn-là toò
(Mateo 21:20-22)*

²⁰ K'e nga tajñòya nga koma nchijòn, ja ìjngoò k'a ñánda síjna yá toò iko, kijtseè nga jye kixì yá kóhok̄ji skanda i'ma-là.

²¹ Jè Pedro tsibítsjeèn-là koni kitsò Jesús. K'ée kitsò-là:

— Maestro, chítsejèn-là jè yá toò iko xi 'on kinokjoàkoji ngojña. Jye kixì.

²² Jesús kiìchja; kitsò:

— Kàtakjeiín-nò it'aà ts'e Nainá.

²³ Okixií xi xan-nò, tsà yá xi k̄itso-là jè nindoò jè: “T̄isixìn; ján t̄ikatjen-jìin yijo-lè ján jjiin ndáchikon.” Tsà mìtsà tà jò tjín-là k'e nga ok̄itso nga t̄j̄ngoò in̄ima-là nga mokjeiín-là, k'oaá s'ín koma.

²⁴ Koi k̄os'ín xan-nò kóhótjión, k'e nga k̄itsi'ba-là Nainá, k'oaá s'ín kàtakjeiín-nò koni tsà jye kitjoé-nò mé-ne nga tjoé-nò.

²⁵ K'e nga kinókjoat'aà-là Nainá tijchàat'aà-là jé-là xinguiqo mé-ne jè Na'èn-nò xi t̄jna it'aà ngajmii s̄ijchàat'aà-nò jé-nò xi tsajòn.

²⁶ Tanga tsà mìkii s̄ijchàat'aà-là jé-là x̄it̄a xinguiqo t̄ikoá mìkii s̄ijchàat'aà-nò Na'èn-ná xi t̄jna ngajmii.

*Kjotíxoma-la Jesús
(Mateo 21:23-27; Lucas 20:1-8)*

²⁷ Jesús ijchò ìjngoò k'a Jerusalén. K'e nga tsó'ba ya nditsin ingo ítòn, j'ì kinchat'aà-la jñà xità sko-la nò'miì, kò xità xi okóya kjotíxoma-la Nainá xi kiskù Moisés, kò xità jchínga;

²⁸ kiskònangui-la, kitsò-la:

—¿Mé kjotíxoma xi tsjá'nde-lè koni s'ín 'nì? ¿Yá xi kitsjaà-lè kjotíxoma kjoa xi 'nì?

²⁹ Jesús kitsò-la:

—Tìkoaá 'an jngoò kjoa skònangui-nò. Kot'ìn-ná, koa 'an, k'oaá xán-nò yá xi kitsjaà-na kjotíxoma koni s'ín s'iaàn.

³⁰ ¿Yá xi kitsjaà-la kjotíxoma Juan nga kis'iìn bautizar xità? ¿A Nainá-né xi tíjna ngajmiì, o xi tà xità-né? Kot'ìn-ná.

³¹ Jñà xità koi, k'eé tsajoóya-ne, kitsò-la xíkjin:

—Tsà kixoán: “Nainá kitsjaà-la kjotíxoma”, kitsò-né: “¿Mé-ne mìkì kòkjeiín-nò it'aà ts'e?”

³² Mì-la kù koma kixoán: “It'aà ts'e xità-né.”

Nga jñà xità naxandá tsakjón-la, koi-né nga jñà xità k'oaá tsò nga jè Juan, nguì kjoa kixi-né nga jè xi kùichja ngajo-la Nainá.

³³ K'eé kùichja, kitsò-la Jesús:

—Mìkì 'ya-jen.

Jè Jesús kitsò-la:

—Tìkoaá 'an mìkì k'oa xán-nò yá xi kitsjaà-na kjotíxoma koni s'ín s'iaàn.

12

Kjoa mangásòn ts'e xità xi tsibítje toò uva

(Mateo 21:33-46; Lucas 20:9-19)

¹ Tsibíts'ia Jesús nga tsibénojmiya kjoa xi mangásòn. Kitsò:

—Jngoò xità tsibítje toò uva, tsibíndi-la ínchibá, ìkjoàn tsibíndaà jngoò i'nde ñánda tsi'ñóngui nandá-la toò uva. Tìkoa tsibíndaà jngoò torre xi síkinda yije kóhotjín. Ìkjoàn kisikíña-la nangui xità xi kj'eíí nga kisixásòn. Ìkjoàn kù jè nei-la nangui ñánda i'nde kjiìn.

² K'e nga ijchò nachrjein-la nga kòjchá toò uva, jè nei-la nangui kisikasén jngoò xità ch'i'nda-la nga kisijé-la xi jè tjoé chiba-la ts'e tsojmì xi kòjchá.

³ Tanga jñà xità xi síxásòn nangui kitsobà'ño koa kiskaàn-kò, tà kisikasén tiyaá-ne.

⁴ Jè nei-la nangui kisikasén ìjngoò xità ch'i'nda-la. Tìkoaá tà ndajo tsibínè, tsate sko, kisiki'on kò ch'o kisikò.

⁵ Jè nei-la nangui ìjngoò kisikasén xità ch'i'nda-la. Tìkoaá kisik'en-né. Kjìn xità-la kisikasén-isa, tanga tjín xi kiskaàn-kò, koa tjín xi kisik'en.

⁶ Kò jè nei-la nangui tà jngoò xità-la tíjna-isa; tà jè ki'ndí-la xi 'ño matsjakeè kisikasén, kitsò: “Skoexkón-la ki'ndí-na.”

⁷ Tanga jñà xità xi síxájin nangui, tsajoóya-ne, kitsò-la xíkjin: “Jè jèe xi tjoé kjotjò-la i'nde, s'ik'eén, tsaján koma i'nde.”

⁸ Kitsobà'ño, kisik'en, ìkjoàn kisikatjen ján ijton nangui ñánda títje toò uva.

⁹ Jñò, ¿kó bixón? K'e nga kjoíí nei-la nangui, ¿mé xi s'ìkò jñà xità koi? S'ìk'en-né; kj'eíí xitàá s'ìngatsja jè nangui ñánda tjín toò uva.

¹⁰ ¿A kj'eè bixkejñoò Xojon-la Nainá? Tsò-né:

Jè ndajo xi tsachrjekàngui chjinechrjó nga sa ítòn,

jè-né xi komà ndajo tàts'en chrjó-la ni'ya;

¹¹ K'oaá s'ín kis'iìn Nainá. Jñà, tà maxkón-ná.

¹² Jñà xità sko-la nò'miì, kò xità xi okóya kjotíxoma-la Nainá kò xità jchínga mejèn kitsobà'ño Jesús nga kiskaàya-la jè kjoa xi mangásòn xi tsibénojmi nga kondra ts'e-né, tanga jñà kitsakjòn-la xità naxandá; kisikíjna, ìkjoàn kù-ne.

Kjoa ts'e xi machjítjì tsojmì

(Mateo 22:15-22; Lucas 20:20-26)

13 Kisikasén i'nga-la Jesús xita Fariseo ko xita ts'e Herodes nga mejèn-la ótsji'nde-la kós'in sikkò nga kohòngui.

14 Xita koi, kií kitsò-la:

—Maestro, 'ya-nájen nga 'én kixí xi nokjoi; miki 'nì kindà koni tsò-lè xita; ko mìtsà jè chitsejèn-jnoi kó kjoàn xita; k'oaá s'in okoòyi ndiyá-la Nainá koni s'in tjin xi kjoa kixi. ¿A ndaà tjin nga kichjiti-jen tsojmì it'aà ts'e xitaxá ítjòn ts'e Roma, o xi majìn-né? ¿A kichji-nájen a xi miki kichji-jen?

15 Jesús jye beè nga jò tjin inima-la; kitsò-la:

—¿Mé-ne nga chonachan-ná? Nchrohókò jngoò-ná ton nga skoeè kó kji.

16 K'ée kiikò jngoò-la ton. Jesús kitsò-la:

—¿Yá ts'e isén jè ko jè 'in xi tjit'aà?

Kitsò-la:

—Ts'ée César, xitaxá ítjòn ts'e Roma.

17 K'ée kitsò Jesús:

—Tji-là César xi ts'e César koa tji-là Nainá xi ts'e Nainá.

Tà k'oaá koma-la nga ki'nchré koni kitsò Jesús.

Kjoa ts'e nga faáya-la mik'en

(Mateo 22:23-33; Lucas 20:27-40)

18 Jñà xita Saduceo ijchòkon Jesús. Jñà xita koi miki mokjeiin-la nga faáya-la xi jye k'en. Kiskònangui-la, kitsò-la:

19 —Maestro, jè Moisés, k'oaá s'in kiskii: Tsà jngoò xita xi kiyá 'ndse, tsà tsjin-la ixti k'e nga kiyá, jè chjoón-la, tije-ne 'ndse kixan-ko jngoò k'a-ne mé-ne nga s'e-la ixti xi tje ts'e 'ndse.

20 Kis'e xó jngoò k'a xita xi itoò komà 'ndse. Jè xi síjna ítjòn, kis'e xó-la chjoón; tanga k'e nga k'en, miki kis'e-la ixti.

21 Jè xi ma jò-ne chixàn-ko chjoón ka'àn-la 'ndse. Tikoá jè k'en. Miki kis'e-la ixti. K'oaá ti komà jè xi ma jàn-ne.

22 Ngàsòn komà nga itoò. Nijngoò xi kis'e-la ixti. Nga jye it'aà-ne k'en jè chjoón.

23 K'e nga tsà kjoáya-la mik'en, nga itoò 'ndse, ¿yá-né xi chjoón-la koma? Nga jñà tsibìtsajnakò nga itoò 'ndse.

24 Kisikáti-ne 'én Jesús, kitsò-la:

—Jñò, koi maskáya-nò nga miki 'yaà kó s'in tíchja Xojon-la Nainá ko nga'ño xi tjin-la Nainá.

25 K'e nga kjoáya-la mik'en, íchjín, íchjá mì ti ki kixan-ne. K'oaá s'in s'e koni jñà àkjale xi títsajna ngajmii.

26 Jè kjoa ts'e mik'en nga kjoáya-la, ¿a kj'eè bìxkejñoò xojon-la Moisés ya ñánda tíchja ts'e yá na'yá xi títi? Nainá kitsò-la Moisés: “An-ná xi Nainá tsò-na Abraham, Isaac, ko Jacob.”

27 Jñà xi jye k'en, mìtsà Nainá tsò-la xi Nainá; tà jñà xi títsajnakon xi Nainá tsò-la! Jñò, 'ño maskáya-nò.

Kjotixoma-la Nainá xi tjina ítjòn

(Mateo 22:34-40)

28 Jngoò xita xi okóya kjotixoma-la Nainá xi kiskii Moisés ki'nchré-la Jesús nga ndaà kiichja; k'e nga nchijoókjoò ijchò kasit'aà chraña-la, ikjoàn kiskònangui-la, kitsò-la:

—¿Ná-laá kjotixoma-la Nainá xi tjina ítjòn?

29 Kiichja Jesús, kitsò-la:

—Jè kjotixoma xi tjina ítjòn tsò-né: “Tiná'yaà xita Israel, jè Nainá xi Na'èn-ná, ta jè ta jngoò-né xi otixoma-ná.

³⁰ Tìtsjachi Na'èn-ná xi Nainá 'mì-la, nga kò inìma-lè kò yijo-lè kò kjohítsjeèn-lè kò nga'ńó-lè.”

³¹ Jè xi ma-ne jò: “Tìtsjachi xìta xinguii koni tsà tì yijo tsiji-ne.” Mì tì tsjìn-ne kjotíxoma xi ìsa xkón tjin.

³² Jè xìta xi okóya kjotíxoma-la Nainá kitsò:

—Ndaà tjin, Maestro. Okixi-né koni s'ín nokjoi. Jngoò ma-ne Nainá kò mì tì yá tjin-ne xi kj'eí.

³³ Ìsa chjí-la nga kò inìma-ná jchaxkoán Nainá, kò kjohítsjeèn-ná kò nga'ńó-ná kò nga jchaxkoán xinguiáá koni tsà yijo-ná. Ìsaá chjí-la koni ngats'ii cho xi tìsòn ímìxa tsjeè-la Nainá, kjotjò xi tsjá jña xìta.

³⁴ Jesús k'e nga kijtseè nga ndaà kiichja jè xìta xi okóya kjotíxoma-la Nainá, kitsò-la:

—Mìtsà kjiin tijnì it'aà ts'e kjondaà xi tjin-la jña xìta xi Nainá otíxoma-la.

Mì tì yá xi kjò'ńó-ne ikon nga kiskònangui-ìsa-la.

Ñánda kitjen-la Cristo [xìta xi xó kisikasén-ne Nainá]

(Mateo 22:41-46; Lucas 20:41-44)

³⁵ Jesús k'e nga tíhokóya ya nditsin ingo ítjòn, kiskònangui-la, kitsò-la:

—¿Mé-ne kòtsò-ne jña xìta xi okóya kjotíxoma-la Nainá xi kiskii Moisés nga jè xi Cristo, [xìta xi xó sikkasén-ne Nainá], nga yaá kjinchrobàt'aà-ne tje-la xitaxá ítjòn David?

³⁶ Tjje-ne David k'e nga kiichja nga kò nga'ńó-la Inìma Tsjeè-la Nainá, kitsò-né: Jè Nainá kitsò-la jè xi Nei-na:

“Tijnat'aà-ná i kixi-na

skanda k'e nga sikkítsajnanguia ndsokoi

jña xi kondra-lè nga 'an jye kisikijne-la.”

³⁷ Jè David, tsà Nainá kitsò-la Cristo, [xìta xi xó sikkasén-ne Nainá], ¿kó s'ín tjin-ne nga tje-la ma-ne David?

Ngats'ii xìta xi kjin ma-ne, tsja ma-la nga 'nchré-la Jesús koni s'ín okóya.

K'e nga jè Jesús tsohojét'in jña xìta xi okóya kjotíxoma-la Nainá xi kiskii Moisés

(Mateo 23:1-36; Lucas 11:37-54; 20:45-47)

³⁸ Jesús k'oaá s'ín tsakóya-la xìta. Kitsò-la:

—Tikindaá yijo-nò it'aà ts'e xìta xi okóya kjotíxoma-la Nainá xi kiskii Moisés. Sasén-la nga nikje ndojò ókjá. Tikoáá sasén-la nga skoexkón xìta xi kj'eí, ndaà sikkat'aà ya nditsin.

³⁹ Tikoáá jña ótsji íxile xi jncha ítjòn ya ni'ya ingo sinagoga, kò mejèn-la nga jña kítsat'aà ítjòn ímìxa k'e nga kjèn xìta ñánda tjin s'eí.

⁴⁰ Koá faá'an ni'ya-la xi tjin-la íchjín ka'àn xi jye k'en x'in-la. K'e nga chjat'aà-la Nainá 'ńó ndajo fikò ochikon nga mejèn-la nga bìtsajna'ma nga mì jcha-la mé kjoá xi s'ín. Jña xìta koi ìsaá tse kjo'in s'e-la.

Ton xi kitsjaà kjotjò chjoón ka'àn xi 'ńó ima

(Lucas 21:1-4)

⁴¹ Jesús tsibijna ya kixi-la ñánda tjna kaxa xi sinchá ton kjotjò-la Nainá. Tíkotsejèn-la xìta naxandá nga bìtsajna ton kjotjò-la Nainá. Kjìn xìta nchiná xi tse ton bìtsajna.

⁴² Ijchò jngoò chjoón ka'àn xi 'ńó ima. Jò ndí ton jtobá tsibijna xi chiba chjí-la.

⁴³ Jesús kiichja-la xìta xi kota'yàt'aà-la, kitsò-la:

—K'oaá xan-nò xi nguì okixi, jè chjoón ka'àn xi 'ńó ima, jè xi ìsa tse ton kòbìjna mì k'oaá-ne koni jña xìta xi i'nga.

⁴⁴ Tà jè tsjá xi ningui-la tanga jè ndí chjoón ima, nas'ín nimé tjin-la, jngoò k'a kàtsjá yije ngats'ii ndí ton xi tjna-la xi tísichá-ne yijo-la.

13

K'e nga jè Jesús tsibénojmi nga kixoña ingo ítjòn
(Mateo 24:1-2; Lucas 21:5-6)

¹ K'e nga itjo-ne nditsin ingo ítjòn, Jesús, jngoò xita xi kota'yàt'aà-la kitsò-la:
—Maestro, chítsejèn-la mé tà ndaà kjoàn ni'ya ko ndajo-la.

² Kitsò Jesús:
—Chítsejèn-la ngats'iì ni'ya koi xi iì kjoàn. Nii ti jngoò ndajo siyijòsòn-la xíkjín. Kixoña yije-né kóhotjín.

Mé seña xi s'e k'e nga nchrohómachraña nga kjoehet'aà isò'nde
(Mateo 24:3-28; Lucas 21:7-24; 17:22-24)

³ Jesús, k'e nga tíjna ya nindoò Yá Olivo ya kixi-la Ingo ítjòn ts'e Jerusalén, jè Pedro, Jacobo, Juan ko Andrés, ijchò kinchat'aà-la Jesús, kiskònanguit'aàxìn-la kitsò-la:

⁴ —Koatìn-nájen, ¿mé nachrjein-ne nga okoma kjoa koi? ¿Mé seña xi s'e k'e nga jye mejèn kitasòn yije kjoa koi?

⁵ Kiichja Jesús, kitsò-la:

—Tikindaa yijo-nò nga mì yá xita xi skónachan-nò.

⁶ Kjìn xita kjoí xi 'ín ts'an siikjeén; kitso: “An-ná xi Cristo, [nga 'aán kisikasén-na Nainá].” Ko kjìn xita skónachan-la.

⁷ Jñò, k'e nga kiná'ya kjoa ts'e kjojchán nga xki xi ján i'nde tjín, kì tsakjoòn-jèn. Xó k'oaá koma-ne, tanga kj'eè tsà isò'nde tífehet'aà.

⁸ Naxandá skaàn-kjoò xi kj'eí naxandá. Koá xitaxá kojits'ia nga skaàn-kjoò ko xitaxá xi kj'eí naxandá. Xki xi ján k'oa ch'ón. S'e kjinchrá. S'e kjoasiì. Jñà kjoa koi, tà jè xi sa tímats'ia ko kjo'in.

⁹ 'Ndaà tikindaa yijo-nò nga yaá skinìt'aà-nò nguixkon xitaxá. Siki'oón-nó nga skaàn-ko-nò xita ya ni'ya ingo sinagoga. Kjiko-nò nguixkon xitaxá gobernador ko xitaxá ítjòn, tà koií kjoa-la it'aà ts'an. K'oaá s'ín koma kinókjoa-là 'én xi ts'an.

¹⁰ Mochjeén-nè nga ítjòn kobísòn 'én ndaà-la Nainá xi kjoa ts'e Cristo nga tíjtsa isò'nde.

¹¹ K'e kijchò nguixkon xitaxá, kì makájno-nò kós'ín kinókjoaa. Kì nikitsjeèn-jèn. Nga tik'eé-ne, Nainá tsjá-nò 'én xi kinókjoaa. Nga mìtsà jñò xi kinókjoaa; jè Inima Tsjeè-la Nainá xi kichja ngajo-nò.

¹² Tjè-ne 'ndse siingatsja 'ndse xita nga siik'en. Jè na'èn-la siingatsja ki'ndí-la nga siik'en xita. Jñà ixti-la siingatsja na'èn-la nga kiyá.

¹³ Ngats'iì xita isò'nde kojitikeé-nò xi kjoa ts'an; tanga jè xi kichikjoa-la skanda k'e nga kjoehet'aà-ne kjoa, jè xi kitjokajìin kjo'in.

¹⁴ K'e nga jchaa nga 'ñó ch'o tíma ya i'nde Tsjeè-la Nainá ñánda mìkì ok'in-la, [koni s'ín kiskii Daniel xita xi kiichja ngajo-la Nainá]. (Kátasijiin-la jñà xita xi bíkke xojon jé.) K'e nga okoma kjoa koi, jñà xita xi títsajna Judea, kátanga, kàtji ñánda nindoò choòn.

¹⁵ Jè xi tíjnasò'nga ni'ya-la, kì ti kii nchrobájen-ne, kì ti kii fahas'en-ne ni'ya-la tsà mé xi mejèn-la nga skoé.

¹⁶ Jè xi tíxájiin nangui-la kì ti kii nchrobá-ne nga nchrohókjá nikje-la.

¹⁷ jima xó-ne jñà íchjín xi ki'ndí 'ya ko xi ixti xó nchisíkaki jñà nachrjein koi!

¹⁸ Tjjet'aà-la Nainá nga mì k'eé okoma k'e nga nachrjein-la chon 'nchán.

¹⁹ K'e nga jè nachrjein nga okoma, 'ñó tse kjo'in s'e, kj'eè ñá oma skanda tjen-ne tsibíndaà isò'nde Nainá koá mì ti kii okoma-ne nga koma iskan.

²⁰ Tsà mì k'oaá kitso Nainá nga isa kochiba nachrjein, nijngoò xita kitjokajìin kjo'in. Tanga koií kjoa-la jñà xita xi xó jaàjiin-ne Nainá, kochibaya nachrjein.

²¹ K'e nga tsà yá xi kitso-nò: “Chítsejèn-là, jí tíjna Cristo [xita xi xó kisikasén-ne Nainá]”, o tsà kitso-nò: “Chítsejèn-là, ján tíjna ján”, kì kii mokjeiín-nò.

²² Kjoí xita ndiso xi Cristo kitso-la yijo-la, tikoá kjoí xita xi koa ti kitso nga jña xi chja ngajo-la Nainá. K'oaá tis'in kòkò seña kò kjoókón xi ndaà tjín nga skónachan. Skanda jña xita xi jye jaàjìn Nainá mejèn skónachan-la tsà kòkjeín-la.

²³ Tikinda yijo-nò. Nga jyeé tibenojmíya yije-nò ngats'ìi kjoa xi koma iskan.

K'e nga kjoí ijngò k'a Ki'ndí-la Xita
(Mateo 24:29-35, 42-44; Lucas 21:25-36)

²⁴ 'K'e nga koma iskan nga jye koto nachrjein ts'e kjo'in, jè ts'oi kojñò-né, mì tì kii kotsjè-ne ndobá-la; tikoá jè sá mì tì kii kohiseèn-ne.

²⁵ Ni'ño xi tjín ngajmii, kixongui-né. Jña nga'ño xi tjín ngajmii kitíya yijeé-la.

²⁶ Ikjoàn skoe-na xita xi Ki'ndí-la Xita xan-la yijo-na nga kjinchrobàjñaà jjiin ifi; tseé nga'ño kò kjoajeya kjoii koaa.

²⁷ Siikasén àkjale-na nga koiìxkóya xita-na xi 'an xó jaàjìn-na nga ñijòn chrjangui-la nga títsa isò'nde kò nga títsa ngajmii.

²⁸ Chíta'yàkò jè yá-la toò iko mé xi okóya-ná; k'e nga ma kíndíya chrja-la, ikjoàn bíjts'én xka-la, tíjìn-nò nga jye nchrobá machraña chon ndobá.

²⁹ K'oaá tis'in tjín, k'e nga jcha nga k'oas'in tíma kjoa koi, kàtasijìn-nò nga 'an xi Ki'ndí-la Xita xan-la yijo-na, jyeé nìton kjoiaa, k'oaá ngaya-la koni tsà jye tjinaa chraña xotjoa-la ni'ya.

³⁰ Okixí xi xan-nò, ngats'ìi kjoa koi, k'oas'in koma k'e nga tikj'eè biyaà xita xi tjín nachrjein j'nde.

³¹ Jè ngajmii kò isò'nde kjoehet'aà-né, tanga jña 'én-na mìkii kjoehet'aà; kitasòn-né.

³² Tanga k'e nga okoma, mì yá xi tíjìn-la mé nachrjein-ne kò mé hora-ne; ni jña àkjale xi títsajna ngajmii kò ni jè Ki'ndí-la Nainá tíjìn-la; tajngò Nainá xi Na'èn-ná tíjìn-la.

³³ T'een kindá yijo-nò, títsajnakon, títsi'ba nga mìkii tíjìn-nò kjé-né nga okoma.

³⁴ K'oaá s'in t'een koni s'in chí'nda-la xita xi kjiin j'nde tífi, jè xita xi tífi síngatsja ni'ya-la xita chí'nda-la. Tsjá-la xá nga jngò jngò, tsò-la jè xi síkindá xotjoa ni'ya: "Tijni, tijnakoin."

³⁵ K'oaá s'in títsajnakoòn ngats'ioò nga mìkii 'yaà mé nachrjein kjoí-ne nei-la ni'ya. ¿A k'eé-né nga kjòhoxòn, o xi k'eé-né nga kijchò osen nìtjen, o xi k'eé-né nga skindáya kóxtí, o xi k'eé-né nga jye s'e isén?

³⁶ Kì tsjayìòfè-jèn tsà koi nachrjein-la tà nìton j'ìi-ne nei-la ni'ya.

³⁷ Koni s'in xan-nò jñò, k'oaá xan yije-la kóhotjín xita: "Títsajnakoòn."

14

Kiis'in tsajoóya-ne xita kondra-la Jesús nga tsobá'ño
(Mateo 26:1-5; Lucas 22:1-2; Juan 11:45-53)

¹ Tà jò nachrjein chija-la nga kitjo s'eí Paxkò ts'e xita judío k'e nga kjèn inchrajín xi tsjìn-la na'yo san. Jña xita sko-la no'mii kò xita xi okóya kjotíxoma-la Nainá xi kiskii Moisés tsohótsji'nde-la kós'in sikkò nga skónachan-la nga tsobá'ño Jesús, ikjoàn sikk'en.

² Tjín i'nga xita xi kitsò:

—Mì nachrjein-la s'eí sikk'eén nga mì kots'en jña xita naxandá.

Jngò chjoón xi kisikaàjno xkii jne sko Jesús
(Mateo 26:6-13; Juan 12:1-8)

³ Jesús, k'e nga tíjna ján naxandá Betania, ya ni'ya-la Simón, jngò xita xi tsindojno chrjoa yijo-la nga sa ítjòn, k'e nga tíjnat'aà ímixa, ijchò jngò chjoón xi 'ya jngò ndajo chítsín xi tíya-la xkii jne ts'e nardo, xi 'ño chíj-la. Kiskix'a ndajo chítsín, ikjoàn tsibíxteèn-jno sko Jesús jè xkii jne.

⁴ Tjín i'nga xita xi ya títsajna, kòjti-la, kitsò-la xikjín:

—¿Mé-ne kasíkits'ón-ne jè xkii jne?

⁵ Tsà kàsátjina, tsatoó-la jàn sìndò tòn denario chjì-la koa jè tòn-la koma kochjât'aà-la xita ima.

Kiichjajno-la jè chjoón xi okis'in.

⁶ Tanga kitsò Jesús:

—Kì k'oaá 'mì-là. ¿Mé-ne nìjti-là? Koni s'in kàs'in-ko-na, ndaà kàs'in.

⁷ Jñà xita ima kítsajnakò kjit'aà-nò, kò maá sìchjât'aà-là k'e nga mejèn-nò. Tanga 'an, mì i tìjnako kjit'aà-nò.

⁸ Jè chjoón jè, k'oaá s'in kàs'in koni kji ma xi kàs'in. Kàsikaajno ítjòn xkii jne yijo-na xi ts'e nga sìjñà.

⁹ Okixií xi xan-nò, nita ñánda-ne nga tíjtsa isò'nde nga kobísòn 'én ndaà-la Nainá, tikoáá kobísòn-né koni s'in kasìko-na mé-ne nga sìkítsjeèn-ne xita it'aà ts'e chjoón jè.

K'e nga jè Judas tsatjina Jesús

(Mateo 26:14-16; Lucas 22:3-6)

¹⁰ Jè Judas Iscariote xi ya itjojin-ne ts'e xita xi tejò ma-ne xi tsajmeiiko Jesús, kiikon jñà xita sko-la no'miì nga sìngatsja Jesús.

¹¹ Jñà xita sko-la no'miì, k'e nga kiì'nchré, kjòtsja-la, kitsjaà-la tso'ba nga tòn tsjá-la. Jè Judas tsohòtsji'nde-la kós'in sìngatsja Jesús.

K'e nga jè Jesús tsakjèn ko xita xi kota'yàt'aà-la jè s'eí Paxko

(Mateo 26:17-29; Lucas 22:7-23; Juan 13:21-30; 1 Corintios 11:23-26)

¹² Jè nachrjein ts'e s'eí xi mats'ia ítjòn-ne k'e nga kjèn inchrajín xi tsjìn-la na'yo san jñà xita judío, k'e nga sík'en orrè xi ts'e s'eí Paxko, jñà xita xi kota'yàt'aà-la Jesús kiskònangui-la; kitsò-la:

—¿Ñánda mejèn-lè onguíkíndaà-jen xi kichiaá ts'e s'eí Paxko?

¹³ Jesús kisikasén jò xita xi kota'yàt'aà-la ján Jerusalén, kitsò-la:

—Tanguió ján ijìin naxandá, yaá skajñoò jngoò xita xi 'yajen jngoò nisa nandá; tanguítjìngui-là.

¹⁴ Ya ñánda kjoahas'en, koatìn-là nei-la ni'ya: “K'oaá tsò Maestro: ¿Ñánda tíjna jè cuarto ñánda kókjen-koa xita xi kota'yàt'aà-na jè s'eí Paxko?”

¹⁵ Yaá kòkò jngoò-nò cuarto xi je kji xi tíjna isò'nga ni'ya. Jyeé tjíndaà tsojmì xi kochjeén. Ya tìndaà xi kichiaá.

¹⁶ Kì jñà xita xi kota'yàt'aà-la ján ijìin naxandá. K'oaá s'in kisakò-la koni s'in kitsò-la Jesús, yaá tsibíndaà tsojmì xi kòkjen kjoa ts'e s'eí Paxko.

¹⁷ K'e nga jye kòjñò, Jesús, ijchòko xita-la xi tejò ma-ne.

¹⁸ K'e nga títsajnat'aà ímìxa nga nchikjèn, Jesús kitsò-la:

—Okixií xi xan-nò, jñò, íf tíjnajìin jngoò-nò xi sìngatsja-na it'aà ts'e xita kondra-na, jngoò xi 'an tíkjèn-ko-na.

¹⁹ Jñà xita xi kota'yàt'aà-la Jesús ta kjòba-la k'e nga okitsò. K'ée jngó jngó kiskònangui-la, kitsò-la:

—¿A 'an-ná?

²⁰ Jesús kitsò:

—Jngoò xi kitjokàjìin ts'e xita-na xi tejò ma-ne jè xi tíjè-ne chrobà ts'an tísíka'nchi-ne inchrajín-la.

²¹ An xi Kì'ndí-la Xita xan-la yijo-na, k'oaá s'in komat'ian koni s'in tíchja Xojon-la Nainá. ¿Tanga ima xó-ne jè xita xi sìngatsja-na! Ìsaá-là ndaà komà tsà mìkì kits'iin xita jè.

²² K'e nga nchikjèn, Jesús kiskoé inchrajín, kiichjât'aà-la Nainá nga kisichikon-t'in, kisìxkoaya ikjoàn kitsjaà-la xita xi kota'yàt'aà-la, kitsò-la:

—Chjoé. Yijo-na né.

²³ Ikjoàn kiskoé jngoò chitsín, kitsjaà-la kjondaà Nainá; k'ée kitsjaà-la xita xi kota'yàt'aà-la, ngats'ìi xita kits'ìi vino xi tíjya chitsín.

24 Kitsò-la:

—Jè-né xī jní-na xi sīkixiya jè kjoa xit̄se xi bīndaàjìn-kò-nò. Jè jní-na xīxteèn xi kjōndaà ts'e nga kjìn xīta.

25 Okixí xi xan-nò, mì t̄i kiì skī-na vino skanda jè n̄achrjein k'e nga skiaa vino xit̄se, ján ñánda tíhotíxoma Nainá.

*'En xi kiichja Jesús nga jè Pedro kjó'mat'in
(Mateo 26:30-35; Lucas 22:31-34; Juan 13:36-38)*

26 Jesús kò xīta-la, k'e nga jye kiseè jngoò-la sò Nainá ts'e Salmo, ikjoàn kiì ján nindoò Yá Olivo.

27 Jesús kitsò-la xīta xi kota'yàt'aà-la:

—Ngats'ioò jñò, kijneí takòn-ná jè n̄it̄jen jè, nga k'oaá s'ín tíchja Xojon-la Nainá, nga tsò: “Kiyá jè paxtò koa jñà orrè tsjohoya-né.”

28 Tanga koma iskan, k'e nga kjoaáya-na, kjín ítjòn-nò ján nangui Galilea.

29 Kitsò Pedro:

—Nas'ín ngats'iì xīta-lè xi i'nga tsjeiìn takòn-lè, 'an, mìkiì tsjeiìn-takòn-lè.

30 Jesús kitsò-la:

—Okixí xi xan-lè; n̄it̄jen jé, k'e nga t̄ikj'eè kjindáya jò k'a kóxtí, ngaji, jàn k'a tsjá'mat'in-ná.

31 Jè Pedro isa 'ñó kiichja; kitsò:

—Nas'ín ya kiyáko-lè, mìkiì kójna'mat'in-lè.

Ngásòn kitsò yije xīta xi kota'yàt'aà-la xi i'nga.

*Kiì kitsò Jesús nga tsibítsi'ba ya i'nde ñánda 'mì Getsemani
(Mateo 26:36-46; Lucas 22:39-46)*

32 Kiì ján i'nde ñánda 'mì Getsemani; Jesús kitsò-la xīta xi kota'yàt'aà-la:

—T̄itsajna ijndé; 'an, Nainá kò-là kichjät'aà-la.

33 Jesús kiikò Pedro, Jacobo, kò Juan. Ikjoàn tsibítsi'ia Jesús nga ba koma-la. 'Ñó kisikájno.

34 K'eé kitsò Jesús:

—Tsí baá ma-la inīma-na koni tsà mejèn kiyá. T̄itsajna ijndé, t̄itsajnakoòn.

35 Jesús kiikjá chiba-isa. Ikjoàn tsohojna skanda it'aà nangui koa kisijét'aà-la Nainá tsà koma, kjoaáxìn-la kjo'in jè.

36 K'e nga tíchjat'aà-la Nainá, kitsò-la:

—Na'èn xi Na'èn-na xan-lè, ma yijeé-lè n̄ita mé kjoa-ne it'aà tsiji. Chjaàxìn-ná kjoa ts'e kjo'in jè, tanga mìtsà jè 'én ts'an k̄itasòn, jè k̄atitasòn 'én tsiji.

37 Ikjoàn j'ì jngoò k'a-ne ya ñánda t̄itsajna xīta-la, tanga jñà xīta-la, kjijijòfè-né. Jesús kitsò-la Pedro:

—Simón, ¿a t̄itsajnafè-né? ¿A mì kachíkjoa-lè tsà tà jngoò hora kòbijnakoin?

38 T̄itsajnakoòn, t̄ijét'aà-la Nainá mé-ne nga mì s̄iikijne-nò kjoa ts'e jé. Xi okixi, jè inīma-nò t̄ijnandaà-né tanga jè yijo-nò, indaá t̄jín, tsjìn-la nga'ñó.

39 Jesús kiì k̄itsi'ba jngoò k'a. Táko k'oaá t̄i kitsò-ne koni kitsò nga sa ítjòn.

40 K'e nga j'ì jngoò k'a-ne, jñà xīta xi kota'yàt'aà-la, táko kjijijòfè-né nga 'ñó nijñá-la. Mìkiì beè kó k̄itso-la Jesús.

41 Koma jàn k'a nga j'ì Jesús. Kitsò-la:

—¿A táko t̄itsan̄kjáya-nò kò t̄itsafè-nò? K̄atje kjoa. Jyeé ijchò hora-la, 'an xi Ki'ndí-la Xīta xan-la yijo-na, yaá kongatsja jñà xīta jé.

42 T̄is̄it̄jeen, ch̄it̄sejèn-là, t̄ikjiaán, jye nchrobá chrañà jè xi s̄iingatsja-na.

*Kiì komà k'e nga kindobà'ñó Jesús
(Mateo 26:47-56; Lucas 22:47-53; Juan 18:2-11)*

43 Tákó tìk'eé tíchja-ìsa Jesús nga ijchò Judas, xi ya itjojiìn-ne ts'e xìta-là Jesús xi tejò ma-ne. Kjin xìta tjiiko xi 'ya kichà ndojò kò yá. Xìta koi, jñà kisikasén xìta sko-là nò'miì kò xìta xi okóya kjotixoma-là Nainá xi kiskii Moisés kò xìta jchínga-là xìta judío.

44 Judas, jè xi tsatijna Jesús, ítjòn tsibíhichiya-là kós'ín kòkò-là Jesús. Kitsò-là:
—Jè xi skíne'a, jè-né xi tìndoba'ñó; ndaà tìkindaa k'e nga onguíkoo.

45 K'e nga ijchò Judas, kii ndiyá-né ñánda tíjna Jesús, kitsò-là:
—Maestro.

Ikjoàn kiskine'a.

46 Jñà xìta xi tjiiko, nitoón kitsobà'ñó Jesús.

47 Yaá tíjna jngoò xìta xi tsachrje kichà ndojò-là. Tsajá-là jè xìta chì'nda-là nò'miì ítjòn, tsatet'aà jngoò líká-là.

48 Jesús kiichja, kitsò-là jñà xìta:

—¿Mé-ne kòs'ín kof'i ndobà'ñó-ná nga kò kichà kò yá kich'à koni tsà jngoò xìta chijé?

49 Nachrjein nchijòn tijnako-nò ján ingo ítjòn nga okoòya-nò koa mìkii kindobà'ñó-ná. Koi k'oaá s'ín tíma-ne nga kítasòn 'én xi tjit'aà Xojon-là Nainá.

50 Ngats'iì xìta xi kota'yàt'aà-là Jesús tsanga-né, yaá kitsjeiìn-takòn.

51 Jngoò chíti tjingui-là xi tijnajté jngoò nikje sávana. Jñà xìta kitsobà'ñó,

52 tanga jè chíti kitsjeiìn nikje sávana-là; ikjoàn k'oa's'ín tsanga laká.

K'e nga kiiko Jesús ñánda tíjna nò'miì ítjòn

(Mateo 26:57-68; Lucas 22:54-55, 63-71; Juan 18:12-14, 19-24)

53 Jesús kiiko ñánda tíjna nò'miì ítjòn. Yaá chixoña kóhotjín xìta sko-là nò'miì, jñà xìta jchínga, kò xi okóya kjotixoma-là Nainá xi kiskii Moisés.

54 Jè Pedro, tà kjiìn tà kjiìn tsajmeètjingui-là skanda k'e nga ijchò ya nditsin ni'ya-là nò'miì ítjòn. Yaá tsibijnat'aà-là ñánda títsajna xìta chì'nda xi síkinda ingo nga títsajna'ngui.

55 Jñà xìta sko-là nò'miì kò ngats'iì xitaxá xi ts'e xìta judío tsohótsji'nde-là nga tsját'in 'én xi kondra ts'e Jesús mé-ne nga koma sikk'en-ne tanga nímé 'én kisakò-là.

56 Kjin ma xìta xi tsját'in 'én ndiso xi kondra ts'e Jesús tanga kj'eii tsò nga jngoò ijngoò; mìkii mangásòn 'én xi tsját'in.

57 Chíncha kixi i'nga xìta xi tsibénojmi 'én ndiso. Kitsò:

58 —Ngajen, kina'yà-lajen nga tsò: “An siikixoña ingo ítjòn xi tsja xìta kisindaà-ne, kò jàn nachrjein kindaa ijngoò-na xi mìtsà tsja xìta sindaà-ne.”

59 Ni mìkii kjòngásòn 'én-là nas'ín okitsò.

60 K'eé tsasítjen jè nò'miì ítjòn; tsasijnajiìn osen-là; kiskònangui-là Jesús, kitsò-là:

—¿A ni mé 'én nokjoì, koni tsò 'én xi tsjá xìta koi xi kondra tsiji?

61 Tanga jè Jesús jyò tsibijna, nímé 'én kiichja. Jè nò'miì ítjòn ijngoò k'a kiskònangui-là, kitsò-là:

—¿A jì-né xi Cristo, xi Ki'ndí-là Nainá xi 'ñó jeya tíjna?

62 Jesús kitsò:

—'An-ná, jñò jcha-ná xi Ki'ndí-là Xìta xan-là yijo-na nga kótijnat'aà chrja kixi-là Nainá xi 'ñó tse nga'ñó tjín-là, koa kjinchrobajñaà ifi ján ngajmiì.

63 Jè nò'miì ítjòn tsatijndajno yijo-là nikje-là xi íkjá nga 'ñó kòjti-là. Kitsò:

—¿Mé s'een-ìsa-ná xìta xi kj'eii xi tsjá 'én?

64 Jñá, jye titsana'yà koni s'ín chjajno-là Nainá. ¿Jñò, kó bixón? ¿Mé xi sikoáá?

Ngats'iì xìta kisijngoò ikon nga tjín-là jé koa ok'ín-là nga kiyá.

—Ok'ín-là nga sikk'en.

65 Jñà xìta tsibíts'ia nga tsibíchrájno koa tsibíchjoà xkon, tsi'beé-là, kitsò-là:

—K'oaá si, ¿yá xi tí'beé-lè?

Jñà xìta xi síkinda ingo, kisijts'iìn-'a isén-là.

*K'e nga jè Pedro tsibìjna'mat'in Jesús**(Mateo 26:69-75; Lucas 22:56-62; Juan 18:15-18, 25-29)*

⁶⁶ Jè Pedro yaá tìjna kangui ndìtsin ni'ya. Ijchò jngoò chjoón xi chì'nda-la nò'miì ítjòn.

⁶⁷ K'e nga kijtsee Pedro, nga tìjna'ngui, kiskoòtsejèn-jno, kitsò-la:

—Tìkoaá ngaji, yaá tjaàkoìi Jesús xi Nazaret ì'nde-la.

⁶⁸ Tanga jè Pedro tsoho'mat'in-né. Kitsò:

—Mìkiì bexkoan. Mìkiì be mé 'én xi tinokjoi.

Pedro itjo ni'ya ján xotjoa-la. K'ée kiskindàya jngoò kóxtí.

⁶⁹ Jè chjoón chì'nda-la nò'miì ítjòn kijtsee ìjngoò k'a jè Pedro. Kitsò-la jñà xìta xi ya títsajna:

—Jè xìta jè, xìta ts'ée Jesús.

⁷⁰ Tanga jè Pedro tsoho'mat'in ìjngoò k'a. Nga koma ìskan, jñà xìta xi ya títsajna, ìjngoò k'a kitsò-la Pedro:

—Xi okixi, ngaji, xìta-la Jesús-né nga Galilea ì'nde-lè, k'oaá tsò 'én-lè xi nokjoi.

⁷¹ Tanga isaá 'ñó kiìchja Pedro kitsò:

—ìBeè Nainá, nas'ín tìk'eèn-ná, mìkiì bexkoan jè xìta xi o'mi-là!

⁷² Tìk'e-ne nga okitsò Pedro, jè xi ma-ne jò k'a kiskindàya kóxtí. K'ée tsibìtsjeèn-la Pedro koni kitsò-la Jesús: “K'e tìk'j'èè kjindàya jò k'a kóxtí, ngaji, jàn k'a tsjá'mat'in-ná.” Ìkjoàn ndaà jchán kiskindàya.

15*Kjoa xi komàt'in Jesús k'e nga kjòngatsja Pilato**(Mateo 27:1-2, 11-14; Lucas 23:1-5; Juan 18:28-38)*

¹ K'e nga kis'e isén jñà xìta sko-la nò'miì kò xìta jchínga kò xìta xi okóya kjotíxoma-la Nainá xi kiskìi Moisés kò ngats'ìi xìtaxá ts'e xìta judío tsajoóya-ne. Tsibít'aà'ñó Jesús, kìiko, kisìngatsja jè Pilato.

² Jè Pilato kiskònangui-la, kitsò-la:

—¿A jì-né xi xìtaxá ítjòn-la jñà xìta judío?

Jesús kitsò:

—Ngajíi xi k'oa si nga 'an-ná.

³ Tanga jñà xìta sko-la nò'miì, kjìn skaya 'én tìjn-ne xi tsját'in nga óngui.

⁴ Pilato ìjngoò k'a kiskònangui-la, kitsò-la:

—¿A nímé 'én nokjoi? Tìná'yaà-la, 'ñó kjìn skaya kjoa tsját'in-lè nga óngui-lè.

⁵ Jesús mìkiì kiìchja nas'ín koa tí'mi-la. Pilato, tà k'oaá komà-la.

*K'e nga jè Jesús kitjoònè kjoa nga kiyá**(Mateo 27:15-31; Lucas 23:13-25; Juan 18:38-19:16)*

⁶ Nga xkì nó k'e nga bitjo s'eí Paxkò jè Pilato síkìjnandeíi jngoò xìta xi títsa'ya ndayá, jè xi síjé xìta naxandá nga kìjnandeíi.

⁷ Jñà xìta xi títsa'ya ndayá nga kjoasii tsohótsji ts'e gobierno, ya tìjna xi 'mì Barrabás xi xìta kisik'en.

⁸ Jñà xìta naxandá kìikáko Pilato nga mejèn-la koa s'ín síkìtasòn koni ma nga xkì nó.

⁹ Kiìchja Pilato, kitsò:

—¿A mejèn-nò nga síkìjnandeíi-nò xi xìtaxá ítjòn-la xìta judío?

¹⁰ Pilato jye tíjìn-la nga tà kjoaxìtakòn-né nga jñà xìta sko-la nò'miì ya ijchò síngatsja Jesús.

¹¹ Jñà xìta sko-la nò'miì chinchá'a xìta naxandá nga kos'ín kàtasíjé nga kàtìjnandeíi-ne Barrabás.

¹² Pilato ìjngoò k'a kiskònangui-la xìta naxandá, kitsò-la:

—¿Mé xi síkoaá jè xi 'mì-là xìtaxá ítjòn-la xìta judío?

13 Jñà x̄it̄a, 'ñó kiìchj̄a, kitsò:

—Tasit'ìi krò.

14 K'èé kitsò Pilato:

—¿Mé jé xi tsohótsji, mé-ne kiyá-ne?

Jñà x̄it̄a, ìs̄aá 'ñó kiìchj̄a, kitsò:

—Tasit'ìi krò.

15 P̄ilato mejèn-l̄a nga ndaà kíjnako x̄it̄a nax̄andá. Kisikíjnandeí Barrabás. K'è nga jye kitsjaà òkixi nga tsajá-l̄a Jesús, ìkjoàn kisìngatsja nga s̄it'aà krò.

16 Jñà soldado kiìko Jesús ján ni'ya osen. Ìkjoàn kiìchj̄a yije-l̄a soldado xíkjin.

17 Kisikákj̄a jngoò nikje xi inì jmà kji; tsibí'a sko jngoò corona na'yá xi jñà xó tsibíndaà-ne.

18 Ìkjoàn tsibíts'ia nga kiskindàyat'in. Kitsò-l̄a:

—Viva x̄itaxá Ítjòn-l̄a x̄it̄a judío.

19 Tsatjì yá xkaj̄nchra sko; ìkjoàn tsibíchrájno koa chinchaxkó'nchit'aà-l̄a koni tsà nchibeèxkòn.

20 K'è nga jye kisìsobà-l̄a, jaàxìn-l̄a nikje sko xi íkjá, ìkjoàn kisikákj̄a-ne xi nikje ts'è. K'èé itjoko nga kosit'aà krò.

K'è nga kisit'aà krò Jesús

(Mateo 27:32-44; Lucas 23:26-43; Juan 19:17-27)

21 Jngoò x̄it̄a kisatiikjoè xi 'mì Simón xi Cirene j'nde-l̄a xi tínchrobá-ne rancho-l̄a. Na'èn-l̄aá ma jè Alejandro ko Rufo. Jñà soldado kjo'ñó kis'ìin-l̄a nga kisik'ajen krò-l̄a Jesús.

22 Kiìko Jesús ján j'nde ñánda 'mì Gólgota, jè 'én xi tsòya-ne j'nde sko mik'en.

23 Kitsjaà-l̄a vino xi tsjájin xich'a tsja xi 'mì mirra tanga jè Jesús mìkiì kits'ii.

24 K'èé tsasit'aà krò, ìkjoàn jñà soldado kisiskáko nikje-l̄a Jesús nga kiska'bí-l̄a xíkjin yá ts'è koma.

25 Ijchò-l̄a tsà xi ñijaàn nga tajñòya nga kisasit'aà krò Jesús.

26 Jñà 'én xi tsohót'aà isòn sko krò, yaá tíchj̄a mé jé xi komà-l̄a Jesús nga kinik'en. Tsò-né: “X̄itaxá Ítjòn-l̄a x̄it̄a judío.”

27 T̄ikoáá chinchat'aà krò jò x̄it̄a chijé. Jngoò tsasíjnat'aà nga kixi-l̄a Jesús ko jngoò tsasíjnat'aà nga ngaskón-l̄a.

28 K'oaá s'ín kjongásòn koni s'ín tíchj̄a Xojon-l̄a Nainá nga tsò: “K'oaá ngaya-l̄a koni jngoò x̄it̄a xi tse jé tjín-l̄a.”

29 Jñà x̄it̄a xi ya ja, síkatji sko nga kiìchjajno-l̄a, kitsò-l̄a:

—Jì, k'oaá kisi nga s̄ixòñi ingo ìtjòn-l̄a Nainá ko jàn n̄achrjein kíndaà ngajo-ne,

30 t̄ikíjnandeí yijo-lè ko chinájen-t'i yijo-lè krò.

31 K'oaá t̄is'ín kisisobà-l̄a jñà x̄it̄a sko-l̄a no'mii ko x̄it̄a xi okóya kjotíxoma-l̄a Nainá xi kiskii Moisés. Kitsò-l̄a xíkjin:

—X̄it̄a jè, tsachrjekàjìn kjo'in xi kj'eí x̄it̄a, tanga jè xi yijo-l̄a, mìkiì ma ochrjekàjìn kjo'in.

32 Kàt̄itjopen-t'aà krò jè xi Cristo, xi X̄itaxá Ítjòn-l̄a nax̄andá Israel, mé-ne nga jch̄a-ná koa k̄okjeiín-ná.

Skanda jñà x̄it̄a xi t̄ikoá ya kjit'aà krò, t̄ikoáá tsatít'aà.

K'è nga k'en Jesús

(Mateo 27:45-56; Lucas 23:44-49; Juan 19:28-30)

33 K'è nga ijchò nchisen, kóhokji nga t̄jtsa isò'nde kòjñò skanda xi jàn nga nguixòn.

34 Tjè-ne hora Jesús 'ñó kiìchj̄a nga kitsò:

—Eloi, Eloi, ¿lama sabactani? —'Èn jè tsòya-ne: Nainá, Nainá, ¿mé-ne kàjneitakòn-ná?

35 Tjín i'nga x̄it̄a xi ya t̄itsajna xi kiì'nchré-l̄a, kitsò:

—T̄iná'yaà-là, jè chj̄a-l̄a Elías.

³⁶ K'eé tsangachikon jngoò xi kisìka'nchi tsànga kò vinagre, ikjoàn tsibísko-là ínaxo, kitsjaà-là Jesús nga kàt'iì, kitsò:

—Chítsejèn-là, ¿a kjoíí Elías nga skónajen-t'aà krò?

³⁷ Tanga Jesús isaá 'ño kiskindàya; k'en.

³⁸ Jè nikje velo xi tjo'hóya jngoò osen ingo ítjòn kixajndà, jòya koma skanda it'aà nangui.

³⁹ Jè xita sko-là soldado xi síjna ñánda kisit'aà krò Jesús k'e nga kijtseè nga jye k'en Jesús, kitsò:

—Kixíí kjoa, xita jèe, Ki'ndí-là Nainá-né.

⁴⁰ Tikoá títsajna i'nga íchjín xi kjiìn nchikotsejèn-ne; jè María Magdalena, kò chjoón Salomé, kò María xi nea-là ma José kò Jacobo, jè xi isa ma ki'ndí.

⁴¹ Jña íchjín koi, k'e nga tsibijna Galilea Jesús, yaá chinchima-tjingui-là kò yaá kisichjât'aà-là. Kjin ma íchjín xi ya títsajna xi ijchòkò ján Jerusalén.

K'e nga kisihjiìn Jesús

(Mateo 27:57-61; Lucas 23:50-56; Juan 19:38-42)

⁴² K'e nga jye kjònguixòn nga jye bìtsajnandaà-là nachrjein nikjáya.

⁴³ José xi Arimatea i'nde-là, jngoò xita xi tikoá 'nga xá tjín-là ts'e xitaxá-là xita judío xi tikoá tíkoña-là nga mejèn-là skoé kó s'ín otíxoma Nainá, kitsjaà-là nga'ño yijo-là, jahas'en ya ni'ya ñánda tíjna Pilato nga kisijé yijo-là Jesús.

⁴⁴ Pilato, tà k'oaá koma-là nga jye k'en Jesús; kiichja-là jè xita sko-là soldado; kiskònangui-là tsà kixi kjoa nga jye k'en.

⁴⁵ K'e nga jye tsibénojmí jè xita sko-là soldado nga jye k'en Jesús, Pilato kisìngatsja José yijo-là Jesús.

⁴⁶ José tsatse jngoò nikje sábara; kiskójen-t'aà krò yijo-là Jesús; ikjoàn kisikájté jè nikje. K'eé kii kíhjiìn ñánda jye tjíndaà jngoò ngajo itsjó ingui nguijo; kiskin's'en-ngui, ikjoàn tshójtza xotjoa-là ngajo jngoò ndajo.

⁴⁷ María Magdalena kò María nea-là José, nchikotsejèn-là nga kisihjiìn Jesús.

16

K'e nga jaáya-là Jesús

(Mateo 28:1-10; Lucas 24:1-12; Juan 20:1-10)

¹ K'e nga jye tsato nachrjein nikjáya, María Magdalena, Salomé, kò María nea-là Jacobo, tsatse xkii jne nga mejèn-là síikaájno yijo-là Jesús.

² Jè nachrjein nga tàts'en xomàna, 'ño tajño'ya kii katsejèn-là ñánda kisihjiìn Jesús. Tik'eé tíbitjokàtji ts'oi.

³ Tsò-là xíkjín:

—¿Yá xi kjoaáxìn-ná ndajo xi tíchjoàjto ya xotjoa-là ngajo itsjó?

⁴ K'e nga ijchò, kiskoòtsejèn, kijtseè nga jè ndajo je xi 'ño i'í xi tíchjoàjto-là ngajo itsjó ñánda kisijna Jesús, jye kitjaàxìn.

⁵ K'e nga jahas'en-ngui nguijo kijtseè jngoò xita ixti xi tíjnajté jngoò nikje chroba ndojò. Tíjnat'aà kixi-là ngajo. Jña íchjín tà kitsakjòn-né.

⁶ Tanga jè xita ixti kitsò-là:

—Kì tsakjoòn-jèn. Jño, jè binchaàtsjioè Jesús xi Nazaret i'nde-là, jè xi kisit'aà krò. Jye kòfaáya-là. Mì tì i' tíjna-ne. Chítsejèn-là i'nde-là ñánda kisijna.

⁷ Tanguió koatìn-là xita xi kota'yàt'aà-là kò Pedro: “Jè tífi ítjòn-nò ján Galilea. Yaá jchaxkoòn ijngoò k'a koni s'ín kitsò-nò.”

⁸ Jña íchjín, itjo nitoón-ne ya iya nguijo. Kii, tsangachikon. Chiba-là nchihotsé-né nga kitsakjòn. Niyá xi tsibénojmí-là nga 'ño tsibíxkón-là yijo-là.

K'e nga jè María Magdalena kijtseè Jesús

(Juan 20:11-18)

⁹ Jè nàchrjein nga tàts'en xomàna, Jesús jaáya-la nga tajñòya. Jè kijtsee ítjòn María Magdalena, jè xi tsachrjekàjìn itoò inìma ch'o-la neí inìma-la.

¹⁰ María Magdalena kii, kisikí'nchré ngats'ii xita-la Jesús nga ba tjín-la koa nchikjindáya.

¹¹ Jñà xita xi kota'yàt'aà-la, k'e nga kii'nchré nga tíjnakon Jesús nga jè chjoón kijtsee, mìkii kòkjeiín-la.

K'e nga jò xita-la kijtsee Jesús

(Lucas 24:13-35)

¹² K'e komà iskan, Jesús, kj'eí kji isén-la k'e nga tsakó-la yijo-la jò xita-la xi nchifi campo.

¹³ Tsohótji-ne jñà xita xi jò ma, kisikí'nchré jñà xita xi i'nga. Tíkooá mìkii kòkjeiín-la.

Kii kitsò Jesús nga kitsjaà-la xá xita xi kota'yàt'aà-la

(Mateo 28:16-20; Lucas 24:36-49; Juan 20:19-23)

¹⁴ Xi jyehet'aà-ne, Jesús tsakó-la yijo-la jñà xita xi tejngoò ma-ne k'e nga títsajnat'aà ímíxa nga nchikjèn. Tsohótiko nga tájaà tjín inìma-la nga mì kòkjeiín-la k'e nga tsibénojímí-la jñà xita xi tsakó ítjòn-la yijo-la nga jè jye jaáya-la.

¹⁵ Koa kitsò-la:

—Tanguió nga tíjtsa isò'nde. Tènojímí yije-la ngats'ii xita jè 'én ndaà-la Nainá xi kjoa ts'an.

¹⁶ Jñà xita xi kòkjeiín-la it'aà ts'an koa koma bautizar, kitjokàjìn kjo'in. Tanga jñà xi mìkii kòkjeiín-la, kjo'ín s'e-la.

¹⁷ Jñà xi kòkjeiín-la it'aà ts'an, k'ooá s'ín jcha-la; nga koma-la kochrjekàjìn inìma ch'o-la neí xi tíjìn inìma-la xita; tíkooá koma-la kichja 'én xi kj'eí tsò;

¹⁸ tsà ye tsobà'ño, tsà xkii kjan skine, nímé xi koma-la; kohòsòn-la tsja xita xi xk'én, kondaà-ne.

K'e nga jè Jesús kùimjìn ngajmii

(Lucas 24:50-53)

¹⁹ K'e nga jye okitsò-la xita xi kota'yàt'aà-la, Na'èn-ná Jesús, kitjámi'nga; nga kii ngajmii, tsibìjna it'aà kixi-la Nainá.

²⁰ Jñà xita-la kii; kisika'bí 'én ndaà-la nga kijndà i'nde, ko jè Na'èn-ná Jesús kisichját'aà-la ko kisikixiyandaà 'én-la ko kjondaà xi kis'iìn xita-la. K'ooá s'ín kàtama.

'Én ndaà-la Nainá xi kjoa ts'e Cristo koni s'ín kiskii San Lucas

'Én xi kiskii-la Teófilo jè Lucas

¹ Kjoa kixi xi komà jjiin naxandá it'aà ts'e Cristo, jye kjin ma-ne xita xi kiskii chiba
² koni s'ín tsakóya-najen jña xita xi xkon kijtseè-ne skanda tàts'en-la kjoa, tijnà-ne xi kis'e-la xá nga kisika'bí 'én ndaà-la Nainá xi kjoa ts'e Cristo.

³ Ngaji Na'en Teófilo xi 'ño ndeè, tikoaa 'an, ndaà sasén-na nga tikji-lè xojon jè, koni s'ín tjin nga jngoò jngoò skoya kjoa; ndaà tsohotsji-jñaà yije skanda tisa tàts'en-la kjoa

⁴ mé-ne nga isa ndaà jcha-ne kjoa kixi xi nguì kos'ín tjin, jña 'én xi k'oas'ín tsakóya-lè xita.

'Én xi kiichja jngoò àkjale-la Nainá nga iskan jts'ín Juan xi kis'ìn bautizar xita

⁵ Koi nachrjein k'e nga jè tjina xitaxá ítjòn Herodes ján nangui Judea, tjina jngoò no'mii xi Zacarías 'mì xi tje-la ts'e Abías. Jè Zacarías tjin-la chjoón xi Elisabet 'mì xi tikoá tje-la ts'e Aarón.

⁶ Jña ingajò, xita kixi-né nga nguixkon Nainá. Síkitasòn yije-né ngats'ii kjotixoma-la Nainá.

⁷ Tjin-la ixti; jè Elisabet, chjoón 'ndi-né; ingajò, jyeé 'ño xita jchinga.

⁸ Jngoò nachrjein, jña xita no'mii xi síxakjoò Zacarías, jña tsako-la nga kisixá nguixkon Nainá.

⁹ Koni s'ín tjin kjotixoma xi ts'e no'mii Israel, tsako-la suerte Zacarías nga jahas'en ni'ya tsjeè-la Nainá, ya iya jngo ítjòn, nga jè kòkà chrjongó-la Nainá.

¹⁰ Jè hora k'e nga tì chrjongó-la Nainá ngats'ii xita naxandá, yaá títsajna nditsin nga nchichjat'aà-la Nainá.

¹¹ Jè Zacarías tsatsejèn jngoò-la àkjale-la Nainá xi síjna kixi ya ngobà kixi-la ñanda tison chrjongó-la Nainá.

¹² Jè Zacarías k'e nga kijtseè, tà kjòxkón-la, tà kitsakjòn-né.

¹³ Tanga jè àkjale-la Nainá kitsò-la:

—Ngaji, Zacarías, kì tsakjoòn-jèn; jè kjoa bìtsi'ba-lè jye kina'yà-la; jè chjoón-lè Elisabet, jts'ín jngoò-la k'ndí x'in; k'oaá s'ín kít'aà 'ín-la nga Juan k'oín.

¹⁴ 'Nó s'e-lè kjotsja. Koi kjoa-la nga jè k'ndí xi jts'ín, kjin xita kjotsja-la.

¹⁵ Xita ítjòn kijná nga nguixkon Nainá; mìkiì xán sk'oi nga xó k'oaá s'ín kitjaàjijn-ne; Inima Tsjeè-la Nainá sijijn inima-la skanda tik'e-ne nga tisa tjina'ya'ma indso'ba nea-la.

¹⁶ Xi it'aà ts'e, kjin xita naxandá Israel koófat'aà-la Nainá.

¹⁷ Jè kjoí ítjòn-la Na'en-ná. Sijijn inima-la nga'ño xi kisikjeén jè Elías xita xi kiichja ngajo-la Nainá. Inima-la xita jchinga, 'nchán sikkítsajnakò ixti-la. Jña xita xi tájaàjijn tjin inima-la nga mìkiì síkitasòn, sikkjatjya-la kjohítsjeèn-la mé-ne nga s'e-la kjoa chjine xi tjin-la xita kixi. K'oaá s'ín sikkijjondaà xita naxandá mé-ne nga kítsajnandaà-ne k'e nga kjoí Na'en-ná.

¹⁸ Zacarías kitsò-la jè àkjale:

—¿Kó s'ín skoeè-na tsà kixi kjoa? 'An, jye 'ño xita jchinga; tikoaa chjoón-na jye tífehèt'aà nachrjein-la.

¹⁹ Jè àkjale kitsò:

—'An-ná Gabriel xi tjinaa nguixkon Nainá; kisikasén-na nga kichjàkò-lè, tsjaà-lè 'én ndaà-la Nainá.

²⁰ I'ndeì, kijná chisín-né, mìkiì koma kinókjoì skanda k'e nga kijchò nachrjein nga kítasòn 'én koi, koi kjoa-la nga mìkiì kòmokjeín-lè 'én-na xi kàxan-lè.

21 Jñà xita naxandá, nchikoña-la Zacarías. Kjonangui-la xíkjín nga tífchrjein-la nga mìkìi xátì bitjo-ne ni'ya tsjeè-la Nainá.

22 K'e nga jye itjo-ne jyeé kjòchisín; mì tì kii ma chja-ne; jñà xita xi nchikoña-la kis'ejiin-la nga tjin kjoa xi kijtsee ya iya ni'ya tsjeè-la Nainá; Zacarías tà jmeé chisín-isa tsja. K'oaá s'ín tsibijna nga mìkìi komà kii chja.

23 Zacarías, k'e nga jye kisisòn jñà nachrjein nga kisikitasòn xá-la, kii-ne ni'ya-la.

24 K'e nga komà iskan, jè chjoón Elisabet, ki'ndí ts'a; 'òn sá mì tì kii itjo-ne ni'ya-la. Kitsò:

25 “K'oaá s'ín kisikò-na jè Nainá xi it'aà ts'an: kijtsee imaá-na nga kitsjaà-na kjondaà-la mé-ne nga mì kii tì kochrjekàngui-na xita.”

Kii komà k'e nga jngoò àkjale tsibénojmí nga iskan jts'ín jè Jesús

26 K'e nga ijchò joòn sá, jè àkjale Gabriel, Nainá kisikasén jngoò naxandá xi chja-ne Galilea ñánda 'mì Nazaret.

27 Kii kon jngoò chjoón xongó xi tjin-ne nga jè kixan-kò jngoò xita xi 'mì José xi tje-la ts'e xitaxá ítjòn xi ki'mì David. Jè 'ín-la chjoón xongó, María 'mì.

28 Jè àkjale, k'e nga jahas'en ni'ya nga kijtseeèkon María, kitsò-la:

— ¡Ndaà-lè, ngaji xi jì kitjoé-lè kjondaà jè! Nainá tijnakò-lè. Ngaji xi ndaà kjòchikon-t'in mì k'oaá-ne koni íchjín xi kj'eíí.

29 Jè María k'e nga kijtseeèkon, tà kjòxkón-la koni s'ín kitsò-la jè àkjale; kisikítsjeèn kó tsòya-ne nga kos'ín j'ì síhixat'aà-ne.

30 Jè àkjale kitsò-la:

— María, kì tsakjoòn-jèn, jye kitjoé-lè kjondaà nga nguixkon Nainá.

31 I'ndeí kòxk'én-né, ki'ndí jchà jngoí. K'oaá s'ín kít'ì 'ín-la nga Jesús k'oín.

32 Xita ítjòn koma; Ki'ndí-la Nainá k'oín xi isa 'ño 'nga tjna; Nainá, jè sìngatsja kjotixoma-la. Xitaxá ítjòn kína koni s'ín tsibijna David xi xita jchínga-la komà.

33 Jè kotixoma-la naxandá Israel. Kjotixoma-la mì kì kjoèhet'aà nita kjé-ne.

34 Jè María k'eé kitsò-la àkjale:

— ¿Kó s'ín koma jè kjoa koi? Nga mìtsà x'in tjin-na.

35 Jè àkjale kitsò:

— Jè Inima Tsjeè-la Nainá kitjoen-nè-lè. Jè nga'ño-la Nainá xi 'ño 'nga tjna koiìtsat'in-lè koni jngoò 'nguién-la ifi mé-ne jè ki'ndí tsjeè xi jts'ín, Ki'ndí-la Nainá k'oín.

36 Jè xinguí Elisabet xi chjoón 'ndí, kò joòn sá tjin-la nga ki'ndí 'ya nas'ín jye 'ño xita jchínga.

37 Xi it'aà ts'e Nainá, nijngoò kjoa xi mìkìi koma-la —kitsò àkjale.

38 K'eé kitsò María:

— 'An-ná xi chjoón chi'nda-la Nainá; k'oas'ín kàtama koni s'ín kò'mì-ná.

Jè àkjale tinguixkoon-ne kii-ne.

Kii komà k'e nga jè María kii katsejèn-la Elisabet

39 Nachrjein koi, jè María nitoón kii jngoò naxandá xi kijna'nchò nindoò ján nangui Judea.

40 Jahas'en ni'ya-la Zacarías; kisihixat'aà Elisabet.

41 K'e kii'nchré Elisabet nga kisihixat'aà María, ki'ndí xi 'ya, kiskì'nga iya indso'ba. Jè inima-la Elisabet ndaà kis'ejiin Inima Tsjeè-la Nainá.

42 K'eé 'ño kii chja, kitsò:

— ¡Nainá, isaá 'ño ndaà tísichikon-t'in-lè mì k'oaá-ne koni jñà íchjín xi kj'eíí; tikoáá ki'ndí-lè xi tijnaya indso'boi 'ño ndaà tímachikon-t'in!

43 ¿Yá-ná 'an? ¡Mé tà ndaà kò'lijchon-ná jì xi nea-la Na'èn-ná!

44 Tik'e-né nga kà'nchré nga kànihixat'aà-ná, ki'ndí-na kàkjì'ngaya indso'ba nga tsja kòma-la.

⁴⁵ ¡Mé tà ndaà-lè nga mokjeiín-lè 'én xi kis'enojmi-lè! Jè 'én xi kiichja Nainá kitsòn-né —kitsò Elisabet.

⁴⁶ Jè María kitsò:

Inima-na 'ño 'nga tísikjna Nainá.

⁴⁷ Matsja-na it'aà ts'e Nainá xi ochrjekátji-na.

⁴⁸ Kijtseè imaá-na, 'an xi chjoón chi'nda-la ma; j'ndeí skanda nita kjé-ne k'oaá s'ín kitsò-na xita: “Mé tà ndaá-la.”

⁴⁹ 'Ñó ndaà tse kjoa kisikò-na Nainá, jè, nga isa tse nga'ño tjín-la.

Nainá, xita tsjeè-né.

⁵⁰ Tjín kjit'aà-la kjohimatakòn it'aà ts'e jña xita xi beèxkón skanda tàts'en-la kjoa nita kjé-ne.

⁵¹ K'oaá s'ín okó nga tse nga'ño tjín-la;

jña xita xi 'ño 'nga ikon jjiín inima-la, ochrjekàngui kjohítsjeèn-la.

⁵² Jña xitaxá ítjòn xi 'nga títsajna, faáxìn kjotíxoma-la,

koa jña xi nangui títsajna, isaá 'nga síkítsajna.

⁵³ Jña xita xi tsjín-la tsojmì xi kine, 'ño kjín tsjá-la,

koa jña xita nchiná, nímé tsjá-la, tà síkasén tiyaá-ne.

⁵⁴ Nainá síchját'aà-la naxandá Israel, jña xita chi'nda-la;

mikiì síchàajìin nga tjòkèè Abraham,

⁵⁵ ngats'ìi tje-la nita mé nachrjein-ne.

Nga Nainá, k'oaá s'ín kitsjaà-la tso'ba jña xita jchínga-ná.

Kitsò María.

⁵⁶ Jè María, jàn sá tsibijnako Elisabet; k'e komà iskan kii-ne ni'ya-la.

K'e nga kits'ìin Juan xi kis'ìin bautizar xita

⁵⁷ K'e nga jye ijchò nachrjein-la, Elisabet, kits'ìin jngoò-la ki'ndí x'in.

⁵⁸ Nainá, 'ño ndaà kisikò. K'e nga kii'nchré xita xíkjin ko xita indii ni'ya-la tikoáá kjòtsja-la.

⁵⁹ Nga komà jìin nachrjein, kiikò jè ki'ndí nga nguixkon no'miì, mé-ne nga kisit'aà chiba-la yijo-la kjoa ts'e circuncisión. Jña xita xi kjeíí, k'oaá s'ín mejèn tsibít'aà 'ín koni 'mì na'èn-la nga Zacarías 'mì.

⁶⁰ Tanga jè nea-la kitsò:

—Majìn, Juan k'oin.

⁶¹ Kitsò jña xita xi títsajna:

—¿Mé-ne kos'ín k'oin-ne? Nijngoò xita xingui xi kos'ín 'mì 'ín-la.

⁶² K'ée kitjònangui chisín-la na'èn-la kó k'oin.

⁶³ Zacarías kisijé jngoò íteè nga kiskiljno, tsibít'aà: “Juan 'mì 'ín-la.” Ngats'ìi xita xi ya títsajna, tà k'oaá komà-la.

⁶⁴ Zacarías tik'ée-ne kitáx'a-ne tso'ba ko tsaniyá-ne nijen, ikjoàn komà kiichja-ne. K'ée kitsjaà-la kjondaà Nainá.

⁶⁵ Ngats'ìi xita xi títsajna chraña indii ni'ya-la, tà kjòxkón-la k'e nga kii'nchré nga jye ma kiichja-ne Zacarías. Xki xi ján tsabísòn kjoa koi kóhokji inchò nindoò nangui Judea.

⁶⁶ Ngats'ìi xita xi kii'nchré kjoa koi, tsohóko jjiín inima-la; kitsò:

—Jè ki'ndí, k'e nga kojchínga, zyá xita xi koma?

Nga jè nga'ño-la Nainá tíjnako.

Kii komà k'e nga jè Zacarías kiichja it'aà ts'e Nainá

⁶⁷ Zacarías, na'èn-la Juan, kisijìin inima-la Inima Tsjeè-la Nainá. Kiichja ngajo-la Nainá, kitsò:

⁶⁸ ¡Mé tà ndaà kji-la Na'èn-ná jè xi Nainá tsò-la naxandá Israel nga j'ìi kichjítjì naxandá-la tikoá j'ìi síkijnandeíí!

⁶⁹ Kitsjaà jngoò-ná x̄it̄a xi tse nga'ñó t̄jín-l̄a nga j'ìi kachrjet̄jì-ná k̄jò'in xi k̄joa ts'e jé-ná, jè xi t̄jè-l̄a David xi ch̄i'nda-l̄a Nainá tsibìj̄na.

⁷⁰ Nainá kisikjeén tso'ba j̄nà x̄it̄a tsjeè-l̄a xi kiichj̄a ngajo-l̄a.

K'oaá s'ín kitsò nga t̄isa t̄ats'en-l̄a k̄joa nga

⁷¹ kochrjekát̄jì-ná ìt'aà ts'e x̄it̄a kondra-ná,

ko x̄it̄a xi jtikeè-ná.

⁷² K'oaá t̄i kitsò Nainá nga skoe ìma j̄nà x̄it̄a jchínga-ná.

Mìkì s̄ijchàaj̄iìn jè 'én xi kitsjaà-l̄a x̄it̄a jchínga-ná Abraham nga tsibíndaaj̄iìn-ko jngoò k̄joa tsjeè.

⁷³ Nainá, k'oaá s'ín kitsjaà-l̄a tso'ba Abraham xi x̄it̄a jchínga k̄j̄iìn-ná nga

⁷⁴ s̄ik̄ítsaj̄nandéj̄i-ná ts'e x̄it̄a kondra-ná mé-ne nga mìkì k̄iskoán nga s̄ixá-lá.

⁷⁵ K̄jit'aà nachrjein tsjeè k̄ítsaj̄naá t̄ikoa kix̄i k̄ítsaj̄naá nga nguixk̄on Nainá.

Kitsò Zacarías.

⁷⁶ K'eé kitsò-l̄a ki'ndí-l̄a:

Ngaji, s̄ik̄jeén-lè Nainá xi 'ñó 'nga t̄jna nga k̄inók̄joa ngajo-l̄a.

Ngaj̄i k'oín ìt̄jòn-l̄a Na'èn-ná nga k̄indii ndiyá-l̄a.

⁷⁷ Kénojmí-l̄a naxandá-l̄a kós'ín s'ín Nainá nga kochrjekát̄jì-ná jé-ná.

Nainá, 'ñó tse k̄johimatakòn t̄jín-l̄a nga s̄ijchàat'aà-l̄a jé-l̄a j̄nà x̄it̄a.

⁷⁸ Nainá s̄ikasén jngoò-ná xi nchrobá-ne ngajmii.

K'e nga k̄joií, k'oaá s'ín s̄ihiseèn-l̄a x̄it̄a koni s'ín mahiseèn k'e nga taj̄nòya.

⁷⁹ J̄nà k̄ohiseèn-l̄a k̄johítsjeèn-l̄a x̄it̄a xi ì'nde j̄nò t̄ítsaj̄naj̄iìn,

ko xi jye ndiyá k̄joa biyaà t̄jímaya.

Yaá k̄jiko-ná ndiyá ñánda t̄jín k̄joa'nchán.

Kitsò Zacarías.

⁸⁰ Ki'ndí jè t̄imajchínga t̄ikoa t̄is'e-l̄a nga'ñó xi ts'e inìma-l̄a. Yaá tsibìj̄na ì'nde ìt'aà xìn ñánda nangui kix̄i choòn skanda k'e nga tsibíts'ia nga tsibij̄na osen-l̄a naxandá Israel.

2

Kii komà k'e nga kits'iìn Jesús

(Mateo 1:18-25)

¹ Koi nachrjein k'e nga t̄jín-l̄a xá ìt̄jòn César Augusto tsjachrje jngoò okix̄i nga ngats'ìi x̄it̄a naxandá xi otíxoma-l̄a Roma, xojoón s̄it'aà 'ín-l̄a.

² Jè xojoon censo xi kisindaà ìt̄jòn k'e nga t̄jna gobernador x̄it̄a xi 'mì Cirenio ján ì'nde ñánda 'mì Siria.

³ Kii yije x̄it̄a nga kii kít'aà xojoon yijo-l̄a nga jngoò ìjngoò naxandá-l̄a xi chj̄a-ne.

⁴ José itjo-ne Nazaret, naxandá ts'e Galilea, kii nangui ñánda 'mì Judea ya naxandá Belén ñánda kits'iìn x̄it̄a ìt̄jòn xi David ki'mì nga jè José, t̄jè-l̄a ts'e David-né.

⁵ Kii kít'aà xojoon yijo-l̄a; t̄ikoaá kii jè María, chjoón-l̄a xi t̄jna'ñó-l̄a nga jè kixan-ko, tanga jyeé ki'ndí 'ya.

⁶ K'e nga jye t̄ítsajna Belén, María ijchò nachrjein-l̄a nga kits'iìn ki'ndí-l̄a.

⁷ Kits'iìn ki'ndít̄jòn-l̄a xi ndí ki'ndí x'ín; kisikájté nikje-l̄a; ya kisikánaya kaxa ñánda k̄jèn-ya cho, nga mì t̄i kii t̄jín-ne ì'nde ya ni'ya ñánda ma nìkjáya.

Kii komà k'e nga j̄nà àkjale-l̄a Nainá j'iikon j̄nà paxtò

⁸ Ya chrañat'aà-l̄a Belén t̄ítsajna paxtò xi nchisíkinda cho orrè-l̄a nga n̄it̄jen.

⁹ Tà n̄itoón ijchòkon jngoò àkjale-l̄a Nainá. Jè k̄joajeya-l̄a Nainá xi 'ñó ote k̄ji, kisihiseèn yije kóhok̄ji jngoò itjandi ñánda t̄ítsajna j̄nà paxtò. K'e nga k̄ijtseè, tsí ndaà kitsak̄jòn.

¹⁰ Jè àkjale kitsò-l̄a:

—Kii tsakjoòn-jèn; 'an, koií xá j'i-na nga síkì'nchré jngoò-nò 'én x̄it̄se xi ndaà tsò xi 'ñó k̄jotsja-l̄a ngats'ìi naxandá:

11 I'ndeì kats'iìn jngoò ki'ndí ya naxandá-la David jè xi kochrjekàjìin-ná kjo'in, jè xi Cristo, [xìtá xi xó kisikasén-ne Nainá], nga jè kotìxoma-ná.

12 Tjín jngoò seña nga kixì kjoa: sakò jngoò-nò ki'ndí xi tsjájtejìin nikje-la; kjinaya kaxa ñánda kjèn-ya cho.

13 Tik'e-ne kjìn jchán àkjale tsatsejèn-kjoò-ìsa xi inchrobà-ne ngajmìi xi 'nga kisikíjna Nainá. Kitsò:

14 Nainá kàtas'e-la kjoajeya ján ngajmìi;
ko jìt'aà nangui,

'nchán kàtas'e kjoa, it'aà ts'e xìtá xi tjín-la kjondaà-la Nainá.

15 K'e nga kiì-ne jñà àkjale ján ngajmìi, jñà paxtò kitsò-la xíkjin:

—Tíkjaán skanda Belén nga jchaá kjoa xi kòma koni s'ín kàsikí'nchré-ná Nà'èn-ná.

16 Nìtòón kiì jñà paxtò ján Belén; k'e nga ijchò, kisakò-la ñánda tíjna María ko José, koa jè ki'ndí, kjinaya kaxa ñánda kjèn-ya cho.

17 K'e nga kijtseèxkon ki'ndí jè, tsibénojímí yije koni s'ín kitsò jè àkjale it'aà ts'e ki'ndí.

18 Ngats'ii xìtá xi kiì'nchré koni s'ín kitsò jñà paxtò tà k'oaá komà-la.

19 Tanga jè María yaá tsibíjìin yije jìjìn inìma-la jñà 'én xi kis'enojmí-la. 'Ñó kisikítsjeèn-jìin kjoa koi.

20 Kiì ijngoò k'a-ne jñà paxtò; jeya tsachrje tìkoá ndaà kisikíjna Nainá ngats'ii kjoa xi kiì'nchré ko xi kijtseè, nga nguì k'oaá s'ín komà koni s'ín kis'enojmí-la.

K'e nga jñà xìtá jchínga-la Jesús kiìko ingo ítjòn ya Jerusalén nga kisìngatsja Nainá

21 K'e nga ijchò jìin nàchrjein nga kits'iìn ki'ndí jè, kisit'aà chìba-la yijo-la kjoa ts'e circuncisión; Jesús kisit'aà 'in-la koni s'ín kitsò àkjale-la Nainá k'e nga tìsa kisinaya'ma indso'ba nea-la.

22 Ijchò nàchrjein nga k'oa's'ín s'ín xìtá koi, koni s'ín tíchja kjotìxoma-la Nainá xi kiskìi Moisés, mé-ne jè María tsjeè kíjna-ne nguixkon Nainá. Nàchrjein koi, kiìko Jesús ingo ítjòn ya Jerusalén nga kisìngatsja Nainá.

23 K'oaá s'ín tjít'aà kjotìxoma-la Nainá xi kiskìi Moisés: “Ngats'ii ki'ndí x'in xi jts'ín ítjòn, ts'eé Nainá, jè kongatsja.”

24 Xìtá jchínga-la Jesús kiìko kjotjò-la nguixkon Nainá; jò tjoni'ña ko tsà jò pichón koni s'ín tjín kjotìxoma-la Nainá.

25 Koi nàchrjein ján Jerusalén tíjna jngoò xìtá kixì xi ndaà beèxkón Nainá, Simeón 'mì. Tìkoáá tìkoña-la jè xi sùikíjnandejì naxandá Israel; jè Simeón, yaá tíjnakò Inìma Tsjeè-la Nainá.

26 Jè Inìma Tsjeè-la Nainá k'oaá s'ín tsibénojímíya-la Simeón nga mìkiì kiyá skanda k'e nga skoèxkon Cristo xi Nainá sùikasén.

27 Jè Inìma-la Nainá kisikasén Simeón ján ingo ítjòn Jerusalén. K'e nga ijchòko Jesús jñà xìtá jchínga-la mé-ne nga kisìkitasòn-ne koni s'ín síjé kjotìxoma-la,

28 Simeón kiskoé ki'ndí jè, tsohóya tsja; 'nga kisikíjna Nainá. Kitsò:

29 Nà'èn, jyeé kòbitasòn 'én-lè koni s'ín ki'mì-ná,
j'ndeì, 'nchán kàtiyaà 'an xi chi'nda-lè ma.

30 Jyeé kòbe-na xkoaàn jè xi kochrjekátjì-ná kjo'in,

31 jè xi kànikíjna-osin nguixkon ngats'ii naxandá,

32 jè xi sùihiseèn-la kjohítsjeèn-la jñà xìtá xi mìtsà xìtá naxandá Israel.

It'aà ts'e ki'ndí jè, naxandá-lè Israel jeyaá kíjna.

33 Jñà xìtá jchínga-la Jesús tà k'oaá komà-la koni s'ín kitsò Simeón it'aà ts'e ki'ndí-la.

34 Simeón kisijét'aà-la Nainá nga kàtasíchikon-t'in; ikjoàn kitsò-la María, nea-la Jesús:

—It'aà ts'e ki'ndí jè, k'oaá s'ín tjínè-la nga kjìn xìtá naxandá Israel kitjoiìn kjo'in koa kjìn kixojìin. Seña-la Nainá kíjna

³⁵ mé-ne nga jcha-la kó s'ín tjín kjohítsjeèn-la nga jngoò ìjngoò xita, tanga kjìn xita xi mìkiì kokjeiìn-la; tikoaa ngaji, k'oaá s'ín s'e-lè kjo'on-takòn koni tsà jngoò kichà ndojò kotokjá inima-lè.

³⁶ Tikoaa yaá tjina chjoón Ana xi chjaya 'én-la Nainá, tsòti-la Fanuel xi tje-la Aser. Jyeé 'ño xita jchínga. Itoò nó tsibìjnako x'in-la.

³⁷ Nachrjein koi, jè chjoón Ana kò ñijòn kaàn kò ñijòn nó tjín-la nga tjina ka'àn. Yaá bijnaya nachrjein inchijòn ya nditsin ingo ítjòn; kò nachrjein kò nìtjen beèxkón Nainá; bítsi'ba-la koa bijnachjan.

³⁸ Tijè-ne hora, chjoón jè ijchò kasijnat'aà chraña-la xita jchínga-la Jesús; kitsjaà-la kjondaà Nainá; kiichja-la ngats'ii xita it'aà ts'e ki'ndí jè, jña xi tikoaa nchikoña-la nga kitjotji yije naxandá xi chja-ne Jerusalén.

K'e nga kii ìjngoò k'a-ne Nazaret

³⁹ José kò María, k'e nga jye kisihitasòn yije koni s'ín tíchja kjotíxoma-la Nainá, kii ìjngoò k'a-ne ján Galilea ya naxandá-la Nazaret.

⁴⁰ Ki'ndí jè tímajchínga; tís'e-la nga'ño ijìin inima-la; tikoaa isa ndaà tímachiya-la; yaá tjínako kjondaà-la Nainá.

Kii komà k'e nga jè Jesús tsibijnaya ingo ítjòn ján Jerusalén

⁴¹ Jña xita jchínga-la Jesús, xki nó fi ya Jerusalén k'e nga bitjo s'eí Paxko.

⁴² Jesús, k'e nga jye tjín-la tejò nó tikoaa kii ján Jerusalén koni s'ín choòn kjotíxoma ts'e s'eí Paxko.

⁴³ K'e nga inchrobà-ne xita nga jyehet'aà s'eí, jè Jesús yaá tsibìjna Jerusalén; koa jña xita jchínga-la mìkiì kisijìin-la tsà ya tsibìjna.

⁴⁴ Jngoò nachrjein chinchimaya ndiyá. Maá-la tsà yaá tsóhojìin-la jña xita xi nchifi-ne. K'e nga tsohótsjijìin-la xíkjin kò xita xi beèxkon,

⁴⁵ mìkiì kisakò-la. K'ee kii ìjngoò k'a ján Jerusalén nga kii kátsji.

⁴⁶ K'e nga komà ján nachrjein nga nchihótsji, kisakò-la ya nditsin ingo ítjòn; tjínajìin-la xita xi okóya kjotíxoma-la Nainá; tí'nchré-la tikoaa tíkjònangui-la.

⁴⁷ Ngats'ii xita xi nchi'nchré-la tà k'oaá komà-la jè kjohítsjeèn xi tjín-la koni s'ín tíchja.

⁴⁸ Jña xita jchínga-la, k'e nga kijtseè nga ya tjina, tikoaa tà k'oaá komà-la; jè nea-la kitsò-la:

—Ji na'èn, ¿mé-ne nga kos'ín nìko-nájen? Na'èn-lè kò 'an tímakájno-najen nga kichiji, titsabinchaàtsji-lèjen.

⁴⁹ Jesús kitsò:

—¿Mé-ne nga binchaàtsji-ná? ¿A mì tíjìin-nò nga tjínè-na nga ya kótijna ni'ya-la Na'èn-na?

⁵⁰ Tanga jña xita jchínga-la mìkiì jahas'en-jìin-la jè 'én xi kitsò Jesús.

⁵¹ Jesús, kii ìjngoò k'a-ne ján Nazaret kò nea-la kò na'èn-la; Jesús ndaà kisikitasòn-la xita jchínga-la. Jè nea-la tà yaá tsibìjìin-ikon inima-la ngats'ii kjoa koi.

⁵² Jesús, tímajchínga koa nachrjein inchijòn, isa ndaà tímachiya-la; tikoaa tís'e-la kjondaà-la Nainá kò ts'e xita.

3

'Én xi kiichja Juan xi kis'iin bautizar xita (Mateo 3:1-12; Marcos 1:1-8; Juan 1:19-28)

¹ K'e nga jye tjín-la chri'oon nó nga tíhotíxoma-la isò'nde xi chja-ne Roma jè xi 'mì Tiberio César, kò ján nangui Judea, jè tjina gobernador Poncio Pilato; kò jè Herodes, xitaxá ítjòn tjina ya nangui Galilea; kò jè Felipe xi 'ndse ma Herodes, xitaxá ítjòn tjina ya nangui ñánda 'mì Iturea kò ya nangui Traconite; kò jè Lisantias, xitaxá ítjòn tjina ya nangui Abilinia.

² Ko ján Jerusalén, no'miì íjtòn títsajna jè Anás ko Caifás. Tíkoi-ne nachrjein, Juan, ki'ndí-la Zacarías, kits'ìi-la 'én-la Nainá ya ì'nde ìt'aà xìn ñánda nangui kixì choòn.

³ Juan, kiì kóhokji ìndiì xajngá nandá Jordán nga kiichjaya nga kàtasíkájno jé-la jña xita nga mì tì jé kòhótsji-ne, ìkjoàn kàtas'ín bautizar yijo-la mé-ne nga siìjchàat'aà-la Nainá jé-la.

⁴ K'e nga k'oas'ín kiichjaya Juan, jña tíbitasòn 'én xi kiskìi Isaías, xita xi kiichja ngajo-la Nainá nga tsò:

Na'yà-la 'én xi 'ñó chja ya ì'nde ìt'aà xìn ñánda nangui kixì choòn:

“Tjandaà ndiyá-la Nainá ya ìjìin inìma-nò; kixì tìkìjna koni jngoò ndiyá ñánda kojmeèya Na'èn-ná.

⁵ Ngats'ìi xajngá kòngásòn-né;

ngats'ìi nindoò ko chrjanguì, kòkixì-né;

jña ndiyá xi tsó'ño tjín, tìkooá kòkixì-né;

koa jña ndiyá xi tjen-jen-jno tjen-jen-t'aà choòn, kojchoòn-la.

⁶ Ngats'ìi xita nga títsa ìsò'nde, skoe-né kó s'ín s'ìin Nainá nga kochrjekátjì jé-la xita.”

Kitsò Isaías.

⁷ Juan kitsò-la jña xita xi ijchò nga mejèn-la koma bautizar:

—jñò xi xita tje-la ye 'mì-nò! ¿Yá xi okitsò-nò nga kìnchat'aàxìn-là jè kjo'in xi sa nchrobá machrañat'aà-nò?

⁸ Ndaà tjín kjoa xi t'een nga ndaà kàta'ya-nò nga jyeé kinikájno jé-nò nga mì tì jé binchaàtsji-nò. Kì bixón-jèn ya ìjìin inìma-nò: “Ngajen, [mikiì s'e-najen kjo'in] nga yaá inchrobàt'aà-najen tje-la Abraham.” K'ooá xan-nò, Nainá, skanda jña ndajo komaá-la siìkjatjìya-la nga ìxti-la Abraham koma.

⁹ Jè kichayá jyeé kijnandaà nga kotesòn yá; ngats'ìi yá xi 'mì ndaà toò ojà-la, skanda ko ìma-la, jtísòn-né, ìkjoàn sìinchajìin ni'ín nga kiti.

¹⁰ Jña xita kiskònanguì-la kitsò-la:

—¿Mé xi s'en-jen?

¹¹ Juan kiichja kitsò-la:

—Jè xi jò ma nachro-la kàtatsjá jngoò-la jè xi tsjìn-la; jè xi tjín-la tsojmì xi kine, kàtatsjá-la jè xi tsjìn-la.

¹² Tìkooá j'ìi i'nga xita-la xitaxá Roma xi síkíchjítjì tsojmì nga mejèn-la koma bautizar. Kitsò-la Juan:

—Maestro, ngajen, ¿mé xi s'en-jen?

¹³ Juan kitsò:

—Kì tsato níkíchjió koni s'ín tíchja kjotíxoma.

¹⁴ Tìkooá kiskònanguì i'nga jña soldado, kitsò:

—Ngajen, ¿mé xi s'en-jen?

Juan kitsò-la:

—Kì xita binchaxkón-là, kì 'én ndiso nìyasòn-là k'e nga nì mé kjoa tjín-la nga ton mejèn-nò nachrjekájno-là; kàtajngoò-takòn koni tjín machjì-nò.

¹⁵ Nchikoña jña xita naxandá; nchisíkìtsjeèn ìjìin inìma-la xi ìt'aà ts'e Juan: tsà jè xi Cristo, [xita xi xó kisikasén-ne Nainá].

¹⁶ Juan kitsò-la ngats'ìi xita naxandá:

—Okixì-né, 'an, tà nandá s'ìin-nò bautizar; tanga nchrobá ìjngoò xi ìsa tse nga'ño tjín-la mì k'ooá-ne koni 'an; skanda mìkiì tjì'nde-na nga skíjnda'ñoá xox'ín-la xojté-la; jè xi sa nchrobá, s'ìin-nò bautizar ko Inìma Tsjeè-la Nainá koa ko ni'ín.

¹⁷ Jyeé kjinaya tsja jè pala nga siìtsjeè tjé-la trigo. Kìnchàxkó trigo ya ìya ni'nga; tanga jè tjé-la trigo, kòkà-né ya ìjìin ni'ín ñánda mìkiì bits'o nita mé nachrjein-ne.

¹⁸ Juan, k'ooá s'ín kiichjayajìin-la xita 'én ndaà-la Nainá; kjin skoya kjotíxoma tsibít'in-la xi ndaà tsò.

¹⁹ Juan, tsohótiko jè Herodes xi xita itjòn tjna, koií kjoa-la nga jè tijnako Herodías chjoón-la Felipe xi 'ndse Herodes. Tikoā tsohótiko Herodes ngats'ii kjoā xi ch'o tís'in.

²⁰ Tanga jè Herodes, isaá 'ño ch'o kis'iin-isa: ndayá kiskinìs'en Juan.

Kii komà k'e nga komà bautizar Jesús

(Mateo 3:13-17; Marcos 1:9-11)

²¹ K'e nga tikj'eè ndayá fahas'en Juan nga tís'in bautizar ngats'ii xita naxandá, tikoá k'eé komà bautizar Jesús; k'e nga tichjat'aà-la Nainá Jesús, kitáx'a ngajmii.

²² Ikjoàn itjojen-nè-la Jesús jè Inima Tsjeè-la Nainá xi okji koni kji nise paloma; koa kina'yà jngoò-la 'én xi ngajmii inchrobà-ne xi kitsò:

—Ji-né xi ki'ndí-na xan-lè xi 'ño matsjake-lè; tsja tjin-la takoàn it'aà tsjji.

Tje-la Jesucristo

(Mateo 1:1-17)

²³ Jesús k'e nga tsibíts'ia nga kisixá, tjin-la tsà katé nó. K'oaá s'in tjiin-la xita, nga ki'ndí-la xó José; José, ki'ndí-la Elí;

²⁴ Elí, ki'ndí-la Matat; Matat, ki'ndí-la Leví; Leví, ki'ndí-la Melqui; Melqui, ki'ndí-la Jana; Jana, ki'ndí-la José;

²⁵ José, ki'ndí-la Matatías; Matatías, ki'ndí-la Amós; Amós, ki'ndí-la Nahúm; Nahúm, ki'ndí-la Ešli; Ešli, ki'ndí-la Nagai;

²⁶ Nagai, ki'ndí-la Maat; Maat, ki'ndí-la Matatías; Matatías, ki'ndí-la Semei; Semei, ki'ndí-la Josec; Josec, ki'ndí-la Judá;

²⁷ Judá, ki'ndí-la Joanán; Joanán, ki'ndí-la Resa; Resa, ki'ndí-la Zorobabel; Zorobabel, ki'ndí-la Salatiel; Salatiel, ki'ndí-la Neri;

²⁸ Neri, ki'ndí-la Melqui; Melqui, ki'ndí-la Adi; Adi, ki'ndí-la Cosam; Cosam, ki'ndí-la Elmodam; Elmodam, ki'ndí-la Er;

²⁹ Er, ki'ndí-la Josué; Josué, ki'ndí-la Eliezer; Eliezer, ki'ndí-la Jorim; Jorim, ki'ndí-la Matat;

³⁰ Matat, ki'ndí-la Leví; Leví, ki'ndí-la Simeón; Simeón, ki'ndí-la Judá; Judá, ki'ndí-la José; José, ki'ndí-la Jonam; Jonam, ki'ndí-la Eliaquim;

³¹ Eliaquim, ki'ndí-la Melea; Melea, ki'ndí-la Mainán; Mainán, ki'ndí-la Matata; Matata, ki'ndí-la Natán;

³² Natán, ki'ndí-la David; David, ki'ndí-la Isaí; Isaí, ki'ndí-la Obed; Obed, ki'ndí-la Booz; Booz, ki'ndí-la Salmón; Salmón, ki'ndí-la Naasón;

³³ Naasón, ki'ndí-la Aminadab; Aminadab, ki'ndí-la Aram; Aram, ki'ndí-la Esrom; Esrom, ki'ndí-la Fares; Fares, ki'ndí-la Judá;

³⁴ Judá, ki'ndí-la Jacob; Jacob, ki'ndí-la Isaac; Isaac, ki'ndí-la Abraham; Abraham, ki'ndí-la Taré; Taré, ki'ndí-la Nacor;

³⁵ Nacor, ki'ndí-la Serug; Serug, ki'ndí-la Ragau; Ragau, ki'ndí-la Peleg; Peleg, ki'ndí-la Heber; Heber, ki'ndí-la Sala;

³⁶ Sala, ki'ndí-la Cainán; Cainán, ki'ndí-la Arfaxad; Arfaxad, ki'ndí-la Sem; Sem, ki'ndí-la Noé; Noé, ki'ndí-la Lamec;

³⁷ Lamec, ki'ndí-la Matusalén; Matusalén, ki'ndí-la Enoc; Enoc, ki'ndí-la Jared; Jared, ki'ndí-la Mahalaleel; Mahalaleel, ki'ndí-la Cainán;

³⁸ Cainán, ki'ndí-la Enós; Enós, ki'ndí-la Set; Set, ki'ndí-la Adán; Adán, xi jè sobà Nainá tsibíndaà.

4

K'e nga jè xita neii kiskoòt'aà Jesús

(Mateo 4:1-11; Marcos 1:12-13)

¹ Jesús, nga ndaà tíjìn inìma-la jè Inìma Tsjeè-la Nainá, inchrobà ìjngòò k'a-ne ya xajngá nandá Jordán, koa jè Inìma Tsjeè-la Nainá kiiko jngòò ì'nde ìt'aà xìn ñánda nangui kixi choòn.

² Ichán nàchrjein tsibìjna. Jè xita neí kiskoòt'aà nga mejèn-la kàtátsji jé Jesús. Ngats'ìi nàchrjein koi, Jesús mìkiì tsakjèn, tsibìjnachjan-né. K'e nga jyehet'aà nàchrjein, jyeé 'ñó kjòhò-la.

³ Jè xita neí kitsò-la:

—Tsà kixi kjoa nga ngaji xi Ki'ndí-la Nainá 'mì-lè, tjiì-la okixi ndajo jè nga inchrajín kàtama.

⁴ Jesús kiìchja kitsò:

—Tjít'aà Xojoñ-la Nainá nga tsò: “Mítsà tà koi tsojmì xi ma chine kítsakon-ne xita, tìkoáá kítsakoón-ne ngats'ìi 'én-la Nainá.”

⁵ Jè xita neí kiiko Jesús jngòò nindoò 'nga, tà jngòòhijta tsakó yije-la ngats'ìi naxandá xi tjín isò'nde.

⁶ Jè xita neí kitsò-la Jesús:

—Ngajíi tsjaà yije-lè ngats'ìi naxandá koi, nga jì kotixoma-la nga jeya kijni. Nga 'aán kjòngatsja yije. Tsà mejèn-na maá sìngatsja nita yá-ne.

⁷ Ngaji, tsà kosixkó'nchit'aà-ná ko jeya sikíjna-ná, tsjii koma kóhòtjín.

⁸ Kiìchja Jesús, kitsò-la:

—Tjìsit'aà xìn-ná jì, xita neí. K'oaá s'ín tjít'aà Xojoñ-la Nainá nga tsò: “Jeya tikíjni Na'èn-ná xi Nainá; tà jè tajngòò chaxkoín.”

⁹ Jè xita neí, ìkjoàn kiiko Jesús ján Jerusalén; kisikíjnasòn ìngo ítjòn ñánda isa 'nga kji; kitsò-la:

—Tsà kixi kjoa nga jì xi Ki'ndí-la Nainá 'mì-lè, tìkatjengui yijo-lè ijndé;

¹⁰ k'oaá s'ín tjít'aà Xojoñ-la Nainá nga tsò:

Nainá koií xá-la àkjale-la mé-ne nga sìikinda-lè,

¹¹ nga ko tsja tsoba'ñó-lè mé-ne nga nijngòò ndajo satíngui-ne ndsokoiì.

¹² Kiìchja Jesús, kitsò-la:

—K'oaá s'ín tíchja Xojoñ-la Nainá nga tsò: “Kì taxki chít'aà-jèn Na'èn-ná xi Nainá.”

¹³ Jè xita neí, k'e nga mì tì kiì kisakò-la kós'ín skónachan-la Jesús nga mejèn-la kohótsji jé, tsasit'aà xìn chiba nàchrjein-la skanda komà iskan.

Kíi komà nga tsibít'ia Jesús nga kisixá nangui Galilea

(Mateo 4:12-17; Marcos 1:14-15)

¹⁴ Jesús j'ìi ìjngòò k'a-ne Galilea, ko nga'ñó-la Inìma Tsjeè-la Nainá ndaà tíjìn inìma-la; kina'yà-la ìt'aà ts'e, kóhokji nga jngòò itjandiì nangui ts'e Galilea.

¹⁵ Tsakóya ya ni'ya ìngo sinagoga xi ts'e naxandá ñánda tsajmeè; ngats'ìi xita xi kiì'nchré 'én-la ndaà kisikíjna Jesús.

Kó kitsò Jesús nga mì kiì kòkjeiín-la jña xita ya naxandá-la Nazaret

(Mateo 13:53-58; Marcos 6:1-6)

¹⁶ Jesús ijchò Nazaret ya nangui-la ñánda kòjchá. Jè nàchrjein nìkjáya, koni s'ín s'ín kjit'aà, jahas'en ni'ya ìngo sinagoga. Tsasìjna kixi nga tsibíxke Xojoñ-la Nainá.

¹⁷ Kits'ìi-la xojoñ-la Isaías, xita xi kiìchja ngajo-la Nainá; k'e nga kiskíjndaya jè xojoñ, kjòtsji-la ñánda tjít'aà 'én xi tsò:

¹⁸ Jè Inìma Tsjeè-la Nainá tíjnakò-na nga 'aán tsibít'aà-na xá nga sika'bí-la xita ima 'én ndaà-la Nainá;

'aán kisikasén-na nga sìndaà-na xita xi kjo'on tíjìn inìma-la;

tìkoáá koi xá kisikasén-na nga 'an kichjàjìin-la xita xi ndayá títsajna nga kítsajnadejì-ne; sìndaà-na jña xita xi mìkiì tsejèn-la;

kítsajnadejì xita xi tíyatoòn;

¹⁹ kichjàya jè nó-la Nainá k'e nga tsjá-la kjotjò xita-la.

²⁰ Tsibíxkóya-ne xojon, kitsjaà-la jè xita xi síchjât'aà xá ts'e ni'ya ingo sinagoga, ikjoàn tsibijna. Tà nchikotsejèn-la ngats'ì xita xi ya títsajna.

²¹ K'ée tsibits'ia Jesús nga kiichja kitsò:

—I'nde, jyeé kàna'yà-là nga nguixkoòn kòbitasòn koni s'ín tíchja Xojon-la Nainá xi 'an kòbìxkee.

²² Ngats'ì xita ndaà kiichja it'aà ts'e Jesús. Tà k'oaá komà-la nga 'ño ndaà tsò 'én xi chja. Jña xita kitsò-la xíkjin:

—¿A mìtsà jè jèe xi ki'ndí-la José?

²³ K'ée kitsò Jesús:

—Xi okixi, jño, k'oaá k'oín-ná 'én xi tsò: “Chjine xki, tiji tixki-la yijo-lè.” K'oaá tís'ín k'oín-ná: “Koni s'ín kina'yà-jen kjoa xi ki'nì ján Capernaum nga kinìxki-la xita, k'oa tís'ín tixki-la j nangui-lè.”

²⁴ Jesús kitsò-isa:

—Okixi xi xan-nò, nijngoò xita xi chja ngajo-la Nainá xi yaxkón ya nangui-la.

²⁵ Tikoá okixi xi xan-nò, kjìn íchjín ka'àn tjin ya Israel jè nachrjein ts'e Elías k'e nga jàn nó osen mì tì kiì ts'a-ne jtsí; j'ì kjìnchrá 'ño kòhokji j'nde Israel.

²⁶ Tanga jè Elías mìtsà ya kiì ñánda títsajna íchjín ka'àn ts'e naxandá Israel; yaá kinikasén ñánda tjna chjoón ka'àn ts'e naxandá Sarepta xi chja-ne Sidón.

²⁷ Tikoá kjìn ma xita xi tìbindojno chrjoa yijo-la ya Israel koi nachrjein ts'e Eliseo, xita xi kiichja ngajo-la Nainá. Tanga nijngoò xi xita Israel kjòndaà-ne, tà jè tajngoò Naamán xi Siria ts'e.

²⁸ Ngats'ì xita xi ya títsajna ya ni'ya ingo sinagoga, 'ño kòjti-la k'e nga kiì'nchré 'én xi kiichja Jesús nga k'oaá s'ín kiskaàya-la nga kondra ts'e-né.

²⁹ Ngats'ì xita koi tsasítjen, tsachrjeiin Jesús ya naxandá jè, kiìko isò'nga nindoò ñánda kijna naxandá-la nga mejèn-la sùikatjen-ngui naxi ñánda nga 'ño tjen-jen-jno choòn.

³⁰ Tanga jè Jesús jahajìn osen-la koa kiì.

*Jngoò xita xi inima ch'o-la neí síxajìn yijo-la
(Marcos 1:21-28)*

³¹ Jesús kiì ñánda 'mì Capernaum, naxandá xi chja-ne Galilea; tsakóya-la xita k'e nga nachrjein nìkjáya.

³² Jña xita, tà k'oaá komà-la koni tsò 'én xi tsakóya, nga jè 'én xi kiichja, tjin-la kjotixoma.

³³ Ya ni'ya ingo sinagoga tjna jngoò xita xi inima ch'o-la neí síxajìn yijo-la; xita jè, 'ño kiichja:

³⁴ —Jesús xi Nazaret tsiji, ki k'oaá nìko-nájen. ¿Mé kjoa xi tjin-lè ko ngajen? ¿Mé-ne ngajen nìjti-nájen? ¿A kòf'i nìkjesòn-nájen? Beèxkon-lè; jì-né xi Xita Tsjeè-la Nainá —kitsò.

³⁵ Jesús tsohótiko jè xita neí:

—jyò tjni, titjoiìn yijo-la xita jè! —kitsò-la.

Jè inima ch'o-la neí, tsajndoòt'aà nangui nga nguixkon ngats'ì xita, ikjoàn itjoiìn yijo-la xita jè, tanga nì mé xi kisiki'on.

³⁶ Ngats'ì xita xi títsajna, tà kitsakjòn-né; k'ée tsohóko xíkjin:

—¿Mé 'én-ne koi? K'e nga chja xita jè, tjin-la nga'ño tikoá tjin-la kjotixoma nga síkitasòn-la inima ch'o-la neí —kitsò.

³⁷ Jesús, kina'yà-la kòhokji nga jngoò itjandi nangui xi chja-ne Galilea.

*Kíi kis'ìn Jesús nga kisindaà-ne nachíya-la Pedro
(Mateo 8:14-15; Marcos 1:29-31)*

³⁸ Jesús tsasítjen; itjo-ne ni'ya ingo sinagoga; kiì; jahas'en ni'ya-la Simón. Jè nachíya-la Simón 'ño xk'én. Ch'in tjnnga tjin-la. Jña xita kiichjatjì nga skótsejèn-la.

³⁹ Jesús tsasiñiat'aà-la, tsohótiko ch'in tìjnga; jè chjoón nitoón kjòndaà-ne. Ikjoàn tsasítjen, kisìs'in-la xità.

*Kii kis'iin Jesús nga kjìn xità xk'én kisindaà-ne
(Mateo 8:16-17; Marcos 1:32-34)*

⁴⁰ K'e nga tíkaàtjì ts'oi, ngats'iì xità xi tjin-la xità xk'én xi kjìn skoya ch'in tjin-la, j'iiko ñánda tíjna Jesús. Jè Jesús tsohót'aà-la tsja nga jngoò ìjngoò xità xk'én; ngats'iì xità koi, kjòndaà yijeé-ne.

⁴¹ Tìkoáá kjìn ma xità xi inima ch'o-la neií itjokàjìn yijo-la nga kjòndaà-ne. 'Ñó kiichja inima ch'o-la neií:

—jji-né xi Ki'ndí-la Nainá 'mì-lè! —kitsò.

Tanga jè Jesús tsohótiko. Mikii kitsjaà'nde-la nga kiichja, koií kjoa-la nga jyeé beèxkon nga jè xi Cristo, [xità xi xó kisikasén-ne Nainá].

*Kii komà k'e nga jè Jesús kisika'bí 'én-la Nainá
(Marcos 1:35-39)*

⁴² K'e nga jye kis'e isén, itjo Jesús; kii jngoò i'nde it'aà xìn ñánda tsjin xità. Jña xità tsohótsji ñánda kiì. K'e nga ijchò ñánda tíjna, mejèn-la nga ya kíjnako nga mì xìn kjoì.

⁴³ Tanga jè Jesús kitsò-la jña xità:

—Tìkoáá mochjeén-né nga xìn naxandá kjíkoáa 'én ndaà-la Nainá koni s'in otíxoma Nainá. Koií xá kisikasén-na Nainá.

⁴⁴ K'oaá s'in chjaya 'én-la Nainá kóhokji ni'ya ingo sinagoga xi tjin ya nangui-la xità judío.

5

*Kjoxkón xi komà k'e nga kjìn tìn tsibíxkóya Pedro
(Mateo 4:18-22; Marcos 1:16-20)*

¹ Jesús k'e nga síjna ya indiì ndáchikon ts'e Genesaret kjòjtínè jña xità xi ijchò nga mejèn-la kji'nchré 'én-la Nainá.

² Jesús, kijtseè jò chitso xi ya kjioèndiì ya indiì nandá. Jña xità nei-la xi bíxkóya tìn, jyeé itjojen chitso nga nchihoníjno na'ya-la.

³ Jesús jahas'en jngoò chitso xi ts'e Simón, tsibítsi'ba-la nga skinikjá-isa chitso-la ya ijìn ndáchikon. Ikjoàn tsibijnaya nga tsakóya-la xità.

⁴ K'e nga jye tsakóya-la xità, kitsò-la Simón:

—Tikojì chitso-lè ñánda nga isa 'ño nanga nandá; ikjoàn tìkatjen-ngui-ndá na'ya-nò mé-ne nga kíxkóya-nò tìn.

⁵ Simón kiichja kitsò:

—Maestro, kànik'a-nájen nítjen nga kànixá-jen, nímé xi kàsakó-najen; tanga tsà jì xi osi nga siikatjen-ngui-ndá na'ya-na, koma-né.

⁶ K'e nga ìjngoò k'a kisikatjen-ngui-ndá na'ya-la, kjìn jchán tìn tsibíxkóya, tsí mejèn xajndà na'ya-la.

⁷ K'eé kisikatjì-la tsja xíkjin nga kiichja-la jña xità xi títsaya chitso xi ìjngoò mé ne nga kisichját'aà-la. Ingajò chitso jngoò k'a kitseè tìn. Mejèn tsà bixòngui-ndá nga 'ño i'í komà.

⁸ Jè Simón xi tìkoá Pedro 'mì, k'e nga kijtseè kjoa koi, tsasèn-xkó'nchit'aà-la Jesús, kitsò-la:

—Tìsít'aàxìn-ná Na'èn, 'an xità jé-ná!

⁹ Jè Simón ko xità xíkjin xi taña síxákjoò, tà kjòxkón-la nga 'ño kjìn tìn kjòxkóya-la.

¹⁰ Tìkoáá tà kjòxkón-la jè Jacobo ko Juan, ixti-la Zebedeo, jña xità xi taña síxákjoò Simón. Jesús kitsò-la Simón:

—Kì tsakjoèn-jèn, i'ndeì mì tì kiì tìn kíxkóya-ne, xitàá kíxkóyi xi it'aà ts'an.

11 K'e nga jye kiiko-ne chitso-la ya indii ndáchikon, yaá kitsjeiin-takòn yije tsojmì-la, ikjoàn kiitjngui-la Jesús.

K'e nga jè Jesús kisitsjeè jngoò xita xi tbindojno chrjoa yijo-la
(Mateo 8:1-4; Marcos 1:40-45)

12 Jesús k'e nga tsibìjna jngoò naxandá, ijchò jngoò xita x'in xi tbindojno chrjoa yijo-la; nga kijtseè Jesús, tsohojna-ñiat'aà nangui nga kijtseèxkón Jesús, tsibítsi'ba-la, kitsò-la:

—Na'èn, tsà mejèn-lè, tìtsjeè-ná ch'in xi tjin-na.

13 Jesús tsijmeé tsja nga tsohót'aà-la yijo-la xita jè, kitsò-la:

—Mejèn-na; ikàtandaà-ne!

Xita jè, nitoón kjòndaà-ne.

14 Jè Jesús kitsò-la:

—Kì yá xita xi bènojmi-la; t'in ñánda tíjna no'miì; takó-la yijo-lè nga jye kjòndaà-ne; tjiì-la kjotjò xi síjé kjotíxoma-la Moisés mé-ne nga tsjeè kijna-ne nguixkón Nainá tikoá skoe jña xita nga jye kjòndaà-ne ch'in-lè.

15 Tanga Jesús, isaá 'ño kina'ya-isa-la; ko isaá kjìn xita kjòxkóya xi mejèn-la nga kji'nchré-la; tikoá mejèn-la nga kondaà-ne ch'in xi tjin-la.

16 Tanga Jesús xìn i'nde fi ñánda tsjìn xita nga chjat'aà-la Nainá.

Kii kis'iin Jesús nga kisindaà jngoò-ne xita xi mi ki ma síhiníyá yijo-la
(Mateo 9:1-8; Marcos 2:1-12)

17 Jngoò nachrjein k'e nga tíhokóya-la xita Jesús, ya títsajnajìin xita fariseo ko xita xi okóya kjotíxoma-la Nainá xi kiskii Moisés. Xita koi, ján inchrobà-ne naxandá xi chja-ne Galilea, Judea ko Jerusalén. Jesús ya tíjnajiìn inima-la nga'ño-la Nainá nga siindaà-ne ngats'iì xita xi xk'én.

18 J'iiko jngoò xita xk'én xi mikii ma síhiníyá yijo-la; kjiya-la nachan-yá. Tsohótsji'nde-la kó s'ín síikas'en xotjoa ni'ya ya ñánda tíjna Jesús.

19 Tanga mikii komà jahas'en ni'ya nga 'ño kjìn xita títsajna; k'eé tsijin isò'nga ni'ya; jaàxàn nitja; kiskinìjen-jìin-la xita koni s'ín kjiya nachan-yá-la jè xita xk'én. Yaá tsohójna nguixkón ñánda tíjna Jesús.

20 Jesús k'e nga kijtseè nga mokjeiín-la it'aà ts'e, kitsò-la jè xita xk'én:

—Ngaji, jyeé kàchàat'aà-lè jé-lè.

21 Jña xita fariseo ko xita xi okóya kjotíxoma-la Nainá xi kiskii Moisés tsohóko inima-la, kitsò: “Xita jè, chjajno-la Nainá koni s'ín tsò. ¿Yá-né jè nga ma-la síjchàat'aà-ná jé-ná? Tajngoò Nainá xi síjchàat'aà-ná jé-ná.”

22 Jesús kijtseèya-la koni s'ín nchisíkítsjeèn; kiichja, kitsò-la:

—¿Mé-ne kotsò-ne inima-nò?

23 ¿Mé xi isa chiba 'in tjin, tsà xán-la jè xita xi xk'én: “Jé-lè jyeé kichàat'aà-lè”, ko tsà xán-la: “Tisítjìin koa tjtjei?”

24 Kokoò-nò nga 'an xi Ki'ndí-la Xita xan-la yijo-na, tjí'nde-na nga síjchàat'aà-la jé-la xita i isò'nde.

Jè Jesús k'eé kitsò-la jè xita xi mikii ma síkjaníyá:

—Ji, k'oaá xan-lè, tísítjìin, chjoí nachan-lè, t'in-ne ni'ya-lè.

25 Jè xita xk'én nitoón tsasítjen nga nguixkón ngats'iì xita xi ya títsajna; kiskoé nachan-la xi kijnasòn; k'e nga tífi-ne ni'ya-la, jeya chjat'aà-la Nainá.

26 Ngats'iì xita xi ya títsajna tà kjòxkón-la, tikoá jeya kiichjat'aà-la Nainá. Tsakjón-ko-ne, kitsò:

—I'ndeì kàyaxkón jngoá kjòxkón.

Mé kjoa xi komà k'e nga jè Jesús kiichja-la Leví
(Mateo 9:9-13; Marcos 2:13-17)

²⁷ K'e nga jye os'ín komà kjoa koi, itjo Jesús, kiì; k'eé kijtsee jngoò xita xi 'mì Leví, xita-la xitaxá Roma xi síkíchítjì tsojmì. Tíjnat'aà ímíxá yá ñánda síkíchítjì tsojmì ts'e Roma. Jesús kitsò-la:

—Nchrobátjìngui-ná.

²⁸ Leví, tsasítjen; kisíkítsajna yije tsojmì xi tjin-la; kiìtjìngui-la Jesús.

²⁹ Leví, yá ni'ya-la, tsí ndaà kis'iìn-la s'eí Jesús. Tíkooá kjìn xita xíkjin títsajna xi tikoá tsojmì síkíchítjì, kò xita xi kj'eí; títsat'aà ímíxá.

³⁰ Jñà xita fariseo kò xita xi okóya kjotíxoma-la Nainá xi kiskiì Moisés tsatít'aà xita xi kota'yát'aà-la Jesús, kitsò-la:

—¿Mé-ne jñà xita xi síkíchítjì tsojmì, kò xi tjin-la jé, 'yò-koo koá bichi-koo?

³¹ K'eé kiìchja Jesús kitsò:

—Jñà xita xi mìtsà ch'in tjin-la mìtsà chjine xkiì mochjeén-la, tà jñà xita xi xk'én xi mochjeén-la chjine xkiì.

³² Mìtsà koi xá j'i-na 'an nga j'íkjaàjñà xita kixi, jñà-né xita xi tjin-la jé nga kàtasíkájno jé-la nga mì tì jé kohótsji-ne.

Kó kitsò Jesús k'e nga kitjònanngui-la mé-ne mì bìtsajnachjan-ne xita-la

(Mateo 9:14-17; Marcos 2:18-22)

³³ Jñà xita kitsò-la Jesús:

—¿Mé-ne jñà xita xi kota'yát'aà-la Juan tsí ndaà bìtsajnachjan tikoá tsí ndaà bítsi'ba; k'ooá tìs'ín jñà xita fariseo; tanga jñà xita tsiji, kjèn-né koá 'biì-né?

³⁴ Jesús kitsò-la:

—K'e nga bixan jngoò xita, ¿a komaá síkítsajnachjaán xita xi báhjtako-ná k'e nga tákó tíjna xita x'in xi kòbixan?

³⁵ Tanga kijchò nachrjein nga tjáxin-la x'in xi kòbixan, k'e-né nga kítsajnachjan xita.

³⁶ Tíkooá tsibénojmi jngoò-la 'én xi mangásòn [nga tsakóya-la nga jñà kjotíxoma jchínga, mìkiì sasén-la xi kjotíxoma xitse]. Kitsò-la:

—Mìtsà yá xi ote chiba nikje xitse nga bíto-ne kò nikje ibaà. Tsà kos'ín s'een kìts'ón nikje xitse; tíkooá mìkiì ndaà kongásòn nikje xitse kò nikje ibaà.

³⁷ Tíkooá mìtsà yá xi binchá xán ixii chrjoa jchínga; tsà kos'ín s'een, k'e nga jye kojchá xán, sùxajndà chrjoa jchínga, íkjoàn xíxteèn xán; tíkooá chija jè chrjoa.

³⁸ Jè xán ixii, chrjoa xitsee sinchá mé-ne nga ndaà sinchátjò-ne.

³⁹ Tsà yá xi skoí xán jchínga xi kjòtsee jncha, mìkiì nìton sùjé ìjngoò k'a xi xán ixii. Kìtso-né: “Jè xán jchínga, isaá ndaà.”

6

K'e nga jñà xita xi kota'yát'aà-la Jesús tsate natín jè nachrjein nìkjáya

(Mateo 12:1-8; Marcos 2:23-28)

¹ Jngoò k'a jè nachrjein nìkjáya, ja Jesús ñánda títje trigo. Xita xi kota'yát'aà-la tsate natín-la trigo, tsafèya-ne tsja, íkjoàn kiskine.

² Tjin i'nga xita fariseo xi kitsò:

—¿Mé-ne kò'nè-enò jè kjoa xi mìkiì tjí'nde nga kos'ín koma jñà nachrjein nìkjáya?

³ Kiìchja Jesús, kitsò-la:

—¿Jñò, a mìtsà jye tíjìin-nò koni s'ín tíchja Xojon-la Nainá koni kis'iìn xitaxá ítjòn xi ki'mì David kò jñà xita-la xi kjihjtako k'e nga kjòhojò-la?

⁴ Jahas'en ni'ya-la Nainá; kiskoé inchrájin tsjeè-la Nainá; tsakjèn. Tikoá kitsjaà-la xita-la xi tjiko. Mìkiì tjí'nde nga jñà kòkjen. Tà jñà no'miì tjí'nde-la nga kòkjen.

⁵ Jesús kitsò-isa-la:

—'An xi Ki'ndí-la Xita xan-la yijo-na, 'aán otìxoma-la nachrjein nìkjáya.

Xità xi kixit'aà jngoò tsja
(Mateo 12:9-14; Marcos 3:1-6)

⁶ Jngoò k'a k'e nga jè nachrjein nìkjáya, Jesús jahas'en ni'ya jngo sinagoga; tsibíts'ia nga tsakóya-la xità. Koá yaá tíjna jngoò xità xi kixit'aà tsja kixi.

⁷ Jñà xità xi okóya kjotíxoma-la Nainá xi kiskii Moisés kò xità fariseo nchisíkinda Jesús kó s'iin, a sùndaá-ne jè xità xi xk'én jè nachrjein nìkjáya; mejèn-la nga skoe mé-ne nga koma kohôngui-ne.

⁸ Tanga Jesús jyeé tíjìn-la kó s'ín nchisíkítsjeèn jñà xità koi. Kitsò-la jè xità xi kixit'aà tsja:

—Tisítjìn, tisijna kixi ya jngoò osen.

Xità jè tsasítjen, tsasijna kixi.

⁹ Jesús, k'eé kitsò-la ngats'ii xità xi ya títsajna:

—Jngoò kjoá skònangui-nò: ¿A tíj'nde-né k'e nga jè nachrjein nìkjáya nga ndaà s'eén, o xi ch'o s'eén? ¿A sik'en-ná o xi sùndaá-ná jngoò xità?

¹⁰ Jesús kiskoòtsejèn yije-la kóhótjín xità xi ya títsajnandii-la. K'eé kitsò-la jè xità xi kixit'aà tsja:

—Tjeèdojoi ndseji.

Xità jè, tsijmeé tsja, nitoón kjòndaà-ne.

¹¹ Jñà xità fariseo, 'ñó jti komà-la; k'eé tsibíts'ia nga tsajoóya-ne mé xi siko Jesús.

Kó 'mì 'ín-la xità-la Jesús xi kota'yàt'aà-la xi tejò ma-ne
(Mateo 10:1-4; Marcos 3:13-19)

¹² Tijnà-ne nachrjein koi, Jesús kìmijìn-jno jngoò nindoò nga kùchjat'aà-la Nainá; kisik'a nitjen nga tíchjat'aà-la.

¹³ K'e nga kis'e isén kùchja-la xità xi kota'yàt'aà-la; ikjoàn jaàjìn tejò xità xi tsibíxáya-la.

¹⁴ Jè Simón xi tikoá Pedro tsibít'aà 'ín; Andrés xi 'ndse ma Simón; Jacobo; Juan; Felipe; Bartolomé;

¹⁵ Mateo; Tomás; Jacobo, ti-la Alfeo; Simón xi ya fit'aà-la kjotíxoma ts'e xità Celote;

¹⁶ Judas, ti-la Jacobo; kò Judas Iscariote, jè xi iskan komà kondra-la Jesús.

K'e nga jè Jesús, kjìn xità kisìndaà-ne
(Mateo 4:23-25)

¹⁷ Jesús itjojen-jno-ne nindoò, tjiko xità xi kota'yàt'aà-la; j'ii jngoò i'nde ñánda isòn choòn; yaá tsibítsajna. Kjìn ma xità-la xi ya nchikoña-la; tikoáá kjìn ma xità xi kj'eí xi inchrobà-ne kóhokji i'nde Judea kò naxandá Jerusalén kò xi inchrobà-ne Tiro kò Sidón, naxandá xi kjijijòndii ndáchikon. Koi xá j'ii-ne nga kji'nchré-la Jesús, tikoá mejèn-la kondaa-ne ch'in xi tjín-la.

¹⁸ Jñà xità xi inima ch'o-la neí síjti-la, tikoáá kjòndaà-ne.

¹⁹ Ngats'ii xità, mejèn-la nga koòt'aà-la tsja yijo-la Jesús nga tsee nga'ño tìbitjojìn yijo-la nga mandaà yije-ne xità.

Kó kitsò Jesús it'aà ts'e xità ima kò xità nchíná
(Mateo 5:1-12)

²⁰ Jesús kiskoòtsejèn-'a xità xi kota'yàt'aà-la kitsò-la:

—Mé tà ndaà-anò jñò xi xità ima 'mì-nò, nga tsajòn-nó jñà kjòndaà xi tsjá Nainá nga jè tíhotíxoma.

²¹ 'Mé tà ndaà-anò jñò xi ijò-nò i'ndeí, nga koma iskan, koskii-nò.

'Mé tà ndaà-anò jñò xi chihindáya i'ndeí, nga koma iskan kijno-nò.

²² 'Mé tà ndaà-anò k'e nga tjín xità xi síjtikeè-nò tà 'an ngatjì-na xi Ki'ndí-la Xità xan-la yijo-na; k'e nga síkítsajnat'aàxìn-nò, k'e nga chja'on-kò-nò, k'e nga ochrjekàngui-nò koni tsà jngoò xità xi 'ñó ts'en.

²³ Tsja t'è-là takòn jè nachrjein koi; tìtsja-là inìma-nò; tsee kjondaà tjoé-nò ján ngajmì; tìkoáá jñà xìta jchínga-là xìta xi beètoòn-nò, k'oaá tìs'ín kijtseètoòn jñà xìta xi kùchja ngajo-là Nainá.

²⁴ 'Tanga ìma-xó-nò jñò xi xìta nchíná 'mì-nò nga tjin yije-nò xi mochjeén-là yijo-nò [tanga mìkìi nìkìtsjeèn kjondaà-là Nainá xi mochjeén-là inìma-nò].

²⁵ 'Ìma-xó-nò xi skìi tìtsajnaà ì'ndeì; k'e nga koma ìskan, kòhojò-nò.

'Ìma-xó-nò jñò xi bijnò ì'ndeì; k'e nga koma ìskan kobaá-nò koa jchìhindáya-nò.

²⁶ 'Ìma-xó-nò jñò k'e nga ndaà síkìtsajna yije-nò xìta. Jñà xìta jchínga k'oaá tìs'ín ndaà kiskìtsajna jñà xìta xi 'én ndiso kùchjaya.

Kó s'ín sikoáá xita kondra-ná

(Mateo 5:38-48; 7:12)

²⁷ 'Tanga jñò xi tìtsana'yà, k'oaá xán-nò: Tìtsjacha kondra-nò, ndaà tìkoo jè xi jtikeè-nò.

²⁸ Tìjèt'aà-là Nainá nga kàtasíchikon-t'in jñà xi chja'on-ko-nò, tìtsi'batjiò jè xi ch'o síko-nò.

²⁹ Jè xi síjts'ìn-t'aà kjioòn, tìkoa tjiì-là xi ngobà; jè xi faá'an nachrokisòn-nò, tìkoa tjiì-là nachro-nò xi ìjngò.

³⁰ Nìta yá xìta xi síjé-nò tsojmì, tjiì-là; tsà yá xi skoé xi tsojmì tsajòn, kì tì kù nìjé-là.

³¹ Koni s'ín mejèn-nò nga sùiko-nò xìta, k'oaá tìs'ín tìko ngajo-nò.

³² 'Tsà matsjacha jè xi matsjakeè-nò, nìmé kjondaà xi s'e-nò, nga k'oaá tìs'ín jñà xìta ts'en, matsjakeè xíkjin.

³³ Tsà tà jñà ndaà sikoò xìta xi tìkoa ndaà síko-nò, nìmé kjondaà xi s'e-nò. Jñà xìta ts'en, k'oaá tì síko xíkjin.

³⁴ Tsà sikiña-là jè xi yaxkoòn nga koiichjí, tìkoáá nìmé kjondaà s'e-nò. Tìkoáá jñà xìta ts'en síkiña-là xíkjin nga jyeé tjiìn-là nga koiichjí yije kóhotjin.

³⁵ Tìtsjacha kondra-nò; ndaà tìkoo; tìkiña-là mé xi síjé-nò, nìmé xi chiña-là it'aà ts'e. Tsà kos'ín s'een, isáá tse kjondaà s'e-nò. Ixti-là Nainá xi 'ñó 'nga tìjna komaà k'e nga k'oas'ín s'een koni s'ín Nainá, nga tjin-là kjohimatakòn it'aà ts'e xìta xi 'nga ikon ko xi ch'o s'ín.

³⁶ Chahimaa xinguiò koni s'ín beèhìma-nò Nainá xi Na'èn-ná 'mì-là.

Mì kù koma jñà sikiñdaá jé-là xita xinguiá

(Mateo 7:1-5)

³⁷ 'Kì jé-là xinguiò 'nè kindaa mé-ne nga Nainá tìkoa mìkìi sùkinda jé-nò; kì jé binchanè-là xinguiò mé-ne nga Nainá mì jé kìnchanè-nò; tìjchàat'aà-là jé-là xinguiò mé-ne nga Nainá tìkoa sùjchàat'aà-nò jé-nò.

³⁸ Tjiì-là xinguiò; jè Nainá tsjá ngajo-nò; Nainá sùchiba-nò chiba xi ndaà kitseè, xi 'ñó jncha, xi ndaà kisisajneè ko xi tíxíteèn-tji nga kìncha chijtsa-nò; jè chiba xi sichibaya-là xinguiò, tìjè sùchibaya ngajo-nò Nainá.

³⁹ Jesús tsibénojmí jngò-là kjoa xi mangásòn, kitsò-là:

—Jngò xìta xi mìkìi tsejèn-là, mìkìi koma kòkò-là ndiyá ìjngò xi tìkoa mìkìi tsejèn-là. Ingajò, yaá kixoya ngajo ñánda ch'o choòn.

⁴⁰ Jngò xìta xi kota'yà mìtsà isá 'nga tìjna koni maestro-là; tanga k'e nga kjoehet'in-là nga ndaà skóta'yà, tìkoáá kongásòn-né koni jè maestro-là.

⁴¹ '[¿Mé-ne jé-là xinguii nìkinda-ne koa tsiji mìkìi nìkindi?]' ¿Mé-ne chitsejèn-là tjé xi kjinangui xkon xinguii, koa jè yá chíso xi kjinangui xkoiìn mìkìi chitsejèn-là?

⁴² ¿A mì 'ya-jèn yá chíso xi kjinangui xkoiìn? ¿Mé-ne kò'mì-là xinguii: “Ndsè, tjiì'nde-ná nga kochrjekànguia tjé xi kjinangui xkoiìn”? Ngaji xi jò ma isén-lè; ítjòn tìnachrjekàngui chíso xi kjinangui xkoiìn, mé-ne nga ndaà kòtsejèn-lè, ìkjoàn tìnachrjekàngui tjé xi kjinangui xkon xinguii.

Kós'ín 'ya-là kós'ín tǐn inima-là jǎa xita
(Mateo 7:17-20; 12:33-35)

⁴³ Tsjìn yá xi ndaà kjoàn kò ch'o kjoàn toò xi ojà-là; tǐkoáá tsjìn yá xi ch'o kjoàn kò ndaà kjoàn toò xi ojà-là.

⁴⁴ Nga jngoò ìjngoò skoya yá, k'oaá s'ín yaxkon-là koni kjoàn toò xi ojà-là. Jè toò ikò, mìtsà yá na'yá ojà-là. Tǐkoáá jǎa toò uva mìtsà na'yá xanchroò ojà-là.

⁴⁵ Koni kjoàn yá, k'oaá tǐ kjoàn xita; jngoò xita xi 'én ndaà chja, koií-né nga kjondaà tíjìn inima-là; koa jngoò xita xi 'én ts'en chja, koií-né nga kjoats'één tíjìn inima-là; nga k'oaá tsò 'én xi nokjoá koni tsò kjohitsjeèn xi tíjìn inima-ná.

Chró ni'ya xi jò ma-ne
(Mateo 7:24-27)

⁴⁶ '¿Mé-ne kos'ín 'mì-ná nga bixón: “Na'èn, Na'èn”, koa mìkiì nìkitasòn koni xan-nò?

⁴⁷ K'oaá xan-nò yá xi mangásòn jè xita xi 'an fit'aà-na, xi 'nchré 'én-na, tǐkoá síkitasòn.

⁴⁸ Jè mangásòn jngoò xita xi bíndaà ni'ya-là; 'ñó nanga ò'ngui; bíjna tàts'en chró ni'ya ya isòn naxi. K'e nga 'ba jtsí xkón, f'ìi xajngá nandá, kaàt'aà 'nó-là ni'ya; nímé xi síkò nga ya tíjindaàsòn naxi.

⁴⁹ Tanga jè xi 'nchré 'én-na koa mìkiì síkitasòn, k'oaá ngaya-là koni jngoò xita xi bíndaàsòn ni'ya-là ñánda tà nangui; mìkiì ndaà bíndaà tàts'en chró; f'ìi xajngá nandá, kaàt'aà 'nó-là ni'ya; yaá bixòña ni'ya jè; jngoò k'a bixòjen.

7

Kii komà nga kjondaà-ne chi'nda-là xi xita sko-là soldado
(Mateo 8:5-13)

¹ Jesús, k'e nga jye tsakóya-là xita naxandá xi nchi'nchré 'én-là, kii, jahas'en-jìin naxandá Capernaum.

² Ya tíjna jngoò soldado ítjòn. Jè chi'nda-là, 'ñó xk'én. Kjomeè biyaà. Tanga 'ñó tjòkèè.

³ K'e nga kii'nchré xita jè it'aà ts'e Jesús, kisikasén xita jchínga xi ts'e xita judío nga kii kítsi'ba-là Jesús mé-ne nga kàtjanchrobá, kàtasíxkiì-là jè chi'nda-là xi xk'én.

⁴ Jǎa xita jchínga, k'e nga ijchòkon Jesús 'ñó tsibítsi'ba-là, kitsò-là:

—Ok'ín-là nga sìchját'aà-là xita ítjòn jè.

⁵ Tsjakeè naxandá xi chja-ne Judea, koa jè tsibíndaà jngoò-ná ni'ya ingo sinagoga i naxandá-ná.

⁶ Jesús kiìkò jǎa xita jchínga koi, tanga k'e nga jye kjomeè bijchó chrañàt'aà-là ni'ya, jè xita ítjòn-là soldado kisikasén i'nga amigo-là nga kitsò-là Jesús:

—Na'èn, kì yijo-lè nìjti-là. 'An, mìkiì ok'ín-na nga ngaji k'oin sobi ni'ya-na.

⁷ Tǐkoáá mìkiì ok'ín-na nga 'an kòfikon sobà-lè. Tanga tjii okixi nga kàtandaà-ne chi'nda-na.

⁸ 'An, tíjìn-na nga tjín-lè kjotíxoma. Tǐkoáá 'an, tjín-na xita ítjòn xi otíxoma-na, tǐkoáá tjín-na soldado xi 'an otíxoma-là, k'e nga xan jngoò-là: “T'in”, fi-né; xan-là xi ìjngoò: “Nchroboí”, nchrobá-né; koa k'e nga xan-là jè xi chi'nda-na: “K'oa t'jìn”, síkitasòn-na.

⁹ K'e nga kii'nchré Jesús jǎa 'én koi, tà kjòxkón-là. K'ée kiskoòtsejèn-a jǎa xita xi tjingui-là; kitsò-là:

—K'oaá xan-nò, ya Israel, ni saà jngoò xita sakó-na xi kos'ín ndaà mokjeiín-là koni jè xita jè.

¹⁰ Jǎa xita xi kiikjaá Jesús, k'e nga j'ìi-ne, jè chi'nda xi xk'én, jyeé kjondaà-ne.

Kós'ín komà k'e nga jè Jesús kisikjaáya-là ki'ndí-là chjóon ka'an

¹¹ Nga komà iskan Jesús kii jngoò naxandá xi 'mì Naín. Tjiko xita xi kota'yàt'aà-là, tǐkoáá kjìn xita xi tà xita naxandá tjingui-là.

12 K'e nga jye ijchò chraña ijto xotjoa naxandá, kjìn ma xita naxandá xi kjihjtakeo chjoón ka'an nga nchifi kíhijìn jngoò mik'en xi ti ta jngoò-la jè chjoón ka'an.

13 Na'en-ná Jesucristo, k'e nga kijtseèxkon, kjòhimatee; kitsò-la chjoón ka'an:

—Kì chihindáya-jèn.

14 Kìi kasit'aà chraña-la jè kaxa mik'en, tsohòson-la tsja; jña xita xi yangui mik'en chinchako. Kitsò Jesús:

—Ngaji ti, k'oaá xán-lè: ¡Tisítjin!

15 Jè mik'en nitoón tsibijna kixi; ikjoàn kiichja. Jesús, k'ee kisìngatsja nea-la.

16 Ngats'ìi xita xi tjiko, tà kitsakjòn-né; k'ee jeya kisikijna Nainá kitsò:

—Jngoò xita tjínako-ná xi 'nó ndaà chja ngajo-la Nainá.

Tikoáá tjín xi kitsò:

—Nainá j'ìi kasìko naxandá-la.

17 Jña 'én koi, kina'yà-la kòhokji nangui Judea, ngats'ìi i'nde nga jngoò itjandi nangui Judea.

Xita xi kota'yàt'aà-la Juan xi kis'ìin bautizar xita

(Mateo 11:2-19)

18 Juan xi kis'ìin bautizar xita kii'nchré yije kjoa xi tís'ín Jesús; jña xita xi kota'yàt'aà-la tsibénojmi-la. K'ee kiichja jò-la xi xita ts'e.

19 Kisikasén ñánda tjina Jesús nga skonangui-la, ¿a jè-né xi Cristo xi tjínè-la nga kjoí a xi kj'eíí chíña-lá?

20 Jña xita-la Juan, k'e nga ijchòkon Jesús, kitsò-la:

—Jè Juan kàsikasén-najen xi it'aà tsiji nga chjinangui-lèjen, ¿a ji-né xi Cristo xi tjínè-lè nga kjoí a xi kj'eíí chíña-lajen?

21 Tjje-ne hora, Jesús, kjìn xita kisindaà-ne xi xk'én, xi kjo'in nchisíkjeiín, xi inima ch'o-la neií tjijn inima-la; tikoáá kjìn xita xi mikii tsejèn-la kjòndaà-ne.

22 Jesús kitsò-la jña xita xi ijchòkon:

—Tanguió tènojmi-là Juan jña kjoa xi kà'yaà ko xi kàna'yà. Jña xita xi mikii tsejèn-la, jyeé tsejèn-la; jña xi tsá'yá kjoàn, jyeé ma fi-ne; jña xi tìbindojno chrjoa yijo-la, tímatsjeéjnoó-ne yijo-la; jña xita xi jtayaà, jyeé 'nchré-ne; ko xita xi jye k'en, nchi-faáyaá-la; koa jña xita ima, jye tís'enojmi-la 'én ndaà-la Nainá.

23 ¡Mé tà ndaà-la jè xita xi ngui jngoò k'a ndaà mokjeiín-la it'aà ts'an nga nimé xi osijna-ikòn-la!

24 K'e nga jye kii-ne xita xi kisikasén Juan, tsibíts'ia Jesús nga tsohóko xita xi it'aà ts'e Juan, kitsò-la:

—¿Mé xi tsanguì chitsejèn-là ya i'nde it'aà xìn ñánda nangui kixi choòn? ¿A jè tsanguì chitsejèn-là jngoò yá ínaxo xi sítija-la tjo?

25 ¿Mé-né xi tsanguì chitsejèn-là? ¿A jngoò xita xi 'nó ndaà kji nikje-la? Jñò, jyeé 'yaà, jña xi ndaà kjoàn nikje xi ókjá, xi tikoá 'nó ndaà kjoàn tsojmì xi tjín-la, yaá títsaya ni'ya-la xitaxá ítjòn.

26 Tanga, ¿mé xi tsanguì chitsejèn-là? ¿A jngoò xita xi chja ngajo-la Nainá? Okixi-né, k'oaá xan-nò, Juan, isaá 'nó ndaà koni jngoò xita xi chja ngajo-la Nainá.

27 It'aà ts'e Juan, yaá tíchja Xojon-la Nainá nga tsò:

'An, sikasén ítjòn-lè xita-na xi kjiko 'én;

jè xi koiindaàya ítjòn-lè ndiyá-lè.

28 K'oaá xán-nò, ngats'ìi xita xi tjín i'isò'nde, nijngoò xita xi mangásòn koni jè Juan xi kis'ìin bautizar xita, tanga ya ijijn naxandá ñánda otixoma Nainá, jè xita xi fehet'aà-ne, isaá jeya tjina mì k'oaá-ne koni Juan.

29 K'e nga kii'nchré jña xita naxandá ko jña xita-la xitaxá Roma xi síkíchjtjì tsojmì, kjòjngoò-ikon nga ndaà tjín jè ndiyá kixi-la Nainá, nga jye komà bautizar it'aà ts'e Juan.

³⁰ Tanga jñà xità fariseo kò xità chjine xojon ts'e kjotíxoma-la Nainá, mìkì komà bautizar it'aà ts'e Juan. Tsachrjengui-né kjondaà xi tjíndaà-la Nainá nga tsjá-la xità koi.

³¹ Jesús kitsò:

—¿Yá xi siingásòn-koaa jñà xità xi tjin nachrjein i'ndeí? ¿Kó kjoàn xi kongásòn-ko?

³² Jñà kongásòn-kjoò jñà ixti xi bitsajna nditsin nga síská, chja-la xíkjin, tsò-la: “Kànikjaneé-nòjen xobí tanga jñò mìkì kàchà; kàjndaá-nòjen sò xi ba tsò tanga mìkì kàchìhindáyaà.”

³³ J'ii Juan xi kis'iin bautizar xità xi mìtsà inchrajín tsakjèn, tikoà mìtsà xán kits'ii koa jñò bixón-nò: “Inima ch'o-la neí tjin-la.”

³⁴ Ikjoàn j'iaa xi Ki'ndí-la Xità xan-la yijo-na; ma-na kjeen, tikoà ma-na 'biaa; jñò, k'oaá s'ín bixón i'ndeí: “Xità chrjá'a-né, xità ch'i-né, amigo-la-né jñà xità-la xitaxá Roma xi síkíchítjì tsojmì kò jñà xi xità jé.”

³⁵ Tanga jè kjoachjine-la Nainá, 'yaá-la nga kixi tjin k'e nga jye bitasòn.

Kó tsò 'én xi kiichja Jesús k'e nga jngoò chjoón xi tse jé tjin-la tsaníjno ndsoko

³⁶ Jngoò xità fariseo kiichja-la Jesús nga mejèn-la kòkjen-ko. K'e nga jahas'en ni'ya-la jè xità fariseo, tsibijnat'aà ímíxa.

³⁷ Ya naxandá jè, tjna jngoò chjoón xi tse jé tjin-la. K'e nga kiì'nchré nga ya tijnat'aà ímíxa Jesús, ya ni'ya-la jè xità fariseo, ijchòko jngoò chitsín xi tjíya-la xkiì xi ndaà jne.

³⁸ Yaá tsasijnat'aà ijton ndsoko Jesús nga tikjindáya. Ikjoàn tsaníjno ndsoko Jesús kò ndáxkon. K'ée kisixijno-ne kò tsja skò. Kjìn k'a kiskine'a ndsoko. Ikjoàn kisikaàjno xkiì xi ndaà jne.

³⁹ Jè xità fariseo xi kiichja-la Jesús, k'e nga kijtsee kjoa koi, kitsò ijìin inima-la: “¿Mé-ne nga mìkì beèxkon-ne yá chjoón-ne xi otísiko? Tsà kixi kjoa nga jè xità xi chja ngajo-la Nainá, skoexkon-né nga chjoón xi jé tjin-la.”

⁴⁰ K'ée kiichja Jesús, kitsò-la:

—Simón, jngoò kjoa koxán-lè.

Simón kitsò:

—Maestro, kot'in-ná.

⁴¹ Jesús kitsò:

—Jò xità títsajna xi ton tjen-la ts'e xità xi síkíña ton; jngoò xi 'òn sìndo tjen-la; jè xi ijngoò icháte tjen-la.

⁴² Ingajò xità koi, tsjìn-la ton xi kojìchjí ngajo-ne. Jè nei-la ton kisìjchàat'aà-la ingajò. Kot'in-ná, ¿ñá-laá ingajò xità koi xi isa 'ñó matsjakeè jè nei-la ton?

⁴³ Kiichja Simón kitsò:

—'An, k'oaá s'ín síkítsjeèn, jè-la xi isa tse ton kitjen-la.

Jesús kitsò:

—Ndaà kichoòsòn-la.

⁴⁴ Jesús kiskoòtsejèn-jno jè chjoón, kitsò-la Simón:

—Chítsejèn-la chjoón jè. 'An, k'e nga kòfahas'eèn ni'ya-lè [mìkì kànikitasòin koni s'ín tjin kjotíxoma tsaján]; mìkì kò'biì-ná nandá xi mochjeén-la ndsokoaà nga saníjno; tanga chjoón jè, ndáxkoon kòhoníjno-ne ndsokoaà koa tsja skoo kàsìxijno-ne.

⁴⁵ K'e nga kànìhixat'aà-ná mìkì kichine'a-ná tanga chjoón jè, kóni kòfahas'eèn ni'ya-lè tíkine'a ndsokoaà.

⁴⁶ 'Ngaji, mìkì kànàhijnoi asitj skoaà, tanga chjoón jè, kòfàhijno ndsokoaà xkiì xi ndaà jne.

⁴⁷ Koií k'oas'ín xan-lè: Chjoón jè, jyeé kàchàat'aà yije-la ngats'ii jé-la koi kjoa-la nga 'ñó matsjakeè-na, tanga jè xità xi chiba kàchàat'aà-la jé-la, isaá chiba matsjakeè-na.

⁴⁸ K'ée kitsò-la Jesús jè chjoón:

—Jé-lè jyeé kàchàat'aà-lè.

⁴⁹ Jñà xità xi taña títsajnat'aà ímíxa kitsò-la xíkjin:

—¿Yá x̄ita-né jè nga t̄ikoa ma-la s̄íjchàat'aà-ná jé-ná?

⁵⁰ Jesús kitsò ìjngoò k'a-la jè chjòón:

—Koi-né nga mokjeiín-lè ìt'aà ts'an nga bitjotjì-ne jé-lè; t'in-là ndaà-ne.

8

Íchjín xi kisichját'aà-la Jesús

¹ K'e nga komà iskan, Jesús, kjìn naxandá tsajmeè, kò rancho, nga kiichjaya kò kisika'bí 'én ndaà-la Nainá koni s'ín otíxoma Nainá. Tjiko x̄ita-la xi tejò ma-ne.

² T̄ikoaá tjiko i'nga íchjín xi jye kjòndaà-ne ch'in neíi-la kò xi kj'eíi ch'in. Yaá tjiko María jè xi Magdalena 'mì, xi itoò inima ch'o-la neíi itjoiin yijo-la;

³ tjiko Juana, chjòón-la Chuza xi síkinda tsojmì-la x̄itaxá ítjòn xi 'mì Herodes; t̄ikoaá tjiko xi 'mì Susana koa kjìn-ìsa íchjín tjiko xi síchját'aà-la mé tsojmì xi tjín-la.

Kjoa xi mangásòn ts'e x̄ita xi bítje xojmá

(Mateo 13:1-9; Marcos 4:1-9)

⁴ K'e nga jye kòkjìn x̄ita xi xkì xi ján naxandá j'ìi-ne, Jesús, tsibénojímí-la kjoa xi mangásòn. Kitsò-la:

⁵ —Jngoò x̄ita xi kù kíjndi xojmá. K'e nga tsibíts'ia nga kiskíjndi xojmá, chixò chiba ya iya ndiyá. Koa chinchane x̄ita koa jñà nise tsakjèn.

⁶ Nguì k'oa tjín chixòsòn ya ñánda naxi choòn, tanga k'e nga isò xojmá, nitoón kixi nga mìkì 'nchi'nde nangui.

⁷ Nguì k'oa tjín chixò ya ijìn na'yá; yaá taña isòkjoò; k'e nga kjò'nga na'yá, kisik'en-ngui xka-la xojmá.

⁸ Nguì k'oa tjín chixò ñánda nangui ndaà; isò, kjò'nga, koa tsajà-la toò; kitsjaà jngoò sìndo nga jngoò ìjngoò.

Jesús k'e nga jye tsibénojímí kjoa koi, 'ñó kiichja, kitsò:

—¿Ndaà t̄iná'yaà koni xan-nò!

Mé-ne kjoa xi mangásòn kisikjeén-ne Jesús

(Mateo 13:10-17; Marcos 4:10-12)

⁹ Jñà x̄ita xi kota'yát'aà-la Jesús kiskònangui-la kó tsòya-ne jè kjoa xi mangásòn xi tsibénojímí-la x̄ita.

¹⁰ Jesús kitsò:

—Jñò, Nainá jye kitsjaà-nò nga jchaa kjoa ma-la xi bénojímíya kó s'ín otíxoma Nainá; tanga jñà x̄ita xi kj'eíi, tà kjoa xi mangásòn s'enojmí-la, mé-ne nga mìkì skoe-ne xi kjoa kixi nas'ín skótsejèn, mìkì kochiya-la nas'ín nchi'nchré.

Kó tsòya-ne kjoa xi mangásòn ts'e x̄ita xi bítje xojmá

(Mateo 13:18-23; Marcos 4:13-20)

¹¹ 'Jè kjoa xi mangásòn ts'e xojmá, kii tsòyaá-ne: Jñà xojmá, jè 'én-la Nainá.

¹² Jñà xojmá xi chixò iya ndiyá, jñà ngaya-la x̄ita xi 'nchré 'én-la Nainá, ìkjoàn f'ìi x̄ita neíi, faáxìn jè 'én ijìn inima-la mé-ne nga mìkì kòkjeiín-la koa mìkì kitjoiin kjo'in inima-la.

¹³ Jñà xojmá xi chixòsòn naxi, jñà ngaya-la x̄ita xi 'nchré 'én-la Nainá, k'e nga tàts'en-la kjoa tsjaà ma-la nga mokjeiín-la, tanga tsjìn-la i'ma; tà chibaá nachrjein mokjeiín-la; k'e nga mé kjoa xi sakó-la, nitoón síkijna-ne.

¹⁴ Jñà xojmá xi chixò ijìn na'yá, jñà ngaya-la x̄ita xi 'nchré 'én-la Nainá; k'e nga jye tjímaya ndiyá-la Nainá, bíts'ia nga síkájno-la yijo-la, ótsji xi kjoa nchiná kò xi kjoa kjotsja. Jñà kjoa koi xi tjín isò'nde bíchjoà-ikòn-la nga mìkì makixi nga ojà-la toò.

¹⁵ Jñà xojmá xi chixò ñánda nangui ndaà, jñà ngaya-la x̄ita xi ndaà tjín kò xi kixi tjín inima-la; 'nchré 'én-la Nainá t̄ikoa bíjiin-ikon 'én xi 'nchré; ndaà bincha kixi skanda k'e nga ndaà makjìn-ya jñà 'én.

*Kjoa xi mangásòn ts'e ni'ín xi síhiseèn
(Marcos 4:21-25)*

¹⁶ 'Tsjìn x̄it̄a xi oká ni'ín, ikjoàn bítsa'ma, o xi ya síkíjnangui n̄achan; jngoò ni'ín xi tì, sijna 'nga-né; yaá sijnaya candelero mé-ne nga kohiseèn-là j̄n̄a x̄it̄a xi kjoahas'en ni'ya.

¹⁷ N̄imé kjoa t̄j̄n xi t̄j̄i'ma i'ndēi xi mìkiì k̄otsejèn nga koma iskan; t̄ikoáá tsjìn kjoa xi t̄j̄i'ma i'ndēi xi mìkiì j̄ch̄a-là. Ngats'iì kjoa skoexkon yije x̄it̄a.

¹⁸ 'T'een kinda k̄johítsjeèn-nò k'e nga k̄iná'ya 'én-là Nainá. Ndaà t̄iná'yaà. Nga jè xi t̄j̄n-là k̄johítsjeèn k'oií isa-là; t̄anga jè xi tsjìn-là, skanda t̄já'aán-là mé xi k'oas'ín síkítsjeèn nga t̄j̄n-là.

*Nea-là Jesús k̄o 'ndse
(Mateo 12:46-50; Marcos 3:31-35)*

¹⁹ Nea-là k̄o 'ndse kiikon ñánda t̄jna Jesús. T̄anga mìkiì komà ijchò skanda ñánda t̄jna nga 'ñó k̄jìn ma-ne x̄it̄a xi t̄ítsajna.

²⁰ Jesús kis'enojmí-là, kitsò-là:

—Nea-lè k̄o j̄n̄a 'ndsi, ján nd̄itsiaán t̄ítsajna, mejèn xó-là nga skótsejèn-lè.

²¹ Kiich̄ja Jesús, kitsò:

—Xi nea-n̄a k̄o xi 'ndse xan-là, j̄n̄a-né xi 'nchré 'én-là Nainá, t̄ikoá síkitasòn.

*K'e nga jè Jesús kisik̄ijnajyò t̄joxkón
(Mateo 8:23-27; Marcos 4:35-41)*

²² Jngoò n̄achrjein, Jesús k̄o x̄it̄a xi kota'yàt'aà-là jahas'en jngoò chitso, kitsò Jesús:

—Tík̄jiaán, k̄it̄j̄ajtoáá ján xijngoáà ndáchikon.

Ikjoàn kiì.

²³ T̄anga k'e nga kiisòndá chitso, Jesús tsohojnafè-né. Ikjoàn k̄jòts'ia nga j'ì t̄joxkón ya j̄jìn ndáchikon. Jyeé t̄ifahas'en nandá chitso; xkón t̄j̄n tsà ya skajjìn-ndá.

²⁴ J̄n̄a x̄it̄a-là k'eé kiikon nga kisik̄jaá-là Jesús; kitsò-là:

—¡Maestro! ¡Maestro! ¡Chitso, jye t̄ikaànguindá! Jyeé-la k̄iyá.

Jaá-là Jesús; ikjoàn tsohótiko t̄joxkón k̄o ndáchikon, n̄it̄oón kisijyò-ne, k̄jòndaàya-ne.

²⁵ Jesús kitsò:

—¿Mé-ne mìkiì mokjeiín-nò it'aà ts'e Nainá?

J̄n̄a x̄it̄a-là tà kitsakjòn-né. Tà k̄jòxkón-là. Kitsò-là xík̄jìn:

—¿Yá x̄it̄a-ne jè nga ch̄ja-là t̄j̄o k̄o nandá koá síkitasòn-là?

*X̄it̄a Gadara xi k̄jìn in̄im̄a ch'o-là neí t̄j̄jìn in̄im̄a-là
(Mateo 8:28-34; Marcos 5:1-20)*

²⁶ Ikjoàn ijchò ya nangui-là x̄it̄a Gadareno xi kijna xijngoáà ndáchikon ts'e Galilea.

²⁷ K'e nga itjojen chitso, Jesús, ijchò kasit'aà jngoò-là x̄it̄a x'ín xi ya i'nde-là n̄axandá Gadara. 'Nó k̄jòtseé t̄j̄jìn yijo-là in̄im̄a ch'o-là neí; mìtsà nikje ókjá, koá mì ni'ya t̄j̄n-là; yaá xó b̄ijnaya ngajo-là mik'en.

²⁸ X̄it̄a jè, k'e nga k̄ijtseé Jesús, 'ñó kiskindàyat'aà-là koá tsasèn-xkó'nchit'aà-là; ikjoàn 'ñó kiich̄ja, kitsò:

—Jesús, ngaji xi Ki'ndí-là Nainá 'mì-lè xi 'ñó 'nga t̄jna, ¿mé xi mejèn-lè k̄o 'an? ¡B̄itsi'bà-lè, k̄i yatoòn-ná!

²⁹ Koií okitsò-ne, nga jè Jesús, jyeé kos'ín tsatixoma-là jè in̄im̄a ch'o-là neí nga k̄atitj̄jìn yijo-là x̄it̄a jè. Jyeé k̄jòtseé kos'ín t̄j̄jìn yijo-là nga biyaàxín; nas'ín na'ñó k̄ich̄a cadena sit'aà'ñó ndsok̄o k̄o tsja, ch̄ikjoáá-là nga otejtso, ikjoàn fik̄o jè in̄im̄a ch'o-là neí ya nangui kixì ñánda tsjìn x̄it̄a.

³⁰ Jesús kiskònangui-là, kitsò-là:

—¿Kó 'mì-lè?

X̄it̄a jè kitsò:

—Legión 'mì-na.

Koií kò'mì-ne nga 'ñó kjin inima ch'o-la neí tjiin yijo-la.

³¹ Jñà inima ch'o-la neí tsibítsi'ba-la Jesús nga mì yaá sùkatsjòya nìtjan-la neí ñánda tjin kjo'in.

³² Ya it'aà nindoò, 'ñó kjin ma chinga xi nchikjèn-jno ijìn ijñá. Jñà inima ch'o-la neí, tsibítsi'ba-la Jesús nga tsjá'nde-la nga ya kjoahas'en-jìn yijo-la chinga. Jesús, kitsjaà'nde-la.

³³ Jñà inima ch'o-la neí, nga jye itjojìn yijo-la xita jè, ikjoàn jahas'en-jìn yijo-la jñà chinga. Ikjoàn jñà chinga tsatíkajen-jno ya naxi skanda ijìn nandá; yaá k'en-jìn nandá ngats'ì jñà chinga.

³⁴ Jñà xita xi nchikondà chinga, k'e nga kijtseè kjoa xi komà, tsangachikon nga kisikí'nchré naxandá kóhokji ñánda rancho.

³⁵ Jñà xita naxandá, k'e nga kii'nchré, itjo katsejèn jñà kjoa xi komà. Kii ñánda tíjna Jesús. Tíkò ya tíjnat'aà ndsòko Jesús jè xita xi jye itjojìn-ne yijo-la jñà inima ch'o-la neí. Jyeé íkjá-ne nikje-la, tíkòáá jyeé ndaà tjin-ne kjohítsjeèn-la. Jñà xita k'e nga kijtseèxon, tà kitsakjòn-la.

³⁶ Jñà xita xi kijtseè kjoa koi, tsibénojmí-la xíkjín kó s'ín komà nga kjòndaà-ne jè xita xi inima ch'o-la neí kisijìn yijo-la.

³⁷ Ngats'ì xita xi títsajna ya nangui-la xita Gadareno, kóhokji jngoò itjandi, tsibítsi'ba-la Jesús nga kàtji-ne, koií kjoa-la nga 'ñó kitsakjòn xita koi. Jesús jahas'en-ne chitso, ikjoàn kii-ne.

³⁸ Jè xita xi jye itjokajìn-ne yijo-la inima ch'o-la neí tsibítsi'ba-la Jesús nga mejèn-la nga ya kojmeiiko; tanga jè Jesús kitsjaà-la okixi nga kàtjna; kitsò-la:

³⁹ —T'in-ne ni'ya-lè, ténòjmí yije-la xita nga 'ñó tse kjoa kàsiko-lè Nainá.

Xita jè, kii-ne; ikjoàn tsibíts'ia nga tsibénojmí, kisihingasòn 'én kóhokji naxandá jè nga 'ñó tse kjoa kisiko Jesús xi it'aà ts'e.

Tsòti-la Jairo kò chjoón xi kitsobà itjòn nikje-la Jesús

(Mateo 9:18-26; Marcos 5:21-43)

⁴⁰ K'e nga jye j'ì jngoò k'a-ne Jesús ján xijngoàà ndáchikon, kjòtsjaá-la jñà xita xi kjin ma-ne, koií kjoa-la nga ngats'ì, nchikoña-la.

⁴¹ J'ìkon jngoò xita skò-la xi ts'e ni'ya ingo sinagoga xi 'mì Jairo; tsasèn-xkó'nchit'aà ndsòko Jesús, tsibítsi'ba-la nga mejèn-la kjiko ni'ya-la.

⁴² Koií xá j'ìkjaá-ne nga jye tíbiyaà ndí tsòti-la xi tajngoò ma-ne xi tejò nó tjin-la.

Jesús, k'e nga tífi, jñà xita nga kjin ma-ne, chiba-la tsohó'nchò'ñó-né.

⁴³ Ya tsóhojìn jngoò chjoón xi jye kjò tejò nó tjin-la ch'in jní. Jye kjò tse ton kò tsojmì xi tjin-la kisikjeheya xi kjoa ts'e chjìnexkii; mikii mandaà-ne nita yá xi síxkii-la.

⁴⁴ Chjoón jè, kii kasit'aà chraña-la Jesús ya ijton íts'in nga kitsobà'ñó itjòn nikje-la, koa jè jní xi tíxteèn-la, nitoón kisijyò-ne.

⁴⁵ K'eé kiskònangui Jesús, kitsò:

—¿Yá-né xi kàtsobà-na?

Ngats'ì xita kitsò:

—Mìtsà yá-jèn.

K'eé kitsò Pedro kò xita xi i'nga:

—Maestro, jñà xita nga kjin ma-ne fàhitjen-lè koa ó'nchò'ñó-lè, ngaji si-né: “¿Yá-né xi kàtsobà-na?”

⁴⁶ Jesús kitsò jngoò k'a:

—Tjin xi kàtsobà-na; kàbeéyaá-na nga kòbitjojìn nga'ñó yijo-na.

⁴⁷ Jè chjoón, k'e nga kijtseè nga mikii koma kójna'ma nga ki'yat'in-la, chiba-la tíhotsé yijo-la nga tsasèn-xkó'nchit'aà-la Jesús. Tsibénojmí-la nga nguixkon ngats'ì xita naxandá mé kjoa-ne nga nikje-la Jesús kitsobà-ne, koa kó s'ín nga ijton kjòndaà-ne ch'in-la.

⁴⁸ Jesús kitsò-la:

—Ndí neaa, koi-né nga mokjeiín-lè it'aà ts'an nga kòmandaa-ne. T'in-là ndaa-ne.

⁴⁹ Tákó tìk'eé tíchja-ísa Jesús nga j'ì jngoò xìtá xi ts'e xìtá ítjòn xi inchrobà-ne ni'ya-la nga kitsò:

—Ndí tsòti-lè jyeé k'en; kì tì kii nìjti-la Maestro.

⁵⁰ K'e nga kii'nchré Jesús kitsò-la:

—Kì tsakjoòn-jèn; tà jè-né nga kàtakjeiín-lè, jè ndí tsòti-lè kondaá-ne.

⁵¹ K'e nga jahas'en ni'ya, Jesús, mìkii kitsjaà'nde-la xìtá xi k'ejí nga jahas'en-ko, tà jè Pedro, Jacobo, Juan, kò na'èn-la kò nea-la ndí tsòti.

⁵² Ngats'ì xìtá xi títsajna, nchikjindáya-né koa nchisíkájno-né xi it'aà ts'e ndí tsòti. Tanga jè Jesús kitsò-la:

—Kì chihindáya-jèn; mìtsà kòbiyaa ndí tsòti, tà kjinafè-né.

⁵³ Jñà xìtá xi títsajna tà tsijnòkeè Jesús nga tíjiin-la nga jyeé k'en.

⁵⁴ Tanga Jesús kiskoé tsja ndí tsòti; 'ñó kiiichja-la kitsò-la:

—Tsòti, itisítjiin!

⁵⁵ J'ì jngoò k'a-ne inima-la; ikjoàn nitoón tsasítjen; Jesús kitsjaà okixi nga tsjá-la xi skine.

⁵⁶ Jñà xìtá jchínga-la, tà kjòxkón-la; tanga jè Jesús kitsò-la:

—Kì yá xìtá xi bènojmi-la jè kjoa xi kòma.

9

K'e nga jè Jesús kitsjaà-la xá xìtá-la xi tejò ma-ne

(Mateo 10:5-15; Marcos 6:7-13)

¹ Jesús kiiichja-la xìtá-la xi tejò ma-ne xi jè tsibíxáya-la; kitsjaà-la nga'ñó kò kjotíxoma nga kochrjeiín yiye inima ch'o-la neí xi tíjiin yijo-la xìtá; tìkoa koma-la siindaà-ne xìtá xi ch'in xk'én tjín-la.

² Kisikasén nga kichjaya kó s'ín otíxoma Nainá, tìkoa siindaà-ne xìtá xi ch'in tjín-la.

³ Kitsò-la:

—Nimé xi ch'aà xi ts'e ndiyá; kì yá garrote ch'aà; kì na'yaá ch'aà; kì inchrajín ch'aà; kì toón ch'aà; tìkoa kì jò nachro ch'aà.

⁴ Nita ñánda ni'ya nga kijchoò, yaá títsajna, skanda k'e kitjoo-nò.

⁵ Tsà jngoò naxandá ñánda kijchoò, tsà mìkii skoétjò-nò, titjojñò, titsajneè chijo-la ndsokoò nga kateè kjoa koi koni jngoò seña, nga jñò, mì tì kii sís'in-là; kjo'íin s'e-la nga mìkii mokjeiín-la.

⁶ Itjo xìtá koi, xkì xi ján naxandá kii; kisika'bí 'én ndaa-la Nainá xi kjoa ts'e Cristo; tìkoaá kisindaà-ne xìtá xi ch'in tjín-la nga kijjndà naxandá.

K'e nga k'en Juan xi kis'ìin bautizar xìtá

(Mateo 14:1-12; Marcos 6:14-29)

⁷ Jè xìtaxá ítjòn xi 'mì Herodes, k'e nga kii'nchré ngats'ì kjoa xi tís'ín Jesús, mìkii beè kó s'ín siikítsjeèn, nga tjín i'nga xìtá xi tsò: “Juan, jyeé jaáya-la.”

⁸ Xìtá xi i'nga tsò: “Jè Elías xi tsatsejèn jngoò k'a-ne.” Tìkoaá xìtá xi k'ejí tsò: “Jaáya jngoò-la xìtá jchínga xi kiiichja ngajo-la Nainá.”

⁹ Kitsò Herodes:

—'An sobà tsibìxá-la xìtá xi kisik'en Juan nga tsatesin. ¿Yá xìtá-ne jè xi kos'ín tís'ín kjoa xi'nchrè?

K'oaá ma-ne nga mejèn-la skoexkon Jesús.

K'e nga 'òn jmii xìtá kisikjèn Jesús

(Mateo 14:13-21; Marcos 6:30-44; Juan 6:1-14)

¹⁰ K'e nga j'ì jngoò k'a-ne jñà xìtá xi tsibíxáya-la Jesús, tsibénojmi ngats'ì kjoa xi kis'ìin. Jesús, k'eé kiiko jngoò i'nde ts'e naxandá Betsaida ñánda tsjìn xìtá.

11 Jñà x̄ita, k'e nga kii'nchré nga jye kii Jesús, kiitj̄ingui-la; k'e nga ijchòtj̄ingui-la, Jesús, kisis'in-la, tsohóko, tsibénojmi-la kó s'ín otíxoma Nainá, t̄ikoḗ kisindaà-ne x̄ita xi mochjeén-la nga kondaà-ne.

12 K'e nga jye tímahixòn, jñà x̄ita-la xi tejò ma-ne, ijchò kinchat'aà-la Jesús, kitsò-la:

—Kot'in-la ngats'ìi x̄ita kàtj̄i-ne mé-ne nga kàtasíkjáya yá naxandá chrañàt'aà ko rancho ñánda sakò-la xi skine. I i'nde ñánda titsajnaá, it'aà xìn-né, n̄imé tjín.

13 Jesús kitsò-la:

—Tjii-là jñò xi kòkjen x̄ita koi.

Jñà x̄ita-la kitsò:

—Nimé tjín-najen, tà 'òn ma inchrajín-najen koḗ jò ma t̄in, tà jè-la tsà konguí kin-daà-lajen xi kòkjen ngats'ìi x̄ita koi.

14 Maá-la tsà 'òn jmiì xi nguì x̄ita x'in.

Jesús kitsò-la x̄ita xi kota'yàt'aà-la:

—Tikítsajnajtiòn, icháte icháte t̄ikítsajna-nò.

15 K'oaá s'ín kisikítsajna kóhotjín.

16 Jesús, kiskoé jñà inchrajín xi 'òn ma-ne kò jñà t̄in xi jò ma-ne; ikjoàn kiskoòtsejèn ngajmiì; kitsjaà-la kjondaà Nainá; ikjoàn kisixkoḗya inchrajín, k'eé kitsjaà-la jñà x̄ita xi kota'yàt'aà-la nga kisika'bí-la jñà x̄ita xi kjin ma-ne.

17 Tsakjèn yije kóhotjín x̄ita, kó nga kjòskiì; k'eé tsibíxkó-ne jñà xi tsiningui-ne; nguì tejò nisiyá komà.

Kós'ín kiichja Pedro nga jè Jesús xi Cristo

(Mateo 16:13-19; Marcos 8:27-29)

18 Jngoò k'a k'e nga tíjnat'aàxìn Jesús nga tíchjat'aà-la Nainá, yá títsajnako x̄ita xi kota'yàt'aà-la. Jesús kiskònangui, kitsò-la:

—¿Kó tsò x̄ita, yá-ná 'an?

19 Jñà x̄ita-la kitsò:

—Tjín xi tsò: jè Juan xi kis'iin bautizar x̄ita, t̄ikoḗá tjín xi tsò: jè Elías, koḗ tjín i'nga xi tsò: jaáya-la jngoò-la x̄ita xi chinchima kjòtseé xi kiichja ngajo-la Nainá.

20 Jesús kiskònangui-la kitsò-la:

—Jñò, kó bixón. ¿Yá-ná 'an?

K'eé kiichja Pedro, kitsò:

—Ji-né xi Cristo xi xó kisikasén-lè Nainá.

K'oaá s'ín tsibénojmi Jesús kjoqbiyaà-la

(Mateo 16:20-28; Marcos 8:30-9:1)

21 Tanga Jesús 'ñó tsibít'in-la nga mì yá x̄ita xi keènojmi-la kjoḗ koi.

22 Kitsò-la:

—'An xi Kí'ndí-la X̄ita xan-la yijo-na, tseé kjo'in siikjiaán; kochrje-nguí-na jñà x̄ita jchínga, kò x̄ita skò-la no'miì kò x̄ita xi okóya kjotíxoma-la Nainá xi kiskii Moisés. Siik'eén-na tanga k'e nga kijchò jàn nàchrjein kjoáya-na.

23 Xi komà iskan kitsò-la kóhotjín:

—Tsà yá xi mejèn-la nga x̄ita ts'an koma, kàtatsjeiìn-takòn mé xi mejèn-la yijo-la; koni jngoò x̄ita xi 'yajen krò-la, nàchrjein inchijòn kàtijnandaà nga siikjeiín kjo'in xi kjoḗ ts'an; ndaà kàtj̄it'aà-na.

24 Nga n̄ita yá x̄ita xi mejèn-la kochrjetj̄i yijo-la nga n̄imé kjo'in sakò-la, tà saá siichija-né kò kjo'in kijnajin; tanga jè xi tíjnandaà nga tsjá yijo-la xi kjoḗ ts'an, jè-né xi kitjokàjin kjo'in nga it'aà ts'an ndaà kijná.

25 ¿Mé xi siikijne jngoò x̄ita nas'ín tjoé yije-la isò'nde tsà chija inima-la koḗ siikits'ón yijo-la? N̄imé.

²⁶ Tsà tjin i'nga xita xi kosobà-la it'aà ts'an ko it'aà ts'e 'én-na, tikoaa 'an xi Ki'ndí-la Xita xan-la yijo-na, kosobà-na k'e nga kitjojen ijngòò k'a nga skoe xita kjoajeya-na, skoe kjoajeya-la Na'èn-na tikoaa skoe kjoajeya-la ts'e àkjale tsjeè-la Nainá.

²⁷ Xi okixi, k'oaá xán-nò, ijndé títajajijn i'nga xita xi mikii kiyá skanda k'e nga skoe kó s'ín otíxoma Nainá.

Kii komà k'e nga jè Jesús jahatjija í'ño isén-la kóhokji yijo-la
(Mateo 17:1-8; Marcos 9:2-8)

²⁸ Tjin-la tsà kó jijn nachrjein nga tsibéojmí 'én koi, Jesús, kiiimijn-jno jngòò nindoò nga kiichjat'aà-la Nainá. Kiiiko Pedro, Juan ko Jacobo.

²⁹ K'e nga tíchjat'aà-la Nainá, Jesús, jahatjija í'ño isén-la; jè nikje-la 'ño kjòchroba; tsí ote tsatsejèn.

³⁰ Jò xita x'in tsatsejèn xi nchijoókjoò Jesús, jè Moisés ko Elías.

³¹ Xita koi, tsí ote choòn kjoajeya-la nga jngòò itjandii ñánda jncha. Nchijoóya-ne nga jè Jesús, jye tífi síkitasòn kjoa ján Jerusalén nga ya kiyá.

³² Jè Pedro ko xita xikjín, tsí 'ño nijná-la, tanga k'e nga jye kitjaàxìn-la nijná kijtseèkon kjoajeya-la Jesús ko jña xita xi jò ma-ne xi títajajinakò.

³³ K'e nga jye chinchat'aà xìn-la Jesús xita koi, jè Pedro kitsò:

—Maestro, ndaà tjin nga i títajajinaá. Kíndaá jàn ni'ya xkòjndà, jngòò tsiji, jngòò ts'e Moisés, jè xi ijngòò ts'e Elías.

Jè Pedro tà k'oaá kitsò, mì ti kii beè-ne kó s'ín kichja.

³⁴ Tik'e-né nga tíchja Pedro, j'ii jngòò 'nguién-la ifi xi tsibí'ma xita koi. K'e nga jahas'en-jijn ifi, tà kitsakjòn-né.

³⁵ Ya jjiin ifi kina'ya jngòò-la 'én xi kitsò:

—Jè jèè xi ki'ndí-na xi 'ño matsjake, jè tiná'ya-là.

³⁶ K'e nga jye kina'ya-la 'én koi tà jè tajngòò síjna-isa Jesús. Nachrjein koi jña xita-la jyò tsibítajajina, nímé 'én xi kiichja, mìtsà yá xita tsibéojmí-la kjoa xi kijtseè.

K'e nga jè Jesús kisindaà jngòò-ne ti xi inima ch'o-la neii tjiin inima-la
(Mateo 17:14-21; Marcos 9:14-29)

³⁷ Xi komà inchijòn, k'e nga itjojen-jno-ne nindoò, 'ño kjin xita kisatiikjoò.

³⁸ K'ée jngòò xita xi ya tijnajijn-la xita kjin, 'ño kiichja, kitsò-la Jesús:

—Maestro, tìbitsi'bà-lè nga chítsejèn-la ki'ndí-na xi tà jè tajngòò-ne.

³⁹ Jngòò inima ch'o-la neii tsobà'ño; tà nitoón kjindáya, ikjoàn 'ño síkatsé yijo-la; ochrje ndáxó tso'ba; tse kjo'in tsjá-la, mikii xatí tsjeiin.

⁴⁰ Kàbitsi'bà-la jña xita xi kota'yat'aà-lè nga kàtachrjekàjijn inima ch'o xi tjiin yijo-la, tanga mikii kòma-la.

⁴¹ K'ée kiichja Jesús kitsò:

—Jño, xita xi mikii mokjeiin-nò it'aà ts'an, xi ch'o 'nè. ¿Skanda mé nachrjein kótijnako-nò koa ska-na kjoa-nò? Nchrohókoi ki'ndí-lè ijndé.

⁴² K'e nga tíchrobá chraña jè ti, jè inima ch'o-la neii, tsajndoòt'aà nangui, ikjoàn kisikatsé yijo-la; tanga jè Jesús, tsohótiko jè inima ch'o-la neii; ikjoàn kisindaà-ne jè ti; kisingsatsja-ne na'èn-la.

⁴³ Ngats'ii xita tà kjòxkón-la jè kjoajeya-la Nainá.

K'oaá s'ín tsibéojmí Jesús kjoabiyaà-la xi ma-ne jò k'a
(Mateo 17:22-23; Marcos 9:30-32)

Ngats'ii kjoa xi kis'ijn Jesús, tikoaa tà kjòxkón-la ngats'ii xita. Jesús kitsò-la jña xita xi kota'yat'aà-la:

⁴⁴ —Ndaà tiná'yaà jña 'én koi; kii nijchàajijn-jèn: 'An xi Ki'ndí-la Xita xan-la yijo-na yaá siingsatsja-na xita nguixkon xitaxá.

45 Jñà x̄ita-la mìkiì kjòchiya-la jè 'én xi kòs'ín kitsò-la. Nainá tsibí'ma-né nga mìkiì kjoahas'en-jiin-la; tà kitsakjòn-né, mìkiì kiskònangui-la Jesús kó tsòya-ne 'én xi tsibénojmi-la.

Yá x̄ita x̄íkjin xi k̄jna ítjòn

(Mateo 18:1-5; Marcos 9:33-37)

46 X̄ita xi kota'yàt'aà-la Jesús, tsibíts'ia nga tsajoóya-ne yá x̄ita x̄íkjin xi k̄jna ítjòn.

47 Jesús, k'e nga kijtseè koni s'ín nchisíkítsjeèn, kiskoé jngoò ndí ti, kisikíjnat'aà-la yijo-la,

48 kitsò-la:

—Nita yá-ne xi it'aà ts'an skoétjò jngoò ndí ti koni jè, 'aán xi skoétjò-na; jè xi skoétjò-na, tikoáá skoétjò-né jè xi kisikasén-na. Koií kjoa-la, jè xi isa nangui tjna xi ya tijnajin-nò, jè-né xi isa tjna ítjòn.

Yá xi kondra-la Cristo kò yá xi x̄ita ts'e

(Marcos 9:38-40)

49 Juan kitsò:

—Maestro, ki'ya jngoò-jen x̄ita xi kò 'ín-lè ochrjekàjin inima ch'o-la neí xi tíjin yijo-la x̄ita; mìkiì kits'ii'nde-lajen nga mìtsà x̄ita tsaján xi jñá fit'aà-ná.

50 Jesús kitsò-la:

—Kì bichakjáya-là. Jè xi mìtsà kondra tsaján, x̄ita tsaján-ná.

K'e nga jè Jesús tsohótiko Jacobo kò Juan

51 K'e nga jye kjòchraña nachrjein nga kjoì jngoò k'a-ne Jesús ján ngajmiì, 'nó tsi'beé-la ikon nga kiì ján Jerusalén.

52 Kisikasén ítjòn i'nga x̄ita-la jngoò naxandá jtobá ján nangui Samaria. Kiì kátsji'nde ñánda s̄ikjáya.

53 Jñà x̄ita Samaria mìkiì kitsjaà'nde-la nga jyeé tíjin-la nga ján nchifi Jerusalén.

54 X̄ita xi kota'yàt'aà-la Jesús, Jacobo kò Juan, k'e nga kijtseè nga mìkiì kitsjaà'nde-la kitsò:

—Na'èn, ¿a mejèn-lè nga k'oa kixón-jen nga kàtjanchrobá-jen ni'ín xi ts'e ngajmiì nga kàtjehesòn x̄ita koi koni s'ín kis'ìin Elías?

55 Tanga jè Jesús kisikátji'a, tsohótiko. Kitsò-la:

—Jnò, mìkiì tíjin-nò yá ts'e inima xi kàtsjá-nò kjohítsjeèn jè.

56 An xi Ki'ndí-la X̄ita xan-la yijo-na, mìtsà koi xá j'i-na nga kàtachija inima-la x̄ita; jè-né nga kàtitjokàjin kjo'in.

Ikjoàn xìn naxandá kiì.

Jè xi mejèn-la nga kjitjingui-la Jesús

(Mateo 8:19-22)

57 K'e nga nchifiya ndiyá, jngoò x̄ita kitsò-la:

—Na'èn, kjitjingui-lè nita ñánda-ne nga k'oin.

58 Jesús kitsò-la:

—Jñà njinda, tjín-la nguijo ñánda oyijò; tikoáá jñà nise tjín-la tjé; tanga 'an xi Ki'ndí-la X̄ita xan-la yijo-na, tsjin-na i'nde ñánda síkjáya.

59 Jesús kitsò jngoò-la x̄ita:

—Nchrobátjingui-ná.

Jè x̄ita xi oki'mi-la kitsò:

—Na'èn, tjii'nde-ná nga ítjòn kjián k̄hijñaà na'èn-na.

60 Jesús kitsò-la:

—Jñà mik'en kàt̄hijin mik'en-la; ngaji t'in, t̄ika'bí 'én kó s'ín otíxoma Nainá.

61 Jngoò x̄ita xi k'oa t̄i kitsò:

—Kjitjingui-lè ngaji Na'èn, tanga tjii'nde-ná nga kjián síhixat'aà ítjoàn jñà x̄ita xi títsajna ni'ya-na.

⁶² Jesús kitsò-la:

—Nijngòò x̄it̄a xi ij̄ton íts'in t̄íkotsejèn-ne koma s̄íkitasòn xá-la Nainá nga jè tíhotíxoma. K'oaá ngaya-la tsà jngòò x̄it̄a xi t̄ísíkon nchraja, tsà ij̄ton íts'in t̄íkotsejèn-ne, mìkìi koma s̄ìixá.

10

Xá xi kits'ii-la x̄it̄a xi jàn-kaàn k̄o te ma-ne

¹ K'e nga jye komà kjoa koi, Na'èn-ná Jesús kitsjaà-la xá nguì jàn-kaàn k̄o te x̄it̄a xi kj'eí. Jò jò kisìkasén ítjòn nga kjiindà naxandá k̄o i'nde ñánda nga isa iskan kjoì jè.

² Kitsò-la:

—Xi okixi, 'ñó tse xá tjín xi it'aà ts'e 'Én-la Nainá koni s'ín ma k'e nga kjìn tsojmì majchá, tanga jña x̄it̄a ch̄i'nda xi síxá, chiba ma-ne. T̄itsi'ba-là jè Nei-la xá, k̄atasíkasén-isa x̄it̄a ch̄i'nda xi koìxkó tsojmì koi.

³ Tanguió; 'aán siikasén-nò koni orrè ki'ndí ya ij̄in-la cho tsején.

⁴ Kì chijtsa ton ch'aà, kì naxá na'yaá ch'aà, n̄i xoxté tsjayaá; t̄ikoaá mìkìi yá x̄it̄a xi n̄ihixat'aà ya iya ndiyá.

⁵ N̄ita ñánda ni'ya nga k̄itjás'een, ítjòn k'oa tixón: “Nchán k̄atas'e ni'ya jè.”

⁶ Ni'ya jè, tsà tjín x̄it̄a xi ok'in-la nga s'e-la kjoa'nchán, k̄itasòn-né; tsà majìn, mìkìi k̄itasòn.

⁷ T̄itsajna ya ni'ya ñánda k̄itjás'een; kì xk̄i xi ján ni'ya onguió; ch̄inee, t'ioo mé tsojmì xi tsjá-nò. Jè x̄it̄a xi síxá mochjeén-né nga k'oi-la ch̄i-la.

⁸ K'e nga kijchoò jngòò naxandá ñánda tsjá'nde-nò, ch̄inee mé tsojmì xi tsjá-nò.

⁹ Tsà tjín x̄it̄a xi xk'én, t̄indaà-nò; koat̄in-là: “Jye kjòchrañat'aà-nò nga jchaa kó s'ín otíxoma Nainá.”

¹⁰ Tsà jngòò naxandá ñánda kijchoò, tsà mìkìi tsjá'nde-nò, t̄itjayaà ndiyá, koat̄in-là:

¹¹ “Skanda jè chijo-la naxandá-nò xi k̄atsobà'ñó ndsokò-jen, k̄itsajneè-nòjen koni jngòò seña nga mì t̄i k̄i s̄is'in-nòjen. Tanga k̄atasij̄in-nò nga jye kjòchrañat'aà-nò nga jchaa kó s'ín otíxoma Nainá.”

¹² K'oaá xán-nò, naxandá jè, isaá tse kjo'in s'e-la jè nachrjein k'e nga s̄indaaj̄in-la x̄it̄a, mì k'oaá-ne koni jña x̄it̄a ts'e naxandá Sodoma.

Mé kjo'in xi tjoé-la naxandá xi mìkìi síkjahatj̄iya kjoh̄itsjeèn-la kjoa ts'e jé-la
(Mateo 11:20-24)

¹³ 'iIma xó-nò jñò, x̄it̄a naxandá Corazín! 'iIma xó-nò jñò, x̄it̄a naxandá Betsaida! Tsà ya-làne naxandá Tiro k̄o Sidón nga k'oa'sín kis'iaàn kjoxkón xi ndaà tjín xi komà ya ij̄in naxandá tsajòn, tsà jña x̄it̄a Tiro k̄o Sidón k̄itsee, jyeé-la nikje naxá íkjá k̄o chijo ni'ín t̄itsaj̄in koni seña nga jye kisikájno jé-la nga mì t̄i jé ótsji-ne.

¹⁴ Tanga jè nachrjein nga s̄indaaj̄in, isaá tse kjo'in s'e-nò mì k'oaá-ne koni jña x̄it̄a naxandá Tiro k̄o Sidón.

¹⁵ Jñò xi x̄it̄a naxandá Capernaum tsajòn, ¿a k'oaá s'ín mokjeiín-nò nga jchaxkón-nò ján ngajmì? Majìn, yaá k̄itsajnajñòò i'nde ñánda tjín kjo'in.

¹⁶ 'Jè xi 'nchré-nò, 'aán xi 'nchré-na; jè xi kochrjengui-nò, 'aán xi ochrjengui-na; jè xi kochrjengui-na, jè ochrjengui xi kisìkasén-na.

Mé-ne kjòtsja-la jña x̄it̄a xi jàn-kaàn k̄o te ma-ne

¹⁷ J'ii-ne jña x̄it̄a xi jàn-kaàn k̄o te ma-ne. 'Ñó tsja tjín-la, kitsò:

—Na'èn, xi it'aà tsiji, skanda jña inima ch'o-la neí síkitasòn-najen.

¹⁸ Jesús kitsò-la:

—Kixií kjoa, k̄itsee-ná jè x̄it̄a neí koni kji ni'ín ch'oon kji nga kiskaàngui it'aà ngajmì.

¹⁹ 'An, jyeé kitsjaà-nò kjotíxoma k̄o nga'ñó nga koma k̄inchanè ye k̄o cho na'yá, nga s̄ikijneè-là ngats'ii nga'ñó-la x̄it̄a neí xi kondra tsajòn; n̄imé xi ch'o s̄ikò-nò.

²⁰ Tanga kì matsja-nò nga jè inima ch'o-la xita neí síkitasòn-nò; jè xi kàtatsja-nò nga jye tjín-nò i'nde ján ngajmii nga jyeé ya tjít'aà 'ín-nò.

Mé kjoa-ne nga jè Jesús kitsjaà-la kjondaà Na'èn-la it'aà ts'e xita-la
(Mateo 11:25-27; 13:16-17)

²¹ Tjè-ne hora, Jesús, tsjaá komà-la xi it'aà ts'e Inima Tsjeè-la Nainá; kitsò:

—Na'èn, xi tsiji ngajmii kò tsiji isò'nde, tsjaà-lè kjondaà nga jñà kjoa koi tsibì'ma-la jñà xita xi tjín-la kjoachjine kò xi 'ñó tjín-la kjohítsjeèn nga jñà tsakoò-la xi taxki ndí xita ima kjoa. Jon, Na'èn, nga k'oaá s'ín kjòmejèn-lè.

²² Ngats'ii kjoa ts'e kjotíxoma, 'aán kisìngatsja-na Na'èn-na. Mitsà yá xi beèxkon yá-né xi Ki'ndí-la ma, tajngoò jè xi Na'èn ma; tikoáá mitsà yá xi beèxkon yá-né xi Na'èn ma, tajngoò jè xi Ki'ndí-la beèxkon, kò jè Ki'ndí-la kòkò-la jñà xita xi jè mejèn-la nga skoexkon, yá-né xi Na'èn ma.

²³ Jesús kisikáfaya'a xita xi kota'yàt'aà-la, tà jñà kiichjat'aà xìn-la, kitsò-la:

—Mé tà ndaà-la jñà xita xi xkon nchibeè-ne koni s'ín titsa'yaà jñò.

²⁴ K'oaá xán-nò, kjìn xita xi kiichja ngajo-la Nainá, tikoá kjìn xitaxá ítjòn xi kjòmejèn-la nga skoè jè kjoa xi jñò titsa'yaà, tanga mìkii kijtsee; tikoáá kjòmejèn-la nga kjì'nchré jè xi titsana'ya, tanga mìkii kiì'nchré.

Xita samaritano xi ndaà xita

²⁵ Jngoò xita chjine xojon ts'e kjotíxoma-la Nainá xi kiskii Moisés kiikon Jesús nga mejèn-la skónachan-la, kitsò:

—Maestro, ¿mé kjondaà xi s'iaàn nga kijnakon inima-na nita mé nachrjein-ne?

²⁶ Jesús kitsò-la:

—¿Mé xi tjít'aà jè xojon ts'e kjotíxoma-la Nainá xi kiskii Moisés? ¿Kó tsò xi bìkkejiin?

²⁷ Jè xita chjine xojon kitsò:

—“Titsjachi Na'èn-ná xi Nainá 'mì-la nga kò inima-lè, kò nga'ñó-lè, kò kjohítsjeèn-lè; koa tis'ín titsjachi xita xinguui koni tsà tì yijo tsiji-ne.”

²⁸ Jesús kitsò-la:

—Ndaà kànokjoi. Tsà k'oaas'ín s'iin, kijnakon-né.

²⁹ Jè xita chjine xojon mejèn-la nga ndaà sikkjna yijo-la 'én xi kiskònangui; jngoò k'a kiskònangui-la Jesús, kitsò:

—¿Yá-né xi xita xinguiáa?

³⁰ Jesús kitsò:

—Jngoò xita tífiyen ján ndiyá Jerusalén skanda Jericó. Ya iya ndiyá tsibíchjoà-la xita chijé. Tsafaá'an tsojmì-la kò nikje-la. 'Ñó kisiki'on. Ikjoàn yaá kisikájna k'en ya iya ndiyá.

³¹ Tjè-ne ndiyá, k'e chiba-la jahajen jngoò nò'mii, tanga k'e nga kijtseèxkon nga ya kjinaya ndiyá xita xi kitsi'on, tà jahat'aà xìn-la.

³² Tik'eé-ne ja jngoò xita levita [xi iya jngo síxá] k'oaá tì kis'iin k'e nga kijtseèxkon xita jè nga kjinaya ndiyá; tikoáá tà jahat'aà xìn-la.

³³ Tanga k'e nga ijchò jngoò xita Samaria [xi xita kondra-la xita judío] nga koa tis'ín tífi ndiyá jè, k'e nga kijtseèxkon, kjòhimakeè-né.

³⁴ Kii kasit'aà chraña-la. Kisixkii-la; kisikaàjno asiti kò xán ñánda kitii-la. Ikjoàn tsibíjtéjiin; kisikíjnasòn-la kohoyo-la; kiiko jngoò ni'ya ñánda nga ma nikjáyaá. Jè kisikinda.

³⁵ Xi komà inchijòn k'e nga jye tífi-ne jè xita Samaria, tsibíchjí-la nei-la ni'ya, kitsjaà-la ton koni tjín chjí-la ch'inda xi jò nachrjein; kitsò-la: “Tikinda-ná xita jè. K'e nga kjoì jngoò k'a-na kichjiá tsà isa tse sikkje.”

³⁶ Ngaji, ¿kó si? Ingajàn xita koi, ¿yá-né xi xikjín jè xita xi kisiki'on chijé?

³⁷ Jè xita chjine xojon kitsò:

—Jè xi xikjín, jè xita xi kjòhimakeè.

Jesús kitsò-la:

—Ngaji, k'oaá tis'ín t'iin.

K'e nga jè Jesús tsibìjna ni'ya-la María kò Marta

³⁸ Jesús k'e nga tìjmayá-ìsa iya ndiyá, ijchò jngoò ndí naxandá jtobá ñánda tíjna ni'ya-la chjoón xi 'mì Marta. Yáá kitsjaà'nde-la nga tsibìjna.

³⁹ Jè Marta tíjna ìjngoò-ìsa chjoón ndichja xi 'mì María. Jè María tsibìjnat'aà ndsokò Jesús nga kii'nchré-la 'én xi tíbénjmi.

⁴⁰ Tanga jè Marta, 'ño tísíkájno xá xi tjin-la. Kii kasit'aà-la Jesús, kitsò-la:

—Na'èn, ¿a mì makájno-lè nga jè xinguiáa tajngoò síkìjna-na nga s'iaàn xá? Kot'in-la kàtasíhjat'aà-na.

⁴¹ Jesús kiichja kitsò-la:

—Marta, Marta, tsí ndaà nìkájnoi, tsí ndaà bìnè-la xá yijo-lè.

⁴² Tà jngoò kjoa xi 'ño mochjeén. Jè María ndaà tjin xi kòfaájìn; niyá xi kjoaáxìn-la kjoa jè.

11

K'e nga jè Jesús tsakóya kjoa ts'e nga bìtsi'baá
(Mateo 6:9-15; 7:7-11)

¹ Jngoò k'a, Jesús tíjna jngoò ì'nde ñánda tíhjat'aà-la Nainá; k'e nga jye kiichjat'aà-la, jngoò xita xi kota'yàt'aà-la kitsò-la:

—Na'èn, takóya-nájen kó s'ín kinókjoat'aà-lajen Nainá koni s'ín kis'ìin Juan nga tsakóya-la xita xi kota'yàt'aà-la.

² Jesús kitsò-la:

—K'e nga kinókjoat'aà-la, k'oaá s'ín tixón:

Na'èn xi tijni ngajmì, kàtayaxkón-la kjoajeya-lè nga tsjeè tijni.

Kàtjanchrobá kjotíxoma-lè.

K'oas'ín kàtama ì'it'aà nangui koni s'ín mejèn-lè nga koma, koni s'ín ma ján ngajmì.

³ Tjii kjit'aà-nájen niño xi mochjeén-najen nga nachrjein inchiòn.

⁴ Tijchàat'aà-nájen jé-najen koni s'ín nìchàat'aà-lajen ngats'ii xita xi ch'o síko-najen.

Ki kii bìi'ndi yá xi mejèn-la nga kot'aà-najen nga kinchátsji jé-jen.

⁵ Jesús kitsò-ìsa-la:

—Jñò, tsà tjin jngoò-nò amigo, tsà osen nìtjen onguíchoòn, tsà k'oin-là: “Amigo, tikìña jàn-ná inchrájin-lè,

⁶ jngoò amigo-na kòf'ìikon-na koa tsjin-na mé xi tsjaà-la.”

⁷ Tsà jè amigo xi tíjna ìnga ni'ya, tsà kitsò: “Kì 'an nìjti-ná. Jè xotjoa ni'ya jyeé tíhjoàjto. Jñà ndí ìxti-na kò 'an jyeé kinìkjáya-jen. Mìkii koma kósitjeen nga tsjaà-lè tsojmì xi mochjeén-lè.”

⁸ K'oaá xán-nò, nas'ín majìn-la nga osítjen nga amigo tsajòn, tsà 'ño s'isì-là, chaán kósitjen. Tsjá yije mé xi mejèn-nò.

⁹ 'K'oaá xan-nò: Tijé mé xi mejèn-nò, jè Nainá tsjá-nò; tìnchátsjioò Nainá, sakó-nò; tìnókjoat'aà-la Nainá mé xi mejèn-nò mé-ne skíx'a'nde-nò koni jngoò xotjoa.

¹⁰ Ngats'ii xita xi síjé, tjoé-la, jè xi ótsji, sakò-la kò jè xi chjat'aà-la Nainá, tjax'a'nde-la koni jngoò xotjoa.

¹¹ Jñò xi na'èn 'mì-nò, tsà inchrájin s'ijé-nò ìxti-nò, ¿a ndajoó k'oi-là? Majìn. Koa tsà tìn s'ijé-nò, ¿a yeé k'oi-là? Majìn.

¹² Tsà chjoó s'ijé-nò, ¿a cho na'yá k'oi-là? Majìn.

¹³ Jñò, nas'ín xita xi ch'o 'nè, ma-nò 'bii-là ìxti-nò tsojmì xi ndaà kjoàn; jè Na'èn-nò xi tíjna ngajmì, isáá nìton s'is'in-nò nga tsjá-nò Inìma Tsjeè-la tsà jñò s'ijét'aà-la.

Jngoò ni'ya xi jòya tjin

(Mateo 12:22-30; Marcos 3:20-27)

14 Jesús, tíhochrjejiin iníma ch'o-la neí xi tíjiin iníma-la jngoò xita xi mìkì ma chja. Xita jè, k'e nga jye itjokàjiin jè iníma ch'o-la neí, komà kiichja-ne. Jñà xita xi nchikotsejèn, tà kjòxkón-la jè kjoa jè.

15 Tanga tjín i'nga xita xi kitsò:

—Jè xita sko-la xita neí xi 'mì Beelzebú, jè tsjá-la nga'ño nga k'oas'ín ochrjekàjiin iníma ch'o-la neí xi tíjiin iníma-la xita.

16 Tjín i'nga xita xi mejèn-la skót'aà tsà kixi kjoa nga Nainá kisikasén Jesús; kisjé jngoò-la seña xi jeya tjín xi it'aà ts'e Nainá nchrobá-ne.

17 Jesús, tik'eé kijtseèya-la koni s'ín nchisíkítsjeèn xita koi, kitsò-la:

—Ngats'ìi naxandá xi jòya tjín nga kondra títsajna-la xíkjin, ti yijo-laá tísíxixòña-ne; tikoáá tsà jngoò ni'ya xita xi jòya tjín nga kondra títsajna-la xíkjin tikoáá jngoò k'a tsjohoba xita.

18 Tsà tikoá jè xita neí, tsà jòya tí'sín xi tijè-ne yijo-la. ¿Kós'ín koma s'e-la nga'ño nga kotixoma? Jñò, bixón-nò nga 'an, koó nga'ño-la Beelzebú ochrjekàjñaà iníma ch'o-la neí.

19 Tsà k'oas'ín tjín kjoa, jñà xita tsajòn, ¿yá xi tsjá-la nga'ño k'e nga ochrjekàjiin neí? Koi kjoa-la, tijña-ne xita-nò keènojmi nga mìtsà kixi kjoa nga jè sko-la neí síkjeén.

20 Tanga 'an, k'e nga ochrjekàjñaà iníma ch'o-la neí xi tíjiin iníma-la xita, jè Nainá tsjá-na nga'ño. Jè kjoa koi tsòyaá-ne nga Nainá, jyeé i tíhotixoma i it'aà nangui.

21 'K'e nga jngoò xita xi tjín-la nga'ño ko tjín-la kicha, ko ndaà síkinda ni'ya-la, ndaà jncha tsojmì xi tjín-la.

22 Tanga tsà kjoí jngoò xi kj'eí xita xi isa tse nga'ño tjín-la, síkijne-la, kjoáá'an yije kicha xi ma'ñót'aà takòn, ikjoàn síjòya yije tsojmì xi tjín-la; kjiko-né.

23 'Niton yá xita-ne xi mì 'an fit'aà-na, jè-né xi kondra-na; koá nita yá xita-ne xi mìkì síchját'aà-na nga bíxkóyako-na xita xi ts'an koma, jè tísítsjohoba xita.

*Mé xi mat'in xita k'e nga f'ìi jngoò k'a-ne iníma ch'o-la neí
(Mateo 12:43-45)*

24 'K'e nga jngoò iníma ch'o-la neí bitjokàjiin iníma-la jngoò xita, yaá ojmeè i'nde ñánda kixi choòn, ótsji'nde nga síkjáya. K'e nga mìkì sakó'nde-la, jngoò k'a síkítsjeèn, tsò: “Kjín-la jngoò k'a-na ni'ya-na ñánda inchrobá-na.”

25 K'e nga bijchó jngoò k'a-ne ni'ya-la, beè nga ndaà kisatiicha ko tsjeè choòn.

26 Ikjoàn fikjaá ngui itoó xíkjin xi isa ch'o s'ín. K'eé fahas'en-jiin iníma-la xita jè; yaá bìtsajna. Xita jè, isáá 'ño ch'o bíjna koni s'ín tsibìjna nga sa íjtòn.

Yá xita-ne xi isa 'ño ndaà-la

27 Tik'e-né nga tíbénojmi Jesús jñà kjoa koi, kiichja jngoò chjoón xi ya tíjnajiin-la xita kjin, 'ño kiichja, kitsò:

—jMé tà ndaà-la jè chjoón xi kisikatsjè-nè jè sò'nde tikoá kisikaki-lè!

28 Jesús kitsò:

—jIsáá ndaà-la jñà xita xi 'nchré 'én-la Nainá, tikoá síkitasòn!

*Xita xi kisjé jngoò kjòxkón
(Mateo 12:38-42; Marcos 8:12)*

29 K'e nga jye kòkjìn xita ñánda tíjna Jesús, tsibíts'ia nga kitsò:

—Xita xi tjín nachrjein i'nde, ch'oo s'ín; síjé jngoò seña xi it'aà ts'e Nainá, tanga nijngoò seña skoe. Tà jè skoe seña ts'e Jonás.

30 Koni s'ín komàt'in Jonás, jñà xita naxandá Nínive kijtseè jngoò kjòxkón xi ndaà tjín, 'an xi Ki'ndí-la Xita xan-la yijo-na, k'oaá tí'sín tjín jè kjoa xi sa komat'ian; jñà xita xi tjín i'nde skoeé kjòxkón xi ndaà tjín.

31 Jè chjoón íjtòn xi ya otixoma nangui sur, kosítjen-né jè nachrjein k'e nga koìndaàjiin Nainá; jè tsját'in 'én jñà xita xi tjín nachrjein i'nde, koi kjoa-la nga kjin nangui j'ìi-ne

nga j'ì 'nchré-la kjoachjine-la Salomón; tanga nachrjein i'ndeï, 'an xi tìchjàko-nò, ìsaá 'ñó jeya tìjnaa mì k'oaá-ne koni Salomón.

³² Jñà xità naxandá Nínive kosítjen-né jè nachrjein k'e nga kojindaajìin Nainá; jñà tsját'in 'én jñà xità xi tjin nachrjein i'ndeï, koií kjoa-la nga kisikájno jé-la nga mì tì jé tsohótsji-ne k'e nga kiichjaya 'én-la Nainá Jonás; tanga nachrjein i'ndeï, 'an xi tìchjàko-nò, ìsaá 'ñó jeya tìjnaa mì k'oaá-ne koni Jonás.

*Ni'ín xi síhiseèn-la xità
(Mateo 5:15; 6:22-23)*

³³ 'Nijngòò xità xi síkíjna'ma k'e nga jngòò ni'ín bít'a'í. Mìtsà kaxa síkíjnangui; síkíjna'nga-né, candelero síkíjnaya mé-ne nga kohiseèn yije-la xità xi fahas'en ni'ya.

³⁴ Jñà xkoaán, jè ma ni'ín xi síhiseèn-la yijo-ná; k'e nga ndaà tsejèn-ná, iseèn choòn yije-la yijo-ná; tanga tsà mìkiì ndaà tsejèn-la xkoìin, jñò choòn-la yijo-lè.

³⁵ Ndaà chítsejìn, ¿a ndaà tìjna inìma-lè? ¿A iseèn choòn-la? ¿A xi jñò choòn-la?

³⁶ Tsà iseèn choòn kóhokji yijo-lè, tsà mì ñánda tjit'aà xi jñò choòn, ndaà kotsejìn k'oaá ngayala koni tsà jngòò ni'ín xi 'ñó títi síhiseèn-lè.

*K'e nga jè Jesús kisikaká-la xità fariseo ko xità chjine xojon ts'e kjotíxoma-la Nainá
(Mateo 23:1-36; Marcos 12:38-40; Lucas 20:45-47)*

³⁷ K'e nga jye kiichja Jesús, jngòò xità fariseo kiichja-la nga mejèn-la kokjen-ko ya ni'ya-la. K'e nga jahas'en ni'ya Jesús, tsibijnat'aà ímìxa.

³⁸ Jè xità fariseo, tà k'oaá komà-la nga kijtseè nga jè Jesús, mìkiì kisìhitasòn kjotíxoma xi xkón tjin, mìkiì tsaníjno tsja nga tsakjèn.

³⁹ Kiichja Na'èn-ná Jesucristo, kitsò-la:

—Jñò, xi xità fariseo 'mì-nò, onìjnoò chítìsìn-nò ko chroba-nò ya isò'nga-la, tanga ijìin inìma-nò, 'ñó fahajìin-nò nga chjaá'an-là tsojmì-la xità xi kj'eíí tìkoaá binchaàtsjioò kjoa xi ch'o tjin.

⁴⁰ Jñò xi xità tòndo 'mì-nò. ¿A mì tìjìin-nò: Nainá, k'e nga tsibíndaà isò'nga yijo-la xità, tìkoaá tìjè-ne xi tsibíndaà inìma-la?

⁴¹ Tjìi-là xità imà kjondaà xi tìjìin inìma-nò mé-ne nga tsjeè kitsajnaà nguixkon Nainá.

⁴² 'ìimà xó-nò xi xità fariseo 'mì-nò! Nga ma-nò bíchjí-là Nainá xi teya oko-la ts'e xka menta ko xka ruda ngats'ii xka xi ma chine, tanga mìkiì kjoa kixi nìkoo xità; mìkiì tjòcha 'yaà Nainá. Koií kjoa xi 'ñó mochjeén nga kítasòn; tìkoaá mochjeén-né nga kítasòn jñà kjoa xi i'nga.

⁴³ 'ìimà xó-nò xi xità fariseo 'mì-nò! Nga mejèn-nò nga jñò kítasànè íxile xi jncha ítjòn ya ni'ya jngò sinagoga, tìkoaá mejèn-nò nga skoexkón-nò xità xi kj'eíí, ndaà sùixat'aà-nò ya nditsìn.

⁴⁴ 'ìimà xó-nò jñò xità xi okoòya kjotíxoma-la Nainá xi kiskìi Moisés ko xi xità fariseo 'mì-nò xi jò ma isén-nò! K'oaas'ín tìtsjoò koni kjoàn ngajo-la mik'en nga mìkiì tsejèn; k'e nga binchimasòn xità, mìkiì beè mé xi jnchaya.

⁴⁵ K'eé kitsò jngòò jñà xità chjine xojon:

—Maestro, k'e nga k'oaas'ín nokjoì, tìkoaá 'on nokjoàko-nájen.

⁴⁶ Jesús kitsò:

—Tìkoaá, imà xó-nò jñò xi xità chjine xojon 'mì-nò! Nga bìnè-là kjotíxoma-nò xità xi kj'eíí xi 'ñó 'in tjin nga mìkiì chíkjoa-la nga síkítasòn, tanga jñò, nì jtsé nìchjít'aà-là.

⁴⁷ 'ìimà xó-nò xi bindaà chrjó-la mik'en ts'e jñà xità xi kiichja ngajo-la Nainá! Jñà xità jchínga-nò kisik'en.

⁴⁸ K'oaás'ín bitjo kixi kjoa nga tìjngòò-takòn nga xità jchínga tsajòn kisik'en xità koi, koa jñò, bindaà chrjó-la mik'en.

49 'Xi kjohítsjeèn ts'e Nainá kitsò-né xi it'aà ts'e xita jchínga-nò kò tsajòn: “Siikasén xita xi kichja ngajo-na kò xita xi 'an kotixáya-la; tanga tjín xi sik'en koa tjín xi kondra kjoí tjingui-la.”

50 Nainá kindáá sijné-la jña xita xi tjín i'ndeí, jní xi kixíxteèn ngats'ìi xita xi k'en xi kichja ngajo-la Nainá skanda k'e nga tisa kisindaà isò'nde;

51 mats'iaqo-ne Abel xita xi k'en ítjòn skanda jè Zacarías xi jyehet'aà-ne nga k'en; jè xita xi k'en ya i'nde jngoò osen-la ñánda tíjna Ni'ya Tsjeè-la Nainá kò ñánda binchásòn kjotjò xi tsjá-la Nainá jña xita. K'oaá xán-nò, jè Nainá sijné-la kindá jña xita xi tjín i'ndeí.

52 'iima xó-nò jñò xita xi okoóya kjotixoma-la Nainá xi kiskii Moisés! Binchachjoà-la xita xi kj'eíi nga mikii kjoahas'en-jìin-la kjoa chjine-la Nainá; jñò, mikii bitjaàs'en-jñòò kò mikii biì'nde-là xi kj'eíi xita nga fahas'en-jìin kjoa chjine-la Nainá.

53 K'e nga jye okitsò Jesús jña 'én koi, jña xita xi okóya kjotixoma-la Nainá kò xita fariseo 'ño tsibít'aà-la nga kjìn skoya kjoa kiskònangui-la,

54 tikoá kisikinda nga skoe mé 'én xi kichja-isa mé-ne nga koma kohòngui-ne it'aà ts'e xitaxá.

12

Kjoa ts'e xita xi jò isén tjín-la

1 K'e nga jye 'ño kjìn jmü kòkjìn xita, chiba-la otíjno, otít'aà xíkjín, tsibíts'ia Jesús nga kichja ítjòn-la xita xi kota'yát'aà-la; kitsò-la:

—Tikindaá yijo-nò it'aà ts'e xita fariseo xi jò isén tjín-la; kì k'oaá s'ín komat'ioòn koni ma na'yo san nga sisan xíkjín k'e nga ótjìin-la.

2 Nì mé tjín xi tíjtsa'ma xi mikii kotsejèn; ngats'ìi xi tjí'ma, jchaá-la.

3 Ngats'ìi kjoa xi kinókjoa'maà k'e nga nitjen, kjì'nchré yije xita k'e nga nachrjein; jè kjoa xi ya kinókjoa'maà iya ni'ya-nò, ján isò'nga ni'ya, 'ño kiná'ya-la.

Yá-né xi kiskón-lá

(Mateo 10:26-31)

4 Jñò xi amigo ts'an xan-nò, kì tsakjoòn-la jña xi ma-la sík'en yijo-ná; k'e nga jye ma, ni tì mé xi síko-isa-ná.

5 An, k'oa xán-nò yá xi kiskón-lá; jè xi tiskón-lá, jè xi ma-la sík'en-ná, ikjoàn tíj'nde-la nga síkatjen-jìin-ná ñánda títi ní'in xi ts'e kjo'in. K'oaá xan-nò, jè xi tiskón-lá.

6 K'e nga 'òn ndí nise, saá jò ton satíjna-ne. Tanga Nainá, tjín-la kindá. Nijngoò nise síjchàajìin.

7 Xi it'aà tsajòn, isaá 'ño tse chjí-nò mì k'oaá-ne koni nas'ín 'ño kjìn ma nise. Skanda tsjaskoò tíxkeya yije-la Nainá. Kì tsakjoòn-jèn, nga Nainá 'ño ndaà s'ín-nò kindá.

Jña xi beèxkón Jesús nga nguixkon xita

(Mateo 10:32-33; 12:32; 10:19-20)

8 Ngats'ìi xita xi tsjá 'én nga nguixkon xita nga 'an fit'aà-na, tikoáá 'an xi Ki'ndí-la Xita xan-la yijo-na, tsjaà-la 'én jña àkjale-la Nainá nga xita ts'an xan-la.

9 Tanga jè xi kjójna'mat'in-na nga nguixkon xita, tikoáá s'i'mat'in-né nga nguixkon àkjale-la Nainá.

10 Ngats'ìi xita xi ch'o tsò 'én xi kichjajno-na 'an xi Ki'ndí-la Xita xan-la yijo-na, jchat'aà-la jé-la; tanga jña xi kichjajno-la Inima Tsjeè-la Nainá mikii jchat'aà-la jé-la.

11 Jñò, k'e nga kjiko-nò xita ya ni'ya ingò sinagoga, ya nguixkon xita ítjòn kò ts'e xitaxá, kì makájno-nò kó s'ín kixón nga kosiko yijo-nò mé 'én xi kinókjoa.

12 K'e nga kijchò hora nga kinókjoaa, jè Inima Tsjeè-la Nainá, keènojmiya-nò kó s'ín kixón.

Xi ts'e kjoa nchiná

13 Jngoò xita xi ya tíjnajìin-la xita kjìn, kitsò-la Jesús:

—Maestro, kot'in-la jè 'ndsè kàtasíjòya tsojmì-la xita jchínga-najen; xi 'an oko-na, kàtatsjá-na.

14 Tanga jè Jesús kitsò-la:

—Ji amigo, mìtsà xitaxá tjín-na nga 'an sìjòya-nò tsojmì xi tsajòn.

15 Jesús tikoáá kitsò-isa-la:

—Chítsejèn, tikoá t'een kinda yijo-nò; kì 'ño kjìn tsojmì binchaàtsjioò i isò'nde; nga jngoò xita, nas'ín 'ño kjìn tsojmì tjín-la, mìkì sikkínakon tsojmì-la.

16 Tikoáá tsibénojmi jngoò-la kjoa xi mangásòn; kitsò-la:

—Jngoò k'a jngoò xita xi 'ño nchiná, 'ño kjìn tsojmì kòjchásòn nangui-la.

17 Xita jè, kisikítsjeèn; kitsò: “¿Mé xi s'iaàn? Tsjin-na ñánda kinchaàxkoá tsojmì-na.”

18 K'eé kitsò: “Jyeé be mé xi s'iaàn. Siikixòña ni'nga-na, ikjoàn kındaà-isa xi isa iì kjoàn; yaá kinchaàxkoá yije kóhotjín tsojmì xi kòjchá-na kò xi tjín-na.

19 Ikjoàn xán-la yijo-na: Kjìn tsojmì 'nchaxkó-na. Kjìn nó koma-la; siikjáya, kókjeen, skiaa, siitsjakoaa isò'nde.”

20 Tanga jè Nainá kitsò-la: “Ji xi xita tòndo 'mì-lè, nitjen jè, kiyá-né. Tsojmì xi 'nchaxkó-lè, ¿yá ts'e koma?”

21 K'oaá s'ín mat'in jña xita xi tà tsojmì ts'e yijo-la bincháxkó koa mìtsà xita nchiná nga nguixkon Nainá.

Kós'ín s'kinda Nainá jña xi ixti-la ma

(Mateo 6:25-34)

22 Nga komà iskan Jesús kitsò-la xita xi kota'yat'aà-la:

—Koií k'oa xan-nò: kì makájno-nò mé tsojmì xi chjinee nga sjchá yijo-nò kò mé nikje xi chikjá.

23 Isáá 'ño tse chjí-la nga titsajnakoaán i isò'nde koni jña tsojmì xi ma chine. Tikoáá yijo-ná, isaá 'ño tse chjí-la koni jña nikje xi chikjá.

24 Chítsejèn-là jña nchraá; mì jnoó 'beé, mì nijin bincháxkó, tsjin-la kaxa nojmé, tikoá tsjin-la ni'nga; tanga jè Nainá tsjá-la tsojmì xi kine. Jjño, isaá 'ño chjí-nò mì k'oaá-ne koni jña cho xi tjímajin isén!

25 Jño, nas'ín takó 'ño sikájnoò, ni itsé koma sikatonè-là nachrjein-nò koni s'ín tjindaà-la Nainá.

26 Tsà mìkì ma-nò nìkitasòn kjoa xi chiba tjín, mé-ne nga jè nìkájno-nò kjoa xi isa chjá tjín.

27 'Chítsejèn-là naxó lirio, kó s'ín majchá; mìkì síxá, mìkì ma-la faña nikje; tanga 'an, k'oaá xan-nò, ndaà tsà jè Salomón xi xitaxá ítjòn tsibìjna nga 'ño xita jeya, mì k'oaá kjoàn nikje tsohòkjá koni kjoàn jña naxó.

28 Nainá, k'oaá s'ín ndaà kjoàn s'ín xka ijña, xi jngoò nachrjein titsajnakon kò xi ma nchjòn kotsjòjìn ni'ín. Jño xi xita 'mì-nò xi mìkì ndaà mokjeín-nò, ¿a mìtsà isa niton tsjá-nò Nainá nikje xi mochjeén-nò nga chikjá?

29 Jño, kì nìkájno-jèn; kì bixón-jèn: “¿Mé xi chjineé; mé xi s'ioaá?”

30 Ngats'iì xita isò'nde, k'oaá tjín tsojmì xi ótsji, tanga jño, tíjnaá-nò Na'èn xi Nainá; jyeé tjijn-la nga kotjín tsojmì xi mochjeén-nò.

31 Jño, tinchátsjioò kjoa ts'e Nainá koni s'ín otíxoma; ngats'iì tsojmì xi mochjeén-nò tikoáá tjoésòn-nò.

Tsojmì xi 'ño tse chjí-la ngajmii

(Mateo 6:19-21)

32 Jño, xi ndí orrè-na xan-nò, kì tsakjoòn-jèn; k'oaá s'ín kiskoòsòn-la Nainá nga jño kotixomakjò ya ñánda tíhotíxoma Nainá.

³³ Tatijnaà tsojmì xi tjin-nò; tjiì kjotjò-là jña xita xi mochjeén-la; k'e nga tsà k'oas'ín s'een, k'oaá ngaya-la koni tsà nchisakó ngajo-nò chijtsa ton ján ngajmii xi mikii machínga; sakò-nò tsojmì xi 'ñó tse chí-la ján ngajmii ya ñánda mikii kjoehet'aà, mikii bijchó chijé, tikoá mikii síkje cho kixo.

³⁴ Ya ñánda kinchajtión tsojmì-nò, tikoá yaá sílkítsjeèn inima-nò.

Chì'nda xi ndaà títsajnaandaà

³⁵ 'Ndaà títsajnaandaà nga síkitasòn-là Na'èn-ná koni jngoò xita xi ndaà tíkjá xincho-la ko ndaà títi ni'ín-la.

³⁶ K'oaá s'ín ndaà títsajnaakoòn koni jña xita chí'nda xi nchikoña-la nei-la xi s'eí kòfi ñánda kòbixan xita, mé-ne k'e nga kjoí-ne, nei-la ni'ya kichja, sílkjane xotjoá ni'ya, ikjoàn skíx'a-la.

³⁷ Mé tà ndaà-la jña xita chí'nda xi títsajnakon k'e nga kjoí-ne nei-la. Xi okixi, k'oaá xán-nò, jè sobà nei-la skoé níkje ot'aà-la nga koòt'aà koá sílkítsajnat'aà ímíxa-la, ikjoàn síkjèn.

³⁸ Mé tà ndaà-la jña chí'nda xi kos'ín títsajnakon nas'ín jye ijchò osen nítjen, nas'ín jye nchrohós'e ísén nga kjoí-ne nei-la.

³⁹ Tíjii-nò tsà jngoò nei-la ni'ya síjii-la mé hora kjoí xita chíjé nga síchijé-la, kíjnakon-né nga mikii tsjá'nde nga kochijé-la.

⁴⁰ Jñò, k'oaá tís'ín títsajnaandaà; 'an xi Ki'ndí-la Xita xan-la yijo-na, kjoí jngoò k'a k'e nga mikii títsachiña kjoaa.

Chì'nda xi mì ndaà s'ín (Mateo 24:45-51)

⁴¹ Pedro kiskònangui, kitsò:

—Na'èn, jè kjoá mangásòn xi tinokjoi, ¿a tà jiiín xi ot'i-mì-nájen, a xi kóhotjín xita?

⁴² Kitsò Na'èn-ná Jesús:

—K'oaá xán-nò yá-né xi chí'nda kixi xi tjin-la kjoachjine nga jè nei-la sílkíjna'nda jña chí'nda-la xi i'nga xi ya síxá ni'ya-la mé-ne nga k'e kíjchò chíba-la, síkjèn chí'nda xíkjín.

⁴³ Mé tà ndaà-la jè chí'nda xi k'oas'ín ndaà tísíkitasòn k'e nga kjoí-ne nei-la.

⁴⁴ Okixí xi xán-nò, nei-la chí'nda jè, jè sílkíjna'nda yije tsojmì xi tjin-la.

⁴⁵ Tanga tsà jè chí'nda jè kítsò nga koòko inima-la: “Nei-na, kjin nachrjein kochrjein-la nga kjoí-ne.” Ikjoàn koíts'ia nga skaàn-ko chí'nda x'in xíkjín, tikoá k'oèè-la jña chí'nda íchjín; kòkjen, koá skoí, koá koch'i.

⁴⁶ Chí'nda jè, kjoí-ne nei-la jè nachrjein ko jè hora k'e nga mikii tíkoña-la. 'Ñó tse kjo'in tsjá-la; yaá sílkíjnajiiín-la ñánda títsajna xita xi mikii mokjeíín-la.

⁴⁷ Jè chí'nda xi jye ndaà tíjiiín-la mé xi mejèn-la nei-la, tanga mikii bíjnandaà, tikoá mikii síkitasòn koni s'ín síjé nei-la, koí jé xi koma-la nga 'ñó kojà-la nei-la.

⁴⁸ Tanga tsà jè chí'nda, tsà mikii tíjiiín-la nga kjo'in tjin-la kjoá xi ch'o tjin, isaá chíba kjo'in s'e-la. Jè xi tse kíjjoé-la, isaá tse síjé-la; tikoá jè xi tse kíjngatsja, tikoá isaá tse síjé-la.

Mé xi koma ya ni'ya-la xita xi jè ngatji-la kjoá ts'e Jesús (Mateo 10:34-36)

⁴⁹ 'Koni jngoò ni'ín xi oká tjé ko síkijne-ngui xi tsjeè, koí xá j'i-na i'it'aà nangui nga kjoaxín-la jé-la xita mé-ne nga kotsjeè-ne. Tsí mejèn-na tsà jye tíbitasòn.

⁵⁰ K'oaá s'ín tjinè-na nga tse kjo'in kotojñaà; ítsí ndaà makájno-na skanda k'e nga kítasòn!

⁵¹ ¿A k'oaá s'ín nílkítsjeèn nga jè kjoá xi j'íikoaa nga 'nchán kítsajna xita? Majín, xán-nò, kjoasii kítsajnajiiín jè ngatji-la kjoá ts'an.

⁵² Mats'ia-ne skanda i'ndeḡ kóni nga fi-isa nāchrjein, k'oaá ngaya-la tsà 'òn ma xita xi títajna nga jngoò ni'ya, jòya koma; xi jàn ma-ne skaàn-kjoòkò xi jò ma-ne, jñà xi jò ma-ne skaàn-kò xi jàn ma-ne.

⁵³ Jò skoya s'e. Na'èn-la, kondra-laá koma jè ki'ndí-la; koa jè ki'ndí-la, kondra-laá koma na'èn-la; nea-la, kondra-laá koma tsòti-la; jè tsòti-la kondra-laá koma nea-la; nāchíya-la, kondra-laá koma jè kja'nda-la; jè kja'nda-la kondra-laá koma nāchíya-la.

Seña ts'e nāchrjein

(Mateo 16:1-4; Marcos 8:11-13)

⁵⁴ Jesús tikoá kitsò-la jñà xita xi kjin ma-ne:

—K'e nga 'yaà nga nchrobá ifi, bixón-nò: “Jtsí k'oa.” K'oaá s'ín bitasòn.

⁵⁵ K'e nga 'ba tjo tsjè, bixón-nò: “Ndobá kotsjè.” K'oaá s'ín bitasòn, matsjè-né.

⁵⁶ jñò, xita xi jò ma isén-nò! Maá-nò chitsejèn-là kó choòn it'aà ngajmì kò it'aà nangui, koa, ¿mé-ne nga mìkì ma-nò 'nè kindà mé kjoa xi tíma jñà nāchrjein xi títajnaà?

Mé xi komat'iaán tsà mìkì nìton kındaajìn-koaá kondra-ná

(Mateo 5:25-26)

⁵⁷ ¿Mé-ne nga mì tà jñò bındaajìn-là xinguiòo nga kàtakixiya kjoa xi tjín-nò?

⁵⁸ K'e nga onguió ján nguixkon xitaxá kò kondra-lè, tinchátsji'nde-la ya iya ndiyá mé-ne nga koma jchibàndaà-nò nga mì ya kjiò-lè it'aà ts'e xitaxá koa jè xitaxá mì ya sijnatsja-lè it'aà ts'e policia koa jè policia nga mì ndayá skinis'en-lè.

⁵⁹ K'oaá xan-lè, mìkì koma kitjoo-ne ndayá skanda k'e nga kichjtji yijo-lè nga yije xi sijé-lè xitaxá.

13

Mé xi koma tsà mìkì sijkájno jé-la jñà xita

¹ Tijnà-ne nāchrjein koi, ijchò xita xi tsibénojmí-la Jesús nga jè Pilato tsatíxá-la xita nga taña kisik'en-kjoò cho kò xita Galilea k'e nga nchitsjá-la kjotjò Nainá. Kisikátjijn jní-la cho kò ts'e xita.

² Kiichja Jesús, kitsò:

—Jñò, ¿a k'oaá s'ín nikítsjeèn nga isaá tse jé tjín-la jñà xita Galilea nga k'oas'ín komat'in?

³ Majìn, xán-nò; tsà mìkì sijkájnoò jé-nò nga mì tì jé kinchátsji-nò, jñò, kiyá yije-nò.

⁴ K'e nga k'en jñà xita xi chrj'oòn jàn ma-ne xi kiskaànè chrjò ts'e torre Siloé, ¿a k'oaá s'ín nikítsjeèn nga isaá tse jé tjín-la xita koi nga kos'ín komat'in, mì k'oa-ne koni ngats'iì xita xi tjín ján Jerusalén?

⁵ Majìn, xán-nò; tsà mìkì sijkájnoò jé-nò nga mì tì jé kinchátsji-nò, jñò, tikoá kiyá yije-nò.

Kjoa xi mangásòn-kjoò yá iko xi mìkì ojà-la toò

⁶ Jesús tikoá tsibénojmí jngoò-la kjoa xi mangásòn. Kitsò-la:

—Jngoò xita xi kijna jngoò-la i'nde ñánda tjín-la toò uva, yaá títjeijn jngoò-la yá toò iko. Xita jè, j'ì katsejèn-la tsà yijà-la toò, tanga nímé kisakò-la.

⁷ K'ée kitsò-la jè xita xi tjína'nda: “Kó jàn nó nga f'ì katsejèn-la yá jè, tsà yijà-la toò. Tanga nímé tjín-la. Tichásoìn. Nanguí tísíkits'ón.”

⁸ Jè xita xi tjína'nda kitsò: “Na'èn, tikijna-là ngui jngoò nó-isa. Sikòn-la, sijxan-ngui-la ni'nde nga jngoò itjandi; ikjoàn kingui-la tjé'nde.

⁹ Tsà koi nāchrjein-la, kjoa-la toò nó xi nchrobá; tsà majìn, komaá iskan kichásoìn.”

K'e nga jè Jesús jngoò chjoón kisindaà-ne nāchrjein nikjáya

¹⁰ Jesús, k'e nga tíhokóya jngoò ni'ya ingo sinagoga ts'e xita judío, jè nāchrjein nikjáya,

¹¹ ya tjína jngoò chjoón xi yje kò chrj'oòn jàn nó tjína nga xk'én. Jngoò inima ch'o-la neí tísítit'in koa mì xó kii ma osìjna kixi.

12 Jesús, k'e nga kijtsee, kiichja-la, kitsò-la:

—Chjoón, jyeé ndaà-ne ch'in xi tjín-lè.

13 Ikjoàn tsohòsòn-la tsja; jè chjoón, nitoón kjòkixi ìjngòò k'a-ne, ikjoàn kitsjaà-la kjondaà Nainá.

14 Tanga jè xita sko-la ts'e ni'ya ingo sinagoga kòjtií-la nga jè Jesús kisindaà-ne chjoón jè, koií kjoa-la nga nachrjein nìkjáya; kitsò-la jña xita xi títsajna:

—Joòn nachrjein tjín nga ma maxá; jña nachrjein koi komaá kjinchrobà nga kondaà-nò, tanga mikii tjí'nde jè nachrjein nìkjáya.

15 K'eé kiichja Na'èn-ná Jesús, kitsò:

—Jñò, xi jò ma isén-nò. Jè nachrjein nìkjáya, ¿a mì chíjnda'ño-jèn nchraja-nò ko búrró-nò nga nachrjenguioò ni'nga nga onguí nìk'ioò nandá?

16 Kò jè chjoón jè, xi tsòti-la Abraham, jyeé kò chrj'oòn jàn nó tjín-la nga tjít'aà'ño-la xita neií. ¿A mì koma tjájnda'ño nas'ín jè nachrjein nìkjáya?

17 K'e nga jye okitsò Jesús, tà kjòsobà-la ngats'ìi xita kondra-la tanga jña xita naxandá kjòtsja-la koni s'ín tjín kjòxkón xi 'ño jeya tís'ín Jesús.

Kjoa xi mangásòn-kjoò xojmá mostaza

(Mateo 13:31-32; Marcos 4:30-32)

18 Jesús kitsò:

—¿Mé xi k'oas'ín mangásòn-kjoò koni s'ín otíxoma Nainá? ¿Mé xi siingásòn-kjoaà?

19 Jè mangásòn-kò koni kji xojmá mostaza; k'e jngòò xita bitjejiin nangui-la, ikjoàn bisò, ma'nga; jña nise xi tjíma i'ngaá, bíndaà'a tjé-la jña chrja-la yá.

Kjoa xi mangásòn-kjoò na'yo san

(Mateo 13:33)

20 Ìjngòò k'a kiichja Jesús, kitsò:

—¿Mé xi siingásòn-kjoaá koni s'ín otíxoma Nainá?

21 K'oaá ngaya-la koni jè na'yo san, k'e nga jngòò chjoón síkájìn jàn chibà skoan inchrajín, masan yije-né kóhokji na'yo.

Xotjoa xi 'nchrèya kji

(Mateo 7:13-14, 21-23)

22 Jesús, nga tífi ján ndiyá Jerusalén, kjìn naxandá jahato nga tsakóya, naxandá xi jtobá kjoàn kò xi ìi kjoàn.

23 Jngòò xita xi kiskònangui-la, kitsò-la:

—Na'èn, ¿a chibaá ma xita xi kochrjekàjiin kjo'in Nainá?

Jè, k'eé kitsò:

24 —T'een-là kjo'ño yijo-nò nga kitjás'een jè xotjoa xi 'nchrèya kji. K'oaá xán-nò: kjìn xita komejèn-la kjoahas'en tanga mikii koma kjoahas'en.

25 K'e nga jè nei-la ni'ya kosítjen nga kiichjoàjto xotjoa ni'ya, jñò, tsà nditsiaán titsajnaà, k'eé kíts'iaa nga kinókjoaa, kixón: “Na'èn, chíx'a-nájen xotjoa ni'ya.” Jè nei-la ni'ya kitsò-nò: “Mikii bexkon-nò ñánda-ne tsajòn.”

26 K'eé kíts'iaa nga kixón: “Tañaá chichiko-lèjen, tikoáá tañaá ki'yòko-lèjen, tikoáá yaá nditsin-nájen tsakoòyi.”

27 Tanga jè, tà kitsòó-nò: “K'oaá xan-nò, mikii bexkon-nò ñánda-ne tsajòn. ¡Tinchat'aàxìn-ná ngats'ioò xi ch'o 'nè!”

28 Yaá jchihindáyaà, tikoá sijts'ioòn ni'ñoò k'e nga jchaxkoòn jè Abraham, Isaac, Jacob, ngats'ìi xita xi kiichja ngajo-la Nainá nga ya títsajna ñánda tíhotíxoma Nainá, koa jñò, xìn i'nde síikasén-nò Nainá.

29 Kjojí-ne xita xi kjinchrobà-ne nga ñijòn chrjangui-la isò'nde xi kítsajnat'aà ímíxa nga kokjen ñánda tíhotíxoma Nainá.

³⁰ I'ndeḡ, tḡn xḡta xi tḡtsajna-tḡngui, nga koma ḡskan ḡñà kḡtsajna ḡtḡon; tḡkoáá tḡn xḡta xi tḡtsajna ḡtḡon i'ndeḡ, k'e nga koma ḡskan, ḡñà kḡoehet'aà-ne.

*K'e nga jè Jesús kiskindàyakeè naxandá Jerusalén
(Mateo 23:37-39)*

³¹ Tḡjè-ne nàchrjein ḡjchò i'nga xḡta fariseo ñánda tḡjna Jesús, kitsò-la:

—Tḡsḡt'aà xḡn, jè Herodes mejèn-la ḡsḡk'en-lè.

³² Kitsò Jesús:

—Tanguió, kot'in-la xḡta maña jè: “I'ndeḡ ko nchijòn-lè k'oaá s'iaàn: kochrjekàḡñàà ḡnḡma ch'o-la neḡ xi tḡjḡn ḡnḡma-la xḡta, tḡkoá sḡndaà-na xḡta xi xk'én; skanda k'e kḡjchò nàchrjein nga kḡoehet'aà xá-na.”

³³ K'oaá s'in koma i'ndeḡ, nchijòn-le ko ḡngui-le, kàtḡi-ḡsa ndḡyá-na. Mikḡi ndaà tḡn nga ḡngò xḡta xi chḡa ḡgajo-la Nainá, xḡn-t'aà kḡyá-la naxandá Jerusalén.

³⁴ 'ḡñò xi xḡta naxandá Jerusalén tsajòn xi nḡk'eèn xḡta xi chḡa ḡgajo-la Nainá, ko bìnè ndajò ḡñà xḡta xi Nainá síkasén-nò! ḡKḡn k'a kḡomejèn-na nga tsibḡxkóya ḡxti-nò koni s'in xa'nda nga bíngui ḡngaá-la ḡñà ḡxti-la; tanga ḡñò, mikḡi kòkḡeḡn-nò!

³⁵ Chḡtsejèn-la ni'ya-nò nga jye tsjeḡn-takòn Nainá; k'oaá xán-nò nga mì tḡ kḡi ḡchaxkoòn-ná skanda k'e nga kḡjchò nàchrjein nga kḡxón: “ḡMé tà ndaà-la jè xi nchrobá ḡgajo-la Nainá!”

14

Kós'in komà k'e nga kisindaà ḡngò-ne xḡta Jesús xi ch'in chḡón-nda tḡn-la

¹ ḡngò k'a ḡngò nàchrjein nḡkḡyá, Jesús kḡi kḡèn ni'ya-la ḡngò xḡta sko-la ḡñà xḡta fariseo; ḡñà xḡta koi, nchisḡkḡnda mé kḡoa xi s'ḡin Jesús.

² Tḡkoá yaá tḡjna nguḡxkon Jesús ḡngò xḡta xi ch'in chḡón-nda tḡn-la (ḡñà xḡta xi nanda sinchá ḡndso'ba).

³ Jesús kiskònangui-la ḡñà xḡta chḡḡne xoḡon ts'e kḡotḡxoma-la Nainá ko xḡta fariseo, kitsò-la:

—ḡA tḡi'nde-né nga sḡkḡi-lá xḡta jè nàchrjein nḡkḡyá, a xi majḡn-né?

⁴ Tanga ḡñà xḡta koi, mikḡi kḡichḡa, tà ḡyò tsibḡtsajna. Tanga jè Jesús kiskoé xḡta jè, kisindaà-ne, ḡkḡoàn kisikasén-ne ni'ya-la.

⁵ K'eé kitsò-la ḡñà xḡta koi:

—ḡñò, tsà búrró-nò, ko tsà nchraḡa-nò kḡxoya ḡngò ḡgajo, ḡa mìtsà nḡton kḡnàchrje-nò nas'in nàchrjein nḡkḡyá?

⁶ ḡñà xḡta fariseo, nḡ tḡ mé 'én kḡichḡa-ne.

Xḡta xi faḡjḡn ḡxḡle xi ḡncha ḡtḡon

⁷ Jesús, k'e nga kḡjtseè ḡñà xḡta xi xó kinokḡoà-la nga nchifaáḡjḡn ḡxḡle ts'e xḡta ḡtḡon ya ḡt'aà ḡmḡxa, tsibénoḡmḡ ḡngò-la kḡoa xi mangásòn, kitsò-la:

⁸ —Tsà xó kḡnókḡoa-lè ya ni'ya ñánda tḡn s'eḡ nga xḡta bixan, mikḡi ya bḡnasòn ḡxḡle ts'e xḡta ḡtḡon, tsà koi nàchrjein-la tḡn ḡngò-ḡsa xḡta xi 'ñó tḡtḡon koni ḡgajḡ, xi tḡkoá xó kànokḡoà-la;

⁹ jè xḡta xi xó kàchḡa-nò kḡtso-lè: “Tḡjḡ'nde-la xḡta jè nga kàtḡjna.” ḡgajḡ, kòsobà-lè nga kḡ'eḡ ḡxḡle kḡjnasòn ñánda fehet'aà-ne.

¹⁰ K'e nga xó kḡnókḡoa-lè, yaá tḡjnasòn ḡxḡle xi fehet'aà-ne mé-ne k'e nga kḡoḡ jè xḡta xi xó kàchḡa-lè, kḡtso-lè: “Amigo, tḡjnat'eḡ ḡmḡxa ñánda síjna ḡxḡle ḡtḡon.” ḡgajḡ, skoḡxkòn-lè xḡta xi taña tḡtsajnat'aà ḡmḡxa.

¹¹ Jè xḡta xi 'nga síkḡjna yḡjo-la, ḡsaá nangui kḡjna; jè xi nangui síkḡjna yḡjo-la, ḡsaá 'nga kḡjna.

¹² Jesús, tḡkoáá kitsò-la jè xḡta xi xó kḡichḡa-la:

—K'e nga xó kinókjoa-la xita nga kichikojii nga nchisen, o nas'ín nguixòn, kì jñà nokjoà ítjòn-la amigo-lè, 'ndsi, xita xinguii, nì jñà xita indii ni'ya-lè xi xita nchiná, mé-ne nga jñà xita koi, tsà koi nchrjein-la k'oaá tís'ín kichja ngajo-lè nga kojndà-ne.

¹³ Tà saá k'e nga s'eí s'iin, jñà tìnókjoa ítjòn-la xita ima, xi tsjin tsja, xi mìkii ma fi, kò xi mìkii tsejèn-la.

¹⁴ Ngaji, k'e nga k'oas'ín s'iin, ndaà s'e-la inima-lè nga jñà xita koi mìkii koma sijnndà ngajo-lè; tanga ngaji, k'ee kochjí ngajo-lè k'e nga kjoaáya-la jñà xi xita kixi.

*Kjoa xi mangásòn ts'e xita xi kjèn s'eí
(Mateo 22:1-10)*

¹⁵ K'e nga kii'nchré jngoò xita xi ya taña títsajnat'aà ímixa, kitsò-la Jesús:

—;Mé tà ndaà-la jè xita xi kòkjen ya ñánda tíhotíxoma Nainá!

¹⁶ K'ee kitsò Jesús:

—Jngoò xita, xi s'eí tsibíjna, kjìn xita kiichja-la.

¹⁷ K'e nga ijchò hora-la nga jye kòkjen xita, kisikasén ch'i'nda-la nga kii kichja-la jñà xita xi xó kinokjoà-la, kitsò-la: “Nchrobá, jyeé tíjndaà yije.”

¹⁸ Ngats'ii xita kisijé kjoa nìchàat'aà. Kitsò jè xi tíjòn: “Mì-la kii koma kjián; jngoò nangui jye kòhotse; mochjeén-né nga kjián katsejèn-la; kitsi'bà-lè, tije-la takòin, mìkii kjián.”

¹⁹ Jè xi ijngoò kitsò: “An, 'òn nga nchraja xi bínchi jyeé kòhotse; mejèn-na kjián kat'aà tsà ndaà síxá; kitsi'bà-lè, tije-la takòin, mìkii kjián.”

²⁰ Xi ijngoò, k'oaá tì kitsò: “An, saá jye kòbixan, koi kjoa-la nga mìkii koma kjián.”

²¹ K'e nga j'ii-ne ch'i'nda jè, tsibénojímí yije-la nei-la ngats'ii kjoa koi. Jè nei-la ni'ya, kòjti-la; k'ee kitsò-la ch'i'nda-la: “T'in nitojin ján nditsin, kóhokji iya ndiyá-la naxandá; nchrohókoii yije xita ima, xi tsjin tsja, xi mìkii ma fi, kò xi mìkii tsejèn-la.”

²² Ch'i'nda jè, nga komà iskan kitsò: “Na'èn, jyeé kòbitasòn yije koni s'ín kò'mì-ná, tanga tjin-isa i'nde.”

²³ K'ee kitsò jè nei-la ch'i'nda: “T'in kóhokji ndiyá teè, kò ndiyá itsjí; nchrohókoii xita; kò'ño t'en-la nga kàtjahas'en mé-ne nga kàtatseè ni'ya-na.

²⁴ K'oaá xán-nò; nijngoò xita xi kichja ítjòn-la kòkjen-kò-na s'eí-na.”

*Mé kjo'in xi singui nga onguítjngui-lá Cristo
(Mateo 10:37-38)*

²⁵ 'Ñó kjìn xita tjngui-la Jesús; kisikáfayat'aà-la, kiichja, kitsò-la:

²⁶ —Tsà yá xi mejèn-la nga 'an kjinchrobà-tjngui-na, tsà jè yijo-la, tsà na'èn-la, tsà nea-la, tsà chjoón-la, ixti-la, 'ndse, ndichja, tsà isa tjòkèè mì k'oaá-ne koni 'an, mìkii koma nga xita ts'an xán-la nga 'an kota'yàt'aà-na.

²⁷ Jè xi mìkii síkitasòn koni jngoò xita xi 'yajen krò-la, tsà mìkii tijnandaà nga sijkjeiín kjo'in nga 'an kjinchrobà-tjngui-na, mìkii koma nga xita ts'an xán-la nga 'an kota'yàt'aà-na.

²⁸ Jñò, tsà mejèn-nò nga chrjó torre kíndaà jngoò, ¿a mìtsà ítjòn jchósòn-là kó tjin singui chjí-la, a tjin-nò ton xi sindaà yije-ne?

²⁹ Tsà koi nchrjein-la tà jè tàts'en chrjó sjjna. Tsà mìkii kongásòn yije chrjó, ngats'ii xita xi skoe kijnokeè-né.

³⁰ Kitso: “Jñà xita koi tsibíts'ia nga kiskímìtjen chrjó ni'ya tanga mìkii kisikjehet'aà.”

³¹ Tsà jngoò xitaxá ítjòn xi mejèn-la koiíts'ia kjoichán nga skaàn-kjoòko xikjín xi ngásòn xitaxá ítjòn, ¿a mìtsà ítjòn skósòn-la tsà te jmii ma xita-la, a kichikjoaá-la nga skaàn-kò tsà kaàn jmii ma xita kondra-la?

³² Tsà beè-la ikon nga mìkii kichikjoa-la, tik'ee-ne nga kjìn tjna xitaxá ítjòn xi ijngoò, sikkasén xita xi kjoii sije kjoa'nchán.

³³ K'oaá t̄is'ín t̄jín, ngats'ioò, n̄ita yá-nò xi mejèn-nò nga x̄ita ts'an koma, ítjòn t̄ikítsjeèn, a s̄jngòò-takòn nga s̄ichjaà yije tsojmì xi t̄jín-nò. Tsà majìn, mìkì koma nga x̄ita ts'an xán-nò.

*Jñà x̄ita xi kota'yàt'aà-la Cristo, k'oaá s'ín ngayá-la koni naxa
(Mateo 5:13; Marcos 9:50)*

³⁴ Jè naxa, ndaà-né; tanga tsà mì t̄i k̄i s̄ijnchra-ne tsojmì, ¿kó t̄is'ín kochjeén-ne?

³⁵ Mì t̄i mé chjì-la; mì t̄i k̄i kochjeén-la nangui; mì t̄i k̄i kochjeén-ne koni t̄jé'nde, tà x̄ixteèn-né. ¡Ndaà t̄iná'yaà koni xan-nò!

15

*Kjoa xi mangásòn ts'e paxtò xi kisakò-ne orrè-la
(Mateo 18:10-14)*

¹ Jñà x̄ita-la x̄itaxá Roma xi s̄ikíchjítjì tsojmì kò jñà x̄ita xi ch'o t̄jín kjoa xi s'ín, ijchò kinchat'aà chrañà-la Jesús ñánda t̄jina, nga mejèn-la k̄jì'nchré-la.

² Jñà x̄ita fariseo kò x̄ita xi okóya k̄jot̄ixoma-la Nainá xi kisk̄i Moisés k̄iichjajno-la Jesús, kitsò:

—X̄ita jè, ndaà ókò jñà x̄ita xi ch'o s'ín, t̄ikoaá tañaá kjèn-kò.

³ Jesús, k'eé tsibénojmi jngòò-la kjoa xi mangásòn, kitsò-la:

⁴ —Tsà jngòò x̄ita tsajòn xi t̄jín-la jngòò s̄indo orrè, tsà chija jngòò orrè-la, ¿a mìtsà s̄ikítsajna j̄jìn ijñá jñà xi ñijòn kaàn kò chrj'oòn ñijòn ma-ne? ¡kjoàn k̄joi kátsji jè xi kichijà skanda kó nga sakò-la.

⁵ K'e nga jye sakò-la, tsjaá koma-la; koa'nga kohòsòn chrja-la.

⁶ K'e nga k̄jichò-ne ni'ya-la, k̄ichja-la amigo-la kò x̄ita indii ni'ya-la, kitsò-la: “T̄itsjako-ná, jye kàsakó-ne orrè-na xi kichijà.”

⁷ K'oaá xán-nò, k'oaá t̄is'ín isà ndaà s'e k̄jotsja ján ngajmì it'aà ts'e jngòò x̄ita jé xi s̄ikájno jé-la nga mì t̄i jé ótsji-ne, mì k'oaá-ne koni tsà ñijòn kaàn kò chrj'oòn ñijòn ma-ne xi t̄jín-la okixi xi mìkì mochjeén-la nga s̄ikájno jé-la.

Kjoa xi mangásòn ts'e chjoón xi kisakò-ne ton-la

⁸ Tsà jngòò chjoón xi te ma-ne ton-la, tsà chija jngòò ton-la, ¿a mìtsà kòkà ni'ín, t̄ikoa kot̄icha inga ni'ya-la; ndaà ndaà kohótsji ton-la skanda kó nga sakò-la?

⁹ K'e nga jye sakò-la, k̄ichja-la amiga-la kò íchjín indii ni'ya-la, kitsò-la: “T̄itsjako-ná, jye kàsakó-ne ton-na xi kichijà.”

¹⁰ K'oaá xán-nò, k'oaá t̄is'ín t̄jín k̄jotsja nga nguixkòn àkjale-la Nainá k'e nga jngòò x̄ita jé s̄ikájno jé-la nga mì t̄i jé ótsji-ne.

Kjoa xi mangásòn ts'e ti xi kichijà

¹¹ Jesús tsibénojmi jngòò kjoa xi mangásòn; kitsò:

—Jngòò x̄ita xi jò ma ixti-la.

¹² Jè ti xi ma ki'ndí kitsò-la na'èn-la: “Na'èn, t̄jii-ná tsojmì xi 'an kòkò-na.” Jè na'èn-la kisijòya yije-la tsojmì xi t̄jín-la, ikjoàn kitsjaà-la.

¹³ Xi jye tsato jò jàn nachrjein, ti jè, n̄itoón tsat̄ijna yije tsojmì-la xi kitjoé-la, kisijngòò ton-la. Ikjoàn k̄i jngòò naxandá xi 'ñó k̄jìn kijna. Yaá kisikjeheya yije ton-la nga taxki kisikò yijo-la.

¹⁴ K'e nga jye kisikjeheya yije ton-la, ya i'nde ñánda tsibijna, j'ì jngòò k̄jinchrá 'ñó; mì t̄i mé t̄jín-la xi kine.

¹⁵ K'eé k̄i s̄jé-la xá jngòò x̄ita xi ya i'nde-la naxandá jè. X̄ita jè, kisikasén ñánda t̄jín-la rancho nga kisikinda chinga.

¹⁶ Ti jè, mejèn xó kine chrjoa najmá xi kjèn chinga tanga mì yá xi tsjá-la.

¹⁷ K'e nga jye k̄jondaàya-ne k̄joh̄itsjeèn-la kitsò: “¡K̄jìn x̄ita ch̄i'nda t̄jín-la na'èn-na ya ni'ya-la xi ningui-la inchrajín xi kjèn, koa 'an, ijndé, t̄ibiyà-ná k̄jinchrá!

18 Kjin ìjngòò k'a-na ni'ya-la na'èn-na; k'oaá xán-la: Na'èn, tsee jé tsohotsjià xi ìt'aà ts'e Nainá xi tíjna ngajmii kò ìt'aà tsiji;

19 mì tì kii ok'in-na nga ki'ndí-lè k'óin-ná; k'oaá s'ín jcha-takòn-ná koni tsà jngòò ch'i'nda-lè."

20 K'ée tsasítjen, kiikon na'èn-la.

'Tik'ée-ne nga kjiin tífi, jè na'èn-la kijtseèxkon, kjòhimaakeè, tsangachikon, ìkjoàn kitsobákjá ki'ndí-la, kiskine'a.

21 Jè ki'ndí-la kitsò: "Na'èn, tsohotsjià jé xi ìt'aà ts'e Nainá xi tíjna ngajmii kò ìt'aà tsiji; mì tì kii ok'in-na nga ki'ndí-lè k'óin-ná."

22 Tanga jè na'èn-la kitsò-la ch'i'nda-la: "Niton nchrobákòò nikje xi isa 'ño ndaà kjoàn, tikákjá, tikoa tíkjá jngòò tangò jnótsja, tjayaà xoxté ndsokò.

23 Tanguichjaà jngòò nchraja ki'ndí xi 'ño xiné, tik'eèn. ¡Chjineé, s'eí s'eén!

24 Jè ki'ndí-na, maá-na tsà jyeé k'en, tanga tíjnakon-né; kichijà-né tanga ì'ndeì kàsakó-ne. Ìkjoàn tsibíts'ia s'eí."

25 'Jè ti-la xi ma jchinga, ján tísíxá rancho-la. K'e nga j'ì chraña-ne ni'ya-la, kii'nchré-la música nga s'eí tíjn; xita nchitè.

26 K'ée kiichja jngòò-la ch'i'nda, kiskònangui-la mé xi tíma.

27 Jè ch'i'nda kitsò: "Jè 'ndsi kòf'ì-ne; jè na'èn-lè kàsík'en jngòò nchraja ki'ndí xi 'ño xiné, koií kjoa-la nga ndaà kòf'ì-ne jè 'ndsi."

28 Jè ti xi ma jchinga, 'ño kòjti-la; majìn-la fahas'en ni'ya; k'ée itjo ni'ya na'èn-la, tsibíts'iba-la nga kàtjahas'en ni'ya.

29 Kitsò-la na'èn-la: "An, kjò kjin nó sixá-lè; ìkjé-ne nga mìkii sikitason-lè; ì saà jngòò ndí tíndsó ki'ndí 'bii-ná nga sìtsjakoaa amigo-na.

30 Tanga k'e nga kòf'ì-ne ki'ndí-lè xi kisikjeheya ton-lè, tsojmì-lè, kisikjeheyako íchjín ská; ìkjoàn kànik'en jngòò-la nchraja ki'ndí xi 'ño xiné."

31 Jè na'èn-la kitsò-la: "Ngaji xi ki'ndí-na xan-lè, ì tíjnakò kjit'aà-ná; ngats'ì tsojmì xi tíjn-na, tsiji-né.

32 Mochjeén-né nga s'eí s'eén mé-ne nga sìtsjakoaa yijo-ná, koi kjoa-la nga jè 'ndsi, jye kòf'ì-ne. Maá-na tsà jyeé k'en tanga tíjnakon-né; kichijà-né tanga ì'ndeì kàsakó-ne."

16

Kjoa xi mangásòn ts'e ch'i'nda xi konachan

1 Jesús tsibénojmi ìjngòò-la kjoa xi mangásòn, jña xita xi kota'yàt'aà-la, kitsò-la:

—Jngòò k'a, jngòò xita nchiná, tíjna jngòò-la xita xi síkinda ch'i'nda. Xita xi k'ejí kii nga nguixkon nei-la nga kitsjaat'in 'én nga tsojmì-la tísíkje.

2 Jè nei-la, k'ée kiichja-la, kitsò-la: "¿Mé 'én xi tsját'in-lè xita? Tjiì-ná kindá kjoa ts'e xá-lè; mì-la tì kii ch'i'nda skò-la kijna-ne."

3 Ch'i'nda jè, k'ée tsohókò yijo-la, kitsò: "¿Mé xi s'iaàn? Jè nei-na mì tì kii tsjá-na xá. 'An, mìkii chíkjoa-na nga sìxákoaa nangui. Masobà-na tsà ton sìjé kjojoà.

4 Jyeé be mé xi s'iaàn mé-ne nga s'e-na amigo xi tsjá'nde-na ni'ya-la k'e nga tjáxin-na xá jè."

5 K'ée kiichja ìjngòò ìjngòò-la jña xita xi tjen-la ton ts'e nei-la. Kitsò-la jè xi ítjòn: "¿Kó tíjn kitjen-lè ts'e nei-na?"

6 Xita jè kitsò: "Jngòò sìndò barril asitì kitjen-na." Jè ch'i'nda kitsò-la xíkjin: "Chjoí xojon-lè, tíjni, ìnton tindaà ìjngòò xi k'ejí xojon xi tà icháte chjì-la."

7 Ìkjoàn kiskònangui-la xi ìjngòò, kitsò-la: "Ngaji, ¿kó tíjn kitjen-lè?" Xita jè kitsò: "Jngòò sìndò naxá trigo kitjen-na." K'ée kitsò-la: "Chjoí xojon-lè; tindaà ìjngòò xi tà ñjòn kaàn chjì-la."

⁸ Chi'nda jè, kijtseèxkón nei-la nga tjín-la kjohítsjeèn nga amigo tsohótsji, nas'ín ch'o kis'iin nga kiskoònachan-la nei-la. Jñà xi mìtsà xità-la Nainá, isaá tjín-la kjohítsjeèn kó s'ín ótsji amigo-la xi skoétjò mì k'oaá-ne koni jñà xità xi iseèn tjín kjohítsjeèn-la.

⁹ K'oaá xán-nò, tikjeén ton kò tsojmì xi tjín i isò'nde nga kàtas'e-nò amigo mé-ne k'e nga mì tì kii kochjeén-ne i isò'nde, ján ngajmì s'e-nò amigo xi skoétjò-nò ya ñánda kitsajnaà nità mé nachrjein-ne.

¹⁰ Jè xi ndaà síkitasòn jè kjoa xi chiba tjín, tikoáá ndaà síkitasòn jè kjoa xi tse tjín; tanga jè xi konachan kjoa xi chiba tjín tikoáá konachan-né kjoa xi tse tjín.

¹¹ Jñò, tsà mì ndaà titsanìchjeén tsojmì kò ton xi tjín isò'nde jè, mìkii tjoé-nò kjoa xi nguì ndaà tjín ts'e ngajmì.

¹² Tsà mì ndaà titsanìkjeén tsojmì kò ton xi mì tsajòn-jèn xi Nainá kisingatsja-nò i isò'nde, tikoáá mìkii tjoé-nò xi nguì tsajòn ján ngajmì.

¹³ Njingoò chi'nda xi jò koma nei-la nga sùxá-la; tsà jò koma nei-la, jngoò kojtikeye kjoa jngoò kotsjakeè; jngoò ndaà kjit'aà-la kjoa ch'o sùkò xi ijngoò. Jñò, tsà kjoa nchiná sùis'in-là, mìkii kos'in-la kjoa ts'e Nainá.

¹⁴ Jñà xità fariseo nga tsjakeè ton, k'e nga kii'nchré ngats'ii kjoa koi, tà tsijnòkèè Jesús.

¹⁵ K'eé kitsò-la jè Jesús:

—Jñò, ndaà nikitsajnaà yijo-nò nga nguixkon xità, tanga Nainá, beè inima-nò nga mìtsà kixi kjoa nga ndaà 'nè. Jè kjoa xi jeya síkijna xità, Nainá ochrjekàngui-né.

Kjotíxoma-la Nainá xi kiskii Moisés

¹⁶ Jesús kitsò-isa:

—Jñà Xojon-la Nainá xi kiskii Moisés kò xità xi kiichja ngajo-la Nainá, jñà tímakjeén xojon koi skanda k'e nga j'ii Juan xi kis'iin bautizar xità. Tjen-ne nachrjein koi, skanda i'nde, tinokjoáya 'én ndaà-la Nainá kó s'ín otixoma Nainá. Ngats'ii xità xi mejèn-la kjoahas'en-jii ñánda tíhotíxoma Nainá, binè-la yijo-la.

¹⁷ "Ñó 'in tjín tsà jè isò'nde kò ngajmì chija, tanga isaá tà 'ño 'in tjín nga chija jngoò letra ts'e kjotíxoma-la Nainá xi kiskii Moisés. Mìkii chija nità kjé-ne —kitsò Jesús.

Kiis'in tsakóya Jesús it'aà ts'e xità xi tsjiiin xikjín

(Mateo 19:1-12; Marcos 10:1-12)

¹⁸ —Nità yá-ne xi tsjiiin chjoón-la ikjoàn bixan-kò jngoò chjoón xi k'ejí, kjoa chijngui tís'in; tikoáá jè x'in xi bixan-kò chjoón xi kitsjiiin x'in-la, tikoáá kjoa chijngui tís'in —kitsò-isa Jesús.

Xità nchiná kò xità ima xi 'mì Lázaro

¹⁹ Jesús kitsò:

—Tsibijna jngoò xità nchiná xi 'ño ndaà kjoàn nikje chjí xi tsohòkjá; nachrjein inchijòn kis'iin s'eí xi taxki 'ño ndaà ma.

²⁰ Tikoá tsibijna jngoò xità ima xi Lázaro ki'mì, xi jtsé tjín yijo-la. Yaá bijna xotjoo ni'ya-la jè xità nchiná.

²¹ Xità ima jè, fahajiiin xó-la jñà xi-la tsojmì xi kine jè xità nchiná nga bixòngui ímixa; tikoáá jñà nañá bijchó xó nga tomajno jtsé-la.

²² K'e nga k'en jè ndí xità ima, jñà àkjale-la Nainá kiiko; yaá kisikijnat'aà-la Abraham. Tikoáá chaán k'en jè xità nchiná; ikjoàn kishijiiin.

²³ Ya i'nde ts'e mik'en ñánda nga tísikjeiín kjo'in jè xità nchiná, kiskoòtsejèn, kijtseèxkon Abraham nga kjiin tjina; yaá tjinat'aà-la jè Lázaro.

²⁴ Xità nchiná, k'eé 'ño kiichja kitsò: “iNa'èn Abraham, chahima-takòn-ná! Tikasín Lázaro nga kàtasika'nchi jnótsja ya jiiin nandá nga kàtasikijne 'nchán nijen-na; 'ño tse kjo'in tísikjiaán i jiiin ni'in.”

²⁵ Jè Abraham kitsò-la: “Na'èn, tikítsjiiin k'e nga tsijni isò'nde, 'ño ndaà tsijni. Jè Lázaro, kjo'ín kisikjeiín, tanga i'nde, ndaà tjina ijndé. Ngaji, kjo'ín tìnikjeiín.

²⁶ K'oaá s'ín t́jín, t́ikoáá jngoò xajngá j́nò xi 'ńó nāngá kijna-ikòn mé-ne nga mìkì koma ján kotot'aà j́nà xítà xi ì t́tsajna; t́ikoá xi t́tsajna ján, mìkì koma kjinchrobà ijndé.”

²⁷ 'Kitsò jè xítà nchíná: “Nà'èn Abraham, 'an bìtsi'bà-lè t́ikasín Lázaro ya ni'ya-la Nà'èn-na;

²⁸ 'òñ ma-ne 'ndsè xi t́tsajna; kàtènojímí-la xi okixi mé-ne nga t́ikoá mì ì kjinchrobà-ne j́nde ts'e kjo'in.”

²⁹ Abraham kitsò-la: “Xítà xinguii, jyeé t́jín-la xojon-la Moisés ko ts'e xítà xi kùchja ngajo-la Nainá; j́nà kàta'nchré-la!”

³⁰ K'eé kitsò jè xítà nchíná: “Majìn, nà'èn Abraham, tsà jngoò mik'en xi jye kijtseè kjo'in kjoì keènojímí-la, s̀ikájno jé-la nga mì t́i jé kohótsji-ne.”

³¹ Jè Abraham kitsò-la: “Tsà mìkì 'nchré-la Moisés ko xítà xi kùchja ngajo-la Nainá, t́ikoáá mìkì kokjeiín-la nas'ín kjoáya jngoò-la mik'en.”

17

Xítà xi bít'in-ná nga binchaàtsjiaá jé (Mateo 18:6-7, 21-22; Marcos 9:42)

¹ Jesús kitsò-la xítà xi kota'yàt'aà-la:

—Kjit'aà nāchrjein s'e xítà xi kojìt'in-ná nga kinchátsjiaá jé, tanga ima-xó-ne jè xítà xi kojìt'in.

² Ìsáá-la ndaà koma tsà s̀ingui'ńó jngoò ndajo natsí ís'ìin, ikjoàn s̀ikatjen-jìin ndáchikon, mé-ne nga mì jé skìnjìin-ne ndí xítà xi mochjeén-la nga kòkinda.

³ jT'een kindá yijo-nò!

'Tsà jè xinguii ótsji jé xi kondra tsiji, t́inókjoa-la nga kàtakixi; tsà s̀ikájno jé-la nga mì t́i jé kohótsji-ne, t́ijchàat'aà-la.

⁴ Tsà itoò k'a nga jngoò nāchrjein ótsji jé xinguii xi kondra tsiji, koá tsà s̀ikájno jé-la koá tsà itoò k'a nga jngoò nāchrjein kjoìikon-lè, kító-lè: “Mì t́i kù k'oa s'ìin-na”, tsà k'oa kító-lè, t́ijchàat'aà-la.

K'e nga mokjeiín-ná it'aà ts'e Jesús

⁵ J́nà xítà xi tsibíxáya-la Nà'èn-ná Jesucristo kitsò-la:

—T́isiko-nájen mé-ne nga ìsá 'ńó ndaà kokjeiín-nájen it'aà tsiji.

⁶ Jè Nà'èn-ná k'eé kitsò:

—J́nò, tsà tà okji kokjeiín-nò koni kji xojmá mostaza nga itsé kji, komaá k'oín-là yá xanchroò jè: “Chjínèyi yijo-lè, ikjoàn ya kàtatjen-jìin ndáchikon”; jè yá, k'oaá s'ín s̀ikitasòn-nò.

Xá-la chì'nda

⁷ J́nò, tsà t́jna jngoò-nò chì'nda xi kàfi síkínchi nchraja, o xi kàfi ka'ndà t́indsó, k'e nga kjoì-ne nga kàfi síxá, ɔa k'oín-là: “T́jni, t́jnat'eii ímíxa”?

⁸ Majìn, a mìtsà t́a s̀a k'oín-là: “T́indaà-ná tsojmì xi kókjeen; t́ixkóngui nikje-lè; t́iya-ná tsojmì xi kókjeen ko xi skiaa. K'e nga jye kjoé koma, ikjoàn t́ichi koá tíoìi jì.”

⁹ Jè nei-la, t́ikoáá mìkì tsjá-la kjondaà chì'nda-la nga ndaà kàsikitasòn jè xá xi kàsít'in-la; mìtsà tsò-la: “Ndaà chjì-lè.”

¹⁰ T́ikoáá j́nò, k'e nga jye ǹikitasòn yije xá xi tsjá-nò Nainá, k'oaá tixón: “Ngajen, taxkì chì'nda-nájen, tà jè kàǹikitasòn-jen koni s'ín ki'mì-nájen.”

Kós'ín komà k'e nga jè Jesús, te xítà kisindaà-ne xi t́bindojno chrjoa yijo-la

¹¹ Jesús, k'e nga t́fi ján naxandá Jerusalén, jahato ya nangui Samaria ko Galilea.

¹² K'e nga jahas'en-jìin jngoò ndí naxandá xi jtobá kji, te xítà kiskaajìin ya jya ndiyá xi t́bindojno chrjoa yijo-la; kjiin chincha-ne

¹³ nga 'ńó kùchja kitsò:

—jJesús, Maestro, chahimá-takòn-nájen!

14 Jesús, k'e nga kijtsee, kitsò-là:

—Tanguió, takó-là yijo-nò jè nò'mi.

K'oaá s'ín komà, k'e nga nchifi-ne, kjòtsjeè-ne yijo-là ch'in xi tjin-là.

15 K'e nga kijtsee yijo-là nga jye kjòndaà-ne ch'in xi tjin-là, jngoò-ne xi inchrobà ìjngoò k'a-ne; ñó kiichja nga kitsjaà-là kjondaà Nainá.

16 Tsasèn-xkó'nchit'aà-là Jesús skanda it'aà nangui, nga kitsjaà-là kjondaà. Xità jè, Samaria i'nde-là.

17 Jesús kitsò-là:

—¿A mìtsà te ma-ne xi kòmatsjeè-ne ch'in-là? Jñà xi ñijaàn, ¿ñánda títsajna?

18 ¿A tà jè tà jngoò xità xi xìn nangui-là kànchrobá ìjngoò k'a-ne nga tsjá-là kjondaà Nainá?

19 Jesús kitsò-là xità jè:

—Tisítjìn, t'in-ne; koi-né nga mokjeiín-lè nga kòmandaà-ne.

K'e nga jcha-là kó s'ín kotìxoma Nainá

(Mateo 24:23-28, 36-41)

20 Jñà xità fariseo kiskònangui-là Jesús, kitsò-là:

—¿Kjé-né nga jcha-là kó s'ín kotìxoma Nainá?

Jesús kitsò-là:

—Koni s'ín otìxoma Nainá mìtsà tsejèn jcha-là.

21 Mìtsà yá xi kítóso: “Í tìjna ijndé”, kò “Ján tìjna ján”; nga jyeé tìjnajiìn-nò kó s'ín otìxoma Nainá.

22 Jesús, kiichja-isa; kitsò-là xità xi kota'yàt'aà-là:

—Kijchò nachrjein k'e nga komejèn-nò jchaxkoòn-ná nga jye kótijnajiìn-nò 'an xi Ki'ndí-là Xità xan-là yijo-na, tanga nachrjein jè, mìkiì jchaxkoòn-ná.

23 K'oaá kítóso-nò xità: “Chítsejèn-là ijndé, chítsejèn-là ján.” Tanga kì kiì mokjeiín-nò, tìkoaá kì kiì onguítjngui-là nas'ín k'oa kítóso-nò.

24 Koni ma ni'ín ch'on k'e nga ote, ma iseèn kó okji nga jngoò itjandì, k'oaá s'ín koma k'e nga kijchò nachrjein nga kjoiaa ìjngoò k'a xi Ki'ndí-là Xità xan-là yijo-na.

25 Tanga 'an xi Ki'ndí-là Xità xan-là yijo-na, ítjòn, tse kjo'in siikjaán; jñà xità xi tjin nachrjein i'ndeì, kochrjekànguif-na.

26 Koni s'ín komà jñà nachrjein ts'e Noé, k'oaá tìs'ín koma jñà nachrjein k'e nga kjoiaa ìjngoò k'a 'an xi Ki'ndí-là Xità xan-là yijo-na.

27 Xità, tsakjèn, kits'ii, chixàn íchjá kò íchjín skanda jè nachrjein nga jahas'en ni'ya chitso jè Noé, ikjoàn j'ii jtsí xkón, yaá jyehesòn yije xità kóhotjín.

28 K'oaá tìs'ín komà nachrjein ts'e Lot [xità xi tsiniì kitsò-là Abraham]. Jñà xità tsakjèn, kits'ii, tsatse tsojmì, tsatìjna tsojmì, tsibítje tsojmì, tsibíndaà ni'ya;

29 tanga jè nachrjein nga itjoiìn jè Lot ya naxandá Sodoma, ts'a jtsí ni'ín xi ngajmii inchrobà-ne xi nguì chijo azufre, yaá jyehesòn yije xità kóhotjín.

30 K'oaá s'ín koma jè nachrjein k'e nga 'an kítjojen ìjngoò k'a xi Ki'ndí-là Xità xan-là yijo-na.

31 Jè xi tìjnasò'nga ni'ya-là, kì tì kiì nchrobájen-ne nga skoé tsojmì xi 'ncha ni'ya-là; tìkoaá jè xi tìsìxájiìn nangui-là kì tì kiì nchrobá-ne ni'ya-là.

32 Tìkítsejèn koni s'ín komàt'in chjoón-là Lot.

33 Nita yá xità xi mejèn-là kochrjetjì yijo-là nga mì mé kjo'in sakò-là, tà saá siichija-né kò kjo'in kíjnajiìn; tanga jè xi tìjnandaà nga tsjá yijo-là, jè-né xi kítjokàjiìn kjo'in nga it'aà ts'an ndaà kíjna.

34 K'oaá xan-nò, jè nitjen k'e nga okoma, tjin ni'ya ñánda jò xità kjiòsòn nachan, jngoò tjámìtjen nga kjiko Cristo, xi ìjngoò sijna-né nga kjo'in s'e-là.

35 Tìkoaá tjin ni'ya ñánda jò íchjín nchi'o na'yo, jngoò tjámìtjen nga kjiko Cristo, xi ìjngoò sijna-né nga kjo'in s'e-là.

³⁶ Jò x̄ita xi nchisíxángui rancho-la, jngoò tjámìtjēn nga kjiko Cristo, jè xi ìjngoò sasíjna-né nga kjo'in s'e-la.

³⁷ Jñà x̄ita kiskònangui-la Jesús:

—¿Ñánda-ne nga k'oas'ín koma Na'èn?

Jesús kitsò-la:

—Ya ñánda kijna cho k'en, yaá kítsajnajtín jñà líké.

18

Kjoa xi mangásòn ts'e chjoón ka'àn ko xitaxá ts'en

¹ Jesús tikoá tsibénojmí jngoò-la kjoa xi mangásòn nga mochjeén-né nga mìkì s̄indaàjñáa inima-ná; nachrjein inchiòn k̄inókjoat'aà-lá Nainá.

² Kitsò-la:

—Jngoò naxandá ñánda tíjna jngoò xitaxá xi mìkì beèxkón Nainá tikoá mìkì beèxkón x̄ita xi kj'eí.

³ Tíya-ne naxandá jè, tíjna jngoò chjoón ka'àn xi f'ìikon kjit'aà xitaxá jè nga tsò-la: “T̄indaàjìin-ná kjoa ts'e kondra-na.”

⁴ Jè x̄ita xi t̄jín-la xá, mìkì xátí tsibíndaàjìin-la, tanga xi komà iskan kisikítsjeèn nga tsibíndaàjìin-la jè chjoón mé-ne nga mì ta tsja s̄ij̄ti-la. Kitsò j̄iìn inima-la: “Nas'ín mìkì bexkoán Nainá, tikoá mìkì bexkoán x̄ita,

⁵ tanga chjoón jè, 'ñó tísísì-na, koií kjoa-la nga k̄indaàjìin-la mé-ne nga mì ta tsja ì kjoíikon-na, mì ta tsja 'an s̄ij̄ti-na.”

⁶ Kitsò Na'èn-ná:

—T̄iná'ya-là koni tsò xitaxá xi tsjìn-la okixì.

⁷ Nainá, ¿a mìtsà is̄a ndaà s̄iis'in-la x̄ita-la xi xó k'oas'ín jaàjìin-ne nga ko nachrjein ko nitjēn 'ñó s̄ij̄t'aà-la? ¿A mìtsà is̄a n̄iton s̄iis'in-la?

⁸ K'oáá xán-nò nga is̄a xátíya koiindaàjìin-la. Tanga k'e nga kjoiaa ìjngoò k'a 'an xi Kì'ndí-la X̄ita xan-la yijo-na, ¿a sakó-na x̄ita ì isò'nde xi mokjeíin-la it'aà ts'an?

Kjoa xi mangásòn ts'e xita fariseo ko xita-la xitaxá Roma xi síkíchjítjì tsojmi

⁹ Jesús tsibénojmí ìjngoò-la kjoa xi mangásòn ts'e x̄ita xi x̄ita kixì tsò-la yijo-la koa ochrjekàngui xi i'nga. Kitsò:

¹⁰ —Jò x̄ita kii ñánda tíjna ìngo ítjòn nga kiichjat'aà-la Nainá: jngoò xi x̄ita fariseo, xi ìjngoò, x̄ita-la xitaxá Roma xi síkíchjítjì tsojmi.

¹¹ Jè x̄ita fariseo, nga síjna kixì, tíchjatjì yijo-la, kitsò: “Nainá, tsjaà-lè kjondaà, ndaà chjì-lè nga 'an mì k'oáá s'iaàn koni s'ín x̄ita xi kj'eí xi tsjìn-la kjoa kixì, x̄ita chijé, x̄ita ts'en, x̄ita chijngui; n̄i mì k'oáá s'iaàn koni s'ín jè x̄ita xi síkíchjítjì tsojmi.

¹² Jò k'a ótijnachjan nga jngoò xomàna; tsjaà-ná xi teya ngats'ì xi síkijne.”

¹³ Tanga jè x̄ita xi síkíchjítjì tsojmi, kjìin síjna; skanda majìn-la nga kotsejèn ngajmì; tà jè inima-la 'beé-la; tsò: “Nainá, kàtas'e-lè kjohimatakòn xi it'aà ts'an nga x̄ita jé 'mì-na!”

¹⁴ K'oáá xán-nò, x̄ita jè, k'e nga kii-ne ni'ya-la, jyeé x̄ita kixì kitsò-la Nainá; tanga jè x̄ita fariseo majìn. Koií kjoa-la, n̄ita yá-ne xi 'nga síkijna yijo-la, is̄a nangui k̄ijna, koa jè xi nangui síkijna yijo-la, is̄a 'nga k̄ijna.

K'e nga jè Jesús kisichikon-t'in ndí ixti

(Mateo 19:13-15; Marcos 10:13-16)

¹⁵ T̄ikoáá j'ìiko-la ndí ixti mé-ne nga koòt'aà-la tsja; jñà x̄ita xi kota'yàt'aà-la Jesús, k'e nga kijtseèxkon jñà x̄ita xi ijchòko ndí ixti, tsohótiko.

¹⁶ Tanga jè Jesús kiichja-la jñà ixti; kitsò-la x̄ita-la:

—T̄jiì'nde-là jñà ndí ixti nga k̄atjanchrobákon-na, k̄i binchahikon-là. Jñà xi k'oá s'ín t̄jín inima-la koni ts'e ndí ixti, jñà xi t̄jín-la kjondaà nga Nainá tíhotíxoma-la.

17 K'oaá xan-nò xi nguì okixi, jñà xi mìkiì kòkjeiín-la koni jngoò ndí ixti nga skoé kjondaà-la Nainá nga jè kòtìxoma-la, mìkiì kjoahas'en-jìin ñánda tíhotìxoma Nainá.

Jngoò xita xi 'ño nchiná

(Mateo 19:16-30; Marcos 10:17-31)

18 Jngoò xi xita sko-la kiskònangui-la Jesús kitsò:

—Maestro ndaà, ¿mé xi s'iaàn nga s'e-na kjoabinachon nita kjé-ne?

19 Jesús kitsò-la:

—¿Mé-ne nga xita ndaà 'mì-ná? Nijngoò xita xi ndaà; ta jngoò jè Nainá xi ndaà.

20 Jyeé tíjìin-lè kó tsò kjotìxoma: “Kì kjoa chijnguí 'nì, kì xitaá nìk'in, kì chijé 'nì, kì 'én ndiso nokjoi it'aà ts'e xita xi kj'eí, chaxkoín na'èn-lè kò nea-lè.”

21 Xita jè kitsò:

—Ngats'ìi kjotìxoma koi, jyeé kisìkitasoàn kó nga sa chítia.

22 K'e nga kii'nchré Jesús, kitsò-la:

—Nguì jngoò kjoa chija-lè: tatijni yiji kóhotjín tsojmì xi tjín-lè; ikjoàn tika'bí-la xita ima mé-ne nga s'e-lè kjoa machikon-t'in ján ngajmì. Ikjoàn nchrobátjngui-ná.

23 Xita jè, k'e nga kii'nchré, tà kjòbaá-la, koi kjoa-la nga 'ño nchiná.

24 Jesús, k'e nga kijtseè nga 'ño ba kis'e-la kitsò:

—jñà xita nchiná, 'íin koma-la nga kjoahas'en-jìin ñánda tíhotìxoma Nainá!

25 Isáá mì 'in koma-la jngoò cho camello nga kjoahas'en xkon nindoò xi tjahaña-ne nikje, mì k'oaá-ne koni jngoò xita nchiná xi 'ño tjín-la tsojmì nga koma kjoahas'en-jìin ñánda tíhotìxoma Nainá.

26 Jñà xita xi kii'nchré kitsò:

—¿Yá-né xi kitjokàjìin kjo'in?

27 Jesús kitsò-la:

—Jè kjoa xi mìkiì koma-la xita, Nainá komaá-la.

28 K'ee kitsò Pedro:

—Na'èn, ngajen, jyeé kinikítsajna yije-jen tsojmì xi tjín-najen nga tjaàtjngui-lèjen.

29 Jesús kitsò-la:

—Okixí xi xan-nò, ngats'ìi xita xi kitsjìin-takòn ni'ya-la, na'èn-la, 'ndse, chjoón-la, ixti-la, nga mejèn-la k'oas'ín sijnchá yijo-la koni s'ín otìxoma Nainá,

30 ngats'ìi xita koi, tsojmì xi kisìkítsajna, isáá tse tjoé ngajo-la jñà nachrjein xi titsajnaá i'nde i isò'nde; koa jñà nachrjein xi sa nchrobá, s'ee-la kjoabinachon nita kjé-ne.

Jesús, jngoò k'a tsibénojmi kjoabiyaà-la

(Mateo 20:17-19; Marcos 10:32-34)

31 Jesús kiichjat'aà xìn-la xita-la xi tejò ma-ne, kitsò-la:

—I'nde, ján onguía Jerusalén; yaá kítasòn yije ngats'ìi kjoa xi tjít'aà xojon it'aà ts'an xi Ki'ndí-la Xita xan-la yijo-na, koni s'ín kiskii xita xi kiichja ngajo-la Nainá.

32 Yaá sijnngatsja-na it'aà ts'e xita xi mìtsà xita judío; kijnokeè-na; ch'o siko-na; kiichrájno-na;

33 kojà-na, ikjoàn sikk'en-na; tanga xi koma jàn nachrjein kjoaáya-na.

34 Tanga jñà xita-la mìkiì kjòchya-la 'én xi tsibénojmi-la; jí'maá-la; mìkiì jahas'en-jìin-la koni s'ín kitsò Jesús.

Kós'ín kisindaà-ne Jesús jngoò xita xi mìkiì tsejèn-la ya naxandá Jericó

(Mateo 20:29-34; Marcos 10:46-52)

35 K'e nga jye tímachrañat'aà nga kijchò Jesús ya naxandá Jericó, jngoò xita ima xi mìkiì tsejèn-la tjina indii ndiyá; tísíjé kjotjò ton.

36 Xita jè, k'e nga kii'nchré nga kjín xita nchifa, kiskònangui mé kjoa xi tíma.

37 K'ee kitsò-la xita nga jè Jesús xi Nazaret ts'e tífahato.

38 K'ee 'ño kiichja, kitsò:

—Jesús, nga ya nchrobàt'aà-ne tje-la xitaxá ítjòn David [nga ji tijna ngajo-la], jchahimatakòn-ná!

³⁹ Jñà xita xi tjíma ítjòn, tsohótiko nga jyò kàtìjna; tanga jè, ìsáá 'ñó kiichja nga kitsò:

—Ji xi ya nchrobàt'aà-ne tje-la xitaxá ítjòn David, jchahimatakòn-ná!

⁴⁰ K'ée tsasìjna Jesús; kitsò: “Nchrobákò.” K'e nga ijchò kasit'aà chraña-la kiskònangui-la, kitsò-la:

⁴¹ —¿Mé xi mejèn-lè nga siikò-lè?

Jè xita xi mìkì tsejèn-la, kitsò:

—Na'èn, mejèn-na nga kàtatsejèn-na.

⁴² Jesús kitsò-la:

—Kàtatsejèn-lè! Koi-né nga mokjeiín-lè nga kòmandaà-ne.

⁴³ Xita jè, nitoón kjòtsejèn-la, ikjoàn kiitjngui-la Jesús; jeya kisikìjna Nainá. Ngats'ìi xita naxandá xi kijtseè kjoa koi, tikoáá jeya kisikìjna Nainá.

19

Jesús ko Zaqueo

¹ Jesús k'e nga ijchò naxandá Jericó, tsibíts'ia nga jahas'en-jiin naxandá.

² Ya tíjna jngò xita xi 'mì Zaqueo xi xita sko-la jñà xita-la xitaxá Roma xi síkíhjtì tsojmì; tikoá 'ñó xita nchiná.

³ Mejèn-la nga skoexkon yá-né xi 'mì Jesús; tanga mìkì ma kotsejèn-la nga kjìn ma-ne xita, nga jtobá kji Zaqueo.

⁴ K'ée tsangachikon ítjòn, ikjoàn tsijin-jno jngò yá sicómoro nga mejèn-la skoexkon Jesús koni s'ín kjoahato.

⁵ K'e nga jahaya ndiyá Jesús, kiskoòtsejèn mijìn k'oa kijtseèxkon Zaqueo nga ya tíjna'a yá; kitsò-la:

—Zaqueo, nitoón titajjin, i'ndeì mochjeén-né nga ya siikjáyá ni'ya-lè.

⁶ Zaqueo, nitoón tsitajen. Tsjaá komà-la nga kitsjaà'nde-la ni'ya-la.

⁷ Jñà xita k'e nga kijtseè nga ya kisikjáyá ni'ya-la Zaqueo, tsibíts'ia nga kiichjajno-la Jesús; kitsò nga ya kisikjáyá ni'ya-la xita xi jé tjín-la.

⁸ K'ée tsasìjna kixi Zaqueo, kitsò:

—Na'èn, osen tsojmì xi tjín-na tsjaà-la xita ima; koa tsà tjín xita xi 'an kiskoònachaan-la, ñijòn k'a kokji tsjaà ngajo-la.

⁹ Jesús kitsò-la:

—Ngats'ìi xita nei-la ni'ya jè, naxrjein i'ndeì, jyeé kòbitjokàjìn kjoa ts'e jé-la, koií kjoa-la nga k'oas'ín mokjeiín-la Zaqueo koni jè xita jchínga-la Abraham.

¹⁰ "An xi Ki'ndí-la Xita xan-la yijo-na, koií xá j'i-na nga j'i katsjià xita xi kichijà, tikoá j'i kàchrjekàjñaà jé-la xita.

Kjoa xi mangásòn xi okóya kjoa ts'e ton

(Mateo 25:14-30)

¹¹ Jñà xita, k'e nga nchi'nchré-la Jesús, koni s'ín tíbénajmí kjoa koi, k'oaá s'ín kisikítsjeèn nga yaá koiíts'ia niton nga kotixoma Nainá; nga jè Jesús, jyeé kjomeè bijchó chraña Jerusalén. Koií kjoa-la, Jesús, tsibénajmí jngò-la kjoa xi mangásòn nga mìtsà k'oas'ín koma.

¹² Kitsò-la:

—Jngò k'a, jngò xita xi tje-la xita ítjòn kii jngò nangui ñánda 'ñó kjìn nga tjoé-la xá ítjòn, ikjoàn kjinchrobà-ne k'e nga jye tjoé-la xá.

¹³ Tanga k'e nga tikj'eè bitjo xita jè, te xita chi'nda-la kiichja-la nga tse ton kisìngatsja nga jngò ijngò; kitsò-la: “Chjóé ton koi, tixákoo skanda k'e nga kjoì-na.”

14 Tanga jñà xita xi tiya-ne naxandá-la nga jtikeè komà, kisikasén-tjingui i'nga-la xita xi kitsò-la xitaxá ítjòn: “Majìn-najèn nga jè xitaxá jè kotixoma-najèn.”

15 Tanga jè xita jè, k'e nga jye kitjoé-la xá, j'ì ìjngò k'a-ne nangui-la. Ikjoàn kiichja-la ngats'ì xita chi'nda-la xi kisìngatsja tòn mé-ne nga skoe kó tjin kisikijne ki'ndí-la jè tòn xi kisìngatsja nga jngò ìjngò.

16 Jè xita xi j'ì ítjòn kitsò: “Na'èn, tòn-lè xi kinìngatsja-ná, te k'a okji kisikijnesòn ki'ndí-la.”

17 Jè xitaxá ítjòn kitsò-la: “Ndaà tjin; ngaji, chi'nda ndaà-né; ndaà kinìkjin tòn xi chiba kjòngatsjei; ì'ndeì, te naxandá sngatsja-lè xi jì kotixoma-la.”

18 Ijchò ìjngò xi ma-ne jò chi'nda, kitsò: “Na'èn, tòn-lè xi kinìngatsja-ná, 'òn k'a okji kisikijnesòn ki'ndí-la.”

19 Jè xitaxá ítjòn kitsò: “Tikoáá ngaji, 'òn naxandá sngatsja-lè xi jì kotixoma-la.”

20 J'ì ìjngò xi kitsò: “Na'èn, ì tjna tòn-lè xi kinìngatsja-ná. Ndaà tsibitjoà; pahito tsibitjé'ñoá.

21 Kitsakjoón-lè; ngaji, xita jti-takòn-né; chjoí xi mì ngají tsibìjni tikoá bixkoí xi mì ngají tsibitji.”

22 Jè xitaxá ítjòn kitsò: “Ngaji xi chi'nda ch'o 'mì-lè; tijè-ne 'én xi nokjoì sìnè-lè jé, nga si: xita jti-takòn-né; chjoí xi mì ngají tsibìjni tikoá bixkoí xi mì ngají tsibitji.”

23 Tsà jye tjin-lè, ¿mé-ne mì yaá kinìkjna-ne tòn-na ya banco nga kisikijnesòn ki'ndí-la mé-ne k'e nga kjoì jngò k'a-na sngatsja-ná tòn-na?”

24 K'èé kitsò-la jñà xita xi ya títajna: “Chjaà'an-là tòn; jè tji-là xita xi te k'a kisikijnesòn.”

25 Jñà xita xi oki-mì-la kitsò: “Na'èn, xita jè, jyeé kò te k'a kotjin tjin-la!”

26 Jè xitaxá ítjòn kitsò: “K'oaá xán-nò, ngats'ì xi tjin-la, k'ojí-isa-la; tanga jè xi tsjin-la, skanda tjá'aán-la mé xi chiba tjin-la.

27 Tikoá jñà xita kondra-na xi majìn-la nga 'an kotixoma-la, nchrohóko-ná ijndé, tik'eèn nga nguixkoaàn.”

K'e nga jahas'en Jesús ya naxandá Jerusalén

(Mateo 21:1-11; Marcos 11:1-11; Juan 12:12-19)

28 K'e nga jye okitsò Jesús, kù ítjòn-la xita-la nga kùko ján Jerusalén.

29 K'e nga jye ijchò chraña jñà naxandá xi 'mì Betfagé ko Betania ya chrañat'aà-la jè nindoò xi 'mì Yá Olivo, kisikasén jò xita xi kota'yat'aà-la.

30 Kitsò-la:

—Tanguió ján ndí naxandá itsé xi kijnat'aà ján; k'e nga kijchoò, yaá síjnat'aà'ño jngò ndí búrró ki'ndí xi nì sà yá xita bijnasòn-la. Chjnda'ño, nchrohóko.

31 Tsà yá xi kjònangui-nò, tsà kitsò-nò: “¿Mé-ne chíjnda'ño-nò?”, tìn-là: “Jè xó Na'èn-ná Jesús kochjeén-la.”

32 Kù jñà xita-la; k'oaá s'ín kisakò-la koni s'ín tsibénojmí-la Jesús.

33 K'e nga nchikjnda'ño ndí búrró ki'ndí, kitsò nei-la:

—¿Mé-ne chíjnda'ño-nò ndí búrró?

34 Jñà xita-la Jesús kitsò:

—Jè xó kochjeén-la Na'èn-ná Jesús.

35 K'e nga ijchòko ñánda tjna Jesús, jñà kisikjeén nikje-la nga tsohótsa-la ndí búrró; ikjoàn kisikijnasòn-la.

36 Koni s'ín tífi Jesús, jñà xita tsohójngò nikje-la ya iya ndiyá.

37 K'e nga jye kjòchrañat'aà nga nchifjen ya nindoò Yá Olivo, ngats'ì xita xi kota'yat'aà-la xi tjiko tsibíts'ia nga 'ño kiichja xi ngui tà kjotsja-la nga kitsjaà-la kjondaà Nainá nga koií kjoa-la jñà kjojkón xi jye kijtseè.

38 Kitsò:

—Mé tà ndaà-la jè x̄itaxá ítjòn xi jè nchrobá ngajo-la Nainá. Tjín kjoa'nchán ít'aà ngajmì. T̄ikoā tjín kjoajeya.

³⁹ Jñà x̄ita fariseo xi ya taña tj̄iko x̄ita k̄jìn kitsò-la:

—¡Maestro, jch̄itikoji x̄ita xi kota'yàt'aà-lè!

⁴⁰ Tanga jè Jesús kitsò-la:

—K'oaá xán-nò tsà jñà x̄ita koi k̄ítsajnajyò, jñà ndajo k̄ichja.

⁴¹ Jesús, nga jye ijchò chraña naxandá Jerusalén, k'e nga kijtseèxkon, kiskindàyakeè xi ít'aà ts'e naxandá.

⁴² Kitsò:

—Jñò xi x̄ita naxandá Jerusalén 'mì-nò, tsà jè-là-ne n̄achrjein ì'ndeì k̄okjeiín-nò ít'aà ts'e jè kjoa xi tsjá-nò kjoa'nchán; tanga ì'ndeì, tjí'maá-nò.

⁴³ Kjoí n̄achrjein k'e nga jñà kondra-nò koìndiì-nò chrjò ndajo, s̄ikinda-nò kò kít'aà-nò nga jngò itjandì.

⁴⁴ Jngò k'a s̄ikjehesòn-nò, s̄ik'en yijee-nò; n̄í t̄i jngò ndajo s̄iyijòsòn-la x̄íkjín. Koi jé xi koma-nò nga mìkì kiyaxkòon Nainá k'e nga j'ì katsejèn-nò.

*Kí komà k'e nga jè Jesús tsachrje x̄ita xi ot̄jna tsojmì ya ingò ítjòn ts'e Jerusalén
(Mateo 21:12-17; Marcos 11:15-19; Juan 2:13-22)*

⁴⁵ Jesús jahas'en ya ñánda kijna ingò ítjòn, ìkjoàn tsibíts'ia nga tsachrje jñà x̄ita xi nchihot̄jna kò xi nchihotse tsojmì;

⁴⁶ kitsò-la:

—K'oaá s'ín tíchja Xojon xi tjít'aà 'Èn Tsjeè-la Nainá: “Ni'ya-na, ni'ya ts'e ochikon-né, tanga jñò, nguijo-la x̄ita chijé titsa'nè.”

⁴⁷ Jesús, n̄achrjein inchijòn tsakóya-la x̄ita ya nd̄itsin ingò ítjòn; jñà x̄ita sko-la no'miì, x̄ita xi okóya k̄jot̄ixoma-la Nainá xi kiskì Moisés, kò jñà x̄ita sko-la naxandá, nchihótsji'nde-la nga mejèn-la s̄ik'en Jesús.

⁴⁸ Tanga mìkì kisakò-la kó s'ín s̄ikò nga jñà x̄ita naxandá, 'ñó ndaà nchi'nchré-la koni s'ín tsò 'én xi tibénojmi.

20

Kjot̄ixoma-la Jesús

(Mateo 21:23-27; Marcos 11:27-33)

¹ Jngò n̄achrjein, k'e nga jè Jesús tíhokóya-la x̄ita 'én ndaà-la Nainá ya nd̄itsin ingò ítjòn, ijchò x̄ita sko-la no'miì kò x̄ita xi okóya k̄jot̄ixoma-la Nainá xi kiskì Moisés; kjihj̄itako x̄ita jchínga.

² Kitsò-la:

—Koat̄in-nájen, ¿mé k̄jot̄ixoma xi tsjá'nde-lè koni s'ín 'nì? ¿Yá xi kitsjaà-lè k̄jot̄ixoma koi?

³ Kìichja Jesús, kitsò:

—T̄ikoáá 'an, jngò kjoa skònangui-nò. Koat̄in-ná:

⁴ ¿Yá xi kitsjaà-la k̄jot̄ixoma Juan nga kis'iin bautizar x̄ita? ¿A Nainá-né xi tíjna ngajmì, o xi tà x̄ita-né?

⁵ Jñà x̄ita koi k'eé tsajoóya-ne; kitsò-la x̄íkjín:

—Tsà kixóan: “Nainá kitsjaà-la k̄jot̄ixoma”, k̄itsò-né: “¿Mé-ne nga mìkì kòkjeiín-nò ít'aà ts'e?”

⁶ T̄ikoá tsà kixóan: “It'aà ts'e x̄ita-né”, jñà x̄ita naxandá ndajoó koì'nè-ná nga k'oaá s'ín mokjeiín-la nga jè Juan xi k̄ichja ngajo-la Nainá.

⁷ K'eé kitsò:

—Mìkì 'ya-jen yá xi kitsjaà-la k̄jot̄ixoma.

⁸ Jè Jesús, kitsò-la:

—T̄ikoáá 'an, mìkì k'oa xán-nò yá-né xi kitsjaà-na k̄jot̄ixoma koni s'ín s'iaàn.

Kjoa xi mangásòn ts'e jñà chì'nda ts'en
(Mateo 21:33-44; Marcos 12:1-11)

⁹ Ikjoàn tsibít's'ia Jesús nga kiichja-la xita naxandá; tsibénojmi jngoò-la kjoa xi mangásòn, kitsò:

—Jngoò k'a jngoò xita tsibítje toò uva, ikjoàn kisikìña-la xita xi kj'eíi nga kisixásòn; jè nei-la nangui, kjiìn nó kiì.

¹⁰ K'e nga ijchò nachrjein nga jye kòjchá toò uva, jè nei-la, kisikasén jngoò chì'nda-la nga tjoé chiba-la chjí-la toò uva xi jè oko-la; tanga jñà xita xi kisixásòn nangui, tà kiskaàn-kò-né, tà kisikasén tiyaá-ne.

¹¹ Xi komà iskan, jè nei-la nangui ijngoò xita chì'nda-la kisikasén; k'oaá tis'ín kisikò; kiskaàn-kò, ch'o kisikò, ikjoàn kisikasén tiya-ne.

¹² Jngoò kisikasén xi ma-ne jàn xita chì'nda; tà ngásòn kisikò; kisiki'on, koa tsachrjekàjiìn nangui-la.

¹³ 'K'eé kitsò jè nei-la nangui: “¿Mé xi s'iaàn? Jè-la sikasén ki'ndí-na xi 'ño tsjakeè; jè-la xi skoejkón.”

¹⁴ Tanga jñà xita chì'nda koi, k'e nga kijtseèxkon, kitsò-la xíkjin: “Jè jèe xi tjoé kjotjò-la i'nde; sik'eén mé-ne nga tsaján koma i'nde.”

¹⁵ Tsachrjekàjiìn ya ñánda tíje toò uva; ikjoàn kisik'en.

'Jñò, ¿kó bixón? Nei-la nangui, ¿mé xi sikkò xita koi?

¹⁶ Kjojí sík'en xita koi; kj'eíi xita sijnngatsja jè nangui ñánda tjín toò uva.

Jñà xita xi nchi'nchré-la Jesús kitsò:

—Nikjé-ne k'oa's'ín koma!

¹⁷ Tanga Jesús, kiskoò'an, kitsò-la:

—Tsà majìn, ¿kó bixón? ¿Kó tsòya-ne koni s'ín tíchja Xojon xi tjít'aà 'Én-la Nainá nga tsò?: “Jè ndajo xi tsachrjekàngui chjinechrjó nga sa ítjòn, jè-né xi komà ndajo tàts'en chrjó-la ni'ya.”

¹⁸ Ngats'ii xi ya kixosòn ndajo jè, koxkoaya-né; kò tsà jè ndajo skané xita, kochijo-né.

¹⁹ Jñà xita sko-la nò'miì kò xita xi okóya kjotixoma-la Nainá xi kiskii Moisés, mejèn-la nga tijè-ne hora tsobà'ño Jesús, nga jè kjoa xi mangásòn, kiskaàya-la nga kondra ts'e koni s'ín tsibénojmi; tanga jñà xita naxandá kitsakjòn-la.

Kjoa ts'e xi machjítjì tsojmi

(Mateo 21:45-46; 22:15-22; Marcos 12:12-17)

²⁰ Jñà xita sko-la nò'miì kisikinda; kisikasén-'ma-la xita xi ijchò 'nchré-la xi k'oa's'ín kis'iìn koni tsà xita ndaà nga mejèn-la sakòtsji jngoò-la 'én xi ch'o tsò mé-ne nga koma sijnngatsja-ne jè gobernador xi tjíya kjotixoma tsja nga jè kojìndaàjiìn.

²¹ Jñà xita koi kiskònangui-la, kitsò-la:

—Maestro, 'ya-nájen jñà 'én xi nokjoì, ndaà okoòyi; mìkii chjaàjiìn xita; k'oaá s'ín okoòyi ndiyá-la Nainá koni s'ín tjín xi kjoa kixi.

²² ¿A ndaà tjín nga kichjítjì-jen tsojmì it'aà ts'e xitaxá ítjòn ts'e Roma? ¿A xi majìn-né?

²³ Jesús, tik'eé kijtseèya-la nga nchikonachan-la, kitsò-la:

—¿Mé-ne nga mejèn-nò nga 'an chít'aà-ná?

²⁴ Takó jngoò-ná ton. ¿Yá ts'e isén kò 'ín xi tjít'aà?

Kitsò xita koi:

—Ts'eé César xi xitaxá ítjòn ts'e Roma.

²⁵ Jesús kitsò:

—Tjiì-lá César xi ts'e César, koa tjiì-là Nainá xi ts'e Nainá.

²⁶ Ngats'ii 'én xi kiichja Jesús nga nguixkon xita naxandá, mìkii kisakò-la xi koma kohòngui-ne. Tà kjòxkón-la; tà saá tà jyò tsibítsajna.

Kós'ín kiskònanngui kjoa ts'e nga faáya-la mik'en
(Mateo 22:23-33; Marcos 12:18-27)

²⁷ Jñà xità saduceo xi mìkìi mokjeiín-la nga faáya-la xità xi jye k'en ijchò kjònanngui-la Jesús, kitsò-la:

²⁸ —Maestro, Moisés, k'oaá s'ín kiskìi: Tsà jngoò xità xi kiyá 'ndse, tsà tsjìn-la ixti k'e nga kiyá, jè chjoón-la mik'en, tije-ne 'ndse kixan-ko ijngoò k'a-ne mé-ne nga s'e-la ixti xi tje ts'e 'ndse.

²⁹ Kis'e xó jngoò k'a xità xi itoò komà 'ndse. Jè xi síjna ítjòn, kis'e xó-la chjoón; tanga mìkìi kis'e-la ixti skanda kóni nga k'en.

³⁰ Jè 'ndse xi ma-ne jò, chixàn-koó; tikoáá k'e nga k'en, mìkìi kis'e-la ixti.

³¹ Chjoón jè, chixàn-koó xi ma-ne jàn; k'oaá xó s'ín chixàn-ko ngats'ii nga itoò 'ndse, tanga nijngoò xi kis'e-la ixti skanda k'e nga k'en.

³² Xi komà iskan, tikoáá k'en jè chjoón.

³³ K'e nga tsà kjoááya-la, nga itoò 'ndse, ¿yá-né xi chjoón-la koma? Nga jñà tsibitsajnakò nga itoò 'ndse.

³⁴ Jesús, k'ée kitsò-la:

—Jñà xità xi tjín nachrjein i'nde, ko chjoón ko x'in, bixan-né.

³⁵ Tanga jñà xità xi Nainá okitsò nga ok'in-la nga kjoááya-la nga kítsajna isò'nde xi sa kjoí, mì tì kii kixan-ne.

³⁶ Tikoáá mì tì kii kiyá-ne. K'oaá s'ín ngàsòn kítsajnakon koni àkjale; yaá kítsajnakò Nainá nga ixti-la ma nga jye kòfaáya-la.

³⁷ Tije-ne Moisés k'oaá s'ín okóya nga jñà xi jye k'en, kjoááya-la. K'oaá s'ín tjít'aà xojon ít'aà ts'e yá na'yá xi títi k'e nga tsò Moisés: “Jè xi Nainá 'mì-lá, tikoáá Nainá tsò-la Abraham, Isaac, ko Jacob.”

³⁸ Jñà xi jye k'en, mìtsà Nainá tsò-la xi Nainá; tà jñà xi títsajnakon xi Nainá tsò-la! It'aà ts'e Nainá, ngats'ii-né nga títsajnakon.

³⁹ K'ée kùichja xità xi okóya kjotíxoma-la Nainá xi kiskìi Moisés, kitsò:

—Maestro, kixíi kjoa 'én xi nokjoì.

⁴⁰ Nì tì jngoò xità xi kjò'ño-ne ikon nga kiskònanngui-isa-la.

Ñánda kitjen-la Cristo [xità xi xó kisikasén-ne Nainá]
(Mateo 22:41-46; Marcos 12:35-37)

⁴¹ Jesús kitsò:

—¿Mé-ne kòtsò-ne jñà xità nga jè xi Cristo, [xità xi xó sikkasén-ne Nainá], nga ya kjinchrobát'aà-ne tje-la xítaxá ítjòn David?

⁴² Tije-ne David, tsò xojon-la ya ts'e Salmo:

Jè Nainá kitsò-la Cristo, jè xi otíxoma-na:

“Tijnat'aà-ná i kixi-na,

⁴³ skanda k'e nga sikkásajnanguia kondra-lè ñánda nchasòn ndsokoiì nga 'an, jye kisikijne-la.”

⁴⁴ Jè David, tsà kòs'ín kitsò-la Cristo, ¿kó s'ín tjín-ne nga ya nchrobát'aà-ne tje-la David?

Kíi kitsò Jesús ít'aà ts'e xità xi okóya kjotíxoma-la Nainá
(Mateo 23:1-36; Marcos 12:38-40; Lucas 11:37-54)

⁴⁵ K'e nga nchi'nchré ngats'ii xità naxandá, Jesús kitsò-la xità xi kota'yát'aà-la:

⁴⁶ —Tikindaa yijo-nò ít'aà ts'e xità xi okóya kjotíxoma-la Nainá xi kiskìi Moisés. Sasén-la nga nikje ndojò ókjá. Tikoáá tsjaá ma-la nga ndaà beèxkón xità xi kj'eí, ndaà síhixat'aà ya ndítsin. Tikoáá jñà ótsji íxile xi jncha ítjòn ya ni'ya ingo sinagoga, ko mejèn-la nga jñà kítsat'aà ítjòn ímixa k'e nga kjèn xità ñánda tjín s'eí.

⁴⁷ Faá'an ni'ya-la íchjín ka'àn xi jye k'en x'in-la. Ikjoàn 'ño ndojò fiko ochikon-la nga mejèn-la nga bitsajna'ma nga mì jcha-la mé kjoa xi s'ín. Jñà xità koi isaá tse kjo'in s'e-la.

21

Ton xi kitsjaà kjotjò chjoón ka'àn xi 'ño ima
(Marcos 12:41-44)

¹ Jesús k'e nga kiskoòtsejèn, kijtsee xita nchiná xi 'ño tjín-la ton nga nchibítsajmaya ton-la ya kaxa ñánda sinchá ton kjotjò-la Nainá.

² Tikoáá kijtsee jngoò chjoón ka'àn xi 'ño ima nga tsibítsajmaya jò ndí ton xi chibachjí chjí-la.

³ K'eé kitsò:

—Xi kjoa kixi, k'oaá xán-nò, chjoón ka'àn ima jè, isaá tse ton kòbína mì k'oaá-ne ngats'ìi xita xi i'nga.

⁴ Ngats'ìi xita koi xi tjín-la ton, koií tsjá-la Nainá jè xi ningui-la, tanga jè chjoón ima, kàtsjá yijeé ton xi tjín-la xi tímajchá-ne.

K'e nga kùichja Jesús it'aà ts'e ingo kó s'ín tjínè-la nga kixoña
(Mateo 24:1-2; Marcos 13:1-2)

⁵ Tikoá nchijoóya i'nga-ne xita xi nchikotsejèn-la ingo ítjòn nga ndaà kjoàn ndajo-la; tikoá ndaà kjoàn tsojmi xi kitsjaà kjotjò-la Nainá jña xita. Jesús kitsò-la:

⁶ —Kjoíi nàchrjein k'e nga jña ndajo kò tsojmi xi ndaà kjoàn xi chítsejèn-la, níi tí jngoò sijijòsòn-la xíkjin, kixoña yije-né.

Seña xi s'e k'e nga nchrobá machraña nàchrjein nga kjoehet'aà isò'nde
(Mateo 24:3-28; Marcos 13:3-23)

⁷ K'eé kiskònangui-la kitsò-la:

—Maestro, ¿mé nàchrjein-ne nga okoma kjoa koi? ¿Mé seña xi s'e k'e nga jye kochraña nga k'oas'ín koma kjoa koi?

⁸ Jesús kitsò:

—Tikindaa yijo-nò nga mì yá xita xi skónachan-nò. Kjin xita kjoíi xi 'ín ts'an sikkjeén; kitsò: “An-ná xi Cristo, [nga 'aán kisikasén-na Nainá], tikoá kitsò-nò: “Jyeé tjina chraña nàchrjein nga 'an kotixoma.” Kì kii onguítjinguì-la.

⁹ K'e nga kiná'ya kjoa ts'e kjojchán, kjoasiì, kì tsakjoòn-jèn; mochjeén-né nga k'oas'ín koma ítjòn tanga kj'eè tsà jè nàchrjein nga kjoehet'aà.

¹⁰ Kitsò-isa-la:

—Naxandá skaàn-kjoò xi kj'eíi naxandá. Koá xitaxá koìts'ia nga skaàn-kjoòko xitaxá xi kj'eíi naxandá.

¹¹ Ndaà jchán k'oa ch'ón xkón; xki xi ján naxandá s'e kjinchrá kò ch'in xi 'ño kjan. Ján ngajmii jcha-la kjojkón xi ch'o tjín kò xi ch'o kjoàn.

¹² Tanga jño, ítjòn tsoba'ño-nò xita; kjitjinguikèè-nò kjiko-nò ya ni'ya ingo sinagoga nga ya sindaàjijn. Skinis'en-nò ndayá; kjiko-nò it'aà ts'e xitaxá ítjòn kò ts'e gobernador, tà koií kjoa-la nga mokjeiin-nò it'aà ts'an.

¹³ K'e nga k'oas'ín komat'ioòn, jè hora nga kénajmí-la xita xi it'aà ts'an.

¹⁴ K'oaá s'ín t'è-la takòn, kì tà chjà ítjòn nìkítsjeèn kó kixón nga kinókjoaa nga kinchakoo yijo-nò,

¹⁵ koií kjoa-la nga 'an, tsjaà-nò 'én tikoá tsjaà-nò kjoa kjin-takòn kó s'ín kinókjoaa mé-ne nga jña xita kondra-nò mikii sikkijne-nò k'e nga chibàkjoò.

¹⁶ Skanda jña sijngatsja-nò xi na'èn-nò, 'ndsè, xinguiòo kò amigo-nò, tikoá sikk'en i'nga-nò.

¹⁷ Ngats'ìi xita isò'nde kojtikeyè-nò xi kjoa ts'an.

¹⁸ Tanga nijngoò tsjaskoò chija.

¹⁹ Jè xi kichikjoa-la kjo'in, kijnakon inima-la!

²⁰ K'e nga jchaa naxandá Jerusalén nga kitsee jngoò itjandii-la soldado, k'oaá s'ín tjijn-nò nga jye kjòchraña nga jngoò k'a kjoehesòn yije mé xi tjín.

21 Jñà xità xi títsajna Judea, kàtanga, kàtjì ñánda nindoò choòn; jñà xi títsajna Jerusalén, kàtitjokàjìin naxandá, jñà xi ján títsajna campo, kì tì kù nchrobá-ne jjiin naxandá-la.

22 Koií kjoa-la nga nàchrjein ts'e kjo'in-né mé-ne nga kítasòn yije-ne koni s'ín tíchja Xojon xi tjít'aà 'Én Tsjeè-la Nainá.

23 jIma xó-ne jñà íchjín xi ki'ndí 'ya kò xi ixti xó nchisíkaki jñà nàchrjein koi, nga 'ñó tse kjo'in s'e it'aà nangui! Xi kjoajti-la Nainá, tse kjo'in koi'nè-la xità naxandá Israel.

24 Tjín xità xi kicha machitìn kiyá-ne; tikoáá tjín xi kjeí nangui kjiko preso jñà xità kjojchán. Jñà xi mìtsà xità judío, 'ñó ch'o sùiko nga skoetoòn jñà xità naxandá Jerusalén; jñà kotìxoma skanda k'e nga kítasòn nàchrjein-la xità koi.

*K'e nga kjoii jngoò k'a-ne Ki'ndí-la Xità
(Mateo 24:29-35, 42-44; Marcos 13:24-37)*

25 'Ikjoàn jcha-la jè ts'oi, sá kò ni'ño nga kotsejèn-la seña xi ch'o kjoàn. I it'aà nangui, ngats'iì xità 'ñó tsakjón nga kji'nchré-la nga 'ñó kjone nga fi nchrobá ndáchikon.

26 Jñà xità chiba-la kiyáya-né nga tsakjón k'e nga skoe kjoa xi komat'in isò'nde. Skanda jñà ni'ño xi tjín ngajmù kjitiyaá-la.

27 'Ikjoàn skoe-na xità xi Ki'ndí-la Xità xan-la yijo-na nga kjinchrobàjñaà jjiin ifi. Tsee nga'ño kò kjoajeya kjoii kjoa.

28 K'e nga kots'ia kjoa koi nga k'oas'ín koma, kixi tìnchaà, chjímii'ngaà skoò, tsja t'è-là inima-nò, chíñakjoa nga jyeé kjòchraña nàchrjein nga jñò kítasajnandeí-nò.

29 K'eé tsibénojmi jngoò-la kjoa xi mangásòn; kitsò-la:
—Chítsejèn-là yá toò iko, ngats'iì yá xi tjín.

30 K'e nga jye bíts'ia nga bíjts'én xka-la yá, jyeé 'yaà nga nchrobá machraña chon ndobá.

31 K'oaá tís'ín tjín, k'e nga jchaa nga k'oas'ín tíma kjoa koi, kàtasijiin-nò nga jye tíjnat'aà chraña-nò nàchrjein nga jchaa kó s'ín otìxoma Nainá.

32 'Xi okixi, k'oaá xán-nò: Mikiì kiyá xità xi tjín nàchrjein koi skanda kóni nga jye kítasòn yije jñà kjoa koi.

33 Jè ngajmù kò isò'nde kjoehet'aà-né, tanga jñà 'én-na mikiì kjoehet'aà; kítasòn-né.

34 'T'een kindà yijo-nò; mikiì biì'nde nga sítajaàjìin inima-nò jñà kjoa xi ch'o tjín koni kjoa ch'i, kjoa chrjá'a, kò kjoa xi nikájnoò i isò'nde. Tsà k'oas'ín s'een, mikiì titsajnandaà jè nàchrjein k'e nga 'an kjoiaa jngoò k'a; tà nìton kjoii nàchrjein, skañè-nò koni jngoò ch'an.

35 K'oaá s'ín komat'in ngats'iì xità xi tjín nga tíjtsa isò'nde.

36 Jñò, ndaà títsajna, tìtsi'ba kijndà nga kjit'aà nàchrjein mé-ne nga s'e-nò nga'ño nga koma kitjojñoò ngats'iì kjo'in xi k'oas'ín koma, tikoá mé-ne nga mikiì kosobà-nò nga kìncha nguixkon Ki'ndí-la Xità.

37 K'e nga nàchrjein, Jesús, yaá tsakóya ya nditsin ingo ítjòn. K'e nga majño yaá físikjáya ya nindoò xi 'mì Yá Olivo.

38 Kjìn xità naxandá, f'iìkon ya nditsin ingo ítjòn nga xki tajñoàya; f'iì 'nchré-la mé 'én xi okóya.

22

*Kiís'ín tsohótsji'nde-la xità kondra-la Jesús nga tsoba'ño
(Mateo 26:1-5, 14-16; Marcos 14:1-2, 10-11; Juan 11:45-53)*

1 Jyeé tímachraña nàchrjein nga bitjo s'eí Paxko k'e nga kjèn inchrajín xi tsjìn-la na'yo san jñà xità judío.

2 Jñà xità sko-la no'miù kò xità xi okóya kjotìxoma-la Nainá xi kiskù Moisés, nga tsakjón-la xità naxandá, tsohótsji'nde-la kó s'ín sùiko Jesús nga sùik'en.

3 Jè xità neíí jahas'en-jiin inima-la jè Judas xi tikoá Iscariote 'mì, xi ya itjoiin ts'e xità xi tejò ma-ne xi tsajmeiiko Jesús.

⁴ Judas, kiikáko jñà xita sko-la no'miù ko xita sko-la xi síkinda ingo ítjòn nga tsajoóya-ne kó s'ín s̀ingatsja Jesús.

⁵ Jñà xita koi, tsjaá komà-la; tsibíndaàjiin nga ton tsjá-la.

⁶ Judas, kòkjeiín-la, ikjoàn tsohótsji'nde-la kó s'ín s̀ingatsja Jesús nga mikii skoe jñà xita naxandá.

K'e nga jè Jesús tsakjèn-ko xita xi kota'yàt'aà-la

(Mateo 26:17-29; Marcos 14:12-25; Juan 13:21-30; 1 Corintios 11:23-26)

⁷ Ijchò nachrjein-la s'eí ts'e inchrájin xi tsjin-la na'yo san, k'e nga k'oas'ín tjínè-la nga biyaà orrè xi bíxteèn jní-la xi it'aà ts'e s'eí Paxko.

⁸ Jesús kisikasén Pedro ko Juan, kitsò-la:

—Tanguió kìndaà tsojmì xi kjoa ts'e s'eí Paxko mé-ne nga kichiaá.

⁹ Jñà xita-la kiskònangui-la, kitsò-la:

—¿Ñánda mejèn-lè nga konguí kìndaà-jen?

¹⁰ Jesús kitsò:

—K'e nga kitjás'en-jñòò naxandá, ya skakjoò jngoò xita x'in xi 'yajen jngoò nisa nandá. Tanguítjngui-là skanda ya ñánda kjoahas'en ni'ya.

¹¹ Kot'in-là nei-la ni'ya: “Jè Maestro kjònangui: ¿Ñánda tíjna cuarto-la ni'ya ñánda kókjen-koaa xita xi kota'yàt'aà-na ts'e s'eí Paxko?”

¹² Xita jè, kòkò jngoò-nò cuarto xi tiyà kji xi jye ndaà choòn xi ya tíjnasò'nga ni'ya. Ya tìndaà nga kichiaá.

¹³ Jñà xita koi, kiì; k'oaá s'ín kisakò-la koni s'ín kitsò-la Jesús. Yaá tsibíndaà tsojmì xi kòkjen kjoa ts'e s'eí Paxko.

¹⁴ K'e nga ijchò hora nga kòkjen, Jesús tsibìjnat'aà ímixa ko xita-la xi tsibíxáya-la.

¹⁵ Kitsò-la:

—¡'Nó tìsikítsjeèn nga mejèn-na kókjen-ko-nò ts'e s'eí Paxko nga tikj'eè fi-na kjoa biyaà!

¹⁶ K'oaá xán-nò nga mì tì kiì kókjeen-na s'eí Paxko skanda k'e nga kítasòn yije kjoa ts'e s'eí Paxko jñà nachrjein k'e nga Nainá kotìxoma.

¹⁷ K'ee kiskoé jngoò chitsín, kitsjaà-la kjondaà Nainá, kitsò:

—Chjoé, tika'bí-là xinguiqo;

¹⁸ k'oaá xán-nò nga mì tì kiì ski-na vino skanda k'e nga kotìxoma Nainá.

¹⁹ Ikjoàn kiskoé inchrájin, kitsjaà-la kjondaà Nainá, kisixkoaya, kitsjaà-la xita-la, kitsò: —Inchrájin jè, yijo-na-né nga 'aán kiyá ngajo-nò. K'oa tis'ín t'een nga tixkoaya inchrájin, mé-ne nga koiitsjeèn-nò xi it'aà ts'an.

²⁰ K'e nga jye tsakjèn, k'oaá tis'ín kis'iin; kiskoé chitsín, kitsò:

—Chitsín jè, jè-né xi kjoa xitse xi bìnndaàjiin-ko-nò xi it'aà ts'e jní-na xi xíxteèn xi kjondaà tsajòn nga makixiya kjoa.

²¹ Íí tjínat'aàko-ná ímixa, jè xita xi s̀ingatsja-na it'aà ts'e xita kondra-na.

²² Xi okixi, 'an xi Ki'ndí-la Xita xan-la yijo-na, tjínè-na nga kiyá. Tanga, jima xó-ne jè xita xi s̀ingatsja-na!

²³ Jñà xita-la tsibíts'ia nga kiskònangui-la xíkjin, kitsò:

—¿Yá-né xi k'oas'ín s̀ingatsja?

Yá-né xi tíjna ítjòn

²⁴ Jñà xita-la tsajoókjoò xi kjoa ts'e yá-né xi tíjna ítjòn.

²⁵ Jesús kitsò-la:

—Jñà xitaxá ítjòn-la xi mìtsà xita judío, 'nó beètoòn xita naxandá-la, tanga jñà xitaxá koi, tsò-né nga ndaà xita.

²⁶ Tanga jñò, mikii k'oas'ín s'een. Jè xi tíjna ítjòn, ìsáá nangui kàtìjna; jè xi otíxá, tà saá jè kàtama chì'nda.

²⁷ ¿Yá-né xi tíjna ítjòn? ¿A jè xi bìjnat'aà ímìxà, o xi jè xi bíya tsojmì? ¿A mìtsà jè xi bìjnat'aà ímìxà? Tanga ì'ndeì, mìkì k'oas'ín koma. 'An, tìjnajìin-nò koni jngoò xìtā chì'nda xi síxá-nò.

²⁸ 'Skanda kó-ne nga tàts'en-là kjoa, jñò-nò xi titsajnakò kjit'aà-ná nìtā mé kjoa xi tímat'ian.

²⁹ Koií kjoa-là nga 'an sìngatsja-nò kjoatìxoma nga jñò kotìxomaà koni s'ín kisingatsja-na Nainá xi Na'èn-na,

³⁰ mé-ne jñò, ya kichioò tìkjoa s'ioo ya it'aà ímìxà-na ñánda tìhotìxoma, tìkjoa ya kìtsajnasòn íxìlè ts'e kjoatìxoma nga jñò, kíndaajìin-là xìtā xi tejò tje-là ts'e naxandá Israel.

*Én xi kùichja Jesús nga jè Pedro kjó'mat'in
(Mateo 26:31-35; Marcos 14:27-31; Juan 13:36-38)*

³¹ Kùichja-ìsa Na'èn-ná, kitsò:

—Simón, Simón, jè xìtā neì kisiyé'nde nga mejèn-là 'ñó skót'aà-nò. K'e nga skót'aà-nò, yaá jchā-là yá-né xi ndaà kò xi mìkì ndaà, koni s'ín nìkò trigo nga matsjeè.

³² Tanga 'an, tsibitsi'batjì-lè mé-ne nga mì jchjìt'aà-lè nga mokjeiín-lè xi it'aà ts'an. K'e nga jye sikkátjifaya-ne xi it'aà ts'an, tìsikoiì xinguiì nga kixì kìtsajna.

³³ Simón kitsò:

—Na'èn, tìjnandaà-ná nga kjiìkò-lè nas'ín ndayá k'oín, nas'ín skanda kiyáko-lè.

³⁴ Jesús kitsò-là:

—Ngajì Pedro, k'oaa xan-lè, ì'ndeì, jàn k'a k'oa sí nga mìkì yaxkon-ná k'e nga tìkj'eè kjindáya kóxtí.

K'e nga jye kjòchraña nàchrjein nga k'oi-là kjo'in Jesús

³⁵ Jesús kiskònangui-là, kitsò-là:

—K'e nga kisiikasén-nò nga tsanguio nìka'bió 'én-na nga mìkì kich'à tòn, mìkì kich'à chijtsa, mìkì xoxté kitsajya, ¿mé xi kisiçhaàt'aà-nò?

Jñà xìtā kitsò:

—Nimé-jèn.

³⁶ K'eé kitsò-là:

—Ì'ndeì, jè xi tíjn-là chijtsa tòn, kàtakjoé; tìkjoa jè xi tíjn-là na'ya kàtakjoé; kò jè xi tsjìn-là kichā ndojò, kàtatìjna nàchrokisòn-là koa kàtatse kichā-là.

³⁷ K'oaa xán-nò nga tíjè-là nga kìtasòn koni s'ín tíchja Xojòn xi jí't'aa 'Én Tsjeè-là Nainá xi it'aà ts'an nga tsò: “K'oaa s'ín skoe-ikon koni jngoò xìtā xi mìkì ndaà s'ín.” Koni s'ín tíchja 'Én Tsjeè-là Nainá xi it'aà ts'an, kìtasòn yije-né.

³⁸ Jñà xìtā-là kitsò:

—Na'èn, kjioò jò-najèn kichā ndojò ijndé.

Jè Jesús kitsò:

—Kàtje kjoa.

*K'e nga jè Jesús tsibitsi'ba ya nindoò Yá Olivo
(Mateo 26:36-46; Marcos 14:32-42)*

³⁹ Jesús kii nga kùichjat'aà-là Nainá ya ñánda 'mì nindoò Yá Olivo koni s'ín s'ín kjit'aà; ìkjoàn kùitjìngui xìtā xi kota'yàt'aà-là.

⁴⁰ K'e nga ijchò ì'nde jè, kitsò-là xìtā-là:

—Tìtsi'ba-là Nainá mé-ne nga mì jé skajñò.

⁴¹ K'eé tsasit'aà xìn chiba-là koni kji saté jngoò ndajo k'e jngoò xìtā osén. Tsasèn-xkó'nchi, ìkjoàn kùichjat'aà-là Nainá.

⁴² Kitsò:

—Na'èn, tsà mejèn-lè, chjaàxìn-ná kjo'in jè; tanga mìtsà jè kìtasòn 'én-na, jè kàtabitasòn tsjì.

43 K'e nga tíchjat'aà-la Nainá tsatsejèn jngoò àkjale-la Nainá xi inchrobà-ne ngajmii nga kitsjaà-isa-la nga'ño.

44 Nga tse kjo'in tísíkjeiín inima-la, isaá 'ño kiichjat'aà-la Nainá; chiba-la kitjoondá-né, jè ndátsjèya-la xi chixòt'aà nangui, jní kjoàn.

45 K'e nga jye kiichjat'aà-la Nainá, kiì ijngoò k'a-ne ñánda títsajna xita xi kota'yàt'aà-la. Tanga k'e nga ijchò, jyeé kjijijòfè, koií kjoa-la nga 'ño 'on ma-la inima-la.

46 Kitsò-la:

—¿Mé-ne titsayijòfè-nò? Tísítjeen, títisi'ba-la Nainá mé-ne nga mì jé skajñoò.

Kií komà k'e nga kindobà'ño Jesús

(Mateo 26:47-56; Marcos 14:43-50; Juan 18:2-11)

47 Táko tik'eé tíchja-isa Jesús, kjìn xita ijchò; jè tsó'ba ítjòn Judas, xi ya itjojiin ts'e xita-la Jesús xi tejò ma-ne. K'e nga ijchò, kiì kasit'aà chraña-la Jesús nga kiskine'a.

48 Jè Jesús kitsò-la:

—Ngaji Judas, ¿a k'oáá s'ín tà jngoò kjoa xi chine'aá nìngatsja-ná 'an xi Ki'ndí-la Xita xan-la yijo-na?

49 Jñà xita-la xi i'nga, k'e nga kijtseè kjoa xi komat'in Jesús, kitsò:

—Na'èn, ¿a mejèn-lè nga kich'on-jen kichà ndojò?

50 Jngoò xita-la Jesús tsajá-la kichà ndojò jè ch'i'nda-la no'mii ítjòn, tsatet'aà líká kixi-la.

51 K'eé kitsò Jesús:

—¿Kì k'oáá nìkoo, kàtje kjoa!

Ikjoàn tsohót'aà-la tsja líká-la; nitoón kjòndaà-ne.

52 K'eé kitsò-la jñà xita xi j'ikjaá xi xita sko-la no'mii kò xita xi síkinda ingo ítjòn kò xita jchínga:

—¿Mé-ne k'oas'ín kà'nè-nò nga kichà machitìn kò yá kich'à koni tsà jngoò xita chijé kòf'ichjaà?

53 Nachrjein inchijòn tsohótijnako-nò ya nditsin ingo ítjòn; ¿mé-ne nga mìkiì ya kindobà'ño-ná? Koií kjoa-la nga jè hora jè nga jñò choòn, tsajòn-nò k'e nga jè xita neii tíhotíxoma.

K'e nga jè Pedro mìkiì tsibénojmí nga beèxkon Jesús

(Mateo 26:57-58, 69-75; Marcos 14:53-54, 66-72; Juan 18:12-18, 25-27)

54 Jesús, kitsobà'ño xita, kiìkò ni'ya-la no'mii ítjòn. Jè Pedro, tà kjìin tà kjìin tsajmeètjìngui-la.

55 Ya jngoò osen nditsin, jñà xita tsibítse jngoò ni'ín, ikjoàn tsibítsajna'ngui jngoò itjandiì. Tíkoo jè Pedro tsibìjnajiin-la xita.

56 K'eé jngoò chjoón ch'i'nda kijtseèxkon Pedro nga tíjna'ngui; kiskoò'an, kitsò:

—Xita jè, tìkooá yaá tsóhoko Jesús.

57 Tanga jè Pedro tsoho'mat'in-né, kitsò:

—Ngaji chjoón, xita jè, mìkiì bexkoan.

58 Xi komà ijngoò tjò, nguì jngoò xita kijtseèxkon Pedro, kitsò-la:

—Tìkooá ngaji, yaá tjaàkoji Jesús.

K'eé kitsò Pedro:

—Ngaji x'iin, mìtsà ya tsòhokooa.

59 Nga komà iskan, tjín-la tsà jngoò hora, tìkooá 'ño okitsò nguì jngoò xita:

—Kixií kjoa, xita jè, yaá tsóhoko, tìkooá yaá i'nde-la Galilea.

60 Pedro kitsò:

—Ngaji x'iin, mìkiì be mé 'én xi kò'mì-la.

Tík'eé-ne tíchja Pedro kiskindàya kóxtí.

⁶¹ Kisikátjifaya Na'èn-ná Jesús, kiskoòtsejèn-la Pedro. K'eé tsibítsjeèn-la Pedro 'én xi kitsò-la Na'èn-ná Jesús nga kitsò-la: “Jàn k'a k'oa sí nga mìkìl yaxkon-ná k'e nga tìkj'eè kjindáya kóxtí.”

⁶² Jè Pedro, k'eé itjo ni'ya, ìkjoàn 'ñó jchán kiskindàya nga 'on komà-la inìma-la.

Kós'ín kùichja xità xi kisìsobà-la Jesús

(Mateo 26:67-68; Marcos 14:65)

⁶³ Jñà xità xi nchisíkìnda Jesús, kisìsobà-la tìkoa tsajà-la.

⁶⁴ Tsibíchjoà xkon, ìkjoàn kiskònangui-la, kitsò-la:

—¡Koatìn-nájen yá xi tí'beé-lè!

⁶⁵ Kjìn kjoa tjin-isa xi kj'eí xi 'ñó 'on kitsò-la.

K'e nga kùiko Jesús ñánda tíjna xitaxá ítjòn ts'e xità judío

(Mateo 26:59-66; Marcos 14:55-64; Juan 18:19-24)

⁶⁶ K'e nga kis'e isén, kjòxkóya jñà xità jchínga ts'e xità judío, xità sko-la no'miì ko xità xi okóya kjotíxoma-la Nainá xi kiskìl Moisés; kùiko Jesús ya ñánda maxkóya jñà xitaxá ítjòn; ìkjoàn kiskònangui-la, kitsò-la:

⁶⁷ —Koatìn-nájen, ¿a ngaji-né xi Cristo, [xi xó kisìkasén-lè Nainá], o xi majìn-né?

Jesús kitsò:

—Tsà k'oa xán-nò: “An-ná”, mìkìl kòkjeiín-nò.

⁶⁸ Tsà 'an skònangui-nò, jñò, mìkìl kìnókjoaa tìkoaá mìkìl s'ikíjnandeí-ná.

⁶⁹ Jyeé ijchò hora-la nga 'an xi Ki'ndí-la Xità xan-la yijo-na yaá kótijnat'aà kixi-la Nainá xi 'ñó tse nga'ñó tjin-la.

⁷⁰ Ngats'ìi xità kitsò:

—¿A ngaji-né xi Ki'ndí-la Nainá 'mì-lè?

Jesús kitsò-la:

—Jñò sobà xi obixón nga 'an-ná.

⁷¹ K'eé kitsò jñà xità:

—¿Yá xità xi mochjeén-isa-ná xi tsja 'én? Jñá sobá titsana'yà-lá koni s'ín tíchja-ne tso'ba.

23

K'e nga kùiko Jesús ñánda tíjna Pilato

(Mateo 27:1-2, 11-14; Marcos 15:1-5; Juan 18:28-38)

¹ Tsasítjen ngats'ìi xità, kùiko Jesús ñánda tíjna Pilato.

² K'e nga ijchòko nguixkon Pilato, jñà xità tsibíts'ia nga tsohóngui, kitsò:

—Xità jè, kjòtsji-najen nga kj'eí ndiyá fikò naxandá-ná. Tsò-né nga mì xó kùl kichjítjía tsojmì xi ít'aà ts'e César, xitaxá ítjòn ts'e Roma; tìkoaá tsò-né nga jè xó xi Cristo [xi xó kisìkasén-ne Nainá] nga xitaxá ítjòn kijná.

³ Jè Pilato kiskònangui, kitsò-la:

—¿A jí-né xi xitaxá ítjòn-la jñà xità judío?

Kitsò Jesús:

—Ngají xi k'oa si nga 'an-ná.

⁴ Pilato kitsò-la jñà xità sko-la no'miì ko xità naxandá:

—Nimé jé xi matsji-na ít'aà ts'e xità jè.

⁵ Tanga jñà xità, isaá 'ñó kùichja nga tsohóngui, kitsò:

—Kj'eí s'ín okóya-la xità naxandá nga ótsji-la kjoasiì. Tsibíts'ia-ne nangui Galilea, kóhokji nangui Judea, skanda j Jerusalén.

K'e nga kùiko Jesús ñánda tíjna Herodes

⁶ K'e nga kùl'nchré Pilato jè 'én xi tsò, Galilea, kiskònangui-la xità: ¿A yaá i'nde-la?

⁷ K'e nga kis'enojmí-la nga ya i'nde-la, kisikasén-la jè xita xi tìjna xitaxá ítjòn Galilea xi 'mì Herodes; jña nachrjein koi, tìkoaá ján tìjna naxandá Jerusalén.

⁸ Herodes, k'e nga kijtseèxkon Jesús, 'ñó tsja komà-la nga kjòtseé mejèn-la nga skoèxkon, nga jyeé kjìn kjoa kiì'nchré xi it'aà ts'e. Mejèn-la skoè jngoò kjòxkón xi s'ín.

⁹ Kjìn skoya kjoa kiskònangui-la, tanga jè Jesús, nijngoò 'én kiìchja.

¹⁰ Tìkoaá yaá tìtsajna jña xita sko-la no'miì ko xita xi okóya kjòtìxoma-la Nainá xi kiskìi Moisés nga 'ñó nchihóngui.

¹¹ Jè Herodes ko soldado-la tsachrjekàngui-né; kisikákjá nikje xi 'ñó ndaà kjoàn koni ts'e xitaxá ítjòn nga kisìsobà-la; ikjoàn kisikasén ijngoò k'a-la jè Pilato.

¹² Nachrjein jè, tsajoóndaà-ne jè Pilato ko Herodes; k'e nga sa ítjòn, kondraá tìtsajna-la xikjín.

K'e nga kitjoònè kjoa Jesús nga kiyá

(Mateo 27:15-26; Marcos 15:6-15; Juan 18:39-19:16)

¹³ Pilato tsibíxkóya jña xita sko-la no'miì ko jña xitaxá, ngats'ìi xita naxandá,

¹⁴ kitsò-la:

—Jñò, kinìkasén-ná xita jè nga onguioò; bixón-nó nga kjoasìi ótsji-la xita naxandá; tanga 'an, kiskònanguií-la nga nguixkoòn; ngats'ìi 'én xi 'bioò, nìmé jé sakó-na it'aà ts'e.

¹⁵ Tìkoaá jè Herodes, kisikasén ijngoò k'a-na xita jè nga nìmé jé kisakòt'aà-la. Tsjìn-la jé nga kiyá.

¹⁶ Tsjaà-la kjo'in, ikjoàn siikíjnandeí-na.

¹⁷ K'oaá s'ín tìjné-la, k'e nga bitjo s'eí Paxko, bijnandeí jngoò xita xi ndayá tìtsajna'ya.

¹⁸ Tanga jña xita naxandá, tà jngoò jtaá kiì ngats'ìi, kitsò:

—¡Kàtiyaá Jesús; tìkíjnandeí-nájen Barrabás!

¹⁹ Barrabás, ndayá tìjna koií kjoa-la nga xita naxandá Jerusalén kisikjaán-kjoò tìkoa xita kisik'en jngoò.

²⁰ Pilato, mejèn-la nga siikíjnandeí Jesús; ijngoò k'a kiìchja-la xita naxandá.

²¹ Tanga jña xita naxandá, isaá 'ñó kiìchja, kitsò:

—¡Tjat'aà krò! ¡Tjat'aà krò!

²² Xi ma-ne jàn k'a kitsò-la xita naxandá:

—¿Mé jé xi tsohótsji, mé-ne kiyá-ne? 'An, nìmé jé sakó-na xi it'aà ts'e nga kiyá. Tìkoaá-ne tsjaà-la kjo'in, ikjoàn siikíjnandeí-na.

²³ Siì kis'iin xita, 'ñó kiìchja nga mejèn-la krò sít'aà Jesús. Koií kjoa-la nga 'ñó chja xita naxandá ko xita sko-la no'miì, kisikijne nga kisikitasòn Pilato.

²⁴ Jè Pilato kitsjaà okixi nga kàtitasòn koni s'ín síjé xita naxandá.

²⁵ Kisikíjnandeí Barrabás, xita xi xó k'oas'ín kisijé-ne naxandá xi tìjna'ya ndayá nga kjoasìi tsohótsji koa xita kisik'en. Ikjoàn kisìngatsja Jesús nga k'oas'ín kàtasíko koni s'ín mejèn-la.

K'e nga kisit'aà krò Jesús

(Mateo 27:32-44; Marcos 15:21-32; Juan 19:17-27)

²⁶ K'e nga kiìko Jesús nga kiì sík'en it'aà krò, kitsobà'ñó jngoò xita xi tìnchrobá-ne rancho-la xi 'mì Simón xi ya i'nde-la ñánda 'mì Cirene; jè kisik'ajen krò nga kiitjinguiko-la Jesús.

²⁷ Kjìn xita naxandá tjingui-la, tìkoaá kjìn íchjín tjingui-la xi kjindáyakeè nga mahimakeè kjoa xi tímat'in Jesús.

²⁸ Jesús, kisikátji, kiskoòtsejèn-la, kitsò:

—Íchjín xi Jerusalén tsajòn, kì 'an chìhindáyachaà-ná, chìhindáyachaà yijo-nò ko ts'e ixti-nò.

²⁹ Kijchò nachrjein k'e nga tse kjo'in s'e nga kitso xita: “Mé tà ndaà-la jña íchjín xi 'ndi, xi tsjìn-la ixti, xi mìkiì ki'ndí tsi'beé, xi mì ixti kisikaki nga isaá chiba siikájno.”

³⁰ Ikjoàn koiìts'ia nga kitso-la nindoò: “¡Kàtakaànè-najen!” K'oa ti kitso-la chrjangui-la nindoò: “¡Tìjtsa'nde-nájen!”

³¹ An, koni jngoò yá xkoén, tanga 'ñó ch'o síko-na xita; jñò xi xita Jerusalén tsajòn, isaá tà 'ñó ch'o síiko-nò xita koni jñà yá kixi.

³² Tikoá kiiko jò xita xi tse jé tjín-la nga tikoá krò kiyát'aà.

³³ K'e nga ijchòko ya i'nde ñánda 'mì I'nde Sko Mik'en, tsasíjnat'aà krò Jesús ko xita xi jò ma-ne, jñà xi tse jé tjín-la; jngoò, tsasíjnat'aà nga kixi-la koá jngoò, tsasíjnat'aà nga ngaskón-la.

³⁴ K'ée kitsò Jesús:

—Na'èn, tijchàat'aà-la; mikiì beè mé kjoá xi s'ín.

Ikjoàn jñà soldado kisiskáko nikje-la Jesús nga kisika'bí-la xíkjin yá ts'e koma.

³⁵ Jñà xita naxandá nchikotsejèn-la; tikoá jñà xitaxá ítjòn nchisísobà-la, nchitsò:

—Xita xi kjejí tsachrjetji kjo'in; tsà kixi kjoá nga jè xi Cristo xi xó k'oas'ín jaàjìn-ne Nainá, kàtsachrjetji kjo'in yijo-la.

³⁶ Tikoáá jñà soldado kisisobà-la Jesús. Ijchò kinchat'aà chraña-la; kitsjaà-la nandá vinagre nga síiki.

³⁷ Kitsò-la:

—¡Tsà ji-né xi xitaxá ítjòn-la xita judío, tikíjnandeí yijo-lè!

³⁸ Tikoá tjít'aasòn-la sko krò xi 'én griego, 'én latín, ko 'én hebreo xi tsò: “Jè jèe xi Xitaxá ítjòn-la xita judío.”

³⁹ Jñà xita xi tse jé tjín-la xi tikoá ya tjohónguit'aà krò, jngoò xi 'ñó 'nga kiichjako Jesús, kitsò-la:

—¡Tsà ji-né xi Cristo [xi xó kisikasén-lè Nainá], tikíjnandeí yijo-lè tikoá tikítsajndeí-nájen!

⁴⁰ Jè xita xi jngoò tsohótiko xíkjin, kitsò-la:

—¿A mì tsakjoón-la Nainá nga ngásòn kjo'in titsanìkjaán?

⁴¹ Xi okixi, jñà ok'ín-ná nga síkjaán kjo'in nga kichjiá jé-ná, koi kjoá-la nga 'ñó ch'o ki'né; tanga jè xita jè, nímé xi ch'o kis'iin.

⁴² K'ée kitsò-la Jesús:

—Tikítsjeèn-ná k'e nga jye kíts'ii nga kotixomai.

⁴³ K'ée kitsò Jesús:

—Okixií xi xan-lè; i'nde, ján kijnako-ná ngajmii ya i'nde ñánda 'ñó ndaà choòn.

K'e nga k'en Jesús

(Mateo 27:45-56; Marcos 15:33-41; Juan 19:28-30)

⁴⁴ K'e nga ijchò nchisen, kòjñò nga tíjtsa isò'nde skanda xi jàn nga nguixòn.

⁴⁵ Jè ts'oi, kòjñò, koá jè nikje xi tjohóya jngohosen ingo ítjòn, jòya komà nga kixojndà.

⁴⁶ Jesús 'ñó kiichja, kitsò:

—¡Na'èn, ndseji bíjnaya inima-na!

K'e nga jye okitsò, k'en.

⁴⁷ Jè xita sko-la soldado, k'e nga kijtseè kjoá koi koni s'ín komà, kijtseèxkón Nainá, kitsò:

—Kixií kjoá, xita jè, xita kixi-né.

⁴⁸ Ngats'ii xita xi chixoña nga nchikotsejèn, k'e nga jye kijtseè kjoá xi komà, ki-ne ni'ya-la; kisijts'iin-sòn inima-la nga 'ñó tse kjoaba kis'ejiin inima-la.

⁴⁹ Ngats'ii xita xi beèxkon Jesús ko íchjín xi inchrobà-tjinguí-la skanda ján Galilea, kjiin jncha-ne nga nchikotsejèn-la.

K'e nga kisihjiin Jesús

(Mateo 27:57-61; Marcos 15:42-47; Juan 19:38-42)

⁵⁰ Tíjna jngoò xita xi 'mì José xi 'ñó ndaà xita, tikoáá xita kixi-né. Yaá i'nde-la ñánda 'mì Arimatea, jngoò naxandá xi chja-ne Judea. Tikoáá xá ítjòn tjín-la ts'e xita judío.

⁵¹ Jè José, tikoáá tíkoñaá-la nga mejèn-la skoe kó s'ín otíxoma Nainá; mìkì tìjngò-ikon koni s'ín tsajoóya-ne xitaxá xíkjin koni s'ín kisikò Jesús.

⁵² Kìikon Pilato; kii síjé'nde-la nga kjinchrobàko yijo-la Jesús.

⁵³ Kiskónájen-t'aà krò; kisikájté jngòò nikje lino chroba. Ikjoàn kii kíhijìn. Kiskinìs'en-ngui jngòò ngajo mik'en ñánda nga xó k'oas'ín kitáx'a-ne naxi. I'nde jè, ni saá jngòò mik'en sihijìn.

⁵⁴ Nàchrjein jè, víspèra-la s'eí Paxko-né; jye kjomeè bijchó hora nga kòts'ia jè nàchrjein nìkjáya.

⁵⁵ Jñà íchjín xi tjiko kóni nga inchrobà-ne Galilea, kiitjingui-la; kijtseèxkon ngajo mik'en kó s'ín kisijna yijo-la Jesús.

⁵⁶ K'e nga j'ì-ne ni'ya-la tsibìtsajnándaà xkii xi 'ñó ndaà jne ko xkii na'yo. Ikjoàn kisikjáya íchjín jè nàchrjein nìkjáya, koni s'ín tíchja kjotíxoma.

24

Mé xi komà k'e nga jaáya-la Jesús

(Mateo 28:1-10; Marcos 16:1-8; Juan 20:1-10)

¹ Jè nàchrjein nga tàts'en xomàna, 'ñó tajñòya kii jñà íchjín ya ngajo mik'en ñánda kisihijìn Jesús nga kii ko xkii jne xi tsibìtsajnándaà nga kixten-jno yijo-la Jesús; tikoá kjihijtako íchjín xi k'ejí.

² K'e nga ijchò, kijtseè jè ndajo xi tíchjoàjto-la ngajo mik'en, xìn kijna.

³ K'e nga jahas'en-ngui ngajo mì tì kii kjòtsji-la yijo-la Na'èn-ná Jesús.

⁴ K'e nga nchisikájno íchjín koi, tà nitoón chinchat'aà jò-la xita x'in xi íkjá nikje xi ote ni'in kjoàn.

⁵ Íchjín koi, tà kitsakjòn-la; chincha-ñiat'aà nangui. K'eé kitsò jñà xita x'in xi jò ma-ne: —¿Mé-ne i binchaàtsjijìn-là mik'en jè xita xi tijnakon?

⁶ Mì tì yá tjín-ne ijndé, jyeé kòfaáya-la. Tíkìtsjeèn koni s'ín kitsò-nò k'e nga tisa tsibìjna Galilea,

⁷ nga kitsò: “Mochjeén-né nga jè Kì'ndí-la Xita, jñà kongatsja xita jé nga koòt'aà krò tanga k'e nga kijchò jàn nàchrjein kjoáya-la.”

⁸ Jñà íchjín koi, k'eé tsibìtsjeèn-la koni s'ín kitsò Jesús.

⁹ K'e nga j'ì-ne nga kii katsejèn-la ngajo mik'en, tsibénojmí-la jñà xita xi tsibíxáya-la xi tejngòò ma-ne ko xita xi i'nga.

¹⁰ Jñà íchjín koi, jè xi 'mì María Magdalena, Juana, María xi nea-la ma-ne Jacobo ko xi k'ejí íchjín-isa; jñà xi ijchòko 'én nga tsibénojmí-la jñà xita xi tsibíxáya-la.

¹¹ Tanga jñà xita-la Jesús, xi kjoa niton, tà kjoaská komà-la; mìkì kòkjeiín-la 'én xi tsibénojmí-la jñà íchjín.

¹² Tanga jè Pedro, tsangachikon, kii katsejèn-la ngajo mik'en; k'e nga kiskoòtsejèn-s'en ngajo, kijtseè nga tà jñà kjioò nikje xi kisijtéjìn Jesús. Ikjoàn kii-ne ni'ya-la; tà kjòxkón-la kjoa xi komà.

Ndiyá Emaús

(Marcos 16:12-13)

¹³ Tjè-ne nàchrjein, jò xita xi kota'yat'aà-la Jesús nchifi jngòò naxandá xi 'mì Emaús, xi tjín-la tsà tejngòò kilómetro skanda ján Jerusalén.

¹⁴ Nga nchifi ya ndiyá, koií nchijoóya-ne ngats'ì kjoa xi komà.

¹⁵ Nga nchijoónojmí tikoá nchikjònangui-la xíkjin ijchòtjingui chraña-la xi tjè-ne Jesús xi taña tsobáhijtako.

¹⁶ Tanga jñà, k'oaá komà-la koni tsà tíchjoà xkon, mìkì kijtseèxkon.

¹⁷ Jesús kiskònangui-la, kitsò-la:

—¿Mé'én xi ondaà chibàya-nò nga tjaàya ndiyá? ¿Mé-ne ba tjín-nò?

18 K'eé kiichja Cleofas, kitsò:

—Ngats'iì xita naxandá Jerusalén, tà jì tà jngoò-lè xi mìkì tìjìn-lè jè kjoa xi komà ján Jerusalén, jña nachrjein xi tsato.

19 Jesús kitsò:

—¿Mé kjoa-ne?

Jña xita koi kitsò-la:

—Kjoa ts'e Jesús xi Nazaret i'nde-la, jè xi kiichja ngajo-la Nainá; kis'eé-la nga'ño, ma yijee-la nita mé kjoa-ne, nita mé 'én-ne nga nguixkon Nainá, nguixkon ngats'iì xita naxandá.

20 Xita sko-la no'miì, ko xitaxá tsajen, kisingatsja xita Romano nga kisik'en, tsohót'aà krò.

21 Ngajen, titsachiñá-lajen, bixón-nájen tsà jè Mesías xi sijkítsajnadejì-ne xita naxandá Israel. Tanga i'nde, jyeé tjin-la ján nachrjein nga k'oas'ín komà kjoa koi.

22 Tikoáá tjin i'nga íchjín xi títajajjìn-najen, xi tajñoa kòfi katsejèn-la jè ngajo mik'en. K'e nga kòfi-ne kabincháxkón-najen nga kábénojmi-najen

23 nga mì xó kii kásakó-la yijo-la Jesús; tikoá kàbeèxkon xó àkjalè xi kàtsò-xó-la: Jesús tijnakon-né.

24 K'eé kòfi i'nga xita xingui-jen xi kòfi katsejèn-la ngajo mik'en, k'oaá tìs'ín kàbeèxkon koni s'ín kàtsò jña íchjín tanga jè Jesús, mì xó kii kòbeè.

25 K'eé kitsò Jesús:

—¿Mé tà tondo-nò tikoá mé tà tájaajjìn tjin inima-nò nga mìkì ndaà mokjeiín-nò kjoa xi kitsò jña xita xi kiichja ngajo-la Nainá!

26 ¿A mìtsà tìjìn-nò? K'oaá s'ín tjinè-la Cristo, [xita xi xó kisikasén-ne Nainá], nga ítjòn sijkjeiín kjo'in, ikjoàn kjoahas'en ngajmi ñánda jeya kijná.

27 Tsibénojmiya-la kó tsòya-ne koni s'ín tíchja ngats'iì Xojon-la Nainá it'aà ts'e Cristo. Tsibíts'iaqo-ne xojon xi kiskii Moisés; ikjoàn tsibénojmiya-la ngats'iì xojon xi kiskii jña xita xi kiichja ngajo-la Nainá.

28 K'e nga ijchò ya naxandá ñánda nchifi xita koi, Jesús, k'oaá kis'iìn koni tsà isa kjìnn tífi.

29 Tanga jña xita koi, kjo'ño kis'iìn-la nga kisikijna; kitsò-la:

—Tijnako-nájen; jyeé kjòhoxòn, jye kiskaàtjì ts'óí.

Jè Jesús, kòkjeiín-la; jahas'en ni'ya; tsibijnako.

30 K'e nga jye títajajjìn-aà ímixa, kiskoé inchrajín, kitsjaà-la kjondaà Nainá, kisixkoaya, ikjoàn kitsjaà-la jña xita.

31 K'eé kitáx'a xkon; kijtseèxkon nga jè Jesús; tanga jè Jesús, tà kichijà-né nga nguixkon xita koi.

32 K'eé kitsò-la xikjín:

—Koií-la kjoa-la nga ndaà kòmatsja-la inima-ná k'e nga tíhókonojmí-ná ya iya ndiyá nga tibeñojmí-ná kjoa ts'e Xojon-la Nainá.

33 Mì tì kii kiskoòña-ne, kisikátjì nitoón-ne nga kii-ne Jerusalén; ijchò ijngoò k'a-ne jngoò ni'ya ñánda títajajjìn xikjín xi tejngoò ma-ne ko xita xi kj'eíí-isa.

34 Jña xita xi tejngoò ma-ne kitsò-la xikjín:

—Kixijí kjoa, jyeé kòfaáya-la Na'èn-ná Jesús; jyeé kòbeèxkon Simón.

35 K'eé tsibénojmi jña xita xi jò ma-ne kó s'ín komàt'in ya iya ndiyá koá kó s'ín komà nga kijtseèxkon Jesús k'e nga kisixkoaya inchrajín.

K'e nga jè Jesús tsatsejèn-jìnn osen ñánda títajajjìn xita xi kota'yàt'aà-la

(Mateo 28:16-20; Marcos 16:14-18; Juan 20:19-23)

36 Tákó tìk'eé nchichja-isa nga nchibénojmi-la xikjín kjoa koi, nga tsasijnajjìn osen-la Jesús; kisihixat'aà, kitsò-la:

—Nainá, 'nchán kàtasíkítsajna-nò.

³⁷ Jñà x̄it̄a koi, tsí ndaà kitsakjòn, koà tsí ndaà kisinchaàxkón; k'è nga kijtseè, komà-la tsà tà in̄im̄a-la mik'en-né.

³⁸ Tanga Jesús kitsò-la:

—¿Mé tà ndaà tsakjoòn-nò? ¿Mé-ne k'oa tsò-ne kjohítsjeèn xi bitjojiin in̄im̄a-nò?

³⁹ Chítsejèn-la ndsaa kò ndsokoaà. 'An-ná. Tjat'aà-ná ndsaa koà chítsejèn-ná. Jngoò x̄it̄a xi tà in̄im̄a, tsjìn-la yijo, t̄ikoaá tsjìn-la nindaà, tanga 'an, tjín-na koni s'ín t̄itsa'yaà-ná.

⁴⁰ K'è nga jye okitsò-la, tsakó-la tsja kò ndsokò.

⁴¹ Tanga jñà x̄it̄a-la mìkìl xátì kòkjeiín-la nga tsja komà-la t̄ikoa kisinchaàxkón nga kijtseèxkon Jesús; k'èé kiskònangui Jesús, kitsò-la:

—¿A tjín chiba-nò tsojmì xi ma chine?

⁴² Kitsjaà itsé-la t̄in xi jye kichjàn, kò tsjén-la cho cera.

⁴³ Jesús kiskoé, ikjoàn kiskine nga nguixkon jñà x̄it̄a-la.

⁴⁴ K'èé kitsò-la jñà x̄it̄a-la:

—Jñà kjoa xi komàt'ian, jñà-né xi tsibenojmì-nò k'è nga t̄isa tsohótijnako-nò. K'oaá s'ín kixan-nò nga k̄itasòn yije-né koni s'ín t̄ichja xojon it'aà ts'an, jè kjotíxoma-la Nainá xi kiskìl Moisés kò ts'e x̄it̄a xi k̄ichja ngajo-la Nainá kò xi t̄jít'aà libro ts'e Salmo.

⁴⁵ K'èé kisikichiya-la kjohítsjeèn-la mé-ne nga kàtjahas'en-jìin-la koni s'ín t̄ichja Xojon xi t̄jít'aà 'Én Tsjeè-la Nainá.

⁴⁶ Kitsò-la:

—K'oaá s'ín t̄ichja Xojon-la Nainá nga tsò nga 'an xi Cristo, [xi xó kisikasén-na Nainá], k'oaá s'ín t̄jínè-na nga k̄iyá; tanga k'è nga k̄ijchò jàn nachrjein, kjoaáya-na it'aà ts'e kjoa biyaà.

⁴⁷ Xi it'aà ts'an, Nainá s̄ijchàat'aà-la jé-la x̄it̄a k'è nga s̄ikájno jé-la nga mì t̄i jé kohótsji-ne. Jè 'én koi, mochjeén-né nga k̄inókjoayajìin yije-la x̄it̄a mats'iaako-ne Jerusalén kó nga t̄jtsa isò'nde.

⁴⁸ Jñò kénajmìó kjoa kixi koni s'ín komà.

⁴⁹ 'An s̄ikasén-nò jè kjotjò xi tsjá Na'èn-na koni s'ín kitsjaà tso'ba. Tanga jñò, íi t̄itsajna naxandá Jerusalén skanda k'è nga tjoé-nò nga'ñó-la Nainá xi nchrobá-ne ngajmì.

K'è nga k̄imjìn ngajmì Jesús

(Marcos 16:19-20)

⁵⁰ K'èé k̄ilkò x̄it̄a-la skanda ján naxandá Betania. Kiskìmi'nga tsja nga kisijét'aà-la Nainá nga k̄atasíchikon-t'in jñà x̄it̄a koi.

⁵¹ K'è nga t̄isjét'aà-la, kitjámì'nga nga k̄i-ne ngajmì.

⁵² Jñà x̄it̄a-la, k'è nga jye chincha-xkó'nchit'aà-la nga jeya kisikíjna Jesús, k̄i-ne Jerusalén; 'ñó tsja kis'e-la.

⁵³ Nachrjein inchijòn tsibìtsajnaya ingo ítjòn nga kitsjaà-la kjondaà Nainá t̄ikoa jeya kisikíjna.

'Én ndaà-la Nainá xi kjoa ts'e Cristo koni s'ín kiskii San Juan

Jesucristo xi 'Én-la Nainá, xitaá komà

¹ K'e nga tisa tàts'en-la kjoa, jè 'Én, jyeé k'oa tíjna-né. Yaá tíjnako Nainá. Jè 'Én, Nainá-né.

² Kò yaá tíjnako Nainá skanda tisa tàts'en-la kjoa.

³ Jè Nainá, k'e nga tsibíndaà ngats'ii tsojmì xi tjin, it'aà ts'eé 'Én tsibíndaà; ni mé tsojmì tjin xi mii it'aà ts'e kisindaà.

⁴ Jè 'Én, it'aà ts'e-né nga títsajnakon xita; jè kjoa nga títsajnakon xita, jè-né ni'ín xi síhiseèn-la ngats'ii xita.

⁵ Jè ni'ín xi síhiseèn nánda jñò choòn, ote-né, kò jè kjoa jñò mikii ma síkijne-la ni'ín nga síkits'o.

'Én xi kiichja Juan it'aà ts'e Cristo

⁶ Tsibijna jngoò xita xi 'mii Juan xi Nainá kisikasén.

⁷ Jè j'ii tsjá 'én it'aà ts'e ni'ín xi síhiseèn, mé-ne ngats'ii xita kòkjeiin-la koni s'ín kiichjaya.

⁸ Mìtsà jè Juan ni'ín xi síhiseèn-la xita, tà 'én j'ii tsjá it'aà ts'e ni'ín xi síhiseèn-la xita.

⁹ Jè ni'ín xi ngui kixi kjoa xi síhiseèn-la ngats'ii xita, yaá tinchrobá i isò'nde.

¹⁰ Íi tsibijna isò'nde, kò it'aà ts'eé kisindaà isò'nde, tanga jñà xita isò'nde mikii kijt-seèxkon.

¹¹ J'ii nangui nánda ts'e, tanga jñà xita-la mikii kiskoétjò.

¹² Ngats'ii xita xi kiskoétjò tikoà kòkjeiin-la jñà 'én xi kiichja, k'oaá s'ín kitjò'nde-la nga Ki'ndí-la Nainá ma,

¹³ tanga mìtsà koi kjoa-la nga jní kits'iin-jiiin, ni mìtsà koi kjoa-la nga it'aà ts'e xita kits'iin; koi-né nga it'aà ts'e Nainá kits'iin.

¹⁴ Jè 'én, xitaá komà, íi tsibijnajiiin-najen. Ki'ya-najen kjoa jeya-la nga Ki'ndí tà jngoò-la Nainá. 'Nó tjin-la kjondaà kò kjoakixi.

¹⁵ Juan kitsjaà 'én it'aà ts'e, kitsò:

—Jè jèe xi k'oaas'ín kixan-nò k'e nga kixan-nò: “Jè xi sa nchrobá tjingui-na, jè isa tíjna ítjòn-na, nga isa kjòtseé tíjna koni 'an.”

¹⁶ 'Nó tse kjondaà kitjoé-ná ngats'iaá, sa 'nó, sa 'nó kochikon-t'ian.

¹⁷ Jè kjotíxoma, it'aà ts'e Moisés j'ii-ne, tanga xi kjondaà kò kjoakixi, it'aà ts'e Jesucristo j'ii-ne.

¹⁸ Ni saá jngoò xita beèxkon kó kji Nainá. Tà jè xi ki'ndí tajngoò-la xi ya tíjnat'aà-la, bénojmi kixi-ná it'aà ts'e.

'Én xi tsibénojmi Juan it'aà ts'e Jesús

(Mateo 3:11-12; Marcos 1:7-8; Lucas 3:15-17)

¹⁹ Jñà 'én koi xi kitsjaà Juan, k'e nga jñà xita judío xi títsajna Jerusalén kisikasén-la no'mii kò xita levita nánda tíjna Juan nga kiskònangui-la, kitsò-la:

—¿Yá xita-ne jii?

²⁰ Juan tsibénojmi kixi-né; mikii tsakajna'ma, kitsò:

—Mìtsà 'an xi Cristo, xita xi xó kisikasén-ne Nainá.

²¹ Xita koi ijngoò k'a kiskònangui-la kitsò-la:

—¿Yá-né ngajii? ¿A jii-né Elías?

Juan kitsò:

—Majin, mìtsà 'an.

—¿A jii-né xita xi chja ngajo-la Nainá xi tjinè-la nga kjoii?

Juan kitsò:

—Majìn, mìtsà 'an.

²² Ìjngòò k'a kiskònangui-là, kitsò-là:

—Kòt'ìn-nájèn, yá-ne jì, mé-ne nga koma kònguíko-lajèn 'én jǎà xítà xi kàsikasén-najèn.
¿Mé 'én xi k'oi-nájèn it'aà tsiji?

²³ K'eé kitsò Juan:

—'An-ná xítà xi 'ñó chjàya i'nde it'aà xìn ñánda nangui kixì choòn: “Tjandaà kixioò ndiyá-là Nainá”, koni s'ín kitsò Isaías, xítà xi kùichjà ngajo-là Nainá.

²⁴ Jǎà xítà xi ijchò kjònangui-là Juan, xítà fariseo-né.

²⁵ Ìjngòò k'a kiskònangui-là, kitsò-là:

—Tsà mìtsà jì xi Cristo, nì Elías, nì jè xítà xi chjà ngajo-là Nainá, mé-ne xítà 'nè-ne bautizar.

²⁶ Kùichjà Juan kitsò:

—'An tà nandá s'iin-na bautizar xítà, tanga tíjnajìn jngòò-nò xi jǎò mìkiì yaxkon,

²⁷ jè xi ìskan kjoí, jè xi ìsa tíjna ítjòn koni 'an; skanda mìkiì tíj'nde-na nga 'an skíjnda'ñoá xox'ín-là xojté-là.

²⁸ Ngats'ìi kjoà koi, ján naxandá Betania nga k'oas'ín komà, naxandá xi kijna xijngoàà ndá je Jordán, ñánda kis'iin bautizar xítà jè Juan.

²⁹ Nga komà nchijòn, Juan kijtsee Jesús nga tínchrobákon, kitsò:

—¿Chítsejèn-là, jè jèe xi síkasén Nainá k'oàá गया-là koni Orrè Ki'ndí xi faáxìn jé-là xítà isò'nde!

³⁰ Jè jèe xi k'oà kixan-nò k'e nga kixan: “Nchrobá tjingui jngòò-na xítà x'ìn xi ìsa tíjna ítjòn-na nga ìsa kjòtsee tíjna koni 'an.”

³¹ Tìkooá 'an, mìkiì bexkoan yá-né jè. Koiì kjoà-là nga ta nandá s'in-na bautizar xítà mé-ne jǎà xítà naxandá Israel skoexkon-ne.

³² Juan, k'oas'ín kitsjàà 'én nga kitsò:

—Kìjtsee-ná jè Inìma Tsjeè-là Nainá nga itjojen-ne ngajmì koni kji nìse paloma kji, tsibìjnasòn-là Jesús.

³³ 'An, kj'eè kì bexkoan, tanga jè Nainá xi kisikasén-na nga kò nandá s'iin-na bautizar xítà, kitsò-na: “Jè xi jchii nga kítjojenè-là Inìma Tsjeè-na nga ya kíjnasòn-là, jè-né xi kò Inìma Tsjeè-na s'iin-ne bautizar xítà.”

³⁴ 'An, k'oàá s'ín kìjtsee, k'oàá ma-ne k'oas'ín tsjàà 'én nga Jesús, jè xi Ki'ndí-là Nainá.

Xítà xi kiskòòta'yàt'aà ítjòn-là Jesús

³⁵ Nga komà nchijòn, Juan yaá tíjna ìjngòò k'a; tjìko jò xítà xi kota'yàt'aà-là.

³⁶ Juan kijtseeèxkon Jesús nga tìkooà ya tsóba, kitsò:

—¿Chítsejèn-là, jè jèe xi orrè-là Nainá [xi kiyátjì jé-là xítà]!

³⁷ Ingajò xítà koi, k'e nga kù'nchré koni s'ín kitsò Juan, kùitjingui-là Jesús.

³⁸ Jesús k'e nga kisikátjiya, kijtsee nga xítà tjingui-là kitsò-là:

—¿Mé xi binchaàtsjioò?

Ingajò xítà koi, kùichjà, kitsò:

—Maestro, ¿ñánda tíjni?

³⁹ Jesús kitsò-là:

—Nchrobá, chítsejèn.

Ikjoàn kùitjingui-là, kijtsee ñánda bìjna Jesús. Yaá tsibìtsajnakò nga jye kjòhoxòn, ijchò-la tsà xi ñijòn.

⁴⁰ Ingajò xítà koi, jǎà xi kùitjingui-là Jesús k'e nga kù'nchré-là koni s'ín kitsò Juan, jngòò xi 'mì Andrés xi 'ndse ma Simón Pedro.

⁴¹ Andrés kù kátsji ítjòn 'ndse xi 'mì Simón, kitsò-là:

—Jyee kà yaxkon-jèn jè Mesías [xi xó kisikasén-ne Nainá]. Jè 'én Mesías, Cristo tsòya-ne.

⁴² Andrés kiiko Simón xi 'ndse ma ya ñánda tíjna Jesús. Jesús, k'e nga kijtsee, kitsò-là:
—Ngaji-né xi 'mì-lè Simón xi ki'ndí-là ma Jonás. I'nde, Cefas k'oín-lè (én xi Pedro tsòya-ne).

K'e nga Jesús kiichja-là jè Felipe ko Natanael

⁴³ Nga komà nchijòn, Jesús k'oaá s'ín kisikítsjeèn nga ján kjoì nangui Galilea. Kiskaàjìin Felipe, kitsò-là:

—Nchrobá tjingui-ná.

⁴⁴ Felipe, yaá i'nde-là naxandá Betsaida, ya ñánda i'nde-là Andrés ko Pedro.

⁴⁵ Felipe ki kátsji Natanael, kitsò-là:

—Jè xità xi oxkít'aà kjotíxoma xi kiskii Moisés ko xità xi kiichja ngajo-là Nainá, jyeé kà yaxkon-jen nga jè Jesús xi ki'ndí-là José xi Nazaret i'nde-là.

⁴⁶ Natanael, kitsò-là Felipe:

—Ján naxandá Nazaret, ¿a tjin jngoò xi ndaà xità xi ya kitjokàjìin-ne?

Felipe kitsò:

—Nchroboí, chítsejèn-là.

⁴⁷ Jesús, k'e nga kijtsee Natanael nga tinchrobákon, kitsò:

—Jè xità jè xi nguì kixi kjoa nga xità Israel nga ndaà tísíjchá yijo-là ko mìkii konachan.

⁴⁸ Natanael kitsò:

—¿Kó s'ín ma-ne nga yaxkon-ná?

Jesús kitsò:

—K'eé kòbe-lè k'e nga tikj'eè chja-lè Felipe nga tijna'ngui yá toò iko.

⁴⁹ Natanael kitsò:

—Maestro, ngaji-né xi Ki'ndí-là Nainá; ji-né xi xitaxá ítjòn-là naxandá Israel.

⁵⁰ Kiichja Jesús kitsò:

—¿A koií-né nga xan-lè: Kòbe-lè k'e nga tijna'ngui yá toò iko nga mokjeiín-lè? K'oaá xan-lè nga isa 'ño tse kjojkón jchaá-isi.

⁵¹ Ijngoò k'a kiichja Jesús kitsò:

—Nguì okixi xi xan-nò, naxrjein xi sa f'ii isa jchaxkoòn ngajmii nga tix'á koa jña àkjale-là Nainá fimijìn koa nchrobájen nga tjímat'aà-na xi Ki'ndí-là Xità xan-là yijo-na.

2

Jè kjojkón xi kis'iin ítjòn Jesús

¹ Xi komà ján naxrjein, kis'e jngoò s'eí nga chixàn xità ján naxandá Caná, ya nangui Galilea. Tikoáá yaá tíjna jè nea-là Jesús.

² Tikoá kinokjoà-là Jesús ko xità xi kota'yàt'aà-là ya ñánda chixàn xità.

³ K'e nga jyehet'aà vino, jè nea-là Jesús kitsò:

—Mì tì mé vino tjin-ne.

⁴ Jesús kitsò:

—¿Mé xi ma-lè? ¿Mé-ne 'an kò'mì-ná? Kj'eè kiì bijchó naxrjein-na nga skoe-na xità yá-ná 'an.

⁵ Jè nea-là Jesús kitsò-là jña xità xi bíya vino:

—K'oaá s'ín tikitasòn yije-là koni s'ín tsò-nò.

⁶ Ya títajna joòn tíjí ndajo xi sinchá nandá, xi síkjeén jña xità judío nga ma sítsjeè-ne tsojmì xi tjin-là koni s'ín tjin kjotíxoma-là xi xkón tjin. Jña tíjí kjiyaá-là tsà jò ko tsà ján nisa nandá.

⁷ Jesús kitsò-là jña xità chi'nda xi nchibíya vino:

—Tínchaà nandá tíjí koi.

Jña xità chinchá nandá; jngoò k'aá kisítseè.

⁸ Ikjoàn kitsò Jesús:

—Tínaxrjeè chiba vino; tanguíko-là jè xi tísís'in-là xità.

K'eé kiiko-la.

⁹ Jè xita xi oko-la nga tís's'in-la jña xita, kiskoòt'aà nandá xi vino komà; xita jè, mìkìl tìjìin-la ñánda j'ii-ne. (Tà jña tìjìin-la xita ch'i'nda xi tsachrje nandá.) Jè xita xi oko-la, k'eé kiichja-la xita x'in xi chixàn,

¹⁰ kitsò-la:

—Ngats'ii xita, jè tsjá ítjòn vino xi 'ño ndaà; k'e nga jye 'ño 'biì jña xita, k'eé tsjá xi chiba ndaà. Tanga ngaji, kòbinchatjó-né xi 'ño ndaà, skanda saá tì'biì.

¹¹ Jè kjo'xkón xi kis'iin ítjòn Jesús ján naxandá Caná nangui xi chja-ne Galilea; k'oaá s'ín tsakó kjoa jeya-la kò jña xita xi kota'yàt'aà-la kòkjeiín-la it'aà ts'e.

¹² Xi jye komà iskan, Jesús kii ján naxandá Capernaum; kiiko nea-la, 'ndse, kò xita xi kota'yàt'aà-la. Tà chibaá naxrjein tsibìtsajna ya naxandá jè.

K'e nga kii s'eí Jesús ján Jerusalén

(Mateo 21:12-13; Marcos 11:15-18; Lucas 19:45-46)

¹³ Nga jye nchrobá machraña s'eí-la xita judío xi bitjo k'e nga itjokàjìin kjo'in ján nangui Egipto, Jesús kii ján Jerusalén.

¹⁴ K'e nga jahas'en ingo ítjòn, kijtseè nga tjín xita ya nditsin ingo xi nchihotíjna nchraja kò orrè kò paloma; tìkoā tìtsajna xi sík'atjìya ton.

¹⁵ Jesús tsibíndaà jngoò na'ño xi tsajá-la jña xita nga tsachrje yije ya nditsin ingo, kò nchraja kò orrè. Tsibíxteèn ton-la jña xi sík'atjìya ton. Jngoò k'aá chinchá ngajten ímixa-la.

¹⁶ Jña xita xi nchihotíjna nise paloma, kitsò-la:

—Tínachrjeè yije cho koi; kii ni'ya nditsin 'nè ni'ya-la Na'èn-na.

¹⁷ Jña xita xi kota'yàt'aà-la k'eé tsibìtsjeèn-la nga k'oa's'ín tít'aà Xojon-la Nainá nga tsò: “Ñó matsjake ni'ya-lè; koi kjoa-la nga machinikeè.”

¹⁸ Jña xita judío kiskònangui-la Jesús, kitsò-la:

—¿Mé kjo'xkón xi okoò-nájen nga tjín-lè kjo'tíxoma it'aà ts'e kjoa xi 'ni?

¹⁹ Kiichja Jesús kitsò-la:

—Tìkixaña ingo jè, 'an, jàn naxrjein kìndàyà òjngoò k'a-na.

²⁰ Kitsò jña xita judío:

—Ingo jè ichán joòn nó kisindaà-ne, koa ji, ¿a tà jàn naxrjein kíndaà xitse òjngoò k'a-ne?

²¹ Tanga jè ingo xi kisikaxki Jesús, jè yijo-la xi okitsò-la.

²² K'e nga jye jaáya-la Jesús nga k'en, k'eé tsibìtsjeèn-la jña xita xi kota'yàt'aà-la 'én xi okitsò. K'eé kòkjeiín-la koni s'ín tìchja Xojon-la Nainá kò 'én xi kiichja Jesús.

Jesús, kós'ín ma ndaá beè inima-la ngats'ii xita

²³ Jesús k'e nga tsibìjna s'eí Paxkò ján Jerusalén, kjin xita kòkjeiín-la it'aà ts'e k'e nga kijtseè kjo'xkón xi kis'iin.

²⁴ Tanga Jesús mìtsà nguì ndaà tìjngoò ikon it'aà ts'e xita koi, nga jyeé beèxkon yije xita.

²⁵ Jesús mìkìl mochjeén-la nga kj'eí xita okitsò-la kó s'ín jña xita; jè, jyeé beè inima-la xita kós'ín síkìtsjeèn.

3

K'e nga jè Jesús tsohóko Nicodemo

¹ Tsibìjna jngoò xita fariseo xi tìkoā xita ítjòn tsibìjna it'aà ts'e xita judío; Nicodemo ki'mì.

² Jngoò k'a j'ìikon Jesús k'e nga jño, kitsò-la:

—Maestro, 'ya-nájen nga jè Nainá kisikasén-lè mé-ne kòkóya-nájen. Nga jngoò xita xi mìtsà Nainá tìjnakò, mìkìl koma-la s'iin kjo'xkón xi ji 'ni.

³ Jesús kitsò-la:

—Xi nguì okixi, k'oaá xan-lè, jè xita xi mikiì jts'ín xitse ìjngoò k'a-ne, mikiì skoe kó s'ín otíxoma Nainá.

⁴ Nicodemo kiskònangui, kitsò:

—¿Kós'ín koma jts'ín xitse ìjngoò k'a xita xi jye kòjchínga? Ni ìtsé koma kjoahas'en ìjngoò k'a indso'ba nea-la nga jts'ín ìjngoò k'a.

⁵ Kiichja Jesús kitsò:

—Xi nguì okixi, k'oaá xan-lè, jè xi mì it'aà ts'e nandá kò Inima Tsjeè-la Nainá jts'ín-ne, mikiì koma kjoahas'en-jìin ñánda tíhotíxoma Nainá.

⁶ Jè xi ts'iin it'aà ts'e xita, xita-né. Koa jè xi ts'iin it'aà ts'e Inima Tsjeè-la Nainá, inima-né.

⁷ Ki maxkón-lè koni s'ín tixan-lè: “Mochjeén-né nga jts'ín xitse ìjngoò k'a-ne jña xita.”

⁸ Jè tjo 'ba-né nita ñánda-ne; na'yà-la nga one. Tanga mikiì 'ya-la ñánda nchrobá-ne, tikoá mikiì 'ya-la ñánda fi. K'oaá tis'ín ma yije ngats'ii xi it'aà ts'e Inima Tsjeè-la Nainá ts'iin-ne.

⁹ K'eé kitsò Nicodemo:

—¿Kós'ín ma-ne nga k'oas'ín koma-ne kjoa koi?

¹⁰ Jesús kitsò-la:

—Ngaji, maestro tijni ts'e xita naxandá Israel. ¿Mé-ne mikiì tíjìin-lè kjoa koi?

¹¹ Xi nguì okixi, k'oaá xan-lè: Jè kjoa xi ma-najen, k'oaá s'ín nokjoà-jen; xi jye kina'yà-jen, k'oaá s'ín benojmí-jen. Jñò, mikiì mokjeiín-nò 'én-najen.

¹² K'e nga benojmí-nò kjoa xi tjin isò'nde, mikiì mokjeiín-nò. ¿A kòkjeiín-nò tsà keènojmi-nò kjoa xi tjin ján ngajmii?

¹³ Ni saà jngoò xita xi jye kiimijin ján ngajmii; tà jè Ki'ndí-la Xita xi ngajmii tjina nga ya itjojen-ne.

¹⁴ Koni s'ín kis'iin Moisés nga kiskimií'nga yá xi tjoót'aà ye kicha bronce ya i'nde it'aà xin ñánda kixi choòn, k'oaá tis'ín tjinè-la jè Ki'ndí-la Xita nga tjamiitjen-t'aà jè yá,

¹⁵ mé-ne ngats'ii xita xi kòkjeiín-la it'aà ts'e, mikiì chija, s'eé-la kjoabinachon nita kjé-ne.

¹⁶ Nainá 'ño tsatoó kjòtsjakeè xita isò'nde nga kitsjaà Ki'ndí-la xi tajngoò ma-ne, mé-ne ngats'ii xita xi mokjeiín-la it'aà ts'e, mikiì chija; s'eé-la kjoabinachon nita kjé-ne.

¹⁷ Nainá mìtsà koi xá kisikasén-ne Ki'ndí-la nga kjo'in koiinè-la xita isò'nde; koií xá kisikasén-ne nga kochrjekàjìin kjo'in xita kjoa ts'e jé-la.

¹⁸ Jè xi mokjeiín-la it'aà ts'e Ki'ndí-la Nainá, mìtsà kjo'in sinè-la xi kjoa ts'e jé-la, tanga jè xi mikiì mokjeiín-la jyeé kjo'in tjinè-la, koií kjoa-la nga mikiì mokjeiín-la it'aà ts'e Ki'ndí-la Nainá xi tajngoò ma-ne.

¹⁹ Jña xita xi mikiì mokjeiín-la, jyeé kjo'in tjinè-la, koií kjoa-la k'e nga j'ii i isò'nde jè xita xi j'iko kjoahiseèn, mikiì kisaseèn-la kjoahiseèn; isaá ndaà kisaseèn-la kjoajñò, nga ch'o tjin kjoa xi nchis'ín.

²⁰ Ngats'ii xita xi ch'o s'ín, majtikeè kjoahiseèn; mikiì ya síchrañat'aà ñánda iseèn choòn, mé-ne nga mikiì jcha-la kjoa xi ch'o nchis'ín.

²¹ Tanga jña xita xi kjoa kixi nchis'ín, nchrobá kinchat'aà chraña-la ñánda iseèn choòn, mé-ne nga jcha-la nga ndaà tjin kjoa xi nchis'ín koni s'ín mejèn-la Nainá.

Jè Juan, j'ii itjòn-la Cristo

²² Nga jye komà kjoa koi, Jesús kiiko xita xi kota'yàt'aà-la ján nangui Judea; yaá tsibìtsajna chiba nachrjein nga kis'iin bautizar xita.

²³ Juan tikoá kis'iin bautizar xita ya naxandá Enón, jngoò i'nde xi chrañat'aà-la ya naxandá Salim, koií kjoa-la i'nde jè tjin jchán nandá. Jña xita, yaá ijchòkon Juan nga komà bautizar.

²⁴ Nachrjein koi, tikj'eè ndayá fis'en Juan.

²⁵ Jña xita xi kota'yàt'aà-la Juan kò jngoò xita judío tsohótiya-ne kjotíxoma-la xita judío xi xkón tjin kós'ín matsjeèya-ne xita.

26 Kiì jñà x̄ita ñánda tíjna Juan, kitsò-la:

—Maestro, jè x̄ita xi ijchòkoji ján xijngoaà xajngá nandá Jordán, jè x̄ita xi ji kits'ìi 'én it'aà ts'e, i'ndeji t̄ikoa tís'in bautizar; saá jé fitjingui-la ngats'ìi x̄ita.

27 Kiichja Juan, kitsò:

—Nimé xi s'e-la x̄ita tsà mì jè sobà Nainá tsjá-la.

28 Jñò, ndaà tíjìn-nò koni s'in kixan-nò nga mìtsà 'an xi Cristo; 'an-ná xi kinikasén ítjòn-na it'aà ts'e x̄ita jè.

29 Jè x̄ita x'in xi sa kòbixan, tíjna chjoón-la; jè amigo-la xi kòbixan síjnat'aà chraña-la nga tí'nchré-la koni s'in tíchja. Tsja jchán ma-la k'e nga 'nchré-la x̄ita xi sa kòbixan. 'An, k'oaá t̄is'in matsja-na k'e nga 'nchré koni s'in tís'in x̄ita jè.

30 X̄ita jè, mochjeén-né nga k̄atasijna ítjòn. 'An, kósijna t̄jingui-ná.

Mé 'én xi tsjá jè xi ngajmii nchrobá-ne

31 'Jè xi nchrobá-ne ngajmii, jè tíjna ítjòn-la ngats'ìi x̄ita. Jè xi i isò'nde ts'e, x̄ita isò'nde-né, k̄o jñà 'én xi chja kjoa ts'e isò'nde-né. Tanga jè xi ngajmii nchrobá-ne, jè tíjna ítjòn-la n̄ita yá-ne.

32 Jè tsjá 'én mé xi kijtseè k̄o mé xi kiì'nchré. Tanga 'én xi tsjá, n̄iyá xi mokjeiín-la koni s'in tsò.

33 Tanga jè x̄ita xi mokjeiín-la 'én xi chja, jè tsjá 'én nga Nainá, ngui 'én kixíi xi chja.

34 X̄ita xi Nainá kisikasén, 'én-la Nainá chja, nga mìkiì fehet'aà koni s'in síxájin in̄ima-la jè nga'ño xi t̄jín-la In̄ima Tsjeè-la Nainá.

35 Na'èn-ná tsjakeé Ki'ndí-la; jè kisingsja yije n̄ita mé kjoa-ne.

36 Jè xi mokjeiín-la koni tsò 'én xi chja Ki'ndí-la Nainá, t̄jín-la kjoabinachon n̄ita kjé-ne. K̄o jè xi mìkiì mokjeiín-la mìkiì kíjnakon in̄ima-la; k̄o'in s̄inè-la xi kjojt̄i-la Nainá.

4

Kó komà k'e nga jè Jesús tsohóko jngoò chjoón samaritana

1 Jesús, kis'enojmí-la nga jñà x̄ita fariseo kitsò: Jesús isaá kjín x̄ita tís'in bautizar mé-ne nga ya skóta'yàt'aà-la mì k'oa-ne Juan.

2 (Tanga Jesús mìtsà x̄ita kis'iin bautizar; tà jñà x̄ita xi kota'yàt'aà-la xi kis'iin bautizar.)

3 K'oaá komà-ne itjoiin-ne nangui Judea; kiì ijngoò k'a-ne nangui Galilea.

4 K'e nga kiì-ne, k̄o'ño t̄jín-ne nga ya kjoahato Samaria.

5 Ijchò jngoò naxandá xi 'mì Sicar, nangui xi chja-ne Samaria, ya chrañat'aà-la nangui xi kitsjaà k̄otjò-la k̄otseé Jacob jè ki'ndí-la xi José ki'mì.

6 Yaá tíjna jngoò ngajo nandá xi nei-la komà Jacob. Jesús jye 'ño ijta-la nga tsó'baya ndiyá. Tsibijnat'aà jè ngajo nandá nga jyeé kjomeé bijchó nchisen.

7-8 Jñà x̄ita xi kota'yàt'aà-la Jesús, tsojmií kiì katse ján ijjin naxandá, jñà tsojmì xi skine. K'ée ijchò jngoò chjoón xi ya i'nde-la Samaria xi ijchòkjaá nandá. Jesús kitsò-la:

—Tjiì itsé-ná nandá xi skiaa.

9 Jñà x̄ita judío mìkiì ndaà fik̄o x̄ita Samaria. Koií kjoa-la, jè chjoón kitsò:

—Ngaji x̄ita judío-né, k̄o 'an chjoón Samaria-ná. ¿Mé-ne nandá n̄jé-ná?

10 Kiichja Jesús kitsò-la:

—Tsà 'ya-lè k̄otjò xi tsjá Nainá k̄o tsà yaxkoin yá-né xi t̄isjé-lè nandá, tsà ji sijé-la nandá, jè tsjá-lè nandá xi síkijnakon-ná.

11 Jè chjoón kitsò:

—Na'èn, n̄imé kich'ì xi koma kinachrje-ne nandá. Jè ngajo nandá 'ño nanga. Ñánda t̄jín-lè nandá xi síkijnakon-ná.

12 Ngaji, ¿a isaá tíjna ítjòn-la x̄ita jchínga-najen Jacob? Jè kitsjaà-najen jè ngajo nandá jè. Jñà x̄ita jchínga-najen, íi kits'ìi nandá, ixti-la k̄o cho t̄jè-la.

13 Kiichja Jesús kitsò-la:

—Nìtá yá-ne xi skoí nandá xi ì tìbitjo, koxíndá ìjngòò k'a-là.

¹⁴ Tànga jè xìtá xi skoí nandá xi 'an tsjaà-là, mì tì kii koxíndá-là nìtá kjé-ne. K'oaá s'ín s'e jjiin inìma-là koni jngòò ngajo nandá xi tìbitjo nga jè nandá sùikíjnakon-ne nìtá kjé-ne.

¹⁵ Jè chjoón kitsò:

—Na'èn, tjiì-ná jè nandá xi kò'mì-là mé-ne nga mì tì kii koxíndá-na tìkoá mì tì íí kjoikjaá-na nandá.

¹⁶ Jesús kitsò-là:

—Tìnókjoa-là x'in-lè, nchrobákoji ijndé.

¹⁷ Kùichja jè chjoón kitsò:

—Tsjìn-na x'in.

Jesús kitsò-là:

—Okixíí xi si nga tsjìn-lè x'in.

¹⁸ Jyeé kò 'òn ma x'in-lè xi bijnakoii. Jè xìtá xi tijnakoii ì'ndeì, mìtsà x'in-lè ma. Okixíí xi kasi nga tsjìn-lè x'in.

¹⁹ Jè chjoón k'e nga kii'nchré 'én koi kitsò:

—Na'èn, k'oaá s'ín machiya-na nga jii-là xìtá xi chja ngajo-là Nainá.

²⁰ Xìtá jchínga-najen xi Samaria tsajen, íi nindoò jè kijtseèxkón Nainá. Tànga jñò xi xìtá judío 'mì-nò bixón-nó nga tà ján Jerusalén jchaxkoán Nainá.

²¹ Jesús kitsò-là:

—Ngaji chjoón, kàtakjeín-lè, jyeé nchrobá machraña nàchrjein nga jchaxkón Nainá nas'ín mì ì kjinchrobà nindoò jè kò nì ján onguió Jerusalén.

²² Jñò, xi Samaria tsajòn, mìkii 'ya yá-né xi yaxkón; tanga ngajen xi xìtá judío 'mì-najen, 'ya-najen yá xi yaxkón-jen; nga tje-là xìtá judío kítjokàjiin jngòò xi kochrjekàjiin kjo'in xìtá.

²³ Jyeé nchrobá nàchrjein, kò tijè-ne hora jè, k'e nga jñà xìtá xi ngui kixi kjoa nga beèxkón Nainá, kàteèxkón nga kò inìma-là kò kjoa kixi. Tìkoá jè Na'èn-ná ótsji-né xìtá xi k'oaá s'ín mejèn-là nga skoèxkón.

²⁴ Nainá Inìma Tsjeè-né. Jè xìtá xi beèxkón, mochjeén-né nga ngui kò kjoa kixi kò ngui kò inìma-là kàteèxkón.

²⁵ Jè chjoón, k'eé kitsò:

—'An, be-ná nga sa kjoíí jè Mesías [xi xó sùikasén-ne Nainá] jè xi Cristo tsòya-ne; k'e nga jè xi kjoíí kèènojmi yije-najen kjoa koi.

²⁶ Jesús kitsò-là:

—'An-ná, jè xi tìhókò-lè.

²⁷ Tijè-ne hora j'ii-ne xìtá xi kota'yàt'aà-là xi kii katse tsojmì. Ta k'oaá komà-là nga kijtseè nga chjoón tíhókò. Tànga nijngòò xìtá xi kitsò ikon nga kiskònangui-là mé xi tíkjònangui-là, o mé 'én xi nchijoó.

²⁸ Jè chjoón, k'eé kisikíjna nisa nandá-là; kii ján ijjiin naxandá nga tsibénojmi yije-là xìtá; kitsò-là:

²⁹ —Nchrobá, chítsejèn-là jngòò xìtá xi k'oa kàtsò yije-na kjoa xi kis'iaàn. Tsà jè-né xi Cristo [xi xó kisikasén-ne Nainá].

³⁰ K'eé kii jñà xìtá naxandá nga kii katsejèn-là ñánda tíjna Jesús.

³¹ Tík'e-ne jñà xìtá xi kota'yàt'aà-là Jesús, tsibítsi'ba-là, kitsò-là:

—Maestro, tichi.

³² Tànga Jesús kitsò:

—'An, tjín-na tsojmì xi kókjeen, xi jñò mìkii yaxkon.

³³ Jñà xìtá xi kota'yàt'aà-là kitsò-là xíkíjín:

—¿Yá xi kòf'ìlko-là tsojmì xi skine?

³⁴ Tànga Jesús kitsò:

—Jñà tsojmì xi kínee, jè-né nga sikitasoàn koni s'ín mejèn-là jè xi kisikasén-na kò nga sikjehet'aà xá-la.

³⁵ Jñò, bixón-nó nga nguì ñijòn sá chija-là nga sincháxkó tsojmì xi jye tímajchá. 'An, k'oaá xan-nò: Chítsejèn-là xità koi; k'oaá ngaya-là koni tsojmì tjè xi jye kòjchá; jyeé koma sincháxkó.

³⁶ Jè xità xi bíxkó, machjí-là, kò jñà tsojmì xi bincháxkó, k'oaá ngaya-là koni xità xi s'e-là kjoabinachon, mé-ne nga jè xi bítje kò xi bincháxkó ngásòn s'e-là kjotsja.

³⁷ 'Én kixi-né xi tsò: “Kj'eíj xità xi bítje koa kj'eíj xi bíxkó.”

³⁸ 'An, kisikasén-nò nga kìncháxkó tsojmì xi mìtsà jñò kisengui-nò kjo'in. Kj'eíj xi kisixá. Tanga jñò tíhokò-nò nga bíxkó tsojmì tjè-là.

³⁹ Kjìn jchán xità Samaria xi ya títsajna naxandá jè kòkjeín-là it'aà ts'e Jesús koni kitsò 'én xi kitsjaà jè chjoón nga kitsò: “K'oaá kàtsò yije-na kjoa xi kis'iaàn.”

⁴⁰ K'e nga jñà xità Samaria ijchòkon Jesús ñánda tíjna, tsibítisi'ba-là nga ya kàtijnako. Jesús, jò nàchrjein tsibìjnako.

⁴¹ Kjìn xità kòkjeín isa-là it'aà ts'e Jesús, k'e nga kiì'nchré-là 'én xi jè sobà tsibénojímí.

⁴² Jñà xità kitsò-là jè chjoón:

—I'ndeì mokjeín-najen; mìtsà tà koi kjoa-là koni s'ín ki'mì-nájen. Ngajen sobà kina'yà-lajen; k'oaá s'ín ma-ne nga mokjeín-najen. Kixíj kjoa, jè xi kòchrjekàjìin kjo'in kjoa ts'e jé-là xità isò'nde, jè-né xi Cristo [xi xó kisikasén-ne Nainá].

K'e nga jè Jesús kisindaà jngoò-ne ti xi chì'nda-là xitàxá ítjòn.

⁴³ Xi jye komà jò nàchrjein nga tsibìjna Samaria, Jesús, itjòjìin ìjngoò k'a-ne j'nde jè. Kii ìjngoò k'a-ne nangui Galilea.

⁴⁴ Jè sobà Jesús kitsò: Nijngoò xità xi chja ngajo-là Nainá yaxkón nangui-la.

⁴⁵ K'e nga ijchò ya Galilea, jñà xità xi ya i'nde-là, ndaà kiskoétjò, nga jyeé kijtseè jñà kjoa xi kis'iin ján Jerusalén k'e nga itjo s'eí Paxkò. Jñà xità koi tìkooá kii-ne k'e nga itjo s'eí.

⁴⁶ Jesús ijchò ìjngoò k'a ján Caná, nangui xi chja-ne Galilea, ñánda kisikjatjìya-là nandá nga vino kis'iin. Ya naxandá Capernaum tíjna jngoò chì'nda-là xitàxá ítjòn xi tìkooá xá 'nga tjín-la. 'Nó xk'én ki'ndí-la.

⁴⁷ Xità jè k'e nga kiì'nchré nga Jesús ya ijchò Galilea nga inchrobà-ne Judea, kiìkon, tsibítisi'ba-là nga kàtjì ni'ya-là, kàtasindaà-ne ki'ndí-la xi jyeé kjomeè biyaà.

⁴⁸ Jesús kitsò-là:

—Jñò, mìkii mokjeín-nò k'e nga tsà mìkii jchaa kjòxkón kò kjoa xi okó kjoa jeya-la Nainá.

⁴⁹ Jè xità chì'nda ítjòn kitsò-là Jesús:

—Nà'èn, t'iin kjondaà, nìton nchroboí nga tìkj'eè biyaà ki'ndí-na.

⁵⁰ Jesús kitsò-là:

—T'in-ne ni'ya-lè. Ki'ndí-lè jyeé ndaà tíjna-ne.

Xità jè kòkjeín-là 'én xi kitsò-là Jesús. Ikjoàn kii-ne ni'ya-là.

⁵¹ K'e nga jye kjomeè bijchó-ne ni'ya-là, xità chì'nda-là kiikjaá indiaà, kitsò-là:

—Ki'ndí-lè jyeé ndaà tíjna-ne.

⁵² Xità jè, kiskònangui-là chì'nda-là:

—¿Mé hora kjòxan-là ch'in 'ndi xi tjín-la?

Kitsò xità chì'nda-là:

—Ngojña xi jngoò-là kjondaà-ne.

⁵³ Jè nà'èn-là ti xi xk'én, kisijìin-là nga tìjè-ne hora k'e nga kitsò-là Jesús: “Ki'ndí-lè jyeé ndaà tíjna-ne.” Xità jè kò ngats'iì xità xi títsajna ni'ya-là, jyeé ndaà tíjingoò ikon nga mokjeín-là it'aà ts'e Jesús.

⁵⁴ Jè xi ma-ne jò kjòxkón xi kis'iin Jesús k'e nga inchrobà-ne Judea nga j'iì-ne ya Galilea.

5

Kó kitsò xita k'e nga Jesús kisindaà jngoò-ne xita xi mikì ma fi jè nachrjein nikjáya

¹ K'e nga jye k'oas'ín komà kjoa koi, nga komà iskan, jña xita judío tsibíjna jngoò s'eí ján Jerusalén. Jesús kiì jngoò k'a ján Jerusalén.

² Ya Jerusalén tíjna jngoò chrjó nandá xi 'mì Betesda nga 'én hebreo. 'Òn ma nguitjoa xi tjín-la. Yaá tíjna chrañat'aà-la xotjoa ts'e orrè.

³ Ya nguitjoa-la kjìn xita xk'én kjiyijongui: xi mikì tsejèn-la, xi tsá'yá kjoàn, xi mikì ma síkjaníyá. Ngats'iì xita koi nchikoña-la k'e nga síjtíya-la nandá xi 'ncha jè chrjó.

⁴ Jngoò àkjale-la Nainá xi tà kjé tà kjé bitjojen-ne nga síjtíya-la nandá. Jè xita xk'én xi fahas'en-jìin ítjòn nandá, k'e nga jye jtíya-la, nitoón mandaà-ne nita mé ch'in xi tjín-la.

⁵ Ya kijnajìin jngoò xita xi jye tjín-la kaàn chrj'oòn jàn nó nga xk'én.

⁶ Jesús, k'e nga kijtseèxkon nga ya kijna, kisijìin-la nga jyeé 'ñó kjòtseé xk'én. Kitsò-la: —¿A mejèn-lè kondaà-ne?

⁷ Jè xita xk'én, kitsò:

—Na'èn, mì yá xi síchját'aà-na nga kinís'en-jìin-na k'e jtíya-la nandá. 'An, k'e nga mejèn-na fahas'en-jña, kj'eí xita síkijne-na nga fahas'en-jìin ítjòn.

⁸ Jesús kitsò-la:

—Tisítjìin, chjoí nijñaà-lè, títjámì.

⁹ Xita jè nitoón kjòndaà-ne, kiskoé-ne nijñaà-la, komà tsajmeè-ne. Nachrjein jè, nachrjein nikjáya-né.

¹⁰ Jña xita judío kitsò-la jè xita xi kjòndaà-ne:

—Nachrjein i'ndeì, nachrjein nikjáya-né. Mikì tjí'nde-lè nga kíkoiì nijñaà-lè.

¹¹ Xita jè kitsò:

—Jè xita xi kàsindaà-na, jè sobà xi kòkàtsò-na: “Chjoí nijñaà-lè, títjámì.”

¹² Jña xita koi kiskònangui-la, kitsò-la:

—¿Yá-né xi okàtsò-lè: “Chjoí nijñaà-lè, títjámì”?

¹³ Jè xita xi jyeé kjòndaà-ne mikì beèxkon yá xita-ne xi kisindaà-ne nga jè Jesús jyeé xìn kiì nga ítjokàjìin-la xita xi kjìn ma-ne xi ya títsajna.

¹⁴ Xi komà iskan, Jesús kisatìikjoè jngoò k'a xita jè ya iya ingo, kitsò-la:

—Jyeé kòmandaà-ne; tanga kì tì jé binchaàtsji-ne, mé-ne nga mì isa ch'o tjín kjoa xi komat'in.

¹⁵ Xita jè kiìkon jña xita judío, tsibénojmi-la nga jè Jesús xi kisindaà-ne.

¹⁶ Jña xita judío kiitjingui kondra-la Jesús, mejèn-la sìik'en koiì kjoa-la nga k'oas'ín s'ín k'e nga nachrjein nikjáya.

¹⁷ Tanga Jesús kitsò-la:

—Na'èn-na skanda nachrjein i'ndeì k'oaá tjín xá xi tís'ín, tìkooá 'an k'oaá tís'ín tís'iaàn.

¹⁸ K'oaá ma-ne jña xita judío isaá 'ñó ndaà kiitjingui kondra-la Jesús nga mejèn-la sìik'en. Mìtsà tà koiì kjoa-la nga mikì beèxkón nachrjein nikjáya, tìkooá koiì-né nga jè Jesús Na'èn-na tsò-la Nainá. K'oaá s'ín tísingàsòn-kjoè yijo-la koni Nainá nga k'oa tsò.

¹⁹ Jesús kitsò-la:

—Xi nguì okixi xi xan-nò, 'an xi Ki'ndí-la Nainá nì mé kjoa xi s'iaàn xi tà kjohítsjeèn ts'an. Tà koiì kjoa s'iaàn xi be koni s'ín Na'èn-na. Ngats'iì kjoa xi s'ín Na'èn-na, 'an xi Ki'ndí ma, k'oaá tís'ín s'iaàn.

²⁰ Jè xi Na'èn-na ma, 'ñó tsjakeè-na nga Ki'ndí-la tsò-na; okó yije-na mé xi s'iaàn. Kokò-isa-na kjoa xi isa 'ñó xkón tjín, mé-ne jñò, k'e nga jchaa, isa 'ñó ndaà koxkón-nò.

²¹ Koni s'ín s'ín Nainá nga síkjaáya-la mik'en kò síkítsajnakon inima-la nita kjé-ne, 'an xi Ki'ndí-la ma, k'oaá tís'ín tsjaà-la kjoabinachon yá-né xi mejèn-na nga tsjaà-la.

²² Jè xi Na'èn-na ma, mìtsà jè bíndaàjìin-la xita, 'an-ná xi Ki'ndí-la ma kisìngatsja yije-na kjotíxoma nga koma kìndaàjìin-la xita,

²³ mé-nè ngats'ì xità skoexkón-na nga Ki'ndí-là ma koni s'ín beèxkón Nà'èn-na. Jè xi mìkiì beèxkón-na nga Ki'ndí-là ma, tìkoáà mìkiì beèxkón Nà'èn-na nga jè kisikasén-na.

²⁴ 'Xi ngui òkixì, k'oaá xan-nò: Jè xi 'nchré 'én-na koni s'ín chjà, tìkoá mokjeiín-là ìt'aà ts'e xi kisikasén-na, tjin-là kjoabinachon nità kjé-ne. Mìtsà kjo'in sinè-là, jyeé itjokàjìin kjo'in ts'e kjoa biyaà, jyeé tijnakon inìma-là ìt'aà ts'e Nainá.

²⁵ Xi ngui òkixì xi xan-nò: Nchrobá nàchrjein, tije-ne hora jè, k'e nga jña mik'en kji'nchré jta-na xi Ki'ndí-là Nainá ma; jña xi kji'nchré jta-na, kítsajnakon-né.

²⁶ Jè Nà'èn-na, tije-ne xi kjoabinachon; kò 'an xi Ki'ndí-là ma, k'oaá tìs'ín kitsjaà-na nga tì'an-na xi kjoabinachon.

²⁷ Tìkoáà kitsjaà-na kjo'tíxoma nga 'an kìndaàjìin-là xità, nga 'an-ná xi Ki'ndí-là Xità xan-là yijo-na.

²⁸ Kì maxkón-nò 'én koi, kijchò nàchrjein k'e nga ngats'ì xità xi tìtsajnak'en ján ínchíbá mik'en kji'nchré-là jta-na.

²⁹ Kosítjen ìjngòò k'a-ne ya ngajo mik'en. Jña xità xi ndaà kis'iin, kjoaáya-là nga s'e-la kjoabinachon, tanga jña xità xi ch'o kis'iin, kjoaáya-là nga s'e-la kjo'in.

Yá xi tsjá 'én ìt'aà ts'e Jesús

³⁰ Jesús kitsò:

—'An, nì mé xi s'iaàn xi tà kjohítsjeèn ts'an. K'oaá s'ín bìndaàjñaà koni s'ín tsò-na Nà'èn-na. Kixì bìndaàjñaà; mìtsà k'oas'ín s'iaàn koni s'ín mejèn-na. K'oaá s'ín s'iaàn koni s'ín mejèn-là Nà'èn-na xi kisikasén-na.

³¹ Tsà tì'an tsjaà-na 'én xi ìt'aà ts'an, 'én xi tsjaà, jño kixón-nò: “Nì mé chjí-là.”

³² Tanga tjin jngòò xi k'ejì xi tsjá 'én xi ìt'aà ts'an, be-ná nga jè 'én xi tsjá ìt'aà ts'an, ngui 'én kixì-né.

³³ Jño kinikasén-là xità Juan nga kiskòngui-là. Jè Juan, kitsjaà kixì 'én xi ìt'aà ts'an.

³⁴ Mìtsà kjo'ño tjinè-là nga k'ejì xità tsjá 'én xi ìt'aà ts'an, koi k'oa xan-nò mé-ne nga kítjokàjñoò kjo'in kjoa ts'e jé.

³⁵ Juan k'oas'ín ngaya-là koni jngòò nì'in xi tìtì nga síhiseèn, tanga jño tà chiba nàchrjein kinìtsjakoo kjoa iseèn-là.

³⁶ Jè xá xi tìs'iaàn, isa 'ño ts'e chjí-là mì k'oa-ne koni 'én xi kitsjaà Juan, nga jè Nà'èn-na kitsjaà-na nga sikitasoàn; tije-ne xá xi tìs'iaàn okó ìt'aà ts'an nga kixì kjoa nga jè Nà'èn-na kisikasén-na.

³⁷ Jè Nà'èn-na xi kisikasén-na, tsjá 'én xi ìt'aà ts'an. Jño, k'jeè kù na'yà-là jta-là, nì mìkiì yaxkon kó kji isén-là;

³⁸ tìkoáà jè 'én-là mìkiì fahas'en-jìin inìma-nò. Jè xi Nainá kisikasén, mìkiì mokjeiín-nò ìt'aà ts'e.

³⁹ Ndaà binchaàtsjijñoò Xojon-là Nainá nga k'oas'ín nìkìtsjeèn nga ya sakó-nò kjoabinachon nità kjé-né. Jè Xojon-là Nainá, tsjá 'én xi ìt'aà ts'an,

⁴⁰ tanga jño, mìkiì sasén-nò nga nchrobátjngui-ná, mé-ne nga s'e-nò kjoabinachon koi.

⁴¹ Mìtsà koi kjoa otsjià nga jeya sijkìjna-na xità.

⁴² Tanga 'an, beèxkoòn-nò, nga jño, mìkiì matsjacha Nainá nga kò inìma-nò.

⁴³ 'An, ìt'aà ts'e Nà'èn-na j'i-na; jño majin-nò nga chjoétjò-ná. Tanga tsà k'ejì xità kjoí xi ta kjotsja ts'e kjoí-ne, isaá-là nìton chjoétjò.

⁴⁴ Jño, ¿kòs'ín koma kòkjeiín-nò? Nga tà jè binchaàtsjioò nga ndaà kìtsajnaà nga nguixkon xità, kò mìtsà jè binchaàtsjioò nga ndaà kìtsajnaà nga nguixkon Nainá xi tà jngòò ma.

⁴⁵ Kì k'oa s'ín nìkìtsjeèn nga 'an tsjat'in-nò 'én nga nguixkon Nà'èn-na. Jè xi tsját'in-nò 'én, tije-ne Moisés xi jè ma'ñót'aà takòn.

⁴⁶ Jño, tsà mokjeiín-nò koni s'ín kiskì Moisés, tìkoáà kòkjeiín-nò ìt'aà ts'an nga jè Moisés ìt'aà ts'aán kùchja nga kiskì.

47 Tsà mìkì mokjeiín-nò koni s'ín kiskì Moisés, ¿kós'ín kòkjeiín-nò 'én-na xi benojmí-nò?

6

Kó kis'iin Jesús nga 'òn jmiì xita kisikjèn

(Mateo 14:13-21; Marcos 6:30-44; Lucas 9:10-17)

1 Nga jye komà kjoa koi, Jesús kii ján xijngoaà ndáchikon Galilea, xi tikoá Tiberias 'mì.

2 'Nó kjìn xita kiitjingui-la nga jye kijtseè kjoxkón ndaà xi s'ín nga síndaà-ne xita xk'én.

3 Jesús k'eé kiimijìn-jno jngoò nindoò, yaá tsibìjna kò xita xi kota'yàt'aà-la.

4 Jyeé tímachraña s'eí Paxkò ts'e xita judío.

5 Jesús, k'e nga kiskoòtsejèn, kijtseè nga 'nó kjìn ma xita tjíma tjingui-la, kitsò-la Felipe:

—¿Nánda kindá-lá tsojmì xi kòkjen xita koi?

6 Tà k'oaá kitsò-la, tà jè xi mejèn-la nga skoe kó kitsò Felipe. Jesús, jyeé tíjìn-la mé kjoa xi s'iin.

7 Felipe kitsò:

—Nas'ín jò-la sìndo nàchrjein tjín-ne chjí-la xita, mì-la kii kichìya-la nga itsé itsé skine ngats'ì xita koi.

8 Kiichja Andrés xi tikoá xita xi ya kota'yàt'aà-la Jesús xi 'ndsè ma Simón Pedro, kitsò:

9 —I tíjna jngoò ti xi 'ya 'òn inchrájin ts'e cebada kò jò ma tìn xi 'ya, tanga mì-la kii kichìya-la nga 'nó kjìn ma-ne xita.

10 Jesús kitsò-la:

—Kot'in-la jña xita, kàtsajna yije.

I'nde jè 'nó tjín xka ijña. Jña xita xi tsibìtsajna, ma-la tsà 'òn jmiì xi nguì xita x'in.

11 Jesús, kiskoé inchrájin, kitsjaà-la kjondaà Nainá, ikjoàn kitsjaà-la jña xita-la. K'eé kisika'bí-la jña xita xi títsajna. K'oa tís'ín kisikò jña tìn, kiskine nita kó kji mejèn-la nga jngoò ìjngoò.

12 K'e nga jye kjòskii yije xita, Jesús kitsò-la jña xita xi kota'yàt'aà-la:

—Tíxkó yije-nò xi kaningui-ne, mé-ne nga mì kits'ón-ne.

13 Jña xita-la tsibíxkó-ne inchrájin xi tsiningui-ne. Nguì tejò nisiyá komà, k'e nga jye tsakjèn yije xita.

14 Jña xita, k'e nga jye kijtseè kjoxkón ndaà xi kis'iin Jesús, kitsò-la xíkjin:

—Kixií-la kjoa, jè-la xita jè xi chja ngajo-la Nainá, xi tjínè-la nga kjoí i isò'nde.

15 Tanga Jesús, tik'eé kijtseèya-la nga jña xita mejèn-la kjo'nó kiikò nga xitaxá ítjòn síkijna; ìjngoò k'a kiimijìn-jno nindoò nga tà tajngoò tsibìjna.

K'e nga tsajmeèsòn ndáchikon Jesús

(Mateo 14:22-27; Marcos 6:45-52)

16 K'e nga jye kòjñò, xita xi kota'yàt'aà-la Jesús inchròhòjen ìjngoò k'a-ne nánda kijna ndáchikon.

17 Jahas'en jngoò chitso, kièsòn-ndá nga kii ján naxandá Capernaum. Jyeé 'nó kòjñò, Jesús mìkì xátì j'ì tjingui-la jña xita-la.

18 Ya ijìn ndáchikon j'ì jngoò tjoxkón xi 'nó jchán ts'a. Jè ndáchikon tsibìts'ia nga kiskì'nga.

19 K'e nga jye tjín-la tsà 'òn kò tsà joòn jmiì metro nga tjímajìn nandá, kijtseè nga jè Jesús tsóbasòn ndáchikon. Tífi tjingui chraña-la jè chitso. Jña xita tà kitsakjòn-la.

20 K'eé kiichja Jesús, kitsò-la:

—Kì tsakjoòn-jèn, 'an-ná.

21 Jña xita tsjaá komà-la, k'eé kisikas'en chitso. Kò jè chitso nitoón ijchò ya naxandá nánda nchifi.

Mé xi kis'iin jña xita nga tsohótsji Jesús

²² Nga komà nchijòn, jñà xità xi tsibìtsajna ján xijngoà ndáchikon, kijtseè nga tà jngoò chitso kijna xi kiikò xità, tanga Jesús mìkiì tsejèn jahas'en ya chitso. Tà jñà xità xi kota'yàt'aà-là jahas'en nga kiì.

²³ Tanga ijchò chitso xi kj'eíí xi ya inchrobà-ne naxandá Tiberias; yaá chincha chraña i'nde ñánda tsakjèn inchrájin xità xi 'òn jmiì ma-ne, k'e nga jè Jesús kitsjaà-là kjondaà Nainá.

²⁴ Jñà xità, k'e nga kijtseè nga mì yá tjín Jesús kò xità xi kota'yàt'aà-là, k'eé jahas'en jñà chitso koi, kiì kátsji Jesús ján naxandá Capernaum.

Inchrájin xi tsjá Nainá, jè xi tsjá-là kjoabinachon xità

²⁵ Xità koi, k'e nga jye ijchò ján xijngoà ndáchikon, yaá kiskaajìn Jesús kitsò-là:

—Maestro, ¿mé naxrjein j'ii ijndé?

²⁶ Kiìchja Jesús, kitsò-là:

—Xi nguì okixi, k'oáá xan-nò, mìtsà koi xá binchaàtsji-ná nga ki'yaà kjoxkón-ndaà xi kis'iaàn, koií-né nga kisikjèn-nò skanda kó nga kjòskioò.

²⁷ Kì koi nixátjiò tsojmì xi fehet'aà. Jè tixátjiò tsojmì xi síkíjnakon inima-ná nità kjé-né, jè xi 'an tsjá xi Kì'ndí-là Xità xan-là yijo-na. Nà'èn-ná xi Nainá jè kitsjaà-na kjotíxoma kjoa xi s'iaàn.

²⁸ Xità koi, kiskònangui, kitsò-là Jesús:

—¿Mé xi s'en-jen nga koma sixá-lajen Nainá koni s'ín mejèn-là jè?

²⁹ Jesús kitsò-là:

—Xá-là Nainá, jè-né nga kòkjeiín-nò it'aà ts'e xi Nainá kisikasén.

³⁰ Xità koi, kitsò-là Jesús:

—¿Mé kjoxkón ndaà xi kòkó-nájen mé-ne k'e nga jcha-jen kòkjeiín-najen? ¿Mé xi ma-lè 'nì?

³¹ Jñà xità jchínga kjìn-najen tsakjèn inchrájin xi 'mì maná, ján i'nde it'aà xìn ñánda nangui kixì choòn. Koni s'ín tjít'aà Xojon-là Nainá nga tsò: “Inchrájin xi nchrobá-ne ngajmiì kitsjaà-là nga kisikjèn.”

³² Kiìchja Jesús kitsò-là:

—Xi nguì okixi xi xan-nò, mìtsà jè Moisés kitsjaà-nò inchrájin xi ngajmiì inchrobà-ne; jè Nà'èn-na xi tsjá-nò xi nguì inchrájin xi ngajmiì nchrobá-ne.

³³ Inchrájin xi tsjá Nainá, jè xi jye itjojen-ne ngajmiì, jè xi tsjá-là kjoabinachon jñà xità isò'nde.

³⁴ Xità koi kitsò:

—Nà'èn, kjit'aà naxrjein tjii-nájen inchrájin koi.

³⁵ Jesús, kitsò-là:

—'An-ná inchrájin xi síkíjnakon inima-là xità. Jè xi 'an kjinchrobát'aà-na, mì tì kiì kohijò-là. Jè xi kòkjeiín-là it'aà ts'an, mì tì kiì koxínda-là nità kjé-ne.

³⁶ Jyeé okixan-nò, jñò nas'ín títsa'yaà-ná mìkiì mokjeiín-nò.

³⁷ Ngats'ii xità xi 'an tsjá-na Nà'èn-na, 'aán nchrobát'aà-na; kò jñà xi 'an nchrobát'aà-na mìkiì ochrjengua.

³⁸ 'An, mìtsà koi xá itjojen-na ngajmiì nga k'oas'ín s'iaàn koni s'ín mejèn-na. K'oáá s'ín síkitasoàn koni s'ín mejèn-là Nà'èn-na xi kisikasén-na.

³⁹ Jè xi mejèn-là Nà'èn-na xi kisikasén-na, nga nijngoò xità chija xi 'an tsjá-na. 'An siikjaáya-là it'aà ts'e kjoa biyaà k'e nga kjoehet'aà naxrjein.

⁴⁰ Koi xi mejèn-là jè xi kisikasén-na: ngats'ii xità xi skoexkon-na nga Kì'ndí-là Nainá 'mì-na kò kòkjeiín-là it'aà ts'an, s'eé-là kjoabinachon. 'An siikjaáya-là k'e nga kjoehet'aà naxrjein.

⁴¹ Jñà xità judío k'eé tsibíts'ia nga kiìchjajno-là Jesús, koií kjoa-là nga kitsò: “'An-ná inchrájin xi ngajmiì nchrobá-ne.”

⁴² Kitsò-là xíkjin:

—¿A mìtsà jè Jesús, xi ti-la ma José? Yaxkon-ná na'èn-la kò nea-la. ¿Mé-ne tsò-ne nga ngajmii itjojen-ne?

⁴³ K'eé kitsò Jesús:

—Kiì k'oas'ín nokjoàjno-ná.

⁴⁴ Nijngoò xitá xi koma kjinchrobàt'aà-na tsà mìtsà jè Na'èn-na xi kisikasén-na kjinchrobàkò, mé-ne nga 'an siikjaáya-la k'e nga kjoehet'aà nachrjein.

⁴⁵ Xitá xi kiichja ngajo-la Nainá, k'oaá tsò xojoñ xi kiskiì nga tsò: “Jè sobà Nainá kòkòya yije-la xitá.” K'oaá s'ín ma-ne nga ngats'iì xitá xi 'nchré-la Na'èn-na kò xi machiya-la it'aà ts'e, 'aán nchrobát'aà-na.

⁴⁶ Ni saá jngoò xitá xi beèxkon Na'èn-ná. Tajngoò jè beèxkon xi Nainá kisikasén.

⁴⁷ Xi nguì okixi xi xan-nò: Jè xi kòkjeiín-la it'aà ts'an s'eé-la kjoabinachon nita kjé-ne.

⁴⁸ An-ná inchrájin xi síkíjnakon inima-la xitá.

⁴⁹ Jñà xitá jchínga kjin-nò tsakjèn inchrájin xi 'mì maná ya i'nde it'aà xin ñánda nangui kixi choòn, tanga tákó k'en-né.

⁵⁰ Jè inchrájin xi k'oa xan-nò xi nchrobájen-ne ngajmii. Kò jè xi kòkjen inchrájin jè mikiì kiyá.

⁵¹ An-ná inchrájin xi tíjnakon xi itjojen-ne ngajmii. Tsà yá xi kòkjen inchrájin jè, s'eé-la kjoabinachon nita kjé-ne. Jè inchrájin xi 'an tsja, jè yijo-na. Koií k'oas'ín tsjaà-na nga 'an kiyátji-la xitá isò'nde mé-ne nga kítsajnakon-ne.

⁵² Jñà xitá judío xkì xi ján tsajoókò xíkjin, kitsò:

—¿Kós'ín s'iin nga siikine-ná yijo-la?

⁵³ Jesús kitsò-la:

—Nguì okixi xi xan-nò. Jñò, tsà mikiì chjinee yijo-na 'an xi Ki'ndí-la Xitá xan-la yijo-na, tikoá mikiì s'ioo jní-na, mikiì s'e-nò kjoabinachon.

⁵⁴ Jè xi skine yijo-na tikoá skoí jní-na tjín-la kjoabinachon nita kjé-ne. 'An siikjaáya-la k'e nga kjoehet'aà nachrjein.

⁵⁵ Yijo-na, jè xi kixi kjoá xi nguì yijo xi ma chine; koá jè jní-na jè nandá xi nguì kixi kjoá nga ma 'yò.

⁵⁶ Jè xi skine yijo-na koá skoí jní-na, kjit'aà nachrjein ya kíjnakò-na, tikoá 'an kjit'aà nachrjein ya tíjnakjoòkoáa.

⁵⁷ Na'èn-na xi kisikasén-na, tíjnakon-né; kò it'aà ts'e-né nga tíjnakòan; k'oaá tis'ín tjín jè xi skine yijo-na, it'aà ts'an kíjnakon-né.

⁵⁸ Jè inchrájin xi itjojen-ne ngajmii, mìtsà jè xíkjin inchrájin maná xi tsakjèn xitá jchínga kjin-nò; nga komà iskan, xitá xi tsakjèn, k'en-né. Tanga jè xi kòkjen inchrájin xi itjojen-ne ngajmii, s'eé-la kjoabinachon nita kjé-ne.

⁵⁹ Jesús k'oaá s'ín kiichja nga tsakóya ya ni'ya ingo sinagoga ya naxandá Capernaum.

'Én xi tsjá-la kjoabinachon inima-la xitá

⁶⁰ Jñà xitá k'e nga kiì'nchré koni s'ín tsakóya Jesús, kjín ma xitá xi kota'yàt'aà-la xi kitsò: —Jñà 'én koi, 'ñó 'in tjín. ¿Yá xi kòkjeiín-la?

⁶¹ Jesús, k'e nga kijtseèya-la nga jñà xitá xi kota'yàt'aà-la ch'o nchijoóya-ne 'én xi tsakóya, kitsò-la:

—¿'Én koi, a mì sasén-nò?

⁶² ¿Kós'ín koma-ne tsà jcha-ná 'an xi Ki'ndí-la Xitá xan-la yijo-na nga kjímijìn iñngoò k'a-na ñánda tíjnaa nga sa ítjòn?

⁶³ Jè Inima Tsjeè-la Nainá xi síkíjnakon-ná. Jè yijo-ná nímé chjí-la. 'Én xi 'an okóya-nò, ts'eé Inima Tsjeè-la Nainá, kò tsjá-la kjoabinachon inima-nò.

⁶⁴ Tanga jñò tjín i'nga xitá xinguióo xi mikiì mokjeiín-la.

Nga jè Jesús jye tíjin-la kóni skanda tàts'en-la kjoá yá-né xi mikiì kòkjeiín-la kò yá-né xi siingatsja it'aà ts'e xitá kondra-la.

⁶⁵ Jesús kitsò ìsà:

—Koií k'oas'ín kixan-nò nga nijngoò xità xi koma kjinchrobàt'aà-na tsà mìtsà jè Na'èn-na kjinchrobàko.

⁶⁶ Ikjoàn kjìn jchán xità xi kota'yàt'aà-la Jesús xi tjingui-la tsibíts'ia nga kiì-ne íts'in. Mì tì kiì ya chinchimako-ne.

⁶⁷ Jesús kitsò-la jñà xità-la xi tejò ma-ne:

—Jñò, ¿a tìkoaá mejèn-nò nga onguió?

⁶⁸ Kiìchja Simón Pedro, kitsò:

—Na'èn, ¿ya xi onguítjingui-lajen? Ji-né xi tjín-lè 'én xi tsjá kjoabinachon.

⁶⁹ Ngajen 'ya-nájen, tìkoaá mokjeín-najen nga ji-né xi Cristo, xi Ki'ndí-la Nainá xi tijnakon.

⁷⁰ Jesús kitsò-la:

—'An, xó k'oáá s'ín jaàjìn-nò nga tejò ma-nò, mé-ne nga kitjako-ná. Tanga jñò, yaá tijnajìn jngoò-nò xi xità neí tísíxájin inima-la.

⁷¹ Jesús, jè kiìchja it'aà ts'e Judas, ki'ndí-la Simón Iscariote. Nga jè sùngatsja Jesús it'aà ts'e xità kondra-la. Jè Judas, xi ya itjojìn xità-la Jesús xi tejò ma-ne.

7

Kó kitsò jñà 'ndse Jesús nga mìki kòkjeín-la it'aà ts'e

¹ K'e nga jye k'oas'ín komà kjoa koi, Jesús yaá tsajmeè nangui Galilea. Majìn-la nga ya kojmeè naxandá Judea, koií kjoa-la nga jñà xità judío nchihótsji nga mejèn-la siik'en.

² Jyeé nchrobá machraña s'eí-la xità judío ts'e Ni'ya Xka Ijñá.

³ Jñà 'ndse Jesús kitsò-la:

—Kì tã tsja jí bijni. T'in ján Judea mé-ne jñà xità xi kota'yàt'aà-lè xi títsajna ján kàteè-lè mé kjoa xi 'nì.

⁴ Tsà k'e mejèn-ná nga skoe-ná xità mé kjoa xi tí'né, mochjeén-né nga kòkó-lá yijo-ná. Ngaji, koni s'ín 'nì, takó-la yijo-lè ngats'ii xità isò'nde.

⁵ Koií okitsò-la jñà 'ndse nga mìki kòkjeín-la it'aà ts'e.

⁶ Jesús kitsò-la:

—Kj'eè kiì bijchó nàchrjein-na, tanga xi it'aà tsajòn ndaà tjín nità mé nàchrjein-ne.

⁷ Jñò, mìki majtikeè-nò jñà xità isò'nde, tanga 'an majtikeé-na, koií kjoa-la nga 'an benojmí kixi-la nga ch'o tjín kjoa xi s'ín.

⁸ Tanguió jñò jè s'eí, 'an mìki kjián. Kj'eè kiì bijchó nàchrjein-na.

⁹ K'e nga jye okitsò-la jñà xità, Jesús yaá tsibìjna ya nangui Galilea.

K'e nga jè Jesús kiì s'eí ts'e ni'ya xka

¹⁰ K'e nga jye kiì s'eí jñà 'ndse Jesús, jè, tìkoaá kiì 'ma-né. Majìn-la nga xità skoexkon.

¹¹ Ya ñánda tìbitjo s'eí, jñà xità judío nchihótsji Jesús, kitsò-la xíkjin:

—Xità jè, ñánda tìjna.

¹² Ngats'ii xità xi ijchò s'eí, xki xi ján tsajoóya-ne it'aà ts'e Jesús. Tjín xi kitsò: “Xità ndaà-né.” Tìkoaá tjín xi kitsò: “Majìn, naxandá konachan-la.”

¹³ Tanga niyá xi kiìchja tsejèn nga nguixkon xità xi kj'eí, nga jñà xità sko-la xità judío, tsakjón-la.

¹⁴ K'e nga jye ijchò osen nga tìbitjo s'eí, ijchò Jesús, jahas'en ingo ítjòn, ikjoàn tsakóya-la xità.

¹⁵ Jñà xità judío, k'e nga kijtseè koni s'ín okóya, tà kjòxkón-la kitsò-la xíkjin:

—Xità jè, ¿kós'ín ma-ne nga kò tà ndaà okóya-ne nga mìtsà xojòn kiskoòta'yà?

¹⁶ Jesús kitsò-la:

—Jñà 'én xi 'an okoòya, mìtsà 'én ts'an, ts'e-né jè xi kisikasén-na.

¹⁷ Tsà yá xi mejèn-la sikkitasòn koni s'ín mejèn-la Nainá, skoe-né jñà 'én xi 'an okoðya tsà it'aà ts'e Nainá nchrobá-ne, o xi tà kjohítsjeèn ts'an-ná.

¹⁸ Jngoò xita xi tà kjohítsjeèn ts'e tísikjeén nga tíchja, tà jè xi mejèn-la nga jè jchaxkón; tanga jè xita xi koií kjoa tíhótsji nga jè kátayaxkón jè xi kisikasén, jè-né xi ngui 'én kixi tsjá, mitsà 'én ndiso chja.

¹⁹ 'Jñò, ¿a mitsà kixi kjoa nga kitjoé-nò kjotíxoma-la Nainá xi jè Moisés kiskii? Tanga jñò, nijngoò xi ma-la sikkitasòn. ¿Mé-ne mejèn-nò nga sik'en-ná?

²⁰ Jñà xita kitsò:

—¿Neí-là tíjin inima-lè! ¿Yá-né xi mejèn-la sikk'en-lè?

²¹ Jesús kiichja kitsò-la:

—Jñò, maxkón-nò jngoò kjoa xi kis'iaàn jè nachrjein nìkjáya.

²² Kixií kjoa, jè Moisés kitsjaà-nò kjotíxoma xi kjoa ts'e circuncisión. (Tanga kjotíxoma jè, mitsà ts'e Moisés; it'aà ts'eé xita jchínga kjiin-nò inchrobà-ne.) Tanga jñò, nas'ín nachrjein nìkjáya bit'aà chibaá-la xita x'in kjoa ts'e circuncisión.

²³ Jñò, nga bit'aà chiba-la jñà xita kjoa ts'e circuncisión jè nachrjein nìkjáya nga majin-nò nijchaànguio kjotíxoma xi kitsjaà-nò Moisés, ¿mé-ne majti-nò nga 'an jngoò k'a ndaà sindaà-na xita jè nachrjein nìkjáya?

²⁴ Kì k'oaá s'ín jchósòn-là koni s'ín tsejèn-nò. K'oaá s'ín jchósòn-là koni s'ín tjín xi ngui kjoa kixi.

Kós'ín bénojmí Jesús ñánda j'ì-ne

²⁵ Tjín i'nga xita xi Jerusalén ts'e xi kitsò:

—¿A mitsà jè xita jè xi ótsji jñà xita judío nga mejèn-la sikk'en?

²⁶ Chítsejèn-là, tíchjajin osen-la jñà xita naxandá, niyá xi kó tsò-la. ¿A jyeé kòkjeiín-la jñà xitaxá nga kixi kjoa nga jè xi Cristo [xi xó Nainá kisikasén-ne]?

²⁷ Tanga jñá, 'ya-ná ñánda j'ì-ne xita jè, k'e nga kjoíí Cristo niyá xi skoe ñánda kjoíí-ne.

²⁸ Jesús nga tíhokóya ya nditsin ingo ítòn, kii'nchré koni s'ín kitsò jñà xita. K'eé 'ño kiichja kitsò:

—Jñò, yaxkoón-ná; tíjin-nò ñánda j'ì-na. Tanga mitsà tà kjotsja ts'an nga j'iaa. Jè xi kisikasén-na, jè-né xi ngui kixi kjoa nga Nainá. Jñò, mìkii yaxkon.

²⁹ Tanga 'an, bexkon-ná. It'aà ts'eé inchrobà-na nga jè sobà kisikasén-na.

³⁰ Tijè-ne hora jñà xita mejèn-la nga tsobà'ño Jesús tanga nijngoò xi kitsò ikon nga kitsobà'ño, koi-né nga kj'eé kì bijchó nachrjein-la nga kiyá.

³¹ 'Ñó kjin xita kòkjeiín-la koni kitsò Jesús. Kitsò-la xíkjin:

—K'e nga kjoíí Cristo, ¿a isa kjin kjoxxkón ndaà xi s'jin, koni jè xita jè? Kixií-là kjoa, jè-la xi Cristo.

Kó kitsò Jesús k'e nga jñà xita fariseo mejèn-la kitsobà'ño

³² Jñà xita fariseo kii'nchré koni s'ín nchijoó jñà xita it'aà ts'e Jesús. Xita sko-la no'mii ko xita fariseo kisikasén xita xi síkinda ingo nga mejèn-la tsobà'ño Jesús.

³³ Jesús kitsò-la:

—An, tà chibaá nachrjein kótijnako-nò, ikjoàn kjín ijngoò k'a-na ñánda tíjna xi kisikasén-na.

³⁴ Jñò, kinchátsji-ná tanga mìkii sakò-nò nga mìkii koma konguió ya ñánda kótijna.

³⁵ Jñà xita judío, tsibíts'ia nga kiskònangui-la xíkjin kitsò:

—Xita jè, ¿ñánda kjoí? ¿Mé-ne nga mìkii koma sakò-ná? ¿A yaá kjiko xita judío xinguiáá xi xìn i'nde títsajna nga jñà xi taxki xita kòkòya-la?

³⁶ ¿Kó tsòya-ne 'én xi bénojmí nga tsò: “Jñò, kinchátsji-ná tanga mìkii sakò-nò nga mìkii koma konguió ya ñánda kótijna”?

Jngoò xajngá nandá xi tijnakon

³⁷ Jè nachrjein xi fehet'aà-ne s'eí, Jesús tsasíjna kixi, 'ño kiichja, kitsò:

—Tsà yá xi xíndá-là kàtjanchrobákon-na, kàt'ì nandá.

³⁸ Koni s'ín tíchjǎ Xojon-là Nainá nga tsò: Jè xi mokjeiín-là it'aà ts'an sijnajiin inima-là koni jngoò xajngá nandá xi mikiì xìya xi síkijnakon xítǎ.

³⁹ K'e nga okítsò Jesús, it'aà ts'eé Inima Tsjeè-là Nainá kiichjǎ nga iskan tjoé-là jǎnà xítǎ xi kòkjeiín-là it'aà ts'e. Nachrjein jè, Inima Tsjeè-là Nainá kj'eé kiì bitjojen nga kj'eé kiì fì-ne ngajmì Jesús nga jchǎ-là kjoajeya-la.

Mé-ne kjòjòya-ne jǎnà xítǎ it'aà ts'e Jesús

⁴⁰ Jǎnà xítǎ, k'e nga kiì'nchré 'én koi, tjín i'nga xi kitsò:

—Kixíí kjoǎ xítǎ jè, jè-né xi tjínè-là nga kjoíí nga kichjǎ ngajo-là Nainá.

⁴¹ Jǎnà xítǎ xi i'nga kitsò:

—Jè-né xi Cristo [xi xó kisikasén-ne Nainá].

Tìkooáá tjín i'nga xi kitsò:

—Majìn-la nga jè Cristo, mìtsà nangui Galilea kjoíí-ne.

⁴² Xojon-là Nainá k'ooá s'ín tíchjǎ nga jè Cristo, yaá kjinchrobàt'aà-ne tje-là David, ya naxandá Belén, j'nde-là David.

⁴³ K'ooá s'ín komà-ne nga kjòjòya jǎnà xítǎ xi kjoǎ ts'e Jesús.

⁴⁴ Tjín i'nga xítǎ xi mejèn-là kitsobà'ño nga kjikò ndayá, tanga nijngoò xi kitsò ikon nga kitsobà'ño.

Kjoǎ xi tsohótiya-ne xítǎ ítjòn-là nò'miì

⁴⁵ Jǎnà xítǎ xi síkindǎ ingo, inchrobà-ne ñánda títsajna xítǎ fariseo kò xítǎ skò-là nò'miì, kitjǎnangui-là, ki'mì-là:

—¿Mé-ne mikiì kànchrobáko-nò?

⁴⁶ Jǎnà xítǎ xi síkindǎ ingo kitsò:

—Nì saá jngoò xítǎ xi k'oas'ín chjǎ koni s'ín chjǎ xítǎ jè.

⁴⁷ Jǎnà xítǎ fariseo, kitsò:

—Jǎnò, ¿a tìkooáá kachonachaán-nò?

⁴⁸ ¿A k'ooáá tìs'ín mokjeiín-là xítǎxá ítjòn tsaján kò xítǎ xinguiáá fariseo?

⁴⁹ Tanga jǎnà xítǎ xi tíchonachǎn-là nga mikiì tjíin-là kjotíxoma-là Moisés, tjínè-là nga kjo'in s'e-là.

⁵⁰ Nicodemo, jè xi xítǎ fariseo, xi jǎnò j'ìikon jngoò k'a Jesús, kitsò-là:

⁵¹ —Kjotíxoma tsaján, mikiì tsjá'nde nga kjo'in k'oi-là xítǎ, k'e nga tìkj'eé kiì ndaà 'ya-la mé kjoǎ xi tjín-là.

⁵² Jǎnà xítǎ fariseo, kitsò-là Nicodemo:

—¿A tìkooáá yaá nangui-lè Galilea? Chíta'yì Xojon-là Nainá mé-ne nga jchǎ-ne nì sà jngoò xítǎ xi chjǎ ngajo-là Nainá f'ì-ne Galilea.

Chjoón xi kjoǎ chijngui kis'ìn

⁵³ Tà k'oas'ín kitsjòya-ne xítǎ, xki xi ján kiì-ne ni'ya-là nga jngoò òjngoò.

8

¹ Tanga Jesús, ján kiì ya nindoò Yá Olivo.

² Nga komà nchijòn tajǎnòyaá j'ì-ne ya ingo ítjòn. Ngats'ì xítǎ j'ì tjingui-là Jesús ñánda tíjna. K'eé tsibìjna nga tsakóya-là jǎnà xítǎ.

³ Jǎnà xítǎ xi okóya kjotíxoma-là Nainá xi kiskì Moisés kò xítǎ fariseo ijchòko jngoò chjoón xi k'iat'in-là nga kjoǎ chijngui tís'ín. Tsasíjna osen ñánda títsajna ngats'ì xítǎ;

⁴ Jǎnà xítǎ koi kitsò-là Jesús:

—Maestro, chjoón jè, ndaà kà'yat'in-là nga kjoǎ chijngui tís'ín.

⁵ Jè kjotíxoma-là Moisés, k'ooá s'ín tíchjǎ nga jǎnà íchjín xi k'ooá tjín kjoǎ xi ótsji ndajoó kiyá-ne. Ngaji, ¿kó si?

⁶ Jñà x̄ita koi, koií k'oas'ín kitsò-la Jesús nga mejèn-la skót'aà, mé-ne koma kohòngui-ne it'aà ts'e x̄itaxá. Tanga Jesús, tsasiñiat'aà nangui nga kiskijno-ne kō jnótsja it'aà nangui.

⁷ X̄ita koi nga siì nchis'ín nga kjònangui, Jesús tsasijna kixi kitsò-la:

—Jñò, tsà tjín i'nga x̄ita xinguiqo xi tsjìn-la jé, jè kàtínè ítjòn ndajò chjoón jè.

⁸ Jesús ijngoò k'a tsasiñia nga kiskijno isa it'aà nangui.

⁹ Jñà x̄ita koi, k'e nga kii'nchré koni s'ín kitsò Jesús, tà ijngó ijngó kii-ne, nga kijtseè nga mikii ndaà tjín kjohítsjeèn xi kiichja, tsibíts'ia-ne xi x̄ita jchínga, ikjoàn kii-ne ixti. Tà jè tajngoò Jesús kō chjoón tsibítsajna.

¹⁰ Jesús tsasijna kixi-ne, kijtseè nga mì tì yá x̄ita tjín-ne. Tà jè tajngoò chjoón síjna. K'eé kitsò-la:

—¿Ñánda títsajna x̄ita xi óngui-lè? ¿A nijngoò xi kòhónè-lè kjo'in?

¹¹ Jè chjoón kitsò:

—Na'èn, niyá-jèn.

Jesús kitsò-la:

—Tikoaá 'an, mikii kìnè-lè kjo'in. T'in-ne ni'ya-lè; kì tì jé binchaàtsji-ne.

Ni'ín xi tsjá kjoabinachon xi síhiseèn-la x̄ita isò'nde

¹² Jesús, ijngoò k'a kiichjajjìn-la jñà x̄ita, kitsò-la:

—'An-ná ni'ín xi síhiseèn-la isò'nde. Jè xi 'an fit'aà-na s'eé-la ni'ín xi tsjá kjoabinachon. Mì tì kii ya kojmejjìn-ne kjoajñò.

¹³ Jñà x̄ita fariseo kitsò:

—Ti jji tì'biè-ne 'én it'aà tsjji. 'Én xi nokjoi, nime chí-la.

¹⁴ Jesús kiichja kitsò-la:

—'Én xi chjà, chí-la-né, nas'ín tì'an tsjaà-na 'én xi it'aà ts'an. Nga be-ná ñánda j'i-na kō ñánda tífia. Tanga jñò mikii 'yaà ñánda j'i-na kō ñánda tífia.

¹⁵ Jñò, tà kjohítsjeèn ts'e x̄itaá nikjeén k'e nga jé binè-ná. Tanga 'an nijngoò x̄ita binè-la jé.

¹⁶ Tanga 'an, tsà yá x̄ita xi konè-la jé, kjoakixí xi s'iaàn. Nga mìtsà tajngoò bindaàjiaàn, kōó Na'èn-na xi kisikasén-na bindaàjjìn-kō-na.

¹⁷ Kjotíxoma tsajòn k'oas'ín tíchja nga tsò: K'e nga tsà jò ma-ne x̄ita xi tsjá 'én, tsà ngásòn tsò ingajò, kixí kjoa, chí-la né.

¹⁸ Tì'aán-na xi tsjaà 'én it'aà ts'an. Kō tikoaá jè Na'èn-na xi kisikasén-na tsjá 'én it'aà ts'an.

¹⁹ Jñà x̄ita fariseo, kiskònangui-la kitsò-la:

—¿Ñánda tíjna Na'èn-lè?

Kiichja Jesús, kitsò-la:

—Jñò, 'an, mikii yaxkon-ná, ni jè Na'èn-na mikii yaxkon. 'An, tsà yaxkon-ná tikoaá jchaxkon-nò Na'èn-na.

²⁰ K'e nga tsakóya jñà 'én koi Jesús, yaá tíjna ya ingo ítjòn ya chrañat'aà-la j'nde ñánda maxkón ton kjotjò. Nijngoò x̄ita xi kitsò ikon nga kitsobà'ñó Jesús nga kj'eè kii bijchó nachrjein-la nga kiyá.

Mé-ne jñà x̄ita mikii koma kjoí-ne ya ñánda tífi Jesús

²¹ Jesús ijngoò k'a kitsò-la:

—'An, tífi-ná. Jñò, kinchátsji-ná. Tanga jñò yaá kiyájñò jé-nò. Ya ñánda 'an tífia, jñò mikii koma konguíó.

²² Jñà x̄ita judío kitsò-la xíkjín:

—¿A tíjè sikk'en-ne yijo-la? ¿Mé-ne k'oa tsò-ne, nga tsò: Ya ñánda 'an tífia, jñò mikii koma konguíó?

²³ Jesús kitsò-la:

—Jñò, íí it'aà nangui tsajòn, tanga 'an ján ngajmiì ts'an. Jñò, íí i'nde-nò isò'nde, 'an, mìtsà isò'nde i'nde-na.

²⁴ Koií k'oas'ín kixan-nò nga ya kiyájñòò jé-nò nga mìkiì mokjeiín-nò nga 'an-ná (xi Cristo). Koií kjoa-la nga kiyájñòò jé-nò.

²⁵ Xità judío, kiskònangui-la, kitsò-la:

—¿Yá-ne ngaji?

Jesús kiìchja, kitsò-la:

—Jyeé okixan-nò nga sa ítjòn yá-ná 'an.

²⁶ It'aà tsajòn, kjin kjoa tjín isa xi 'an kènojmi-nò, ko xi 'an kìndaàjìin-ko-nò. Jè xi kisikasén-na nguì 'én kixíí xi chja. Koni s'ín ki'nchrè-la, k'oaa tjín 'én xi 'an chjàjìin-la jñà xità isò'nde.

²⁷ Tanga jñà xità judío mìkiì kjòchija-la tsà it'aà ts'e Na'èn-ná xi Nainá tíchja Jesús.

²⁸ Jesús kitsò-la:

—Jñò, k'e nga chjímì'nga-ná 'an xi Ki'ndí-la Xità xan-la yijo-na, k'eé kochiya-nò nga 'an-ná [xi Cristo]. Nímé kjoa xi s'iaàn xi ta kjòhítsjeèn ts'an. K'oas'ín chjà koni s'ín tsakóya-na xi Na'èn ma.

²⁹ Jè xi kisikasén-na íí tíjnakò-na. Mìkiì síkìjna tajngoò-na Na'èn-na. Koií kjoa-la nga kjit'aà nàchrjein sikitasoàn koni s'ín sasén-la jè.

³⁰ Jesús, k'e nga kiìchja 'én koi, kjin jchán xità kòkjeiín-la it'aà ts'e.

Jè kjoa kixi síkítsajnadeií-ná xi kjoa ts'e jé-ná

³¹ Jesús kitsò-la jñà xità judío xi kòkjeiín-la it'aà ts'e:

—Tsà kixi sikitasòn 'én-na xi okoòya-nò, jñò-nò xi nguì kixi kjoa nga 'an kota'yàt'aà-na.

³² Jchaxkoòn xi kjoa kixi, koa jè kjoa kixi síkítsajnadeií-nò.

³³ Kiìchja xità judío, kitsò:

—Ngajen, xità tje-la Abraham-nájen. Ni saá jngoò xità xi k'ejí síkítsajna'ñó-najen. Ngaji, ¿mé-ne k'oas'ín si-ne nga kítsajnadeií-najen?

³⁴ Jesús kitsò-la:

—Nguì kjoa kixíí xi xan-nò, ngats'ìi xità xi jé ótsji, yaá títsajna'ñó it'aà ts'e jé-la, k'oaa ngayala koni jngoò xità chì'nda xi tíjna'ñó-la nei-la.

³⁵ Jngoò xità xi chì'nda tíjna, mìkiì tjí'nde-la nga ya kíjna kjit'aà ya ni'ya ñánda síxá. Tanga jngoò xi ki'ndí ma, tjí'ndeé-la nga kjit'aà nàchrjein ya kíjna ya ni'ya-la na'èn-la.

³⁶ K'oaa ma-ne, tsà jè Ki'ndí-la Nainá síkìjnadeií-nò, nguì kixíí kjoa nga jñò, kítsajnadeií-nó.

³⁷ 'An, be-ná nga tje-la Abraham-nò; tanga jñò mejèn-nò nga sik'en-ná, koi-né nga mìkiì mokjeiín-nò 'én-na xi chjà.

³⁸ 'An, k'oaa s'ín chjà koni s'ín tjín xi kijtseè k'e nga tisa tíjnakooa Na'èn-na. Jñò, k'oaa tjs'ín 'nè koni s'ín kina'yà-là na'èn-nò.

Yá-né xi na'èn-la ma xità xi chjako Jesús

³⁹ Jñà xità judío kitsò:

—Jè tje-najen, yaá inchrobàt'aà-ne ts'e Abraham. Jè na'èn-jchá kjiin-najen.

Jesús kiìchja kitsò-la:

—Tsà kixi kjoa nga ixti-la Abraham 'mì-nò, k'oaa s'ín s'een koni s'ín kis'iin Abraham.

⁴⁰ 'An, nas'ín jye k'oas'ín tsibenojmí kixi-nò, nga Nainá kitsjaà-na 'én xi chjà, jñò mejèn-nò nga sik'en-ná. Abraham mì k'oaa kis'iin.

⁴¹ Jñò, k'oas'ín 'nè koni s'ín na'èn-nò.

Jñà xità judío kitsò:

—Ngajen, mìtsà kjoa chijngui kits'iin-jìin-jen. Tajngoò jè Na'èn-najen, jè Nainá.

⁴² Jesús kiìchja, kitsò-la:

—Tsà kixi kjoa nga jè na'èn-nò Nainá, 'an tjòchaá-la s'en-ná nga it'aà ts'e Nainá inchrobà-na; mìtsà tà kjòtsja ts'an nga j'iaa; Nainá kisikasén-na.

⁴³ ¿Mé-ne mìkiì machiya-nò 'én-na xi chjàkò-nò? Koií-né nga mìkiì ma-nò na'yañijon.

⁴⁴ Na'èn-nò, jè xita nejí, jè nokjoà-nò. K'oaá s'in 'nè koni s'in mejèn-la na'èn-nò. Jè xi ma-la sík'en xita kóni nga tisa tàts'en-la kjoa. Mìtsà kjoa kixi s'in nga tsjin-la kjoa kixi. K'e nga chja 'én ndiso, k'oaá tsò koni s'in tjín inima-la nga nguì xita ndiso-né. Jè na'èn-la ts'e 'én ndiso.

⁴⁵ Tanga 'an, 'én kixi benojmí-nò; koií kjoa-la jñò, mìkiì mokjeiín-nò.

⁴⁶ ¿Yá xita xinguioo xi koma-la kòkò mé jé xi tjín-na? K'e nga chjàkò-nò, nguì 'én kixi chjà, kò ¿mé-ne mìkiì mokjeiín-nò?

⁴⁷ Jè xi xita-la Nainá, 'én-la Nainá 'nchré. Tanga jñò, nga mìkiì na'ya, koií-né nga mìtsà xita-la Nainá 'mì-nò.

Jñà kjoa xi tsohótiya-ne Jesús kò xita judío

⁴⁸ Jñà xita judío kiichja, kitsò-la Jesús:

—Ngajen, koií kjoa-la k'oas'in 'mì-lèjen: ji, xita Samaria-né, inima ch'o-la nejí tíjin inima-lè.

⁴⁹ Kiichja Jesús kitsò-la:

—'An, mìtsà inima ch'o-la nejí tíjin inima-na. Jè kjoa xi tìs'iaàn, jè-né nga bexkoán Na'èn-na. Tanga jñò mìkiì yaxkón-ná. Tà saá nachrjengui-ná.

⁵⁰ Mìtsà jè kjoa tìhotsjia nga jeya síkíjna yijo-na. Tíjna jngoò xi tìkosòn-la, jè-né xi jeya síkíjna-na.

⁵¹ Nguì 'én kixi xi chjàkò-nò, jè xi síkitasòn 'én-na koni s'in xan-nò, mìkiì kiyá nita kjé-ne.

⁵² Xita judío kiichja, kitsò:

—I'ndeí jyeé 'ya-jen nga inima ch'o-la nejí tíjin inima-lè. Abraham kò ngats'ìi xita xi kiichja ngajo-la Nainá kjòtseé, k'en-né. Tanga ji si-né: “Jè xi síkitasòn 'én-na koni s'in xan-nò, mìkiì kiyá.”

⁵³ Ngaji, ¿a isa tíjna ítjoìn a mì k'oa-ne koni jè Na'èn-najen Abraham? K'en-né. Kò ngats'ìi xita xi kiichjaya ngajo-la Nainá tìkooá k'en-né. ¿Yá-ne ji nga tíji tìnachrjeé jeya-ne yijo-lè?

⁵⁴ Kiichja Jesús kitsò-la:

—Tsà tì'an jeya síkíjna-na yijo-na, nìmé chjí-la. Jè xi jeya síkíjna-na, jè Na'èn-na xi Nainá 'mì-là.

⁵⁵ Jñò mìkiì yaxkon Nainá, tanga 'an beèxkon-ná. Tsà xán-nò mìkiì bexkoan, xita ndiso koma koni jñò nga xita ndiso-nò. 'An, bexkon-ná kò síkitasòn-ná 'én-la.

⁵⁶ Xita jchínga-nò Abraham, tsjaá komà-la nga mejèn-la skoexkon nachrjein-na nga j'iaa. K'e nga kijtseé nachrjein-na isa 'ñó ndaà kjòtsja-la.

⁵⁷ Jñà xita judío kitsò-la:

—Skanda kj'eè tjín-lè icháte nó. ¿Kós'in komà-ne nga kiyaxkoin Abraham?

⁵⁸ Jesús kiichja kitsò-la:

—Nguì kixi kjoa xi xan-nò, 'An-ná xi isa kjòtseé tijnna koni jè Abraham.

⁵⁹ Jñà xita judío, kiskoé ndajo nga mejèn-la kosèn-la Jesús. Tanga Jesús tsibìjna'ma, ítjo-ne ndìtsin ingo, jahajìin osen-la xita, ìkjoàn kii.

9

K'e nga jè Jesús kisindaà jngoò-ne xita xi mìkiì tsejèn-la

¹ Jesús k'e nga tífi ya ndiyá, kijtseé jngoò xita xi mìkiì tsejèn-la xi xó k'oas'in kits'iin-ne.

² Xita xi kota'yàt'aà-la Jesús kiskònangui-la kitsò-la:

—Maestro, xita jè, ¿mé-ne k'oas'in kits'iin-ne? ¿Yá xi tsohótsji jé? ¿A jñà xita jchínga-la, o xi jè xita xi mìkiì tsejèn-la?

³ Kiichja Jesús kitsò-la:

—Mìtsà jè x̄ita xi mìkiì tsejèn-la t̄jín-la jé, n̄i mìtsà j̄nà x̄ita jchínga-la tsohótsji jé. Koií-né nga it'aà ts'e x̄ita koi jcha-la kjoxxkón-ndaà-la Nainá.

⁴ Mochjeén-né nga siikitasoàn kjoxxkón-ndaà-la jè xi kisikasén-na nga nachrjein isa. Kijchò nachrjein k'e nga kojñò; n̄i t̄i jngoò-ne xi koma s̄ixá.

⁵ K'e tákó i t̄ijn̄aa isa isò'nde, 'an-ná ni'ín xi s̄ihiseèn-la x̄ita isò'nde.

⁶ K'e nga jye okitsò, tsibíchrá it'aà nangui. Jè ndánachrá-la tsibíndaà-ne ndási, ikjoàn kisikaàjno xkon jè x̄ita xi mìkiì tsejèn-la.

⁷ Ikjoàn kitsò-la:

—T'in, kaníkjoìin ya chrjó nandá Siloé (jè 'én xi tsòya-ne, jè xi kinikasén).

Jè x̄ita xi mìkiì tsejèn-la kii kaníkjoàn, k'e nga inchrobà-ne jye tsejèn-la.

⁸ J̄nà x̄ita indii ni'ya-la jè x̄ita xi mìkiì tsejèn-la, kò j̄nà x̄ita xi jye kjòtseé beèxkon nga ton síjé kjòtjò, kitsò-la x̄ikjín:

—¿A mìtsà jè x̄ita jè xi b̄jna nga síjé kjòtjò ton?

⁹ Tjín i'nga x̄ita xi tsò:

—Jè-né.

Koa j̄nà x̄ita xi i'nga kitsò:

—Kjomeé k'oaá kji, tanga mìtsà jè.

K'eé kiichja x̄ita xi mìkiì tsejèn-la nga sa ítjòn, kitsò:

—'An-ná.

¹⁰ J̄nà x̄ita kiskònangui-la kitsò-la:

—¿Kós'ín komà nga kitáx'a-ne xkoiìn?

¹¹ X̄ita jè kitsò:

—Jè x̄ita xi 'mì Jesús, kisindaà ndási, kisikaàjno xkoaàn, ikjoàn kitsò-na: “T'in, kaníkjoìin ya chrjó nandá Siloé.” 'An, kiaà, k'e nga jye tsaníkjoaàn, komà kotsejèn-na.

¹² J̄nà x̄ita koi kiskònangui-la kitsò-la:

—X̄ita jè, ¿ñánda t̄jna?

Jè x̄ita xi jye kjòndaà-ne, kitsò:

—Mìkiì be ñánda t̄jna.

K'e nga j̄nà x̄ita fariseo kisijtsò jè x̄ita xi mìkiì tsejèn-la xi jye kjòndaà-ne

¹³ Jè x̄ita xi mìkiì tsejèn-la nga jye kjòndaà-ne kiiko ñánda títsajna x̄ita fariseo,

¹⁴ koií kjoa-la nga nachrjein n̄ikjája-né k'e nga tsibíndaà ndási Jesús nga kisikaàjno xkon jè x̄ita xi mìkiì tsejèn-la mé-ne koma kitáx'a-ne xkon.

¹⁵ J̄nà x̄ita fariseo ìjngoò k'a kiskònangui-la jè x̄ita xi mìkiì tsejèn-la xi jye kjòndaà-ne, kitsò-la:

—¿Kós'ín komà nga kitáx'a-ne xkoiìn?

X̄ita jè kitsò:

—Ndásií kisikaàjno xkoaàn; ikjoàn tsaníkjoàn; i'ndeì jyeé tsejèn-na.

¹⁶ Tjín i'nga x̄ita fariseo xi kitsò:

—X̄ita jè, mì-la tsà Nainá kisikasén nga mìkiì beèxkón nachrjein n̄ikjája.

T̄ikoá t̄jín i'nga xi kitsò:

—¿Kós'ín ma-ne nga ma-la s'ín kjoxxkón xi ndaà t̄jín tsà x̄ita jé-né?

Ikjoàn kjòjòya xi t̄ijn̄a-ne x̄ita fariseo; mìkiì kjòngásòn kjòhítsjeèn-la.

¹⁷ Ìjngoò k'a kitjànangui-la jè x̄ita xi mìkiì tsejèn-la xi jye kjòndaà-ne, kitsò-la:

—Ngaji, ¿kó si, yá x̄ita-ne xi kiskíx'a-ne xkoiìn?

X̄ita jè kitsò:

—Jngoò x̄ita xi chja ngajo-la Nainá.

¹⁸ Tanga j̄nà x̄ita judío, mìkiì kòkjeiìn-la tsà kixi kjoa nga jè x̄ita xi mìkiì tsejèn-la nga k'oas'ín kits'iìn koa i'ndeì jyeé tsejèn-la. K'eé kiichja-la j̄nà x̄ita jchínga-la,

¹⁹ kiskònangui-la kitsò-la:

—Jè x̄ita jè, ¿a ki'ndí-nò ma? ¿A kix̄ií kjoa nga mìkì tsejèn-la k'e nga sa kits'iìn? ¿Kó ma-ne nga tsejèn-la i'ndeì?

²⁰ Jñà x̄ita jchínga-la kitsò:

—'Ya-nájen nga ki'ndí-najen ma. Kix̄ií kjoa nga mìkì tsejèn-la k'e nga sa kits'iìn.

²¹ Tanga mìkì 'ya-jen mé-ne nga ma tsejèn-la i'ndeì, t̄ikoáá mìkì 'ya-jen yá-né xi kiskíx'a-ne xkon. Jè sobà chjínangui-là, jè kàtènojímí-nò, nga jyeé x̄ita jchínga.

²² Jñà x̄ita jchínga-la koií k'oas'ín kitsò-ne nga jñà tsakjón-la x̄ita judío. Jñà x̄ita judío jyeé k'oas'ín tsajoóya-ne nga jngoò k'aá kitjokàjìin ya ni'ya ingo sinagoga, tsà yá x̄ita xi kitsò nga jè Jesús jè xi Cristo [xi xó kiskikasén-ne Nainá].

²³ Koií k'oá t̄is'ín kitsò-ne jñà x̄ita jchínga-la, nga kitsò: “Jè sobà chjínangui-là, nga jyeé x̄ita jchínga-né.”

²⁴ Jñà x̄ita judío ìjngoò k'a kiichja-la jè x̄ita xi mìkì tsejèn-la, kitsò-la:

—Tènojímí kix̄i-nájen nga nguixkon Nainá. Ngajen 'ya-nájen nga jè x̄ita jè, x̄ita jé-né.

²⁵ Jè x̄ita xi mìkì tsejèn-la xi jye k̄jòndaà-ne kiichja, kitsò:

—'An, mìkì be tsà x̄ita jé-né. Tà jè xi be, k'e nga sa kits'ian mìkì tsejèn-na, tanga i'ndeì jyeé tsejèn-na.

²⁶ Ìjngoò k'a kitsò-la:

—¿Mé xi kisikò-lè? ¿Kó s'ín kisikò-lè nga kitáx'a-ne xkoiìn?

²⁷ Jè x̄ita xi mìkì tsejèn-la kitsò:

—Jyeé koa kàxan-nò, tanga jñò mìkì na'yà. ¿Mé-ne mejèn-nò nga ìjngoò k'a k'oá xán-nò? ¿A t̄ikoáá mejèn-nò nga x̄ita-la koma nga ya ch̄ita'yàt'aà-là?

²⁸ Jñà x̄ita judío k'e nga k'oá ki'mì-la, kòjti-la, kiichjajno-la jè x̄ita xi mìkì tsejèn-la, kitsò-la:

—Jì-né x̄ita xi ya ch̄ita'yàt'aà-la. Tanga ngajen yaá ch̄ita'yàt'aà-lajen Moisés.

²⁹ 'Ya-nájen nga jè sobà Nainá kiichjako Moisés. Tanga jè x̄ita jè mìkì 'ya-jen ñánda j'ìi-ne.

³⁰ Jè x̄ita xi mìkì tsejèn-la kitsò:

—Kjoa jè, tà maxkón-ná nga jñò, mìkì 'ya ñánda j'ìi-ne x̄ita jè, tanga 'an be-ná nga jè kiskíx'a-ne xkoaàn.

³¹ 'Yaà-ná jñà x̄ita xi t̄jín-la jé, mìkì 'nchré-la Nainá. Tanga jñà x̄ita xi tsakjón-keè Nainá t̄ikoá síkitasòn koni s'ín mejèn-la, jñà-né xi 'nchré-la.

³² Kóni nga t̄isa k̄jòtseé, n̄i saá jngoò x̄ita na'yà-la xi ma-la k'íx'a-ne xkon jngoò x̄ita xi mìkì tsejèn-la k'e nga k'oas'ín kits'iìn.

³³ X̄ita jè, tsà mitsà Nainá kiskikasén, n̄imé xi koma-la nga k'oas'ín s'iin.

³⁴ Jñà x̄ita judío kitsò-la jè x̄ita xi mìkì tsejèn-la:

—Ngaji xi taxkì 'ñó tse jé t̄jín-lè, ¿a j̄ií mejèn-lè k̄okóya-najen?

Ikjoàn tsachrje ni'ya ingo sinagoga.

X̄ita xi mìkì tsejèn-la kjoa ts'e inima-la

³⁵ Jesús kii'nchré nga jè x̄ita jè kinachrjekàjìin ya ni'ya ingo sinagoga. K'e nga kisatiikjoò ìjngoò k'a, kiskònangui-la kitsò-la:

—Jì, ¿a mokjeiín-lè it'aà ts'e xi Ki'ndí-la X̄ita tsò-la yijo-la?

³⁶ X̄ita jè kitsò:

—Nà'èn, koatìn-ná yá-né, mé-ne nga k̄okjeiín-na it'aà ts'e.

³⁷ Jesús kitsò-la:

—Jyeé ki'yi, 'an-ná xi tichjàkò-lè.

³⁸ X̄ita jè tsasijna xkó'nchit'aà-la Jesús nga kijtseèxkón, kitsò-la:

—Nà'èn mokjeiín-na it'aà tsiji.

³⁹ Ikjoàn kitsò Jesús:

—'An, koií xá j'i-na i isò'nde; nga 'an skosòn-la mé-ne jñà xita xi mìkiì tsejèn-la kotsejèn ìjngoò k'a-la, koa jñà xi tsejèn-la mìkiì kotsejèn-la.

⁴⁰ Tjín i'nga xita fariseo xi ya títajako Jesús, k'e nga kiì'nchré 'én koi, kiskònangui-la kitsò-la:

—Ngajen, za tikoáa mìkiì tsejèn-najen?

⁴¹ Jesús kiìchja kitsò-la:

—Jñò, tsà mìkiì tsejèn-nò, tsjìn-nò jé. Tanga bixón-nò: “Tsejèn-najen”, k'oaá ma-ne nga ya tjíne-nò jé-nò.

10

Paxtò ko ndí orrè-la

¹ 'Nguì kjoa kixií xi xan-nò, jè xita xi mìtsà ya fahas'en-ne xotjoa-la írchíba-la orrè, xi xìn fahas'en-kjá-ne, xita chijé-né, jè xita xi fikò chijé cho.

² Tanga jè xi ya fahas'en-ne xotjoa-la írchíba, jè-né xi paxtò, xi síkinda orrè.

³ Jè xi síkinda xotjoa-la írchíba, jé kíx'a-la. Jè xi paxtò, chja 'ín-la nga jngoò ìjngoò orrè, ko jñà orrè 'nchréjta-la nei-la. Ikjoàn ochrje írchíba-la.

⁴ K'e nga jye bitjo yije írchíba-la jñà orrè, jè paxtò fikò nga 'nchréjtaá-la nga jè nei-la.

⁵ Tanga jngoò xita xi kj'eíí, mìkiì kjitjingui-la nga mìkiì beèxkon. Ta saá ta kongaá-la nga mìkiì 'nchré jta-la xita xi kj'eíí.

⁶ Jesús k'oaá tsò kjoa xi mangásòn xi tsibénojmí-la. Tanga jñà xita koi mìkiì kjòchiya-la kó tsòya-ne.

Mé xi s'ín jè paxtò xi ndaà síkinda orrè

⁷ Jesús, ìjngoò k'a kitsò-la:

—Xi nguì okixi k'oaá xán-nò. 'An-ná xotjoa-la írchíba ñánda fahas'en-ne jñà orrè.

⁸ Ngats'ì jñà xi j'ìl ítjòn-na, sa xita chijé-né, jñà xi fikò chijé cho. Jñà orrè mìkiì kiì'nchréñijon-la.

⁹ 'An-ná xi xotjoa; jè xi it'aà ts'an kjoahas'en, kitjokàjiín kjo'in kjoa ts'e jé-la. K'oas'ín ngayá-la koni s'ín orrè nga fahas'en írchíba-la ko bitjo ko sakó-la ijñá xi kjèn.

¹⁰ 'Jè xita chijé tà f'ìl síchijé-né, f'ìl sík'en-né, f'ìl síkjesòn-ne. Tanga 'an, koií xá j'i-na nga kàtas'e-nò kjoabinachon nita kjé-ne, nga nímé chijat'aà-nò nga nguì ndaà kàtas'e-nò.

¹¹ 'An-ná xi paxtò xi ndaà ko'ndà orrè. Jè paxtò xi ndaà ko'ndà orrè, jè xi tjíjngoò ikon nga kijátjì jñà orrè.

¹² Jè xita xi ch'i'nda tíjna nga ko'ndà orrè, k'e nga beè nga nchrobá chraña tsején, síkítajna jñà orrè, ikjoàn onga. Koií k'oas'ín-ne nga mìtsà jè paxtò xi ko'ndà, tikoá mìtsà jè nei-la orrè. Ikjoàn matsja-la jè tsején nga tsobà'ño jñà orrè, xki xi ján sítsjòya jñà orrè xi i'nga.

¹³ Jè xita xi ch'i'nda tíjna tà onga-né; koií k'oas'ín-ne nga nímé kindá-la. Tà jè síkinda chjì-la mìtsà jñà orrè síkinda.

¹⁴⁻¹⁵ 'An-ná paxtò xi ndaà ko'ndà orrè; koni s'ín beèxkon-na Na'èn-na, tikoá 'an bexkoan Na'èn-na, k'oaá tis'ín beèxkon-ná orrè-na kó kjoàn, ko jñà orrè beèxkoòn-na nga ts'an. 'An tjíngoò takoàn nga kijátjì jñà orrè-na.

¹⁶ Tikoá tjín-isa-na xi kj'eíí orrè, jñà xi mìtsà i títajnaya írchíba jè. Tikoáá mochjeén-né nga kjinchrobàkon-na mé-ne nga kjì'nchréñijon-na tikoá síkitasòn-na. Jngoò írchíba koma-ne ko jngoò koma paxtò xi skó'nda.

¹⁷ 'Koií kjoa-la nga matsjakeè-na Na'èn-na nga 'an tjíngoò takoàn nga kijá mé-ne k'e nga koma iskan kjoáaya-na.

¹⁸ Niyá xi tjí'nde-la nga siik'en-na, 'an kjotsja ts'an-ná nga tsja yijo-na. Tjí'nde-na nga tsja, tikoá tjí'nde-na nga kjoáaya-na it'aà ts'e kjoabiyaá. Jè Na'èn-na k'oa tjín kjotíxoma xi kitsjaà-na.

19 Jñà x̄ita judío k'e nga kiì'nchré 'én koi, ìjngò k'a kjòjòya jñà x̄ita.

20 Kjín ma x̄ita xi kitsò:

—Inìma chò-la neí tíjìn inìma-la. X̄ita ská-né. ¿Mé-ne okji-ne x̄ita xi na'yà-là?

21 Jñà x̄ita xi i'nga kitsò:

—'Én koi mìtsà ts'e x̄ita neí. ¿A komaá-la jè x̄ita neí nga skíx'a xkon x̄ita xi mìkiì tsejèn-la?

Mé xi komà k'e nga jñà x̄ita judío kisijtikeè Jesús

22 K'e nga nàchrjein chon 'nchán, ján Jerusalén tíbitjo s'eí nga ijchò ìjngò nó nga kjòchikon-t'in ingo.

23 Jesús ya tíjna ingo ítjòn nga tsóbanguì nguitjoa xi 'mì Salomón.

24 Jñà x̄ita judío chìncha jngò itjandii-la Jesús, kitsò-la:

—¿Skanda mé nàchrjein chíña-lèjen? Jngò k'a koatìn-nájen, ¿a jì-né xi Cristo [xi xó kisikasén-ne Nainá]?

25 Jesús kiìchja kitsò-la:

—Jyeé k'oa kixan-nò, tanga jñò mìkiì mokjeiín-nò. Jñà kjoxkón xi it'aà ts'e Na'èn-na s'iaàn, jñà síkixiya ndaà kjoa xi it'aà ts'an.

26 Tanga jñò, mìkiì mokjeiín-nò, koií kjoa-la nga mìtsà ndí orrè ts'an xan-nò.

27 Jñà ndí orrè-na 'nchréjtaá-na; 'an beèxkon-ná, koa fitjngui-na.

28 'Aán tsja-la kjoabinachon nita kjé-ne; mìkiì chija nita kjé-ne; tikoá niyá xi kjoaá'an-na.

29 Jè Na'èn-na xi kisingatsja-na jñà ndí orrè, isa tíjna ítjòn nita yá-ne. Nijngò xi koma-la kjoaá'an-na iya tsja Na'èn-na.

30 'An ko Na'èn-na tà jngò ma-najen.

31 Jñà x̄ita judío tsibíxkó ndajo nga mejèn-la kosèn-la Jesús.

32 Kiìchja Jesús kitsò-la:

—'Nó kjìn kjoxkón xi ndaà tjín jye tsakoò-nò xi inchrobà-ne it'aà ts'e Na'èn-na. ¿Jñò, ñá-laá ngatjì-la kjoa koi, nga ndajo mejèn bínè-ná?

33 Jñà x̄ita judío kitsò:

—Mìtsà koií kjoa-la kjoxkón ndaà xi tì'nì nga ndajo kìnè-lèjen. Koií kjoa-la nga Nainá nokjoàjno-la nga Nainá 'mì-la yijo-lè. Jì, tà x̄ita-né.

34 Jesús kiìchja kitsò-la:

—Jè Xojon-la Nainá xi jñò chita'yà k'oaá s'ín tíchja ñánda nga tsò Nainá: “Jñò, k'oaá kixan-nò, nainá 'mì-nò.”

35 Xojon-la Nainá, mì yá xi koma kochrjekàngui. K'oaá s'ín tíchja nga jè Na'èn-ná, nainá kitsò-la jñà x̄ita xi kitjoé-la 'én-la.

36 Tsà k'oas'ín ki'mì x̄ita koi, ¿mé-ne bixón-nò nga Nainá chjàjno-la k'e nga xan-nò: 'An-ná xi Ki'ndí-la Nainá? Nga jè Nainá kitsjaà-na xá nga kisikasén-na i isò'nde.

37 Kì kiì mokjeiín-nò it'aà ts'an, tsà mì k'oaá s'ín tìs'iaàn koni s'ín tìs'ín Na'èn-na.

38 Tanga tsà k'oa tjín kjoa xi tìs'iaàn nas'ín mìkiì mokjeiín-nò it'aà ts'an, kàtakjeiín-nò it'aà ts'e kjoa xi tìs'iaàn, mé-ne nga k'oas'ín jcha-nò ko kàtakjeiín-nò nga ta jngó ma-najen Na'èn-na ko 'an.

39 Jñà x̄ita judío mejèn-la nga kitsobà'ño ìjngò k'a Jesús. Tanga Jesús itjokàya tsja x̄ita koi, ikjoàn kiì.

40 K'éé kiì ìjngò k'a ján xijngoaà xajngá nandá Jordán ya ñánda kis'iìn ítjòn bautizar x̄ita jè Juan; Jesús yaá tsibìjna.

41 'Nó kjìn x̄ita ijchò tjingui-la Jesús. X̄ita koi, kitsò:

—Juan, nímé kjoxkón ndaà kis'iìn. Tanga ngats'ii 'én xi kitsò jè Juan it'aà ts'e x̄ita jè, ngui kjoa kixi-né.

42 Ya i'nde jè, 'ño kjìn x̄ita kòkjeiín-la it'aà ts'e Jesús.

11

Kó kitsò Jesús k'e nga kiì'nchré nga k'en Lázaro

¹ Tíjna xk'én jngoò xit̩a xi 'mì Lázaro xi ya ì'nde-la Betania, ya naxandá ts'e María ko ndichja xi 'mì Marta.

² (Jè María xi ndichja ma Lázaro, jè-né xi kisikaàjno xkiì jne ndsoko Jesús. Ikjoàn ko tsja sko kisixijno-ne ndsoko.)

³ Jñà íchjín ndichja Lázaro, kisikasén-la xá Jesús, kitsò-la:

—Na'èn, jè amigo-lè xi ndaà matsjachi kijna xk'én-né.

⁴ K'e nga kiì'nchré Jesús, kitsò:

—Ch'in jè, mìkiì kiyá-ne; k'oaa s'in kochjeén nga jcha-la kjoajeya-la Nainá, mé-ne jè Ki'ndí-la t̩koajeya kijna-ne.

⁵ Jesús 'ñó matsjakeè Marta ko ndichja ko Lázaro xi 'ndse ma.

⁶ K'e nga kiì'nchré nga kijna xk'én Lázaro, nguì jò nachrjein tsibijna Jesús, ya ì'nde ñanda tíjna.

⁷ Xi jye komà, ikjoàn kitsò-la xit̩a xi kota'yat'aà-la:

—Ìjngoò k'a t̩kjaán ján nangui Judea.

⁸ Jñà xit̩a xi kota'yat'aà-la Jesús kitsò:

—Maestro, kj'eè tsà kjìn nachrjein tjín-la k'e nga jñà xit̩a judío mejèn-la tsibínè-lè ndajo nga s̩ik'en-lè. ¿A tiyaá mejèn k'oín ìjngoò k'a ngá-ne?

⁹ Kiìchja Jesús kitsò-la:

—Nga jngoò nachrjein, ¿a mìtsà tejò hora tjín-la? Jè xi nachrjein tsóba mìkiì satíngui nga jè ni'ín xi tjín isò'nde síhiseèn-la.

¹⁰ Tanga jè xi tsóba nga n̩tjen, satíngui-né nga tsjìn-la ni'ín xi síhiseèn-la.

¹¹ Ikjoàn kitsò-la xit̩a-la:

—Jè amigo-ná Lázaro kjinafé-né, tanga 'an koií xá fi-na nga 'an s̩ikjaá-la.

¹² Xit̩a xi kota'yat'aà-la Jesús kitsò:

—Na'èn, tsà kjinafé-né, kondaá-ne.

¹³ Jesús k'e nga okitsò, jè tíchja it'aà ts'e kjoabiyaà-la Lázaro. Tanga jñà xit̩a xi kota'yat'aà-la k'oaa s'in kisikítsjeèn tsà tà t̩síkjáya-ne Lázaro nga kjinafé.

¹⁴ K'eé jngoò k'a tsibénojmí kixi-la kitsò-la:

—Lázaro jyeé k'en.

¹⁵ Matsja-na xi it'aà tsajòn nga jè nachrjein nga mì ya titsajnaà, mé-ne jñò k̩kjeiín-nò. Nchrobá, t̩kjaán ch̩tsejèn-lá.

¹⁶ K'eé kiìchja Tomás xi t̩koaj Dídimo tsò-la ['én xi tsòya-ne Ti'ño]; kitsò-la xíkjín:

—Jñà t̩koaj t̩kjaán, mé-ne ya kiyákoaa Jesús.

Jesús, jè xi s̩ikjaáya-la xit̩a t̩koaj tsjá-la kjoabinachon

¹⁷ K'e nga ijchò Jesús, kiì'nchré nga jyeé tjín-la ñijòn nachrjein nga kisihijìn Lázaro.

¹⁸ Naxandá Betania chrañat'aà kijna-la naxandá Jerusalén, tjín-la tsà jàn kilómetro.

¹⁹ Kjìn xit̩a judío ijchòkon jè Marta ko María nga ijchò síjehikon nga 'ndse k'en.

²⁰ Jè Marta, k'e nga kiì'nchré nga Jesús t̩nchrobá chraña, kiìkjaá indiaà. Jè María yaá tsibijnaya ni'ya.

²¹ Jè Marta kitsò-la Jesús:

—Na'èn, tsà ì-là tijni, jè 'ndse mì-la kiì k'en.

²² Tanga ì'ndeji be-ná n̩t̩a mé xi sijé-la Nainá, tsjá-lè.

²³ Jesús, kitsò-la:

—Jè 'ndsi kjoaáya-la.

²⁴ Marta kitsò:

—Be-ná k'e nga kjoehet'aà nachrjein kíjnakon ìjngoò k'a-ne, k'e nga kjoaáya-la ngats'iì xit̩a xi jye k'en.

²⁵ Jesús, k'eé kitsò-là:

—'An-ná xi sǐkjaáya-là xǐtǎ kǒ tsjaà-là kjoabinachon. Jè xi mokjeiín-là it'aà ts'an nas'ín kiyá, kíjnakon ìjngoò k'a-ne.

²⁶ Ngats'iì xǐtǎ xi tǐtsajnakon, jǎà xi mokjeiín-là it'aà ts'an, mìtsà jngoò k'a kiyá. Ngaji, ¿kó si?, ¿a mokjeiín-lè?

²⁷ Marta kiìchja kitsò:

—Jon Na'èn, 'an, mokjeiín-na nga jǐ-né xi Cristo; jǐ-né xi Ki'ndí-là Nainá, jè xi k'oas'ín tjínè-là nga kjoíí ì isò'nde.

Jesús, mé-ne kiskindàyakeè-ne Lázaro

²⁸ Marta, k'e nga jye okitsò, kiìchja'ma-là María xi ndichja ma, kitsò-là:

—Íí tíjna Maestro, chja xó-lè.

²⁹ Jè María k'e nga kiì'nchré, nǐtoón tsasítjen, kiikon Jesús.

³⁰ Jesús, k'j'eè kiì fahas'en-jìin naxandá, tákó yaá síjna ñánda ijchòkjaá indiaà Marta.

³¹ Jǎà xǐtǎ judío xi tǐtsajnakó ni'ya-là María nga nchisíjehikon, k'e nga kǐjtseè nga tà nǐton itjo ni'ya María, kiìtjingui-là. K'oaá s'ín kisikítsjeèn tsà ya tífi kjindáya ñánda kisihijìin Lázaro.

³² María k'e nga ijchò ñánda síjna Jesús, k'e nga kǐjtseè, tsasíjna xkó'nchit'aà-là, kitsò-là:

—Na'èn tsà íí-la tíjni, jè 'ndsè mì-la kiì k'en.

³³ Jesús k'e nga kǐjtseè nga tǐkjindáya María tǐkóa nchikjindáya xǐtǎ judío xi tjǐkǒ, 'oón komà-là inǐma-là Jesús, 'ñó kjòba-là.

³⁴ Jesús kiskònangui, kitsò:

—¿Ñánda kisihijìin?

Kitsò jǎà xǐtǎ:

—Na'èn nchroboí, chítsejèn-là.

³⁵ Jesús kiskindàya-né.

³⁶ Jǎà xǐtǎ judío kitsò-là xíkjín:

—Chítsejèn-là, 'ñó matsjakeè Lázaro.

³⁷ Tjín i'nga xǐtǎ xi kitsò:

—Xǐtǎ jè komà-là kiskíx'ǎ xkǒn xǐtǎ xi mìkiì tsejèn-là, ¿a mìtsà komà-là tsà mìkiì k'en Lázaro?

Kós'ín ma jaáya-là Lázaro

³⁸ Jesús ìjngoò k'a 'ñó 'on komà-là inǐma-là. Kiì kasit'aà chrañà-là jè itsjó-là mik'en. Jngoò nguìjo ñánda jngoò ndajǒ tèè tíchjoàjto-là.

³⁹ Jesús kitsò:

—Chjaàxiòn jè ndajǒ.

Jè Marta, ndichja mik'en, kitsò-là Jesús:

—Na'èn, jyeé-la ch'o jne nga jyeé tjín-là ñijòn nàchrjein nga kisihijìin.

⁴⁰ Kiìchja Jesús kitsò-là:

—¿A mì jyeé k'oa kixan-lè, tsà mokjeiín-lè jchà-ne kjoajeya-là Nainá?

⁴¹ K'eé jaàxìn ndajǒ xi tíchjoàjto-là itsjó-là mik'en, Jesús kiskoòtsejèn ngajmì, kitsò:

—Na'èn, tsjaà-lè kjondaà, ndaàhà chjí-lè nga na'yà-ná.

⁴² 'An be-ná nga kǐjt'aá nàchrjein na'yà-ná, tanga koií k'oa kàxan-lè nga kjìn ma xǐtǎ xi tǐtsajna mé-ne nga kǒkjeiín-là nga jǐ kinikasén-ná.

⁴³ K'e nga jye okitsò, 'ñó kiìchja, kitsò:

—Lázaro, nchroboí, tǐtjoí ngajǒ.

⁴⁴ Jè xi kijna k'en, itjo-ne ngajǒ. Jǎà ndsokǒ kǒ tsja, nikje na'ñó tjí'ñó-ne. Jè isén-là, jngoò nikje chroba tíjtéjìin. Jesús k'eé kitsò-là jǎà xǐtǎ:

—Chíjnda'ñó-nò, kàtjì-ne.

*K'e nga jñà xità judío tsajoóya-ne nga siik'en Jesús
(Mateo 26:1-5; Marcos 14:1-2; Lucas 22:1-2)*

⁴⁵ Jñà xità judío xi j'ìi nga tsobáhijtakò María, k'e nga kijtseè koni s'ín kis'iin Jesús, kjin ma xi kòkjeiín-la ìt'aà ts'e.

⁴⁶ Tanga tjín i'nga xità judío xi kiikon jñà xità fariseo, tsibénojmi-la koni s'ín tjín kjoa xi kis'iin Jesús.

⁴⁷ Jñà xità sko-la no'miù kò xità fariseo tsibíxkóya xíkjin, tsibijna jngoò junta ts'e xità ítjòn-la xità judío, kitsò-la xíkjin:

—¿Mé xi s'eén? Xità jè ndaà jchán tís'ín kjojkón xi ndaà tjín.

⁴⁸ Tsà ta kì'nde-lá, ngats'ii xità kòkjeiín-la ìt'aà ts'e. Ikjoàn kjoii xità Roma, siikits'ón-ya j'nde tsjeè-ná kò naxandá-ná.

⁴⁹ Xi tijñà-ne xità koi, jngoò xi 'mì Caifás xi no'miù ítjòn tjina jè nó jè, kiichja kitsò:

—Jñò, nímé kjoa xi tjiin-nò,

⁵⁰ kò mìkiù nìkìtsjeèn nga mochjeén-né nga tà jngoò xità kàtiyaàtji-la naxandá-ná mì k'oaá-ne tsà kiyá yije xità naxandá-ná.

⁵¹ Caifás k'e nga k'oas'ín kiichja mìtsà tà kjohìtsjeèn ts'e. Tanga koi-né nga no'miù ítjòn tjina nó jè, Nainá kisikichiya-la nga Jesús, k'oaá s'ín tjínè-la nga jè naxandá kiyátji ngajo-la.

⁵² Mìtsà ta jè naxandá kiyátji ngajo-la; tikoáá koiìxkóya-né ngats'ii ixti-la Nainá xi xki xi ján naxandá nchisíjchá yijo-la, kóhokji nga tíjtsa isò'nde.

⁵³ Tijè-ne nachrjein jè tsajoóya-ne nga siik'en Jesús.

⁵⁴ Koií kjoa-la Jesús mì tì kii taxkì tsajmeèjiiin osen-la xità judío. Yaá kii kijna j'nde ìt'aà xìn ñánda nangui kixì choòn ya chrañàt'aà-la jngoò naxandá xi 'mì Efraín; yaá tsibijna kò xità xi kota'yàt'aà-la.

⁵⁵ Jyeé nchrobá machraña s'eí Paxkò ts'e xità judío. K'e nga tikj'eè mats'ia s'eí, kjin xità kii ján Jerusalén nga kii sítsjeèya yijo-la koni s'ín tjín kjotíxoma-la xi xkón tjín.

⁵⁶ Xki xi ján tsohótsji Jesús. K'e nga títsajna ya nditsin jngo, kitsò-la xíkjin:

—¿Kó bixón? ¿A kjoii s'eí Paxkò, o xi majin-né?

⁵⁷ Jñà xità sko-la no'miù kò xità fariseo, k'oaá s'ín kitsjaà okixi tsà yá xi skoexkon ñánda tjina Jesús, kàtènojmi mé-ne nga tsoba'ño-ne.

12

*Mé xi kis'iin María ìt'aà ts'e Jesús
(Mateo 26:6-13; Marcos 14:3-9)*

¹ Nguì joòn nachrjein chija isa-la nga kitjo s'eí Paxkò. Jesús kii ján naxandá Betania ñánda tjina Lázaro xi jè Jesús kisikjaáya-la k'e nga k'en.

² Yaá kisindaà-la tsojmì Jesús xi tsakjèn nga kòjñò. Jè Marta tsibíya tsojmì xi kiskine. Ngats'ii xità xi ya títsajnat'aà ímíxa, tikoá ya tjina Lázaro kò Jesús.

³ María j'iikò osen litro xkiù jne xi 'ño chjí xi nguì ts'e nardo. Kisikaajno ndsokò Jesús, ikjoàn kisixijno-ne tsjaskò. Kóhokji i'nga ni'ya, ndaà jchán kiijne.

⁴ Jngoò xità xi kota'yàt'aà-la Jesús, jè ti-la Simón xi 'mì Judas Iscariote, jè xi siingatsja Jesús jñà xità kondra-la, kitsò:

⁵ —¿Mé-ne mìtsà kàsatijna-ne xkiù jne jè? Tsà kàsatijna-ne koni tjín síkijne chjí-la jngoò xità xi ján sindò nachrjein síxá, mé-ne jè ton-la kò'bi-la jñà xità ima.

⁶ Judas mìtsà koi kjoa-la okitsò-ne nga makájno-la xità ima, koií-né nga xità chijé-né. Jè ngatsja chijtsa xi sinchá ton; ma síchijé ton xi sinchá chijtsa.

⁷ Jesús kitsò-la:

—Kì k'oa 'mì-la jè chjoón. Xkiù jne jè tjinatjò-la k'e nga 'an xi siijñaà.

⁸ Jñò, kjit'aà nachrjein kítsajnakò-nò jñà xità ima, tanga 'an mìtsà tà kjit'aà nachrjein i kótijnakò-nò.

K'e nga jñà xità judío tsajoóya-ne nga tìkoà s̄iik'en jè Lázaro

⁹ Ñó k̄jìn xità judío kisij̄iìn-là nga ya t̄jina Jesús ya naxandá Betania; k'eé k̄iit̄j̄ingui-là. Tanga mìtsà tà koií kjoa-là Jesús k̄iì-ne; jè k̄iì katsejèn-là Lázaro xi jè Jesús kisikjaáya-là k'e nga k'en.

¹⁰ Jñà xità sko-là no'miù tsajoóya-ne nga tìkoà mejèn-là s̄iik'en jè Lázaro,

¹¹ koií kjoa-là nga jè ngat̄j̄i-là Lázaro, k̄jìn jchán xità judío chinchat'aàxìn nga jye mokjeiín-là it'aà ts'e Jesús.

*Kós'ín komà k'e nga jè Jesús jahas'en-j̄iìn naxandá Jerusalén
(Mateo 21:1-11; Marcos 11:1-11; Lucas 19:28-40)*

¹² Nga komà nchijòn, k̄jìn jchán xità ijchò s'eí Paxko ján Jerusalén; kisij̄iìn-là nga tìkoà ya kijchò Jesús;

¹³ tsate xkajén, itjo kiskoòñà-là iya ndiyá; 'ñó k̄iichja, kitsò:

—jeya k̄at̄ijna Nainá! ¡Mé tà ndaà-là jè xità xi nchrobá ngajo-là Nainá, xi xitaxá ítjòn-là xità naxandá Israel!

¹⁴ Jesús kisakò jngoò-là ndí búrró ki'ndí xi tsib̄ijnasòn-là koni s'ín tíchja Xojon-là Nainá, nga tsò:

¹⁵ Kì tsakjoòn-jèn, jì naxandá Sión, chit̄sejèn-là xitaxá ítjòn-lè xi nchrobá, t̄ijnasòn jngoò-là ndí búrró ki'ndí.

¹⁶ K'e nga sa ítjòn, jñà xità xi kota'yàt'aà-là Jesús mìk̄iì kjòchiya-là kó tsòya-ne 'én koi. Tanga k'e nga k'en Jesús, ikjoàn jaáya-là nga k̄iimij̄iìn ján ngajm̄iì, skanda k'eé kjòchiya-là nga k'oaá s'ín komat'in koni s'ín tíchja xojon xi it'aà ts'e.

¹⁷ Jñà xità xi kijtseè k'e nga jè Jesús kisikjaáya-là jè Lázaro nga jye kijnak'en, isaá ndaà kisika'bísòn 'én, tsibénojmí yije-là xità xi k'ejí.

¹⁸ Koií kjoa-là 'ñó k̄jìn xità k̄iikjaá indiaà Jesús nga jye k̄iì'nchré jñà kjoxkón xi kis'iìn.

¹⁹ Jñà xità fariseo kitsò-là xíkjin:

—Chit̄sejèn-là; jñá, n̄imé xi s'eén nga ngats'ì xità isò'nde sa jè fit̄j̄ingui-là.

Kó kitsò Jesús k'e nga jñà xità griego mejèn-là skoexkon

²⁰ Jñà xità xi ijchò s'eí ján Jerusalén nga ya beèxkón Nainá, yaá títsaj̄najiìn i'nga xità griego.

²¹ Xità koi ijchòkon Felipe xi Betsaida i'nde-là, nangui xi chja-ne Galilea; tsib̄itsi'ba-là kitsò-là:

—Na'èn, mejèn-najen jchaxkon-jen Jesús.

²² Felipe k̄iì k̄énojmí-là Andrés; k'eé k̄iì Andrés ko Felipe tsibénojmí-là Jesús.

²³ Jesús k̄iichja kitsò-là:

—Jyeé ijchò nachrjein-là nga jè Ki'ndí-là Xità k̄jimij̄iìn i'ngoò k'a-ne ngajm̄iì mé-ne nga jeya k̄jna-ne.

²⁴ Nguì okixí xi xan-nò, jè nojmé tsà mìk̄iì tjókiyá k'e nga sitje, tà jngoò k̄jit'aá koma. Tanga tsà tjókiyá k'e nga s̄ihij̄iìn, k̄okj̄iìn-ya-né.

²⁵ Jè xità xi tjòkeè yijo-là nga mì mé kjo'in sakò-là, tà saá s̄iichja-né ko kjo'in k̄ijnajiìn; tanga jè xità xi mìk̄iì tjòkeè yijo-là i'isò'nde, ndaà t̄jnat̄jò-là kjoabinachon-là skanda ta mé nachrjein-ne.

²⁶ Tsà yá xi mejèn-là nga 'an s̄ixáko-na k̄at̄janchrobá t̄j̄ingui-na; ya ñánda nga 'an kótijna, t̄ikoà jè, yaá k̄jnat'aà-na. Tsà yá xi 'an s̄ixáko-na jè Na'èn-na ndaà skoexkón.

K'oaá s'ín tsibénojmí Jesús it'aà ts'e kjoabiyaà-là

²⁷ 'I'ndeí 'ñó jchán ba ma-là inima-na. ¿Mé 'én xi kichjà? ¿A k'oaá xan-lè: “Na'èn, t̄inachrjek̄ajiìn-ná kjo'in xi komat'ian jè hora jè?” Majin, nga koií xá j'i-na nga k̄itasòn.

²⁸ Na'èn, jeya tijni.

Tik'e-ne kina'yà jngoò-là 'én xi ngajm̄iì nchrobá-ne, kitsò:

—Jyeé kòkjìn k'a jeya síkíjna yijo-na kò ìjngoò k'a jeya síikíjna yijo-na.

²⁹ Jñà xità xi ya títsajna, k'e nga kù'nchré, tjin xi kitsò: ch'oon xi jane. Jñà xità xi i'nga, kitsò:

—Àkjalè-là Nainá xi kùichja-là.

³⁰ Kùichja Jesús kitsò:

—'Én xi kàna'yà-là mìtsà kjondaà ts'an, kjondaà tsajòn-nò.

³¹ Jè hora jè, nga sindaàjìn-là isò'nde; ì'nde, jyeé ijchò hora nga jè xità neí xi tíhotíxoma-là isò'nde, jyeé kitjoiìn.

³² K'e nga 'an, tjamitjen it'aà nangui, ngats'ì xità, 'aán kichjà-là nga kjinchrobàt'aà-na.

³³ Koií okitsò-ne, jè tsibénojmiya kós'in komat'in k'e nga kiyá.

³⁴ Jñà xità kùichja kitsò-là:

—Ya-nájen nga jè kjotíxoma-là Nainá xi kiskù Moisés, k'oaá s'in tíchja, tsò-né: Jè Cristo, kíjnakon-ne nita kjé-ne. Ngaji, ¿mé-ne kosi-ne nga mochjeén-né nga jè Ki'ndí-là Xità tjamitjen-t'aà nangui? ¿Yá-ne xi Ki'ndí-là Xità 'mì-là?

³⁵ Jesús kitsò-là:

—Tákó kíjnajiìn chiba nachrjein-nò ni'in xi síhiseèn-nò. Títjámeè nga tíjnajiìn-nò xi síhiseèn-nò, mé-ne nga mì kojñò-nò. Jè xi ijìin jñò tsò'ba mìkù beè kós'in fì.

³⁶ Kàtakjeiìn-nò it'aà ts'e ni'in xi síhiseèn k'e nga tákó tíjnajiìn-nò, mé-ne nga ya kitjá ñánda iseèn choòn.

K'e nga jye okitsò Jesús, kù tsibìjna'ma-là jñà xità.

Mé-ne jñà xità judío mìkù kòkjeiìn-là it'aà ts'e Jesús

³⁷ Jesús, nas'in tákó 'ño kjìn kjojkón ndaà kis'iìn nga nguixkon xità, jñà xità mìkù kòkjeiìn-là.

³⁸ Koií tsitasòn 'én xi kiskù Isaías, xità xi kùichjaya ngajo-là Nainá, nga kitsò: Na'èn, ¿yá-né xi tímokjeiìn-là 'én-ná xi kinokjoayaá?

¿Yá xi tihokoò-là nga'ño xi tjin-lè?

³⁹ Koií kjoa-là nga mìkù kòkjeiìn-là, nga k'oaá s'in tíchja ìjngoò k'a xojon-là Isaías ñánda tsò:

⁴⁰ Nainá tsibíchoà xkon,

kisítajaàjìn inima-là,

mé-ne nga mìkù kotsejèn-là,

mìkù kochiya-là ijìin inima-là

nga tikoá mì 'an kjinchrobàt'aà-na nga 'an sindaà-na.

⁴¹ Isaías, koií k'oaá s'in kùichja-ne nga jyeé kijtsee jè kjoa jeya-là Jesús nga it'aà ts'eé kùichja.

⁴² Nas'in koatsò 'én koi, kjìn xità judío kòkjeiìn-là it'aà ts'e Jesús, skanda kòkjeiìn i'nga-là xi xità sko-là. Tanga mìtsà jngoò k'a tsakó yijo-là nga jye kòkjeiìn-là it'aà ts'e Cristo; nga jñà tsakjón-là jñà xità fariseo, tsà ya kochrjekàjìn ni'ya ingo sinagoga.

⁴³ Jè xi mejèn-là nga isa ndaà kítsajna nga nguixkon xità mì k'oa-ne koni nga nguixkon Nainá.

'Én xi kùichja Jesús, nga jè koiindaàjìn-là xità

⁴⁴ Jesús 'ño kùichja kitsò:

—Jè xi mokjeiìn-là it'aà ts'an, mìtsà tà it'aà ts'an mokjeiìn-là, tikoá mokjeiìn-là it'aà ts'e Na'èn-na xi jè kisikasén-na.

⁴⁵ Jè xi beèxkon-na, tikoá beèxkon-né jè xi kisikasén-na.

⁴⁶ 'An xi síhiseèn-là xità, koií xá j'i-na ì isò'nde, nga ngats'ì xità xi kòkjeiìn-là it'aà ts'an, mì ya kítsajnajiìn ijìin jñò.

⁴⁷ Jè xi 'nchré 'én-na kò mìkù síkitasòn, mìtsà 'an tsjaà-là kjo'in nga mìtsà koi xá j'i-na nga kjo'in tsjaà-là xità isò'nde, koií xá j'i-na nga kochrjekàjña kjo'in xità isò'nde.

⁴⁸ Jè xi ochrjekàngui-na nga mìkù kjoétjò 'én-na, tjin xi tsjá-là kjo'in. Jè 'én xi jye 'an kichjà, jè tsjá-là kjo'in k'e nga kjoehet'aà nachrjein.

⁴⁹ K'e nga chjà, mìtsà tà kjohítsjeèn ts'an sìkjeén, jè Na'èn-na xi kisikasén-na kitsjaà-na okixi kós'in chjà koa mé 'én xi kokoòya.

⁵⁰ Be-ná jè kjotíxoma-la Na'èn-na, jè xi tjín-la kjoabinachon nita kjé-ne. Jñà 'én xi 'an chjà, k'oaá s'in chjà koni s'in tsatíxoma-na Na'èn-na.

13

K'e nga jè Jesús tsaníjno ndsoko xita xi kota'yàt'aà-la

¹ Chibaá nachrjein chija-isa nga kitjo s'eí Paxko ts'e xita judío. Jesús jyeé tíjìn-la nga jye ijchò nachrjein nga sìkíjna isò'nde nga jye tífikò-ne Na'èn-la. Tanga Jesús tjòkeè kijtsee yije xita-la i isò'nde kóni skanda jyehet'aà nachrjein-la.

² K'e nga jye kòjñò, Jesús tíkjèn-kò xita-la, kò jè xita nejí jyeé k'oas'in tsibíjìn inima-la jè Judas Iscariote, ti-la Simón, nga jè sìngatsja Jesús it'aà ts'e xita kondra-la.

³ Jesús jyeé tíjìn-la nga jè Na'èn-la kisingatsja yije kjoa nga jè kotíxoma-la nga it'aà ts'e Nainá inchrobà-ne kò tijè tífikò ìjngòò k'a-ne.

⁴ Jesús tsasítjen-t'aà ímíxa, jaàxin nachro xi kisòn-'nga-la, kiskoé jngòò nikje toalla, tsibíkjá ndáyá-la.

⁵ Íkjoàn kiskoé jngòò tina, tsibíya nandá, tsibíts'ia nga tsaníjno ndsoko xita xi kota'yàt'aà-la, íkjoàn kisìxijno-ne jè nikje toalla xi tíkjá ndáyá-la.

⁶ K'e nga ijchò kasit'aà-la Simón Pedro nga mejèn-la koníjno ndsoko, Simón kitsò:
—Na'èn, ¿a ok'in-na nga jí konijnói ndsokoaà?

⁷ Kìichja Jesús, kitsò:

—Í'ndeí mìkiì machiya-lè mé kjoa xi tìs'iaàn, tanga koma iskan, k'ée kochiya-lè.

⁸ Jè Pedro kitsò:

—Mìkiì tsjaà'nde nga ndsokoaà konijnói.

Jesús kitsò-la:

—Tsà mìkiì kónijnoa ndsokoì mìtsà xita ts'an xán-lè.

⁹ K'ée kitsò Simón Pedro:

—Na'èn, mìtsà tà ndsokoaà tanijnói, tíkoaá tanijnói ndsaa kò skoaà.

¹⁰ Kìichja Jesús kitsò-la:

—Jè xi jye tsangàya, tà jè ndsoko mochjeén nga saníjno, nga jyeé tsjeè yije yijo-la. Jñò, tsjeè kjoàn nas'in mìtsà kóhotjion.

¹¹ Jesús koií k'oas'in kitsò-la: “Mìtsà tà ngats'ioò nga tsjeè kjoàn”, nga jyeé tíjìn-la yá-né xi sìngatsja it'aà ts'e xita kondra-la.

¹² K'e nga jye tsaníjno ndsoko jñà xita-la, tsohòkjá-ne nachrokisòn-'nga-la. Tsibìjnat'aà-ne ímíxa, kitsò-la:

—¿A machiyaá-nò kjoa xi kàsikò-nò?

¹³ Jñò, k'oaá bixón nga Maestro kò Na'èn 'mì-ná. Ndaà bixón, kixí kjoa xi 'mì-ná.

¹⁴ 'An, xi Maestro kò Na'èn 'mì-na, kònijnoa ndsokòò, jñò tíkoaá mochjeén-né nga k'oa tìs'in tanijnòò ndsoko xinguiòò.

¹⁵ 'An, k'oaá s'in kijnà jngòò-nò xkòsòn mé-ne jñò k'oa tìs'in tikoo xinguiòò koni s'in kàsikò-nò.

¹⁶ Nguì kjoa kixí xi xan-nò, jè xi chì'nda tíjna, mìtsà jè tíjna ítjòn-la nei-la. Tíkò jè xi satíxá-la mìtsà jè tíjna ítjòn-la jè xi otíxá-la.

¹⁷ Í'ndeí nga jye machiya-nò kjoa koi, mé ta ndaà-nò tsà k'oas'in sikitasòn nga kòs'in s'een.

¹⁸ 'Mìtsà ngats'ioò k'oatìxan-nò; bexkon-ná jñà xita xi 'an jaàjñaà. Mochjeén-né nga kàtìtasòn koni s'in tíchja Xojon-la Nainá nga tsò: “Jè xi kjèn-kò-na, tijè-ne xi kondra kiiingui-na.”

¹⁹ Tibenojmí-nò kjoa koi k'e nga tikj'eè k'oa ma, mé-ne k'e nga jye k'oas'in koma, kokjeín-nò nga 'an-ná [xi Nainá].

²⁰ Nguì kjoa kixí xi xan-nò, jè xi skoétjò xita xi 'an siikasén, 'aán skoétjò-na; kò jè xi skoétjò-na, jè skoétjò jè xi kisikasén-na.

Kó kitsò Jesús k'e nga tsibénojmí nga jè Judas siingatsja xita kondra-la
(Mateo 26:20-25; Marcos 14:17-21; Lucas 22:21-23)

²¹ Jesús k'e nga jye okitsò, 'ño jchán kokájno-la; ìjngoò k'a kiichja, kitsò:

—Nguì okixí xi xan-nò, ì tijnajin jngoò-nò xi siingatsja-na it'aà ts'e xita kondra-na.

²² Jña xita xi kota'yat'aà-la, xki xi ján kiskoò'an xikjín nga mìkì tjiin-la yá-ne xi otítsò-la Jesús.

²³ Jngoò xita xi kota'yat'aà-la Jesús ya tijnakjoòko k'e nga nchikjèn, jè xita-la xi jè Jesús 'ño matsjakeè.

²⁴ Jè Simón Pedro, kitsjaà-la seña jè xita xikjín xi ya tijnakjoòko Jesús nga skonangui-la yá-né xi otítsò-la.

²⁵ Jè xita jè, isa 'ño tsibijnat'aà chraña-la; kiskònangui-la, kitsò-la:

—Na'èn, zyá-né xi otì'mì-la?

²⁶ Kiichja Jesús kitsò:

—Jè xi tsjaà jngoò-la inchrajín 'nchi, jè-né xi otixan-la.

K'eé kitsjaà-la jè Judas Iscariote, ti-la Simón.

²⁷ Jè xita neii nitóon jahas'en-jin inima-la Judas k'e nga kiskoé inchrajín. Jesús kitsò-la:

—Jè kjoa xi s'jin xatíya kot'jin.

²⁸ Jña xita xi títajnat'aà imixa xi nchikjèn, nijngoò xi kjòchiya-la mé-ne kos'ín kitsò-ne Jesús.

²⁹ Tjin i'nga xita xi k'oas'ín kisikítsjeèn; maá-la tsà títso-la Jesús: “Tsojmì tindí xi ts'e s'eí.” O tsà títso-la: “Ton tji chiba-la xita ima.” Nga jè Judas ngatsja chijtsa ton.

³⁰ Judas, k'e nga jye tsakjèn inchrajín, nitóon itjo ni'ya; kii; nga jye jño choòn.

Kjotixoma xitse xi kitsjaà Jesús

³¹ K'e nga jye itjo ni'ya Judas nga kii, Jesús kitsò:

—I'ndeí, jè Ki'ndí-la Xita, jyeé jeya tjna. Tikoá Nainá jyeé jeya tjna it'aà ts'e Ki'ndí-la.

³² Nainá tsà jeya tjna it'aà ts'e Ki'ndí-la, tije-ne Nainá jeya sikjina Ki'ndí-la. Nitóon jcha-la kjoa jeya-la.

³³ Jño, xi ndí ixti-na xan-nò, mìtsà ti tse kótijnako isa-nò. Jño, kinchátsji-ná tanga k'oaá xan-nò koni kixan-la jña xita judío: Ya ñánda tífia, jño, mìkì koma konguíó.

³⁴ Jngoò kjotixoma xitse tsjaà-nò: Titsjacha xinguió nga jngoò ìjngoò. K'oas'ín titsjacha xinguió koni s'ín 'an kisitsjakeè-nò.

³⁵ Tsà k'oas'ín titsjacha xinguió nga jngoò ìjngoò, k'oaá s'ín skoe-ne ngats'ii xita nga kixi kjoa nga ya chita'yat'aà-ná.

'Én xi kiichja Jesús nga jè Pedro kjó'mat'in

(Mateo 26:31-35; Marcos 14:27-31; Lucas 22:31-34)

³⁶ Simón Pedro kiskònangui-la Jesús, kitsò-la:

—Na'èn, ñánda tì'mì?

Jesús, kitsò-la:

—Ya ñánda tífia, mìkì koma kjítjngui-ná xi kjoa niton, tanga k'e nga koma iskan, komaá kjítjngui-ná.

³⁷ Simón Pedro kitsò-la:

—Na'èn, i'ndeí, ìmé-ne mìkì koma kjítjngui-lè? Tijnogoò takoàn nga 'an kiyá ngajo-lè.

³⁸ Jesús kiichja, kitsò-la:

—¿A kixí kjoa nga tijnogoò takoàn nga jì kiyá ngajo-ná? Nguì okixí xi xan-lè, k'e nga tikj'eè kjindáya kóxtí, ján k'a tsjá'mat'in-ná nga mìkì yaxkon-ná.

14

Kó s'ín koma nga ma kijchoaá ya ñánda tǵna Na'èn-ná

¹ 'Kì makájno-nò. Kàtakjeíin-nò it'aà ts'e Nainá, tǵkoá kàtakjeíin-nò it'aà ts'an.

² Ján ni'ya-lá Na'èn-na tǵin jchán i'nde ñánda ma ñikjáya. Tsà mì kixi kjoá nga k'oas'ín tǵin, mì-la tsà tà chjà k'oá xán-nò nga tǵfikindaà-nò jngoò i'nde xi tsajòn.

³ Koni s'ín kjián nga kındaà-nò i'nde, k'oáá tǵs'ín kjoíaa ñngoò k'a nga kǵko-nò, mé-ne ya ñánda kótijna, tǵkoá ya kǵtsajnakò-ná.

⁴ Jǵnò jyeé 'yaà kós'ín fǵi ndiyá ñánda tǵfia.

⁵ Tomás kitsò:

—Na'èn mìkiì 'ya-jen ñánda tǵmì. ¿Kós'ín jchà-najen ndiyá?

⁶ Jesús kitsò-lá:

—'An-ná xi ndiyá, 'an-ná xi kjoakixi, 'an-ná xi kjoabinachon. Tajngoò it'aà ts'an koma kijchò jǵnò ñánda tǵjna Na'èn-ná.

⁷ Jǵnò, tsà yaxkon-ná, tǵkoá jchaxkon-nò Na'èn-na. Tanga i'nde, jyeé yaxkon kò tǵtsachǵtsejèn-la.

⁸ Felipe kitsò:

—Takó-nájen yá-ne xi Na'èn 'mì. Tǵ k'oáá tǵin xi kojngoò-ne takòn-jen.

⁹ Jesús kiichja kitsò-lá:

—Jǵ Felipe, kǵjòtseé tǵjnakò-nò, ¿a tà kǵ'eè yaxkon-ná? Jè xi jye kǵjtseèxkon-na, jyeé kǵjtseèxkon Na'èn-na. ¿Mé-ne kòsi-ne: “Takó-nájen xi Na'èn 'mì”?

¹⁰ ¿A mì mokjeíin-lè nga 'an, yaá tǵjnakooa Na'èn-na, koá jè Na'èn-na ya tǵjnakò-na? Jǵ ñá 'én xi 'an chjàkò-nò, mìtsà kǵjòhǵtsejèn ts'an; jè Na'èn-na xi tǵjnakò-na, jè-né xi tǵsǵxá it'aà ts'an.

¹¹ Kàtakjeíin-nò nga 'an ya tǵjnakooa Na'èn-na, kò jè Na'èn-na ya tǵjnakò-na. Tsà mìkiì mokjeíin-nò it'aà ts'an, nas'ín tà jè kàtakjeíin-nò it'aà ts'e xá-na xi 'an tǵs'iaàn.

¹² Nguì okixiì xi xan-nò, jè xi mokjeíin-lá it'aà ts'an, tǵkoáá komaá-lá s'ǵiin xá xi 'an s'iaàn; skanda isaá tsato s'ǵiin, nga 'an, ján tǵfia ñánda tǵjna Na'èn-na.

¹³ Nǵta mé xi sǵjé-la Na'èn-na xi it'aà ts'an, 'an sǵkitasoàn, mé-ne jè Na'èn-na jeya kǵjna-ne it'aà ts'e Ki'ndí-lá.

¹⁴ Tsà mé xi sǵjé it'aà ts'an, 'an, sǵkitasòn-ná.

K'e nga jè Jesús kitsjaà 'én-lá nga sǵikasén jè Inima Tsjeè-lá Nainá

¹⁵ Jǵnò, tsà matsjacha-ná tǵkitasòn kǵjotǵxoma-na.

¹⁶ 'An, kǵtsi'bà-lá Na'èn-na nga kátasǵkasén jngoò-nò jè xi kòsǵko-nò, mé-ne kǵjit'aà nachrjein kǵjnakò-nò.

¹⁷ Jè xi sǵikasén-nò Na'èn-na, jè Inima Tsjeè-lá xi nguì kjoá kixi. Jǵ ñá xǵta isò'nde, mìkiì koma skoétjò nga mìkiì beèxkon, tanga jǵnò yaxkon-nò nga ya tǵjnakò-nò, kò yaá kǵjnajiin inima-nò.

¹⁸ Mìkiì sǵikǵtsajna jchàn-nò, kjoǵkon ñngoò k'a-nò nga kótijnakò-nò.

¹⁹ Tà chibaá nachrjein chija-lá nga jǵ ñá xǵta isò'nde mì tǵ kǵi skoexkon-na; tanga jǵnò jchaxkon-ná; tǵkoáá kǵtsajnakon-nò nga 'an tǵjnakon-ná.

²⁰ K'e nga kijchò nachrjein jè, jchà-nò nga yaá tǵjnakooa Na'èn-na, koá jǵnò yaá tǵtsajnakò-ná, kò 'an yaá tǵjnakò-nò.

²¹ Jè xi tǵjiin-lá kǵjotǵxoma-na tǵkoáá sǵkitasòn-né, jè-né xi matsjakeè-na. Kò jè xi matsjakeè-na tǵkoáá kòtsjakeè Na'èn-na. 'An, tǵkoáá matsjake-ná koá kokoò tsejèn-la yijo-na.

²² Kiskòngui Judas (mìtsà jè Iscariote). Kitsò-lá:

—Na'èn kós'ín koma nga tà ngajen kòkòtsejèn-nájen yijo-lè nga mìtsà jǵ ñá xǵta isò'nde kòkòtsejèn-lá yijo-lè.

²³ Kiichja Jesús, kitsò-lá:

—Jè xi matsjakeè-na s̄ikitasòn 'én-na; kò jè Na'èn-na kòtsjakeè-né. Na'èn-na kò 'an kjinchrobàchón-nájen; yaá k̄itsajnakò-jen.

²⁴ Jè xi mìkiì matsjakeè-na mìkiì síkitasòn 'én-na. J̄nà 'én xi j̄nò titsana'yà, mìtsà ts'an, ts'ée Na'èn-na xi kisikasén-na.

²⁵ 'K'oaá s'ín tibenojmí yije-nò 'én koi k'e nga tákó t̄ijnakò ìsa-nò.

²⁶ Jè xi kòsìkò-nò, jè In̄ima Tsjeè-la Nainá xi ìt'aà ts'an s̄ikásén-nò Na'èn-na, jè kòkòya yije-nò koa s̄ik̄itsjeèn-nò ngats'ì 'én xi t̄ixan-nò.

²⁷ 'An, tsjaà-nò kjoa'nchán; yaá s̄ik̄ijnaj̄nà in̄ima-nò. K'oaá s'ín tsjaà-nò koni s'ín 'nchán t̄ijnà, mìtsà k'oas'ín tsjaà-nò koni s'ín tsjá ìsò'nde. Kì makájno-nò kò k̄i tsakjoòn-jèn.

²⁸ J̄nò, jyeé kina'yà koni s'ín t̄ixan-nò nga 'an t̄ifia t̄anga kjoji ìjngòò k'a. Tsà kixi kjoa nga matsjacha-ná, j̄nò, t̄ikoaá kòtsjaá-nò nga xan-nò: Jye t̄ifia ñanda t̄jna Na'èn-na; nga jè Na'èn-na ìsaá t̄jna ìtjòn mì k'oà-ne koni 'an.

²⁹ K'oaá s'ín tibenojmí ìtjòn-nò kjoa koi, mé-ne k'e nga jye k̄itasòn, kòkjeiín-nò.

³⁰ 'Mì t̄i k̄i kjìn 'én kichjàkò ìsa-nò. Jyeé nchrobá x̄ita neí xi t̄ihotíxoma-la jè ìsò'nde; t̄anga n̄imé nga'ñó t̄jín-la nga jè s̄ik̄ijne-na.

³¹ K'oaá s'ín k̄itasòn, mé-ne skoè-ne j̄nà x̄ita ìsò'nde nga matsjake Na'èn-na nga t̄is̄ikitasoàn k̄jotíxoma xi kitsjaà-na.

'T̄is̄itjeen, t̄ikjiaán.

15

Jè xi ngui yá-la toò uva kò j̄nà xi chrja-la

¹ 'Aán ngaya-la yá je-la toò uva; jè Na'èn-na xi síxáko.

² Ngats'ì chrja-la yá uva xi ìt'aà ts'an nchrobát'aà-ne xi mìkiì ojà-la toò, Na'èn-na otet'aà-né; koa j̄nà xi ojà-la toò, ta s̄itsjeè-né, mé-ne nga ìsa ndaà kòja-la toò.

³ J̄nò, jyeé k'oas'ín k̄jòtsjeè-nò xi ìt'aà ts'e 'én xi òkixan-nò.

⁴ J̄nò, mochjeén-né nga ya k̄itsajnakò k̄jit'aà-ná koa 'an, yaá kótijnakò k̄jit'aà-nò. Jngòò chrja-la yá toò uva, mìkiì kòja-la toò tsà mìkiì 'ñó t̄jít'aà jè yá je-la. Ìt'aà tsajòn, k'oà t̄is'ín t̄jín, n̄imé xi s'een tsà mì 'an k̄itsajnakò k̄jit'aà-ná.

⁵ 'An-ná xi yá je-la toò uva, j̄nò-nó xi chrja-la. Jè xi 'an k̄ijnakò k̄jit'aà-na kò 'an kótijnakò k̄jit'aà, ndaà jchán kòja-la toò. T̄anga n̄imé xi s'een tsà titsajnat'aàxìn-ná.

⁶ Jè xi mìtsà 'an k̄ijnakò k̄jit'aà-na, k'oaá s'ín t̄jáxìn koni chrja-la yá xi n̄imé toò ojà-la; k'e nga jye x̄i, maxkó-né ìkjoàn sinchájìn ni'ín nga t̄i.

⁷ J̄nò, tsà ya k̄itsajnakò k̄jit'aà-ná, koa tsà kixi k̄itsajnakoo 'én-na xi 'an tsakoòya-nò, t̄ijé n̄ita mé xi mejèn-nò, k'oaá s'ín k̄itasòn-nò koni s'ín kixón.

⁸ K'oaá s'ín ma-ne jcha-la kjoajeya-la Na'èn-na k'e nga 'ñó k̄jìn toò kòja-nò kò k'oaá s'ín ma-ne nga 'ya-la nga kixi kjoa nga ya ch̄ita'yàt'aà-ná.

⁹ Koni s'ín matsjakeè-na Na'èn-na, j̄nò, 'an, k'oà t̄is'ín matsjake-nò. Mochjeén-né nga k'oas'ín titsajnakò k̄jit'aà kjoa tsjacha-na.

¹⁰ Tsà s̄ikitasòn k̄jotíxoma-na, yaá k̄itsajnaj̄noò k̄jit'aà kjoa tsjacha-na. 'An, k'oaá t̄is'ín s̄ikitasoàn k̄jotíxoma-la Na'èn-na kò yaá t̄ijnaj̄nà k̄jit'aà kjoatsjacha-la.

¹¹ J̄nò, k'oaá s'ín chjàkò-nò mé-ne s̄ijnaj̄ìn-ne in̄ima-nò k̄jotsja xi 'an t̄jín-na kò ngui ndaà s'e-nò k̄jotsja.

¹² K̄jotíxoma-na xi 'an tsjaà-nò, jè-né nga t̄itsjacha xinguiòo nga jngòò ìjngòò, koni 'an matsjake-nò.

¹³ Jè x̄ita xi biyaàt̄jì ngajo-la amigo-la, jè-né xi ìsa 'ñó matsjakeè x̄ikjín.

¹⁴ J̄nò-nó xi amigo-na xan-nò, tsà s̄ikitasòn koni s'ín b̄inè-nò.

¹⁵ Mì t̄i ch̄i'nda-na xan-nò nga jè ch̄i'nda mìkiì beè mé xi s'ín nei-la. Amigo ts'aán xan-nò nga jyeé tsibenojmíya yije-nò kjoa xi tsakóya-na Na'èn-na.

16 Mìtsà jñò kichjaajìin-ná, tã saà 'an jaajìin-nò. Kitsjaà-nò xá nga konguió mé-ne nga ndaà sixá-nò. Jè xá-nò sijna-né nità kjé-ne, mé-ne k'e nga mé xi sijé-là Na'èn-na xi it'aà ts'an, tsjá-nò.

17 Jè kjotíxoma xi 'ñó tibìnè-nò: Nga tjòcha jchaa xinguioo nga jngoò ìjngoò.

Mé-ne jñà xità isò'nde sítikeè-ne xità-la Jesús

18 Jñò, tsà sùjtikeè-nò jñà xità isò'nde, kàtasijìin-nò nga 'an, k'oaá s'ín kisítikeè ítjòn-na.

19 Jñò, tsà tákó ya titsajnajìin-là xità isò'nde, jñà xità isò'nde kotsjakeé-nò koni s'ín matsjakeè xità xíkjin. Tanga jñò, mìtsà tì i-ne isò'nde tsajòn. 'An jaajìin-nò nga tsachrjekajìin-nò kjoa xi tjín isò'nde, koií kjoa-la nga majtikeè-nò jñà xità isò'nde.

20 Ndaà tikítsjeèn koni s'ín kixan-nò: “Jè xi chì'nda tíjna, mìtsà isa tíjna ítjòn-la nei-la.” Koni s'ín kiitjingui kondra-na jñà xità, jñò, k'oaá tìs'ín kjitjingui kondra-nò. Tsà kisikitasòn 'én-na, tìkoaá sùkitasòn tsajòn.

21 Ngats'ii kjoa koi, k'oaá sùiko-nò jè ngatjì-la it'aà ts'an nga mìkiì beèxkon jè xi kisikasén-na.

22 'An, tsà mì-la kii j'iaa kò tsà mì-la kii tsohókoa, nì mé-la jé tjín-la. Tanga i'ndeì, mì tì kii koma kosìko-ne yijo-la kjoa ts'e jé-la.

23 Jñà xità xi 'an majtikeè-na, tìkoaá majtikeè Na'èn-na.

24 Nìmé-là jé tjín-la jñà xità tsà mì-la kii kijtseè jñà kjoxkón xi 'an kis'iaàn xi nì saá jngoò xità k'oas'ín s'ín. Tanga jyeé kijtseè kjoxkón xi 'an kis'iaàn, tanga tákó majtikeè-na tìkoa majtikeè Na'èn-na.

25 K'oas'ín tíma nga tìbitasòn 'én xi jtít'aà Xojon-la Nainá xi kota'yà xità koi, nga tsò: “Tísítikeé-na nas'ín nì mé kjoa tìsìkoa.”

26 Tanga k'e kitjojen jè xi kosìko-nò, xi 'an sikasén it'aà ts'e Na'èn-na, jè Inìma Tsjeè-la Nainá xi ngui okixi, xi it'aà ts'e Na'èn-na nchrobá-ne, jè tsjá 'én it'aà ts'an.

27 Jñò, tìkoaá k'oioo 'én it'aà ts'an nga yaá titsajnakò-ná kóni nga tàts'en-la kjoa.

16

1 K'oas'ín tibenojmí-nò kjoa koi mé-ne nga mìkiì kìnchat'aàxìn-nò nga mokjeiín-nò it'aà ts'an.

2 Kochrjekajìin-nò ya ni'ya ingo sinagoga. Tìkoa kijchò nachrjein k'e nga nità yá-ne xi sùk'en-nò k'oaá s'ín sùkítsjeèn nga Nainá nchisixá-la.

3 Koií kjoa-la nga k'oas'ín s'iin-ne nga mìkiì beèxkon Na'èn-na, tìkoaá 'an mìkiì beèxkon-na.

4 Koií k'oas'ín tìxan-nò mé-ne k'e nga kijchò nachrjein kùtsjeèn-nò nga jyeé tsi-benojmíya yije-nò. K'e nga sa ítjòn, mìkiì okixan-nò nga yaá tìjnako-nò.

Xá xi s'ín Inìma Tsjeè-la Nainá

5 Tanga i'ndeì, jyeé tìfiko-na jè xi kisikasén-na. Jñò, nijngoò chjinangui-ná, ñánda tìfia.

6 Tã saà kjoaba tíjìn inìma-nò, jè ngatjì-la koni tìxan-nò kjoa koi.

7 'Én kixií xi tìxan-nò; kjondaà tsajòn-nò nga kjián. Tsà mìkiì kjián, mìkiì koma kitjojen jè xi kosìko-nò nga i kijnako-nò. Mochjeén-né nga kjián mé-ne nga koma sikasén-nò.

8 K'e nga kitjojen jè xi kosìko-nò, jè sùkíchiya ndaà-la xità isò'nde kjoa ts'e jé, kò kjoa xi kixi tjín kò nga sindaajìin yá xi kòko-la kjo'in.

9 Jè sùkíchiya ndaà-la xità isò'nde xi kjoa ts'e jé nga mìkiì mokjeiín-la it'aà ts'an.

10 Kò sùkíchiya ndaà-la xità it'aà ts'e kjoa xi kixi tjín, nga 'an jyeé tìfia ñánda tíjna Na'èn-na. Jñò, mì tì kii jchaxkon-ná.

11 Kò sùkíchiya ndaà-la xità nga sindaajìin-la yá xi kòko-la kjo'in, koi kjoa-la nga jè xità neií xi tíhotíxoma-la isò'nde jye k'oas'ín tjínè-la nga kjo'in s'e-la.

12 Kjin jchán kjoa tjín isa xi k'jeií xi koxán-nò tanga i'ndeì mìkiì titsajnandaà nga kjoahas'en-jìin-nò.

¹³ K'e nga kitjojen jè Inima Tsjeè-la Nainá xi nguì kjoa kixi, jè siikixiya ndaà-nò xi nguì kjoa kixi nga mìtsà kjohtësjeèn ts'e siikjeén k'e nga kichja. K'oaá s'ín kichja koni s'ín tjin kjoa xi 'nchré. Keènojmi-nò kjoa xi s'e k'e nga koma iskan.

¹⁴ Jè jeya siikijna-na k'e nga tjoé-la 'én-na ikjoàn kokòya-nò.

¹⁵ Ngats'iì xi tjin-la Na'èn-na, tikoáá ts'an-ná. Koií k'oa xan-nò nga jè Inima Tsjeè-la Nainá tjoé-la 'én xi ts'an, ikjoàn kokòya-nò.

Mé-ne jè kjoa, kjotsjaá koma-ne

¹⁶ Jñò, tà chibaá nachrjein chija nga mì tì kii jchaxkon-ná; xi koma jò jàn nachrjein ìjngòò k'a jchaxkon ìjngòò k'a-ná nga jè tifikoa Na'èn-na.

¹⁷ Xita xi kota'yàt'aà-la k'eé kitsò-la xikjín:

—Kó tsòya-ne 'én xi tsò-la: tà chibaá nachrjein chija-la nga mì tì kii jchaxkon-ná, xi koma jò jàn nachrjein, ìjngòò k'a jchaxkon-ná nga jè tifikoa Na'èn-na.

¹⁸ Kitsò-la xikjín:

—¿Kó tsòya-ne 'én xi tsò-la: “Ta chibaá nachrjein chija”? Mikii fiya-ná koni s'ín chja.

¹⁹ Jesús, tik'eé kjòchiya-la nga jñà xita-la mejèn-la skonangui-la kó tsòya-ne 'én xi kichja. K'eé kitsò-la:

—¿A titsachjinangui-la xinguiòò kó tsòya-ne koni s'ín kàxan-nò: Tà chibaá nachrjein chija-la nga mì tì kii jchaxkon-ná, xi koma jò jàn nachrjein ìjngòò k'a jchaxkon-ná?

²⁰ Nguì okixi xi xan-nò, jñò, ba s'e-la inima-nò, jchihindáya-nò, tanga jñà xita isò'nde tsjaá s'e-la inima-la. Jñò, nas'ín ba s'e-nò, jè kjoa ba-nò, nga koma iskan, kjoa tsjaá koma-ne.

²¹ Jngòò chjoón, k'e nga chóya nachrjein-la nga 'beé ki'ndí, tse kjo'in síkjeín. Tanga k'e nga jye ts'iin jè ki'ndí, mì tì kii síkítsjeèn-ne kjo'in xi kasíkjeín jè chjoón. Tà saá tà kjotsjaá s'e-la nga jngòò xita kats'iin ì isò'nde.

²² Okixi-né it'aà tsajòn, i'ndeì, ba tjin-nò, tanga koma iskan, k'e nga skoexkon ìjngòò k'a-nò, k'e-né nga 'ñó tsja koma-la inima-nò. Jè kjotsja-nò niyá xi kjoaáxìn-nò.

²³ K'e nga kijchò nachrjein nga jchaxkon ìjngòò k'a-ná, nimé xi chjinangui-ná. Okixi xi xan-nò, nitá mé xi sijé-la Na'èn-na xi it'aà ts'an, tsjá-nò.

²⁴ Skanda i'ndeì, ni sà mé xi nijé xi it'aà ts'an; tijé, tjoé-nò, mé-ne nga nimé xi chijat'aà-la kjotsja xi tjiin inima-nò.

Mé kjoa-ne nga Jesús jye kisikijne-la kjoa xi tjin isò'nde

²⁵ “Én xi tichjàkò-nò, tà kjoa mangásòn-né tìsikjeén. Tanga kijchò nachrjein k'e nga mì tì kii kjoa mangásòn kichjàkò-nò. Kènojmi kixi-nò it'aà ts'e Na'èn-na.

²⁶ Nachrjein jè, jñò, it'aà ts'aán sijét'aà-la Na'èn-na. 'An, mì tì kii kiti'bà-tji-nò xi it'aà tsajòn,

²⁷ nga jè sobà Na'èn-na matsjakeè-nò. Koií matsjakeè-nò nga jñò, tikoáá matsjacha-ná kò mokjeiín-nò nga it'aà ts'e Nainá inchrobà-na.

²⁸ Yaá itjokàt'aà-la Nainá nga inchrobà ì isò'nde. I'ndeì siikijna-ná isò'nde, tifikoo ìjngòò k'a-na Na'èn-na.

²⁹ Jñà xita xi kota'yàt'aà-la kitsò-la:

—I'ndeì, tinokjoà kixi-né, nimé kjoa mangásòn tinikjín.

³⁰ I'ndeì, jyeé 'ya-jen nga ji machiya yijeé-lè nitá mé kjoa-ne. Mikii mochjeén tsà yá xi skonangui-lè. K'oaá ma-ne nga mokjeiín-najen nga it'aà ts'e Nainá inchrobà-ne.

³¹ Kichja Jesús, kitsò-la:

—I'ndeì, ¿a mokjeiín-nò?

³² Jyeé kjomeè bijchó hora, tijé-ne hora jè, jñò, tsjohoba-nò nga jngòò ìjngòò; onguí-nò ni'ya-nò; tajngòò síkijna-ná. Tanga mìtsà tajngòò tijná, jè tijnakò-na Na'èn-na.

³³ K'oaá s'ín tichjàkò-nò mé-ne it'aà ts'an s'e-nò kjoa'nchán. Koa ì isò'nde kjo'iin s'e-nò, tanga 'ñó t'è-là takòn. 'An, jyeé kisikijne-la jñà kjoa xi tjin isò'nde.

17

K'e nga jè Jesús tsibítsi'batjì jǎà xítà xi kota'yàt'aà-la

¹ Jesús, k'e nga jye k'oas'ín kiichja, kiskoòtsejèn ngajmì, kitsò:

—Na'èn, jyeé ijchò hora-la, jeya tikíjmi Ki'ndí-lè, mé-ne jè Ki'ndí-lè tikoá ngaji, jeya sǐikíjna-lè,

² koni s'ín kits'ii-la kjotíxoma Ki'ndí-lè it'aà ts'e ngats'ii xítà nga tjí'nde-la nga tsjaà-la kjoabinachon nítà kjé-ne ngats'ii xítà xi jì kits'ii-la.

³ Jè kjoabinachon xi tjín nítà kjé-ne, jè-né nga skoexkon-lè, nga ta jì tajngoò-né xi kixi kjoa nga Nainá 'mì-lè, tikoá skoexkon Jesucristo xi Ki'ndí-lè xi xó jì kinikasén-ne.

⁴ 'An, jeya kisikíjna-lè i isò'nde, nga jyeé kisíjngoàá xá xi jì kiningatsja-ná.

⁵ Na'èn, i'nde, k'oas'ín jeya tikíjna-ná nga nguixkoìn koni tjín kjoa jeya xi kis'e-na nga tsohótijnat'aà-lè k'e nga tikj'eè sindaà isò'nde.

⁶ Jǎà xítà isò'nde xi xó jì kichjaàjìin-ne nga 'an kiníngatsja-ná, jyeé tsibenojmí-la it'aà tsiji. Xítà tsiji-né, nga jì kits'ii-ná, kò nchisikitasòn-né koni tsò 'én-lè.

⁷ Jǎà xítà koi, i'nde, jyeé beè nga ngats'ii kjoa xi 'an kits'ii-ná, it'aà tsiji nchrobá-ne.

⁸ 'An, tsibenojmí-la jǎà 'én xi jì kits'ii-ná; jǎà xítà koi, jahas'en-jìin-la; jyeé kijtseè nga kixi kjoa nga it'aà tsiji inchrobà-na. Mokjeiín-la nga jì kinikasén-ná.

⁹ Jǎà xítà koi, bìtsi'batjià. Mìtsà jǎà xítà isò'nde bìtsi'batjià; tà jǎà-né xi jì kits'ii-ná, nga xítà tsiji-né.

¹⁰ Ngats'ii xítà xi ts'an, tikoá tsiji-né, koá jǎà xítà xi tsiji, tikoáá ts'an-ná. It'aà ts'eé xítà koi, nga jeya ótijnà.

¹¹ 'An, mì tì kii tse kótijnà-na i isò'nde; tanga jǎà xítà koi, ií kítsajna isò'nde. 'An, yaá tífikon-lè nga ya kótijnako-lè. Na'èn tsjeè, ndaà tikindii xítà koi nga kò nga'ño-lè, tijè-ne nga'ño xi jì kits'ii-ná mé-ne nga ndaà kítsajnajtín-ne koni jǎà ndaà titsajnakjoáá ngaji kò 'an.

¹² K'e nga tsohótijnakoáa i isò'nde, ndaà kisikindaa nga kò nga'ño-lè, tijè-ne nga'ño xi jì kits'ii-ná. Njingoò xi kichijà, tà jé kichijà jè xi k'oas'ín tjínè-la nga k'oas'ín komat'in, mé-ne kítasòn-ne koni s'ín tíchja Xojon-lè.

¹³ 'Tanga i'nde yaá tífikon-lè ñánda tijni. Jǎà 'én xi tìchja k'e nga tákó i tijnàa isò'nde, koi-né nga 'ño ndaà kátasijìin iníma-la jǎà xítà-na, jè kjotsja xi tjìin ts'an.

¹⁴ 'An, jyeé tsibenojmí-la 'én-lè jǎà xítà-na; tanga jǎà xítà isò'nde síjtikeè-né, koií-né nga mìtsà tì xítà ts'e isò'nde-ne, tikoáá 'an, mìtsà tì i isò'nde chjà-na.

¹⁵ Mìtsà xan-lè nga chjàxìn i isò'nde, tà jè-né xi xan-lè nga tikindii it'aà ts'e xítà neí.

¹⁶ Koni 'an mìtsà i isò'nde chjà-na, tikoáá jǎà xítà-na mìtsà tì i-ne isò'nde chjà-ne.

¹⁷ It'aà ts'e kjoa kixi-lè, tsjeè tikítsajni nga nguì xítà tsiji kátama; nga jǎà 'én-lè, nguì kjoa kixi-né.

¹⁸ Jì, koni s'ín kinikasén-ná i isò'nde, 'an, k'oáá tìs'ín síkasén jǎà xítà-na it'aà ts'e xítà isò'nde.

¹⁹ Xi kjondaà ts'e xítà-na, 'an, jyeé tsjeè tìsngatsja-lè yijo-na mé-ne jǎà xítà-na tikoá tsjeè sìnngatsja-lè yijo-la xi it'aà ts'e kjoa kixi-lè.

²⁰ 'Mìtsà tà jǎà bìtsi'batjià jǎà xítà ts'an; tikoáá bìtsi'batji-ná jǎà xítà xi iskan kòkjeiín-la it'aà ts'an k'e nga kji'nchré 'én-na xi keènojmi-la jǎà xítà-na,

²¹ mé-ne ngats'ii jǎà xítà koi, tà jngoò koma-ne, koni jǎà nga jngoò ma-ná koni s'ín tijnako-ná ngaji Na'èn, tikoá 'an tijnako-lè. Jǎà xítà koi, tikoá kátítsajnakò-ná mé-ne jǎà xítà isò'nde kòkjeiín-la nga jì kinikasén-ná.

²² Jè kjoajeya xi jì kits'ii-ná, 'an, k'oáá tìs'ín kitsjaà-la jǎà xítà-na mé-ne nga tà jngoò koma-ne koni jǎà nga tà jngoò ma-ná.

²³ 'An tijnakoáa jǎà xítà-na kò jì tijnako-ná, mé-ne nga nguì jngoò koma-ne. K'oáá s'ín skoe-ne jǎà xítà isò'nde nga jì kinikasén-ná kò tikoá skoe nga matsjachi jǎà xítà-na koni s'ín matsjacha-ná 'an.

²⁴ Na'èn, koií xi mejèn-na nga jñà xita xi ji kits'ii-ná ya kítsajnakò-na ñánda kótijna, mé-ne nga skoe-ne kjoa jeya-na xi ji kits'ii-ná nga tikoā matsjacha-ná skanda k'e nga tikj'eè sindaà isò'nde.

²⁵ Na'èn xi xita kixi 'mì-lè, jñà xita xi tjin isò'nde, mikiì beèxkon-lè, tanga 'an, beèxkoòn-lè. Tikoā jñà xita xi ji kits'ii-ná jye kisijiin-la nga ji kinikasén-ná.

²⁶ Jñà xita-na jyeé tsibenojmí yije-la it'aà tsiji; tákó saá kènojmi isa-la mé-ne jè kjoatjòcha xi tjin-lè it'aà ts'an, tikoā s'e-la jñà xita koi, koā 'an sobà kótijnajñaà inima-la.

18

*Kós'in komà k'e nga kitsobà'ño Jesús xita kondra-la
(Mateo 26:47-56; Marcos 14:43-50; Lucas 22:47-53)*

¹ Jesús k'e nga jye okitsò, ikjoàn itjo, kiiko xita xi kota'yàt'aà-la ján xijngoàà xajngá nandá xi 'mì Cedrón. Ya kijna jngoò i'nde ñánda kjin skaya tsojmi títje; yaá jahas'en-jiin Jesús ko xita-la.

² Judas, xita xi siingatsja Jesús it'aà ts'e xita kondra-la, jyeé beèxkon i'nde jè, nga Jesús, kjin k'a ya chixoñako xita xi kota'yàt'aà-la ya i'nde jè.

³ Judas, kjin soldado ijchòko, tjiko xita xi síkinda ingo xi jñà kisikasén xita sko-la no'miì ko xita fariseo; 'ya ni'in linterna, 'ya kicha ndojò, 'ya ni'in nicha.

⁴ Jesús, nga jyeé tjiin yije-la kjoa xi komat'in, nitoon itjo, kitsò-la:

—¿Yá xi binchaàtsjioè?

⁵ Xita koi, kitsò:

—Jè Jesús xi Nazaret i'nde-la.

Jesús kitsò-la:

—'An-ná.

Judas, xita xi tisingatsja Jesús, tikoá ya tsóbajiin-la.

⁶ K'e nga kitsò Jesús: “'An-ná”, xita koi, kiì-ne its'in, chixòt'aà nangui.

⁷ Jesús, jngoò k'a kiskònangui-la kitsò-la:

—¿Yá xi binchaàtsjioè?

Xita koi kitsò:

—Jè Jesús xi Nazaret i'nde-la.

⁸ Kiichja Jesús, kitsò-la:

—Jyeé, k'oā tixan-nò, 'an-ná. Tsà 'an binchaàtsji-ná, tjiin'nde-là jñà xita-na xi i'nga nga kàtji-ne.

⁹ K'e nga okitsò Jesús, koií tsitasòn 'én xi jè kiichja k'e nga kitsò: “Na'èn, xita xi ji kits'ii-ná, nijngoò kichijà.”

¹⁰ Jè Simón Pedro, 'ya jngoò kicha ndojò; tsachrje; tsajà-la xita xi 'mì Malco, xita chi'nda-la no'miì ítjòn; tsatet'aà líká kixi-la.

¹¹ Jesús kitsò-la jè Simón Pedro:

—Tikájnátjò-ne kicha ndojò-lè. Tjaya-ne chrjoa-la. Jè kjoa ts'e kjo'in xi tsjá-na Na'èn-na koni s'in mejèn-la, ¿a mìtsà tjinè-la nga siikitasoàn?

*K'e nga jè Jesús tsibijna nguixkon Anás
(Mateo 26:57-58; Marcos 14:53-54; Lucas 22:54)*

¹² Jñà xita soldado ko soldado ítjòn ko xita judío xi síkinda ingo ítjòn, kitsobà'ño Jesús, ikjoàn chinchá na'ño.

¹³ Itjòn kiiko ján ñánda tijná ni'ya-la Anás, nga níxáya-la ma jè Caifás xi no'miì ítjòn tijná nó jè.

¹⁴ Jè Caifás xi okitsò-la jñà xita judío nga kitsò-la: Mochjeén-né nga tà jngoò xita kàtiyaàtji-la naxandá.

*K'e nga jè Simón Pedro k'oaá kitsò nga mìkì beèxkon Jesús
(Mateo 26:69-70; Marcos 14:66-68; Lucas 22:55-57)*

¹⁵ Simón Pedro t̄jngui-là Jesús kò ìjngò sà x̄it̄a xi kota'yàt'aà-là Jesús, jè xi beèxkon jè nò'miì ìt̄jòn, jahas'en-kò Jesús yà nd̄itsin ni'ya-là nò'miì ìt̄jòn.

¹⁶ Tanga jè Pedro, ján kiskoòñà nd̄itsiaán; yáá tsibìjna xotjoa-là ni'ya. Jè x̄it̄a-là Jesús xi ìjngò, k'eé itjo ìjngò k'a, k̄ichja-là jè chjoón xi síkinda xotjoa-là ni'ya, ìkjoàn kisikas'en Pedro.

¹⁷ Jè chjoón xi síkinda xotjoa-là ni'ya, kitsò-là Pedro:

—Ngaji, ¿a mìtsà t̄ikoa yà ch̄ita'yàt'aà-là x̄it̄a jè?

Jè Pedro, kitsò:

—Majìn.

¹⁸ Jñà x̄it̄a ch̄i'nda kò x̄it̄a xi síkinda ìngò nchat'aà-là ni'ín xi jñà tsibítse nga nchisíhiso-là yijo-là nga 'ñó 'nchán tíma. Jè Pedro t̄ikoa yà síjna nga tíshiso-là yijo-là.

Mé 'én xi k̄ichja Jesús yà nguixkon nò'miì ìt̄jòn

(Mateo 26:59-66; Marcos 14:55-64; Lucas 22:66-71)

¹⁹ Jè nò'miì ìt̄jòn tsibítse'ia nga kiskònangui-là Jesús ìt'aà ts'e x̄it̄a xi kota'yàt'aà-là kò ìt'aà ts'e 'én xi okóya.

²⁰ K̄ichja Jesús kitsò-là:

—'An, kichjàjìn osen-là x̄it̄a nga títsa isò'nde. Kjit'aà n̄achrjein tsakoòya yà ni'ya ìngò sinagoga kò yà nd̄itsin ìngò ìt̄jòn ñánda bixoña yije x̄it̄a judío. Nímé 'én xi t̄ichjà 'ma.

²¹ ¿Mé-ne 'an ch̄jinangui-ná? Jñà ch̄jinangui-là x̄it̄a xi k̄i'nchré-na, mé 'én xi tsakoòya-là. Jñà x̄it̄a koi, ndaà t̄ijìn-là kó kixan-là.

²² K'e nga jye okitsò Jesús, jngò x̄it̄a xi síkinda ìngò ìt̄jòn síjnat'aà chraña-là, kisijts'ìn-t'aà k̄jín Jesús, kitsò-là:

—¿Mé-ne kotsò-ne 'én xi nokjoàkoi nò'miì ìt̄jòn?

²³ Jesús k̄ichja kitsò-là:

—Tsà ch'o tsò 'én xi t̄ichjà, koatìn-ná, kó xán. Tanga tsà ndaà tsò 'én xi t̄ichjà, ¿mé-ne ti'bé-ná?

²⁴ Nga k'oas'ín t̄jít'aà'ñó Jesús, jè Anás kisikasén ñánda tíjna jè Caifás jè xi nò'miì ìt̄jòn tíjna koi n̄achrjein.

K'e nga jè Pedro ìjngò k'a kitsò nga mìkì beèxkon jè Jesús

(Mateo 26:71-75; Marcos 14:69-72; Lucas 22:58-62)

²⁵ Jè Pedro yà síjnat'aà-là ni'ín nga tíshiso-là yijo-là; jñà x̄it̄a koi kiskònangui-là, kitsò-là:

—Ngaji, ¿a mìtsà t̄ikoa yà ch̄ita'yàt'aà-là x̄it̄a jè?

Jè Simón Pedro tsibìjna'ma, kitsò:

—Majìn, mì yáá kota'yàt'aà-là.

²⁶ Ìkjoàn kiskònangui ìjngò-là x̄it̄a ch̄i'nda-là nò'miì ìt̄jòn; x̄ikjín ma x̄it̄a xi jè Pedro tsatet'aà líká-là, kitsò-là:

—Ngaji, yáá kijtseèxkon-lè kò Jesús yà ì'nde ñánda t̄jín tsojmì t̄jè.

²⁷ Jè Pedro, ìjngò k'a tsibìjna'mat'in Jesús, ìkjoàn n̄itoón kiskindàya kóxtí.

K'e nga tsibìjna Jesús yà nguixkon Pilato

(Mateo 27:1-2, 11-14; Marcos 15:1-5; Lucas 23:1-5)

²⁸ K̄ikò-ne Jesús yà ni'ya-là Caifás skanda ján ni'ya osen ts'e x̄itaxá ìt̄jòn ts'e Roma. Nga jye t̄is'e isén, jñà x̄it̄a judío mìkì jahas'en ni'ya osen koni s'ín t̄jín k̄jotíxoma-là nga majìn-là nga s̄iikits'ón yijo-là mé-ne koma k̄okjèn-ne s'eí paxkò.

²⁹ K'oaá komà-ne nga itjo ni'ya osen jè Pilato, kiskònangui-là jñà x̄it̄a koi, kitsò-là:

—¿Mé kjoa xi ongui-nò x̄it̄a jè?

³⁰ Jñà x̄it̄a judío kitsò:

—Tsà nímé jé t̄jín-là, mì-la jì t̄itsanìngatsja-lèjèn.

³¹ K'eé kitsò Pilato:

—Tanguíko, jñò tindaàjìin-là koni s'ín tjín kjotíxoma-nò.

Jñà xità judío kitsò:

—Ngajen mìkìlì tjí'nde-najen nga taxkì sik'en jngoò-jen xità.

³² K'oas'ín komà-ne nga tsitasòn 'én xi kitsò Jesús k'e nga tsibénojímí kós'ín komat'in k'e nga kiyá.

³³ Pilato, ìjngoò k'a jahas'en ni'ya osen, kiichja-là Jesús, kitsò-là:

—¿A jì-né xi 'mì-lè xitàxá ítjòn-là xità judío?

³⁴ Kiichja Jesús, kitsò-là:

—¿A tà kjohítsjeèn tsiji-né nga k'oa tisi, a xi kj'ejí xitàá okitsò-lè ít'aà ts'an?

³⁵ Pilato kitsò:

—'An, mìtsà xità judío-ná. Jñà xità naxandá-lè kò xità sko-là nò'miì, jñà xi kòfi síngatsja-na ít'aà tsiji. ¿Mé kjoa xi chinchaàtsji?

³⁶ Kiichja Jesús kitsò:

—Mìtsà ì isò'nde tjínè-na nga kotìxoma. Tsà k'oaá-la s'ín tjín jñà xità-na kosìko-na nga mì ya kongatsja ts'e xità judío. Tanga mìtsà ì kotìxoma.

³⁷ Pilato, ìjngoò k'a kiskònangui-là kitsò-là:

—Ngaji, ¿a xitàxá ítjòn 'mì-lè?

Kiichja Jesús kitsò:

—Ngajì xi osi nga xitàxá ítjòn 'mì-na. Koií xá kits'iìn-na kò koií xá j'i-na ì isò'nde, mé-ne nga kènojmiá ít'aà ts'e kjoa kixi. Ngats'ì xi fit'aà-là kjoa kixi, 'nchré 'én-na.

³⁸ Pilato kiskònangui, kitsò-là:

—¿Mé-né xi 'mì-là kjoakixi?

K'e nga kitjoònè kjoa Jesús nga kiyá

(Mateo 27:15-31; Marcos 15:6-20; Lucas 23:13-25)

K'e nga jye kiskònangui Pilato, ìjngoò k'a itjo ni'ya osen. Kiikon xità judío, kitsò-là:

—Xità jè, nìmé jé xi sakót'aà-na ít'aà ts'e.

³⁹ Jñò, k'oaá s'ín tjín kjotíxoma-nò k'e nga bitjo s'eí Paxko: bijnandeí jngoò xità xi ndayá títsajna. ¿A mejèn-nò nga kàtìjnandeí jè Xitàxá Ítjòn-là xità judío?

⁴⁰ Ìjngoò k'a 'ñó jchán kiichja kóhotjín xità judío, kitsò:

—Majìn, jè Jesús, mìkìlì kíjnandeí, jè Barrabás kíjnandeí.

Tanga jè Barrabás xità chijé-né.

19

K'e nga jñà xità kisìjé nga krò kàtasit'aà jè Jesús

¹ Pilato kitsjaà-là okixi jñà xità soldado nga tsajá-là Jesús.

² Jñà soldado tsibíndaà jngoò corona na'yá, tsibí'a sko Jesús, ìkjoàn kisìkákjá jngoò nikje sko.

³ Kitsò-là:

—A ta k'oaá ndaà-ne jì xi xitàxá ítjòn-là xità judío 'mì-lè.

Ìkjoàn kisìjts'iìn-t'aà kjin.

⁴ Pilato itjoko ìjngoò k'a ya ndjtsin, kitsò-là jñà xità naxandá:

—Chítsejèn-là, ì j'ìkò ìjngoò k'a-nò mé-ne nga jchà-nò nga nìmé jé sakót'aà-na ít'aà ts'e xità jè.

⁵ Itjo Jesús, tjí'a corona na'yá sko; ìkjá nikje xi sko kjoàn; Pilato kitsò-là jñà xità naxandá:

—Ì síjna xità jè.

⁶ K'e nga kijtseèxkon jñà xità sko-là nò'miì kò jñà xità xi síkinda ìngo, tsibíts'ia nga 'ñó jchán kiichja, kitsò:

—¡Tjat'aà krò! ¡Tjat'aà krò!

K'eé kitsò jè Pilato:

—Jñò, sobà tanguíkoo nga tjat'aà krò. 'An, nìmé jé xi sakót'aà-na ìt'aà ts'e xità jè.

⁷ Kiìchja jñà xitàxá-là xità judío, kitsò-là Pilato:

—Ngajen, tjín jngoò-najen kjotixoma; k'oaá s'ín tíchja kjotixoma tsajen: Xità jè, mochjeén-né nga kiyá, koií kjoa-là nga Ki'ndí-là Nainá tsò-là yijo-là.

⁸ Pilato, k'e nga kiì'nchré 'én koi, isaá 'ñó ndaà kitsakjòn.

⁹ Pilato, jahas'en ìjngoò k'a ni'ya osen, kitsò-là Jesús:

—¿Ñánda-ne ì'nde-lè?

Tanga Jesús, mikiì kiìchja-là.

¹⁰ Pilato kitsò-là:

—¿Mé-ne mì nokjoà-ná? ¿A mì 'ya-jèn? 'An, tjí'ndeé-na nga kot'aà-lè krò, tìkoa tjí'ndeé-na nga siikíjnandeií-lè.

¹¹ Kiìchja Jesús kitsò-là:

—Nimé-la xi tjí'nde-lè ìt'aà ts'an tsà mìtsà Nainá kitsjaà-lè. Jè xità xi síngatsja-na ìt'aà tsiji, isaá tse jé tjín-là mì k'oa-ne koni ji.

¹² Tijè-ne hora, jè Pilato mejèn-là siikíjnandeií Jesús tanga jñà xità judío isaá 'ñó kiìchja kitsò:

—Xità jè, tsà siikíjnandeií-ne, mìtsà amigo tsiji ma César xi xitàxá ítjòn tjina ts'e Roma. Nita yá-ne xi xitàxá ítjòn tsò-là yijo-là, kondra ts'eé César.

¹³ Pilato, k'e nga kiì'nchré 'én koi, kiìko Jesús ján nditsiaán; tsibijnasòn íxile-là ya ì'nde ñánda 'mì Isòn Chrjó Ndajò; Gabatá 'mì nga 'én hebreo.

¹⁴ Ta jngoò nachrjein chija-là ts'e s'eí Paxko; jyeé kjomeè bijchó nchisen. Pilato, kitsò-là jñà xità judío:

—ìl síjna xitàxá ítjòn-nò!

¹⁵ Jñà xità judío 'ñó jchán kiìchja kitsò:

—¡Kàtabiyaà! ¡Kàtabiyaà! ¡Tjat'aà krò!

Pilato kitsò-là:

—Xitàxá ítjòn-nò, ¿a krò kót'aà?

Jñà xità sko-là no'miì, kiìchja kitsò:

—Ngajen, tsjin-najen xitàxá ítjòn xi kj'eií, tà jè ta jngoò César.

¹⁶ Pilato kisingatsja nga kátát'aà krò. Jñà xità koi kiìko Jesús.

K'e nga kisit'aà krò Jesús

(Mateo 27:32-44; Marcos 15:21-32; Lucas 23:26-43)

¹⁷ Jesús itjo, 'yajen krò-là; yaá kiìko ya ì'nde ñánda 'mì ì'nde Sko Mik'en, xi 'én hebreo Gólgota 'mì.

¹⁸ K'e nga ijchòko ì'nde jè, tsohót'aà krò, ko ngui jò xità xi kj'eií, íjngó íjngó kisinchaàt'aà-là nga ngobà ngobà. Jè Jesús kisasíjna jngoò osen-là.

¹⁹ Pilato kiskii 'én xi tsohót'aà sko krò xi tsò: “Jesús xi Nazaret ì'nde-la, Xitàxá ítjòn-la xità judío.”

²⁰ Jñà 'én koi, kjìn xità judío tsibíxkejiìn; nga ya ì'nde ñánda kisit'aà krò Jesús, yaá chrañat'aà-là naxandá. 'Én hebreo tjít'aà ko 'én griego, ko 'én latín.

²¹ Jñà xità sko-là no'miì ts'e xità judío, kitsò-là jè Pilato:

—Ki k'oaá s'ín chjiì xi tsò: “Xitàxá ítjòn-la xità judío.” K'oaá s'ín chjí xi tsò: “Xità jè, k'oaá tsò nga jè-né xi xitàxá ítjòn-la xità judío.”

²² Kiìchja Pilato kitsò:

—Koni s'ín jye kàkjiaà, k'oaá s'ín kàtjna.

K'e nga jñà soldado, kisijòya nikje-là Jesús

²³ Jñà soldado k'e nga jye tsohót'aà krò Jesús, tsibíxkó nikje-là; ñijòn ya kis'iìn. Íjngó íjngó ya kitsjaà-là xíkjin. Tìkoa kiskoé jè nikje ndojò-là xi x'ió kji, mikiì kitjahaña, tà kijna ndojò-né.

24 Kitsò-la xíkjin:

—Mìkiì s̄ixajndá; tà s̄iskáko-ná yá ts'e koma.

Jè kjoa koi k'oaá s'ín tsitasòn koni s'ín tíchja Xojon-la Nainá nga tsò:

Nikje-na kisika'bí-la xíkjin;

jè nikje ndojò-na tà kisiskáko-né.

Jñà soldado, k'oaá kis'iin.

25 Yaá nchat'aà chraña-la krò nea-la Jesús ko ndichja ko María chjoón-la Cleofas ko María Magdalena.

26 Jesús, k'e nga kijtseèkon nea-la ko jè xita xi kota'yàt'aà-la xi 'ñó matsjakeè, kitsò-la nea-la:

—Chjoón, ya síjna ki'ndí-lè.

27 Ikjoàn kitsò-la jè xita xi kota'yàt'aà-la xi 'ñó matsjakeè:

—Ya síjna nea-lè.

Skanda tik'e-ne jè xita jè kiskoétjò jè nea-la ya ni'ya-la.

K'e nga k'en Jesús

(Mateo 27:45-56; Marcos 15:33-41; Lucas 23:44-49)

28 Xi jye komà, Jesús kijtseè nga jye tsitasòn yije, kitsò:

—Xínda-na.

K'oaá s'ín tsitasòn koni s'ín tjít'aà Xojon-la Nainá.

29 Yaá tjna jngoò tíjí xi tíjya nandá vinagre. Kiskoé tsanga, kisika'nchi-ne vinagre, ikjoàn tsibi'a jngoò yá, tsijmeé'a chraña-la tso'ba Jesús.

30 Jesús, k'e nga jye kits'ìi nandá vinagre, ikjoàn kitsò:

—Jyeé tsitasòn yije.

Tsibíjnajteén sko, k'en.

Mé-ne kiskix'akjá-ne nisin-la Jesús

31 Tà jngoò nachrjein chija-la ts'e s'eí Paxko; jñà xita judío majin-la nga ya sitjobát'aà krò yijo-la xita xi jye k'en jè nachrjein nikjáya (koií kjoa-la nga 'ñó xkón jè s'eí Paxko). Tsibítsi'ba-la Pilato nga kàtatsjá okixi mé-ne nga kàtakján-ne nindaà chrjomí-la jñà xita xi tjoót'aà krò, ikjoàn kàtakjínájen-t'aà krò.

32 Kii jñà soldado nga tsakján nindaà chrjomí-la jè xi síjna ítjòn; k'oaá tí kisiko jè xi jngoò xi ngàsòn taña kisit'aà krò.

33 Tanga k'e nga ijchò kinchat'aà-la Jesús, kijtseè nga jye k'en. Mikiì tsakján nindaà chrjomí-la.

34 Tanga jngoò soldado tsibísekjá nisin-la jngoò kicha xi 'mì lanza. Ikjoàn itjo jní ko nandá.

35 Jè xi kijtseè kjoa koi, jè-né xi tsjá 'én nga kixi kjoa, ko jè 'én xi tsjá, ngui 'én kixi-né, ndaà tíjiiin-la nga 'én kixií xi bénojmi, mé-ne jñò tikoa kokjeiín-nò.

36 Kjoa koi, k'oaá s'ín komà mé-ne nga tsitasòn-ne koni s'ín tjít'aà Xojon-la Nainá nga tsò: “Nijngoò nindaà-la kokján.”

37 Tikoaá tjít'aà-né ñanda tsò: “Jè skótsejèn-la jè xi kiskix'akjá nisin-la.”

K'e nga kisihiijn Jesús

(Mateo 27:57-61; Marcos 15:42-47; Lucas 23:50-56)

38 K'e nga jye komà kjoa koi, José xi ya naxandá Arimatea i'nde-la, tikoaá jè xita xi kota'yàt'aà-la Jesús tanga tà tsajmeè'ma-né nga jñà tsakjón-la xita judío. Tsibítsi'ba-la Pilato nga kàtatsjá'nde-la nga kjiko yijo-la Jesús. Pilato kitsjaà'nde-né. José kiskónájen-t'aà krò yijo-la Jesús, ikjoàn kiiko.

39 Tikoa ijchò Nicodemo, jè xita xi ijchòkon jngoò k'a Jesús k'e nga jñò. 'Ya chijo jne xi tsjáiin-la chijo xi 'mì mirra ko áloe. Ma-la tsà katé kilo chijo xi 'ya.

⁴⁰ José kò Nicodemo, kiikò yijo-la Jesús. Kisikájtéjno nikje xi tjin-la chijo xi ndaà jne koni s'in tjin kjotixoma-la jña xita judío k'e nga sihijiin mik'en.

⁴¹ Ya i'nde ñánda kisit'aà krò Jesús, tjin jngoò i'nde ñánda titje tsojmi tje; yaá tix'a jngoò ngajo itsjó-la mik'en xi ngui xitse, ñánda ni saà jngoò mik'en sijnaya.

⁴² Yaá kisikájna yijo-la Jesús nga isa chrañat'aà nga jyeé tímats'ia nachrjein nìkjáya ts'e xita judío, jè víspera-la s'eí Paxko.

20

K'e nga jaáya-la Jesús it'aà ts'e kjoa biyaà

(Mateo 28:1-10; Marcos 16:1-8; Lucas 24:1-12)

¹ Jè nachrjein nga tàts'en xomàna, jè María Magdalena 'ño tajñòya kiì, nga kiì katsejèn-la itsjó ñánda kisihijiin Jesús; tákó jño choòn k'e nga kiì. K'e nga ijchò, kijtseè nga jye kitjaàxin ndajo xi tíchjoàjto-ne jè ngajo itsjó.

² K'eé tsangachikon, kiikon ñánda tjna Simón Pedro kò xita xi ijngoò xi tikoà ya kota'yàt'aà-la Jesús, jè xi 'ño matsjakeè, kitsò-la:

—Jña xita, jyeé kiikò jè Na'èn-ná. Mikìl 'yaá ñánda kisikájna.

³ Pedro kò xita xi ijngoò xi ngàsòn ya kiskoòta'yàt'aà-la Jesús, kiì katsejèn-la jè ngajo itsjó.

⁴ Ingajò xita koi, 'ño jchán tsangachikon, tanga jè xi ijngoò, isaá 'ño tsangachikon mì k'oaà-ne koni jè Pedro. Isaá ítjòn ijchò ya ngajo itsjó-la Jesús.

⁵ K'e nga tsasiñia kiskoòtsejèn-s'en ngajo, kijtseè nga tà jña nikje-la kjioò, tanga mìkiì jahas'en-ngui ya ngajo.

⁶ Ikjoàn ijchò tjingui Simón Pedro, jè-né xi jahas'en-ngui ngajo itsjó, tikoà kijtseè nga tà jña nikje-la kjioò.

⁷ Tikoà kijtseè jè nikje xi kisijtjéjìn skò Jesús. Mìtsà ya tsátijiin-la nikje xi i'nga. Xin kijna nga tíxkóya-la.

⁸ K'eé jahas'en-ngui xita xi ijngoò, jè xi ijchò ítjòn; kijtseè kjoa xi komà, kòkjeiín-la.

⁹ Kj'eé kiì ndaà machiya-la nga k'oas'in tíchja Xojon-la Nainá nga jè Jesús, k'oaà s'in tjinè-la nga kjoáya-la it'aà ts'e kjoabiyaà.

¹⁰ Jña xita xi kota'yàt'aà-la Jesús, kiì-ne ni'ya-la.

K'e nga jè Jesús tsakó-la yijo-la jè María Magdalena

(Marcos 16:9-11)

¹¹ Tanga jè María Magdalena, yaá tsibijna nditsiaán nga tíkjindáyat'aà-la ngajo itsjó; k'e nga tíkjindáya tsasiñia nga kiskoòtsejèn-s'en jè ngajo itsjó-la Jesús.

¹² Kijtseè jò àkjale xi nikje chroba íkjá. Jngoò tjna ya skò ñánda kisijna yijo-la Jesús; jè xi ijngoò ya tijnangui ndsokò.

¹³ Jña àkjale, kitsò-la María:

—Ji ndí chjoón, ¿mé-ne tìchhindáya-ne?

Jè María kitsò:

—Koiì tikjindáya-na, jyeé kiikò xita yijo-la Na'èn-na; mìkiì be ñánda kisikájna.

¹⁴ María k'e nga okitsò, kisikátji skò, kijtseè Jesús nga ya síjna, tanga mìkiì beè tsà jè-né.

¹⁵ Jesús kitsò-la:

—Ji ndí chjoón, ¿mé-ne chihindáya-ne? ¿Yá xi binchaàtsji?

Jè María, k'oaà s'in kisikítsejèn, maá-la tsà jè xita xi síkinda i'nde jè, kitsò-la:

—Ji na'èn, tsà ji kiìkoji, kot'in-ná ñánda kinikájnei mé-ne nga kíkjaá-na.

¹⁶ Jesús kiichja-la kitsò-la:

—¡María!

Kò jè María, kisikátji, kitsò-la:

—¡Raboni! —'én hebreo xi tsòya-ne: Maestro.

17 Jesús, kitsò-la:

—Kì 'an nìkò-ná nga kj'eè kù fì mijìn-koaa jè Na'èn-na. Tanga t'in tìkí'nchré jñà 'ndse, kot'in-la nga jye tìfikoaa jè Na'èn-na jè xi tìkoaa Na'èn-nò ma, jè xi Nainá xan-la, xi tìkoaa Nainá 'mì-là.

18 María Magdalena kù kisikí'nchré jñà xita xi kota'yàt'aà-la Jesús nga jye kijtseèkon Jesús, tìkoaa tsibénojímí-la 'én xi kùichja Jesús.

K'e nga jè Jesús tsakó-la yijo-la jñà xita-la

(Mateo 28:16-20; Marcos 16:14-18; Lucas 24:36-49)

19 K'e nga jye kòjñò, tìjè-ne nachrjein nga tàts'en xomàna, jñà xita xi kota'yàt'aà-la Jesús tíchjoàjto-la xotjoa-la ni'ya ñánda chixoña nga jñà tsakjón-la xita judío. Jesús jahas'en ni'ya, tsasíjnajiin osen-la xita-la, kisihixat'aà, kitsò-la:

—¿A ta k'oaá ndaà-ne? Kàtas'e-nó kjoa'nchán.

20 K'e nga jye okitsò-la, tsakó-la tsja kò nindaà nisìn-la. Jñà xita xi kota'yàt'aà-la 'ño tsja kis'e-la k'e nga kijtseè Jesús.

21 Jesús, ijngoò k'a kitsò-la:

—Jñò, kàtas'e-nò kjoa'nchán. Koni s'ín kisikasén-na Na'èn-na, jñò, k'oaá tìs'ín siikasén-nò.

22 K'e nga jye okitsò, ikjoàn kiskìnomájno, kitsò-la:

—Chjoé jè Inima Tsjeè-la Nainá.

23 Jñà xita xi jñò sijchàat'aà-là jé-la, jchat'aà-la, jñá xi jñò mìkiì sijchàat'aà-là jé-la, k'oaá s'ín kítsajna nga mìkiì jchat'aà-la.

K'e nga kijtseè Tomás nga jye jaáya-la Jesús

24 Xita xi kota'yàt'aà-la Jesús xi tejò ma-ne, jngoò xi 'mì Tomás, xi tìkoaa Dídimò tsò-la ['én xi tsòya-ne: Tì'ñò], mìkiì ya tíjna k'e nga ijchò Jesús.

25 Jñà xita xi i'nga xi tìkoaa ya kota'yàt'aà-la Jesús, kitsò-la Tomás:

—Kà'ya-nájen Na'èn-ná Jesús.

Tomás kitsò:

—Tsà mìkiì skoeè tsja ñánda kisinchaàs'en xó, kò tsà mìkiì skinìs'en najmá ndsaa ñánda kitáx'a, kò tsà mìkiì skinìs'en ndsaa ya nisìn-la, mìkiì kòkjeiín-na.

26 Xi jye komà jìin nachrjein, jñà xita xi kota'yàt'aà-la Jesús ijngoò k'a ya títsajna; jyeé ya tíjna-ne Tomás; tanga jè xotjoa ni'ya tíchjoàjto-né. Ijchò Jesús, tsasíjnajiin osen-la, kitsò-la:

—Jñò, kàtas'e-nò kjoa'nchán.

27 Jesús, ikjoàn kitsò-la Tomás:

—Chìnis'in najnóndsejì ijndé, chítsejèn-la ndsaa. Nchrobákojì ndsejì, chìnìs'in nisìn-na. Kì k'oaá s'ín mìkiì mokjeiín-lè. Kàtakjeiín-lè.

28 K'eé kùichja Tomás, kitsò:

—jì xi Na'èn xan-lè kò xi Nainá xan-lè!

29 Jesús kitsò-la:

—Ngajì Tomás, koií kjoa-la mokjeiín-lè nga kà'ya-ná. ¡Mé tà ndaà-la jñà xita xi mokjeiín-la nas'ín mìkiì beèèkon-na!

Mé-ne k'oas'ín kitjei-ne xojon jè

30 Taxkì kjìn jchán kjojkón kis'ìn isa Jesús nga nguixkòn xita xi kota'yàt'aà-la xi mìkiì tjít'aà xojon jè.

31 Tà jñà 'én koi k'oas'ín kitjei mé-ne nga kòkjeiín-nò nga Jesús, jè xi Cristo, [jè xi xó kinikasén-ne] xi Ki'ndí-la Nainá. Kò mé-ne k'e nga kòkjeiín-nò s'eé-nò kjoabinachon xi it'aà ts'e.

21

K'e nga jè Jesús itoò xita-la tsakó-la yijo-la

¹ Jesús, ìjngòò k'a tsakó-la yijo-la jñà xità xi kota'yàt'aà-la ya ìndiì ndáchikon xi 'mì Tiberias. Jñà kjoa koi, kiís'in komà.

² Títsajna kjoò Simón Pedro ko Tomás, xi tikoá Dídimò tsò-la ['én xi tsòya-ne: Ti'ño], ko Natanael xi Caná i'nde-la, nangui xi chja-ne Galilea. Tikoá títsajna jñà ìxti-la Zebedeo ko ngui jò isa xità xi tikoá ya kota'yàt'aà-la Jesús.

³ Simón Pedro kitsò-la xità xíkjin:

—Tìn kó-lá tífi tsobà'ñoá nga sik'èn.

Jñà xità xi i'nga, kitsò-la:

—Tikoá onguíko-lèjen.

Ikjoàn kiì, jahas'en jngòò chitso. Tanga nìtjen jè, nìmé tìn kisakò-la.

⁴ K'e nga jye kis'e isén, Jesús tsatsejèn, tsasìjna ya ìndiì nandá, tanga jñà xità xi kota'yàt'aà-la mìkiì kijtseèxkon tsà jè Jesús.

⁵ Jesús kitsò-la:

—Ìxti, ¿a kj'eè sakó chiba-nò tìn?

Jñà xità-la kitsò:

—Majìn, nìmé tjin.

⁶ Jè Jesús, k'eé kitsò-la:

—Tikatjen-ngui-ndá na'ya-nò ya kixi xijngoaà chitso. Sakò-nò tìn.

Jñà xità koi, k'oaá s'in kisikatjen-ngui-ndá na'ya-la. K'e nga tsachrjekàjìn-ne, jye mì tì kiì ma bitjokàjìn-ne na'ya-la nga 'ño jchán kjìn tìn 'ncha.

⁷ Jè xità-la Jesús xi 'ño matsjakeè xi ngàsòn ya kota'yàt'aà-la Jesús, kitsò-la jè Simón Pedro:

—Jè Na'èn-ná Jesús xi okji.

Simón Pedro, k'e nga kiì'nchré nga jè Na'èn-ná Jesús, nitoón tsohòkjá nàchro-la (nga sa ítjòn tà nikje kjingui íkjá), ikjoàn kiskingui nandá nga kiitjingui-la Jesús.

⁸ Jñà xità xi i'nga xi ngàsòn ya kota'yàt'aà-la, kiìko jè chitso; tífejìn nandá jè na'ya tìn nga kjìn jchán tìn 'ncha; nga mìtsà kjìn kijnà jè chitso; tjin-la tsà jngòò sìndo metro ñánda kijnajìn nandá.

⁹ Xità koi, k'e nga tsitajen chitso, kijtseè it'aà nangui tjtse jngòò ni'in. Jngòò tìn tímatsjò, tikoá kijtseè inchrajín.

¹⁰ Jesús kitsò-la:

—Nchrohóko i'nga tìn xi sa jye kitjoé-nò.

¹¹ Simón Pedro, jahas'en chitso. Kiskoé na'ya tìn, tsibífet'aà nangui. Jngòò sìndo ko icháte jàn ma-ne jñà tìn ì xi 'ncha na'ya. Nas'in 'ño kjìn ma-ne tìn, jè na'ya mìkiì kixajndá.

¹² Jesús kitsò-la:

—Nchrobá, tichioè.

Tanga nijngòò xità xi kota'yàt'aà-la kitsò ikon nga kiskònangui-la yá-né jè. Nga jyeé tíjìn-la nga jè Na'èn-ná Jesús.

¹³ Jesús, kiì kasit'aà chraña-la, kiskoé inchrajín, kitsjaà-la jñà xità koi, k'oaá ti kisìko jñà tìn.

¹⁴ Ya ma-ne jàn k'a nga tsakó-la yijo-la Jesús jñà xità xi kota'yàt'aà-la, k'e nga jye jaáya-la it'aà ts'e kjoabiyaà.

Jesús, mé-ne jàn k'a kiichja-la Simón Pedro

¹⁵ K'e nga jye tsakjèn, Jesús kiskònangui-la Simón Pedro, kitsò-la:

—Jì, Simón, ti-la Jonás, ¿a isáá ndaà matsjacha-ná mì k'oa-ne koni jñà koi?

Pedro kitsò:

—Jon Na'èn, jyeé 'yi nga matsjake-lè.

Jesús kitsò-la:

—Tikindji jñà ndí ìxti orrè-na.

¹⁶ Xi ma-ne jò k'a, Jesús ìjngòò k'a kiskònangui-la, kitsò-la:

—Simón, ti-la Jonás, ¿a matsjacha-ná?

Kiichja Pedro, kitsò:

—Jon Na'èn, jyeé 'yi nga matsjake-lè.

Jesús kitsò-la:

—Tikindji jñà orrè-na.

¹⁷ Xi ma-ne jàn k'a, ìjngoò k'a kiskònangui-la kitsò-la:

—Simón, ti-la Jonás, ¿a matsjacha-ná?

Pedro, ba kis'e-la nga ma-ne jàn k'a nga kjònangui-la tsà nga matsjakeè-né. Kitsò-la:

—Na'èn, 'ya yije-né, jyeé tíjìn-lè nga matsjake-lè.

Jesús kitsò-la:

—Tikindji jñà orrè-na.

¹⁸ Ngui okixí xi xan-lè, k'e nga tisa ti titsjoi, ji tajngoó kichíkejé nikje-lè k'e nga k'ìin ñánda mejèn-lè nga k'óin. Tanga k'e nga jye kojchíngui, tà kjoén-né ndseji. Kj'eíí xitáá sikkákjá-lè nikje-lè, kjoikò-lè ñánda nga majìn-lè nga k'óin.

¹⁹ Jesús, koií okitsò-ne, jè kjoa tsibénojmiya kós'ín komat'in Pedro k'e nga kiyá mé-ne nga jeya sikkíjna-ne Nainá. K'e nga jye okitsò Jesús, ikjoàn kitsò-la Pedro:

—Nchrobátjìngui-ná.

Jè xita-la Jesús xi 'ñó tsjakeè

²⁰ Pedro, k'e nga kiskoòtsejèn-ne its'in, kijtseè jè xita-la Jesús xi 'ñó matsjakeè xi ngàsòn ya kota'yàt'aà-la nga tífítjìngui-la. Tijè-ne xita xi taña tsibitsajnakjoò Jesús k'e nga tsakjèn. Jè xi kiskònangui-la nga kitsò-la: “¿Yá-né xi sùngatsja-lè it'aà ts'e xita kondra-lè?”

²¹ Pedro, k'e nga kijtseè, kiskònangui-la Jesús, kitsò-la:

—Na'èn, xita jè, ¿mé xi komat'in?

²² Kiichja Jesús, kitsò-la:

—Tsà 'an xi mejèn-na nga kíjnakon skanda k'e nga kjoiaa ìjngoò k'a, mìtsà jì oko-lè. Ngaji, nchrobátjìngui-ná.

²³ K'oaá s'ín komà-ne nga tsabísòn 'én koi. Ngats'ìi xita 'ndse kitsò nga jè xita jè, mìkìi kiyá; tanga Jesús mìtsà kitsò nga mìkìi kiyá. Kitsò-né: “Tsà 'an xi mejèn-na nga kíjnakon skanda k'e nga kjoiaa ìjngoò k'a, mìtsà jì oko-lè.”

²⁴ Tijè-ne xita xi kota'yàt'aà-la Jesús xi tóbénojmi kixi ngats'ìi kjoa koi. Kò tijè-ne xi kiskìi yije xojon jè. Kò 'ya-ná nga 'én kixíí xi chja.

²⁵ Jesús kjìn jchán kjoa kis'ìin-isa xi kj'eíí. Tsà tjeí yije nga jngoò jngoò skaya kjoa xi kis'ìin, mì-la kii kichìya-la nga tíjtsa isò'nde jñà xojon. K'oa's'ín kàtama.

Kó kis'iìn jñà x̄ita xi tsibíxáya-la Jesús

Én xi kitsjaà Jesús nga iskan kjoí Inima Tsjeè-la Nainá

¹ Ngaji Na'èn Teófilo, jè xojon xi 'an kiskii ítjòn-lè, k'oaá kixan-lè ngats'iì kjoa xi kis'iìn ko xi tsakóya Jesús kóni nga tsibíts'ia nga kisixá

² skanda jè nàchrjein k'e nga Nainá kiiko ijngoò k'a-ne ján ngajmii. K'e nga tikj'eè fi-ne ján ngajmii, jè nga'ño-la Inima Tsjeè-la kisikjeén nga jaajìin x̄ita xi tsibíxáya-la nga kitsjaà-la kjotíxoma mé xá xi s'iin.

³ K'e nga k'en ko nga jaáya-la it'aà ts'e kjobiyaa nguì ichán nàchrjein tsibìjna isa; kjìn k'a tsakó-la yijo-la jñà x̄ita-la ko kjìn skoya kjoa kis'iìn nga kixi kjoa nga tíjnakon. Tikoáá tsakóya-la x̄ita-la kós'ín otíxoma Nainá.

⁴ K'e nga tíjnako x̄ita-la k'oaá s'ín kitsjaà-la okixi, kitsò-la:

—Kì tà chjà bitjojñò naxandá Jerusalén. Chíña kjoaa skanda k'e nga kitjojen kjondaà xi tsjá Na'èn-na koni s'ín kitsjaà tso'ba. Jyeé k'oas'ín kixan-nò nga sa ítjòn.

⁵ Kixi kjoa, jè Juan, nandá kis'iìn-ne bautizar x̄ita. Tanga jñò, machraña nàchrjein nga ko Inima Tsjeè-la Nainá koma-nò bautizar.

Kí komà k'e nga kii mijìn ijngoò k'a-ne Jesús ján ngajmii

⁶ Jñà x̄ita xi títsajna ko Jesús, kiskònangui-la, kitsò-la:

—Na'èn, xi jì otíxoma-nájen, jñà nàchrjein koi, ¿a síkíjnandeí ijngoò k'a-ne naxandá Israel nga ta jè tajngoò kotíxoma-la yijo-la?

⁷ Jesús kitsò:

—Mítsà jñò oko-nò nga jchaa nàchrjein; ta jngoò Na'èn-ná beè kó s'ín kosòn-la xi kjotíxoma ts'e.

⁸ Tanga k'e nga kitjojen-nè-nò jè Inima Tsjeè-la Nainá, tjoé-nò nga'ño-la. Jñò kénojmi-là x̄ita xi it'aà ts'an i Jerusalén, kóhokji nga kijndà nangui Judea ko Samaria, skanda ñánda fehet'aà-ne isò'nde.

⁹ K'e nga jye okitsò Jesús, ikjoàn kitjámijìn i'nga nga kiiko ijngoò k'a Nainá ján ngajmii ko jñà x̄ita-la nchikotsejèn-la. Chaán mì tì kii kijtseè-ne nga jè ifi tsibíjtsa'ma.

¹⁰ Jñà x̄ita-la, k'e nga nchikotsejèn-la nga tífi-mijìn ngajmii Jesús, tà nitoón j'ii kinchat'aà jò-la x̄ita xi íkjá nikje chroba.

¹¹ Kitsò jñà x̄ita koi:

—Jñò xi x̄ita Galilea tsajòn, ¿mé-ne kos'ín chitsejèn-nò ngajmii? Jè Jesús, koni s'ín kà'yaà nga kòfímijìn ijngoò k'a-ne ngajmii, kijchò nàchrjein nga k'oa tìs'ín kjoí ijngoò k'a-ne.

Kí komà nga kitjaajìn Matías

¹² Jñà x̄ita xi tsibíxáya-la Jesús inchrobà-ne nindoò Yá Olivo nga kii ijngoò k'a-ne Jerusalén. K'oaá kji chrañat'aà fi ndiyá Jerusalén koni kji tsjá'nde kjotíxoma nga ma fi x̄ita k'e nga nàchrjein níkjáya.

¹³ K'e nga ijchò-ne naxandá Jerusalén, kii mijìn isò'nga ni'ya, jahas'en cuarto ñánda síkjáya. Jñà x̄ita xi ijchò, jè Pedro, Jacobo, Juan, Andrés, Felipe, Tomás, Bartolomé, Mateo, Jacobo ki'ndí-la Alfeo, Simón Celote, Judas, ti-la Jacobo.

¹⁴ Ngats'iì x̄ita koi yaá bixoña nga kjit'aà nàchrjein nga jngoò tíjn kjohítsjeèn-la nga chjat'aà-la tikoá bítsi'ba-la Nainá; tikoáá títsajna i'nga íchjín ko María xi nea-la Jesús ko jñà 'ndse Jesús.

¹⁵ Jñà nàchrjein koi, Pedro, kiichjajìin-la x̄ita xíkjín xi mokjeiín-la it'aà ts'e Cristo. Maá-là tsà jngoò sìndo ko kaàn jñà x̄ita. Pedro kitsò:

16 —'Ndsè, tjin-ne nga kitasòn koni s'ín tíchja Xojon-la Nainá jñà 'én xi kjòtseé kiichja Inima Tsjeè-la Nainá nga jè xitaxá ítjòn David kisikjeén nga kiichja mé xi komat'in Judas, jè xi kiikakó-la xita xi kitsobà'ñó Jesús.

17 Judas, nga xita xingui-nájen. Tikoáá kitjoé-la xá nga ngajen kisixáko-najen.

18 Jè ton xi kisikijne Judas ít'aà ts'e jé xi tsohótsji, nanguí tsatse jngoò 'nde-ne; ikjoàn skò kiskaànguit'aà-ne nangui, jngoò k'a kixojndà indso'ba, itjo ndó'ye-la.

19 K'e nga jye kiì'nchré yije xita naxandá Jerusalén nga jye k'en Judas, i'nde jè, k'oaá s'ín tsibít'aà 'ín nga Acéldama kitsò-la. 'Én ts'e xi chja, tsòyaá-ne: "I'nde ts'e Jní-né."

20 Jè xojon ts'e Salmo, k'oaá s'ín tíchja nga tsò:

Ni'ya-la kátasijna tiya-né,

nijngoò xita kítsajna.

Tikoáá tíchja Salmo ñánda tsò:

Kj'eí xita kàt'iì-la xá-la.

21 'Mochjeén-né nga kj'eí xita sakó ijngoò-isa xi jè ngajo-la Judas; jñà chjaàjìn-jngoáá xita xi kjòtseé tímakò-ná skanda k'e nga tisa tsajmeiìko-ná Jesús,

22 mats'iaìko-ne nga kis'iìn bautizar Juan skanda k'e nga tsijin ijngoò k'a-ne Jesús ján ngajmì, mé-ne nga kíjnakò-ná tikoá tsjá 'én nga Jesús jyeé jaáya-la.

23 K'eé tsafaàjìn jò xita: jngoò xi 'mì José, tikoá tít'aàsòn 'ín-la nga Barsabás 'mì. Barsabás, kò tije-ne xi 'mì Justo. Xi ijngoò, Matías 'mì.

24 Ikjoàn kiichjat'aà-la Nainá kitsò:

—Ngaji Na'èn, xi yaxkoin inima-la ngats'iì xita, kot'ìn-nájen ñá-laá ingajò xita koi jye kàchjaàjìn,

25 mé-ne nga skoé xá-lè xi jì bixáya-la, jè xá xi kisikijna Judas k'e nga tsohótsji jé, nga jye tíjna i'nde ñánda okò-la.

26 Kisiskákjoò suerte-la. Jè Matías kisikijne. Jè komà-ne tejò xita xi tsibíxáya-la Jesús xi tejngoò ma nga sa ítjòn.

2

K'e nga itjojen Inima Tsjeè-la Nainá

1 K'e nga ijchò nàchrjein-la s'eí Pentecostés, ngats'iì xita xi mokjeiín-la ít'aà ts'e Cristo ta jngoò jín títsajna.

2 Tà nitoón kina'yà jngoò-la xi 'ñó one, koni jngoò tjo xi 'ñó tí'ba xi ngajmì inchrobà-ne. Kina'yà-la kóhokji i'nga ni'ya ñánda títsajna jñà xita.

3 Tsatsejèn-la nijen xi koni kjoàn ni'ín kjoàn; kjòxkoaya íjngó íjngó kisijnasòn-la jñà xita.

4 Ngats'iì xita, jngoò k'a ndaà kis'ejiìn inima-la Inima Tsjeè-la Nainá; ikjoàn tsibíts'ia nga kiichja 'én-la xita xi kj'eí naxandá koni s'ín kitsjaà-la Inima Tsjeè-la Nainá nga kichja.

5 Nàchrjein koi, kjìn xita judío títsajna [xi ijchò s'eí] ya naxandá Jerusalén xi beèxkón Nainá xi inchrobà-ne ñánda nga xìn naxandá nga títsa isò'nde.

6 Jñà xita xi ya títsajna xi ijchò s'eí ya naxandá Jerusalén, ngats'iì kjòxkóya k'e nga kiì'nchré-la xi jane. Tikoáá tà kjòxkón-la k'e nga kiì'nchré-la xita-la Cristo nga ma-la chja nga jngoò ijngoò skoya 'én-la xita xi xìn naxandá-la xi ya títsajna.

7 Tà k'oaá komà-la, tikoáá tà kjòxkón-la, kitsò-la xíkjin:

—¿A mìtsà xita Galilea ngats'iì xita xi nchichja?

8 ¿Kós'ín ma-ne nga na'yá-lá 'én-ná xi nokjoá nga xìn naxandá-ná nga ijngoò jngoá?

9 Ngats'iaá xi jì títsajnaá, tjin xita Partia, xita Media, xita Elam, xita Mesopotamia, xita Judea, xita Capadocia, xita Ponto, xita Asia,

10 xita Frigia, xita Panfilia, xita Egipto, xita Libia xi ya chrañàt'aà-la Cirene. Tikoá tjin xita Roma xi jì títsajna Jerusalén. Tjin xi nguì xita judío. Tikoáá tjin xi tà jahatjìya-la nga xita judío komà.

11 Tíkooá tjin xi inchrobà-ne Creta ko Arabia. ¡Ngats'iaá na'yà-lá nga jngoò ìjngoò skoya 'én-ná koni s'ín bénojmi-ná kjojkón xi s'ín Nainá!

12 Ngats'ii xita tà kisinchaàxkón-né, mi tì kii machiya-la, kitsò-la xíkjin:

—¿Kó tsòya-ne kjoa koi?

13 Tjin i'nga xita xi tà tsijnòkeè-né, kitsò:

—¡Ch'ii xita koi!

Én xi kiichjayajin-la xita jè Pedro

14 K'ée tsasijna kixi Pedro ko xita xi tejngoò ma-ne; 'ño kiichjayajin-la xita, kitsò:

—Jño, xita xinguaá xi judío 'mì-ná ko ngats'ioò xi xìn naxandá-nò xi ì titsajnaà Jerusalén, ndaà katasijin-nò, ndaà tiná'ya 'én xi kichjako-nò.

15 Jño bixón-nò: “Ch'ii xita koi.” ¿Kós'ín koma-ne nga koch'ì nga saá ijchò xi ñijaàn nga tajñòya?

16 Koií tìbitasòn 'én xi kiichja Joel, xita xi kiichja ngajo-la Nainá.

17 K'oaá tsò Nainá:

K'e nga jye tífehèt'aà nàchrjein,
síka'bí-la Inima Tsjeè-na ngats'ii xita xi tjin nga tíjtsa isò'nde;
jña ixti x'in ko ixti íchjín-nò, 'aán kichja ngajo-na;
jña ixti xongó-nò, skoe kjojkón xi okó Nainá;
jña xita jchínga-nò k'oií-la nijná xi it'aà ts'e Nainá.

18 Okixi-né nàchrjein koi,

jña ch'inda-na xi x'in ko íchjín siika'bí-la Inima Tsjeè-na
mé-ne nga kichja ngajo-na.

19 Ján ngajmì kjin kjojkón jcha-la,
tíkooá ì it'aà nangui jchaá-la kjojkón
nga xíteèn jní-la xita,
nga ko ni'ín ko n'ndi tsjè xi kjoa ts'e kjojchán.

20 Jè ts'oií, kojñò-né,

jè sá, jní kji koma
k'e nga tikj'eè f'ii Na'èn-ná
nga kjoí kíndaàjin-la xita
jè nàchrjein xi jeya ko 'ño xkón.

21 Tanga ngats'ii xita xi kichjat'aà-la Nainá,
kitjokàjin kjo'in.

[K'oaá tsò 'én-la Nainá xi kiskii Joel (2:28-32).]

22 'Tiná'ya xi xita Israel 'mì-nò 'én xi k'oa xán-nò: Jño, ndaà tíjin-nò, Nainá tsakó nga Jesús xi Nazaret ts'e, tjin-la kjojíxoma. Xkoòn ki'ya-nò nga kis'ìn ngats'ii kjojkón ko kjoa ts'e seña xi tseé nga 'ño tjin-la.

23 Koni s'ín tíindaà-la Nainá nga tisa tàts'en-la kjoa, jño, kindobà 'ño xita jè nga kinik'eèn nga kinìngatsja xita xi mìkii beèxkón kjojíxoma nga tsakat'aà krò.

24 Tanga Nainá kisikjaáya-la; kisikjínandeí kjoa ts'e kjo'in xi tjin-la kjoabiyaà nga mìkii koma nga ya sijna 'ño it'aà ts'e kjoabiyaà.

25 Jè xitaxá íjòn xi David ki'mì, kitsò it'aà ts'e Jesús:

Kijtseè kjit'aà-ná Nainá k'e nga tjina nguixkoaàn;
ì tjinat'aà ndsaa kixi mé-ne nga nì mé xi komat'ian.

26 Koií kjoa-la nga matsja-la inima-na,
tíkoo matsja-la nijen-na nga seè.

Yijo-na, tíkooá ndaà siikjáya nga skóña kjoa,

27 koií kjoa-la nga mi ya sikjini inima-na ya i'nde-la mik'en,
tíkoo mìkii koj'ndi nga k'indo yijo-na xi ch'inda tsjeè-lè 'mì-ná.

28 Tsakoò-ná ndiyá nga ma kótijnakoan,
tsee kjotsja s'e-là inima-na nga ji tijnako-ná.
[K'oaá tsò 'én-là Nainá xi kiskii David (Salmo 16:8-11).]

29 "Ndsè, k'oaá xan-nò xi nguì kjoa kixi: xita jchinga-ná David, jye kjõtsee k'en, tikoá kishijiin-né. Jè itsjó-la, tíjna skanda nachrjein i'ndeí.

30 Tanga jè David, jngoò xita xi kiichja ngajo-la Nainá. Jyee k'oas'in tíjiin-la koni s'in kitsjaà-la tso'ba Nainá nga tje ts'e kitjokajiiin Cristo nga jè kijná ngajo-la koni xitaxá ítjòn.

31 Jè David, k'oaá s'in kiichja it'aà ts'e Cristo koni tsà jye kijtsee nga jye jaáya-la. Kitsò: "Mikiì ya kisijna inima-la ya i'nde-la mik'en, tikoáá mikiì i'ndo yijo-la."

32 Nainá, jyee kisikjaáya-la Jesús. Ngats'ii kjoa xi komà, k'oaá s'in bènojmí-nòjen nga xkoòn ki'ya-najen.

33 Nainá jeya kisikíjnat'aà chrja kixi-la; kitjoé-la Inima Tsjeè-la koni s'in kitsjaà tso'ba Nainá. Jè Jesús kisika'bísòn ijngoò k'a Inima Tsjeè-la. Koií kjoa-la nga k'oas'in titsa'yaà ko titsana'ya.

34 Jè David, mìtsà ngajmii kii mijin; tanga k'oaá kitsò:
Jè Nainá kitsò-la jè xi Nei-na:
"Tijnat'aà-ná i kixi-na,

35 skanda k'e nga sikítsajnanguia kondra-lè ñánda nchasòn ndsokoiì."

36 'Jñò xi xita naxandá Israel tsajòn, ndaà jchaa yije nga 'ñó kixi tjín kjoa nga jè Jesús xi jñò tsakat'aà krò, Nainá, k'oaá s'in kisikíjna nga jè-né xi Na'èn-ná, ko tijè-ne xi Cristo [xita xi xó kisikasén-ne Nainá].

37 K'e nga kii'nchré 'én xi okitsò jña xita xi ya títsajna, kisikájno jjiin inima-la; k'ee kiskònangui-la Pedro ko xita xikjín xi i'nga xi tikoá xó tsibíxáya-la Jesús. Kitsò-la:

—'Ndsè, ¿mé xi s'en-jen?

38 Pedro kitsò-la:

—Tikájno jé-nò, kii tí jé binchaàtsji-nò; t'een bautizar yijo-nò it'aà ts'e Jesucristo nga jngoò ijngoò-nò, mé-ne nga siijchàat'aà-nò Nainá, tikoá tsjá-nò Inima Tsjeè-la.

39 Koni s'in kitsjaà tso'ba Nainá, 'én xi tsibíjna tsajòn-nò; tikoáá ts'eeé ixti-nò, ko ngats'ii xita xi kjiin títsajna, nga yije xi jè sobà Nainá xó kichja-la.

40 Pedro, kjin 'én kiichjajiiin-sa-la. 'Ñó kiichjako. Kitsò-la:

—Tinchat'aàxin-là kjo'in xi tjoé-la jña xita koi xi ch'o s'in!

41 Jña xita xi kòkjeiin-la 'én xi kiichja Pedro komà bautizar; ma-la tsà jàn jmii xita xi jahas'en-t'aà nachrjein jè.

42 Kóhotjín, kixii chinchako 'én xi kii'nchré koni s'in tsakóya-la jña xita xi tsibíxáya-la Jesús, tikoá kjit'aà nachrjein maxkóya nga kjèn-ko xikjín tikoá chjat'aà-la Nainá.

43 Ngats'ii xita xi ya títsajna tà kitsakjòn-né k'e nga kijtsee ngats'ii kjondaà ko kjojkón xi kis'iin jña xita xi tsibíxáya-la Jesús.

44 Jña xita xi jye kòkjeiin-la it'aà ts'e Cristo bitsajnajtín-né kóhotjín; síxkoaya yije mé tsojmì xi tjín-la.

45 Otíjna nangui-la ko tsojmì xi tjín-la, ikjoàn síjòya ton-la koni s'in mochjeén-la nga jngoò ijngoò.

46 Nachrjein inchijòn bixoña ya nditsin ingo ítjòn, ko ya ni'ya-la xikjín nga kjèn-kjoò nga tjín-la kjotsja ko indaàjiiin tjín inima-la.

47 Jeya kisikíjna Nainá; jña xita naxandá tsjakeè komà xita-la Cristo; jè Nainá, nachrjein inchijòn kisikas'en-t'aà-isa naxandá-la Cristo jña xita xi jè mejèn-la nga kitjokajiiin kjo'in.

3

Kós'in komà k'e nga kjondaà jngoò-ne xita xi mikiì ma fi

1 Jngoò k'a kiì Pedro kò Juan ya ingo ítjòn ts'e xita judío. Ijchò-la xi jàn nga nguixòn k'e nga chjat'aà-la Nainá jñà xita.

2 Nachrjein nchijòn bijchó síkíjna jngoò xita ima xi mìkiì ma fi. Xita jè k'oaá s'ín kits'iin. Yaá bijnajto xotjoa-la ingo ítjòn xi k'oas'ín tjit'aà 'ín: xotjoa xi ndaà kji. Xita jè, ton síjé kjotjò-la jñà xita xi fahas'en nditsin ingo.

3 Jè xita xi mìkiì ma fi, k'e nga kijtsee Pedro kò Juan nga nchifahas'en nditsin ingo, kisijé kjotjò-la ton.

4 Jè Pedro kò Juan, kiskoò'an; jè Pedro kitsò-la:

—¡Chítsejèn-'a-nájen!

5 Jè xita xi mìkiì ma fi kiskoò'an; k'oaá s'ín komà-la koni tsà tjín xi tsjá-la.

6 Tanga jè Pedro kitsò-la:

—Nimé ton tjín-na xi oro kò xi plata, tanga jè xi tjín-na tsjaà-lè; it'aà ts'e Jesucristo xi Nazaret ts'e, tisítjiin, títjámil.

7 Jè Pedro, k'e nga okitsò-la, kiskoé tsja kixi, kiskímiltjen; nitoón kis'e-la nga'ño tsji ndsoko, kóhokji ndsoko.

8 Jè xita jè, kiskì'nga nga tsasítjen; ikjoàn tsibíts'ia nga tsajmeè-ne; jahas'en-kò nditsin ingo jè Pedro kò Juan nga ndsoko kii-ne; fijen fikjá, kjì'nga kítsian nga jeya kisikíjna Nainá.

9 Ngats'ii xita naxandá kijtsee jè xita jè nga jye ma fi-ne kò nga jeya kisikíjna Nainá.

10 Tà kjòxkón-la xita, tikoáà tà kitsakjòn-né koni s'ín komà'in jè xita jè nga jyeé beèxkon nga jè-né xi síjé kjotjò ton ya xotjoa ingo xi k'oas'ín tjit'aà 'ín-la: xotjoa xi ndaà kji.

'Én xi kiichjaya Pedro ya nguitjoa-la ingo ts'e Salomón

11 Jè xita xi jye kjondaà-ne, mìkiì tsjeiin nga kitsobà'ño Pedro kò Juan. Ngats'ii xita naxandá tà k'oaá komà-la; k'ee tsangachikon kiitjingui-la ya ingo ítjòn, ya nguitjoa-la xi 'mì Salomón.

12 Jè Pedro, k'e nga kijtsee jñà xita naxandá, kitsò-la:

—Jñò, xita xinguiáá xi xita Israel 'mì-ná, ¿mé-ne maxkón-onò? ¿Mé-ne ngajen ch'án-nájen? ¿A k'oaá s'ín nikítsjeèn koni tsà nga'ño tsajen kò kjondaà tsajen kòmandaà-ne xita jè nga ma fi-ne?

13 Jè xi Nainá tsò-la Abraham, Isaac, Jacob kò ngats'ii xita jchínga-ná xi i'nga, jè-né xi jeya kàsikíjna Jesús xi ch'nda-la ma; tijè-ne Jesús xi jñò kinìngatsja xitaxá. Jñò, mìkiì kits'ii'nde k'e nga jè Pilato mejèn-la sìikíjnandeí-ne.

14 Jñò, kinachrjekànguio jè xi Xita Tsjeè kò xi Xita Kixi; ikjoàn kinijé nga tsibijnandeí jè xita xi mik'en kitjen-la.

15 Jñò kinìk'eèn jè xi síkíjnakon-ná tanga jè Nainá kisikjaáya-la. Ngats'ii kjoa koi, ki'ya-nájen, k'oaá ma-ne nga bènojmi-jen.

16 Jesús kàtsjá-la nga'ño xita jè xi jñò titsa'yaá tikoá yaxkoòn, koi-né nga mokjeiin-najen it'aà ts'e Jesús. Tà koií kjoa-la nga ndaà mokjeiin-najen nga ndaà kòmandaà-ne xita jè nga nguixkoòn jñò xi i titsajnaà.

17 "Ndsè, jyeé tíjiin-na, k'e nga k'oas'ín ki'nè kò xitaxá-nò nga kinìk'eèn Jesús, koi-né nga mìkiì machiya-nò.

18 Jè Nainá, k'oaá s'ín kisikitasòn koni s'ín kiichja ngats'ii xita-la xi kiichja ngajo-la nga jè Cristo [jè xi xó kisikasén-ne Nainá] k'oaá s'ín tjínè-la nga kijá.

19 Koií k'oa 'mì-nòjen nga tikájno jé-nò, kì tì jé binchaàtsji-nò; Nainá tanguít'aà-là mé-ne nga jchat'aà-nò jé-nò ikjoàn tsjá-nò Nainá kjoa'nchán ts'e inima-nò.

20 Kàtasikasén-nò Jesús, jè xi xó k'oas'ín kjòtsee jaàjùn-ne Nainá nga jè xi Cristo nga it'aà tsajòn kjoí-ne.

21 Mochjeén-né nga ján kíjna ngajmii jè Jesucristo skanda k'e nga jè Nainá sìixitseyá yije ijngoò k'a tsojmì xi tjín. K'oaá s'ín kitsjaà okixi Nainá k'e nga kiichja ngajo-la xita tsjeè-la xi jè kisikjeén nga sà kjòtsee.

²² Moisés, k'oaá s'ín kitsò-la jñà xità jchínga-ná: “Jè Na'èn-ná xi Nainá, yaá kochrjekàjìin jngoò xità xinguiáá xi kichjā ngajo-la Nainá koni 'an. Jè tìná'ya-là koni s'ín kichjako-nò ngats'ìi kjoa xi keènojmi-nò.

²³ Ngats'ìi xità xi mìkìi kji'nchréñijon-la, jngoò k'a tjáxìn it'aà ts'e naxandá-la Nainá.”

²⁴ Ngats'ìi xità xi kùichjā ngajo-la Nainá, mats'ia-ne Samuel, skanda i'ndeì, saá koìi 'én tsibénojmi mé kjoa xi tíma nachrjein i'ndeì.

²⁵ Kjongdaà tsajòn-nò koni s'ín kitsjaà tso'ba Nainá it'aà ts'e xità-la xi kùichjā ngajo-la. Tìkoáá kjondaà tsajòn-nò koni s'ín tsibíndaajìin jngoò kjoa Nainá kò xità jchínga-ná k'e nga kitsò-la Abraham: “Ngats'ìi xità xi tjin nga títja isò'nde kochikon-t'in-né xi it'aà ts'e tje-lè.”

²⁶ Nainá, k'e nga kisìkjaáya-la Ki'ndí-la, jñò kisìkasén ítjòn-nò nga sùichikon-t'in-nò mé-ne nga sikkatjìya-là kjòhìtsjeèn-nò nga jngoò ìjngoò, nga mì tì ch'o s'en-nò.

4

K'e nga jè Juan kò Pedro kùiko xità naxandá ya nguixkon xitaxá

¹ Pedro kò Juan tákó tìk'eé nchihóko xità naxandá nga ijchò jñà nò'miì, tìjiko jè xità sko-la policía xi sikkinda ingò ítjòn kò jñà xità saduceo.

² Jñà xità koi ñó jti komà-la nga jè Pedro kò Juan k'oaá s'ín tsakóya-la xità naxandá nga jyeé ki'ya-la nga kjoaáya-la xità xi jye k'en koni s'ín jaáya-la Jesús.

³ Kitsobà'ñó, kùiko, ikjoàn kiskinìs'en ndayá nga jyeé kjònguixòñ. Yaá kisìkítsajna ndayá skanda komà nchijòn.

⁴ Ñó kjìn ma-ne xità xi kòkjeiín-la k'e nga kii'nchré 'én xi kùichjā Pedro kò Juan. Jyeé ma 'òn jmìi xità x'in xi mokjeiín-la; kò jñà íchjín xi kòkjeiín-la mìkìi kòxkeya.

⁵ Xi komà inchijòn, kjòxkóya ján Jerusalén xità sko-la jñà xità judío kò xità jchínga kò xità chjine xojòn xi okóya kjotíxoma-la Nainá xi kiskìi Moisés.

⁶ Tìkoá ya tìjna Anás, xi nò'miì ítjòn, Caifás, Juan, kò Alejandro, ngats'ìi xità xíkjin jñà xi nò'miì ítjòn.

⁷ Kiskinìkjaá Pedro kò Juan, ikjoàn chinchá osen nga kiskònangui-la, kitsò-la:

—¿Yá ts'e nga'ñó? ¿Yá xi kitsjaà'nde-nò nga xità xk'én nindaà-nò?

⁸ Jè Pedro nga ndaà tíjìn inìma-la jè Inìma Tsjeè-la Nainá kitsò:

—Jñò xi xitaxá ítjòn 'mì-nò kò xità jchínga-la naxandá Israel:

⁹ Jñò, ¿mé-ne mejèn-nò nga jchāa kjondaà xi kòmat'in xità jè nga kòmandaà-ne nga jye ma fi-ne?

¹⁰ Jñò nga nguixkoòn, kènojmi-nòjen, tìkoá kàtji'nchré yije ngats'ìi xità naxandá Israel. Xità jè, it'aà ts'eé Jesucristo xi Nazaret ts'e kjòndaà-ne. Tìjè-ne xi kinìk'eèn nga tsakat'aà krò, tanga Nainá kisìkjaáya-la.

¹¹ Jñò, k'oaá ngaya-la koni chjinechrjò xi bíndaà ni'ya. Kinachrjekàngui-nò Jesús koni jngoò ndajo xi nímé chjì-la. Tanga i'ndeì jè tìjna ítjòn koni ndajo chrjangui-la chrjò ni'ya.

¹² Tà jngoò ma xità xi ma-la ochrjekàjìin-ná kjo'in, tà jè Jesucristo. Mì tì yá xità tjin-ne i it'aà nangui xi Nainá kisìkasén nga kòma kochrjekàjìin-ná kjo'in.

¹³ Jñà xitaxá, k'e nga kijtseè nga 'ñó chjā Pedro kò Juan nga mìkìi tsakjón, tìkoá kijtseè nga taxkì ndí xità-né nga mìtsà 'ñó ma-la xojòn, tà kjòxkón-la; k'eé kjòchjìya-la nga jñà xità xi tsajmeìkò Jesús.

¹⁴ Tìkoá kijtseè nga ya síjna jè xità xi jye kjòndaà-ne, k'oaá s'ín komà-ne nga mì tì kò kitsò-la.

¹⁵ K'eé tsachrje jngoò tjò ni'ya osen, ikjoàn tsajoóya-ne.

¹⁶ Kitsò-la xíkjin:

—¿Mé xi sikoáá xità koi? Ngats'ìi xità naxandá Jerusalén, jyeé tíjìn-la kjòxkón xi kis'ìin, mìkìi kòma kí'maá.

17 Kínchaxkón-laá nga ni ti jngoò xita kohóko-ne xi it'aà ts'e Jesús, mé-ne nga mi ti kiì kobísòn-ne kjoa koi.

18 K'eé kiichja ìjngoò k'a-la Pedro ko Juan; kitsjaà-la okixi nga jngoò k'a mi ti kiì tji'nde-la nga kichja-isa-la, tikoà kokòya-isa-la xita it'aà ts'e Jesús.

19 Jè Pedro ko Juan kiichja, kitsò-la:

—Jñò, ndaà jchósòn-là, ñá-laá xi kixi tjín nga nguixkon Nainá. ¿Yá-né xi sikitasòn-lajen? ¿A jñò-nò xi xita 'mì-nò? ¿A xi jè sobá Nainá?

20 Mikiì koma jyò kitsajna-jen it'aà ts'e kjoa xi ki'ya-jen ko xi kina'ya-jen.

21 Jñá xitaxá mikiì kjòtsji-la kós'ín sikkò nga tsjá-la kjo'in, tà chincháxkón-la, ikjoàn kisikítsajnadeji-ne, koií kjoa-la nga jñá ngats'ii xita naxandá, 'ñó jeya kisikíjna Nainá it'aà ts'e kjoaxkón xi komà.

22 Koií-né nga jè xita xi jye kjòndaà-ne, tsatoó ichán nó tjín-la k'e nga k'oas'ín komàt'in kjoaxkón jè.

Kó s'ín kisijét'aà-la Nainá jñá xita xi mokjeiín-la it'aà ts'e Cristo

23 K'e nga jye tsibítsajnadeji-ne Pedro ko Juan, kiì-ne ñánda títsajna xita xíkjin; tsibénojmi yije-la kó kitsò-la jñá no'miì ítjòn ko jñá xita jchínga.

24 Jñá xita xíkjin, k'e nga jye kiì'nchré koni s'ín kis'enojmi-la, ngats'ii, tsibíts'ia nga tà jngoò jta kiichjat'aà-la Nainá, kitsò:

—Ji Na'èn xi ji tjín-lè kindá ngats'ii xi tjín, nga ji tsibìndii ngajmiì, nangui ko ndáchikon, ngats'ii tsojmi xi tjín isò'nde.

25 Nga ko Inima Tsjeè-lè kinikjín tso'ba chi'nda-lè David xi xita jchínga kjiin-najen nga k'oà kisi:

¿Mé-ne nga mats'en-ne xita isò'nde?

Ko jñá xita naxandá, ¿mé-ne kjoa ts'en joóya-ne xi kondra ts'e Nainá?

26 Kjòxkóya xitaxá ítjòn xi tjín isò'nde;

kisìjngoò yijo-la jñá xita xi tjín-la kjotíxoma

nga kondra kiì-la Nainá ko Cristo, [xita xi xó kisikasén-ne Nainá].

27 'Kixií kjoa, jè Herodes ko Poncio Pilato, ko xi taxki xita xi mìtsà xita judío, ko ngats'ii xita naxandá Israel, kisìjngoò yijo-la i naxandá jè, nga kondra kiì-la Ki'ndí-lè Jesús xi xita tsjeè xi ngaji xó ji kichjaàjiin-ne nga kinikasín nga jè xi Cristo.

28 Jñá xita koi, k'oaa s'ín kis'iin yije koni s'ín tjíndaà-lè nga tisa tàts'en-la kjoa nga k'oas'ín koma.

29 Na'èn, i'ndeji, chítsején-la xita koi nga mejèn-la beètoòn-najen; tichját'aà-nájen nga mikiì kiskón-jen nga ma kinókoaya-jen 'én-lè xi chi'nda-lè 'mì-nájen.

30 Takói nga'ño xi tjíya ndseji nga kàtandaà-ne xita xi xk'én; it'aà ts'e Chi'nda Tsjeè-lè Jesús, t'jin kjoaxkón xi okó kjoajeya-la Nainá.

31 K'e nga jye kiichjat'aà-la Nainá, ts'a ch'ón ya i'nde ñánda títsajna. Ngats'ii xita xi ya títsajna kis'ejiin inima-la Inima Tsjeè-la Nainá; mi ti kiì kitsakjòn-ne nga kiichjaya 'én-la Nainá.

Kó kis'iin jñá xita-la Cristo nga nijngoò xi kisichjät'aà-la tsojmi xi mochjeén-la

32 Ngats'ii xita xi jye kòkjeiín-la, ngàsòn ngáya tjín inima-la ko kjohítsjeèn-la; ngats'ii tsojmi xi tjín-la nga jngoò ìjngoò, ts'e yije-né kóhótjín. Nijngoò xi kitsò: “Tsojmi xi tjín-na, tà ts'an, tajngoò-ná.”

33 Jñá xita xi tsibíxáya-la Jesús 'ño tse nga'ño kis'e-la nga isa ndaà tsibénojmi nga jye jaáya-la Na'èn-ná Jesucristo it'aà ts'e kjoabiyaà. Ngats'ii jñá xita koi, Nainá 'ño ndaà kisichikon-t'in.

34 K'oaa s'ín komà-ne nga nijngoò xita kisichjät'aà-la tsojmi xi mochjeén-la. Jñá xita xíkjin xi tjín-la nangui ko jñá xi tjín-la ni'ya, otíjna. Ikjoàn f'iikò yije ton-la tsojmi xi otíjna.

³⁵ Síngatsja jǎ̀nà x̄it̄a xi tsibíxáya-la Jesús; ikjoàn síka'bí-la xíkjín nga jngoò ìjngoò mé xi chijat'aà-la.

³⁶ Ya tǎ̀njajìn jngoò x̄it̄a levita xi José 'mì. Yaá ì'nde-la naxandá Chipre. Jǎ̀nà x̄it̄a xi tsibíxáya-la Jesús, tsibít'aàsòn 'ín-la: Bernabé kitsò-la. ('Ín jè, tsòyaá-ne: x̄it̄a xi síjehikon-ná.)

³⁷ X̄it̄a jè, kijna jngoò 'nde-la nangui; tsatǎ̀jna; j'ìikò tòn-la; kisìngatsja jǎ̀nà x̄it̄a xi tsibíxáya-la Jesús.

5

Jé xi tsohótsji Ananías kò Safira

¹ Tanga ìjngoò x̄it̄a x'ìn xi 'mì Ananías kò chjoón-la Safira, tǎ̀koo tsatǎ̀jna jngoò 'nde nangui-la.

² X̄it̄a jè tsajoóya-ne kò chjoón-la, tsibí'ma chiba tòn chjí-la nangui. Tà chiba j'ìikò nga kisìngatsja jǎ̀nà x̄it̄a xi tsibíxáya-la Jesús.

³ Jè Pedro kitsò:

—Ji Ananías, ¿mé-ne kòbì'nde-ne nga x̄it̄a neí kòfahas'en-jìin inima-lè nga mejèn-lè kachonachan-la Inima Tsjeè-la Nainá nga kòbì'ma chiba tòn chjí-la nangui?

⁴ ¿A mìtsà tsiji nangui? K'e nga jye kòhotijni, ¿a mìtsà tsiji tòn? ¿Mé-ne k'oas'ín kànikítsjeèn-ne ìjìin inima-lè? Mìtsà taxki x̄it̄a mejèn-lè kachonachan-la, jè sobà Nainá.

⁵ Jè Ananías, k'e nga kiì'nchré 'én koi, kiskaàjndoòt'aà nangui, k'en. Ngats'ìi x̄it̄a xi kis'ejiin-la kjoa xi komà, ndaà jchán kitsakjòn.

⁶ K'eé j'ìi i'nga ìxti x'ìn xi kisikájté nikje yijo-la Ananías; tsachrje ni'ya, nga kiì kíhijìn.

⁷ Tjín-la tsà jàn hora nga j'ìi Safira chjoón-la Ananías; mìkì tǎ̀jìin-la mé kjoa xi komà.

⁸ Pedro kiskònangui-la kitsò-la:

—¿A k'oaá tjín kòhotijna-nò nangui-nò koni tjín bixón?

Jè chjoón kitsò:

—Jon, k'oaá tjín kòhotijna-najen.

⁹ Jè Pedro kitsò-la:

—¿Mé-ne k'oas'ín kàchibàya-nò? ¿A k'oaá s'ín kànikítsjeèn nga ma chónachan-là jè Inima Tsjeè-la Nainá? Chítsején-la jǎ̀nà ìxti xi nchajto xotjoa ni'ya. Jǎ̀nà kòfi kíhijìn x'ìn-lè; tǎ̀kooá ngaji, jǎ̀nà kjikò-lè.

¹⁰ Chjoón jè, nǎ̀toón kiskaàjndoòt'aà nangui ya ñánda síjna Pedro; k'en. K'e nga jahas'en ni'ya jǎ̀nà ìxti x'ìn, kijtseè nga jye k'en; tsachrje ni'ya; kiì kíhijìn-t'aà-la x'ìn-la.

¹¹ Ngats'ìi x̄it̄a naxandá-la Cristo kò ngats'ìi x̄it̄a xi kiì'nchré kjoa koi, ndaà jchán kitsakjòn.

Kjoxkón ndaà xi kis'ìn jǎ̀nà x̄it̄a xi tsibíxáya-la Jesús

¹² Jǎ̀nà x̄it̄a xi tsibíxáya-la Jesús, kjìn kjoxkón xi okó kjoajeya-la Nainá kis'ìn nga nguixkòn x̄it̄a naxandá. Ngats'ìi x̄it̄a-la Cristo, yaá bixoña kjit'aà ya ingo ítjòn ya nguitjoa-la xi 'mì Salomón.

¹³ Jǎ̀nà x̄it̄a xi mìkì mokjeiín-la ìt'aà ts'e Cristo, nijngoò kjò'ñóhikon nga ya kiit'aà-la jǎ̀nà x̄it̄a-la Cristo. Tanga jǎ̀nà x̄it̄a naxandá, 'ñó ndaà kijtseèxkón jǎ̀nà x̄it̄a-la Cristo.

¹⁴ Tanga jǎ̀nà x̄it̄a xi kòkjeiín-la ìt'aà ts'e Cristo, íchjín íchjá, isaá 'ñó kòkjìn-ya-ìsa.

¹⁵ Jǎ̀nà x̄it̄a tsachrje x̄it̄a xi xk'én ya iya ndiyá; kisikáyjòsòn nachan kò nijñaà mé-ne k'e nga kjoa Pedro, nas'ín tà jè 'nguién-la skat'aà i'nga-la jǎ̀nà x̄it̄a xk'én.

¹⁶ Tǎ̀koo kjìn x̄it̄a j'ìi ya Jerusalén xi inchrobà-ne naxandá xi kjiyijòt'aà chraña-la; j'ìikò x̄it̄a xi xk'én kò jǎ̀nà xi inima ch'o-la neí nchibeètoòn; ngats'ìi x̄it̄a koi kjòndaà yijeé-ne.

Kjo'in xi tsatojìn Pedro kò Juan

¹⁷ Jè no'miì ítjòn kò ngats'ìi x̄it̄a xi ya báhijtakò, jǎ̀nà xi ya chja-ne ìt'aà ts'e x̄it̄a saduceo, kjòchìnikeé jǎ̀nà x̄it̄a xi tsibíxáya-la Jesús.

18 Kitsobà'ńó; kiiko; kiskinìs'en ndayá xi ts'e naxandá.

19 Tanga k'e nga jye kòjńò, jngoò àkjale-la Nainá ijchò kix'a-la xotjoa ndayá. Tsachrje xita koi; kitsò-la:

20 —Tanguió, tinchajtoò xotjoa ingo ítjòn. Tènojmi yije-la xita naxandá kós'ín kítsajnakon xita it'aà ts'e Cristo.

21 K'e nga kiì'nchré 'én koi, nga komà nchijòn, tajńòyaá kiì ya ingo ítjòn, ikjoàn tsibíts'ia nga tsakóya-la xita.

Tik'e-ne chixoña jè nò'miù ítjòn, ngats'iì xita-la xi ya títsajna. Kiìchja-la ngats'iì xitaxá ko xita jchínga ts'e naxandá Israel; ikjoàn kiskiníkjaá jńà xita-la Cristo xi títsajna'ya ndayá.

22 Tanga k'e nga ijchò jńà policia, mìkiù kusakò-la jńà xita xi títsajna'ya ndayá; tà k'oaá s'ín inchrobà-ne; kitsjaà okixi nga mì tì yá tjín-ne.

23 Kitsò:

—K'e nga kòbijchò-jen, ndaà tíchjoàjto xotjoa-la ndayá. Jńà xita soldado xi síkinda, yaá nchajto xotjoa, tanga k'e nga kòbitjaàs'en-jen mì tì yá xita tjín-ne iya ndayá.

24 K'e nga kiì'nchré 'én koi, jè nò'miù ítjòn ko nò'miù xi i'nga ko jè xita sko-la policia xi síkinda ingo ítjòn, tà k'oaá komà-la nga mìkiù machiya-la kós'ín koma nga kjoehet'aà kjoa koi.

25 Tik'eé-ne j'ìi jngoò xita xi j'ìi kénojmi, kitsò:

—Jńà xita xi kichinìs'en ndayá ngojńà, yaá títsajna ingo ítjòn nga nchihokóya-la xita naxandá.

26 K'eé kiì jè xita sko-la policia xi síkinda ingo, kjihijtako jńà policia xi i'nga nga kiìkjaá Pedro ko Juan. Tà kjondaá inchrobàko. Jńà tsakjón-la xita naxandá tsà ndajo koì'nè nga siik'en.

27 K'e nga j'ìiko, chinchá osen ñánda nchijoóya-ne. Jè nò'miù ítjòn kitsò-la:

28 —¿A mìtsà k'oas'ín ki'mi-nòjen nga jngoò k'a mì tì k'oaá tsò-ne 'én xi kókóya it'aà ts'e Jesús? I'ndeì, kòhokji Jerusalén, jyeé titsachinìsòn yije kjotíxoma-nò; tikoáá mejèn-nò ngajen chinì'nè-nájen nga k'en xita xi 'mì Jesús.

29 Jè Pedro ko xita xi i'nga xi tańa tsibíxáya-la Cristo kitsò:

—Isaá 'ńó mochjeén nga jè Nainá síkitasòn-lajen mì k'oaá-ne koni xi taxki xita.

30 Jè xi Nainá tsò-la xita jchínga-ná kisikjaáya-la Jesús it'aà ts'e kjoabiyaá, tijè-ne Jesús xi jńò kinik'eèn nga tsakat'aà krò.

31 Nainá, 'ńó jeya kisikíjnat'aà chrja kixi-la. Xitaxá ítjòn kisikíjna. Tikoáá jè kisikíjna nga jè kochrjekàjìin-ná kjo'in. K'oaá s'ín kis'iin Nainá, mé-ne nga jńá xi naxandá Israel 'mì-ná síkájnoaá jé-ná; mì tì jé kinchátsji-ná nga sùjchàat'aà-ná Nainá jé xi tjín-ná.

32 K'oaá s'ín bènojmi-nòjen kjoa koi xi xkoòn ki'ya-najen. Tikoá bènojmi kixi-né jè Inima Tsjeè-la Nainá xi jye kitjoé-la jńà xita xi síkitasòn-la Nainá.

33 K'e nga kiì'nchré 'én koi, 'ńó jchán kòjti-la; skanda mejèn-la siik'en.

34 Ya tjínajìin jngoò xita fariseo xi tikoá xá tjín-la xi 'mì Gamaliel, jè xi okóya kjotíxoma. Ngats'iì jńà xita naxandá 'ńó ndaà beèxkón xita jè. K'eé tsasíjna-kixi-jìin-la ngats'iì jńà xita xi tjín-la xá; kitsjaà okixi nga kàtitjo jngoò tjò ni'ya jńà xita xi tsibíxáya-la Jesús.

35 Jè Gamaliel kitsò-la xitaxá xíkjín:

—Jńò ngats'ioò xi xita xinguiáá Israel 'mì-ná, ndaà tikítsjeèn mé kjoa xi síkoo jńà xita koi.

36 Tikítsjeèn jńà nachrjein xi jye tsato, tsibìjnaá jngoò xita xi ki'mi Teudas. K'oaá kitsò nga xita ítjòn-né. Komà-la tsà ñijòn sìndo xita xi kiit'aà-la. Tanga k'e nga kisik'en xita, ngats'iì xita xi kiit'aà-la, kitsjohoba-né. Tà yaá jyehet'aà kjoa.

37 K'e nga komà iskan, jè nachrjein nga kòxkeya xita, tsatsejèn ijngoò xita xi 'mì Judas xi xita Galilea. Tikoáá kjìin xita naxandá kiit'aà-la. Tanga k'e nga kinik'en xita jè, tikoáá ngats'iì xita xi ya kiit'aà-la, kitsjohoba yije-né.

³⁸ I'ndeì k'oaá ma-ne koxan-nò, tà tikjehet'aà kjoa. Tjiì'nde-là xità koi nga kàtjì-ne. Tsà tà xá ts'e xitàá xi nchis'ín kjoehet'aà-né.

³⁹ Tanga tsà xá ts'e Nainá-né xi nchis'ín, mìkì kichikjoa-nò nga jñò kixkàn-ko; tikindaá yijo-nò tsà koi nachrjein-la, tsà xá-la Nainá titsabixkàn-ko.

⁴⁰ Ngats'ì xità xi títsajna junta, kòkjeín-la koni s'ín kitsò Gamaliel. K'eé kiichja ìjngoò k'a-la jñà xità xi tsibíxáya-la Jesús. Ikjoàn tsajá-la. 'Nó tsibínè-la nga mì tì k'oa s'ín kichjaya-ne it'aà ts'e Jesús. Ikjoàn kisikítsajnadeí-ne.

⁴¹ Jñà xità xi tsibíxáya-la Jesús, 'nó tsja tjín-la k'e nga itjo-ne ni'ya nga jè Nainá kitsjaà'nde nga kitjoé-la kjondaà nga kisikjeín kjo'in xi kjoa ts'e Jesús.

⁴² Jñà xità koi, mìkì jyò tsibítsajna. Nachrjein inchijòn tsakóya tikoa kiichjaya 'én ndaà-la Nainá ya ìngo ítjòn ko xi kj'eí ni'ya nga jè Jesús xi Cristo [jè xi xó kisikasén-ne Nainá].

6

K'e nga itoò xità kitjaàjìin xi kisichját'aà

¹ Jñà nachrjein koi, k'e nga jye 'nó tímakjìn-ya xità xi kota'yàt'aà-la Cristo, jñà xità xi chja 'én griego tsibíts'ia nga tsohojét'in jñà xità xi chja 'én hebreo, nga jñà íchjín ka'àn xi ts'e xità griego mì ngàsòn tí'biì-la tsojmì xi kine koni jñà íchjín ka'àn xi ts'e xità hebreo.

² Jñà xità xi tejò ma-ne xi tsibíxáya-la Jesús, tsibíxkóya ngats'ì xità xi kota'yàt'aà-la Cristo, kitsò:

—Mì-la kiì ndaà tjín nga sikíjna-jen xá-la Nainá nga mì tì kiì kinókjoaya-najen 'én-la Nainá, nga nguì ta koi xá s'en-jen nga xità ìma sikjèn-jen.

³ 'Ndsè, chjaájñòò itoò xità x'in xi 'yaà nga ndaà nchisíjchá yijo-la, tikoa ndaà tíjìin inìma-la Inìma Tsjeè-la Nainá, xità xi ndaà kjohítsjeèn tjín-la mé-ne jñà kongatsja xá koi.

⁴ Ngajen, kjit'aà nachrjein kinókjoat'aà-lajen Nainá; tikoa kókóya-jen 'én-la Nainá.

⁵ Jñà 'én koi, ndaà kisaseèn yije-la ngats'ì xità. K'eé jaàjìin Esteban, jngoò xità x'in xi ndaà mokjeín-la it'aà ts'e Nainá, tikoa ndaà tíjìin inìma-la jè Inìma Tsjeè-la Nainá. Tikoa kitjaàjìin Felipe, Prócoro, Nicanor, Timón, Parmenas, Nicolás, jngoò xità Antioquía xi jahatjìya-la nga xità judío komà.

⁶ Jñà xità xi itoò ma-ne chinchá osen nga nguixkon xità xi tsibíxáya-la Jesús. Ko jñà xità xi tsibíxáya-la Jesús kiichjatjì it'aà ts'e Nainá, ikjoàn tsohósòn-la tsja nga kjòngatsja xá.

⁷ Ìsaá 'nó tsabísòn-ìsa 'én-la Nainá. Ya naxandá Jerusalén saá 'nó saá 'nó makjìn-ya xità xi kota'yàt'aà-la Cristo. Skanda jñà nò'miì, tikoaá jyeé kjìn ma-ne xi mokjeín-la it'aà ts'e Cristo.

K'e nga kindobà'nó Esteban

⁸ Jè Esteban, 'nó ndaà kis'e-la nga'nó ko kjondaà xi it'aà ts'e Nainá. K'oaá komà-ne nga kjìn kjojkón xi okó kjoajeya-la Nainá kis'ìin ya jìjìin naxandá.

⁹ Tjín i'nga xità xi ya chja-ne ni'ya ìngo sinagoga ñánda maxkóya xità judío xi jye títsajnadeí-ne, ko xità Cirene, xità Alejandría, xità Cilicia ko xi ján i'nde-la Asia; tsibíts'ia nga tsakátikjoó ko Esteban.

¹⁰ Tanga xità koi, mìkì kisikijne, nga jè Esteban, koó kjohítsjeèn-la Inìma Tsjeè-la Nainá kiichja.

¹¹ K'eé tsohótsji xità xi tsibíchjì-la nga kitsjaàt'in 'én ndiso; kitsò:

—Kina'yà-lajen Esteban nga chjajno-la Moisés ko Nainá.

¹² K'oaá s'ín komà-ne nga kòjti-la jñà xità naxandá ko xità jchínga ko xità xi okóya kjotíxoma-la Nainá xi kiskì Moisés. Kitsobà'nó Esteban, kiìko ñánda títsajna xitàxá ítjòn xi joóya-ne kjotíxoma.

¹³ Ijchòko xità ndiso xi kitsjaàt'in 'én, kitsò:

—Xita jè, mìkìl jyò bìjna, kjit'aà nàchrjein chjajno-la jè Ingo Tsjeè-la Nainá kò kjotíxoma xi kiskìl Moisés.

¹⁴ Jyeé kina yà-lajen nga tsò nga jè Jesús xi Nazaret ts'e, sikkixòña Ingo-la Nainá tikoa sikkjatjìya-la kjotíxoma xi 'né koni s'ín tsakóya-ná Moisés.

¹⁵ Ngats'iì xitaxá xi ya títsajna, k'e nga kiskòd'an Esteban, k'oaá s'ín kijtsee isén-la koni kji isén-la àkjale.

7

'Én xi kùichja Esteban nga tsasìkò yijo-la

¹ Jè xita sko-la nò'mi kiskònangui-la Esteban kitsò-la:

—¿A kixií kjoa nga k'oa tjin jé xi ónè-lè xita?

² Jè Esteban kitsò:

—'Ndsè, kò xi xita jchínga 'mì-nò, tiná'ya-ná: Jè Nainá, xi 'ñó jeya tíjna, yaá ijchòkon ñánda tíjna xita jchínga-ná Abraham k'e nga tákó ya tíjna Mesopotamia, k'e nga tikj'eè bijchó kijna ján naxandá Harán. Kò jè Abraham kijtsee tsejèn-né kó kji Nainá.

³ K'eé kùichja Nainá, kitsò-la: “Titjòjùn nangui-lè; tikítsajnei xita xingui; t'in kijni ya nangui ñánda 'an kokòd-lè.”

⁴ Jè Abraham, itjokàjùn nangui-la xita Caldea; ján kù kijná nangui Harán. K'e nga k'en na'èn-la, Nainá j'iikò i i'nde jè ñánda titsajnaá i'nde.

⁵ Nainá, nimé i'nde kitsjaà kjotjò-la; nì tsà tà itsé ñánda kosijnasòn jngoò ndsokò. Tanga k'oaá s'ín kitsjaà-la tso'ba nga kitsò-la nga ts'eé koma kò ts'eé xita tje-la nita mé nàchrjein-ne. Nàchrjein koi, kj'eè ixtií tjin-la jè Abraham.

⁶ Nainá k'oaá s'ín kitsò-isa-la: “Jña tje-lè, xita chi'ndaá koma; ñijòn sindò nó xìn naxandá sikkjá yijo-la nga sikkjeín kjo'in.”

⁷ Nainá kitsò: “Aán tsjaà-la kjo'in jè naxandá ñánda chi'nda kítsajna; k'e nga koma iskan, kitjokàjùn-né nangui jè. Kjinchrobà jngoò k'a-ne ijndé, kò ií i'nde jè, skoexkón-na.”

⁸ Nainá jngoò kjoa tsibíndaajùn-kò Abraham nga sít'aà chiba-la yijo-la xita kjoa ts'e circuncisión. Abraham, kis'e jngoò-la ki'ndí xi Isaac ki'mì; k'e nga ijchò jùn nàchrjein nga kits'iin, tsibít'aà chiba-la. Isaac kis'e-la ki'ndí xi 'mì Jacob; k'oaá tis'ín kisikò. Jacob, kis'e-la ixti xi tejò ma-ne tje-la xita jchínga-la naxandá Israel. K'oaá tis'ín tsibít'aà chiba-la.

⁹ Jña ixti-la Jacob, xi xita jchínga-ná, kjòxítakòn-keè jè 'ndse xi 'mì José; ikjoàn tsatíjna nga kùkò xita xi tsatse ján nangui Egipto. Tanga Nainá kisikinda José.

¹⁰ Nainá kisichját'aà-la nita mé kjoa xi kis'e-la José. Kitsjaà-la kjohítsjeèn, kitsjaà-la kjondaà nguixkòn faraón xi xitaxá ítjòn tíjna ján naxandá Egipto. Jè Faraón kisikíjna José nga jè tsatíxoma-la naxandá Egipto, tikoa jè tsatíxoma ni'ya-la faraón.

¹¹ Jña nàchrjein koi j'ií kjinchrá kóhokji nangui Egipto kò i'nde Canaán; tseé kjo'in kis'e-la xita; jña xita jchínga-ná tsjìn tsojmì xi kine.

¹² K'e nga kù'nchré Jacob nga tjin tsojmì xi ma chine ján Egipto kisikasén nga kùkjaá ítjòn tsojmì ixti-la jña xi xita jchínga-ná.

¹³ Xi komà jò k'a nga kùkjaá tsojmì, José tsakó-la yijo-la xikjín nga 'ndse ma-ne. Faraón k'oaá s'ín komà-ne kijtseèxkon, ñánda nchrobát'aà-ne tje-la José.

¹⁴ José kiskinikjaá Jacob xi na'èn-la ma nga kjitjingui-la ján Egipto. Ngats'iì xita xikjín, jàn kaàn kò chrj'òòn ma-ne.

¹⁵ K'oaá s'ín komà-ne nga kù Jacob ján Egipto; yaá k'en; tikoaá yaá k'en ngats'iì ixti-la jña xi xita jchínga-ná.

¹⁶ Xi komà iskan, kùkò nindaà-la Jacob kò ts'e ti-la nga kù kihijùn jngoò ngajo itsjó ján Siquem; i'nde ñánda tsatse Abraham xi tsatíjna ixti-la Hamor.

17 'K'e nga jye kjòchraña nàchrjein nga kítasòn 'én koni s'ín kitsjaà tso'ba Nainá koni s'ín tsaioókjoò Abraham, jè naxandá Israel, 'ño kòkjìn-ya jña xita-la ján Egipto.

18 Ijchò nàchrjein nga ijngoò xita kisakò xi xita sko-la tsibìjna ján Egipto; tanga xita jè, mìkiì beèxkon José.

19 Xitaxá ítjòn jè, tsibíts'ia nga kiskoònachan-la xita jchínga-ná nga kijtseètoòn; kis'iìn-la kjo'ño nga kitsjeiìn takòn ngats'iì ndí ixti-la mé-ne nga kàtiyaa yije-ne nga kàtachija tje-ne.

20 Tijnà-ne nàchrjein koi, kits'iìn Moisés. Ki'ndí jè, 'ño ndaà kji isén-la. Jàn sá kisikíjna'ma ni'ya-la xita jchínga-la.

21 K'e nga ijchò síkíjna ijììn nandá, jè tsòti-la faraón kiskoétjò, kisijchá koni tsà ki'ndí ts'e.

22 Jè Moisés kiskoòta'ya ngats'iì kjoachjine xi tjín Egipto. 'Ñó ndaà kjohítsjeèn xi kis'e-la, ndaà kiùchja tikoá ndaà kis'iìn.

23 'Moisés, k'e nga jye tjín-la ichán nó k'oaá s'ín tsi'beé-la ikon nga mejèn kiìkon xita naxandá Israel xikjín.

24 Moisés, k'e nga kijtseè nga ch'o tìnìko jngoò xita Israel xikjín, tsasìko nga kisik'en xita Egipto mé-ne nga kòjndà-ne.

25 Moisés, k'oaá s'ín tísikítsjeèn, maá-la tsà tímachiyaá-la jña xita Israel xikjín nga jè Moisés siìkjeèn Nainá nga siìkítsajnandeí; tanga jña xita Israel mìkiì kjòchija-la.

26 K'e nga komà inchijòn, Moisés kijtseè jò xita Israel xi nchikjaán-kjoò, mejèn-la kotekjáya-la, kitsò-la: “Jño xi 'ndsè chiba, ¿mé-ne bixkàn-ko-nò xinguiò?”

27 Jè xita xi tíkjaán-ko xikjín, k'eé kii jahitjen Moisés, kitsò-la: “¿Yá xi xitaxá kàsikíjna-lè ko xi ixkàlè kàtsò-lè xi it'aà tsajen?”

28 ¿A tikoáá mejèn-lè nga sik'en-ná koni s'ín kinik'in ngojña jè xita Egipto?”

29 Moisés, k'e nga kii'nchré 'én koi, tsanga-né; ján kii kíjna i'nde ñánda 'mì Madián. K'oaá s'ín tsibìjna koni jngoò xita xi kjiìn i'nde-la; jò ixti kis'e-la.

30 'K'e nga jye ijchò ichán nó nga tíjna Madián, Moisés, tsatsejèn jngoò-la àkjale-la Nainá xi ya síjnajiìn ni'ín ñánda títi jngoò yá na'yá ya chrañat'aà-la nindoò Sinaí, ya i'nde it'aà xìn ñánda nangui kixì choòn.

31 Moisés, k'e nga tíkotsejèn-la jè yá na'yá xi títi, tà kjòxkón-la koni s'ín tíma; k'e nga isa chrañat'aà kii kasìjna nga isa ndaà skoe, kii'nchré jta-la Nainá nga kiùchja-la, kitsò:

32 “An-ná xi Nainá tsò-na xita jchínga-lè, Nainá tsò-na Abraham, ko Isaac, ko Jacob.” Tanga jè Moisés tà tsatsé-né nga 'ño kitsakjòn, mìkiì kitsò-ikon nga kiskoòtsejèn-la.

33 Jè Nainá kitsò-la Moisés: “Chjaàxìn xojté xi titsjayi; jè i'nde ñánda tisijnasoìn, i'nde tsjeè-né.

34 Ndaà tìbe kjo'in xi nchisikjeiìn xita-na xi títsajna Egipto. Jyeé ki'nchrè-la nga nchihojé't'aà-na; koií xá kòbitjojen-na nga siìkítsajnandiaá. Koií xá tichjà-lè, nchroboí, ján siìkasén-lè Egipto.”

35 Jña xita Israel nas'ín tsachrjekàngui Moisés k'e nga kitsò-la: “¿Yá xi xitaxá kàsikíjna-lè ko xi ixkàlè kàtsò-lè?”, tanga jè sobá Nainá kisikasén ján naxandá Egipto koni jngoò xitaxá ítjòn xi kisikítsajnandeí xita Israel. Nainá kisikjeèn jè àkjale xi tsatsejèn-jììn yá na'yá xi títi.

36 Jè Moisés xi tsachrjekàjììn xita Israel ján naxandá Egipto. Nainá kisikjeèn Moisés nga 'ño kjìn kjòxkón kis'iìn kóhokji Egipto, ko ya Ndáchikon Inì, kóhokji ñánda nangui kixì choòn nga ichán nó chinchimaya ndiyá.

37 Tijè-ne Moisés xi kitsò-la jña xita Israel: “Nainá kochrjekàjììn jngoò xi tì xita xinguiò-nò, jè xi kichja ngajo-la Nainá koni 'an.”

38 Tikoáá tijè-ne Moisés xi tsibìjnako xita naxandá Israel ya ñánda nangui kixì choòn, jè xi tsohóko àkjale ya nindoò Sinaí, jè xi tsajmeiìko xita jchínga-ná nga kisikatoya-la 'én xi kitsjaà-la àkjale; tikoáá tijè-ne xi kitjoé-la 'én-la Nainá xi síkíjnakon-ná mé-ne komà kisikatoya-ná jña 'én.

³⁹ Tanga jñà xita jchínga-ná, tsachrjenguí 'én xi kitsjaà Moisés, mìkìi kisikitasòn. K'oaá s'ín kisikitsjeèn ijìin inìma-la, mejèn kù ìjngòò k'a-ne ján Egipto.

⁴⁰ Kitsò-la jè Aarón: “Tìndaà i'nga-ná nainá xi kjìko-ná. Jè Moisés xi tsachrjekàjìin-ná ján nangui Egipto, mìkìi 'yaá mé xi komà-la.”

⁴¹ K'ée tsibíndaà jngòò xkósòn xi nainá kitsò-la xi isén-la nchraja ki'ndí kji; kisik'en cho kjotjò xi kitsjaà-la jè nchraja nga kijtseèxkón, ikjoàn tsibíjna jngòò-la s'eí xi it'aà ts'e xkósòn xi tijnà tsibíndaà-ne.

⁴² Koií kjoa-la tsasit'aàxìn Nainá it'aà ts'e xita Israel. Kitsjaà'nde-la nga kijtseèxkón yije ni'ño xi tijn ngajmii. K'oaá s'ín tíchja jè xojon xi kiskii jñà xita xi kiichja ngajo-la Nainá nga tsò:

Jñò xi xita naxandá Israel tsajòn,
k'e nga ichán nó tsitjaayaà ndiyá ya ñánda nangui kixi choòn,
kò kinik'eèn cho nga mejèn-nò kits'iì kjotjò-ná,
mìtsà 'an kiyaxkón-ná.

⁴³ Majin, ta saá kichijeèn ni'ya nikje-la Moloc,

kò ni'ño ts'e Renfán xi nainá 'mì-là;
jñà isén xi tijnò tsibíndaà-nò nga kiyaxkón.

Koií kjoa-la nga kochrjekàjìin-nò i'nde tsajòn.

Ján siikasén-nò ñánda nga isa kjìin-la Babilonia.

⁴⁴ 'Ya ñánda nangui kixi choòn, jñà xita jchínga-ná kis'e-la Ni'ya Tsjeè xi nikje ñánda kjijiyòya kjotixoma-la Nainá. K'oaá s'ín kisindaà koni s'ín tsatixoma-la Nainá jè Moisés k'e nga kitsò-la nga kátindaà jngòò ni'ya koni kji isén-la ni'ya xi jye jè tsakò-la.

⁴⁵ Ni'ya tsjeè jè xi nikje, jñà xita jchínga-ná kjòngatsja; jñà xita Israel xi tjiko Josué, j'iiko ni'ya jè, k'e nga jahas'en nangui ijndé ñánda Nainá kitsjaà-la kò tsachrjekàjìin nangui-la jñà xita naxandá xi kj'eíi. Ni'ya jè, yaá kisijna skanda naxrjein ts'e xitaxá ítjòn xi David ki'mì.

⁴⁶ Nainá, 'ño ndaà kisaseèn takòn David. Kò jè David mejèn-la koìndaà jngòò-la ni'ya ñánda jeya kijná Nainá xi beèxkón jñà xita tje-la Jacob.

⁴⁷ Tanga jè xitaxá ítjòn xi ki'mì Salomón, jè xi tsibíndaà jngòò-la ni'ya Nainá.

⁴⁸ Nainá xi 'ño 'nga tíjna, mìtsà ya tíjnaya ni'ya xi xita bíndaà. Jè xita xi kiichja ngajo-la Nainá kitsò:

⁴⁹ Jè ngajmii, jè íxile-na ñánda otixoma;

jè isò'nde, k'oaá ngaya-la koni jngòò ískon ñánda nchasòn ndsokoaà.

¿A komaá-nò nga kíndaà jngòò-ná ni'ya ñánda siikjáyá? tsò Na'èn-ná.

⁵⁰ ¿A mìtsà 'an sobà xi tsibíndaà yije tsojmì koi?

⁵¹ Jè Esteban kitsò-isa-la:

—Jñò, kjit'aà naxrjein, 'ño tájaajìin tijn inìma-nò, kò mìkii ndaà na'ya koni s'ín jñà xi mìtsà xita-la Nainá. Kjit'aà naxrjein kondra onguí-là Inìma Tsjeè-la Nainá koni kis'iin jñà xita jchínga-nò.

⁵² Nijngòò xita xi kiichja ngajo-la Nainá xi mì kondra kii-la; kisik'en jñà xita xi j'ii kénomí it'aà ts'e jè xita kixi xi tijnè-la nga kjoíi. I'ndeí, nga jye j'ii jè xita kixi, yaá kinìngatsja jñà xitaxá nga kisik'en.

⁵³ Jñò, nas'ín it'aà ts'e àkjale-la Nainá kitjoé-nò kjotixoma, tanga mìkii nìkitasòn.

K'e nga k'en Esteban

⁵⁴ K'e nga kii'nchré 'én xi kiichja Esteban, 'ño jti komà-la ijìin inìma-la, chiba-la kinené ni'ño xi kondra ts'e Esteban.

⁵⁵ Jè Esteban, 'ño ndaà tíjìin inìma-la Inìma Tsjeè-la Nainá. Kiskoòtsejèn ngajmii; kijtseè kjoajeya-la Nainá nga Jesús ya síjnat'aà chrja kixi-la Nainá.

⁵⁶ Kitsò Esteban:

—Tíbe-ná ngajmù nga tìx'á; jè xi Ki'ndí-la Xìta tsò-la yijo-la yaá síjnat'aà chrja kixi-la Nainá.

⁵⁷ Ngats'ìi xìta koi, tsibíchoàjto líká-la; ìkjoàn 'ñó kiskindàya; jngoò k'a kii kóhòtjín nga jahatjen Esteban;

⁵⁸ tsachrjekàjìin naxandá; kò jñà xìta ndiso xi kitsját'in 'én xi kondra kii-la Esteban, yaá tsibítsajnanngui ndsoko jñà nikje-la ñánda síjna jngoò xìta ìxti xi 'mì Saulo mé-ne nga komà tsibínè-ne ndajo nga kisik'en.

⁵⁹ K'e nga tísine ndajo, Esteban tíchjat'aà-la Nainá, kitsò:

—Ná'èn Jesús, chjoétjoì inìma-na.

⁶⁰ Esteban tsasìjna-xkó'nchi, ìkjoàn 'ñó kiichja kitsò:

—ìNá'èn, kii kindáá 'nì jé-la xìta koi!

K'e nga jye okitsò, k'en.

8

¹ Jè Saulo, nga ya síjna tìkoáá kisìjngoò ikon nga kinìk'en Esteban.

Mé kjoa-ne nga jè Saulo kitsobà'ñó xìta-la Cristo

Kjòts'ia-ne nachrjein jè nga 'ñó kùtjìngui kondra-la xìta ngats'ìi xìta naxandá-la Cristo ján Jerusalén. Kóhòtjín xìta-la Cristo kitsjohoba kóhòkji nangui Judea kò Samaria. Tà jñà tsiningui-ne xìta xi tsibíxáya-la Jesús.

² Tjín i'nga xìta xi beèxkón Nainá, jñà tsibíhijìin Esteban. 'Ñó kiskindàyakeè.

³ Tanga jè Saulo, 'ñó kùtjìngui kondra-la xìta naxandá-la Cristo. Xkì xi ján ni'ya jahas'en nga kjo'ñó ochrje íchjín kò íchjá, ìkjoàn kinís'en ndayá.

Mé xi komà ya nangui Samaria k'e nga kiichjaya 'én-la Nainá jè Felipe

⁴ Jñà xìta xi kitsjohoba, xkì xi ján kii nga kisika'bí 'én ndaà-la Nainá xi kjoa ts'e Cristo.

⁵ Jè Felipe, k'e nga ijchò naxandá Samaria, yaá tsibénojímí ìt'aà ts'e Cristo [xìta xi xó kisikasén-ne Nainá].

⁶ Jñà xìta Samaria nga kjàn ma, k'e nga kii'nchré tìkoá kijtsee jñà kjoxkón ndaà xi kis'ìin Felipe, kóhòtjín, ìsáá ndaà kii'nchré-ìsa koni s'ín tsibénojímíya-la.

⁷ Kjàn xìta xi inìma ch'o-la neíí tíjìin inìma-la kjòndaà-ne. Jñà inìma ch'o-la neíí, 'ñó kjindáya k'e nga bitjojìin inìma-la xìta. Tìkoáá kjàn xìta ìma kjòndaà-ne xi mìkii ma síhiníyá yijo-la kò xi tsá'yá kjoàn.

⁸ K'oaá ma-ne nga jñà xìta naxandá jè, 'ñó tsja kis'e-la.

⁹ Ya Samaria tsibìjna jngoò xìta xi Simón ki'mì. K'e nga sa ítjòn, maá-la bíndaà. Kjàn nó kiskoònachàn-la xìta xi ya ì'nde-la nga chincháxkón-la nga kitsò: “An 'ñó ndaà machiya-na.”

¹⁰ Ngats'ìi xìta ìxti kò xìta jchínga, ndaà kii'nchréñijon-la; kitsò:

—Jè xìta jè xi tse nga'ñó tjín-la ìt'aà ts'e Nainá.

¹¹ Koií kjoa-la nga ndaà kii'nchréñijon-la nga jye kò kjàn nó konachàn-la nga bincháxkón-la nga 'ñó ndaà ma-la bíndaà.

¹² Jñà xìta, k'e nga kòkjeiín-la 'én ndaà-la Nainá kó s'ín otíxoma Nainá kò ìt'aà ts'e Jesucristo xi jè Felipe túbénojímí, tsibíts'ia nga komà bautizar íchjín íchjá.

¹³ Skanda tìjè-ne Simón tìkoáá kòkjeiín-la; ìkjoàn komà bautizar. Nándá tsajmeè Felipe, yaá tsajmeiikò Simón. Tà k'oaá ma-la nga tibeè kjoxkón ndaà xi tís'ín Felipe kò kjoa xi okò kjoa jeya-la Nainá.

¹⁴ Jñà xìta xi tsibíxáya-la Jesús xi títsajna Jerusalén, k'e nga kii'nchré nga jñà xìta Samaria jyeè kòkjeiín-la 'én-la Nainá, kisikasén jè Pedro kò Juan.

¹⁵ Jñà xìta koi, k'e nga jye ijchò Samaria, tsibítsi'batjì jñà xìta xi jye kòkjeiín-la mé-ne nga tjoé-la jè Inìma Tsjeè-la Nainá.

¹⁶ Nga jè nàchrjein jè, nì saá jngoò tjoé-la Inìma Tsjeè-la Nainá. Sà tà jè it'aà ts'e Na'èn-ná Jesús komà bautizar xita koi.

¹⁷ Jè Pedro ko Juan, k'eé tsohósòn-la tsja, ikjoàn kitjoé-la Inìma Tsjeè-la Nainá.

¹⁸ Jè Simón, k'e nga kijtseè nga jñà xita xi tsibíxáya-la Jesús, ósòn-la tsja jñà xita, nitoón tjoé-la Inìma Tsjeè-la Nainá, jè Simón tsibít'aà-la ton jñà xita-la Cristo,

¹⁹ kitsò-la:

—'An, tìkoa tjiì-ná nga'ño jè, mé-ne nita yá xita-ne xi kosòn-la ndsaa tìkoa tjoé-la Inìma Tsjeè-la Nainá.

²⁰ Jè Pedro kitsò-la:

—Kàtiyaàkoi ton-lè! Ngaji, k'oaá s'ín nìkítsjiìn tsà maá bindaà-ná kjojtjò xi tsjá Nainá.

²¹ Ngaji mìkìì tji'nde-lè it'aà ts'e xá jè nga jè inìma-lè mì kixi tìjna nguixkon Nainá.

²² Tìkájnoi jé-lè, nga ch'o tsò ya jjiìn inìma-lè, kì tì jé binchaàtsji-ne. Tìjét'aà-la Nainá tsà koi nàchrjein-la sùjchàat'aà-lè jé-lè.

²³ Be-ná nga jè kjoaxitakòn xi tjiìn inìma-lè ko jè kjoach'o-lè mìkìì tsjá'nde-lè nga ndaà 'nì.

²⁴ Jè Simón k'eé kitsò:

—Sìjét'aà-nò, titsi'ba-la Nainá xi it'aà ts'an mé-ne nga mì k'oa s'ín komat'ian ngats'ii kjoa xi k'oas'ín titsa'mì-ná.

²⁵ Jñà xita xi tsibíxáya-la Jesús, k'e nga jye kitsjaà 'én it'aà ts'e Cristo tìkoa tsakóya 'én ndaà-la Nainá, kii jngoò k'a-ne ján Jerusalén. K'e nga chinchimaya ndiyá, kjiìn xita naxandá jtobá xi chja-ne Samaria tsibénojmí-la 'én ndaà-la Nainá xi kjoa ts'e Cristo.

Jè Felipe ko jngoò xita Etiopía

²⁶ Xi jye komà, jngoò àkjale-la Nainá kiichja-la Felipe, kitsò-la:

—Tìsítjiìn, t'in kixii ndiyá xi bitjokàt'aà-ne Jerusalén, fijen bijchó skanda Gaza.

(Ndiyá jè, yaá fahato ya i'nde it'aà xìn ñánda nangui kixi choòn.)

²⁷ Felipe, tsasítjen, kii; ya iya ndiyá kisatiikjoò jngoò xita x'in ts'e Etiopía xi 'ño 'nga xá tjin-la xi jye kjòxkiì-la nga mì tì íchjín sùs'in-ne; tesorero tjin-la ts'e chjoón sko-la Etiopía xi 'mì Candace. Jerusalén j'ii-ne xita jè nga kii ingo ñánda beèxkón Nainá.

²⁸ Xita jè, k'e nga tinchrobá-ne nangui-la, tijnaya carreta-la; tíbixkejiìn xojoñ xi kiskii Isaías, xita xi kiichja ngajo-la Nainá.

²⁹ Jè Inìma Tsjeè-la Nainá kitsò-la Felipe:

—T'in tjiingui-la carreta jè, tsjahijtakoii.

³⁰ Felipe nitoón kiitjiingui-la, kii'nchré-la jè xita nga tíbixkejiìn xojoñ xi kiskii Isaías, xita xi kiichja ngajo-la Nainá; ikjoàn kiskònangui-la kitsò-la:

—¿A fíyaá-lè kó s'ín tichja xojoñ xi tìbixkejiìn?

³¹ Jè xita etiope kitsò:

—¿Kó s'ín koma kjiya-na nga mì yá bénojmíya-na? K'eé tsibítsi'ba-la Felipe nga tsijin-jno carreta; yaá tsibìjnayako.

³² Jè Xojoñ-la Nainá xi tíbixkejiìn ts'e Isaías tsò-né:

Kiiko koni jngoò orrè nga kii sík'en;

k'oaá ngaya-la koni jngoò orrè ki'ndí xi mìkii kjindáya k'e nga tísìjno-la,

k'oaá s'ín mìkii kiichja k'e nga tsatojiìn kjo'in.

³³ K'e nga tsachrjekàngui xita, mì kixi kisindaàjiìn-la.

Nga mì yá xita tje s'e-la, niyá xi sùkítsjeèn,

nga jè, kinìk'en-né i'isò'nde.

³⁴ Jè xita etiope kitsò-la Felipe:

—T'iiìn kjondaà. Tènojmíya-ná yá-né xi k'oas'ín títso-la jè Isaías; ¿a kj'eji xita-né, a xi tije-ne yijo-la?

³⁵ Felipe tsibíts'iako-ne jè xojoñ xi tíbixkejiìn xita etiope; tsibénojmí yije-la it'aà ts'e 'én ndaà-la Nainá xi kjoa ts'e Jesús.

³⁶ Koni s'ín nchifiya ndiyá, ijchò jngoò i'nde ñánda tjin nandá, kitsò xita etiope:
—I'nde jè, tjin nandá; ¿a mìtsà ndaà s'e tsà s'iaàn bautizar yijo-na?

³⁷ Felipe kitsò-la:

—Tsà koó inima-lè nga ndaà mokjeiin-lè koma-né.

Xita jè kitsò:

—Mokjeiin-na nga Jesús, jè xi Cristo xi Ki'ndí-la Nainá.

³⁸ Ko kitsjaà okixi nga tsasíjna carreta, ikjoàn tsitajen ingajò, jahas'en-jiin nandá, jè Felipe kis'iin bautizar.

³⁹ K'e nga jye itjokajiin-ne nandá, Felipe, tà nitoón kichijà; jè Inima Tsjeè-la Nainá kiiko; mì ti kii kijtseèxkon-ne xíkjin; tanga jè xita etiope, k'e nga tífi ya ndiyá, tsjaá jchán tjin-la.

⁴⁰ Jè Felipe k'e nga kjòchiya-la jye ya tjna naxandá Azoto; xki xi ján naxandá tsibénjmi 'én ndaà-la Nainá xi kjoa ts'e Cristo skanda k'e nga ijchò naxandá xi 'mì Cesarea.

9

*Kós'in komà k'e nga jè Saulo kòkjeiin-la it'aà ts'e Cristo
(Hechos 22:6-16; 26:12-18)*

¹ Saulo, xki xi ján i'nde bincháxkón-la xita xi kota'yat'aà-la Cristo nga mejèn-la sikk'en. K'oaá ma-ne nga kiikon jè no'mii itjòn,

² nga kisijé-la xojon xi tjin-la nga ñó xi k'oa ts'e jña ni'ya ingo sinagoga ján Damasco, mé-ne nga koma tsobà'ño-ne xita íchjin ko íchjá xi fit'aà-la jè ndiyá xitse-la Cristo; ikjoàn kjinchrobàko Jerusalén nga sikkítsajna ndayá.

³ K'e nga nchifiya ndiyá nga jye kjòchrañat'aà-la naxandá Damasco, tà nitoón kjòhiseèn jngoò itjandi-la jngoò ni'in xi inchrobà-ne ngajmii.

⁴ Jè Saulo kiskaajndoòt'aà nangui, ikjoàn kii'nchré-la 'én xi kiichjajiin isén xi kitsò:

—Saulo, Saulo, ¿mé-ne 'an tì'mitjngui kondra-ná?

⁵ Saulo kitsò:

—¿Yá-né ngaji, Na'èn?

Jè xi tíchja kitsò:

—'An-ná Jesús xi tì'mitjngui kondra-ná. Tijii tìyatoòn-ne yijo-lè, k'oaá ngaya-la koni tsà nchraja tsjón-la jè yá xi bínès'en-la nei-la.

⁶ Saulo, tsí tsatsé-né; tsí ndaà kitsakjòn; k'ée kitsò:

—Na'èn, ¿mé xi mejèn-lè nga 'an s'iaàn?

Jè Na'èn-ná kitsò-la:

—Tisítjiin, titjás'en-jiin naxandá; yaá s'enojmi-lè mé xi s'iin.

⁷ Jña xita xi tjiko Saulo, tà kisinchaà-né nga 'ño kitsakjòn; kii'nchré-la jè xi tíchja tanga mikii kijtseèxkon yá xi tíchja.

⁸ Jè Saulo, tsasítjen-t'aà-ne nangui, tanga k'e nga kiskix'a xkon mì ti kii kjòtsejèn-la. Tà jña xita xi tjiko kitsobàt'aà, kiiko ján Damasco.

⁹ Jàn nachrjein tsibijna nga mì ti kii kotsejèn-la; nimé xi kiskine tjiko nimé xi kits'iì.

¹⁰ Ya naxandá Damasco tjna jngoò xita xi kota'yat'aà-la Cristo xi 'mì Ananías; Nainá kiichja-la nga tsatsejèn jngoò-la kjoa koni tsà nijná tí'bi-la, kitsò-la:

—¡Ananías!

Kiichja Ananías kitsò:

—¿Mé-ne Na'èn? ¿Mé xi mejèn-lè?

¹¹ Jè Na'èn-ná kitsò-la:

—Tisítjiin, t'in jè calle xi 'mì Calle Kixi, ya ni'ya-la Judas; ya tinchátsji jngoii xita xi 'mì Saulo xi ya i'nde-la Tarso. I'nde, tíbítsi'ba-né.

¹² Saulo jyeé kòbeè jngoò kjoa koni tsà nijná tí'bi-la xi tsò: jngoò xita xi 'mì Ananías kòbijchókon nga kòhósòn-la tsja nga kòmandaà ijngoò k'a-ne xkon.

¹³ Ananías, k'e nga kii'nchré kitsò:

—Na'èn, tíjìn-na, kjìn x̄it̄a jye tsibénojmí-na nga 'ñó ch'o kjoàn x̄it̄a jè; jè-né xi 'ñó tíbeètoòn x̄it̄a ts̄iji ján Jerusalén.

¹⁴ I'ndeḡ koií xá j'ii-ne skanda ijndé, tjín-la okixi it'aà ts'e no'miì ítjòn nga tsoba'ñó ngats'ii x̄it̄a xi mokjeiín-la it'aà ts̄iji.

¹⁵ Nainá kitsò-la Ananías:

—Tich'oín x̄it̄a jè; xó jaàjìin-na; k'oaá s'ín kochjeén-na nga jè kichjaya it'aà ts'an nga tíjtsa isò'nde nguixkon ngats'ii x̄it̄a xi mìtsà x̄it̄a judío ko x̄itaxá ítjòn-la, t̄ikoa jñà xi x̄it̄a Israel.

¹⁶ 'Aán kokoò yije-la kjo'in xi 'ñó tse s̄ikjeiín xi kjoa ts'an.

¹⁷ Ananías kii ñánda tíjna Saulo; jahas'en ni'ya. Tsohósòn-la tsja, kitsò-la:

—'Ndsè Saulo, jè Na'èn-ná Jesús xi kiichja-lè ya iya ndiyá k'e nga tjinchroboí, jè kàsikasén-na nga kotsejèn òjngò k'a-lè t̄ikoa s̄ijiin inima-lè Inima Tsjeè-la Nainá.

¹⁸ Saulo, n̄itoón kitjaàxìn-la xkon xi koni kjoàn chrjoa ton-la t̄in. Ikjoàn kjòtsejèn òjngò k'a-la. K'eé tsasítjen, ikjoàn komà bautizar.

¹⁹ Saulo, tsakjèn; ikjoàn kis'e òjngò k'a-la nga'ñó. Tsibìjnako chiba nachrjein jñà x̄it̄a xi kota'yàt'aà-la Cristo xi t̄itsajna Damasco.

Kós'ín komà nga jè Saulo kiichjaya 'én-la Cristo

²⁰ Saulo, n̄itoón tsibíts'ia nga kiichjaya it'aà ts'e Jesús ya ngats'ii ni'ya òjngò sinagoga nga jè Jesús, jè xi Ki'ndí-la Nainá.

²¹ Ngats'ii x̄it̄a xi kii'nchré-la tà kjòxkón-la; kitsò-la xíkjin:

—¿A mìtsà jè x̄it̄a jè xi tsangatjingui-la x̄it̄a ján Jerusalén, jñà xi mokjeiín-la it'aà ts'e Jesús? ¿A mìtsà t̄ikoa koií xá j'ii-ne ijndé nga ndayá kjiko yije x̄it̄a koi, ikjoàn s̄iingatsja no'miì ítjòn?

²² Tanga Saulo, isaá 'ñó tse nga'ñó t̄isijiin inima-la nga chjaya. Jñà x̄it̄a judío xi t̄itsajna Damasco, skanda mì t̄i kii beè-ne kós'ín s̄ikítsjeèn koni s'ín tsakóya Saulo nga nguì 'én kixi-né nga Jesús, jè xi Cristo [jè xi xó kisikasén-ne Nainá].

K'e nga jè Saulo tsanga-la x̄it̄a judío

²³ Nga jye komà kjìn nachrjein, jñà x̄it̄a judío, tsajoóya-ne nga s̄ik'en Saulo.

²⁴ Tanga jè Saulo kii'nchré koni s'ín tsajoóya-ne nga jñà x̄it̄a judío, ko nachrjein ko nitjen kisikinda, tsibìtsajnajto xotjoa-la naxandá nga mejèn-la s̄ik'en.

²⁵ Tanga jñà x̄it̄a-la Saulo, k'e nga jñò, kiiko, kisikijnaya jngò n̄isiyá xi je kji; ikjoàn kiskinis'en-kjá ñánda t̄ix'á chiba jè chrjó xi t̄jindii-la naxandá ko yaá kiskinjen-jno jè chrjó, mé-ne komà tsanga-ne.

K'e nga tsibìjna Jerusalén jè Saulo

²⁶ Saulo, k'e nga ijchò-ne ján Jerusalén, mejèn-la nga ya koahijtako jñà x̄it̄a xi kota'yàt'aà-la Cristo, tanga ngats'ii x̄it̄a koi, tà kitsakjòn-la, nga mìkii kòkjeiín-la tsà kixi kjoa nga t̄ikoa ya kota'yàt'aà-la Cristo.

²⁷ Tanga jè Bernabé k'eé kiiko ñánda t̄itsajna x̄it̄a xi tsibíxaya-la Jesús. Tsibénojmí-la nga jyeé jahatjia-la k'e nga kijtseè Na'èn-ná Jesús nga kiichja sobà-la ya iya ndiyá k'e nga tífi Damasco; t̄ikoaá tsibénojmí-la nga ján Damasco 'ñó ndaà kiichja it'aà ts'e Jesús, mìkii kitsakjòn.

²⁸ Saulo, yaá tsibìjnako jñà x̄it̄a xi tsibíxaya-la Jesús; yaá tsajmeiiko Jerusalén. Mìkii kitsakjòn nga kiichjaya it'aà ts'e Jesús.

²⁹ 'Ñó kiichjako jñà x̄it̄a judío xi 'én griego chja nga tsajoókjoòko xíkjin; tanga jñà x̄it̄a koi tsohótsji'nde-la kó s'ín s̄ikò nga mejèn-la s̄ik'en Saulo.

³⁰ Jñà x̄it̄a xi 'ndse joó it'aà ts'e Cristo, k'e nga kii'nchré 'én koi, kiiko Saulo ján Cesarea, ikjoàn kisikasén skanda ján Tarso.

³¹ Ngats'ii x̄it̄a naxandá-la Cristo, 'nchán tsibìtsajna kóhotjín naxandá xi chja-ne nangui Judea, Galilea ko Samaria; nì t̄i mé kjoasiì kis'e-ne. Kis'e-isa-la nga'ñó ts'e

inima-la nga isa ndaà kijtseèxkón Nainá; jè Inima Tsjeè-la Nainá isaá ndaà tsasìkò nga isa kjìn komà xita-la Cristo.

Kós'ín komà k'e nga kjòndaà-ne Eneas

³² Jè Pedro, k'e nga tsajmeèsòn ì'nde koi, tìkoáá kùkon xita-la Cristo xi títsajna ya naxandá Lida.

³³ Ya tíjna jngoò xita xi 'mì Eneas; jyeé tíjn-la jìin nó nga kijna xk'én, mìkì ma síkjaníyá yijo-la.

³⁴ Pedro kitsò-la:

—Eneas, jè Jesucristo tísin-daà-lè. Tísítjìn, tìxkóyi nijñaà-lè.

Eneas, nìtoón tsasítjen.

³⁵ Ngats'ì xita xi títsajna ya naxandá Lida kò Sarón, kijtseè Eneas nga tsajmeè-ne, ìkjoàn kòkjeín-la ìt'aà ts'e Na'èn-ná Jesús.

K'e nga jaáya-la Dorcas ìt'aà ts'e kjoabiyaà

³⁶ Ya naxandá Jope tíjna jngoò chjoón xi kota'yàt'aà-la Cristo: Tabita 'mì. Jè 'én griego, Dorcas 'mì. [Jè 'én tsaján, Naxín tsò-ne.] Chjoón jè, 'nó ndaà xita, tìkoáá ndaà síchjít'aà-la xita ima.

³⁷ Jñà nàchrjein koi, chjoón jè, kjòxk'én koa k'en. K'e nga jye kisìhingáya, kùkò, kisikájnyaya ni'ya xi ma-ne jò piso.

³⁸ Jè naxandá Lida yaá kijnat'aà chraña-la Jope. Jñà xita xi kota'yàt'aà-la Cristo kù'nchré nga ya tíjna Lida jè Pedro. Kisikasén jò xita x'in xi kù kítsi'ba-la, kitsò-la:

—Kì nìkàchrjein-jèn, nìton nchrobáchón-nájen.

³⁹ Pedro, k'e nga kiskaat'aà-la okixi, nìtoón tsasítjen; tsobáhijtakò xita koi. K'e nga ijchò Jope, kùkò ñánda kijna mìk'en; jahas'en ni'ya. Ngats'ì íchjín ka'àn xi títsajna ijchò kinchat'aà-la Pedro nga kjindáya; tsakó-la x'ió kò nàchro xi tsibíndaà Dorcas k'e nga tísa tíjnakon.

⁴⁰ Pedro tsachrje yije ni'ya jñà xita koi; ìkjoàn tsasìxkó'nchi, kùchjít'aà-la Nainá; k'èé kiskoò'an jè mìk'en, kitsò-la:

—¡Tabita, tísítjìn!

Jè mìk'en, kiskíx'angui-ne xkon. K'e nga kijtseè Pedro, tsibìjna kixi.

⁴¹ Pedro kitsjaà-la tsja, kisikasítjen; ìkjoàn kùchja-la xita-la Cristo kò jñà íchjín ka'àn; tsakó-la Dorcas nga tíjnakon-né.

⁴² Kjoa jè, ki'ya yijeé-la kòhokji Jope; kjìn xita kòkjeín-la ìt'aà ts'e Na'èn-ná Jesucristo.

⁴³ Jè Pedro, kjìn nàchrjein tsibìjna ya Jope, ya ni'ya-la xita xi 'mì Simón chjìnechrjoa.

10

K'e nga jè Cornelio kùchja-la Pedro

¹ Ya naxandá Cesarea tsibìjna jngoò xita xi 'mì Cornelio, jè xi xita sko-la ts'e soldado xi jngoò sìndò ma-ne xi ya chja-ne xi 'mì Italiano.

² Jè Cornelio, ngats'ì xita ni'ya-la, ndaà beèxkón Nainá, tìkoáá tsakjón-keè Nainá. Ndaà síchjít'aà-la jñà xita ima xi nì mé tíjn-la. Kjit'aà nàchrjein bítsi'ba-la Nainá.

³ Jngoò nàchrjein, ijchò-la tsà xi jàn nga nguixòn, tsatsejèn jngoò-la kjoa koni tsà nijña tí'biì-la nga jahas'en jngoò àkjale-la Nainá ya ni'ya ñánda tíjna; kitsò-la:

—¡Cornelio!

⁴ Jè Cornelio, k'e nga kiskoò'an àkjale, tà kitsakjòn-la, kitsò-la:

—¿Mé xi mejèn-lè na'èn?

Jè àkjale kitsò:

—Jyeé ijchò kaat'aà-la Nainá jè kjoa bítsi'ba-lè kò kjoa nga nìchjít'aà-la xita ima xi nì mé tíjn-la. Jè Nainá ndaà sasén-la.

⁵ Tìkasín xita-lè ján naxandá Jope; kàtikjaá Simón xi tìkoá Pedro 'mì.

⁶ Ya tíjna ni'ya-la xita xi tikoá Simón 'mì xi chrjoa-la cho síhinda. Jè ni'ya-la yaá kijnandi ndáchikon. Jè keènojímí-lè mé xi s'iin.

⁷ K'e nga jye kii-ne àkjale-la Nainá xi tíchjako Cornelio, kiichja jò-la xita chi'nda-la koa jngoò soldado xi ndaà beèxkón Nainá xi ya síxát'aà-la.

⁸ K'e nga jye tsibénojímí yije-la ngats'iì kjoa xi kiì'nchré, ikjoàn kisikasén ján naxandá Jope.

⁹ K'e nga komà nchijòn, ijchò-la tsà nchisen, jña xita koi, jyeé kjomeè bijchó chraña-la naxandá Jope. Tijè-ne hora jè Pedro, tsijin isò'nga ni'ya nga kiì kítsi'ba-la Nainá.

¹⁰ Pedro, jyeé 'ñó kjòhò-la; mejèn-la nga kòkjen, tanga tíkoñaá-la, k'eé tísindaà tsojmì xi skine; tsatsejèn jngoò-la kjoa koni nijña tí'biì-la.

¹¹ Kijtseè nga tixá ngajmì; inchrobàjen jngoò nikje skanda it'aà nangui xi 'ñó teè kji, jtít'aà'ñó nga ñijòn chrjangui-la.

¹² Jè nikje, yaá títsajna yije cho xi tjín i it'aà nangui xi ñijòn ma ndsoko ko jña cho xi bífejno yijo-la nangui, ngats'iì cho xi tjín-la jngaá xi tjíma ijìin isén.

¹³ Jè Pedro kiì'nchré jngoò 'én xi kitsò-la:

—Pedro, tísitjìin, tik'in cho koi, chinji.

¹⁴ Kitsò Pedro:

—Na'èn, majin; ni saà jngoò k'a tsojmì tjé kínee xi xkón tjín it'aà ts'e kjotíxoma.

¹⁵ Pedro, ijngoò k'a kiì'nchré 'én xi kitsò-la:

—Tsojmì xi Nainá jye kisítsjeè nga ma chjine, kì tsojmì tjé 'mì-la.

¹⁶ Jè kjoa ts'e nikje, jàn k'a okomà. Ikjoàn tsijin ijngoò k'a-ne ján ngajmì.

¹⁷ Pedro, tískítsjeèn kó tsòya-ne jè kjoa xi kijtseè. Tik'eé-ne ijchò kinchajto xotjoa ni'ya jña xita xi kisikasén Cornelio nga jye kiskònangui ñanda-ne ni'ya-la Simón.

¹⁸ Kiskònangui, a yaá tíjna jngoò xita xi Simón 'mì, tikoá jtít'aàsòn 'ín-la nga Pedro 'mì.

¹⁹ Jè Pedro, tákó k'eé tískítsjeèn jè kjoa xi kijtseè, jè Inima Tsjeè-la Nainá kitsò-la:

—Jàn ma xita xi ji ótsji-lè.

²⁰ Tísitjìin, titjojiin, kì jò 'beé-la takoìn nga 'mìkoi; jña xita koi, 'aán kàsikasén.

²¹ Jè Pedro inchrobàjen ñanda 'ncha xita xi kisikasén Cornelio, kitsò-la:

—'An-ná xi binchaàtsji-ná; ¿mé xá xi kòf'i-nò?

²² Jña xita koi kitsò:

—Jè kisikasén-najen xita sko-la soldado xi 'mì Cornelio, jngoò xita kixi xi ndaà beèxkón Nainá, tikoá jè, ndaà yaxkón it'aà ts'e naxandá Israel. Jngoò xó àkjale-la Nainá k'oa kitsò-la nga ngaji skínikjaá-lè nga k'óin ni'ya-la mé-ne nga kénojímíya-la 'én xi ji tihokoòyi.

²³ Jè Pedro kisikas'en ni'ya-la; yaá kisikjáyako jngoò nitjen. Xi komà nchijòn, kiìko xita koi; tikoá tsobáhitako i'nga xita xi mokjeiín-la it'aà ts'e Cristo xi títsajna ya Jope.

²⁴ Xi komà nchijòn ijchò Cesarea; jyeé tíkoña jè Cornelio; jyeé títsajna xita xíkjín ko amigo-la xi ndaà óko xi xó kisikí'nchré-ne.

²⁵ K'e nga jye ijchò Pedro, jè Cornelio itjo ni'ya nga kisihiat'aà; tsasixkó'nchit'aà-la nga kijtseèxkón.

²⁶ Tanga jè Pedro kisikasítjen, kitsò-la:

—Tísitjìin; 'an, tikoá ta xita-ná koni ngaji.

²⁷ Jè Pedro, nga tíhóko Cornelio, jahas'en ni'ya; kijtseè nga 'ñó kjìn ma-ne xita xi ya títsajna.

²⁸ Pedro kitsò-la:

—Jño, tíjìin-nò nga jña xita judío mìkì tjí'nde-la nga jña xita xi xìn i'nde-la sìngásòn-ko, mìkì ma kjoas'en ni'ya-la xi mìtsà xita judío. Tanga Nainá tsibénojímíya-na nga nijngoò xita xi koma xán-la: jño, taxki xita-nò ko xita tjé-nó nga nguixkon Nainá.

²⁹ Koií kjoa-la k'e nga ijchò nokjoà-ná, mìkì kisitájaajña, nitóon inchrobà. Jè xi kjònanguia, ¿mé xá xi nokjoà-ná?

³⁰ Cornelio kitsò:

—Tjín-la ñijòn nàchrjein, tìjè-ne hora jè nga xi jàn nga nguixòn, k'e nga tìchjàt'aà-la Nainá ì ni'ya-na, tà nìtoón tsatsejèn jngoò xìtā xi tsasìjna nguixkoaàn; ñó ote kji nikje-la.

³¹ Kitsò-na: “Cornelio, jè kjoa bítsi'ba-lè jye kina'yà-la kò jye ki'ya-la nga nguixkòn Nainá koni s'ín nìchjàt'aà-la xìtā imā xi nì mé tjín-la.

³² Tìkasín xìtā-lè ján naxandá Jope, kàtikjaá Simón xi tìkoa Pedro 'mì. Yā tìjna ni'ya-la xìtā xi tìkoa Simón 'mì xi chrjoa-la chò síhinda. Jè ni'ya-la yaá kijnandì ndáchikon.”

³³ K'oaá komà-ne nga nìton kiskinikjaá-lè. Ndaà kà'nè-ne nga kànchroboì. Kóhòtjín-jen jí titsajna-jen nga nguixkòn Nainá mé-ne nga kìná'ya yije-jen mé okixì xi kitsjaà-lè Nainá nga kénojímí-nájen.

K'e nga kùichja Pedro ya ni'ya-la Cornelio

³⁴ Pedro tsibíts'ia nga kùichja, kitsò:

—Kixìj kjoa, tìbe-ná nga Nainá mìkì faájìn nìtā yá xìtā-ne, tà ngàsòn fikò yije.

³⁵ Nainá kjoétjò-né nìtā yá xìtā-ne nìtā ñánda-ne ì'nde-la xi beèxkòn Nainá xi tìkoa s'ín kjoakixì.

³⁶ Nainá kisìkasén 'én-la ya naxandá Israel; tsibénojímíya-la 'én ndaà-la nga 'nchán kìtsajnakoaá Nainá ìt'aà ts'e Cristo, jè xi otìxoma-la ngats'ìi xìtā xi tìjín isò'nde.

³⁷ Jñò, ndaà tìjìin-nò koni s'ín komà kóhòkji nangui-la xìtā judío, kjòts'ia-ne ì'nde Galilea k'e nga jye kùichjaya Juan xi kjoa ts'e bautismo.

³⁸ Tìjìin-nò nga jè Jesús xi Nazaret ts'e, Nainá xó jaájìin-ne nga kitsjaà-la Inìma Tsjeè-la kò nga ñó. Nìtā ñánda-ne nga tsajmeè Jesús, ndaà tìjín kjondaà xi kis'ìin; kisìndaà-ne xìtā xi kjò'in nchisìkjeiín ìt'aà ts'e xìtā neì. Koií k'oas'ín kis'ìin-ne nga jè Nainá tìjnakò.

³⁹ K'oaá ma-ne bènojímí-jen nga xkoón ki'ya-najen ngats'ìi kjondaà xi kis'ìin Jesús ya nangui-la xìtā judío kò Jerusalén. K'e nga komà iskan, jñà xìtā kisik'en Jesús, tsibítjohónguit'aà krò.

⁴⁰ Tanga nga ijchò jàn nàchrjein Nainá kisìkjaáya-la kò k'oaá s'ín kis'ìin nga kiyaxkon ìjngoò k'a-la nga jye jaáya-la.

⁴¹ Mìtsà ngats'ìi xìtā naxandá kijtseèxkon, tà ngajen-nájen xi xó kjòtseè kitjaájìin-najen mé-ne nga koma kénojímí-jen xi ìt'aà ts'e, ngajen-nájen xi chichiko-jen tìkoa k'ì'yòko-jen k'e nga jye jaáya-la.

⁴² Jè Jesús tsibít'in-najen nga kìnókjoaya-jen kò kénojímí kixì-lajen xìtā naxandá nga jè Jesús, k'oaá s'ín kisìkìjna Nainá koni xìtaxá ítjòn nga jè bíndaàjìin-la xìtā xi tìtsajnakon kò xi jye k'en.

⁴³ Ngats'ìi xìtā xi kùichja ngajo-la Nainá, k'oaá s'ín tsjá 'én nga ngats'ìi xìtā xi mokjeiín-la ìt'aà ts'e Cristo, ìt'aà ts'e-né nga jchat'aà-la jé-la.

K'e nga kitjoé-la Inìma Tsjeè-la Nainá jñà xi mìtsà xìtā judío

⁴⁴ Tákó tìk'eé tìchja isa Pedro, ngats'ìi xìtā xi nchi'nchré-la itjojen-nè Inìma Tsjeè-la Nainá.

⁴⁵ Jñà xìtā judío xi tìjko Pedro [xi tìkoa jye mokjeiín-la ìt'aà ts'e Cristo], tà k'oaá komà-la k'e nga kijtseè nga jñà xi mìtsà xìtā judío, tìkoa ndaà itjojen-nè jè Inìma Tsjeè-la Nainá.

⁴⁶ Nga kùì'nchré-la nga chja xi kj'eíí 'én, tìkoa chjat'aà-la Nainá nga 'ñó jeya síkìjna.

⁴⁷ K'eé kitsò Pedro:

—Mì-la kùì koma kìchakjáya-là jñà xìtā koi nga koma bautizar nga jyeé kàtjoé-la Inìma Tsjeè-la Nainá koni s'ín kitjoé-ná jñà.

⁴⁸ Jè Pedro kitsjaà okixì nga koma bautizar xìtā koi ìt'aà ts'e Na'èn-ná Jesucristo. Ìkjoàn jñà xìtā tsibítsi'ba-la Pedro nga kàtìjnakò chiba nàchrjein isa.

11

Mé 'én xi kùichja Pedro nga tsibénojímí-la xìtā naxandá-la Cristo ján Jerusalén

¹ Jñà x̄ita xi tsibíxáya-là Jesús kò x̄ita xíkjín xi 'ndse joó it'aà ts'e Cristo xi títsajna nangui Judea, kiì'nchré nga jñà xi mìtsà x̄ita judío t̄ikoáá jye kòkjeiín-là 'én-là Nainá.

² Jñà x̄ita judío xi mokjeiín-là it'aà ts'e Cristo tsohótikò Pedro, k'e nga ijchò-ne ján Jerusalén.

³ Kitsò-là:

—¿Mé-ne ya kiì-ne ni'ya-là xi taxkì x̄ita xi mìtsà x̄ita judío, skanda yaá chichikoji?

⁴ Jè Pedro k'eé tsibíts'ia nga ndiyá ndiyá tsibénojímí yije-là koni s'ín komàt'in; kitsò-là:

⁵ —K'e nga tijnáa ján naxandá Jope, nga tìchjàt'aà-là Nainá, tsatsejèn jngoò-na kjoa koni tsà nijñá tí'biì-na, jngoò nikje kijtseè xi 'ñó te kji, tjí'ñó nga ñijòn chrjangui-là xi ngajmii inchrobàjen-ne, j'ii skanda ñánda tijnáa.

⁶ K'e nga kiskoòtsejèn-là, ndaà kijtseè nga títsajnaya cho xi t̄jín i it'aà nangui xi ñijòn ma ndsoko kò cho ts'en xi t̄jín ijìin ijñá, kò cho xi bífejno yijo-là nangui, ngats'ii cho xi jngáá t̄jín-là xi t̄jímajìin isén.

⁷ Ki'nchrè jngoáà 'én xi kitsò-na: “Pedro, t̄isítjìin, t̄ik'iìn cho koi, chinii.”

⁸ 'An kixan-là: “Majìn Na'èn, 'an, ni saà jngoò k'a tsojmì tjé kínee xi xkón t̄jín it'aà ts'e kjotixoma.”

⁹ Xi ma-ne jò k'a, ijngoò k'a kiìchja-na ján ngajmii kitsò-na: “Tsojmì xi Nainá jye kisìtsjeè nga ma chjìne, kì tsojmì tjé 'mì-là.”

¹⁰ Jè kjoa koi, jàn k'a okomà. Ikjoàn tsijin yije ijngoò k'a-ne ján ngajmii.

¹¹ Tjje-ne hora, jàn x̄ita ijchò kátsji-na ya ni'ya ñánda tijnáa xi ján inchrobà-ne Cesarea xi xó kisatìixá-là.

¹² Jè Inimà Tsjeè-là Nainá kitsò-na: “Tikoji x̄ita koi; kì jò beè-là takoìn nga tsjáhihtakoi; t̄ikoáá tsobáhihtako-na jñà x̄ita 'ndse xi joòn ma-ne xi i títsajna; ijchò-jen ya ni'ya-là jè x̄ita xi kiskinìkjaá-na, ikjoàn tsitjaàs'en-jen ni'ya-là.”

¹³ X̄ita jè tsibénojímí-najen nga jngoò xó àkjalè kijtseè ya ni'ya-là xi kitsò xó-là: “T̄ikasín x̄ita ján naxandá Jope nga kàtikjaá jè x̄ita xi 'mì Simón xi t̄ikoá Pedro 'mì.

¹⁴ Jè tsjá-lè 'én nga kitjokàjñòò kjo'in kjoa ts'e jé-nò, ngaji kò ngats'ii x̄ita ni'ya-lè.”

¹⁵ K'e nga tsibíts'ia nga tsibénojímí-là, jè Inimà Tsjeè-là Nainá, n̄itoón itjojen-nè jñà x̄ita koi koni s'ín komàt'iaán jñá nga sa tàts'en-là kjoa.

¹⁶ K'eé tsibítsjeèn-na koni s'ín kitsò Na'èn-ná Jesús nga kitsò: “Jè Juan, nandá kis'iìn-ne bautizar, tanga jñò, kò Inimà Tsjeè-là Nainá koma-nò bautizar.”

¹⁷ Tsà Nainá k'oas'ín sasén-là nga t̄ikoá tsjá kjotjò-là jè Inimà Tsjeè-là koni s'ín kitsjaà-ná jñá k'e nga kòkjeiín-ná it'aà ts'e Na'èn-ná Jesucristo, ¿'an, mé-ne kondra kótijna-là Nainá?

¹⁸ K'e nga kiì'nchré 'én koi, jyò tsibítsajna. Jeyaá kisikíjna Nainá, kitsò:

—¿Kixií-la kjoa nga jñà xi mìtsà x̄ita judío, t̄ikoá tsjá-là kjondaà Nainá mé-ne nga s̄ikájno-ne jé-là kò mì t̄i jé kohótsji-ne mé-ne nga s'e-là kjoabinachon ts'e inimà-là!

K'e nga kinikasén Bernabé ján naxandá Antioquía

¹⁹ K'e nga jye k'en Esteban, jñà x̄ita xi mokjeiín-là it'aà ts'e Jesús kitsjohoba, koií kjoa-là nga 'ñó kiìtjinguikèè x̄ita. T̄jín xi kiì ján nangui Fenicia kò Chipre kò naxandá Antioquía. X̄ita koi, k'e nga ijchò i'nde koi, tsibénojímí-là 'én-là Cristo jñà x̄ita judío xi ya títsajna tanga xi taxkì x̄ita, majìn.

²⁰ Jñà x̄ita xi kitsjohoba, t̄jín i'nga xi ján i'nde-là nangui Chipre kò naxandá Cirene. K'e nga ijchò ya naxandá Antioquía t̄ikoáá tsibénojímí-là jñà x̄ita xi mìtsà x̄ita judío 'én ndaà-là Nainá xi kjoa ts'e Jesús xi otixoma-ná.

²¹ Nainá kitsjaà-là nga'ñó; kjìn x̄ita koi kòkjeiín-là it'aà ts'e Cristo, jahatjìya-là kjohítsjeèn-là, kiit'aà-là Na'èn-ná.

²² Jñà x̄ita naxandá-là Cristo xi títsajna Jerusalén kiì'nchré koni s'ín tíma ján Antioquía. Kisikasén jè Bernabé.

²³ Bernabé, k'e nga ijchò Antioquía, kijtseè nga jè Nainá ndaà tísíchikon-t'in xitá koi. Tsja jchán komà-là. K'ée ìsà ndaà tsibít'in yije-là nga kò inìma-là ìsà ndaà kàtjít'aà-là Na'èn-ná.

²⁴ Jè Bernabé, 'ñó ndaà xitá; ndaà tíjìn inìma-là Inìma Tsjeè-là Nainá; tìkoáá ndaà mokjeiín-là it'aà ts'e Nainá. K'oaá s'ín komà-ne nga ìsà kjiìn xitá jahas'en-t'aà-là Na'èn-ná Jesús.

²⁵ Nga komà ìskan, Bernabé kiì ján Tarso nga kiì kátsji Saulo.

²⁶ K'e nga jye kisakò-là, kiìkò ján Antioquía. Jngoò nó tsibìtsajnakò jñà xitá naxandá-là Cristo; koií xá kis'iìn nga kjin xitá tsakóya-là. Yaá kisit'aà 'ín ítjòn nga xitá-là Cristo 'mì ngats'ìi xitá xi kota'yàt'aà-là Cristo.

²⁷ Nachrjein koi ijchò i'nga xitá xi kiìchja ngajo-là Nainá ján Antioquía xi inchrobà-ne Jerusalén.

²⁸ Jngoò xitá xi 'mì Agabo, tsasìjna kixi, kiìchja nga jè Inìma Tsjeè-là Nainá tsibít'in-là, kitsò nga tíjtsa isò'nde kjinchrá 'ñó kjoíí. 'Èn jè, k'oaá s'ín tsitasòn k'e nga tsibìjna xitaxá ítjòn ján Roma jè xi 'mì Claudio.

²⁹ Jñà xitá xi kota'yàt'aà-là Cristo xi títsajna Antioquía tsajoóya-ne nga sùikasén-là nga'ñó xitá xíkjin xi títsajna nangui Judea koni kji bijchó nga'ñó-là nga jngoò ìjngoò.

³⁰ Koni s'ín tsajoóya-ne, k'oaá s'ín kisikitasòn. Jè Bernabé kò Saulo, kiìkò kjojtjò jè ján nangui Judea nga kisìngatsja jñà xitá jchínga xi tjín-là xá ts'e naxandá-là Cristo.

12

Kó s'ín komà nga itjo ndayá Pedro

¹ Tíjñà-ne nachrjein koi, jè Herodes xi xitaxá ítjòn tíjna, kitsjaà okixi nga kitsobà'ñó i'nga xitá naxandá-là Cristo mé-ne nga koma skoetoòn-ne.

² Tsatíxá nga kichá ndojò kisik'en-ne Jacobo, 'ndse Juan.

³ Jè Herodes, k'e nga kijtseè nga tsja komà-là jñà xitá judío nga jye k'en Jacobo, ìkjoàn kitsobà'ñó Pedro jè nachrjein k'e nga bitjo s'eí nga kjèn inchrajín xi tsjìn-là na'yo san.

⁴ Kiskinìs'en ndayá. Chrj'òòn jngoò soldado kisikinda ya ìya ndayá; ñijòn kisikinda nga indiaà indiaà. Kjohítsjeèn-là Herodes, jè-né k'e nga jye kjoehet'aà s'eí Paxkò kochrje ndayá mé-ne jñà xitá naxandá tsjá 'én nga kiyá Pedro.

⁵ Jè Pedro, ndaà tímakinda ìya ndayá; kò jñà xitá naxandá-là Cristo, mìkiì jyò tsibìtsajna nga 'ñó ndaà nchisíjèt'aà-là Nainá it'aà ts'e Pedro.

⁶ Jè nachrjein k'e nga mejèn-là Herodes nga sùingatsja xitá naxandá jè Pedro, tíjè-ne nítjen, kjiijnafè'nchò osen-là jò soldado; jò na'ñó kichá cadena tíjt'aà'ñó-ne; jñà soldado xi i'nga yaá nchisíkinda xotjoa ndayá.

⁷ Tà nitoón tsatsejèn jngoò àkjale-là Nainá ya ìya ndayá; kjòhiseèn yije kóhokji; jè àkjale kisihiníyá-là Pedro nga kisikjaá-là; kitsò-là:

—ìNìton tísítjin!

Jñà na'ñó kichá cadena xi tíjt'aà'ñó-ne tsja Pedro chixòt'aà nangui.

⁸ Jè àkjale kitsò-là:

—Chíkjeí nikje-lè, tsjayi xojté-lè.

Jè Pedro, k'oaá s'ín kis'iìn. ìkjoàn kitsò àkjale:

—Chíkjeí nachrokisòn-lè, nchrobátjingui-ná.

⁹ Pedro itjo tíjingui-là jè àkjale; mìkiì machiya-là tsà kixi kjoa xi tísíko àkjale; jè Pedro k'oaá ma-là koni tsà nijná tí'biì-là.

¹⁰ Jahat'aà-là jè soldado xi síjna ítjòn, tìkoá jahat'aà-là xi ma-ne jò; k'e nga ijchò xotjoa-là ndayá xi ngui kichá nga jye bitjoaá calle, tà tajngoò kitáx'a; ìkjoàn itjo; tsato'nchò jngoò calle; tà nitoón kichijà jè àkjale; jè Pedro, tajngoò kisasijna.

¹¹ Jè Pedro, k'ée ndaà kjòchíya-là nga kixi kjoa xi tímat'in, kitsò:

—Kixí kjoa, mokjeiín-na nga Nainá kàsikasén àkjale-la nga kàsíkijnandeí-na it'aà ts'e Herodes kò ngats'ì kjoa xi ch'o tjin xi nchikoña-la xita judío nga sùko-na Herodes.

¹² Jè Pedro, k'e nga ndaà kjòchiya-la kjoa koi, kiì ni'ya-la María, nea-la Juan xi tikoà Marcos 'mì. Ya ni'ya jè, kjìn xita chixoña xi nchibítsi'ba-la Nainá.

¹³ Kiichja, kisikjane xotjoa-la ni'ya; k'eé itjo katsejèn jngoò tsòti xi 'mì Rode nga mejèn-la skoe yá-né xi tichja.

¹⁴ K'e nga kiì'nchré jta-la nga jè Pedro xi tichja, tsja jchán komà-la skanda mì tì kiì kiskix'a-la xotjoa ni'ya; ta saá tsangachikon iya ni'ya; kisikí'nchré ñánda títsajna xíkjin nga jè Pedro síjnajto xotjoa ni'ya.

¹⁵ Jña xita xíkjin kitsò-la:

—¡Ská-lè!

Tanga jè tsòti tákó k'oaá tsò nga kixí kjoa jè Pedro xi tichja. Tanga jña xita kitsò-la:

—Jè-la àkjale-la.

¹⁶ Jè Pedro, tákó tichja-ne, síkjane xotjoa ni'ya. K'e nga kiskix'a-la xotjoa ni'ya, kijtseèxkon nga jè Pedro; jña xita xíkjin, tà kjòxkón-la.

¹⁷ Kiskímìtjen tsja Pedro nga kitsò-la jyò títsajnaà; ikjoàn tsibénojmi-la kó s'ín komàt'in nga Nainá tsachrje-ne ndayá. Kitsò-la:

—K'oaá s'ín ténajmí-là jè Jacobo kò xita xinguiáá xi i'nga.

Ikjoàn itjo ni'ya; xin i'nde kiì.

¹⁸ K'e nga kis'e isén ngats'ì soldado xi nchisíkinda, mì tà k'oaá kji kjoasiì kis'e-la nga mikì tjiin-la kó s'ín komà nga itjo ndayá Pedro.

¹⁹ Jè Herodes kitsjaà okixi nga tsohótsji Pedro tanga mikì kusakò-la. K'e nga jye kiskònangui-la ngats'ì soldado xi kisikinda, jña kiskaànè-la nga tsjin Pedro; ikjoàn kitsjaà okixi nga kàtiyaa jña soldado. Herodes itjokàjìn ya Judea. Ján kiì kijna naxandá Cesarea.

²⁰ Herodes kjoasií tjin-la kò xita naxandá Tiro kò Sidón. Xita naxandá koi, tsajoóya-ne nga inchrobàkon Herodes. Tanga ítjòn ndaà tsajoókò Blasto xi tikoà xá tjin-la ya ni'ya-la Herodes xi xitaxá ítjòn tjina. Kò jè Blasto kiichjatji naxandá koi nga kátas'e kjoa'nchán. Koi k'oa's'ín kis'iin-ne jña naxandá koi, nga ya nangui-la Herodes otse tsojmì xi kine.

²¹ Jè nachrjein k'e nga chixoña xita nga kisijna junta, jè Herodes, tsohòkjá nikje-la xi ts'e xitaxá ítjòn; tsibìjnasòn ixile-la, ikjoàn kiichjajin-la xita naxandá.

²² Jña xita naxandá, k'e nga kiì'nchré-la, tsibíts'ia nga 'ñó kiichja kitsò:

—Jè xi tichja, jngoò xita xi nainá, mìtsà taxki xita!

²³ Tik'e-ne j'ì àkjale-la Nainá xi kitsjaà ch'in-la; kjòxk'én, ch'indoó kisikje, ikjoàn k'en, koi kjoa-la nga mikì jeya kisikjna Nainá.

²⁴ Tanga jè 'én-la Nainá isaá ndaà tíhobìsòn k'oa isaá ndaà tímakjin xita xi mokjeiín-la.

²⁵ Jè Bernabé kò Saulo, k'e nga jye kjòngàsòn xá-la, inchrobà-ne Jerusalén, kiì-ne ján Antioquía. Tjiko Juan xi tikoà Marcos 'mì.

13

K'e nga jè Bernabé kò Saulo tsibíts'ia nga kisixá

¹ Jña xita naxandá-la Cristo xi títsajna ya naxandá Antioquía, tjin i'nga xita xi chjaya ngajo-la Nainá kò okóya 'én-la Nainá: jè xi 'mì Bernabé, Simón (xi tikoà Niger 'mì), Lucio xi Cirene ts'e, Manaén (xi taña kòjchákò Herodes, xi tsatíxoma Galilea), kò Saulo.

² Jngoò nachrjein k'e nga tíma culto tikoà títsajnachjan xita-la Cristo, jè Inimà Tsjeè-la Nainá kitsò:

—Tíkítsajnandaà-ná jè Bernabé kò Saulo xá xi xó 'an kichja-la.

³ Jña xita-la Cristo, k'e nga jye tsibítsajnachjan kò jye tsibítsi'ba, tsohòsòn-la tsja Bernabé kò Saulo, ikjoàn kisikasén [xi kjoa ts'e xá-la Nainá].

Kós'ín komà k'e nga jè Bernabé kò Saulo kiichjaya ján Chipre

⁴ Jè Inima Tsjeè-la Nainá kisikasén Bernabé kò Saulo nga kii Seleucia; yaá jahas'en chitso nga kii nangui xi kijnajiiin-nda xi 'mì Chipre.

⁵ K'e nga ijchò naxandá Salamina, tsibíts'ia nga kiichjaya 'én ndaà-la Nainá ya jña ni'ya ingo sinagoga ts'e xita judío. Tjiko jè Juan Marco xi kisichját'aà-la Bernabé kò Saulo.

⁶ Tsatojiin kóhokji nangui jiin-nda Chipre, ijchò skanda naxandá Pafos. Yaá kiskaàt'aà jngoò-la xita judío xi 'mì Barjesús xi xita tj'e, tikoáá xita ndiso-né nga tsò, 'én-la Nainá chjaya.

⁷ Jè xita tj'e, yaá ojmeèko Sergio Paulo xi xitaxá ítjòn tjina kóhokji nangui Chipre. Jè Sergio Paulo ndaà fiya-la. Kiichja-la jè Bernabé kò Saulo nga mejèn-la kji'nchré 'én ndaà-la Nainá.

⁸ Tanga jè xita tj'e, xi 'mì Barjesús xi tikoá Elimas 'mì xi 'én griego, kondraá kii-la jè Bernabé kò Saulo nga majin-la nga jè xitaxá ítjòn kòkjeiin-la 'én ndaà-la Nainá.

⁹ Tanga jè Saulo, tijè-ne xi 'mì Pablo, ndaà tjijin inima-la Inima Tsjeè-la Nainá; ñó kiskoò'an,

¹⁰ kitsò-la:

— Xita ndiso xi ch'o tjín kjohítsjeèn-lè; ki'ndí-la xita neij; ngaji kondra 'mì yije-la xi kjoa kixi! ¿Mé-ne nga kjit'aà nachrjein mejèn-lè nìkíts'ón-jiin ndiyá kixi-la Nainá?

¹¹ I'ndeji Nainá tsjá-lè kjo'in; mì kii tì kòtsejèn-lè. Kjin nachrjein mì tì kii jcha-ne isén ndobá ts'e ts'oi.

Tik'e-ne mì tì kii kjòtsejèn-la. Kj'eij xita tsohótsji xi kitsobàt'aà nga komà kii.

¹² Jè xitaxá ítjòn, k'e nga kijtseè kjoa koi, kòkjeiin-la 'én-la Nainá nga kixi kjoa. Tà kjòxkón-la koni s'ín tsakóya-la Pablo kò Bernabé it'aà ts'e Na'èn-ná.

Kós'ín komà k'e nga jè Pablo kiichjaya ya Antioquía ts'e Pisidia

¹³ Pablo kò jña xita xi kihijitako jahas'en chitso ya Pafos, kii ján Perge i'nde xi chja-ne Panfilia. Tanga jè Juan Marco, tsohótji-ne, ján kii-ne Jerusalén. Mì tì ya tsoháhitako-ne Pablo.

¹⁴ Jè Bernabé kò Pablo jahato Perge, kii Antioquía, naxandá xi chja-ne Pisidia. Jè nachrjein nikjáya, jahas'en ni'ya ingo sinagoga, ikjoàn tsibitsajna.

¹⁵ K'e nga jye kjòxkejiin kjotixoma-la Moisés kò xojon xi kiskii xita xi kiichjaya ngajo-la Nainá, jña xita sko-la ni'ya ingo sinagoga kisikasén xá-la jè Pablo kò Bernabé, kitsò-la:

— 'Ndsè, tsà tjín-nò mé 'én xi kinókjoajiiin-là xita, tinókjoaa mé-ne nga s'e-la nga'ño inima-la jña xita.

¹⁶ K'éé tsasítjen Pablo; kòó tsja kisijé-la nga jyò kàtitsajna; kitsò-la:

— Jñò xi xita Israel 'mì-nò, kò xi mìtsà naxandá Israel tsajòn tanga yaxkón Nainá, tiná'ya-ná.

¹⁷ Jè Nainá xi ts'e naxandá Israel, jaàjiin xita jchínga kjin-ná; jngoò naxandá je kis'iin k'e nga tisa ján títsajna Egipto nga mìtsà ya i'nde-la; nga'ño ts'e Nainá-né nga tsachrjekàjiin nangui Egipto.

¹⁸ Nainá, ichán nó kis'e-la kjoatsejta nga kisikinda jña xita Israel ya i'nde it'aà xin ñánda nangui kixi choòn.

¹⁹ Nainá, itoò naxandá xita kisikjehesòn ya nangui Canaán. Ikjoàn kitsjaà-la jña xita Israel jè nangui jè nga ts'e koma.

²⁰ Ngats'ii kjoa koi, ñijòn sindo osen nó tsato.

'Xi komà iskan, Nainá kitsjaà-la xi xita sko-la tsibitsajna nga tsibíndaàjiin-la xita naxandá Israel. Kò jña tsasikò skanda k'e nga j'ii Samuel, xita xi kiichja ngajo-la Nainá.

²¹ Xita naxandá Israel, kisijé-la Nainá jngoò xitaxá ítjòn xi mejèn-la nga kòtixoma-la. Nainá kitsjaà-la Saúl, ki'ndí-la Cis xi tje-la Benjamín. Ichán nó tsatixoma Saúl.

²² Nga komà iskan, Nainá jaàxin Saúl; jè David kitsjaà-la xá nga tsibijna xitaxá ítjòn. Nainá kitsò: “Jyee kisakò-na nga jè David xi ki'ndí-la Isaí, jngoò xita xi sasén-la inima-na nga siikitasòn yije xi 'an mejèn-na.”

²³ Nainá kisikasén-la xita naxandá Israel, jngoò xita xi tje-la David xi 'mì Jesús nga jè kochrjekàjiin kjo'in. Nainá, k'oaá s'ín kitsjaà tso'ba nga tisa tàts'en-la kjoa.

²⁴ K'e nga tikj'eè f'ii Jesús, Juan kiichjayajiin-la xita naxandá Israel nga kàtasíkájno jé-la, mì tì jé kohótsji-ne kò kàtama bautizar.

²⁵ K'e nga jye tifehet'aà nachrjein-la Juan xá xi j'ii-ne, kitsò: “Jñò, ¿kó s'ín nìkìtsjeèn it'aà ts'an? ¿A bixón-nò: jè Cristo? Majìn. Saá nchrobá tjingui jngoò-na xi isa tíjna ítjòn skanda mìkì ok'in-na nga 'an skjnda'ñoá xox'ín-la xoxté-la”, kitsò Juan.

²⁶ Tanga j'ndeji, k'oaá ma-ne koxan-nò ngats'ioò jñò ndí 'ndsè xi tje-la Abraham inchrobàt'aà-nò kò jñò xi mìtsà ya inchrobàt'aà-nò tanga yaxkón Nainá: jñá j'ii-ná jè 'én it'aà ts'e Cristo nga jè kochrjekàjiin-ná kjo'in.

²⁷ Jñá xita naxandá Jerusalén kò xitaxá-la, mìkì kijtseèxkon Jesús nga jè xi Cristo, tikoáá mìkì kjòchiya-la jñá 'én xi maxke nga jiin jiin nachrjein jè nachrjein nìkjáya ya ni'ya ingo sinagoga koni s'ín tjít'aà xojon ts'e xita xi kiichja ngajo-la Nainá. Tanga jñá xita koi kitsjaà okixi nga kàtiyaá Jesús kò k'oaá s'ín tsitasòn koni tsò 'én koi.

²⁸ Nas'ín tsjin-la jé Jesús nga ok'in-la nga kiyá, xita koi, kisijét'aà-la Pilato nga kàtasík'en.

²⁹ K'e nga jye tsitasòn yije koni s'ín tíchja Xojon-la Nainá it'aà ts'e Jesús, kiskónájen t'aà krò, ikjoàn kù nga tsibíhijiin.

³⁰ Tanga Nainá kisikjaáya-la it'aà ts'e kjoabiyaà.

³¹ Jesús, k'e nga jye jaáya-la, kjìn k'a tsakó-la yijo-la jñá xita xi chinchimako nga inchrobà-ne Galilea skanda Jerusalén; nachrjein j'ndeji, jñá xita koi xi bénojmi kixi-la xita naxandá it'aà ts'e Jesús.

³² 'Koi xá j'ii-najen nga kénojmi-jen 'én ndaà-la Nainá xi kjoa ts'e Cristo koni s'ín kitsjaà-la tso'ba Nainá jñá xita jchínga-najen.

³³ I'ndeji, k'e nga kisikjaáya-la Jesús, k'oaá s'ín kisikitasòn xi it'aà tsajen xi ixti-la ma-jen jñá xita jchínga-najen. K'oaá s'ín tjít'aà xojon ts'e Salmo xi ma-ne jò, nga tsò: “I'ndeji, ji-né xi Ki'ndí-na xan-lè; 'an-ná xi na'èn-lè ma.”

³⁴ Koni kis'iin Nainá nga kisikjaáya-la Jesús it'aà ts'e kjoabiyaà nga mì tì kù kiyá-ne, yaá makixiya 'én koi nga tsò Xojon-la Nainá: “Siikitasòn-ná koni tsò 'én tsjeè-na, kò 'én kixi-na xi 'an kitsjaà-la David.”

³⁵ K'oaá tìs'ín tjít'aà ijngoò xojon ts'e Salmo nga tsò: “Mìkì koi'ndi nga k'i'ndo yijo-la Xita tsjeè-lè.”

³⁶ Jñá nachrjein nga tsibijnakon David, k'e nga jye kisikitasòn koni s'ín mejèn-la Nainá, k'en. K'oaá tìs'ín kisihijiin koni komàt'in xita jchínga-la. Tikoáá i'ndo yijo-la.

³⁷ Tanga jè Xita Tsjeè xi Nainá kisikjaáya-la mìkì i'ndo yijo-la.

³⁸ Ngats'ioò jñò ndí 'ndsè, k'oaá s'ín kàtasiijiin-nò, jñá 'én xi nokjoàyajiiin-nòjen, jè-né nga it'aà ts'e Jesús, Nainá síjchàat'aà-ná jé-ná.

³⁹ Jñá xita, ngats'ii kjoa xi ch'o s'ín, mìtsà it'aà ts'e kjotixoma-la Moisés makixiya; jè it'aà ts'e Jesús makixiya xita, jñá xi mokjeiin-la it'aà ts'e.

⁴⁰ T'een kindá yijo-nò mé-ne nga mì k'oaá s'ín komat'ioòn koni s'ín tíchja xojon-la jñá xita xi kiichja ngajo-la Nainá nga tsò:

⁴¹ Chítsejèn, jñò xi nachrjekànguioò kjoakixi,

kàtaxkón-nò, kò jngoò k'a kàtachija jñò.

'An, jngoò xá s'iaàn nachrjein tsajòn, k'e nga tisa titsajnakoòn.

Mìkì kokjeiin-nò nas'ín s'enojmi-nò xá xi 'an tìs'iaàn.

⁴² Jè Pablo kò Bernabé k'e nga itjo-ne ni'ya ingo sinagoga, jñá xita kisijét'aà-la nga kàtènojmiya kjoa koi jè xòhoto xi sa nchrobá.

⁴³ K'e nga kisihixat'aà xíkjin nga kù-ne, kjìn xita kiit'aà-la Pablo kò Bernabé, jñá xi xita judío kò jñá xita xi beèxkón Nainá xi jye jahatjiya-la nga xita judío komà. Jè Pablo kò Bernabé, k'e nga tsohóko xita koi, 'ño tsibít'in-la nga ndaà kàtíjiin inima-la jñá 'én xi jye kù'nchré xi kjondaà ts'e Nainá.

⁴⁴ Jè nàchrjein nìkjáya xi ìjngoò, kjomeé ijchò ngats'ì xìta naxandá nga kii'nchré 'én-la Nainá.

⁴⁵ Tanga jñà xìta judío k'e nga kijtseè nga 'ñó kjìn ma xìta, isaá ndaà kjòchinikeè Pablo. Ikjoàn tsibíts'ia nga kondra kii-la Pablo 'én xi kiihja, tìkoà tsakatít'aà.

⁴⁶ Pablo kò Bernabé, 'ñó tsi'beé-la ikon; kitsò-la:

—Tjínè-najen nga kénojímí ítjòn-nòjen 'én-la Nainá jñò xi xìta judío 'mì-nò; tanga jñò nachrjengui-nò; k'oaá ma-ne nga jñò, mìkii s'e-nò kjoabinachon nìta mé nàchrjein-ne; ngajen tã saá jñà kénojímí-lajen jñà xi mìtsà xìta judío.

⁴⁷ K'oaá s'ín tsatixoma-najen Nainá nga kitsò:

Jí tsjaà-lè xá nga sikhiseèn-la jñà xìta xi mìtsà xìta judío, kóhokji nga tíjtsa isò'nde mé-ne nga kítjokàjìin-ne kjoà ts'e kjo'in.

⁴⁸ K'e nga kii'nchré ngats'ì xi mìtsà xìta judío, kjòtsjaá-la; ikjoàn tsibíts'ia nga kitsò: Ndaà tjín 'én-la Nainá; kòkjeiín-la ngats'ì xi xó kitjaàjìin-ne nga s'e-la kjoabinachon nìta mé nàchrjein-ne.

⁴⁹ K'oaá s'ín komà nga tsabísòn 'én ndaà-la Nainá kóhokji ya j'nde jè.

⁵⁰ Tanga jñà xìta judío tsibíts'ia nga chinchá'a jñà íchjín ítjòn xi ndaà beèxkón Nainá kò xìta ítjòn-la naxandá. K'oaá s'ín komà nga kondra kii-la jè Pablo kò Bernabé. Tsachrjekàjìin ya naxandá.

⁵¹ Jè Pablo kò Bernabé tsibítsajneè chijo-la ndsokò xi kondra ts'e xìta koi, [jè kjoà xi okó nga kjo'in s'e-la it'aà ts'e Nainá]; ikjoàn kii ján Iconio.

⁵² Tanga jñà xìta xi kota'yàt'aà-la Cristo, ndaà kis'e-la kjòtsjacha kò ndaà kisixàjìin inima-la Inima Tsjeè-la Nainá.

14

K'e nga jè Pablo kò Bernabé kiihja ján Iconio

¹ K'oaá s'ín komà ya Iconio, jè Pablo kò Bernabé, k'e nga jahas'en ni'ya ingò sinagoga ts'e xìta judío, 'ñó ndaà tsakóya; k'oaá komà-ne nga 'ñó kjìn xìta judío kò xi mìtsà xìta judío kòkjeiín-la it'aà ts'e Jesús.

² Tanga jñà xìta judío xi mìkii mokjeiín-la, chinchá'a jñà xi mìtsà xìta judío mé-ne nga ch'o tsò-ne kjòhítsjeèn xi kisikítsjeèn it'aà ts'e xìta-la Cristo.

³ Pablo kò Bernabé, tseé tsibítsajna ya Iconio. Mìkii kitsakjòn nga tsakóya 'én ndaà-la Nainá koi kjoà-la nga Nainá ndaà ma'ñót'aà takòn. Nainá kisikixiyandaà nga kixi kjoà 'én xi tsibénojímí xi kjondaà-la Nainá. Kitsjaà-la nga'ñó nga kis'iin kjòxkón xi ndaà tjín xi okó kjoajeya-la Nainá.

⁴ Jñà xìta naxandá Iconio, jòya komà; osen kiit'aà-la jñà xìta judío koà osen kiit'aà-la Pablo kò Bernabé, xìta xi tsibíxáya-la Jesús.

⁵ Jñà xìta judío kò xi mìtsà xìta judío tsajoóya-ne kò xitaxá ítjòn-la nga mejèn-la skaàn-kò, kiiè ndajo.

⁶ Pablo kò Bernabé, k'e nga jye kii'nchré, tsanga; kii ján Listra kò Derbe, naxandá xi chja-ne Licaonia; tìkoà chinchima kóhokji j'nde xi chja-ne nga jngoò itjandii.

⁷ Ya j'nde jè, tìkoà kisika'bí 'én ndaà-la Nainá xi kjoà ts'e Cristo.

K'e nga kisiné ndajo Pablo ya Listra

⁸ Ya Listra tjina jngoò xìta x'ín xi mìkii ma fi. K'oaá s'ín kits'iin; nì saá jngoò nàchrjein nga ndsokò tsajmeè-ne.

⁹ Xìta jè, tjina; tí'nchré-la Pablo nga tíhja. Jè Pablo, k'e nga kiskoò'an, kijtseè nga mokjeiín-la nga kondaà-ne.

¹⁰ Pablo, 'ñó kiihja kitsò-la:

—;Tisítjìin, tìsijna kixi-ne ndsokoi!

Xìta jè, nguì kiskì'nga-né; tsibíts'ia nga tsajmeè-ne.

11 Jñà xità, k'e nga kijtseè kjo_xkón ndaà xi kis'iìn Pablo, 'ñó kiichja xi 'én Licaonia, kitsò: —jñà nainá, xitàá kjoàn kòma nga kòf'iikon-ná!

12 Bernabé, Zeus kitsò-la; Pablo, Hermes kitsò-la nga jè xi isa 'ñó chja.

13 Jè ingo xkósòn-la Zeus, yaá kijna indii naxandá. Jè no'miì-la j'iiko nchraja ko corona. Jè no'miì, ko ngats'iì xità naxandá mejèn sík'en-la jñà nchraja nga tsjá-la kjo_tjò mé-ne nga skoexkón-ne.

14 Jè Pablo ko Bernabé xi kisixáya-la it'aà ts'e Cristo, ch'oó komà-la k'e nga kijtseè kjoa xi nchis'in; tsatejndajno yijo-la jè nikje-la; ikjoàn kiis'ejiiin-la xità. 'Ñó kiichja, kitsò-la:

15 —Tiná'yaà, ¿mé-ne k'oas'in titsa'nè-nò? Ngajen, tikoáá taxki xità-nájen koni jñò. Koií xá kòf'i-najen nga kénajmí-nòjen 'én ndaà-la Nainá xi kjoa ts'e Cristo mé-ne nga síkijna-nò kjoa koi xi nì méé chjí-la; jè tanguít'aà-là Nainá xi tíjnakon xi tsibíndaà ngajmiì, nangui, ko ndáchikon, ko ngats'iì tsojmi xi ya tjín.

16 Nachrjein xi jye tsato, Nainá kitsjaà'ndeé-la ngats'iì xità naxandá xi tjín kóhokji isò'nde nga chinchimaya ndiyá xi kisaseèn-la.

17 Tanga Nainá, kjit'aà nachrjein tíhokó yijo-la yá-né jè, nga tí'ya-la ngats'iì kjondaà xi tís'in; jè-né xi tísikasén-nò jtsí xi ngajmiì tínychrobá-ne; títsjá-nò tsojmi xi ndaà tímajchá-nò; jè tísíchikon-t'in-nò nga ndaà títsjá-nò tsojmi xi ma chine, mé-ne nga ndaà s'e-nò kjotsja.

18 Pablo ko Bernabé, nas'in k'oas'in tsatekjáya yije-la kjoa xi nchis'in nga mejèn sík'en-t'aà-la cho, tseé xá kisengui nga kòkjeiín-la jñà xità naxandá.

19 Tik'e-ne j'iì xità judío xi inchrobà-ne Antioquía ko Iconio xi chinchá'a jñà xità naxandá nga tsibínè ndajo jè Pablo. K'e nga jye k'oas'in kisiko, kitsò-né tsà jyeé k'en; ikjoàn tsibifejno nangui, kiì síkatjen ján indii naxandá.

20 Tanga jñà xità xi kota'yàt'aà-la Cristo, k'e nga chixoñat'aà-la Pablo ñánda kijna, jè Pablo tsasítjen ìjngoò k'a-ne; jahas'en-jiiin ìjngoò k'a-ne naxandá; xi komà inchijòn, Pablo ko Bernabé kiì ján Derbe.

21 K'e nga jye tsibénajmí 'én ndaà-la Nainá xi kjoa ts'e Cristo ya Derbe, nga jye kjìn xità kòkjeiín-la, kiì ìjngoò k'a-ne Listra, Iconio ko Antioquía.

22 Pablo ko Bernabé kitsjaà-la nga ñó inima-la jñà xità xi kota'yàt'aà-la Cristo xi títsajna naxandá koi; tsibénajmí-la nga kixi kàtìtsajnako 'én xi mokjeiín-la; kitsò-la:

—Mochjeén-né nga tse kjo'in síkjiaán itjoán k'e nga kitjás'en-jñaá ñánda tíhotíxoma Nainá.

23 Nga jngoò ìjngoò i'nde ñánda tjín xità naxandá-la Cristo, Pablo ko Bernabé jaèjiiin xità jchínga xi tsibít'aà xá nga síkinda xità-la Cristo; k'e nga jye kiichjat'aà-la Nainá, jye tsibìtsajnachjan, kisikítsajnaya tsja Nainá nga jye mokjeiín-la it'aà ts'e Nainá.

Kós'in ijchò-ne Pablo ko Bernabé ján Antioquía ts'e Siria

24 Jahato i'nde Pisidia, ijchò-ne nangui Panfilia.

25 Tsibénajmí 'én ndaà-la Nainá xi kjoa ts'e Cristo ya Perge, ikjoàn kiì-ne Atalia.

26 Yaá jahas'en chitso nga tsohótji-ne nga kiì ìjngoò k'a-ne Antioquía, i'nde ñánda kisatìixá-la it'aà ts'e kjondaà-la Nainá, xá xi jye kisikitasòn.

27 K'e nga jye ijchò-ne Antioquía, tsibíxkóya xità naxandá-la Cristo; tsibénajmí-la ngats'iì kjoa xi kisiko Nainá, kós'in komát'in nga Nainá kitsjaà'nde nga tikoá kòkjeiín-la jñà xi mìtsà xità judío.

28 Pablo ko Bernabé, tseé tsibìtsajnako xità xi kota'yàt'aà-la Cristo ya Antioquía.

15

Mé kjoa xi tsajoóya-ne jñà xità xi tsibíxáya-la Jesús ko xità jchínga ján Jerusalén

1 Jñà nachrjein koi, j'iì i'nga xità xi inchrobà-ne Judea nga tsibénajmí-la xità-la Cristo, kitsò-la: “Mikiì kitjokàjñoò kjo'in tsà mikiì sít'aà chiba-la yijo-nò kjoa ts'e circuncisión koni s'in tíchja kjo_tíxoma xi kiskii Moisés.”

² Pablo kò Bernabé 'ńó tsajoókjoò kò jńà xịtạ koi; tsohótiyaá-ne jńà kjoạ koi; ikjoàn kisikasén Pablo kò Bernabé ján Jerusalén; tsoháhjtakò i'nga xịtạ-lạ Cristo xi títsajna ya Antioquía nga kiìkon jńà xịtạ xi tsibíxáya-lạ Jesús kò xịtạ jchínga xi otíxoma ya naxandá-lạ Cristo nga sịndaàjìin kjoạ koi.

³ Jńà xịtạ naxandá-lạ Cristo xi títsajna Antioquía, kisìchját'aà-lạ nga kiì-ne xịtạ koi. Jahato Fenicia kò Samaria; tsibénojní nga jńà xi mìtsà xịtạ judío tịkoạ jyeé tífatjịya-lạ nga Cristo nchifit'aà-lạ. Ngats'ìi xịtạ xi mokjeiín-lạ ìt'aà ts'e Cristo, 'ńó kjòtsja-lạ.

⁴ Pablo kò Bernabé, k'e nga ijchò ján Jerusalén, jńà xịtạ naxandá-lạ Cristo kò xịtạ jchínga xi ya otíxoma kò xịtạ xi tsibíxáya-lạ Jesús, ndaá kiskoétjò. Xịtạ koi tsibénojní yije mé kjoạ xi kis'ìin Nainá nga kisìchját'aà-lạ.

⁵ Ya títsajnajìin i'nga xịtạ fariseo xi jye kòkjeiín-lạ 'én ndaà-lạ Nainá xi kjoạ ts'e Cristo; chinchà kixị, kitsò:

—Jńà xi mìtsà xịtạ judío xi jye mokjeiín-lạ, mochjeén-né nga sịt'aà chịba-lạ kjoạ ts'e circuncisión; tịkoạ sịnè-lạ nga kàtasíkitasòn kjotíxoma xi kiskìi Moisés.

⁶ Kjòxkóya xịtạ xi tsibíxáya-lạ Jesús kò xịtạ jchínga xi otíxoma ya ijìin naxandá-lạ Cristo nga tsajoóya-ne kjoạ koi.

⁷ Tse jchán tsajoóya-ne kjoạ koi; chaán tsasíjna kixị Pedro, kiìchjạ, kitsò:

—'Ndseé, jńò, jyeé tíjìin-nò nga kjòtseé jaàjìin-na Nainá nga 'an kènojní-lạ 'én ndaà-lạ Nainá xi kjoạ ts'e Cristo jńà xi mìtsà xịtạ judío mé-ne nga tịkoạ kòkjeiín-lạ.

⁸ Nainá xi beé inịma-ná, k'oaá s'ín tsakó kixị-ná nga tịkoạ kiskoétjò xịtạ koi nga k'oaá tịs'ín kitsjaà-lạ Inịma Tsjeè-lạ koni s'ín kitsjaà-ná jńà.

⁹ Nainá, kisitsjeè inịma-lạ xịtạ koi k'e nga kòkjeiín-lạ ìt'aà ts'e Cristo, nga mìkiì faájìin xịtạ, tà ngàsòn fikò-ná ngats'iaá, xi xịtạ judío 'mì-ná kò xi taxkị xịtạ.

¹⁰ I'ndeì, ¿mé-ne kondra onguí-là kjohítsjeèn-lạ Nainá, tsà koi nàchrjein-lạ kojti-lạ? Nga bìnè-lá xịtạ xi kota'yát'aà-lạ Cristo nga sịkítasòn kjoạ ts'e kjotíxoma. Nị jńà kò nị jńà xịtạ jchínga-ná chíkjoạ-ná nga nìkitasoán.

¹¹ Mìkiì kòs'ín koma. Nga k'oaá s'ín mokjeiín-ná nga jńà, kò xi taxkị xịtạ, ta ngàsòn kjondaà-lạ Na'èn-ná Jesucristo kítjokàjńà kjo'ín.

¹² Jyò tsibítsajna ngats'ìi xịtạ xi ya títsajna. Kiì'nchré-lạ Bernabé kò Pablo nga tsibénojní-lạ xịtạ nga 'ńó tse kjòxkón ndaà xi kis'ìin Nainá xi ìt'aà ts'e nga nguixkòn jńà xi mìtsà xịtạ judío.

¹³ K'e nga jye kiìchjạ Bernabé kò Pablo, k'eé kiìchjạ Jacobo, kitsò:

—'Ndseé xi ì tịtsajnaà, tịná'ya-ná.

¹⁴ Jè Simón Pedro, jyeé tsibénojní-ná kó s'ín komà nga tịsạ ítjòn nga Nainá jaàjìin jńà xi mìtsà xịtạ judío nga naxandá-lạ koma.

¹⁵ K'oaá s'ín mangàsòn 'én koni s'ín kiskìi jńà xịtạ xi kiìchjạ ngajo-lạ Nainá nga kitsò:

¹⁶ K'e nga koma iskan, kịtjojen ìjngò k'a nga kìndàyà xịtse-na kjotíxoma-lạ xịtaxá ítjòn David xi jye its'oòn;

jè xi jye chixoña, ìjngò k'a síkixiya-na; sịkíjna jngò-na xịtạ xi kòtìxoma ngajo-lạ David,

¹⁷ mé-ne jńà xịtạ xi i'nga kòhótsji-ne Nainá, ngats'ìi xi mìtsà xịtạ judío, jńà xi 'ín ts'an tịt'aa.

¹⁸ K'oaá tsò Nainá, nga tsibénojní kjohítsjeèn xi tịjín-lạ skanda tịsạ tàts'en-lạ kjoạ.

¹⁹ 'An, k'oaá xán-nò nga mìkiì sịnè-lạ kjoạ xi 'in tịjín jńà xi mìtsà xịtạ judío, jńà xi nchifatjịya-lạ nga Nainá nchifit'aà-lạ.

²⁰ Ta jè xi mochjeén nga sịkasén-lá xojon mé-ne nga mìkiì skịne ngats'ìi tsojmì xi ya sinchá nguixkòn kjoaxkòsòn; tịkoạ kì tị kjoạ chijngui s'ín-ne, mì tị kiì skịne-ne jní kò ngats'ìi yịjo-lạ cho xi mìkiì xíxteèn jní-lạ.

21 Skanda kjòtseé, xkì xi ján naxandá tjín xità xi bíxkejìin xojon kjotíxoma xi kiskìi Moisés ya ni'ya ingo sinagoga nga jìin jìin nachrjein nga nachrjein nìkjáya.

22 Jñà xità xi tsibíxáya-là Jesús kò ngats'ìi xità naxandá-là Cristo kò xità jchínga xi ya otíxoma, tsajoóya-ne nga jaàjìin i'nga xità xíkjín xi kisìkasén ján Antioquía. Jñà kitjaàjìin Judas xi tìkoà Barsabás 'mì kò Silas, jñà xità xi ndaà yaxkón ya ijìin naxandá-là Cristo. Tsobáhjtakò Pablo kò Bernabé.

23 Kisìk'a jngoò xojon xi tsò:

“Ngajen, xità xi tsibíxáya-là Jesús kò xità jchínga, nihixat'aà-nòjen jñò xi mìtsà xità judío 'mì-nò xi 'ndsé chibá it'aà ts'e Cristo xi titsajnaà ya naxandá Antioquía, kò ì'nde Siria kò Cilicia.

24 Jyeé kina'ya-jen nga ì itjokàjìin i'nga xità xi ijchòkon-nò nga sù sù sùkò-nò nga chjako-nò 'én xi síkìts'ón-jìin-là inìma-nò, tanga mìtsà ngajen tsatíxá-lajen.

25 Ngats'ìi-jen, k'oaa s'ín kichoòsòn-lajen nga kinìkasén i'nga-nòjen xità tsajen xi kiikon-nò. Tsobáhjtakò xinguiáá Pablo kò Bernabé, xità xi 'ñó matsjacha-jen.

26 Jñà xità koi, jye k'oas'ín tsibínè-là yijo-là nità mé kjo'in xi komàt'in xi kjoa ts'e Na'èn-ná Jesucristo.

27 Titsanìkasén-nòjen Judas kò Silas; ngats'ìi 'én xi tjít'aà xojon, jñà xità koi keènojmiya ijngoò k'a-nò xi tà 'én kòòkò-nò.

28 Ngajen kò Inìma Tsjeè-là Nainá ndaà kisaseèn-najen nga mì kjo'ñó koma-nò kjoa ts'e kjotíxoma xi 'in tjín; tà koi-né xi ndaà mochjeén:

29 nga mìkiì ma chjinee yijo-là cho xi ya biyaà nguixkon xkòsòn; mìkiì ma chjinee jní kò mìkiì ma chjinee yijo-là cho xi mìkiì xíxteèn jní-là; tìkoaa kì tì kjoa chijngui nìs'in-là; tsà chjaàxìn-là yijo-nò ngats'ìi kjoa koi, ndaà s'e; k'e chibá.”

30 Xità koi, k'e nga jye kisìhixat'aà xíkjín, nìtoón kii skanda ján Antioquía; k'e nga ijchò tsibíxkóya ngats'ìi xità-là Cristo, kisìngatsja xojon xi 'ya.

31 Jñà xità naxandá-là Cristo, k'e nga jye tsibíxkejìin xojon, tsjaá komà-là nga ijchò-là 'én xi kisìjehikon.

32 Jè Judas kò Silas tìkoaa Nainá chja ngajo-là; ndaà kisìjehikon jñà xità-là Cristo; kitsjaà-là nga'ñó.

33 Xità koi, kjìin nachrjein tsibìtsajna Antioquía. Nga komà iskan kisìhixat'aà xíkjín, kii-ne Jerusalén; kiikon-ne jñà xità xi kisìkasén.

34 [Tanga jè Silas ndaà kisaseèn-là nga tsibìjna Antioquía.]

35 Jè Pablo kò Bernabé, yaá tsibìtsajna Antioquía; tsakóya-isa 'én-là Nainá tìkoà kiichjaya 'én ndaà-là Nainá xi kjoa ts'e Cristo. Tìkoaa kjìin xità xi kj'eìi kisìxákjoò.

K'e nga chinchat'aà xìn-là xíkjín jè Pablo kò Bernabé

36 K'e nga komà iskan, Pablo kitsò-là Bernabé:

—Tìkjiaán ijngoò k'aá kòhokji naxandá ñánda tsibènojmiá 'én-là Nainá mé-ne nga jchaá kó s'ín títsajna xità xinguiáá.

37 Jè Bernabé mejèn-là kjìkò Juan, xi tìkoà Marcos 'mì;

38 tanga jè Pablo mìkiì kisaseèn-là nga jè kjìkò, koií kjoa-là nga kitsjeiìn takòn ján Panfilia nga mì tì kii tsobáhjtakò-ne nga kisìxá jè xá xi tjíma-ne.

39 K'oaa s'ín komà-ne nga kisakò kjoa nga mìkiì kjòngásòn 'én-là; chinchat'aà xìn-là xíkjín; jè Bernabé kiìkò Marcos; kiìsòn-ndá skanda Chipre.

40 Jè Pablo, jaàjìin Silas nga tsobáhjtakò. Jñà xità-là Cristo kisìkìtsajnyaya tsja Nainá nga kii.

41 Kii kòhokji nangui Siria kò Cilicia nga ya chinchima nga isa ndaà kisì'ñó ikon jñà xità naxandá-là Cristo.

16

K'e nga jè Timoteo tsobáhjtakò Pablo kò Silas

¹ Pablo, k'e nga ijchò naxandá Derbe kò Listra, ya kisatiikjoò jngoò xita xi kota'yàt'aà-la Cristo xi Timoteo 'mì; nea-la xita judío-né xi mokjeín-la it'aà ts'e Cristo. Tanga jè na'èn-la xita griego-né.

² Jña xita-la Cristo xi títsajna Listra kò Iconio 'ñó ndaà kisikíjna Timoteo.

³ Pablo mejèn-la nga jè koahijtako; k'oaá komà-ne nga kisit'aà chiba-la kjoa ts'e circuncisión mé-ne nga ndaà kíjna-ne Timoteo it'aà ts'e xita judío; nga jña xita xi ya i'nde-la jyeé beè nga na'èn-la Timoteo, xita griego-né.

⁴ Ngats'ii naxandá ñánda jahato, k'oaá kitsò-la nga kàtasíkitasòn kjoakixi xi tsajoóya-ne jña xita xi tsibíxáya-la Jesús kò xita jchínga xi títsajna Jerusalén xi otíxoma ya ijìn naxandá-la Cristo.

⁵ Jña xita naxandá-la Cristo, isaá 'ñó ndaà mokjeín isa-la; nachrjein nchijòn tímakjìn-ya xita xi nchimokjeín-la.

K'e nga jè Pablo kisìnjña jngoò-la xita Macedonia

⁶ Jè Inima Tsjeè-la Nainá mikì kitsjaà'nde-la Pablo kò xita xi kjihijtako nga 'én-la Cristo kii síka'bí ján nangui Asia; k'oaá ma-ne nga ya jahatojìn nangui ñánda 'mì Frigia kò Galacia.

⁷ K'e nga ijchò chrañat'aà-la nangui Misia mejèn-la nga ján kjoì nangui Bitinia, tanga jè Inima-la Jesús mikì kitsjaà'nde-la.

⁸ Tà jahato Misia, ijchò skanda naxandá Troas.

⁹ Nga jye títsajna Troas, Pablo, k'e nga nítjen, tsatsejèn jngoò-la xita koni tsà nijña tí'biì-la xi nangui Macedonia i'nde-la xi tsasíjna kixi nguixkon Pablo. Tsibítsi'ba-la, kitsò-la: “Nchroboí i nangui Macedonia. Tichját'aà-nájen.”

¹⁰ Pablo, k'e nga jye kijtseè kjoa koi, nitoón tsitsajnandaà-jen nga tsanguì-jen ján nangui Macedonia; k'oaá s'ín kjòchiya-najen nga kixi kjoa nga Nainá tíchja-najen mé-ne nga síka'bí-jen 'én ndaà-la Nainá xi kjoa ts'e Cristo ya i'nde jè.

Kós'ín komà nga jè Pablo kò Silas kii ndayá ya naxandá Filipos

¹¹ K'e nga itjo-najen ya naxandá Troas, kichjoé jngoò-jen chitso, tsanguí kixi-jen ya nangui xi kijnajìn ndá xi 'mì Samotracia; xi komà inchijòn ijngoò k'a tsanguì-jen skanda naxandá Neápolis.

¹² Itjo-najen Neápolis, tsanguí-jen Filipos, jngoò naxandá ítjòn ts'e i'nde Macedonia xi 'ñó tjoé-la nga'ñó it'aà ts'e Roma. Kjìn nachrjein tsitsajna-jen ya i'nde jè.

¹³ Jngoò nachrjein níkjáya tsanguí jngoò-jen i'nde indii naxandá ñánda tífa jngoò xajngá nandá nga k'oas'ín kiníkítsjeèn-jen nga tjín jngoò i'nde ñánda chjat'aà-la Nainá xita judío. Tsitsajna-jen; kinokjoàko-jen it'aà ts'e 'én ndaà-la Nainá xi kjoa ts'e Cristo jña íchjín xi maxkóya ya i'nde jè.

¹⁴ Ya tíjnajìn jngoò chjoón xi 'mì Lidia xi otíjna níkje chjí xi sko kjoàn isén-la; yaá i'nde-la ñánda 'mì Tiatira; ndaà beèxkón Nainá; jè Nainá kiskíx'ajìn kjohítsjeèn-la nga ndaà tí'nchré koni s'ín tíchja Pablo.

¹⁵ Komà bautizar Lidia kò ngats'ii xita ni'ya-la; xi komà iskan tsibítsi'ba-najen kitsò:

—Jñò tsà kixi kjoa nga mokjeín-nò nga 'an, ndaà mokjeín-na it'aà ts'e Nainá, tíkjiaán ni'ya-na, ya síkjáyaá.

Ngajen kjo'ñó tsitsajna-jen.

¹⁶ Jngoò nachrjein k'e nga titsahonguí-jen i'nde ñánda nokjoat'aà-lajen Nainá, kisatiikjoò jngoò-jen tsòti chí'nda xi inima ch'o-la neí tíjìn inima-la; maá-la bíndaà nga kot'aàsòn xita. Jña nei-la tsòti jè, ndaà jchán síkijne ton nga koi xá s'ín.

¹⁷ Tsòti jè, kiitjngui-najen; 'ñó chja tjingui-najen, nga tsò:

—Xita koi, chí'nda-la Nainá-né xi 'ñó jeya tíjna; tíjña-ne xi bénojmí-nò ndiyá xi kitjokajìn-nò kjo'in.

18 Jè tsòti, kjin nàchrjein k'oas'ín kitsò-najen. Pablo chaán kòjti-la, kisikátjifaya'a; kiichja-la jè tjo neji xi tjiin inima-la. Kitsò-la:

—It'aà ts'e Jesucristo, k'oaá xan-lè, tjtjokàjiiin inima-la tsòti jè.

Tik'eé-ne kjòndaà-ne.

19 Jña nei-la, k'e nga kijtseè nga kitjaàxìn-la kjoa xi ma-la, nga mì tì kii kisikijne-ne ton, kitsobà'ño Pablo ko Silas, kiiko nguixkon xitaxá.

20 Chinchá osen ñánda títajna xitaxá, kitsò:

—Jña xita koi xi xita judío, fi kátsji kjosii i naxandá-ná.

21 Kjtixoma xi okóya mikii ndaà tjín, mikii tji'nde-ná nga chjoé, mikii k'oas'ín s'eén, koií kjoa-la nga xita Roma-ná jña.

22 Ngats'ii xita naxandá saà kondra kii-la jè Pablo ko Silas; jña xitaxá kitsjaà okixi nga tsatejndajno nikje-la, ikjoàn tsajá-la.

23 K'e nga jye 'ño tsajá-la, ingajò, kiskinìs'en ndayá; ikjoàn kitsjaà-la okixi jè xita xi síkinda ndayá nga ndaà kàtasikinda xita koi.

24 Jè xita xi síkinda ndayá, k'e nga kits'ii-la okixi, yaá chinchá iya ñánda isa 'ño tjín. Tsibít'aà'ño ndsoko it'aà ya ts'e ndayá.

25 K'e nga jye ijchò osen nitjen, jè Pablo ko Silas, nchichjat'aà-la Nainá ko nchiseè-la; jña xita xi i'nga xi tikoá kjo'in títajna, tà nchi'nchré-la.

26 Tik'e-ne tà nitóón j'ii jngoò ch'ón xi 'ño jchán ts'a. Jña xotjoa-la ndayá kitáx'a, tikoá jña na'ño kicha cadena xi tjt'aà 'ño-ne xita xi títajna ndayá, jngoò k'a kitjájnda'ño.

27 Jè xita xi síkinda ndayá, k'e nga jaá-la, kijtseè nga tix'á yije xotjoa-la ndayá. Kisikítsjeèn, maá-la tsà jyeé tsanga yije xita xi títajna kjo'in. Kiskoé jngoò kicha ndojò nga mejèn-la sikk'en yijo-la.

28 Jè Pablo, k'e nga kijtseè, nitóón 'ño kiichja-la kitsò-la:

—Kì k'oaá nikoii yijo-lè; ii títajna yije-jen.

29 Jè xita xi síkinda ndayá kisijé jngoò ni'ín nga kjòhiseèn-ya ndayá; chiba-la tíhotsé-né k'e nga jahas'en cuarto ñánda títajna Pablo ko Silas; ikjoàn kisikatjen yijo-la ya ingui ndsoko.

30 Ikjoàn tsachrje-ne ndayá Pablo ko Silas; kiskònangui-la, kitsò-la:

—Na'èn, ¿mé xi s'iaàn nga ktjokàjñaà kjo'in?

31 Pablo ko Silas kitsò-la:

—Kàtakjeín-lè it'aà ts'e Na'èn-ná Jesucristo mé-ne nga ktjokàjñoò kjo'in ngaji ko ngats'ii xita ni'ya-lè.

32 K'eé tsibénojmí-la 'én-la Na'èn-ná ngats'ii xita xi ya títajna ni'ya-la.

33 Tijè-ne nitjen jè, jè xita xi síkinda ndayá, tsanijno ñánda kitii-la Pablo ko Silas; xita jè tikoá komà bautizar kóhotjín xita xi ya títajna ni'ya-la.

34 Nga jye komà iskan, kiiko ni'ya-la nga tsakjèn kjoò kóhotjín xita ni'ya-la xi nguì tà kjotsja nga jye kòkjeín-la it'aà ts'e Nainá.

35 Nga komà inchijòn, jña xitaxá kisikasén policía-la nga kisikasén-la okixi jè xi síkinda ndayá nga tà k'oas'ín kàtitjo-ne Pablo ko Silas.

36 Jè xita xi síkinda ndayá kisikí'nchré Pablo kitsò-la:

—Jña xitaxá, jyeé kàtsjá-na okixi nga ma ktjondejì-nò. Ndaà tanguí-nò.

37 Tanga jè Pablo kitsò:

—Ngajen xita Roma-nájen. [Mikii tji'nde nga taxki siko-najen.] Tanga kis'eé-najen yá nga nguixkon naxandá k'e nga skanda tikjeé 'ya-la mé jé xi tjín-najen; tanga i'ndeí mejèn-la nga tà kjoa chijé kochrje-najen ndayá; jña kàtjanchróbá sobà nga kàachrje-najen.

38 Jña policía, k'oaá s'ín kii kénojmí-la jña xitaxá koni s'ín kitsò Pablo. K'e nga kii'nchré jña xitaxá nga jè Pablo ko Silas nga xita Roma, tsí ndaà kitsakjòn.

³⁹ K'eé nìton kii nga tsachrje-ne ndayá Pablo kò Silas; ikjoàn tsibítsi'ba-la kjoa xi komàt'in; kitsò-la nga ta kjonndaà kàtitjoiin naxandá.

⁴⁰ Pablo kò Silas, k'e nga jye itjo-ne ndayá, kii ni'ya-la chjoón xi 'mì Lidia. Yaá tsohóko nojmí xíkjin xi ngàsòn mokjeiin-la it'aà ts'e Cristo nga 'ñó kàt'eé-la ikon; ikjoàn kii-ne.

17

K'e nga kisakò kjoasii ján Tesalónica

¹ Jahato Anfípolis kò Apolonia, ijchò Tesalónica ya naxandá ñánda tjín jngoò ni'ya ingo sinagoga xi ts'e xita judío.

² Jè Pablo, koni s'ín kjit'aà, jahas'en jè ni'ya ingo sinagoga; jàn nachrjein nìkjáya tsajoóya-ne nga kiskoòta'yà Xojon-la Nainá.

³ K'oaá s'ín tsibénojmí-la nga jè Cristo k'oaá s'ín tjínè-la nga kiyá tikoáá jaáyaá-la it'aà ts'e kjoabiyaá. Kitsò-la:

—Jesús xi 'an tibenojmí-nò, jé-né xi Cristo [xi xó k'oas'ín tjínè-la nga kjoii].

⁴ Tjín i'nga xita judío xi kòkjeiin-la; yaá tsoháhtakò Pablo kò Silas. Tikoáá kjín íchjín ítjòn kòkjeiin-la kò xita griego xi beèxkón Nainá.

⁵ Tanga jña xita judío xi mikii mokjeiin-la, kjòchinikeè Pablo kò Silas. Tsibíxkóya xita ts'eè xi tà jyò tjíma; tsibíts'ia kjoasii ya naxandá; kii kjaán-t'aà ni'ya-la xita xi 'mì Jasón nga tsohótsji Pablo kò Silas nga mejèn-la sikkjna osen nga nguixkon naxandá.

⁶ Tanga mikii kisakò-la ñánda tjína Pablo kò Silas; kjo'ño komà-la nga tsachrje ni'ya jè Jasón kò i'nga xita-la Cristo xi ya títsajna nga kiiko nguixkon xitaxá; 'ño kiichja kitsò:

—Jña xita koi xi síkíts'ón xita xi tjín nga títsa isò'nde; jyeé j'ii i'nde tsaján.

⁷ Ngats'ii xita koi, jè Jasón kitsjaà'nde-la ni'ya-la. Saà kondraá fi-la kjotíxoma-la César xi xitaxá ítjòn ts'e Roma; k'oaá tsò nga tjín jngoò xitaxá ítjòn xi Jesús 'mì.

⁸ Jña xitaxá kò xita naxandá, k'e nga kii'nchré 'én koi, kòjtii-la.

⁹ Jè Jasón kò xita xi i'nga tsibíchjtji yijo-la it'aà ts'e xitaxá nga komà tsibítsajnandeii-ne.

K'e nga tsibítsajna naxandá Berea Pablo kò Silas

¹⁰ K'e nga jye kòjño, jña xita-la Cristo nitoón kisikasén jè Pablo kò Silas skanda ján naxandá Berea. K'e nga ijchò i'nde jè jahas'en ni'ya ingo sinagoga ts'e xita judío.

¹¹ Jña xita xi títsajna Berea, isaá ndaà tjín kjohítsjeèn-la mì k'oaà-ne koni xi títsajna ya Tesalónica; isaá nìton kòkjeiin-la 'én-la Nainá kò nachrjein inchijòn tsibíxkejiin Xojon-la Nainá nga mejèn-la skoe tsà kixii kjoa koni tsò 'én xi okóya Pablo.

¹² Kjín xita judío kòkjeiin-la tikoá kjín íchjín ítjòn kò xita x'in kòkjeiin-la xi xita griego.

¹³ Jña xita judío xi títsajna Tesalónica, k'e nga kii'nchré nga jè Pablo kò Silas ya títsajna Berea, nga 'én-la Nainá nchibénojmí, kii ya naxandá jè nga kii kinchá'a xita mé-ne nga kisakò-ne kjoasii.

¹⁴ Jña xita-la Cristo, nitoón kisikasén Pablo ján indii ndáchikon; tà jè Silas kò Timoteo tsibítsajna ya Berea.

¹⁵ Jña xita xi tsoháhtakò Pablo nga kii kinì indiaà, kiiko skanda Atenas. K'e nga jye j'ii-ne xita koi, 'ya-la okixi Silas kò Timoteo nga nitoón kjitjingui-la Pablo.

Kó tsò 'én xi kiichja Pablo k'e nga tsibijna ján Atenas

¹⁶ Pablo, k'e nga tjína naxandá Atenas nga tíkoña-la Silas kò Timoteo, 'ño baá komà-la nga kijtseè nga ya naxandá jè, 'ño kjín xkósòn beèxkón.

¹⁷ Ya ni'ya ingo sinagoga tsajoókjoòkò xita judío kò xi taxki xita xi beèxkón Nainá; nachrjein inchijòn tsohóko ngats'ii xita xi bixoña ya nditsin.

¹⁸ Nachrjein koi tjín i'nga xita xi tsakóya kjohítsjeèn ts'e xita epicúreo kò xita estoicos nga tsajoókjoò Pablo. Tjín i'nga xi tsò:

—¿Kó tsòya-ne 'én xi chjaya, nga sii s'ín nga chja?

Tikoáá tjín i'nga xi tsò:

—K'oaá ma-ná, kj'eíi-la nainá tíhokóya.

Koií k'oas'ín kitsò-ne nga jè Pablo, jè tìbénojímí 'én ndaà-la Nainá xi kjoa ts'e Jesús nga jaáya-la it'aà ts'e kjoabiyaà.

¹⁹ K'eé kiiko jngoò i'nde ñánda 'mì Areópago. Kiskònangui-la kitsò-la:

—¿A komaá isa ndaà kénojímí-nájen jè kjotíxoma xitse xi ngaji okoòyi?

²⁰ 'Ñó kj'eíi tsò. Mejèn-najen nga jcha-jen kó tsòya-ne.

²¹ Koií okitsò-ne nga jña xita Atenas ko xita xi xin nangui-la xi ya títsajna, tà jè xi mejèn-la nga skoe ko koma kjoóya-ne ngats'ii kjoa xitse.

²² Pablo, tsasíjna kixi nga jngoò osen-la i'nde Areópago, kitsò:

—Ngats'ioò xi i i'nde-nò Atenas, k'oaá s'ín tibexkon-nò; 'ño ndaà yaxkón jña xi nainá 'mì-la.

²³ K'e nga jáhatoaà jña ingo ñánda bixoñaà, kijtsee jngoàà ingo ñánda tjít'aà 'én xi tsò: “Nainá xi mìkiì yaxkon-la.” Jè xi jño yaxkón, nas'ín mì kì yaxkon, tijè-ne xi 'an benojímí-nò.

²⁴ Jè Nainá xi tsibíndaà isò'nde, ngats'ii tsojmì xi tjín nga títsa isò'nde, jè xi nei-la ngajmii ko nangui; mìtsà ya tíjnaya ingo xi tsja xita bíndaà-ne.

²⁵ Tikoáá, nimé xi mochjeén-la it'aà tsaján. Ta saá jè tísíkjínakon-ná, tsjá-ná tjo xi chjoaán, tsjá-ná ngats'ii xi mochjeén-ná.

²⁶ 'Nainá, jngoò xita kisikjeén nga tsibíndaà ngats'ii xita xi tjín nga títsa isò'nde; kiskoòsòn-la kótjín nachrjein kítsajna ko ñánda kítsajna,

²⁷ mé-ne nga kátátsji-ne Nainá, nas'ín k'oas'ín kàtas'ín koni jngoò xita xi mìkiì tsejèn-la nga ótsjijno ótsjit'aà nangui. Tanga Nainá, mìtsà kjìin tíjna; chraña tíjnat'aà-ná.

²⁸ Koni s'ín kitsò jngoò xita tsajòn xi 'ño chjine: “Jña, ki'ndí-la Nainá 'mì-ná.” Kixii kjoa, nga jè tsjá-ná nga títsajnakoaán nga níkaníyá nga títsajnasoaán isò'nde.

²⁹ Tsà kixi kjoa nga ki'ndí-la Nainá 'mì-ná, mì k'oas'ín síkítsjeén nga Nainá jña isén xi kicha oro xi kicha plata ko xi ndajo xi xita bíndaà-ne tsja koni s'ín tjín kjohítsjeèn-la.

³⁰ Nga sa ítjòn Nainá kitsjaà'nde-né nga tíjñò-la xita. Tanga i'nde, k'oaá s'ín tsjá okixi nga títsa isò'nde nga jña xita kàtasíkájno jé-la nga mì tì jé kohótsji-ne.

³¹ Nainá jye tsibíjna jngoò nachrjein nga kixi koìndaàjìin ngats'ii xita isò'nde. Jaàjìin jngoò xita xi kitsjaà-la okixi nga jè koma xitaxá xi koìndaàjìin-la ngats'ii xita. Ko k'oaá s'ín tsakó nga kixi kjoa k'e nga kisikjaáya-la it'aà ts'e kjoa biyaà.

³² K'e nga ki'nchré-la kjoa ts'e nga faáya-la mik'en it'aà ts'e kjoa biyaà, tjín i'nga xita xi tà tsijnò'nga-né ko tjín i'nga xi kitsò:

—Jña kjoa koi, kj'eíi nachrjein kina'ya-jen.

³³ Pablo, k'eé itjojìin-la.

³⁴ Tanga tjín i'nga xita xi ya títsajna nga kòkjeín-la: jngoò xita xi 'mì Dionisio xi ya chja-ne ts'e xita xi títsajnajtín xi 'mì Areópago; tikoá jngoò chjoón xi 'mì Dámaris, ko xita xi kj'eíi isa.

18

K'e nga kisixá Pablo ya Corinto

¹ K'e nga jye komà iskan, Pablo itjojìin Atenas, kiì Corinto.

² Yaá kiskaàkjoò jña xita judío xi 'mì Aquila ko chjoón-la xi 'mì Priscila. Ján nangui-la ñánda 'mì Ponto. Sà ta k'eé j'ii-ne nangui Italia koií kjoa-la nga jè Claudio xi xita sko-la tsachrje kjotíxoma nga ngats'ii xita judío kitjokàjìin naxandá ítjòn xi 'mì Roma. Pablo kiìkon jña xita koi.

³ Jña xita koi, tikoáá koií xá s'ín jè xá xi s'ín Pablo nga ni'ya nikje bíndaà. Yaá tsibijnako nga kisixákjoò.

⁴ Nga jìin jìin nachrjein, k'e nga nachrjein níkjáya, Pablo fi ya ni'ya ingo sinagoga nga fi káko jña xita judío ko xi mìtsà xita judío nga kàtakjeín-la.

⁵ K'e nga j'i-ne Macedonia, jè Silas ko Timoteo, jè Pablo nguì koií xá kis'iin nga tsibénojmi-la 'én-la Nainá jñà xita judío. Kitsò-la nga jè Jesús, jè xi Cristo [xi xó kinikasén-ne].

⁶ Tanga jñà xita judío, tà kondraá kii-la Pablo koa kiihjajno-la; k'oaá s'in komà-ne jè Pablo tsibítsajne nikje-la xi kondra ts'e xita koi, [jè kjoa xi okó nga kjo'in s'e-la it'aà ts'e Nainá], kitsò-la:

—Jé tsajòn-nò tsà mìkii mokjeiin-nò; 'an jye kisikitasoàn nga tsibenojmi-nò 'én. I'nde, jñà tifikenojmi-la jñà xi mìtsà xita judío.

⁷ Pablo, itjo ni'ya ingo sinagoga; kii jngoò ni'ya-la xita xi ya chrañat'aà tíjna xi 'mì Ticio Justo xi ndaà beèxkón Nainá.

⁸ Crispo, jè xi xita ítjòn-la ni'ya ingo sinagoga, kòkjeiin-la 'én-la Nainá, ngats'ii xi xita ni'ya-la; tikoáá kjin xita Corinto xi kii'nchré 'én xi tsakóya Pablo kòkjeiin-la, ikjoàn komà bautizar.

⁹ Jngoò nitjen jè Pablo, k'oaá komà-la koni tsà nijñá kits'ii-la; Na'èn-ná kiihja-la, kitsò-la:

—Kì jyò bijni, ko kì tsakjoòn-jèn, tijnókjoa-né.

¹⁰ Mì yá xita kó sikkò-lè, 'aán tijnako-lè; i'nde jè, kjin ma xi xita ts'an ma.

¹¹ Pablo, jngoò nó osen tsibijna Corinto nga tsakóya 'én-la Nainá.

¹² K'e nga xitaxá gobernador tsibijna jè xi 'mì Galión ya i'nde Acaya, jñà xita judío tsajoóya-ne nga kitsobà'ño Pablo; kiiiko ni'ya osen mé-ne nga kisindaàjiin-la.

¹³ Kitsò-la jè xitaxá xi gobernador tíjna:

—Xita jè naxandá tíbinchá'a nga kje'ei s'in beèxkón Nainá; mì k'oaá s'in koni s'in tjin kjotixoma ts'e Roma.

¹⁴ K'e nga mejèn kiihja Pablo, jè Galión kitsò-la xita judío:

—Tsà jngoò kjoa xi tse tjin ko 'in tjin, tjinè-la nga 'an kindaàjñaà;

¹⁵ tanga tà 'én-né, tà kjotixoma tsajòn-nò; tà jñò tindaàjñoò; 'an mìkii skongájñaà kjoa koi.

¹⁶ Ikjoàn tsachrje ni'ya osen.

¹⁷ Ngats'ii xita griego kitsobà'ño jè xita ítjòn ts'e ni'ya ingo sinagoga, jè xi 'mì Sóstenes. Kiskaàn-ko ya ni'ya osen nga nguixkon xitaxá. Tanga jè xitaxá Galión, mìkii kisìs'in-la.

Kii s'in kii jngoò k'a-ne Pablo ya Antioquía

¹⁸ Pablo, kjin nachrjein tsibijna isa ya Corinto. Iskan kisihixat'aà jñà xita 'ndse, kii-ne Siria. Tsobáhijtakò Priscila ko Aquila. Ya Cencrea tsibijno-la skò koni jngoò chiba xi okó nga jye kisikitasòn koni s'in kitsjaà-la tso'ba Nainá.

¹⁹ K'e nga ijchò Éfeso, yaá tsibítsajna Priscila ko Aquila. Pablo, ján kii ni'ya ingo sinagoga nga tsajoókjoò jñà xita judío xi ya bixofña.

²⁰ Jñà xita koi tsibítsi'ba-la Pablo nga isa kjin nachrjein kàtijnako, tanga Pablo, mìkii kòkjeiin-la.

²¹ Kisihixat'aà xita xikjin kitsò-la:

—Tsà Nainá mejèn-la, iskan kjoikon jngoò k'a-nò.

Ikjoàn tsibijnaya chitso nga kii.

²² K'e nga ijchò Cesarea, kii ján Jerusalén nga kisihixat'aà xita naxandá-la Cristo. Ikjoàn kii skanda Antioquía.

²³ Kjin nachrjein tsibijna Antioquía; iskan kii kóhokji i'nde Galacia ko Frigia. Kisì'ño ikon ngats'ii xita xi kota'yat'aà-la Cristo.

K'e nga kiihjava Apolos ya Éfeso

²⁴ Ya Éfeso ijchò jngoò xita judío xi 'mì Apolos xi ján i'nde-la Alejandría, jngoò xita xi 'ño ndaà ma-la chjaya. Ndaà tíjiin-la it'aà ts'e Xojon-la Nainá.

²⁵ Jè Apolos, xó kiskoòta'yà-ne ndiyá-là Nainá; 'ñó tsja beè-là inìma-là nga nguì kixíí chjaya tìkoáá tsakóya it'aà ts'e Jesús; jé kjoa ts'e bautismo nas'ín tà jè tíjìn-là ts'e Juan.

²⁶ Apolos, 'ñó tjín ikon nga kùichjā ya ni'ya ingo sinagoga. K'e nga kù'nchré jè Priscila ko Aquila, it'aà xìn kùiko nga isa kixíí tsakóya-là ndiyá-là Nainá.

²⁷ Apolos, k'e nga kjòmejèn-là kùì ján i'nde Acaya, ngats'ìi xitā-là Cristo kisi'ño ikon nga komà kùì. Ikjoàn kiskùì jngoò-là xojon jñà xitā xi kota'yàt'aà-là Cristo xi títsajna ján i'nde Acaya nga skoétjò jè Apolos k'e nga kijchò. K'e nga ijchò Acaya, 'ño ndaà tsasìko jñà xitā xi kitsjaà-là kjondaà Nainá nga kòkjeín-là it'aà ts'e Cristo.

²⁸ Apolos, 'ño ndaà tsajoókjoò jñà xitā judío ya nguixkon naxandá nga kisikítsajnajyò nga it'aà ts'e Xojon-là Nainá, nguì ndaà tsakó-là nga jè Jesús, jè xi Cristo [xi xó kinikasén-ne].

19

K'e nga ijchò naxandá Éfeso jè Pablo

¹ K'e nga tákó ya tíjna Apolos ya naxandá Corinto, jè Pablo, kjìn i'nde jahatojìn xi nindoò choòn nga ijchò Éfeso. Yaá kiskaàjìn i'nga xitā xi kota'yàt'aà-là Cristo.

² Kiskònangui-là, kitsò-là:

—¿A kitjoé-nò Inìma Tsjeè-là Nainá k'e nga kòkjeín-nò it'aà ts'e Cristo?

Jñà xitā koi kitsò:

—Ngajen mìkùì tíjìn-najen tsà tjín Inìma Tsjeè-là Nainá.

³ Pablo kitsò-là:

—¿Kó s'ín komà bautizar?

Jñà xitā koi kitsò:

—It'aà ts'eé bautismo-là Juan komà-jen.

⁴ Pablo kitsò:

—Kixíí kjoa. Juan, kis'ìin bautizar xitā xi kisikájno jé-là nga mì tì jé kohótsji-ne, tanga k'oaá s'ín kitsò-là xitā naxandá nga kàtakjeín-là it'aà ts'e Jesús, jè xitā xi iskan kjojí.

⁵ K'e nga jye kù'nchré 'én koi, ikjoàn komà bautizar it'aà ts'e Na'èn-ná Jesucristo.

⁶ Pablo, k'e nga jye tsohósòn-là tsja, jñà xitā koi jahas'en-jìn inìma-là Inìma Tsjeè-là Nainá, ikjoàn kùichjā 'én xi kj'eíí tsò tìkoá kùichjaya ngajo-là Nainá.

⁷ Ngats'ìi xitā koi, tejò ma xi xitā x'in.

⁸ Pablo, jàn sá tsibijna Éfeso nga xkì xòhoto fì ya ni'ya ingo sinagoga; mìkùì tsakjón nga bénojmiya, 'ño kùichjako xitā nga kàtakjeín-là kós'ín otíxoma Nainá.

⁹ Tanga tjín i'nga xitā xi kisitájaàjìn inìma-là, mìkùì kòkjeín-là koni s'ín tíhokóya Pablo. Ch'oo kùichjā nga nguixkon xitā it'aà ts'e ndiyá xitse-là Cristo. Pablo, k'eé tsasit'aà xìn; kùiko yije xitā xi kota'yàt'aà-là Cristo. Yaá kùiko jngoò ni'ya escuela ñánda okóya xitā xi 'mì Tirano. Yaá tsajoóya-ne nga nachrjein nchjòn.

¹⁰ Pablo, jò nó tsibijna nga tsakóya-là xitā. K'oaá s'ín komà nga kù'nchré 'én ndaà-là Na'èn-ná Jesucristo ngats'ìi xitā judío ko xi mìtsà xitā judío xi títsajna naxandá ts'e nanguì Asia.

¹¹ Nainá, tseé kjojkón kis'ìin nga jè kisìkjeén Pablo.

¹² Skanda jè pahito-là ko nikje xi síkjeén Pablo f'ìikjaá xitā nga fiko-là xitā xi xk'én. K'e nga jye síko jñà nikje, mandaà-ne ch'in xi tjín-là; tìkoáá bitjokàjìn-ne inìma ch'o-là neíí xi tíjìn inìma-là.

¹³ Tjín i'nga xitā judío xi xkì xi ján naxandá tjíma nga ochrjekàjìn inìma-là xitā xi inìma ch'o-là neíí tíjìn inìma-là. Mejèn-là k'oa tìs'ín sùkaxkì 'ín-là Jesús nga koxkùì-là xitā. Tsò-là jè neíí:

—It'aà ts'e Jesús xi jè Pablo okóya otíxoma-lè nga tìtjokàjìn inìma-là xitā koi!

¹⁴ Jngoò xitā judío xi 'mì Esceva xi xitā sko-là no'mù, k'oaá s'ín mejèn kis'ìin ixti-là xi itòò ma-ne.

15 Tanga jè x̄ita neí, jngoò k'a kiichja-la kitsò-la:

—'An bexkon-ná Jesús, t̄ikoáá bexkon-ná Pablo; tanga jñò, ¿yá x̄ita-nò?

16 Jè x̄ita xi in̄ima ch'o-la neí t̄ijiin in̄ima-la kiskaàn-ko jñà ixti koi; kitsjoònè kitsjoòfe; kisikijne-la nga itoò ixti. Itjo ni'ya, ikjoàn tsanga nga laká kjoàn koi kjoa-la nga 'ñó kisiki'on.

17 Ngats'ìi x̄ita judío ko xi mìtsà x̄ita judío xi t̄jín ján naxandá Éfeso, kiì'nchré kjoa xi komà; tà kitsakjòn-né. Ìsáá 'ñó ndaà kijtseèxkón Na'èn-ná Jesucristo.

18 Kjìn x̄ita xi jye mokjeiín-la 'én ndaà-la Nainá xi kjoa ts'e Cristo, j'ìi kénajmí nga nguixkon x̄ita nga ch'o t̄jín xá xi kis'ìin nga sa ítjòn.

19 T̄ikoáá kjìn ma x̄ita t̄j'e j'ìiko yije libro xi kisikjeén nga t̄isa ítjòn nga tsaká. Chinchájiin ni'ín nga kitìi nga nguixkon yije x̄ita. K'e nga komà kindá jè ch̄jì-la libro xi kitì, icháte jmii ton plata t̄jín-ne ch̄jì-la.

20 K'oaá s'ín komà-ne nga 'ñó tsangasòn 'én ndaà-la Nainá xi kjoa ts'e Cristo; tsee nga'ñó kis'e-la.

21 K'e nga jye jyehet'aà kjoa koi, Pablo kisikítsjeèn nga ján kjoì Jerusalén, kjoahato nangui Macedonia ko Acaya. K'oaá s'ín kisikítsjeèn nga t̄ikoá mochjeén-né nga ján kjoì naxandá Roma.

22 K'eé kisikasén ingajò x̄ita xi síchjât'aà-la ján nangui Macedonia, jè Timoteo ko Erasto; ko jè Pablo, yaá tsibìjna chiba naxrjein isa ya nangui Asia.

Mé kjoa-ne nga kjoasìi kis'e ya naxandá Éfeso

23 Jñà naxrjein koi, 'ñó tse kjoasìi kis'e ya Éfeso, koi kjoa-la Ndiyá x̄itse-la Cristo.

24 Jngoò x̄ita xi 'mì Demetrio xi síxáko kichá plata, bíndaà xkósòn-la ts'e ingo-la Diana. Ngats'ìi x̄ita xi síxáko 'ñó ndaà síkijne ton.

25 Tsibíxkóya ngats'ìi x̄ita-la xi síxáko ko x̄ita xi kj'eíi xi t̄ikoá koi xá s'ín, kitsò-la:

—Ngats'ioò jñò, 'ya-nò nga jè xá koi, bijne-ná ton.

26 Tanga t̄ikoáá t̄itsa'ya-nò, ko t̄itsana'ya-nò nga jè x̄ita xi 'mì Pablo, k'oaá s'ín binchá'a yije x̄ita nga mì xó tsà nainá xi tsja x̄ita sindaà-ne. Kjìn ma-ne xi jye jahatj̄iya-la, mìtsà ta j̄i Éfeso, kóhokji jngoò itjandii nangui Asia.

27 Jè kjoa koi, mìkiì ndaà t̄jín. Mìtsà tà koi kjoa-la nga ch̄ija xá xi 'nè. T̄ikoáá t̄jín-la kjoskon tsà ch̄ija ingo-la nainá xi 'mì Diana, jè xi 'ñó 'nga t̄jna nga mì t̄i kiì skoexkón-ne x̄ita; ko yaá ch̄ija kjoajeya-la; mìtsà tà j̄i Asia nga yaxkón, t̄jtsaá isò'nde.

28 Jñà x̄ita, k'e nga kiì'nchré 'én koi, 'ñó kòjti-la, ikjoàn 'ñó kiichja nga kitsò:

—j'Nga kàtjna Diana ts'e naxandá Éfeso!

29 Kóhokji naxandá kis'e kjoasìi; kitsobà'ñó jè xi 'mì Gayo ko Aristarco. Ingajò x̄ita koi, yaá kjihjtako Pablo; ján j̄i'nde-la nangui Macedonia. Fàhatjen fàhania, kiìko ni'ya teatro ñánda bixoña x̄ita naxandá.

30 Pablo, mejèn jahas'en t̄jngui-la ni'ya nga kichjajjìn-la x̄ita naxandá tanga jñà x̄ita xi kota'yàt'aà-la Cristo mìkiì kitsjaà'nde-la.

31 T̄ikoáá yaá t̄itsajna i'nga x̄ita xi xá t̄jín-la ts'e nangui Asia xi amigo ts'e Pablo. Kisikasén-la 'én nga mì ya kjoas'en-jjìn ya ni'ya teatro.

32 Ya ni'ya teatro ñánda chixoña x̄ita, mìkiì 'ya-la mé kjoa xi t̄jín. Xkì xi ján ch̄ja, kakj'eíi kakj'eíi tsò nga jngoò ijngoò. Ìsáá kjìn ma-ne xi mìkiì t̄jiin-la mé kjoa xi t̄jín j̄i'nde jè.

33 Jñà x̄ita judío tsasj̄na osen Alejandro nga kisikíchja. Jè Alejandro, k'eé kiskimìtjen tsja nga kisikítsajnajyò x̄ita. Mejèn-la nga kosiko x̄ita judío.

34 Jñà x̄ita, k'e nga kijtseèxkon Alejandro nga x̄ita judío, ngats'ìi, 'ñó kiichja nga ta jngoó jtaá kiichja, kitsò:

—j'Nga kàtjna Diana ts'e naxandá Éfeso!

Koni jò-la hora kiichja nga okitsò.

³⁵ Jè x̄ita xi t̄jín-la secretario ts'e naxandá, k'e nga jye kisikítsajnajyò x̄ita naxandá kitsò-la:

—Ngats'ioò xi x̄ita Éfeso 'mì-nò, 'ya-nò nga ngats'iì x̄ita xi t̄jín nga tíjtsa isò'nde beè-né nga i naxandá Éfeso t̄jín-la kinda ingo-la kò xkòsòn-la xi nea-ná Diana xi 'ñó 'nga t̄jna xi ngajmii j'iì-ne.

³⁶ Nijngòò xi koma kíjna'ma kjoa koi. Mochjeén-né nga mì taxki s'een; ítjòn tikítsjeèn.

³⁷ J̄nà x̄ita xi j̄nò kòf'ikòò ijndé, nì mé kjoa xi kòhòtsji it'aà ts'e ingo; t̄kooáà mìtsà jè nea-ná Diana kàchjajno-la.

³⁸ Tsà jè Demetrio kò x̄ita xi síxáko, tsà mé kjoa xi t̄jín-la kò x̄ita xi k'ejí, t̄jín x̄itaxá xi ma-la bíndaàjìin, koa t̄jín ni'ya osen ñánda sindaàjìin mé-ne nga koma k̄inchako-ne yijo-la.

³⁹ J̄nò, tsà mé xi mejèn-isa-nò, kàtasijna jngoò junta ts'e x̄ita naxandá xi kixi t̄jín nga kàtasindaàjìin koni s'ín tíchja k̄jotíxoma.

⁴⁰ Jè kjoa xi kòma i'ndeì, t̄jín-la k̄joskon tsà jè x̄itaxá ítjòn ts'e Roma k̄ichja'nchré-ná nga k̄josii titsabinchaátsjiaá. ¿Mé kinda xi k'oiáá?

⁴¹ K'e nga jye okitsò x̄ita jè, kii yije-ne ni'ya-la x̄ita.

20

K'e nga kii Pablo ya nangui Macedonia ko Grecia

¹ K'e nga jye kisikjoàn-la kjoasiì, Pablo tsibíxkóya yije x̄ita xi kota'yàt'aà-la Cristo nga kitsjaà-la 'én xi ndaà tsò nga kisì'ñójìin ikon. Ikjoàn, kisìhixat'aà xíkjín nga kii ján nangui Macedonia.

² Koni s'ín tsajmeè nga kii, jahato ngats'iì naxandá nga ndaà kisì'ñójìin ikon j̄nà x̄ita-la Cristo; ijchò skanda Grecia.

³ Pablo, jàn sá tsibìjna Grecia. K'e nga jye t̄bìjnandaà nga skoé jngoò chitso nga jye tífi ján Siria, kisijìin-la nga j̄nà x̄ita judío, k'oaá s'ín t̄jindaà-la nga mejèn-la s̄iik'en; kisikátji-ne, ndiyá Macedonia kii ijngòò k'a-ne.

⁴ Tsobáhijtakò jè Sópater xi Berea i'nde-la, ti-la ma Pirro; jè Aristarco kò Segundo xi Tesalónica i'nde-la; Gayo xi Derbe i'nde-la; kò Timoteo; t̄kooáà ya t̄jiko Tíquico kò Trófimo xi Asia i'nde-la.

⁵ J̄nà x̄ita xinguiáá koi, kii ítjòn-né skanda ján Troas. Yaá kiskoòñà-najen.

⁶ K'e nga jye jyehet'aà j̄nà nàchrjein-la s'eí nga bichiaá inchrajín xi tsjìn-la na'yo san, tsitsajmaya jngoò-jen chitso ya Filipos; ikjoàn tsanguijìin-ndá-jen; xi komà 'òn nàchrjein ijchòtjìngui-lajen ján Troas; yaá tsitsajna jngoò xomàna-jen.

K'e nga tsibìjna Pablo ján Troas

⁷ Jè nàchrjein tahàngo nga tàts'en xomàna chixoña yije-jen nga kinixkoaya-jen inchrajín; jè Pablo 'ñó ndojò kii kò nga tsibénojímíya 'én-la Cristo. Tíchja-né skanda kó nga ijchò osen nitjen, koií kjoa-la nga komà inchijòn jye tífi-ne.

⁸ Ya cuarto xi kijnasòn-'nga ts'e ni'ya ñánda titsajna-jen, k̄jìn lámpara títi.

⁹ Jngoò chíti xi 'mì Eutico t̄jijnajto ventana-la ni'ya xi jàn piso t̄jín-la. Koa jè Pablo nga 'ñó ndojò kii kò 'én xi tsibénojímí, jè chíti kisijnafè nga 'ñó nijná-la. K'e nga jye 'ñó kijnafè, kiskaàngui skanda it'aà nangui. K'e nga kitjámìitjen, jyeé k'en.

¹⁰ K'ee inchrobàjen Pablo; kitsobàkjá, kitsò:

—Kì tsakjoòn-jèn, t̄jínakon-né.

¹¹ Ikjoàn kii mijìn ijngòò k'a-ne ya cuarto ñánda títsajna; kisixkoaya inchrajín, koa tsakjèn-kò xíkjín. Ijngòò k'a tsibíts'ia nga kiichjaya skanda kis'e-la isén. Ikjoàn kii-ne.

¹² J̄nà x̄ita kii kò-ne ni'ya-la jè chíti; jye t̄jínakon-ne; k'oaá t̄jín kjoa xi isa ndaà k̄jòtsja-la x̄ita.

K'e nga itjo-ne Pablo ya Troas nga kii ján Mileto

13 Ngajen, tsanguì íjtòn-nájen, tsitsajnaya-jen chitso skanda ján Asón; yaá tsitjaàjto-jen Pablo; k'oaá kitsò nga ndiyá ndsokóó kù-ne.

14 K'e nga jye ijchò-jen ján Aso, yaá kiskaàkjoò-jen Pablo; tsibìjnayako-najen chitso; tsanguí-jen skanda ján Mitilene.

15 Itjo-jen Mitilene. Nga komà inchijòn, tsitjaàjto-jen Quío. Xi ma-ne jò nachrjein ijchò-jen Samos. Yaá Trogilio kinìkjáya-jen. Xi komà jàn nachrjein ijchò-jen Mileto.

16 Jè Pablo, k'oaá s'ín kisikítsjeèn nga tà kjoahato kixíí Éfeso; kisixátíya-la yijo-la nga mìkiì tsibìjna Asia; jè xi mejèn-la nga isa nìton kijchò Jerusalén tsà koi nachrjein-la ya tíjna k'e nga kitjo s'eí ts'e Pentecostés.

Én xi kùichjako Pablo jñà xita jchínga ts'e naxandá-la Cristo xi títsajna Éfeso

17 Pablo, k'e nga tíjna Mileto, kiskinìkjaá jñà xita jchínga xi tjín-la xá ya ijìin naxandá-la Cristo xi títsajna Éfeso.

18 K'e nga ijchò jñà xita jchínga, kitsò-la:

—Jñò, ndaà tíjìin-nò kós'ín tíjnakò-nò skanda tjen-ne k'e nga j'iaa i nangui Asia.

19 Nga kjit'aà nachrjein, 'nó indaàkjoa tsixá-la Nainá; mì k'oaá kji ndáxkoaàn bìxteèn nga otojñaà kjoa koií kjoa-la koni s'ín síko-na jñà xita judío nga bíchjoà ikon-na.

20 'An, mìkiì jyò ótìjna nga benojmíya-nò ngats'ìi kjoa xi mochjeén-nò xi kjondaà tsajòn. Benojmíya-nò ñánda bixoña xita kò ni'ya-nò.

21 K'oaá s'ín benojmíya yije-la, ngats'ìi xita judío kò xi mìtsà xita judío nga kàtasíkájno jé-la nga mì tì jé kohótsji-ne, Nainá kàtjít'aà-la kò kàtakjeiín-la it'aà ts'e Na'èn-ná Jesu-cristo.

22 I'ndeì, ján tífia Jerusalén; tsejèn ma-na nga jè kjo'ño tífikò-na Inìma Tsjeè-la Nainá. Mìkiì tíjìin-na mé kjoa xi komat'ian;

23 ta jè-né nga kijjndà naxandá ñánda bijchoa, jè Inìma Tsjeè-la Nainá, k'oaá s'ín benojmíya-na, k'e nga kijchoa Jerusalén, ndayá kótìjna, tse kjo'in síkjaán.

24 Kjoa ts'e kjo'in, mìkiì makájno-na nas'ín sík'en-na xita. Jè xi mejèn-na nga ndaà síkitaòàn. Ndaà síkjet'èaà xá xi kitsjaà-na Na'èn-ná Jesucristo nga sika'biá 'én ndaà-la it'aà ts'e kjondaà xi tsjá Nainá.

25 I'ndeì, k'oaá xan kixi-nò ngats'ioò jñò xi kiyaxkon-ná nga tsibenojmí-nò kjotíxoma-la Nainá, mì tì kù jchaxkon-ná.

26 I'ndeì, k'oaá xan-nò, tsà mìkiì mokjeiín-nò it'aà ts'e Jesús, mìtsà 'an tjín-na jé tsà kjo'in s'e-nò.

27 Nga 'an, jyeé tsibenojmí yije-nò kó s'ín tjín kjoa xi tíjndaà-la Nainá; nímé xi tsibì'ma-nò.

28 Jñò, tíkindaa yijo-nò, tíkoa tíkindaa naxandá-la Cristo xi jè kisikijne nga kò jní-la. K'oaá s'ín tíkindaa koni jngoò paxtò ts'e orrè nga jè xá kitsjaà-nò Inìma Tsjeè-la Nainá.

29 'An, be-ná, k'e nga koma iskan, nga jye kjíán, kjoahas'en-jìin-nò xita xi kj'eí koni tsején ts'en xi mejèn-la síkje xita naxandá-la Cristo.

30 Tíkoa kitjokàjìin xi tì xita tsajòn-nò xi kj'eí kjotíxoma kòkòya xi mìtsà kixi kjoa; kjìko xita xi kota'yát'aà-la Cristo nga skónachan-la.

31 Títsajnakon; tíkítsjeèn, 'an, jàn nó tsohótijnako-nò kò nachrjein kò nìtjen bìxteèn ndáxkoaàn nga tsibenojmíya-nò kós'ín síjchá yijo-nò.

32 I'ndeì, ndí 'ndsè, ngats'ioò, tsja Nainá síkítsajnaya-nò. Tíkoa síkítsajnajìin-nò 'én-la Nainá it'aà ts'e kjotsjacha xi tjín-la, jè 'én xi koma tsjá-la nga'ño inìma-nò. It'aà ts'e 'én koi tjoé-nò kjotjò ján ngajmì k'e nga tjoé yije-la xita tsjeè-la Nainá.

33 'An, nímé xi jaàjìin-na, nì ton, nì níkje xi ts'e xita.

34 Jñò, ndaà tíjìin-nò nga ndsaa kisixá-na nga kisikijne ngats'ìi tsojmì xi kinìchjeén-jen kò xita xi títsajnakò-na.

³⁵ K'oaá s'ín tsakoòya-nò, mochjeén-né nga s_{ix}á mé-ne nga s_{ich}ját'aà-lá j_ñà x_{it}a xi 'in t_{its}ajna; t_{ik}ítsjeèn 'én-la Na'èn-ná Jesucristo xi tsò: “Ísaá ndaà machikon-t'in j_ñà x_{it}a xi tsj_á mì k'oaà-ne j_ñà x_{it}a xi tjoé-la.”

³⁶ K'e nga jye okitsò, ikjoàn tsasijna-xkó'nchi Pablo, kiichjat'aà-la Nainá kóhotjín x_{it}a.

³⁷ Ngats'iì kiskindàya, kitsobàkjá kò kiskine'a Pablo.

³⁸ J_ñà x_{it}a, tsí 'on komà-la jè 'én xi kitsò Pablo nga mì t_i kii skoexkon-ne xíkjin. Kii kinì indiaà skanda ñánda kijna chitso.

21

K'e nga kii Pablo ján Jerusalén

¹ K'e nga jye kinìhixat'aà-jen x_{it}a xingui-jen, tsitsajnyaya-jen chitso; tsanguí kixi-jen naxandá jìin-ndá ñánda 'mì Cos; xi komà inchijòn ijchò-jen naxandá Rodas, ikjoàn tsanguì-jen skanda naxandá Pátara.

² Ya Pátara síjna ijngoò chitso xi tífi Fenicia; jè tsitsajnyaya-jen nga tsanguì-jen.

³ K'e nga tsitjaàjìin-ndá-jen, ki'ya-jen nangui jìin-ndá ts'e Chipre xi kijna ya ngaskón-najen; tanga tsanguí kixi-nájen skanda Siria. Jè chitso, yaá kisasijna indii ndáchikon Tiro nga yaá chinchá ch'á-la xi 'ya.

⁴ Ya Tiro, kiskaàkjoò-jen x_{it}a xi kota'yàt'aà-la Cristo, itoò nàchrjein tsitsajnakò-jen. J_ñà x_{it}a koi kitsò-la Pablo nga mìkii kjoì ján Jerusalén; jè Inima Tsjeè-la Nainá k'oaá s'ín tsibénojmiya-la.

⁵ K'e nga jye ijchò jngoò xomàna nga titsajna-jen, ikjoàn itjo ijngoò k'a-jen. Tsobáhijtako yije-najen j_ñà x_{it}a-la Cristo, kò íchjín-la kò ixti-la skanda ján indii najnchra. Kò yaá indii ndáchikon chinchá-xkó'nchi-jen nga kinokjoàt'aà-lajen Nainá.

⁶ Ikjoàn kinìhixat'aà-jen x_{it}a xingui-jen, tsitjaàs'en-jen chitso koa j_ñà x_{it}a koi, kii-ne ni'ya-la.

⁷ Yaá jyehet'aà nga tsitjaàjìin-ndá-jen nga itjo-najen Tiro skanda ijchò-jen Tolemaida. Yaá kinìhixat'aà-jen x_{it}a xinguiáa it'aà ts'e Cristo; jngoò nàchrjein tsitsajnakò-jen.

⁸ K'e nga komà nchijòn, tsanguì-jen ján Cesarea. Ijchò-jen ni'ya-la Felipe, x_{it}a xi chjaya 'én ndaà-la Nainá xi kjoa ts'e Cristo, jè xi taña kitjaàjìin-kò j_ñà x_{it}a xi itoò ma-ne nga kisixáko naxandá-la Cristo. Yaá kinìkjáya-jen ni'ya-la.

⁹ Nijòn ma ixti íchjín xongó-la xi síkjeén Nainá nga chja ngajo-la.

¹⁰ Kjin nàchrjein tsitsajnakò-jen Felipe. Yaá j'ii jngoò x_{it}a xi 'mì Agabo xi inchrobà-ne Judea jè xi síkjeén Nainá nga chja ngajo-la.

¹¹ K'e nga ijchòkon-najen, kiskoé sincho xi bìjnakjá Pablo. Tsibí'ño tsja kò ndsokò, ikjoàn kitsò:

—K'oaá tsò jè Inima Tsjeè-la Nainá: kiís'ín koit'aà'ño j_ñà x_{it}a judío ján Jerusalén jè x_{it}a nei-la sincho jè; ikjoàn s_{ing}atsja xi mìtsà x_{it}a judío.

¹² Ngajen kò x_{it}a Cesarea, k'e nga kina'yà-jen 'én koi, tsibìtsi'ba-lajen Pablo nga mìkii kjoì Jerusalén.

¹³ Tanga jè Pablo kitsò:

—¿Mé xi ma-nò? ¿Mé-ne chihindáya-nò? Kì nìba-là inima-na. 'An tíjngoò takoàn nga kàtít'aà'ño-na nas'ín kàtasík'en-na x_{it}a ján Jerusalén xi kjoa ts'e Na'èn-ná Jesucristo.

¹⁴ Mìkii komà kichjaàxìn-lajen kjohítsjeèn-la; tà k'oaá ki'mì-lajen:

—K'oas'ín kàtitasòn koni s'ín mejèn-la Nainá.

¹⁵ Xi komà iskan, tsibìkkò-jen tsojmì-najen, ikjoàn tsanguì-jen Jerusalén.

¹⁶ Tsobáhijtako i'nga-najen j_ñà x_{it}a-la Cristo xi Cesarea i'nde-la. Kii-kò-najen ya ni'ya-la x_{it}a xi 'mì Mnasón xi Chipre i'nde-la. X_{it}a jè kjòtseé kota'yàt'aà-la Cristo. Yaá kinìkjáyako-jen.

Mé xi komà k'e nga jè Pablo ijchò Jerusalén

17 K'e nga ijchò-jen Jerusalén, jñà xità-la Cristo xi ya títsajna, tsjaá komà-la nga kiskoétjò-najen.

18 Xi komà inchijòn, tsanguì-jen ko Pablo ni'ya-la Jacobo; yaá títsajna ngats'ìi xità jchínga xi otíxoma ijìin naxandá-la Nainá.

19 Pablo kishixat'aà xità koi, ikjoàn tsibénojmí yije-la kjoa xi tís'ín Nainá it'aà ts'e xità xi mìtsà xità judío nga jè tísíkjeén Pablo xá xi tís'ín.

20 K'e nga kiì'nchré 'én koi, jeyaá kisikíjna Nainá. Ikjoàn kitsò-la Pablo:

—Ji ndí 'ndsè, tí'ya-né nga jñà xità judío jyeé 'ñó kjìn jmì ma-ne xi mokjeiín-la it'aà ts'e Jesús. Ngats'ìi xità koi, 'ño mejèn-la nga kítasòn kjotíxoma xi Nainá kitsjaà-la Moisés.

21 Tanga jye xó kiì'nchré xi it'aà tsiji nga k'oaá xó s'ín okoòya-la ngats'ìi xità judío xi títsajnajìin ya naxandá-la jñà xi mìtsà xità judío nga mì xó tì kiì sùkítasòn-ne kjotíxoma-la Moisés; kàtasíchija xó kjotíxoma xi tjín-ná xi xità judío 'mì-ná, tìkoa mì xó tì kiì sít'aà chiba-la jñà ndí ixti kjoa ts'e circuncisión.

22 ¿Mé xi s'eén? Kjo'ño-né kji'nchré xità nga i tijni.

23 K'oaá s'ín t'iin koni s'ín 'mì-lèjen; i títsajnajìin ñijòn-najen xità xi sùkítasòn koni s'ín kitsjaà-la tso'ba Nainá nga sùtsjeèya yijo-la.

24 Tikoi jñà xità. Tìtsjeèyi yijo-lè ko xità koi. Tíchjí nga kàtasijno-la tsja sko mé-ne nga skoe-ne xità xi kj'eíi nga mìtsà kixi kjoa koni tsò-lè xità. Yaá skoe-ne nga tìkoaá ngaji nìkítasòin kjotíxoma-la Moisés.

25 It'aà ts'e xità xi mìtsà xità judío xi jye mokjeiín-la 'én-la Cristo, jyeé kinìkasén-lajen xojon koni s'ín kichoòsòn-lajen nga mìki skìne tsojmì xi xkòsòn sinchát'aà-la; mìki skìne jní-la cho; tìkoaá mìki skìne yijo-la cho xi mìki xíxteèn jní-la k'e nga biyaá; tìkoaá kì tì kjoa chijngui sís'in-la.

K'e nga kindobà'ño Pablo ya ingo ítjòn

26 Xi komà nchijòn, Pablo kiìko nga ñijòn xità koi. Tañaá kisikítasòn kjotíxoma-la xità judío nga kisìtsjeèya yijo-la kjoa ts'e jé-la. Ikjoàn kiì ya ñánda tíjna ingo ítjòn nga kisikí'nchré jñà xità mé naxrjein kjoehet'aà naxrjein-la nga nchisìtsjeèya yijo-la; ikjoàn koma kjìko cho xi kjotjò ts'e Nainá nga jngoò ijngoò.

27 K'e nga jye kjomeè bijchó itoò naxrjein, jñà xità judío xi inchrobà-ne nangui Asia, kijtseèxkon Pablo nga ya tíjna ndìtsin ingo ítjòn; chinchá'a ngats'ìi xità nga kitsobà'ño.

28 'Ñó kiìchja, kitsò:

—iNgats'ioò xi xità Israel 'mì-nò, tìchját'aà-nájen! Jè xità jè xi tsó'ba nga kijndà naxandá nga okoòya kjotíxoma xi kondra ts'e naxandá, kondra ts'e kjotíxoma-la Moisés, ko kondra-la ingo ítjòn. Skanda j'ìikoò xità xi mìtsà xità judío xi kisikas'en ya ndìtsin ingo nga sítjè jè i'nde tsjeè-la Nainá.

29 Xità koi, koi kjoa-la nga k'oaas'ín kitsò, k'e nga sa ítjòn kijtseèxkon Pablo ya ijìin naxandá nga taña tímakjoòko jngoò xi mìtsà xità judío xi 'mì Trófimo xi xità Éfeso; k'oaá s'ín kisikítsjeèn tsà tìkoaá kiìko-né ya ndìtsin ingo.

30 Kóhokji naxandá kiì'nchré nga kjoasii kisakò. Nìtoón chixoña xità. Kitsobà'ño Pablo; kjo'ño tsachrje ya ndìtsin ingo; ikjoàn tsibíchjoajtò-la xotjoa ingo.

31 Jye mejèn nchisik'en tanga nìtoón kiì'nchré jè xità sko-la soldado ts'e Roma nga kjoasii kisakò naxandá Jerusalén.

32 Jè xità sko-la soldado, nìtoón kiìchja i'nga-la soldado xi isa nangui xá tjín-la nga tsibíxkóya soldado-la; ikjoàn tsangachikon, kiì ñánda tjín kjoasii. Jñà xità, k'e nga kijtseè soldado, k'ée kitsjeiín Pablo; mì tì kiì kiskaàn-ko-ne.

33 K'e nga ijchò xità sko-la soldado, kitsobà'ño Pablo; kitsjaà okixi nga jò na'ño kicha cadena kisit'aà'ño Pablo. Ikjoàn kiskònangui yá xità-ne xi 'mì Pablo ko mé xi kis'iin.

³⁴ Jñà x̄ita xi k̄jìn ma-ne, x̄k̄i xi ján ch̄ja; k̄ak̄j'eíj k̄ak̄j'eíj tsò nga jngoò ìjngoò. Jè x̄ita sko-la soldado, mìk̄iì kisakò-la mé k̄joa xi komà nga 'ñó siì nchis'ín. Kitsjaà-la ok̄ixi soldado-la nga k̄àtjiko Pablo ján cuartel.

³⁵ K'e nga nchifimijìn-jno escalón, jñà soldado tsa'nga Pablo, koií k̄joa-la nga jñà x̄ita xi k̄jìn ma-ne xi t̄jìngui-la, 'ñó nchimats'en,

³⁶ nga tsò:

—T̄ik'eèn!

Kó kitsò Pablo nga k̄iichjat̄jì yijo-la

³⁷ Jè Pablo, k'e nga jye t̄ifahás'en cuartel k̄iichja-la jè x̄ita sko-la soldado, kitsò-la:

—¿A koma kichjàkò jngoò t̄jò-lè?

Jè x̄ita sko-la soldado kitsò:

—¿A maá-lè nokjoi 'én griego?

³⁸ ¿A mìtsà ngaji xi x̄ita Egipto ì'nde-lè xi tsibíts'ij k̄joasi kò jngoò kò jò nó nga k̄iikoi ñijòn jmiì x̄ita k̄joasi ján ì'nde ìt'aà xìn ñánda nangui kixi choòn?

³⁹ Pablo kitsò:

—'An, x̄ita judío-ná, yaá ì'nde-na Tarso, jngoò naxandá xi ndaà yaxkon-la ts'e nangui Cilicia; t̄jín-lè k̄jondaà, t̄jii'nde-ná nga kichjàkooa x̄ita naxandá.

⁴⁰ Jè x̄ita sko-la soldado, kitsjaà'nde-la; ik̄joàn tsasijna kixi Pablo ya escalón; kiskímiitjen tsja nga jyò k̄àtitsajna x̄ita naxandá. K'e nga jye tsibítsajnajyò, k̄iichjàkò 'én hebreo, kitsò:

22

¹ —Ngats'ioò xi x̄ita judío xinguiáá 'mì-nò kò xi x̄ita jchínga, t̄iná'ya 'én kixi xi kichjàkò-nò nga kichjàt̄jia yijo-na.

² Jñà x̄ita, k'e nga k̄iì'nchré nga 'én hebreo k̄iichja, isaá jyò tsibítsajna. K'eé kitsò Pablo:

³ —'An, x̄ita judío-ná. Yaá kits'ian Tarso, naxandá xi ch̄ja-ne Cilicia. Tanga jí Jerusalén kòjchá. Jè kiskoòta'yàt'aà-la jè maestro Gamaliel. Nguì kixi tsakóya-na koni s'ín t̄jín k̄jotixoma-la x̄ita jchínga-ná. Nguì t̄jingoò takoàn nga s̄ikitasòn-la Nainá koni s'ín 'nè jñò skanda naxhrjein ì'ndeì.

⁴ Nga s̄a k̄jòtseé, k̄iit̄jìngui kondra-la jñà x̄ita xi fit̄jìngui-la ndiyá x̄itse jè, skanda mejèn-na kisik'én. Tsibìt'aà'ñoá, t̄ikoá kiskinìs'en ndayá íchjín, íchjá.

⁵ Jñà x̄ita sko-la no'miì, ngats'ii x̄ita jchínga, ndaà kijtseé k̄joa koi. Jñà kitsjaà-na xojòn nga k̄iikò-la x̄ita xinguiáá xi t̄itsajna Damasco nga koma k̄jinchrobàkooa ì Jerusalén ngats'ii x̄ita xi mokjeín-la ìt'aà ts'e Cristo mé-ne nga s'e-la k̄jò'ín.

Kó kitsò Pablo k'e nga tsibénojmí kó s'ín komàt'in nga jahat̄jya k̄johítsjeèn-la (Hechos 9:1-19; 26:12-18)

⁶ K'e nga jye k̄jomeé bijchoa chrañàt'aà-la Damasco, ijchò-la tsà nchisen, tà n̄itoón tsatsejèn jngoò-na ni'ín xi ngajmiì inchrobà-ne xi k̄johiseèn kóhok̄ji nga jngoò it̄jandii-na koni s'ín t̄ifia.

⁷ 'An, kiskaàjndoòt'aà nangui. Ki'nchrè 'én xi ijìin isén k̄iichja, kitsò: “Saulo, Saulo, ¿mé-ne 'an t̄i'mit̄jìngui kondra-ná?”

⁸ K'eé kiskònangui-la, kixan-la: “¿Yá-ne ngaji Na'èn?” Kitsò-na: “'An-ná xi 'mì-na Jesús xi Nazaret ts'an xi j̄i t̄i'mit̄jìngui kondra-ná.”

⁹ Jñà x̄ita xi t̄jikoá, kijtseé ni'ín nga k̄johiseèn, tà kitsakjòn-né, tanga mìk̄iì ki'ya-la 'én xi 'an k̄iichja-na.

¹⁰ K'eé kiskònangui-la kixan-la: “¿Mé xi s'iaàn, Na'èn?” Kitsò-na: “T̄isítjìin, t'in kixi Damasco. Yaá s'enojmí yije-lè kó s'ín t̄jindaà k̄joa xi s'iiin.”

¹¹ Koi k̄joa-la nga 'ñó k̄johiseèn ni'ín, 'an mì t̄i k̄iì k̄jòtsejèn-na. Jñà x̄ita xi t̄jikoá kitsobà'ñoò ndsaa nga k̄iikò-na skanda Damasco.

12 'Ya Damasco tíjna jngoò x̄ita xi 'mì Ananías xi ndaà beèxkón Nainá koni s'ín tíchja k̄jotíxoma ts'e Moisés. Jè Ananías t̄ikoáá ndaà yaxkón it'aà ts'e x̄ita judío xi títsajna ya i'nde jè.

13 K'e nga j'ii katsejèn-na Ananías, kitsò-na: “Ndsè Saulo, kàtatáx'a-ne xkoiìn.” T̄ik'eé-ne kitáx'a-ne xkooàn ikjoàn kiskoò'an Ananías.

14 Kitsò ìsa-na: “Nainá xi ts'e x̄ita jchínga-ná jaàjìin-lè nga jchaxkoin mé xi mejèn-la; t̄ikoa jchaxkoin jè xi Nguì X̄ita Kixi; kiná'yi 'én-la xi jè sobà k̄ichja-lè.

15 J̄i kénjómí-la ngats'ii x̄ita, ngats'ii kjoa xi t̄i'yi k̄o xi t̄ina'yì.

16 I'nde, k̄i t̄i chiñà-ne. T̄isítj̄iin; kàtamai bautizar; t̄inókjoat'aà-la Na'èn-ná Jesús nga kàtatsjeèya jé-lè.”

Mé xi komà k'e nga jè Pablo tsibénjómí-la kós'ín komà nga kiikon j̄nà xi mìtsà x̄ita judío

17 'K'e nga j'i-na Jerusalén, kiaà ya ñánda tíjna ingo ítjòn nga kichjàt'aà-la Nainá. Koni nijñá tí'biì-na,

18 tsatsejèn-na Na'èn-ná; kitsò-na: “Tixátíyi, n̄it̄on t̄itjokàjìin naxandá Jerusalén; ijndé, mì yá xi k̄jì'nchré 'én-lè xi kinókjoayi it'aà ts'an.”

19 'An kixan-la: “Na'èn, jyeé beèxkon-na nga 'an, x̄k̄i ni'ya ingo sinagoga kiaà nga kitsobà'ñoá x̄ita, kiskinìs'en ndayá, t̄ikoa kiskaàn-koaa j̄nà xi mokjeiìn-la it'aà tsiji.

20 K'e nga kisik'en Esteban xi x̄ita ch̄i'nda-lè xi jè kitsjaà 'én tsiji, t̄ikoaá 'an yaá tíjnaa; t̄ikoaá kisijngoò takoàn nga kinik'en; skanda 'aán kitsobà nikje-la j̄nà x̄ita xi kisik'en Esteban.”

21 Tanga jè Na'èn-ná kitsò-na: “T'in, ján siikasén-lè naxandá-la xi mìtsà x̄ita judío xi k̄jìin títsajna.”

22 J̄nà x̄ita naxandá, ndaà nchi'nchré-la Pablo koni s'ín tíchja; k'eé k̄jti-la k'e nga k̄iì'nchré 'én xi jyehet'aà-ne; 'ñó kiichja kóhotj̄in nga kitsò:

—iX̄ita jè, kàtiyaà! j̄Mik̄iì ok'in-la nga k̄ijnakon ìsa ìsò'nde!

23 J̄nà x̄ita koi, ìsaá 'ñó kiichja ìsa, bítsajneè nikje-la koa bíxteèn chijo ni'nde.

24 Jè x̄ita sk̄o-la soldado, kitsjaà okixi nga tsasíjna'ya Pablo ya cuartel; t̄ikoa kitsjaà okixi nga kàtajá-la mé-ne nga keénjómí-ne mé kjoa xi tsohótsji nga kondra fit̄jngui-la x̄ita.

25 K'e nga jye t̄jít'aà'ñó, Pablo kiskònangui, kitsò-la jè soldado xi ya síjna, jè xi bít'in-la j̄nà soldado xi i'nga:

—¿A tsjá'ndeé-lè k̄jotíxoma nga k'oas'ín n̄ikoi jngoò x̄ita Roma xi k̄j'eé k̄iì 'ya-la mé jé xi t̄jín-la?

26 Jè x̄ita xi bít'in-la j̄nà soldado xi i'nga, k'e nga k̄iì'nchré nga x̄ita Romaá Pablo, kiikon jè x̄ita sk̄o-la soldado, kitsò-la:

—¿Mé xi s̄ikoi x̄ita jè? Nga x̄ita Roma-né.

27 Jè x̄ita sk̄o-la soldado kiikon Pablo, kiskònangui-la kitsò-la:

—Ngaji, ¿a kixi kjoa nga x̄ita Roma-né?

Pablo kitsò:

—Kixi kjoa.

28 Jè x̄ita sk̄o-la soldado kitsò-la Pablo:

—Tse jchán t̄on kisengui-na yijo-na nga x̄ita Roma komà.

Jè Pablo kitsò:

—Tanga 'an, k'oaa s'ín kits'ian nga x̄ita Roma-ná.

29 J̄nà x̄ita soldado xi t̄jín-ne nga kojà-la, chinchat'aàxìn; t̄ikoaá jè x̄ita sk̄o-la soldado k'e nga kisij̄in-la nga jè Pablo x̄ita Roma-né, kitsakjòn-né koi kjoa-la nga jè kitsjaà okixi nga kisit'aà'ñó Pablo.

Mé xi komà k'e nga jè Pablo tsibìjna nguixkon x̄itaxá ítjòn-la x̄ita judío

³⁰ K'e nga komà inchijòn, jè xit̃a sko-la soldado mejèn-la nga ndaà skoe mé jé xi tjín-la nga k'oas'ín óngui-ne jñà xit̃a judío. Kiskíjnda'ño; ikjoàn tsibíxkóya xit̃a sko-la no'miì kò xit̃axá ítjòn-la xit̃a judío; kiìkò Pablo, tsasíjnangui nguixkòn xit̃a koi.

23

¹ Pablo kiskoò'an jñà xit̃axá ítjòn kitsò-la:

—Jñò xi xit̃a xinguiáá judío 'mì-nò, ngats'ioò, k'oaá xán-nò, kjohítsjeèn ts'an, k'oaá tsò nga ndaà tìsikitasoàn koni s'ín mejèn-la Nainá skanda nàchrjein i'ndeì.

² Jè no'miì ítjòn xi 'mì Ananías kitsò-la jñà xit̃a xi nchat'aà chraña-la Pablo nga kàtasíjts'iìn-'a tso'ba.

³ Tanga jè Pablo kitsò-la:

—Ngaji, xi jò isén tjín-lè, Nainá kàtasíjts'iìn-'a ndsohoi! Ngaji, koií xá tijna-ne nga kíndaàjìin-ná koni s'ín tíchja kjotíxoma tanga ngaji, isaá nìkatonè-la kjotíxoma nga mejèn-lè sijts'in-'a-ná.

⁴ Jñà xit̃a xi nchat'aà chraña-la Pablo kitsò-la:

—¿Mé-ne k'oas'ín nokjoajno-la xi no'miì ítjòn-la Nainá?

⁵ Pablo kitsò:

—'Ndsè, mìkiì bexkoan tsà jè xi no'miì ítjòn tíjna. Kixíí kjoa, k'oaá s'ín tíchja xojon kjotíxoma-la Nainá nga tsò: “Jè xi xit̃axá sko-la naxandá mìkiì koma kínoájoajno-la.”

⁶ Pablo, k'e nga kijtseèxkon jñà xit̃a xi títsajna nga jò skoya ma; tjín xit̃a fariseo kò tjín xit̃a saduceo; 'ño kiìchja, kitsò-la:

—'Ndseé, 'an, xit̃a fariseo-ná; ki'ndí-la xit̃a fariseo-ná; koií kjoa-la nga k'oas'ín tísindaàjìin-na nàchrjein i'ndeì nga k'oaá s'ín mokjeiín-na nga faáya-la jñà xit̃a xi biyaá.

⁷ K'e nga k'oa kitsò Pablo, kjòjòya jñà xit̃a xi títsajna junta; tsibíts'ia jñà xit̃a fariseo kò xit̃a saduceo nga tsohótiko xíkjin.

⁸ Koi kjoa-la nga jñà xit̃a saduceo mìkiì mokjeiín-la tsà kixi kjoa nga faáya-la mik'en, tíkjoa mìkiì mokjeiín-la tsà tjín xi 'mì àkjale kò xi 'mì iníma; tanga jñà xit̃a fariseo mokjeiín yije-la kjoa koi.

⁹ Ngats'ii xit̃a 'ño jchán kiìchja; k'eé chinchá kixi xit̃a xi okóya kjotíxoma-la Nainá xi ya chja-ne ts'e xit̃a fariseo, kitsò:

—Xit̃a jè, nímé kjoa xi ch'o tís'ín; tsà iníma tsohóko kò tsà àkjale tsohóko; mìkiì koma jñà kíntcha ikón-lá Nainá.

¹⁰ Jè xit̃a sko-la soldado, k'e nga kijtseè nga isa 'ño makjan-la jñà xit̃a, kitsakjòn-né tsà ya sík'en Pablo. K'eé kiìchja isa-la soldado; kitsjaà-la okixi nga kàtjìkò lingoò k'a ján cuartel.

¹¹ Xi komà nchijòn nga nítjen, ijchò kasit'aà-la Na'èn-ná jè Pablo, kitsò-la:

—Kì tsakjoòn-jèn, k'oaá s'ín mochjeén nga kínoájoji xi ít'aà ts'an ján Roma, koni s'ín kinokjoi i Jerusalén.

K'e nga jñà xit̃a judío tsajoóya-ne nga sík'en Pablo

¹² Nga kis'e isén, jñà xit̃a judío tsajoóya-ne nga sík'en Pablo; k'oaá kitsò nga mì ki kòkjen kò mìkiì skoí nandá; Nainá kàtatsjá-la kjo'in tsà mìkiì kítasòn nga sík'en Pablo.

¹³ Tsatoó ichán ma-ne jñà xit̃a judío xi k'oas'ín tsajoóya-ne.

¹⁴ Xit̃a koi, kiìkon jñà xit̃a sko-la no'miì kò xit̃a jchinga ts'e xit̃a judío, kitsò-la:

—K'oaá s'ín tsibìnè-lajen yijo-najen nga nímé xi chjine-jen, Nainá kàtatsjá-najen kjo'in tsà mìkiì kítasòn nga sík'en-jen Pablo.

¹⁵ Ngats'ioò xi tjín-nò xá ítjòn ts'e Junta jè, kot'in-là jè xit̃a sko-la soldado nga kàtjanchrobáko nchijòn-le i nguixkoòn. Tà k'oaá tìn-là nga isa ndaà mejèn-nò jchaxkoòn kjoa xi tjín-la. Ngajen kítasajnandaà-jen ya iya ndiyá nga sík'en-jen k'e nga tíkj'eè fì ijndé.

¹⁶ Jè ti-la ndichja Pablo, kiì'nchré kjoa xi tsajoóya-ne xit̃a judío; k'eé kiì kisikí'nchré Pablo ya cuartel.

¹⁷ Pablo kiichja jngoò-la soldado, kitsò-la:

—Tikoji ti jè ñánda tíjna xítá sko-la soldado. Tjín 'én xi keènojímí-la.

¹⁸ Jè soldado kiiko jè ti ñánda tíjna xítá sko-la, kitsò-la:

—Jè Pablo xi tíjna ndayá kàchja-na kàtsò-na: “Tikoji ti jè.” Tjín xó 'én xi keènojímí-lè.

¹⁹ Jè xítá sko-la soldado, kitsobà'ño tsja jè ti, kiiko it'aà xìn, kiskònangui-la mé 'én xi keènojímí-la.

²⁰ Jè ti kitsò:

—Jña xítá judío, jye ndaà tsajoóya-ne [nga mejèn-la skónachan-lè]; sijné-lè nga kíkoji nchijòn-lè jè Pablo ján nguixkon xítaxá judío nga mejèn xó-la isa ndaà tjanangui-la mé kjoa xi tjín-la.

²¹ Ngaji, kì kii mokjeiin-lè. Xítá koi, ma-la tsà ichán nga títsajnachjoà-la Pablo ya iya ndiyá nga mejèn-la siik'en. Jye k'oas'in kitsjaà-la tso'ba Nainá nga mìkii kòkjen tikoá mìkii skoí nandá skanda k'e nga siik'en Pablo. I'ndeí, tà jè nchikoña-la nga k'oi-la 'én-lè koni s'in nchisíjé.

²² Jè xítá sko-la soldado, kitsò-la jè ti nga komaá kjoí-ne; kitsjaà-la okixi nga nijngoò xítá keènojímí-la nga jè ijchò síkí'nchré.

K'e nga jè Pablo kichinì'aà-la Félix xi xítaxá ítjòn

²³ Jè xítá sko-la soldado kiichja jò-la soldado-la xi bít'in-la soldado xi i'nga, kitsjaà-la okixi nga kàtasíkítsajnaandaà jò sindo soldado xi ndsoko kjoí-ne, jàn kaàn kò te xi kohòyo kítsasòn-la, jò sindo xi kichá lanza k'oa nga kjoí skanda ján Cesarea k'e nga kijchò xi ñijaàn nga kojño.

²⁴ Tikoá kitsjaà okixi nga kàtinchándaà kohòyo xi kíjnakjá-la Pablo mé-ne nga ndaà kjiko-ne nga nímé xi komat'in skanda ñánda tíjna Félix xi xítaxá ítjòn.

²⁵ Jngoò xojon carta tsibíndaà xi tsò:

²⁶ “Tjín-lè kjondaà ngaji Félix xi xítaxá ítjòn tijni; 'an, xi Claudio Lisias 'mì-na síhixat'aà-lè.

²⁷ Xítá xi tìsikásén-lè, jña xítá judío kitsobà'ño, kjomeé kisik'en, tanga 'an tsohósikoaa nga kiikoaa soldado-na nga jye kis'ejiin-na nga xítá Roma-né.

²⁸ 'An, mejèn-na nga skoeè mé kjoa xi tjín-la. K'oaá komà-ne nga kiikoaa ñánda títsajna xítaxá judío.

²⁹ K'e nga ijchòkoaa, kisijiin-na nga tà koií kjoa-la xi kjotíxoma ts'e. Nì mé jé tjín-la nga kiyá; skanda mìkii ok'in-la nga ndayá kájna iya.

³⁰ 'An, kis'enojmí-na nga jña xítá judío, k'oaá s'in tsajoóya-ne nga mejèn-la siik'en chijé. K'oaá ma-ne nga jì tìsikásén-lè. K'oa tìs'in kixan-la jña xítá xi óngui nga nguixkoìin kàtasindaajiin-la mé kjoa xi tjín-la kondra ts'e.”

³¹ Jña soldado, k'e nga jye kitjoé-la okixi, kiiko Pablo k'e nga jye kòjño skanda ján naxandá Antipatris.

³² Nga komà nchijòn jña xítá soldado xi ndsoko kii-ne, kisikátji-ne; inchrobà-ne skanda cuartel. Tà jña kiiko Pablo soldado xi kohòyo títsajnasòn.

³³ Jña xítá soldado, k'e nga ijchò Cesarea, kisingatsja jè xítaxá ítjòn xojon carta xi 'ya; tikoá kisingatsja Pablo.

³⁴ Jè xítaxá ítjòn, k'e nga jye tsibíxkejiin xojon carta, kiskònangui ñánda i'nde-la Pablo. K'e nga jye kis'enojmí-la nga nangui Cilicia i'nde-la,

³⁵ kitsò-la:

—K'ée kjí'nchré-lè k'e nga kjoí xítá xi óngui-lè.

Ikjoàn kitsjaà okixi nga kàtamakinda, yaá kájna ni'ya osen-la Herodes.

24

Kó kitsò Pablo k'e nga kiichjatjì yijo-la nguixkon xítaxá ítjòn xi 'mì Félix

¹ K'e nga komà 'òn nachrjein, ijchò Ananías ya Cesarea xi xita sko-la no'miì. Tjiko i'nga xita jchínga xi xá tjín-la ts'e xita judío tikoá tjiko jngoò xita xi 'mì Tértulo xi chjine xojon ts'e kjotíxoma. Jñà xita koi kiikon Félix jè xi xitaxá ítjòn tjina nga kitsjaàt'in 'én xi kondra ts'e Pablo.

² K'e nga jye ijchòko Pablo nguixkon xitaxá, tsibíts'ia Tértulo nga kitsjaàt'in 'én xi kondra ts'e Pablo; kitsò-la Félix:

—Ngaji xi xitaxá ítjòn tjini, ndaà yaxkón-lèjen. Nga it'aà tsiji, 'ñó tísakó-najen kjoa'nchán. Ndaà xá xi títbasòn i naxandá-najen xi kjoa chjine tsiji.

³ Kjit'aà nachrjein, kóhokji ñánda titsajna-jen tjoé-najen kjondaà tsiji. Ndaà chjí-lè nga k'oas'ín nìchját'aà-nájen.

⁴ Majìn-najen nga sù s'en-lèjen; tjín-lè kjondaà, tìná'ya itsé-nájen.

⁵ K'oaá s'ín ki'ya-jen xita jè nga tíjtsa isò'nde 'ñó ch'o tjín kjoa xi ótsji nga síjòya xita judío; jè-né xi xita ítjòn-la xita Nazaret xi síkjatjìya ndiyá-la Nainá.

⁶ Tikoáá mejèn-la ch'o kisítjé Ingo Tsjeè-la Nainá, k'oaá ma-ne nga kindobà'ñó-jen. [Mejèn k'oas'ín síko-jen koni s'ín tíchja kjotíxoma tsajen,

⁷ tanga jè Lisias xi xita sko-la soldado tsasìko. Koó kjoats'en tsafaá'an-najen k'e nga jye tijnaya ndsaa-jen.

⁸ Ko k'oaá kitsò Lisias nga jñà xita xi óngui, jí kjoí nguixkoiìn nga sindaàjìin.] Komaá ngaji sobà chjinangui-la mé-ne nga jcha-ne mé kjoa xi tjín-la nga ongui-jen.

⁹ Jñà xita judío xi ya títsajna, tikoáá síngàsòn 'én nga kixi kjoa.

¹⁰ Jè xitaxá ítjòn kiskimìtjen tsja nga kitsjaà'nde-la Pablo nga kiichja. Pablo kitsò: —Jì xi xitaxá ítjòn tjini, tjiìn-na nga kò kjìn nó tìnikitasòin xá i'nde jè; k'oaá ma-ne nga ko kjotsja-na, tì'an kichjátjì-na yijo-na.

¹¹ Ngaji, komaá kinchátsjiyi. 'An, saá tjín-la tejò nachrjein nga kiaà Jerusalén ya ingo ítjòn nga kijtseèxkoán Nainá.

¹² Nì saá jngoò k'a 'ya-na nga xita otikjoòkooa, tikoáá mì xita naxandá binchaà'a ya nditsin ingo ítjòn, ko ni'ya ingo sinagoga, ko ya jjiìn naxandá.

¹³ Jñà xita xi óngui-na mìkì koma kókixiya-la kjoa xi ónè-na.

¹⁴ K'oaá xán-lè xi nguì kixi kjoa, 'an, jè sikitasòn-la xi Nainá tsò-la xita jchínga-najen; k'oaá s'ín sikitasòan koni s'ín tjín jè ndiyá xitse-la Cristo, jè xi tsò-la jñà xita koi nga ndiyá xìn-la Nainá-né. 'An, mokjeiìn yije-na koni s'ín tíchja xojon ts'e kjotíxoma-la Nainá xi kiskì Moisés ko ts'e xita xi kiichja ngajo-la Nainá.

¹⁵ 'An, k'oaá tìs'ín mokjeiìn-na it'aà ts'e Nainá koni s'ín mokjeiìn-la jñà xita xi óngui-na nga faáya-la xita xi biyaà, jñà xi xita kixi ko xi mìtsà xita kixi.

¹⁶ Koií k'oas'ín bìnè-la yijo-na nga tsjeè síkìjna kjohítsjeèn-na nguixkon Nainá ko nguixkon xita.

¹⁷ 'Nga jye kò kjìn nó mì tì kù f'i-na naxandá-na Jerusalén, j'íi jngoò k'a-na nga j'ìko-la ton jñà xita imà ko kitsjaà-la kjotjò Nainá.

¹⁸ K'oaá tjín kjoa xi tìs'iaàn k'e nga jye kisitsjeèya yijo-na koni tjín kjotíxoma-la xita judío. K'e nga kijtseè-na jñà xita judío xi Asia i'nde-la nga ya tjinaa ya nditsin ingo, mìtsà kjìn ma xita xi títsajna-na. Tikoáá mìtsà kjoasì tìbìts'iaa.

¹⁹ Jñà xita xi kijtseè-na ya nditsin ingo, tsà mé kjoa xi tjín-la xi kondra ts'an, jñà sabá kàtjanchrobá nga kàtatsjá 'én.

²⁰ Tsà majìn, jñà xita xi i títsajna kàtènojímì tsà mé jé kisakòt'aà-la it'aà ts'an k'e nga tsohótijna nguixkon xitaxá judío.

²¹ A xi koií jé xi tíma-na nga 'ñó kichjà k'e nga tijnajiìn-la xitaxá judío nga kixan-la: “Nachrjein i'ndeì tìsindaàjìin-na nga mokjeiìn-na nga faáya-la xita xi biyaà.”

²² Jè Félix, ndaà tjiìn-la koni s'ín tjín ndiyá xitse ts'e Jesucristo. Tsibíchróbá kjoa koi. Kitsò:

—K'e nga kjoí Lisias xi xita sko-la soldado, k'eé skònangui-ìsa-nò kjoa xi tjín-nò.

²³ Félix kitsjaà-la okixi jña soldado-la nga sikkjna isa ndayá Pablo, tanga komaá kojmeendei ya iya ndayá, tikoáá komaá kijchòkon xita xikjin ko amigo-la.

²⁴ K'e nga komà jàn ñijòn nachrjein, ijchò ijngò k'a Félix; tjiko Drusila xi chjoón-la ma xi tikoá xita judío. Kiskinikjaá Pablo nga mejèn-la kji'nchré-la kós'in mokjein-la it'aà ts'e Na'èn-ná Jesucristo.

²⁵ Pablo, tsibénojmí-la kós'in tjín xi kjoa kixi, mé xi s'eén nga kíkjoán-lá kjoa xi ch'o tjín xi síjé yijo-ná; tikoá tsibénojmí-la nga sa nchrobá nachrjein nga Nainá kùndaàjìn. Félix tà kitsakjòn-né; k'eé kitsò-la:

—T'in-ne. K'ejí nachrjein kichjà ijngò k'a-lè k'e nga ko'a-na.

²⁶ Jè Félix, k'oaá s'in tísikítsjeèn, mejèn-la ton Kochrjekájno-la Pablo nga sikkjnandeí; k'oaá ma-ne nga kjin k'a kiichja-la.

²⁷ K'e nga tsato jò nó, jahatjya xá-la Félix. Jè jahas'en xi 'mì Porcio Festo. Jè Félix, mejèn-la nga ndaà tsibijnako jña xita judío; kiskikjna isa ndayá Pablo.

25

K'e nga jè Pablo tsibijna nguixkon Festo

¹ Festo ijchò Cesarea nga jahas'en xitaxá ítjòn; xi komà jàn nachrjein itjo-ne Cesarea, kii Jerusalén.

² K'e nga jye tjina Jerusalén, jña no'miù ítjòn ko xita sko-la xita judío ijchòkon nga tsohóngui Pablo; kitsjaat'in 'én xi kondra ts'e.

³ Xita koi, kisié-la kjondaà jè Festo nga kàtjanchrobáko Pablo ya Jerusalén. K'oaá s'in jye tjindaà-la nga kítsachjoà ikon-la ya iya ndiyá mé-ne nga sikk'en-ne.

⁴ Tanga jè Festo, kitsò:

—Majìn, mikii koma, nga jè Pablo ndayá tjina ján Cesarea; 'an, jyeé ya tífia.

⁵ Jña xitaxá-nò koma koahijtakò-na ján Cesarea mé-ne koma kohòngui-ne xita jè, tsà mé jé xi tjín-la.

⁶ Jè Festo tsibijna-la tsà nguì jìn nachrjein ko tsà te nachrjein ján Jerusalén; ikjoàn kii ijngò k'a-ne ján Cesarea; nga komà inchijòn ijchò ni'ya osen, tsibijnané ixile-la ñánda otixoma; ikjoàn kiskinikjaá Pablo.

⁷ K'e nga jahas'en ni'ya osen Pablo, jña xita judío xi j'ì-ne Jerusalén, kii kinchat'aà chraña-la nga kitsjaat'in 'én ndiso xi 'nó ch'o tsò tanga mikii komà kjòkixiya 'én xi kitsjaat'in.

⁸ Pablo tsasiko yijo-la kitsò:

—Nimé jé xi tsohotsjià xi kondra ts'e kjotixoma-la xita judío, ni jè kondra ts'e ingo ítjòn-la Nainá, ni jè kondra ts'e César xi xitaxá ítjòn ts'e Roma.

⁹ Tanga jè Festo mejèn-la nga ndaà kijnako xita judío; kiskòngui-la Pablo, kitsò-la:

—¿A mejèn-lè nga k'oin ján Jerusalén mé-ne nga ya kındaajñaà kjoa-lè?

¹⁰ Pablo kitsò:

—Jye i tjina ñánda tjín kjotixoma-la César xi xitaxá ítjòn ts'e Roma. Mochjeén-né nga i kàtasindaàjìn-na. Ngaji ndaà tjijn-lè nga ni mé kjoa tsohotsjià it'aà ts'e xita judío.

¹¹ Tsà tjín-na jé, tsà ok'ln-la nga kiyá, tjngò takoàn nga kàtasik'en-na; tanga tsà mi kixi kjoa 'én xi tsját'in-na, mikii koma ya kongatsja it'aà ts'e xita koi. Tikoáá-ne, jè kàtındaàjìn-na César xi xitaxá ítjòn ts'e Roma.

¹² Jè Festo, k'eé tsajoóya-ne ko xita-la xi títajnakò junta, ikjoàn kitsò:

—Tsà k'oaá s'in nijí nga jè César kındaajìn-lè, tà saá ján sikasén-lè.

K'e nga ijchò ján Cesarea jè xitaxá Agripa

¹³ K'e nga jye tsato chiba nachrjein, jè xitaxá Agripa ko Berenice kii ján Cesarea nga kisihiat'aà Festo.

¹⁴ Kjìn nachrjein tsibitsajna ya Cesarea; jè Festo tsibénojmí-la Agripa kjoa-la Pablo, kitsò-la:

—Jè Félix, jngoò xita kisikijnaya ndayá ijndé.

¹⁵ K'e nga tsohótijna ján Jerusalén, jña xita sko-la no'miù ko xita jchínga-la xita judío kitsjaà-na 'én nga óngui. Kisijé nga kàtiyaà.

¹⁶ 'An, k'oaá kixan-la nga jña xitaxá Roma, mì taxki sík'en xita k'e nga tikj'eè 'ya-la jé xi tjín-la. Ítjòn joó'a kjoa-la ko jña xita xi óngui mé-ne nga koma kinchako-ne yijo-la.

¹⁷ Koií kjoa-la, k'e nga j'ii ijndé jña xita koi, mìkiì kisichja nàchrjein; nga koma inchijòn, nga jye tijnasoàn íxile-na nga tihotixoma, nitoón kiskinikjaá xita jè.

¹⁸ K'e nga jye títsajna osen jña xita xi óngui, mìtsà koi kjoa tsohóngui koni s'ín 'an tísíkijsjeèn.

¹⁹ Tà k'oaá tjín 'én xi kitsjaat'in xi kondra ts'e Pablo koni s'ín beèxkón Nainá ko it'aà ts'e jngoò xita xi 'mì Jesús xi jye k'en; tanga jè Pablo tsò-né nga tíjnakon-né.

²⁰ 'An, mìkiì be mé xi s'iaàn it'aà ts'e kjoa koi. K'eé kiskònangui-la Pablo, a mejèn-la nga ján kjoí Jerusalén mé-ne nga ya sindaàjìin-la kjoa xi finè.

²¹ K'oaá s'ín kisijé Pablo nga jè César kìindaàjìin-la. Koií k'oa s'ín kitsjaà-na okixi nga ndayá tijnaya-isa skanda k'e nga koma sikasén-la César.

²² Agripa kitsò-la jè Festo:

—Tikoaá 'an mejèn-na nga kji'nchrè-la xita jè.

Festo kitsò:

—Nchijòn-le kìná'ya-la.

²³ Nga komà inchijòn, ijchò Agripa ko Berenice. K'e nga jahas'en ni'ya osen 'ño ndaà kisís'in-la. Kjihijtakò jña xita sko-la soldado ko jña xita sko-la naxandá. Festo kitsjaà okixi nga kùchjaà Pablo.

²⁴ Festo kitsò:

—Ngaji Agripa xi xitaxá ítjòn tijni, ngats'ioò xi i títajnaà: chítsejèn-la xita jè. Ngats'ii jña xita judío, 'ño síjèt'aà-na ján Jerusalén ko i Cesarea nga 'ño chja nga mejèn-la siik'en.

²⁵ Tanga 'an, nimé xi matsjit'aà-na it'aà ts'e nga mochjeén-la nga kiyá. Tanga tso'baá kisijé-ne nga jè kìindaàjìin-la César xi xitaxá sko-la tíjna-la ngats'ii xita. 'An, k'oaá s'ín kiskoòsòn-la nga ya siikasén.

²⁶ Tanga 'an, nimé kjoa xi matsji-na it'aà ts'e xita jè, kós'ín sikasén-la xojon jè César xi xitaxá sko-la tíjna-la ngats'ii xita. K'oaá ma-ne nga síjèt'aà-nò jñò xi i títajnaà ko ngaji Agripa xi xitaxá ítjòn tijni, mé-ne k'e nga jye chjinangui-laá, 'an sakó-na okixi nga sikasén xita jè.

²⁷ 'An, k'oaá ma-na, nga nimé chjí-la tsà taxki sikasén jngoaa xita xi ndayá tíjna tsà mì sik'à jngoò xojon xi 'ya-la mé jé xi tjín-la.

26

K'e nga kùchjatji yijo-la Pablo nga nguixkon Agripa

¹ Jè Agripa kitsò-la Pablo:

—Tjì'ndeé-lè nga kìnókjoatji yijo-lè.

Pablo kiskímìtjen tsja; tsíbíts'ia nga kùchjatji yijo-la; kitsò:

² —Ngaji Agripa, matsjaá-na nga ma kichjàkò-lè mé-ne nga kósikoa yijo-na ngats'ii kjoa xi kondra ts'an tsját'in-na 'én xita judío.

³ Be-ná nga ji Agripa, tíjìin yijeé-lè ngats'ii kjotíxoma xi tjín-la xita judío ko kjoa xi joóya-ne. K'oaá ma-ne síjèt'aà-lè, tjín-lè kjondaà, tse t'iiin takoìn, ndaà tìná'ya-ná.

⁴ 'Ngats'ii xita judío tíjìin-la kós'ín kisijchá yijo-na ján nangui-na ko Jerusalén tjen-ne nga sa ti kjia skanda nàchrjein i'ndeì.

⁵ Jña xita koi, tsà mejèn-la komaá keènojmi-lè. Ndaà tíjìin-la nga 'an, nguì xita fariseo-ná; nga jña xita fariseo xi isa 'ño bínè-la yijo-la nga beèxkón kjotíxoma-la Nainá mì k'oaá-ne koni jña xita judío xi i'nga.

⁶ 'An mokjeiín-na nga kítasòn kjoa xi tìkoña-la koni s'ín jye kitsjaà-la tso'ba Nainá jñà xitá jchínga kjiín-ná. Koií kjoa-la nga i tìjnaa.

⁷ Nga tejò tje-la naxandá Israel, ko nachrjein ko nitjen, jeya nchisikíjna Nainá nga nchikoñaá-la nga kítasòn kjoa koi. K'oaá xan-lè ngaji Agripa, nga tìkoií-ne kjondaá xi 'an tìkoña-la; k'oaá ma-ne nga óngui-na jñà xitá judío.

⁸ ¿Jñò, mé-ne nga mìkiì mokjeiín-nò nga Nainá sìkjaáya-la xitá xi jye k'en?

K'e nga tsibenojmí Pablo kó kis'iìn nga kisijtikeè xitá-la Cristo

⁹ 'An, nga sa kjòtseé, k'oaá s'ín kisikítsjeèn nga mochjeén-né nga kondra kjítjngui-la Jesús xi Nazaret i'nde-la.

¹⁰ K'oaá kis'iaàn ján Jerusalén. Jñà xitá sko-la no'miì kitsjaà-na okixi nga kjìn xitá tsjeè-la Nainá kiskinìs'en ndayá. K'e nga kinik'en xitá koi, 'an tìkooá kjòjngod takoàn.

¹¹ Nga xki xi ján ni'ya ingo sinagoga, kjìn k'a kitsjaà-la kjo'in nga mejèn-na nga kàtíhjaano-la Cristo. 'Nó kisijtikeè, skanda kiitjngui kondra-la ñanda xìn naxandá xi tjin isò'nde.

*Kó komà nga jahatjìya kjohítsjeèn-la Pablo
(Hechos 9:1-19; 22:6-16)*

¹² 'Koi xá kiì-na ján naxandá Damasco nga 'an tsatíxá-na jñà xitá sko-la no'miì, tìkoa kitsjaà-na okixi.

¹³ Ngaji, xi xitaxá ítjòn tijni, k'e nga ijchò nchisen, kjitseeè ya iya ndiyá, jngodò ni'ín xi ngajmiì inchrobà-ne xi isa 'ñó ote tsejèn mì k'oaá-ne koni ts'e ts'oi. Nguì kishiseèn-né nga jngodò itjandiì-na ko ts'e xitá xi tjikoa.

¹⁴ Chixòt'aà-jen nangui, ikjoàn ki'nchrè jngoaà 'én hebreo xi kiichjajiìn isén-na; kitsò: “Saulo, Saulo, ¿mé-ne 'an tì'mìtjngui kondra-ná? Tijí tìyatoòn-ne yijo-lè, k'oaá ngaya-la koni tsà nchraja tsjón-la jè yá xi bìnès'en-la nei-la.”

¹⁵ 'An kixan-la: “¿Yá-né ngaji Na'èn?” Jè kitsò-na: “'An-ná xi 'mì-na Jesús xi tì'mìtjngui kondra-ná.

¹⁶ Tisítjijn; tìsijna kixii; koií xá kàyaxkon-ná nga 'an sixá-ná; jí k'oi 'én, jè kjoa xi kà'yi ko kjoa xi iskan 'an kokoò sobà-lè.

¹⁷ 'Aán sìkinda-lè it'aà ts'e xitá naxandá-lè ko ts'e xi mìtsà xitá judío. Yaá sìkasén-lè

¹⁸ nga chíx'anguì xkon nga mì ta tsjaà ya kinchimaya ndiyá jñò; ndiyá iseèn kinchimaya. Kàtinchat'aàxìn-la nga ñó-la xitá neií; Nainá kàtjìt'aà-la. K'e nga kòkjeiín-la it'aà ts'an, jchat'aà-la jé-la, tìkoo s'e-la kjotjò xi tjoé-la xitá naxandá-la Nainá xi xó kitjaàjiìn-ne.”

¹⁹ 'Ngaji Agripa xi xitaxá ítjòn tijni, 'an mìkiì kisitájaàjñà inima-na jè kjoa xi kjitseeè ko xi ki'nchrè xi ngajmiì inchrobà-ne.

²⁰ Ta saá, tsibenojmí ítjòn-la jñà xitá Damasco, ikjoàn tsibenojmí-la xitá Jerusalén, tìkoo tsibenojmí-la kòhokji nangui Judea, ko jñà xi mìtsà xitá judío. K'oaá s'ín tsibenojmí-la nga kàtasíkájno jé-la nga mì tì jé kòhótsji-ne. Nainá kàtjìt'aà-la; ndaà kàtas'ín mé-ne nga jcha-la nga jye jahatjìya-la kjohítsjeèn-la.

²¹ Koií kjoa-la, jñà xitá judío, kitsobà ñó-na ya nditsin ingo; mejèn-la nga sìk'en-na.

²² Tanga Nainá tsasikò-na; tákó k'oaá tìs'iaàn skanda i'nde; k'oaá s'ín tsibenojmí yije-la nitá yá xitá-ne. Mìtsà k'ejí 'én okoòya; koi 'én benojmiá xi tsakóya Moisés ko xitá xi kiichja ngajo-la Nainá, kjoa xi koma nga tífi isa nachrjein.

²³ K'oaá s'ín tsakóya xitá koi, nga jè Cristo [xi xó kisikasén-ne Nainá] tjinè-la nga k'en, tanga jè jaáya ítjòn-la mé-ne nga keènojmií-la xitá naxandá-la ko xi mìtsà xitá judío kós'ín kòhiseèn-jiìn inima-la nga koma kitjokajiìn kjoajñò.

Kó kitsò Agripa nga mejèn jahas'en-jiìn-la 'én-la Nainá

²⁴ Jè Festo, k'e nga kiì'nchrè 'én-la Pablo nga tíhosikò yijo-la, 'ñó kiichja kitsò:

—iNgaji Pablo, tímaskáyaá-lè; jè xojon tísiskáya-lè!

²⁵ Tanga jè Pablo kitsò:

—Ngaji Festo xi xitaxá tijni, mìtsà tímaskáya-na; k'oaá s'ín tjín; 'én kixí xi tìchjà.

²⁶ Jè Agripa xi xitaxá ítjòn tíjna, tíjìn yijeé-la kjoa koi; k'oaá ma-ne ma'ño takoàn nga nguixkon jè tìchjà 'én koi; 'an, k'oaá s'ín makixiya-na nga jè, tìkoaá 'ño ndaà tíjìn-la kjoa koi; nga mìtsà tí'ma koni s'ín komà.

²⁷ Ngaji Agripa xi xitaxá tijni, ¿a mokjeiín-lè koni s'ín kitsò jña xita xi kiichja ngajo-la Nainá? 'An, be-ná nga mokjeiín-lè.

²⁸ Jè Agripa kitsò-la Pablo:

—Tà chibaá chja-la tsà kinikijne-ná nga 'an, xita-la Cristo koma.

²⁹ Pablo kitsò:

—Tsà tse ko tsà chiba chja-la, 'an, k'oaá s'ín mejèn-na nga nguixkon Nainá nga kàtakjeiín-lè xi xitaxá ítjòn tijni; tìkoa kàtakjeiín-la ngats'ì xita xi nchi'nchré-na. K'oaá s'ín kàtamat'ioòn koni 'an tanga mì k'oaá s'ín na'ño kichà cadena sít'aà'ño.

³⁰ K'eé tsasítjen Agripa ko Festo ko Berenice, ngats'ì xita xi ya títsajna.

³¹ Xìn kiì nga tsajoóya-ne kjoa koi. Kitsò-la xíkjín:

—Xita jè, nímé kjoa tjín-la nga kiyá, tìkoaá mìkiì ok'in-la nga ndayá kijn'ya.

³² Agripa kitsò-la jè Festo:

—Xita jè, komaá-la kijnandeí-ne tsà mì k'oaá s'ín kisijé nga jè kiindaàjìn-la César xi xitaxá ítjòn ts'e Roma.

27

K'e nga kinikasén Pablo ján Roma

¹ K'e nga jye k'oas'ín kiskoòsòn-la nga ján sikkasén-najen Italia, jè Pablo ko xita xi i'nga xi ndayá títsajna, jè kjongatsja xita sko-la soldado xi 'mì Julio xi ya chja jngoò jtín-ne soldado xi ts'e César.

² Tsitjaàs'en-jen jngoò chitso xi ts'e Adramitio xi jye mejèn tíbitjo nga ya tífi jña naxandá indii ndáchikon ts'e nangui Asia. Tìkoaá yaá tíjnako-najen Aristarco xi ya i'nde-la Tesalónica, naxandá xi chja-ne nangui Macedonia.

³ Nga komà inchijòn, ijchò-jen Sidón. Jè Julio ndaà kijtseè ikon Pablo; kitsjaà'nde-la nga kiikon amigo-la mé-ne nga siis'in-la.

⁴ K'e nga itjo-najen Sidón, k'oaá s'ín tsanguì-jen xijngoàà nangui jìn-nda Chipre, nga jè tjo, kondra tsajeén tí'ba.

⁵ Tsitjaàjto-jen jjiìn ndáchikon i'nde ts'e Cilicia ko Panfilia; ijchò-jen Mira, naxandá xi chja-ne nangui Licia.

⁶ Jè xita sko-la soldado kisakò jngoò-la chitso xi naxandá Alejandría ts'e; yaá kisikas'en-najen nga ján tífi Italia.

⁷ Kjìn nachrjein tsitjaàjìn-jen ndáchikon nga tafí tafí tsanguì-jen; chjá ijchò-najen ya kixi-la Gnido. Jè tjo mìkiì tsjá'nde-najen nga onguí kixi-jen; tsitjaáhindii-la-jen nangui Creta ya kixi-la naxandá Salmón.

⁸ Tseé kjo'in ki'nè-jen nga tsitjaàjìn-nda-jen kóhokji indii ndáchikon ts'e Creta. Chjá ijchò-najen i'nde ñánda 'mì Buenos Puertos ya chrañat'aà-la naxandá Lasea.

⁹ Jyeé kjìn nachrjein tsato; jyeé 'ño kjojkón tjín-la jjiìn ndáchikon, nga jyeé nchrobá machraña nachrjein cho 'nchán [k'e nga 'ño 'ba tjo]. K'oaá ma-ne jè Pablo kitsò-la jña xita:

¹⁰ —'An, k'oaá s'ín machiya-na, ndiyá jè, 'ño tse kjojkón tjín-la; jchijaá-la jè chitso ko ch'á xi 'ya, skanda jña, mejèn tsà sichijaá yijo-ná.

¹¹ Jè xita sko-la soldado, isaá ndaà kiì'nchréñijon-la jè nei-la chitso ko jè xita sko-la xi tísíxako chitso mì k'oaá-ne koni kitsò Pablo.

¹² Ya i'nde jè, mìkiì ndaà choòn nga ya sasijna chitso nachrjein ch'o 'nchán. Xita xi ya títsajnaya chitso, kjìn ma xi ngàsòn kitsò nga kitjokajìn Buenos Puertos; ján kjoí Fenice,

jngoò i'nde xi ndaà choòn xi chja-ne Creta ñánda bijchó sinchá chitso nga ya fahas'en jngoò chrja-la ndáchikon ya nga kixi-la kò ngaskón-la ñánda kahatji-ne ts'oí; yaá kitsajna nachrjein ts'e cho 'nchán.

K'e nga ts'a tjo xkón

¹³ Jñà xitá xi síxáko chitso, k'e nga kijtseè nga indaà ts'a tjo xi inchrobà-ne ya i'nde sur, k'oaá s'ín kisikítsjeèn nga jyeé koma kison-nda; itjo-jen, tsanguisòn ndá-jen ya indi nangui Creta.

¹⁴ Xi komà iskan nga jye tjaájiin-nda-jen, j'ii tjo xkón xi inchrobà-ne ya i'nde norte.

¹⁵ Kiiko jè chitso koni s'ín fi tjo. Ngajen, mi ti ki ma nikáfaya-najen jè chitso, nga jè tjo, miki tsjá'nde-la; ta saá ta kits'i'ndeé-lajen nga k'oas'ín kiiko-najen jè tjo.

¹⁶ Tsitjaajto-jen ijton íts'in i'nde Cauda; i'nde jè, mi ti k'oaá 'ño tí'ba-ne tjo; chja kitjoé-najen jè chitso jtobá xi tjíndófe-la ijton íts'in jè chitso je.

¹⁷ K'e nga jye kitjoé-najen jè chitso jtobá, ikjoàn na'ño tsibí'ñókja-ne jè chitso je nga mi kixoña-jen. Jñà xitá xi síxáko chitso, tsakjón-la tsà ya skajiin-ño ya i'nde ñánda 'ño 'ncha tsomi ñánda 'mi Sirte. Koi kiskinájjen-ne jè nikje ts'e chitso xi 'mi vela; ta k'oaá s'ín kiiko jè tjo.

¹⁸ Nga komà inchijòn, jè tjo xkón, táko 'ño jchán tí'ba. K'eé tsachrje jñà ch'á xi 'ya chitso; tsibíxteèn-jiin ndáchikon [mé-ne nga isa jna komà-ne jè chitso].

¹⁹ Xi komà jàn nachrjein, tikoá tsachrje tsojmi xi mochjeén-la nga síxáko chitso. Tsibíxteèn-jiin ndáchikon.

²⁰ Kjìn nachrjein mi ti ki ki'ya-najen ts'oí kò ni'ño nga 'ño 'ncha ifi nga jtsí xkón tibanè-najen. K'oaá komà-ne nga chixón-jen nga mi-la ti ki ndaà kitjokàjiin-najen ndáchikon.

²¹ Nga jyeé kò kjìn nachrjein mi ti ki bichi-najen, Pablo tsasijna kixi, kitsò-la jñà xitá: —Ndaà-la komà tsà kina'yañijon-ná koni kixan-nò; tsà miki itjokajñaá ya i'nde Creta, mi-la ki k'oas'ín tímat'iaán nga kjo'in títanikjiaán koá kinichijaá tsojmi-ná.

²² Tanga i'ndeji, ki makájno-nò; nijngoò xitá kiyá; ta jè chitso xi jchija.

²³ Nati nitjen kò 'bi jngoò-na nijña; jngoò àkjale kòf'ikon-na xi Nainá kàsikasén, jè Nainá xi 'an fit'aà-la koá 'an síxá-la,

²⁴ kàtsò-na: “Pablo, ki tsakjoòn-jèn; kjo'ño tjín-ne nga kijchoi nguixkon César, xitaxá ítjòn ts'e Roma. Nainá, k'oaá tjín kjondaà xi tsjá-lè nga nijngoò xitá kiyá xi ya títajnayako-lè chitso.”

²⁵ Jñò, 'ño t'è-là takòn. 'An miki sikájnoa. 'Beé-la takoàn, k'oaá s'ín kitasòn koni kàtsò-na jè àkjale.

²⁶ Tanga yaá kijcho kat'aà'ño-laá jngoò nangui jtobá xi kijjnajiin-nda.

²⁷ K'e nga jye komà jò xomàna nga tjaájiin-jen ndáchikon Adriático, jè tjo fijen fikjako jè chitso. Jngoò nitjen, ijchò-la tsà osen nitjen, jñà xitá xi nchisíxáko chitso, kijtseè nga jyeé kjomeè bijcho chrañat'aà-lajen nangui.

²⁸ Kisichiba kó kji nanga kijna nandá; kijtseè nga kaàn chrj'oòn jngoò metro nanga kijna. K'eé nguì kò kji ki isa; ikjoàn kisichiba jngoò k'a; jye kaàn itoò metro tjín-la nga nanga.

²⁹ Kitsakjòn-la tsà jñà ndajo nandá skakjoòko jè chitso. Nijòn kicha ii xi gancho kjoàn kisikatsjoòjiin tàts'en chitso mé-ne nga kitsobà'ño-ne nangui nga mi ti ki koma kjoí-ne jè chitso; ikjoàn tsibísi'ba-la Nainá nga niton kàtas'e isén.

³⁰ Ngats'ii jñà xitá xi síxáko chitso mejèn tsanga chijé; k'oaá kis'iin koni tsà jñà kicha ii xi gancho kjoàn kinchangui'ño skò chitso nga kitsobà'ño nangui; tsibísi'ia nga kiskinjen-jiin nandá jè chitso jtobá.

³¹ Tanga jè Pablo kitsò-la jè xitá skò-la soldado kò soldado xi i'nga:

—Tsà jñà xitá koi konga, jña, miki koma kitjojñaá nandá.

³² Jñà soldado tsate'ño jè chitso jtobá. Kiskaàjiin ndáchikon.

³³ K'e nga jye kis'e isén, jè Pablo kitsò-la ngats'ì xita:

—Jyeé tjin-la jò xomana nga titsajnachjaán nga chiná-lá mé xi komat'iaán.

³⁴ Bitsi'bà-nò, mochjeén-né nga tichioò mé-ne nga s'e-nò nga'ño. Ngats'ioò, nime xi komat'ioòn, skanda njngoò xi sichja jngoò tsja skoò.

³⁵ Pablo, k'e nga jye okitsò, kiskoé inchrajín, kitsjaà-la kjondaà Nainá nga nguixkon ngats'ì xita. Kisixkoaya; ikjoàn tsakjèn.

³⁶ Ngats'ì xita, kjòtsja yije-la; tikoá tsakjèn kóhotjín.

³⁷ Jò sindo kò jàn kaàn kò chrj'oòn jngoò ma-najen xi ya titsajnaya-jen chitso.

³⁸ K'e nga jye komà ndaà chichi yije-jen, jña ch'á trigo kisixteèn-jìin ndáchikon mé-ne nga isa jnà komà-ne jè chitso.

³⁹ K'e nga jye itjokàtji ts'oi, jña xita xi síxako chitso, mìki beèxkon kó 'mì nangui ñánda ijchò-jen, tanga kijtseè-né nga tjin jngoò i'nde ñánda fahas'en jngoò chrja-la ndáchikon ñánda 'ño 'ncha tsomì; mejèn k'oas'in kiskinì chitso tsà koma ya skajìin-'ño tsomì.

⁴⁰ Tsate na'ño xi tjit'aà'ño chitso; jña kichà iì xi gancho kjoàn, yaá kisijijòjìin ndáchikon; kiskijnda'ño jña yá xi síxako nga fiko kixi chitso. Ikjoàn kiskimùtjen jè nikje xi sinchá tjo nga fahitjen chitso. Ikjoàn tsibits'ia nga kii kixi ñánda kijna nangui xi 'ño 'ncha tsomì.

⁴¹ Tanga yaá kii kaàjìin-'ño ñánda 'ncha tsomì ya jìin ndáchikon. Jè skò yá chitso, kiskaàjìin-'ño; mì tì kii koma kishiniyá-ne. Ikjoàn kjòts'ia nga kjòxkoaya jè tàt'en chitso nga jè nga'ño-la nandá kisixkoaya.

⁴² Jña soldado mejèn kisik'en jña xita xi kjo'in nchifi nga majìn-la nga kongá ya jìin ndáchikon.

⁴³ Tanga jè xita skò-la soldado mìki kitsjaà'nde. Jè xi mejèn-la nga mì kiyá Pablo. Tà saá okixi kitsjaà kitsò:

—Yá xi ma-la nandá, kàtjì ítjòn mé-ne nga koma kijchò-ne ñánda nangui choòn,

⁴⁴ kò jña xita xi i'nga xi mì ma-la nandá, kàtjìsòn íteè kò tsà jña yá xkoá-la chitso.

K'oaá s'in komà-ne nga ndaà ijchò yije-jen ñánda nangui choòn.

28

Mé xi komat'in Pablo k'e nga tsibijna Malta

¹ K'e nga jye itjoiin-jen ndáchikon, kis'enojmí-najen nga ya i'nde jè, Malta 'mì.

² Jña xita xi ya i'nde-la, ndaà kisikò-najen; tsibitse-najen ni'in, ikjoàn kitsjaà'nde-najen nga kinihiso-jen, nga jtsí tí'ba koa 'nchán choòn.

³ Jè Pablo tsibíxkò chiba chikín kixi. K'e nga chinchájìin ni'in jña chikín, jngoò ye itjokàjìin xi tihonga nga 'ño tsjè ni'in; kiskine tsja Pablo.

⁴ Jña xita xi ya i'nde-la nga kijtseè nga ye tjoóngui-la tsja Pablo, kitsò-la xíjín:

—Xita jè, xitaá-la ma-la sík'en; nas'in ndaà kòbitjokàjìin ndáchikon, jè nea-ná xi tjin-la okixi, majìn-la síkijnakon.

⁵ Jè Pablo, tsibítsajneé tsja ya jìin ni'in; nime xi komà-la.

⁶ Ngats'ì xita nchikoña-la mé hora kitjaya tsja koa mé hora kiyá Pablo. K'e nga kijtseè nga jye kjìn hora tsato nga nime xi komà-la, kj'eij s'in kisikítsjeèn, kitsò:

—Jè Pablo, Nainá-la.

⁷ Ya chrañat'aà-la i'nde ñánda ijchò-jen, tseé nangui tjin xi ts'e xita ítjòn-la i'nde Malta xi 'mì Publio. Jàn nachrjein tsitsajnakò-jen; ndaà kiskoétjò-najen kò ndaà kisìs'in-najen.

⁸ Nachrjein koi, jè na'èn-la Publio, xk'én-né; ch'in tijná tjin-la kò xojmá jnì tífa-la. Pablo kiikon; kiichjat'aà-la Nainá; ikjoàn tsohójnasòn-la tsja; jngoò k'a kjondaà-ne.

⁹ K'e nga kii'nchré jña xita xk'én xi tjin ya i'nde jè, tikoá inchrobà ñánda tijná Pablo. Kjondaà yijeé-ne.

¹⁰ Jña xita, ndaà kisìs'in-najen. K'e nga jye titsachjoé jngoò-jen chitso nga jye titsahonguí-jen, jña xita kisik'a yijeé-najen ngats'ì tsojmì xi kochjeén-najen ya ndiyá.

K'e nga ijchò Pablo ján naxandá Roma

¹¹ K'e nga jye tsato jàn sá nga titsajna-jen i'nde jè, ikjoàn tsanguì ìjngoò k'a-jen. Tsitjaàs'en jngoò-jen chitso xi ján i'nde-la naxandá Alejandría xi tikoá ya kisasijna ya indii ndáchikon ts'e Malta jñà nàchrjein cho 'nchán; isén ts'e Cástor ko Pólux tjít'aà.

¹² K'e nga ijchò-jen naxandá Siracusa, jàn nàchrjein tsitsajna-jen.

¹³ Tsanguì ìjngoò k'a-jen; ijchò-jen skanda naxandá Regio. Xi komà inchijòn tsibíts'ia nga ts'a tjo xi inchrobà-ne i'nde sur. Ijchò jò nàchrjein, ijchò-jen naxandá Puteoli.

¹⁴ Yaá kiskaàkjoò i'nga-jen xitá xinguiáá xi it'aà ts'e Cristo xi kiichjako-najen nga tsitsajnakò-jen jngoò xomàna. Xi komà iskan, ikjoàn tsanguí-jen skanda Roma.

¹⁵ Jñà xitá xinguiáá it'aà ts'e Cristo xi titsajna Roma, jyeé tíjìn-la nga ya titsahonguí-jen; tjín xi ijchò kaña-najen ya nditsin Apio; tikoá tjín xi ijchò kaña-najen ñánda 'mì Jàn Tabernas. Jè Pablo, k'e nga kijtseèxkon, tsjaá kis'e-la inima-la; kitsjaà-la kjondaà Nainá.

¹⁶ K'e nga jye titsajna-jen Roma, Pablo kits'ii'nde-la nga tsibìjna tajngoò ni'ya-la; ko tà jngoò soldado kisikinda.

Mé 'én xi kiichja Pablo k'e nga tsibìjna Roma

¹⁷ Nga komà jàn nàchrjein nga ijchò-jen Roma, Pablo, tsibíxkóya jñà xitá sko-la xitá judío xi ya titsajna. K'e nga jye j'ii yije, kitsò-la:

—Jñò xi xitá xinguiáá judío xi i titsajnaà Roma, ján Jerusalén, kitsobà'ño-na xitá, ikjoàn kisingsatja-na it'aà ts'e xitaxá Roma nga tsibíndaàjìin-na. 'An, nímé jé xi tihotsjià it'aà ts'e xitá xinguiáá judío ko it'aà ts'e kjotixoma-la xitá jchínga-ná.

¹⁸ Jñà xitaxá Roma nga tsibíndaàjìin-na, nímé jé xi kisakòt'aà-la it'aà ts'an. Mejèn kisikijnandeí-na nga mìkii ok'in-la nga sikk'en-na.

¹⁹ Tanga jñà xitá judío, mìkii kòkjeín-la; k'oaá komà-ne nga 'an, kisijé nga jè kátindaàjìin-na jè César xi xitaxá ítjòn ts'e Roma. 'An, nímé xi sijé xi kondra ts'e naxandá-ná.

²⁰ K'oaá ma-ne nga kòbìxkóya-nò mé-ne nga kichjàkò-nò; koií kjoa-la nga mokjeíin-na it'aà ts'e kjoa xi titsachiña-lá xi xitá Israel 'mì-ná nga na'ño kichja tjít'aà'ño-na.

²¹ Jñà xitá judío kitsò:

—Ngajen, nímé xojon tíkaàt'aà-najen xi kjoa tsiji xi ján Judea nchrobá-ne. Ngats'ii xitá judío xinguiáá xi nchif'ii, nímé 'én xi ch'o tsò nchitsjá-najen xi kjoa tsiji.

²² Mejèn-najen nga kiná'ya-jen kjoa xi nikítsjìin; ngajen, tíjìn-najen nga xki xi ján chjajno-la xitá nga kondra fi-la jè ndiyá xitse xi ya tjaáyi.

²³ Tsibìjna jngoò nàchrjein-la xíkjín, mé nàchrjein kixoña. K'e nga chixoña, kjìn xitá ijchò ya ni'ya ñánda tíjna Pablo; ko jè Pablo tsakóya-la kós'ín otixoma Nainá, tsibíts'iajo-ne nga sa tajñoña skanda kjonguixòn. Pablo kisikjeén xojon ts'e Moisés ko ts'e xitá xi kiichjaya ngajo-la Nainá nga tsakóya-la kó s'ín tíchja mé-ne nga jñà xitá kàtakjeíin-la it'aà ts'e Jesús nga jè xi Cristo.

²⁴ Tjín xitá xi kòkjeíin-la, tikoá tjín xi mìkii kòkjeíin-la.

²⁵ Nga mìkii kjongásòn 'én-la koni s'ín tsajoókjoò, tsibíts'ia nga itjo ni'ya. K'eé kitsò-la Pablo:

—Ndaà kiichja Inima Tsjeè-la Nainá nga kisikjeén Isaías xitá xi kiichja ngajo-la kjòtseé nga kitsò-la jñà xitá jchínga judío:

²⁶ T'in, kot'in-la jñà xitá naxandá:

Jñò, kiná'ya-nò tanga mìkii kjoas'en-jìin-nò; chítsejèn-nò tanga mìkii jchaxkon.

²⁷ Koií kjoa-la nga jñà xitá naxandá jè, kisitájaàjìin kjohítsjeèn-la, tsibíchjoàjto líká-la,

tikoá tsibíchjoà xkon,

mé-ne nga mìkii skoe-ne,

mìkii kji'nchré,

tikoá mìkì kjoas'en-jìin-la;
majìn-la nga 'an fìt'aà-na
nga sìn daà-na.

²⁸ Jñò kàtasijìin-nò, nàchrjein ì'ndeì, Nainá, ján tísíkasén-la jñà xi mìtsà xìtá judío, kjondaà jè, mé-ne nga kítjokàjìin-ne kjo'in. Kò jñà xìtá koi, kòkjeiín-la.

²⁹ K'e nga jye òkìtsò Pablo, jñà xìtá judío, k'e nga kù-ne, nguì tà tsohótiyaá-ne 'én xi tsibénojímí Pablo.

³⁰ Pablo, jò nó tsibìjna ni'ya xi kiskìña nga tsibíhjí. Yáá kisis'in-la ngats'ìi xìtá xi ijchòkon.

³¹ Kitjò'nde-la nga kùchjaya kós'ín otíxoma Nainá tikoá tsakóya ìt'aà ts'e Nà'èn-ná Jesucristo. Mì yá xìtá tsatekjáya-la.

Xojon carta-la San Pablo xi kiski-la xita naxandá-la Cristo xi títsajna Roma

Kó tsò Pablo nga síhixat'aà jña xita naxandá-la Cristo xi títsajna Roma

¹ Jè xojon carta jè, 'aán tikjiù-nò xi Pablo 'mì-na xi chj'nda-la Jesucristo ma, xi xó kiichja-na Nainá nga 'an tsibíxáya-na kò xó kitjaàjiin-na nga 'an sika'bísoàn 'én ndaà-la Nainá.

² It'aà ts'e 'én koi, Nainá jye k'oas'ín kitsjaà tso'ba nga tisa kjòtseé, koni s'ín tíchja Xojon Tsjeè-la xi kiski xita xi kiichja ngajo-la Nainá.

³ Nga ya tíchja it'aà ts'e Ki'ndí-la, jè Na'èn-ná Jesucristo xi jè otíxoma-ná. Koni xita isò'nde, yaá inchrobàt'aà-ne tje-la xitaxá ítjòn David.

⁴ K'e nga jaáya-la it'aà ts'e kjoabiyaà, Jesucristo, k'oaá s'ín kiyaxkon-la nga Ki'ndí-la Nainá-né xi tse nga'ño tjín-la koni s'ín ndaà síkíchiya-ná jè Inima Tsjeè-la Nainá xi sítsjeè-ná.

⁵ It'aà ts'e Jesucristo, kitjoé-na kjondaà nga 'an tsibíxáya-na nga kènojmiya-la 'én ndaà-la jña xita naxandá xi tjín nga títsa isò'nde nga kàtasíkitasòn kò kàtakjeiín-la it'aà ts'e Cristo, mé-ne nga jeya kíjna-ne Cristo.

⁶ Tikoaá jñò, xó kinokjoà-nò nga xita-la Cristo k'oín-nò.

⁷ Tikjiù-nò ngats'ioò xi titsajnaà Roma xi matsjakeè-nò Nainá nga tikoa xó kinokjoà-nò nga xita tsjeè-la koma.

Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya jjiin inima-nò.

Mé-ne mejèn-la kjoj Roma jè Pablo

⁸ Xi mats'ia-ne, it'aà ts'e Jesucristo tsjaà-la kjondaà Nainá xi it'aà tsajòn, koi kjoa-la nga xki xi ján naxandá xi tjín nga títsa isò'nde, na'yá-nò nga ndaà mokjeiín-nò it'aà ts'e Cristo.

⁹ It'aà ts'e Nainá xi 'an sixá-la nga tjingoò takoàn nga sika'biá 'én ndaà-la xi kjoa ts'e Ki'ndí-la, jè tíbeè nga naxhrjein nchijòn síkítsjeèn-nò k'e nga chjàt'aà-la.

¹⁰ K'e nga bìtsi'ba-la Nainá, k'oaá s'ín síjèt'aà-la tsà ikon xi tsò nga chaán tsjá'nde-na nga kíkon-nò.

¹¹ Tikoaá mejèn-na skoexkon-nò mé-ne nga tsja chiba-nò kjohítsjeèn ts'e inima-ná mé-ne nga isa kixi kitsajna-nò.

¹² Jè xi tixan-nò nga ngàsòn k'oi-lá nga'ño xinguiá it'aà ts'e kjoa xi mokjeiín-ná.

¹³ 'Ndsè, tichja, mejèn-na nga kàtasijiin-nò nga kjòtseé tjín-ne nga kíkon-nò tanga skanda j'ndeì mì tà jngoò kjoa bíchjoà ikòn-na. Xi kjohítsjeèn ts'an, jè xi mejèn-na nga siixáko-nò jñò, koni s'ín kisixá ñánda nga xìn naxandá mé-ne nga tikoa skoeè-na kjondaà-la xá-na xi 'an s'iaàn it'aà tsajòn.

¹⁴ Tjínè-na nga kokoòya-la ngats'iì xita xi 'én griego chja kò xi mìkiì chja, xita xi tjín-la kjoachjine kò xi tsjin-la.

¹⁵ K'oaá ma-ne nga 'ño mejèn-na nga tikoa kichjàyajiin-nò jè 'én ndaà-la Nainá xi kjoa ts'e Cristo, jñò xi titsajnaà naxandá Roma.

Mé nga'ño xi tjín-la 'én ndaà-la Nainá xi kjoa ts'e Cristo

¹⁶ Mikiì masobà-na it'aà ts'e 'én ndaà-la Nainá xi kjoa ts'e Cristo, nga nga'ño-la Nainá-né. Jè 'én xi ma-la síkítsajnandeì xita kjoa ts'e jé, ngats'iì xita xi mokjeiín-la it'aà ts'e, mats'ia-ko-ne jña xi xita judío kò tikoa xi mìtsà xita judío.

¹⁷ Jñà 'én ndaà-la Nainá xi kjoa ts'e Cristo okó-ná kós'ín s'ín Nainá nga síkixi xita. Tà jè-né nga mokjeiín-la it'aà ts'e Cristo mé-ne nga isa ndaà kòkjeiín-la. K'oaá s'ín tíchja Xojon-la Nainá nga tsò: “Jè xi xita kixi, it'aà ts'e kjoa xi mokjeiín-la kíjnakon-ne.”

Jé xi tjín-la xita isò'nde

¹⁸ Nga jè Nainá skanda ján ngajmiì tíhokó kjoajti-la it'aà ts'e xita xi mìkiì beèxkón kò xi ch'o s'ín. Jè kjohítsjeèn ch'o xi tjín-la mì kì tsjá'nde-la nga kjoétjò xi kjoakixi.

¹⁹ Jè kjoa xi 'ya-la it'aà ts'e Nainá, ndaà tíjiin-la jñà xita koi, nga tijè-ne Nainá tíhokó-ne.

²⁰ Nga jñà kjoa ts'e Nainá xi mìkiì tsejèn, ndaà tíyaxkon-la kóni nga tisa kisindaà isò'nde. Yaxkoón-la nga tjín-la nga'ño Nainá nita mé nachrjein-ne nga tà jè tajngoò xi Nainá 'mì. Kjoa koi tí'yaá-la it'aà ts'e tsojmì xi tsibíndaà Nainá. K'oaá ma-ne nga jñà xita mì kì koma kíchako yijo-la nga kitsò: “Mìkiì tíjiin-na tsà tíjna Nainá.”

²¹ Jñà xita nas'ín tíjiin-la nga tjín Nainá xi tsibíndaà isò'nde, tanga mìkiì jeya kisikíjna, nì mìkiì kitsjaà-la kjondaà. Tà saá tà koií 'ño ndaà kisis'in-la kjohítsjeèn xi nímé chjí-la. Kjohítsjeèn tájaà-la kisijñò-la.

²² Xi kjohítsjeèn ts'e, xita chjineé kitsò-la yijo-la; tanga mìtsà kixi kjoa, xita nchikón-né.

²³ Kisikíjnat'aàxìn Nainá xi jeya tíjna xi mìkiì fehet'aà nachrjein-la; tà saá koi kijtseèxkón isén ts'e xita xi fehet'aà nachrjein-la; skanda jñà isén-la cho xi tímajin isén kijtseèxkón, kò isén-la cho xi ñijòn ma ndsokò kò isén-la ye.

²⁴ Koií kjoa-la nga kitsjeiìn takòn Nainá nga taxki kàtas'ín nga kàtas'ín nita mé kjoa chinga xi bitjokàjin inima-la. K'oaá ma-ne nga tsohótsji-la kjoa sobà yijo-la koni s'ín kisiko xíkjin.

²⁵ Kisikjatjiaá-la kjoa kixi-la Nainá; 'én ndiso kiskoé. Jñà kijtseèxkón koa jñà kisitsjako tsojmì xi jè Nainá tsibíndaà. Mìtsà jè kijtseèxkón koa kisitsjako Nainá xi tsibíndaà tsojmì. Nainá kàtayaxkón nita mé nachrjein-ne, k'oas'ín kàtama.

²⁶ Koií kjoa-la nga kitsjeiìn takòn Nainá nga kò s'ín kàtas'ín-kò yijo-la kjoa sobà xi ch'o tjín. Jñà íchjín kisikjatjiaá-la koni s'ín mochjeén x'in; tjín íchjín xi tijñà xíkjin kiskoé-ne.

²⁷ K'oaá tis'in kis'iin íchjá, kitsjeiìn takòn-né koni s'ín mochjeén íchjín. Tjín íchjá xi 'ño kisaseèn-la nga tí x'in xíkjin tsoyjòko-ne. Tsohótsji-la kjoa sobà yijo-la. K'oaá ma-ne nga kjo'in kis'e-la xi tí yijo ts'e-ne koni s'ín ok'in-la kjoa ch'o xi kis'iin.

²⁸ Xita koi, mìkiì kisikítsjeèn tsà mochjeén-né nga skoexkon Nainá; k'oaá ma-ne nga kitsjeiìn takòn Nainá nga kàtasíkjeén kjohítsjeèn-la xi nì méé chjí-la mé-ne nga k'oas'ín kàtas'ín-ne kjoa xi mìkiì ok'in-la.

²⁹ Xita koi, yaá tíjiin yije inima-la ngats'iì kjoa xi ch'o tjín koni: kjoa chingui, kjoa ts'en, kjoa tse mejèn, kjoa toòn, kjoaxitakòn, kjoa nga ma-la sík'en xita, kjoa xi kjaán-kjoò, kjoa konachan, kjoa xi ch'o s'ín, kjoa 'én ndiso;

³⁰ nga chjajno-la xíkjin; nga sjítikeè Nainá; ochrjengui xíkjin; 'nga ikon; ndaà síkijna yijo-la; síkítsjeèn nga mejèn-la isa ch'o tjín kjoa xi s'iin; mìkiì 'nchréñijon-la xita jchínga-la;

³¹ mìkiì machiya-la; mìkiì síkitasòn 'én xi chja; mìkiì beètjò xita xíkjin; tsjin-la kjoa nìchàat'aà; koa tsjin-la kjoahimatakòn.

³² Jñà xita koi, ndaà tíjiin-la nga k'oaá s'ín tsjá okixi Nainá: ngats'iì xi k'oa tjín kjoa xi s'ín, ok'in-la nga kiyá. Tanga mìkiì majngoò ikon nga tà jñà xi k'oas'ín, skanda tíkoáá matsja-la k'e nga k'oa tis'in xita xi kj'eíí.

2

Nainá, mé xi tsjá-la xita xi ndaà s'ín kò xi ch'o s'ín

¹ K'oaá ma-ne, ngaji, nita yá xita-ne ji, nga jé onè-la xinguii, mìkiì koma kosikoii yijo-lè nga nguixkon Nainá. K'e nga jé tibìnè-la xita xinguii, tíkoáá ngaji, tíji tibìnè-la jé yijo-lè nga k'oa tis'in 'nì.

² Tanga 'ya-ná nga kixi s'ín Nainá k'e nga tsjá-la kjo'in jñà xita xi koa tjín jé xi ótsji.

³ Ngaji xi kjo'in bìnè-la xita xi kje'ei, ¿mé-ne koa s'ín nìkítsjeèn-ne nga jchat'aà-lè kjo'in xi tsjá Nainá? Nga ji k'oaá tís'ín 'nì.

⁴ ¿A mì tíjìn-lè nga nachrjekàngui jè kjondaà-la Nainá nga tjín-la kjojetakòn koa tjín-la kjoatsejta? ¿A mì tíjìn-lè nga jè kjondaà-la Nainá tíkoña-né nga s'íkájnoi jé-lè nga mì tí jé k'inchátsji-ne?

⁵ Nga tájaàjìn tjín inìma-lè nga mìkì n'íkájnoi jé-lè, isaá tse kjo'in tìbìnè-la yijo-lè xi tsjá-lè Nainá jè nachrjein k'e nga kjo'íkò kjoajti-la nga jcha-la kós'ín kixi koìndaàjìn Nainá nga tsjá-la kjo'in jña xita.

⁶ Nainá tsjá-la chjí-la mé kjoa xi kis'iìn nga jngoò ijngoò xita.

⁷ Tsjá-la kjoabinachon nita mé nachrjein-ne jña xita xi nchihótsji kjoajeya, ko nchihótsji nga jchaxkón, ko nchihótsji nga kítsajnakon nita mé nachrjein-ne ján ngajmì. Koií kjoa-la nga ndaà tjín kjoa xi nchis'ín nga kjit'aà nachrjein.

⁸ Tanga Nainá nga ko kjoajti-la tsjá-la kjo'in jña xita xi kondra fi-la nga mìkì 'nchréñijon xi kjoa kixi. Tà kjoa nchikón fitjingui-la.

⁹ Tseé kjoa s'e-la ko tseé kjo'in s'e-la ngats'ii xita xi ch'o s'ín, mats'ia'ko ítjòn-ne jña xita judío, tíkoaá ko xi taxkì xita xi mìtsà xita judío.

¹⁰ Tanga jña xita xi ndaà s'ín, tjoé-la kjoajeya, ndaà jchaxkón, tíkoaá s'eé-la kjoa'nchán inìma-la, mats'ia'ko ítjòn-ne jña xita judío, tíkoaá ko xi taxkì xita xi mìtsà xita judío.

¹¹ Nainá mìkì faàjìn nita yá xita-ne, tà ngàsòn fìko yije.

¹² Ngats'ii jña xita xi mìkì tíjìn-la kó tsò kjotíxoma xi kiskì Moisés, k'e nga jé ótsji, chija-né nas'ín mìkì kijtseè kjotíxoma-la Moisés. Koa jña xita xi ndaà tíjìn-la kjotíxoma-la Moisés, k'e nga jé ótsji, k'oaá s'ín kojtsò koni s'ín tíchja xi tíjè-ne kjotíxoma.

¹³ Jña xita xi tà 'nchré-la kjotíxoma xi kiskì Moisés, mìtsà jña xi xita kixi nga nguixkon Nainá. Jña-né xi xita kixi xi síkitasòn.

¹⁴ K'e nga jña xi taxkì xita xi mìkì tíjìn-la kós'ín tíchja kjotíxoma-la Moisés, sà k'oaá tà yaá nchrobájin inìma-la nga k'oas'ín s'ín koni tsò kjotíxoma-la Moisés, yaá 'ya-la nga tíkoá tíjìn inìma-la kjotíxoma xi ts'e nas'ín tsjìn-la ts'e Moisés.

¹⁵ K'e nga ndaà s'ín yaá 'ya-la nga tíjìn inìma-la kjoa xi síjé kjotíxoma-la Moisés; jè inìma-la okó kjoa xi ndaà tjín ko xi mìkì ndaà tjín; tíjè-ne kjohítsjeèn-la sà k'oaá óngui ko sà k'oaá osìko.

¹⁶ K'oaá s'ín koma jè nachrjein k'e nga Nainá koìndaàjìn ngats'ii jé xi tíj'ma-la xita ijìn inìma-la; it'aà ts'e Jesucristo s'indaàjìn, koni tsò 'én ndaà-la Nainá xi kjoa ts'e Cristo xi 'an chjàya.

¹⁷ Ngaji xi xita judío 'mì-lè; jè ma'ñót'aà takoìn kjotíxoma xi kiskì Moisés; 'ngaá ma takoìn it'aà ts'e Nainá nga si tsiji-né;

¹⁸ 'ya-né mé xi mejèn-la Nainá nga s'ikitasòin; ma-lè chjaàjìn mé kjoa xi ngui ndaà tjín koni s'ín okóya-lè Kjo'íxoma;

¹⁹ k'oaá s'ín n'íkítsjìn nga tíjngoò takoìn nga ji okoò-la ndiyá kixi xita xi mìkì machiya-la nga tíchjoà xkon ko k'oaá ma-lè nga ji n'ihiseèn-la xi tíjñò kjohítsjeèn-la.

²⁰ Ji, k'oaá s'ín n'íkítsjìn nga ma-lè okoòya-la xi taxkì xita xi tsjìn-la kjohítsjeèn; nga maestro 'mì-lè ts'e xita xi chiba ma-la it'aà ts'e Nainá; nga tjín-lè kjoa chjine ko kjoa kixi xi okó-lè it'aà ts'e Kjo'íxoma.

²¹ Ji xi ma-lè okoòya-la xita xi kje'ei, ¿mé-ne mìkì okoòya-la xi tí yijo tsiji-ne? Ji k'oaá s'ín nokjoàyi nga mìkì ma s'ichijé; ji, ¿mé-ne n'ichijé-ne?

²² Ji, k'oaá si nga mìkì ndaà tjín nga kjoa chijngui s'iin xita; ji, ¿mé-ne nga k'oa tís'ín 'nè-ne? Ji, k'oaá si nga jtichì xkósòn; ¿mé-ne nga ingo bitjaàs'en-ne nga n'ichijí tsojmì-la xkósòn?

²³ Ji, 'ngaá takoìn nga ndaà tíjìn-lè kjoa ts'e kjotíxoma tanga, ¿a mìtsà t'nachrjekàngui Nainá nga mìkì n'ikitasòn-la koni s'ín tíchja kjotíxoma?

²⁴ K'oaá s'ín tíchja Xojon-la Nainá nga tsò: “Kjoa tsajòn-nò xi xita judío 'mì-nò nga chjajno-la Nainá jña xi taxki xita.”

²⁵ Tsà ndaà sikitasòin kjotixoma xi kiskii Moisés, jè kjoa ts'e circuncisión nga tjít'aà chiba-lè, chjí-la-né; tanga tsà mikii sikitasòin, k'oaá ngaya-la koni tsà mikii tjít'aà chiba-lè.

²⁶ Jña xi mìtsà xita judío, nas'ín mikii tjít'aà chiba-la koni xita judío, tanga tsà kixi sikitasòin kjotixoma ts'e Moisés, Nainá skoétjò-né koni tsà tjít'aà chiba-la.

²⁷ Jña xita xi síkitasòn kjotixoma ts'e Moisés, nas'ín mikii tjít'aà chiba-la yijo-la, jña kojindaajiin-nò nga mikii nikitason nas'ín tjít'aà chiba-nò, nas'ín tjín-nò xojon ts'e kjotixoma-la Nainá.

²⁸ Jngoò xi xita judío, mìtsà tà jè nga ndaà 'ya-la kjoa xi s'ín; koa jngoò xita xi tjít'aà chiba-la kjoa ts'e circuncisión, mìtsà tà jè xi mochjeén nga tjít'aà chiba-la isò'nga yijo-la.

²⁹ Jè xi ngui xita judío, jè xi chjí-la koni s'ín tjín jjiin inima-la. Ko jè xi ngui tjít'aà chiba-la, jè xi chjí-la koni s'ín tjít'aà chiba-la ya jjiin inima-la. Kjoa koi, mìtsà ts'e kjotixoma xi xojon tjít'aà; ts'eé Inima Tsjeè-la Nainá. Jña xi k'oas'ín síkitasòn, Nainá ndaà chja xi it'aà ts'e, nas'ín mikii ndaà chja xita xi kj'eí.

3

Mé kjoa xi 'ñó chjí-la it'aà ts'e xita judío

¹ Tsà k'oaá s'ín tjín, ¿mé kjondaà xi isa tse tjín-la nga xita judío 'mì? Ko ¿mé chjí-la nga tjít'aà chiba-la?

² Kjìn skoya chjí-la. Jè xi tíjna ítjòn, jè-né nga jña xita judío kjòngatsja 'én-la Nainá.

³ Jña xita judío, nas'ín tjín i'nga xi mikii síkitasòn 'én xi kjòngatsja, ¿a koma sikjatjìya-la kjoakixi-la Nainá nga mikii kítasòn koni s'ín kitsjaà tso'ba?

⁴ Majìn, mikii koma. Nainá, xita kixi-né, nas'ín xita ndiso ngats'ì xita xi tjín isò'nde; koni s'ín tíchja xojon nga tsò:

Mé-ne nga kàta'ya-la nga kixi kjoa 'én xi nokjoi sikijne-né k'e nga yá xi kohòngui-lè.

⁵ Tjín i'nga xita xi tsò: K'e nga ch'o 'nè, isaá ndaà 'ya-la kjoakixi-la Nainá. Tsà k'oas'ín tjín, ¿kó kixoán? ¿A kixón-ná nga mì kjoa kixi tís'ín Nainá nga kjo'in tsjá-ná? (Tsà kos'ín kixoán, jngoò kjohítsjeèn-la xi taxki xita titsanìkjeén.)

⁶ Tanga majìn, mì k'oaá s'ín tjín. Tsà mìtsà kixi s'ín Nainá nga kjo'in tsjá-ná, ¿kós'ín koma kojindaajiin-la xita isò'nde?

⁷ Tikoáá tsà k'oa kító xita koi: “Tanga tsà kjoandiso-na okó nga jè kjoa kixi-la Nainá isa jeya kína, ¿mé-ne k'oas'ín tísine-na nga xita jé tíyatakòn-na?”

⁸ Tikoáá-ne ch'o s'eén mé-ne nga kátasakó-isa-ná kjondaà-la Nainá. Tjín xita xi kotsò nga k'oaá tjín 'én xi okoòya; jè xi mejèn-la nga ch'o síkíjna-na. Jña xita xi kotsò, ok'ín-la nga tjoé-la kjo'in xi Nainá tsjá.

Mé jé xi tjín-la ngats'ì xita

⁹ ¿Kó s'ín nìkítseèn? Jña xi xita judío 'mì-ná, ¿a isaá ndaà xitaá koni jña xita xi kj'eí? Majìn, jyeé k'oaá kixan-nò, tà ngàsòn jé titsajnajñaá ngats'iaá xi xita judío 'mì-ná ko xi taxki xita.

¹⁰ Konì s'ín tíchja Xojon-la Nainá nga tsò: Nijngoò xita tjín xi xita kixi, ni tsà tà jngoò.

¹¹ Nijngoò tjín xi machiya-la, nijngoò tjín xi ótsji Nainá.

¹² Ngats'ì xita, saá xìn ndiyá kii; ngats'ì nímée chjí-la kjoa xi s'ín; nijngoò xi ndaà s'ín, ni tsà tà jngoò.

¹³ Naxájta-la, k'oaá kjoàn koni ngajo-la mik'en k'e nga táx'ajto;

nijen-la nguì 'én ndisoó chja;

'én xi chja, k'oaá ngaya-la koni tsà xán-la ye.

14 Chjajno-la xita ko nguì koi 'én chja xi 'on ma-la inima-ná.

15 Mìkìi koña kjoa, nitoón sík'en xita.

16 Nita ñánda nga fi, síhima ko síkjesko xita xi kj'eíí.

17 Mìkìi beèxkon ndiyá ñánda tjin kjoa'nchán.

18 Mìkìi tsakjón-keè Nainá it'aà ts'e kjoa xi s'in.

19 Jyee 'yaá nga ngats'ii 'én xi tjit'aà kjotixoma ts'e Moisés, jña chja-la ngats'ii xita xi ya fit'aà-la, mé-ne nga ngats'ii xita, mìkìi koma kichja nga kinchako yijo-la nga nguixkon Nainá; ngats'ii xita xi tjin isò'nde koindaajin-la Nainá nga jcha-la nga jé tjin-la.

20 Nijngòò xita xi kixi kjna nga nguixkon Nainá tà koi kjoa-la nga ndaà tísíkitasòn Kjotixoma ts'e Moisés. Nga jè Kjotixoma, tà k'oaá s'in mochjeén nga benojmíya-ná nga jé tjin-ná.

Kó síko-ná Nainá nga kixi kitsajnaá nguixkon jè

21 Tanga i'ndeí, Nainá okó-ná kós'in s'in Nainá nga xita kixi beètakòn-ná. Ko mìtsà kjoa ts'e Kjotixoma nga bitasòn. Jña xojon jchinga ts'e kjotixoma-la Nainá ko ts'e xita xi kiichja ngajo-la Nainá k'oaá tis'in benojmíya-ná,

22 nga jña xita k'e nga mokjeiin-la it'aà ts'e Cristo, kixi bitsajna nguixkon Nainá. K'oaá s'in síko yije kóhótjin xi mokjeiin-la. Nga ngats'ii xita ngásòn jé tjin-la,

23 nga ngásòn ótsji jé-né; kjiin títsajnat'aaxin-la Nainá ñánda nga jeya tjina.

24 Tanga Nainá, nga ndaà xita, kitsjaà kjotjò-ná kjondaà-la mé-ne nga kixi kitsajnaá nguixkon jè. Jè Jesucristo tsibíhítjì ngajo-ná jé-ná mé-ne nga kitsajnandeíí-ná xi kjoa ts'e jé.

25 Nainá kitsjaà ki'ndi-la koni jngòò kjotjò xi faaxin jé-ná nga nguixkon Nainá k'e nga mokjeiin-ná it'aà ts'e Jesucristo, nga jè tsibíxteèn jni-la k'e nga k'en. Nainá k'oaá s'in okóya-ná kós'in tjin kjoakixi-la. Koi kjoa-la nga ngasa kjotseé, Nainá, tíkoña kjoa-né, mìkìi niton kitsjaà-la kjo'in xita koni s'in ok'in-la jé xi tsohótsji.

26 Tanga i'ndeí tí'ya-la nga it'aà ts'e Jesucristo tísindaajin-la xita jña kjoa-la jé xi kisichroba mé-ne nga kàta'ya-la Nainá nga xita kixi-né ko tikoáá tijè-ne Nainá xi kixi síkítsajna xita xi mokjeiin-la it'aà ts'e Jesús.

27 ¿A 'ngaá koma takoán nga kixi títsajnaá nguixkon Nainá? Majin, mìkìi 'nga koma takoán. Nga mìtsà koi kjoa-la nga kjotixoma níkitasoán. Jè-né nga mokjeiin-ná it'aà ts'e Jesús nga kixi síkítsajna-ná Nainá.

28 K'oaá tsòya-ne ngats'ii kjoa koi nga Nainá síkixi xita k'e nga mokjeiin-la it'aà ts'e Jesús; mìtsà koi nga kjotixoma ts'e Moisés síkitasòn.

29 ¿A tà ts'eé xi xita judío Nainá? ¿A mìtsà tikoá ts'e xi taxki xita? Kjoa kixi-né, tikoáá ts'e-né xi taxki xita xi mìtsà xita judío.

30 Nainá, tà jngòò ma xi kixi síkítsajna ngats'ii xita k'e nga mokjeiin-la it'aà ts'e Jesús. Ngásòn síko jña xita judío xi tjit'aà chiba-la ko xi taxki xita xi mìkìi tjit'aà chiba-la.

31 Jè kjoa nga mokjeiin-ná it'aà ts'e Jesucristo, ¿a tíchahingui-né kjoa ts'e Kjotixoma? Majin, mìtsà tíchahingui; tà saá tímajngòò-ne koni jè xá xi tjin-la.

4

Abraham, mé-ne kixi tsibijna-ne nga nguixkon Nainá

1 ¿Kó kixoán? ¿Mé kjoa kixi xi kisakò-la na'èn-jchá-kjiin-ná Abraham nga kixi tsibijna nguixkon Nainá?

2 Na'èn-jchá-ná Abraham, tsà koií-la kjoa-la nga ndaà xá xi kis'iin nga kixi tsibijna nguixkon Nainá, ok'in-la nga jeya síkíjna yijo-la, tanga majin nga nguixkon Nainá.

³ Nga k'oaá s'ín tíchja Xojon jchínga-la Nainá nga tsò: “Abraham, jè-né nga kòkjeiín-la ìt'aà ts'e Nainá; k'oaá ma-ne nga kiskoétjò Nainá nga xita kixi kitsò-la.”

⁴ Jngoò xita xi síxá, jè ton xi tjoé-la, mìtsà tà kjotjò tjoé-la; jè chjí-la nga síxá.

⁵ Tanga jè xita xi mìtsà xá-la ma'ñót'aà takòn, tanga mokjeiín-la ìt'aà ts'e Nainá xi kixi síkítsajna xita xi jé tjín-la, xita jè, Nainá k'oaá s'ín skoétjò nga xita kixi tsò-la.

⁶ Jè xitaxá ítjòn xi ki'mì David k'oaá tís'ín kiìchja nga tsja s'e-la xita xi Nainá kjoétjò nga xita kixi tsò-la; Nainá mì tì kindá s'ín-ne nita mé xi s'ín.

⁷ David kitsò:

Mé tà ndaà-la jña xita xi jye kichàat'aà-la kjoa ch'o-la

ko xi jye tíjtsa'ma jé-la.

⁸ Mé ta ndaà-la jña xita xi mì tì kindá s'ín-ne Nainá kjoa ts'e jé-la.

⁹ Jè kjondaà jè, ¿a tà ts'eé xita judío xi tít'aà chiba-la? ¿A xi tikoáá ts'e-né xi taxki xita xi mìkì tít'aà chiba-la? Jye okixan nga jè xita jchínga Abraham, k'e nga kòkjeiín-la ìt'aà ts'e Nainá, kiskoétjò-né nga xita kixi kitsò-la.

¹⁰ ¿Kós'ín komà nga kiskoétjò Nainá Abraham nga xita kixi kitsò-la? ¿A k'e-né nga jye tít'aà chiba-la? ¿A xi k'e-né nga tikj'eè tít'aà chiba-la? Majìn, k'e-né nga tikj'eè tít'aà chiba-la.

¹¹ Abraham, k'e nga jye kiskoétjò Nainá nga xita kixi kitsò-la, iskaán kisit'aà chiba-la koni jngoò chiba xi okó nga jye xita kixi nga kòkjeiín-la ìt'aà ts'e Nainá k'e nga tikj'eè tít'aà chiba-la. K'oaá komà-ne nga xita jchínga kitsò-la Abraham ngats'ìi xita xi mokjeiín-la ìt'aà ts'e Nainá nas'ín mìkì tít'aà chiba-la.

¹² Abraham, tikoáá xita jchínga-la-né jña xita judío xi tít'aà chiba-la, tanga mìtsà tà koiì kjoa-la nga tít'aà chiba-la, tikoáá koi-né nga ya tímatjìngui-la nga mokjeiín-la ìt'aà ts'e Nainá, koni s'ín kòkjeiín-la Abraham k'e nga tikj'eè tít'aà chiba-la.

¹³ Nainá, k'oaá s'ín kitsjaà-la tso'ba Abraham ko ngats'ìi xita tje-la, nga jè kongatsja isò'nde; mìtsà koi kjoa-la nga Kjotíxoma kisikitasòn, jè-né nga kòkjeiín-la koni s'ín kiìchja Nainá, k'oaá ma-ne nga xita kixi kitsò-la.

¹⁴ Tsà tà jña tjoé-la kjondaà xita xi síkitasòn Kjotíxoma, tsà k'oaá s'ín tjín kjoa, nímé-là chjí-la nga mokjeiín-ná ìt'aà ts'e Nainá; tikoáá mì-là kii kítasòn koni s'ín kitsjaà tso'ba Nainá.

¹⁵ K'e nga tjín Kjotíxoma, kjo'íin sinè-ná; tanga tsà tsjìn kjotíxoma, nímé tjín xi kotonè-la kjotíxoma.

¹⁶ Jña xita, nga mokjeiín-la ìt'aà ts'e Nainá tjoé-la kjondaà koni s'ín kitsjaà-la tso'ba Nainá jè Abram. Nainá tsjá kjotjò kjondaà koi mé-ne nga jcha-ná nga kixi kjoa nga kítasòn ìt'aà ts'e ngats'ìi tje-la Abraham. Mìtsà tà jña tjoé-la xita judío xi tje-la Abraham nga tjín-la kjotíxoma; tikoáá tjoé-la jña xita xi mìtsà xita judío xi tikoáá tje-la Abraham ma koiì kjoa-la nga mokjeiín-la koni s'ín kòkjeiín-la Abraham. K'oaá ma-ne nga jè Abraham, xita jchínga-ná ma ngats'iaá

¹⁷ nga nguixkon Nainá. Koni s'ín tíchja Xojon-la Nainá nga tsò: “Kjìn naxandá xita xi jye kisingatsja-lè xi xita jchínga tsò-lè.” Abraham, kòkjeiín-la ìt'aà ts'e Nainá xi ma-la síkjaáya-la xita xi jye k'en xi tikoá tsjá 'én-la koni tsà jye tsitasòn kjoa xi kj'eè bitasòn.

¹⁸ Xita jchínga Abraham kòkjeiín-la koni kitsò-la Nainá; kiskoña kjoa-né nas'ín mìkì tjìin-la kós'ín koma nga kítasòn. K'oaá s'ín komà nga kjìn naxandá xi xita jchínga tsò-la, koni s'ín kitsjaà-la tso'ba Nainá nga kitsò-la: “K'oaá s'ín kjìn jchán koma tje-lè.”

¹⁹ Abraham, mìkì kjòhindaà koni s'ín kòkjeiín-la ìt'aà ts'e Nainá, nas'ín kos'ín beè-la ikon nga mì tì mé chjí-la yijo-la nga jye 'ño xita jchínga; jyeé kjomeè jngoò sìndò nó tjín-la; Sara xi chjoón-la, tikoáá chjoón 'ndì-né; mì tì kii koma s'e-la ìxti.

²⁰ Abraham, mìtsà jò tsi'beé-la ikon koni s'ín mokjeiín-la 'én xi kitsjaà-la Nainá. Tà isaá 'ño tsi'beé-la ikon nga ndaà kòkjeiín-la. 'Ñó jeya kisikíjna Nainá.

²¹ Abraham, nguì ndaà tíjngòò ikon nga Nainá tjin-la nga'ño nga komaá-la sikkitasòn yije kóhotjín kjoa koni s'ín kitsjaà-la tso'ba.

²² K'oaá ma-ne Nainá, k'e nga kijtseè nga ndaà mokjeiin-la Abraham, kiskoétjò nga xita kixi kitsò-la.

²³ Mìtsà tà it'aà ts'e Abraham kitjei xojon jè nga Nainá kiskoétjò nga xita kixi tsò-la.

²⁴ Tikoá it'aà tsaján kitjei nga Nainá skoétjò-ná nga ngàsòn xita kixi kitsò-ná koi kjoa-la nga mokjeiin-ná it'aà ts'e Nainá, jè xi kisikjaáya-la Na'èn-ná Jesucristo it'aà ts'e kjoabiyaá.

²⁵ Kjòngatsja xita nga kisik'en Jesús jè ngatji-la jé-ná; tikoá jaáya-la mé-ne nga kixi kitsajnaá nguixkon Nainá.

5

Mé kjondaà xi sakó-ná nga jye xita kixi tsò-ná Nainá

¹ K'e nga jye xita kixi 'mì-ná nga mokjeiin-ná it'aà ts'e Nainá, jyeé 'nchán titsajnaoá Nainá it'aà ts'e Na'èn-ná Jesucristo.

² Jè Cristo tsjá-ná nga s'e-ná kjondaà jè, nga mokjeiin-ná it'aà ts'e. Jè kjondaà jè, 'ño ndaà tíjìn inima-ná; matsjaá-la inima-ná nga chiña kjoá nga tikoá s'e-ná kjoajeya-la Nainá.

³ Mìtsà tà koi kjoa nga matsja-ná, tikoá matsja-ná k'e nga mé kjo'in xi otojñaá. K'e nga kjo'in otojñaá, yaá sakó-ná nga'ño nga tseejta s'eén inima-ná.

⁴ K'e nga tseejta s'eén inima-ná, yaá sakó-ná nga ndaà kitjoá; tsà nga ndaà kitjoá, tikoá yaá sakó-ná nga skóna kjoa inima-ná kjondaà xi tsjá Nainá.

⁵ Jè kjoa xi chiña-lá nga tíjngòò takoán, mìkì masobà-ná nga mìkì kitasòn; jè Nainá jyeé ndaà kisikijnajìn inima-ná kjotjòcha-la it'aà ts'e Inima Tsjeè-la Nainá xi kitsjaà-ná.

⁶ K'e nga kichóya nachrjein, Cristo, k'en ngajo-ná jña xi xita jé 'mì-ná, koi kjoa-la nga tsjìn-ná nga'ño nga ma bitjokajñaá jé-ná.

⁷ Mì-là yá xita tjin xi kiyátjì ngajo-la jngòò xita kixi, tanga tsà koi nachrjein-la tsà tjin jngòò xi kò'ño ikon nga kiyátjì ngajo-la jngòò xi 'ño ndaà xita.

⁸ Tanga jè Nainá okó-ná nga 'ño tsjakeè-ná nga jè Cristo k'en ngajo-ná, k'e nga tákó xita jé 'mì-ná.

⁹ I'ndeì nga jye xita kixi tsò-ná Nainá nga jè Cristo tsibíxteèn jní-la k'e nga k'en ngajo-ná, isaá 'ño tikixi kjoa nga it'aà ts'e Cristo kitjokajñaá kjo'in jè nachrjein k'e nga sikkasén kjoiti-la Nainá.

¹⁰ K'e nga kondra titsajna-lá Nainá, jè Ki'ndí-la kisikijne 'nchán kjoa k'e nga k'en. I'ndeì, k'e nga jye ndaà chibà-ná, isaá 'ño tjikixi kjoa nga kitjokajñaá kjo'in it'aà ts'e Cristo nga jè tijnakon-né.

¹¹ Mìtsà tà jña kjoa koi, tikoá 'ño matsja-ná it'aà ts'e Nainá koni s'ín kisikò-ná it'aà ts'e Na'èn-ná Jesucristo nga it'aà ts'e Cristo 'nchán titsajnaoá Nainá nga jye kichibàndaà-aná.

¹² K'e nga jahas'en jé isò'nde, jngòò xita xi ki'mì Adán tsohótsji jé, ikjoàn k'en; k'oaá s'ín komà nga kjòts'ia nga biyaá yije kóhotjín xita, koi kjoa-la nga jé ótsji yije kóhotjín.

¹³ K'e nga tikj'eè tjoé-la Kjotíxoma Moisés, xita xi tjin isò'nde jyeé tjin yije-la jé. Tanga mìkì ma kindá jé-la k'e nga tsjìn kjotíxoma.

¹⁴ Tjen-ne nachrjein ts'e Adán skanda ts'e Moisés, tjinè-la nga kiyá yije xita kóhotjín nas'ín mì k'oaá tjin jé xi tsohótsji koni kis'iin Adán nga kisikatonè-la okixi xi kitsjaà-la Nainá. Adán, jè ngaya-la [Cristo] xi iskan j'i.

¹⁵ Tanga jé xi tsohótsji Adán, mìkì mangàsòn koni jè kjondaà xi Nainá tsjá; nga tà jè ngatji-la jé xi tsohótsji xi tà jngòò xita, k'oaá ma-ne nga kjìn xita biyaá; tanga isaá 'ño tse kjondaà tjin-la Nainá nga kjìn xita machikon-t'in kjotjò xi tsjá Nainá it'aà ts'e xi tà jngòò xita xi 'mì Jesucristo.

¹⁶ Jé xi tsohótsji xi tà jngoò x̄ita, mìkì mangásòn koni jè kjondaà xi Nainá tsjá. K'e nga kisakò jé ítjòn, Nainá kitsjaà okixi nga tsibínè-là kjo'in ngats'ì x̄ita. Tanga k'e nga jye kjìn jé tsohótsji x̄ita, j'ì kjondaà-là Nainá nga kixi kítsajna x̄ita nguixkon Nainá.

¹⁷ Jè ngatjì-là jé-là xi tà jngoò x̄ita, tjínè-là nga kiyá x̄ita. Tanga j'ndeì, isáá 'ñó tjíkixi kjoa nga ít'aà ts'e xi tà jngoò x̄ita xi 'mì Jesucristo, tjí'nde-là nga jeya kítsajnakon jñà x̄ita xi 'ñó tse kjondaà-là Nainá kjoé, kò xi 'ñó tse kjotjò tjoé-là nga kixi kítsajna nguixkon Nainá.

¹⁸ Jè kjoa-là jé xi tsohótsji xi tà jngoò x̄ita kisinè-là kjo'in ngats'ì x̄ita, tanga jè kjoa kixi xi kis'ìn Jesucristo tikoá kixi kisikítsajna ngats'ì x̄ita nga kítsajnakon nguixkon Nainá.

¹⁹ Jè kjoa-là nga mìkì ki' nchréñijon-là Nainá xi tà jngoò x̄ita xi 'mì Adán, k'oaá ma-ne nga kjìn x̄ita kisakò jé-là. Tanga jè kjoa-là nga ki' nchréñijon-là Nainá xi tà jngoò x̄ita xi 'mì Jesucristo, kjìn x̄ita xi kixi kítsajna nga nguixkon Nainá.

²⁰ J'ì Kjotíxoma-là Moisés mé-ne nga ndaà ki'ya-là nga isá 'ñó isá 'ñó tís'e jé; tanga k'e nga isá tse jé tísakó, isáá 'ñó tse kjondaà-là Nainá j'ì.

²¹ Nga sa ítjòn, jè kjoa ts'e jé tsatíxoma-là x̄ita, mé-ne nga kisakò-là kjoabiyá x̄ita; tanga j'ndeì, k'oaá tís'ìn kàtatíxoma kjondaà-là Nainá k'e nga kixi síkítsajna x̄ita nga nguixkon Nainá mé-ne nga s'e-là kjoabinachon nita mé nachrjein-ne xi ít'aà ts'e Na'èn-ná Jesucristo.

6

Mé-ne nga jè kjoa ts'e jé, mì tì mé nga'ñó tjín-là nga jè kotíxoma-ná

¹ ¿Kó kixoán? ¿A ndaà tjín nga kinchátsji-jé-isa mé-ne nga isá tse kjondaà tsjá-ne Nainá?

² Majìn, mì ki' k'oa s'en-ná. Jyeé titsajnat'aàxìn-là kjoa ts'e jé koni tsà jye k'eén xi ít'aà ts'e; mì tì ki' koma ya kítsajnajìn-isa kjoa ts'e jé.

³ ¿A mìtsà jye tjììn-nò k'e nga komà bautizar ít'aà ts'e Cristo ngats'iaá nga tikoá ya titsakjoðkoaá k'e nga k'en?

⁴ K'e nga ma bautizar x̄ita, k'oaá s'ìn ngaya-là koni tsà ya sihiììn-t'aà-là Cristo k'e nga k'en. Koni s'ìn jaáya-là Cristo ít'aà ts'e nga'ñó-là Nainá xi 'ñó jeya tjina, k'oaá tís'ìn mochjeén nga kòs'ìn sijchá yijo-ná nga kijnakon xitse òjngoò k'aá.

⁵ Koni s'ìn titsakjoðkoaá Cristo k'e nga k'en, jñá k'oaá tís'ìn kjoáya-ná koni s'ìn jaáya-là jè.

⁶ Tjììn-ná nga jè kjoa jchínga-ná koni s'ìn ki'né nga isá kjòtseé, yaá kisit'aà krò-là Cristo mé-ne nga kàtachija-ne nga'ñó-là yijo jé-ná nga mì tì jé kjotíxoma-isa-ná.

⁷ Jngoò x̄ita xi jye k'en, jyeé tjíndeì kjoa ts'e jé.

⁸ Nga ya k'en-koaá Cristo, mokjeììn-ná nga tikoá ya kítsajna kjoa.

⁹ 'Ya-ná k'e nga jaáya-là Cristo k'e nga k'en, nì tì jngoò nachrjein kiyá òjngoò k'a-ne. Mì tì mé nga'ñó tjín-là kjoabiyá nga jè kotíxoma-là.

¹⁰ K'e nga k'en Cristo, jngoò k'a k'en xi kjoa ts'e jé-ná; j'ndeì nga òjngoò k'a tjínakon-né koi' kjoa tjínakon-ne nga jeya síkijna Nainá.

¹¹ Jñò, k'oaá tís'ìn tikítsjeèn koni tsà jye k'eén xi kjoa ts'e jé; titsajnakon-nò xi kjoa ts'e Nainá nga ya titsajna kjoa Na'èn-ná Jesucristo.

¹² Koi' kjoa-là, mì tì ki' bì'nde-là yijo jé-nò nga jè kjoa ts'e jé kotíxoma-nò k'e nga kjo'ñó s'ìn-nò nga nikitasòn-là kjoa xi ch'o tjín xi síjé yijo-nò.

¹³ Ki' ya òngatsja yijo-nò kjoa ts'e jé nga jé jé síkjeén nga ch'o 'nè, ta saá jé Nainá òngatsja yijo-nò koni jngoò x̄ita xi jye jaáya-là ít'aà ts'e kjoabiyá. Nainá òngatsja yijo-nò nga kàtasíkjeén kjoa xi kixi tjín.

¹⁴ Kjoa ts'e jé, mì tì mé nga'ñó tjín-là nga jè kotíxoma-nò nga mìtsà kjoa ts'e kjotíxoma-là Moisés titsajnajñò; kjondaà-là Nainá titsajnajñò.

¹⁵ ¿Kó bixoán? ¿A ndaà tjín nga kinchátsji jé isá nga kjondaà-là Nainá titsajnajñaá nga mìtsà kjoa ts'e kjotíxoma titsajnajñaá? Majìn, mìkì ndaà tjín.

16 Ndaà tjiin-nò tsà ya s̄ingatsja yijo-nò ts'e x̄ita xi bítj̄e ch̄i'nda nga jè n̄ikitasòn-là, ch̄i'nda-là komaà ts'e x̄ita jè. Kjo'ño t̄j̄in-ne nga jè s̄ikitasòn-là. K'oaá s'ín t̄j̄in, tsà ch̄i'nda-là jè komaà nga jè s̄ikitasòn-là, kiyá-nò; tanga tsà ch̄i'nda-là Nainá komaà nga jè s̄ikitasòn-là, kixií k̄itsajnaà nguixk̄on jè.

17 J̄nò, nga ìsa kjòtseé, k'oaá s'ín kin̄ikitasòn-là kjoa ts'e jé koni tsà jngoò ch̄i'nda, tanga i'ndeij, ndaà ch̄j̄i-là Nainá nga k̄o in̄ima-nò ndaà n̄ikitasòn koni s'ín nguì ndaà t̄j̄in 'én kixi xi kis'enojmi-nò.

18 I'ndeij jyeé titsajnadeií-là kjoa ts'e jé; ch̄i'nda ts'e kjoakixi-nò; t̄j̄inè-nò nga s̄ikitasòn koni s'ín s̄ijé kjoakixi.

19 Koi 'én t̄ichj̄ak̄o-nò xi m̄itsà 'in ch̄ja koií kjoa-là nga indaà t̄j̄in takòn; mikiì ndaà machīya-nò kjoa ts'e Nainá. Koni s'ín ki'nè nga ìsa kjòtseé nga ya kin̄ingatsja yijo-nò it'aà ts'e ngats'ìi kjoach'o xi t̄j̄in nga jè tsatixoma-nò koni x̄ita ch̄i'nda; i'ndeij k'oaá t̄is'ín t̄ingatsja yijo-nò it'aà ts'e kjoa kixi mé-ne jè kjoa kixi k̄atatixoma-nò koni ch̄i'nda xi tsjeé titsajna nga nguixk̄on Nainá.

20 K'e nga kjoa ts'e ch̄i'nda-là jè titsajnaj̄noò, mikiì titsan̄ikitasòn-là kjoakixi-là Nainá.

21 Tanga, ¿mé xi kisakò-nò kjoa ts'e jé? I'ndeij tà masobà-nò kjoa koi; tà yaá fik̄o-ná ñánda t̄j̄in kjoabiyaà.

22 I'ndeij nga jye titsajnadeií-là xi kjoa ts'e jé, ch̄i'nda-là Nainá ma; kjondaà xi sakó-nò jè-né nga tsjeé titsajnaà nga nguixk̄on Nainá. Xi fehet'aà-ne, s'e-nò kjoabinachon n̄ita mé nachrjein-ne.

23 Ch̄j̄i xi t̄j̄in-là kjoa ts'e jé, kjoabiyaà-né. Tanga kjotjò xi tsj̄a Nainá, kjoabinachon-né n̄ita mé nachrjein-ne nga ya titsajnaoáá Cristo Jesús xi Na'èn-ná ma.

7

Kó s'ín ma fehet'aà nga'ño-la jè kjotixoma

1 J̄nò, xi 'ndseé chibà, t̄ichj̄ak̄o-nò xi jyeé t̄j̄iin-nò kós'ín t̄ichj̄a kjotixoma; 'ya-nò nga t̄j̄in-la nga'ño jè kjotixoma kós'ín otixoma-là x̄ita k'e nga t̄itsajnakon-ìsa skanda k'e nga kiyá.

2 K'oaá ngaya-là jngoò chjoón xi t̄j̄in-là x'in, k'oaá tsò kjotixoma nga mikiì koma tsj̄in x̄ikj̄in k'e nga tákó t̄itsajnakon ingajò. Tanga tsà jè x'in kiyá, jè chjoón, jye t̄j̄inadeií it'aà ts'e kjotixoma xi ts'e kjoabixan.

3 Jè chjoón, k'e nga tsà tákó t̄j̄inakon x'in-là, tsà kj'eíi x'in kixan-ko, kjoa chijnguií t̄is'ín; tanga tsà jye k'en x'in-là, jè chjoón, jyeé t̄j̄inadeií xi kjoa ts'e kjotixoma jè; komaá kixan-ko ìjngoò k'a-ne xi kj'eíi x'in. Mì t̄i kjoa chijnguií t̄is'ín-ne.

4 J̄nò ndí 'ndsè, k'e nga k'en-kjoòkòò Cristo, yaá k'en it'aà ts'e nga'ño-la kjotixoma, mé-ne nga ya kinójoa-nò it'aà ts'e Cristo xi jye jaáya-là ts'e kjoabiyaà nga k'oas'ín kàta'ya-là it'aà tsaján jè kjondaà xi sasén-là Nainá.

5 K'e nga t̄isa ya tjaàj̄naá kjoa xi t̄j̄in isò'nde, jè kjotixoma tsibít'in-ná mé-ne nga j̄nà kjoa ch'o xi s̄ijé yijo-ná, ìsa 'ño ch'o kisixaj̄iin yijo-ná; k'oaá komà-ne nga kisakò-ná kjoabiyaà.

6 Tanga i'ndeij jyeé titsajnadeií-là kjoa ts'e kjotixoma. Jyeé k'eén it'aà ts'e kjoa xi bít'aà'ño-ná, mé-ne nga koma s̄ixá-lá Nainá xi kjoa x̄itse koni s'ín okóya-ná In̄ima Tsjeè-là Nainá. M̄itsà k'oas'ín s̄ixá-lá koni s'ín t̄j̄in kjoa jchínga xi t̄j̄it'aà xojon.

7 ¿Kó kixoán xi kjoa ts'e kjotixoma? ¿A ch'o t̄j̄in? ¿A kjoa ts'e jé-né? Maj̄in, ndaà t̄j̄in. Tanga 'an, tsà mikiì k̄jtseèxkoan kjoa ts'e kjotixoma, t̄ikoáá mì-là kiì k̄jtseè kjoa ts'e jé. Mì-là kiì kisij̄iin-na nga mikiì ndaà t̄j̄in nga 'an fahaj̄iin-na tsojmì xi m̄itsà ts'an, tsà jè kjotixoma mì k'oaá s'ín bénojmi nga tsò: “Kì j̄i n̄ikjaàj̄iin tsojmì xi m̄itsà tsiji.”

8 Kjoa ts'e jé, yaá kisakò-la nga'ño it'aà ts'e kjotixoma; k'oaá komà-ne nga ìsa 'ño jahaj̄iin-na tsojmì xi m̄itsà ts'an. Tanga tsà tsj̄in kjotixoma, tsj̄in-là nga'ño kjoa ts'e jé.

9 K'e nga s̄a kjòtseé, kj'eè kiì bexkoan kjotixoma. Tanga k'e nga k̄jtseèxkoan kjotixoma, kjoa ts'e jé, ìsaá ndaà kis'e-là nga'ño; kjoabiyaà kisakò-na.

¹⁰ Kjoa ts'e kjotíxoma, tjinè-la nga kjoabinachon tsjá-na, tanga tà saá kjoa biyaà kitsjaà-na.

¹¹ Kjoa ts'e jé, yaá kiskò-la nga'ño it'aà ts'e kjotíxoma nga kiskoònachan-na, k'oa kisik'en-na.

¹² K'oa s'ín tjin nga jé Kjotíxoma, tsjeè-né; koni s'ín otíxoma jña 'én xi tjit'aà, tsjeè-né, kixi-né, koa ndaà-né.

¹³ ¿Kó bixón? ¿A jé kjoa ts'e kjotíxoma xi ndaà tjin xi kisik'en-na? Majìn, mìtsà koi kjoa-la. Kjoa ts'e jé-né. K'oa s'ín ki'ya-la nga kixi kjoa nga jé-né. It'aà ts'e kjotíxoma xi ndaà tjin, jé kjoa ts'e jé kiskò-la nga'ño nga kisik'en-na, mé-ne nga ki'ya-la it'aà ts'e kjotíxoma nga 'ño ch'o tjin xi kjoa ts'e jé.

Kó tò xitá xi otíxoma-la kjoa ts'e jé

¹⁴ Kjoa ts'e kjotíxoma, 'ya-ná nga kjohítsjeèn ts'e Inima Tsjeè-la Nainá; tanga 'an, yijo jé tsohoya; yijo-na yaá kjòngatsja kjoa ts'e jé nga jé otíxoma-na.

¹⁵ Mikiì fiya-na mé kjoa xi s'iaàn. Kjoa xi ndaà tjin xi mejèn-na nga s'iaàn mikiì koa s'iaàn. Tà saá jña kjoa xi mikiì sasén-na sikitasoàn.

¹⁶ K'e nga k'oa s'iaàn jña kjoa xi mikiì mejèn-na, k'oa xan nga tjikixi kjoa nga ndaà tjin koni s'ín tichja kjotíxoma.

¹⁷ K'e nga k'oa s'iaàn nga otsjà jé, mìtsà 'an xi k'oa s'iaàn, jé kjoa ts'e jé xi tjiin-na bit'in-na.

¹⁸ An xi xitá isò'nde 'mì-na, be-ná nga mikiì ndaà tjin kjoa xi tjiin yijo-na. Mejèn-na nga ndaà s'iaàn, tanga mikiì sakó-na kó s'ín s'iaàn kjoa xi ndaà tjin.

¹⁹ K'e nga mejèn-na ndaà s'iaàn, mikiì sikitasoàn; tà saá koi sikitasoàn kjoa xi ch'o tjin xi majìn-na nga koa s'iaàn.

²⁰ K'e nga k'oas'ín sikitasoàn kjoa xi ch'o tjin xi majìn-na nga koa s'iaàn, mìtsà 'an xi k'oa s'iaàn, jé kjoa ts'e jé xi tijnajin-na xi k'oas'ín.

²¹ Jngoò kjoa matsji-na nas'ín mejèn-na nga ndaà s'iaàn, tà saá tà koi sakó-na kjoa xi ch'o tjin.

²² Xi jjiin inima-na matsja-na it'aà ts'e Kjotíxoma-la Nainá.

²³ Tanga tjin jngoò kjoa xi tísíxájin yijo-na xi mikiì tsjá'nde-na nga ndaà s'iaàn; jé kjoa ts'e jé kjaán-kjoò kjohítsjeèn-na xi mejèn-la nga ndaà s'iaàn. Kjoa ts'e jé xi tísíxájin yijo-na síkijne-na nga ch'o s'iaàn.

²⁴ Ima xó-na 'an; ¿yá xi síkijnandeí-na it'aà ts'e yijo jé-na xi kjoabiyaà tjin-la?

²⁵ Ndaà chjí-la Nainá nga it'aà ts'e Na'èn-ná Jesucristo síkijnandeí-ná kjoa ts'e jé.

Nga jña 'én xi kotixan-nò nga 'an, ya jjiin kjohítsjeèn-na mejèn-na sikitasoàn kjotíxoma-la Nainá, tanga ya jjiin yijo jé-na, tà saá kjoa ts'e jé sikitasoàn.

8

Mé kjondaà xi sakó-ná k'e nga k'oas'ín titsanjchá yijo-ná koni s'ín mejèn-la Inima Tsjeè-la Nainá

¹ Tanga j'ndeí, jña xitá xi ya títsajnakjoòko Cristo, mì tì mé kjo'in sinè-la, jña xitá xi mì k'oa s'ín nchisíjchá yijo-la koni tjin jé xi síjé yijo-la; tà saá k'oa s'ín nchisíjchá yijo-la koni s'ín mejèn-la Inima Tsjeè-la Nainá.

² Jé nga'ño-la Inima Tsjeè-la Nainá xi síkítsajnakon-ná nga ya titsajnakjoòkoaá Cristo; ko tijè-ne nga'ño xi síkítsajnandeí-ná it'aà ts'e nga'ño-la kjoa ts'e jé ko it'aà ts'e kjoabiyaà.

³ Kjotíxoma ts'e Moisés mikiì kichikjoa-la nga síkítsajnandeí-ná it'aà ts'e jé, nga tsjin-la nga'ño, koi kjoa-la nga jé yijo-ná síjé jé xi tjin isò'nde. Tanga Nainá kichikjoaá-la nga kiskasén Ki'ndí-la koni jngoò xi xitá isò'nde xi yijo kis'e-la koni jña xi xitá jé 'mì-ná. Ki'ndí-la kitsjaà kjotjò yijo-la nga k'en xi kjoa ts'e jé-ná. Nainá k'oa s'ín kis'iin nga jngoò k'a kisikjehet'aà kjoa ts'e jé xi tjin-la yijo-ná.

⁴ Nainá k'oaá s'ín kis'iin mé-ne nga it'aà tsaján kàttasòn-ne jè kjoa kixi xi ts'e kjotíxoma, jñá xi mì k'oaá s'ín titsañijchá yijo-ná koni tjín jé xi síjé yijo-ná, nga k'oas'ín titsañijchá yijo-ná koni s'ín mejèn-la Inima Tsjeè-la Nainá.

⁵ Jñà xita xi k'oa s'ín koni tjín xi síjé yijo-la, k'oaá tjín kjoa xi nchisíkítsjeèn; tanga jñà xi k'oa s'ín koni s'ín tjín xi síjé Inima Tsjeè-la Nainá, k'oaá tjín kjoa xi nchisíkítsjeèn.

⁶ Jñà xita xi k'oas'ín nchisíkítsjeèn koni tjín xi mejèn-la yijo-la, kjoabiyaà tjín-la. Tanga jñà xita xi k'oas'ín nchisíkítsjeèn koni s'ín mejèn-la Inima Tsjeè-la Nainá, tjín-la kjoabinachon ko kjoa'nchán.

⁷ Xita xi tà koi kjoa nchisíkítsjeèn koni tjín kjoa ch'o xi síjé yijo-la, kondra ts'e Nainá-né koi kjoa-la nga mikìl síkitasòn ko mikìl chíkjoa-la nga síkitasòn kjotíxoma-la Nainá.

⁸ Jñà xita xi k'oas'ín s'ín koni tjín xi síjé yijo-la, mikìl ma-la s'ín koni s'ín sasén-la Nainá.

⁹ Tanga jñò, mì tì k'oaá 'nè-nò koni tjín xi síjé yijo-nò; k'oaá s'ín titsa'nè koni tjín xi síjé Inima Tsjeè-la Nainá, nga jè tjínajìin inima tsajòn Inima Tsjeè-la Nainá. Jñà xita xi tsjìn-la Inima Tsjeè-la Nainá xi kitsjaà Cristo, mìtsà xita ts'e Cristo.

¹⁰ Tanga tsà yaá tjínajìin inima tsajòn Cristo, inima tsajòn tjínakon-né nga xita kixi 'mì-nò nga nguixkon Nainá, nas'ín k'oas'ín tjínè-la nga kiyá yijo-nò xi kjoa ts'e jé.

¹¹ Jè Nainá xi kisìkjaáya-la Jesucristo it'aà ts'e kjoabiyaà, tsà ya tjínajìin inima-nò jè Inima Tsjeè-la, k'oaá tìs'ín sùkítsajnakon jngòò k'a yijo-nò xi kjoa ts'e kjoabiyaà it'aà ts'e nga'ño-la Inima Tsjeè-la Nainá xi tjínajìin inima tsajòn.

¹² K'oaá ma-ne, jñá xi 'ndseé chibá, tjína jngòò xi tjínè-ná nga síkitasòn-lá, tanga mìtsà jè yijo-ná síkitasòn-lá; mì tì kù k'oas'ín s'en-ná koni tjín kjoa ch'o xi síjé yijo-ná.

¹³ Tsà tákó k'oaá s'ín s'een nga ya onguít'aà-là kjoa xi ch'o mejèn-la yijo-nò, kiyá-nò. Tanga tsà ko'nde-la Inima Tsjeè-la Nainá nga jngòò k'a sùkijne-la kjoa xi ch'o mejèn-la yijo-nò, kitsajnakon-nò.

¹⁴ Jñà xita xi jè Inima Tsjeè-la Nainá okó-la ndiyá, jñà-né xi ixti-la Nainá 'mì.

¹⁵ Jè Inima Tsjeè xi kitsjaà-nò Nainá mìtsà taxkì inima ima xi kjo'ño s'ín-nò koni jngòò chí'nda xi ts'e jé nga ma-la bíxkón-nò; ta saá jè Inima xi kitsjaà-ná Nainá skoétjò-ná nga ixti-la komaá, tije-ne Inima Tsjeè-la Nainá bénojmiya-ná nga ma nokjoà-lá Nainá nga Ndí Apa 'mì-lá.

¹⁶ Jè Inima Tsjeè-la Nainá tsjá kixi-la 'én inima tsaján nga ixti-la Nainá 'mì-ná.

¹⁷ K'e nga jye ixti-la maá, tìkooá tsaján-ná kjotjò-la Nainá xi jye k'oas'ín kitsjaà tso'ba nga tsjá-ná; tañaá tjoékjòò-ná ko Cristo nga tìkoo ko jè titsañikjiaán kjo'in mé-ne nga jeya kitsajnakon-ná Cristo.

¹⁸ 'An, k'oaá xan nga kixi kjoa, koni tjín kjo'in xi titsañikjiaán i'ndeì mikìl mangásòn koni tjín kjoajeya-la Nainá xi s'e-ná k'e nga koma iskan.

¹⁹ Jñà tsojmì xi Nainá tsibíndaà, 'ño nchikoña kjoa nga mejèn-la skoe nàchrjein k'e nga Nainá jngòò k'a ndaà kòkò kó kjoàn xi ixti-la ma.

²⁰ Jñà tsojmì xi tsibíndaà Nainá, jngòò k'a its'oòn-jìin koni s'ín tjínè-la nga kochjeén nga sa ítjòn; mìtsà kjotsja ts'e isò'nde nga k'oas'ín komàt'in; koi-né nga jè Nainá k'oaá s'ín kiskoòsòn-la; tanga i'ndeì jñà xi tsibíndaà Nainá nchikoñaá-la

²¹ nga kjoíi nàchrjein k'e nga tìkoo kitsajnandeì xi tsibíndaà Nainá nga mì tì kù kits'ón-jìin-ne; Nainá jeya sùkítsajnandeì jngòò k'a-ne koni s'ín sùkò ixti-la.

²² 'Ya-ná ngats'iì xi Nainá tsibíndaà, skanda i'ndeì, nchitsiné-né, kjo'in nchisíkjeín koni jngòò chjoón xi ki'ndí tí'beé.

²³ Mìtsà tà koi xi tjín isò'nde xi tsiné; tìkooá jñá xi jye tjín-ná Inima Tsjeè-la Nainá koni jngòò kjondaà xi tjeñ kitjoé ítjòn-ná, tìkooá tsiné-ná nga kjo'in titsañikjiaán nga titsachiñá-lá nga 'ño mejèn-ná nga skoétjò-ná Nainá nga jngòò k'a ya kitsajnakooá koni ixti-la maá; yijo-ná kíjnandeì-ne it'aà ts'e kjoa xi síkìts'ón-ná.

²⁴ Nga jye titsajnandiaá, i'ndeì jè titsachiñá-lá nga jngòò k'a kàttasòn. Tanga tsà tsejèn tjína xi chiñá-lá mikìl ma chiñá-lá. ¿Yá xi koña-la xi tsejèn tjína?

²⁵ Tanga tsà jè chíña-lá xi mìkiì tsejèn tíjna, tafì tafì chíñakjoa-lá.

²⁶ K'oaá tís'ín s'ín jè Iníma Tsjeè-la Nainá k'e nga indaàjìn tíjn iníma-ná síchját'aà-ná. K'e nga mìkiì ma-ná kó s'ín síjèt'aà-lá Nainá k'e nga bìtsi'ba-lá, tíjè-ne Iníma Tsjeè-la Nainá bìtsi'batjì-ná, nímé 'én xi tsejèn chja, nì ìtsé fiya-ná kó tsòya-ne.

²⁷ Jè Nainá xi ma-la bíxkejìn iníma-ná, tíjìn-la mé xi tíbítsjeèn-la jè Iníma Tsjeè-la. K'e nga bìtsi'batjì xítà tsjeè-la Nainá k'oaá s'ín síjèt'aà-la koni s'ín mejèn-la Nainá.

Nímé xi koma kochrjet'aàxìn-ná kjoatjòcha-la Nainá xi jye tíjn-ná it'aà ts'e Cristo Jesús

²⁸ Tíjìn-ná nga it'aà ts'e jñà xítà xi tjòkeè beè Nainá, ngats'ì kjoa xi mat'in, Nainá k'oaá s'ín síkjeèn xi kjondaà ts'e xítà. K'oaá s'ín síko jñà xítà xi xó jè kíichja-la koni s'ín mejèn-la,

²⁹ jñà xítà xi jye tíjìn-la nga tisa tàts'en-la kjoa nga ìxti-la koma; tìkooá k'oaá s'ín kiskoòsòn-la nga ngàsòn kjoàn koma koni kji Kì'ndí-la mé-ne nga jè Cristo Kì'ndítjòn koma koa kjin koma xítà xíkjin xi 'ndse.

³⁰ Nainá nga k'oas'ín kiskoòsòn-la it'aà ts'e xítà koi, tìkooá xó kíichja-la, jñà xi xó kíichja-la tìkooá kixíí kisikítsajna, jñà xi kixíí kisikítsajna tìkooá jeya kisikítsajna.

³¹ ¿Mé xi kixoán it'aà ts'e kjoa koi? Nga Nainá tíjnako-ná, nijngoò xítà kondra-ná síkijne-ná.

³² Nainá mìkiì 'on komà-la, nga kitsjaà kjotjò Kì'ndí-la it'aà tsaján ngats'iaá skanda kjoabiyaà. ¿A mìtsà tìkooá tsjá kjotjò-ná ngayije nga kò Cristo?

³³ ¿Yá xi koma kohòngui-ná jñà xi Nainá xó jaàjìn-ná? Mì yá xi koma kohòngui-ná nga jé Nainá jye kixíí kisikítsajna-ná.

³⁴ ¿Yá xi koi'è-né-ná kjo'in? Nga jé Cristo Jesús k'en ngajo-ná, tìkooá jaáya-la kjoa ts'e kjoabiyaà. Yá tíjna it'aà kixíí-la Nainá nga tíbítsi'batjì-ná.

³⁵ ¿Yá xi kochrjet'aàxìn-ná kjoatjòcha-la Cristo? ¿A kjo'in-né? ¿O xi kjoaba-ne? ¿O xi jè-né nga ongatjingui-ná xítà? ¿O xi kjoa ts'e kjinchrá-ne? ¿O xi koi'è-né nga tsjìn-ná níkje xi chíkjá? ¿O xi jè kjoa xi xkón tíjn? ¿O xi jè kjoa biyaà nga xítà sík'en-ná? Majìn, nímé kjoa-ne.

³⁶ K'oaá s'ín tíchja Xojon-la Nainá nga tsò:

Xi kjoa tsjì kjit'aà nàchrjein tíjn kjoxkón nga kiyá-jen, k'oaá s'ín tíyatakòn-najen koni orrè xi tíjnandaà nga kiyá.

³⁷ Tanga it'aà ts'e ngats'ì kjoa koi, jye tsato títanikijne-lá xi it'aà ts'e Cristo xi kjòtsjakeè-ná.

³⁸ K'oaá s'ín tíjngoò takoán nga nijngoò kjoa xi koma kochrjet'aàxìn-ná xi kjoatjòcha-la Nainá, nì jè kjoa biyaà, nì kjoabinachon, nì àkjale, nì jñà nga ñó xi tíjn isò'nde nì jñà xi tíjn jjin isén, nì jñà kjoa xi tíjn nàchrjein i'ndeí, nì jñà kjoa xi koma nàchrjein xi sa nchrobá,

³⁹ nì jè xi isa 'nga, nì jè xi isa nanga, nità mé tsojmì xi Nainá tsibíndaà, nímé xi koma kochrjet'aàxìn-ná kjoatjòcha-la Nainá xi jye tíjn-ná it'aà ts'e Cristo Jesús xi Na'èn-ná.

9

Mé-ne mìkiì ijchòtjingui-la kjoa kixíí-la Nainá jñà xítà Israel xi xó jaàjìn-ne

¹ Okixíí xi xan it'aà ts'e Cristo; mì 'én ndiso chjà; jè Iníma Tsjeè-la Nainá síkíchiya-la kjòhítsjeèn-na nga tsjá 'én it'aà ts'an,

² nga kjit'aà nàchrjein ba tíjn-na koa 'on ma-la iníma-na,

³ it'aà ts'e jñà xítà 'ndsè xi xinguiáa ma koi-né nga 'ñó matsjake. 'Ñó mejèn-na nga kàtasakó-la kjondaà. Skanda komaá-là kósit'aàxìn-la Cristo tsà k'oas'ín sakò-la kjondaà jñà xítà xinguiáa xi ts'e naxandá Israel, tanga mìkiì tíj'nde-na nga kos'ín s'iaàn.

⁴ Nga jñà xítà Israel, jè Nainá kiskoétjò nga ìxti-la ma, kò yaá k'ya-la kjoajeya-la Nainá, kò kitjoé-la jñà kjoa xi tsibíndaàjìn-kò, tìkooá kitjoé-la kjotíxoma-la Moisés, kò kitjoé-la okixíí kós'ín skoexkón Nainá, kò kitjoé-la 'én koni s'ín kitsjaà-la tso'ba Nainá.

⁵ Jñà x̄ita Israel yaá inchrobàt'aà-ne ts'e xi 'ñó x̄ita jchínga kjiìn xi Nainá xó jaàjiìn-ne. Jè Cristo [xi xó kisikasén-ne Nainá] nga x̄ita isò'nde komà, yaá inchrobàt'aà-ne it'aà ts'e x̄ita jchínga koi. Jè Cristo xi Nainá; jè otíxoma yije-là kjoa; jeya kàtìjna n̄ita kjé-ne. K'oas'ín kàtama.

⁶ [Nga mìtsà mokjeiìn-là ngats'iì x̄ita Israel], mìtsà koi kjoa-là nga jè 'én-là Nainá mìkiì bitasòn. Koi-né nga it'aà ts'e Nainá, mìtsà ngats'iì x̄ita xi ya nchrobàt'aà-ne tje-là Israel nga nguì kixi kjoa nga ya chja-ne.

⁷ Nas'ín ya tjen-là it'aà ts'e Abraham, mìtsà ngats'iì nga kitjoé-là kjondaà nga ixti-la ma. Nga k'oaa tsò Xojon-là Nainá: “Jñà x̄ita tje-lè, yaá kjinchrobà-ne it'aà ts'e Isaac.”

⁸ Kjoa koi, k'oaa tsòya-ne, nga jñà ixti-là Nainá, mìtsà jè xi chjì-là yá ts'e tje xi nchrobàt'aà-ne. Ta jñà-né xi ixti-là Nainá ma jñà xi jye k'oas'ín kitsjaà tso'ba Nainá nga ixti-là koma. Tà jñà-né xi k'oas'ín oxkit'aà nga kixi kjoa nga nguì tje-là Abraham ma.

⁹ Nga jè 'én xi Nainá kitsjaà-là tso'ba Abraham, k'oaa tsò: “Jè nó xi sa nchrobá kjoíí l̄jngòò k'a-na; jè Sara, ki'ndí s'e jngòò-là.”

¹⁰ Mìtsà ta jñà kjoa koi xi komà. Tìkooá jè Rebeca kis'e-là ixti'ño xi ts'e Isaac, jè xi x̄ita jchínga-ná ma.

¹¹ Nainá k'oaa s'ín kitsjaà tso'ba k'e nga tìkj'eè ts'iìn jñà ixti'ño nga tìkj'eè kiì 'ya-là mé kjoa xi s'iìn, a jè xi ndaà t̄jín, o jè xi mìkiì ndaà t̄jín. K'oaa s'ín kjòkixi nga Nainá t̄jín-de-là nga kjoaájiìn x̄ita koni s'ín jye t̄jindaà-là nga kichja-là jñà x̄ita xi jè mejèn-là. Mìtsà kindà s'ín mé xi jye kis'iìn x̄ita.

¹² Nainá k'oaa kitsò-là Rebeca: “Jè ti-lè xi jts'ín ítjòn, ch̄i'nda-lá koma jè xi iskan jts'ín.”

¹³ K'oaa s'ín tíchja Xojon-là Nainá nga tsò: “Jè Jacob kjòtsjakeè-ná, kò jè Esau kòjtikeè-ná.”

¹⁴ ¿Mé xi kixoán? Nainá, ¿a mìtsà kjoa kixi xi s'ín? Majìn, mì k'oaa s'ín t̄jín.

¹⁵ Nainá k'oaa kitsò-là Moisés: “Kohimakeè-ná xi 'an mejèn-na nga kohimakeè, skoehimà-ná jè xi mejèn-na nga skoehimà.”

¹⁶ K'oaa s'ín t̄jín kjoa koi, mìtsà koi nga jñà mejèn-ná nga s'e-ná, n̄i mìtsà koi nga 'ño binchaàtsjaá; jè Nainá tsjã-là kjondaà-là jñà x̄ita xi jè mejèn-là mahimakeè.

¹⁷ K'oaa s'ín tíchja Xojon-là Nainá nga kitsò-là Faraón: “Koií k'oas'ín kisikìjna-lè nga x̄itaxá t̄jini ya naxandá Egipto mé-ne nga it'aà tsiji kokoaà nga'ño-na t̄kooa skoexkon-na x̄ita nga t̄jtsa isò'nde.”

¹⁸ K'oaa s'ín s'ín Nainá, t̄jín-là kjohimatakòn it'aà ts'e x̄ita xi jè mejèn-là; t̄kooa ma-là sítajaàjiìn inima-là x̄ita xi jè mejèn-là nga kàtasítajaàjiìn inima-là.

¹⁹ Tanga tsà j̄i k'oaa k'oín-ná: “Tsà k'oas'ín s'ín Nainá, ¿mé-ne jé bìnè-là jñà x̄ita?, nga n̄i yá x̄ita xi koma kondra kjoì-là koni s'ín mejèn-là jè.”

²⁰ Tanga j̄i, xi taxki x̄ita-né, ¿yá-né j̄i, nga Nainá otìkjoòkoi? Jngòò t̄jì xi xó kisindaà-ne, ¿a komaá kitso-là jè xi tsibindaà: “Mé-ne k'oas'ín tsibindaà-ná?”

²¹ ¿A mì t̄jín-de-là jè xi ma-là bíndaà t̄jì ni'nde nga t̄jè-ne ndási koiindaà jngòò-ne t̄jì xi tà k'e mochjeén k'e nga t̄jín s'eí koa koiindaà jngòò xi nàchrjein nchijòn mochjeén?

²² Tsà Nainá mejèn-là tsakó kjoajti-là kò nga'ño-là, ¿a ch'o t̄jín nga kiskoðña kjoa it'aà ts'e x̄ita xi tjoé-là kjo'in kò xi t̄jínè-là nga kjoehesòn?

²³ Mìtsà ch'o t̄jín; nga koií k'oas'ín kis'iìn-ne mé-ne nga ma tsakó kjoajeya-là xi it'aà tsaján nga kjòhimakeè-ná. Nga jè tsibítsajnandaà-ná skanda t̄isa kjòtseé, mé-ne t̄kooa s'e-ná kjoajeya-là.

²⁴ Nainá k'oaa s'ín xó kiichja-ná. T̄jín x̄ita xi ya itjokàjiìn ts'e x̄ita judío; t̄kooa t̄jín x̄ita xi ya itjokàjiìn ts'e xi taxki x̄ita xi mìtsà x̄ita judío.

²⁵ K'oaa s'ín tíchja xojon-là Oseas x̄ita xi kiichja ngajo-là Nainá nga tsò:

Jè xi mìtsà naxandá-na ma nga sa ítjòn, naxandá ts'aán koma;

jè xi mì t̄jòkeè kijtseè nga sa ítjòn, t̄jòkeè skoeè.

²⁶ Ti ya-ne i'nde ñánda oki'mì-nò:

“Mìtsà naxandá ts'an xan-nò”,

“ixti-la Nainá xi tijnakon” k'óin-nò.

²⁷ Isaías, xita xi kiichjaya ngajo-la Nainá, k'oaá ti tsò it'aà ts'e naxandá Israel: “Nas'in kjin jchán ma-ne ixti-la koni tsumi ts'e ndáchikon, tà chiba ma-ne xi kitjokàjijn kjo'in.

²⁸ Nga jè Na'en-ná nitóón silitasòn jè kjoakixi-la xi jye jè kitsjaà koni s'in tjinè-la jña xita nga tíjtsa isò'nde.”

²⁹ Koni s'in kitsò Isaías nga tisa ítjòn:

Jè Na'en-ná, xi tse nga'ño tjin-la,
tsà mìkìì kisikiningui chiba-ne tje-ná,
jyeé-la kisikjehesòn yije-ná

koni kisikò naxandá Sodoma kò naxandá Gomorra.

³⁰ ¿Mé xi kixoán? Jña xi mìtsà xita judío, xi mìkìì fitjingui-la kjoa kixi, i'nde, jyeé xita kixi-né nga nguixkon Nainá tà koií kjoa-la nga mokjeiin-la it'aà ts'e Nainá.

³¹ Tanga jña xita Israel xi fitjingui-la Kjotixoma-la Moisés nga nchihótsji nga kixi kítsajna nguixkon Nainá mìkìì ijchòtjingui-la.

³² ¿Mé-ne nga k'oas'in komà-ne? Koií kjoa-la nga mìkìì mokjeiin-la it'aà ts'e Nainá. Tà k'oaá s'in 'ño tsohót'aahikon nga ndaà tjin kjoa xi kis'iin it'aà ts'e Kjotixoma. K'oaá ma-ne [k'e nga j'ii Cristo] yaá kisatíngui koni jngoò Ndajo xi kijnahikòn.

³³ Xojon-la Nainá k'oaá s'in tíchja [it'aà ts'e Cristo] nga tsò:

Ya nindoò Sión kijnaá jngoáá ndajo xi kíjnahikòn,
jngoò Ndajo xi satíngui xita,
tanga jè xi kòkjeiin-la it'aà ts'e Ndajo jè mìkìì kosobà-la.

10

Mé xi s'eén nga kítsajnadeií-ná xi kjoa ts'e jé-ná nga kixi kítsajnaá nguixkon Nainá

¹ Jñò ndí 'ndse, xi ngui okixi, koií xi 'ño mejèn-la inima-na kò xi 'ño sijét'aà-la Nainá it'aà ts'e naxandá Israel, nga kàtítsajnadeií kjoa ts'e jé-la.

² An be kixi-ná nga 'ño mejèn-la nga ndaà skoexkòn Nainá jña xita Israel, tanga mìkìì mangásòn kjohítsjeèn-la koni s'in tjin jè kjohítsjeèn xi ngui kixi tjin.

³ Nga mìkìì fahas'en-jiin-la nga tà jngoò jè Nainá xi ma-la kixi síkítsajna xita. Tà jè xi mejèn-la nga tà jña kixi silitasajna yijo-la. Majin-la kjoé xi okixi-la Nainá xi ma-la kixi silitajna-ná.

⁴ Nga jè Cristo kisikjehet'aà kjoa ts'e kjotixoma mé-ne nga s'e-la kjoa kixi ngats'ii xita xi mokjeiin-la it'aà ts'e Nainá.

⁵ Jè Moisés, k'oaá s'in kiskii it'aà ts'e xita xi mejèn-la kixi kítsajna it'aà ts'e kjotixoma nga tsò: “Jè xita xi silitasòn kjotixoma, it'aà ts'eé kjotixoma kíjnakon-ne.”

⁶ Tanga it'aà ts'e xita xi kixi kítsajna k'e nga mokjeiin-la, k'oaá tsò: “Kì k'oaá tsò inima-lè: ¿Yá xi kjimijin ngajmii?” (Én koi tsòyaá-ne nga mejèn-la kjinchrobàjen-kò Cristo.)

⁷ Kò, kì k'oaá tsò inima-lè: “¿Yá xi ma koiis'en-jiin i'nde ñánda nchisíkjeiin kjo'in jña mik'en?” (Én koi tsòyaá-ne nga mejèn-la skimií'nga ijngoò k'a-ne Cristo ya ijjin-la mik'en.)

⁸ Tanga, ¿kò tsò-isa 'én-la Moisés? Tsò-ne: “Chrañat'aà tijnalè jè 'én, yaá tijnalè a ndsoboi, yaá tijnajijn inima-lè.” K'oaá tsò 'én xi an chjaya xi mochjeén nga kòkjeiin-ná.

⁹ Tsà ndsoboi kénojmi-ne nga Jesucristo, jè xi Na'en-ná, kò tsà kò inima-lè kòkjeiin-lè nga Nainá kisikjaáya-la it'aà ts'e kjoabiyaá, kijnandeii-né xi kjoa ts'e jé-lè.

¹⁰ Nga kò inima-ná mokjeiin-ná mé-ne nga kixi kítsajnaá nguixkon Nainá tikoá kò ndsobaa bènojmiá nga Jesucristo, jè xi Na'en-ná, mé-ne nga kòma kítsajnadeií-ná xi kjoa ts'e jé-ná.

¹¹ K'oas'in tíchja Xojon-la Nainá nga tsò: “Ngats'ii xi kòkjeiin-la it'aà ts'e Cristo mìkìì kosobà-la.”

¹² Jñà x̄it̄a judío k̄o xi m̄itsà x̄it̄a judío, tà ngàsòn-né xi ìt'aà ts'e Nainá; nga t̄ijè-ne Cristo xi Na'èn tsò-là ngats'ìi x̄it̄a. Jè kj̄ondaà xi 'n̄ó tse t̄jín-là Cristo, jè tsjá-là ngats'ìi x̄it̄a xi chjat'aà-là.

¹³ Nga k'oaá t̄i tsò Xojon-là Nainá: “Ngats'ìi x̄it̄a xi k̄ichjat'aà-là Na'èn-ná, k̄ítsaj̄nandej̄í-né xi k̄joa ts'e jé-là.”

¹⁴ Tanga mìk̄iì k̄oma k̄ichjat'aà-là Cristo jè x̄it̄a xi k̄j'eè k̄i mokjeiín-là. K̄o mìk̄iì k̄okjeiín-là x̄it̄a xi k̄j'eè mé 'én 'nchré ìt'aà ts'e Cristo. Koá mìk̄iì k̄oma k̄jì'nchré x̄it̄a tsà mì yá x̄it̄a t̄jín xi k̄eènoj̄mí-là ìt'aà ts'e Cristo.

¹⁵ Koá jè x̄it̄a xi k̄eènoj̄mí 'én, mìk̄iì k̄oma s̄iixá tsà mì yá xi s̄iikasén. K'oas'ín t̄jít'aà xojon: “Mé tà ndaà-ne nga k'oas'ín binchimasòn jñà x̄it̄a xi chjaya 'én ndaà-là Nainá xi k̄joa ts'e Cristo xi ts'e k̄joa'nchán.”

¹⁶ Tanga mìtsà tà ngats'ìi x̄it̄a Israel kisikitasòn jè 'én ndaà-là Nainá xi k̄iì'nchré. Nga jè Isaías x̄it̄a xi k̄iichj̄a ngajo-là Nainá, k'oaá kitsò: “Na'èn, ¿yá xi k̄òkjeiín-là 'én xi j̄in kinokjoàya-jen?”

¹⁷ K'oaá ma-ne, k'e nga mokjeiín-ná, yaá nchrobát'aà-ne k'e nga na'yá-lá 'én. K'oa jñà 'én xi na'yá, 'én ndaà-là Nainá xi k̄joa ts'e Cristo-né.

¹⁸ Tanga, k'oaá xan: ¿A mìtsà k̄iì'nchré x̄it̄a Israel jè 'én ndaà-là Nainá? Jon, k̄iì'nchré-né. Nga k'oaá tsò jè Xojon-là Nainá:

Kijndà ìsò'nde jyeé tsabìsòn 'én-là.

Jyeé ijchò skanda ñánda fehet'aà-ne nangui.

¹⁹ T̄ikoaá xan-ná: jñà x̄it̄a Israel, ¿a mì kisijiín-là k̄joa koi? Kisijiín-là. Jè xi t̄ijna ítjòn, k'oaá kitsò Moisés:

'An, k'oaá s'ín s'iaàn nga k̄àtach̄in̄icha jñò jngoò naxandá xi mìtsà naxandá ts'an xan-là.

K̄àtamaj̄t̄icha ìt'aà ts'e naxandá xi chiba k̄joh̄ítsjeèn t̄jín-là.

²⁰ T̄ikoaá Isaías 'n̄ó tsi'beé-là ikon nga k̄iichj̄a 'én-là Nainá nga kitsò:

Kisakò-là jñà x̄it̄a xi mìk̄iì 'an tsohótsji-na.

Tsakó-là kj̄ondaà-na jñà x̄it̄a xi mìk̄iì 'an kiskònanguiya-na.

²¹ Tanga jè Isaías k'oaá s'ín kiskìi ìt'aà ts'e x̄it̄a Israel koni s'ín kitsò Nainá: “N̄achrjein nchijòn tsijmeé-là ndsaa nga kichj̄a'nchré-là jngoò naxandá xi kondra k̄iì-là 'én-na nga mì k̄i kisikitasòn.”

11

Kjoh̄im̄atakòn xi t̄jín-là Nainá ìt'aà ts'e naxandá Israel

¹ Aán kj̄onanguia, jè Nainá, ¿a kitsjeiín takòn naxandá-là Israel? Majìn, mì k'oaá s'ín t̄jín. 'An, t̄ikoaá x̄it̄a Israel-ná, t̄je-laá ma Abraham, x̄it̄a xinguiáá ma xi ya nchrobát'aà-ne ts'e Benjamín.

² Nainá mìtsà tsachrjekàngui naxandá-là nga jye t̄jiiín-là nga t̄isa tàts'en-là k̄joa nga ìxti-là k̄oma. ¿A mì t̄jiiín-nò koni tsò Xojon-là Nainá ìt'aà ts'e Elías nga k'oas'ín chjat'aà-là Nainá xi kondra ts'e Israel? Tsò:

³ “Na'èn, jñà x̄it̄a-lè xi k̄iichj̄a ngajo-lè, jyeé kisik'en x̄it̄a, koá jñà ì'nde tsjeè-lè jyeé kisikits'óna; tà 'an tajngoò t̄ijn̄aa ìsa, t̄ikoaá mejèn-là s̄iik'en-na.”

⁴ Tanga k'oaá tsò 'én xi tsjá Nainá: “Majìn, mìtsà tà j̄i tajngoò tijni. Itoò jmiì ma-ne x̄it̄a xi 'an t̄ítsajnatjò-na xi k̄j'eè tsà ya bincha-xkó'nchit'aà-là xkósòn-là Baal.”

⁵ N̄achrjein ì'nde j̄i tákó k'oaá s'ín ma, t̄jín ìsa x̄it̄a Israel xi t̄ítsajnatjò-là Nainá xi xó jaàjiiín-ne xi kj̄ondaà ts'e.

⁶ Tsà tà kj̄ondaà ts'eé Nainá nga k'oas'ín jaàjiiín x̄it̄a, tsòyaá-ne mìtsà koi k̄joa-là kj̄ondaà xi kis'iín. Tanga tsà koií k̄joa-là kj̄ondaà xi kis'iín, mì-la tsà t̄i kj̄ondaà-là Nainá k̄jòchjeén-ne nga kitjaàjiiín x̄it̄a.

⁷ ¿Kó s'ín tǵín kjoa? Tsòyaá-ne nga kǵín xita Israel mìkìi ijchòtǵingui-la jè kjoa xi tsohòtsji. Tanga kis'e i'nga xita xi xó jaàjìin-ne Nainá xi jye ijchòtǵingui-la. Jǵnà xita xi i'nga, 'nó kjòtájaàjìin inima-la.

⁸ K'oaá s'ín tǵít'aà Xojon-la Nainá nga tsò: “Nainá, kitsjaà-la nga kisǵjñòjìin inima-la; jǵnà xkon mìkìi tsejèn-la, kò líká-la, mìkìi 'nchré skanda nàchrjein i'ndeì.”

⁹ Jè xitaxá ítjòn David k'oaá ti kitsò:

Jè s'eí xi ochrje, tǵjè kátama-ne ch'an nga kátakaàngui, kátasiya'nó na'ya, kò tǵjǵnà kátasatǵingui-ne mé-ne nga kátas'e-la kjo'in.

¹⁰ Kátasichjoà xkon mé-ne nga mìkìi kòtsejèn-la nga kjit'aà nàchrjein kátamatsit'in ít's'in.

¹¹ 'An kǵònangui-ná, ¿a jngoò k'a chixòt'aà nangui jǵnà xita Israel k'e nga kisatèngui? Majìn. Mì k'oaá s'ín tǵín kjoa. Jè kjoa-la nga mìkìi kisikitasòn jǵnà xita Israel, jǵnà kitjoé-la xi mìtsà xita judío nga tsibitsajnandeìí xi kjoa ts'e jé-la. K'oaá s'ín komà mé-ne nga jǵnà xita judío kátachìni-ne ít'aà ts'e kjondaà-la Nainá.

¹² Tsà jǵnà xita isò'nde kisakò-la kjoanchinà-la Nainá k'e nga jǵnà xita judío mìkìi kisikitasòn-la Nainá kò kisìchijà kjondaà-la, isaá ta 'nó ndaà s'e-la kjoa machikon-t'in jè isò'nde k'e nga jǵnà xita judío òjngoò k'a skoé i'nde-la ya nguixkon Nainá.

¹³ Jǵnò chjàkò-nò xi mìtsà xita judío mì-nò. 'An kisixáya-na nga 'an kichjàjìin-la jǵnà xi mìtsà xita judío. 'An beèxkón-ná xá xi kits'iì-na.

¹⁴ Tsà koií nàchrjein-la kochìnií i'nga xita xinguiáa mé-ne nga tǵkjoa koma kítsajnandeìí-ne xi kjoa ts'e jé-la.

¹⁵ Tsà jǵnà xita isò'nde kisakò-la kjoa'nchán ít'aà ts'e Nainá k'e nga jǵnà xita judío itjokàngui, isaá tse kjondaà sakò-la jǵnà xita judío k'e nga skoétjò òjngoò k'a-ne Nainá. Skanda k'oaá s'ín komat'in koni jngoò xita xi jye k'en kò kjoaáya-la ít'aà ts'e kjoabiyaà.

¹⁶ Tsà tsjeè niño xi sindaà ítjòn nga kongatsja Nainá, tǵkjoaá tsjeè-né na'yo xi kochjeén nga sindaà niño k'e nga koma iskan. Tsà tsjeè ít'aà ts'e Nainá i'ma-la yá, jǵnà chrja-la tǵkjoaá tsjeè-né.

¹⁷ Jǵnà xita Israel, k'oaá s'ín ngaya-la koni jngoò yá olivo ndaà xi kitit't'aà chrja-la, koa ngaji k'oaá s'ín ngaya-la koni chrja-la yá olivo ijìin ijǵnà nga ya kisikjoòkoií ya ngajo-la chrja-la yá olivo ndaà; k'oaá ma-ne nga ya tíchjoi jè nga'nó-la i'ma-la yá olivo ndaà.

¹⁸ Kì 'nga níkjìni yijo-lè nga ya titsakjoòkoií chrja-la yá olivo ndaà. Tǵkítsjìin nga tà kisikjoòkò-nè; mìtsà jì 'biì-la nga'nó jǵnà i'ma-la yá olivo ndaà, tà saà jì tsjá-lè nga'nó jǵnà i'ma-la yá olivo ndaà.

¹⁹ Jì, kì k'oaá si: “Kitit't'aà chrja-la yá olivo ndaà, nga 'an kisikjoòkooa.”

²⁰ Tǵkítsjìin koií kjoa-la nga mìkìi mokjeiín-la nga kitit't'aà-ne. Tanga jì koií kjoa-la nga mokjeiín-lè nga ya tǵjnat'eìi. Kì 'ngaá beè-la takoin, tǵskón-la Nainá.

²¹ Nainá, tsà mìkìi kitsjaà'nde-la jǵnà chrja-la jè yá olivo ndaà nga ya kíjnakjoòkò tǵkjoaá ngaji tsà mì tǵ kù mokjeiín-lè mì tǵ kù tsjá'nde-lè nga ya kíjnakjoòkoií.

²² Chitsejèn-la Nainá, 'nó ndaà xita tanga tǵkjoaá jè xi mejèn-la nga ndaà kítasòn 'én xi chja. Mìkìi beè ima jǵnà xita xi chinchat'aaxìn-la Nainá. Tanga ít'aà tsjìi tǵtsjá-lè kjondaà. Tà jè xi mochjeén nga k'oas'ín kǵjini koni s'ín tǵín kjondaà xi kitsjaà-lè. Tsà majìn tǵkjoa kotet'aà-lè koni jngoò chrja-la yá.

²³ Jǵnà xita judío xi chrja-la yá xi kitit't'aà, tsà kòkjeiín òjngoò k'a-la, komaá sincháya-ne i'nde-la, nga Nainá tǵjín-la nga'nó, komaá kǵkjoò òjngoò k'a-ne.

²⁴ Jì, nga ya kitit't'aà-ne jǵnà yá olivo ijìin ijǵnà koa kisikjoòkoií yá olivo ndaà nas'ín mìkìi ya ok'in-lè. òisaá tà ndaà ok'in-la nga jǵnà chrja-la yá olivo xi xó kitjaàjìin-ne nga sincháya òjngoò k'a-ne i'nde-la xi tǵjè-ne yijo-la yá!

²⁵ 'Ndsè, mejèn-na nga ndaà kátasijìin-nò kjoa'ma koi koni s'ín tǵjindaà-la Nainá mé-ne nga mì 'nó chjìne kìnachrje yijo-nò. Jè kjoa nga tǵjín i'nga xita Israel xi kjòtájaàjìin

inìma-là nga mìkì mokjeiín-là, tanga skanda k'eé kòkjeiín-là k'e nga jye kòkjeiín yije-la xi mìtsà xìta judío.

²⁶ K'e nga jye k'oas'ín koma, ngats'ìi xìta Israel kítsajnadeií-né xi kjoa ts'e jé-la, koni s'ín tíchja xojon nga tsò:

Yaá nindoò Sión kjinchrobà-ne xi ma-là sìkítsajnadeií xìta Israel xi kjoa ts'e jé-la, jè xi kjoaáxìn-là jé-la jñà xìta tje-la Jacob.

²⁷ Jè kjoa xi bìndaàjìin-koaa k'e nga kjoaáxìn-là jñà jé xi tjin-la.

²⁸ Kjoa ts'e 'én ndaà-là Nainá xi kjoa ts'e Cristo, jñà xìta judío, kondra-laá ma Nainá mé-ne jñò sakò-nò kjondaà. Tanga jè kjoa nga xó kitjaàjìin-ne xìta koi, tákó matsjakeè Nainá nga jye kos'ín kitsjaà-là tso'ba jñà xìta jchínga kjìin-là.

²⁹ Nainá mìkì faáxìn kjotjò xi tsjá, tìkoa mìkì faáxìn 'én xi chja-ná.

³⁰ Jñò, k'oaa tjs'ín ki'nè nga sa kjòtseé; mìkì kinìkitasòn-là Nainá, tanga i'ndeì jyeé kisakò-nò kjohimatakòn, koií ngatjì-là nga mìkì kisikitasòn jñà xìta judío.

³¹ Nachrjein i'ndeì jñà xìta judío mìkì síkitasòn-là Nainá. Tanga tà koi-né nga jè Nainá tjin-la kjohimatakòn xi it'aà tsajòn mé-ne jñà xìta koi tìkoaá s'e-la kjohimatakòn ts'e Nainá.

³² Nainá, k'oaa tsò nga ngats'ìi xìta judío, kò xi mìtsà xìta judío, mìkì síkitasòn-là nga jè xi mejèn-là Nainá nga ngàsòn ngáya kohimakeè ngats'ìi xìta.

³³ ¡Mé tà 'ñó tse ma kjoanchiná xi tjin-la Nainá, kò 'ñó tse kjoachjine tjin-la kò kjohitsjeèn-là! Nijngoò xìta xi machiya-là kós'ín kosòn-là k'e nga bìndaàjìin kò kós'ín tjin ndiyá-là.

³⁴ ¿Yá xi beè kós'ín tjin kjohitsjeèn-là Nainá? Mì yá xi koma-là sìkìchiya-là Na'èn-ná.

³⁵ ¿Yá xìta xi jè kisikíña ítjòn-là xi mochjeén-là Nainá mé-ne nga jè sìkátji ngajo-la?

³⁶ It'aà ts'eé Nainá nchrobát'aà-ne ngats'ìi tsojmì xi tjin, tìkoa it'aà ts'e-né nga títsakon, kò k'oaa s'ín mochjeén nga jeya kjna.

Nainá, kàtas'e-la kjoajeya nita mé nachrjein-ne. K'oas'ín kàtama.

12

Mé xi s'eén nga tsjeè sijchá yijo-ná koni s'ín sasén-la Nainá

¹ K'oaa ma-ne 'ndsè, nga tse kjohimatakòn tjin-la Nainá xi it'aà tsaján, 'an bìtsi'bà-nò nga k'oas'ín tìngatsja yijo-nò it'aà ts'e Nainá koni jngoò kjotjò xi tijnakon, xi tsjeè tjin, xi ndaà sasén-la Nainá; nga nguì kò inìma-nò kò kjohitsjeèn-nò jeya sìkìjna Nainá.

² Kì k'oas'ín onguíko yijo-nò koni s'ín tjin kjotixoma-la isò'nde. Tixitseyà kjohitsjeèn-nò nga kàtatjìya-nò koni s'ín tìtsanjchá yijo-nò mé-ne nga jcha-nò mé xi mejèn-là Nainá it'aà tsajòn, jñà kjoa xi ndaà tjin, xi nguì tjìkixi, xi jè ndaà sasén-la.

³ It'aà ts'e xá xi 'an kitjoé kjotjò-na, k'oaa xan-nò nga jngoò ijngoò, kì 'nga onguíkoo kjohitsjeèn-nò koni s'ín tjinè-là nga sìkìtsjeèn; tà saà ndaà tìkìtsjeèn koni s'ín ok'ìn-là kjondaà xi kitsjaà-nò Nainá k'e nga kòkjeiín-nò it'aà ts'e Cristo.

⁴ Koni s'ín tjin yijo-ná nga kjin skoya tjin-la tanga kakj'eíí kakj'eíí xá tjin-la nga ijngoò ijngoò skoya.

⁵ K'oaa s'ín ma it'aà tsaján nga kjin ma-ná, tanga xi it'aà ts'e Cristo tà jngoò ma-ná nga ijngoò ijngoá; k'oaa s'ín kìndoba'ñóá xinguiáá koni s'ín kitsobà'ñó xíkjin yijo-ná.

⁶ Koni s'ín kjòmejèn-là Nainá jye kitsjaà-ná xá xi s'eén nga jngoò ijngoá. Jngoò xìta, tsà jè xá kitjoé-là nga xìta kichjayajìin-là, k'oaa s'ín kàtasíkjeén koni s'ín mokjeiín-là.

⁷ Tsà jè xá kitjoé-là nga xìta kòsìko, k'oaa s'ín kàtasíkjeén nga ndaà kàtasìko xìta. O xi jè xá kitjoé-là nga kòkòya, k'oas'ín kàtasíkjeén nga ndaà kàtakóya.

⁸ Jè xi kitjoé-là xá nga sìjehikon xìta, k'oas'ín kàtas'ín. Jè xi ma-là sika'bí tsojmì, nguì kòó inìma-là kàtasíka'bí; jè xi xá ítjòn kjòngatsja, ndaà kàtasíkitasòn; jè xi síchját'aà-là jñà xìta imà, kòó kjòtsja-là kàtasíchját'aà-là.

⁹ Nguì koó inima-nó tìtsjacha xinguiòo. Tìjticha kjoa xi ch'o tjin. Koií tanguítjngui-là kjoa xi ndaà tjin.

¹⁰ Koó kjotsja-nò tìtsjacha xinguiòo nga 'ndsè chiba. Ìsa ndaà jchaxkón xita xinguiòo xi i'nga; jña tikítsajna ítjòn nga jngoò ìjngoò.

¹¹ Kì ts'e'è 'nè xi xá ts'e Nainá. Nguì koó inima-nò tixá-là Na'èn-ná.

¹² Tsja te-lá takòn jè kjoa xi chiña-là. Kò inima-nò kàtachíkjoakò-nò kjo'in xi tìtsanìkjoón. Nachrjein nchijòn tìtsi'ba-là Nainá.

¹³ Tjiì-là mé xi mochjeén-là jña xita tsjeè-là Cristo. Chjoétjò xita xi bijchó ya ni'ya-nò.

¹⁴ Tjjet'aà-là Nainá nga kàtasíchikon-t'in jña xita xi ch'o síkò-nò; kì k'oaá s'in njet'aà-là nga kjo'in tsjá-là.

¹⁵ Tìtsjakoo jña xita xi tsja tjin-là. Chìhindáyakoo jña xi nchikjindáya.

¹⁶ Tà jngoò t'een kjohítsjeèn-nò. Kì 'nga ikon 'nè yijo-nò, ya tsjahijtakoo jña xita ima. Kì 'ño chjine nachrjenguiòo yijo-nò.

¹⁷ Jña xita xi ch'o síkò-nò, kì ch'o nìkoo ngajo-nò. Kjit'aà nachrjein ndaà t'een nga nguixkon ngats'ii xita.

¹⁸ Skanda ñánda sakó'nde-nò, jño tjinè-nò nga 'nchán tìtsajnakoo ngats'ii xita.

¹⁹ Ndí 'ndsè xi matsjake-nò, k'e nga mé xi mat'ioòn, kì jño 'nè ngajo-nò. Tsja Nainá tikijnaya kjoa-nò mé-ne nga jè tsjá-ne kjo'in. K'oaá s'in tíchja Xojon-là Nainá nga tsò: “Tsò Na'èn-ná: 'Aán oko-na nga kındaàjìin-là xita, 'aán tsja-là chí-là.”

²⁰ K'oaá ma-ne, tsà jè kondra-lè, tsà tsjin tsojmì xi kine, jí tjiì-là; tsà xindá-là, tjiì-là nandá nga kàt'ii. K'e nga koa síkoi, kosobà tì'biì-là kondra-lè, chíba-là kohini isén-là koni xá'í.

²¹ Jè kjoa xi ch'o tjin, kì jè síkijne-nò; tìkooá-ne jè kàtitasòn xi kjondaà, mé-ne nga síkijne-là kjoa xi ch'o tjin.

13

Mé kjoa-ne nga nìkitasòn-lá xi xitaxá tìtsajna

¹ Ngats'ii xita kàtasíkitasòn-là xi xitaxá tìtsajna, nga Nainá kitsjaà-là kjotíxoma. Jña xi xitaxá tìtsajna, Nainá kitsjaà-là xá.

² Jña xita xi bìtsajna tájaà-là kjotíxoma-là xitaxá, kondraá bìtsajna-là jña xita xi Nainá kitsjaà-là xá. Jña xita koi, tì yijo-láá tìbínè-là kjo'in.

³ Jña xitaxá mìtsà koi xá tìtsajna-ne nga jña kìnchaxkón-là xita xi ndaà s'in, jña-né xita xi ch'o tjin kjoa xi s'in. Tsà mejèn-lè nga mìkì kiskón-là xitaxá, ndaà t'jin, kò jña xitaxá ndaà sikkìjna-lè.

⁴ Jña xi xitaxá tjin-là, xá ts'e Nainá nchisíkitasòn, mé-ne nga ndaà kijna-ne. Tanga tsà ch'o tjin kjoa xi t'ni, tiskón-là xi xitaxá tjin-là, nga tji'nde-là nga tsjaà-lè kjo'in. Nga xá-là Nainá nchis'in k'e nga bíndaàjìin kjoa kò nga tsjá-là kjo'in jña xita xi ch'o s'in.

⁵ K'oaá ma-ne nga mochjeén-né nga ndaà sikitason-lá jña xi xitaxá tìtsajna, mìtsà tà koi-ne nga kjo'in tsjá-ná; koi-né nga xó k'oas'in beè-là takoán nga tjinè-ná nga sikitasoán.

⁶ Koií kjoa-là nga tikoá machjí ton sá, nga jña xitaxá k'oaá s'in nchisíkitasòn-là Nainá kò kjit'aà nachrjein koatjín xá xi nchis'in.

⁷ Tichjió yije mé xi kitjen-nò. Jè xi kitjen-là ton sá, kàtíchjí. Jè xi kitjen-là tsojmì xi machjítjì, kàtíchjítjì. Jè xita xi mochjeén-là nga jchaxkón, kàtayaxkón. Jè xita xi mochjeén-là nga ndaà kìjna, ndaà tikìjna.

⁸ Kì mé xi jmeèt'ioòn yijo-nò. Tanga kitjeén-nò ts'e kjoatjòcha it'aà ts'e xita xinguiòo. Nga jè xi matsjakeè xíkjin, jyeé kisikitasòn yije Kjoatíxoma.

⁹ Jña kjotíxoma tsò-ne: “Kì kjoa chijngui 'ni, kì xita nìk'in, kì chíjé 'ni, kì 'én ndiso nokjoi, kì maxitakòn-chii xinguii.” Ngats'ii kjotíxoma koi, kò xi kj'eí, yaá mangásòn yije jè kjotíxoma xi tsò: “Tìtsjachi xita xinguii koni tsà ti yijo tsjì-ne.”

¹⁰ Jè xi matsjakeè xíkjin, mìtsà ch'o síko xita xíkjin. Jè xi matsjakeè xíkjin, jyeé ndaà tísíkitasòn Kjøtixoma.

¹¹ K'e nga k'oas'in s'eén yijeé kjoa koi, jcha-ná nachrjein i'ndeji mé kjoa xi tíma nga jye ijchò chiba-la nga sikja-lá yijo-ná nga titsafè. Koni k'e nga sa kòkjeiin-ná, jye 'ño kjòchrañat'aà nachrjein nga kitsajnandiaá kjoa ts'e jé-ná.

¹² Nitjen, jyeé tífahato, jyeé tímachraña nachrjein nga s'e isén nga kitjojen ijngoò k'a Na'en-ná. Kinachrjenguaiaá ngats'iì kjoa xi ma ñánda nga jñò choòn kò chjoé nga'ño-la Nainá koni s'in mochjeén ñánda iseèn choòn koni tsà kichá ts'e soldado.

¹³ K'oaá s'in iseèn kitjá koni nachrjein nga ndaà sijchá yijo-ná. Mì kì mochjeén nga taxki chjineé tsojmì kò nga mach'iaá. Mikiì mochjeén nga íchjin kjòhijtakoaa, kò mì kì ma taxki síkoaá yijo-ná. Mikiì mochjeén nga xita kixkàn-koaá kò mikiì mochjeén nga kjoaxitakòn kichjà-lá xinguaiaá.

¹⁴ K'oaá s'in tíjchá yijo-nò koni s'in kis'iin jè Na'en-ná Jesucristo, kì kù nìkitasòn-la yijo-nò kjoa ch'o xi sijé.

14

K'e nga mikiì mangàsòn kjòhítsjeèn-ná it'aà ts'e kjoa xi mì xó kù tjí'nde-ná nga s'eén

¹ Chjoétjò xita xinguiòo xi mikiì tíjngoò ikon mé kjoa xi tjí'nde-la nga s'in; kì chibàya-nò jñà kjoa xi mikiì mangàsòn kjòhítsjeèn-nò.

² Tjín xita xi k'oas'in mokjeiin-la nga ma chine yije tsojmì xi tjín, tikoá tjín xita xi mikiì mokjeiin-la tsà ma chine yije tsojmì xi tjín. Tà jñà tsojmì xi nangui síjchá kine.

³ Jè xi kine yije tsojmì xi ma chine mikiì koma kochrjekàngui jè xi mikiì ma-la kine yije tsojmì; kò jè xi mikiì ma-la kine yije tsojmì, mikiì koma kichajno-la jè xi ma-la kine yije tsojmì xi tjín, nga Nainá jyeé kiskoétjò nga k'ndí-la ma.

⁴ ¿Yá-né jì nga nìkindii ch'i'nda xi mìtsà tsiji? Nga ch'i'nda ts'e Nainá-né. Jè ch'i'nda jè, kindà ts'eé nei-la tsà kixi tíjna kò tsà mì kixi tíjna. Tanga kixií kíjna, nga jè Na'en-ná tjín-la nga'ño nga kixi síikijna.

⁵ Tjín xita xi tsò: tjín nachrjein xi isa xkón. Tikoá tjín xi tsò: Nachrjein, tà ngàsòn ngayá-né nga nachrjein nchijòn. Nga jngoò ijngoò xita, k'oaá s'in ndaà katijngoò-la ikon koni s'in síkítsjeèn.

⁶ Jñà xita xi faájijn jngoò nachrjein nga beèxkón, k'oaá s'in nga jeya síkijna Na'en-ná; koá jñà xita xi tsò nga ta ngàsòn ngáya nachrjein, tikoá k'oaá s'in s'in nga tikoá jeya síkijna Na'en-ná. Jñà xita xi kine yije tsojmì, it'aà ts'e Na'en-ná kine, nga tsjá-la kjondaà Na'en-ná k'e nga kine; k'oa jñà xita xi tsò nga tjín tsojmì xi mikiì ma chine, tikoá it'aà ts'eé Na'en-ná nga mikiì kine tsojmì, kò tikoá tsjá-la kjondaà Na'en-ná.

⁷ Jñà, k'e nga titsajnakoaán, mìtsà koi xá titsajnakon-ná xi ta kjondaà tsaján. Kò k'e nga kiyá, mìtsà ta kjondaà tsaján kinchátsjiaá nga kiyá.

⁸ Tanga k'e nga titsajnakoaán, koií xá titsajnakoaán xi kjondaà ts'e Na'en-ná. Kò nga kiyá, tikoá koií xá kiyá-aná xi kjondaà ts'e Na'en-ná. K'oaá ma-ne tsà titsajnakoaán kò tsà kiyá kjondaà ts'e Na'en-ná nga ts'e tsò-ná.

⁹ Koií kjoa-la nga k'en Cristo koá jaáya-la nga tsibìjnakon-né, mé-ne nga jè koma-ne Nei-la jñà xita xi biyaà kò xi títsajnakon.

¹⁰ Tanga jì xi nokjoàjno-la 'ndsi, ¿mé-ne koá'nè-ne? Tikoá jì xi nachrjekàngui 'ndsi, ¿mé-ne nachrjekàngui-ne? Nga ngats'iì-ná kijchò kinchanguiaá ndsokò Cristo ñánda nga jè tíhotixoma.

¹¹ K'oaá s'in tíchja Xojon-la Nainá nga tsò:

Tsò Na'en-ná: 'An tíjnakon-ná,
ngats'iì xita kìncha-xkó'nchit'aà-na
kò ngats'iì xita skoèxkón Nainá.

¹² Ngats'iaá k'oi-lá kindà Nainá mé kjoa xi k'éné nga tsitsajnaá isò'nde.

13 K'oaá ma-ne nga mì tì xinguiáá kìnókjoajno-lá; jñò, ta saá ndaà tìkítsjeèn nga nímé xi s'een xi s'ikits'ón-jìin koni s'ín mokjeiín-là xinguióo mé-ne nga mì jé skajjìn ìjngòò k'a-ne.

14 'An ndaà tìjngòò takoán ìt'aà ts'e Na'èn-ná Jesús nga kixi kjoa nga tsjìn tsojmì xi xkón tjín nga mìkiì ma chine; tanga jè xita xi k'oas'ín síkítsjeèn nga tjín tsojmì xi xkón tjín nga mìkiì ma chine, xkón tjín-là ìt'aà ts'e tsà skine.

15 Tanga tsà ta koií kjoa-là ts'e tsojmì xi chinii, jè 'ndsì ch'o ma-là, jè kjoa xi tì'nì mìtsà tì kjoatjòcha-ne; kì kiì biì'ndi nga jè 'ndsì xi Cristo k'en ngajo-là k'its'ón-jìin-là xi tà kjoa ts'e tsojmì xi chinii.

16 Kì k'oaá s'ín 'nè mé-ne nga mì xita kichjajno-nò ìt'aà ts'e kjoa xi tìtsa'nè nga k'oas'ín mokjeiín-nò nga ndaà tjín.

17 K'e nga jè Nainá tíhotíxoma-ná mìtsà jè xi ìsa 'ñó chjì-là mé xi s'ioaá kò mé xi chinéé. Jè xi 'ñó mochjeén nga kixi k'itsajnaá, 'nchán sijchá yijo-ná, kò tsja k'oé-lá inima-ná; koi kjoa xi tsjá Inima Tsjeè-là Nainá.

18 Jè xi k'oas'ín síkitasòn kjoa koi k'e nga síxá-là Cristo, ndaà sasén-là nguixkon Nainá, tìkooá ndaà bijna nga nguixkon xita.

19 K'oaá s'ín kjitjngui-lá kjoa xi 'nchán síkijna-ná kò kjoa xi 'bì-lá nga'ñó xinguiáá nga jngòò jngoaá koni s'ín mokjeiín-ná.

20 Kì xá-là Nainá n'ikits'ón-jìin-là xi ta kjoa ts'e tsojmì xi ma chine. Kixií kjoa, ngats'ìi tsojmì xi tjín, tsjeè-né. Tanga jè xi ch'o tjín k'e nga ta koi kjoa-là tsojmì xi chinéé bits'ón-jìin-là kjoa xi mokjeiín-là ìt'aà ts'e Nainá jñà xita xi kj'eí.

21 Ìsaá ndaà-ne nga mì yijo chjineé, nga mì xán s'ioaá, nga nímé kjoa xi s'een jè xi s'ikits'ón-jìin-là jè 'ndsì nga sakó-là jé.

22 Koni s'ín mokjeiín-lè ìt'aà ts'e kjoa koi, tà jii tjiin takoín kò Nainá. ¡Mé ta ndaà-là jè xi mì kjo'in bínè-là yijo-là k'e nga tìjngòò ikon nga ndaà tjín kjoa xi s'ín!

23 Jè xi jò tjín-là k'e nga mé tsojmì xi kine, jé tíhónè-là yijo-là nga mìkiì tjiingòò ikon tsojmì xi kine. Tsà mìkiì tjiingòò takoán k'e nga mé kjoa xi s'een, jé tìtsahonè-là yijo-ná.

15

1 Jñá xi jye kixi mokjeiín-ná ìt'aà ts'e kjoa xi tji'nde-ná mé xi s'een, mochjeén-né nga tìkooá kichikjoako-ná jñà xita xi k'oas'ín mokjeiín-là nga mìkiì tji'nde-là mé kjoa xi s'ìin. Mìtsà tà jñà kjoa xi ndaà sasén-ná k'inchátsjiaá.

2 Nga jngòò ìjngoaá, mochjeén-né nga k'oas'ín s'een jè kjoa xi sasén-là jñà xita xinguiáá xi k'jondaà ts'e, mé-ne nga kijin-ìsa k'johítsjeèn-là jè kjoa xi mokjeiín-là.

3 Nga tìkooá jè Cristo mìtsà jè tsohótsji kjoa xi sasén-là yijo-là, tà saá ìt'aà ts'eé tsitasòn koni s'ín tji't'aà xojon ts'e Salmo, nga tsò: “Én ch'o xi jì kiichjajno-lè, 'aán kiskaat'aà-na.”

4 Jñà 'én xi kitjei nga sa kjòtseé, koií xá kitjei-ne nga kòkòya-ná mé-ne nga ìt'aà ts'e Xojon-là Nainá, tseé s'een takoán tìkooá s'e-là kjoa'nchán inima-ná, mé-ne nga koma chíñakjoa-lá ìt'aà ts'e Nainá.

5 Nainá xi ma-là tsjá-ná kjoatsetakòn kò xi ma-là sí'nchán-jìin inima-ná, k'oas'ín jngòò k'johítsjeèn kàtatsjá-nò nga jngòò ìjngòò koni tsò Cristo Jesús,

6 mé-ne ngats'ioò ngàsòn jngòò jta jeya tìkijna Nainá, Na'èn-là Jesucristo xi otíxoma-ná.

7 Koií kjoa-là k'oas'ín chjoétjò xinguióo nga jngòò ìjngòò koni s'ín kiskoétjò-nò Cristo mé-ne nga jeya k'ijna-ne Nainá.

8 K'oaá xán-nò, jè Cristo Jesús, koií xá j'ii-ne nga j'ii síxájiin-là xita judío xi tji't'aà chiba-là kjoa ts'e circuncisión mé-ne nga tsakó-ne kjoakixi-là Nainá tìkooá síkitasòn koni s'ín jye kitsjaà-là tso'ba Nainá jñà xita jchínga kjìin-là.

9 Tìkooá koií xá j'ii-ne mé-ne nga jñà xi mìtsà xita judío jeya s'ikijna Nainá ìt'aà ts'e k'johimatakòn xi tjín-là Nainá koni s'ín tíchja Xojon-là Nainá, nga tsò:

Koií kjoa-là nga jeya s'ikijna-lè jjiin-là xita naxandá xi mìtsà xita judío.

It'aà tsiji sé-lè sò xi ndaà tsò.

10 Ìjngoò k'a tǵít'aà xojon ñánda nga tsò:
 Jǵnò xi mìtsà xǵta judío 'mì-nò,
 tsjaá t'è-lá takòn kǵ xǵta naxandá-la Nainá.

11 Ìjngoò k'a tǵít'aà xojon ñánda tsò:
 Jǵnò ngats'ioò xi mìtsà xǵta judío 'mì-nò,
 jeya tǵkǵjna Na'èn-ná,
 ngats'ioò xi naxandá 'mì-nò jeya tǵnachrjeè Nainá.

12 Ìjngoò k'a tǵít'aà xojon ts'e Isaiás ñánda tsò:
 Jè tǵe-la Isai kǵtǵot'aà jngoò-ne jts'én-la xi kǵtǵxoma-la jǵnà xi mìtsà xǵta judío,
 kǵ jè jts'én jè kǵòt'aà ikon nga skǵña-kjoa-la.

13 Nainá xi tsjá nga chiñàkjoaá, kàtatsjá yije-nò kǵotsja kǵ kjoa'nchán nga mokjeiín-nò
 it'aà ts'e, mé-ne nga ìsa ndaà chíñakjoa ìsaa xi kǵ nga'ñó-la Inǵma Tsjeè-la Nainá.

Pablo chi'nda-la Jesucristo

14 Tanga ndí 'ndsè, 'an tǵjngoò takoàn xi it'aà tsajòn xi tǵjǵnò-nò tǵjín-nò kǵjondaà tǵkoa
 machiya-nò nga kǵoma tǵjǵnò sǵkǵxiya-la xǵta xinguiǵo nga ìjngoò jngoò.

15 Ndí 'ndsè, 'ñó tǵbeè-la takoàn nga tǵkǵjǵ-nò xojon jè; tǵchjà kǵxi-nò, mé-ne nga mìkǵi
 jchàajǵn-nò koni tsò xojon jè. Koií k'oas'ín tǵsǵkǵtsjeèn-nò nga 'an kǵtǵjoé-na kǵtǵjǵ-la Nainá
 k'e nga kitsjaà-na xá,

16 mé-ne nga 'an kǵoma-na chi'nda-la Jesucristo it'aà ts'e xi mìtsà xǵta judío. Sǵxákoaa
 'én ndaà-la Nainá, mé-ne jǵnà xi mìtsà xǵta judío ndaà sasén takòn-nè Nainá koni jngoò
 kǵtǵjǵ xi 'ñó sasén-la Nainá nga it'aà ts'e Inǵma Tsjeè-la Nainá jyeé kǵòtsjeè.

17 'An tǵjín-na mé kjoa-ne nga matsja-na it'aà ts'e Cristo ts'e xá xi tǵs'iaàn.

18 Nì mé kjoa tǵjín xi ma'ñót'aà takoàn nga ma chjà, ta jè kjoa ts'e Cristo nga 'an sǵkǵjeén-na
 nga sǵxákoaa jǵnà xi mìtsà xǵta judío mé-ne nga kǵoma sǵkǵitasòn-la Nainá. K'oaá s'ín kǵs'iaàn
 it'aà ts'e 'én xi kǵchjà kǵ it'aà ts'e xá xi kǵs'iaàn,

19 kǵ it'aà ts'e kǵjǵxkón xi okó kjoajeya-la Nainá kǵ it'aà ts'e nga'ñó-la Inǵma Tsjeè-la
 Nainá. Jyeé ndaà kǵsǵngásoàn 'én ndaà-la Nainá xi kjoa ts'e Cristo, tsibǵts'iaǵko-na ján
 Jerusalén kǵhǵkǵi nga jngoò itǵjandǵ-la skanda ján Ilírico.

20 K'oaá s'ín tsibǵnè-la yǵjo-na nga kǵchjàya 'én ndaà-la Nainá xi kjoa ts'e Cristo ya ì'nde
 ñánda kǵ'eè yá bǵnojmíya it'aà ts'e Cristo, mé-ne nga mì 'an kokoðya ndaà-la xǵta xi kǵ'eǵi
 xi jye tsakóya ítǵon-la it'aà ts'e Cristo.

21 Koni s'ín tǵjít'aà Xojon-la Nainá nga tsò:
 Skoǵ-né jǵnà xǵta xi mì yá tsibǵnojmí-la it'aà ts'e;
 kǵochiyaá-la jǵnà xǵta xi kǵ'eè mé 'én 'nchré xi it'aà ts'e.

Kós'ín tǵsǵkǵtsjeèn Pablo nga mejèn-la kjoǵ Roma

22 Kò kǵjín k'a mejèn-na fǵkon-nò tanga jǵnà xá xi 'an tǵs'iaàn ì ì'nde jé mìkǵi tǵjò'nde-na nga
 ma fia.

23 Tanga ì'ndeǵ nga jye jyehet'aà xá-na ìjndé, kǵ tǵkoa kò kǵjín nó tǵjín-la nga mejèn
 fǵkon-nò,

24 k'oaá s'ín tǵsǵkǵtsjeèn, k'e nga kǵjían ján España, k'eé kǵchjàjto-nò mé-ne nga
 skoǵxkon-nò. K'e nga jye chibá jngoò tǵjoà kǵoma kǵinchako-ná nga kǵoma kǵjían ñánda nga
 tǵfia.

25 Tanga ì'ndeǵ ján Jerusalén tǵfia, nga tǵfǵko jngoò-la nga'ñó jǵnà xǵta-la Cristo xi ya
 tǵtsajna.

26 Nga jǵnà xǵta naxandá-la Nainá xi tǵtsajna Macedonia kǵ Acaya kǵòtsja ts'e-né nga
 tsibǵxkó chiba tǵon koni jngoò nga'ñó xi kǵtǵjǵ ts'e xǵta ìma naxandá-la Cristo xi tǵtsajna
 ján Jerusalén.

²⁷ Nguì kjotsja ts'e-né koni s'ín kis'ìin jñà xità koi. Nga tjen-t'in-la kjondaà. Tsà jñà xità xi mìtsà xità judío k'oàá s'ín kisakò-la kjondaà ya jjiìn inìma-la it'aà ts'e xi nguì xità judío, tìkoàá tjinè-la jñà xi mìtsà xità judío nga kìnchako nga tsjá-la tsojmì xi mochjeén-la.

²⁸ K'e nga jye kjoehet'aà kjoa koi nga jye sìngatsja jè ton xi kjòxkó, ìkjoàn skotsejèn jngò tò-nò, k'ée kjián ján España.

²⁹ Be-ná nga 'ñó ndaà sìchikon-t'in-ná Cristo k'e nga kìjchokon-nò.

³⁰ Tanga jñò ndí 'ndsè, bìtsi'bà-nò it'aà ts'e Na'èn-ná Jesucristo kò it'aà ts'e kjoatjòcha xi tsjá-ná Inìma Tsjeè-la Nainá, tìnókjoat'aà-là Nainá xi it'aà ts'an,

³¹ mé-ne nga kosìko-na Nainá it'aà ts'e xità xi mìkiì mokjeiìn-la xi títsajna ján Judea, kò mé-ne nga jè ton xi tìfiko-la xità-la Cristo xi títsajna ján Jerusalén ndaà kàtasasén-la,

³² mé-ne nga, tsà k'oas'ín mejèn-la Nainá, nga kò kjotsja-na kìjchokon-nò, tìkoà koma ndaà sìkjáya chiba nachrjein-kò-nò.

³³ Jè Nainá xi tsjá-ná kjoa'nchán kàtijnako-nò ngats'ioò. K'oas'ín kàtama.

16

Kós'ín kisìhixat'aà Pablo ngats'ii xità naxandá-la Nainá xi títsajna Roma

¹ It'aà tsajòn sìngatsja-nò jè tichjaá Febe, jè xi síchját'aà naxandá-la Cristo xi ya tíjna Cencrea;

² ndaà choéjtò xità jè nga xinguiáá ma nga tìkoàá mokjeiìn-la it'aà ts'e Na'èn-ná nga k'oàá s'ín ok'in-la xi xità-la Cristo. Tìchját'aà-là nità mé xi kochjeén-la nga 'ñó kjín xità tsasìko, tìkoà 'an kisìchját'aà-na.

³ Tìixat'eì jè Priscila kò Aquila, jñà xità xi taña nìxákjoè-jen it'aà ts'e Cristo Jesús.

⁴ Jñà xità koi kjomeè kinìk'en xi kjoa ts'an. Mìtsà tà 'an xi tsjaà-la kjondaà tìkoà tsjá-la kjondaà ngats'ii xità naxandá-la Cristo xi mìtsà xità judío.

⁵ Tìkoà tìixat'eì jñà xità naxandá-la Cristo xi maxkóya ya ni'ya-la Priscila kò Aquila. Tìixat'eì jè Epeneto xi 'ñó matsjake nga jè kòkjeiìn ítjòn-la it'aà ts'e Cristo ya ì'nde Acaya.

⁶ Tìixat'eì jè María, chjoón xi 'ñó ndaà kisìxá it'aà tsajòn.

⁷ Tìixat'eì jè Andrónico kò Junias, xi xinguiáá ma nga taña tsitsajna'ya-jen ndayá. Jñà xità xi tsibíxáya-la Cristo 'ñó matsjakeè xità koi. Kò isá ítjòn kijtseèxkon 'én-la Cristo koni 'an.

⁸ Tìixat'eì jè Amplias, jè xità xi 'an 'ñó matsjake it'aà ts'e Na'èn-ná.

⁹ Tìixat'eì jè Urbano xi taña síxáko-na it'aà ts'e Cristo Jesús kò jè Estaquis xi 'an 'ñó matsjake.

¹⁰ Tìixat'eì jè Apeles xi ndaà kixì mokjeiìn-la it'aà ts'e Cristo. Tìixat'eì jñà xità xíkjín xi ya títsajna ni'ya-la jè Aristóbulo.

¹¹ Tìixat'eì jè Herodiòn xi xinguiáá ma. Tìixat'eì jñà xità xíkjín xi ya títsajna ni'ya-la Narciso xi Na'èn-ná títsajnako.

¹² Tìixat'eì jè Trifena kò Trifosa jñà íchjín xi 'ñó síxá-la Na'èn-ná, kò tichjaá Pérsida xi 'ñó matsjachaá nga tìkoà ndaà síxá-la Nainá.

¹³ Tìixat'eì jè Rufo xi xó jaàjìin-ne Nainá. Kò nea-la xi 'an k'oà tìs'ín beètakoàn koni tsà nea-na.

¹⁴ Tìixat'eì jè Asíncrito, jè Flegonte, jè Hermas, jè Patrobas, jè Hermes kò xità 'ndseé xi ya títsajnako.

¹⁵ Tìixat'eì jè Filólogo, jè Julia, jè Nereo kò ndichja, kò Olimpas, ngats'ii xità xi mokjeiìn-la it'aà ts'e Cristo xi ya títsajnako.

¹⁶ Jñò nga jngò ìjngò, k'e nga sìxat'aà xinguió, nguì kòó inìma-nò tìixat'aà xinguió nga kò okixì-nò. Ngats'ii xità naxandá-la Cristo xi ì títsajna síhixat'aà-nò.

¹⁷ Ndí 'ndsè k'oàá s'ín bìtsi'bà-nò nga chítsejèn-là jñà xità xi síjòya kò xi síkìts'ón-jìin koni s'ín mokjeiìn-nò, jñà xi kondrà f'ii-la kjohítsejèn koni s'ín kichità'ya jñò. Tìnchat'aàxìn-là jñà xità koi.

¹⁸ Jñà xità koi, mìtsà Nà'èn-ná Jesucristo síxá-la, tà yijo-laá síxátjì. 'Én sin 'én ndaà chja nga konachan-la xità xi mìkiì ndaà machiya-la.

¹⁹ 'An, matsjaá-na it'aà tsajòn nga jye ndaà na'ya-nò nga ndaà nìkitasòn. Tanga 'an mejèn-na nga xità chjinee kàtama it'aà ts'e kjoa xi ndaà tjín. Kò jñà kjoa xi ch'o tjín, kj'eè kiì na'ya-nò.

²⁰ Jè Nainá xi tsjá-ná kjoa'nchán, tà chibaá chja-la nga ya sìikíjnangui ndsokoò jè xità neijí mé-ne nga koma kinchanè. Kjondaà-la Nà'èn-ná Jesucristo kàtijnako-nò.

²¹ Tísíhixat'aà-nò jè Timoteo xi taña nìxákjoò-jen, kò Lucio, kò Jason kò Sosípater jñà xi xità xinguiáa ma.

²² 'An xi Tercio mì-na, xi tìkjiì-nò xojon jè, it'aà ts'e Nà'èn-ná, síhixat'aà-nò.

²³ Tìkjoa tísíhixat'aà-nò Gayo; 'an íí tijnáa í ni'ya-la nga tìkjoa íí bixoña ngats'ìi xità naxandá-la Cristo. Tísíhixat'aà-nò Erasto xità xi bítjò ton ts'e ni'ya osen; tìkjoaá síhixat'aà-nò jè 'ndseé xi 'mì Cuarto.

²⁴ Ngats'ioò, jè kàtijnako-nò kjondaà-la Jesucristo xi otíxoma-ná.

'Én xi fehet'aà-ne

²⁵ Jeya kàtjna jè Nainá xi tijnako-nò. Jè xi komà tsjá-nò ngañó tìkjoa komà kixi sìikítsajna-nò koni tsò 'én ndaà-la Nainá xi 'an okoòya-nò kò jñà 'én xi nokjoàyajìin-nò it'aà ts'e Nà'èn-ná Jesucristo. Nga jyeé tí'ya-la kjoa xi tjí'ma-la Nainá skanda sa kjòtseé;

²⁶ tanga i'ndeji jye ki'ya-la koni s'ín tíchja Xojon-la Nainá xi kiskii jñà xità xi kùchja ngajo-la Nainá kjòtseé. K'oaá s'ín tíchja kjotíxoma-la Nainá xi tijná nità mé nachrjein-nè. Jè kjoa'ma-la Nainá, jye kis'enojmi yije-la ngats'ìi xità naxandá xi tjín nga tíjtsa isò'nde mé-ne nga kàtasíkitasòn-ne koni s'ín mokjeiín-la.

²⁷ Jè Nainá xi tajngoò ma-ne, xi tjín-la kjoachjine, kàtas'e-la kjoa jeya it'aà ts'e Jesucristo nità mé nachrjein-ne. K'oa's'ín kàtama.

Xojon carta-la San Pablo xi kiskii ítjòn-la xita naxandá-la Cristo xi títsajna Corinto

Kó tsò Pablo nga síhixat'aà jñà xita naxandá-la Cristo xi títsajna Corinto

¹ 'An xi 'mì-na Pablo, xi xó k'oas'ín kinokjoà-na nga 'an tsibíxáya-na Cristo Jesús, nga k'oas'ín kjòmejèn-la Nainá. Títsañihixat'aà-nòjen kò Sóstenes xi 'ndseeé chibá it'aà ts'e Cristo.

² Tikjii-nò xojon carta jè, jñò xi naxandá-la Cristo maà xi títsajnaà ján Corinto, xi jye kisitsjeè-nò Nainá nga ya títsakjoòkoo Cristo Jesús nga xó k'oas'ín jaàjii-nò Nainá mé-ne nga xita tsjeè-la komaà kò ngats'ii xita xi xki xi ján chjat'aà-la nga jeya síkijna jè Na'èn-ná Jesucristo xi otíxoma-ná, tíkoo jè otíxoma-la xita koi. Xi Na'èn-ná 'mì-lá, tíkoo Na'èn-ná tsò-la jñà xita koi.

³ Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya ijii inima-nò.

'Én xi kiichja Pablo nga tsjá-la kjondaà Nainá

⁴ Kjit'aà nachrjein tsjaà-la kjondaà Nainá xi it'aà tsajòn koií kjoa-la jñà kjondaà xi kitsjaà-nò Nainá nga ndaà kisichikon-t'in-nò it'aà ts'e Cristo Jesús.

⁵ Nga yaá it'aà ts'e Cristo, Nainá kisichikon-t'in yije kjohítsjeèn-la inima-nò, kós'ín nokjoà, kò kós'ín machiya-nò 'én-la Nainá.

⁶ Nga k'oaá s'ín 'ya-la, nga jè 'én ndaà-la Nainá xi kjoa ts'e Cristo kjòkixiyaá ijii inima-nò.

⁷ Nímé kjotjò-la Nainá chjat'aà-nò k'e nga tákó títsachiñá-la nga kjoí íjngoò k'a Jesucristo xi otíxoma-ná.

⁸ Nainá tsjá-nò nga'ño skanda k'e nga kjoehet'aà nachrjein, mé-ne nga nímé jé sakòt'aà-nò k'e nga kitjojen íjngoò k'a Jesucristo xi otíxoma-ná.

⁹ Nainá xita kixi-né, síkitasòn-né koni s'ín tsjá 'én-la. Xó k'oaá s'ín kiichja-nò nga ya chraña kitsajnakjoòkoo Jesucristo xi ki'ndí-la tsò-la nga jè otíxoma-ná.

Mé-ne kjòjòya-ne naxandá-la Cristo ján Corinto

¹⁰ Ndí 'ndsè kò tichjaá, it'aà ts'e okixi xi kitsjaà-na Jesucristo xi otíxoma-ná, tìbitsi'bà-nò ngats'ioò, ngàsòn ngáya títsajnakoo xinguiòo, mé-ne nga mì kojòya-ne kjohítsjeèn-nò. Tajngoò kjohítsjeèn tíkjeén, ngàsòn jchósòn-la nita mé kjoa-ne.

¹¹ Koií koxan-nò ndí 'ndsè, nga jñà xita ni'ya-la Cloé, tsibénojmí-na nga kjoasii tjín-nò.

¹² Koií k'oas'ín tixan-nò, tjín i'nga xita xinguiá xi tsò: “'An, jé Pablo fit'aà-la.” Tjín xi tsò: “'An, jé Apolos fit'aà-la.” Tjín xi tsò: “'An, jé Cefas [xi tíkoo Pedro 'mì] fit'aà-la.” Tjín xi tsò: “'An, jé Cristo fit'aà-la.” ¿Mé-ne obixón-nò?

¹³ ¿A kjìn ya ma-ne Cristo? ¡Majìn! ¿A jé Pablo xi kisit'aà krò it'aà tsajòn? ¡Majìn! ¿A it'aà ts'eé Pablo komà bautizar? ¡Majìn!

¹⁴ Ndaà chjí-la Nainá, 'an, mìtsà yá xita kis'iaàn bautizar ya naxandá tsajòn, ta jé Crispo kò Gayo,

¹⁵ mé-ne nga mì yá xita kitso-ne: “It'aà ts'eé Pablo komà bautizar.”

¹⁶ Saá tíbitsjeèn-na nga tíkoo kis'iaàn bautizar Estéfnas kò xita xikjín, tanga mìkii bítsjeèn-na tsá kis'iaàn bautizar xi kj'eij xita.

¹⁷ Jé Cristo mìtsà koi xá kisikasén-na nga xita s'iaàn bautizar; koií xá kisikasén-na nga 'an kichjaya 'én ndaà-la Nainá. K'e nga chjaya, mìtsà 'én-la xita chjine síkjeén; majìn-na nga chija nga'ño-la krò-la Cristo.

Jé Cristo, nga'ño-la Nainá-né kò kjoachjine-la Nainá-né

¹⁸ Jǎ̀nà 'én xi tǎ̀nokjoáya it'aà ts'e Cristo nga k'en-t'aà krò, ta kjoa ská ma-la jǎ̀nà xǐta xi ya tǎ̀jímaya ndiyá-la ì'nde kjo'in. Tanga jǎ̀nà xi jye titsabitjokàjǎ̀nà kjo'in, k'oaá s'ín mokjeiín-ná nga jè 'én-la Cristo nga'ńó-la Nainá-né.

¹⁹ K'oaá s'ín tǐchja Xojon-la Nainá nga tsò:

Jǎ̀nà xǐta xi 'ńó tǎ̀jín-la kjoa chjine,
'aán kokoò-la nga nímé chjí-la kjoachjine-la.
'Aán kochrjeènguia kjohítsjeèn-la
jǎ̀nà xǐta xi 'ńó machiya-la.

²⁰ Jǎ̀nà xǐta xi 'ńó tǎ̀jín-la kjoachjine, kò xi 'ńó chjine xojon kò xi joóya-ne kjoa xi tǎ̀jín isò'nde, ì'nde, ¿ńánda tǐtsajna kjoachjine-la? Jè Nainá, kisískáya-la kjoachjine xi tǎ̀jín-la xǐta isò'nde.

²¹ Nainá 'ńó xǐta chjine, mìkiì kitsjaà'nde-la xǐta nga it'aà ts'e kjoachjine-la isò'nde kǐtseèxkon. Nainá k'oaá s'ín sasén-la nga ochrjekàjǎ̀n kjo'in jǎ̀nà xi mokjeiín-la it'aà ts'e 'én ndaà-la Nainá xi kjoa ts'e Cristo, 'én xi tsò-la xǐta koi, kjoa ská-né.

²² Jǎ̀nà xǐta judío [mìkiì mokjeiín-la] nga jé xi mejèn-la nga skoe kjoxkón xi 'ńó jeya tǎ̀jín, kò jǎ̀nà xi mìtsà xǐta judío [tǐkoaá mìkiì mokjeiín-la] nga koi ótsji xi 'ńó kjoa chjine.

²³ Tanga ngajen k'oaá s'ín nokjoàya-jen nga krò k'en-t'aà Cristo [xǐta xi xó kisikasén-ne Nainá]. Jǎ̀nà xǐta judío mìkiì mokjeiín-la kjoa xi komàt'in Cristo, kò jǎ̀nà xi mì xǐta judío, kjoa ská ma-la.

²⁴ Tanga jǎ̀nà xǐta xi xó jaàjǎ̀n-ne Nainá, xi xǐta judío kò xi mìtsà xǐta judío, k'oaá s'ín mokjeiín-la nga jè Cristo nga'ńó-la Nainá-né kò kjoa chjine-la Nainá-né.

²⁵ Kjoa-la Nainá xi ta kjoa ská tsò-la xǐta isò'nde, kjoa chjine-la Nainá-né. Ìsáá tse kjoachjine tǎ̀jín-la mì k'oaá-ne koni kjoachjine xi tǎ̀jín-la xǐta isò'nde. Kò jè kjoa-la Nainá xi ta kjoa indaà tsò-la xǐta isò'nde, nga'ńó-la Nainá-né. Ìsáá tse nga'ńó tǎ̀jín-la mì k'oa-ne koni nga'ńó xi tǎ̀jín-la xǐta isò'nde.

²⁶ Jǎ̀nò ndí 'ndsè kò ndí tichjaá, tǐkítsjeèn k'e nga sa jaàjǎ̀n-nò Nainá, chibaá ma-nò xi xǐta chjine tsò-nò xǐta isò'nde, kò chibaá ma-nò xi xǐta ítjòn titsajnaà, tǐkoa chibaá ma-nò xi ya ní'ya-la xǐta skò-la kits'ìon.

²⁷ Tanga Nainá jaàjǎ̀n jǎ̀nà xǐta xi tsò-la xǐta isò'nde nga chiba kjohítsjeèn tǎ̀jín-la mé-ne kosobà-la jǎ̀nà xǐta chjine. Tǐkoa jaàjǎ̀n Nainá xi tsò-la xǐta isò'nde nga nímé chjí-la mé-ne kosobà-la jǎ̀nà xǐta xi xǐta ítjòn tǐtsajna.

²⁸ Nainá jaàjǎ̀n xǐta ima kò xǐta xi bitjongui xi tsò-la xǐta isò'nde nga nímé chjí-la, mé-ne kǐtjongui-ne jǎ̀nà xǐta xi tsò nga jǎ̀nà tǐtsajna ítjòn,

²⁹ mé-ne nijngoò xǐta xi 'nga sǐkǐjna-ne yijo-la nga nguixkon Nainá.

³⁰ Tanga tǐjè-ne Nainá kisíkítsajna-ná Cristo Jesús. K'oaá tǐs'ín kis'ìin nga it'aà ts'e Cristo sakó-ná jè kjoachjine, nga jè Cristo, xǐta kixi s'ín-ná, xǐta tsjeè s'ín-ná kò sǐkítsajnadejǐ-ná kjoa ts'e jé-ná.

³¹ Koni s'ín tǐchja Xojon-la Nainá nga tsò: “Jè xi jeya sǐkǐjna yijo-la, ta saá Nainá jeya kàtasǐkǐjna.”

2

¹ Ndí 'ndsè kò tichjaá, k'e nga kiikon-nò nga tsibenojmí-nò 'én-la Nainá, mìtsà koi 'én kichjà-nò xi maxkón-la xǐta k'e nga 'nchré kò xi tsò-la nga 'én-la xǐta chjine.

² K'e nga tsohótijnako-nò, k'oaá s'ín kiskoòsòn-la; mìtsà mé kjoa xi kj'eíi kisíkítsjeèn; ngui tà 'én-la Jesucristo tsibenojmí-nò, nga jè-né xi krò k'en-t'aà.

³ K'e nga ijchò kènojmí-nò 'én-la Nainá, indaàkjoá ijchoa. Titsakjoòn-ná skanda tǐhotsé-ná.

⁴ K'e nga kichjàyajǎ̀n-nò mìtsà 'én-la xǐta chjine kisíkjeèn mé-ne nga kòkjeiín-nò. Ta saá jè Inima Tsjeè-la Nainá tsakó nga'ńó-la nga kòkjeiín-nò.

⁵ Mé-ne jè kjoa xi mokjeiín-nò it'aà ts'e Cristo, mìtsà ya nchrobá-ne kjoa chjine-la xita, yaá nchrobá-ne nga'ño-la Nainá.

Xi nguì kjoa chjine, it'aà ts'eé Nainá nchrobá-ne

⁶ Kixí kjoa 'én chjineé nokjoàya-lajen jña xita xi jye tímajchínga nga mokjeiín-la it'aà ts'e Cristo. Tanga mìtsà kjoa chjine ts'e isò'nde nokjoàya-jen, ni mìtsà ts'e xita ítjòn xi tjín isò'nde xi jye tíchija nga'ño-la.

⁷ 'Én xi nokjoàya-jen, kjoa chjine ts'e Nainá-né, jè kjoachjine xi tjí'ma-la xi k'oas'ín kiskoòsòn-la skanda tisa kjòtseé nga jña jeya kitsajnaá.

⁸ Nijngoò xita ítjòn xi tjín isò'nde kjòchiya-la it'aà ts'e kjoa chjine koi. Tsà kjòchiya-la, mì-la kiì k'oas'ín krò kisik'en-t'aà Na'èn-ná Jesucristo xi tjín-la kjoa jeya.

⁹ Xojon-la Nainá, k'oaá s'ín tíchja nga tsò:

Jña xita xi matsjakeè Nainá,
jè tjíndaà-la kjoa xi ni saá jngoò xita xi xkon beè-ne,
xi líká-la 'nchré-ne
xi ko inima-la machiya-la.

¹⁰ Nainá, it'aà ts'e Inima Tsjeè-la tsakó-najen kjoa koi. Nga jè Inima Tsjeè-la Nainá ótsjiya yije-né skanda jña kjoa xi mìkiì ndaà fiya-ná it'aà ts'e Nainá.

¹¹ ¿Yá xita-ne xi machiya-la kó tsò kjòhítsjeèn xi tíjìn inima-la xita xi kj'eíí? Tà jè tíjìn inima-la kó tsò kjòhítsjeèn-la. K'oaá tís'ín tjín kjoa ts'e Nainá, nijngoò xita tíjìn-la kó tsò kjòhítsjeèn-la Nainá; ta jè Inima Tsjeè-la tíjìn-la.

¹² Ngajen, mìtsà jè inima-la xita isò'nde kitjoé-najen. Jè Inima Tsjeè-la Nainá kitjoé-najen, mé-ne nga jcha-najen kjoa xi Nainá kitsjaà kjotjò-ná.

¹³ 'Én koi, k'oaá s'ín nokjoà-jen koni s'ín okóya-najen Inima Tsjeè-la Nainá. Mìtsà kjòhítsjeèn ts'e xita isò'nde. 'Én Tsjeè-la Nainá bènojmi-jen xi kjoa ts'e Inima Tsjeè-la.

¹⁴ Jè xi mìtsà xita-la Cristo, mìkiì machiya-la 'én xi ts'e Inima Tsjeè-la Nainá. Tà kjoa ská ma-la. Mìkiì fahas'en-jìin-la, nga mochjeén-né nga it'aà ts'e Inima Tsjeè-la Nainá kinchátsjiyaá.

¹⁵ Tanga jè xita xi Inima Tsjeè-la Nainá tíjnajìn inima-la, maá-la ótsjiya yije nita mé kjoa-ne. Tanga it'aà ts'e xita jè, mì yá xita xi koma-la kohótsjiya kjòhítsjeèn-la.

¹⁶ K'oaá s'ín tíchja Xojon-la Nainá nga tsò: “¿Yá-né xi beè kjòhítsjeèn-la Nainá? ¿Yá-né xi koma kokòya-la?” Tanga jña tjín-ná kjòhítsjeèn xi ts'e Cristo.

3

Jña xita xi síxá it'aà ts'e Nainá ján Corinto

¹ Jñò ndí 'ndsè ko tichjaá, mìkiì komà kos'ín kichjàko-nò koni xita xi ndaà tíjìn inima-la Inima Tsjeè-la Nainá. Ta k'oaá s'ín kichjàko-nò koni tsà taxki xita isò'nde xi tà kjoa ts'e yijo-la ótsji, koni tsà tákó ndí ixti xó xi it'aà ts'e Cristo.

² Mìtsà 'in tjín 'én xi tsakoòya-nò; k'oas'ín ngaya-la koni ndí ixti xó xi sa nchihoki, tà tsjín 'biì, mìtsà tsojmì tájaà kine. Jñò, kj'eè kiì ndaà fahas'en-jìin-nò 'én-la Nainá, k'oaá ngaya-la koni tsojmì tájaà xi kj'eè kiì ma chine skanda nachrjein i'nde.

³ Táko k'oaá s'ín 'nè koni s'ín xita xi kjoa ts'e yijo-la ótsji. Machinicha-nò xinguiò, chitiya-nò nita mé kjoa-ne. Kjoa koi, kjoa ts'e xita isò'nde-né.

⁴ K'e nga bixón: “An, xita ts'e Pablo-ná”, ko jè xi ijngoò tsò: “An, xita ts'e Apolos-ná”, jñò, k'oaá s'ín nokjoà koni chja xi taxki xita isò'nde.

⁵ An xi Pablo 'mì-na, ko Apolos, tà xita chi'nda-najen xi nixá-lajen Nainá. It'aà tsajeén kòkjeiín-nò 'én-la Nainá, nga ijngoò ijngoò-jen ki'nè-jen xá xi Na'èn-ná kisingatsja-najen.

⁶ Aan tsakoòya-nò 'én-la Nainá, k'oaá ngaya-la koni jngoò xita xi bitje xojmá, jè Apolos kiskinìnda-la, tanga jè Nainá tísjchá.

⁷ Mìtsà jè x̄ita xi bítje tsojmì, n̄i m̀tsà jè xi kiǹndá-là xi chj́-là, ta jngoò jè Nainá xi síjchá tsojmì xi sitje xi 'n̄ó chj́-là.

⁸ Jè xi bitje k̄o xi kiǹndá-là, ta jngoò xá t̄jín-ne xi s'ín. Tanga jè Nainá tsjá-là chj́-là koni t̄jín xá xi kis'iin nga jngoò ìjngoò.

⁹ Ngajen, yaá taña n̄ixákjoè-jen xá-là Nainá. Koá j̄ñò-nò ì'nde ñánda sitje 'én-là Nainá. T̄ikoáá j̄ñò-nò ni'ya-là Nainá xi ngajen b́indaà-jen.

¹⁰ Koni s'ín t̄jín k̄jondaà-là Nainá xi kitjoé-na, 'an-ná xi chjine chrj́o ítjòn, xi tsibijna tàts'en chrj́o-là ni'ya. Kj'ejí x̄itaá b́indaàsòn ni'ya. Tanga j̄ñà xi b́indaàsòn, ndaà k̄atasíkinda nga jngoò ìjngoò kós'ín k̄iindaà.

¹¹ Mì t̄i yá xi k̄oma-là k̄ijna ìjngoò-isa tàts'en chrj́o ni'ya koni jè xi jye t̄jna, nga jè Jesucristo t̄jna koni tàts'en chrj́o ni'ya.

¹² Tàts'en chrj́o ni'ya, k̄omaá sindaàsòn-ne k̄ich̄a oro, plata, ndaj̄o chj́i xi 'n̄ó ndaà k̄joàn, nas'ín yá, nas'ín x̄ka paja, o x̄ka ndiji.

¹³ Tanga j̄ñà xá xi s'ín nga jngoò ìjngoò x̄ita, k'eé j̄cha-là jè n̄achrjein k'e nga sindaàj̄in-là x̄ita. N̄achrjein jè, ni'ín k̄joíko, koá jè ni'ín skót'aà nga jngoò ìjngoò skaya xá xi komà.

¹⁴ Tsà jngoò xá k̄ich̄ikjoako-là ni'ín xi skót'aà, tjoé-là chj́-là jè x̄ita xi k̄iindaàsòn.

¹⁵ Tanga tsà jè xá xi kisindaàsòn, tsà k̄it̄i, chijaá chj́-là. Tanga jè x̄ita k̄itjokàj̄in kjo'in koni jngoò x̄ita xi bitjokàj̄in ni'ín.

¹⁶ J̄ñò, ¿a m̀tsà t̄j̄in-nò nga ni'ya ìngo tsjeè-là Nainá 'm̀-ndò? Nga jè In̄ima Tsjeè-là Nainá t̄jnaj̄in-nò.

¹⁷ Tsà yá x̄ita xi mejèn-là s̄ikits'ón-j̄in-là ni'ya tsjeè-là Nainá, Nainá t̄ikoáá s̄ikits'ón-j̄in-là jè x̄ita xi k'oas'ín s'iin. Nga jè ni'ya-là Nainá, tsjeè-né. Koá j̄ñò-nò xi ni'ya tsjeè-là Nainá 'm̀-ndò.

¹⁸ Kì yijo-nò chon̄ach̄an-là, tsà yá xi k'oas'ín síkítsjeèn nga 'n̄ó t̄jín-là k̄johítsjeèn xi ts'e kjoa chjine-là ìsò'nde, ta saá k̄os'ín k̄atas'ín koni tsà tsj̄in-là k̄johítsjeèn, mé-ne nga nguì x̄ita chjine k̄oma-ne.

¹⁹ Jè kjoa chjine-là x̄ita ìsò'nde, it'aà ts'e Nainá, kjoa ská tsò-là. Xoj̄on-là Nainá, k'oáá s'ín t̄ich̄ja nga tsò: “Nainá, k'oáá s'ín s'ín nga j̄ñà x̄ita chjine, t̄j̄nà-ne kjoa maña-là k̄ixoj̄in-ne.”

²⁰ Jè Xoj̄on-là Nainá, ìjngoò k'a t̄jít'aà ñánda tsò: “Nainá, beè-né nga n̄imé chj́-là k̄johítsjeèn-là x̄ita xi chjine tsò-là yijo-là.”

²¹ K'oáá ma-ne, j̄ñò, k̄i n̄ijngoò x̄ita xi 'nga n̄ik̄jna. Nga ngats'iì xi t̄jín, k̄jondaà tsaj̄on yije-nò.

²² Tsà jè Pablo, tsà jè Apolos, tsà jè Cefas [xi t̄ikoá Pedro 'm̀], tsà jè ìsò'nde, tsà jè kjoabinachon, tsà jè kjoa biyaà, tsà jè n̄achrjein ì'nde, tsà jè n̄achrjein xi sa nchrobá, k̄jondaà tsaj̄on yije-nò.

²³ J̄ñò, ts'e Cristo-nò, koá jè Cristo ts'eé Nainá.

4

Xá-là x̄ita xi tsibíxáya-là Jesús

¹ K'oáá s'ín j̄chatakòn-nájen koni x̄ita ch̄i'nda xi síxá-là Cristo, nga ngajen k̄jòngatsja-jen nga k̄okóya-jen kjoa t̄j́'ma-là Nainá.

² Jngoò x̄ita xi xá mangatsja, mochjeén-né nga k̄ata'ya-là nga kixi síkitasòn xá-là.

³ 'An, m̄ik̄i sikájnoa xi it'aà tsaj̄on kó tsò k̄johítsjeèn-nò, a ndaá t̄isikitasoàn, a xi ch'oó t̄isikitasoàn xá xi 'an k̄jòngatsja, k̄o kó s'ín síkítsjeèn j̄ñà x̄itaxá xi b́indaàj̄in-là x̄ita ìsò'nde. Skanda 'an, m̀ t̄i k̄i xan-na tsà ndaà t̄jín k̄o tsà ch'oó t̄jín xá xi t̄is'iaàn.

⁴ 'An, nas'ín k'oas'ín síkítsjeèn nga tsj̄in-na jé, tanga m̀tsà tsò-ne kjoa nga nguì x̄ita kixi-ná. Nga jè N̄a'èn-ná xi b́indaàj̄in-na.

⁵ K'oáá ma-ne k̄i tà ch̄à jé b̄inè-là xinguīo nga ti kj'eè bijchó n̄achrjein. Ch̄iña-kjoa k'e nga kjoí N̄a'èn-ná xi síhiseèn nga j̄cha-là kjoa xi t̄j́'ma ñánda nga j̄ñò choòn. Koá

sìikatsjeèn kó tsò kjohítsjeèn xi tjiìin inìma-là xìta. Ikjoàn Nainá jeya sìikíjna koni s'ín nga ok'ín-là nga jngoò òjngoò xìta.

⁶ Ndí 'ndse kò tichjaá, koi 'én tìchjàko-nò kjoa xi mangásòn ìt'aà ts'an kò ìt'aà ts'e Apolos xi kjondaà tsajòn mé-ne nga mìkìl sikkatonè-là koni tsò 'én-là Nainá. Kì k'oaá s'ín nìkítsjeèn nga jngoò chì'nda-là Nainá ìsa ndaà nachrjenguioò koni chì'nda xi i'nga.

⁷ Jñò, ¿mé-ne koa bixón-nò nga ìsa 'ñó chjì-nò koni xìta xi i'nga? ¿Mé kjondaà xi tjin-nò xi mìtsà Nainá kitsjaà-nò? Tsà jye kitjoé-nò ngats'ii kjondaà, ¿mé-ne nga 'nga ma-ne takòn koni tsà ta nga'ño tsajòn kisakò-nò?

⁸ Jñò, k'oaá s'ín machiya-nò koni tsà jyeé ma yije-nò, koni tsà 'ño xìta nchiná ìt'aà ts'e Nainá. K'oaá s'ín nìkítsjeèn koni tsà xitaxá ìtjòn titsajnaà kò ngajen mìtsà xitaxá titsajna-jen. Ndaà-là tjin tsà kixi kjoa nga otìxoma, mé-ne ngajen koma kotìxomako-nòjen.

⁹ 'An, k'oaá s'ín sikkitsjeèn, ngajen xi ìt'aà ts'e Cristo kisixáya-najen, Nainá k'oaá s'ín kiskoòsòn-là nga ngajen-nájen xi fehet'aà-ne, xi tjinè-najen nga kiyá-jen nga nguixkon isò'nde, nga nguixkon xìta kò àkjale. Jñà xìta, tà nchikotsejèn-najen nga tsja ma-là mé kjo'in xi timat'in-jen.

¹⁰ Ngajen, xi kjoa ts'e Cristo, xìta ská 'yatakòn-najen; tanga jñò, ìt'aà ts'e Cristo, k'oaá s'ín 'ya-nò nga 'ño tjin-nò kjoachjine. Ngajen, k'oaá s'ín 'yatakòn-najen nga xìta indaàkjoa-nájen; tanga jñò, xìta tájaà-nò. Ngajen, mì yá xìta beèxkòn-najen; jñò, beèxkòn-nò xìta.

¹¹ Skanda jè hora jè, kjinchrá-najen, xínda-najen, tsjin-najen nikje xi chíkjá-jen, 'ño beètoòn-najen xìta, tà tjaàsòn-najen, tsjin-najen ni'ya.

¹² Skanda bijtaá-najen nga 'ño nixá-jen. K'e nga chja'on-ko-nájen xìta, ngajen, nijét'aà-lajen Nainá nga katasíchikon-t'in. K'e nga kondra fi-najen xìta, chíkjoakoó-najen.

¹³ 'On chjako-najen xìta, ngajen ndaà nokjoá-lajen. K'oas'ín beè takòn-najen koni tsà tjé-là isò'nde. Skanda nachrjein i'nde, jñà xìta k'oaá s'ín beètakòn-najen koni tsojmì xi ningui-ne nga bíxteèn.

¹⁴ Koni s'ín tikjiil-nò, mìtsà tìs'iin sobà-nò. Kjohítsjeèn tìtsja jngoò-nò koni tsà ìxti ts'an xi matsjake.

¹⁵ Nas'ín te jmii ma-ne xi okóya-nò ìt'aà ts'e Cristo, ta jngoò ma-ne xi na'èn-nò. 'An-ná xi komà na'èn-nò nga mokjeiín-nò ìt'aà ts'e Cristo Jesús nga 'aán tsibenojmí ìtjòn-nò 'én ndaà-là Nainá xi kjoa ts'e Cristo.

¹⁶ K'oaá ma-ne bìtsi'bà-nò nga k'oas'ín tìjchá yijo-nò koni 'an.

¹⁷ Koi kjoa-là tìsikasén-nò Timoteo, xi ki'ndí-na xan-là nga 'ño matsjake kò kixi síxá-là Na'èn-ná. Jè sìkítsjeèn-nò kós'ín tìjnaako Cristo Jesús nga mokjeiín-na ìt'aà ts'e, koa kós'ín okoòya-là xìta naxandá-là Cristo nga kijndà naxandá ñánda bijchoa.

¹⁸ Tjin i'nga xìta xinguiòo xi 'ño 'nga chja, k'oaá-là s'ín sikkitsjeèn tsà mìkìl kjiikon-nò.

¹⁹ Tanga tsà Nainá mejèn-là, kjiikon nitoón-nò. K'e nga kìjchoa, skoeè jñà xìta xi 'nga chja, a nga'ño-là Nainá xi tjin-là a xi tà jè 'én-là xi 'nga chja.

²⁰ K'e nga jè Nainá tíhotìxoma jngoò-là xìta, mìtsà ta kjoa ts'e 'én mochjeén, koó nga'ño-là Nainá mochjeén.

²¹ Jñò, ¿kós'ín mejèn-nò nga kjián? ¿A mejèn-nò nga kjo'in tsjaà-nò k'e nga kìjchokon-nò, a xi mejèn-nò nga kò kjondaà-na kò kjotsja-na kìjchokon-nò?

5

Jé xi kisakò ya ijìin naxandá-là Cristo ján Corinto

¹ Jye na'yà-là nga kjoachijngui tíma ijìin tsajòn. Kjoa xi tíma, skanda jñà xìta xi mìkìl beèxkòn Nainá, mì k'oaá s'ín. Nga yaá tijnajìin jngoò-nò xìta xinguiòo xi neajòn-là tsóhoko.

² Jñò, ¿mé-ne 'nga nìkítsajna-nò yijo-nò? Mochjeén-né nga kjoaba kìtsajnajñòò, kò jè xìta xi kotjin jé tíhotsji, tìnachrjekajioòn.

³ 'An, kixí kjoa, kjiin tijná-nò, tanga kjohítsjeèn-la inima-na yaá tijnajiin osen-nò. 'An, k'oaá ngaya-la koni tsà ya tijnajiin-nò, jyeé kiskoòsòn-la mé kjo'in xi sinè-la jè xita xi k'oa tjin jé tihótsji.

⁴ Jñò, k'e nga koxkóya nga jeya sikíjna Jesucristo xi otíxoma-ná, jè kjohítsjeèn-la inima-na yaá kijnajiin-nò, tikoá yaá kijnajiin-nò jè nga'nño-la Na'èn-ná Jesucristo. Kò it'aà ts'e Na'èn-ná Jesucristo,

⁵ xita jè, xita neí kàtangatsja yijo-la nga kàtas'e-la kjo'in, kò kàtasíkájno jé-la nga mì tì jé kohótsji-ne mé-ne nga kitjokàjiin-ne kjo'in inima-la, k'e nga kjoí ijngò k'a Jesucristo xi otíxoma-ná.

⁶ Miki ndaà tjin nga 'nga nikítsajna yijo-nò. ¿A mì tjiin-nò nga nas'ín ta chiba na'yo san sísan yije xikjín na'yo?

⁷ Tinachrjekàjioòn jè xita xi ótsji jé k'oaá ngaya-la koni tsà na'yo san xi mì tì ndaà-ne nga síkíts'ón-nò, mé-ne jñò k'oas'ín kjoàn koma-nò koni na'yo xitse ts'e inchrájin xi tsjin-la na'yo san. Nga jñò, jyeé kitjaàxìn-nò kjoa ts'e jé koni na'yo san jchínga nga jé Cristo k'en ngajo-ná koni jñà orrè xi kisik'en xita Israel k'e nga Paxko.

⁸ Koi kjoa-la jñá, k'oaá s'ín kináchrjé s'eí nga jyeé kisikítsajnandeí-ná Nainá kjoa ts'e jé, koni s'ín xita Israel k'e nga Paxko nga sítsjeè ni'ya-la nga faáxìn yije na'yo san. Jñá, k'oaá tis'ín chjaàxián kjoa ts'e jé kò kjoa ch'o kò nguì kjoatsjeè kò kjoakixi sikjeén k'oaá ngaya-la koni inchrájin xi tsjin-la na'yo san.

⁹ Jè xojon xi kisikasén ítjòn-nò, k'oaá kixan-nò nga mì ya koahijtakoo jñà xita xi kjoa chijngui s'ín.

¹⁰ K'e nga k'oa kixan-nò, mìtsà jñà kisikaxkia jñà xita isò'nde xi kjoa chijngui s'ín, kò jñà xi tse mejèn-la, kò jñà xita chijé, kò jñà xi xkòsòn beèxkón. Xita koi, xki xi ján satíkjoò. Ta jè xi koma kinchat'aàxìn-là tsà xìn isò'nde onguíò.

¹¹ Jñà 'én xi kixan-nò, jè-né nga mì ya tsjahijtakoo jñà xi tsò nga xita-la Cristo xi 'ndsè chibá tsà tákó kjoa chijngui nchis'ín, xita xi tse mejèn-la, xi xkòsòn beèxkón, xi ch'o chjajno-ná, xi xán 'biì, xi chijé s'ín. Jñà xita xi k'oas'ín s'ín, skanda mìki mochjeén nga kichikoo.

¹²⁻¹³ Mìtsà jñá oko-ná nga bíndaàjiin-lá jñà xita isò'nde. Jè Nainá kiindaàjiin-la jñà xita koi. Tanga jñò oko-nò nga kíndaàjiin-là xita naxandá-la Nainá xi tsajòn. K'oaá ma-ne nga xan-nò, chjaàxiòn jè xita xi ch'o tís'ín xi ya tijnajiin-nò.

6

Kós'ín s'iin jñà xita-la Cristo nga tijnà xikjín kiindaàjiin-la

¹ Jñò, k'e nga tsà kjoasì tjin-nò kò xita xinguiò, ¿mé-ne jñà mejèn-nò kiindaàjiin-nò jñà xitaxá xi mìtsà xita-la Cristo? ¿A mìtsà tà jñà kàtindaàjiin-nò xi xita naxandá-la Cristo?

² ¿A mìtsà tjiin-nò nga jñá xi xita naxandá-la Cristo 'mì-ná, jñá kíndaàjiin-lá xita isò'nde? Tsà jñò kiindaàjiin-là xita isò'nde, ¿a mì chíkjoa-nò nga ta jñò kíndaàjiin-là xita xinguiò kjoa xi chiba tjin?

³ ¿A mìtsà tjiin-nò nga tikoá it'aà tsaján kíndaàjiin-lá àkjale? Tsà jñá kíndaàjiin-lá àkjale, ¿a mì koma-ná kíndaàjiin-lá xita xinguiá kjoa xi tjin i isò'nde?

⁴ K'oaá ma-ne tsà ta kjoa ts'e isò'nde-né xi tjin-nò, tinókjoa jngò-là xita 'ndsè xi jñò nachrjenguiò nga 'mì-là nímé chíj-la, jè kàtindaàjiin-nò.

⁵ Koi koa xan-nò mé-ne nga kàtasobà-nò. ¿A mìtsà tjina jngò xita xinguiò xi tjin-la kjohítsjeèn nga koma-la kiindaàjiin-la xita xi 'ndsé chibá?

⁶ Mìtsà ta koi kjoa-la nga bixkàn-koo xinguiò, skanda yaá onguíko xinguiò nguixkon xitaxá xi mìki beèxkon Nainá nga bíndaàjiin-nò.

⁷ Kixí kjoa, ch'óó tjin kjoa k'e nga tijnò bixkàn-kò-nò xinguiò. ¿Mé-ne mìtsà ta saá nikjeín-là xinguiò k'e nga ch'o síko-nò? Ta saá tikjeín-la nga kàtasíchjé-nò.

⁸ Tanga jñò, k'oaá tis'ín ch'o nikoo xinguiò, tijnò níchjé-là.

⁹ ¿A mìtsà tǎjǎn-nò nga jǎn xi mìtsà xǐta kǐxǐ, mìkǐ kjoahas'en-jǎn i'nde ñánda tíhotíxoma Nainá? Jǎn xǐta xi kjoa chǐngui s'ín, jǎn xi xkósòn beèxkón, jǎn xǐta xi jye chixàn xi kjoa chǐngui s'ín, jǎn xǐta xǐ'ndé xi tǐ x'ín xǐkǐn oyǐjòkò-ne,

¹⁰ jǎn xǐta chǐjé, jǎn xǐta tse mejèn, jǎn xǐta xi xán 'biì, jǎn xi xǐta chǐajno-la, jǎn xǐta xi konachan-la xǐkǐn nga síchǐjé-la, kǐ yǐjo-nò chonachan-la nga jǎn xǐta xi koatǐjǐn kjoach'o xi s'ín mìkǐ kjoahas'en-jǎn ñánda tíhotíxoma Nainá.

¹¹ Jǎn, k'e nga sa kjòtseé k'oa tǐs'ín kǐ'nè i'nga; tanga i'ndeǐ, jye kisanǐjno kjoa ts'e jé-nò, jye xǐta tsjeè-la Nainá komà, kò jye xǐta kǐxǐ komà ìt'aà ts'e nga'ño-la Jesucristo xi otíxoma-ná kò ìt'aà ts'e Inǐma Tsjeè-la Nainá.

Kó s'ín síchjeén yǐjo-ná mé-ne nga jeya kǐjna Nainá

¹² Tǐjǐn i'nga xǐta xǐnguiòo xi tsò: “An tǐjǐndeé-na nǐta mé kjoa xi s'iaàn.” Kǐxǐ kjoa tǐjǐnde-né, tanga mìkǐ ok'ín-la tsà k'oas'en yǐjeé ngats'ì kjoa; k'oaá ma-ne, 'an, mìkǐ tsjaà'nde-la yǐjo-na nga síkǐjne-na jngoò kjoa.

¹³ Tǐkooá tǐjǐn i'nga xi tsò: “Jǎn tsojmǐ xi ma chine, ts'eé ǐndso'ba, koa jè ǐndso'ba mochjeén-la tsojmǐ xi ma chine.” Kǐxǐ kjoa, tanga ǐngajò kjoa koi, Nainá síkǐjehet'aà. Tanga jè yǐjo-ná, mìtsà kòs'ín kochjeén nga kjoa chǐngui s'eén; ìt'aà ts'e Nainá kochjeén; yǐjo-ná, ts'eé Nainá.

¹⁴ Koni s'ín kǐs'ǐn Nainá nga kǐsǐkjaáya-la Na'èn-ná Jesús, jǎn k'oaá tǐs'ín kjoaáya-ná ìt'aà ts'e kjoa biyaà nga tǐjǐn-la nga'ño Nainá.

¹⁵ ¿A mìtsà tǎjǎn-nò nga jè yǐjo-ná, yaá tǐkjoòkò ts'e Cristo? ¿A komaá síkǐjeén yǐjo-la Cristo nga síjngoòt'aà-lá ts'e chjoón ská? Majǐn, mìkǐ koma.

¹⁶ ¿A mìtsà 'yaà, k'e nga jngoò xǐta x'ín, tsà chjoón ská kǐjnako, jngoò yǐjoó koma? Nga k'oaá s'ín tǐchǐa Xojon-la Nainá nga tsò: ǐngajò xǐta koi, jngoò yǐjoó koma.

¹⁷ Tanga jè xi Na'èn-ná tǐjnako, yaá majngoòkò ǐnǐma-la kò ts'e Na'èn-ná.

¹⁸ Tǐnchat'aàxìn-la kjoa chǐngui. Jngoò xǐta, nǐta mé jè xi ótsǐ xi kǐ'eǐ jé, mìtsà yǐjo-la tǐbeètoòn. Tanga jè xǐta xi kjoa chǐngui s'ín, yǐjo-laà beètoòn.

¹⁹ ¿A mìtsà tǎjǎn-nò nga jè yǐjo-nò ni'ya-la ǐnǐma Tsjeè-la Nainá-né xi jǎn kitsjaà-nò Nainá nga tǐjnǐjǐn ǐnǐma-nò? Yǐjo-nò, mìtsà tǐ tsajòn-nò.

²⁰ Nainá jye tsakatse-nò, tseé tsǐbǐchǐtǐjǐ-nò. Koi kjoa-la jchaxkón Nainá, ndaà tǐkjeén yǐjo-nò nga ts'eé Nainá.

7

Kjoa ts'e xǐta xi bixan

¹ Ìt'aà ts'e 'én xi kǐchǐjǐnangui-ná nga kǐnǐkasén-ná xojon nga bixón: “Ndaà-la tǐjǐn, jngoò xǐta x'ín kò jè chjoón tsà mìkǐ kǐxan.”

² Tanga koi kjoa-la nga 'ño tǐjǐn kjoa chǐngui, nga jngoò ǐjngoò xǐta x'ín kàtas'e-la chjoón, kò nga jngoò ǐjngoò chjoón kàtas'e-la x'ín.

³ Koni s'ín tǐjǐn kjotíxoma ts'e kjoa bixan, jè x'ín, ndaà kàtasís'in-la chjoón-la k'e nga kójnako, tǐkoo jè chjoón, ndaà kàtasís'in-la x'ín-la.

⁴ Jè chjoón, mìtsà tǐjè otíxoma-la yǐjo-la, jè x'ín-la otíxoma-la. Tǐkoo jè x'ín mìtsà tǐjè otíxoma-la yǐjo-la, jè chjoón-la otíxoma-la.

⁵ K'e nga tsǐjǐjòkòo xǐnguiòo, kǐ yǐjo-nò nǐxkon-la xǐnguiòo. Tà k'e-né tsà ngásòn chibàya-nò kótǐjǐn nǐchǐjein mìkǐ tsǐjǐjòkòo xǐnguiòo tsà Nainá kǐnókjoat'aà-la. Xi koma ǐskan mochjeén-né nga sǐs'in-la xǐnguiòo nga mì jè xǐta neǐ skónachan-nò k'e nga tsà mì tǐ kǐ chǐkjoa-nò nga xǐn tsǐjǐjò-la xǐnguiòo.

⁶ 'Én xi tǐxan-nò tà 'an-ná xi tǐtsjaà'nde-nò; mìtsà kjotíxoma tǐbìnè-nò.

⁷ Xi ìt'aà ts'an, mejèn-na tsà ngats'ì xǐta k'oas'ín kàtǐtsajna tǐjngoò, koni 'an, tǐjngoó tǐjnaa. Tanga ǐjngoò ǐjngoò xǐta kǐts'ì-la kjotǐjò xi Nainá kitsjaà-la, kòs'ín kǐtsajna. Kǐkǐ'eǐ kǐkǐ'eǐ s'ín tǐtsajna nga ǐjngoò ǐjngoò xǐta.

⁸ Jñà x̄it̄a xi t̄ítsajna tajngoò k̄o jñà íchjín xi jye k'en x'in-la, ndaà-la t̄jín tsà tà k'oas'ín k̄ítsajna tajngoò koni 'an.

⁹ Tanga tsà mìkiì ch̄íkjoa-la nga bìtsajna ìjngó, ìsaá ndaà-ne tsà kàtixan, mì k'oã-ne tsà tsjè s̄iik'en.

¹⁰ 'An, k'oãá s'ín bìnè-la jñà x̄it̄a xi jye chixàn, nga mìkiì koma tsjeín x̄íkjín. Jè chjoón, mìkiì koma s̄iikjina x'in-la. Mìtsà kjot̄ixoma ts'an xi tsjaà-nò; ts'eé Nainá.

¹¹ Jè chjoón xi tsjeiin x'in-la, mìkiì t̄jì'nde-la nga kj'eíí x'in kixan-k̄o ìjngoò k'a. T̄ikoãá-ne kàtajoondaà-ne. T̄ikoã jè x'in, mìkiì t̄jì'nde-la nga tsjeín chjoón-la.

¹² Jñà x̄it̄a xi i'nga, k'oãá xan-la, xi tà kjoh̄ítsjeèn ts'an, mìtsà jè Na'èn-ná tsibíjna kjot̄ixoma jè. Tsà jngoò x̄it̄a x'in xi mokjeiín-la 'én-la Nainá, tsà jè chjoón-la xi t̄jínako, tsà mìkiì mokjeiín-la, tsà tsò ikon jè chjoón nga bìjnak̄o, kàt̄ijnako, k̄i tsjeiin takòn jè chjoón-la.

¹³ Tsà jngoò chjoón xi mokjeiín-la 'én-la Nainá, jè x'in xi t̄jínako, tsà mìkiì mokjeiín-la, tsà tsò ikon jè x'in nga bìjnak̄o, kàt̄ijnako, k̄i tsjeiin takòn jè x'in-la.

¹⁴ Jè x'in xi mìkiì mokjeiín-la 'én-la Nainá, it'aà ts'e chjoón-laá matsjeè-né; t̄ikoãá jè chjoón xi mìkiì mokjeiín-la, it'aà ts'e x'in-laá matsjeè-né. Tsà majìn, jñà ìxti-la mìtsà x̄it̄a kixi nga nguixk̄on Nainá, tanga ì'ndeì ìxti-la, yaá chja-ne naxandá-la Cristo.

¹⁵ Tanga tsà jè chjoón xi mìkiì mokjeiín-la 'én-la Nainá tsà mejèn-la tsjeín x'in-la xi mokjeiín-la, kàtatsjeiin. K̄o tsà jè x̄it̄a x'in xi mìkiì mokjeiín-la 'én-la Nainá, tsà mejèn-la nga tsjeín chjoón-la xi mokjeiín-la, kàtatsjeiin. Jñà x̄it̄a koi mìkiì t̄jìnè-la nga kjo'ño k̄ítsajnak̄o x̄íkjín. Nainá, jè xi mejèn-la nga 'nchán k̄ítsajna.

¹⁶ Jì chjoón xi mokjeiín-lè it'aà ts'e Cristo, mìkiì t̄jìin-lè tsà koi n̄achrjein it'aà tsjji koma k̄itjokàjìin kjo'in x'in-lè. K̄o jì xi x'in 'mì-lè nga mokjeiín-lè it'aà ts'e Cristo, mìkiì t̄jìin-lè tsà koi n̄achrjein it'aà tsjji koma k̄itjokàjìin kjo'in chjoón-lè.

¹⁷ Jngoò kjoa mejèn-na nga ndaà síkijna-la ngats'ii x̄it̄a naxandá-la Cristo, nga ìjngoò ìjngoò x̄it̄a x'in k̄o chjoón, mochjeén-né nga kos'ín kàtasíjchá yijo-la koni s'ín kitsjaà-la Nainá koni s'ín t̄ítsajna k'e nga Nainá k̄iichja-la nga x̄it̄a-la komà.

¹⁸ Tsà t̄jín i'nga x̄it̄a xi jye t̄jít'aà ch̄iba yijo-la kjoa ts'e circuncisión k'e nga x̄it̄a-la Cristo komà, tà k'oãá s'ín kàtijna. Tsà t̄jín i'nga xi kj'eé k̄i t̄jít'aà ch̄iba yijo-la, k̄i bít'aà ch̄iba-la yijo-la.

¹⁹ Xi kjoa ts'e circuncisión, tsà t̄jít'aà ch̄iba-nò k̄o tsà majìn, mìtsà mé-ne. Jè xi chjì-la nga ndaà s̄ikitasòn jè kjot̄ixoma-la Nainá.

²⁰ Nga jngoò ìjngoò, k'oãá s'ín t̄ítsajna koni s'ín t̄ítsajnaà k'e nga k̄iichja-nò Nainá.

²¹ K'e nga k̄iichja-lè Nainá, tsà ch̄i'nda t̄jini, k̄i makájno-lè. Tanga ì'ndeì tsà koma kijnandeì-ne, ndaà s'e, t̄ijnandeì-ne.

²² Jè xi ch̄i'nda t̄is'ín k'e nga k̄iichja-la Nainá nga kòkjeiín-la 'én-la, ì'ndeì t̄ijnandeì-né it'aà ts'e Cristo. K'oãá t̄is'ín t̄jín, jè xi t̄ijnandeì k'e nga k̄iichja-la Nainá, ì'ndeì ch̄i'nda-la Cristo-né.

²³ Jñò, Nainá jye tsatse-nò, k̄i k̄i bìi'nde nga x̄it̄a xi kj'eíí ch̄i'nda 'nè-là.

²⁴ Jñò ndí 'ndsè k̄o tichjaá, koni s'ín t̄ítsajnaà nga jngoò ìjngoò k'e nga k̄iichja-nò Nainá, k'oãá s'ín t̄ítsajna ya nguixk̄on Nainá.

²⁵ It'aà ts'e x̄it̄a xi t̄ítsajna tajngoò, tsjìn jngoò-na kjot̄ixoma xi ts'e Na'èn-ná. 'An, k'oãá s'ín kosòn-la koni tsò kjoh̄ítsjeèn-na nga Nainá kis'e-la kjoh̄imatakòn mé-ne nga it'aà ts'an kjoaàt'aà takòn-na jñà x̄it̄a.

²⁶ Koií kjoa-la nga 'ño 'in choòn n̄achrjein ì'ndeì, 'an, k'oãá s'ín s̄ikítsjeèn, ìsaá-la ndaà t̄jín, tà k'oas'ín kàt̄ítsajna x̄it̄a koni s'ín t̄ítsajna skanda n̄achrjein ì'ndeì.

²⁷ Tsà t̄jín-lè chjoón, k̄i n̄ikijna-jèn chjoón-lè. Tsà tsjìn-lè, k̄i chjoón binchaàtsji.

²⁸ Tsà kixein, mìtsà jé t̄ibinchaàtsji. K̄o tsà jngoò chjoón xongó xi kixan, t̄ikoãá mìtsà jé t̄ihótsji. Ta jè-né, k'e nga jye kixan, kjoaá s'e-nò. 'An, mejèn-na nga mì kjoa kàtas'e-nò.

²⁹ Ndi' ndsè, mejèn-na nga kàtasijìn-nò, nga chiba jchán nachrjein chiya nga ma sixá-lá Nainá. Koií kjoa-la jngoò x̄it̄a x̄'in xi t̄jín-la chjoón, k'oaá s'ín kàtas'ín koni tsà tsjìn-la chjoón.

³⁰ Ko jñà x̄it̄a xi kjoaba títsajnajìn, k'oaá s'ín kàtìtsajna koni tsà mì ba títsajna. Koá jñà xi s'eí t̄jín-la, k'oaá s'ín kàtìtsajna koni tsà mì s'eí t̄jín-la. Koá jñà xi tsojmì otse, k'oaá s'ín kàtas'ín koni tsà nìmé t̄jín-la.

³¹ Ko jñà xi fitjingui-la kjoa xi t̄jín isò'nde, k'oaá s'ín kàtas'ín koni tsà mì ya fitjingui-la; nga jè isò'nde xi tìtsajnasoán ijndé, kjoehet'aà-né.

³² 'An, k'oaá s'ín mejèn-na nga nìmé kjoa ts'e isò'nde sikítsjeèn. Jè x̄it̄a x̄'in xi t̄jna tajngoò, koií síkìtsjeèn kjoa ts'e Nainá, mé xi s'ìin nga kòtsja-la Nainá.

³³ Tanga jè xi jye chjoón t̄jín-la, koií síkìtsjeèn kjoa xi t̄jín isò'nde mé xi s'ìin nga kòtsja-la chjoón-la,

³⁴ k'oaá ma-ne nga jò kjoa síkìtsjeèn. Tikoáá jè chjoón ka'àn xi jye k'en x'in-la ko jè chjoón xi t̄jna tajngoò xi kj'eè x'in t̄jín-la, koií síkìtsjeèn kjoa ts'e Nainá mé-ne nga tsjeè síkìtsajna-ne yijo-la ko inìma-la. Tanga jè chjoón xi x'in t̄jín-la, koií síkìtsjeèn kjoa ts'e isò'nde mé xi s'ìin nga kòtsja-la x'in-la.

³⁵ Kjoa xi benojmì-nò kjondaà tsajòn-nò, mìtsà xan-nò nga 'an ósijna ikon-nò, jè-né nga ngui ndaà sijchá yijo-nò nga nìmé kjoa k̄ichjoà ikon-nò nga sixá-lá Nainá.

³⁶ Tsà jngoò x'in xi kòs'ín t̄síkìtsjeèn nga mì ndaà t̄síkò chjoón nga mì xátí t̄bixan-ko nga jye t̄hóto nó-la chjoón, k'oaá s'ín kàtas'ín koni s'ín síkìtsjeèn, kàtixan; jè kjoa bixan, mìtsà jè nchihótsji.

³⁷ Tanga tsà jngoò xi k'oas'ín bìnè-la yijo-la ko inìma-la nga majìn-la kixan, nga kjohìtsjeèn ts'e-né, ko tsà chíkjoa-la yijo-la nga mìkì kixan, ko tsà jye kòs'ín kiskoòsòn-la, ndaà t̄jín.

³⁸ Jñà x̄it̄a xi bixan, ndaà s'ín, tanga jñà xi mìkì bixan, isaá ndaà s'ín.

³⁹ Jngoò chjoón xi x'in t̄jín-la, mìtsà t̄jñandeí. K'eé-né tsà jye k'en x'in-la nga jye t̄jñandeí. Koma kixan-ko n̄it̄a yá x'in-ne xi matsjakeè tsà tanga mokjeíin-la 'én-la Nainá.

⁴⁰ 'An, k'oaá s'ín síkìtsjeèn, ndaà-la t̄jín tsà mì t̄i k̄i kixan-ne jñà íchjín ka'àn. Tikoáá 'an, k'oaá s'ín machiya-na nga jè Inìma Tsjeè-la Nainá t̄síchya-na.

8

Tsojmì xi sinchásòn ya nguixkòn xkósòn

¹ Jè kjoa xi ts'e yijo-la cho xi sík'en-la xkósòn-la x̄it̄a isò'nde nga tsjá-la kjotjò, jñò bixón-nò nga ngats'iaá jyeé t̄jín-ná kjoachjine it'aà ts'e kjoa koi. Kixíí kjoa, tanga k'e nga t̄jín-ná kjoachjine, ma'ngaá takoán. Tanga k'e nga t̄jín-ná jè kjotsjacha, isaá ndaà 'biù-lá nga'ño xinguiáá.

² Tsà t̄jín i'nga x̄it̄a xi tsò nga ndaà machiya-la, chiyaá isa-la; kj'eè k̄i beè yije koni s'ín t̄jínè-la nga skoe.

³ Jngoò x̄it̄a xi matsjakeè Nainá, jè Nainá ndaà beèxkon.

⁴ K'oaá xan-nò kó s'ín t̄jín, tsà ma chine yijo-la cho xi ya biyaàt'aà-la jñà xkósòn. T̄jìin-ná nga jñà xkósòn xi t̄jín i isò'nde, nìmé nga'ño t̄jín-la. Nga ta jngoò ma-ne xi Nainá.

⁵ Jñà x̄it̄a, k'oaá s'ín síkìtsjeèn nga k̄jìn ma nainá xi t̄jín ján ngajmì ko it'aà nangui. (Kixíí kjoa it'aà ts'e x̄it̄a koi, k̄jìn ma xi nainá ko na'èn-ná tsò-la.)

⁶ Tanga jñá, 'ya-ná nga ta jngoò ma-ne Nainá xi Na'èn-ná nga it'aà ts'eé inchrobà-ne n̄it̄a mé xi t̄jín. Jñá, koií xá t̄jín-ná nga síkìtasoán xá-la. Tikoáá ta jngoò ma-ne xi otíxoma-ná, jè Jesucristo; nga it'aà ts'eé nga'ño-la kisindaá yije n̄it̄a mé xi t̄jín ko t̄ikoáá jñá, it'aà ts'eé tìtsajnaakoán.

⁷ Tanga mìtsà ngats'ìi x̄it̄a t̄jìin-la kjoa koi. T̄jín i'nga x̄it̄a 'ndseé xi jye k'oas'ín kjò'nga-la kjoa ts'e xkósòn k'e nga t̄ikj'eè mokjeíin-la. Tanga i'ndeí, k'e nga kine yijo-la cho xi ya

biyaàt'aà-la jñà xkòsòn, k'oaá s'ín síkítsjeèn nga jñà nchibeèxkón xkòsòn xi nainá tsò-la xità isò'nde. Nga jò tjín kjohítsjeèn-la, k'oaá s'ín fiya-la nga jé ótsji nguixkòn Nainá.

⁸ Jñò bixón-nó nga jñà tsojmì xi ma chine, mìtsà koi kjoa-la nga isà ndaà skoétjò-ná Nainá. Tsà kichiaá mìtsà isà ndaà kítsajnaá kò tsà mìkì kichiaá mìtsà isà ch'o kítsajnaá nga nguixkòn Nainá.

⁹ Kixií kjoa, tjí'nde-ná nità mé xi chjineé. Tanga jñà jchòsòn-lá yijo-ná nga mì k'oaá tjín xi chjineé mé-ne jñà xità 'ndseé xi indaàjiin tjín kjohítsjeèn-la mì jé sakò-la.

¹⁰ Tsà tjín jngoò xità xinguioo xi tsò nga tjín-la kjohítsjeèn nga ma chine nità mé yijo-ne, kò yaá fi kakjèn ya i'nde ñánda yaxkón xkòsòn; tsà koi nachrjein-la ya skoe jngoò 'ndseé xi indaàjiin tjín kjohítsjeèn-la nga ya tìkjèn. Jè xità 'ndsé, k'oaá tìs'ín s'iin.

¹¹ Kjohítsjeèn-la xità jè nga tsò nga maá chine yije nità mé-ne, koií kjoa-la nga kjo'in sijkjeiín jè 'ndsè xi indaàjiin tjín kjohítsjeèn-la xi Cristo k'en ngajo-la.

¹² K'e nga jé binchaàtsjioò xi kondra ts'e xità 'ndseé nga níkits'ón-jñò kjohítsjeèn-la xi indaàjiin tjín, jé binchaàtsjioò xi kondra ts'e Cristo.

¹³ 'An, tsà ta koií kjoa-la ts'e tsojmì xi kínee nga jé sakò-la jè 'ndsè, tìkooá-ne, jngoò k'a mì tì kii skíne-na yijo, mé-ne nga mì jé sakó-la 'ndsè.

9

Kjoa xi tjí'nde-la xità xi tsibíxáya-la Cristo

¹ 'Aán tsibíxáya-na Cristo. Tìjnandejií-ná. Xkoaàn kijtseè-na jè Jesús xi otíxoma-ná. Nga xá-la Na'èn-ná tìs'iaàn, i'ndeji jñò-nò xi xità-la Cristo maà.

² K'oaá xó tsò i'nga xità xi kjejí nga mì xó tsà 'an tsibíxáya-na Cristo, tanga jñò, ndaà tjiin-nò nga 'aán kisíxáya-na, nga it'aà ts'an-ná nga mokjeiín-nò 'én-la Nainá. K'oaá s'ín bitjo kixi kjoa.

³ K'e nga jngoò xità kjònangui-na xi kondra ts'an, 'an, kií xan-la nga ósíkoaa yijo-na:

⁴ ¿A mìtsà tjí'nde-najen nga k'oi-najen tsojmì xi chine-jen kò xi s'io-jen nga xá-la Nainá tìtsa'nè-jen?

⁵ ¿A mìtsà tjí'nde-najen nga kitjako jngoò-jen xi chjoón-najen ma xi 'én-la Nainá mokjeiín-la, koni s'ín xità xi i'nga xi tsibíxáya-la Cristo koni jñà 'ndseé Na'èn-ná kò Cefas [xi tìkooá Pedro 'mì]?

⁶ ¿A tà 'an-ná kò Bernabé xi tjinè-najen nga kjejí xá s'en-jen mé-ne nga sakò-najen tsojmì xi chine-jen?

⁷ ¿A tjín xità xi soldado síkitasòn xi tije bíchjí-la yijo-la? ¿A tjín xità xi bitje tsojmì tje, koo mìkì kine toò xi ojà-la? ¿A tjín xità xi cho síchá, koo mìkì 'bì tsjìn xi ochrje?

⁸ Kì k'oaá s'ín níkitsjeèn nga tà kjohítsjeèn ts'an koni s'ín tìxan. Tìkooá tichjaá kjotíxoma ts'e Moisés.

⁹ Kjotíxoma-la Nainá xi kiskì Moisés, k'oaá s'ín tichja nga tsò: “Jñà nchraja xi bínchi, kì na'ya bì'a tso'ba.” 'Én koi mìtsà tsò-ne kjoa nga Nainá 'ño síkinda nchraja,

¹⁰ jñá-ná xi síkinda-ná Nainá; nga it'aà tsaján tichja kjotíxoma. Jè xi síkínchi nchraja kò xi sítsjeè tsojmì xi majchá-la, nchikoñaá-la nga tjoé chiba-la tsojmì xi majchá-la.

¹¹ 'Én ndaà-la Nainá xi kjoa ts'e Cristo xi jin tsakoòya-nòjen jè ngaya-la koni tachó xi kisitje jjiin inima-nò. ¿A mì ndaà s'e tsà tjoé chiba-najen tsojmì xi majchá-nò?

¹² Tsà jñà xi kjejí xità tjoé chiba-la tsojmì xi tsajòn, ngajen, ¿a mìtsà isà ndaà tjí'nde-najen nga tìkooá tjoé-najen?

Tanga mì k'oaá s'ín tìtsa'nè-jen koni s'ín tjí'nde-najen mé-ne nga mìkì koma sichjoa ikon-la 'én ndaà-la Nainá xi kjoa ts'e Cristo.

¹³ Jñò, ndaà 'yaà, jñà xità xi ya síxá ya Ingo Ítjòn-la Nainá, koií tsojmì kine xi tjín ya i'nde jè; kò jñà xi ya síxá i'nde tsjeè-la Nainá ya ñánda binchásòn kjotjò xi tsjá-la Nainá jñà xità, okoó chiba-la yijo-la cho xi ya binchásòn.

¹⁴ Nainá k'oaá s'ín kitsjaà okixi: jñà xi chjaya 'én ndaà-là Nainá xi kjoa ts'e Cristo yaá sakò-là tsojmì xi skine.

¹⁵ 'An, mì k'oaá s'ín tìsikjeén jñà kjoa xi tji'nde-na. Tikoáà mìtsà koi xá tikjiì-nò nga kos'ín síko-ná. Ìsaá-la ndaà tjin tsà kàtiyaà mì k'oaá-ne tsà tjin xita xi kjoaáxin-na kjotsja xi tjin-na nga ta kjotjò 'an chjaya 'én ndaà-là Nainá xi kjoa ts'e Cristo.

¹⁶ Nga 'én ndaà-là Nainá xi kjoa ts'e Cristo chjaya, mìkiì tsà jeya síkijna yijo-na. 'An, xó k'oaá s'ín tjinè-na nga 'an kichjaya; imá xó-na tsà mìkiì kichjaya jè 'én ndaà-là Nainá xi kjoa ts'e Cristo.

¹⁷ Tsà tà kjohitsjeèn ts'aán-là nga kos'ín tìs'iaàn, tjinè-la nga kochji-na, tanga mìtsà tà kjohitsjeèn ts'an, jè tìsikitasoàn xá xi kisingatsja-na Nainá.

¹⁸ Jè chji xi tìsakó-na, jè-né nga tsja tjin-na nga chjaya 'én ndaà-là Nainá xi kjoa ts'e Cristo nga mìtsà chji-na sijé, nas'ín tji'nde-na nga jè 'én ndaà-là Nainá xi kjoa ts'e Cristo kótijnakon-na.

¹⁹ 'An tijnandeji-ná, tanga j'ndeji, k'oaá s'iaàn koni tsà chi'nda-là ma ngats'ì xita, mé-ne nga isa kjin xita koma kichjà-là 'én-là Cristo nga kokjeiín-là.

²⁰ K'e nga ya tijnajiin-là jñà xita xinguiáa judío, k'oaá s'ín s'iaàn koni s'ín xita judío mé-ne nga koma kichjà-là 'én-là Cristo nga kokjeiín-là. Kixiì kjoa nga 'an, mìkiì kjo'ño tjinè-na nga kos'ín sikitasoàn koni tsò kjotixoma xi kiskii Moisés, tanga k'e nga ya tijnajiin-là jñà xita judío xi kjotixoma-là Moisés títajajijn, 'an k'oaá ti s'iaàn, ta jè xi mejèn-na nga koma kichjà-là 'én ndaà-là Nainá xi kjoa ts'e Cristo nga kokjeiín-là.

²¹ K'e nga ya tijnajiin-là jñà xita xi mìtsà ya títajajijn kjotixoma-là Moisés, 'an, k'oaá ti s'iaàn koni tsà mì ya tijnajñaà kjotixoma mé-ne nga koma kichjà-là 'én-là Cristo nga kokjeiín-là xita xi mì ya títajajijn kjotixoma. Mìtsà tsò-ne kjoa nga tijnat'aà xin-là kjotixoma-là Nainá. Yaá tijnajñaà kjotixoma-là Cristo.

²² K'e nga ya tijnajiin-là jñà xita xi indajijn tjin kjohitsjeèn-là, 'an, k'oaá s'iaàn koni tsà tikoáà indajijn tjin kjohitsjeèn-na mé-ne nga koma kichjà-là 'én-là Cristo xita koi. Yaá sngàsòn yijekoáa mé kjoa xi títajajijn ngats'ì xita mé-ne nga koma kochrjekajijn i'nga-na kjo'in kjoa ts'e jé-là.

²³ K'oaá s'iaàn xi kjondaà ts'e 'én ndaà-là Nainá xi kjoa ts'e Cristo mé-ne nga s'e-na kjoa machikon-t'in it'aà ts'e 'én.

²⁴ Jñò, jyeé tjiin-nò k'e nga síská xita xi ongachikon, ngats'ì-né nga ongachikon, tanga ta jngoè-né xi tjoé-là kjotjò, ta jè xi síkijne. Jñò, k'oaá s'ín tichá yijo-nò nga xita-là Cristo 'mì-nò koni jngoè xita xi ongachikon mé-ne nga tjoé-nò kjotjò xi Nainá tsjá-nò.

²⁵ Jñà xita xi sískákjoè nga mejèn-là sijkijne, itjòn bitsajnandaà nga mì tijnà sijkjeén-ne tsojmì xi ch'o síko; koi k'oas'ín-ne nga mejèn-là tjoé jngoè-là kjotjò. K'e nga jye ma iskan, jè kjotjò xi tjoé-là, ta bits'on-né. Tanga jñá bitsajnandaá nga tjoé jngoè-ná kjotjò xi mìkiì bits'on nita kjé-ne.

²⁶ 'An, mìtsà k'oas'ín ongachikoan [kjoa ts'e xá-là Nainá] koni jngoè xita xi mìkiì beè ñánda kijchò. Tikoáà mìtsà k'oas'ín [s'ixá it'aà ts'e Nainá] koni s'ín xita xi ta 'beéjijn isén k'e nga kjaán-ko xikjín.

²⁷ 'An, k'oaá s'ín bìnè-là yijo-na nga kàtas'e-na kjo'in mé-ne k'e nga kjoehet'aà nachrjein nga okoòya-là xita 'én ndaà-là Nainá xi kjoa ts'e Cristo, Nainá mì kító-na: “Nì mé chji-là xá-lè.”

10

Kjoa ts'e xkósòn xi mìtsà kixi kjoa nga Nainá

¹ Jñò ndí 'ndsè ko tichjaá, kì nìjchàajijn-jèn nga jñà xita jchínga kjiin-ná, [k'e nga itjojijn naxandá Egipto], yaá tsibítsajnangui yije ijijn ifi [nga tsakó-là ndiyá], tikoáà ngats'ì tsatojijn ndáchikon.

² K'oaá ngaya-la koni tsà komà bautizar ya jjiìn ifi ko jjiìn ndáchikon mé-ne nga xita-la Moisés koma-ne.

³ K'oaá tis'in jngoò skaya tsojmi kiskine xi kjojkón ndaà ts'e Nainá.

⁴ Tikoá ta jngoò skaya nandá kits'iì xi kjojkón ndaà ts'e Nainá, jè nandá xi ya naxi itjo-ne nga jè Nainá kitsjaà-la. Jè naxi, jè ngaya-la Cristo nga jè tsajmeèyakò ndiyá ñánda chinchimaya.

⁵ Tanga jña xita jchínga koi, kjìn jchán k'en ya ñánda nangui kixi choòn nga Nainá mìkìi kisaseèn-takòn koni s'in kis'iìn ngats'iì xita jchínga koi, ta chibaá tsiningui-ne.

⁶ Jña kjoa xi k'oas'in komà, jña okóya-ná nga mì jña sikjaajñaá kjoa xi ch'o tjin koni kis'iìn jña xita jchínga-ná.

⁷ Kì k'oa s'in sandò xkósòn yaxkón koni kis'iìn i'nga xita jchínga koi, nga k'oaá s'in tíchja Xojoñ-la Nainá nga tsò: “Jña xita naxandá tsibítsajna nga tsakjèn koa kits'iì, ikjoàn tsasítjen nga kitè [nga jè kisítsjako xkósòn].”

⁸ Tikoá mìkìi kjoa chijngui s'eén koni s'in kis'iìn i'nga xita jchínga koi, nga tà jngoò nachrjein kaàn jàn jmiì xita k'en.

⁹ Mì kì taxkì chít'aá Na'èn-ná koni s'in kis'iìn i'nga xita jchínga koi; k'oaá komà-ne nga k'en nga kiskine-la ye.

¹⁰ Tikoá kì í'ño-isa tsajét'aà-là Nainá koni s'in kis'iìn i'nga xita jchínga koi. K'oaá komà-ne nga jè àkjale-la kjoabiyaà kisik'en xita koi.

¹¹ Ngats'iì kjoa koi, k'oaá s'in komàt'in jña xita jchínga-ná ko k'oaá s'in kisijna chiba mé-ne sijjìn-ná. Kisit'aà Xojoñ-la Nainá nga jchaa jña mé kjo'in xi sinè-ná tsà k'oa tis'in s'eén jña xi titsajnakoaán nachrjein xi jye tífehet'aà.

¹² K'oaá ma-ne jè xi kos'in síkítsjeèn nga kixi tjina, kàtasíkínda yijo-la nga mì jé sakó-la.

¹³ Jñò, k'j'eè mé kjoa xi mat'ioòn nga tíchít'aà-nò xi isa 'ño 'in tjin koni mat'in xita xi k'ejí. Nainá, xita kixi-né, jè kàta'ñót'aà takòn nga mìkìi tsjá'nde nga isa tsato chít'aà-nò koni kji chíkjoako-nò. Tijjè-ne Nainá kòkò ndiyá kós'in kichìkjoa-nò koni s'in tíchít'aà-nò skanda k'e nga kjoehet'aà kjoa.

¹⁴ Jñò ndí 'ndsè, nì itsé kjoa ts'e xkósòn nìkítsjeèn nga mejèn-nò jchaxkón.

¹⁵ An, k'oaá s'in tíchja-nò koni xita xi tjin-la kjohítsjeèn. Jchósòn-là 'én xi xán-nò, a kixíi kjoa.

¹⁶ K'e nga 'yoaá vino xi tjíya chítsín nga nìjét'aà-lá Nainá nga kàtasíchikon-t'in, ¿a mìtsà ya ñingásòn-koaá ko jní-la Cristo? Ko k'e nga nìkkoayaá inchrajín, ¿a mìtsà ya ñingásòn-koaá ko yijo-la Cristo?

¹⁷ Jña, nas'in 'ño kjìn ma-ná, jè inchrajín xi bichiaá, ta jngoò ma-ne; k'oaá ma-ne nga ngats'iaá, ta jngoò yijo ma-ná.

¹⁸ Chítsejèn-là xita naxandá Israel, jña xi kine yijo-la cho xi biyaà ya i'nde tsjeè nga tsjá-la kjotjò Nainá. Xita koi, yaá síngásòn-ko kjotjò xi tsjá-la Nainá ya i'nde tsjeè.

¹⁹ K'e nga k'oa xan-nò, mìtsà xan-nò nga tjin-la okixi jña xkósòn ko tsojmi xi sinchát'aà-la.

²⁰ Jña 'én xi xan-nò, jña kjotjò xi fiko jña xita xi mìkìi beèxkon Nainá, jña fiko-la inima ch'o-la nejí, mìtsà jè sobà Nainá. An, majìn-na nga ya síngásòn-ko inima ch'o-la nejí.

²¹ Mìkìi ndaà tjin, k'e nga jye 'yò vino xi ts'e Jesús, xi otíxoma-ná, ikjoàn s'ioo xi ts'e inima ch'o-la nejí. Tikoá mìkìi ndaà tjin, k'e nga jye bichioò inchrajín xi ts'e Jesús, ikjoàn bichioò xi ts'e inima ch'o-la nejí.

²² ¿A xi mejèn-nò sikjàn-là Na'èn-ná nga kàtachini? ¿A isaá tjin-nò nga'ño mì k'oa-ne Nainá?

Jè kinchátsjiaá ítjoán kjondaà ts'e xita xi k'ejí

²³ Tsò jña xita: “Tjí'nde-né nita mé xi s'eén.” Kixíi kjoa tjí'nde-né, tanga mìtsà ngats'iì kjoa nga ndaà tjin. Tjí'nde-né nita mé kjoa xi s'eén, tanga mìtsà ngats'iì kjoa tsjá-ná nga'ño.

24 Mìtsà tà kjòndaà tsajòn binchaàtsjioò ítjòn, jè tìnchátsjioò ítjòn kjòndaà ts'e xità xi kj'eíí.

25 Maá chinee nità mé yijo xi satíjna ya ñánda biyaà cho. Kì kii chjinanguio ñánda j'ìi-ne mé-ne nga mì ch'o koma-la kjohítsjeèn-nò.

26 Nga ts'eé Na'èn-ná jè nangui kò ngats'ìi tsojmì xi tjín-la.

27 Tsà jngòò xità xi mìkii mokjeiín-la 'én-la Nainá, kichja-nò nga kichikoo, tsà mejèn-nò nga onguió, chjinee yije-nò xi tsjá-nò. Kì mé xi chjinanguio nga mì ch'o koma-la kjohítsjeèn-nò.

28 Tsà jngòò xità xi kító-nò: “Jña tsojmì koi, yaá kisinchaàt'aà-la xkósòn.” Jè kjoa-la xità xi okítsò-nò, kì kii chine, mé-ne nga mì ch'o koma-la kjohítsjeèn-la.

29 Mìtsà kjohítsjeèn tsajòn xi tixan-nò, ts'eé xità xi okítsò.

Tanga tsà tjín i'nga xità xi skonangui nga kító: “¿Mé-ne mì tjí'nde-na nga s'iaàn nità mé kjoa xi mejèn-na nga ta koi kjoa-la nga mì ch'o koma-la kjohítsjeèn-la xità xi kj'eíí?

30 'An, tsà tsjaà-la kjòndaà Nainá it'aà ts'e tsojmì xi kínee, mìkii ndaà tjín tsà ch'o kító-la xità jña tsojmì xi jye kàtsjaà-la kjòndaà Nainá.”

31 Tanga jñò, k'e nga bichioò kò tsà 'yò, nità mé kjoa xi 'nè, k'oaá s'ín t'een nga jeya kàtìjna Nainá.

32 Kì jé binchaàtsji-la jña xità judío, kò xi mìtsà xità judío, kò jña xità naxandá-la Nainá.

33 'An, k'oaá s'ín s'iaàn yije koni s'ín sasén-la xità xi kj'eíí. Mìtsà jè otsjià ítjoàn xi kjòndaà ts'an, jè otsjià ítjoàn kjòndaà ts'e xità xi kj'eíí mé-ne nga kítjokàjìin-ne kjo'in.

11

1 Koni s'ín s'iaàn 'an nga kjingui-la Cristo, k'oa tìs'ín chjìngui-ná.

Kó s'ín skoexkón x'in-la jña íchjín k'e nga chjat'aà-la Nainá

2 Ndí 'ndsè kò tichjaá, ndaà 'nè-nò nga nìkítsjeèn it'aà ts'an ngats'ìi kjoa xi s'iaàn; tìkoa nìkitasòn kjotíxoma xi 'an kisiatoya-nò.

3 Tanga mejèn-na nga kàtasijìin-nò nga jngòò òjngòò xità x'in, jè Cristo xi sko-la ma, kò jè chjoón, jè xità x'in xi sko-la ma, koni jè Cristo, jè Nainá xi sko-la ma.

4 Tsà jngòò xità x'in xi tíjtsa sko k'e nga chjat'aà-la Nainá, o k'e nga chjaya 'én-la Nainá, mìkii beèxkón Cristo nga jè tíjna sko-la.

5 Tanga tsà jngòò chjoón, tsà mìkii bíjtsa sko k'e nga chjat'aà-la Nainá, o k'e nga chjaya 'én-la Nainá, mìkii beèxkón x'in-la nga jè tíjna sko-la. K'oaá ngaya-la koni tsà kisijno-la.

6 Tsà jngòò chjoón xi majìn-la bíjtsa sko, tìkoaá-ne kàtasijno-la tsja sko. Kò tsà masobà-la nga sijno-la, kàtíjtsa sko.

7 Jè xità x'in, mìkii tjí'nde nga kùjtsa sko, nga k'oaá s'ín 'ya-la koni Nainá, kò it'aà ts'e xità x'in, 'yaá-la kjoajeya-la Nainá; tanga it'aà ts'e chjoón 'yaá-la kjoajeya-la x'in-la.

8 Jè x'in, mìtsà ya itjokàt'aà-ne ts'e chjoón; jè chjoón xi it'aà ts'e xità x'in itjokàt'aà-ne.

9 Jè xità x'in, mìtsà kjoa ts'e chjoón kisindaà-ne; tanga jè chjoón, kjoa ts'e x'ín kisindaà-ne.

10 Koií kjoa-la jè chjoón tjínè-la nga kùjtsa sko, seña-né nga beèxkón x'in-la, mé-ne nga tìkoa skoe-ne jña àkjale.

11 Tanga koni s'ín tjíndaà-la Na'èn-ná, tsà tsjìn chjoón, mìkii tíjna x'in; kò tsà tsjìn x'in, mìkii tíjna chjoón.

12 Koni s'ín komà nga jè chjoón, it'aà ts'e x'ín kisindaà-ne; tìkoaá jè x'in, it'aà ts'e chjoón ts'ìin. Tanga it'aà ts'e Nainá nchrobá yije-ne.

13 Jñò, ndaà tìkítsjeèn: ¿A ndaà tjín tsà mìkii tíjtsa sko jña íchjín k'e nga chjat'aà-la Nainá?

14 Tjé-ne isò'nde, bénojmiya-ná nga kjoasobà-né k'e nga jè xità x'in síndojo tsja sko.

15 Tanga ndaà tsejèn k'e nga jngòò chjoón xi ndojò kjoàn tsja sko. Kjoajeya ts'e-né. Koií xá kits'ìi-la tsja-la nga ndojò kjoàn, mé-ne nga kùjtsa-ne sko koni tsà payo.

¹⁶ Tsà tǵín xǵita xi mìkì tǵíngò ikon koni bixón-jen, k'oaá s'ín kàtasijùn-la, ngajen ko naxandá-la Cristo, nguì k'oaá s'ín 'nè-jen, tsjìn xi kj'eíí s'ín.

Kjoa xi mìkì ndaà tǵín k'e nga bichiaá koni s'ín tsakóya Cristo

¹⁷ Nga tikjii ìsa-nò, mìkì ndaà síkítsajna-nò, koií kjoa-la nga mìkì ndaà titsa'nè k'e nga maxkóya; ch'o titsa'nè.

¹⁸ Jè kjoa xi tǵina ítjòn ít'aà tsajòn, k'oaá s'ín ki'nchrè, jǵnò xi naxandá-la Cristo 'mì-nò, k'e nga maxkóya, jò xó ya maà. Mejèn tsà mokjeíin-na tsà koií naxhrjein-la tsà k'oaá s'ín titsa'nè.

¹⁹ Ta xó k'oaá-la komat'in-nò nga s'eé xǵita xinguiòo xi sǵijòya-nò, mé-ne nga jcha-la yá-ne xi tǵín-la okixi.

²⁰ K'e nga maxkóya nga bichioò, koni s'ín tsakóya Cristo, mìtsà kixi kjoa nga jè nìkítsjeèn-yaà koni s'ín komat'in Na'èn-ná k'e nga k'en.

²¹ K'e nga bichioò, tǵín i'nga xǵita xi ítjòn kjèn tsojmì xi bijchóko; mìkì koña-la xíkjín nga tsjá itsé-la; skanda tǵín xi mach'í. Tanga jǵnà xǵita xi i'nga, imaá ijò-la nga mìkì tsjá itsé-la.

²² Jǵnò, ¿a tsjìn-nò ni'ya ñánda nga bichioò ko nga 'yò? ¿Mé-ne nachrjekàngui-nò xǵita naxandá-la Cristo koa nìsobà-là xǵita ima xi tsjìn-la tsojmì xi kine? K'e nga k'oas'ín 'nè, ¿kó s'ín xán-nò? ¿A ndaà síkítsajna-nò? Majìn, mìkì ndaà síkítsajna-nò.

*K'e nga jè Na'èn-ná tsakjèn-ko xǵita-la k'e nga kòjǵnò
(Mateo 26:26-29; Marcos 14:22-25; Lucas 22:14-20)*

²³ Koni s'ín tsakóya-na Na'èn-ná, ti koií-ne xi 'an tsakoòya-nò. Jè nǵtjen k'e nga Na'èn-ná Jesús kitsobà'ñó xǵita, kiskoé inchrájin,

²⁴ kitsjaà-la kjondaà Nainá, ikjoàn kisìkkoaya, kitsò: “Chjoé, jè-né xi yijo-na nga tǵtsjaà kjotjò nga kiyá xi kjondaà tsajòn. K'oa tǵi s'ín t'een nga tǵxkoaya inchrájin, mé-ne nga síkítsjeèn-nò ít'aà ts'an.”

²⁵ K'oaá tǵis'ín kis'íin k'e nga jye tsakjèn, kiskoé chǵtsín, kitsò: “Vino xi tǵíya chǵtsín jè, jè jní-na xi síkixiya kjoa xǵitse xi bìndaajùn-ko-nò. Jǵnò, k'e nga ìjngò ìjngò k'a s'ioo, k'oaá s'ín t'een mé-ne nga síkítsjeèn-nò ít'aà ts'an.”

²⁶ K'e nga ìjngò ìjngò k'a kichioò inchrájin jè, koa s'ioya vino chǵtsín jè, ít'aà ts'eé kjoabiyaà-la Na'èn-ná kǵnókjoaya, skanda k'e nga kjoíí ìjngò k'a Cristo.

Mìkì ma taxkǵi bichikoaá Na'èn-ná

²⁷ Nǵta yá xǵita-ne xi kǵkjen inchrájin jè, o xi skoíya chǵtsín ts'e Na'èn-ná, tsà mìkì skoexkón k'e nga kǵkjen, jè tíhótsji ít'aà ts'e Na'èn-ná nga tíhochrjengui yijo-la ko jní-la.

²⁸ Koií kjoa-la, ítjòn ndaà tǵkítsjeèn ijìin inima-nò kós'ín titsajnakoo Nainá ko xǵita xinguiòo. Iskan tǵchioò inchrájin koa t'ioya chǵtsín ts'e Na'èn-ná.

²⁹ Tsà yá xǵita xi kǵkjen inchrájin koa skoí vino xi tǵíya chǵtsín, tsà mìkì síkítsjeèn nga jè yijo-la Na'èn-ná, xǵita jè, kjo'íin tǵbínè-la yijo-la.

³⁰ K'oaá ma-ne kjìn xǵita xinguiòo xi ch'in bít'aà-la koa tǵín xi indaàkjoa tǵtsajna, skanda jye kjò kjìn biyaà.

³¹ Tsà ndaà síkítsjeén kós'ín titsajnakoaá Nainá ko xǵita xinguiáá, Na'èn-ná mìkì kjo'in tsjá-ná.

³² Tanga tsà jè Na'èn-ná tsjá-ná kjo'in, koi-né nga mejèn-la síkixiya-ná mé-ne mìkì kǵkot'aà-ná kjo'in xi mìkì fehet'aà nǵta kjé-ne xi tjoé-la jǵnà xǵita isò'nde xi mìkì beèxkón Nainá.

³³ K'oaá ma-ne jǵnò ndí 'ndsè k'e nga maxkóya nga bichioò, chíñakjoa-là xinguiòo.

³⁴ Tsà tǵín i'nga xi 'ñó ijò-la, tǵchioò ni'ya-nò, mé-ne k'e nga kǵxkóya mì kjo'in tsjá-nò Na'èn-ná. Jǵnà kjoa xi i'nga xi tǵín ìsa-nò, k'e kǵchokon-nò kíndaajǵñaá.

12

Kó s'ín tǵín kjoa chjine xi tsjá Inima Tsjeè-la Nainá xi kjondaà ts'e naxandá-la

¹ Ndí 'ndsè kò tichjaá, 'an mejèn-na kàtasijìn-nò jǎà kjoa chjine xi tsjá Inima Tsjeè-la Nainá.

² Jǎò, ndaà tǎjìn-nò k'e nga tǎkj'eè mokjeiín-nò 'én-la Nainá, yaá tsanguit'aà-là xkòsòn xi mìkìi ma chja nga xìn ndiyá kùkò-nò nga mìtsà kixi kjoa nga Nainá.

³ K'oaá xan-nò, niyá xita xi koma kǎtso-la Jesús: “ǎCh'o kàtamat'in!”, tsà it'aà ts'e Inima Tsjeè-la Nainá tǎchja. Tǎkooá tsà mìtsà nga'ńó ts'e Inima Tsjeè-la Nainá tǎchja, mìkìi koma kǎtso-la: “ǎǎ-né Jesús xi otixomai!”

⁴ Ya ijìn naxandá-la Nainá, kǎn skaya kjoa chjine tǎjín kjoa ts'e xá xi síkitasòn xita, tanga jè xi tsjá kjoa chjine, tǎjè-ne Inima Tsjeè-la Nainá.

⁵ Jǎà xita, kǎn skaya xá tǎjín-la nga sǎixá-la Na'èn-ná, tanga tǎjè-ne Na'èn-ná xi maxá-la.

⁶ Kǎn skaya nga'ńó tǎjín kòs'ín maxá, tanga tǎjè-ne nga'ńó-la Nainá xi sǎxájin-la ngats'ìi xita.

⁷ Nga jngoò òjngoò xita, tjoé-la jngoò kjoa chjine xi okó nga yaá tǎjnajìn inima-la Inima Tsjeè-la Nainá mé-ne nga ngats'ìi xita naxandá-la Nainá kochjeén-la kǎndaà xi tjoé-la.

⁸ Xi it'aà ts'e Inima Tsjeè-la Nainá tǎjín xita xi 'bii-la 'én xi tǎjín-la kǎohitsjeén; kǎ tǎjín i'nga xi 'bii-la 'én xi tǎjín-la kjoa chjine, nga tǎjè-ne Inima Tsjeè-la Nainá tsjá.

⁹ Tǎjín xi tjoé-la kǎochjine nga ndaà mokjeiín-la nga tǎjè-ne Inima Tsjeè-la Nainá tsjá-la, tǎkooá tǎjín xi tjoé-la kǎochjine nga sǎndaà-ne xita xi xk'én, nga tǎjè-ne Inima Tsjeè-la Nainá tsjá-la.

¹⁰ Tǎjín xi tjoé-la kǎochjine nga ma-la s'ín kǎoxkón xi ndaà tǎjín, kǎ xi ma-la chja ngajo-la Nainá, kǎ xi machiya-la mé inima xi tǎsǎxájin inima-la xita xi chja. Kǎ tǎjín xi tjoé-la nga ma-la chja 'én xi kǎ'eíi tsò xi mì yá xita fiya-la, tǎkooá tǎjín xi ma-la síkatoya 'én xi kǎ'eíi tsò xi mì yá xita fiya-la.

¹¹ Tǎjè ta jngoó-ne Inima Tsjeè-la Nainá xi sǎxá it'aà ts'e ngats'ìi kjoa koi nga síka'bí-la nga jngoò òjngoò xita kǎochjine xi jè mejèn-la nga tsjá-la.

¹² Yijo tsǎján, kǎn jchán skaya tǎjín-la; tanga koni s'ín tǎkjoò, tǎ jngoò ma-ne yijo. Naxandá-la Cristo, k'oaá tǎs'ín tǎjín, ta jngoò ma-ne.

¹³ Jǎà xi xita judío kǎ xi mìtsà xita judío, xi xita chǎ'nda tǎtsajna kǎ xita xi tǎtsajnandeíi ta jngoò ma-ne. Ngats'iaá jǎà, tǎ ngàsòn komaá bautizar it'aà ts'e xi tǎjè-ne Inima Tsjeè-la Nainá nga jngoò naxandá-la Nainá komaá koni tsà jngoò yijo. Nga jngoò òjngoá, Nainá kitsjaà-ná xi tǎjè-ne Inima Tsjeè-la.

¹⁴ Jè yijo-ná, mìtsà tǎ jngoò skaya tǎjín-ne; kǎn jchán skaya tǎkjoòya.

¹⁵ Tsà jè ndsokooá kǎtso: “An, mìtsà tsja xita ma, mìtsà ya chja-na jè yijo.” Mitsà koi kjoa-la nga okǎtso nga mì ya chja-ne yijo.

¹⁶ Tsà jǎà líká kǎtso: “An, mìtsà xkǎn xita ma, mìtsà ya chja-na jè yijo.” Mitsà koi kjoa-la nga okǎtso nga mì ya chja-ne yijo.

¹⁷ Tsà kǎhokji yijo-ná, tsà nguì xkooán koma, ¿kòs'ín kǎná'ya-ná? Tsà jè yijo-ná, tsà nguì líká koma, ¿kòs'ín kǎjne-ná?

¹⁸ Tanga Nainá nga jngoò òjngoò skaya yijo-ná, yaá kisíkǎtsajna ònde-la yijo-ná ñánda nga jè kǎomejèn-la.

¹⁹ Yijo-ná tsà tǎ jngoò skoya koma, mì-la tsà yijo xi nguì tǎjngoò.

²⁰ Kixií kjoa nas'ín kǎn skaya tǎkjoòya yijo-ná, tanga tǎjngoò ma-ne.

²¹ Jǎà xkooán mìkìi koma kǎtso-la jǎà ndsaá: “Mìkìi mochjeén-na.” Jè skooá tǎkooá mìkìi koma kǎtso-la jǎà ndsokooá: “Mìkìi mochjeén-na.”

²² Tanga it'aà ts'e yijo-ná, tǎjín-né xi 'mì-lá nga chiba nga'ńó tǎjín-la tanga òsáá ndaà mochjeén.

²³ It'aà ts'e yijo-ná xi 'mì-lá nga mìkìi ndaà tsejèn, jǎà-né xi níkakjá níkje mé-ne nga òsá ndaà kǎtsejèn-ne. Bítsa'ma-né jè yijo-ná, jǎà xi mìkìi tǎjǎnde-la nga jcha-la.

²⁴ Mìkìi mochjeén nga sijtsa'ma yijo-ná xi tsejèn. Nainá jye k'oaas'ín tsibíndaà nga òsá ndaà jchaxkón jè xi 'mì-lá nga òsá chiba chǎ-la,

²⁵ mé-ne nga mì kojòya-ne. Ta saá nga jngoò ìjngoò skaya kàtasíkinda xíkjin.

²⁶ Tsà tjín jngoò skaya yijo-ná ñánda ijò ma, ok'ín yije-la xíkjin kóhokji nga ma ijò. Koa tsà tjín ñánda ndaà tìyaxkón, ndaà s'e yije-la kóhokji yijo.

²⁷ Jñò, k'oaá ngaya-la koni yijo-la Cristo. Katjín, katjín xá xi kitjoé-nò ya ijìn naxandá-la Nainá.

²⁸ Nainá k'oaá s'ín kiskoòsòn-la mé xá xi s'jin xita: jñà títsajna ítjòn xita xi bíxáya-la Nainá; xi ma-ne jò, xita xi chja ngajo-la Nainá; xi ma-ne jàn, xita xi okóya 'én-la Nainá. Tikoá tjín xi ma-la s'ín kjoxxkón xi ndaà tjín. Kò tjín xi ma-la síndaà-ne xita xi xk'én; tjín xi ma-la síchját'aà; tjín xi otíxoma mé kjoa xi koma; kò tjín xi chja 'én xi k'ejí tsò xi mì yá xita fiya-la.

²⁹ Mìtsà ngats'ii nga ma bíxáya-la Nainá. Mìtsà ngats'ii nga Nainá chja ngajo-la. Mìtsà ngats'ii nga ma-la okóya 'én-la Nainá. Mìtsà ngats'ii nga ma-la s'ín kjoxxkón xi ndaà tjín.

³⁰ Kò mìtsà ngats'ii nga ma-la síndaà-ne xita xk'én. Mìtsà ngats'ii nga ma-la chja 'én xi k'ejí tsò xi mì yá xita fiya-la. Mìtsà ngats'ii ma-la síkatoya 'én xi k'ejí tsò xi mì yá xita fiya-la.

³¹ Tanga jñò, mochjeén-né nga tìnchátsjioò jñà kjoachjine xi isa ndaà tjín.

Tanga i'ndeji 'aán kokoò-nò jngoò ndiyá xi isa ndaà tjín kó s'ín sijchá yijo-nò.

13

It'aà ts'e kjoatjòcha

¹ An, tsà ma-na chja jñà 'én xi k'ejí tsò xi chja xita nas'ín jñà 'én xi chja àkjale, tanga tsà tsjìn-na kjoatjòcha, nímé chjí-la; k'oaá ngaya-na koni jngoò kichá xi 'ñó one, o koni jñà kichá tsjìn xi ch'o one k'e nga kaàkjò.

² Tsà tsjìn-na kjoatjòcha, nímé chjí-na nas'ín ma-na chja ngajo-la Nainá, nas'ín machiya yije-na kjoa xi tjí'ma-la Nainá; nas'ín ma yije-na kjoa chjine, nas'ín ndaà mokjeín yije-na it'aà ts'e Nainá, skanda ma-na síkjaníyá-la nindoò.

³ Tsà sika'biá yije tsojmì xi tjín-na nga kòkjen xita ima, koa tsjaà kjotjoà yijo-na nga kití xi kjondaà ts'e xita xi k'ejí, tanga tsà tsjìn-na kjoatjòcha, nímé síkijne.

⁴ Jè xita xi tjín-la kjoatjòcha, tjín-la kjoatsetakòn nita mé kjoa-ne; tjín-la kjondaà; mìkìl maxítakòn; mìtsà 'én 'nga chja; kò mìtsà tije ndaà síkijna-ne yijo-la;

⁵ mìtsà taxkí s'ín; mìtsà tà kjondaà ts'e ótsji; mìkìl taxkí majti-la; nímé kjoa bíngui takòn;

⁶ mìtsà matsja-la it'aà ts'e kjoa xi ch'o tjín, ts'eé kjoa kixi xi matsja-la.

⁷ Jè xi tjín-la kjoatjòcha, síkjeín yije-la nita mé kjoa-ne, mokjeín yije-la, koña yije-la, chíkjoako yije-la ngats'ii kjoa.

⁸ Jè kjoatjòcha mìkìl kjoehet'aà. Tanga kijchò nachrjein nga mì tì yá xi kichja ngajo-la Nainá, nga mì tì yá xi kichja-ne 'én xi k'ejí tsò xi mì yá xita fiya-la kò nga mì tì yá xi tjoé-la kjohítsjeèn xi tjí'ma-la Nainá.

⁹ Nga k'j'eè tsà nguì ndaà tíjìn yije-ná kjohítsjeèn xi tjí'ma-la Nainá, kò k'j'eè tsà nguì ndaà nokjoà ngajo-lá Nainá.

¹⁰ Tanga k'e nga kijchò nachrjein nga kjoí xi nímé chijat'aà-la, yaá kjoehet'aà jñà kjoa xi ta chiba machiya-ná.

¹¹ K'e nga sa chítia, k'oaá s'ín kichja koni chja ixti, k'oas'ín kisikítsjeèn koni s'ín síkítsjeèn ixti, k'oas'ín kiskoòsòn-la koni ixti. Tanga k'e nga jye kòjchínga, kisikijna-ná kjoa ts'e ixti.

¹² I'ndeji, ta k'oaá s'ín 'yaá Nainá koni tsà chítsín jmà chítsejèn-yaá nga mìkìl ndaà tsejèn-ná. Tanga kijchò nachrjein k'e nga ndaà kòtsejèn-ná nga chí'aán Nainá. I'ndeji tà chibaá machiya-na, tanga kijchò nachrjein nga ndaà kochiya-na koni s'ín beèxkon-na Nainá.

¹³ Ján kjoa tjín xi mìkìl kjoehet'aà, jngoò kjoa nga mokjeín-ná it'aà ts'e Nainá, ìjngoò nga chiñà-lá xi tjoé-ná, ìjngoò nga s'e-ná kjoatjòcha. Jñà ingajàn kjoa koi, jè kjoatjòcha xi isa 'ñó chjí-la.

14

Jè xi ma-la chja 'én xi kj'eíí tsò

¹ Jè kjoatjòcha tanguítjngui-là; tikoá mochjeén-né nga tinchátsjioè jñà kjoachjine xi tsjá Inimá Tsjeè-la Nainá. Kò jè xi isa 'ñó mochjeén nga kinókjoá ngajo-là Nainá.

² Jngoò xita xi kj'eíí tsò 'én xi chja, mìtsà taxki xita tíchja-la; Nainá tíchjat'aà-la. Nga mì yá xita fiya-la kó tsò 'én xi tíchja. Jñà 'én xi chja, ts'eé Inimá Tsjeè-la Nainá nga tíchja'ma-né.

³ Tanga jè xita xi chja ngajo-la Nainá, jñà xita naxandá-la Nainá chjajiin-la, mé-ne nga isa ndaà koma-la, isa ndaà kò'ñójiiin-ne kjohítsjeèn-la koá isa ndaà sije takòn-ne xita naxandá-la Nainá.

⁴ Jè xita xi chja 'én xi kj'eíí tsò xi mì yá xita fiya-la, tí yijo-laá tsjá nga'ñó-la. Tanga jè xi chja ngajo-la Nainá, jñà xita naxandá-la Cristo tsjá-la nga'ñó.

⁵ An, k'oaá s'ín mejèn-na tsà ngats'ioè koma-nò kinókjoá 'én xi kj'eíí tsò xi mì yá xita fiya-la. Tanga isaá-la ndaà tjín tsà koma-nò kinókjoá ngajo-la Nainá. Jè xi Nainá chja ngajo-la isaá 'ñó chjí-la mì k'oa-ne koni jè xi chja 'én xi kj'eíí tsò. Ta jngoó-la tsà tjín xita xi koma-la sijkatoya 'én xi kj'eíí tsò mé-ne isa ndaà s'e-la nga'ñó xita naxandá-la Cristo.

⁶ Ndí 'ndsè kò tichjaá k'oaá ngaya-la tsà 'an mejèn-na kíkòn-nò, tsà kj'eíí tsò 'én xi kichjàkò-nò xi mìkiì na'yà-là, kós'ín kochjeén-nò. Ta jé-la tsà 'én-la Nainá sikíchiya-nò, tsà kènojmi chiba-nò kjohítsjeèn xi ndaà tsò, tsà kichjàjiin-nò 'én kixi, kò kokoòya-nò 'én xi ndaà tsò.

⁷ Jñà chrjo-la música kò ní'ñó xi tíhone tsà ngàsòn kjone, ¿kós'ín jcha-la ñá-laá xi tíhone nga tà ngàsòn tsò?

⁸ Tsà jè chrjo trompeta-la xita kjojchán, tsà mìkiì ndaà skindàya, ¿yá xita xi kítsajnandaà nga kjoì kjojchán?

⁹ Jñò, k'oaá tís'ín mat'ioènn tsà mìtsà 'én tsajòn kinókjoá nga kjiya-la xita, ¿kó s'ín kiná'ya-la mé 'én xi titsanokjoà? Tà jjiin isén-la titsanokjoà.

¹⁰ Kjìn jchán skoya 'én tjín nga tíjtsa isò'nde, tanga ngats'ii 'én tjín-la kjohítsjeèn kó tsòya-ne nga jngoò ijngoò skoya.

¹¹ An, tsà mìkiì fiya-na kó tsò 'én xi tíchja jngoò xita, xita xìn nanguí koma-na. Kò jè xita xi tíchja, k'oaá tí koma-la it'aà ts'an koni xìn nanguí i'nde-na.

¹² Jñò, nga mejèn-nò jñà kjoachjine xi tsjá Inimá Tsjeè-la Nainá, mochjeén-né nga isa ndaà tinchátsjioè jñà kjoachjine xi koma ndaà síchjít'aà-la naxandá-la Cristo mé-ne nga isa tse nga'ñó s'e-la.

¹³ K'oaá ma-ne jè xita xi kj'eíí tsò 'én xi chja xi mì yá xita fiya-la, kàtasíjé't'aà-la Nainá nga kàtatsjá-la kjoachjine mé-ne koma sijkatoya-ne 'én xi chja.

¹⁴ An, k'e nga chjít'aà-la Nainá nga kj'eíí tsò 'én xi tíchja xi mìkiì fiya-na, tà jè tíchja Inimá Tsjeè-la Nainá xi tíjnajiin inima-na. Tanga jè kjohítsjeèn-na, nímé kjondaà sakò-la nga mìkiì fiya-na kó s'ín tíchjà.

¹⁵ An, ¿mé xi s'iaàn? Mochjeén-né nga kichjít'aà-la Nainá 'én xi bíjiin inima-na Inimá Tsjeè-la Nainá. Tikoá mochjeén-né nga kichjàkòá Nainá 'én xi ndaà fiya-na. K'e nga seè, tikoá mochjeén-né nga seè sò xi bíjiin inima-na Inimá Tsjeè-la Nainá. Tanga tikoá mochjeén nga seè sò xi ndaà fiya-na.

¹⁶ K'e nga jeya nìkíjni Nainá, tsà tà jñà 'én nokjoì xi bíjiin inima-lè Inimá Tsjeè-la Nainá, tsà kjì'nchré-la 'én-lè jñà xita xi mìkiì fiya-la, mìkiì koma kító: “K'oaá s'ín kàtama”, nga mìkiì fiya-la kó tsò 'én xi nokjoì.

¹⁷ Okixi-né, kjondaà xi tí'biì-la Nainá, ndaà tjín, tanga jñà xita xi i'nga, nì mé nga'ñó tísakó-la nga mìkiì fiya-la.

¹⁸ An, tsjaà-la kjondaà Nainá nga isaá ndaà ma-na chja 'én xi mì yá xita fiya-la mì k'oa-ne koni jñò.

¹⁹ Tanga k'e nga ya tijnajin-la xita naxandá-la Cristo, isaá ndaà tjin tsà tà 'òn 'én kichjà xi tjin-la kjohitsjeèn nga kokoòya-la xita, mi k'oa-ne tsà te jmiù 'én kichjà xi kjeij tsò xi mikì 'nchréya-la xita.

²⁰ Ndi 'ndsè kò tichjaá, kì k'oaá s'in nikitsjeèn koni ixti. Tanga ts'e kjoa xi ch'o tjin, k'oaá s'in t'een koni ixti xi kjeè ndaà machiya-la. Tanga it'aà ts'e kjohitsjeèn-nò, k'oaá s'in t'een koni xita xi jye ndaà machiya-la.

²¹ Xojon-la Nainá k'oaá s'in tichja nga tsò: “Nga kichjà-la naxandá-na, xita xin nanguii sikjeén xi kjeij 'én chja nga koma kichja-la. Tanga nas'in k'oas'in s'iaàn mikì kji'nchréñijon-na, tsò Na'èn-ná.”

²² K'e nga nokjoá 'én xi kjeij tsò xi mi yá xita fiya-la, kjoxkón okó-la Nainá jña xita xi mikì mokjeiin-la, mìtsà ts'e xita xi mokjeiin-la. Tanga k'e nga nokjoà ngajo-lá Nainá, ts'eé xita xi mokjeiin-la, mìtsà ts'e xita xi mikì mokjeiin-la.

²³ Jña xita naxandá-la Cristo k'e nga maxkóya, tsà ngats'ii nga kjeij 'én kichja xi mi yá xita fiya-la, tsà kjoahas'en jngoò xita xi taxki xita xi mikì mokjeiin-la 'én-la Nainá, kitsò-né: “Jña xita koi, xita ská-né.”

²⁴ Tanga tsà ngats'ioò nga 'én-la Nainá titsanokjoáya ngajo-lá, tsà kjoahas'en jngoò xi taxki xita xi mikì mokjeiin-la 'én-la Nainá, k'e nga kji'nchré-nò, kokjeiin-la kò kochiyaá-la nga xita jé-né.

²⁵ Jè kjoa xi tjna'ma jjin inima-la, jchaá-la; kò jè xita, kosijna-xkó'nchi-la Nainá nga skoexkón; kokjeiin-la nga kixi kjoa nga ya tijnajin-nò Nainá.

Okixi xi kitsjaà Pablo kó s'iin xita k'e nga maxkóya nga jeya síkijna Nainá

²⁶ Jñò ndi 'ndsè kò tichjaá, kó s'in fiya-nò jña 'én koi? Tsòyaá-ne, k'e nga maxkóya nga jeya níkijna Nainá, tjin i'nga xita xinguiòo xi seè-la Nainá; tjin i'nga xi ma-la okóya 'én-la Nainá; tjin xi ma-la bénojmi 'én xi jye tsakó-la Nainá; tjin xi chja 'én xi kjeij tsò xi mi yá xita fiya-la; tikoáá tjin xi ma-la síkatoya 'én xi kjeij tsò. Ngats'ii xá koi, k'oaá s'in kàtabitasòn mé-ne nga isa ndaà s'e-la nga'ño inima-la jña xita naxandá-la Nainá.

²⁷ Tsà tjin xita xi ma-la chja 'én xi kjeij tsò xi mi yá xita fiya-la, tà jò kò tsà jàn kichja; tanga ta jngoò jngoò kichja; kò jngoò xi síkatoya 'én koi.

²⁸ Tsà tsjin xita xi ma-la síkatoya, tà jyò kàtitsajna nga nguixkon naxandá-la Cristo, tikoáá-ne tà jjin inima-la kàtichjakò Nainá.

²⁹ K'oaá tis'in tjin ts'e xita xi chja ngajo-la Nainá, tà jò-ne kò tsà jàn xi kichja. Jña xita xi i'nga, tà kji'nchré-né; ta siningàsòn-kjoò-né a ndaà tjin, o xi majin-né.

³⁰ Jña xita xi titsajna, tsà kitjokajin jngoò xita xi Nainá síkichiya-la 'én xi mejèn-la nga kichja, jè xita xi tichjaya tikoáá-ne ta jyò kàtijn, kàtatsjá'nde-la nga jè kàtichja.

³¹ K'oaá ma-ne, ngats'ioò xi ma-nò nokjoà ngajo-la Nainá komaá kinókjoaa nga jngoò jngoò-nò mé-ne nga isa ndaà koma-nò kò isa ndaà kotsja-nò ngats'ioò.

³² Jña xita xi ma-la chja ngajo-la Nainá, mochjeén-né nga tijnà skòsòn-la kós'in kichja.

³³⁻³⁴ Nga Nainá, jè xi mejèn-la nga s'e kjoa'nchán, majin-la nga kjoasi s'e.

Jña íchjin, jyò kàtitsajna, koni ma ngats'ii naxandá-la Cristo ñánda maxkóya xita-la; mikì tji'nde nga kichja; ndaà kàta'nchréñijon koni s'in tichja kjotixoma.

³⁵ Tsà mé kjoa xi mejèn-la nga skoe, yaá ni'ya-la kàtakjònangui-la x'in-la. Mikì ndaà tjin tsà jngoò chjoón kichjajin ñánda maxkóya xita naxandá-la Nainá.

³⁶ ¿A k'oaá s'in nikitsjeèn nga ta it'aà tsajòn kisindaà 'én-la Nainá? ¿A k'oaá ma-nò tsà ta jñò-nó xi kitjoé-nò?

³⁷ Tsà tjin i'nga xita xinguiòo xi k'oas'in síkitsjeèn nga ma-la chja ngajo-la Nainá, o xi ndaà machiya-la kjohitsjeèn-la Inima Tsjeè-la Nainá, k'oas'in kàtakixiya-la nga jña 'én xi tikji-nò, kjotixoma ts'eé Na'èn-ná.

³⁸ Tsà tjin xita xi mikì sasén-la koni s'in okoòya-nò, tikoáá Nainá mikì sasén takòn xita jè.

³⁹ Ndí 'ndsè kọ tichjaá, k'oaá s'ín 'ńó tinchátsjioò nga tìnókjoa ngajo-là Nainá; tanga kì bítšajna ikòn-là jńà xi ma-là chja 'én xi k'ejí tsò xi mì yá xítà fiya-là.

⁴⁰ Tanga ngats'ìi kjoa koi, ngui ndaà t'een, kixi tanguíkoo.

15

K'e nga jaáya-la Cristo

¹ I'ndeí ndí 'ndsè kọ tichjaá, 'an mejèn-na nga sikkítsjeèn-nò jè 'én ndaà-là Nainá xi kjoa ts'e Cristo xi 'an kichjàyajiin-nò xi kichjoétjò kọ nga kixi titsajnakoo.

² Jè 'én ndaà-là Nainá xi kjoa ts'e Cristo xi koma kochrjejiin-nò kjo'in tsà kixi titsajnakoo skanda i'ndeí koni s'ín nga kichjàyajiin-nò nga tisa ítjòn; tsà majin, nímé chjí-là nga kòkjeiín-nò.

³ Jè kjoa xi isa 'ńó tjin, jè-né nga kos'ín tsakoòya-nò koni tjin xi 'an kitjoé-na, nga jè Cristo k'en ngajo-ná xi kjoa ts'e jé-ná nga k'oaá s'ín tichja Xojon-là Nainá;

⁴ nga kisihiin, koa nga ijchò jàn nachrjein jaáya-là, koni s'ín tichja Xojon-là Nainá.

⁵ K'e nga jaáya-là, tsakó-là yijo-là jè Cefas [tijè-ne Pedro], ikjoàn tsakó-là yijo-là jńà xítà-là xi i'nga, ya tejò ma-ne kọ Pedro.

⁶ Xi komà iskan, tsato 'òn sindo ma-ne xítà 'ndsè xi titsajnajtín nga tsakó-là yijo-là. Jńà xítà koi, tjin i'nga xi jye k'en, tanga kjin ma xi tákó titsajnakon skanda i'ndeí.

⁷ Ikjoàn tsakó-là yijo-là jè Jacobo. Xi komà iskan tsakó yije-là yijo-là jńà xítà-là xi tsibixáya-là.

⁸ Xi jyehet'aà-ne, ikjoàn 'aán tsakó-na yijo-là. 'An, k'oaá s'ín ngaya-là koni tsà jngoò ki'ndí xi mì jé nachrjein kits'iin koni s'ín chíya nachrjein-là.

⁹ 'An-ná xi isa 'ńó nangui tjna-là kóhotjin jńà xítà xi tsibixáya-là Jesús. Skanda mìkìi ok'in-na nga k'oas'ín k'oin-na; nga 'aán kiitjingui kondra-là jńà xítà naxandá-là Cristo.

¹⁰ Tanga jè kjondaà-là Nainá ndaà tsasikò-na; k'oaá komà-ne nga 'an tsibixáya-na. Jè kjondaà-là, mìtsà tà kjojtò kitsjaà-na. Tanga 'an, isaá 'ńó kisixá mì k'oa-ne koni ngats'ìi xítà-là xi i'nga. Kixi kjoa, mìtsà nga'ńó ts'an, kjondaà ts'eé Nainá.

¹¹ Tsà 'an-ná, kọ tsà jńà xítà-là xi i'nga xi ndaà síxá, tanga jè xi chjí-là nga k'oa s'ín nokjoàya-jen, koa jńò, k'oaá s'ín mokjeiín-nò.

K'e nga kjoáya-la jńà xítà xi jye k'en

¹² K'oaá s'ín tìnokjoáya nga jè Cristo jaáyajiin-là xítà xi jye k'en, tanga, ¿mé-ne tjin i'nga-ne xítà xinguiòo xi tsò: “Jńà xítà xi jye k'en mì tì kii kjoáya-là.”?

¹³ Tsà mìkìi kjoáya-là xítà xi jye k'en, tikoáá jè Cristo, mì-la tsà kixi kjoa nga jaáya-là.

¹⁴ Tsà mìkìi jaáya-là Cristo, jńà 'én xi nokjoàya-jen nímé-la chjí-là, tikoáá nímé-la chjí-là koni s'ín mokjeiín-nò.

¹⁵ Tikoáá ngajen, xítà ndisoó kítjokàngui-jen it'aà ts'e Nainá, nga k'oaá s'ín nokjoàya-jen 'én-là Nainá nga bixón-jen: “Jè Nainá kisikjaáya-là Cristo.” Nga tsà jńà mik'en mìkìi kjoáya-là, mì-la tsà kixi kjoa nga kisikjaáya-là Cristo.

¹⁶ Tsà jńà xítà xi jye k'en mìkìi kjoáya-là, tikoáá jè Cristo mì-la tsà kixi kjoa nga jaáya-là.

¹⁷ Jè Cristo, tsà mìkìi jaáya-là, nímé-la chjí-là koni s'ín mokjeiín-nò it'aà ts'e, tákó yaá-la titsajnajjòò jé-nò.

¹⁸ Tikoáá jńà xítà xi jye k'en nga kòkjeiín-là it'aà ts'e Cristo, jngoò k'aá-la kichijà, tsà mì jaáya-là Cristo.

¹⁹ Jè kjoa xi chińà-lá it'aà ts'e Cristo, tsà tà íí isò'nde kjoehet'aà, jńà-la xi ngui xítà ima 'mì-ná kó ngats'ìi xítà xi tjin isò'nde.

²⁰ Tanga ngui kixi kjoa nga jè Cristo jaáyaá-là it'aà ts'e kjoa biyaà. K'oaá ngaya-là koni tsojmì xi majchá ítjòn, nga jè Cristo jaáya ítjòn-là ngats'ìi xítà xi iskan kjoáya-là [nga mì tì kii kiyá-ne].

²¹ Koni s'ín komà nga it'aà ts'e jngoò xita kjòts'ia nga biyaà xita, k'oaá tís'ín komà nga it'aà ts'e jngoò xita j'ìi nga kjoaáya-la xita xi jye k'en.

²² Koni s'ín ma nga biyaà ngats'ìi xita xi it'aà ts'e tje-la Adán kits'iin, k'oaá tís'ín ma nga kjoaáya-la ngats'ìi xita xi it'aà ts'e Cristo ts'iin xitse-ne.

²³ Tanga jngoò ìjngoò 'ncha ndiyá-né nga kjoaáya-la koni s'ín oko-la. Jè Cristo, tíjna ítjòn nga jaáya-la; k'e nga kjoíi ìjngoò k'a Cristo, k'eé kjoaáya-la xi xita ts'e.

²⁴ Cristo, ítjòn sijkjehesòn ngats'ìi xi kondra fi-la, ngats'ìi xi títsajna ítjòn, xi tjín-la nga'ño ko xi otíxoma. Ikjoàn jè Cristo sijnngatsja kjotíxoma-la Nainá xi Na'èn-ná ma; k'eé kjoehet'aà isò'nde.

²⁵ Mochjeén-né nga jè Cristo kàtatíxoma skanda k'e nga jye sijkítsajnangui yije ndsoko jña xi kondra-la.

²⁶ Ko jè kondra-la xi fehet'aà-ne nga chija, jé kjoa biyaà.

²⁷ Nita mé xi tjín, Nainá, yaá kisikítsajnangui yije ndsoko Cristo. Jè tíhotíxoma yije-la. Tanga mìtsà tsò-ne kjoa nga jè Nainá, yaá tíjnangui ndsoko Cristo. Nga jè sobá Nainá xi kisikítsajnangui ndsoko nita mé xi tjín.

²⁸ K'e nga jye ya títsajnangui yije ndsoko Cristo nita mé xi tjín, jè Cristo, nga Ki'ndí-la Nainá ma, tikoáá nangui sijkíjna yijo-la nga nguixkon Nainá nga jè sobá Nainá tsibítsajnangui ndsoko Cristo nita mé xi tjín, mé-ne nga jè Nainá jngoò k'aá jè kíjna ítjòn-la nita mé kjoa-ne.

²⁹ Tanga tsà jña xita xi jye k'en mì tì kii kjoaáya-la, jña xita xi it'aà ts'e mik'en ma-ne bautizar, ¿kó s'ín síkítsjeèn? ¿Mé-ne it'aà ts'e mik'en ma-ne bautizar, tsà kixi kjoa nga mì tì kii kjoaáya-la xita?

³⁰ Ko ngajen, ¿mé kjoa-ne nga nachrjein nchijòn binchaxkón-lajen yijo-najen, tsà mì tì kii kjoaáya-la xita?

³¹ Ndí 'ndsè ko tichjaá, k'oaá xan-nò nga nguì kixií kjoa nga nachrjein nchijòn tjín-na kjoxkón tsà ya kiyá, koni s'ín nga nguì kixií kjoa nga matsja-na it'aà tsajòn nga ngàsòn mokjeiín-ná it'aà ts'e Na'èn-ná Jesucristo.

³² Tsà tà jña kjoa ts'e isò'nde-né nga kiskaàn-koaa xita koni tsà xa ján Éfeso, ¿mé xi kisikijne? Tsà jña xita xi jye k'en mì tì kii kjoaáya-la, tikoáá-ne: “Kichiaá, s'ioáá nga nchijòn-lè kiyá-ná.”

³³ Kì yá xita xi konachan-nò it'aà ts'e kjoa koi. Nga tjín jngoò 'én xi tsò: “Jña xita xi tsahijtakoáá xi mìkii ndaà s'ín, jña síkíts'ón-jìin kjoa xi ndaà tjín koni s'ín titsanjchá yijo-ná.”

³⁴ Ndaà tikítsjeèn it'aà ts'e kjoa koi; kì tà tsjaà jé binchaàtsjioè. Nga tjín i'nga xita xinguiòo xi mìkii beèxkon Nainá. K'oaá xan-nò mé-ne nga kàtasobà-nò.

Kó kjoàn koma mik'en k'e nga kjoaáya-la

³⁵ Tsà koi nachrjein-la tjín i'nga xita xi tsò: “¿Kós'ín koma nga kjoaáya-la xita xi jye k'en? ¿Kó kjoàn yijo xi kitjokàjìin-ko?”

³⁶ ¿Mé tà tònò-nò! K'e nga 'bè tje, jña nojmé nga sihiìin, biyaà-né, mé-ne nga kiso xitse-ne jno, nga ìjngoò k'a kítsajnakon.

³⁷ K'e nga 'bè tje, mìtsà jña xi jye jno bitjee; tà jña nojmé bitjee, o xi trigo-né.

³⁸ Tanga jè Nainá, k'oaá kjoàn s'ín koni s'ín mejèn-la; k'oaá kjoàn s'ín nga jngoò ìjngoò skaya xojmá koni kjoàn tje-la.

³⁹ Jña yijo, mìtsà ngàsòn kjoàn. Yijo-la xita, kj'eíi kjoàn; yijo-la cho, kj'eíi kjoàn; yijo-la tìn, kj'eíi kjoàn; yijo-la nise, kj'eíi kjoàn.

⁴⁰ Koni choòn i isò'nde nga tjín yijo xi kj'eíi s'ín tsejèn, k'oaá ti choòn ngajmii nga tjín xi kj'eíi s'ín tsejèn. Mìtsà ta ngàsòn tsejèn xi tjín ngajmii ko xi tjín isò'nde.

⁴¹ Jè ts'oi kj'eíi s'ín tsejèn, jè sá kj'eíi s'ín tsejèn, jña ni'ño kj'eíi s'ín tsejèn. K'a kj'eíi, k'a kj'eíi s'ín tsejèn nga jngoò ìjngoò skoya.

⁴² K'oaá t̄is'ín ma nga kjoaáya-la x̄ita xi jye k'en. Jè yijo xi sihiijìn, bits'on-né, t̄anga jè yijo xi kjoaáya-la, m̄i t̄i k̄i k̄its'ón-ne.

⁴³ Sihijìn-né xi n̄imé ch̄j̄i-la; jè xi kjoaáya-la jeya-né. Xi sihiijìn, yijo indaà-né; xi kjoaáya-la t̄j̄in-la nga'ñó.

⁴⁴ Jè yijo xi sihiijìn, tax̄ki yijo-né, ts'e isò'nde-né. Yijo xi kjoaáya-la, yijo x̄itse-né, ts'eé In̄ima Tsjeè-la Nainá. T̄j̄in xi tax̄ki yijo, t̄ikoa t̄j̄in xi tsjá In̄ima Tsjeè-la Nainá.

⁴⁵ K'oaá s'ín t̄ich̄ja Xojon-la Nainá nga tsò: “Jè x̄ita x'ín t̄j̄on xi k̄i'mì Adán, jngoò xi x̄ita komà xi tsib̄j̄nakon.” T̄anga [jè Cristo], jngoò in̄ima xi s̄ík̄itsajnakon x̄ita, nga jè j'ì ngajo-la Adán nga jyehet'aà-ne kjoa.

⁴⁶ T̄anga jè xi in̄ima, m̄itsà jè j'ì t̄j̄on; jè j'ì t̄j̄on xi tax̄ki yijo ts'e isò'nde, iskaán j'ì xi in̄ima.

⁴⁷ Jè x̄ita x'ín xi t̄j̄on, i it'aà nangui ts'e; ni'ndeé kisindaà-ne. Jè x̄ita x'ín xi ma-ne jò, ngajm̄i ts'e, yaá inchrobà-ne, [nga jè xi Na'èn-ná].

⁴⁸ Ngats'ì x̄ita xi i isò'nde ts'e, k'oaá kjoàn yijo-la koni k̄i ts'e Adán nga ni'ndeé kisindaà-ne. Ngats'ì xi ngajm̄i k̄itsajna, k'oaá kjoàn koma yijo-la koni k̄i ts'e Cristo xi ngajm̄i inchrobà-ne.

⁴⁹ I'ndeji, j̄n̄á, k'oaá kjoàn tsejèn yijo-ná koni k̄i xi ni'nde kisindaà-ne; nga komà iskan, k'oaá kjoàn kotsejèn yijo-ná koni k̄i xi ngajm̄i j'ì-ne.

⁵⁰ Ndí 'ndsè, k'oaá xan-nò jè yijo-ná nga j̄n̄i t̄j̄in-la m̄ik̄i ma kjoahas'en-j̄in ñánda tíhotíxoma Nainá. T̄ikoaá jè yijo-ná xi bi'ndoya m̄ik̄i ok'ín-la nga ya kjoahas'en-j̄in ñánda t̄j̄in xi m̄ik̄i bi'ndoya.

⁵¹ K̄en̄ojm̄i jngoò-nò kjoa'ma ts'e Nainá: J̄n̄á xi x̄ita-la Cristo 'mì-ná, m̄itsà ngats'iaá nga k̄iyá, t̄anga ngats'ì-ná ta jngoò t̄j̄o kjoat̄j̄iya-ná,

⁵² k'oaá ngaya-la koni k'e nga tsíx'aá koa bíchjoa xkoaán, t̄ik'eé-ne nga sk̄indàya chrjo trompeta xi fehet'aà-ne. K'e nga k̄jone chrjo trompeta, j̄n̄á mik'en kjoaáya-la, m̄i t̄i k̄i k̄i'ndo-ne n̄ita k̄jé-ne. Koa j̄n̄á kjoat̄j̄iya-ná.

⁵³ Jè yijo-ná nga biyaà k̄o nga bi'ndo, mochjeén-né nga tjoé jngoò-la yijo xi m̄i t̄i k̄i k̄iyá-ne k̄o m̄i t̄i k̄i k̄i'ndo-ne n̄ita k̄jé-ne.

⁵⁴ K'e nga k'oas'ín koma nga jè yijo-ná tjoé jngoò-la yijo xi m̄i t̄i k̄i k̄iyá-ne k̄o m̄i t̄i k̄i k̄i'ndo-ne n̄ita k̄jé-ne, k'eé k̄itasòn koni s'ín t̄ich̄ja Xojon-la Nainá nga tsò: “Jè kjoa xi s̄ík̄ijne jngoò k'aá s̄ích̄ja kjoabiyaà.

⁵⁵ Ji xi kjoa biyaà 'mì-lè, ¿ñánda-ne nga kin̄ik̄ijni? ¿Ñánda t̄jna na'yá-lè xi ma-la s̄ík'en x̄ita?”

⁵⁶ Jè na'yá xi t̄j̄in-la kjoa biyaà, jé kjoa ts'e jé. K̄o jè nga'ñó xi t̄j̄in-la jè kjoa ts'e jé, jé k̄jot̄ixoma.

⁵⁷ Ndaà ch̄j̄i-la Nainá nga jè tsjá-ná nga'ñó xi it'aà ts'e Jesucristo xi ot̄ixoma-ná nga n̄ik̄ijne-lá kjoa biyaà k̄o kjoa ts'e jé.

⁵⁸ J̄n̄o ndí 'ndsè xi matsjake-nò, kixi t̄itsajna. Niyá xi s̄iik̄jat̄j̄iya-la k̄joh̄itsjeèn-nò. K̄jit'aà nachrjein isa 'ñó t̄ixá-là Na'èn-ná. Nga t̄ij̄in-nò nga jè xá xi 'nè xi ts'e Na'èn-ná, m̄itsà tà k̄jot̄j̄o.

16

Ton xi maxkót'aà-la j̄n̄a x̄ita naxandá-la Cristo

¹ Jè ton xi maxkót'aà-la x̄ita naxandá-la Cristo, k'oas'ín t'een koni s'ín kixan-la x̄ita naxandá-la Nainá ján nangui Galacia.

² J̄n̄o, nga jngoò ījngoò, nga j̄in j̄in nachrjein k'e nga tahàngo, tit̄j̄o chiba ton-nò koni s'ín machikon-t'ioòn, mé-ne nga m̄i k'e k̄ixkó-nò k'e nga 'an xi k̄jchoa.

³ K'e nga k̄jchokon-nò ya Corinto, s̄ikasén ján Jerusalén x̄ita xi j̄n̄o ch̄jaaj̄n̄o. Tsjaà-la xojon carta nga k̄jiko jè ton xi maxkót'aà-nò.

⁴ Tsà mochjeén nga t̄ikoa 'an k̄jían, komaá k̄jiko-na j̄n̄a x̄ita koi.

K'e nga kisikítsjeèn Pablo nga kjoì ján Corinto

⁵ Mejèn kjíkon-nò k'e nga jye kjoáhatoaa ján nangui Macedonia, nga k'oaá s'ín tjíndaà-na nga ya kjoáhatoaa mé-ne nga ikjoàn kijcho-na Corinto.

⁶ Tsà koma ya kótijnako chiba nachrjein-nò, ko tsà koií nachrjein-la nga ya kótijnako-nò skanda k'e nga kjoehet'aà nachrjein-la chon 'nchán, mé-ne jñò koma síhjat'aà-ná k'e nga tsà ñánda kjián nga koma iskan.

⁷ Majìn-na nga tà jngoò tjò skotsejèn-nò; jè xi mejèn-na nga kjìn nachrjein kótijnako-nò, tsà Nainá mejèn-la nga tsjá'nde-na.

⁸ Íí kótijna naxandá Éfeso skanda nachrjein ts'e s'eí Pentecostés, [jè s'eí xi bitjo k'e nga jye bijchó icháte nachrjein nga bitjo s'eí Paxko].

⁹ Ndaà tíjjo'nde-na nga tís'iaàn xá-la Nainá xi 'ñó ndaà tíbitasòn, nas'ín 'ñó kjìn ma-ne xita xi kondra títsajna-na.

¹⁰ Tsà kijchòkon-nò jè Timoteo, chítsejèn-là nga tsja kátas'e-la nga kíjnako-nò nga mì yijo-la kinchaxkón-la, nga tíkoá xá-la Nainá tís'ín koni 'an.

¹¹ K'oaá ma-ne, kì nachrjenguioò jñò, ta saá tichját'aà-là nga 'nchán kàtjanchrobákon-na; 'an, tíkoñaá-la ko xita 'ndseé xi i'nga.

¹² 'An 'ñó tsibìtsi'ba-la jè 'ndsè Apolos, nga katahijtako jña xita 'ndseé xi tjínè nga kjíkon-nò, tanga majìn-la nga fi; k'ée-la kjoì k'e nga ko'a-la.

¹³ Ndaà titsajnakon. 'Ñó kixi titsajnakoo jè 'én xi mokjeiín-nò. Kì yá xi tsakjoòn-là, kátas'e-nò nga 'ñó.

¹⁴ Ngats'ii kjoá xi 'nè, koó kjoatjòcha-nò k'oa t'een.

¹⁵ Jñò ndí 'ndseé ko tichjaá, jyeé tíjìin-nò nga jña xita ni'ya-la Estéfanos, jña kòkjeiín ítjòn-la 'én-la Cristo ya nangui Acaya. Jña xita koi, k'oaá s'ín bínè-la yijo-la nga jña xita naxandá-la Cristo síhjat'aà-la.

¹⁶ Ndí 'ndsè, bìtsi'bà-nò nga tiná'yañijon-là xita xi k'oa'sín síxá koni jña xita koi, ko ngats'ii xita xi mìkiì bijta-la nga síxá-la Nainá.

¹⁷ Matsja-na nga j'ìikon-na Estéfanos, Fortunato ko Acaico [nga jñò kinikasén], nga jña j'ii síkitasòn xi jñò mìkiì komà kinítasòn nga inchrobàchon-ná.

¹⁸ Jña j'ii síje ikon-na ko tsajòn. K'oaá ma-ne jchaxkón jña xita xi k'oa'sín s'ín koni jña xita koi.

Pablo síhixat'aà naxandá-la Cristo

¹⁹ Jña naxandá-la Cristo xi títsajna nangui Asia síhixat'aà-nò. Jè Aquila ko Priscila ko xita naxandá-la Cristo xi bixoña ya ni'ya-la, it'aà ts'e Na'èn-ná ndaà síhixat'aà-nò.

²⁰ Ngats'ii xita 'ndseé, síhixat'aà-nò. Jñò tíixat'aà nga jngoò l'jngoò xita xinguioo nga ko inima-nò.

²¹ 'An, xi Pablo 'mì-na, tísìhixat'aà-nò nga ko ndsaa tìkjìl-nò xojoñ jè.

²² Tsà tjín xita xi mìkiì matsjakeè Jesucristo xi otíxoma-ná, jè xita neí kàtjìko. Na'èn, jì nìton nchroboí.

²³ Jè kàtijnako-nò kjondaà-la Jesucristo xi otíxoma-ná.

²⁴ Kjit'aà nachrjein kátas'e-nò kjoatjòcha-na nga jè Cristo Jesús titsajnakoá. K'oaá s'ín kátama.

Xojoŋ carta-la San Pablo xi ma-ne jò xi kiski-la xita naxandá-la Cristo xi títsajna Corinto

Kó tsò Pablo nga síhixat'aà jñà xita naxandá-la Cristo xi títsajna Corinto

¹ 'An, Pablo, tìsikasén-nò xojoŋ jè, nga k'oaá s'ín kjòmejèn-la Nainá nga 'an tsibíxáya-na Cristo Jesús. 'An, kò 'ndsè Timoteo tìtsanikasén-nòjèn xojoŋ jè. Tìtsanìhixot'aà-nòjèn jñò xi xita naxandá-la Nainá 'mì-nò xi títsajnaà ya naxandá Corinto, kò ngats'ì xita tsjeé-la Cristo xi títsajna kóhokji nangui Acaya.

² Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya ijìin inìma-nò.

Kó tsò Pablo nga tsjá-la kjondaà Nainá

³ Ndaà kàtayaxkón Nainá xi Na'èn-la ma Jesucristo xi otíxoma-ná. Jè Nainá xi Na'èn-ná ma, tse kjohimatakòn tjín-la it'aà tsaján. Kò jè, kjit'aà nachrjein síje takoán.

⁴ K'e nga mé kjo'in títsajnajñaá, jè Na'èn-ná síjetakòn-ná mé-ne jñá, k'oaá tìs'ín síjetakoán xinguiáá xi tìkoa kjo'in títsajnajìin koni s'ín kisijetakòn-ná Nainá.

⁵ Koni tjín kjo'in xi tse níkjiaán xi kjoa ts'e Cristo, k'oaá tìs'ín tse kjojetakòn sakó-ná it'aà ts'e Cristo.

⁶ Ngajen, tsà kjo'in tìtsanìkjeiín-jen, kjondaà tsajòn-nò nga s'e-nò kjojetakòn, koa kítjokàjñò kjo'in. Tsà Nainá síjetakòn-najen, jè-né nga tìkoa jñò s'e-nò kjojetakòn, koa kichìkjoa kò-nò kjo'in xi jìn tìtsanìkjeiín-jen.

⁷ Tjín kixí kjoa xi chiñà-lajen it'aà tsajòn. Tjìin-najen, koni s'ín tíhokot'aà-nò kjo'in xi tìtsanìkjeiín-jen, k'oa tìs'ín okot'aà-nò kjojetakòn xi tjín-najen.

⁸ Jñò 'ndsè kò tichjaá, mejèn-najen nga kàtasijìin-nò kjo'in xi kis'e-najen ján nangui Asia. Tse jchán kjo'in kinìkjeiín-jen. Jyeé mì tì kii kichìkjoako-najen skanda mì tì kii bixón-najen tsà kítajnakon isa-jen.

⁹ K'oaá s'ín komà-najen nga jyeé-la tjínè-la nga kiyá-jen. K'oaá s'ín komàt'in-jen mé-ne nga isa ndaà kjót'aà takòn-najen Nainá xi ma-la síkjaáya-la mik'en, nga mì tà yijo-najen kjót'aà takòn-jen.

¹⁰ Nga jyeé kjomeè k'en-jen, tanga Nainá tsasìko-najen nga kisiكاتojìin-najen kjo'in kò tákò síkatojìin-isa-najen kjo'in. Kò k'oaá s'ín kjit'aà takòn-jen nga jè síkatojìin isa-najen nita mé kjoa-ne.

¹¹ Jñò, mochjeén-né nga sichját'aà-najen nga kinókjoat'aà-là Nainá it'aà tsajen mé-ne nga isa kjin koma-ne xita xi kichjat'aà-la Nainá, tìkoaá kjin koma xita xi tsjá-la kjondaà Nainá koni s'ín machikon-t'in-jen.

Mé-ne mìkii kii-ne Pablo ján Corinto

¹² Tjín jngò kjoa nga ndaà níkítajna-jen yijo-najen. K'oaá s'ín beè-lajen takòn-jen nga it'aà ts'e Nainá nchrobá-ne nga tsjeé kò kixi tihonguíko-jen yijo-najen i isò'nde, kò jè tjína ítjòn it'aà tsajòn. Mìtsà kjoachjine-la xi taxkì xita nga kò'nè-jen, kjondaà-la Nainá-né.

¹³ Mìtsà kj'eí kjoa nga tìtsachjìin-nòjèn, ta jè-né nga kixkejñò kò kjoas'en-jìin-nò koni tsò 'én xi jtít'aà xojoŋ jè. K'oaá s'ín majngòò takoàn nga ngui ndaà kjìya-nò

¹⁴ koni s'ín jye kjòchiya chiba-nò nga tsja kàtama-nò it'aà tsajen kò nga tìkoa tsjaá koma-najen it'aà tsajòn k'e nga kjoí ijngòò k'a Jesucristo xi otíxoma-ná.

¹⁵ 'An, jyeé ndaà tjíngòò takoàn it'aà ts'e kjoa koi, k'oaá ma-ne nga k'oaá s'ín kiskoòsòn-la nga jò k'a kjíkon-nò mé-ne jñò, jò kjondaà sakò-nò. [Tanga mì k'oaá s'ín tsitasòn.]

16 K'oaá s'ín kisikítsjeèn, k'e nga kiaà nangui Macedonia nga ya jahato ítjòn-nò. Tjín-nè nga kjoahato ìjngoò k'a-nò k'e nga kjinchrobà-na mé-ne jñò koma sìchjât'aà-ná nga kjián nangui Judea.

17 K'e nga k'oas'ín kiskoòsòn-la, ¿a k'oaá s'ín kinikítsjeèn nga 'an, tìsiskáko-nò? Majìn, nga mì k'oaá s'ín s'iaàn koni s'ín xi taxkì xità isò'nde. Mìtsà ítjòn xan-nò: “Koma-né”, ko tìk'e-ne ìjngoò k'a xan-nò: “Mikìi koma.”

18 Tíbeè Nainá; 'én kixí xi kixan-nò, ngajen, mì k'oaá s'ín nokjoà-jen nga bixón-jen: “Jon, koma-né”, ko “Mikìi koma.”

19 Timoteo, Silvano ko 'an, k'oaá s'ín nokjoàyajìin-nòjen it'aà ts'e 'én-la Jesucristo xi ki'ndí-la Nainá. Tsjin-la 'én xi tsò jon ko majìn. Nainá jngoò k'a síkitasòn it'aà ts'e Cristo nga tsò: “Jon, koma-né.”

20 Ngats'ì 'én xi chja Nainá koni s'ín tsjá tso'ba, it'aà ts'e Cristo bitasòn yije-né. Nga jè Cristo xi tsò “koma-né”. Ko it'aà ts'e Cristo, jñá bixón-ná: “K'oas'ín kàtama”, mé-ne jeya kijnane Nainá.

21 Jè Nainá, xi síkixiyandaà-ná nga jè titsajnaoá Cristo [xi xó jaàjìin-ne Nainá], tìkoáá jñá xó jaàjìin-ná Nainá.

22 Ko tìjè-ne Nainá xi tsibít'aà chiba-ná koni jngoò sello; kisikìjnajìin inìma-ná jè Inìma Tsjeè-la xi tjoé ítjòn-ná nga kixì kjoa nga tìkoá tjoé yije-ná kjondaà xi tjindaà-la nga tsjá-ná.

23 Tìkotsejèn Nainá, jè tíbeè inìma-na, mé-ne kj'eè kii fi-na Corinto koni s'ín tíjìin-na; koií kjoa-la, majìn-na nga 'on koma-la inìma-nò nga 'én ts'en kichjàko-nò.

24 Ngajen, majìn-nòjen nga ngajen, kjo'ñó kotixoma-nòjen it'aà ts'e 'én xi mokjeiín-nò. Ta saá nìchjât'aà-nòjen mé-ne nga s'e-nò kjotsja nga kixì titsajnaà koni s'ín mokjeiín-nò.

2

1 K'oaá ma-ne nga k'oas'ín kiskoòsòn-la nga mì tì kii kùkon-nò. Majìn-na nga ba kìtsajnaà.

2 Tanga tsà 'an, ba síkìtsajna-nò, nga koma ìskan, mì tì yá tjín-ne xi sìtsjako-na, nga jñò, jyeé ba titsajnaà.

3 Koií xá jye kiskii jngoò-nò xojon, mé-ne k'e nga kìchokon ìjngoò k'a-nò nga mì ba síkìjna-ná nga mochjeén-né nga jñò sìtsjako-ná. Nga k'oaá s'ín tíjngoò takoàn, 'an, matsja-na tìkoá jñò, matsjaá-nò.

4 K'e nga k'oas'ín kiskii-nò, ndaà jchán kokájno-la inìma-na, baá kis'e-na skanda ndáxkoaàn tsibíxteèn. Tanga 'an mìtsà koi xá kiskii-nò nga kàtaba-nò. Jè-né nga jchaa nga 'ñó matsjake-nò.

Kó kitsò 'én xi kùchja Pablo it'aà ts'e xità xi tsohótsji jé

5 Jè xità xi tsohótsji jé, mìtsà ta 'an xi ba kisikìjna-na, mejèn tsà ba kisikìtsajna ngats'ìi xità naxandá-la Cristo. Tà k'oaá xan-nò nga mì koto chiba-la koni s'ín tìxan-nò.

6 Nga kjìn ma-nò xi tsibìnè-là kjo'in jè xità jè; jyeé ndaà tjín, ta koma-ne.

7 I'ndeì, jè xi s'een nga sìjchàat'aà-là jé-la; sìjetakòn xità jè, mé-ne nga mì kjoa kiyajìin-ne.

8 K'oaá ma-ne nga bìtsi'bà-nò nga ndaà jchibàya-nò nga ìjngoò k'a tìtsjacha xità jè.

9 Tìkoá koií xá kiskii-nò it'aà ts'e kjoa koi, mejèn-na skot'aà-nò, a kixí kjoa nga ma-nò nìkitasòn yije.

10 Jè xità xi jñò nìchàat'aà-la jé-la, tìkoáá 'an sìjchàat'aà-la. Tsà mochjeén-né nga 'an sìjchàat'aà-la xità jè, 'an jyeé kisijschàat'aà-la xi kjondaà tsajòn ko tíbeè Cristo.

11 Mé-ne jè xità neìi mìkii koma jè sìikijne-ná, nga jyeé ndaà 'yaá kjoamaña-la kós'ín síxá.

Kó komà-la Pablo nga mìkii kisatùkjoò Tito ján Troas

¹² K'e nga ijchoa ján naxandá Troas, nga kichjàya 'én ndaà-la Nainá xi kjoa ts'e Cristo, it'aà ts'e Na'èn-ná kitáx'a'nde-na nga kisixákoaa 'én ndaà-la Nainá.

¹³ Tanga mikìi ndaà kis'e-la inìma-na nga mikìi kiskaajñaà jè 'ndsé Tito. K'oaá komà-ne kisikítsajna jña xita xi ya i'nde-la, ikjoan kiaà ján nangui Macedonia.

Mé kjoa-ne nga jè Pablo tsjá-la kjondaà Nainá

¹⁴ Ndaà chjí-la Nainá nga it'aà ts'e Cristo fiko-najen k'e nga okó-lajen jña xita isò'nde nga jye kisikijne. It'aà tsajen k'oaá s'ín obísòn kjohítsjeèn-la Nainá xi kos'ín ngaya-la koni jngoò jta-la tsojmì xi 'ñó ndaà jne, mé-ne nga skoe-ne jña xita nita ñánda-ne nga títsajna.

¹⁵ It'aà tsajen k'oaá s'ín ngaya-la koni nì'ndi-la chrjongó-la Nainá, k'e nga jè Cristo tsját'aà-la Nainá. K'oaá s'ín bijchókajìin-la jña xita xi bitjokajìin kjo'in ko xita xi chija.

¹⁶ It'aà ts'e jña xita xi chija, [k'e nga beè-najen nga bènojmiya-jen 'én-la Nainá], k'oaá s'ín ch'o jne-la koni jngoò jta xi sík'en-ná. Tanga jña xita xi bitjokajìin kjo'in, k'oaá s'ín ndaà jne-la koni jngoò jta xi síkíjnakon-ná. It'aà ts'e xá koi, nijngoò xita chíkjoa-la nga síkitasòn xi ta kjohítsjeèn ts'e.

¹⁷ Ngajen, mikìi k'oaá s'ín 'nè-jen koni s'ín xita xi kj'eíi xi chjaya 'én-la Nainá nga ton síkijne. Ngajen, 'én kixíi nokjoà-jen. Nainá tíbeè-ne nga jè kisikasén-najen ko nga'ño ts'e Cristo-né nga nokjoàya-jen, nga jè Cristo títsajna-ko-jen.

3

Xá-la Nainá xi kjoa xitse

¹ K'e nga k'oaá mìnò-jen kjoa koi, ¿a bít's'ia ijngoò k'a-jen nga ndaà níkítsajna-jen yijo-najen? Jñò, ¿a k'oaá s'ín níkítsjeèn nga mikìi tjí'nde-na nga ma síxá tsà tsjìn-na xojon xi jñò k'oi-ná, o xi kj'eíi xita tsjá-na koni s'ín síjé xita xi kj'eíi?

² Majìn, jñò sobà-nò xi xojon-najen ma xi tíjìn jìjìn inìma-najen. Ngats'ii xita beè-né koa bíxkejìin-né.

³ K'oaá s'ín ndaà 'ya-jen nga jñò-nò xi koni xojon-la Cristo xi it'aà tsajen kitjei. Jngoò xojon carta xi mìtsà tinta kitjei-ne; koó Inìma Tsjeè-la Nainá xi tíjnakon kitjei-ne; mìtsà ndajo kitjeit'aà; yaá kitjeit'aà yijo inìma-la xita.

⁴ Kjoa koi, k'oaá s'ín makixiya nga it'aà ts'e Cristo mokjeiín-najen it'aà ts'e Nainá.

⁵ Xi ta nga'ño tsajen tsjìn-najen kjohítsjeèn mé xi s'en-jen. Tanga jè Nainá tsjá-najen kjohítsjeèn k'e nga mé xi 'nè-jen.

⁶ Jè Nainá tsjá-najen kjohítsjeèn nga chí'nda-la ma-jen mé-ne nga koma kìnókjoaya-najen it'aà ts'e kjondaà xitse xi Nainá tsibíndaajìin-ko jña xita. Mìtsà kjoa ts'e kjotíxoma xi xojon tjít'aà, ts'eé Inìma Tsjeè-la Nainá. Jè kjoa xi ts'e kjotíxoma sík'en-ná nga nguixkon Nainá, tanga jè Inìma Tsjeè-la Nainá síkíjnakon-ná.

⁷ Jè kjotíxoma xi kitjoé-la Moisés xi ndajo kitjeit'aà, kjoa biyaà j'iiiko. Tanga k'e nga sa kitjoé ítjòn-la kjotíxoma jè, k'oaá s'ín ki'ya-la kjoa jeya-la Nainá. Jè Moisés, k'e nga j'ii-ne nga kii mijìn-jno nindoò, jña xita Israel mikìi komà kiskoò'an Moisés nga 'ñó ote ni'ín kji isén-la; tanga xi komà iskan, chaán kichjà xi ote kji isén-la. Tsà k'oaá s'ín kis'e-la kjoajeya, jè kjoa xi tjínè-la nga chija,

⁸ isa jeya tjín kjondaà xitse xi tsjá-ná Nainá k'e nga tsjá-ná Inìma Tsjeè-la.

⁹ Nga jeya j'ii jè kjotíxoma xi kjoa biyaà tsibínè-ná, isaá 'ñó jeya kítasòn 'én xi nokjoàya-jen nga xita kixi síkítsajna-ná Nainá.

¹⁰ Nas'ín 'ñó kis'e-la kjoa jeya jè kjotíxoma xi jye tsato, tanga mikìi mangásòn-ko jè kjoajeya xi tjín-la kjondaà xitse; isaá 'ñó jeya tíjna.

¹¹ Tsà jè kjoa xi tíchijangui kis'e-la kjoa jeya, isaá jeya tjín kjoa xitse xi mì tì kii chíja-ne nita kjé-ne.

¹² Nga tíjngoò takòn-jen nga títsachiñá-lajen kjoa koi, k'oaá ma-ne nga mikìi ma-sobà-najen nga nokjoá-jen.

¹³ Mìtsà k'oas'ín 'nè-jen koni kis'iin Moisés nga nikje tsibíjtsa isén-la, mé-ne nga jñà xita Israel mìkii komà kiskoò'an-ne nga jye tíchijangui xi ote kji isén-la.

¹⁴ Tanga jñà xita Israel kjòtájaajin kjohítsjeèn-la. Skanda nachrjein i'nde, k'e nga bíxkejin Xojon-la Nainá xi tít'aà kjoa jchínga xi tsibíndaajin-ko xita, tákó k'oaá s'ín ma-la koni tsà nikje xoba kijtsa kjohítsjeèn-la. Ta jngoó it'aà ts'e Cristo koma tjáxin nikje jè.

¹⁵ Skanda nachrjein i'nde, jñà xita Israel, k'e nga bíxkejin xojon xi kiskii Moisés, tákó k'oaá s'ín ma-la koni tsà nikje xoba tíjtsa'ma kjohítsjeèn-la.

¹⁶ Tanga k'e nga jngoó xita síkjahatjia-la kjohítsjeèn-la nga fit'aà-la Na'èn-ná xi otíxoma-ná, tjáxin-la nikje xoba xi tíjtsa'ma kjohítsjeèn-la.

¹⁷ Nga jè Na'èn-ná, jè sobà-né xi Inima Tsjeè-la Nainá. Ya ñánda tíjna Inima-la Na'èn-ná, jñà xita títsajnandeí-né kjoa ts'e kjotíxoma.

¹⁸ Ngats'iaá jñà mì tì nikje xoba tíjtsa'ma-ne kjohítsjeèn-ná. It'aà tsaján k'oaá s'ín ngaya-la koni jngoó chítsin xi ma chítsejèn-yá xi okó kjoa jeya-la Na'èn-ná. Kjit'aà nachrjein isa jeya tíhotsejèn koni kji Na'èn-ná nga jè Inima Tsjeè-la tísíkatjia-ná.

4

Kó s'ín síhiseèn-ná jè 'én ndaà-la Nainá xi kjoa ts'e Cristo

¹ Koií kjoa-la ngajen, mìkii mahindaà inima-najen nga jè Na'èn-ná kjòhimakeè-najen nga xá ts'e kisingatsja-najen.

² Jyeé kichjaàxin-jen jñà kjoa ch'o xi tíj'ma, xi sísobà-najen; mìkii chonachan-jen, nì mìkii níkatjia-lajen 'én-la Nainá. Ngui 'én kixi bènojmi-jen, mejèn-najen nga nguixkon Nainá ngats'ii xita kàteèxkon kjohítsjeèn-najen kós'ín 'nè-jen.

³ Jè 'én ndaà-la Nainá xi kjoa ts'e Cristo xi nokjoàya-jen, jñà xita xi ya tíchijajin kjoa ts'e jé-la, ta jñà-né xi tíjtsa'ma kjohítsjeèn-la nga mìkii fiya-la.

⁴ Jè xita neí xi tíhotíxoma-la isò'nde nachrjein i'nde, xi kos'ín tíjna koni tsà nainá, jé bíchjoa xkon jñà xita xi mìkii mokjeiin-la it'aà ts'e Cristo; nga jè bíjñò kjohítsjeèn-la, mé-ne nga mìkii skoè-ne kjoahiseèn-la 'én ndaà-la Nainá xi kjoa ts'e Cristo xi 'ñó jeya tíjna, nga jè Cristo xi okó kó kji xi ngui jè sobà Nainá.

⁵ Ngajen, mìtsà tà it'aà tsajen nokjoà-jen k'e nga bènojmiya-jen 'én-la Nainá; it'aà ts'eé Jesucristo nokjoà-jen nga jè xi otíxoma-ná. Ngajen, tà chí'ndaá ma-jen nga ngajen nìxá-nòjen, koií-né nga matsjacha-jen Jesús.

⁶ Nainá, jè xi kitsò nga jè ni'ín kàtasíhiseèn i'nde ñánda jñò choòn, tíjè-né xi kishiseèn jijn inima-najen, mé-ne jñà xita xi kj'eíí kohiseèn-la nga skoexkon kjoa jeya-la Nainá koni s'ín 'ya-la ts'e Cristo.

Mé-ne tíjngoò-ne takoán nas'ín kjo'in titsanikjiaán

⁷ Kjondaà jè xi 'ñó tse chí-la, yaá tíjin yijo-najen. Tanga yijo-najen k'oaá s'ín ngaya-la koni tíj ni'nde. Jè Nainá k'oaá s'ín kis'iin mé-ne nga 'ya-la nga jè nga'ñó xi 'ñó ndaà tísíxajin yijo-najen, it'aà ts'e Nainá nchrobá-ne; mìtsà it'aà tsajen nchrobá-ne.

⁸ 'Nó kjin ma-ne kjoa xi tíjn-najen, tanga maá kitjokàjin-jen. Tjin kjoa xi makájno-najen, tanga mìkii mahindaà-jen.

⁹ Fitjngui kondraá-najen xita, tanga Nainá mìkii tsjeiin takòn-najen; jñà xita beètoòn-najen, tanga mìkii chíkjoa-la nga síkjesòn-najen.

¹⁰ Nita ñánda-ne nga onguí-jen, kjit'aà nachrjein mejèn-la sík'en-najen xita koni s'ín komàt'in Jesús; tanga jè Nainá, jè xi mejèn-la nga it'aà tsajen kàta'ya-la nga jè Jesús xi tísíkinakon-najen.

¹¹ Ngajen xi titsajnakon-jen, kjit'aà nachrjein tíjnat'aà chraña-najen kjoabiyaá xi jè ngatji-la Jesús, mé-ne jè yijo-najen xi ma biyaá jcha-la kjoabinachon ts'e Jesús.

¹² Ngajen, kjo'iin titsanikjeiin-jen skanda mejèn-la xita sík'en-najen, tanga jñò kjoabinachon tísakó-nò.

¹³ K'oaá s'ín tichja Xojon-la Nainá nga tsò: “Mokjeiin-na k'oaá ma-ne nga kichjà.” Ngajen, k'oaá tís'ín tjin inima-najen it'aà ts'e 'én xi mokjeiin-najen, k'oaá ma-ne nga nokjoá-jen.

¹⁴ Jè Nainá xi kisikjaáya-la Na'èn-ná Jesús it'aà ts'e kjoabiyaà, 'ya-nájen nga tikoáá kijchò nachrjein nga sikkjaáya-najen koni s'ín jaáya-la Jesús. Ikjoàn ngats'iaá kiko-ná ya nguixkon Nainá.

¹⁵ Ngats'ii kjoa koi, kjondaà tsajòn-nò, mé-ne isa kjin koma-ne xita xi tjoé-la kjondaà-la Nainá, nga tikoá isa jeya kjna Nainá nga kjin ma xita xi tsjá-la kjondaà.

¹⁶ K'oaá ma-ne mikì mahindaà inima-najen; kixi kjoa yijo-najen tifehengui-né; tanga Nainá, nachrjein nchijòn tísixitseyá inima-najen.

¹⁷ Jè kjo'in xi nikjeiin-jen i isò'nde, tà chibaá tjin. Tà jngoò tjo oto. Tanga yaá sakó-najen kjondaà xi isa jeya tjin xi mikì fehet'aà nita kjé-ne.

¹⁸ Nga mìtsà jña chitsejen-lajen kjoa xi tjin isò'nde xi tsejen, jña chitsejen-lajen xi mikì tsejen xi ts'e Nainá. Kjoa xi tíma i isò'nde, kjoehet'aà-né, tanga jña kjoa xi mikì tsejen, mikì kjoehet'aà nita kjé-ne.

5

Ni'ya xi tjindaà-la Nainá ján ngajmii

¹ Yijo-ná k'oaá s'ín ngaya-la koni ni'ya xi tjin i it'aà nangui xi chiba nachrjein ma-la nga bixòña. Tsà kixoña ni'ya jè, Nainá tjindaà jngoò-la ni'ya ján ngajmii, xi tjina nita kjé-ne, nga mìtsà tsja xita kisindaà-ne.

² K'oaá ma-ne nga imaá fahatse-la inima-ná i isò'nde nga jè xi mejèn-ná nga niton kitsajnayaá ni'ya-ná ján ngajmii.

³ Nas'ín sijna yijo-ná xi tsjach'á i'nde, Nainá tsjá jngoò-ná xi yijo xitse. Jè inima-ná mìtsà chija, yijo xitseé koma.

⁴ K'e nga tákó tijnakon yijo-ná koni jngoò ni'ya xi ma bixòña, imaá fahatse-ná, maba-ná, mikì tsò takoán nga nikjna ni'ya-ná. Majin-ná nga tjáxin-ná ni'ya jè, jè xi mejèn-ná nga kàtaxitseyá yijo-ná mé-ne nga yijo-ná xi ma biyaà jngoò k'aá jchija nga jè kjoabinachon sikkijne-la.

⁵ Jè Nainá xi xó k'oas'ín tsibindaà-ná ko kitsjaà-ná Inima Tsjeè-la mé-ne tjikixi-ne kjoa nga iskan tsjá yije-ná koni s'ín kitsjaà tso'ba.

⁶ Kjit'aá nachrjein k'oas'ín tjingoò takoán it'aà ts'e Nainá ko k'oaá s'ín tjin-ná, k'e nga tákó tijnakon yijo-ná i it'aà nangui koni jngoò ni'ya ñanda titsajnaá, kjin titsajna-lá ni'ya-la Na'èn-ná ján ngajmii.

⁷ K'oaá s'ín titsanjchá yijo-ná koni s'ín mokjeiin-ná it'aà ts'e Nainá, mì k'oaá s'ín mochjeén nga kos'ín sijchá yijo-ná koni s'ín beè xkoaán.

⁸ Tjingoò takoán it'aà ts'e Nainá, isaá-la ndaà tjin tsà sikkjnaá yijo-ná, mé-ne nga ján kitsajnaoá Na'èn-ná ngajmii.

⁹ Koi kjoa-la nga ndaà sikitasoán koni s'ín sasén-la Na'èn-ná, a i titsajnaá it'aà nangui a xi ján titsajnaá ján ngajmii.

¹⁰ Mochjeén-né nga ngats'iaá kichoá nguixkon ñanda tíhotíxoma Cristo nga k'oi-lá kindá nga jngoò jngoá; tjoé-ná chjíná mé kjoa xi ki'né nga titsajnaá isò'nde, a ndaà ki'né, o xi ch'o ki'né.

'Én xi tsjá kjoa'nchán it'aà ts'e Nainá

¹¹ Nga yaxkón-jen Nainá koni s'ín ok'in-la, k'oaá ma-ne bènojmi-lajen xita xi kjeii, mé-ne kokjeiin-la it'aà ts'e Cristo. Nga nguixkon Nainá ndaà beèskon-najen nga ndaà 'nè-jen, 'an k'oaá tís'ín mejèn-na nga tikoá jño jyeé ndaà yaxkon-najen.

¹² Mìtsà 'mì-nòjen nga tìjin ndaà nìkítsajna-nájen yijo-najen tanga jè xi mejèn-najen nga tsja kàtama-nò it'aà tsajen, mé-ne koma kìnókjoa-là jñà xità xi tìjñà ndaà síkítsajna-ne yijo-là koni s'ín tsejèn-la, tanga jè inìma-la mìkii ndaà síkinda.

¹³ Tsà ská-najen, koi-né nga Nainá nìxá-lajen, tsà ndaà tìjin kjohítsjeèn-najen, kjondaà tsajòn-nò nga jñò nìxá-nòjen.

¹⁴ Jè kjoatjòcha-la Cristo jè kitsobà'ñó-najen nga ma fikò-najen koni s'ín mejèn-la, k'oaá tìjin kjohítsjeèn xi kjòchiya-najen nga jngoò xità k'en ngajo-la ngats'ii xità xi tìjin isò'nde, k'oaá komà-ne nga ngats'ii xità k'en.

¹⁵ Jè Cristo k'en ngajo-la ngats'ii xità xi tìjin isò'nde, mé-ne jñà xità xi títsajnakon mì tì k'oaá s'ín sijnchá-ne yijo-la koni s'ín mejèn-la yijo-la. K'oaá s'ín sijnchá yijo-la koni s'ín mejèn-la Cristo nga jè k'en ngajo-la koa jaáya-la it'aà ts'e kjoabiyaà.

¹⁶ I'ndeji mì tì kii k'oas'ín nìkítsjeèn-najen it'aà ts'e xità xi kj'eijí kós'ín tsejèn, kó kjoàn, koni s'ín s'ín jñà xità isò'nde. K'e nga sa ítjòn k'oaá s'ín kìnìkítsjeèn-jen, jè Cristo, tsà taxki xità isò'nde-nè. Tanga i'ndeji mì tì k'oaá s'ín nìkítsjeèn-najen.

¹⁷ Jngoò xità, k'e nga Cristo tìjnakò, xità xitse-né it'aà ts'e Nainá. Jè kjoa jchínga jyeé tsato, jyeé kjòxitseya yije.

¹⁸ Ngats'ii kjoa koi it'aà ts'e Nainá nchrobá-ne, nga it'aà ts'e Cristo kichibàndaà-ná ko Nainá. Kò jè Nainá kitsjaà-najen xá nga koma kénojmi-jen kós'ín kjoóndaà-ne xità ko Nainá.

¹⁹ It'aà ts'e Cristo kisixá Nainá nga kisìkjoóndaà-ne xità isò'nde. Mì tì kii kindá kis'iin-ne jé-la jñà xità. Kò kitsjaà-najen xá nga bènojmi-jen kós'ín ma nga chibàndaà-ná ko Nainá.

²⁰ K'oaá ma-ne ngajen síkasén-najen Cristo nga nokjoà ngajo-lajen. K'oaá ngaya-la koni tsà jè Nainá tíbítsi'ba-nò. It'aà ts'e Cristo bitsi'ba-nòjen: jchibàndaàko-nò Nainá.

²¹ Cristo, mìtsà jé tsohótsji; tanga xi kjondaà tsaján, Nainá, jé tsohónè yije-la ngats'ii jé xi tìjin isò'nde, mé-ne it'aà ts'e Cristo, xità kixi komaá nga jè Nainá sijnkixiya-ná.

6

¹ Ngajen, xi Nainá nìxát'aà-lajen, bítsi'ba-nòjen, kjondaà xi tsjá-nò Nainá, ndaà tikjeén.

² Nga jè Nainá, k'oaá tsò:

Ki'nchrè-lè k'e nga ndaà chiba-la kjòchjeén-lè kjondaà-na,

tsohósikoo-lè, jè nachrjein k'e nga tíchiñá-la nga kitjoiin kjo'in.

I'ndeji, jñò, ndaà tìná'yaà. Jyeé ijchò nachrjein ts'e kjondaà-la Nainá nga kítjokajñòò kjo'in.

³ Nìmé kjoa xi ch'o 'nè-jen xi síkíts'ón-jìin-la xità xi kj'eijí, mé-ne jè xá-la Nainá xi jin tìtsa'nè-jen mì yá xi ch'o kichjajno-la.

⁴ Nità mé kjoa xi 'nè-jen, ndaá onguíko-jen yijo-najen mé-ne jñà xità skoe-ne nga chí'nda-la Nainá 'mì-najen, nga 'ñó tìjin-najen kjoatsetakòn, 'ñó ndaá chíkjoako-najen kjoa ts'e kjo'in, kò tíchijat'aà-najen mé tsojmi xi kochjeén-najen, koa chjá tíma-najen kjoa xi tíhotojìin-jen,

⁵ nga tísat'é-najen, nga ndayá tìnìkjas'en-najen, nga ngajen binchaàtsji-lajen kjoasii naxandá, nga 'ñó nìxá-jen, kò mìkii tsafé-jen, skanda bitsajna kjinchrá-nájen.

⁶ Tanga nguì tsjeé tìtsanìjchá-jen yijo-najen; ndaá machiya-najen nità mé kjoa-ne; tìjin-najen kjoatsetakòn kò kjondaà it'aà ts'e xità; kò jè Inìma Tsjeè-la Nainá tísíxájiin inìma-najen; kò nguì koó inìma-najen nga tìjin-najen kjoatjòcha.

⁷ Bènojmi-jen 'én xi kixi tìjin. Tìjin-najen nga'ñó-la Nainá. Jñà kjoa kixi xi 'nè-jen, k'oaá ngaya-la koni jñà kichá xi kò ngaskón kò kixi mochjeén.

⁸ Tìjin xità xi beèxkón-najen, tìkoo tìjin xi mìkii beèxkón-najen. Sakoá ndaà chja it'aà tsajen, sakoá majin. Tìjin i'nga xi xità ndiso tsò-najen tanga ngajen 'én kixii nokjoá-jen.

⁹ Tjín i'nga xi k'oas'ín síko-najen koni tsà mìkìi beèxkon-najen, tanga tjín xi beèxkon-najen. K'oaá s'ín beèhikon-najen koni tsà jyeé k'en-jen, tanga titsajnakon-nájen. Tsjá-najen kjo'in jñà xità tanga mìkìi biyaà-jen.

¹⁰ K'oaá s'ín ko'an-najen koni tsà ba tjín-najen, tanga ngajen tsja tjín-najen. Tsò-najen nga xità ima-né, tanga it'aà tsajen, kjìn jchán xità tísakó-la kjondaà ts'e inima-la. Nímé xi tjín-najen, tanga nguixkon Nainá, tjín yijeé-najen nità mé-ne.

¹¹ Jñò 'ndseé xi Corinto tsajòn, jyeé kinokjoà kixi-nòjen; nguì koó inima-najen matsjacha-nòjen.

¹² Ngajen, mìtsà bìxkon-nòjen kó tsò kjohítsjeèn-la inima-najen, jñò-nó xi bìxkoòn kó tsò kjohítsjeèn-la inima-nò.

¹³ K'oaá s'ín chjà-nò koni tsà ixti-na xan-nò, jñò, k'oaá tís'ín t'een koni s'ín 'nè-jen, nga ko inima-nò tìtsjacha-nájen.

Tìnchat'aàxìn-là kjoa ts'e jé

¹⁴ Jñò, xi mokjeiín-nò it'aà ts'e Cristo, kì jñà xità xi mìkìi mokjeiín-la nìngàsòn-ko kjohítsjeèn-nò. ¿A komaá kongàsòn-ko jngoò xità xi tjín-la okixi ko jngoò xi tsjìn-la okixi-la Nainá? ¿A komaá ya kìtsajnajñaá ñánda jñò choòn nga tjín kjoa iseèn?

¹⁵ ¿A komaá ndaà kjìko xíkjín, jè Cristo ko xità neí? Tìkooá mìkìi koma ndaà kjìko xíkjín jngoò xità xi mokjeiín-la it'aà ts'e Cristo ko jngoò xi mìkìi mokjeiín-la.

¹⁶ Mìkìi koma ya sijnaya ni'ya ingo-la Nainá jñà xkósòn xi nainá tsò-la xità. Nga jñá-ná xi 'mì-ná ni'ya ingo-la Nainá xi tijnakon. Koni s'ín kitsò Nainá it'aà ts'e xità xi mokjeiín-la, tsò-né:

'An, yaá kótijnakoaa naxandá-na, tìkooá yaá kojmejiin-la.

'An-ná xi Nainá kìtso-na koa jñà koma xità naxandá-na.

¹⁷ Nainá k'oaá kitsò nga kùchjajiin-la xità naxandá-la:

Tìtjokàjiin-là jñà xità xi mìkìi mokjeiín-la it'aà ts'an,

koa tìnchat'aàxìn-là.

Nímé kjoa chingàjñò xi tjé tjín nga nguixkoaàn,

mé-ne nga 'an koma skoétjò-nò.

¹⁸ 'An-ná xi skoétjò-nò koni jngoò Na'èn,

jñò koma ndí ixti x'in-na ko ndí ixti íchjín-na,

k'oaá tsò Na'èn-ná xi ta jè tajngoò xi 'ñó tse nga'ñó tjín-la.

7

¹ Jñò ndí 'ndsè xi matsjake-nò, k'oaá tjín kjondaà xi tsjá-ná Nainá koni s'ín kitsjaà tso'ba. K'oaá ma-ne kìnchat'aàxìn-là ngats'ìi kjoa xi tjé tjín xi síkìts'ón yijo-ná ko inima-ná, mé-ne tsjeè kìtsajnaá nga nguixkon Nainá. Ndaà jchaxkoán Nainá mé-ne nga kjit'aà naxhrjein isa tsjeè sijchá yijo-ná.

Mé-ne tsja ma-la Pablo kjoa xi s'ín xità Corinto

² Chjoétjò-nájen nga ko inima-nò. Ngajen, niyá xità xi ch'o nìko-jen; nì saá yá xità nìkì'on-jen, nì saá jngoò xità chonachan-lajen.

³ K'e nga k'oas'ín tìxan-nò, mìtsà mé kjoa xi ch'o tjín tìhonè-nò; jyeé k'oa kixan-nò nga sa ítjòn, kjit'aá naxhrjein nga matsjacha-nòjen, nas'ín kiyá ko tsà titsajnakooán, koó inima-najen nga matsjacha-nòjen.

⁴ Nguì 'én kixíi xi tìchjàko-nò; 'ñó matsja-la inima-na it'aà tsajòn. 'Ñó tjín-na kjojetakòn ko taxkì tsjaá ma-la inima-na, nas'ín tse kjo'in tjín-najen.

⁵ K'e nga j'ì-jen i nangui Macedonia, nímé xi komà kinikjáya-jen. 'Ñó kinikájno-jen; xkì xi ján kis'e-najen kjoasiì, koa ya jjiin inima-najen 'ñó kisinchaàxkón.

⁶ Tanga Nainá síjehikon-né xità xi indaà tjín ikon; kisiìjehikòn-najen k'e nga j'ìi Tito.

⁷ Mìtsà tà koi kjoa-la nga j'ì Tito, jè-né nga jè, tìkooá tsja tjin-la xi it'aà tsajòn. Tsibénojmi-najen nga jñò, 'ñó mejèn-nò nga jchaxkon-nájen. K'oaá tì kitsò-najen nga ba titsajnaà koa makájno-nò it'aà ts'an. K'e nga ki'nchrè 'én koi, 'an, isaá ndaà kjòtsja-na.

⁸ Jñò, nas'in tà kjoaba tsohotsji-nò k'e nga kisikasén ítjòn-nò xojon, i'ndeji, mì tì kiì tìsikájno-na. Nga sa ítjòn kisikájnoa nga kisikasén jngoò-nò xojon, koií kjoa-la nga kisibaá chiba nachrjein-nò.

⁹ Tanga i'ndeji, matsja-la inima-na, mìtsà koi nga kjoaba kis'e-nò kjoa ts'e xojon, koi-né nga it'aà ts'e Nainá kinikájno jé-nò nga mì tì jé chinchaàtsji-nò. Jñò, k'oaá s'in kjòba-nò koni s'in mejèn-la Nainá. K'oaá ma-ne nga nimé kjoa ch'o kisakò-nò it'aà tsajen.

¹⁰ Jè kjoaba xi s'e-ná koni s'in mejèn-la Nainá, jè síxájiin inima-ná nga nìkájnoaá jé-ná nga mì tì jé binchaàtsji-ná mé-ne nga koma kitjokàjñaá kjo'in; ko mìtsà mé xi iskan síkájnoaá. Tanga jè kjoaba xi tsjá-ná isò'nde nga mìkiì mokjeiín-ná it'aà ts'e Nainá, jè síxájiin inima-ná nga kjoa biyaá fiko-ná.

¹¹ Tanga tìkítsjeèn ngats'ìi kjondaà xi ki'nè ta koi kjoa-la nga kjoaba kisakò-nò it'aà ts'e Nainá. I'ndeji titsajnandaà-nò nga s'een kjoa xi tjinè-nò nga sikitason; k'oaá s'in titsahokoò yijo-nò nga nimé jé tjin-nò; majticha-nò kjoa ts'e jé; i'ndeji tsakjoòn-chaà Nainá; mejèn-nò nga jchaxkon-ná; makájnoó-nò it'aà ts'an; k'oaá komà-ne nga kits'ì-là kjo'in jè xita xi tsohòtsji jé. Ngats'ìi kjoa koi koni s'in ki'nè, k'oaá s'in 'ya-la nga mìtsà ngats'ioò tjin-nò jé.

¹² 'An, koni s'in kiskii-nò xojon carta xi kisikasén-nò, mìtsà jè tìsikítsjeèn it'aà ts'e xita xi tsohòtsji jé; nì mìtsà it'aà ts'e xita xi kits'ì on kisikasén-nò xojon. Jè-né nga tijñò ki'ya-nò nga nguixkon Nainá nga kixií kjoa nga tjòcha 'ya-nájen.

¹³ Maje takòn-nájen ngats'ìi kjoa xi ki'nè.

Mìtsà ta koií kjoa-la nga maje takòn-jen it'aà ts'e kjoa koi; isa 'ñó matsja-najen nga ki'ya-jen Tito nga 'ñó tsja tjin-la, koií kjoa-la nga ngats'ioò kinìtsjakoo.

¹⁴ 'An, jyeé kos'in ndaà kisikítsajna-nò nga nguixkon Tito koni kixan-la. Jñò, nimé kjoa tjin xi ch'o kinikájna-ná. Koni s'in nga ngats'ìi 'én xi ki'mi-nòjen, ngui 'én kixi-né, k'oaá tìs'in kixi itjo koni tsò 'én xi kixan-la Tito nga ndaà kisikítsajna-nò.

¹⁵ Tito, isaá 'ñó ndaà matsjakeè-nò k'e nga bítsjeèn-la nga ngats'ioò ndaà kinikitasòn-là ko ndaà kichjoétjò k'e nga ijchòkon-nò, koa 'ñó ndaà kiyaxkón.

¹⁶ I'ndeji, it'aà tsajòn ma'ñót'aà takoàn nita mé kjoa-ne, k'oaá ma-ne nga matsja-la inima-na.

8

Mé kjoa-ne nga ton maxkó-ne

¹ Ndí 'ndsè ko tichjaá, mejèn-na nga kàtasijiin-nò kjondaà-la Nainá xi okó ijìin naxandá-la Cristo xi tìtsajna ya nangui Macedonia.

² Nas'in 'ñó tse kjo'in nchihotojiin tìkooa tí'ya-la nga 'ñó matsja-la. Nas'in 'ñó xita ima, jñà tsojmi xi tsjá kjotjò-la Nainá, koó inima-la tsjá koni tsà 'ñó xita nchiná.

³ 'An, tibe-ná nga koó kjòtsja-la tsjá ton xi kjotjò ts'e Nainá koni kji bijchó nga'ñó-la, saà k'oaá skanda tsjásòn-né koni kji bijchó nga'ñó-la.

⁴ Jñà xita koi, 'ñó tsibítsi'ba-najen nga mejèn-la nga tìkooa síikasén-la ton kjotjò jñà xita naxandá-la Cristo jè i'nde ñánda kochjeén-la.

⁵ Jñà xita koi, isaá tsato kitsjaà koni s'in titsachiñá-lajen. Ítjòn nangui kisikítsajna-la Nainá inima-la, ikjoàn, k'oaá ti s'in kis'ìin it'aà tsajen koni s'in mejèn-la Nainá.

⁶ K'oaá ma-ne bítsi'ba-lajen Tito koni s'in tsibítsi'iako xá xi kitjoé-la k'e nga sa ítjòn, k'oaá tìs'in kàtasíkjehet'aà-ne nga kàtíxkó ton kjotjò xi jñò 'bioò.

⁷ Tanga jñò, 'ñó ndaà 'nè-nò ngats'ìi kjoa xi 'nè nga ndaà mokjeiín-nò, nga ndaà nokjoà, nga ndaà tjin-nò kjoa chjine, nga titsajnandaà nga mejèn-nò síchját'aà nita mé kjoa-ne,

nga tjin-nò kjoatjòcha nga it'aà tsajen komà-nò. Koni s'in 'nè yije kjoa koi, k'oaá tis'in tikatonè-là jè kjotjò xi 'bioò.

⁸ Mìtsà k'oas'in tixan-nò koni tsà jngoò kjotixoma tìtsja-nò. Jè xi mejèn-na nga skoeè a ngui kixií kjoa nga tjin-nò kjoatjòcha koni s'in tjin-la xita xi k'ejí nga titsajnandaà nga tsjá kjotjò-la.

⁹ Jñò, jyeé 'yaà kjondaà-la Jesucristo xi otixoma-ná. Xita imaá kis'in yijo-la xi kjondaà tsajòn, nas'in ts'e yije-né ngats'ì tsojmì xi tjin, mé-ne jñò tjoé-nò kjoa nchiná xi tjin-la.

¹⁰ Tsjaà jngoò-nò kjohitsjeèn it'aà ts'e kjoa jè. Kochjeén-nò nga ndaà sikitasòn koni s'in tsibìts'iaqoo jè nó xi tsato nga kits'ioò ton xi kjotjò ts'e Nainá. K'oas'in ki'nè nga ko kjotsja-nò kits'ioò.

¹¹ I'ndeí, takó k'oaá s'in t'een koni s'in tsibìts'iaqoo. K'oaá s'in tikjehet'aà koni s'in kjòmejen-nò nga sa itjòn. K'oaá kji tjioò koni kji bijchó nga'ño-nò.

¹² K'e nga jngoò xita xi tijnandaà nga ko inima-la mejèn-la tsjá, k'oaá kji kàtatsjá koni kji ma xi s'in, mìtsà tsato tijnjé-la. Nainá mìtsà tsato síjé koni kji ma xi 'nè.

¹³ Mìtsà koi kjoa-la nga kjo'in s'e-nò nga sichját'aà-lá xita xi k'ejí, jè-né nga ngàsòn ngáya s'e-ná mé xi mochjeén-ná.

¹⁴ I'ndeí, jña xita koi, tsjin-la mé xi mochjeén-la, tanga jñò, tjin-nò. K'e nga k'ejí nachrjein, jña xita koi, s'ee-la mé xi mochjeén-la, ko jña kosiko-nò k'e nga jñò tsjin-nò. K'oaá s'in ngàsòn ngáya s'e-ná mé xi kochjeén-ná.

¹⁵ K'oaá s'in tichja Xojon-la Nainá nga tsò: "Jè xi kjìn tsibíxkó, nímé tsiningui-la, koa jè xi chiba tsibíxkó, nímé kisichjaat'aà-la."

Kós'in komà nga kinikasén Tito ján Corinto

¹⁶ Ndaà chjí-la Nainá nga k'oas'in tsibíjìn inima-la jè Tito nga tikoa kisikájno it'aà tsajòn koni s'in 'an kisikájnoa.

¹⁷ Kixií kjoa jè Tito kòkjeín-la koni s'in tsibit'in-la; tikoa jè, 'ño mejèn-la nga kiikon-nò; ikoón xi kitsò nga kijikon-nò.

¹⁸ Jè Tito tífikò jngoò 'ndseé xi ndaà síkijna ngats'ì xita naxandá-la Cristo xi tjin nita ñánda-ne; nga jè 'ndseé ndaà chjaya 'én ndaà-la Nainá xi kjoa ts'e Cristo.

¹⁹ Mìtsà tà koi kjoa koi, tikoaá jña naxandá-la Cristo jaajìn jè 'ndseé nga koahijtako-najen nga onguíko-jen ton kjotjò-la Nainá xi ngajen titsabíxkó-jen mé-ne jè Na'èn-ná jeya kijna, tikoa skoe jña xita nga koó inima-najen sichját'aà-lajen xita.

²⁰ K'oaá ma-ne nga mì yá xita kichjajno-najen kós'in kochjeén ton xi tse tímáxkó.

²¹ K'oaá s'in binè-lajen yijo-najen kjoa xi ndaà tjin nga nguixkon Nainá ko tikoa nguixkon xita.

²² Tito, tikoaá báhijtako jngoò 'ndseé xi xki xi ján ki'ya-jen nga 'ño binè-la yijo-la nga kjìn xá ma-la. Tjin kixi-né i'ndeí, isaá ndaà binè-la yijo-la nga sichját'aà-nò nga isa ndaà beè takòn-nò.

²³ Jè Tito, amigo ts'an-ná nga 'aán síxáko-na xi kjondaà tsajòn. Jña xita 'ndseé xi i'nga, jña naxandá-la Cristo xi tjin nangui Macedonia jña kisikasén; nga it'aà ts'e xita 'ndseé koi, jè Cristo jeya bijna.

²⁴ Takó-là xita koi kjoatjòcha xi tjin-nò, takó-là kjondaà xi tjin-nò koni s'in jye okixan-la jña xita 'ndseé koi, mé-ne nga skoe-ne jña naxandá-la Cristo xi i'nga nga kixi kjoa.

9

Mochjeén-né nga sichját'aà-lá xita-la Cristo xi k'ejí

¹ Jè kjoa ts'e nga'ño xi máxkót'aà-la jña xita tsjeè-la Nainá xi kochjeén-la jè nga'ño, mì tì kii mochjeén-ne nga 'an skiì-isa-nò.

² Be-ná nga titsajnandaà nga mejèn-nò sikitasòn. K'oaá xan-la jña xita xi nangui Macedonia ts'e nga jñò xi Acaya tsajòn, titsajnandaà-nò skanda jè nó xi tsato nga

mejèn-nò sikasén nga'ńó. K'e nga ki'nchré jńà xita Macedonia koni s'ín títsa'nè, kjin ma-ne xi matsja-la it'aà tsajòn tikoá kjòtsja-la nga mejèn-la sìchját'aà.

³ Koií xá tísikasén-nò jńà 'ndseé koi, mé-ne 'an mi ch'o kótijna-na tsà koi nàchrjein-la tsà ta 'én ndiso koma-ne koni s'ín ndaà síkítsajna-nò it'aà ts'e kjoa koi, mé-ne jńò títsajndaà koni s'ín kixan.

⁴ Kós'ín koma-ne tsà koi nàchrjein-la kjiķo i'nga-na xita Macedonia. K'e nga kijchò skoe-nò nga kj'eè ki títsajndaà nga'ńó xi sikasén. Tsà k'oas'ín koma kjoa koi, ngajen kosobá-najen, ķo jńò, isaá 'ńó kosobà-anò. Nga ngajen, it'aà tsajòn 'ńó ndaà níkítsajna-nòjen.

⁵ Koií kjoa-la k'oaá s'ín tísikítsjeèn nga tsibìtsi'ba-la jńà 'ndseé nga kisikasén ítjoàn, mé-ne nga kàtikon-nò koa kàtasíchját'aà-nò nga kàtíxkóķo-nò ton kjotjò xi jye k'oas'ín kits'ioò ndsobaa, mé-ne k'e nga jye tijnandaà kjotjò-nò jcha-la nga ijìn inima-nò inchrobàjìn-ne; mìtsà ķjo'ńó komà-nò.

⁶ Tíkítsjeèn jè 'én xi tsò: Jè xi chiba tsojmì bítje, chibaá tsojmì majchá-la; jè xi tse tsojmì bítje, kjin tsojmì majchá-la.

⁷ Nga jngoò ijngoò, k'oaá kji kàtatsjá koni kji kosòn-la inima-la. Mìtsà ķo ķjoba-la nga tsjá, ni mìtsà ķjo'ńó koma-la, nga Nainá tsjakeè-né xi ķo kjòtsja-la tsjá.

⁸ Nainá koma-la tsjá yije-nò kjondaà xi tjin-la, mé-ne nga kjit'aà nàchrjein s'e yije-nò xi mochjeén-nò, skanda kininguú-nò mé-ne koma sìchját'aà ts'e xá xi ndaà tjin.

⁹ K'oaá s'ín tíchja Xojon-la Nainá nga tsò:

Kisika'bí-la xita ima nga kitsjaà-la mé xi mochjeén-la.

Kjoakixi-la, mìkiì kjoehet'aà nita kjé-ne.

¹⁰ Nainá tsjá tje-la tsojmì xi sitje, tikoá tsjá tsojmì xi chineé. Tsjá yije-nò xi mochjeén-nò nga kítje; tikoá síchá tsojmì xi bítje. Kjin skoya kjondaà sakò-nò k'e nga ķo kjoakixi-nò 'bioò kjotjò-nò.

¹¹ Jńò, s'e yije-nò ngats'ii kjoa nchiná xi tjin, mé-ne nga ķo kjondaà-nò ma sìchját'aà-la xita xi kj'eii, nga sikasén-la kjotjò xi ngajen onguíķo-jen. K'e nga tjoé-la jńà xita 'ndseé, tsjá-la kjondaà Nainá.

¹² Jńà tsojmì kjotjò xi títsanikasén-la jńà xita 'ndseé, mìtsà ta koi kjoa-la nga kochját'aà-la mé xi chija-la, tikoá koií-né nga isa kjin koma xita xi tsjá-la kjondaà Nainá.

¹³ Jńà xita koi, k'e nga tjoé-la tsojmì kjotjò, jeya sìkijna Nainá. K'oaá s'ín skoe-ne nga kixii kjoa nga jńò níkitasòn-nò 'én ndaà-la Nainá xi kjoa ts'e Cristo koni s'ín mokjeiín-nò. Jńà xita koi skoexkón Nainá it'aà ts'e tsojmì kjotjò xi 'biì-la ķo xi 'biì-la jńà xita xi kj'eii.

¹⁴ Koó inima-la kichjat'aà-la Nainá it'aà tsajòn, nga 'ńó tse kjondaà tísakó-nò xi tsjá-nò Nainá.

¹⁵ jndaà chjí-la Nainá nga 'ńó tse kjondaà tsjá-ná, skanda tsjin-ná 'én kós'ín k'oi-lá kjondaà!

10

Kó tsò Pablo nga chjatjì xá-la nga chi'nda-la ma Cristo

¹ 'An xi Pablo 'mì-na, bítisi'ba-nò it'aà ts'e Cristo xi tjin-la kjondaà, ķo xi indaà tjna inima-la. Tjin xita xi tsò-na nga ima kjoa xó s'iaàn k'e nga ya tijnajìn-nò, ķo 'ńó xó ts'en s'iaàn k'e nga kjìn tijnaa.

² Tikoá bítisi'ba-nò k'e nga kjikon-nò, jńò, ítjòn jchibàya-nò kjoa xi tjin-nò, mé-ne k'e nga kijchoa, ki kiì binè-nájen nga 'ńó kichjakoaa jńà xita xi k'oas'ín nchitsò nga k'oaá s'ín títsa'nè-jen koni s'ín xi taxki xita isò'nde. Tanga 'an, tjna ndaà-ná nga kojtikooa jńà xita xi chajno-najen.

³ Kixii kjoa nga xita isò'nde 'mì-najen, tanga mi k'oas'ín bixkán-jen koni s'ín kjaán jńà xi taxki xita isò'nde.

⁴ Kicha xi nìkjeén-jen, mìtsà kicha ts'e isò'nde. Nga'ño ts'e Nainá-né xi ma-la síkixòña nga'ño-la xita neí xi bíchjoà ikòn-la 'én-la Nainá.

⁵ Nìkixòña-nájen ngats'iì kjohítsjeèn xi ch'o tjin ko kjoa 'nga takòn xi kondra ts'e kjoachjine-la Nainá. Ndobà'ño-nájen ngats'iì kjohítsjeèn mé-ne koma kítasòn-la Cristo koni s'ín mejèn-la.

⁶ Titsajnaandaà-nájen nga k'oi-lajen kjo'in xita nita mé kjoa-ne xi mìkiù ndaà bitasòn-la, k'e nga jye jcha-la nga jño kixi nìkitasòn.

⁷ Jño, tà k'oaá s'ín chitsejèn-là koni s'ín 'ya-la jña xita. Tsà tjin i'nga xita xi tsò-la yijo-la nga jè Cristo kisikasén, ndaà kàtasíkitsjeèn, tikoà ngajen jè sobà Cristo kisikasén-najen.

⁸ Mìkiù masobà-na nga ndaà síkijna yijo-na it'aà ts'e kjotíxoma xi kisingatsja-najen Cristo mé-ne koma sichját'aà-nò nga isa 'ño kítajnaà; ko mìtsà koi-ne nga 'an sikits'ón-jìin-nò.

⁹ Majìn-na nga k'oas'ín síkitsjeèn nga 'an mejèn-na binchaxkón-nò k'e nga xojon tìsikasén-nò.

¹⁰ Tjin i'nga xita xi tsò: “Xojon-la, 'ño jchán tjin, 'ño tíchja, tanga k'e nga i tijnajìin-ná mìtsà 'ño xkón kji. 'Én xi chja, mì yá xi ndaà beèxkón.”

¹¹ Jña xita xi k'oa tsò, ndaà kàtasíkitsjeèn koni tsò xojon xi nìkasén-jen k'e nga kjìin titsajna-jen. K'oaá tìs'ín s'en-jen k'e nga ya titsajnajìin-nòjen.

¹² Kixií kjoa, ngajen, majìn-najen nga sìngàsòn-kjoòko-jen jña xita xi tì yijo-la ndaà síkitsajna-ne. Jña xita xi k'oas'ín s'ín, xita tònò-né. Tsjìn-la kjohítsjeèn nga tì chiba ts'ée síchiba-ne yijo-la. Tikoà tì xíkjin síchibakjòò-ne.

¹³ Ngajen, mìkiù síkatonè-lajen chiba-la nga ndaà síkitsajna-jen yijo-najen. K'oaá kji koni kji tsjá chiba Nainá it'aà ts'e xá-najen. Jè Nainá kitsjaà-najen xá xi ijchòko-nòjen skanda ján Corinto.

¹⁴ Ko tsà mì-là ngajen ijchò ítjòn-jen, kixií kjoa kinìkatonè-lajen chiba-la i'nde koni kji kitjò'nde-najen. Tanga ngajen-nájen xi ijchòko ítjòn-nòjen 'én ndaà-la Nainá xi kjoa ts'e Cristo.

¹⁵ Mìtsà jìn ndaà nìkítajna-jen yijo-najen it'aà ts'e xá xi nchis'ín xita xi k'ejí. Mìtsà tìsanìkatonè-lajen chiba-la koni kji xá xi okò-najen. Chiñàkjoa-nájen, koni s'ín isa 'ño ndaà kòkjeiín-nò, ko isaá kòtseya xá xi tìtsa'nè-jen. Tanga ta k'oaá kji sìxá-jen koni s'ín tjen chiba-la.

¹⁶ K'oaá s'ín kénojmiya-jen 'én ndaà-la Nainá jña naxandá xi fi-isa ñánda kijna naxandá tsajòn. Tanga mì ya kítjás'en-jìin-jen i'nde ñánda jye nchisíxá xita xi k'ejí nga mì jìn ndaà síkítajna-jen yijo-najen xá xi nchis'ín xita xi k'ejí.

¹⁷ Jè xi jeya síkijna yijo-la, ta saá Nainá jeya kàtasíkijna.

¹⁸ Mìtsà jè xi ndaà bitjongui xi tì yijo-la ndaà síkijna-ne it'aà ts'e mé kjoa xi s'ín. Jè Nainá xi k'oa kítso tsà kixi kjoa nga ndaà xita.

11

Pablo, jè xi ngui xita-la Cristo nga jè tsibíxáya-la

¹ T'een kjondaà, tìná'ya jngòò tjà-ná; k'oaá s'ín tìchjàko-nò koni jngòò xita xi mì ndaà tìjna kjohítsjeèn-la. Kàtas'e-nò kjoatsejta.

² Koni s'ín makájno-la Nainá, 'an, k'oaá tìs'ín makájno-na it'aà tsajòn nga mì k'ejí xita konguít'aà-là. Ta jngóò x'in tsibìndaajìin-kò-nò nga sìngatsja-nò, jè Cristo. 'An mejèn-na nga tsjeè sìngatsja-nò Cristo koni jngòò tsòti xongó.

³ Tanga tsakjòòn-ná tsà k'oas'ín kòmat'ioòn koni kòmat'in Eva nga kiskoònachan-la jè ye, tsà ya kít'són-jìin kjohítsjeèn-nò nga kìnchat'aaxìn-lá jè kjoatjòcha kixi xi tjin-nò ko Cristo nga mì tì tijnòò-ne takòn nga onguít'aà-là.

⁴ Nga bì'nde-là nga k'ejí xita bijchókon-nò xi k'ejí tsò 'én xi okóya-nò it'aà ts'e Jesús koni tsò 'én kixi xi jìn bènojmi-nòjen, ko mokjeiín-nò nga chjoétjò jngòò inìma xi k'ejí xi mìtsà jè Inìma Tsjeè-la Nainá xi jye kichjoétjò. Tikoà, mokjeiín-nò nga k'ejí tsò 'én

ndaà-la Nainá xi kjoa ts'e Cristo xi bénojmí-nò koni tsò xi kòkjeín-nò nga sa ítjòn. Nga ndaà sasén-nò nga jñà na'yà-là xita koi.

⁵ 'An, mìtsà isa nangui tjina-la jñà xita xi 'mì-là jñò nga isaá 'nga títsajna-la jñà xita xi tsibíxáya-la Cristo.

⁶ 'An, nas'ín mìkiì ndaà ma-na chjà, nímé kjohítsjeèn chijat'aà-na xi ít'aà ts'e 'én-la Nainá. Jñò, jyeé ndaà 'yaà, 'an, nita ñánda nga tjinaa, k'oaá s'ín tsakoò-nò.

⁷ ¿A ch'oó kis'iaàn nga tsakoòya-nò 'én ndaà-la Nainá nga nímé kisikíchjí-nò? Nangui tsohótijnako-nò skanda kisihíma-ná yijo-na mé-ne jñò isa 'nga kisikítsajna-nò.

⁸ Jñà xita naxandá-la Cristo xi xìn i'nde-la kisichját'aà-na nga tsachrjekàjno-la ton mé-ne komà kisixáko-nò nga tsibenojmí-nò 'én ndaà-la Nainá xi kjoa ts'e Cristo.

⁹ K'e nga tsohótijnako-nò, niyá xi kisijti-la mé xi kichiját'aà-na. K'e nga mé tsojmi xi kjòchjeén-na, jñà xita 'ndsee xi j'ii-ne nangui Macedonia kitsjaà-na. Nga majìn-na nga chjà koma-nò. Nachrjein xi fi-isa, tákó k'oaá s'iaàn.

¹⁰ Nguì koó kjoakixi-la Cristo koni tìxan-nò nga mì yá xi kotichjoà-na kóhokji nangui Acaya nga ndaà síkíjna yijo-na kjoa xi tìs'iaàn nga mì ton kisijé-nò.

¹¹ ¿Mé-ne k'oa xan-na nga chjà? ¿A koi-né nga mìkiì matsjake-nò? Tíbeè Nainá, 'an 'ñó matsjake-nò.

¹² Tanga tákó k'oaá s'iaàn koni kisiko-nò nga sa ítjòn nga nímé kisijé-nò mé-ne nga mìkiì tsjaà'nde-la nga kitsò jñà xita xi mejèn-la nga jeya síkítsajna yijo-la nga k'oaá tìs'ín nchis'ín koni ngajen.

¹³ Xita koi, xita ndiso-né. Mìtsà kixi kjoa nga xita xi jè Cristo tsibíxáya-la. Ta konachan-né nga síkijatjya-la yijo-la koni tsà jè Cristo tsibíxáya-la.

¹⁴ Kjoa koi, mìtsà kjoa xitse; tijè-ne xita nejí síkijatjya-la yijo-la koni jngoò àkjale-la Nainá xi ote kji.

¹⁵ Mìtsà xkón tjín, xó k'oaá koma-ne nga jñà xita xi síxá-la jè xita nejí, k'oaá s'ín síkijatjya-la yijo-la koni tsà xita xi bénojmí 'én kixi-la Nainá. Xita koi k'e nga kjoehet'aà nachrjein-la, k'oaá s'ín komat'in koni s'ín tjín kjoa ch'o xi nchis'ín.

Mé kjoa-ne nga jeya síkíjna yijo-la Pablo

¹⁶ Jngoò k'a k'oa tìxan-nò, kì k'oaá s'ín nìkítsjeèn nga mìkiì ndaà tjín kjohítsjeèn-na. Tsà k'oa s'ín síkítsjeèn, tjii'nde-ná nga 'an, k'oa tìs'ín ndaà síkíjna itsé yijo-na koni s'ín xita xi i'nga xi mì ndaà tjín kjohítsjeèn-la.

¹⁷ K'e nga kos'ín tìchjà, mìtsà k'oa s'ín chjà koni s'ín sasén-la Na'èn-ná, k'oaá s'ín tìchjà koni jngoò xita xi mì ndaà tjín kjohítsjeèn-la nga tì'an ndaà síkíjna-na yijo-na.

¹⁸ Koni s'ín kjìn ma xita xi tijñà ndaà síkítsajna-ne yijo-la ít'aà ts'e kjoa xi s'ín, 'an k'oaá tìs'ín mejèn-na nga tì'an ndaà síkíjna-na yijo-na.

¹⁹ Jñò, bixón-nó nga xita chjine-nò, tanga, ¿mé-ne bìi'nde-là jñà xita xi mì ndaà tsò kjohítsjeèn-la?

²⁰ Jñò, nìkjeín-là xita xi kjo'ñó s'ín-nò nga ch'i'nda 'nè-là, xita xi ma-la síkjehejno-nò tsojmi xi tjín-nò, xita xi jñò beètoòn-nò, xita xi ochrjekàngui-nò, koa nìkjeín-là xita xi síjts'iin-'a isén-nò.

²¹ Jñò, ¿kó s'ín nìkítsjeèn? ¿A masobà-na nga indaàkjoa kinìko-nòjen nga mì k'oaá s'ín kinìko-nòjen koni kisiko-nò jñà xita xi i'nga?

Tsà tjín i'nga xi 'ñó ts'en s'ín nga chjà, 'an tìkoá ts'eén tìs'iaàn koni s'ín 'ñó tìchjàko-nò. Tanga ta k'oaá s'ín tìchjà koni tsà mìkiì ndaà tjín kjohítsjeèn-na.

²² Jñà xita koi, tsà kixi kjoa nga xita hebreo-né, 'an, tìkoáá xita hebreo-ná. Tsà xita Israel-né, 'an, tìkoáá xita Israel-ná. Tsà tje-la Abraham-né, 'an, tìkoáá tje-la Abraham-ná.

²³ ¿A ch'i'nda-la Cristo-né? 'An, isaá ndaà síxá-la Cristo. (K'e nga kos'ín chjà, k'oaá ngayala-la koni jngoò xita xi mìkiì ndaà tjín kjohítsjeèn-la.) 'An isaá 'ñó síxá-la. Isaá ko kjìn

k'a ótijnaya ndayá, ìsa kò kjìn k'a síki'on-na xita, tikoá kò kjìn k'a nga jye kjomeè sík'en-na xita.

²⁴ Jñà xita judío, 'òn k'a kitsjaà-na kjo'in nga tsakajá-na xox'ín xi s'e-la kohòyo xi kaàn chrj'òòn ñijòn tjín-ne nga jngoò ìjngoò k'a.

²⁵ Jàn k'a kits'iin-na kjo'in nga tsajá-na xkajinchra jñà xita; jngoò k'a tsibínè-na ndajo xita nga mejèn-la sikk'en-na; jàn k'a kiskaàjiin-ndáko-na chitso ya ijìin ndáchikon; jngoò nachrjein kò jngoò nitjen tsohótijnajñaà ijìin ndáchikon.

²⁶ Nita ñánda nga ojmeè, ta kjojkón tjín kjit'aà-la. Tjín kjojkón ya xajngá nandá ñánda nga otoa. Tjín kjojkón ts'e xita chijé. Tjín kjojkón it'aà ts'e xita xinguiáa judío koa tjín it'aà ts'e xita xi mìtsà xita judío. Tjín kjojkón ya ijìin naxandá, koa ya i'nde it'aà xìn ñánda tsjìn xita. Tjín kjojkón ya ijìin ndáchikon, koa ya ijìin-la xita xi tsò nga xita-la Cristo ma tanga mìtsà kixi kjoa.

²⁷ Kjìn jchán xá kisinè-na xi 'ño tjín, sà k'oaá skanda mìkì òjñafè. Kisikjiaán kjinchrá. Sà k'oaá tsjìn-na nandá xi ma 'yò, sà k'oaá skanda mìkì tsoókjeen, kisikjiaán 'nchán nga tsjìn-na nikje xi ójñakjá.

²⁸ Mìtsà tà jñà kjoa koi xi komàt'ian. Tjín ìsa xi k'ejí xi ìsa 'ño tjín. Nachrjein nchijòn makájno-na kjoa xi tímat'in kóhotjín naxandá-la Cristo xi 'an sikinda.

²⁹ Tsà yá 'ndseé xi ma indaàjiin, tikoá 'an, ma indaàjiin-ná. Tsà yá xi mejèn-la ótsji jé-la jngoò xita xi k'ejí, 'an ma jtike-ná.

³⁰ Tsà mochjeén nga tì yijo-na ndaà síkijna-na, jè ndaà síkijna yijo-na it'aà ts'e kjoa xi mahindaàjñaà.

³¹ Jè Nainá xi Na'èn-la Jesucristo xi otíxoma-ná, jeya kàtìjna nita kjé-ne, tibeè-ne nga 'én kixi xi tìchjà.

³² K'e nga tsohótijna ján naxandá Damasco, jè xita xi gobernador tjina nga jè kitsjaà-la xá jè xitaxá ítjòn xi 'mì Aretas, kitsjaà-la okixi nga kisikinda xotjoa-la naxandá nga mejèn-la tsobà'ño-na.

³³ Tanga jñà xita kisichját'aà-na nga kisikijnaya-na nisijá, ikjoàn ya tsachrje-na ñánda tix'á chrjò ndajo xi tjíndi-la naxandá nga kiskinìjen-t'aà-na skanda it'aà nangui. K'oaá s'ín komà-ne nga mìkì komà kitsobà'ño-na.

12

Pablo, kits'i jngoò-la nijña xi kixi kjoa

¹ Nímé xi sikijne nga ndaà síkijna yijo-na. Tanga mochjeén-né nga k'oa xán-nò kjoa xi tsakó-na Nainá k'e nga tsohóko-na, jè kjoa xi Nainá kisikichiya-na.

² Beèxkon-ná jngoò xita xi fit'aà-la Cristo. Tjín-la te ñijòn nó nga kiiko Cristo skanda jè ngajmì xi ma-ne jàn [ñánda tjina Nainá]. Mìkì be tsà k'oaá s'ín kiiko nga yijo, a xi tà inimaá kiiko. Jè Nainá tjiin-la.

³ Tanga be-ná nga jè xita jè, kiì. A yijo-né, o a tà inimaá kiì, tà jngoò Nainá tibeè.

⁴ Kiì skanda ján i'nde ñánda ndaà jchán choòn ján ngajmì ñánda tjina Nainá. Kiì'nchré 'én xi 'ño xkón tjín, xi nijngoò xita koma s'enojmí-la.

⁵ Koni komàt'in xita jè, jè-né xi ok'in-la nga ndaà kijna. Tanga it'aà ts'an mìkì ok'in-na nga 'an ndaà síkijna yijo-na. Tajngoò tsà jñà kjoa xi mahindaàjñaà ndaà síkijna.

⁶ Tsà ndaà síkijna yijo-na [koni tjín kjoa xi 'an kijtseè ngajmì], mìtsà 'én ská benojmiá, 'én kixi chjà. Tanga majin-na nga ndaà síkijna yijo-na it'aà ts'e kjoa xi kijtseè mé-ne nga nijngoò xita ìsa 'nga síkijna-na ta ngatjì-la kjoa koi. Kòs'ín kàtasikinda-na kó s'iaàn, kó s'ín chjà, kò kó s'ín tìsjchá yijo-na.

⁷ Mé-ne nga mì 'an ndaà kótijna-na it'aà ts'e kjoa xi 'an tsakó-na Nainá xi jeya jchán tjín, kiskaàt'aà jngoò-na ch'in, k'oaá ngaya-la koni tsà na'yá nchajìin yijo-na. Jè xita nejí kijtseètoòn-na nga kisikasén-na kjo'in.

⁸ Kò jàn k'a bítsi'ba-la Na'èn-ná nga kàtjaàxìn-na kjo'in jè.

⁹ Tanga jè Nainá ta k'oaá tsò-na: “Jè kjonndaà-na yaá tíjnakò-lè. Yaá okoaà yije nga'ño-na k'e nga tsjìn-lè nga'ño.” K'oaá ma-ne jè kjoa xi mahindaàjñaà, jè xi ndaà síkíjna-na yijo-na, mé-ne nga jè nga'ño-la Cristo kíjnakò-na.

¹⁰ Koií kjoa-la matsja-na k'e nga ma indaàjñaà. Tíkoaá matsja-na k'e nga chja'on-ko-na xita, k'e nga mé tsojmì xi chija-na, k'e nga fitjingui kondra-na xita, k'e nga mé kjoa xi 'iín ma-na síkjaán it'aà ts'e Cristo. K'e nga ma indaàjñaà, k'eé isa ndaà s'e-la nga'ño inima-na [nga jè Cristo tsjá-na].

¹¹ An, k'oaá s'ín kichjà, koni s'ín chja xita 'én xi nímé chjí-la. Tanga jño ki'nè-ná kjo'ño. Jño xi tjínè-nò nga ndaà síkíjna-ná. Nga 'an mìtsà isa nangui tjina-la jña xita xi 'mì-là jño nga isa 'nga títsajna-la jña xita xi tsibíxáya-la Cristo; nas'ín 'an nímé chjí-na.

¹² K'e nga tsohótijnako-nò kis'e-na kjoatsejta nga tsakoò-nò kjoaxkón xi okó chiba ko xi okó kjoa jeya-la Nainá ko nga'ño-la. Kjoa koi okó nga kixi kjoa nga 'an-ná xi tsibíxáya-na Cristo.

¹³ ¿Jño, mé xi isa nangui kisíkítsajna-nò koni jña naxandá-la Cristo xi kj'eíí? ¿A koií majti-nò nga mì jño kisijti-nò k'e nga mé tsojmì xi kichjàt'aà-na? Tjichàat'aà-ná nga nímé kisijé-nò.

Kó kitsò Pablo nga ìjngò k'a tífikon jña xita Corinto

¹⁴ Jyeé tjnandaà xi ma-ne jàn k'a nga kíjkon-nò. Tákó k'oas'ín s'iaàn, mìtsà mé xi sìjé-nò. Mìtsà koi otsjià mé tsojmì xi tjín-nò; kjonndaà tsajòn xi otsjià. Nga jña xita jchínga tjínè-la nga koiitjò ton xi kochjeén-la ìxti, mìtsà jña ìxti tjínè-la nga koiitjò ton xi kochjeén-la xita jchínga.

¹⁵ Matsjaá-na nga síkjèya yije mé xi tjín-na, skanda tìskjè yijo-na kjoa ts'e inima-nò. Nga isa ndaà matsjake-nò, jño, ¿a isaà chiba matsjacha-ná?

¹⁶ Kixií kjoa, 'an, nímé tsojmì xi kisijé-nò. Tanga tjín i'nga xita xi tsò: “Ñó maña nga konachan-la xita.”

¹⁷ Tanga, ¿mé xi kiskoònachan-nò k'e nga kisikasén i'nga-nò xita?

¹⁸ Tsibítsi'ba-la Tito nga kíikon-nò ko jè 'ndsè xi ìjngò. Jè Tito, ¿a kiskoònachaán-nò? ¿A mìtsà ngàsòn tìkoi-ne kjohítsjeèn tjaàjìn-jen, tíkoa tìkoi-ne ndiyá kixi tjaàya-jen?

¹⁹ ¿A k'oaá s'ín níkítsjeèn nga yijo-najen tìtsanokjoàtji-jen? Majìn, tíbeè Nainá koi 'én xi tìtsanokjoà-jen nga Cristo tìtsajnakò-jen. Jño ndí 'ndsè xi 'ño matsjake-nò, ngats'ì kjoa koi, kjonndaà tsajòn-nò nga isa tse nga'ño kàtas'e-nò.

²⁰ Makájno-na tsà k'e nga kíjchokon-nò tsà mì k'oaá s'ín tìtsa'nè koni s'ín mejèn-na. Koa 'an tsà mì k'oa s'ín tìs'iaàn koni s'ín mejèn-nò jño. Koií makájno-na tsà koií nàchrjein-la tìtsabixkàn-kjoò, tsà kjoaxitakòn tjín-nò, tsà kjoajti tjìin inima-nò, tsà jò tsà jàn ya tìtsajna-là xinguiò, tsà 'én ndiso tìtsabìnè-là xinguiò, tsà xinguiò tìtsanokjoájno-lá, tsà 'nga takòn tìtsa'nè ko tsà mìkìl ndaà tìtsajnakò xinguiò nga jngò ìjngò.

²¹ Tíkoaá makájnoó-na k'e nga kíjchokon ìjngò k'a-nò tsà Nainá sìsobà-na nga nguixkoòn jño. Tsà Nainá sìkjindáya-na xi kjoa tsajòn nga kjìn ma-nò xi jye kjòtseé binchaàtsjioè jé nga mìkìl níkájno jé-nò kjoa tjé xi 'nè ko kjoa chijngui xi 'nè ko ngats'ì kjoa ch'o xi 'nè.

13

'Én-la Pablo xi fehet'aà-ne.

¹ Jè xi ma-ne jàn k'a nga kíjkon-nò. K'oaá s'ín tíchja Xojon-la Nainá nga tsò: “K'e nga tsà jngò xita mejèn-la kíindaàjìn jngò kjoa, jò ko tsà jàn xita kochjeén xi koma tsjá 'én nga xkon kijtseè-ne kjoa xi komà mé-ne nga jcha-la, a kixií kjoa, o xi majìn-né.”

² K'oaá s'ín jye kixan kixi-nò k'e nga ijchòkon-nò xi ma-ne jò k'a, ko i'ndeí nas'ín kjìin tjinaa, k'oaá tjì xan ìjngò k'a-nò nga jña xi jé tsohòtsji nga sa ítjòn ko xi nchihòtsji jé skanda i'ndeí, mìkìl kojno-la nga tsjaà-la kjo'iín nga jngò ìjngò.

³ 'An, k'oaá s'iaàn mé-nè nga jcha-nò, a kixií kjoa nga 'an síkjeén-na Cristo nga chjàjìn-nò 'én-la. Mìtsà indaàkjoa Cristo; tjín-la nga'ño k'e nga síxajìn inima-nò.

⁴ Kixií kjoa jè Cristo, k'oaá s'ín k'en-t'aà krò koni jngoò xita xi tsjìn-la nga'ño. Tanga i'ndeì, nga'ño ts'e Nainá tijnakon-ne. Ngajen, k'oaá tìs'ín indaàkjoa titsajna-jen koni s'ín komàt'in Cristo, tanga nga'ño ts'e Nainá kitsajnakon-najen koni Cristo mé-ne nga koma síxá-nòjen.

⁵ Jñò, chít'aà inima-nò, tsà kixií kjoa nga ndaà mokjeiín-nò it'aà ts'e Nainá. Ndaà chít'aà inima-nò xi tijnò-nò. ¿A mìtsà tijnìn-nò nga Cristo tijnajìn inima-nò? Ta jngoò-la tsà mìkì tsatojioòn koni s'ín kichit'aà-nò.

⁶ Tanga 'an, majngoò takoàn nga jchaá it'aà tsajen, ngajen tsatojìn yije-nájen koni s'ín kichit'aà-najen.

⁷ Koií kjoa-la bìtsi'ba-lajen Nainá nga nímé jé kinchátsjioò. Tanga mìtsà koi-ne nga jcha-najen nga ndaà bitjo-jen k'e nga chit'aà-najen. Jè-né nga síkitasòn jñò kjoa xi ndaà tjín, nas'ín k'oa's'ín kàta'ya-la it'aà tsajen koni tsà mìkì chíkjoa-najen kjoa xi otojìn-jen.

⁸ Mìkì koma kondra kitsajna-lajen xita xi síkitasòn kjoakixi-la Nainá. Ta saá k'oi-lajen nga'ño.

⁹ Matsja-najen k'e nga jñò tjín-nò nga'ño, nas'ín ngajen ma indaàjìn-jen. K'oaá ma-ne nga bìtsi'ba-lajen Nainá, mé-ne jñò nímé kjohítsjeèn chijat'aà-nò.

¹⁰ Tìkjù-nò xojon jè k'e nga tákó kjìn tijnaa-isa, mé-ne k'e nga kijchokon-nò mì tì k'oaá s'ín 'ño kichjàkò-nò koni s'ín tjín kjotíxoma xi kitsjaà-na Nainá. Nga Nainá mìtsà koi xá kitsjaà-na kjotíxoma nga 'an síkìts'ón-jìn-nò, jè-né nga isa kixi kitsajnakoo 'én xi mokjeiín-nò.

Kó kitsò Pablo nga síhixat'aà xita Corinto

¹¹ Ndí 'ndsè kò tichjaá, jè xi fehet'aà-ne, tsja t'è-là inima-nò; kixi titsajna; tìjetakòn xinguiò; tà jngoò kjohítsjeèn kàtas'e-nò, 'nchán titsajnakoo xinguiò. Nainá xi tjín-la kjoa 'nchán kò xi tjín-la kjoatjòcha kàtijnakò-nò.

¹² Nga nguì koo inima-nò tìixat'aà xinguiò nga jngoò ìjngoò.

¹³ Ngats'ì xita-la Nainá xi ì tìtsajnakò-na síhixat'aà-nò.

¹⁴ Jè kjondaà-la Jesucristo xi otíxoma-ná, kò kjoatjòcha-la Nainá, kò Inima Tsjeè-la Nainá kàtijnakò-nò ngats'ioò. K'oaá s'ín kàtama.

Xojoñ carta-la San Pablo xi kiskiñ-la xita naxandá-la Cristo xi títsajna nangui Galacia

Kó tsò Pablo nga síhixat'aà xita naxandá-la Cristo xi títsajna nangui Galacia

¹⁻² Jñò xi naxandá-la Cristo maà xi títsajnaà ján nangui Galacia, títsañihixot'aà-nòjen 'an xi 'mì-na Pablo, kò ngats'ìi xita-la Cristo xi ì títsajna-na. Jè xá ítjòn xi 'an tjín-na, mìtsà ít'aà ts'e xita isò'nde kitjoé-na kò mìtsà taxkì xita tsibít'aà-na. Jè sobà Jesucristo kò Nainá tsibíxáya-na, jè xi Na'èn 'mì-lá xi jè kisikjaáya-la Jesús ít'aà ts'e kjoabiyaà.

³ Jè Na'èn-ná xi Nainá kò Na'èn Jesucristo xi otíxoma-ná kàtatsjá-nò kjondaà kò kjoa'nchán ya jjiin inima-nò.

⁴ Jñò, jyeé tíjiin-nò nga jè Jesucristo kitsjaà kjotjò yijo-la nga k'en xi kjoa ts'e jé-ná, mé-ne nga kochrjekàjiin-ná jñà kjoach'o xi tjín ì isò'nde. Jesucristo, k'oaá s'ín kisikitasòn koni s'ín mejèn-la Na'èn-ná xi Nainá.

⁵ Jeya kàtjna Nainá nita mé nachrjein-ne, nita mé nó-ne. K'oaá s'ín kàtama.

Tsjin ìjngoò-isa 'én ndaà-la Nainá xi kjoa ts'e Cristo xi kj'eíi tsò

⁶ 'An, tà maxkón-na nga jñò, ta nitoón chinchat'aaxìn-là Nainá nga kj'eíi 'én tsanguit'aà-là kò kijnei takòn Nainá xi xó kiichja-nò mé-ne nga ít'aà ts'e kjondaà-la Cristo sijchá yijo-nò.

⁷ Tanga tsjin ìjngoò-isa 'én ndaà-la Nainá xi kjoa ts'e Cristo xi kj'eíi tsò. Tanga tjín i'nga xita xi binchá ská-nò xi mejèn-la sikkatjiya-la 'én ndaà-la Nainá xi kjoa ts'e Cristo.

⁸ Tanga tsà tjín xita xi kj'eíi tsò 'én xi okóya xi mì k'oaá tsò koni tsò 'én ndaà-la Nainá xi kjoa ts'e Cristo xi jin bènójmí-jen, kàtatsjá-la kjo'in Nainá, nas'ín ti 'an-na, o nas'ín jngoò àkjalé xi ngajmii nchrobá-ne kàtatsjá-najen kjo'in.

⁹ Koni s'ín ki'mì-nòjen nga sa ítjòn, tákó k'oaá s'ín tixan ìjngoò k'a-nò: Tsà yá xi kj'eíi tsò 'én xi bènójmí-nò koni tsò 'én ndaà-la Nainá xi jye kichjoétjò, Nainá kàtatsjá-la kjo'in.

Mé kjoa xi komàt'in Pablo nga ít'aà ts'e Cristo kisixáya-la

¹⁰ 'An, mìtsà kjondaà-la xita otsjià, kjondaà-la Nainá otsjià. Mìtsà koií otsjià nga ndaà kótijna nga nguixkòñ xita. Tsà kòs'ín s'iaàn, mì-là tsà kixì kjoa nga chí'nda-la Cristo ma.

¹¹ Jñò 'ndseé kò tichjaá, k'oaá s'ín kàtasijiin-nò; jè 'én ndaà-la Nainá xi kjoa ts'e Cristo xi 'an benojmiá, mìtsà kjohítsjeèn-la xi taxkì xita.

¹² Mìtsà ít'aà ts'e xi taxkì xita komà-na kò nga kjòchiya-na 'én koi; jè sobà Jesucristo kisihiseèn-na nga tsakóya-na.

¹³ Jñò, jyeé kina'yà kó kis'iaàn nga tisa ítjòn, k'e nga ya kiit'aà-la kjotíxoma-la xita judío. 'An, tsangatjingui-la jñà xita naxandá-la Cristo nga kòjtikeé; mejèn-na nga kàtachija.

¹⁴ Koni s'ín tjín kjotíxoma-la jñà xita judío, kjìn jchán xita naxandá-na xi taña jchínga-jen, kisikítsajna tjínguia nga 'an, isa 'ñó ndaà kisikitasoàn koni s'ín tjín xkósòn xi tjín-la xita jchínga-na.

¹⁵ Tanga Nainá k'oaá s'ín kisaseèn-la nga 'an jaàjiin-na k'e nga tákó ya tijnaya'ma indso'ba nea-na, nga ngui tà kòó kjondaà-la nga 'an kiichja-na;

¹⁶ kò kisikatsejèn-na Ki'ndí-la mé-ne koma kichjáyajiin-la 'én ndaà-la jñà xi mìtsà xita judío. Mìtsà yá xi kiskònangui-la xi taxkì xita;

¹⁷ kò mìtsà ya kiaà ján naxandá Jerusalén ñanda títsajna jñà xita xi isa kjòtseé tsibíxáya-la Cristo koni 'an. Tà saá ya kiaà i'nde Arabia; xi komà iskan-ne inchrobà ìjngoò k'a-na ya naxandá Damasco.

¹⁸ K'e nga jye tsato ján nó, skanda k'eé kiaà ján Jerusalén nga mejèn-na skoexkoan Cefas [xi tikoá Pedro 'mì]; chrj'òñ nachrjein tsohótijna ya ni'ya-la.

¹⁹ X̄ita xi kisìxáya-la, mìtsà yá xi k̄ijtseèxkoan xi k̄j'eíi, ta jè tajngoò Jacobo xi 'ndse ma Na'èn-ná.

²⁰ J̄nà 'én koi xi 'an t̄isikasén-nò, nguì 'én kixi-né, tíbeè Nainá, mìtsà 'én ndiso.

²¹ K'e nga jye komà iskan, kiaà ján nangui Siria k̄o ya nangui Cilicia.

²² Tanga j̄nà n̄achrjein koi, k̄j'e è k̄i beèxkon-na j̄nà x̄ita n̄axandá-la Cristo xi títsajna ya nangui Judea.

²³ Tà k'oaá tsò 'én xi k̄i'nchré: “Jè xi k̄iit̄jngui kondra-ná nga sa k̄jòtseé, j̄'ndeí, 'én ndaà-la Nainá xi k̄joa ts'e Cristo ch̄jaya, jè 'én xi mejèn-la kisichja nga sa ít̄jòn.”

²⁴ J̄nà x̄ita koi, jeya kisik̄ijna Nainá nga jye jahat̄jya-na.

2

¹ K'e nga jye komà iskan nga jye ijchò te ñijòn nó, kiaà ìjngoò k'a ján Jerusalén ko Bernabé; t̄ikoá k̄iikoáa jè Tito.

² Koií k̄i-nà nga Nainá k'oa's'ín kisik̄ichiya-na nga t̄jínè-na nga k̄jián. J̄nà x̄ita xi xá 'nga t̄jín-la ya n̄axandá-la Cristo ít̄'aà x̄in tsibenojmí-la kó tsò 'én ndaà-la Nainá xi k̄joa ts'e Cristo xi 'an ch̄jaya-la j̄nà xi mìtsà x̄ita judío. Majìn-na nga j̄nà x̄ita koi k̄itso-na nga ñimé ch̄jì-la xá xi 'an t̄is'iaàn k̄o xi jye kis'iaàn.

³ Jè Tito nas'ín x̄ita griego nga ya t̄jiko-na, mìtsà yá xi k̄jò'ñó kis'iìn-la nga k̄isit'aà chiba-la yijo-la k̄joa ts'e circuncisión.

⁴ Tanga t̄jín i'nga x̄ita ndiso xi jahas'en-jìin chijé nga tsò nga t̄ikoá jè Cristo fit'aà-la; ta jè xi mejèn-la nga kotsejèn chijé kós'ín titsa'né j̄nà xi mokjeiín-ná ít̄'aà ts'e Cristo Jesús nga jye titsajnandiaá k̄joa ts'e k̄jotixoma xi kitjoé-la Moisés, k̄o mejèn-la nga k̄jò'ñó s'iìn-ná nga sikitasoán k̄jotixoma.

⁵ Tanga ngajen ñi itsé kinis'in-lajen mé-ne nga jè k̄joa kixi xi ts'e 'én ndaà-la Nainá xi k̄joa ts'e Cristo, yaá k̄at̄ijnajìin-nò nga k̄jit'aà n̄achrjein.

⁶ J̄nà x̄ita xi xá 'nga t̄jín-la ñimé k̄joa x̄itse kitsjaà-isa-na koni tsò 'én xi 'an okoòya. Tanga mìtsà 'an t̄jín-na kindá tsà x̄ita ít̄jòn-né k̄o tsà majìn. Nga Nainá mìtsà faájiin x̄ita yá-ne xi títsajna ít̄jòn k̄o yá-ne xi títsajna t̄jngui.

⁷ Ta saá kòk̄jeiín-la nga jè sobà Nainá kitsjaà-na xá nga 'an kichj̄ajajìin-la 'én ndaà-la Nainá xi k̄joa ts'e Cristo j̄nà xi mìtsà x̄ita judío xi mìk̄i t̄jít'aà ch̄iba yijo-la k̄joa ts'e circuncisión. K̄o jè Pedro kitjoé-la xá nga jè k̄iichj̄ajajìin-la j̄nà xi nguì x̄ita judío xi t̄jít'aà ch̄iba yijo-la k̄joa ts'e circuncisión.

⁸ Nainá, koni kisik̄o Pedro nga jè tsibíxáya-la nga k̄iichj̄ajajìin-la 'én ndaà-la Nainá xi k̄joa ts'e Cristo j̄nà xi nguì x̄ita judío, 'an, k'oaá t̄i kisik̄o-na nga 'aán tsibíxáya-na nga kichj̄ajajìin-la 'én ndaà-la Nainá xi k̄joa ts'e Cristo j̄nà xi mìtsà x̄ita judío.

⁹ Jacobo, Cefas [xi t̄ikoá Pedro 'mì] k̄o Juan, xi k̄os'ín beèxkón x̄ita nga j̄nà títsajna ít̄jòn ya n̄axandá-la Cristo, k̄ijtseè nga Nainá kitsjaà-na k̄jondaà koi. K̄jòjngoò ikon, ìk̄joàn kitsjaà-najen tsja, 'an k̄o Bernabé, mé-ne nga ki'ya-la nga ta jngoó xá titsa'nè-jen. Ndaà kisaseèn-la nga tsanguì ñixá-lajen j̄nà xi mìtsà x̄ita judío, k̄o j̄nà, kisìxáko j̄nà xi nguì x̄ita judío.

¹⁰ Tà koií k̄joa xi kisijé-najen nga kochj̄at'aà-la x̄ita ìma. J̄nà k̄joa koi, t̄ikoáá 'an, jyeé k̄os'ín t̄ibìnè-la yijo-na nga k'oa t̄is'iaàn.

Mé-ne tsohótiko-ne Pedro jè Pablo ján naxandá Antioquía

¹¹ Jngoò k'a k'e nga jè Cefas [xi t̄ikoá Pedro 'mì] j'ì ì naxandá Antioquía, tsakatikoá nga nguixkon x̄ita k'e nga k̄ijtseè nga mìk̄i ndaà t̄jín k̄joa xi t̄is'ín.

¹² K'e nga sa ít̄jòn, yaá tsakjèn-k̄o j̄nà x̄ita-la Cristo xi mìtsà x̄ita judío. Nga komà iskan, k'e nga j'ì x̄ita judío xi t̄ikoá mokjeiín-la ít̄'aà ts'e Cristo, x̄ita xi ts'e Jacobo, k'eé mì t̄i k̄i ya tsakjèn-k̄o-ne; tsasit'aàxìn-né nga majìn-la nga ch'o k̄ijnako j̄nà x̄ita koi nga k̄jò'ñó mejèn-la nga sit'aà ch̄iba-la j̄nà xi mìtsà x̄ita judío.

¹³ Tíkooá jñà x̄ita judío xi i'nga xi mokjeiín-la 'én-la Nainá, k'oaá ti kis'iin koni jè Pedro nga kisis'in-la kjoa xi jò isén t̄jín-la, skanda jè Bernabé k'oaá ti kis'iin.

¹⁴ An, k'e nga kijtsee nga mi k'oaá s'ín nchisíkitasòn koni s'ín t̄jín kjoa kixi-la 'én ndaà-la Nainá xi kjoa ts'e Cristo, k'oaá kixan-la jè Cefas [xi t̄kooa Pedro 'mì] nga nguixkon ngats'iì x̄ita: “Ngaji nga x̄ita judío 'mì-lè, k'oaá s'ín t̄nìjchí yijo-lè koni tsà mìtsà x̄ita judío. ¿Mé-ne kjo'ño 'nè-la jñà xi mìtsà x̄ita judío nga k'oas'ín k̄atasíjchá yijo-la koni tsà nguì x̄ita judío?”

¹⁵ Nas'ín kixi kjoa nga tje-la x̄ita judío 'mì-ná nga mì yaá kits'iin-jìin-lá jñà xi mìtsà x̄ita judío xi x̄ita jé 'mì-lá,

¹⁶ tanga 'ya-ná nga jñà x̄ita, mìtsà kixi k̄itsajna nga nguixkon Nainá nga ta koi kjoa-la nga síkitasòn Kjotíxoma xi kitjoé-la Moisés; ta jè-né nga mokjeiín-la it'aà ts'e Cristo. Jñá, jyeé kòkjeiín-ná it'aà ts'e Jesucristo, kò jè Nainá kixi síkijna-ná koi kjoa-la nga jye ya kòkjeiín-ná it'aà ts'e Cristo, mìtsà koií kjoa-la nga n̄ikitasoán kjotíxoma. Nijngòò x̄ita xi kixi k̄ijna nga nguixkon Nainá nga ta koi kjoa-la nga síkitasòn Kjotíxoma.

¹⁷ I'ndeì k'oaá s'ín chiñá-lá nga kixi k̄itsajnaá ya nguixkon Nainá ta koií kjoa-la nga mokjeiín-ná it'aà ts'e Cristo, [mìtsà koi-ne nga kjotíxoma t̄itsan̄ikitasoán]. K'oaá ma-ne nga x̄ita jé tí'mì-ná [koni jñà xi mìtsà x̄ita judío]. Tanga, ¿a tsò-ne kjoa nga jè Cristo bít'in-ná nga binchaàtsjiaá jé? Majìn, mì k'oaá s'ín t̄jín.

¹⁸ Tsà jè kjotíxoma xi 'an tsachrjekànguia nga sa ítòn, kò tsà ijngòò k'a s̄ikitasoán, jé t̄ihotsjia.

¹⁹ Jè kjotíxoma xi kitjoé-la Moisés, jè kisik'en-na. I'ndeì t̄ijn̄andeìí-ná kjoa ts'e kjotíxoma mé-ne ma kótijnakon-na nga s̄ikitasoán-la Nainá.

²⁰ K'e nga k'en-t'aà krò Cristo, 'an, t̄ikooá ya k'en-t'aàkoa. Kò mìtsà t̄i'an-na xi t̄ijn̄akoan, jè Cristo xi t̄ijn̄ajìin in̄ima-na. I'ndeì, koií t̄ijn̄akon-na nga jè Ki'ndí-la Nainá ma'ñót'aà takoàn nga 'ño kjòtsjakeè-na skanda jè kitsjaà kjotjò yijo-la nga k'en ngajo-na.

²¹ Majìn-na nga ochrjekànguia kjondaà-la Nainá. Tsà it'aà ts'e kjotíxoma xi kitjoé-la Moisés, kixi k̄itsajnaá nga nguixkon Nainá, mì-la mé chjì-la nga k'en Cristo.

3

Mé xi chjì-la, a jè kjotíxoma xi kitjoé-la Moisés, o xi jè-né nga mokjeiín-ná it'aà Cristo

¹ Jñò xi nangui Galacia tsajòn, mé ta tòn̄dò-nò! ¿Yá xi kiskoònachan-nò? ¿A mì b̄itsjeèn-nò koni s'ín nga nguì ndaà tsibènojmiya-nòjen nga jè Jesucristo yaá k'en-t'aà krò xi kjondaà tsajòn?

² Tà koií kjoa kjònangui-nò: ¿A koií kjoa-la nga kin̄ikitasoán kjotíxoma nga kitjoé-nò In̄ima Tsjeè-la Nainá, o xi koií-né nga mokjeiín-nò 'én-la Nainá koni s'ín kina'ya?

³ Jñò, nga sa ítòn, tsibìts'iaqò-nò kjoh̄ítsjeèn-la In̄ima Tsjeè-la Nainá; kò i'ndeì, mejèn-nò nga tà kjoh̄ítsjeèn-la x̄ita s̄ikjehet'aà-nò. ¿Mé ta tòn̄dò-nò!

⁴ Jñò, tseé kjo'in tsatojioòn nga kòkjeiín-nò 'én ndaà-la Nainá. ¿A tà kjotjò-ne nga tse kjo'in tsatojioòn? Majìn, mì-la kii ndaà t̄jín.

⁵ K'e nga Nainá kitsjaà-nò In̄ima Tsjeè-la kò kis'iin kjoxkón xi ndaà t̄jín ijìin naxandá tsajòn, ¿mé-ne k'oas'ín kis'iin-ne? ¿A koi-né nga ndaà kin̄ikitasoán kjotíxoma? Majìn, koií-né nga kòkjeiín-nò 'én ndaà-la Nainá.

Nainá, mé-ne x̄ita kixi kijtsee takòn-ne Abraham

⁶ Koni jè x̄ita jchínga-ná xi ki'mì Abraham kòkjeiín-la it'aà ts'e Nainá; k'oaá komà-ne nga x̄ita kixi kitsò-la Nainá.

⁷ Jñò, k'oaá s'ín ndaà k̄atasijìin-nò: Jñà xi mokjeiín-la, jñà-né xi tje-la Abraham.

⁸ Nga t̄isa kjòtsee, jyeé k'oas'ín kitsjaà 'én Nainá koni s'ín t̄ichja Xojon-la nga síkixi-né jñà xi mìtsà x̄ita judío k'e nga mokjeiín-la it'aà ts'e. Yaá t̄ichja ñánda jè Nainá t̄jen kitsjaà ítòn-la Abraham jñà 'én ndaà-la xi tsò: “Ngats'iì naxandá xi t̄jín isò'nde, it'aà tsjìí kochikon-t'in.”

⁹ K'oaá ma-ne nga ngats'iì xita xi mokjeiín-la it'aà ts'e Nainá ngásòn kochikon-t'in ko Abraham nga jè Abraham kòkjeiín-la it'aà ts'e Nainá.

¹⁰ Ngats'iì xita xi jè ma'ñót'aà takòn koni s'ín nchisíkitasòn kjotíxoma, kjo'iín tjinè-la, nga mìtsà kixi kjoa nga ndaà síkitasòn ngats'iì kjoa xi ya tjit'aà. Nga k'oaá s'ín tíchja Xojon-la Nainá nga tsò: “Kàtasinè-la kjo'in jè xi mì kixi síkitasòn ngats'iì kjoa xi tjit'aà jè xojon ts'e kjotíxoma.”

¹¹ Okixi-né nga nijngoò xita xi kixi kjna nga nguixkon Nainá nga kjotíxoma síkitasòn. Nga jè 'én-la Nainá tsò-né: “Jè xi xita kixi, jè kjoa xi mokjeiín-la kijnakon-ne.”

¹² Jña xita xi kjotíxoma síkitasòn mìtsà Nainá ma'ñót'aà ikon. Nga k'oaá s'ín tíchja Xojon-la Nainá, nga tsò: “Xita xi kjotíxoma síkitasòn, k'oaá s'ín tjinè-la nga k'oas'ín sijnchá yijo-la koni tsò kjotíxoma.”

¹³ Jè Cristo tsibíhjtji-ná kjo'in xi ya titsajnañaá nga kjotíxoma titsaníkitasoán nga jè kisikjeiín kjo'in xi jé tsajan; nga k'oaá s'ín tíchja xojon nga tsò: “Kjo'iín sinè-la ngats'iì xi krò sit'aà.”

¹⁴ Jè Cristo, koií okis'iín-ne mé-ne nga jña kjoa machikon-t'in xi kitjoé-la Abraham tikoá tjoé yije-la ngats'iì naxandá xi tjin isò'nde nga jña kjoa machikon-t'in, yaá nchrobá-ne it'aà ts'e Cristo mé-ne nga it'aà ts'e kjoa xi mokjeiín-ná, tjoé-ná Inima Tsjeè-la Nainá xi jye k'oas'ín kitsjaà tso'ba Nainá nga tsjá-ná.

Nga'ño xi tjin-la 'én-la Nainá koni s'ín kitsjaà-la tso'ba Abraham

¹⁵ Jño 'ndsè ko tichjaá, kènojmí jngoò-nò kjotíxoma xi ts'e isò'nde. K'e nga sindaàjìin jngoò kjoa nga xojon tjámi'nga, nga jye ma firma ko sasén-la sello, mì tì kii koma kits'ón-ya-ne koni s'ín sindaàjìin, tikoáá mì tì kii koma sùt'aàsòn-isa-la 'én xi kje'ejì tsò koni s'ín jye kasindaàjìin.

¹⁶ K'oaá s'ín kitsjaà-la tso'ba Nainá jè Abraham ko jè xita tje-la. Jè Xojon-la Nainá mìtsà tsò “jña xita tje-la”, ta tsò-né: “jè tje-lè.” Nga mìtsà kjin ma tje-la Abraham xi kitjoé-la koni tsò 'én xi kitsjaà-la Nainá, ta jngoó ma-ne. Nga jè tíhoxkit'aà Cristo.

¹⁷ Jè kjoa xi tibenojmiá, kiis'ín tjin: Nainá ko Abraham tsibíndaàjìin jngoò kjoa, ikjoàn kisikixiya [koni ma k'e nga jye ma firma]. K'e nga jye tsato ñijòn sindo ko katé nó, j'ii kjotíxoma ts'e Moisés; tanga jè kjotíxoma mìkii ma síkits'óna jè kjoa xi jye kisindaàjìin ko mìkii ma kitjongui xi Nainá jye k'oas'ín kitsjaà tso'ba.

¹⁸ Jè Nainá k'e nga tsjá-ná kjondaà-la, mìtsà koi kjoa-la nga nìkitasoán kjotíxoma, koi-né nga jye k'oas'ín kitsjaà tso'ba. Nga Nainá, tà kjotjò kitsjaà-la kjondaà Abraham nga jyeé k'oas'ín kitsjaà-la tso'ba.

Mé xá xi tjin-la kjotíxoma

¹⁹ Tanga jè kjotíxoma, ¿mé xá kitjei-ne? Koií k'oas'ín kitjei-ne koií kjoa-la nga ch'o nchis'ín xita. K'oaá s'ín kisijna skanda k'e nga j'ii tje-la Abraham xi Nainá xó k'oas'ín kitsjaà-la tso'ba. Jè kjotíxoma, jña àkjalé j'ii ko jè Moisés tsasijnajìin osen nga kisikatoya 'én ko kiichjatji xita nguixkon Nainá.

²⁰ K'e nga jngoò xita osijnajìin osen, mìtsà ta jngoò xita fit'aà-la, fit'aà-la ngajò. Tanga jè Nainá ta jè tajngoó kitsjaà-la 'én Abraham.

²¹ Nainá, k'e nga kitsjaà kjotíxoma, mìtsà kondra kii-la koni s'ín jye kitsjaà-la tso'ba Abraham. Tsá jè-la-ne kjotíxoma ma-la síkitsajnakon xita, maá-la kixi kitsajna xita nga kjotíxoma síkitasòn.

²² Tanga jè Xojon-la Nainá, k'oaá tsò nga ngats'iì xita saá jé títsajnajìin. K'oaá ma-ne nga jña xita xi mokjeiín-la it'aà ts'e Jesucristo, tjoé-la kjoabinachon xi Nainá jye k'oas'ín kitsjaà tso'ba nga tsjá-la jña xita nga mokjeiín-la.

²³ K'e nga tikj'eè f'ii jè kjoa xi mokjeiín-ná, jè kjotíxoma kitsobà'ño-ná koni tsà ndayá tsibìtsajna-ya-ná skanda jè nachrjein k'e nga ki'ya-la jè kjoa xi mokjeiín-ná.

²⁴ Kò jè k̄jotíxoma kisikinda-ná koni s'ín makinda jñà ìxti, skanda k'e nga j'ii Cristo, mé-ne k'e nga mokjeiín-ná it'aà ts'e Cristo, kixi k̄itsajnaá nga nguixkòn Nainá.

²⁵ I'ndeí nga jye j'ii kjoa xi mokjeiín-ná, mì tì yaá titsajna'ño-ná it'aà ts'e k̄jotíxoma.

²⁶ Jñò, ngats'ioò, saà ìxti-la Nainá maá koi kjoa-la nga mokjeiín-nò it'aà ts'e Cristo Jesús.

²⁷ K'e nga ya titsajnakjoòkoo Cristo nga komà bautizar, k'ée jahatjìya-nò koni jngoò xita xi sík̄jatjìya nikje-la. Jè sobá Cristo xi komà nikje xit̄se-nò.

²⁸ Mì tì kii mochjeén-ne nga tjájiìn xita yá-né xi xita judío kò yá-né xi mìtsà xita judío, yá xi ch̄i'nda'ño titsajna kò yá xi titsajnandeí, yá-né xi x'in kò yá-né xi chjoón. Ngats'ioò ta jngoò yijo ma-nò nga ya titsajnakjoòkoo Cristo Jesús.

²⁹ Jñò, nga xita-la Cristo ma, kixi kjoa nga tje-la Abraham ma, tikoá tjoé-nò k̄jotjò koni s'ín kitsjaà-la tso'ba Nainá jè Abraham.

4

¹ Tikoá kènójmí jngoò-nò k̄jotíxoma: Jngoò ti, k'e nga tákó itsé kji, k'oaá ngaya-la koni tsà ch̄i'nda tíjna nga k̄j'èè tsà jè be mé tsojmì xi tjín-la na'èn-la nas'ín k'e nga koma ìskan jè tjoé-la tsojmì xi tjín.

² Nga xitaá síkinda skanda k'e nga majchínga, kò tjín xita xi síkinda jñà tsojmì-la skanda k'e nga kichóya nachrjein-la koni s'ín tsibíjna chiba na'èn-la.

³ Jñá xi xita 'mì-ná, k'oaá t̄is'ín komàt'iaán koni mat'in jñà ìxti k'e nga tikj'èè mokjeiín-ná it'aà ts'e Cristo nga jñà k̄jotíxoma xi tjín isò'nde 'ño tsatíxoma-ná koni s'ín mat'in jñà xi ch̄i'nda titsajna'ño nga mìkìl t̄j'nde-la nga k̄itsajnandeí.

⁴ Tanga k'e nga kichóya nachrjein koni s'ín tjindaà-la Nainá, jè Nainá kisikasén ki'ndí-la ì it'aà nangui; kò it'aà ts'e chjoón kits'iìn koni s'ín ts'iìn xi taxkì xita isò'nde. Kò yaá k̄jòchájiìn k̄jotíxoma ts'e xita judío.

⁵ K'oaá kis'iìn Nainá, mé-ne nga jè Jesucristo s̄ik̄itsajnandeí jñà xita xi ya titsajnajìin-'ño k̄jotíxoma kò mé-ne nga ngàsòn skoétjò-ná Nainá nga ìxti-la komaá.

⁶ Koi kjoa-la nga jye ìxti-la maá, Nainá kisikasén Inima Tsjeè-la xi ts'e Ki'ndí-la ya jjiìn inima-ná. K'e nga nokjoát'aà-lá Nainá, k'oaá tsò Inima Tsjeè-la: “Ndí apa”, tsò-né.

⁷ K'oaá ma-ne nga i'ndeí mìtsà tì xita ch̄i'nda titsajnaá; jyeé ìxti-la Nainá 'mì-ná; kò tikoá tsjá-ná Nainá ngats'ii k̄jotjò xi jñá tjoé-ná nga ìxti-la 'mì-ná.

Mé-ne síkájno-ne Pablo it'aà ts'e xita Galacia xi mokjeiín-la 'én-la Nainá

⁸ Jñò k'e nga sa k̄jòtseé, k'e nga tikj'èè yaxkon xi nguì jè sobà Nainá, ch̄i'nda'ño tsitsajnaà nga k̄jò'ño-né nga jñà tsanguit'aà-la xi mìtsà kixi kjoa nga Nainá.

⁹ Tanga i'ndeí nga jye yaxkoòn xi nguì jè sobà Nainá, (tanga xi nguì kixi kjoa, jè Nainá xi jye ndaà beèxkon-nò), ¿mé-ne k'oas'ín n̄ik̄itsjeèn-nò nga jñà onguít'aà ìjngoò k'a-là jñà k̄jotíxoma ima xi tjín-nò, jè xi tsjìn-la nga'ño, kò xi n̄imé chjì-la? ¿A mejèn-nò nga ya s̄ik̄itsajna'ño ìjngoò k'a-nò?

¹⁰ Jñò, tákó 'ño yaxkón nachrjein ts'e s'eí, ts'e sá, kò ts'e nó.

¹¹ 'An, makájno-na jè xá xi kis'iaàn nga kisixájiìn-nò tsà tà k̄jotjò-ne.

¹² 'An nga jye tsohósijnat'aàxìn-la jè k̄jotíxoma, tikoá yaá kisìngàsòn-kò-nò, nga jñò, mìkìl t̄jiìn-nò it'aà ts'e k̄jotíxoma. I'ndeí k'oaá s'ín t̄isjé-nò nga t̄inchat'aàxìn-la k̄jotíxoma koni 'an jyeé tsohósijnat'aàxìn-la. Nga sa ítjòn n̄imé kjoa tjín xi ch'o kinikò-ná.

¹³ Jyeé t̄jiìn-nò k'e nga sa kiaà ítjoàn nga kichjàyajiìn-nò 'én ndaà-la Nainá xi kjoa ts'e Cristo, koi kjoa-la nga ch'in tjín-la yijo-na.

¹⁴ Jñò, mìkìl kinachrjengui-ná n̄i mìtsà xìn kinikíjna-ná, nas'ín kjoa tsohósji-nò nga ch'in tjín-la yijo-na. Tà saá kichjoétjò-ná koni jngoò àkjale-la Nainá, koni tsà jè sobà Cristo Jesús.

¹⁵ ¿Nga sa ítjòn, 'ño tsja tjín-nò! I'ndeí, ¿mé xi komà-nò? K'oaá xan-nò, skanda jñà xkoòn mejèn kinachrje nga 'an kits'iì-ná.

¹⁶ I'ndeí, ¿a kondraá kótijnako-nò, tà koi kjoa-la nga 'én kixi benojmì-nò?

¹⁷ Jñà xitá [xi mejèn-la nga kjotíxoma sikitasòn], 'ñó bínè-la yijo-la it'aà tsajòn, tanga mìkì ndaà tjin kjohítsjeèn-la. Tà jè xi mejèn-la nga kochrjet'aàxìn-nò it'aà tsajèn mé-ne nga jñà konguit'aà-là.

¹⁸ Jñò, ndaà tjin k'e nga 'ñó bínè-la yijo-nò it'aà ts'e kjoa xi mejèn-nò tsà ndaà tjin kjohítsjeèn-nò kò tsà kjit'aà nachrjein k'oas'ín s'een, mìtsà tà k'e nga 'an tijnako-nò.

¹⁹ Jñò xi koni tsà ndí ixti-na xan-nò, 'an, k'oaá s'ín tímat'ian koni jngoò chjoón xi ki'ndí tí'beé; tseé kjo'in tìsikjiaán xi kjoa tsajòn. Jè kjo'in xi tìsikjiaán skanda k'ée-la kjoehet'aà k'e nga k'oas'ín sijchá yijo-nò koni Cristo.

²⁰ Mejèn-na nga ya kótijnako-nò jè hora jè, mé-ne nga k'ejí tsò 'én xi kichjàko-nò. Jyee mì tì kii be-na kós'ín sikkítsjeèn it'aà tsajòn.

Kó tsòya-ne it'aà ts'e chjoón Agar kò Sara

²¹ Jñò xi mejèn-nò nga kjotíxoma sikitasòn, ¿a k'jeè na'yà-là kó tsò 'én xi tjit'aà kjotíxoma-la Moisés?

²² K'oaá tsò nga jè Abraham, jò komà ixti-la, jngoò ts'e chjoón chi'nda-la; jè xi jngoò, ts'ée xi nguì chjoón-la xi mìtsà chi'nda tjna.

²³ Jè ki'ndí-la xi chjoón chi'nda k'oaá s'ín kits'iin koni s'ín ts'iin ngats'ii ndí ixti. Tanga jè ts'e xi nguì chjoón-la xi mìtsà chi'nda tjna, k'oaá s'ín kits'iin nga tsitasòn koni s'ín kitsjaà-la tso'ba Nainá Abraham.

²⁴ Kjoa ts'e íchjín koi, k'oaá ngaya-la koni jñà kjoa xi jò tsibíndaajijn Nainá. Jè chjoón Agar, jè ngaya-la kjoa xi kisindaajijn ya nindoò Sinaí k'e nga kitjoé-la kjotíxoma Moisés. Ngats'ii xitá tje-la chi'ndaá tsibítsajna.

²⁵ Jè chjoón Agar, jè ngaya-la nindoò Sinaí xi síjna ján Arabia, kò nachrjein i'nde jè mangásòn-kò naxandá Jerusalén, nga jñà xitá-la chi'nda'ño títsajna nga tákó kjotíxoma sí's'in-la.

²⁶ Tanga jè Jerusalén xi kijna ngajmii, tijnandeí-né kò yaá nokjoá-ná ya naxandá jè; k'oaá ngaya-la koni tsà nea-ná ma.

²⁷ K'oaá tsò Xojon-la Nainá nga tsò:

Kàtatsja-lè ngaji xi chjoón 'ndi 'mì-lè nga tsjin-lè ixti.

'Ñó chihindáyi nga kò kjotsja-lè nga mìkì 'yi kós'ín ma nga ts'iin ixti.

Nga jè chjoón xi kijnei takòn,

isaá kjin koma ixti-la mì k'oa-ne jè xi tjin-la x'in.

²⁸ Isaac k'oaá s'ín kits'iin koni s'ín kitsjaà tso'ba Nainá. Jñò tikoáá ixti-laá maá xitá jchínga-la Isaac koni s'ín kitsjaà-la tso'ba Nainá.

²⁹ Jè ki'ndí xi tà k'oas'ín kits'iin koni ts'iin yije xitá isò'nde, kùtjingui kondra-la jè xi it'aà ts'e Inima Tsjeè-la Nainá kits'iin-ne. Koni s'ín komà jñà nachrjein koi, tákó k'oaá s'ín ma skanda nachrjein i'nde.

³⁰ Tanga, ¿kó tsò Xojon-la Nainá? K'oaá tsò: “Tiyótjingui-la jè chjoón chi'nda kò ki'ndí-la; nga jè ki'ndí-la nímé kjotjò tjoé-la, tà jè tjoé-la kjotjò jè ki'ndí-la xi mìtsà chjoón chi'nda.”

³¹ Jñò ndí 'ndsè kò ndí tichjaá, k'oaá s'ín tjin, jñá mìtsà ixti-la chjoón chi'nda maá, jñá-ná xi ixti-la chjoón xi mìtsà chi'nda tjna.

5

Kós'ín sijchá yijo-ná nga jye titsajnandiaá it'aà ts'e kjotíxoma xi kitjoé-la Moisés

¹ Jè Cristo, jngoò k'aá kisikkítsajnandeí-ná it'aà ts'e kjotíxoma xi kitjoé-la Moisés; k'oaá ma-ne jñò 'ñó kixi títsajna koni s'ín kisikkítsajnandeí-nò Jesucristo. Kì tì ya onguít'aà-là kjoa ts'e kjotíxoma xi kitsobà'ño-nò skanda kjotseé.

² 'An sobá-ná xi 'mì-na Pablo, tjiná'ya-ná koni xan-nò: tsà sit'aà chiba-nò kjoa ts'e circuncisión, mì tì mé kjondaà sakò-nò it'aà ts'e Cristo.

³ Ìjngoò k'a koxan-nò, nita yá xita-ne xi sit'aà chiba-la kjoa ts'e circuncisión, kjo'ñoó tjinè-la nga sikitason yije koni tsò 'én xi tjit'aà xojon ts'e kjotixoma.

⁴ Jñò xi k'oas'ín mejèn-nò nga it'aà ts'e kjotixoma kixi kitsajnaà nga nguixkon Nainá, jyeé chinchat'aàxin-là Cristo, jyeé chinchat'aàxin-là kjondaà xi tsjá kjotjò-ná Nainá.

⁵ Tanga ngajen, it'aà ts'eé Inima Tsjeè-la Nainá titsachiñá-lajen nga kixi kitsajna-jen nga nguixkon Nainá nga ta koi kjoa-la nga mokjeiin-najen it'aà ts'e Cristo.

⁶ Nga it'aà ts'e Cristo Jesús, mì tì mé chjí-la yá-ne xi tjit'aà chiba-la kjo yá-ne xi tsjin-la chiba kjoa ts'e circuncisión. Jè xi chjí-la nga 'ya-la koni s'ín mokjeiin-ná it'aà ts'e Cristo, nga tjin-ná kjotsjacha.

⁷ Jñò, k'e nga sa ítjòn, ndaà titsahonguikoo kjohitsjeèn-nò. ¿Yá xi tsatekjáya-nò nga mì tì kii nikitason-nò xi kjoa kixi?

⁸ Jè kjohitsjeèn jè, mìtsà ya nchrobá-ne ts'e Nainá xi xó kiichja-nò.

⁹ Tikindaà yijo-nò; nga k'oaá tsò jngoò 'én: “Nas'ín itsé-ne na'yo san xi sjiin na'yo inchrájin, sísan yije-né nas'ín tse ma-ne na'yo.”

¹⁰ Jè Nainá ot'aà takoàn it'aà tsajòn nga mìtsà kjei'í s'ín sikitsjeèn. Jè Nainá tsjá-la kjo'in nita yá xita-ne xi mejèn-la sikits'ón-jiin-nò.

¹¹ Jñò ndí 'ndsè kò ndí tichjaá, nga mì k'oaá s'ín tihokoòya nga sit'aà chiba-la xita kjoa ts'e circuncisión, koi kjoa-la nga fitjinguí kondra-na jña xita. Tanga tsà mì k'oas'ín okoòya, mì-la kii kjitjinguí kondra-na, mì-la tì kii kojitikeè-ne 'én xi chjaya it'aà ts'e krò-la Cristo.

¹² Jña xita xi mejèn-la sikits'ón-jiin-nò, kì tà bit'aà chiba-la yijo-la, tà saà jngoò k'a kàtatet'aà yijo-la.

¹³ Jñò 'ndseé kò tichjaá, k'oaá s'ín kiichja-nò Nainá nga kitsajnandeji-nó it'aà ts'e kjotixoma. Tanga i'ndeí nga titsajnandeji-nó, kì ch'o 'nè koni s'ín mejèn-la yijo-nò. Mochjeén-né nga tisikòò xinguiòò, kàtas'e-nò kjotjòcha nga òjngoò òjngoò-nò.

¹⁴ Nga ngats'ii kjotixoma, yaá majngoò yije jè xi tsò: “Titsjachi xita xinguii koni tsà tì yijo tsji-ne.”

¹⁵ Tsà tijnò titsabixkàn-kò-nò xinguiòò koni s'ín nañá, t'een kindá yijo-nò nga mì tijnò sikjehesòn-nò xita xinguiòò.

Kjoach'o xi síjé yijo-ná

¹⁶ K'oaá xan-nò: Tji'nde-là yijo-nò nga jè Inima Tsjeè-la Nainá kàtakó-nò ndiyá mé-ne nga mì koi kjoa sikitason kjoach'o xi síjé yijo-nò.

¹⁷ Jña kjoach'o xi síjé yijo-ná kondraá fi-la jè Inima Tsjeè-la Nainá, kò jè kjoa xi mejèn-la Inima Tsjeè-la Nainá kondraá fi-la jè xi mejèn-la yijo-ná. Jña kjoa koi kondraá titsajna-la xikjin. K'oaá ma-ne nga jñò, mìkii k'oas'ín s'een koni s'ín mejèn-nò.

¹⁸ Tanga tsà jè Inima Tsjeè-la Nainá tíhokó-nò ndiyá, mì tije kjotixoma otixoma-nò.

¹⁹ Jyeé 'yaá mé kjoach'o xi síjé yijo-ná koni jè kjoachijngui, kjoaxòpa, kjoachinga,

²⁰ kjoa nga xkòsòn yaxkoán, kjoatje, kjoa nga majtichaá xinguiáá, nga bixkán-koáá xinguiáá, nga machinichaá xinguiáá, nga jti takoán, nga nachrjenguiáá xinguiáá, nga xita nìjòyaá kò nga binchat'aàxin-lá xinguiáá,

²¹ kjoaxitakòn, kjoach'i, kò ngats'ii kjoachrjá'a xi ma ñánda bitjo s'eí. Tjin isa kjoa xi kjei'í, xi mangásòn-kò kjoa koi. Koni s'ín kixan-nò nga sa ítjòn, tákó k'oaá xan-nò skanda i'ndeí, jña xita xi k'oa tjin kjoa xi s'ín, nímé kjondaà sakò-la ya ñánda nga tíhotixoma Nainá.

Kjondaà xi tsjá Inima Tsjeè-la Nainá

²² Tanga jña kjondaà xi tsjá Inima Tsjeè-la Nainá, jña-né nga tjòcha s'eén xinguiáá, nga tsja s'en kjit'aá, nga 'nchán sijchá yijo-ná, nga s'e-ná kjoatsejta, nga tsjakjoa s'eén, nga s'en-ná kjondaà xi ndaà tjin, nga kixi tjin kjohitsjeèn-ná,

²³ nga indaàkjoa s'eén kò nga kixi kotixoma-lá yijo-ná. Jña kjoa koi, tsjin kjotixoma xi kondra tjna-la.

²⁴ Jñá xi jye x̄ita-la Cristo maá, ngats'ìi kjohítsjeèn-ná xi ch'o tsò kò xi ch'o síjé yijo-ná, yaá kinik'en-t'aá krò-la Cristo.

²⁵ I'ndeji nga jè Inima Tsjeè-la Nainá tísíkijnakon-ná, mochjeén-né nga kòs'ín kjaáan koni s'ín okó-ná ndiyá.

²⁶ Mikiì ndaà tjín nga 'nga koma takoán, nga tijñá sijti-lá xinguiáá, kò nga koxítakòn-chaá xinguiáá.

6

Mé xi mochjeén nga ndaà sikoáá ngats'ìi x̄ita

¹ Jñò ndí 'ndsè kò ndí tichjaá, tsà tjín i'nga x̄ita xi jé ótsji, jñò xi ndaà onguít'aà-là jè Inima Tsjeè-la Nainá, jñò t̄isikòò nga kàtakixiya ìjngoò k'a-ne nga indaàkjoa t̄inókjoa-là. Tanga jñò, t'een kinda yijo-nò, mé-ne nga mì jé skajjìn-nò.

² T̄isikòò xinguiòò k'e nga tsà mé kjoa xi 'in tjín t̄itsajnajjìn; k'oaá s'ín koma-ne nga s̄ikitasòn jè kjotixoma xi kitsjaà Cristo.

³ Tsà tjín i'nga x̄ita xi ndaà ochrjengui yijo-la, koa tsà mìtsà kixi-ne kjoa, jñà x̄ita koi, tà yijo-laá nchikonachan-la.

⁴ Isáá ndaà-ne nga chít'aà yijo-nò nga jngoò ìjngoò-nò, a ndaà titsa'nè; tsà ndaà titsa'nè, ta ya t̄ijjìn takòn, kì k'oaá s'ín nikítsjeèn nga jñò, isáá ndaà titsa'nè mì k'oa-ne koni jñà x̄ita xi kj'eíí.

⁵ Nga jngoò ìjngoò, yaá kjinè-la kós'ín t̄isíjchá yijo-la.

⁶ Jñà x̄ita xi nchikota'yà 'én ndaà-la Nainá, mochjeén-né nga kàtatsjá-la mé xi kochjeén-la maestro-la nga 'én okóya.

⁷ Kì yijo-nò chonachan-là; nga Nainá mìkiì koma s̄iskákoáá. Nga ìjngoò ìjngoò x̄ita, koni tjín kjoa xi s'ín, k'oaá t̄i tjín kjoa xi sakò-la.

⁸ Nga jè xi k'oa's'ín s'ín koni s'ín mejèn-la yijo-la, kjoabiyaá tjoé-la it'aà ts'e kjoa ch'o xi síjé yijo-la, tanga jè xi k'oa's'ín s'ín koni s'ín mejèn-la Inima Tsjeè-la Nainá, it'aà ts'e Inima Tsjeè-la Nainá tjoé-la kjoabinachon xi mìkiì fehet'aà n̄ita kjé-né.

⁹ Mikiì ndaà tjín tsà kòsìl-ná nga ndaà s'eén; nga kijchò nachrjein nga sakò-ná kjondaà tsà mì kì sihindaà-lá takoán.

¹⁰ Koií kjoa-la, k'e ma xi 'né itsé, ndaà sikoáá ngats'ìi x̄ita, jñà t̄itsajna ítjòn jñà x̄ita xinguiáá xi ngásòn mokjeiín-ná 'én-la Nainá.

Mé kjoa xi síkijna ítjòn Pablo

¹¹ Chítsejèn-là tsí kitsian-ne letra xi ndsaa t̄ikjìl-nò.

¹² Jñà x̄ita xi mejèn-la nga kjo'ñò s'ín-nò nga sit'aà ch̄iba-nò kjoa ts'e circuncisión, tà koií xi mejèn-la nga ndaà síkítsajna yijo-la nga nguixkòn x̄ita; kò majìn-la nga x̄ita kjitjingui kondra-la tsà kòs'ín keènojmiya nga ya k'en-t'aà krò Cristo.

¹³ Jñà x̄ita xi t̄jít'aà ch̄iba-la kjoa ts'e circuncisión, t̄ikoáá mìkiì s̄ikitasòn kjotixoma, tanga mejèn-la nga s̄it'aà ch̄iba-nò mé-ne nga it'aà tsajòn ndaà s̄ikítsajna-ne yijo-la k'e nga skoe nga jñò jye t̄jít'aà ch̄iba-nò.

¹⁴ Tanga 'an, n̄imé kjoa xi mejèn-na nga ndaà síkijna yijo-na; ta jè tajngoó krò-la Na'èn-ná Jesucristo nga ndaà síkijna yijo-na. K'oaá ma-ne nga jñà kjoa ch'o xi tjín isò'nde, it'aà ts'an, t̄itsajnak'en-né kò 'an t̄ijnak'eén-la jè isò'nde. Mì t̄i k'oaá tjín kjoa xi sis'in-na.

¹⁵ Xi it'aà ts'e Cristo, mìtsà jè xi ch̄í-la tsà t̄jít'aà ch̄iba-ná kò tsà tsjìn-ná ch̄iba kjoa ts'e circuncisión; jè xi ch̄í-la nga jè Nainá jyeé kisìk̄jatj̄iya-ná kò jyeé x̄ita x̄itse kjoán.

¹⁶ Kàtas'e-la kjoa'nchán kò kjoa ima takòn ya ijjìn inima-la ngats'ìi x̄ita xi k'oa's'ín nchisikitasòn koni tsò 'én jè; jñà-né xi x̄ita-la Nainá ts'e naxandá Israel.

¹⁷ K'oaá ma-ne i'ndeji, kì t̄i yá xi kjoa ótsji-isa-na nga jyeé t̄jít'aà ch̄iba-la yijo-na kjo'in xi kitsjaà-na x̄ita xi kjoa ts'e Na'èn-ná Jesús.

¹⁸Jñò ndí 'ndsè kọ ndí tichjaá, jè kàtasijììn inìma-nò kjondaà-là Jesucristo xi otíxoma-ná. K'oas'ín kàtama.

Xojon carta-la San Pablo xi kiski-la xita naxandá-la Cristo xi títsajna Éfeso

Kó tsò Pablo nga síhixat'aà jñà xita naxandá-la Cristo xi títsajna Éfeso

¹ Jñò xi xita-la Nainá 'mì-nò xi títsajnaà naxandá Éfeso, jñò, xi kixi onguít'aà-la Cristo Jesús, 'an xi 'mì-na Pablo tíshixat'aà-nò nga 'an tsibíxáya-na Jesucristo nga k'oas'ín kjòmejèn-la Nainá.

² Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya jjiin inima-nò.

Kós'ín síchikon-t'in-ná Nainá k'e nga Cristo títsajnaoáá

³ Jeya kàtijna Nainá, Na'èn-la Jesucristo xi otíxoma-ná nga kisichikon-t'in-ná, kitsjaà-ná ngats'ìi kjondaà xi ts'e inima-ná xi ngajmii nchrobá-ne koi kjoa-la nga Cristo títsajnaoáá.

⁴ Nainá xó k'oáá s'ín jaàjìin-ná k'e nga tikj'eè sindaà isò'nde nga Cristo títsajnaoáá mé-ne nga nímé jé s'e-ná kò tsjeè kitsajnaà nguixkon jè.

⁵ Koi-né nga matsjakeè-ná nga k'oas'ín kiskoòsòn-la nga tisa-ne nga kiskoétjò-ná koni jxti jchan-la maá xi it'aà ts'e Jesucristo. Nainá k'oáá s'ín kis'ìin koni s'ín kisaseèn-la ta koi kjoa-la nga k'oas'ín kjòmejèn-la.

⁶ Koií kjoa-la nga jeya bijna Nainá nga tse kjondaà kitsjaà-ná nga kisichikon-t'in-ná nga ya títsajnaoáá ki'ndí-la xi 'ñó matsjakeè.

⁷⁻⁸ Jè jní-la Jesucristo tsibíhjtji-ná koa kisijchàat'aà-ná jé-ná nga Cristo títsajnaoáá, nga 'ño tse kjondaà tjín-la Nainá nga tsjá-ná kjohítsjeèn kò kjoachjine xi tjín-la.

⁹ K'oáá ma-ne nga tikoá tsakó-ná jè kjoatjí'ma-la koni s'ín kjòmejèn-la jè, tikoí-ne kjohítsjeèn-la xi tijè-ne kiskoòsòn-la nga kitasòn.

¹⁰ Koni s'ín tjíndaà-la kjohítsjeèn jè, kijchò nachrjein nga kitasòn tsjeè. Nainá, jé sijnngò yije nita mé xi tjín ngajmii kò it'aà nangui nga jè Cristo kotíxoma.

¹¹ Nainá jyeé kjòtsee jaàjìin-najen nga Cristo títsajnao-jen. Kitjoé-najen kjotjò xi tsjá Nainá koni s'ín tjíndaà-la nga k'oas'ín bitasòn 'én-la koni s'ín ndaà sasén-la.

¹² K'oáá s'ín kis'ìin nga ngajen kiníkítsajna ítjòn-jen nga jeya tíjna Nainá, ngajen xi xita judío 'mì-najen, ngajeén kòkjeíin ítjòn-najen it'aà ts'e Cristo.

¹³ Tikoáá jñò nga ya títsajnao Cristo, k'e nga kina'yà 'én ndaà-la Nainá xi kjoa kixi, jè xi tsachrjekajìin-nò kjo'in nga kòkjeíin-nò it'aà ts'e Cristo, Nainá kitsjaà-nò Inima Tsjeè-la; yaá tsibít'aà chiba-la jjiin inima-nò, koni s'ín jye kitsjaà tso'ba nga tsjá-nò.

¹⁴ Jè Inima Tsjeè-la Nainá, jè-né xi tjoé ítjòn-ná nga kixi kjoa nga tjoé yije-ná kjotjò xi Nainá tsjá-ná jè nachrjein k'e nga kongásòn nga sükítsajnandeíi-ná xi naxandá-la maá mé-ne nga jeya kijn-ne Nainá.

Kós'ín bítsi'ba Pablo it'aà ts'e jñà xita xi jye mokjeíin-la

¹⁵ Koií kjoa-la k'e nga ki'nchrè nga mokjeíin-nò it'aà ts'e Jesucristo xi otíxoma-ná, kò nga matsjacha ngats'ìi xita-la Nainá;

¹⁶ mìkiì sìjchàajñaà nga nachrjein inchijòn tsjaà-la kjondaà Nainá xi it'aà tsajòn; k'e nga bítsi'ba-la, síjét'aà-la xi kjondaà tsajòn

¹⁷ mé-nè nga jè Na'èn-ná xi jeya tíjna, jè xi Nainá tsò-la Jesucristo xi otíxoma-ná, jè kàtasíkihichiya-nò kò kàtatsjá-nò kjoachjine xi ts'e inima-nò mé-ne nga isa ndaà jchaxkon-nò Nainá.

¹⁸ K'oaá s'ín síjèt'aà-la Nainá nga síhiseèn-la kjohítsjeèn-nò mé-nè nga jcha-nò mé xi chiñà-là nga xó kinokjoàa-nò. Tíkooá jcha nga 'ño ndaà tjín kò 'ño jeya tjín kjotjò xi Nainá tsjá-la jña xita naxandá-la.

¹⁹ Tíkooá síjèt'aà-la nga jchaxkon kó kji 'ño tse nga'ño tjín-la Nainá nga koma kosiko-ná jña xi mokjeín-ná it'aà ts'e. Tikoií-ne nga'ño xi 'ño tse tjín-la Nainá

²⁰ xi kisikjeén nga kisikjaáya-la Cristo k'e nga k'en, ikjoàn jeya kisikíjnat'aà chrja kixi-la ján ngajmii

²¹ ñánda nga isa ta 'ño 'nga kisikíjna ítjòn mì k'oaá-ne tsà jngoò xita ítjòn, xitaxá ítjòn, ngats'ii nga'ño xi tjín i it'aà nangui kò xi tjín ijin isén, ngats'ii xi tjín-la kjotixoma ngajmii; tjina ítjòn-la ngats'ii xi tjín isò'nde jè, kò jè isò'nde xi sa nchrobá.

²² Nainá, jè kisìngatsja yije Cristo, ngats'ii kjotixoma xi tjín; tíkooá jè kitsjaà yije-la Cristo nga jè koma xi sko-la naxandá-la.

²³ Naxandá-la tijè-ne yijo-la Cristo; kò jè tsjá yije-la nita mé xi chija-la. Tijè-ne Cristo xi síjngoò yije, nita mé xi tjín isò'nde.

2

Kós'ín síjchàat'aà-ná jé-ná Nainá

¹ Jñò, nga sa kjòtseé, k'oaá ngaya-la koni tsà titsajna k'en-nò it'aà ts'e Nainá nga jè kjoa-la jé-nò nga ch'o ki'nè.

² K'oaá s'ín tse tsitjaàyaà ndiyá jé-la xita isò'nde; jè kinìkitasòn-là xita neí xi sko-la tjo ijin isén nga jè síxájìn inima-la jña xita xi mìkii 'nchréñijon-la Nainá.

³ Tíkooá ngats'iaá jña, k'e nga isa kjòtseé, k'oaá tís'ín chinchaaatsjiaá jé koni s'ín kjòmejèn-la yijo-ná kò kjohítsjeèn-ná. Tjín-ne nga ngásòn tse kjo'in k'oi-ná tsà ndaà, koni jña xita xi kjeíi nga koi kjoa-la jé-ná.

⁴ Tanga Nainá, tsee kjohimatakòn tjín-la nga 'ño matsjakeè-ná.

⁵ Nainá kisikítsajnakon ijngoò k'a-ná kò Cristo, nas'ín jye titsajnak'eén xi kjoa ts'e jé-ná. (Kò jñò, tà kjondaà-la Nainá-né nga bitjokajñoò kjo'in.)

⁶ Nainá, kisikjaáyakjoè-ná kò Cristo, nga ya titsajnakooá, kò tañaá kisikítsajnakjoè-ná ján ngajmii.

⁷ K'oaá s'ín kis'iin mé-nè nga kòkò-ne jña nachrjein xi sa nchrobá nga tse kjoatjòcha tjín-la kò tse kjondaà tjín-la it'aà tsaján nga Cristo Jesús titsajnakooá.

⁸ Tà kjondaà-la Nainá-né nga itjokajñoò kjo'in nga kòkjeín-nò it'aà ts'e Cristo. Mìtsà kjondaà tsajòn nchrobá-ne kjoa koi; ta kitsjaà kjotjò-nò Nainá.

⁹ Mìtsà koi kjoa-la nga xá ki'nè, mé-nè nga nijngoò xita ndaà síkíjna-ne yijo-la.

¹⁰ Nainá tsibíndaàya xitse ijngoò k'a-ná, nga ya titsajnakooá Cristo, mé-nè nga s'eén ngats'ii kjoa xi ndaà tjín, jña kjoa xi Nainá jyeé k'oas'ín kiskoòsòn-la nga tisa kjòtseé nga kòs'ín síkitasoán.

Kjoa'nchán xi tjín-ná nga Cristo titsajnakooá

¹¹ Jñò xi mì ya tjen-nò tje-la xita judío, k'oaá tsò-nò jña xita judío xi jtít'aà chiba yijo-la nga mìtsà xita-la Nainá 'mì-nò, koií kjoa-la nga mì jtít'aà chiba-nò kjoa ts'e circuncisión. Tanga jè kjoa jè, tà tsja xitaá bindaàya-ne yijo-la.

¹² Tikítsjeèn k'e nga sa kjòtseé jñò titsat'aaxìn-la Cristo; tíkooá titsajnat'aaxìn-la naxandá Israel, mìkii ya nokjoà-nò koni s'ín tsibíndaàjìn-kò Nainá jña xita judío koni s'ín kitsjaà-la tso'ba Nainá. Isò'nde jè, nimé xi chiñà-là kò mìkii yaxkon Nainá.

¹³ Tanga i'ndeji, nga ya titsajnakoo Cristo, Nainá jyeé kisichrañat'aà-nò jè kjoa-la jní xi tsibíxteèn Cristo, nas'ín kjiin tjat'aaxìn-là Nainá nga sa kjòtseé.

¹⁴ I'ndeji, jè Cristo xi tsjá-ná kjoa'nchán. Kisikjoóndaà-ná nga jngoò naxandá komà-ne jña xita judío kò xi mìtsà xita judío. Jè kisihixaña jè kjoa kondra xi jòya tjín nga sa ítjòn k'e nga kitsjaà kjotjò yijo-la nga k'en-t'aà krò.

15 Yaá kisikjehet'aà jè kjotíxoma-la Moisés xi tjín-la jñà xítà judío; kjòjngò-ne ingajò naxandá; jngò naxandá xitse komà-ne nga jè titsajnakoaá Cristo; k'oaá komà-ne nga tsijne 'nchán kjoa.

16 Cristo, k'e nga k'en-t'aà krò, yaá kisikjehet'aà kjoa kondra xi jòya tjín. Kisikjoóndaà-ne ingajò naxandá; jngò naxandá komà-ne koa kitsjaà-la kjoa'nchán it'aà ts'e Nainá.

17 Jñò xi kjiin titsajna-la Nainá nga sa ítjòn, tikoá ngajen xi titsajnat'aà chraña-lajen, j'ìi Cristo nga j'ìi kénajmí-ná 'én ndaà xi tsjá-ná kjoa'nchán.

18 Ndaà chjí-la Cristo nga ingajò naxandá-ná jyeé tji'nde-ná nga koma chikoaá Nainá nga tijè-ne Inima Tsjeè-la tsjá-ná nga'ño nga ingajoá.

19 K'oaá ma-ne jñò xi mìtsà xítà judío 'mì-nò, mìtsà tì xítà xìn nangui-nò. Jñò, i'ndeì, ngàsòn ya tajngò nokjoà-nò naxandá-la Nainá; xítà xinguiò-nò ngats'ìi xítà naxandá-la Nainá.

20 K'oaá ngaya-la koni tsà jngò ni'ya tísindaà. Jñò, jè ngaya-la ndajo xi mochjeén-la chrjó ni'ya. Jñà xítà xi tsibíxáya-la Cristo kò jñà xi kùchja ngajo-la Nainá, jñà-né tàts'en chrjó-la ni'ya. Kò jè Cristo jè ndajo chrjangui-la chrjó ni'ya.

21 Nga kò Cristo ngats'ìi ndajo-la chrjó ni'ya, ndaà tísikjoè kò tímajeya ni'ya mé-nè nga ni'ya tsjeè-la Nainá koma-ne.

22 Tikoá jñò, nga Cristo titsajnakjoèkoo, Nainá tísíkítsajnakjoè-nò kò xítà xinguiò xi kj'eìi, mé-ne nga jñò koma-nò ni'ya ñánda tíjna Nainá nga Inima Tsjeè.

3

Xá-la Pablo it'aà ts'e xítà xi mìtsà xítà judío

1 K'oaá ma-ne bìtsi'bà-la Nainá, 'an xi 'mì-na Pablo nga ndayá tijnáa, koií ngatjí-la nga 'an benojmí-nò 'én ndaà-la Jesucristo, jñò xi mìtsà xítà judío 'mì-nò.

2 Nga jyeé-la tíjii-nò nga kjondaà ts'e Nainá-né nga 'an kitsjaà-na xá xi kjondaà tsajòn,

3 koni s'ín kishiseèn-na Nainá nga tsakó-na jè kjoa xi tji'ma-la skanda kjòtseé. Jyeé isa kiskii chiba-nò jñà 'én koi.

4 K'e nga tsà ndaà kíxkejñoò xojòn jè koni s'ín kiskii ítjòn-nò, yaá jchaa nga 'an ndaà tíjii-nà jè kjoa tji'ma it'aà ts'e Cristo.

5 Nga isa kjòtseé, nijngòò xítà tíjii-la jè kjoa tji'ma; tanga i'ndeì jè Inima Tsjeè-la Nainá kishiseèn-la jñà xítà xi xó jaàjii-ne Nainá, jñà xítà xi tsibíxáya-la Cristo kò xi kùchja ngajo-la.

6 Jè kjoa tji'ma, jè-né nga jñà xi mìtsà xítà judío, k'e nga mokjeiín-la 'én ndaà-la Nainá xi kjoa ts'e Cristo, ngàsòn tjoé-la kjotjò-la Nainá nga ngàsòn ixti-la ma koni jñà xítà judío; jngò naxandá koma yije kóhotjín; kò jñà xi mìtsà xítà judío ngàsòn tjoé-la kjondaà koni s'ín kitsjaà-la tso'ba Nainá jñà xítà judío.

7 Ta kjondaà-la Nainá-né nga 'an kitjoé-na xá jè. Jè kitsjaà kjotjò-na nga ch'i'nda-la ma k'e nga kitsjaà-na nga'ño-la mé-ne nga 'an kénajmíá 'én ndaà-la Cristo.

8 An, nas'ín isa 'ño nangui tijná-la ngats'ìi xítà-la Nainá, tanga Nainá kitsjaà-na kjondaà jè, nga 'an chjáyajii-la 'én ndaà-la Nainá xi kjoa ts'e Cristo jñà xi mìtsà xítà judío, mé-né nga skoe-ne kó kji 'ño tse kjondaà tsjá Cristo skanda mikii bijchótjinguì-la kjohítsjeèn-ná.

9 Jè xá xi 'an kjòngatsja nga 'an sishiseèn-la jñà xítà mé-ne nga skoe-ne kó s'ín tjín kjoa xi tji'ma. Nainá xi tsibindaà isò'nde, jè tíjna'ma-la kjoa jè skanda tisa tàts'en-la kjoa.

10 Koií k'oas'ín komà-ne mé-ne skoe-ne i'ndeì ngats'ìi inima ch'o kò inima xi ndaà xi tjín-la nga'ño jjiin isén nga kjin skoya kjoachjine tjín-la Nainá. Yaá skoe kjoa koi it'aà ts'e naxandá-la Cristo.

11 Nga tisa tàts'en-la kjoa, Nainá k'oaá s'ín tíjindaà-la nga it'aà ts'e Cristo kítasòn yije kjoa koi.

12 I'ndeì, nga Cristo titsajnakoaá, jyeé 'ño takoán. Komaá chikoaá Nainá ñánda tíjna nga mì tì kii xkón-oná nga jyeé mokjeiín-ná it'aà ts'e Cristo.

¹³ K'oaá s'ín siijé-nò nga kì nìkjajen-là takòn jè kjo'in xi tìsikjiaán nga 'an benojmí-nò 'én ndaà-là Nainá xi kjoa ts'e Cristo. Isaá ndaà kàtatsja-là inìma-nò nga kjondaà tsajòn-nò.

Kó tsò Pablo nga bìtsi'batji naxandá-là Cristo xi títsajna Éfeso

¹⁴ Koií kjoa-là nga ósijna xkó'nchit'aà-là nga bìtsi'bà-là Nainá xi Na'èn-ná.

¹⁵ Nga it'aà ts'eé Nainá nchrobá-ne nga tjín na'èn kò tjín ixti nga jngoò ìjngoò ni'ya xita xi tjín ngajmii kò xi tjín isò'nde.

¹⁶ Nainá, nga tse nga'ño tjín-là, k'oaá s'ín bìtsi'bà-là nga kàtatsjá-nò nga'ño-là xi ts'e inìma-nò nga jè Inìma Tsjeè-là Nainá kàtasíxájiìn inìma-nò.

¹⁷ Jè Cristo, ndaà kàtijnajiìn inìma-nò, nga mokjeiìn-nò it'aà ts'e; 'ño ndaà kàtas'e-nò kjoatjòcha-là Nainá koni jngoò yá xi nanga fi ima-là, kò koni jngoò ni'ya xi nanga tjihijiìn chrjó-là.

¹⁸ K'oaá s'ín koma-ne nga jño kò ngats'iì xita-là Nainá, jchaxkoòn koa kochiya-nò nga 'ño tse kjoatjòcha xi tjín-là Cristo, 'ño tiyà, 'ño ndojò, 'ño nanga kò 'ño nga.

¹⁹ Ngui ndaà jchaa jè kjoatjòcha xi tjín-là Cristo xi isa 'ño otonè-là ngats'iì kjohítsjeèn-ná skanda mìkii machiya-ná, mé-ne nga nímé chijat'aà-nò koni jè Nainá, nímé chijat'aà-là.

²⁰ Nainá, 'ño tse nga'ño tjín-là, tsà k'e nga mé xi nìjé-laá, skanda isaá 'ño síkatonè-là koni s'ín nìjé-laá kò nga koni s'ín nìkítsjeèn. K'oaá s'ín tsjá yije-ná nga kò nga'ño-là xi síxájiìn inìma-ná.

²¹ Jeya kàtijn Nainá ya jjiìn naxandá-là kò it'aà ts'e Cristo nita mé nachrjein-ne, nita mé nó-ne. K'oaá s'ín kàtama.

4

Títsajtiòn nga kò Inìma Tsjeè-là Nainá

¹ Koií kjoa-là nga k'oaá s'ín bìtsi'bà-nò nga ndaà tijchá yijo-nò koni s'ín ok'in-là kjoa xi xó kinokjoà-nò. 'An, ndayá tijnaa'ya jè ngatji-là nga Nainá tìsìxá-là.

² Jño, kì 'nga ikon 'nè; indaàkjoa t'een, kàtas'e-nò kjoatsejta; ngàsòn kàtachíkjoa-nò mé kjoa xi tjín-nò nga matsjacha xinguiòo.

³ Tìnè-là yijo-nò nga títsajnajtiòn-koo xinguiòo koni s'ín jye tsibítsajnajtín-nò jè Inìma Tsjeè-là Nainá, mé-ne nga 'nchán kitsajna-nò.

⁴ Nga tà jngoò ma naxandá-là Nainá; kò tà jngoò ma Inìma Tsjeè-là Nainá; tìkoa tà jngoò kjoa chiñá-lá nga Nainá xó kiichja-ná;

⁵ kò tà jngoò ma Na'èn-ná Jesucristo xi otíxoma-ná; tà jngoò kjoa tjín koni s'ín mokjeiìn-ná it'aà ts'e Cristo; tìkoaá tà jngoò kjoa tjín nga ma bautizar xita.

⁶ Ta jngoò ma Nainá nga ngats'iaá Na'èn-ná ma, jè xi otíxoma-ná nga ngats'iaá, jè xi síxájiìn inìma-ná nga ngats'iaá, kò jè xi tíjnako-ná nga ngats'iaá.

⁷ Tanga kitjoé-ná kjotjò koni s'ín sasén-là Cristo mé xá-là Nainá xi s'eén nga jngoò jngoáá.

⁸ Koií kos'ín tíchja-ne Xojon-là Nainá nga tsò:

K'e nga jye kisìkijne nga tífimijìn-ne ngajmii,

kiiko preso jña xita xi kitsobà'ño,

kò kitsjaà-là kjotjò jña xita.

⁹ ¿Kó tsòya-ne jè xi tsò: “Tífimijìn-ne ngajmii”? Tsòyaá-ne nga [jè Cristo] ítjòn itjojen skanda ñánda 'ño nanga jjiìn nangui.

¹⁰ Jè xi itjojen-t'aà skanda it'aà nangui, tijè-ne xi tsijin ìjngoò k'a-ne ñánda nga isa 'ño 'nga tsibijna koni ngats'iì xi 'nga títsajna mé-ne nga jè sùjngoò yije-ne nita mé xi tjín isò'nde.

¹¹ Tìkoa tijè-ne xi kitsjaà-là xá xita-là mé xá xi s'iin nga jngoò ìjngoò. Tjín xi tsibíxáya-là Jesucristo nga siika'bísòn 'én ndaà-là; tjín xi jña kichja ngajo-là; tjín xi 'én ndaà-là Nainá xi kjoa ts'e Cristo benojmíya; tjín xi síkinda naxandá-là Nainá; tìkoa tjín xi okóya 'én-là Nainá.

12 K'oaá s'ín kitsjaà-la xá xita-la nga jngoò ìjngoò mé-nè nga kàtatsjá-la kjohítsjeèn xita naxandá-la nga koma sùixá-la Nainá, nga isa tse nga ñó s'e-la naxandá-la Cristo.

13 K'oaá s'ín koma-ne nga jngoò kjohítsjeèn s'e-ná ngats'iaá koni s'ín mokjeín-ná it'aà ts'e Nainá kō koni s'ín yaxkoaán Ki'ndí-la mé-ne nga nguì xita kixi komaá. Nguì k'oaá s'ín kongásòn-kjoaá kóhotjián koni jè Cristo nga nimé chijat'aà-la.

14 Mì tì k'oas'ín s'en-ná koni s'ín ndí ixti nga nìton mokjeín-la yá xita xi konachan-la; nga fijen fikjáko koni tsà tjo tísískako; nga fitjngui-la kjohítsjeèn-la xita maña xi 'én ndiso okóya nga kj'eí ndiyá tjmaya.

15 Tà saá 'én kixi-la Nainá kinókjoaá nga matsjachaá xinguiáá mé-nè nga kos'ín isa ndaà skasòn kjohítsjeèn-ná koni s'ín tjín kjohítsjeèn-la Cristo nga jè tjina xi sko-la naxandá-la Nainá.

16 Nga jè naxandá-la Nainá, k'oaá kji koni jngoò yijo-la xita. Jè Cristo tjina xi sko-la; kō jè tsjá-la nga jngoò ìjngoò xá xi oko-la; ikjoàn síjngoò koni s'ín tjín yijo-ná nga títéya naxá-la nindaà-ná; nga jngoò ìjngoò skaya, katjín katjín xá-la. K'e nga ndaà síxá yije yijo-ná maje-né koa ma'nga-né. K'oaá tis'ín tjín jè naxandá-la Cristo nga koje-né koa kō'nga-né k'e nga jngoò ìjngoò xita-la ndaà sùixá nga matsjakeè xikjín.

Kós'ín sijchá yijo-ná k'e nga jè Nainá síxitseya inima-ná kō kjohítsjeèn-ná

17 It'aà ts'e kjotixoma xi tsjá-na Cristo, k'oaá xan-nò kō bit'in-nò nga mì tì k'oas'ín s'en-nò koni s'ín xita xi kj'eí xi mìkì beèxkon Nainá, nga tákó tjmako kjohítsjeèn-la xi nímée chjí-la.

18 Tà tjíñò kjohítsjeèn-la. Tsjìn-la kjoabinachon xi it'aà ts'e Nainá nchrobá-ne; mìkì beè kó s'ín sijchá yijo-la nga jè inima-la tájaajìn tjín; mìkì tsjá'nde nga fahas'en-jìin kjohítsjeèn xi ndaà tsò.

19 Mì tì kù beè-ne xi kjosobà 'mì, jyeé kòxox'ín. Tà kjoa chijngui 'ñó sí's'in-la; kjit'aà nachrjein ótsji ngats'ì kjoa ch'o xi tjín isò'nde.

20 Tanga jñò, mì k'oaá tjín kjoa xi kis'enojmí-nò it'aà ts'e Cristo.

21 Nga jye ndaà kina'yà-là 'én-la kō ndaà kichità'yà kó s'ín tjín xi nguì kjoa kixi it'aà ts'e Jesús.

22 K'oaá s'ín kis'enojmí-nò nga chjaàxiòn kjoa jchínga xi tjín-nò nga sa kjòtseé koni s'ín kinìjchá yijo-nò; i'ndeì jyeé mì tì mé chjí-la kjoa koi koi kjoa-la nga jñà kjoa ch'o xi kisaseèn-la yijo-nò kiskoònachan-nò.

23 Tjí'nde-là Nainá nga jè kàtasíxitseya inima-nò kō kjohítsjeèn-nò.

24 Chjoé ìjngoò k'a xi kjoa xitse xi k'oas'ín kisindaà koni kji isén-la Nainá mé-ne nga kixi kō tsjeè sijchá yijo-nò koni s'ín tjín xi nguì kjoakixi.

25 K'oaá ma-ne i'ndeì, kì tì 'én ndiso nokjoà-nò. 'Én kixi tinókjoakoo xinguiòo nga jngoò ìjngoò nga tà ngásòn xita xinguiáá ma kóhotjián.

26 Tsà k'e nga majti-nò, kì jé binchaàtsjioò; kì nìjti-là yijo-nò kóni nga 'ba nachrjein skanda k'e nga okatjì ts'oi.

27 Kì kù bì'nde-là xita neí nga jè konachan-nò.

28 Jè xi chijé s'ín nga sa ítjòn, kì tì chijé s'ín-ne i'ndeì; tikoaá-ne k'oas'ín kàtasíkjeén tsja nga kixi kàtasíxá mé-nè nga sakò-la ton xi tsjá itsé-la xita ima xi nimé tjín-la.

29 Nijngoò 'én xi ch'o tsò nokjoà; jñà 'én tinókjoakoo xinguiòo xi ndaà tsò xi kochjeén-la xinguiòo nga isa kixi kítsajna mé-nè nga kochikon-t'in-ne jñà xita xi kji'nchré-nò.

30 Kì nìba-là jè Inima Tsjeè-la Nainá, jè xi tsibít'aà chiba-ná mé-ne nga kàta'ya-ná nga xita-la Nainá 'mì-ná skanda jè nachrjein k'e nga sikkítsajnandeí-ná Nainá xi kjoa ts'e jé.

31 Chjaàxiòn yije ijìin inima-nò jñà kjoa xi ch'o tjín xi kondra ts'e xita xi kj'eí koni kjoa bínguitakòn, kjoajti, kjoa xi makjan-nò, kjoa nga chítikoo xinguiòo, kō nga nokjoajno-là xinguiòo, kō ngats'ì kjoats'en.

³² Ndaà chibàkoo xinguiṓo; kàtas'e-nò kjohimatakòn; tijchàat'aà-là jé-la xinguiṓo koni s'ín kisikò-nò Nainá it'aà ts'e Cristo nga kisijchàat'aà-nò jé-nò.

5

Kó s'ín sijchá yijo-ná nga ixti-la Nainá 'mì-ná

¹ K'oaá ma-ne nga k'oas'ín tijchá yijo-nò koni s'ín Nainá nga koi kjoa-la nga ixti-la Nainá 'mì-ná nga 'ñó matsjakeè-ná.

² K'oaá tís'ín tjòcha chaà xinguiṓo koni Cristo tjòkeè kijtseè-ná nga jè kitsjaà ngajo-ná yijo-la nga k'en, jngoò kjòtjò xi ndaà kjòtsjakeè Nainá.

³ Jè xi kjoa chijngui, ngats'ii kjoa ch'o xi 'ñó tjé tjín kò kjoa nga maxitakòn-chaà xinguiṓo mì tì k'oaá tjín kjoa xi koxki-ne it'aà tsajòn. Nga jñò, xita tsjeè-la Nainá 'mì-nò.

⁴ Kì 'én tsa'a nokjoà, kò 'én nchikón, kò 'én xi ch'o tsò nga bijnòkeè xita. Jñà kjoa koi, tikoaá mìkii ok'in-la nga kòs'ín kinókjoaa. Tà saà kjondaà tjii-la Nainá.

⁵ Jye tjiin-nò nga mìkii koma kjoahas'en ñánda tíhotixoma Cristo kò Nainá, ngats'ii xita xi kjoa chijngui s'ín, xi kjoa xi 'ñó tjé s'ín kò nga maxitakòn-keè xíkjín. Jñà xita xi k'oas'ín s'ín, ta jñà kjoa koi beèxkón nga nei-la ma.

⁶ Kì yá xita xi konachan-nò xi taxki 'én bénojmi-nò xi nímé chjí-la it'aà ts'e jé koi. Ta jè ngatji-la nga kjo'in tsjá-la Nainá jñà xita xi mìkii 'nchréñijon-la.

⁷ Kì yá tsjahitakoo xita koi.

⁸ Jñò, nga sa kjòtseé, jè kjohítsjeèn-nò tjíjñò-la, tanga i'ndeji, jyeé iseèn titsajnaà nga Na'èn-ná Jesucristo titsajnakoo. K'oaá s'ín tijchá yijo-nò koni s'ín ok'in-la jñà xita xi ya titsajna ñánda iseèn choòn.

⁹ K'e nga kjoa iseèn tjiin inima-ná ndaà s'eén, ya kitjáyaá ndiyá kixi, koa nguì 'én kixi kinókjoaa.

¹⁰ Tinchátsjioò mé kjondaà xi sasén-la Na'èn-ná.

¹¹ Kì yá chingajñò kjoa xi nímé chjí-la koni s'ín xita xi tjíjñò kjohítsjeèn-la. Jñò, ta saà takó nga kàta'ya-la nga mìkii ndaà tjín kjoa xi s'ín.

¹² Skanda masobà-ná nga nokjoá jñà kjoa'ma xi ch'o tjín xi s'ín jñà xita.

¹³ Nita mé kjoa-ne xi sijna ñánda iseèn choòn, nitóon beè xita mé kjoa-ne, a ndaà tjín, a xi mìkii ndaà tjín. Nga jè kjoa iseèn okó yije xi ndaà tjín kò xi mìkii ndaà tjín.

¹⁴ Koií kotsò-ne 'én xi tsò:

Ngaji xi titsajnafi, tikjaá-la yijo-lè.

Tisítjen-jiin-la mik'en;

jè Cristo sijniseèn-lè.

¹⁵ Ndaà tikindaa koni s'ín titsanjchá yijo-nò; k'oaá s'ín titsajna koni xita xi tjín-la kjoachjine; kì k'oaá 'nè koni s'ín xi tsjín-la kjohítsjeèn.

¹⁶ Ndaà tikjeén nachrjein mé xi s'een; nga nachrjein i'ndeji, 'ñó tjín kjoa ch'o.

¹⁷ Kì ch'o onguíkoo kjohítsjeèn-nò; ndaà kàtachiya-nò mé xi mejèn-la Nainá.

¹⁸ Kì xán 'yò, jè xán síkits'ón-ná, tà saá jè Inima Tsjeè-la Nainá ndaà kàtas'en-jiin inima-nò nga kàtakó-nò ndiyá kixi.

¹⁹ Chikoo xinguiṓo 'én-la Nainá. Tijndá-là sò xi 'mì salmo, himno koa tijndá jiin inima-nò jè xi okóya-nò Inima Tsjeè-la Nainá. Jeya tikijna Nainá nga kò inima-nò.

²⁰ It'aà ts'e 'ín-la Na'èn-ná Jesucristo, nachrjein nchijòn tjii-la kjondaà Nainá xi Na'èn-ná ngats'ii xi tsjá-nò.

Kjoa xi tjínè-la nga sijkitasòn jñà xita x'in kò jñà íchjín

²¹ Nangui titsajna-là xinguiṓo koni s'ín yaxkón Cristo.

²² Jñò, íchjín xi x'in tjín-nò, nangui titsajna-là x'in-nò koni s'ín nangui bitsajna-là Cristo.

²³ Nga jè x'in, jè xi skò tjina-la chjoón, koni Cristo, jè xi skò-la naxandá-la. Kò jè Cristo xi ochrjekàjiin kjo'in naxandá-la nga tijè-ne yijo-la.

²⁴ Koni jè naxandá-la Cristo nangui tíjna-la, k'oaá tís'ín jñà íchjín, nangui kàtìjna-la x'in-la nìta mé kjoa-ne.

²⁵ Jñò xi x'in mì-nò, tìtsjacha íchjín-nò, koni jè Cristo matsjakeè naxandá-la nga jè kitsjaàtjì yijo-la nga k'en.

²⁶ Koií kòs'ín kis'iin-ne nga tsjeè s̀ikíjna naxandá-la nga nguixkò Nainá. Jè jaàxìn jé-la nga kò 'én ndaà-la koni s'ín xita nga oníno yijo-la,

²⁷ mé-nè nga tìjè kòkò-ne nga tsjeè kji kò tìjè skoétjò-ne nga ts'e koma, jngoò naxandá xi jeya tíjna, xi mì ch'oo kji, mì tìyó kji, mì tje kji, jngoò k'a tsjeè kji, kò nímé jé tjin-la.

²⁸ Tìkooá jè x'in kàtamatsjakeè chjoón-la koni s'ín matsjakeè xi ti yijo ts'e-ne; nga jè xi matsjakeè chjoón-la, tìjè-ne yijo-la tímatsjakeè.

²⁹ Nijngoò xita xi tìjè beètoòn-ne yijo-la; ta saá tsjá-la nga'ño nga síkinda yijo-la koni s'ín jè Cristo nga síkinda naxandá-la.

³⁰ Nga jè naxandá-la tìjè-ne yijo-la; kò jñá, tìkooá yaá nokjoàt'aà-ná yijo-la.

³¹ Koií kjoa-la nga k'oas'ín tíchja Xojon-la Nainá nga tsò: “Jè x'in xi bixan s̀ikíjna na'èn-la kò nea-la nga kíjakò chjoón-la. Ingajò, tà jngoò xita koma.”

³² Jñà 'én koi, jngoò kjoa xi 'ño 'in tjin skanda mìkì fiya-ná. Tanga 'an, jè tìsìkaxkia Cristo kò naxandá-la.

³³ K'oaá xan-nò ngats'ioò nga jngoò ijngoò, tìtsjacha íchjín-nò koni s'ín matsjacha yijo-nò; kò jè chjoón kàteèxkón x'in-la.

6

Kjoa xi tjinè-la nga s̀ikitasòn jñà ixti kò xita jchínga

¹ Jñò xi ixti 'mì-nò, tìná'yañijon-là xita jchínga-nò nga Cristo titsajnakoo. Koií kjoa xi kixi tjin.

²⁻³ Nga tsò jè Xojon-la Nainá: “Jchaxkoín na'èn-lè kò nea-lè, mé-nè nga ndaà kijnane koo tseé koma-lè i isò'nde.” Ngats'iì kjotixoma xi kitsjaà Nainá, jè jèe xi tsjá ítjòn jngoò-la kjondaà jñà xita xi s̀ikitasòn.

⁴ Jñò xi na'èn 'mì-nò, kì ixti-nò nìjti-là; k'oaá s'ín tìjchá nga ndaà tìkixioo koo ndaà takóya-là koni s'ín mejèn-la Na'èn-ná.

Kjoa xi tjinè-la nga s̀ikitasòn xi chì'nda 'mì

⁵ Jñò xi chì'nda maà, ndaà tìkitasòn-là xi nei-nò ma i it'aà nangui; ndaà jchaxkón nga tìjngoò takòn koni tsà xá ts'e Cristo titsa'nè.

⁶ Ndaà tìxá-là nei-nò; mì tà k'e ndaà nìxá k'e nga tímakinda nga tà jè nei-nò ndaà kìtsajnakoo; k'oaá s'ín t'een koni tsà chì'nda-la Cristo maà nga nguì koo inima-nò tìxá koni s'ín mejèn-la Nainá.

⁷ K'oaá s'ín tìxá nga nguì kò kjotsja-nò koni tsà xá-la Na'èn-ná titsa'nè kò mìtsà ts'e xi taxki xita.

⁸ Ndaà 'yaà nga jngoò ijngoò xita, Nainá, k'oaá s'ín tsjá-la chí-la koni tjin xá xi s'ín, nas'ín xita chì'nda kò xi mìtsà xita chì'nda.

⁹ Jñò xi nei-la xá 'mì-nò, k'oaá tís'ín tjò t'een chì'nda-nò. Kì taxki chítikoo chì'nda-nò nga mejèn-nò kjo'in bìnè-là. Ndaà tìjìn-nò nga jè Nei-la xita chì'nda-nò kò jè Nei-nò, tìjé-ne xi tíjna ján ngajmì. Nga jè, mìkì faájìn xita; tà ngàsòn fikò.

Kjoa xi tsjá-la nga'ño inima-ná

¹⁰ Jñò 'ndseeé, jñà kjoa koi xi fehet'aà-ne; k'oaá xán-nò: Tìnchátsjioò nga'ño ts'e inima-nò it'aà ts'e Na'èn-ná Jesucristo; 'ño tìtsajnakoo ngats'iì nga'ño xi 'ño tse tjin-la Cristo.

¹¹ Tìsìkoo yijo-nò, chjoé yije nga'ño xi tsjá-nò Nainá mé-nè nga tájaà titsajna-nò nga mì jè xita nejí skónachan-nò. K'oaá ngaya-la koni jñà soldado nga 'ya yije kicha-la k'e nga fi kjojchán.

¹² Nga mìtsà jñà xità isò'nde titsabixkán-koaá. Jñà kondra-ná xi xitaxá ítjòn tjín-la ijìin iseèn, jñà xi mìkiì tsejèn, ngats'ii xi tjín-la kjoíxoma ts'e xità neíí, koa xi sko-la títsajna nga jñà otíxoma isò'nde jñò, ngats'ii nga'ñó-la xità neíí xi tjíma ijìin isén nga tíjtsa isò'nde.

¹³ Koií koxan-nò, chjoé yije nga'ñó xi tsjá-nò Nainá mé-nè nga 'ñó kítsajna-nò jè nachrjein k'e nga mejèn-la skónachan-nò xità neíí. K'e nga jye sikijneè, tákó k'oaá s'ín kixi kìncha-la nità mé kjoa-ne.

¹⁴ K'oaá s'ín 'ñó kixi títsajnandaà; nguì 'én kixi tinókjoaa mé-ne nga kítsajnandaà kjoa ts'e xità neíí koni s'ín jñà soldado nga 'ñó bíkjá xincho-la [mé-ne nga mì sùjti-la níkje-la k'e fi kjojchán]. Kò nguì kixi títsajnaá nga nguixkon Nainá mé-ne nga ndaà kójtsa iníma-nò koni jngoò soldado xi ndaà kítsa iníma-la jè chrjoa xi 'mì coraza.

¹⁵ Kjit'aà nachrjein títsajnandaà nga sika'bió 'én ndaà-la Nainá mé-ne nga kàtas'e-la kjoa'nchán jñà xità. K'e nga kos'ín s'een, 'ñó kítsajnaà koni jngoò soldado nga tjín-la nga'ñó xoxté-la nga ma fi.

¹⁶ K'e nga ndaà mokjeiin-nò it'aà ts'e Nainá, jè kosíko-nò xi kjoa ts'e xità neíí k'e nga jè bí't'in-nò nga binchaàtsjioè jé; k'oaá ngaya-la koni s'ín jngoò soldado nga kjoé escudo-la, jè xi síkíts'o ni'ín flecha xi títi-la xità neíí.

¹⁷ Jè kjoa nga bitjokajñò kjo'in, jè ngaya-la jè tsí'nguién kichá xi osíko sko soldado. Koa jñà 'én ndaà-la Nainá jè ngaya-la kichá ndojò xi tsjá Iníma Tsjeè-la Nainá.

¹⁸ Kì bíkjoàn-la nga bìtsi'bà-la Nainá; tíjèt'aà kjit'aà-la koni s'ín bénojmiya-nò Iníma Tsjeè-la Nainá. Kjit'aà nachrjein títsajnandaà; kì nìhindaà-jèn nga bìtsi'batjiò ngats'ii xità naxandá-la Nainá.

¹⁹ Tíkoá titsi'batji-ná it'aà ts'an mé-nè nga Nainá tsjá-na 'én xi kichjà, koa mé-ne nga mìkiì tsakjoòn-na k'e nga kènojmi-la xità jè 'én ndaà-la Nainá xi kjoa ts'e Cristo xi ochrjekajìin-ná kjo'in mé-ne nga koma skoe-ne jè kjoa'ma xi tjína-la Nainá skanda kjòtseé.

²⁰ Nainá kisikasén-na nga 'an kichjà ngajo-la it'aà ts'e 'én ndaà-la; koií kjoa-la nga ndayá tjínaa'ya; sùjèt'aà-nò nga titsi'batji-ná mé-ne nga mì tsakjoòn-na nga kènojmiá 'én ndaà-la.

'Én xi fehet'aà-ne

²¹ Tisikasén-nò jè 'ndsé Tíquico jè xi matsjachaá, tíkoá ndaà síxá-la Nainá. Jè okítsò yije-nò xi it'aà ts'an, kó s'ín tjínaa, kò mé xi tís'iaàn.

²² Koií xá tísikasén-nò nga kènojmi-nò xi it'aà tsajen kós'ín títsajna-jen kò mé-ne nga kàtatsjá-nò nga'ñó ts'e iníma-nò.

²³ Jè Nainá xi Na'èn-ná kò jè Jesucristo xi otíxoma-ná kàtasíkijna 'nchán ijìin iníma-nò ngats'ioè xi xinguiá chibá; kàtatsjá-nò kjondaà nga tjòcha t'een xinguiò, nga mokjeiin-nò it'aà ts'e Nainá.

²⁴ Jè kjondaà-la Jesucristo xi otíxoma-ná kàtijnako ngats'ii xità xi mìkiì síkjahatjiya-la kjohítsjeèn-la nga kjit'aà nachrjein ndaà matsjakeè Na'èn-ná Jesucristo. K'oa's'ín kàtama.

Xojoṇ carta-la San Pabło xi kiskiṇ-la xita naxandá-la Cristo xi títsajna Filipos

Kó tsò Pabło nga sḥixat'aà jñà xita naxandá-la Cristo xi títsajna Filipos

¹ Ngats'ioò xi títsajnaà ján naxandá Filipos xi xita-la Nainá maà nga Cristo Jesús títsajnakoo, tikoṇ jñò xi ñikitasòn xá nga ñikindaṇ naxandá-la Nainá ko jñò xi ñichját'aà, 'an xi 'mì-na Pabło ko Timoteo títsañihixot'aà-nòjen nga chí'nda-la Jesucristo 'mì-najen.

² Nainá xi Nà'èn-ná, ko jè Jesucristo xi otíxoma-ná kàtatsjá-nò kjoṇdaà ko kjoṇ'nchán ya ijìin inima-nò.

Kó tsò Pabło nga chjat'aà-la Nainá it'aà ts'e xita Filipos

³ Jè Nainá xi 'an bexkoán, tsjaà-la kjoṇdaà nga indiaà indiaà bítsjeèn-na it'aà tsajòn.

⁴ K'e nga indiaà indiaà chját'aà-la Nainá, 'ñó ndaà matsja-na nga ngats'ioò chjátjì-nò,

⁵ koií kjoṇ-la nga jñò títsañichját'aà-ná nga ma chjaya 'én ndaà-la Nainá xi kjoṇ ts'e Cristo tjen-ne jè nachrjein k'e nga kòkjeiín-nò skanda nachrjein i'ndeji.

⁶ 'An, k'oaá s'ín makixi-na nga jè Nainá, koni s'ín tsibíts'iaṇ-nò nga tísíkatjìya-la inima-nò ko kjohítsjeèn-nò, skanda k'eé sijnṅoò-ne kjoṇ koi jè nachrjein k'e nga kjoṇ ijìinṅoò k'a Nà'èn-ná Jesucristo.

⁷ Ndaà tjín nga k'oas'ín síkítsjeèn-nò ngats'ioò jñò xi 'ñó matsjake-nò nga ngàsòn kitjoé-nò kjoṇdaà-la Nainá koni 'an; nga jñò títsañichját'aà-ná nga ma benojmí-la jñà xita jè 'én ndaà-la Nainá xi kjoṇ ts'e Cristo nas'ín ndayá tjinaṇ iya, ko nas'ín xìn tjinaṇ nga ósíkoṇa jè 'én ko okoò-la xita nga 'én kixi-né.

⁸ Tíbeè Nainá nga kixií kjoṇ nga ngats'ioò, 'ñó matsjake-nò koni s'ín tjín jè kjoṇtjòcha xi 'ñó tse tjín-la Jesucristo.

⁹ K'e nga bitsi'batjì-nò, k'oaá s'ín síjét'aà-la Nainá nga jè kjoṇtjòcha xi tjín-nò, isa ndaà títsjacha xinguiṇo, isa ndaà kjohítsjeèn kàtas'e-nò ko isa ndaà kàtamachiya-nò ngats'ìi kjoṇ xi kixi tjín,

¹⁰ mé-ne koma chjaàjìin-nò kjoṇ xi nguì ndaà tjín. K'oaá s'ín koma-ne nga tsjeè sijchá yijo-nò ko ñimé jè sakòt'aà-nò jè nachrjein k'e nga kjoṇ ijìinṅoò k'a Cristo.

¹¹ Nga kàta'ya-la nga jñò, nguì kixií tjín kjoṇ xi 'nè nga ko nga'ñó xi tjín-la Jesucristo mé-ne jè Nainá jeya kíjna-ne ko 'nga kíjna.

Kó komà nga isa kjìn xita kòkjeiín-la 'én ndaà-la Nainá xi kjoṇ ts'e Cristo

¹² Ndí 'ndsè, mejèn-na nga ndaà kàtasijìin-nò nga k'oaá s'ín tímochjeén ngats'ìi kjoṇ xi tímat'ian nga isa kjìn xita mokjeiín-la 'én ndaà-la Nainá xi kjoṇ ts'e Cristo.

¹³ Nga ngats'ìi soldado xi síkinda ni'ya osen ko ngats'ìi xita xi i'nga, tjìjìin-la nga koií kjoṇ-la 'én-la Cristo nga ndayá tjinaṇ.

¹⁴ Jñà xita xinguiá xi 'ndsé chibá, nga nchibeè nga ndayá tjinaṇ'ya, kjìn ma-ne xi ma'ñó ikon, mì tì kiì tsakjón-ne it'aà ts'e 'én ndaà-la Nainá xi kjoṇ ts'e Cristo nga chjayajìin-la xita.

¹⁵ Kixií kjoṇ, tjín i'nga xita xi 'én-la Cristo chjaya ta koií kjoṇ-la nga machinikeè-na nga jè xi mejèn-la nga isa kjìn xita kjit'aà-la. Tanga tikoṇaá tjín i'nga xi ndaà tjín inima-la nga benojmí kixi jè 'én-la Cristo.

¹⁶ Jñà xita xi ndaà tjín inima-la, k'oaá s'ín benojmí nga matsjakeè-na, nga jyeé ndaà tjìin-la nga Nainá íi kisikíjna-na ndayá mé-ne nga 'an kichjátjì 'én ndaà-la Nainá xi kjoṇ ts'e Cristo.

17 Tanga jñà xita xi i'nga, nga chjaya it'aà ts'e Cristo, mìtsà kò inima-la bénojmi. Ta jè xi mejèn-la nga kjìn xita kjit'aà-la. K'oaá s'ín mejèn-la nga isa tse kjo'in sikjiaán nga jye ndayá tijnáa'ya.

18 Mìtsà mé-ne, tsà ndaá tjin inima-la nga okóya 'én ndaà-la Nainá, kò tsà majìn; mì 'aán oko-na. Ta jè xi mejèn-na nga kàtachjaya 'én ndaà-la Nainá xi kjoa ts'e Cristo. K'oaá ma-ne nga tsja ma-na.

Mé xi 'ño mejèn-la Pablo

Nga tífi nàchrjein kotsjaá-isa-na,

19 koií kjoa-la nga ngats'iì kjoa xi tíma, jyeé tíjìn-na nga kijchò nàchrjein nga kítjokàjñàa kjo'in koi-né nga jñò bìtsi'batjì-ná kò nga tsjá-ná nga'ño Inima Tsjeè-la Cristo.

20 Ta jè xi 'ño mejèn-na kò tikoña kjoa nga mì kosobà-na nga ch'o síkijna Cristo. Jè xi mejèn-na nga mì kì tsakjoòn-la xita nga ma kichjà-la mé-ne 'an, tsà tijnakoan, kò nas'ín kiyá, jè Cristo jeya kijná it'aà ts'an.

21 'An, nga tijnakoan, jè-né nga jeya kijná Cristo. Kò tsà 'an kiyá, isaá-la ndaà s'e.

22 Tanga tsà takó kótijnakoan i isò'nde, tsà koií nàchrjein-la s'iin-isa xá-la Nainá. K'oaá ma-ne, mìkì be mé xi isa ndaà tjin.

23 Ingajò kjoa koi 'ño 'in ma-na; jòya tjin kjohítsjeèn-na; mejèn-na nga kàtiyaà mé-ne nga ya kótijnakoaa Cristo; nga isaá-la 'ño ndaà s'e.

24 Tanga xi kjondaà tsajòn, isa 'ño mochjeén nga kótijnakon isa.

25 K'oaá s'ín beè-la takoàn nga kótijnakon isa, nga k'oaá s'ín tíngoò takoàn nga mochjeén-nò it'aà ts'an. Kótijnajìn-nò mé-ne koma siichját'aà-nò nga isa tsja koma-nò koni s'ín mokjeiín-nò kò nga isa ndaà kokjeiín-isa-nò.

26 Mé-ne k'e nga kijchokon i jngoò k'a-nò, isaá tsja koma-nò nga isa 'nga síkijna Cristo Jesús koni s'ín osìko-na.

27 Ta jè xi 'ño mochjeén nga k'oas'ín tichá yijo-nò koni tsò 'én ndaà-la Nainá xi kjoa ts'e Cristo; mé-ne tsà koma kikon-nò kò tsà mìkì koma kjián, takó kji'nchrè-ná nga kixi titsajnakoo 'én, nga jngoò tjin kjohítsjeèn-nò nga ngàsòn titsabixkàn-tjiò koni s'ín mokjeiín-nò 'én ndaà-la Nainá xi kjoa ts'e Cristo,

28 nga mì tsakjoòn-là jñà xita kondra-nò. Koni s'ín titsa'nè ngats'iì kjoa koi, k'oaá s'ín sijna koni jngoò chibà xi okó nga jñà xita kondra, kjoehesòn-né, tanga jñò, kítjokàjìn-nò kjo'in. Kjoa koi, it'aà ts'e Nainá nchrobá-ne.

29 Nga Nainá tikoáá tsjá-nò kjondaà nga kjo'in titsanikjioón xi kjoa ts'e Cristo koni s'ín kitsjaà-nò kjondaà nga kòkjeiín-nò 'én ndaà-la.

30 Nga jñà kjoa xi tjin-nò i'nde, tijnà-ne xi 'an kis'e-na koni s'ín ki'yaà jñò, kò takó koií kjoa tjin-na skanda nàchrjein i'nde koni s'ín titsana'ya.

2

Kjohítsjeèn xi kis'e-la Cristo nga nangui kisikijna yijo-la i isò'nde

1 Jñò, nga Cristo tsjá-la nga'ño inima-nò, kò nga jè kjoatjòcha síje takòn-nò, kò nga jè Inima Tsjeè-la Nainá ndaà síkítsajnajtín-nò nga nìxákoò, kò nga nguì kò inima-nò tjin-nò kjohimatakòn,

2 k'oaá ma-ne nga síjé-nò nga ta jngoò kjohítsjeèn kàtas'e-nò, jngoò kjoatjòcha, ngàsòn t'è-là takòn, kò ngàsòn chibà-nò mé xi nìkítsjeèn mé-ne nga isa ndaà kotsja-na.

3 Kì kjoa 'nga takòn onguíchjaà, kò kì 'nga nìkítsajna yijo-nò. Ta saá nangui tikítsajna yijo-nò, k'oaá s'ín jchaxkón xita xi kje'ei koni tsà jñà titsajna ítjòn.

4 Kì ta koi nìkájno xi kjondaà tsajòn. Tikoáá tikájno-nò mé xi mochjeén-la xita xi kje'ei.

5 K'oaá tjin kjohítsjeèn xi kàtas'e-nò koni tjin kjohítsjeèn xi tjin-la Cristo Jesús.

6 Nas'ín tije sobà-ne Nainá, mìtsà kos'ín kisikítsjeèn nga kjo'ño mejèn-la nga kos'ín kijná koni s'ín tijná Nainá.

⁷ Ta saá 'ńó nangui kisikíjna yijo-la nga kos'ín tsibìjna koni jngoò xita chi'nda, koni xi taxki xita isò'nde.

⁸ K'e nga jye taxki xita komà, kisikajeén-la inima-la nga ndaà kisikitasòn yije-la Nainá skanda kó nga k'en nga ya kinik'en-t'aà krò.

⁹ K'oaá ma-ne, Nainá, k'e nga jye kisikjaáya-la, taxki 'ńó 'nga kisikíjna. Kitsjaà jngoò-la 'ín xi isa 'ńó 'nga tíjna mé-ne jè kotìxoma yije-la xita.

¹⁰ Mé-ne nga it'aà ts'e Jesús kincha-xkó'nchi-la ngats'ìi xi títsajna ngajmiì, xi títsajna i it'aà nangui, ko xi títsajna ijìin nangui.

¹¹ K'oaá s'ín kitsò ngats'ìi xita nga Jesucristo, jè xi otìxoma; k'oaá ma-ne nga jeya kíjna Nainá xi Na'èn-ná.

Mé xi s'een nga ixti tsjeè-la Nainá 'mì-ná

¹² K'oaá ma-ne, jñò ndí 'ndsè xi 'ńó matsjake-nò, k'e nga tsohótijnako-nò, kjit'aà nachrjein ndaà kinikitasòn. I'ndeji nga kjìin tíjnaa, tákó k'oas'ín ndaà tikitasòn. K'oas'ín t'een nga kàta'ya-nò nga jyeé itjokàjñò kjo'in kjoa ts'e jé-nò koií kjoa-la nga 'ńó tsakjoòn-chaà yijo-nò.

¹³ Nga jè Nainá xi ndaà tísíxájiin inima-nò. Jè síkítsjeèn-nò nga k'oaá s'ín mejèn-nò koni s'ín ndaà sasén-la Nainá ko tíjè-ne xi tsjá-nò nga'ńó nga ma k'oas'ín 'nè.

¹⁴ Ndaà t'een yije nita mé kjoa-ne; kì taxki tsajét'aà-là Nainá ko kì chitiya-nò nita mé kjoa-ne.

¹⁵ K'oaá s'ín koma-ne nga ixti tsjeè-la Nainá k'oín-nò; nimé jé s'e-nò nga titsajnajìin-là xita ts'en ko xi ch'o s'ín; jñò, k'oaá s'ín kàta'ya-nò koni ni'ín-la ni'ńó xi síhiseèn ñánda jñò choòn.

¹⁶ Tika'bísòn 'én ndaà xi síkíjnakon inima-ná, mé-ne jè nachrjein k'e nga kjoíi ijngoò k'a Cristo, ndaà kotsja-na nga mìtsà ta kjotjò koni s'ín kis'iaàn nga 'ńó kisixájiin-nò nga tsakoòya-nò 'én ndaà-la Nainá xi kjoa ts'e Cristo.

¹⁷ An, matsjaá-na ko síjngoàà kjotsja xi tíjn-nò nas'ín kjo'in tìsikjaán koni jñò nga kjo'in tìsanikjioón nga koií kjoa-la nga mokjeiín-nò it'aà ts'e Cristo. Kjo'in xi tíjn-nò k'oaá ngaya-la koni jngoò kjotjò xi jñò 'biì-là Nainá, ko jè kjo'in xi 'an tíjn-na tikoáá 'an tsjaà-la Nainá koni kjotjò tsajòn.

¹⁸ Jñò, k'oaá tìs'ín kàtatsja-nò mé-ne kojngoò-ne kjotsja xi tíjn-ná.

It'aà ts'e Timoteo

¹⁹ K'oaá s'ín tísíkítsjeèn, tsà Na'èn-ná Jesús mejèn-la nga síkasén nìton-nò Timoteo, mé-ne 'an kotsja-na k'e nga kjoíiko-na okixi it'aà tsajòn kós'ín titsajnaà.

²⁰ Mì tì yá xita tíjn isa-na xi k'oas'ín ngàsòn síkájno it'aà tsajòn koni jè Timoteo.

²¹ Ngats'ìi xita xi k'ejí, saà kjondaà ts'ee ótsji, mìkìl ótsji xi kjondaà ts'e Cristo.

²² Jñò, jyeé ndaà tíjiin-nò, jè Timoteo xita kixi-né. Ndaà síchját'aà-na it'aà ts'e 'én ndaà-la Nainá xi kjoa ts'e Cristo, k'oaá ngaya-la koni tsà ki'ndí ts'an-ná.

²³ Tikoña kjoa-ná nga síkasén-nò Timoteo k'e nga skoeè kós'ín síndaàjiin kjoa-na.

²⁴ Tanga jè Na'èn-ná ma'ńót'aà takoàn, nga tsjá'nde-na nga tikoá 'an koma kjiikon nìton-nò.

It'aà ts'e Epafrodito

²⁵ Tanga k'oaá s'ín kisikítsjeèn nga ítjòn síikasén ijngoò k'a-nò jè 'ndsè Epafrodito. Ndaà kisixáko-na. K'oaá s'ín tsajmeiiko-na koni jngoò soldado nga bixkàn-tji-jen 'én-la Nainá. Nainá kàtíchjí-nò nga kinikasén-ná k'e nga 'ńó tímochjeén-na. Ndaà kisichját'aà-na.

²⁶ I'ndeji, mejèn-la nga skoexkon-nò ngats'ioò, 'ńó tísíkájno nga jñò jyeé kina'ya nga kjòxk'én-né.

²⁷ Kixií kjoa nga kjòxk'én-né, kjomeé k'en. Tanga Nainá kjòhimakeè; mìtsà ta jè xi kjòhimakeè, koó 'an, mé-ne nga mì isa tse kjoaba s'e-na.

²⁸ K'oaá ma-ne nga tìsikasén nìton-nò, mé-ne k'e nga jchaxkoòn ìjngoò k'a, kotsja-nò ìt'aà ts'e, koa 'an, tjàxìn chiba-na kjoaba.

²⁹ Chjoétjò nga ko kjotsja-nò nga 'ndsee chibá ìt'aà ts'e Na'èn-ná. Chaxkón yije xi ngásòn ok'in-la koni jè.

³⁰ Koií kjoa-la ìt'aà ts'e xá-la Cristo nga kjomeé k'en. Jè kjoa xi jñò mìkìl komà kinìchját'aà-ná, jé Epafrodito, 'ñó tsibínè-la yijo-la nga ndaà kisìchját'aà-na nas'ín kjomeé k'en.

3

Mé kjoa xi isa 'ñó chjí-la nga kixi kitsajnaá nguixkon Nainá

¹ Ndí 'ndse, k'oaá xan-nò, tsja t'è-là inima-nò nga Na'èn-ná Jesús titsajnakoo. 'An, mìkìl masiì-na nga tikjii ìjngoò k'a-nò jñà kjoa xi jye kòkjìn k'a kjii-nò nga kjondaà tsajòn-nò.

² Tikindaa yijo-nò ìt'aà ts'e jñà xita xi kjo'ño mejèn-la nga otet'aà yijo-la xita nga bít'aà chiba-la kjoa ts'e circuncisión. Tikindaa xita koi nga nímé chjí-la. Tikindaa nga 'ño ch'o s'ín.

³ Jñá-ná xi nguì kixi kjoa nga tjít'aà chiba-ná nga 'ya-la nga xita-la Nainá 'mì-ná. Jñá-ná xi ndaà yaxkoán Nainá nga jè Inima Tsjeè-la síchját'aà-ná. 'Nó ndaà matsja-ná nga jè ma'ñót'aà takoán Cristo Jesús nga mìtsà jè kjoa ts'e yijo-ná ma'ñót'aà takoán.

⁴ 'An, mìtsà kjoa ts'e yijo-na ma'ñót'aà takoàn nas'ín kjìn skoya kjondaà kisikitasoàn. Tsà tjín i'nga xita xi koi ma'ñót'aà takòn kjondaà xi tjín-la, tanga 'an mì k'oaá s'ín tìs'iaàn nas'ín tsato kjìn skoya kjondaà kisikitasoàn.

⁵ K'e nga tjín-la jùn naxhrjein nga kits'ian, kisit'aà chiba-na kjoa ts'e circuncisión. 'An, xita Israel-ná, tje-la Benjamín-ná. Xita Hebreo-ná, ko jñà xita jchínga-na nguì xita Hebreo-né. 'An, nguì xita fariseo-ná nga jñà kjotíxoma-la xita judío nguì ndaà kisikitasoàn.

⁶ Nga 'ño fit'aà-la koni s'ín tjín kjotíxoma-la xita judío, 'an skanda kiitjingui kondraá-la xita naxandá-la Cristo. 'An, nguì kixi kisikitasoàn kjotíxoma-la xita judío, njingoò xi mìkìl ndaà kisikitasoàn.

⁷ Nga sa ítjòn, 'an, k'oaá s'ín kisikitsjeèn nga 'ño tse chjí-la ngats'ii kjoa koi; tanga i'ndeí nga Cristo fit'aà-la nímé chjí-la kjoa koi.

⁸ Xi nguì okixi, ngats'ii kjoa xi 'an ma'ñót'aà takoàn nga sa kjòtseé, i'ndeí, k'oaá s'ín beè takoàn nga nímé chjí-la mì k'oaá-ne koni s'ín bexkoan Cristo Jesús xi otíxoma-na nga isa 'ño tsato chjí-la. Ngats'ii kjoa koi, jyeé tsachrjengua yije xi kjoa-la Cristo. Ta tjé beè takoàn mé-ne nga ya ma fit'aà-la Cristo

⁹ ko mé-ne nga ya kótijnakjoòkoa. Nga kixi ótjna nga nguixkon Nainá, mìtsà koi kjoa-la nga 'an ndaà sikitasoàn kjotíxoma-la xita judío, koi-né nga mokjeiín-na ìt'aà ts'e Cristo. Jè Nainá xi kixi síkijna-na koií kjoa-la nga mokjeiín-na.

¹⁰ Mejèn-na nga isa ndaà skoexkoan Cristo; skoeè nga'ño xi tjín-la nga jaáya-la ìt'aà ts'e kjoabiyaà; kàtamajngoò kjohítsjeèn-na ko ts'e Cristo koni s'ín komàt'in nga kisikjeiín kjo'in skanda k'e nga k'en,

¹¹ mé-ne k'oa tìs'ín kjoaáya-na ìt'aà ts'e kjoabiyaà koni s'ín jaáya-la Cristo.

Mé xi s'ín Pablo nga ma kijchò tjingui-la kjotjò xi tsjá Nainá

¹² Mìtsà tsò-ne kjoa nga jye kjòngásòn yije-na kjoa koi. Kj'eè tsà nguì xita kixi 'mì-na. Tanga tífi tjingui-la nga mejèn-na nga isa ndaà skoexkoan skanda kó nga kijchò tjingui-la mé kjoa-ne nga ijchò tjingui-na Cristo Jesús.

¹³ Ndí 'ndse, k'oaá s'ín machiya-na, kj'eè kii bijchó tjingui yije-la kjondaà xi tjín-la Cristo. Tanga jngoò kjoa tìs'iaàn, tìsìchàajñaà yije kjoa xi jye tsato, tìbínè-la yijo-na nga kijchò tjingui-la kjoa xi sa nchrobá.

¹⁴ Tífi tjingui-la skanda ñánda fehet'aà-ne, mé-ne nga tjoé-na kjotjò xi Nainá tsjá-na nga xó kiichja-na Nainá ján ngajmii nga Cristo Jesús tjínakoo.

15 Ngats'iaá xi jye ndaà mokjeiín-ná it'aà ts'e Cristo, ngàsòn ngáya k'oas'ín s̄ikítsjeén. Jñò, tsà mìkiì k'oas'ín n̄ikítsjeèn, Nainá s̄ikíchiyandaà-nò.

16 Tanga mochjeén-né nga k'oas'ín s̄ikitasoán koni kji jye machiya-ná skanda nachrjein i'ndeì.

17 Ndí 'ndsè, k'oaa s'ín tijchá yijo-nò koni s'ín t̄is̄jchá yijo-na. Chjíngruì-là jñà x̄ita xi k'oas'ín ndaà nchis̄jchá yijo-la koni s'ín t̄itsa'nè-jen.

18 Nga kjìn ma x̄ita xi tjíma xi kondra fì tjingui-la jè 'én xi t̄is'enojmíya nga krò k'en-t'aà Cristo. Kòkjìn k'a k'oaa xan-nò; i'ndeì skanda koo ndáxkoaàn t̄ib̄ixteèn nga ìjngoò k'a k'oaa t̄ixan-nò.

19 X̄ita koi, k'e nga kjoehet'aà nachrjein-la, kjo'iín s̄ikjeiín n̄ita kjé-ne. Ta koií ótsji kjoa xi s̄ijé yijo-la kò mìtsà Nainá ótsji. 'Nga s̄ikítsajna yijo-la kjoa xi t̄jínè-la nga k̄osobà-la. Tà koií s̄ikítsjeèn kjoa ts'e isò'nde.

20 Tanga jñà, ján i'nde-ná ngajmì. 'Ñó ndaà t̄itsachiñá-lá nga ya kjinchrobà-ne jngoò xi kochrjekàjìin-ná kjo'in, jè-né Jesucristo xi otíxoma-ná.

21 Jè s̄ikjatt̄iya-la yijo ni'nde-ná; k'oaa kji koma koni kji ts'e jè, nga jeya kji. Jè s̄ikjeén nga'ño xi t̄jín-la nga jè otíxoma yije-la n̄ita mé xi t̄jín.

4

Mé xi s'eén nga jye kixi t̄itsajna kooá Cristo

1 K'oaa ma-ne jñò ndí 'ndsè xi 'ño matsjake-nò, kò nga 'ño makájno-na nga mejèn-na skoexkon-nò, kò nga n̄itsja-là in̄ima-na, kò jñò xi kjotjò-na ma it'aà ts'e xá-na, k'oaa xan-nò nga kixi t̄itsajnakoo Na'èn-ná, jñò xi 'ño matsjake-nò.

2 Tibitsi'bà-la jè Evodia kò Síntique, nga ngàsòn ndaà k̄atjìko x̄ikjín nga ndichja joó xi it'aà ts'e Na'èn-ná.

3 T̄ikooá ngaji ndí 'ndsè xi ngàsòn taña n̄ixá, t̄is̄jét'aà-lè, t̄ichjât'aà-la íchjín koi; nga ndaà kisixáko-na it'aà ts'e 'én ndaà-la Nainá xi kjoa ts'e Cristo. Kò jè Clemente kò x̄ita xi i'nga t̄ikooá ndaà kisixáko-na. X̄ita koi, jye t̄jít'aà 'ín-la xojon ts'e kjoabinachon ján ngajmì.

4 Tsja t'è-là in̄ima-nò nga Na'èn-ná t̄itsajnakoo. Ìjngoò k'a k'oaa xan-nò: ;Tsja t'è-là takòn!

5 Jñò, k̄atabeè yije-nò x̄ita nga x̄ita ndaà 'mì-nò. Jyee t̄imachraña nga kjoí ìjngoò k'a Na'èn-ná.

6 Kì mé kjoa n̄ikájno. Ta isaá t̄jjet'aà-là Nainá k'e nga mé xi mochjeén-nò. T̄ikooa t̄jii-là kjondaà.

7 K'oaa s'ín koma-ne nga tsjá-nò kjoa'nchán Nainá. Jè kjoa'nchán xi tsjá-nò fahatonè-la koni s'ín b̄itsjeèn-la x̄ita. Kjoa'nchán jè, jè xi s̄ikinda in̄ima-nò kò kjoh̄itsjeèn-nò nga Cristo Jesús t̄itsajnakoo.

8 Ndí 'ndsè k'oaa xan-nò xi fehet'aà-ne. T̄ikítsjeèn xi kjoa kixi, kjoa xi ndaà yaxkón, kjoa xi ndaà t̄jín nga nguixkon Nainá, kjoa xi tsjeè t̄jín, kjoa xi ndaà sasén-ná, kò ngats'ii kjoa xi ndaà na'yà-la. Kò tsà t̄jín-isa kjoa xi kj'eí xi 'ño ndaà t̄jín, xi ok'in-la nga 'nga k̄itsajna, koií kjoa t̄ikítsjeèn.

9 K'oas'ín t'een koni s'ín tsakoòya-nò okixi xi 'an kitsjaà-nò, 'én xi kina'yá-ná, koni s'ín ki'ya-ná nga kis'iaàn; tákó k'oas'ín t'een. Nainá xi tsjaà-la kjoa 'nchán in̄ima-ná, jè k̄ijnakoo-nò.

Kjondaà-la ts'e x̄ita Filipos it'aà ts'e Pablo

10 'Ñó matsja-na koni síko-na Na'èn-ná nga ijchò nachrjein, ìjngoò k'a kin̄ikítsjeèn-ná. 'An k'oaa s'ín s̄ikítsjeèn nga mìtsà kin̄ichàajñòò xi it'aà ts'an, tà jè-né nga mìkiì x̄atì kitjò'nde-nò nga kin̄ichjât'aà-ná.

11 Mìtsà koi kjoa-la nga k'oat̄ixan-nò tsà mé tsojmì xi chijat'aà-na. Jyee kjò'nga-na nga majngoò takoàn mé xi t̄jín-na.

¹² Be-ná kó ma nga imá tísíchá yijo-na. Tikoáá be-ná kó ma k'e nga tjín-na tsojmì. Jye tíbe nità mé kjoa xi tímat'ian. Tijé-na tsà skiì tjína indso'bà, kò tsà kjinchrá tìbiyaà, tsà ningui-na tsojmì kò tsà nímé tsojmì tjín-na.

¹³ Koma yijee-na nità mé kjoa-ne nga jè Cristo tsjá-na nga'ñó.

¹⁴ Tanga jñò, tákó ndaà ki'nè-nò nga kinìchját'aà-ná k'e nga kjoa tìjnajñaà.

¹⁵ Jñò xi naxandá Filipo tsajòn, tíjìn-nò nga ta jñò-nò xi kinìchját'aà-ná mé xi kjòchjeén-na, jè nàchrjein k'e nga kiaà nangui Macedonia k'e nga sa tsibìts'iaa nga kichjàkò-nò 'én ndaà-là Nainá xi kjoa ts'e Cristo. Nijngòò naxandá-là Cristo xi kj'ejí xi ma-là kisichját'aà-na.

¹⁶ Tikoáá k'e nga tsohótijna naxandá Tesalónica, jngòò jò k'a kinikasén-ná kjotjò xi kjòchjeén-na.

¹⁷ Mìtsà mé kjotjò tsajòn xi mejèn-ìsa-na, ta jè xi mejèn-na nga ìsa ndaà kàtasíchikon-t'in-nò Nainá.

¹⁸ Jyee kiskaat'aà yije-na ngats'ii xi kinikasén-ná. Jyee tjín yije-na xi mochjeén-na skanda ninguií-na nga jyee j'ìikò-na nga'ñó xi kinikasén-ná kò Epafrodito. Kjotjò xi kinikasén-ná k'oaá s'ín ngaya-là koni chrjongó-là Nainá xi 'ñó ndaà jne, jña kjotjò xi 'ñó ndaà sasén-là Nainá.

¹⁹ K'oaá ma-ne, jè Nainá xi 'an kjit'aàtakoàn, tsjá yije-nò nità mé xi chijat'aà-nò koni s'ín jeya tjín kjoa nchiná xi tjín-nò nga Cristo Jesús titsajnakoo.

²⁰ Jè Nainá xi Nà'èn-ná, jeya kàtìjna nità mé nàchrjein-ne, nità mé nó-ne. K'oas'ín kàtama.

Xi fehet'aà-ne, Pablo síhixat'aà xità Filipos

²¹ It'aà ts'an, tíixat'aà yije jña xità naxandá-là Cristo xi ya títsajna. Jña xità 'ndseeé xi j títsajnakò-na, tikoáá nchisíhixat'aà-nò.

²² Ngats'ii xità-là Cristo síhixat'aà-nò. Jña nchisíhixat'aà ítjòn-nò xi títsajna ni'ya-là César xi xitaxá ítjòn ts'e Roma.

²³ Ngats'ioò, jè kàtìjnakò-nò kjondaà-là Jesucristo xi otíxoma-ná. K'oas'ín kàtama.

Xojon carta-la San Pabło xi kiski-la xita naxandá-la Cristo xi títsajna Colosas

Kó tò Pablo nga síhixat'aà jña xita naxandá-la Cristo xi títsajna Colosas

1-2 Jñò xi xita naxandá-la Cristo 'mì-nò xi ján títsajnaà naxandá Colosas nga kixi onguít'aà-là Cristo, 'an xi Pabło 'mì-na kò 'ndsè Timoteo títsajnaà-nòjen nga 'an tsibíxáya-na Jesucristo nga k'oas'ín kjòmejèn-la Nainá. Nainá xi Nà'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya ijìin inima-nò.

Kó tò Pablo nga tsjá-la kjondaà Nainá

3 Kjit'aà naxrjein k'e nga nokjoat'aà-lajen Nainá xi it'aà tsajòn, 'biì-lajen kjondaà Nainá xi Nà'èn-la Jesucristo jè xi otíxoma-ná.

4 Koií kjoa-la ngajen jyeé k'oas'ín kina'yà-jen nga ndaà mokjeíin-nò it'aà ts'e Cristo Jesús. Tikoá matsjacha ngats'ìi xita-la Nainá.

5 Koií k'oas'ín 'nè-nò nga títsachiñá-là nga tjoé-nò kjondaà xi tíjnatjò-la Nainá ján ngajmìi; koni s'ín kjòchíya-nò k'e nga kina'yà 'én ndaà-la Nainá xi kjoa ts'e Cristo xi ngui kjoakixi.

6 Tjè-ne jè 'én ndaà-la Nainá xi kjoa ts'e Cristo xi jye k'oas'ín kina'yà, 'ñó tínokjoáya nga títsa isò'nde kò 'ñó kjìn xita nchifatjíya-la kjohítsjeèn-la koni s'ín komàt'ion jñò k'e nga jahatjíya-la kjohítsjeèn-nò nga jahas'en-jiin-nò kjondaà-la Nainá xi ngui kjoakixi.

7 K'oaá s'ín tsakóya-nò Epafras jè xita xi matsjacha-jen nga taña nixájoò-jen it'aà ts'e Nainá; nga jè Epafras, jngoò chí'nda-la Cristo xi kixi síxá xi it'aà tsajòn.

8 Jyeé tsibénojmi-najen nga jè Inima Tsjeè-la Nainá síkítsjeèn-nò nga ndaà matsjacha xita.

9 K'e nga kina'yà-jen, mìkiì nìjchàajiin-jen nga bìtsi'batjí-nòjen. K'oaá s'ín nìjèt'aà-lajen Nainá nga ngui ndaà kàtasíchiya-nò koni s'ín mejèn-la jè; jè Inima Tsjeè-la kàtatsjá-nò kjohítsjeèn kò kjoachjine.

10 Tikoá nìjèt'aà-lajen nga k'oas'ín tíjchá yijo-nò koni s'ín ok'in-la nga sìljchá yijo-la xi xita-la Nainá, nga kjit'aà naxrjein k'oas'ín t'een koni s'ín mejèn-la, nga k'oas'ín t'een ngats'ìi kjoa xi ndaà tíjn kò nga isa ndaà jchaxkon yá-né xi Nainá.

11 K'oaá tí's'ín nìjèt'aà-lajen Nainá nga tse nga'ñó kàtatsjá-nò koni s'ín tíjn nga'ñó-la xi mìkiì fehet'aà, mé-ne nga kixi kítsajna-nò nita mé kjoa xi sakò-nò, tikoá s'e-nò kjoatsejta kò kjotsja.

12 Tjii-là kjondaà Nà'èn-ná nga jè kíkítsajnandaà-nò nga tikoá tjoé-nò kjotjò xi jè jye tíjndaà-la ján ngajmìi ñánda iseèn choòn nga tsjá-la ngats'ìi xita-la xi ya chja-ne naxandá-la Nainá.

13 Nainá kíkítsajnandeíi-ná it'aà ts'e nga'ñó-la xita neíi jè xi otíxoma ñánda jñò choòn; yaá kíkítsajna-ná ñánda tíhotíxoma Ki'ndí-la xi 'ñó matsjakeè,

14 jè xi kò jní-la tsibíchítjì-ná nga kíkítsajnandeíi-ná tikoá kíkíchàat'aà-ná jé-ná.

Jè Cristo tíjna ítjòn-la ngats'ìi xi tsejèn kò xi mìkiì tsejèn

15 Nì saá jngoò xita beèxkon Nainá tanga jè Ki'ndí-la tsakó-la xita yá-ne xi Nainá. Nga jè Ki'ndí-la xi tíjna ítjòn-la ngats'ìi xi kíkítsajna isò'nde.

16 Nga kò Cristo, Nainá tsibíndaà yije xi tíjn ngajmìi kò xi tíjn i it'aà nangui, xi tsejèn kò xi mìkiì tsejèn, ngats'ìi nga'ñó xi tíjn ijìin isén, xi títsajna ítjòn, xi otíxoma, xi xá ítjòn tíjn-la, kò jña nga'ñó xi mìkiì tsejèn-ná; it'aà ts'eé Cristo kíkítsajna yije-ne kò ts'e-né.

17 Cristo, isaá kjòtseé tíjna mì k'oa-ne ngats'ìi tsojmì xi tíjn, kò jè tsjá-la nga'ñó ngats'ìi tsojmì mé-ne nga ndaà kíkítsajna-ne.

18 Jè Cristo tíjna sko-la naxandá-la nga tíjè-ne yijo-la kò it'aà ts'eé kjòts'ia-ne. K'e nga jaáya-la Cristo it'aà ts'e kjoabiyaà, jè tsibìjna ítjòn-la it'aà ts'e xità xi faáya-la mé-ne nga jè kíjna ítjòn-la nità mé xi tíjn.

19 Nainá k'oaá s'ín kisaseèn-la nga jngoò k'aá ya tsibìjnajiìn yijo-la Cristo,

20 nga it'aà ts'eé Cristo, Nainá tsajoóndaàkò yije-ne ngats'ii xi tíjn isò'nde kò xi tíjn ngajmì; it'aà ts'e jní-la Jesucristo xi kixíxteèn ján it'aà krò, Nainá kisìkijne 'nchán kjoa.

21 Jñò, nga sa ítjòn, tíkooá titsajnat'aàxìn-la Nainá; kondraá tsanguì-la ya jjiìn inìma-nò, koií kjoa-la nga ch'o tíjn kjoa xi ki'nè.

22 Tanga j'ndeì jyeé ndaà tsajoókò-nò Nainá koií kjoa-la jè kjo'in xi kisìkjeín Cristo j it'aà nangui k'e nga k'en. Koií k'oas'ín kis'iìn-ne mé-ne nga tsjeè kitsajnaà-nò, kò nìmé jè xi s'e-nò kò nìmé xi ch'o kíjõnguio nga nguixkõn Nainá.

23 Kjoa koi mochjeén-né nga kixi tìtsajnakoo koni s'ín mokjeiìn-nò. Kò kì binchat'aàxìn-la kjoa xi tìtsachiñà-la it'aà ts'e 'én ndaà-la Nainá xi kjoa ts'e Cristo, 'én xi jye kina'ya-là. Jè 'én jè, xkì xi ján tínokjoàyajìin-la xità kóhokji isò'nde; kò 'an xi 'mì-na Pablo, 'aán kjòngatsja nga okoòya 'én.

Xá-la Pablo

24 I'ndeì matsjaá-na nga kjo'in tìsìkjaán xi kjoa tsajòn nga k'oaá s'ín tìsìjngoàà jjiìn yijo-na koni s'ín chijat'aà-na kjo'in xi kitsjaà-na Cristo xi kjõndaà ts'e naxandá-la nga tíjè-ne yijo-la.

25 'Aán tìsìkjeén-na Nainá nga 'an tìsìxákoaa naxandá-la, xá xi kisìngatsja-na xi kjõndaà tsajòn nga ngui ndaà kènojmiá 'én ndaà-la,

26 jè 'én xi tíjna'ma-la Nainá nga tìsa tàts'en-la kjoa, tanga nachrjein j'ndeì, Nainá jyeé tsakó-la xità-la.

27 Jè Nainá k'oaá s'ín kjòmejèn-la nga tsakó-la jñà xità-la kó s'ín tíjn kjoa'ma-la xi 'ñó jeya tíjna xi kjõndaà ts'e xi mìtsà xità judío. Jè kjoa'ma, jè-né nga jè Cristo tíjnajiìn inìma-nò jñò xi mìtsà xità judío 'mì-nò, k'oaá ma-ne nga tìtsachiñà-la jñò kjoajeya-la Nainá xi tsjá-nò ján ngajmì.

28 K'oaá s'ín nokjoàyajìin-lajen ngats'ii xità it'aà ts'e Cristo; 'ñó nokjoàkò-jen nga ngui kò kjoachjine okoòya-lajen mé-ne nga ngats'ii xità xi fit'aà-la Cristo nìmé chijat'aà-la jè nachrjein k'e nga ngajen sìnngatsja-jen nga nguixkõn Nainá.

29 K'oaá ma-ne nga 'ñó tìbínè-la yijo-na nga tìsìxá, tìsìkjeén jè nga'ñó xi tsjá-na Cristo.

2

1 Mejèn-na nga ndaà kàtasijìin-nò, nga 'ñó tìkjaàn-tji-nò it'aà tsajòn kò jñà xità-la Cristo xi tìtsajna ján naxandá Laodicea, kò it'aà ts'e ngats'ii xità xi kj'eè kii beèxkon-na.

2 Koií k'oas'ín tìkjaàn-tji-nò mé-ne nga kàtas'e-la nga'ñó inìma-nò kò mé-ne nga jè kjòtsjacha xi tíjn-nò sìkìtsajnajtín-nò. Jè xi mejèn-na nga isa ndaà kòkixi kjòhìtsjeèn-nò nga ngui ndaà kochiya-nò jè kjoa xi tíj'ma-la Nainá xi Na'én-ná. Jè kjoa'ma jè, jè-né Cristo.

3 Nga ta jè Cristo tíjn-la ngats'ii kjòhìtsjeèn kò kjoachjine xi 'ñó chjí-la.

4 Koií k'oas'ín tìxan-nò nga mì yá xi skónachan-nò nga sìkjeén 'én xi ndaà tsò tanga mìtsà 'én kixi.

5 Nas'ín mìtsà ya tíjnakò-nò, tanga inìma-na tìsìkìtsjeèn kjit'aà-nò. Matsjaá-na nga tì'be nga kixi tìtsajtión koni s'ín onguíkoo yijo-nò tíkoo kixi tìtsajnaà nga mokjeiìn-nò it'aà ts'e Cristo.

Kjõndaà xi tíjn-ná nga Cristo tìtsajnakooá

6 Koni s'ín kòkjeiìn-nò it'aà ts'e Jesucristo xi otíxoma-nò, k'oaá tìs'ín kixi tìtjít'aà kjit'aà-là

7 koni jngoò yá xi nanga fì ima-la kò koni jngoò ni'ya xi tìsindaàsòn-isa nga kàtakixiya jè kjoa xi mokjeiìn-nò koni s'ín kichìta'ya; kò tjiì kjit'aà-là kjõndaà Nainá.

⁸ Tíkíndaá yijo-nò nga mì jǎà skónachan-nò xítà xi 'én ndiso chja xi nì mé chjí-la. Jǎà kjohítsjeèn koi, tà yaá nchrobá-ne ìt'aà ts'e xi taxkì xítà koni tsò kjotíxoma xi tjín isò'nde, mìtsà kjotíxoma ts'e Cristo.

⁹ Yaá tíjnajìln yijo-la Cristo yá-ne xi nguì jè sobà Nainá nga nímé chijat'aà-la.

¹⁰ Nga Cristo titsajnakoo, tjín yije-nò nítà mé xi mochjeén-nò. Jè Cristo otíxoma-la ngats'ìi nga'ño kò kjotíxoma xi mìkìi tsejèn.

¹¹ Tíkooá ìt'aà ts'e Cristo kisit'aà chiba-nò kjoa ts'e circuncisión, tanga mìtsà jè xi tsja xítà bít'aà chiba-la yijo-ná, jè-né nga jè Cristo tsibít'aà chiba-la iníma-nò k'e nga jaàxìn jé xi tjín-la yijo jé-nò.

¹² Tíkooá k'e nga komà bautizar, k'ooá ngaya-la koni tsà ya kisìhijiìn-t'aà-là Cristo xi kjoa ts'e jé-nò. K'ooá tís'ín jaáya-nò koni s'ín jaáya-la Cristo koií kjoa-la nga mokjeiín-nò nga'ño xi tjín-la Nainá nga komà kiskímìtjjen Cristo ìt'aà ts'e kjoa biyaà.

¹³ Jǎò, nga sa ítjòn, titsajnaà k'en-nò ìt'aà ts'e Nainá koi kjoa-la jé-nò nga jè Cristo kj'eè kii bít'aà chiba-la iníma-nò nga faáxìn jé xi tjín-la yijo jé-nò. Tanga ì'ndeì, Nainá jyeé kisikítsajnakon-nò kò Cristo nga kisìjchàat'aà-nò ngats'ìi jé-nò.

¹⁴ K'ooá ngaya-la koni tsà jye kisìkjeheya-ne xojòn xi kitjámiì'nga xi kondra tsaján. Jaàxìn-ne, yaá tsohójnat'aà krò ñánda k'en-t'aà Cristo.

¹⁵ Jǎà nga'ño xi tjín ijìln isén kò ngats'ìi xi otíxoma, Nainá jaàxìn yije-la nga'ño-la. Yaá kisikijne-la k'e nga jè Cristo k'en-t'aà krò. Kò ngats'ìi xítà, yaá kijtseè nga kisichja.

Kjotíxoma-la xítà xi mì kii fit'aà-la Cristo

¹⁶ K'ooá ma-ne jǎò, kii kii nìs'in-là xítà xi chjajno-nò nga tsò-nò nga mìkii nìkitasòn kjoa ts'e tsojmì xi chine, xi 'yò, kjoa ts'e s'eí xi bitjo, kjoa ts'e nga otsejèn xítse ìjngoò k'a sá, kò ts'e nachrjein nìkjáya.

¹⁷ Ngats'ìi kjoa koi, k'ooá ngaya-la koni tà 'nguién-laá kjoa xi iskan j'ìi; tanga jè xi nguì kjoa kixi, jè Cristo.

¹⁸ Kii kii bìi'nde nga faáxìn-nò jè kjondaà xi jye titsajnajñoò jǎà xítà xi beèxkón àkjale; k'ooá tsò-la yijo-la nga mìtsà xítà nga ikon. Jè xi mejèn-la nga jǎò k'ooá tís'ín s'een. Jǎà xítà koi tsò-né nga ìnga nijǎà kis'enojmi-la kjoa jè, kò 'ño 'nga sikítsajna yijo-la xi ta kjohítsjeèn ts'e, tanga nímé chjí-la.

¹⁹ Xítà koi mìtsà ya ndaà fit'aà-la Cristo. Nga jè Cristo tíjna sko-la naxandá-la kò jè tsjá-la kjohítsjeèn kò nga'ño kò jè síkítsajnajtín xítà-la koni s'ín ma yijo-ná nga jǎà naxá-ná bítéya nindaà-ná, mé-ne nga ndaà sìlxá-ne naxandá-la Cristo koni s'ín mejèn-la Nainá.

²⁰ Jǎò, tañaá k'en-koo Cristo, k'ooá ma-ne nga mìkii tì tjí'nde-nò nga jǎà síkitasòn kjotíxoma xi tjín isò'nde. ¿Mé-ne tákó k'oas'ín 'nè-nò koni tsà kjoa ts'e isò'nde otíxoma-nò nga nìkitasòn-nò kjotíxoma

²¹ xi tsò: “Kii kii nìkoìi tsojmì koi, kii kii chiniì, kii ndseji nìkò-ne.”?

²² Jǎà kjotíxoma koi, tà ts'eé tsojmì xi chija k'e nga tímochjeén. Tà kjotíxoma ts'e xítà-né koni s'ín okóya.

²³ Jǎà kjotíxoma koi, k'ooá s'ín 'ya-la koni tsà tjín-la kjoachjine tanga mìtsà kixi kjoa. Nga síjé-ná nga ndaà síkitasoán kjoa xi 'in tjín mé-ne nga ndaà jchaxkoán kjotíxoma xi tjín-la ìngo; tíkooá tsò-né nga mochjeén nga mì xítà 'nga ikon komaá, kò nga kínè-lá kjo'in yijo-ná. Tanga jǎà kjoa koi nímé chjí-la, nga mìkii ma osikò-ná nga nìkítsajnaá jǎà kjoa ch'o xi síjé yijo-ná.

3

¹ Jǎà kjoa tinchátsjioò kjondaà xi tjín ngajmiì ya ñánda tíjna Cristo nga ya tíjnat'aà chrja kixi-la Nainá, koií kjoa-la nga ya jaáyakjoò-nò kò Cristo,

² Koií tìkítsjeèn kjit'aà mé kjoa xi tjín ngajmiì, kii koií nìkítsjeèn kjoa xi tjín isò'nde.

³ Nga jǎò, jyeé k'en kjoa ts'e isò'nde, kò jè kjoabinachon xítse xi tjín-nò nga ya titsajnakoo Cristo, yaá tíjnatjò nga nguixkon Nainá.

⁴ Jè Cristo, jè-né xi kjoabinachon-nò; k'e nga jè xi kotsejèn ìjngoò k'a, jñò, tikoáá yaá kotsejèn-koo nga jeya kítsajnaà.

Xi kjoa jchínga ko xi kjoa xítse

⁵ Tíkítsajna kjoa ch'o xi síjé yijo jé-nò xi kjoa ts'e isò'nde: koni jñà kjoa chijngui, ko kjoa tjé ko kjoa ch'o xi sasén-la yijo-nò ko ngats'ìi kjoa ch'o xi fahajìin-nò, ko nga kjìn tsojmì mejèn-nò. Kjoa jè tijé-ne koni tsà xkòsòn yaxkón.

⁶ Koií kjoa-la nga kjo'in tsjá-la Nainá jñà xíta xi mìkìi 'nchréñijon-la.

⁷ Jñò, tikoáá k'oaá tjin kjoa xi ki'nè kjòtseé k'e nga ya titsajnajñò kjoa xi ch'o tjin.

⁸ Tanga i'ndeí tíkítsajna yije kjoa koi: jñà xi kjoa jti, ko jñà xi kjoa ts'en, ko jñà kjoa xi ch'o tjin, ko jñà kjoa xi nokjoàjno-la xíta, ko jñà 'én xi ch'o tsò nga nokjoà.

⁹ Kì 'én ndiso nokjoàkoo xinguiòo nga jyeé kichjaàxìn-là yijo-nò kjoa jchínga-nò ko ngats'ìi kjoa xi ki'nè nga sa kjòtseé.

¹⁰ Jyeé kichjoé xi kjoa xítse. Jyeé jahatjìya-la kjohítsjeèn-nò. K'oaá s'ín tímaxitseyá koni kji isén-la Nainá xi tsibíndaà-nò skanda kóni nga isá ndaà jchaxkoòn yá-ne xi Nainá.

¹¹ I'ndeí, mì tì kùì 'ñó mochjeén-ne yá-né xi xíta griego, o yá-né xi xíta judío, yá-né xi tjit'aà chiba-la, o yá-né xi kjoa ts'e circuncisión, yá-né xi xíta xìn nangui-la ko yá xíta-ne xi ima tímajchá, yá-né xi ch'i'nda tjna'ñó, o yá-né xi tijnandeí. Jè Cristo xi isá 'ñó chjí-la; ko jè xi tijnajìin inima-la ngats'ìi xíta-la.

¹² Jñò xi xó k'oa'sín jaàjìin-nò Nainá ko xi nguì xíta tsjeè-la maà nga ndaà matsjakeè-nò, k'oaá s'ín chjoé xi kjoa xítse nga kàtahimacha xíta; kàtas'e-nò kjondaà; kì 'nga matakòn; indaàkjoa t'een; ko kàtas'e-la kjoatsejta inima-nò.

¹³ Nita mé kjoa xi tjin-nò tikjeíin-là xinguiòo, tjichàat'aà-là xinguiòo tsà mé kjoa xi ch'o síko-nò. Jñò, k'oaá tis'ín t'een, koni s'ín kisìko-nò Cristo nga kisìjchàat'aà-nò.

¹⁴ Jè xi tjna ítjòn ts'e kjoa koi, jè-né nga tìtsjacha xinguiòo, nga jè kjoatjòcha xi ndaà síkítsajnajtín-ná.

¹⁵ Kjoa'nchán-la Cristo ndaà kàtatixoma jìjìn inima-nò; nga Nainá xó k'oaá s'ín kiichja-nò nga 'nchán kítsajnakoo xinguiòo mé-ne nga ta jngoò yijo koma-nò. Ko mochjeén-né nga kjit'aà nachrjein tjì-là kjondaà Nainá.

¹⁶ Jè 'én-la Cristo 'ñó ndaà kàtasijìin kjit'aà ya jìjìn inima-nò. Takóya-là xinguiòo ko tikixiyaà nga tikjeén kjohítsjeèn xi tjin-la kjoachjine. Tijndá-là Nainá nga tjì-là kjondaà xi tjiin inima-nò; tijndá-là sò ts'e salmo, ko sò xi jeya síkìjna Nainá, ko sò xi ya nchrobá-ne ya jìjìn inima-nò.

¹⁷ Ngats'ìi 'én xi nokjoà ko ngats'ìi xá xi 'nè, it'aà ts'e Jesucristo xi otixoma-ná koat'een. Ko it'aà ts'e Jesucristo tjì-là kjondaà Nainá xi Na'èn-ná.

Kjoa xi mochjeén nga sùikitasòn xíta-la Cristo

¹⁸ Jñò íchjín xi x'in tjin-nò, nangui titsajna-là x'in-nò koni s'ín ok'in-la jñà xíta-la Cristo.

¹⁹ Jñò xi íchjín tjin-nò, tjòcha jchaa íchjín-nò, kì toòn 'yaà.

²⁰ Jñò xi ixti 'mì-nò, ndaà tina'yañijon-là xíta jchínga-nò, nga jè Nainá ndaà sasén-la kjoa koi.

²¹ Jñò xi Na'èn 'mì-nò, kì taxkì sùì nokjoàkoo ixti-nò mé-ne nga mì sùkàjeèn-la ikon.

²² Jñò xi ch'i'nda maà, ndaà tikitason yije-là nei-nò i it'aà nangui; kì tà k'eé nixá k'e nga tìkotsejèn-nò nga ta jè xi mejèn-nò nga ndaà kítsajnakoo. Nguì koó inima-nò nga tikitason-là koií kjoa-la nga yaxkón Nainá.

²³ Nita mé kjoa xi s'een, nguì koó inima-nò nga t'een koni tsà it'aà ts'e Na'èn-ná titsanikitasòn ko mìtsà it'aà ts'e xi taxkì xíta.

²⁴ Jyeé 'yaà nga jè Na'èn-ná Jesucristo tsjá-nò chjí-nò nga tjoé-nò jè kjotjò xi tsjá-nò Nainá nga ixti-la maà koi kjoa-la nga jè titsanixát'aà-là Jesucristo xi otixoma-nò.

²⁵ Tanga jè xi ch'o tjin kjoa xi s'ín, k'oaá s'ín kochjí-la koni tjin kjoa ch'o xi s'ín. Nainá mìtsà faàjìin xíta, ngàsòn ngáya fìko ngats'ìi.

4

¹ Jñò xi nei-là xá ma, ndaà t̄ikoo jñà x̄ita ch̄i'nda-nò koni s'ín t̄jín xi kjoa kixi, nga jñò 'yaà-nò nga t̄ikoa t̄jín jngoò-nò xi Nei-nò ma ján ngajmì.

² Ki bikjoàn-là nga nokjoat'aà-là Nainá; kjit'aà n̄achrjein titsajndaà nga t̄inókjoat'aà-là ko t̄jiù-là kjondaà Nainá.

³ K'oaá t̄is'ín titsi'batjì-nájen, mé-ne jè Na'èn-ná k̄atatsjá'nde nga koma kénojmi-jen 'én-là Cristo xi t̄jì'ma-là Nainá nga sa ítjòn; nga koií kjoa-là nga ndayá t̄jinaa'ya.

⁴ Titsi'batjì-ná mé-ne nga s'e-na nga ñó nga ndaà kixi kichjàjìn-là x̄ita koni s'ín t̄jìnè-là nga kichjà.

⁵ Jñò, ndaà t̄ikjeén kjohítsjeèn-nò mé-ne nga ndaà k̄itsajnakoo jñà x̄ita xi mìkii beèxkon 'én ndaà-là Nainá xi kjoa ts'e Cristo. Ndaà t̄ikjeén n̄achrjein xi tí'biì-nò nga kos'ín t̄ikitasòn.

⁶ K'e nga chikoo x̄ita, jñà 'én t̄inókjoaa xi ndaà tsò ko xi ndaà sasén-là mé-ne nga koma sikátji-là 'én xi skonangui-nò.

Kó tsò Pablo nga síhixat'aà x̄ita

⁷ Ngats'ii kjoa xi tímat'ian, jè keènojmi yije-nò jè 'ndseé Tíquico xi 'an 'ñó ndaà matsjake nga jè ndaà síchjât'aà-na koa ndaà n̄ixákjoò-lajen Nainá.

⁸ Koií xá t̄isikasén-nò nga keènojmi-nò xi it'aà tsajen kós'ín titsajna-jen ko mé-ne nga k̄atatsjá-nò nga ñó ts'e inima-nò.

⁹ T̄ikoaá ya t̄ibáhijtakoo Onésimo xi x̄ita tsajòn, xi 'ndsè ma it'aà ts'e Cristo. Nga x̄ita kixi-né ko 'ñó matsjacha-jen. Jñà keènojmi-nò mé kjoa xi tíma ijndé.

¹⁰ Jè Aristarco xi taña titsajna-jen ndayá, t̄isíhixat'aà-nò. Ko jè Marcos xi ti xíkjin ma Bernabé t̄ikoaá t̄isíhixat'aà-nò. Jyee kis'enojmi-nò it'aà ts'e Marcos; tsà ya kijchòkon-nò, t'een kjondaà ndaà chjoétjò.

¹¹ T̄ikoaá t̄isíhixat'aà-nò Jesús xi t̄ikoa Justo 'mì. Tà jñà-né xi x̄ita judío xi mokjeiín-là xi k'oas'ín 'ñó ndaà nchisíxako-na it'aà ts'e kjotíxoma-là Nainá ko 'ñó ndaà síjehikon-na.

¹² Epafras, xi ch̄i'nda-là Cristo, t̄ikoaá t̄isíhixat'aà-nò nga x̄ita tsajòn-nò. Kjit'aà n̄achrjein bìtsi'batjì-nò mé-ne nga nguì kixi k̄itsajnaà koa ndaà k̄itsajndaà nga sikitasòn mé xi mejèn-là Nainá.

¹³ 'An, ndaà t̄ibe nga jè Epafras 'ñó síkájno xi it'aà tsajòn ko it'aà ts'e x̄ita xi t̄itsajna ján naxandá Laodicea ko xi t̄itsajna ján naxandá Hierápolis.

¹⁴ T̄isíhixat'aà-nò Lucas jè xi ch̄jinekkii xi 'ñó matsjacha-jen, t̄ikoa t̄isíhixat'aà-nò jè Demas.

¹⁵ Xi it'aà ts'an t̄ixat'aà-ná jñà 'ndseé xi t̄itsajna ján naxandá Laodicea, ko jè chjoón tichjaá Ninfa, ko ngats'ii x̄ita naxandá-là Cristo xi ya bixoña ni'ya-là.

¹⁶ K'e nga jye kíxkejiìn-là xinguiqoo xojon jè, t̄ikoaá k̄ataxkejiìn-là naxandá-là Cristo xi t̄itsajna ján Laodicea; koa jè xojon xi ts'e Laodicea t̄ikoaá t̄ixkejñò.

¹⁷ Koatìn-là jè Arquipo: k̄atasíkitasòn xá xi kitsjaà-là Cristo.

¹⁸ Nga jye tífehèt'aà xojon jè, koó ndsaa tikjiì-nò 'an xi 'mì-na Pablo, nga t̄isíhixat'aà-nò. T̄ikítsjeèn nga ndayá t̄jina'ya. Jè k̄atijnako-nò kjondaà-là Nainá. K'oa s'ín k̄atama.

Xojon carta-la San Pablo xi kiskiù ítjòn-la xita naxandá-la Cristo xi títsajna Tesalónica

Kó tsò Pablo nga síhixat'aà jñà xita naxandá-la Cristo xi títsajna Tesalónica

¹ Jñò xi xita naxandá-la Nainá maà xi títsajnaà ya naxandá Tesalónica nga ya títsajnakjoòkoo Nainá xi Na'èn-ná kò jè Jesucristo xi otíxoma-ná, 'an xi 'mì-na Pablo títsanìhixot'aà-nòjen kò Silvano [tíjé-ne xi 'mì Silas] kò Timoteo. Nainá kàtatsjá-nò kjondaà kò kjoa'nchán ya ijìn inima-nò.

Kó tsò Pablo nga tsjá-la kjondaà Nainá

² K'e nga nokjoàt'aà-lajen Nainá, kjit'aà nachrjein 'bii-lajen kjondaà ít'aà tsajòn.

³ Bítseèn-najen nga nguixkon Nainá xi Na'èn-ná koni s'ín nga títsanìxá, koií kjoa-la nga mokjeiín-nò ít'aà ts'e Cristo, tíkoa ndaà nìxá-là xita xi kj'eíí nga matsjacha, nga tíkoa kixi títsajnaà nga títsachiñà-là Jesucristo xi otíxoma-ná.

⁴ Ndí 'ndsè, Nainá matsjakeè-nò. 'Ya-nájen nga xó k'oas'ín jaàjìn-nò nga xita naxandá-la komaà.

⁵ Nga jè 'én ndaà-la Nainá xi kjoa ts'e Cristo xi tsibènojímí-nòjen, mìtsà ta 'én tsajen xi kinokjoákò-nòjen. Jè Inima Tsjeè-la Nainá kitsjaà-najen nga'ñó, kò tíkoa 'ñó ndaà kjòchiya-najen nga nguì kixi kjoa. Jñò, ndaà ki'yaà k'e nga ya tsakítsajna-jen, ndaà kinìchját'aà-nòjen xi kjondaà tsajòn.

⁶ Jñò, k'oaá s'ín ki'nè koni s'ín ki'nè-jen kò koni s'ín s'ín Cristo. Jè Inima Tsjeè-la Nainá kitsjaà-nò kjotsja nga komà kichjoétjò 'én-la Nainá nas'ín 'ñó tse kjo'in tsatojioòn.

⁷ K'oaá ma-ne jñò tsakoò jngoò-là kjoa xi ndaà tjín nga kiskinguì ngats'ii xita xi jye kòkjeiín-la 'én-la Nainá ya nangui Macedonia kò Acaya.

⁸ Nga yaá kjòts'ia-ne ít'aà tsajòn nga tsabísòn jè 'én ndaà-la Na'èn-ná; mìtsà tà ya nangui Macedonia kò Acaya; xki xi ján kina'ya-la nga jñò, ndaà mokjeiín-nò ít'aà ts'e Nainá. K'oaá ma-ne nga mì tí kiì mochjeén-ne nga ngajen kènojímí-lajen xita ít'aà tsajòn, nga jyeé beè-nò xita.

⁹ Nga tíjñà bénojímí-ne nga ndaà kichjoétjò-nájen k'e nga ijchochoòn-nòjen. Tíkooá tsò-né nga jñò jyeé kinìkíjna kjoa ts'e xkòsòn. I'ndeí jyeé ya tjaàt'aà-là xi nguì jè sobà Nainá xi kixi kjoa nga tíjnakon.

¹⁰ Tíkooá bénojímí-né nga títsachiñà-là Ki'ndí-la Nainá nga kitjojen ijngoò k'a-ne ngajmii, jè xi tíjè-ne Jesús xi Nainá kisìkjaáya-la k'e nga k'en, nga jè-né xi kòchrjekàjìn-ná kjo'in ts'e kjoajti-la Nainá xi sa nchrobá.

2

Xá xi kis'ìin Pablo ya naxandá Tesalónica

¹ Jñò ndí 'ndsè kò ndí tichjaá, 'ya-nò k'e nga ijchochón-nòjen mìtsà ta kjotjò.

² Nga jyeé ndaà tíjìn-nò koni s'ín komàt'in-jen ján naxandá Filipos, nga 'ñó tse kjo'in kinìkjeiín-jen; 'ñó kijtseètoòn-najen xita; tanga Nainá kisìchját'aà-najen nga kitsjaà-najen nga'ñó nga komà tsanguì-jen ya naxandá-nò nga komà tsibènojímí-nòjen 'én ndaà-la Nainá nas'ín 'ñó kjìn ma kondra-najen.

³ Nga 'én kixi kinokjoàya-jen, mìtsà jò tjín inima-najen nga tsibènojímí-nòjen, tíkoa mìtsà xita kichonachan-lajen.

⁴ Nga Nainá jyeé kiskoòt'aà-najen kò k'oaá kitsò nga ok'ín-najen nga ngajen kjòngatsja-jen 'én ndaà-la Nainá xi kjoa ts'e Cristo mé-ne nga koma kinókjoàya-jen. Mìtsà jè xi mejèn-najen nga ndaà kitsajna-jen nguixkon xita; jè-né nga ndaà kitsajna-jen nguixkon Nainá nga jè xi tíbeè inima-ná.

⁵ Jyeé ndaà tíjìin-nò nga mìtsà 'én tsjén nokjoà-jen koni tsà mé xi mejèn-najen nga k'oi-nájen, tìkoáá mìtsà tòn binchaàtsji'ma-jen. Kjoa koi, Nainá tíbeè-né.

⁶ Mìtsà jè binchaàtsji-jen nga jñò, kò xìtá xi k'ejí, nga 'nga sùkítsajna-nájen. Tsà jin xi mejèn-najen nga tsibìnè-nòjen kjotíxoma xi tjin-najen nga it'aà ts'e Cristo kisìxáya-najen, komaá-la okinìkò-nòjen.

⁷ Tanga mìtsà kòs'ín kinìkò-nòjen. Ta saá k'oas'ín kinìkò-nòjen koni ndí ixti. K'oaá ngaya-la koni jngoò nea xi síkaki ixti-la nga ndaà síjchá ixti-la.

⁸ Ñó tjòcha ki'ya-nòjen. K'oaá ma-ne nga kò kjotsja-najen tsibènojímí-nòjen 'én ndaà-la Nainá xi kjoa ts'e Cristo. Tìkoáá matsjaá-najen nga ndaà kinìkò-nòjen nìtá mé kjoa xi komàt'ioòn ta koi kjoa-la nga 'ñó matsjacha-nòjen.

⁹ Ndí 'ndsè kò ndí tichjaá, bítsjeèn-nò kòs'ín kinìxá-jen nga binchaàtsji'a-jen yijo-najen. Kò nàchrjein kò nìtjen nìxá-jen, mé-ne nga mì jñò sjiti-nòjen jñà nàchrjein k'e nga kinokjoàyajìin-nòjen 'én ndaà-la Nainá.

¹⁰ Jñò, ndaà ki'yaá, tìkoáá Nainá kijtseè-né, nga ngajen ndaà kinìkò-nòjen. K'oaá s'ín kinìkò-nòjen koni s'ín sasén-la Nainá koni s'ín tjin xi kjoa kixi. Kò nìyá xi jé kòonè-najen koni s'ín kinìkò-nòjen jñò xi mokjeíin-nò 'én ndaà-la Nainá.

¹¹ Tìkoáá jyeé ndaà tíjìin-nò nga jen, ndaà kinìkò-nòjen nga jngoò ìjngoò koni s'ín síkò ixti-la jngoò xìtá xi na'èn ma.

¹² Kinìje ikon-nòjen koa kinì 'ñójìin-jen takòn kò k'oas'ín tsibìnè-nòjen nga k'oas'ín s'een koni s'ín ok'in-la xi xìtá-la Nainá ma; nga jè-né xi síkí'nchré-nò nga ya tìtsajnajìin-là xìtá xi jye jè tíhotíxoma-la kò tìkoá ya tìtsajnajñò kjoajeya-la.

¹³ Kjit'aà nàchrjein 'biì-lajen kjondaà Nainá koni s'ín ndaà kichjoétjò 'én-la nga mìtsà k'oas'ín kichjoétjò koni 'én-la xi taxki xìtá. K'oaá s'ín kichjoétjò koni tjin xi nguì kjoa kixi nga 'én-la Nainá-né. Jñà 'én koi, tí'yaá-la nga nchisíxájiin inìma-nò jñò xi mokjeíin-nò.

¹⁴ Jñò ndí 'ndsè kò ndí tichjaá, k'oaá s'ín komàt'ioòn koni s'ín komàt'in jñà xìtá naxandá-la Nainá xi mokjeíin-la it'aà ts'e Cristo Jesús xi tìtsajna ján nanguì Judea. Tijnà-ne xìtá naxandá judío xíkjin kùitjingui kondra-la. Jñò tijnà-ne xìtá naxandá tsajòn kùitjingui kondra-nò.

¹⁵ Jñà xìtá judío kisik'en Na'èn-ná Jesús kò tijnà-ne xìtá jchínga-la kisik'en jñà xìtá xi kùichjaya ngajo-la Nainá kjòtseé. I'ndeì, tákó k'oaá síkò-najen nga fitjingui kondra-najen. Nainá mìkùì sasén-la kjoa xi s'ín xìtá koi, nguì kondraá fi-la ngats'ì kjoa,

¹⁶ nga mìkùì tsjá'nde nga nokjoà-lajen jñà xi mìtsà xìtá judío mé-ne nga tìkoá kùitjokàjiin-ne kjo'in. K'oaá ma-ne xìtá koi, skanda nchisíkatonè-la nga ótsji jé-la yijo-la. Jyeé kjomeè f'ìikanè-la kjo'in xi tìkò kjoiti-la Nainá.

Kó kitsò Pablo nga mejèn-la kjikon jñà xìtá-la Cristo xi tìtsajna ya naxandá Tesalónica

¹⁷ 'Ndseé kò tichjaá, k'e nga chinchat'aaxìn chiba nàchrjein-nòjen, nas'ín mì tì kùì kiyaxkon-ná xinguiáá, ngajen 'ñó nìkítsjeèn-nòjen. 'Ñó mejèn-najen nga onguìchoòn-nòjen.

¹⁸ Mejèn tsanguì-jen. 'An xi 'mì-na Pablo, kjin k'a mejèn kiaà, tanga jè xìtá neí mìkùì kitsjaà'nde-najen.

¹⁹ Kjoa tsajòn-nò nga tìtsachiñá-lajen nga 'ñó kòtsja-najen kò nga ndaà kùitjo-jen k'e nga kjoí ìjngoò k'a Na'èn-ná Jesucristo.

²⁰ Kixi kjoa it'aà tsajòn-nò nga ndaà kùitjongui-jen kò nga s'e-najen kjoa tsja.

3

Mé-ne ya kinikasén-ne Timoteo ján naxandá Tesalónica

¹ K'e nga mì tì kùì komà kichìkjoa isa-najen nga mejèn-najen sjiin-najen kó s'ín tìtsajnaà ján Tesalónica, k'oaá komà-ne nga kichibàya-najen nga kinikasén-jen jè 'ndsè Timoteo, kò ngajen yaá tsìtsajna-jen Atenas.

² Kinikasén-jen jè 'ndsee Timoteo, chi'nda-la Nainá-né nga tikoáá chjaya 'én ndaà-la Nainá xi kjoa ts'e Cristo koni ngajen. Koií xá kiikon-nò mé-ne nga kàtatsjá-isa-nò nga'ño nga isa 'ño ndaà kixi kitsajnaà koni s'ín mokjeiín-nò,

³ mé-ne nga nijngoò xi sihindaà-ne kjoa ts'e kjo'in xi titsanìkjoón. Jñò, jyeé ndaà tjiin-nò nga k'oaá s'ín tjínè-la nga kos'ín komat'iaán.

⁴ K'e nga tisa ya titsajnao-nòjen, k'oaá ki'mi-nòjen nga kjo'iín s'e-ná. I'ndeí, jyeé titsa'yaà nga k'oaá s'ín tímat'ioón.

⁵ Koií kjoa-la nga mì tì kiì kiskoòña kjoa-na; kisikasén Timoteo nga mejèn-na skoeé kós'ín titsajnaoò jè 'én xi mokjeiín-nò. Tímakájno-na tsà jye kiskoónachan-nò jè xita neí. Tsà koií nachrjein-la, xá xi ki'nè-jen, tsà ta kichjà-né.

⁶ I'ndeí, jè Timoteo jyeé j'ii-ne nga kiì Tesalónica; ndaà tsò okixi xi 'ya-najen it'aà tsajòn koni s'ín mokjeiín-nò kò nga tjín-nò kjotsjacha. K'oaá s'ín tsibénojmi-najen nga kjit'aà nachrjein tsjaá ma-nò nga níkijsjeèn-nájen. Tikoáá mejèn-nò nga jchaxkoón-nájen koni ngajen tikoáá mejèn-najen jchaxkoón-nòjen.

⁷ K'oaá ma-ne ndí 'ndsè kò ndí tichjaá, nas'ín kjo'in kò kjoa kondra titsajnajin-jen, k'e nga kina'ya-jen it'aà tsajòn nga 'ño ndaà mokjeiín-nò it'aà ts'e Cristo, tikoáá ngajen, 'ño ndaà kjòtsja-najen.

⁸ K'e nga kina'ya-jen nga kixi onguít'aà-là Nà'èn-ná, ngajen jyeé mì tì mé makájno-najen.

⁹ Ngajen, 'ño tse kjòtsja tjín-najen nga nguixkon Nainá xi kjoa tsajòn skanda mì-la kiì kjoehet'aà nachrjein nga k'oi-lajen kjondaà Nainá.

¹⁰ Kò nachrjein kò nitjen nokjoàt'aà-lajen Nainá mé-ne nga tsjá'nde-ne nga koma konguichoón-nòjen. Tikoá koma kokòya-isa-nòjen mé-ne nga kojngoò-ne 'én xi chijat'aà-nò koni s'ín mokjeiín-nò.

Kjoa bítsi'ba-la Pablo

¹¹ Mejèn-najen nga tije-ne Nà'èn-ná xi Nainá kò jè Jesucristo xi otíxoma-ná, kàtatsjá'nde-najen nga koma konguichoón-nòjen.

¹² Jè kjòtsjacha-la Nà'èn-ná isa ndaà kàtasijin inima-nò, mé-ne nga isa ndaà kòtsjacha-nò xinguiòo kò ngats'ii xita xi kjeí, koni ngajen, ndaà matsjacha-nòjen.

¹³ Jè Nà'èn-ná kàtatsjá-la nga'ño inima-nò mé-ne nga nimé jè sakòt'aà-nò kò tsjeè kitsajnaà nga nguixkon Nainá xi Nà'èn-ná k'e nga kjoíi ìjngoò k'a-ne Jesucristo xi otíxoma-ná nga tjikò ngats'ii xi ya chja-ne.

4

Kjoa xi sasén-la Nainá

¹ Ndí 'ndsè kò ndí tichjaá, k'oaá s'ín tsakoòya-nòjen nga k'oas'ín sijchá yijo-nò koni s'ín sasén-la Nainá. Kò kixii kjoa, jyeé kos'ín titsa'nè. Tanga i'ndeí bítsi'ba-nòjen tikoá bìnè-nòjen it'aà ts'e Jesús xi otíxoma-ná nga isa 'ño ndaà tjiil-la nga'ño yijo-nò nga kos'ín tikitasòn.

² Jyeé tjiin-nò kó s'ín tjín kjotíxoma xi kits'ii-nòjen koni s'ín kitsjaà-najen Jesucristo xi otíxoma-ná.

³ Jè xi mejèn-la Nainá nga nguì tsjeè sijchá yijo-nò, mì tì kjoa chijngui sis'in-là.

⁴ Nga jngoò ìjngoò-nò tikindaa yijo-nò; k'oas'ín tikjeén nga nguì tsjeè titsajna koni s'ín sasén-la Nainá.

⁵ Ki bìi'nde-là nga síkijne-nò jña kjoa ch'o xi síjé yijo-nò koni s'ín jña xita xi mìkiì beèxkon Nainá.

⁶ Jñò xi 'ndsee chibá it'aà ts'e Cristo, kì k'oaá tjín kjoa xi kaajñoò mé-ne nga mì xinguiòo chónachan-là nga mì xinguiòo jchatoón. Tsà k'oas'ín s'een, kjo'iín tsjá-nò Nainá. Jyeé k'oas'ín tsibénojmi-nòjen.

⁷ Nainá mìtsà koi xá kiichja-ná nga ch'o s'eén, jè xi mejèn-la nga tsjeè kitsajnaá.

⁸ Jè xi ochrjekàngui kjoa koi, mìtsà kjohítsjeèn ts'e xita ochrjekàngui, kjohítsjeèn ts'e Nainá ochrjekàngui; nga jè xi tsjá-nò Inima Tsjeè-la.

⁹ Mikiì mochjeén nga xojon skiit'aà-isa-nò xi ts'e kjoatjòcha. Nainá jye tsakóya-nò kós'ín sitjòchaà xinguiòo nga jngoò ìjngoò.

¹⁰ Jyeé kos'ín títsa'nè nga matsjacha ngats'iì xita xinguiòo xi títsajna kóhokji ya nangui Macedonia. Tanga k'oaá s'ín bìtsi'ba-nòjen nga isa ndaà tìtsjacha xinguiòo.

¹¹ Tinè-la yijo-nò nga 'nchán tìtsajna, kì kjoa-la xinguiòo chingàjñò, t'een xá-nò koni tijn xá xi ma-nò, koni s'ín jye k'i'mi-nòjen ngats'iì kjoa koi.

¹² Mé-ne nga skoexkón-nò jñà xita xi mikiì mokjeiín-la 'én-la Nainá. Koá jñò, nimé chijat'aà-nò.

K'e nga kjoí ìjngoò k'a-ne Na'èn-ná Jesucristo

¹³ Ndí 'ndsè ko ndí tichjaá, mejèn-najen nga kátasijìn-nò mé kjoa xi mat'in jngoò xita xi biyaá, mé-ne nga mì kobaá-nò koni jñà xita xi nimé nchikoña-la.

¹⁴ Koni s'ín mokjeiín-ná nga Jesús k'en, ìkjoàn jaáya-la, k'oa tìs'ín mokjeiín-ná nga Nainá sùkjaáya-la xita xi jye k'en, jñà xi mokjeiín-la it'aà ts'e Jesús.

¹⁵ Nga koií 'én bènojmiya-jen koni tsò 'én xi tsibíjna Jesús nga jñá xi tìtsajnakoaán skanda k'e nga kjoí ìjngoò k'a Na'èn-ná Jesucristo, mìtsà jñá kjiín ítjòn-lá jñà xi jye k'en.

¹⁶ Nga jè sobà Na'èn-ná kítjojen ìjngoò k'a-ne ngajmiì; 'ñó kichja nga tsjá okixi, kina'ya jngoò-la jta ts'e àkjale ítjòn, ko kina'ya-la chrjo-la Nainá; ìkjoàn jñà xita xi jye k'en nga mokjeiín-la it'aà ts'e Cristo, kjoaáya ítjòn-la.

¹⁷ Ìkjoàn jñá xi tákó tìtsajnakoaán jè nachrjein jè, yaá tjámijìn-tjen-koaá jjiìn ifi nga kixkjoaá Nainá ya jjiìn isén. K'oaá s'ín koma nga ya kìtsajnakoaá Nainá nita mé nachrjein-ne.

¹⁸ K'oaá ma-ne nga tije takòn xinguiòo nga tènójmiya-là koni tsò jñà 'én koi.

5

¹ Ndí 'ndsè ko ndí tichjaá, mikiì mochjeén nga xojon sit'aà-nò mé nachrjein-ne nga okoma.

² Jñò, nga jyeé ndaà tíjìn-nò, jè nachrjein k'e nga kjoí ìjngoò k'a Na'èn-ná Jesucristo, k'oaá s'ín kjoí koni jngoò xita chijé xi f'ì nga nìtjen k'e nga nìyá xi nchikoña-la.

³ K'e nga kìtso jñà xita: “Nchán tìtsajnaá, nimé kjoa tijn.” K'ée tà nìtoón kítjojenè-la kjoxkón koni s'ín mat'in jngoò chjoón xi bijchó nachrjein-la nga k'ndí 'beé, mikiì kojno-la.

⁴ Tanga jñò ndí 'ndsè ko ndí tichjaá, mìtsà jjiìn jñò tìtsajnaà jñò. Ko k'oaá ma-ne nga mì k'oaá s'ín komat'ioòn jè nachrjein jè, koni ma k'e nga ta nìtoón fi jngoò xita chijé.

⁵ Tanga jñò, ngats'ioò, iseèn choòn ñánda tìtsajnaà, ko nachrjein-né. Nga jñá, mìtsà jjiìn jñò tìtsajnaà ko mìtsà nìtjen tìtsajnaá.

⁶ K'oaá ma-ne nga mikiì k'oa s'een koni s'ín xita xi k'ejí nga mì tìtsajnandaà-jèn mé kjoa xi tijn k'oaá ngaya-la koni tsà kjiyijòfè. Mochjeén-né nga kìtsajnandaá koni jngoò xita xi tijnakon, xi nguì ndaà tijn ikon.

⁷ Nga jñà xita xi oyijòfè, k'ée oyijòfè k'e nga jñò. Ko jñà xi mach'i, k'ée mach'i k'e nga jñò.

⁸ Tanga jñá, yaá tìtsajnaá ñánda iseèn choòn. K'oaá ma-ne nga ndaà sijchá yijo-ná. Jè 'én xi mokjeiín-ná ko jè kjoatjòcha, jñà kosìko inima-ná koni jngoò soldado xi ndaà kìtsa inima-la jè chrjoa xi 'mì coraza. Ko k'e nga nguì tíjngoò takoán nga chiñá-lá jè nachrjein k'e nga kítjokàjñá kjo'in, jè ngaya-la tsí'nguién kichja xi osìko skò soldado.

⁹ Nainá mìtsà koi xá jaàjìn-ná nga kjo'in tsjá-ná, jé-né nga kítjokàjñá kjo'in it'aà ts'e Jesucristo xi otíxoma-ná.

¹⁰ Nga jè k'en ngajo-ná mé-ne k'e nga kjoí ìjngoò k'a-ne, tsà tìtsajnakoaán, ko tsà jye k'een, yaá kìtsajnakoaá.

11 K'oaá ma-ne nga t̄jetakòn kò t̄ji-là nga'ńó xinguiòo koni s'ín jye t̄itsa'nè.

Kjotíxoma xi kitsjaà Pablo

12 Ndí 'ndsè kò ndí tichjaá, n̄jé-nòjen kjondaà, jchaxkón x̄it̄a xi síxáko-nò nga j̄ñà t̄ítsajna ít̄jòn ya ij̄iìn naxandá-là Nainá kò nga okóya-nò.

13 Ndaà jchaxkón t̄ikoā ndaà t̄itsjacha x̄it̄a koi, jè kjoā-là xá xi s'ín. 'Nchán t̄ítsajnakoo xinguiòo.

14 K'oa t̄is'ín b̄itsi'ba-nòjen ndí 'ndsè kò ndí tichjaá, kòt'ìn-là nga k̄atasíxá j̄ñà x̄it̄a xi ta jyò t̄jíma nga maj̄ìn-là síxá; t̄i'ńó ikon j̄ñà xi indaà t̄jìn ikon; t̄ichját'aà-là j̄ñà xi tsj̄ìn-là nga'ńó ya ij̄iìn in̄ima-là; kò k̄atas'e-nò kjoatsejta it'aà ts'e ngats'ìi x̄it̄a-là Nainá.

15 Tsà k'e nga mé kjoā xi ch'o síko-nò x̄it̄a xi kj'eíi, t̄ikinda xinguiòo nga mì s̄ij̄ndà ngajo-ne. T̄a saá t̄ìnè-là yijo-nò nga kjit'aà n̄achrjein ndaà t̄ikoo xinguiòo kò ngats'ìi x̄it̄a xi kj'eíi.

16 Kj̄it'aà n̄achrjein tsja t'è-là in̄ima-nò.

17 T̄itsi'ba kj̄it'aà-là Nainá.

18 N̄it̄a mé kjoā-ne, t̄ji kj̄it'aà-là kjondaà Nainá. K'oaá s'ín mej̄èn-là Nainá nga k'oa's'ín s'een ngats'ioò xi mokjeiìn-nò it'aà ts'e Cristo Jesús.

19 Kì bichjoá ikòn-là xá xi s'ín In̄ima Tsjeè-là Nainá.

20 Kì n̄achrjekànguiòò 'én-là x̄it̄a xi ch̄ja ngajo-là Nainá.

21 Ndaà ndaà chít'aà yije ngats'ìi 'én. J̄ñà t̄ikítsajnatjò xi ndaà tsò.

22 Ngats'ìi xi ch'o tsò, k̄i k̄i n̄ikitasòn.

23 Jè Nainá xi tsj̄a kjoā'nchán, jngoò k'a tsjeè k̄atasíkítsajna-nò. Ndaà k̄atasíkinda in̄ima-nò, yijo-nò kò kjohítsjeèn-nò mé-ne nga n̄imé jé s'e-nò jè n̄achrjein k'e nga kjoíi ìjngoò k'a jè Jesucristo xi otíxoma-ná.

24 Nga x̄it̄a kixi-né jè Nainá xi xó k̄iichja-nò, s̄ikitasòn yijeé kjoā koi.

Kó kitsò Pablo nga síhixat'aà x̄it̄a

25 'Ndseé kò tichjaá, t̄itsi'batj̄i-nájen.

26 T̄iixot'aà ngats'ìi x̄it̄a 'ndseé nga nguì kò in̄ima-nò.

27 'An, tsja-nò okixi nga nguixkòn Na'èn-ná nga k̄ataxkejiìn-là xojon jè ngats'ìi x̄it̄a naxandá-là Nainá.

28 Jè k̄at̄ijnakò-nò kjondaà-là Jesucristo xi otíxoma-ná.

Xojoṅ carta-la San Pablo xi ma-ne jò xi kiskiì-la xita naxandá-la Cristo xi títsajna Tesalónica

Kó tsò Pablo nga síhixat'aà jñà xita naxandá-la Cristo xi títsajna Tesalónica

¹ Jñò xi xita naxandá-la Nainá maà xi títsajnaà ya naxandá Tesalónica nga ya títsajnakjoòkoo Nainá xi Na'èn-ná kò jè Jesucristo xi otíxoma-ná, 'an xi 'mì-na Pablo títsajna hixot'aà-nòjen kò Silvano [tíjé-ne xi 'mì Silas] kò Timoteo.

² Nainá xi Na'èn-ná, kò jè Jesucristo xi otíxoma-ná kàtatsjá-nò kjoṅdaà kò kjoa'nchán ya ijìin inima-nò.

Kó tsò Pablo nga tsjá-la kjoṅdaà Nainá

³ Ndí 'ndseé kò tichjaá mochjeén-nè nga kjit'aà nachrjein k'oií-lajen kjoṅdaà Nainá xi it'aà tsajòn. Ndaà tjin nga k'oas'ín s'en-jen, koií kjoa-la nga nachrjein inchijòn isa ndaà mokjeiín-nò kò isa ndaà matsjacha xinguiòo nga jngoò ijngoò.

⁴ K'oaá ma-ne nga ndaà matsja-najen it'aà tsajòn; k'oaá s'ín bènojmí-lajen jñà xita naxandá-la Cristo xi xìn nangui títsajna nga jñò, ndaà mokjeiín-nò kò ndaà chíkjoako-nò nas'ín 'ñó fì tjingui kondra-nò xita kò nas'ín kjo'in títsajnikjoón.

⁵ Ngats'ii kjoa koi, Nainá k'oaá s'ín okó nga kixi koiṅdaàjìn; kò k'oaá ma-ne nga jñò, ok'in-nò nga ya kítsajnajìn-là xita xi jè tíhotíxoma-la, nga tikoi-ne kjoa-la Nainá nga kjo'in títsajnikjoón.

⁶ Nainá, xita kixi-né nga tsjá-la kjo'in jñà xita xi kjo'in tsjá-nò.

⁷ Kò jñò xi kjo'in títsajnikjoón, tsjá-nò kjoa'nchán kò ngajen, k'e nga kjinchrobàjen ngajmii Jesucristo xi otíxoma, tjiko àkjale-la xi 'ñó tse nga'ñó tjin-la nga kjinchrobàjen-jìin ni'ín.

⁸ Nainá tsjá-la kjo'in jñà xita xi mìkii beèxkón ni mìkii síkitasòn 'én ndaà-la Nainá xi kjoa ts'e Jesucristo xi otíxoma-ná.

⁹ Xita koi, 'ñó tse kjo'in sìkjeiín nita kjé-ne; mì yaá kítsajna nguixkòon Na'èn-ná, kò mìkii skoe kjoajeya-la xi 'ñó tse nga'ñó tjin-la.

¹⁰ Kjoa koi, k'oaá s'ín koma jè nachrjein k'e nga kitjojen ijngoò k'a Na'èn-ná mé-ne nga it'aà ts'e xita-la jeya kijnane kò ngats'ii xita xi mokjeiín-la it'aà ts'e, ta koxkón-la. Tikoáá jñò yaá kítsajnaà, koií kjoa-la nga kòkjeiín-nò koni s'ín tsibènojmí-nòjen.

¹¹ K'oaá ma-ne nga kjit'aà nachrjein bítsi'ba-lajen Nainá it'aà tsajòn, mé-ne nga Nainá kitso nga ok'in-nò nga ya kinókjoa-nò naxandá-la nga xó k'oaá s'ín kiichja-nò. Nga kò nga'ñó-la kàtasíkitasòn ngats'ii kjoṅdaà xi jñò sasén-nò kò xá xi 'nè nga Na'èn-ná ma'ñót'aà takòn.

¹² K'oaá s'ín koma nga it'aà tsajòn jeya kijnane Jesucristo xi otíxoma-ná. Tikoá jè ndaà sìkítsajna-nò koni s'ín tjin-la kjoṅdaà jè Nainá kò jè Jesucristo xi otíxoma-ná.

2

K'e nga kjoii ijngoò k'a-ne Jesucristo

¹ Ndí 'ndseé kò tichjaá, i'ndeij jè kénojmí-nòjen kó s'ín koma k'e nga kjoii ijngoò k'a Jesucristo xi otíxoma-ná kò k'e nga ya koxkóyat'aà-lá. K'oaá ma-ne bítsi'ba-nòjen

² tsà yá xita xi kitso-nò nga jyeé j'ii ijngoò k'a Jesucristo, kì tà nìton mokjeiín-nò; kì tsakjoòn-là tsà yá xita xi kitso-nò: k'oaá tsò 'én-la Nainá xi kjoṅgatsja Pablo; k'oaá s'ín chjaya, kò k'oaá s'ín kisikasén jngoò xojoṅ.

³ Kì yá xita xi konachan-nò. Nga jè nachrjein k'e nga okoma, ítjòn s'e nachrjein nga jñà xita, 'ñó kondra kítsajna-la Nainá. Ikjoàn ta nitoón kotsejèn jè xita xi 'ñó ch'o s'iiin, jè xi tjinè-la nga kjo'in sìkjeiín nita kjé-ne.

⁴ Xità jè, jè xi kondra kájna-la ngats'iì xi Nainá tsò-la xità kò nità mé-ìsa-ne xi beèxkón nga jè mejèn-la kájna ítjòn. Skanda yaá kájnya ingò ítjòn-la Nainá koni tsà jè sobà Nainá, k'oaá kító-la yijo-la nga Nainá jè.

⁵ ¿A mì bítsjeèn-nò k'e nga sa ya tsohótijnako-nò, k'oaá kixan-nò nga k'oaá s'ín koma?

⁶ I'ndeì jye tíjìn-nò mé kjoa xi bíchjoà ikòn-la xità jè nga mì xátí f'iì; skanda k'eé kjoíí k'e nga kichóya nachrjein-la.

⁷ Jè nga'ño-la kjoach'o, jyeé tísíxá'ma ì isò'nde, tanga tíjna jngoò xi tíjna ikòn nga mìkìì tsjá'nde kò ta jè chija nga tjáxìn.

⁸ Kò ikjoàn k'eé kotsejèn jè xità xi ch'o s'ín. Tanga Jesucristo xi otíxoma, ta jngoò 'én kichja nga tsjá-la kjo'in nità kjé-ne. Tà ma tà jé nga ote kji nga kjoíí, jngoò k'a kjoáxìn nga'ño-la.

⁹ K'e nga kjoíí jè xità xi ch'o s'ín, jè xità neíí tsjá-la nga'ño nga kjìn skaya kjoxkón kokò xi mìtsà kixì kjoa.

¹⁰ Sìikjeén yije kjoa xi ch'o tjín nga skónachan-la xità xi kjo'in sìikjeín nità kjé-ne, koíí kjoa-la nga jña xità koi mìkìì matsjakeè xi kjoa kixì xi ma kítjokàjìn-ne kjo'in kjoa ts'e jé-la.

¹¹ K'oaá ma-ne Nainá tsjá'nde-né nga tíjna jngoò xi skónachan-la xità koi, mé-ne kàtakjeín-la kjoa ndiso,

¹² nga kàtas'e-la kjo'in ngats'iì xi mìkìì mokjeín-la kjoa kixì. Nguì ta kjoa ch'oó sasén-la.

Mé kjoa-ne nga jaàjìn-ná Nainá

¹³ Ndí 'ndsè kò ndí tichjaá, mochjeén-né nga kjit'aà nachrjein 'biì-lajen kjondaà Nainá xi it'aà tsajòn xi 'ño matsjakeè-nò Na'èn-ná, nga xó k'oaá s'ín jaàjìn-nò Nainá kóni nga tisa tàts'en-la kjoa, mé-ne nga kítjokàjñoò-nò kjo'in, nga jè Iníma Tsjeè-la Nainá sítsjeèya-nò kò nga ndaà mokjeín-nò xi kjoa kixì.

¹⁴ Xó k'oaá s'ín kiichja-nò Nainá it'aà ts'e 'én ndaà-la Nainá xi kjoa ts'e Cristo xi ngajen nokjoàya-jen, mé-ne nga jño, tìkoà s'e-nò kjoajeya-la Jesucristo, jè xi otíxoma-ná.

¹⁵ Ndí 'ndsè kò tichjaá, k'oaá s'ín kixì títajna. Kì nìjchàajìn-jèn jña 'én kixì-la Cristo xi ngajen kinikatoya-nòjen, jña xi ta 'én kinokjoà-nòjen kò xi xojon carta tsakoòya-nòjen.

¹⁶ 'Aán síjèt'aà-la Jesucristo, jè xi otíxoma-ná kò jè Nainá xi Na'èn-ná, jè xi 'ño matsjakeè-ná nga tsjá-ná kjoajetakòn-la xi mìkìì kjoehet'aà, kò tsjá kjotjò-ná kjondaà-la nga tíjngoò takoán nga títachiña-lá.

¹⁷ K'oaá s'ín síjèt'aà-la nga isa tse nga'ño kàtatsjá-la iníma-nò mé-ne nga isa kixì kítajnaà koni s'ín 'nè kjoa xi ndaà tjín kò koni s'ín nokjoà 'én xi ndaà tsò.

3

K'oaá tsò Pablo nga mejèn-la sìtsi'batjì

¹ Xi fehet'aà-ne ndí 'ndsè kò ndí tichjaá, títisi'batjì-nájen mé-ne jè 'én-la Nainá nìton xkì xi ján katijchó, tìkoà ndaà kàteèxkón jña xità xi skoétjò 'én koni s'ín kì'nè jño nga ndaà kiyaxkón.

² Tìkoà títisi'batjì-nájen mé-ne nga jè Na'èn-ná kì kii tsjá'nde nga ch'o sìiko-najen xità ts'en kò xi ch'o s'ín, nga mì tà ngats'iì xità mokjeín-la.

³ Na'èn-ná xità kixì-né, síkitasòn 'én-la, kixì sìkítajna-nò tìkoà sìikinda-nò mé-ne nga mì ch'o sìiko-nò jè xità neíí.

⁴ Nga it'aà ts'e Na'èn-ná mokjeín-najen nga títisanìkitasòn-nò koni s'ín títisahotíxoma-nòjen kò tákó k'oaá s'ín s'een-ìsa.

⁵ Jè Na'èn-ná kàtasíchját'aà-nò nga kòs'ín tjòcha jchaa xinguiòo koni s'ín tjòkèè kijtseè-nò Nainá; kò nga kàtachíkjoako-nò kjo'in koni s'ín kichikjoako-la Cristo.

Mochjeén-né nga kàtasíxá jña xità

⁶ Ndí 'ndsè kò ndí tichjaá, k'oaá s'ín bìnè-nòjen, it'aà ts'e Na'èn-ná Jesucristo, kì tì ya tsjahijtako-nò jñà xità 'ndseé kò tichjaá xi majìn-là síxá, jñà xi mìkìl k'oas'ín síkitasòn koni s'ín tjín kjoa kixi xi ngajen kinikatoya-nòjen.

⁷ Jñò, jyeé tjiìn-nò nga mochjeén-né nga chjìnguì-nájen koni s'ín ki'nè-jen k'e nga ya tsitsajnakò-nòjen; mì jyò tsitsajna-jen, kinixá-nájen.

⁸ Mìtsà ta kjotjò chichi-jen. Ta saá 'ñó kinixá-jen kò nachrjein kò nìtjen kinikijta-jen yijo-najen, mé-ne nga mì jñò sùjti-nòjen.

⁹ Kinixá-nájen nas'ín tji'nde-najen nga sjjé-nòjen mé tsojmì xi mochjeén-najen. Jè xi mejèn-najen nga chjìnguì-nájen mé-ne k'oa tìs'ín s'een koni 'nè-jen.

¹⁰ K'e nga tsitsajnakò-nòjen k'oaá s'ín ki'mì-nòjen: Tsà jngoò xità xi majìn-là síxá, tìkoa mìkìl tji'nde-là nga kòkjen.

¹¹ Jyeé kina'yà-jen nga tjímajìl i'nga xità xi majìn-là síxá nga tà jyò binchima, nga ta jñà chjajìl chja'a ñánda mì jñà oko-là.

¹² Jñà xità koi, it'aà ts'e Jesucristo xi otíxoma-ná, k'oaá s'ín bìtsi'ba-lajen, tìkoa bìnè-lajen nga kàtasíxá, mé-ne nga kàtátsji'a-ne yijo-là.

¹³ Jñò ndí 'ndsè kò ndí tichjaá, kì bijta-nò nga ndaà 'nè.

¹⁴ Tsà tjín i'nga xi mìkìl síkitasòn koni tsò xojon jè, chítsejèn-là yá-né, kì yaá báhijtako, mé-ne nga kosobà-là.

¹⁵ Tanga kì k'oaá s'ín nìkò koni jngoò xità kondra, k'oaá s'ín tènójmíya-là nga 'én ndaà chikò nga 'ndseé chibá.

'Én xi fehet'aà-ne

¹⁶ Tjje-ne Na'èn-ná xi tsjá kjoa'nchán, kjit'aà nachrjein kàtatsjá-nò kjoa'nchán nità mé kjoa-ne. Na'èn-ná kàtìjnakò-nò ngats'ioò.

¹⁷ Nga jye tífehet'aà xojon jè, koó ndsaa tìkjiì-nò 'an xi 'mì-na Pablo, nga tìsìhixat'aà-nò. Nga k'oas'ín s'iaàn firma-na, kò k'oaá s'ín kjiaà.

¹⁸ Ngats'ioò, jè kàtìjnakò-nò kjondaà-là Jesucristo xi otíxoma-ná.

Xojon carta-la San Pablo xi kiskii ítjòn-la jè Timoteo

Kó tsò Pablo nga síhixat'aà Timoteo

¹ 'An, Pablo, tìkji-lè xojon jè, nga 'an tsibíxáya-na Jesucristo, nga k'oas'ín kitsjaà okixi Nainá xi ochrjekàjìin-ná kjo'in kò Nà'èn-ná Jesucristo nga titsachiñá-lá kjondaà-la.

² Ngaji Timoteo, koni tsà ki'ndí ts'an xan-lè nga 'an tsakoòyandaà-lè koni s'ín mokjeiín-ná it'aà ts'e Cristo. Nainá xi Nà'èn-ná kò Nà'èn-ná Jesucristo kàtatsjá-lè kjondaà, kàtahimakeè-lè, kàtas'e-la kjoa'nchán jìiìn inìma-lè.

Pablo tsibínè-la Timoteo nga síkixiya xita xi kj'eí kjohítsjeèn okóya

³ Koni s'ín tsibìtsi'ba-lè k'e nga kiaà nangui Macedonia, yaá tìjni naxandá Éfeso mé-ne nga kichakjáya-la xita xi mìtsà 'én kixi nchihokóya jìiìn naxandá-la Nainá.

⁴ Ngaji Timoteo, k'oaá s'ín tìjné-la jñà xita koi, kì kii sí's'in-la cuento jchínga xi mìtsà kixi kjoa tìkoa kì kii sí's'in-la kjoa xi mìkii fehet'aà ts'e xita jchínga kjòtseé. Kjoa koi nìmé chjì-la. Tà síkjaán-kjoò-ná. Mì kì osìko-ná nga mokjeiín-ná it'aà ts'e Cristo mé-ne nga koma síkitasoán koni s'ín mejèn-la Nainá.

⁵ Xá xi tìbìnè-lè, jè-né nga tsjeè tìjna inìma-ná, nga tsjeè tìjn kjohítsjeèn-ná koa nga nguì ndaà mokjeiín-ná; yaá nchrobát'aà-ne nga sítjòchaà xinguiáá.

⁶ Tanga tìjn i'nga xita xi xìn ndiyá tìjmayá; tà koi joóya-ne 'én xi nìmé chjì-la.

⁷ Mejèn-la maestro ts'e kjotíxoma-la Nainá kítsajna. Tanga tìjñà-ne, skanda mìkii machiya-la 'én xi chja nga 'ñó chja nga tsò nga kixi kjoa.

⁸ Tìjìin-ná nga jè kjotíxoma xi kitsjaà Nainá, ndaà tìjn tsà k'oas'ín kochjeén koni s'ín mejèn-la Nainá.

⁹ 'Ya-ná, kjotíxoma-la Nainá, mìtsà ts'e jñà xita xi ndaà s'ín. Ts'e-né jñà xita xi mìkii 'nchréñjon koa mìkii síkitasòn; ts'e-né xita xi mìkii beèxkón Nainá koa ótsji jé; ts'e-né xita xi mì tsjeè tìjn kjohítsjeèn-la xi tjé beèhikon jè kjoatsjeè-la Nainá; ts'e-né xita xi sík'en na'èn-la kò nea-la, kò ngats'ì xita xi xita sík'en.

¹⁰ Tìkoa ts'e-né jñà xita xi kjoa chijnguí s'ín, jñà xi xita xa'nda, xita xi xíkín fiko chijé nga otìjna. Tìkoa ts'e-né jñà xita ndiso kò xita xi mìtsà 'én kixi chja, jñà xita xi ch'o tìjn kjoa xi s'ín xi kondra ts'e kjohítsjeèn xi kixi tìjn.

¹¹ Jè kjohítsjeèn kixi, k'oaá tìjn xi okóya jñà 'én jeya-la Nainá xi kjoa ts'e Cristo. Nainá xi 'ñó jeya tìjna, jè kisingatsja-na nga 'an kichjàya 'én koi.

Mé kjoa-ne nga kitsjaà-la kjondaà Nainá jè Pablo

¹² Tsjaà-la kjondaà Nà'èn-ná Jesucristo. Ndaà chjì-la nga kitsjaà-na nga 'ñó tìkoa ndaà kijtseè ikon-na nga 'an kisingatsja-na xá-la,

¹³ nas'ín k'e nga sa ítjòn, 'ñó ch'o kis'iaàn; kichjàjno-la Nainá; kondra kìtjìngui-la; toòn kijtseè xita-la. Tanga kjòhimakeè-na Nainá, nga kj'eè kii be, koa kj'eè kii mokjeiín-na it'aà ts'e Cristo.

¹⁴ Tanga jè kjotjò-la Nà'èn-ná isaá 'ñó tse kitsjaà-na tìkoa kishiseèn-na nga mokjeiín-na kò kitsjaà-na kjoatjòcha-la nga jè Cristo tìjnakoaa.

¹⁵ Jñà 'én koi, nguì 'én kixi-né. Mochjeén-né nga kòkjeiín yije-la xita nga jè Jesucristo j'ìi i isò'nde nga kochrjekàjìin kjo'in ngats'ì xita xi jé tìjn-la. Ngats'ì xita xi ch'o s'ín, 'aán tìjna ítjoàn nga tsohotsjià jé.

¹⁶ Nas'ín 'ñó ch'o kis'iaàn, Nainá kis'e-la kjohimatakòn it'aà ts'an. Jñà xita, k'e nga skoe kó s'ín kishìko-na Nà'èn-ná Jesucristo, nga 'ñó tìjn-la kjoatsetakòn, tìkooá kòkjeiín-la it'aà ts'e Cristo nga s'e-la kjoabinachon nita mé nchrjein-ne.

17 Nainá, 'nga kàtìjna, kàtas'e-la kjoajeya nìta mé nó, nìta mé nachrjein-ne nga jè otìxoma nìta mé nachrjein-ne koa mìkìi kjoehet'aà nachrjein-la nìta kjé-ne, tìkoa mìkìi tsejèn ñánda tìjna koa nguì jè tajngoò xi Nainá. K'oas'ín kàtama.

18 Ngaji Timoteo koni tsà ki'ndí-na xan-lè, sìngatsja-lè 'én koi, koni s'ín kitsò xìta xi kisikjeén Nainá nga kiìchja ìt'aà tsiji, mé-ne nga ìt'aà ts'e 'én koi, tsjá-lè nga ñó nga ndaà sixá-la Nainá koni s'ín sixá soldado.

19 Ndaà kàtakjeiín-lè ìt'aà ts'e Cristo, tìkoa ndaà kàtìjna kjohìtsjeèn-lè. Tjín i'nga xìta xi mìkìi kisis'in kjohìtsjeèn xi ndaà tjín. K'oaá komà-ne nga kisikje-la ikon nga mì tì kiì kòkjeiín-la.

20 K'oaá s'ín komàt'in jè Himeneo ko Alejandro xi 'an kisikìtsajna koa xìta nejí mé-ne nga kàtakixiya-ne nga mì taxki kichjajno-la Nainá.

2

Mochjeén-né nga kítsi'batjiá xinguiáá

1 Jè kjoa xi isa 'ño mochjeén, k'oaá s'ín tìbìnè-nò nga titsi'batjiò ngats'ìi xìta, tìnókoat'aà-la Nainá, titsi'ba-la Nainá, tjiì-la kjòndaà ìt'aà ts'e ngats'ìi xìta xi tjín nga tìtsa isò'nde.

2 Mochjeén-né nga kítsi'batjiá xi xìtaxá ítjòn tìtsajna ko ngats'ìi xi kjotìxoma tjíya tsja mé-ne nga 'nchán kìtsajna-ná tìkoa tafi tafi sijchá yijo-ná tìkoa jchaxkoán Nainá ko jchaxkoán kjoa xi ndaà tjín.

3 K'e nga k'oas'ín s'eén ndaà tjín koa ndaà sasén-la Nainá xi ochrjekátjì-ná kjo'in.

4 Nainá, jè xi mejèn-la nga ngats'ìi xìta kítjokàjìin kjo'in tìkoa sijiin-la kós'ín tjín xi kjoakixi.

5 Tà jngoò ma Nainá; tìkoaá tà jngoò ma xìta xi chjatjì-ná ìt'aà ts'e Nainá, jè xìta xi Jesucristo 'mì.

6 K'e nga kichíya nachrjein-la Nainá, Jesucristo kitsjaà kjotjò yijo-la nga k'en mé-ne nga kochjítjì-ne ngats'ìi xìta nga ma kítjokàjìin kjo'in. K'oaá s'ín kis'ìin nga kisijiin yije-la xìta.

7 'Aán kjòngatsja xá jè nga 'an tsibíxáya-na Cristo nga kichjàya 'én ndaà-la tìkoa kokoòya-la jña xi mìtsà xìta judío nga kòkjeiín-la ìt'aà ts'e Cristo tìkoa skoe xi kjoakixi. 'Én kixí xi tìxan-lè, mìtsà 'én ndiso.

8 It'aà ts'e xìta x'in, mejèn-na k'e nga chjat'aà-la Nainá nìta ñánda i'nde tìtsajna, tsjeè kàtasíkìtsajna inìma-la k'e nga skímìtjen-la tsja Nainá. Kì kjoajti tjiin inìma-la, koa kì nchikjaán-kjoò-jèn.

9 Tìkoa jña íchjín, jè nikje xi ndaà ok'in-la kàtakjá. Kì nikje chjí ókjá. Kì taxki sí'ñojno sko ko yijo-la tsojmì xi 'ño chjí koni kichá oro ko perla. Chiba chiba kàtíndaà yijo-la mé-ne nga mì xìta skótsejèn-jno-ne.

10 Tà saá xá xi ndaà tjín kàtas'ín koni s'ín ok'in-la jña íchjín xi beèxkón Nainá.

11 Jña íchjín jyò kàtìtsajna k'e nga skóta'yà 'én-la Nainá; kàta'nchréñijon-la jè xi okóya.

12 'An, mìkìi tsjaà'nde nga jña íchjín kotìxoma-la xi xìta x'in koa kòkòya-la. Íchjín, jyò kàtìtsajna.

13 Koií kjoa-la jè Nainá ítjòn tsibíndaà Adán, iskan tsibíndaà Eva.

14 Mìtsà jè Adán xi kichonachan-la; jè Eva xi chjoón-la. K'oaá s'ín komà-ne nga kisakò jé-la.

15 Tanga, jña íchjín, tsà sùkìtasòn koni s'ín mejèn-la Nainá nga s'e-la ixti, kítjokàjìin kjo'in. Mochjeén-né nga ndaà kòkjeiín-la ìt'aà ts'e Cristo, nga s'e-la kjoatjòcha, nga tsjeè kìtsajna ko Nainá koa ndaà sijnchá yijo-la.

3

Kjoa xi mochjeén ts'e xita xi síkinda naxandá-la Nainá

¹ 'Én jè, ngui 'én kixi-né: Tsà tjín jngoò xita xi mejèn-la xá nga naxandá-la Nainá síkinda, 'ño ndaà tjín xá xi mejèn-la.

² Jè xita xi síkinda naxandá-la Nainá mochjeén-né nga ndaà s'iin mé-ne nga mì yá xi ch'o kitso-la. Jngoò chjoón s'e-la; jngoò xita xi indaà tjín ikon; xita xi ndaà kosòn-la yijo-la; xita xi yaxkón nga ndaà tísíjchá yijo-la; xi ndaà sí's'in-la xita xi bijchókon; xita xi ndaà ma-la okóya;

³ xi mìtsà xita ch'i; xi mìtsà xita kjaán-ko; xi mìtsà ton chijé kjòtsjakeè. Jè xita xi mochjeén xi ndaà xita, xi mìtsà kjoasiì sí's'in-la, xi mìtsà ton kájno-la.

⁴ Mochjeén-né nga ndaà kjotíxoma-la xita ni'ya-la; ndaà síkixi ixti-la mé-ne nga s'e-la kjoxkón ixti tikoá síkitasòn koni s'ín tsò xita jchínga-la.

⁵ Tsà mìkiì ma-la otíxoma-la xita ni'ya-la, ¿kó s'ín koma síkinda xita naxandá-la Cristo?

⁶ Jè xi síkinda xita naxandá-la Nainá jè xi mochjeén xi kjòtseé kòkjeiín-la, mé-ne nga mì 'nga ikon koma-ne nga mì kjo'in s'e-la koni komàt'in xita neíí.

⁷ Mochjeén-né nga ndaà síjchá yijo-la mé-ne nga skoexkón-ne jña xita xi mìkiì mokjeiín-la it'aà ts'e Cristo nga mì ch'o kíjna, nga mì jè xita neíí síkijne-la.

Kjoa xi mochjeén ts'e xita xi síichját'aà-la naxandá-la Nainá

⁸ K'oaá tís'ín tjín ts'e xita xi síkitasòn xá nga síichját'aà-la xita naxandá-la Nainá, jña mochjeén xita xi yaxkón nga ndaà nchisíjchá yijo-la. Mìkiì koma síkijatjìya-la 'én xi chja. Mìkiì koma xán koahijtakò. Mìkiì koma ton chijé kotsjakeè.

⁹ Mochjeén-né nga ndaà kàtafit'aà-la kjoatjí'ma xi jye tsakó Nainá koni s'ín mokjeiín-ná it'aà ts'e Cristo. Tikoá mochjeén-né nga tsjeè kàtasíkítsajna kjohítsjeèn-la.

¹⁰ Jña xita xi síkitasòn xá nga síichját'aà-la xita naxandá-la Nainá, ítjòn kàtachit'aà tsà nímé kjoa tjín-la, ikjoàn, k'eé kàtasíkitasòn.

¹¹ K'oaá tís'ín tjín ts'e íchjín; mochjeén-né nga yaxkón nga ndaà nchisíjchá yijo-la. Mì 'én ndiso kichja. Indaà k'oeè ikon. Ndaà síkitasòn yije nita mé kjoa-ne.

¹² Jè xita xi síkitasòn xá nga síichját'aà-la xita naxandá-la Nainá, mochjeén-né nga tà jngoò chjoón s'e-la. Ndaà kàtatíxoma-la ixti-la ko xita ni'ya-la.

¹³ Jña xita xi ndaà síkitasòn xá koi, isa ndaà jchaxkón koa isa 'ño ndaà s'e ikon koni s'ín mokjeiín-la it'aà ts'e Cristo Jesús.

Kjoa'ma-la Nainá

¹⁴ Mejèn-na nga kjíkon nítòn-lè, tanga tsà koií nàchrjein-la kochrjein-ya-na, k'oaá ma-ne tikjìl-lè xojon jè

¹⁵ mé-ne nga jcha-ne kós'ín kítsajnakoaá xita xinguiáa ya jjiìn naxandá-la Cristo xi tíjnakon. Jè naxandá-la Cristo tjíya tsja 'én kixi-la Nainá.

¹⁶ Ngui 'én kixi-né nga 'ño jeya jè kjoa'ma-la Nainá xi jye tsakó koni s'ín yaxkoán Nainá: Nainá, xitaá komà nga j'ii ì isò'nde;

it'aà ts'e Inima Tsjeè-la ki'ya-la nga tjín-la kjoakixi;

jña àkjale kijtseè-né;

'én-la kinokjoàyajjiìn-la ngats'ii xi mìtsà xita judío;

nga tíjtsa isò'nde kòkjeiín-la xita it'aà ts'e Cristo;

jeya kitjoétjò-ne ján ngajmiì.

4

Xita xi mìtsà 'én kixi kokòya

¹ Tanga jè Inima Tsjeè-la Nainá ndaà bénojmíya-ná nga tsò: k'e nga chiba nachrjein chija-isa-la nga kjoí l'ngò k'a Cristo, s'eé xita xi mì tì kii kòkjeín-la it'aà ts'e Cristo. Yaa kjit'aà-la inima ch'o-la neí xi konachan koa kjohítsjeèn-la neí sikitason.

² Jña kji'nchré-la xita ndiso xi jò isén tjin-la. Xita koi, nga jye kjótáajìin kjohítsjeèn-la, mì tì kindá fiko-ne kjoach'o xi nchis'in.

³ Jña xita koi mìkii tsjá'nde nga kixan xita. Tikoáá tjin tsojmì xi ma chine, mìkii tsjá'nde nga koma chjine. Tanga tsojmì koi, Nainá tsibíndaà nga tji'nde-la nga koma skine xita xi mokjeín-la kò xi ndaà tjiin-la kjoakixi. K'e nga skine tsjá-la kjondaà Nainá.

⁴ Ngats'ii tsojmì xi Nainá tsibíndaà, ndaà-né, mìkii koma kináchrjenguaá. Koma sikjeén yije tsà k'oi-lá kjondaà Nainá k'e nga sikjeén.

⁵ Jè 'én-la Nainá siitsjeè tsojmì k'e nga kinókjoat'aà-lá.

Jngò ch'i'nda-la Cristo xi ndaà síxá

⁶ Ji, tsà k'oas'in kókóya-la jña xita xinguaá kjoa koi, 'ño ndaà sixát'aà-la Cristo Jesús. Skason-isa kjohítsjeèn-lè it'aà ts'e 'én xi mokjeín-ná kò kjohítsjeèn xi ndaà tjin xi ndaà tì'mitjingui-la.

⁷ Tanga kì taxki nìs'in-la 'én jhínga ts'e isò'nde xi nímé chjí-la xi tà kjohítsjeèn-la xita. Tìnè-la yijo-lè nga chaxkoín Nainá.

⁸ Tsà kìnè-lá yijo-ná nga k'oi-lá nga'ño, sakó chiba-la kjondaà, tanga tsà kìnè-lá inima-ná nga ndaà jchaxkoán Nainá, isaá sakó-ná kjondaà xi mochjeén-ná nga kjit'aà nachrjein. Sakó-ná kjondaà i it'aà nangui kò nga koma iskan tikoáá sakó-ná ján ngajmì.

⁹ 'Én koi, 'én kixi-né. Mochjeén-né nga kàtakjeín yije-la xita.

¹⁰ Koií k'oas'in binè-lá xá yijo-ná, tikoá nìkjaán kjo'in nga jè titsachiñá-lá Nainá xi tijnakon xi ma-la ochrjekàjìin kjo'in ngats'ii xita. Jña-né xi kitjokàjìin kjo'in xi mokjeín-la it'aà ts'e Cristo.

¹¹ K'oáá s'in tatixoma-la jña xita, k'oa tì s'in takóya-la 'én koi.

¹² Kì yá xi ochrjekàngui-lè nas'in nguì sa ixti-isi. Yá jjiin-la xita xi mokjeín-la it'aà ts'e Cristo, ji, ndaà t'in itjòin mé-ne skingui-ne kós'in nokjoi, kós'in 'nì, kós'in tjòcha 'yi Nainá kò xita, [kós'in ndaà tjina inima-lè], kós'in mokjeín-lè it'aà ts'e Nainá, kós'in tsjeè tìnjchí yijo-lè nga nguixkon Nainá.

¹³ Skanda k'e nga kìchokon-lè, k'oáá s'in t'iin: tìxkejìin-la xita 'én-la Nainá; tìnè-la nga 'ño kàt'eé-la ikon; tikoá takóya-la.

¹⁴ Kì nìjchàajìin-jèn nga sixát'aà-la Nainá it'aà ts'e kjotjò xi kitjoé-lè k'e nga jña xita jhínga-la naxandá-la Nainá tsohósòn-lè tsja nga jña kiihja ngajo-la Nainá it'aà tsiji.

¹⁵ It'aà ts'e kjoa koi, kjit'aà nachrjein tìyakoii, tikoá tìxákoii mé-ne nga skoe yije-ne xita nga ndaà tímajhíngakoi.

¹⁶ Ndaà tìkindji yijo-lè mé xi 'nì. Tikoá t'iin kindá jè 'én xi okoòya-la xita. Kixi tìjni. Tsà k'oas'in sikitason, ngaji, kitjokàjìin kjo'in; tikoáá kitjokàjìin kjo'in jña xita xi 'nchré-lè.

5

Kjondaà xi mochjeén it'aà ts'e xita xi kjeí

¹ Jña xita xi jye 'ño jhínga, kì taxki nìkaká-la; k'oáá s'in tènnojmíya-la koni tsà na'èn-lè ma; tikoá jña xi isa ixti-isa, k'oáá s'in tènnojmíya-la koni tsà 'ndsì ma.

² Jña íchjín xi jye 'ño jhínga, k'oáá s'in tènnojmíya-la koni tsà nea-lè ma. Jña xi íchjín ixti k'oáá s'in tènnojmíya-la koni tsà tichji ma nga nguì tsjeè tjina kjohítsjeèn-lè.

³ Tìsikòò jña íchjín xi jye k'en x'in-la tsà kixi kjoa nga tsjìn xi osìko.

⁴ Tsà tjin íchjín ka'àn xi tjin-la ixti, kò tsà tjin-la ixti 'ndeí, ixti koi, itjòn kàtasíkitason ya ni'ya-la kós'in beèxkón Nainá. Kàtasìko xita xikjín, mé-ne nga tsjá ngajo-la kjoatjòcha ts'e xita jhínga-la. Kjoa koi, ndaà tjin. K'oáá s'in sasén-la Nainá.

⁵ Jè chjoón ka'àn xi kixi kjoa nga tjina tajngoò, Nainá 'ñót'aà-takòn ko nachrjein ko nitjen bítsi'ba nga chjat'aà-la Nainá.

⁶ Tanga jè chjoón ka'àn xi kjotsja ts'e isò'nde xi ch'o tjin tsjá-la yijo-la, it'aà ts'e Nainá tijnak'en-né nas'in tijnakon.

⁷ K'oaá s'in tatixoma-la kjoa koi mé-ne nga ndaà siìjchá-ne yijo-la nga mì yá xi ch'o kitso-la.

⁸ Tsà yá xi mìkiì siìkinda xita xíkjin nga siìchját'aà-la, mats'iaxo ítjòn-ne xi ya títsajna ni'ya-la, tsà mì k'oaá s'in kosiko xíkjin, mìkiì nchisíkitasòn 'én xi mokjeiin-la it'aà ts'e Cristo. Isaá ch'o nchisíkítsajna yijo-la mì k'oaá-ne koni jña xita xi mìkiì mokjeiin-la 'én-la Nainá.

⁹ Íchjín ka'àn xi sit'aà xojon nga kochját'aà-la, tà jña-né xi tsato jàn kaàn nó tjin-la xi kixi tsibítsajna x'in-la,

¹⁰ jña xi 'ya-la nga ndaà kisìjchá yijo-la ts'e xá xi ndaà tjin: tsà ndaà kisìjchá ixti-la, tsà ndaà kisis'in-la xita xi ijchòkon ni'ya-la, tsà tsanijno ndsoko xita-la Cristo nga ndaà kisis'in-la, tsà kisìchját'aà-la xita xi kjoa títsajin. Tsà k'oaá s'in kisikitasòn yije xá xi ndaà tjin, koma sit'aà xojon.

¹¹ Tanga jña íchjín ka'àn xi sa ixti isa mìkiì koma xojon sit'aà. K'e nga x'in kjoajin-la, mìtsà 'iin koma-la nga kinchat'aaxin-la Cristo nga kixan ijngoò k'a-ne.

¹² Tsà k'oaá s'in s'jin, kjo'jin s'e-la nga mìkiì nchisíkitasòn koni s'in kitsjaà tso'ba nga sa ítjòn.

¹³ Íchjín koi, tikoáá mangaá-la nga xki xi ján ni'ya binchimajto. Ma ts'eè-né. Mìtsà tà ma ts'eè. Tikoáá 'én ndiso bíxkó. Chjajin chja'a ñanda mì jña oko-la.

¹⁴ An, k'oaá s'in mejèn-na nga kátixan ijngoò k'a-ne jña íchjín ka'àn xi sa ixti isa. Kátas'e-la ixti. Ndaà kátatixoma ni'ya-la mé-ne nga mì ch'o kichjajno-ná xi kondra.

¹⁵ Tjin i'nga íchjín ka'àn xi jye tsohófaya-ne, jè kiit'aà ijngoò k'a-la xita neií.

¹⁶ Tsà jngoò xita xi mokjeiin-la 'én-la Nainá tsà tjin xíkjin xi chjoón ka'àn, mochjeén-ne nga kátasíchját'aà-la xíkjin mé-ne nga mì jè naxandá-la Cristo 'ño skanè-ne xá. Jè naxandá-la Cristo komaá kosiko xi kixi kjoa nga nguì ndí chjoón ka'àn ima.

¹⁷ Jña xita jhínga xi ndaà otixoma ya naxandá-la Nainá, ok'in-la nga isa ndaà jchaxkón koa kochját'aà-la xi mochjeén-la, mats'iaxo-ne jña xi chjaya koa okóya 'én-la Nainá.

¹⁸ Xojon-la Nainá, k'oaá s'in tíchja nga tsò: “Jè nchraja xi síxá, kì na'ya bì'a tso'ba.” Tikoáá tjit'aà xi tsò: “Jè xita xi síxá, mochjeén-ne nga kátachjí-la.”

¹⁹ Kì kiì nìs'in-la tsà yá xi óngui xita jhínga xi otixoma ts'e naxandá-la Nainá tsà mì jò jàn ma-ne xita xi kijtseè-ne xkon kjoa xi komà.

²⁰ Tanga jña xita jhínga xi ótsji jé-isa, tikaká-la nga nguixkon ngats'ìi xita naxandá-la Nainá, mé-ne jña xita xi i'nga k'oaá s'in sincháxkón-ne.

²¹ Tìbìnè-lè nga nguixkon Nainá ko Na'èn-ná Jesucristo ko àkjale-la xi xó jè jaàjin-ne, ndaà tikitasòn kjoa koi. Nímé kjoa xi bìndaàjin k'e nga kj'eè kiì 'ya-la tsà kixi kjoa. Kì chjaàjin xita xi nìs'in-la; ngàsòn tis'in yije-la.

²² Kì yá xita xi taxki chjaàjin nga kjósòn-la ndseii k'e nga k'oi-la xá ijìn naxandá-la Nainá. Ítjòn ndaà tikítsjin mé-ne nga mì jì kokot'aà-lè jé-la xita xi k'ejí. Tsjeè tjin.

²³ Nga ch'in tjin kjit'aà-la indso'boi, kì tà nandá 'yoi, tikoáá t'i chibi nandá vino.

²⁴ Tjin i'nga xita xi tik'e 'ya-la jé-la k'e nga tik'eè sindaàjin. Tanga tikoáá tjin i'nga xi iskan 'ya-la.

²⁵ K'oaá tis'in tjin xá xi ndaà tjin, tjin xi niton beè xita. Tikoáá tjin xá ndaà xi mì niton 'ya-la tanga mìkiì koma jngoò k'a sijna'ma. Iskan jcha-la.

6

¹ Ngats'ìi xita naxandá-la Nainá xi chj'nda títsajna'ño, ndaà kàteèxkón nei-la mé-ne nga mì yá xi ch'o kichjajno-la Nainá ko 'én xi okoóyaá it'aà ts'e Cristo.

² Jñà xità chì'nda xi mokjeiín-la nei-la it'aà ts'e Cristo, mochjeén-né nga ngásòn ndaà kàteèxkón nei-la nga 'ndseé joó it'aà ts'e Cristo. Ìsaá ndaà kàtasíxá-la nga ngásòn mokjeiín-la 'én-la Nainá tìkoà tsjakeè xíkjin.

Jñà 'én koi, takóyi tìkoà tìnókjoayi.

Kjoa xi sakó-ná k'e nga tòn matsjachaá

³ Tsà tjin xità xi kje'eií tsò 'én xi okóya nga mì tìjngoò ikon koni tsò 'én ndaà-la Nà'èn-ná Jesucristo tìkoà mikii tìjngoò ikon it'aà ts'e kjo'ixoma koni s'ín yaxkoán Nainá.

⁴ Xità koi, xità 'nga takòn-né, nímé machiya-la. 'Nó tsjakeè nga ótiya-ne 'én xi nímé chjí-la. Yaá nchrobát'aà-ne nga maxítakòn-chaá xinguiáá, nga bixkán-kjoaá, nga nokjoàjno-lá xinguiáá 'én xi ch'o tsò, tìkoà ch'o nìkítsjeèn it'aà ts'e xità xi kje'eií.

⁵ Tìkoáá yaá nchrobát'aà-ne nga kjit'aà nachrjein nchikjaán-kjoò jñà xità xi mì kixi síkjeén kjohítsjeèn-la kò mì kjoakixi fit'aà-la. K'oaá s'ín síkítsjeèn, tsò-né: tsà ndaà jchaxkoán Nainá, yaá sakó-ná tòn. Ngaji, kì k'oaá tjin kjoa xi nìkítsjin.

⁶ Kixií kjoa, tseé kjondaà sakó-la xità k'e nga beèxkón Nainá tsà tìkoà tsja tjin-la inima-la mé xi tjin-la.

⁷ Nga nímé xi kich'á k'e nga kits'iaán i isò'nde. Tìkoáá nímé xi kjikoáá k'e nga kiyá.

⁸ Tsà tjin-ná tsojmì xi chineé koà tjin-ná nikje xi chíkjá, mochjeén-né nga tsjaá kíjngoò-lá takoán.

⁹ Tanga jñà xità xi mejèn-la kjoanchiná, nga mikii chíkjoako-la kjohítsjeèn xi ch'o tjin nga kjin tsojmì mejèn-la, yaá kixongui ch'an koà yaá singui'ño. 'Nó mejèn-la kjoa xi nímé chjí-la koà xi ch'o síko-ná, kjoa xi síkíts'ón xità koà yaá chijajin.

¹⁰ K'e nga tòn matsjachaá, yaá mats'ia-ne kjoa ts'e jé kò ngats'ii kjoa xi ch'o tjin. Tjin i'nga xità xi jye chinchat'aàxìn-la kjoa xi mokjeiín-ná it'aà ts'e Cristo jè ngatji-la nga tse tòn mejèn-la. K'oaá s'ín ma-ne nga tijnà-ne tse kjo'in tsjá-la yijo-la.

Tìnè-la yijo-lè kjoa xi mokjeiín-lè

¹¹ Tanga ngaji xi xità-la Nainá 'mì-lè, tìsit'aàxìn-la ngats'ii kjoa koi. Jè t'in tjingui-la xi kjoakixi. Jchaxkoín Nainá. Ndaà kàtakjeiín-lè it'aà ts'e Cristo. Kàtas'e-lè kjoatjòcha. Kàtas'e-lè kjoatsetakòn. Indaà kjoa tìkjin inima-lè.

¹² Ndaà tìxkàtji kjoa xi mokjeiín-ná it'aà ts'e Cristo. Kì nìkijna-jèn ndiyá kixi ts'e kjoabinachon xi mikii fehet'aà nita kjé-ne. Nga koií xá kiichja-lè Nainá. Ngaji jyeé k'oas'ín ndaà kits'ii ndsobi nga kinikixiyi 'én xi mokjeiín-lè it'aà ts'e Cristo nga nguixkon xità xi kjin ma-ne nga kiì'nchré.

¹³ I'ndeì jngoò xá tìbìnè-lè nga nguixkon Nainá xi síkítsajnakon yije nita mé xi tjin, tìkoà nguixkon Jesucristo xi ndaà kitsjaà tso'ba nga kisikixiya 'én ndaà-la k'e nga kiichja nga nguixkon Poncio Pilato.

¹⁴ K'oaá s'ín tìhotiixoma-lè, ndaà tìkitasòin kjo'ixoma koi; kì nìkijatjiya-la mé-ne nga mì yá xi kochrjengui-lè skanda k'e nga kjoii jngoò k'a Nà'èn-ná Jesucristo.

¹⁵ K'e nga kijnchòya nachrjein, Nainá, k'oaá s'ín sìkítasòn yije kjoa koi. Mé tà ndaà-la Nainá nga jè tajngoò tìhotiixoma. Jè tìjna ítjòn-la jñà xi xitàxá ítjòn tìtsajna tìkoà tìjna ítjòn-la jñà xi xità skò-la tìtsajna.

¹⁶ Tajngoò Nainá xi xó k'oas'ín tìjna-ne nga mikii biyaá. Yaá tìjnajin kjoahiseèn ñanda mì yá xi koma kijnchò kinchat'aà-la. Nì saá jngoò xità beèxkon nì mikii tji'nde-la nga skoexkon. Nainá, kjit'aà nachrjein jeya kàtìjna. Kàtayaxkón kjo'ixoma-la nita kjé-ne. K'oas'ín kàtama.

¹⁷ Jñà xità nchiná xi tjin i isò'nde, k'oaá s'ín tìnè-la: “Kì bí'nga-la ikon.” Kì koií ma'ñót'aà ikon kjoanchiná xi tjin-la nga tà nìton fehet'aà. Jè kàtama'ñót'aà ikon Nainá xi tijnakon nga jè tsjá yije-ná xi mochjeén-ná skanda síkatonè-la mé-ne nga kò kjotsja síkjeén tsojmì xi tsjá-ná.

¹⁸ Koatìn-la, kjondaà kàtas'ín. Kàtas'e-la kjoanchiná nguixkon Nainá it'aà ts'e kjondaà xi s'ín. Kì kjoaxkon fikjaá, kò inima-la kàtatsjá itsé-la xíkjin mé xi tjín-la.

¹⁹ Tsà k'oas'ín sükitasòn nachrjein i'ndeji, s'eé-la kjoanchiná xi mìkì kjoehet'aà k'e nga jye títsajna nguixkon Nainá. Tikoáá tjoé-la kjondaà xi nguì ts'e kjoabinachon.

'Én xi fehet'aà-ne

²⁰ Ngaji Timoteo, ndaà tükitasòn 'én ndaà-la Nainá xi ji kjòngatsjei. Kì kù na'yà-la 'én ndiso xi nímé chjí-la. Kì kù nìs'in-la kjoa xi chitiya-ná ts'e kjoachjine ndiso.

²¹ Tjín i'nga xitá xi k'oá tjín kjohítsjeèn fitjingui-la. K'oáá ma-ne nga chinchat'aaxìn-la kjoa xi mokjeiín-ná it'aà ts'e Cristo.

Jè kàtijnako-lè kjondaà-la Nainá.

Xojoṇ carta-la San Pablo xi ma-ne jò xi kiski-là Timoteo

Kó tsò Pablo nga s'hihat'aà Timoteo

¹ 'An, Pablo, tìkjiì-lè xojoṇ jè. Nga 'an tsibíxáya-na Jesucristo nga k'oaá s'ín kjòmejèn-la Nainá. K'oaá s'ín kitsjaà tso'ba Nainá nga kijnakon inima-ná it'aà ts'e Cristo Jesús.

² Ngaji Timoteo xi 'ño matsjake-lè koni tsà ki'ndí ts'an xan-lè, Nainá xi Na'èn-ná ko Na'èn-ná Jesucristo kàtatsjá-lè kjondaà, kàtahimakeè-lè, kàtas'e-la kjoa'nchán ijìin inima-lè.

'En xi tsjá Pablo it'aà ts'e Cristo

³ Mikiì jchàajiin-na ko nachrjein ko nitjen bìtsi'batjì-lè tikoā tsjaà-la kjondaà Nainá, jè xi 'an bexkoán koni s'ín kijtseèxkón jña xita jchinga-na nga nguì tsjeè tjin kjohitsjeèn-na.

⁴ K'e nga bìtsjeèn-na kjoa ts'e ndáxkoìin mejèn-na nga skoeè ijngoò k'a-lè mé-ne nga kotsja-la inima-na.

⁵ Bìtsjeèn-na nga nguì ndaà mokjeiín-lè it'aà ts'e Cristo koni s'ín kòkjeiín itjòn-la neájchá-lè Loida ko nea-lè Eunice. 'An k'oaá s'ín makixi-na nga ngaji tikoā ndaà mokjeiín-lè.

⁶ Koiì k'oas'ín tìsikitsjeèn-lè nga isa ndaà tìkjiín kjotjò xi kitsjaà-lè Nainá nga ndaà tixá-la, jè kjotjò xi kitjoé-lè k'e nga 'an tsakàsòn-lè ndsaa.

⁷ Nainá, mìtsà inima tsakjón kitsjaà-ná. Jè kitsjaà-ná Inima Tsjeè-la nga tsjá-ná nga'ño, nga tsjá-ná kjoatjòcha, nga tsjá-ná kjohitsjeèn kós'ín s'eén nga kixi sijchá yijo-ná.

⁸ Koiì kjoa-la kì masobà-lè nga nokjoàkoji xita it'aà ts'e Na'èn-ná Jesucristo. Tikoā kì masobà-lè xi it'aà ts'an nga ndayá tjna'ya koiì kjoa-la nga ya sixát'aà-la Na'èn-ná. Tìkjeiín-ko-ná kjo'in xi it'aà ts'e 'én ndaà-la Nainá xi kjoa ts'e Cristo. Jè Nainá tsjá-lè nga'ño xi kochjeén-lè.

⁹ Nainá, jyeé tsachrekàjiin-ná kjo'in. K'oaá s'ín kiichja-ná nga tsjeè sijchá yijo-ná. Mìtsà koi kjoa-la nga ndaà ki'né. Koi-né nga k'oas'ín kjòmejèn-la Nainá tikoā kitsjaà-ná kjondaà-la xi it'aà ts'e Cristo skanda tisa tàts'en-la kjoa k'e nga tìkj'eè sindaà isò'nde.

¹⁰ I'ndeì Nainá jyeé tsakó kjondaà-la nga jyeé j'ì Jesucristo xi ochrjekàjiin-ná kjo'in. Jaàxìn-ná nga'ño-la kjoabiyaà. Xi it'aà ts'e 'én ndaà-la Nainá xi kjoa ts'e Cristo, tsakó-ná kjoabinachon tikoā tsakó-ná nga mìtsà jngoò k'a kiyá nita kjé-ne.

¹¹ Nainá, 'aán kisingatsja-na xá jè nga 'an kichjaya 'én ndaà-la Nainá xi kjoa ts'e Cristo. Tsibíxáya-na it'aà ts'e xá-la nga 'an kokoòya-la jña xi mìtsà xita judío.

¹² Tseé kjo'in tìsikjaán tà jè ngatjì-la 'én xi 'an chjaya. Tanga mikiì masobà-na. Jyeé tíjiin-na nga it'aà ts'e Cristo mokjeiín-na. Tikoā ndaà tíjiin-na nga ta jngoò jè Nainá xi tjin-la nga'ño. Ndaà sijkinda jè xá xi 'an kisingatsja-na skanda jè nachrjein k'e nga kjoí ijngoò k'a-ne Jesucristo.

¹³ Ndaà tíjiin takoìn 'én ndaà xi 'an tsakoòya-lè koni s'ín tjin 'én xi mokjeiín-ná ko kjoatjòcha xi tjin-ná nga Cristo titsajnaoá.

¹⁴ Ndaà tikitasoìn xá ndaà xi jì kjòngatsjei. Jè s'ichját'aà-lè Inima Tsjeè-la Nainá xi tijnajiin inima-ná.

¹⁵ Jyeé tíjiin-lè ngats'ì xi títajna nangui Asia, jyeé kitsjeiìn takòn-na, koni jè Figelo ko Hermógenes.

¹⁶ Nainá kàtahimakeè xita ni'ya-la Onesíforo. Kjin k'a j'ì síjehikon-na. Mikiì kjòsobà-la nas'ín ndayá tjna'ya.

¹⁷ Tà saá, k'e nga j'ì i Roma skanda mikiì kisikjaya nga 'ño tsohótsji-na skanda kó nga kisakò-la ñánda tijnáa.

18 Na'èn-ná kàtahimakeè jè Onesíforo k'e nga kijchò nachrjein-la Nainá. Ngaji jyeé ndaà tíjìin-lè, ndaà kisichját'aà-ná ján Éfeso.

2

Timoteo, jngoò soldado-la Cristo xi ndaà síxá-la

1 Ngaji Timoteo koni tsà ki'ndí ts'an xan-lè, tjìi-la nga'nó yijo-lè it'aà ts'e kjondaà xi tsjá Jesucristo nga jè titsajnaakoá.

2 Jè 'én xi kina'yà-ná nga kichjàya nguixkon nga kìn ma xita xi kiì'nchré, k'oaá s'ín takóya-la xi xita kixi xi ndaà ma-la okóya mé-ne k'oa tís'ín kòkòya ngajo-la xita xi kj'eíí.

3 Ngaji Timoteo, tikjeíin-ko-ná kjo'in nga ndaà mìt'aà-la Jesucristo koni jngoò soldado xi síkjeíin kjo'in.

4 Jngoò xita xi soldado síkitasòn mìkì tíj'nde-la nga kj'eíí xá skóngajìin xi tjín isò'nde, tjínè-la nga ya síkitasòn-la jè xi kitsjàa-la xá mé-ne nga ndaà kíjako.

5 K'oaá tís'ín tjín jè ts'e xita xi síská. Tsà mì kixi síiská koni s'ín tjín kjo'tixoma-la mìkì tjoé-la chjí-la.

6 Xita xi bínè-la yijo-la nga ndaà síxá nga bíte tsojmì tje, k'e nga jye kojchá tsojmì, jè tjoé íjòn chiba-la tsojmì xi majchá koni tsà chjí-la.

7 Tikítsjìin koni s'ín tìxan-lè. Jè Nainá isa ndaà tsjáya yije-lè kjohítsjeèn.

8 Tikítsjìin it'aà ts'e Jesucristo, jè xi jaáyajìin-la mik'en xi tje-la xitaxá íjòn xi David ki'mì. K'oaá tsò 'én ndaà-la Nainá xi kjoa ts'e Cristo xi 'an chjàya.

9 Koií kjoa-la 'én ndaà-la Nainá xi kjoa ts'e Cristo xi 'an chjàya, tìsikjiaán kjo'in skanda na'nó kichá tjít'aà'nóá nga tjìna'ya ndayá koni jngoò xita xi 'nó ts'en. Tanga jè 'én-la Nainá mìtsà tjít'aà'nó yia ndayá.

10 Koií kjoa-la tìsikjiaán yije kjo'in xi kjondaà ts'e xita xi xó jaajìin-ne Nainá mé-ne nga tikoá kítjokajìin-ne kjo'in xi it'aà ts'e Cristo Jesús; s'eé-la kjoajeya xi mìkì fehet'aà nita kjé-ne.

11 'Én koi, 'én kixi-ne nga tsò:

Nga ya k'en-koáá Cristo, tikoáá yaá kítajnakon-koáá.

12 Tsà chíkjoa-ná kjo'in tikoáá yaá kòtixomakoáá Cristo.

Tsà kixoán mìkì bexkoan, jè k'oaá tì kítso-ná mìkì bexkoan.

13 Tsà mìkì síkitasoán 'én xi nokjoá, tanga Nainá síkitasòn 'én xi chja.

Mìkì koma síkijatjya 'én-la.

Jngoò xita xi ndaà síxá-la Cristo

14 Tikítsjeèn-la kjoa koi. Tìnokjoakoi nga nguixkon Nainá mé-ne nga mì kohótiya-ne kjoa ts'e 'én. Jè kjoa xi chitiya-ne nímé chjí-la. Ta saá síkít'són xita xi 'nchré.

15 'Nó ndaà tjínè-la yijo-lè mé-ne nga ndaà kijnane nga nguixkon Nainá. Nímé xi kosobà-lè nga ndaà tjín xá-lè koa ndaà okoòyi 'én kixi-la Cristo.

16 Kì taxkì nokjoà-jèn 'én xi mìkì sasén-la Nainá xi nímé chjí-la. Jñà xita xi k'oas'ín chja, isaá 'nó bìnchat'aaxìn-isa-la Nainá.

17 Jñà 'én xi ch'o tsò k'oaá ngaya-la koni ch'in nchikòn xi bi'ndo-ne yijo-ná. K'oaá s'ín chja Himeneo kjo Fileto

18 nga jyeé chinchat'aaxìn-la xi kjoakixi nga tsò: “Jè kjoa xi faáya-la mik'en jyeé tsato-né.” K'oaá ma-ne sískáya i'nga-la xita kjoa xi mokjeíin-la.

19 Tanga Nainá jyeé tsibíjna'nó tàts'en jngoò kjoakixi nánnda tjít'aà 'én xi tsò: “Nainá beèxkon-né xi xita ts'e”; ngats'ì xi tsò: “An, xita-la Cristo-ná, kàtinchat'aaxìn-la kjoa xi ch'o tjín.”

20 Jngoò ni'ya xi je kji, tjín tsojmì xi oro kjo plata. Tikoáá tjín tsojmì xi yá kjo xi ni'nde. Tjín tsojmì xi nachrjein nchijòn mochjeén koa tjín xi tà k'e mochjeén k'e nga ndaà tíma.

²¹ Tsà s̄itsjeé kjohítsjeèn-ná nga k̄inchat'aàxìn-lá kjoa xi ch'o t̄jín, k'oaá s'ín s̄ikjeén-ná Nainá koni tsojm̄i tsjeé xi tà k'e mochjeén k'e nga ndaà tíma. Titsajnaandaà nga s̄ikitasoán n̄it̄a mé xá-la Nainá xi ndaà t̄jín.

²² Ngaji Timoteo, t̄isit'aàxìn-la kjohítsjeèn-la ixti xi ch'o t̄jín. Koií t'in t̄jinguí-la xi kjoakixi, k̄o kjoa xi mokjeiín-ná it'aà ts'e Cristo, k̄o kjoatjòcha, k̄o kjoa'nchán takòn. K'oas'ín t'in t̄jinguí-la kjoa koi k̄o x̄it̄a xi tsjeé t̄jín in̄ima-la nga ch̄jat'aà-la Nainá.

²³ Kì kjoa nchikón n̄is'in-la xi n̄imé ch̄jì-la. Jyeé ndaà t̄jìin-lè nga kjoas̄i ótsji.

²⁴ Jngoò ch̄i'nda-la Nainá mìk̄i mochjeén nga kjoas̄i skóngajiin. Ndaà k̄atas̄ik̄o yije x̄it̄a. K̄at̄ijnandaà nga k̄okòya 'én-la Nainá. K̄atas'e-la kjoatsetakòn mé kjoa xi mat'in.

²⁵ Koó k̄jondaà-la k̄atas̄ik̄ixiya j̄n̄à xi x̄it̄a kondra, tsà koi nachrjein Nainá ts̄j̄a ìsa-la nachrjein nga s̄ik̄ájno jé-la nga mì t̄i jé kohótsji-ne mé-ne nga k̄okjeiín-la xi kjoakixi.

²⁶ K'e nga táx'anguí x̄kon, k̄omaá k̄itjok̄ajiin kjoanachan-la neií nga ya t̄jít'aà'n̄ó-la nga k'oas'ín s̄ik̄itasòn-la koni s'ín mejèn-la neií.

3

Mé kjoa ch'o xi s'iin x̄it̄a k'e nga tímachrañà nga kjoehet'aà nachrjein

¹ Ngaji Timoteo, k̄atas̄ijiin-lè k'e nga tímachrañà'taà nachrjein nga kjoíi jngoò k'a-ne Cristo, k̄jìn skoya kjoa s'e xi mìk̄i ndaà t̄jín.

² J̄n̄à x̄it̄a xi s'e, tà yijo-laá 'n̄ó s̄iis'in-la; toón 'n̄ó kotsjakeè; yijo-laá 'n̄ó ndaà s̄ik̄ítsajna; x̄it̄a 'nga ikoón k̄oma; k̄ichjajno-la Nainá k̄o x̄it̄a; mìk̄i k̄i'nchréñijon-la x̄it̄a jchínga-la; mìk̄i ts̄j̄a ngajo-ne k̄jondaà, mìk̄i skoexkón Nainá,

³ mìk̄i s̄it̄jòkèè x̄ik̄jín, jngoò k'a mìk̄i s̄ije-la ikon, 'én ndiso ts̄j̄at'in x̄ik̄jín, mìk̄i s̄ik̄inda yijo-la mé kjoa xi s'iin, x̄it̄a ch'o k̄oma, kondraá kjoí-la kjoa xi ndaà t̄jín,

⁴ kondraá kjoí-la amigo-la, mìtsà ít̄jòn s̄ik̄ítsjeèn mé kjoa xi s'iin, 'n̄ó 'nga ikon k̄oma, jè s̄iitsjakeè kjoa ts'e ìsò'nde xi sasén-la yijo-la, mìk̄i s̄iitsjakeè Nainá.

⁵ K'oaá s'ín s'iin koni tsà beèxkón Nainá, t̄anga mìk̄i ts̄j̄a'nde nga jè nga'n̄ó-la Nainá s̄ixájiin in̄ima-la.

X̄it̄a koi k̄i k̄i n̄is'in-la.

⁶ J̄n̄à x̄it̄a koi, ótsji'nde-la nga fahas'en ni'ya-la íchjín xi mìk̄i beèxkón yijo-la k̄o xi tse jé t̄jín-la nga ma konachan-la. Íchjín koi, yaá f̄it̄jinguí-la kjoa xi ìsa 'n̄ó ch'o t̄jín koni s'ín mejèn-la yijo-la.

⁷ K̄jit'aà nachrjein nchikota'ya 'én x̄it̄se t̄anga n̄ijn̄goò nachrjein fahas'en-jìin-la xi nguì kjoakixi.

⁸ J̄n̄à x̄it̄a koi, k'oaá t̄is'ín binchahikon-la xi kjoakixi, koni kis'iin x̄it̄a ch̄jine xi ma-la bíndaà xi k̄i'mì Janes k̄o Jambres nga chinchahikon-la Moisés. X̄it̄a koi, jngoò k'aá ch'o t̄jín kjohítsjeèn-la. Bitjongui-né nga nguixk̄on Nainá nga mìk̄i mokjeiín-la xi kjoakixi.

⁹ T̄anga mìk̄i s̄ik̄ijne. K̄ijhò nachrjein nga skoè yije x̄it̄a kjoa tòn̄do-la. K'oaá s'ín jch̄at'in-la koni jè Janes k̄o Jambres.

Kó tsò Pablo nga bít'in-la Timoteo nga 'én kixi k̄okòya

¹⁰ T̄anga j̄i Timoteo k'oaá s'ín t̄i'm̄it̄jinguí-la koni s'ín tsakoòya-lè, koni s'ín t̄is̄jch̄a yijo-na, koni s'ín t̄jín kjohítsjeèn-na mé kjoa xi t̄if̄it̄jinguí-la. K'oaá t̄is'ín mokjeiín-lè koni s'ín mokjeiín-na 'an it'aà ts'e Cristo. K'oaá s'ín t̄jín kjoatsetakòn-lè k̄o kjoatjòcha-lè koni s'ín t̄jín ts'an. K'oaá t̄is'ín ch̄ik̄j̄o yije-lè n̄it̄a mé kjoa-ne koni 'an.

¹¹ T̄ij̄iin-lè koni s'ín t̄is̄ik̄j̄aán k̄j̄o'in it'aà ts'e Cristo t̄ik̄oa ongat̄jinguí-na x̄it̄a kondra koni s'ín komàt'ian ján naxandá Antioquía, Iconio k̄o Listra. j̄Taxk̄i toón k̄ijtseè-na x̄it̄a nga tsangat̄jinguí-na t̄anga jè Na'èn-ná tsachrjek̄ajiin yije-na kjoa koi!

¹² Kixi kjoa, ngats'ì xi mejèn-la skoexkón Na'èn-ná Jesucristo, k'oaá t̄is'ín s'e-la kondra nga k̄j̄it̄jinguíkeè x̄it̄a.

¹³ Tanga jñà x̄ita xi ch'o s'ín, xi konachan, kjit'aà nachrjein, saá 'ñó, saá 'ñó ch'o s'iin nga skónachan-là x̄ita, tanga k'oaá t̄is'ín komat'in ngajo-ne nga skónachan-là x̄ita xi k'ejí.

¹⁴ Tanga ngaji, ndaà kixi tikoji jñà kjoa xi kichita'yì xi jye k'oas'ín ndaà kòkjeín-lè. Jyeé t̄jiin-lè yá x̄ita xi tsakóya-lè.

¹⁵ Skanda tik'e-né nga t̄isa ndí ti titsjoi, kiyaxkoin Xojon Tsjeè-là Nainá jè xi koma-la s̄ichjine-lè kó s'ín kitjokàj̄iin kjo'in nga mokjeín-lè it'aà ts'e Cristo Jesús.

¹⁶ Ngats'ì 'én xi t̄jít'aà Xojon-là Nainá, kjohítsjeèn ts'eé Nainá nga kitjei. K'oaá s'ín mochjeén nga okóya-ná, nga okó-ná k'e nga ch'o 'nè, nga síkixiyandaà-ná, nga okó-ná ndiyá kixi,

¹⁷ mé-ne jñá xi x̄ita-là Nainá 'mì-ná jngoò k'a ndaà kitsajndaá nga s̄ikitasoán yije kjoa xi ndaà t̄jín.

4

Kó tsò Pablo nga t̄bìnè-là Timoteo nga 'Én-là Nainá kichja

¹ 'Ñó t̄bìnè-lè nga nguixkon Nainá ko Na'èn-ná Jesucristo jè xi jeya kjoí ìjngoò k'a-ne koni x̄itaxá ítjòn nga koìndaàj̄iin-là x̄ita xi t̄itsajnakon ko xi jye k'en.

² T̄inókjoayì 'én ndaà-là Nainá xi kjoa ts'e Cristo. T̄ijnandeì nga kjit'aà nachrjein n̄ita mé kjoa xi t̄jín. Ch̄ikojì x̄ita k'e nga ch'o s'ín; t̄ikixiyi; t̄it'in-là nga 'ñó kàt'eé-là ikon. K'e nga k'oas'ín s'iin, tseé t̄iin takòin, ko kjondaà-lè takóya-là.

³ Kijchò nachrjein k'e nga jñà x̄ita mì t̄i k̄i kòkjeín-là nga kji'nchré 'én ndaà xi kixi t̄jín xi jñà okoòyaá it'aà ts'e Cristo. K̄jìn maestro kohótsji xi kòkòya-là kjoa xi jñà komejèn-là nga kji'nchré-là.

⁴ K̄inchat'aàxìn-là xi kjoakixi, koií kjit'aà-là xi taxki cuento jchínga xi mìtsà kixi kjoa.

⁵ Tanga ngaji Timoteo, indaà t'è-là takòin n̄ita mé kjoa-ne, t̄ikjeín kjoa ts'e kjo'in, koi xá t̄iin nga t̄ika'bisoìn 'én ndaà-là Nainá xi kjoa ts'e Cristo, ndaà t̄ikitasoìn xá xi j̄i kjòngatsjei.

⁶ 'An, jye t̄itsjaà kjotjò-là yijo-na Nainá. Jyeé ijchò nachrjein nga kiyá.

⁷ Jyeé ndaà kiskaàn-tjià xá-là Cristo; jyeé ndaà kisikitasoàn xá xi 'an kjòngatsja; jyeé ndaà tsohótijnakoaa jè 'én xi mokjeín-na it'aà ts'e Cristo.

⁸ I'ndeì, Cristo, xi x̄itaxá kixi t̄jna, t̄jnatjò jngoò-là corona ján ngajmì xi 'an tsjá-na nga kixi tsohótijnakoaa. K'e nga kjoí ìjngoò k'a-ne, mìtsà tà 'an xi tjoé-na. T̄ikoaa tjoé-là ngats'ì x̄ita xi t̄jngoò ikon nga nchikoña-là Cristo.

Kó kitsò Pablo nga kisixátíya-là Timoteo nga kjoikon n̄iton

⁹ T̄ixátíyi nga n̄iton nchrobáchon-ná.

¹⁰ Nga jè Demas, jyeé kitsjeiìn takòn-na. Jè 'ñó matsjakeè kjoa xi t̄jín ì isò'nde. Ján k̄i naxandá Tesalónica. Crescente, ján k̄i nangui Galacia, koa jè Tito ján k̄i nangui Dalmacia.

¹¹ Tà jè Lucas t̄jnakò-na. K'e nga kjinchroboì, t̄ajchatoi Marcos, nchrobákoji. Kochjeén-na kjoa ts'e xá xi t̄jín-na.

¹² Jè T̄iquico, ján kisikasén Éfeso.

¹³ K'e nga kjinchroboì, jcha-ná inchrokisòn-na xi tsakajná ya naxandá Troas ya ni'ya-là Carpo. Jch'ìi xojon-na; jñà xi isa 'ñó mochjeén-na xi chrjoa kjoàn.

¹⁴ Alejandro, jè xi chjine kichá, 'ñó ch'o t̄jín kjoa xi t̄síko-na. Nainá, jè kàtatsjá-là kjo'in kjoa xi t̄s'ín.

¹⁵ Ngaji Timoteo, t̄ikindii yijo-lè it'aà ts'e x̄ita jè. 'Ñó kondra fitjingui-là 'én xi okoòyaá.

¹⁶ K'e nga kisindaàj̄iin ítjòn-na nga nguixkon x̄itaxá, n̄iyá xi tsasiko-na. Ngats'ì x̄ita kitsjeiìn takòn-na. Kì kindaa s'ín Nainá kjoa koi.

¹⁷ Tanga Na'èn-ná tsasiko-na. Kitsjaà-na nga 'ñó mé-ne nga komà kichjàj̄iin-là jñà x̄ita 'én ndaà-là Nainá xi kjoa ts'e Cristo. K'oaá s'ín komà-ne nga k̄i'nchré yije xi mìtsà x̄ita judío. Nainá tsasiko-na nga mìkìl kisik'en-na x̄ita xi tsibíndaàj̄iin-na.

¹⁸ Na'èn-ná kōsiko-na it'aà ts'e ngats'ì kjoa xi ch'o tjin. Kjiko-na ñánda tíhotíxoma ján ngajmì. Nainá, kátas'e-la kjoajeya nita mé nó-ne nita mé nāchrjein-ne. K'oas'ín kàtama.

Xi fehet'aà-ne, Pablo síhixat'aà xita xikjín

¹⁹ Tixat'eì jè Priscila kō Aquila kō xita ni'ya-la Onesíforo.

²⁰ Erasto, ján tsibijna naxandá Corinto. Jè Trófimo, ján kisikijna naxandá Mileto. Xk'én-né.

²¹ Tixatíyi nga niton nchrobáchón-ná k'e nga tikj'eè f'ì nāchrjein choòn 'nchán. Tísíhixat'aà-lè Eubulo, Pudente, Lino kō Claudia, kō ngats'ì xita xi 'ndsè chibá.

²² Jè kàtijnakō-lè Jesucristo xi otíxoma-ná. Ngats'ioò, jè kàtijnakō-nò kjondaà-la. K'oas'ín kàtama.

Xojon carta-la San Pablo xi kiski-la Tito

Kó tsò Pablo nga síhixat'aà Tito

¹ 'An, Pablo, xi chí'nda-la Nainá ma. Tíkoa 'an tsibíxáya-na Na'èn-ná Jesucristo mé-ne nga kòkjeiín-la it'aà ts'e Cristo jñà xita xi xó jè Nainá jaàjìin-ne, tíkoa skoe xi kjoakixi nga koma-la skoexkón Nainá.

² Xita koi k'oaá s'ín komat'in nga tíjngò ikon nga nchikoña-la nga kítsajnakon inima-la nita kjé-ne koni s'ín kitsjaà tso'ba Nainá skanda k'e nga tikj'eè sindaà isò'nde. Nainá mìkiì konachan.

³ K'e nga jye ijchò nachrjein, Nainá kisikatsjèn 'én-la it'aà ts'e 'én ndaà-la Nainá xi kjoa ts'e Cristo xi 'an chjaya. Na'èn-ná kisingatsja-na xá jè nga k'oaá s'ín tsatixoma Nainá xi ochrjekàjìin-ná kjo'in.

⁴ Ngaji, Tito, koni tsà ki'ndí ts'an xan-lè nga ngàsòn mokjeiín-ná it'aà ts'e Cristo, tsikasén-lè xojon jè. Nainá xi Na'èn-ná ko Na'èn-ná Jesucristo xi ochrjekàjìin-ná kjo'in kàtatsjá-lè kjondaà-la, kàtahimakeè-lè, tíkoa 'nchán kàtasíkijna inima-lè.

Kjoa xi mochjeén ts'e xita xi síkitasòn xá ya ijìin naxandá-la Nainá

⁵ Koií xá kisíkijna-lè ján nangui Creta nga sikixiyi xá xi chijat'aà-isa. K'oaá tis'ín tsatixoma-lè nga kinchandeìi xita jchínga xi sìikinda naxandá-la Nainá nga jngò ò jngò naxandá.

⁶ Xita jchínga xi sìikitasòn xá, jñà-né xi ndaà nchisíjchá yijo-la nga mì yá xi ch'o kító-la; xi jngò ma chjoón-la. Ko jñà ixti-la mochjeén-né nga ndaà mokjeiín-la it'aà ts'e Cristo nga mìtsà yá xita ónè-la kjoa nga kjoaská tjímajìin ko nga mìkiì 'nchréñjon.

⁷ Jè xita xi síkinda naxandá-la Nainá xi xá-la Nainá síkitasòn, mochjeén-né nga ndaà s'jìn mé-ne nga niyá xi ch'o kító-la. Mìkiì mochjeén nga 'nga ikon koma; mì taxkì kojti-la; mì xán kohijtako; mì xita skaàn-ko; ko mì ton chijé kotsjakeè.

⁸ Ta saá ndaà kàtasís'in-la xita xi bijchókon. Kàtamatsjakeè kjoa xi ndaà tjín. Indaà kàtìjna ikon. Kixi kàtìjnako xita. Tsjeè kàtasíjchá yijo-la nga nguixkon Nainá, ndaà kàtasíkinda yijo-la nga mì taxkì s'jìn.

⁹ Ndaà kàtìjìin ikon 'én kixi koni s'ín kis'enojmí-la mé-ne nga it'aà ts'e 'én ndaà xi kòkòya koma kìtin-la xita nga 'ñó kàt'eé-la ikon tíkoa koma sìikixiya xi kondra fitjìngui-la xi kjoakixi.

¹⁰ Koií kjoa-la tjín jchán xita xi tájaàjìin nga okóya 'én xi nímé chjí-la tíkoa konachan-la xita xi kj'eí; ko tjíñà-ne xi 'ñó bínè-la xita xi kj'eí nga kjo'ñó sít'aà chiba-la yijo-la kjoa ts'e circuncisión.

¹¹ Jñà xita koi mochjeén-né nga kichjoà'a nga sískáya-la ngats'ìi xita xi títsajna nga jngò ò jngò ni'ya. Tà jè xi mejèn-la nga ton síchijét'aà-la xita nga k'oa tjín 'én xi okóya xi nímé chjí-la.

¹² Jngò xita chjine xi tiya-ne i'nde-la Creta k'oaá kitsò-la xita xíkjin: "Jñà xita Creta, xita ndiso-né, xita ts'en-né koni tsà cho ijñá, xita chrjá'a-né, xita ts'eè-né."

¹³ 'En kixí xi kiichja xita jè; ngaji, Tito, koií kjoa-la 'ñó tìnókjoakoi mé-ne nga ndaà kítsajna-ko-ne koni s'ín mokjeiín-la it'aà ts'e Cristo,

¹⁴ ko mé-ne nga mì jñà sìs'in-la cuento xi nímé chjí-la xi fitjìngui i'nga-la xita judío tíkoa mì jñà sìs'in-la kjotixoma ts'e xita xi binchat'aàxìn-la kjoakixi.

¹⁵ Jñà xita xi tsjeè tjín kjohítsjeèn-la tsjeè yije ma-la nita mé-ne. Tanga jñà xita xi mì tsjeè tjín kjohítsjeèn-la ko mìkiì mokjeiín-la it'aà ts'e Cristo, saá tjé yije ma-la nita mé-ne; skanda jè inima-la ko kjohítsjeèn-la tjé tjín.

¹⁶ K'oaá tsò nga beèxkon Nainá tanga jñà kjoa xi s'ín 'yaá-la nga mìtsà kixi kjoa. Xita koi, 'ñó ch'o s'ín, mìkì 'nchréñijon, tìkoa nìmé chjì-la nga nijngoò ma-la síkitasòn xá xi ndaà tjín.

2

Kjohítsjeèn xi ndaà tjín takóyi

¹ Ngaji, Tito, k'oaá s'ín tìnókjoii koni s'ín ok'in-la 'én ndaà xi jñá okoðyaá

² nga jñà xita jchínga ts'e naxandá-la Nainá, indaàkjoa kàtas'ín; ndaà kàtayaxkón; ndaà kjohítsjeèn kàtas'e-la; ndaà kàtitsajnakò kjoa xi mokjeiín-la, kò kjoatjòcha-la kò kjoatsejta-la mé-ne nga kichìkjoako-la kjo'in.

³ Jñà íchjín jchínga, k'oa s'ín kàtasíjchá yijo-la koni xita-la Nainá. Kì xita chjajno-la. Kì xán báhihtakò. Koií kàtakóya kjoa xi ndaà tjín.

⁴ K'oaá s'ín kàtakóya-la íchjín ixti nga tjòkeè kàtas'ín íchjá-la, tìkoa tjòkeè kàtas'ín ixti-la.

⁵ K'oaá s'ín ndaà kàtakóya nga ndaà kàtasíjchá yijo-la; tsjeè kàtitsajnakò yijo-la; ndaà kàtasíkínda ni'ya-la; ndaà xita kàtama; kàta'nchréñijon-la íchjá-la, mé-ne nga mì yá xi kichjajno-la 'én-la Nainá.

⁶ K'oa tís'ín tìnè-la jñà íchjá xi ixti-isa nga ndaà kàtasíjchá yijo-la.

⁷ Nita mé kjoa xi tjín, jì tjina ítjoìn nga ndaà t'íin. K'e nga kokóya-la xita, kixi tikíjni kjohítsjeèn-lè; 'én kixi tìnókjoii;

⁸ ndaà tsò 'én xi tìnókjoii xi mì yá kochrjekàngui mé-ne k'e nga kji'nchré-la jñà xi xita kondra, kosobà-la; nìmé sakòt'aà-la xi ch'o kítso-ná.

⁹ Koatìn-la jñà xita xi ch'inda títajna-ñó, ndaà kàtasíkítasòn yije-la nei-la, ndaà kàtasís'in-la mé-ne nga tsja s'e-la, kì kjingui'a-jèn;

¹⁰ kì síchijét'aà-la nei-la. Tà saá ndaà kàtas'ín nga kàta'ya-la nga xita kixi. K'oaá s'ín skoe-ne xita xi k'ejí nga ndaà tjín kjotíxoma-la Nainá xi ochrjekàjìin-ná kjo'in.

¹¹ Nainá jyeé tsakó kjondaà-la nga ngats'ìi xita xi tjín nga tíjtsa isò'nde koma kítjokàjìin kjo'in.

¹² Jè kjondaà-la Nainá k'oaá s'ín okóya-ná nga mì tì kii k'oa s'en-ná nga mì ndaà yaxkoán Nainá tìkoa mì tì kii k'oa s'en-ná kjoach'o xi síjé yijo-ná xi ts'e isò'nde. K'e nga jye síkítajnaá kjoa koi, indaàkjoa síkíjnaá kjohítsjeèn-ná, xita kixi komaá, tìkoa ndaà jchaxkoán Nainá nachrjein xi títajnaá i'ndeí.

¹³ K'oaá s'ín s'eén kjoa koi nga títaschiñá-lá kjondaà xi 'ñó ndaà tjín nga jchaá kjoajeya-la Jesucristo k'e nga kjoíi jngoò k'a. Jesucristo xi Nainá nga 'ñó 'nga tíjna nga jè xi ochrjekàjìin-ná kjo'in.

¹⁴ Jè Na'èn-ná Jesucristo kitsjaà yijo-la nga k'en ngajo-ná. Jè tsibíchjítjì-ná mé-ne koma kítjokàjìnaá ngats'ìi kjoa ts'e jé tìkoa jngoò k'a s'ìitsjeè-ná nga nguì xita naxandá ts'e komaá. Kò nguì tíjngoò takoán nga síkítasoán nita mé kjoa xi ndaà tjín.

¹⁵ K'oaá s'ín takóyi tìkoa tìt'in-la xita. 'Ñó tìnókjoakoii koni s'ín tjí'nde-lè nga kotíxomai. Kì yá xi ochrjekàngui-lè.

3

Ndaà tìkítasòn jñà 'én xi mokjeiín-ná

¹ Tikítsjeèn-la nga kàteèxkón xi xitaxá títajna kò ngats'ìi xi kjotíxoma tíjya tsja. Kàta'nchréñijon-la. Kàtasíkítasòn ngats'ìi xá xi ndaà tjín.

² Koatìn-la kì xitaá chjajno-la; kì xitaá kjaán-kò; tà saá kjondaà kàtas'e-la; nguì indaàkjoa kàtitsajnakò ngats'ìi xita.

³ Nga sa kjòtseé, jñá, tìkoaá xita tònðoó komá. Mìkì na'yañjjoaán. Xìn ndiyá tsitjaàyaá. K'oaá s'ín kì'né ngats'ìi kjoa xi ch'o tjín xi síjé yijo-ná kò kjoa xi sasén-la. Yaá tsitsajnajñaá

xi kjoach'o kjoaxìtakòn. Tsak'in-ná nga kisìjtikeè-ná xìta. Tìkoa jñá kinìjticha ngajo-ná xinguiáá.

⁴ Tanga Nainá xi ochrjekàjìin-ná kjo'in, k'e nga tsakó kjondaà-la kjoatjòcha-la ìt'aà ts'e xìta,

⁵ tsachrjekàjìin-ná kjo'in. Mìtsà koi kjoa-la nga ndaà tjin kjoakixi xi ki'né. Tà koi-né nga kjòhìmakeè-ná. K'e nga kjòtsjeè inìma-ná, kits'iin xitse ìjngò k'a-ná kjo jè Inìma Tsjeè-la Nainá kisìxìtseya ìjngò k'a-ná.

⁶ It'aà ts'e Nà'èn-ná Jesucristo xi ochrjekàjìin-ná kjo'in, Nainá, 'ñó ndaà kisìkìjnajìin inìma-ná Inìma Tsjeè-la.

⁷ K'e nga jè kjondaà-la Nainá jye kisikixiya-ná, k'oaá s'ín kìtsajnaá nga tìjngò takoán nga tìtsachiñá-lá kjoabinachon xi mìkìi fehet'aà nìta kjé-ne, jè kjotjò xi tsjá-ná Nainá nga ìxti-la tsò-ná.

⁸ 'Èn koi, 'én kixi-né. K'oaá s'ín mejèn-na nga 'ñó tìnè-la xìta mé-ne jñà xìta xi mokjeiìn-la ìt'aà ts'e Nainá ndaà kàtasís'in-la kjoa xi ndaà tjin. Kjoa koi, ndaà tjin; mochjeén-la ngats'ìi xìta.

⁹ Tanga kì kii nìs'in-la xi kjoa tònđo kjoa ts'e xìta jchínga kjòtseé xi mìtsà kixi kjoa. Kì kjoasìi nìs'in-la kjoa xi chitiya-ná ìt'aà ts'e kjotìxoma-la Moisés. Kjoa koi, mìkìi mochjeén, nìmé chjí-la.

¹⁰ Jè xìta xi naxandá-la Cristo mejèn-la sùjòya, jò, jàn k'a tìnókjoa 'nchré-laà. Tsà mìkìi 'nchréñijon-lè, nàchrjekàjìin.

¹¹ Ji, jyeé 'yi nga xìta jè, jyeé its'oòn kjohítsjeèn-la. Ch'o tís'ín. Jé tihónè-la yijo-la.

'Èn xi tìtsjá-la Tito jè Pablo

¹² K'e nga sikasén-lè Artemas, o xi jè Tíquico, tìxátíyi nchrobáchón-ná Nicópolis. K'oaá s'ín kiskoòsòn-la, yaá kótijna nàchrjein cho 'nchán.

¹³ Tìchját'aà-la Zenas, maestro ts'e kjotìxoma, kjo Apolos; tjiì-la mé xi mochjeén-la mé-ne nga koma kjoì-ne ñánda nchifì nga nìmé sìchijat'aà-la.

¹⁴ Jñà xi xìta tsaján, k'oaá tìs'ín kàtama-la kjondaà xi ndaà tjin nga kàtasíchját'aà-la xìta xi chijat'aà-la tsojmì mé-ne nga ndaà sùkjeén-ne nàchrjein-la nga tìtsajnakon, komaá sùkìjna jngò kjoa xi ndaà mochjeén.

'Èn xi fehet'aà-ne

¹⁵ Ngats'ìi xìta xi ì tìtsajnakò-na tìsìhixat'aà-lè. Tìkoa tìixat'eì yije jñà xi matsjakeè-ná nga ngàsòn mokjeiìn-ná ìt'aà ts'e Cristo. Kjondaà-la Nainá kàtìjnako-nò ngats'ioò. K'oaá s'ín kàtama.

Xojon carta-la San Pablo xi kiski-la Filemón

Kó tsò Pablo nga síhixat'aà Filemón

¹ Ji Filemón xi ndaà matsjake-lè xi ngàsòn xá-la Na'èn-ná títsa'né, 'an Pablo nga ndayá tijnáa'ya k'oií kjoa-la nga xá-la Cristo tís'iaàn, tís'hixat'aà-lè kò 'ndsè Timoteo.

² Tíkooá tís'hixat'aà xíta naxandá-la Cristo xi ya bixoña ni'ya-lè kò tichjaá Apia kò 'ndseé Arquipo xi tíkoo xá-la Nainá nchikjaán-tji koni 'an.

³ Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya jjiin iníma-nò.

Kjoatjòcha xi tjín-la Filemón

⁴ K'e nga chjät'aà-la Nainá, kjit'aà nachrjein sikítsjeèn it'aà tsiji, k'oaá ma-ne nga tsjaà-la kjondaà Na'èn-ná,

⁵ Koií kjoa-la nga jyeé ki'nchrè nga ndaà mokjeiin-lè it'aà ts'e Na'èn-ná Jesucristo tíkoo ndaà matsjachi ngats'ii xíta-la Nainá.

⁶ K'oaá s'ín s'ijét'aà-la Nainá nga ndaà kítasòn koni s'ín nokjoàkoii xíta xi i'nga it'aà ts'e kjoa xi mokjeiin-lè mé-ne nga isa ndaà jchaxkoin ngats'ii kjondaà xi koma sikitasoán it'aà ts'e Cristo.

⁷ Ji ndí 'ndsè, 'nó tsja ma-na kò ma'nó takoàn it'aà ts'e kjoatjòcha xi tjín-lè, nga it'aà tsiji-né, nga jye ndaà tìnìjetakoìn iníma-la jña xíta-la Nainá.

Kó tsò Pablo nga chjätjì Onésimo

⁸ K'oaá ma-ne nas'ín it'aà ts'e Cristo tjí'nde-na nga kìnè-lè mé kjoa xi s'iin, tanga mìtsà kos'ín tìbìt'in-lè.

⁹ Ta jngoò kjondaà tís'ijé-lè, nga tjiin-ná nga tjòcha 'yaá xinguiáa. Kò jyeé tjiin-lè, 'an Pablo, jyeé xíta jchínga-ná, tíkoo ndayá tijnáa'ya xi jè ngatjì-la Cristo Jesús.

¹⁰ K'oaá ma-ne nga tís'ijé jngoò-lè kjondaà nga ndaà chjoétjò jè Onésimo xi koni ki'ndí-na komà nga kòkjeiin-la 'én ndaà-la Nainá xi 'an tsibenojmí-la nga j tijnáa'ya ndayá.

¹¹ Nga sa kjòtseé, jè Onésimo, jngoò xíta chì'nda xi mìkì ndaà kjòchjeén-lè, tanga j'ndeij jyeé ndaà kochjeén-ná ingajoá.

¹² Tísikasén jngoò k'a-lè, 'an nga 'nó matsjake.

¹³ Ndaá-la s'e tsà j kijnako-na mé-ne nga s'ichjät'aà-na koni tsà j tìnìchjät'aà-ná, k'e nga takó ndayá tijnáa'ya nga jè ngatjì-la 'én ndaà-la Nainá xi kjoa ts'e Cristo.

¹⁴ Tanga majìn-na nga kjo'nó s'ikíjna tsà ngaji mìkì tijnogoò takoìn, mé-ne jè kjondaà xi tís'ijé-lè mì kjo'nó koma-lè; iníma-lè kjinchrobàjìin.

¹⁵ Tsà koi nachrjein, jè Onésimo, koií kjoa-la tsasit'aà xìn chiba nachrjein-lè mé-ne j'ndeij koma chjoétjò jngoò k'a-ne nga ya kijnako kjit'aà-lè.

¹⁶ Tanga k'oaá s'ín 'ya takoìn koni tsà jngoò xi taxkì chì'nda; isaá 'nó ndaà jchatakòin koni tsà jngoò 'ndsì xi 'nó ndaà matsjachi. 'An, 'nó matsjake; tanga ngaji isaá 'nó tìtsjachi mìtsà ta koi kjoa-la nga chì'nda tsiji koma, koi-né nga jyeé 'ndsè chibà it'aà ts'e Cristo.

¹⁷ Tsà kixij kjoa nga k'oaas'ín 'yatakòn-ná nga 'ndseé chibá it'aà ts'e Cristo, chjoétjò Onésimo koni tsà 'an xi tichjoétjò-ná.

¹⁸ Tsà tjín mé kjoa xi ch'o kisìko-lè, kò tsà mé xi kitjen-t'in-lè, 'aán tikichjí-ná.

¹⁹ 'An, Pablo, 'an sobá tikjì-lè xojon jè. 'An kichjía yije xi tjen-la. Mìkì mochjeén nga 'an koxán-lè, jyeé tjiin-lè nga 'aán kitjen-t'in-ná kjoabinachon-lè.

²⁰ Ndí 'ndsè, k'oaá s'ín tís'ijé-lè nga kàtasakó jngoò-na kjondaà it'aà tsiji, koni s'ín ok'in-la nga 'ndseé chibá it'aà ts'e Na'èn-ná; tije takoìn iníma-na it'aà ts'e Cristo.

²¹ Be-ná nga sikitason-né; k'oaá ma-ne nga tìskasén-lè xojon jè; skanda 'beé-la takoàn, nga isaá tsatoó s'iin koni s'ín tìxan-lè.

²² K'oaá tìs'ín tìxan-lè nga tìkijnandaà jngoò-ná ì'nde ñánda ma síkjáya. K'oaá s'ín tìkoña nga jè Nainá kji'nchré-né koni s'ín tìtsanokjoàt'aà-là, nga tsjá'nde-na nga koma kjikon-nò.

'Én-la Pablo xi fehet'aà-ne

²³ Tìsìhixat'aà-lè Epafra, xinguiá xi ngàsòn ndayá tìtsajna-jen nga jè ngatjì-la Cristo Jesús.

²⁴ Tìkooá tìsìhixat'aà-lè Marcos, Aristarco, Demas ko Lucas, xi síhját'aà-na kjoa ts'e xá xi tìs'iaàn.

²⁵ Jè kàtijnajiin inima-nò kjondaà-la Jesucristo xi otíxoma-ná.

Xojoṇ carta xi kitjei-la xita Hebreo

Kós'ín chjako-ná Nainá it'aà ts'e Ki'ndí-la

¹ Nga tisa kjòtseé, jè Nainá kjìn k'a kiichja-la xita jchínga-ná nga jñà kisikjeén xita xi kiichja ngajo-la, nga kjìn skaya tjín-ne kós'ín kiichja-la.

² Tanga i'ndeí, nga tífehet'aà nachrjein, Nainá, jè ki'ndí-la tísikjeén nga tíchjako-ná ko tije-ne ki'ndí-la kisikjeén nga tsibíndaà isò'nde ko jè kjòngatsja ngats'ii nga yije tsojmì xi tjín isò'nde.

³ Ko jè Ki'ndí xi okó jè kjoa isén ko kjoa jeya-la Nainá; ko it'aà ts'eé 'ya-ná kó kji kjoàn-ne Nainá. It'aà ts'e nga'ño xi tjín-la 'én-la Cristo síjnangui'ño-la isò'nde. K'e nga jye kitsjaà kjotjò yijo-la nga kisìtsjeè-ná jé-ná, ikjoàn tsijin ngajmì nga tsibìjnat'aà chrja kixi-la Nainá.

⁴ Nga jè Ki'ndí-la Nainá tjina ítjòn; isaá 'ño 'nga tjina mì k'oa-ne koni jñà àkjale, koif kjoa-la nga isaá 'ño 'nga tjina jè 'ín xi kitjoé-la.

⁵ Nga jè Nainá, nijngoò k'a k'oas'ín kitsò jngoò-la àkjale:

Ji-né xi ki'ndí-na xan-lè,

'an-ná Na'èn-lè.

Tikoaá nijngoò àkjale xi kitsò-la:

'Aán koma Na'èn-la,

jè koma ki'ndí-na.

⁶ K'e nga kisikasén ki'ndítjòn-la i isò'nde tikoaá k'oaá s'ín kitsò:

Ngats'ii àkjale-na kàteèxkón.

⁷ It'aà ts'e àkjale, k'oaá tsò:

Nainá, maá-la tjo s'ín àkjale-la;

jñà chi'nda-la maá-la ní'ín s'ín.

⁸ Tanga it'aà ts'e ki'ndí-la tsò-né:

Ji-né xi Nainá,

kixí kotixomai nita kjé-né.

⁹ Matsjacha-né kjoa xi ndaà tjín

ko majticha-né kjoa xi ch'o tjín;

koií kjoa-la, 'an xi Nainá 'mì-na xó jaàjìl-lè

nga isa ndaà jchaxkón-lè

mé-ne nga isa tse kjotsja s'e-lè

koni jñà xita xingui xi báhjtako-lè.

¹⁰ Tikoaá tsò-né:

Ji Na'èn xi Nainá 'mì-lè nga ji otixomai,

nga sa tàts'en-la kjoa, jí tsibìndi isò'nde,

tijí-ne xi tsibìndi ngajmì.

¹¹ Ngaji kijna-né nita mé nachrjein-ne.

Tanga jè isò'nde ko ngajmì kjoehet'aà-né;

k'oaá s'ín kojchá koni ma nikje nga ma jchínga.

¹² K'oaá s'ín kíxkóyi koni jngoò x'ió,

k'oaá s'ín sikjatjyi koni s'ín fatjya nikje.

Tanga ngaji mì k'joatjya-lè nita kjé-ne

ko jñà nachrjein-lè mìki kjoehet'aà.

¹³ Nainá ni saà jngoò k'a kitsò-la jngoò àkjale-la:

Tijnat'eii chrja kixi-na

skanda k'e nga síkijnanguia kondra-lè

ya ñánda nga nchasòn ndsokoiì.

¹⁴ Ngats'ìi àkjale, inìma-né nga síxá-la Nainá; jñà nìkasén nga síchjât'aà-la jñà xítà xi tjoé-la kjondaà nga bitjokàjìin kjo'in kjoa ts'e jé-la.

2

Mé-ne 'ñó chjí-la 'én xi jye kina'yá it'aà ts'e Cristo

¹ Koií kjoa-la, mochjeén-né nga nguì sa ndaà sis'in-lá 'én xi jye kina'yá, mé-ne nga mì xìn ndiyá kjiaán koni s'ín tjín ndiyá-la Nainá.

² Jñà kjo'tíxoma xi Nainá kitsjaà nga kisikjeén àkjale nàchrjein xi jye tsato, tjín-la okixi, ko jñà xítà xi tsohótsji jé nga mìkìlì kisìkitasòn kjo'tíxoma xi kits'ìi-la, kjo'íin kitjoé-la koni s'ín ok'in-la.

³ Ko jñà xi titsajnaà nàchrjein i'ndeì, isaá 'ñó s'e-ná kjo'in tsà mì kì sis'iaán 'én-la Cristo nga jé kòchrjekàjìin-ná kjo'in. Nga jé sobá Na'én-ná kitsjaà ítjòn-ná 'én koi. Ko jñà xi iskan kiì'nchré 'én koi, tìkoáá tsibénojmí-ná nga kixi kjoa.

⁴ Nainá, tìkoáá kisikixiya 'én koi nga kjìn skoya kjo'xkón kis'ìin xi okó kjoa jeya-la Nainá, tìkoá kisìka'bìsòn kjo'tjò ts'e Inìma Tsjeè-la; k'oaá s'ín kitsjaà koni s'ín mejèn-la jé.

Yá xi ochrjekàjìin-ná kjo'in kjoa ts'e jé-ná

⁵ Nga Nainá mìtsà jñà àkjale-la kitsjaà-la nga jñà kotìxoma-la jé isò'nde xi iskan kjoí, jé xi titsachibàya-ná.

⁶ Ta saá tíchjaá jngoò k'a Xojon-la Nainá ñánda nga tsò:

Jì Na'èn, ¿yá-né xi xítà?

¿A ok'in-la nga jì nìkìtsjeèn-ne ko makájno-lè it'aà ts'e?

⁷ Isaá nangui kinìkíjni koni jñà àkjale,

kits'ìi-la kjoa jeya ko 'nga kinìkíjni nga tsatíxoma,

⁸ jí kits'ìi-la nga'ñó nga ma kotìxoma-la ngats'ìi tsojmì xi tjín.

Tsà Nainá kitsjaà-la nga'ñó nga jé kotìxoma-la ngats'ìi tsojmì xi tjín tsòyaá-ne nga nímé tsojmì tjín xi mì jé otíxoma-la. Kixí kjoa, nàchrjein i'ndeì, kj'eè kiì ndaà 'ya-la tsà jé tíhotíxoma-la ngats'ìi tsojmì xi tjín.

⁹ Tanga 'ya-ná nga jé Jesús, nas'ín nangui kinìkíjna chiba nàchrjein koni jñà àkjale, tanga i'ndeì, jeyaá tíjna ko 'ngaá tíjna nga tíhotíxoma, koií kjoa-la nga kjo'in kisìkjeín k'e nga k'en. Nainá, 'ñó matsjakeè-ná nga kisikasén Jesús nga jé kisìkjeín kjo'in ts'e kjoabiyaá xi kjondaà ts'e ngats'ìi xítà.

¹⁰ Jé Nainá, xi tsibíndaà yije nítà mé xi tjín, ndaá ok'in-la koni s'ín kis'ìin k'e nga kisikatojìin kjo'in Ki'ndí-la mé-ne nga it'aà ts'e kjo'in xi tsatojìin-ne, nímé kjoa xi kichijàt'aà-la nga koma kòchrjekàjìin-ná kjo'in kjoa ts'e jé-ná ngats'ìi xi ixti-la Nainá maá xi jé mejèn-la nga ya kítsajnaakoáá ñánda nga jeya tíjna jé.

¹¹ Jé xi títsjeè xítà xi tjín-la jé, ko jñà xítà xi tjímatsjeè, tajngoó Na'én ma. Koií kjoa-la jé Ki'ndí-la Nainá mìkìlì masobà-la nga 'ndse tsò-la xítà xi sítsjeè.

¹² Jé Xojon-la Nainá k'oaá s'ín tjít'aà nga tsò:

Kènojmí-la jñà xítà 'ndse xi it'aà tsiji,

seè-lè ya jjiin-la xítà naxandá-lè.

¹³ Tìkoáá tjít'aà ñánda tsò:

Jé Nainá ma'ñót'aà takoàn.

Ijngoò k'a tjít'aà ñánda tsò:

Íi tjínaakoáa ixti xi Nainá kitsjaà-na.

¹⁴ K'oaá s'ín tjín koni ixti-la xítà, tajngoò jní-né ko tajngoò yijo-né. Jesús, k'oaá tìs'ín jní ko yijo kis'e-la mé-ne nga it'aà ts'e kjoa biyaá ma kisikijne-la xítà neíi xi tjín-la nga'ñó nga ma-la sík'en xítà.

15 Jesús, k'oaá s'ín komàt'in mé-ne nga komà kisikítsajnandejí ngats'ì xità xi kit-sakjòn-là kjoa biyaà nga k'oaá s'ín títsajna koni tsà tjit'aà'ñó-là kó tjin nàchrjein bìtsajnakon xità.

16 Jesús, mìtsà koií xá j'ì-ne nga jñà àkjale sìichját'aà-là, jñà xità tje-là Abraham sìichját'aà-là.

17 K'oaá s'ín komà-ne, jè Jesús tjinè-là nga ngàsòn k'oas'ín xità komà koni 'ndse, mé-ne nga nò'miì ítjòn koma-ne xi tjin-là kjohimatakòn xi ndaà síkitasòn xá-là Nainá nga koma kichjítjì-ne jé-là xità it'aà ts'e kjoa biyaà-là.

18 Koni s'ín kichit'aà nga kits'ì-là kjo'in, jè, k'oaá tìs'ín ma-là osìko jè xità xi kò kjo'in tíchit'aà-ne.

3

Mé-ne ìsa jeya tíjna-ne Jesús mì k'oa-ne Moisés

1 Jñò ndí 'ndsè, xi xità naxandá tsjeè-là Nainá 'mì-nò, xi xó k'oaá s'ín jaàjì-nò Nainá nga xità ts'e tsò-nò, k'oaá s'ín ndaà tikítsjeèn nga jè Cristo Jesús xi xó tsibíxáya-là Nainá kò jè tíjna nga nò'miì ítjòn it'aà ts'e kjoa xi mokjeiín-ná.

2 Jesús ndaà síkitasòn xá-là Nainá, nga xó k'oaá s'ín kits'ì-là koni jè Moisés, ndaà kisikitasòn it'aà ts'e naxandá-là Nainá.

3 Jesús ìsaá jeya tíjna koni jè Moisés. K'oaá ngaya-là koni jngò xità xi bíndaà ni'ya, ìsaá jeya bíjna nei-là mì k'oaá-ne koni tije-ne ni'ya.

4 Ngats'ì ni'ya, tsejèn tjin xità xi tsibíndaà; tanga jè Nainá xi tsibíndaà yije tsojmì xi tjin isò'nde.

5 Xi nguì okixì, jè Moisés, nga xità chì'nda-là Nainá ma, ndaà kisikitasòn xá-là it'aà ts'e xità naxandá-là Nainá. Jè xá xi kis'ìin, jè-né nga kitsjaà 'én kó s'ín kichja Nainá k'e nga koma ìskan.

6 Tanga jè Cristo, nga Ki'ndí-là Nainá ma, jè otíxoma it'aà ts'e naxandá-là, jè naxandá-là xi tijná-ná, tsà kixì titsajnaá skanda k'e nga kjoehet'aà nàchrjein koni s'ín nga mokjeiín-ná it'aà ts'e Nainá nga kò kjotsja-ná titsachiñá xi kjondaà-là Nainá.

Mé xi mochjeén nga kitjás'eén ñánda ma ñikjáyaá it'aà ts'e Nainá

7 K'oaá tsò jè Inìma Tsjeè-là Nainá jè xojon xi tjit'aà 'én-là Nainá, nga tsò: Ì'ndeì, tsà titsana'yà jñò 'én-là Nainá,

8 kì tájaàjìin bitsajnakoo inìma-nò koni s'ín kis'ìin jñà xità xi kondra kù-là Nainá nga kiskoòt'aà ya ì'nde it'aà xìn ñánda nangui kixì choòn.

9 Jñà xità jchínga-nò kiskoòt'aà-na nas'ín jye kijtseè ichán nó kjoa xi kis'iaàn.

10 Koií kjoa-là nga tsohótijna jchán-là jñà xità koi, k'oaá kixan-là: “Jñò, kjit'aà nàchrjein xìn ndiyá tjaàkoo kjohítsjeèn-là inìma-nò kò mìkì yaxkon ndiyá-na.”

11 Xi kjoa jti-na, k'oaá s'ín kitsjaà ndsoba nga mìkì kjoahas'en-jìin ì'nde ts'an ñánda ma ñikjáya.

12 Ndí 'ndsè, t'een kindá yijo-nò, nijngò xi ch'o síkìjna inìma-là nga mìkì mokjeiín-là mé-ne nga mì kinchat'aàxìn-lá Nainá xi tíjnakon.

13 Ta saá, nàchrjein nchijòn tjiì nga'ñó-là xinguìoo, k'e nga tíjna-ìsa nàchrjein, mé-ne nga mìkì kotájaàjìin-ne inìma-nò nga mìkì ma skónachan-nò kjoa ts'e jé.

14 Jñà yaá nokjoá-aná it'aà ts'e Cristo, tsà k'oas'ín ndaà kòkjeiín-ná skanda k'e nga kjoehet'aà nàchrjein koni s'ín kòkjeiín-ná nga tisa tàts'en-là kjoa.

15 Xojon-là Nainá k'oaá s'ín tíchja nga tsò: Ì'ndeì, tsà titsana'yà jñò 'én-là Nainá,

kì tájaàjìin bitsajnakoo inìma-nò

koni s'ín kis'iìn jǎà xítà xi kondrà kiì-là Nainá.

¹⁶ ¿Yá xítà-ne xi kiì'nchré 'én-là Nainá, ikjoàn kondrà kiì-là? Tijǎà-ne ngats'ii xítà xi jè Moisés tsachrjekàjii ì'nde Egipto.

¹⁷ ¿Kò yá xítà-ne xi ichán nó tsibijnajchán kò Nainá? Jǎà-né xítà xi tsohótsji jé, xi yá k'en ya iya ndiyá ya ì'nde it'aà xìn ñánda nangui kixi choòn.

¹⁸ ¿Kò yá xítà-ne xi Nainá kitsò-là nga mìkiì kjoahas'en-jii ì'nde ñánda tjín kjoa nìkjáya? Jǎà-né xítà xi mìkiì kiì'nchréñijon-là.

¹⁹ Kò k'oaá s'ín tísijii-ná nga mìkiì jahas'en-jii ì'nde ñánda ma nìkjáya, koií kjoa-là nga mìkiì kòkjiín-là.

4

¹ Nainá k'oaá s'ín kitsjaà-ná 'én nga kitjás'eén ya ì'nde-là ñánda ma nìkjáyaá. K'e nga tákó tjina-isa 'én xi kitsjaà Nainá, ngats'iaá mochjeén-né nga ndaà sikiindaá yijo-ná mì k'oa-ne tsà mì kì kitjás'eén.

² Nga jǎà, k'oaá tís'ín jye kis'enojmíya-ná 'én ndaà-là Nainá, koni s'ín kis'enojmíya-là jǎà xítà jchínga-ná. Tanga jǎà xítà jchínga-ná nímé kjondaà kisakò-là nga mìkiì ngàsòn kòkjiín-là koni jǎà xítà xi i'nga xi kisitasòn jǎà 'én koi.

³ Tanga jǎà xi jye mokjeiín-ná, kitjás'en-ná ya ì'nde ñánda ma nìkjáyaá, ñánda kitsò Nainá:

Xi kjoa jti-na, k'oaá s'ín kitsjaà 'én-na xi ndsoba kichjà-na nga mìkiì kjoahas'en-jii ì'nde ts'an ñánda ma nìkjáyaá.

Tanga Nainá jye kjòtseé jyehet'aà xá xi kis'iìn kóni skanda k'e nga tsibíndaà isò'nde.

⁴ Xojon-là Nainá, k'oaá s'ín tíchjà ts'e xi ma-ne itoò nàchrjein:

Xi ma itoò nàchrjein kisikjáya Nainá nga komà jyehet'aà yije xá-là.

⁵ Tijè-ne Xojon-là Nainá, ìjngò k'a tíchjà ñánda tsò:

Mìkiì kjoahas'en-jii ya ì'nde-na ñánda ma nìkjáya.

⁶ Jǎà xítà xi kiì'nchré ítjòn 'én xi ndaà tsò, mìkiì jahas'en ì'nde ñánda ma nìkjáya nga mìkiì kisitasòn; tanga nàchrjein ì'ndeì tjín-isa xítà xi chíja nga koma kjoahas'en-jii ì'nde ñánda ma nìkjáya.

⁷ Koií kjoa-là Nainá tsibíjna ìjngò-isa nàchrjein xitse, jè nàchrjein ì'ndeì. Nga isa 'ñó komà iskan jè xitaxá ítjòn xi k'ì mì David, k'oaá s'ín tsibít'aà Xojon-là Nainá jǎà 'én xi tsò:

Jǎò, nàchrjein ì'ndeì tsà titsana'yà 'én-là Nainá

kì tájaàjii nìkítsajnaà inima-nò.

⁸ Jè Josué, nga mìkiì komà kitsjaà-là kjoa nìkjáya jǎà xítà Israel, koií kjoa-là Nainá kitsjaà ìjngò-isa nàchrjein xitse.

⁹ K'oaá ma-ne jè naxandá-là Nainá tjina ìjngò-là nàchrjein tsjeè ts'e kjoa nìkjáya;

¹⁰ nga jè xítà xi fahas'en-jii kjoa nìkjáya xi ts'e Nainá, tikoáá síkjáya-ne kjoa ts'e xá-là, koni s'ín kisikjáya Nainá it'aà ts'e xá xi kis'iìn.

¹¹ Mochjeén-né nga k'oi-lá nga'ñó yijo-ná nga kitjás'en-jǎá kjoa nìkjáya-là Nainá; mìkiì k'oas'ín s'eén koni kis'iìn jǎà xítà xi mìkiì kòkjiín-là nga kisikitasòn.

¹² 'Én-là Nainá tjina-kon-né kò tjín-là nga'ñó. Isaá ndaà ote mì k'oa-ne jngò kichjà ndojò xi yijò nga ingajò ngobà-là; fahas'en-jii-né skanda ya jii inima-ná kò ya jii kjohítsjeèn-ná. Tikoáá fahas'en-jii-né skanda ñánda tikjò nindaà-ná kò iya nindaà-ná; ótsjiya-né kjohítsjeèn-là inima-ná mé xi mejèn-là nga s'iin.

¹³ Ngats'ii xi Nainá tsibíndaà, nì mé tjín xi tjina'ma, nga ngats'ii kjoa tjina tsejèn-né; tibeè-ne xkon jè xi tjínè-là nga k'oi-lá kindà.

Jè xi ngui no'mii ítjòn tjina

¹⁴ Jesús xi k'ndí-là Nainá, jè-né xi ngui sobà no'mii ítjòn tjina it'aà tsaján, jè-né xi jahas'en ngajmii nga nguixkon Nainá. K'oaá ma-ne nga mochjeén-né nga kixi kítsajnaakoaá jǎà 'én xi mokjeiín-ná.

¹⁵ Jè xi nò'miì íjtòn tíjna ít'aà tsaján, komaá kohimakeè-ná k'e nga mahindaà; nga jè, k'oaá tís'ín kichít'aà koni jñá, tanga mìtsà jé tsohòtsji.

¹⁶ Kíjngò-lá takoán nga kìnchat'aá chrañà-lá íxile kjotíxoma-là Nainá xi tse kjondaà tíjn-là, mé-ne nga skoe imà-ná kjondaà xi tíjn-là koa kosíko-ná k'e nga mé xi kochjeén-ná.

5

¹ Ngats'ìi jñà nò'miì íjtòn, yaá tjaájiìn ít'aà ts'e xítà naxandá. Jè xá tíjnè-là nga chjatì xítà nga nguixkon Nainá tíkoa tsját'aà-là kjotjò Nainá kò sík'en cho xi kjoa ts'e jé-là xítà.

² Jñà nò'miì, tíkoaá mahindaàjiìn inima-là; k'oaá s'ín ma-ne nga ma beèhima jñà xítà xi mìkiì machiya-là kò xi xìn ndiyá tíjmaya.

³ Koií kjoa-là nga ma indaàjiìn inima-là nò'miì, tíjnè-là nga sík'en-là cho kjotjò xi tsjá-là Nainá xi kjoa ts'e jé-là kò tíkoa sík'en cho kjoa ts'e jé-là naxandá.

⁴ Jñà nò'miì, mìtsà tà jñà tajngò bí't'aà xá 'nga yijo-là; jè Nainá xó chja-là koni s'ín kíichja-là jè Aarón.

⁵ K'oaá tís'ín tíjn ít'aà ts'e Cristo, mìtsà tà jè tajngò kiskoé xá xi ts'e nò'miì íjtòn, Nainá kitsjaà-là xá 'nga k'e nga kitsò-là:

Ji-né xi Ki'ndí-na xan-lè;

'aán-ná xi Na'èn-lè.

⁶ Tjè-ne Xojòn-là Nainá, ìjngò k'a tíchja ñánda tsò:

Ji-né xi nò'miì tíjni nítà mé nàchrjein-ne,

xá-lè, k'oaá s'ín tíjn koni xá xi kisikitasòn Melquisedec.

⁷ Jè Cristo k'e nga sa tsibijna í isò'nde, 'ñó kíichjat'aà-là Nainá, nguì koó ndáxkon tsibítsi'ba-là koa kisijét'aà-là jè xi tíjn-là nga'ño nga ma-là kochrjekátjì ít'aà ts'e kjoa biyaà; Nainá kí'nchré-là nga ndaà kijtseèxkón.

⁸ Jè Cristo, nas'ín kí'ndí-là Nainá ma, yaá komà-là kisikitasòn, k'e nga kisikjeín kjo'in.

⁹ K'e nga jye mì tí mé xi kichjät'aà-là, k'oaá s'ín tsibijna nga jè kochrjekátjì kjo'in xítà nítà mé nàchrjein-ne, ngats'ìi xi 'nchréñijon-là,

¹⁰ Nainá kisikíjna Jesús nga nò'miì íjtòn tsibijna, kitsjaà-là xá koni ts'e Melquisedec.

Jñà xítà xi mìkiì machiya-là mé kjoa xi kixi tíjn

¹¹ Ít'aà ts'e kjoa koi, 'ñó tíjn-isa kjoa xi s'enojmíya-nò, tanga 'ñó chjá tíjn nga s'enojmí-nò, koi kjoa-là nga jñò, mìkiì machiya-nò.

¹² Jñò, skanda kjòtseé maestroó-là titsajnaà tsà ndaà; tanga jñò, tákó mochjeén-nò nga chíta'yà xítse ìjngò k'a 'én-là Nainá xi mì 'in chja koni s'ín komà-nò nga sa íjtòn. K'oaá s'ín tímat'ioòn koni ndí íxti xi tákó tsjín 'biì, mìkiì mochjeén-là nga tsojmi tájaà skine.

¹³ Ngats'ìi xi tákó tsjín 'biì, íxti-né, mìkiì machiya-là mé kjoa xi kixi tíjn.

¹⁴ Tanga jñà tsojmi xi ma chine xi tájaà kjoàn, ts'eé xítà xi jye kòchínga, jñà xi jye machiya-là mé kjoa xi ndaà tíjn kò mé kjoa xi mìkiì ndaà tíjn nga k'oaá s'ín nchisíchá yijo-là.

6

¹ Koií kòs'ín mochjeén-ne nga chíta'yà 'én-là Cristo xi isa ndaà kojchíngakoá kjoa ts'e Nainá mé-ne nga nímé chjät'aà-ná nga xítà-là Cristo maá. Mì tíjñà tíjñà 'én chíta'yà-aná xi kichíta'yà nga sa íjtòn ít'aà ts'e Cristo. Mì tíjñà tíjñà 'én síkítsjeèn-ya-ná kó s'ín ma nga níkájnoá jé xi tíjn-ná xi kjoabiyaà fiko-ná. Kò tíkoaá mì tíjñà tíjñà 'én síkítsjeèn-ya ìjngò k'a-ná kó s'ín kòkjeín-ná ít'aà ts'e Nainá

² kò kòs'ín ma bautizar xítà, kò kòs'ín oyijòsòn-lá ndsaá jñà xítà xi mokjeín-là ít'aà ts'e Cristo. Kò tíkoaá mì tíjñà tíjñà 'én síkítsjeèn-ya ìjngò k'a-ná kó s'ín kjoaaya-là jñà xítà xi jye k'en, kò kòs'ín s'íin Nainá nga kíindaàjiìn-là xítà mé xi ok'in-là nga tsjá-là nítà kjé-ne.

³ Mochjeén-né nga chíta'yà 'én xi isa ndaà kojchíngakoá kjoa ts'e Nainá; tsà Nainá tsjá'nde nga kòs'ín koma, k'oas'ín s'én.

⁴ Nga jñà xità xi jye kjòhiseèn-la kjòhítsjeèn-la, xi jye kisaseèn-takòn kjòndaà xi tsjá Nainá, xi tìkoà jye ngàsòn kitjóé-la Inìma Tsjeè-la Nainá,

⁵ xi jye kisaseèn-takòn 'én ndaà-la Nainá kò nga'ñó-la isò'nde xi sà kjoíí,

⁶ tsà ìjngòò k'a xìn ndiyá kjoí, tsà tsjìn takòn 'én-la Nainá, mì tì kiì koma kondaàya-ne kjòhítsjeèn-la nga kóófat'aà ìjngòò k'a-la Nainá; nga jñà xità koi, kjoà xi nchis'ín, k'oaá ngaya-la koni tsà krò nchihót'aà ìjngòò k'a jè Ki'ndí-la Nainá nga tsjá-la kjosobà nga nguixkòn ngats'ìi xità.

⁷ K'oaá s'ín ngaya-la koni jè nangui, k'e nga 'ba jtsí, ma'nchì'nde-né. Tsà ndaà xkà xi bisò xi mochjeèn-la xità xi síxáko nangui, jè Nainá síchikon-t'in nangui.

⁸ Tanga tsà na'yá chìnì kò na'yá xanchroò bisò, nímé chjí-la, mìtsà nangui ndaà nga nguixkòn Nainá; kijchò nàchrjein nga tà kiti-né.

⁹ Jñò ndí 'ndsè, xi matsjacha-nòjen, nas'ín k'oas'ín nokjoà-jen, k'oaá s'ín tíjngòò takòn-jen nga tjoé-nò kjoà xi 'ñó ndaà tjín, ngats'ìi kjòndaà xi tjín-la xità xi jye itjokàjìin kjo'in.

¹⁰ Nga Nainá, xità kixi-né, mìkiì síjchàajìin xá-nò xi jye ki'nè kò kjoatjòcha xi tjín-nò nga nìchját'aà-là xità naxandá-la Cristo, koni s'ín títsa'nè skanda nàchrjein i'ndeí.

¹¹ Tanga ngajen, k'oaá s'ín mejèn-najen nga kjit'aà nàchrjein nguì kóó kjotsja nga kos'ín tixá nga jngòò ìjngòò skanda k'e nga kjoehet'aà nàchrjein-nò mé-ne nga kítasòn-ne kjoà xi títsachiñá-laá.

¹² Majìn-najen nga ts'eè s'een. Chjínguì-là jñà xità xi jye nchitjóé-la kjotjò koni s'ín kitsjaà tso'ba Nainá koi kjoà-la nga ndaà mokjeíin-la kò tjín-la kjoatsejta.

Kó tsò 'én xi kiìchjā Nainá koni s'ín kitsjaà-la tso'ba Abraham

¹³ Nainá k'e nga kitsjaà-la tso'ba Abraham, k'oaá s'ín kitsjaà kixi 'én-la nga tíjè tsasèn-ne nga mì tì yá tjín-ne xi ìsà 'nga tíjna koni jè; k'oaá s'ín kiìchjā,

¹⁴ nga kitsò: “An, 'ñó ndaà sichikon-t'in-lè, tìkoà 'ñó kòkjìn-ya jñà ìxti-lè.”

¹⁵ K'oaá s'ín komà-ne Abraham kiskoòñàkjoà, ìkjoàn kitjóé-la koni s'ín kitsò Nainá.

¹⁶ Jñà xi taxkì xità, k'e nga tsjá 'én-la, síkjeèn jngòò 'ín-la jngòò xi ìsà 'nga tíjna mé-ne nga síkixiya-ne 'én xi tsjá. Kò tà yaá fehet'aà kjoà.

¹⁷ K'oaá s'ín ma-ne k'e nga jè Nainá k'oaá s'ín kjòmejen-la nga kitsjaà kixi-la 'én jñà xità xi tjoé-la kjotjò nga sìkítasòn koni s'ín kitsjaà tso'ba, kitsjaà jngòò 'én xi 'ñó xkón tjín nga nímé xi ma kjoatjìya.

¹⁸ Jñà 'én koi xi jò ma-ne xi mìkiì ma fatjìya, nga mìkiì koma skónachan-ná Nainá, yaá 'ñó sakó-la nga'ñó inìma-ná, jñá xi mejèn-ná nga Nainá kosìko-ná nga nguì jè kjit'aà takoán nga títsachiñá-lá jè kjoà kixi-la xi jè jye kitsjaà-ná.

¹⁹ Jè kjoà kixi xi títsachiñá-lá, k'oaá s'ín síkìjna kixi inìma-ná koni jngòò kichā xi sit'aà'ñó-ne chitso, kò jè kjoà kixi xi okji skanda maá jahas'en ya i'nde tsjeè ñánda tjobájtòò nikje cortina,

²⁰ ya ñánda jahas'en Jesús nga tsohójnandaà-ná ndiyá, nga no'miì ítjòn tíjna nità mé nàchrjein-ne koni jè Melquisedec.

7

Jesús, k'oaá s'ín ngaya-la koni jè no'miì ítjòn xi ki'mi Melquisedec

¹ Melquisedec xi xità xá ítjòn tsibìjna ts'e naxandá Salem, tìkoà no'miì ítjòn tsibìjna ts'e Nainá xi tíjna ngajmì, kiì kaña-la Abraham k'e nga tínchrobá-ne nga jye kisìkijne yije-la xitàxá ítjòn xi kiskaàn-kò. Melquisedec kisìchikon-t'in Abraham.

² Jè Abraham, teya kis'iin tsojmì xi kisakò-la ts'e kjoajchán, kò jngòòya kitsjaà-la Melquisedec. 'In xi 'mì Melquisedec, tsòyaá-ne: xitàxá ítjòn xi tjín-la okixi. Tìkoà jè 'ín xi 'mì xitàxá ítjòn ts'e Salem, tsòyaá-ne: xi tjín-la kjoà'nchán.

³ Jè Melquisedec mìkiì 'ya-là tje-là, yá na'èn-là, yá nea-là, ñánda kits'iìn, ñánda k'en; k'oaá s'ín mangásòn-kò koni Cristo xi Ki'ndí-là Nainá nga jè Melquisedec tikoá nò'miì ítjòn tíjna nità mé nàchrjein-ne.

⁴ Jñò tikítsjeèn nga 'ño 'nga tsibìjna Melquisedec, skanda jè xità jchínga-ná Abraham teya kis'iìn tsojmì xi kisakò-là ts'e kjoajchán, kò jngoòya kitsjaà-là Melquisedec.

⁵ Kixí kjoa, k'oaá s'ín tíchja kjotíxoma-là Moisés xi Nainá kitsjaà-là nga jñà xità naxandá tíjné-là nga teya sùjòya tsojmì xi tíjn-là, jngoòya tsjá-là jñà nò'miì xi tje-là Leví, nas'ín tí xità xíkjin-ne xi ya nchrobát'aà-ne tje-là Abraham.

⁶ Tanga jè Melquisedec, mìtsà tje-là Leví, tanga kitjoé-là xi jngoòya oko-là tsojmì xi teya kis'iìn Abraham, ikjoàn k'eé kisìchikon-t'in, nas'ín jè Abraham xi kitjoé-là 'én xi tso'ba Nainá kùchja-ne.

⁷ Nga jyeé tíjin-ná, jè xi síchikon-t'in xità, isaá 'nga tíjna mì k'oaá-ne koni jè xi machikon-t'in.

⁸ Jñà nò'miì xi tje-là Leví xi tjoé-là xi jngoòya oko-là xi teya s'ín xità naxandá Israel, mìtsà ta bitsajnakon kjit'aà, bijchó nàchrjein nga biyaà; tanga ít'aà ts'e Melquisedec, jè Xojon-là Nainá, k'oaá s'ín 'ya-là koni tsà jngoò xità xi tákó tíjnakon skanda nàchrjein i'ndej.

⁹ Jñà nò'miì xi nchrobát'aà-ne tje-là Leví xi tjoé-là xi jngoòya oko-là xi teya s'ín xità naxandá Israel, komaá k'oakixoán nga tikoá jè Melquisedec kitjoé jngoòya-là ít'aà ts'e xità koi k'e nga kitsjaà jngoòya-là Abraham,

¹⁰ nga jñà nò'miì xi tje-là Leví, yaá nchrobát'aà-ne tje-là Abraham. Nas'ín kj'eè kii ts'iìn Leví k'e nga jè Melquisedec ijchò kaña-là Abraham, k'oaá s'ín ngaya-là koni tsà jñà nò'miì Israel, jyeé ya títsajnakò Abraham nga nchitsjá-là kjotjò xi jè tjoé-là Melquisedec.

¹¹ Jñà kjotíxoma xi kitjoé-là jñà xità Israel, yaá inchrobát'aà-ne ít'aà ts'e nò'miì xi tje-là Leví; tanga jñà nò'miì koi, mìkiì komà-là nga jngoò k'a kisìkixiya xità nga mì tí mé chijat'aà-là. K'oaá s'ín komà-ne nga j'ii ìjngoò nò'miì xi jè mangásòn-kò Melquisedec, kò mìtsà jè mangásòn-kò Aarón xi tje-là Leví.

¹² K'e nga fatjìya nò'miì, kós'ín síxá, tikoá mochjeén-né nga kjoatjìya kjotíxoma.

¹³ Koni s'ín tíchja 'én-là Nainá, jè xi kitjoé-là xá koni ts'e Melquisedec, kj'eí tje-né; ya ñánda inchrobát'aà-ne, nì saá jngoò nò'miì bitjokàjìn.

¹⁴ K'oaá s'ín 'ya-là nga jè Na'én-ná Jesucristo, yaá inchrobát'aà-ne tje-là naxandá Judá. Tje-là naxandá jè, mìkiì kisìkaxkì Moisés k'e nga kùchja ít'aà ts'e nò'miì.

¹⁵ Kjoa koi, isaá ndaà makixiya-ná tsà jè nò'miì xitse sùkitasòn koni s'ín kisìkitasòn jè Melquisedec.

¹⁶ Nga mìtsà k'oaá s'ín kitjoé-là xá ts'e nò'miì koni s'ín tíchja kjotíxoma yá ts'e tje xi inchrobát'aà-ne nga nò'miì kisìkitasòn. Ta saá k'oaá s'ín kitjoé-là xá ít'aà ts'e nga'ño xi tíjn-là nga mìtsà yá xi koma-là jngoò k'a sùk'en.

¹⁷ K'oaá s'ín tíchja 'én-là Nainá xi ít'aà ts'e, nga tsò:

Ji-né xi nò'miì tíjni nità mé nàchrjein-ne,
k'oaá s'ín mangásòn-koi koni jè Melquisedec.

¹⁸ K'oaá s'ín komà-ne nga kichijàngui kjotíxoma jchínga, koi kjoa-là nga tsjìn-là nga'ño tikoá mì tí kii tímochjeén-ne.

¹⁹ Nga jè kjotíxoma jchínga xi kiskii Moisés, nímé xi kisìkixiya xità; tanga nàchrjein i'ndej, tíjn ìjngoò-ná kjoa xi isa ndaà tíjn xi títsachiñá-lá jè xi sikinchat'aà chraña-ná Nainá.

²⁰ Nainá k'oaá s'ín kitsjaà kixi 'én-là xi xkón tíjn k'e nga kitsjaà tso'ba nga nò'miì ítjòn kíjna Cristo. Jñà nò'miì xi i'nga, ta k'oaá s'ín kitjoé-là xá, mìtsà yá xi kitsjaà 'én-là.

²¹ Tanga xi ít'aà ts'e Na'én-ná Jesús, k'oaá s'ín tíchja xojon xi tíjt'aà 'én-là Nainá nga kitsò: Na'én-ná k'oaá s'ín kitsjaà kixi 'én-là;
mìkiì sùkijatjìya-là kjohítsjeèn-là nga tsò:
“Ji-né xi nò'miì tíjni nità mé nàchrjein-ne.”

22 K'oaá s'ín ma-ne nga jè Jesucristo osen-tjì-ná nga nguixkòn Nainá nga jè bíndaàjìin ko-ná jngoò kjoa xitse xi ìsaá ndaà tjín.

23 Tíkooá jñà no'miì xi kisíxá xi tje-la Leví, jyeé kjìn ma xi jye kisíkítasòn xá-la tanga koií kjoa-la nga biyaà nga mìkiì ma síxá-ìsa.

24 Tanga jè Jesús tíjnakon-ne nità kjé-ne, k'oaá ma-ne nga no'miì tíjna nità mé nachrjein-ne.

25 K'oaá s'ín ma-ne nga ma-la ochrjekàjìin kjo'in xità nità mé nachrjein-ne, ngats'ìi xità xi it'aà ts'e Jesús bijchó nguixkòn Nainá; jè tíjnakon-né nità kjé-ne mé-ne nga bítsi'batjì xità.

26 It'aà tsaján, nguì jè Jesús xi mochjeén-ná nga no'miì ítjòn tíjna: nga xità tsjeè-né; nímé jé tjín-la; mì tjé kji iníma-la; tíjnat'aàxìn-la xità jé, kò jè xi ìsa 'nga tíjna ján ngajmìi.

27 Mìtsà k'oas'ín koni s'ín no'miì ítjòn xi i'nga, nga nachrjein nchijòn sík'en cho nga tsjá kjotjò-la xi kjoa ts'e jé-la, ikjoàn tsjá ts'e jé-la xità naxandá. Tanga Jesús k'e nga kitsjaà kjotjò yijo-la nga k'en, jngoò k'aá kitsjaà nità kjé-né.

28 Jè kjotíxoma xi kitsjaà Moisés, k'oaá s'ín tíchja nga jñà kítsajna no'miì ítjòn xi taxki xità xi chiba nga'ño tjín-la; tanga jè 'én xi xkón tjín xi iskan kitsjaà Nainá, k'oaá s'ín tíchja nga jè Ki'ndí-la Nainá, kíjna no'miì ítjòn, jè xi k'oas'ín kisìkò Nainá nga nímé chijat'aà-la nità kjé-ne.

8

Jè kjoa xitse xi tsibí'ño Jesús

1 Ngats'ìi kjoa xi chibàya-ná, tjín jngoò xi ìsaá 'ño chíj-la, jè-né nga tíjna jngoò-ná no'miì ítjòn xi tsibíjnat'aà chrja kixi-la íxile kjotíxoma-la Nainá ján ngajmìi.

2 Yaá síxá ya ñánda tíjna xi nguì Ni'ya Tsjeè-la Nainá, xi jè sobà Nainá tsibíndaà; mìtsà taxki xità tsibíndaà.

3 Ngats'ìi no'miì ítjòn, k'oaá s'ín satíxoma-la nga kjotjò tsját'aà-la Nainá kò cho sík'en; k'oaá ma-ne nga jè Cristo tíkooá tjínè-la nga kis'e-la mé kjotjò xi kitsjaat'aà-la Nainá.

4 Jè Cristo, tsà i tíjna it'aà nangui, skanda mì-la kii koma nga no'miì kíjna, nga i it'aà nangui, jyeé tjín no'miì xi tsját'aà-la kjotjò Nainá koni s'ín tjín kjotíxoma xi kiskii Moisés.

5 Tanga jñà no'miì xi tjín i it'aà nangui, yaá síxá ni'ya xi tà isén-la-né kò 'nguién-la-né jè Ni'ya Tsjeè-la Nainá xi tíjna ngajmìi; nga jè Moisés k'e nga jye mejèn koiíts'ia nga kíindaà ni'ya tsjeè-la Nainá xi nikje, jè Nainá kitsò-la: “Ndaà chítsejìn, k'oa kó kji t'íin koni kji xi tsakoò-lè ya nindoò Sináí.”

6 Tanga nachrjein i'ndeji, ìsaá ndaà tjín xá xi kitjoé-la Jesucristo nga no'miì ítjòn tíjna, nga jè osíjnajìin jngoò kjoa xitse xi ìsa ndaà tjín xi tsibíndaàjìin Nainá kò xità, nga yaá nchrobát'aà-ne 'én xi ìsa ndaà tjín koni s'ín jye kitsjaà tso'ba Nainá.

7 Tsà nímé xi kisíchiját'aà-la jè kjoa xi kisindaàjìin ítjòn, mì-la kii mochjeén nga ìjngoò k'a sindaàjìin xi ma-ne jò k'a.

8 Tanga Nainá k'e nga tsohótiko, k'oaá kitsò:
Kijchò nachrjein k'e nga kíndaàjìin-kò jngoò kjoa xitse
jñà xità Israel kò xità Judá, kitsò Nainá.

9 Jè kjoa xitse xi kíndaàjìin-koaa,
mìtsà k'oas'ín sindaàjìin koni ts'e xità jchínga-la,
k'e nga 'an sobà kitsobà tsja
nga tsachrjekàjñà nangui Egipto.
Jñà xità koi, mìkiì kisíkítasòn koni s'ín kisindaàjìin,
k'oaá komà-ne nga kitsjìn takoàn, tsò Nainá.

10 K'e nga jye koma iskan,
jè kjoa xitse xi kíndaàjñàakoaa xità Israel, kiís'ín s'e, tsò Nainá:
Kjotíxoma-na yaá kíjnajñà ya kjohítsjeèn-la,

ko yaá skiaà jjiìn inima-la.

'An-ná xi Nainá k̄itso-na,
ko jñà-né xi koma x̄ita naxandá-na.

¹¹ Mì t̄i k̄i kochjeén-ne nga x̄ita x̄ikjín keènojmiya-la
ni mìtsà jè 'ndse keènojmi-la nga skoexkon Nainá,
nga ngats'iì x̄ita skoexkon-na
mats'iāko-ne xi is̄a ixti skanda jñà xi 'ñó x̄ita jchínga.

¹² 'Aán siijchàat'aà-la ngats'iì kjoa ch'o xi kis'iìn,
mì t̄i k̄i siikitsjeèn-na jé xi tjín-la.

¹³ K'e nga Nainá síkaxki ìjngoò kjoa x̄itse, tsòyaá-ne nga jè kjoa xi kisindaàjììn ítjòn, jyeé kòjchínga. Mì t̄i k̄i tímochjeén-ne, jyeé tíchija.

9

Jè Ni'ya Tsjeè-la Nainá xi nikje

¹ Jè kjoa xi tsibíndaàjììn ítjòn Nainá kis'eé-la k̄jotixoma kós'ín ma nga jeya n̄ikjinaá Nainá ko kis'e jngoò-la ni'ya tsjeè ì it'aà nangui.

² Jè Ni'ya Tsjeè-la Nainá xi nikje, k'oaá s'ín tjíndaà nga jngoò ì'nde tíjna ítjòn xi 'mì I'nde Tsjeè, ñánda tíjna k̄ich̄a xi t̄iya ni'ín ko ñánda tíjna ím̄ixa xi nchasòn inchrájìn tsjeè-la Nainá.

³ Jè nikje cortina xi ma jò-ne xi tjóbá jngoò osen ni'ya nikje, ya ijton kjijna ì'nde xi 'mì I'nde xi is̄a 'Ñó Tsjeè.

⁴ I'nde jè, yaá kjijna jngoò kaxa xi nguì oro ñánda t̄isòn chrjongó-la Nainá; t̄ikoa yaá kjijna kaxa xi nguì oro yijajno ts'e kjoa xi tsibíndaàjììn Nainá. Kaxa jè, tíjnaya jngoò t̄ijí k̄ich̄a xi nguì oro ñánda 'ncha inchrájìn xi 'mì maná, t̄ikoa yaá k̄jinaya ya nise-la Aarón xi tsibíjts'én-t'aà chrja-la ko ya 'ncha jñà ndajò teè ñánda t̄jít'aà k̄jotixoma-la Nainá xi kitjóé-la Moisés.

⁵ Ya isòn kaxa 'ncha isén-la àkjale xi querubín 'mì xi tjín-la jngaá xi okó kjoa jeya-la Nainá; jñà jngaá-la bíjtsa'ma jè kaxa. Tanga ì'ndeì, jñà kjoa koi, mìkìì mochjeén nga íjngó íjngó skaya koxki.

⁶ K'e nga jye k'oa's'ín kisinchaàndaà tsojmì koi, jñà nò'miì, k̄jít'aà n̄achrjein fahas'en ya Ni'ya Tsjeè-la Nainá xi nikje, jè ì'nde xi tíjna ítjòn, nga síkitasòn xá-la nga beèxkón Nainá.

⁷ Tanga jè ì'nde xi ma-ne jò, ta jè tajngoò nò'miì ítjòn fahas'en jngoò k'a nga jngoò nó; k'e nga fahas'en, tjínè-la nga jní-la cho 'ba xi tsját'aà-la Nainá kjoa xi t̄its'e-ne jé-la ko ngats'iì jé-la x̄ita naxandá, jñà xi mìkìì t̄jjiìn-la tsà jé ótsji.

⁸ Jè Inima Tsjeè-la Nainá k'oaá s'ín síkíchiya-ná, k'e nga tákó jè tímochjeén Ni'ya Tsjeè xi nikje xi kisindaà ítjòn, k̄j'eè k̄i táx'a'nde nga koma k̄itjás'eén jè I'nde xi Is̄a 'Ñó Tsjeè.

⁹ Jñà kjoa xi komà k̄jòtseé, tà kjoa mangásòn-né koni s'ín tíma n̄achrjein ì'ndeì; nga jñà k̄jòtjò ko jní-la cho xi kixíxteèn ì'nde jè, tsjìn-la nga'ñó nga sīitsjeè k̄johítsjeèn-la x̄ita xi k'oa's'ín beèxkón Nainá.

¹⁰ Kjoa koi, tà kjoa ts'eé yijo-la x̄ita, mé tsojmì xi ma chine ko xi ma 'yò, koa kós'ín sítsjeè yijo-la x̄ita; tà k'oaá s'ín t̄jen kochjeén skanda k'e nga jè Nainá sīikjaj̄iya-la ngats'iì kjoa koi.

Nga'ñó xi tse tjín-la jè jní xi tsibíxteèn Cristo

¹¹ Tanga jyeé j'ìi Cristo nga nò'miì ítjòn tíjna it'aà ts'e k̄jondaà-la Nainá xi jye tíma. Yaá jahas'en Ni'ya Tsjeè-la Nainá jè xi is̄a 'ñó ndaà choòn ko xi is̄a kixi tjín, nga mìtsà tsja x̄ita kisindaà-ne jè xi tsò-ne kjoa nga mìtsà ì it'aà nangui kisindaà.

¹² Cristo, jngoò k'aá jahas'en ya I'nde Tsjeè. Mìtsà t̄i jní-la tíndsó ko jní-la nchrja jahas'en-ko-ne. Ts'e sobá jní jahas'en-ne. K'oaá s'ín kis'iìn nga tsibíchjítjì jé-ná, mé-ne nga komà kisik̄itsaj̄nandeìí-ná n̄ita mé n̄achrjein-ne.

13 Jè jní-là nchraja kò jní-là tíndso kò chijo-là nchraja kitì xi nchraja chjoón ki'ndí, maá-là sítsjeè yijo-là xítà xi xa'ya-là k'e nga xíxteèn-jno.

14 Tsà k'oaá s'ín bitasòn kjoa koi, jè jní xi tsibíxteèn Cristo, isaá tse nga'ño tjín-là. Nga it'aà ts'eé nga'ño-là Iníma Tsjeè xi tíjnakon nítà mé nachrjein-ne nga kitsjaà kjotjò-là Nainá yijo-là xi mìtsà mé jé tjín-là. Jè jní-là Cristo sítsjeèya kjohítsjeèn-nò nga mì tì kii koa tís'ín s'en-nò kjoa xi fiko-ná kjoabiyaà, mé-ne nga ma sixá-là Nainá xi tíjnakon.

Jè kjoa xítse xi tsibíndaàjìin Nainá kò xítà

15 K'oaá ma-ne nga jè Cristo osijnajìin osen koni s'ín tsibí'ño jngoò kjoa xítse. K'e nga k'en ngajo-là xítà, jè tsibíchítjì jé-là xi tsohótsji xítà k'e nga tisa jè tíhotíxoma kjoa xi kisindaàjìin ítjòn, mé-ne ngats'ìi xítà xi xó jaàjìin-ne tjoé-là kjotjò xi tsjá Nainá nítà kjé-ne koni s'ín kitsjaà 'én-là Nainá xi tso'ba kiihja-ne.

16 K'e nga jngoò xítà mejèn-là síka'bí tsojmì xi tjín-là, bíndaà jngoò xojon xi bí'ño. Skanda k'eé mochjeén k'e nga biyaà jè xítà xi bíndaà.

17 Tanga xojon jè, nímé chjí-là k'e nga tikj'eé biyaà xítà xi tsibíndaà; skanda k'eé chjí-là k'e nga kiyá.

18 Jè kjoa xi kisindaàjìin ítjòn k'oaá tís'ín kisindaàjìin nga cho k'en mé-ne komà kixíxteèn-ne jní.

19 Moisés, k'e nga jye tsibíxkejìin-là xítà naxandá ngats'ìi kjotíxoma-là Nainá, ikjoàn kiskoé jní-là tíndso kò jní-là nchraja ki'ndí kò kisikájìin nandá; kò kiskoé jngoò chrja-là yá hisopo kò tsja-là orrè xi inì kjoàn; jahajìin jní-là cho; ikjoàn tsibíxteèn-jno jè xojon xi tjít'aà kjotíxoma-là Nainá; k'eé tsibíxteèn-jno ngats'ìi xítà naxandá.

20 Moisés kitsò: “Jè jní jè xi síkixiya kjoa nga koma síkitasòn koni s'ín tsibíndaàjìin-kò-nó Nainá.”

21 Moisés, tikoá tsibíxteèn-jno jní jè Ni'ya Tsjeè-là Nainá xi nikje kò ngats'ìi tsojmì xi mochjeén k'e nga yaxkón Nainá.

22 Koni s'ín tíhja xojon xi tjít'aà kjotíxoma-là Nainá, mejèn tsà ngats'ìi kjoa, saá jní matsjeèya-ne; tsà mìkii xíxteèn jní, mìkii koma jchat'aà-là jé-là xítà.

23 K'oaá s'ín kjòchjeén nga jní-là cho matsjeèya-ne jè Ni'ya Nikje Tsjeè kò tsojmì xi tjíya xi mochjeén k'e nga yaxkón Nainá; jñà tsojmì koi, ta okó-né koni choòn ján ngajmii; tanga jñà xi tjín ngajmii, mochjeén-né nga biyaà jngoò xi isaá xkón tjín mé-ne koma kotsjeèya-ne.

24 Tanga Cristo, mìtsà ya jahas'en Ni'ya Nikje Tsjeè xi tsja xítà kisindaà-ne, xi ta okó xi tjín ngajmii. Cristo, ngui yaá jahas'en ngajmii nga nguixkon Nainá nga tíhjatjì-ná.

25 Mìkii k'oaas'ín kjìn k'a jahas'en ya ngajmii nga kitsjaàt'aà kjotjò yijo-là, koni s'ín no'mii ítjòn nga xkì nó fahas'en I'nde xi 'Nó Tsjeè, nga fahas'en kò jní xi mìtsà ts'e.

26 Cristo tsà kjìn-là k'a jahas'en ngajmii tikoá tjìnè-là nga kjìn k'a sùkjeiín kjo'in kó-ne skanda kisindaà isò'nde. Tanga i'nde, nga jye tífehèt'aà nachrjein, ta jngoò k'a j'ii nga kitsjaà kjotjò yijo-là nga tsibíxteèn jní-là, mé-ne nga kitjaàxìn-ne kjoa ts'e jé nítà mé nachrjein-ne.

27 K'oaá s'ín tjín nga ngats'ìi xítà, ta jngoò k'a biyaà, kò iskan kjoí jè nachrjein nga sindaàjìin-là.

28 K'oaá tís'ín tjín it'aà ts'e Cristo, ta jngoò k'a kitsjaàt'aà kjotjò yijo-là nga tsibíxteèn jní-là, mé-ne nga kjìn xítà tjáxìn-ne jé-là. Xi ma-ne jò k'a, kitjojen i'ngoò k'a-ne ngajmii; mìtsà tì jé kjoaàxìn-ne; koií xá kjoí-ne nga kochrjekàjìin kjo'in jñà xítà xi nchikoña-là.

10

Mé-ne 'ño chjí-là jè kjoa biyaà-là Cristo

1 Jè kjotíxoma-là Nainá xi kitjoé-là Moisés, mìtsà ngui jñà kjondaà xi iskan j'ii; ta 'nguién-là né xi tsakó. K'oaá ma-ne nga jngoò k'a mìkii koma ngui tsjeè sílkítsajna xítà xi xkì nó síchrañat'aà-là Nainá nga tijnà tijnà kjotjò tsjá-ne.

² Jè k̄jotíxoma, tsà jngoò k'a kisítsjeèya jé-la x̄ita, mì-la t̄i k̄iì sìikájno-ne tsà jé t̄jín-la; t̄ikoáá mì-la t̄i k̄iì jn̄í-la cho tsjá k̄jotjò-ne.

³ Tanga jè jn̄í-la cho, x̄k̄i nó x̄k̄i nó síkítsjeèn-ya jé-la x̄ita.

⁴ Nga jè jn̄í-la nchraja k̄o jn̄í-la tíndsó mìk̄iì ma-la faáxìn j̄ñà jé-la x̄ita.

⁵ Cristo, k'e nga j'ìì ì isò'nde kitsò-la Nainá:

Majìn-lè jn̄í-la cho xi biyaà, k̄o k̄jotjò xi tsját'aà-lè x̄ita, tanga jè yijo-na kinikijnandei.

⁶ Mìk̄iì sasén-lè cho xi kitì, k̄o n̄i j̄ñà k̄jotjò xi tsjá-lè x̄ita xi k̄joa ts'e jé-la.

⁷ K'eé kichjà, kixan-lè: “Koni s'ín tíchja xojon-lè xi ìt'aà ts'an, ìí t̄ijn̄aa nga sìkitasoàn koni s'ín mejèn-lè, j̄i xi Nainá 'mì-lè.”

⁸ Cristo, ítjòn kitsò: “Majìn-lè k̄o mìk̄iì sasén-lè jn̄í-la cho xi biyaà k̄o k̄jotjò xi tsjá-lè x̄ita, cho xi kitì k̄o k̄jotjò xi tsjá xi k̄joa ts'e jé-la”, nas'ín k'oas'ín tíchja k̄jotíxoma nga t̄jínè-la nga koatjín xi tsjá x̄ita.

⁹ Ikjoàn kitsò ìsa: “Ìí t̄ijn̄aa nga sìkitasoàn koni s'ín mejèn-lè.” K'e nga os'ín k̄iìchja, tsòyaá-ne nga jè Cristo jaàxìn jè k̄joa jchínga mé-ne nga kisikíjna ngajo-ne xi k̄joa x̄itse.

¹⁰ K'oaá s'ín komà nga kisítsjeèya in̄ima-ná Nainá ìt'aà ts'e Na'èn-ná Jesucristo k'e nga k̄os'ín kisikitasòn koni s'ín mejèn-la Nainá nga ta jngoò k'a kitsjaà k̄jotjò yijo-la n̄ita kjé-ne k'e nga k'en.

¹¹ Ngats'ìì n̄o'miì, n̄achrjein nchijòn síkitasòn xá-la nga k̄jìn k'a tsját'aà-la Nainá xi t̄ijn̄aa t̄ijn̄aa-ne k̄jotjò xi mìk̄iì ma-la faáxìn jé-la x̄ita.

¹² Tanga Jesucristo ta jngoò k'a kitsjaat'aà k̄jotjò yijo-la k̄joa ts'e jé n̄ita kjé-ne, ikjoàn tsibijnat'aà chrja kixi-la Nainá.

¹³ Yaá tíkoña skanda k'e nga kijchò n̄achrjein nga j̄ñà x̄ita kondra-la sìichija nga jè Nainá sìikítsajnangui ndsoko.

¹⁴ Ta jngoò k'aá kitsjaat'aà k̄jotjò yijo-la mé-ne nga nguì ndaà kjòkixiya-ne x̄ita n̄ita kjé-ne, j̄ñà x̄ita xi tímatsjeè.

¹⁵ Jè In̄ima Tsjeè-la Nainá ndaà síkixiya-ná k̄joa koi; nga sa ítjòn tsò-né:

¹⁶ Jè k̄joa jè xi k̄indaàjìin-koaa j̄ñà x̄ita k'e nga jye k̄oma iskan, tsò Na'èn-ná:

J̄ñà k̄jotíxoma-na sìkíjnaj̄ñà in̄ima-la, k̄o yaá skiaa j̄jìin kjohítsjeèn-la.

¹⁷ Ikjoàn tsò-ìsa:

'An, mì t̄i k̄iì sìikítsjeèn-na jé xi t̄jín-la

k̄o ngats'ìì k̄joa ch'o xi s'ín.

¹⁸ K'e nga jye jchat'aà-ná jé-ná, mì t̄i mé k̄jotjò kochjeén-ne xi k̄joa ts'e jé.

Mé k̄joa-ne nga ìsa ndaà k̄inchat'aà chraña-lá Nainá

¹⁹ J̄ñò ndí 'ndsè, k'oaá ma-ne n̄achrjein ì'ndeì, t̄jì'nde-ná nga k̄itjás'eén jè ì'nde-la Nainá xi 'Nó Tsjeè, koií k̄joa-la jè jn̄í xi tsibíxteèn Jesús.

²⁰ Nga jè kiskíx'a jngoò-ná ndiyá x̄itse xi fiko-ná ñánda t̄jín k̄joabinachon, nga k̄oma kotokjá jè nikje cortina xi t̄johóya jngoò osen ì'nde Tsjeè-la Nainá. Jè nikje, k'oaá ngayala koni yijo-la Jesús.

²¹ Nga t̄jín jngoò-ná n̄o'miì xi 'ñó jeya t̄jna xi otíxoma ya ni'ya-la Nainá.

²² K'oaá ma-ne nga mochjeén-né nga ìsa ndaà k̄inchat'aà chraña-lá Nainá, nga nguì kixi sìkíjnaa in̄ima-ná k̄o nguì t̄jingoò takoán xi ìt'aà ts'e, nga jè Cristo jye kisítsjeè in̄ima-ná k̄joa ts'e jé, k̄o jè yijo-ná, k'oaá ngayala koni tsà nguì nandá tsjeè tsanijno-ne.

²³ Kixi kitsajnakoaa k̄joa xi titsachiña-lá koni s'ín mokjeiín-ná nga mì kijen k̄kjá-lá takoán; nga Nainá, x̄ita kixi-né, sìikitasòn-né koni s'ín jye kitsjaà 'én-la.

²⁴ Kìrchátsji'nde-lá nga 'én ndaà kìnókjoa-lá xinguiáá mé-ne nga ìsa ndaà s'e-ná kjòtsjacha; kò s'eén kjoa xi ndaà tjín.

²⁵ Mìkìì sjichayaá jè nàchrjein k'e nga bixoñaá, koni s'ín i'nga xità nga mì tì kii bixoñat'aà-là xikjín. Ta saà mochjeén-né nga k'oi-lá nga'ño xinguiáá nga jngoò ìjngoò; ìsaá 'ño kòs'iaán k'e nga yaá nga jye tìnchrobá machraña nàchrjein-là Nainá.

²⁶ Tsà k'oas'ín tjín takoán nga kìnchátsji jè ìsaá k'e nga jye kiyaxkoaán kjoa kixi-là Nainá, mì tì mé jní koma xíxteèn-ne xi ma kjoaáxìn jé-ná.

²⁷ Tà jè kòkò ìsa-ná kjo'in xi 'ño xkón tjín kò ni'ín jngà xi síkjehesòn yije xità xi kondra fi-là Nainá.

²⁸ K'e nga tsà jngoò xità xi mìkìì síkitasòn kjotíxoma-là Nainá xi kitjoé-là Moisés, tsà tjín jò, jàn xità xi tsjá 'én nga kixi kjoa, mìkìì mahimàcha, nìk'en-né.

²⁹ ¿Kòs'ín beè-là takòn jño, a mìtsà ìsa tse kjo'in ok'in-là jña xità xi binchanè jè Ki'ndí-là Nainá, kò ochrjekàngui jè jní xi tsibíxteèn, kò tìkoà chjajno-là Inìma Tsjeè-là Nainá xi tjín-là kjondaà? Jè jní xi ochrjekàngui, jè-né xi Nainá kisiàkjeén nga tsibíndaàjìin-kò xità jngoò kjoa xitse, kò jè xi kisiàtsjeè-ne inìma-là xità koi.

³⁰ Jyee tíjìin-ná nga k'oaá tsò Nainá: “Aán oko-na nga tsjaà-là kjo'in xità, 'aán tsjaà-là chjí-là.” Ìjngoò k'a tsò: “Jè Nà'èn-ná kìindaàjìin-là xità naxandá-là.”

³¹ ;Taxki 'ño tse kjoàkón tjín k'e nga ya kàyaá tsja Nainá xi tíjnakon!

³² Tanga tìkítsjeèn kòs'ín komàt'ioòn nàchrjein xi jye tsato, k'e nga sa kina'yà ítjòn 'én kixi xi kisiàhiseèn-nò, nga kichìkjoa-nò nga tse kjo'in kinìkjoòn.

³³ Kis'eé nàchrjein k'e nga jña xità kii chjajno-nò kò kiskaàn-kò-nò nga nguixkòn xità naxandá. Tìkoáá kis'eé nàchrjein nga jño kitsjahijtakoo jña xità xinguiòo xi tìkoà kjo'in nchisíkjeiín.

³⁴ Jño, kjòhimàcha xità xi kjo'in nchisíkjeiín nga ndayá títsajna; kò tìkoà mìkìì kòjti-nò k'e nga kjòchijé-nò tsojmì-nò, ta saá kjòtsjaá-nò nga jye tíjìin-nò nga ján ngajmii tjín-nò tsojmì xi ìsa ndaà kjoàn xi mìkìì fehet'aà nità mé nàchrjein-ne.

³⁵ Kì nìchija-jèn koni s'ín kjit'aatakòn Nainá nga yaá tjoé-nò jè xi 'ño tse chjí-là.

³⁶ Mochjeén-né nga s'e-nò kjoatsetakòn kjoa ts'e kjo'in, mé-ne k'e nga jye kítasòn koni s'ín mejèn-là Nainá, tjoé-nò xi tsjá-nò koni s'ín jye kitsjaá 'én-là xi tso'ba kii chja-ne.

³⁷ K'oaá s'ín chja xojon xi tjít'aà 'én-là Nainá nga tsò:

Ta jngoò tjò chja-là nga kjoí jè xi sa nchrobá.

Mìkìì kochrjein-là.

³⁸ Jè xi xità kixi kíjnakon-né nga mokjeiín-là,

tanga tsà kòsit'aà xìn, mìkìì sasén-là inìma-na.

³⁹ Tanga jña, mì k'oaá s'eén koni s'ín xità xi íts'in fi-ne nga síchija inìma-là. Ta saá ya kjiaán ya i'nde ñánda kítjokàjìin kjo'in inìma-ná koi kjoa-là nga mokjeiín-ná.

11

Kjoa xi mokjeiín-ná

¹ Jè kjoa xi mokjeiín-ná, jè-né nga tjín kixi nga tjoé-ná jña kjoa xi chiñá-lá; jè-né nga tíjngoò takoán nga kítasòn nas'ín mìkìì tìtsa'yaá xi kjoa nìton.

² Jña xità jchínga kjòtseé, koií kjoa-là nga kòkjeiín-là nga ndaá ki'ya-là.

³ Ta koi-né nga mokjeiín-ná nga kòs'ín machiya-ná nga jè Nainá, tà kòó 'én-là tsibíndaà ìsò'nde; kisiàkatsjèn tsojmì xi mìkìì tsejèn nga sa ítjòn.

⁴ Abel, koií kjoa-là nga kòkjeiín-là, kitsjaat'aà-là Nainá kjotjò xi ìsa 'ño ndaà kjoàn, mì k'oaá-ne koni ts'e Caín. K'oaá s'ín komà-ne nga xità kixi kitsò-là Nainá Abel; kiskoé kjotjò xi ijchòkò-là; skanda nàchrjein i'nde, tákó k'oaá s'ín tíchja nga mokjeiín-là, nas'ín jye k'en.

⁵ Enoc, tikoá kòkjeín-la; k'oaá s'ín komà-ne nga kiiko tikon Nainá ján ngajmii; m̀i t̀i kii kisakò-ne k'e nga jye kiiko. K'e nga sa tsibijna i isò'nde, Enoc, k'oaá s'ín ki'ya-la nga ndaà kisaseèn takòn Nainá.

⁶ Tsà mikii mokjeiin-ná it'aà ts'e Nainá, mikii koma s'eén kjoa xi sasén-la Nainá. Jè xita xi síchrañat'aà-la Nainá mochjeén-né nga ndaà kòkjeiin-la nga tina Nainá, tikoá kòkjeiin-la nga ngats'ii xita xi ótsji Nainá, tsjá-la kjotjò xi ndaà tjin.

⁷ Noé koií-né nga kòkjeiin-la, k'e nga tsibénojmí-la Nainá kjoa xi iskan koma, kisikitasòn; koó kjojkón-la nga tsibíndaà jngoò chitso xi 'ño je kji, mé-ne nga mikii kiyá-ne jña xita ni'ya-la. Noé, nga ndaà kòkjeiin-la, k'oaá s'ín tsibínè-la kjo'in xita isò'nde nga jè tjin-la; ko jè Noé kitjoé-la kjotjò xi tsjá Nainá nga xita kixi kitsò-la ta koií kjoa-la nga kòkjeiin-la.

⁸ Abraham, nga kòkjeiin-la k'e nga kiichja-la Nainá, kisikitasòn. Itjokàjiiin nangui-la, kii ya i'nde ñánda tà kjotjò tsjá-la Nainá, tanga skanda mikii tjiin-la ñánda tífi.

⁹ Koií kjoa-la nga kòkjeiin-la, nga kos'ín kisijchá yijo-la koni tsà xita xi xìn nangui-la nas'ín ya tsibijna ya i'nde ñánda nga k'oa kitsò-la Nainá nga tsjá kjotjò-la. Ni'ya nikjeé tsibijnaya. Nga kii-isa nachrjein, k'oaá t̀i komat'in jè Isaac ko Jacob, xi tikoá k'oas'ín kitsjaà-la 'én Nainá nga ts'e koma nangui.

¹⁰ Abraham tíkoña jngoò-la naxandá xi 'ño ndaà tjin tàts'en chrjó-la, nga jè Nainá kiskoòsòn-la kós'ín sindaà ko tije-ne Nainá tsibíndaà.

¹¹ Koií kjoa-la nga kòkjeiin-la Abraham, nga nas'ín chjoón 'ndi jè chjoón-la xi 'mì Sara, ko nas'ín jye 'ño xita jchinga, kis'eé-la nga'ño nga kisakò jngoò-la ki'ndí jè Sara, koií kjoa-la nga kòkjeiin-la nga Nainá siikitasòn koni s'ín jye kitsjaà-la 'én-la.

¹² K'oaá ma-ne nga ta jè tajngoò xita jè, nas'ín jye tífehet'aà nachrjein-la, kjin jchán ma ixti-la xi tje ts'e k'oaá ngaya-la koni jña ni'ño xi tjin ngajmii ko tsomì xi jncha indii ndáchikon nga mikii ma maxkeya.

¹³ Ngats'ii xita koi, k'oaá s'ín mokjeiin-la skanda k'e nga k'en, nas'ín mikii kitjoé-la tsojmi xi Nainá k'oas'ín kitsjaà 'én-la nga tsjá-la; ta k'oaá s'ín kjòchiya-la koni tsà ta kjin kijtseè-ne; tsjaá kis'e-la nga kitsò nga mitsà i i'nde-la, ta nchifahato-né nga títsajna i it'aà nangui.

¹⁴ Jña xita xi koatsò, k'oaá s'ín bénojmí kixi-né nga saá nchihótsji jngoò nangui xi ngui ts'e koma.

¹⁵ Tsà jè nchisíkítsjeèn nangui ñánda itjokàjiiin, okixi-né komá-la kii ijngoò k'a-ne i'nde ñánda inchrobà-ne.

¹⁶ Tanga jngoò i'nde nchihótsji xi isa ndaà choòn, i'nde xi ts'e ngajmii. K'oaá ma-ne nga jè Nainá, mikii masobà-la nga kitso-la xita: jè jèe xi Nainá, nga jyeé kisikijnandaà jngoò-la i'nde ñánda naxandá-la koma nga ya kítsajna.

¹⁷ Abraham, k'e nga kichit'aà, koií kjoa-la nga kòkjeiin-la nga kiskoé Isaac nga kitsjaat'aà kjotjò-la Nainá. Tsibijnandaà nga tsjá-la ki'ndí-la xi ta jè tajngoò-ne, nas'ín xó k'oas'ín kitsjaà-ne 'én Nainá it'aà ts'e ki'ndí-la, k'e nga kitsò:

¹⁸ “It'aà ts'e Isaac, kjin jchán koma xita tje-lè.”

¹⁹ Abraham k'oaá s'ín kisikítsjeèn nga Nainá tjin-la nga'ño nga ma-la síkjaáya-la xita nas'ín jye k'en. Kitjoé ijngoò k'a-la ki'ndí-la koni tsà jaáya-la it'aà ts'e kjoabiyaà.

²⁰ Isaac, koií kjoa-la nga mokjeiin-la nga kisijét'aà-la Nainá nga kàtasíchikon-t'in Jacob ko Esaú it'aà ts'e kjoa xi iskan koma.

²¹ Koií kjoa-la nga mokjeiin-la Jacob, k'e nga jye tíbiyaà, kisijét'aà-la Nainá nga kàtasíchikon-t'in ingajò ixti-la José; síngui'ño tsja yá nise-la nga jeya kisikijna Nainá.

²² Koií kjoa-la nga mokjeiin-la José, k'e nga jye tíbiyaà, tsibénojmí kós'ín komat'in jña xita Israel nga kitjokàjiiin naxandá Egipto. Tikoá kitsjaà okixi it'aà ts'e nindaà-la ñánda kjiko.

23 Xità jchínga-là Moisés, koií kjoa-là nga kòkjeín-là nga jàn sá kisikíjna'ma ki'ndí-là k'e nga sá kits'iín, nga kijtseè nga 'ńó ndaà kji ísén-là ki'ndí-là, kò mikiì kitsakjòn-là kjotixoma-là xítaxá ítjòn ts'e naxandá Egipto.

24 K'e nga jye kòjchínga Moisés, koií kjoa-là nga kòkjeín-là nga mikiì kisaseèn-là nga nea-là kitsò-là tsòti-là faraón.

25 Tà saá jè jaàjìin nga kjo'in kisikjeín kò naxandá-là Nainá, mì k'oa-ne nga kjotsja tsjá-là yijo-là xi kjoa ts'e jé.

26 K'oaá s'ín kiskoòsòn-là nga ìsa 'ńó chjí-là kjo'in xi s̀ikjeín xi it'aà ts'e Cristo mì k'oaá-ne nga kjotsja tsjá-là yijo-là xi kjoa nchíná ts'e naxandá Egipto. Kiskońákjoaá-là kjondaà xi ískan tsjá-là Nainá.

27 Koi-né nga tikoá kòkjeín-là nga itjokàjìin naxandá Egipto; mikiì kitsakjòn-là kjoajti-là jè xítaxá ítjòn; kixíí tsibìjna koni tsà xkòn tíbeè-ne Nainá xi nì saá jngoò xita beèxkon.

28 Moisés, nga kòkjeín-là, tsjachrje s'eí Paxko. K'oaá kitsò-là ngats'ìi xita Israel nga jní s̀ikaàjno xotjoa ni'ya-là mé-ne jè àkjale-là Nainá mikiì s̀ik'en j̀nà xi ki'ndítjòn-là ts'e xita Israel.

29 J̀nà xita Israel, nga kòkjeín-là, tsatojìin jè xi 'mì Ndáchikon Inì koni tsà nangui kixì. J̀nà xita Egipto, k'e nga kijtseè, mejèn-là nga k'oa tìs'ín kis'iín, tanga ta yaá k'en yije ya j̀jìin ndáchikon.

30 Nga kòkjeín-là xita Israel, kisikixòjen chrjó xi tjíndi-là naxandá Jericó, k'e nga jye kjò itoò nachrjein bítjindi-là jé naxandá.

31 Koií nga kòkjeín-là Rahab xi chjoón chijngui nga mì ya k'en-kò j̀nà xita xi mikiì mokjeín-là, koií kjoa-là nga ndaà kijtseètjò j̀nà xita Israel xi ítjòn ijchò kotsejèn 'ma-la nangui.

32 ¿Mé kjoa xi kènojímí ìsa? Mì-la kiì chíya-na nachrjein nga kichjà it'aà ts'e Gedeón, ts'e Barac, ts'e Sansón, ts'e Jefté, ts'e David, ts'e Samuel kò ngats'ìi xita xi kiichjã ngajo-la Nainá.

33 Koií nga kòkjeín-là xita koi nga kis'e i'nga xi kisikijne-là kjoa ts'e kjojchán, xi kixì tsibíndaàjìin kjoa, xi Nainá kitsjaà-là koni s'ín jye kitsò-là xi tso'ba kiichjã-ne, xi tsibíchjoàjto tso'ba xa.

34 Kis'eé i'nga xi kisikits'o nga'ńó-là ni'ín jnga, xi itjomachinga-là nga kichã ndojò k'en-ne, xi kis'e ìjngoò k'a-là nga'ńó nas'ín xk'én kjoàn, xi kis'e-là nga'ńó kjoa ts'e kjojchán, xi kisikijne-là xita kjojchán xi kondra ts'e.

35 Kis'eé i'nga íchjín xi kitjoé ìjngoò k'a-la xita xíkjín xi jye k'en nga jaáya-là.

Tanga tjín i'nga xi ya k'en-jìin kjo'in; mikiì kjòmejèn-là nga tsibítsajnandejí, nga k'oaá s'ín kjòmejèn-là nga ìsa ndaà kítsajna k'e nga kjoaáya-là.

36 Xi i'nga, kisikjeín kjo'in nga kinìsobà-là, kiskaàn-kò xita, skanda na'ńó kichã cadena kisit'aà'ńó ìya ndayá.

37 Tjín i'nga xi ndajo kisinè nga kinìk'en; tjín i'nga xi kichã serrote kjòjòya-ne; tjín xi kichã ndojò k'en-ne. Xki xi ján chinchimasòn, tà chrjoa-là orrè kò chrjoa-là tíndso tsakakjá nga 'ńó imã chinchima, tseé kjo'in kis'e-là kò 'ńó ki'yatoòn.

38 J̀nà xita koi, nga 'ńó ndaà kòkjeín-là it'aà ts'e Nainá, skanda mikiì ok'in-là nga ì tsibítsajna isò'nde. Xki xi ján chinchimasòn ya ì'nde it'aà xìn ñánda nangui kixì choòn, kóhokji j̀jìin ij̀nà kò ìngui nguijo kò ngajo xi tix'á j̀jìin nangui.

39 Ngats'ìi xita koi, koni s'ín nga ndaà kòkjeín-là ndaá ki'ya-là, tanga nijngoò kitjoé-la xi Nainá tjín-ne nga tsjá-là koni s'ín jye kitsjaà-là 'én-là.

40 Nainá tsibíndaà jngoò-ná kjoa xi ìsa 'ńó ndaà tjín, mé-ne j̀nà xita koi, ngàsòn kongàsòn-kjoaá nga nímé chijat'aà-ná nga kixì kítsajnaá.

12

Ndaà chítsejèn-là Jesús

¹ Nga 'ñó k̄jìn ma-ne x̄it̄a xi t̄ítsaj̄nand̄i-ná xi ndaà mokjeiín-là, k'oaá ma-ne nga t̄īkoaá j̄ñá, j̄ngoò k'a s̄ik̄ítsaj̄naá ngats'ìi k̄joa xi s'ín-ná k̄o k̄joa ts'e jé xi t̄sobà'ñó-ná nga konachan-ná; mochjeén-né nga k'oa s'ín s'eén koni j̄ngoò x̄it̄a xi ongachikon nga chí̄k̄joak̄o-là nga k̄j̄chò skanda ñánda nga t̄j̄ín-nè-là nga k̄j̄chò.

² Ndaà chítsejèn-là Jesús; jè tsibíts'ia í̄t̄j̄on koni s'ín mokjeiín-ná k̄o jè s̄j̄ngoò k̄joa koni s'ín mokjeiín-ná. Jesús nga jye t̄j̄īin-là nga k̄oma iskan s'eé-là k̄j̄otsja, k'oaá ma-ne nga kichik̄joa k̄o-là k̄j̄o'in it'aà krò, mìk̄īi k̄j̄òsobà-là koni s'ín k'en; ik̄joàn tsibí̄j̄nat'aà chrja kixi-là Nainá nga ya tíhotixoma.

³ T̄ik̄ítsjeèn it'aà ts'e Jesús; kichik̄joa koó-là k̄j̄o'in xi tsibínè-là j̄ñà x̄it̄a jé, mé-ne j̄ñò mìk̄īi k̄j̄ita-nò k̄o mìk̄īi s̄ik̄àjeèn-là takòn.

⁴ Koni s'ín t̄itsabixkàn-koo k̄joa ts'e jé, k̄j'e tsà yá x̄it̄a xi tsò ikon nga s̄ik'en-nò.

⁵ ¿A jye k̄j̄chàaj̄īn-nò koni tsò-nò Nainá nga ixti-là tsò-nò? K'oaá s'ín t̄ich̄j̄a xoj̄on xi t̄j̄it'aà 'én-là Nainá nga tsò:

Nga ki'ndí-nà xan-lè, k̄i nachrjekàngui-jèn k'e nga s̄ikixiya-lè Na'èn-ná, k̄o k̄i n̄ik̄jajen-là takoin k'e nga s̄ikaká-lè.

⁶ Na'èn-ná s̄ikixiya-né jè x̄it̄a xi tsjakeè,

tsjá-là k̄j̄o'in ngats'ìi xi k̄j̄oét̄j̄ò nga ki'ndí-là tsò-là.

⁷ Nainá k'oaá s'ín beèhikon-nò nga ki'ndí-là tsò-nò; t̄ik̄j̄ioón k'e nga k̄j̄o'in tsjá-nò. Ngats'ìi xi Na'èn ma, tsjá-là k̄j̄o'in ixti-là nga s̄ikixiya.

⁸ Tanga tsà Nainá mìk̄īi s̄ik̄ixiya-nò koni s'ín s̄ik̄o ngats'ìi xi ixti-là ma, mìtsà kixi k̄joa nga ngui ixti-là Nainá maà.

⁹ K'e nga s̄a ixtiaá, j̄ñà x̄it̄a jchínga-ná xi t̄j̄ín i it'aà nangui, kis̄ik̄ixiya-ná koa ndaà kiyaxkoán. ¿A mìtsà isa ndaà jchaxkoán Na'èn-ná xi t̄j̄ina ngajmì, mé-ne nga k̄atas'e-ná k̄joabinachon?

¹⁰ X̄it̄a jchínga-ná i it'aà nangui tsjá-ná k̄j̄o'in nga s̄ikixiya-ná koni s'ín mejèn-là, nas'ín ta chiba nachrjein t̄itsaj̄naá. Tanga Nainá s̄ikixiya-ná xi k̄j̄ondaà tsaján mé-ne nga tsjeè k̄ítsaj̄naá koni jè Nainá nga tsjeè t̄j̄ina.

¹¹ Kixi k̄joa, tsj̄in k̄j̄o'in xi k̄j̄otsja tsjá, tà k̄joaba tsjá nga 'on ma-là yijo-ná, tanga komà iskan-ne s'eé-ná k̄joa kixi xi 'nchán t̄j̄ín nga ndaà k̄ítsaj̄nakoá Nainá ngats'iaá xi biì'ndeé nga tímakixiyaá.

¹² K'oaá ma-ne nga t̄j̄ī-là nga'ñó yijo-nò, ch̄j̄imì'ngaà ndsaa xi mìk̄īi ma s̄ikjaníyá, k̄o xkò ndsokoò xi tsj̄in-là nga'ñó;

¹³ t̄inchátsj̄ioè xi ndj̄yá kixi nga k̄atandaà-ne ndsokoò xi tsá'yá k̄j̄i, mé-ne nga mìk̄īi isa ndaà k̄otsó'ñò-ne.

Kì binchat'aàxìn-là k̄j̄ondaà-là Nainá

¹⁴ 'Nchán t̄itsaj̄nakoo ngats'ìi x̄it̄a; tsjeè t̄itsaj̄na nga nguixkon Nainá. Nga nijngoò x̄it̄a skoexkon Nainá tsà mì tsjeè t̄j̄ina.

¹⁵ Ndaà chítsejèn nga nijngoò x̄it̄a kosij̄nat'aàxìn-là k̄j̄ondaà-là Nainá, mé-ne nga mì k'oaá s'ín komat'ioòn koni tsà j̄ngoò xka ij̄ñá k̄iso xi tsja ima-là xi s̄ikits'ón x̄it̄a nga tsjá ch'in-là.

¹⁶ J̄ñò, nijngoò xi x̄it̄a chijngui k̄oma, k̄i nachrjekànguioè tsojmì xi tsjeè; k̄i k'oaá s'ín 'nè koni kis'ìin Esaú nga tà j̄ngoò chroba tsojmì xi ma chine tsat̄j̄ina-ne xi jè t̄j̄ín-ne nga k̄oko-là koni ki'ndí t̄j̄on.

¹⁷ J̄ñò jyeé t̄j̄īin-nò, k'e nga jye komà iskan, Esaú k'e nga k̄j̄omejèn-là nga s̄īchikon-t'in na'èn-là, kinachrjekàngui-né, mì t̄i k̄īi komà k̄j̄ochikon-t'in-ne, nas'ín takó 'ñó kiskindàya.

¹⁸ [Koni s'ín komàt'in x̄ita Israel nga k̄jìn k̄joxkón k̄ijtseè], j̄ñò, mìtsà kos'ín ya ijchò kinchat'aà-là nindoò xi ma nìkò, jè nindoò ñánda títi ni'ín j̄nga, ñánda skanda mì t̄i k̄i k̄jòtsejèn-ne nga j̄ñò choòn kò ñánda tí'ba t̄jò xkón.

¹⁹ Mìkìi kina'yà-là j̄ta-là chrjo, t̄ikoà mìkìi kina'yà-là j̄ta-là Nainá k'e nga k̄iichja. J̄ñà xi k̄iì'nchré-là Nainá, tsibítsi'ba-ne nga majìn-là nga k̄ichja-isa,

²⁰ koií kjoa-là nga mìkìi kichikjoa-là koni s'ín t̄jìn k̄jotíxoma xi kisinè-là nga tsò: “Jè x̄ita xi kos̄ijna j̄ngoò ndsòkò ya ìt'aà nindoò, nas'ín j̄ngoò cho, ndajòó kiyá-ne kò tsà majìn k̄ichaá kotosikjá yijo-là.”

²¹ 'Nó xkón t̄jìn kjoa xi ki'ya-là, skanda t̄ijè-ne Moisés kitsò: “Tsakjoòn jchán-ná skanda chiba-là tíhotsé-ná.”

²² Tanga j̄ñò, yaá ijchò kinchat'aà-là nindoò Sión, jè naxandá-là Nainá xi t̄jnakon, xi t̄ijè-ne Jerusalén xi ts'e ngajmii, ñánda k̄jìn j̄mii àkjale títsajna xi nchisítsjakò Nainá nga jeya nchisíkijna,

²³ ñánda títsajnajt̄ín ixti-là Nainá xi t̄joe-là k̄jotjò xi ts'e ixtitjòn xi t̄jít'aà 'ín-là xojon ts'e ngajmii. Ijchò kinchat'aà-là Nainá xi x̄itaxá t̄jina nga jè b̄indaàj̄ìn-là ngats'ìi x̄ita. T̄ikoáá ijchò kinchat'aà-là inima-là x̄ita kixi xi Nainá jye kisitsjeè nga n̄imé chijat'aà-là.

²⁴ Ijchò kinchat'aà-là Jesús xi os̄ijnaj̄ìn-ná j̄ngoò kjoa x̄itse kò jè j̄ní-là xi kixíxteèn [nga kisitsjeè-ná] xi isa ndaá chja-ná mì k'oaá-ne koni ts'e Abel [xi s̄jé nga sindaàj̄ìn].

²⁵ J̄ñò, t'een kindà yijo-nò. Kì nachrjekànguioò jè xi tíchja-ná. J̄ñà x̄ita jchínga k̄jòtseé xi tsachrjekàngui koni s'ín kinokjoa-là ì ìt'aà nangui nga kinikaká-là, mìkìi tsajno-là nga kitjoe-là kjo'in. J̄ñá, isaá 'ñó 'in t̄jìn tsà kinachrjekànguiaá Nainá k'e nga skanda ján ngajmii chja-ná nga síkaká-ná; mìkìi kojno-ná nga t̄joe-ná kjo'in.

²⁶ Jè nachrjein jè, j̄ta-là Nainá, skanda jè nangui kisijtiya-là, tanga nachrjein ì'ndeì, k'oaá tsò: “Ìjngoò k'a s̄ijtiya-là, mìtsà tà jè nangui s̄ijtiya-là kòó ngajmii.”

²⁷ Jè 'én, k'e nga tsò “ìjngoò k'a s̄ijtiya-là”, k'oaá s'ín machiya-ná nga t̄jáchìn tsojmì xi xó kisindaà-ne, j̄ñà xi ma oníyá-là, mé-ne nga k̄ítsajna-ne xi mìkìi ma oníyá-là.

²⁸ Ìt'aà ts'e Nainá tsjá-ná okixi nga ya kot̄ixomakoáá ya ì'nde ñánda mìkìi ma oníyá-là. Ndaà ch̄jì-là Nainá j̄ñà kjoa koi. Jeya s̄ikijnaá kò jchaxkoán koni s'ín sasén-là jè.

²⁹ Nga “jè Nainá, k'oaá ngaya-là koni ni'ín xi síkjehesòn yije n̄ita mé xi t̄jìn.”

13

Kjoa xi mochjeén nga s'ìin j̄ñà x̄ita-là Cristo

¹ J̄ñò, t̄itsjacha x̄ita xinguiòo xi 'ndsè chibá xi ìt'aà ts'e Cristo.

² Kì n̄jchàajioòn j̄ñà x̄ita xi bijchókón-nò ni'ya-nò, t̄is'in-là nga k̄àtasíkjáya. K'oaá komàt'in ì'nga x̄ita, kiskoétjò x̄ita xi mìkìi beèxkon, tanga àkjale-né.

³ T̄ikítsjeèn j̄ñà x̄ita xi ndayá títsajna; k'oaas'ín t'è-là takòn koni tsà ngàsòn kjo'in t̄itsajnaà. T̄ikítsjeèn j̄ñà x̄ita xi t̄iyatoòn koni tsà j̄ñò xi t̄ikoà k'oaas'ín t̄iyatoòn-nò.

⁴ J̄ñò xi jye chixàn, ngàsòn jchaxkón xinguiòo. Kì ch'o bitsajnakoo xinguiòo. Nga j̄ñà xi kjoachijngui s'ín, Nainá tsjá-là kjo'in.

⁵ Kì toòn 'ñó matsjacha; k̄atajngoò takòn koni kji t̄jìn-nò. Nainá k'oaá tsò: “Mìkìi tsjeiìn takòn-nò, kò mìkìi t̄ajngoò s̄ikijna-nò.”

⁶ K'oaá ma-ne nga ma k'oaas'ín kixoán:

Jè Na'èn-ná kos̄ikò-ná,

mìkìi k̄iskoán mé kjoa xi s̄ikò-ná x̄ita.

⁷ T̄ikítsjeèn j̄ñà x̄ita xi chincha ítjòn nga tsakóya-nò 'én-là Nainá; t̄ikítsjeèn kó s'ín kisijchá yijo-là x̄ita koi kò k'oaá s'ín ch̄jinguì-là koni s'ín kòkjeiìn-là.

⁸ Jesucristo mìkìi fatjìya, t̄ijè-ne ngojña, t̄ijè-ne nachrjein ì'ndeì, kò t̄ijè-ne n̄ita mé nachrjein-ne.

⁹ Ki kii nìs'in-là kjohítsjeèn xi k'ejí tsò kò xi mìkì yaxkon-là nga xìn ndiyá fiko-ná. Ìsáá ndaà tjin nga jè inima-ná s'e-là nga'ño it'aà ts'e kjondaà-là Nainá mì k'oaá-ne koni ts'e tsojmì xi ma chine; nga jña tsojmì xi ma chine, nímé nga'ño kitsjaà-là jña xi k'oa tjin kjoa kisìs'in-là.

¹⁰ Jña, tjin jngoò-ná i'nde tsjeè [ñánda kitsjaà kjotjò yijo-là Cristo nga k'en], tanga jña no'miì xi tákó ya síxá it'aà ts'e kjoa jhínga ya Ní'ya xi nikje, mìkì tji'nde-là nga tjoé-là kjondaà nga ya kòkjen.

¹¹ Nga jè yijo-là cho xi sík'en jña no'miì, [mìkì tji'nde-là nga tjoé-là nga skine]; ta jè jní-là cho fiko jè no'miì ítjòn ya i'nde tsjeè-là Nainá xi kjoa ts'e jé. Tanga jè yijo-là cho, it'aà xìn i'nde fiko nga tì.

¹² K'oaá tis'in komàt'in Jesús, it'aà xìn-là naxandá kisikjeiín kjo'in, mé-ne nga kisìtsjeè-ne naxandá it'aà ts'e xi nguì jní ts'e.

¹³ K'oaá ma-ne jña, kitjokajñaá naxandá. Jè kjitjingui-là Jesús nga sikjiaán-koaá kjo'in xi jè kisikjeiín.

¹⁴ Nga i'nde nangui tsjin-ná naxandá xi nguì jngoò k'a tjna nita kjé-ne; jè titsachiña-là naxandá xi iskan kotsejèn.

¹⁵ Koi kjoa-là mochjeén-né nga kjit'aà nachrjein jeya sikjnaá Nainá it'aà ts'e Jesucristo koni jngoò kjotjò xi 'bì-là Nainá, 'én xi nguì tso'baá bitjo-ne nga bènojmiá yá-né jè.

¹⁶ Ki nìchàajioòn nga ndaà t'een, tjiì itsé-là xinguiò mé xi tjin-nò; k'oaá tjin kjotjò xi sasén-là Nainá.

¹⁷ Tikitasòn-là jña xita xi jncha ítjòn-nò, tina'yañjon-là. Nga jña síkinda-nò nga mì jchija inima-nò koiì kjoa-là nga tjinè-là nga tsjá-là kindá Nainá. Tikitasòn-là koni s'in kitsò-nò mé-ne nga nguì kò kjotsja-là síxá-ne nga mì ba s'e-là; tsà ba s'e-là, nímé kjondaà s'e-nò.

¹⁸ Tijét'aà-là Nainá it'aà tsajen, nga k'oaá s'in tijngoò takòn-jen nga ndaà tjin kjohítsjeèn-najen, mejèn-najen nga ndaà s'en-jen nita mé kjoa-ne.

¹⁹ Ìsáá ndaà síjé-nò nga tijét'aà-là Nainá xi it'aà ts'an, mé-ne nga kàtatsjá'nde-na nga niton kjiìkon-nò.

'Én xi fehet'aà-ne

²⁰ Jè Nainá xi tsjá kjoa'nchán xi kisikjaáya-là it'aà ts'e kjoa biyaa Na'èn-ná Jesucristo, xi paxtò ítjòn-là ts'e orrè, jè xi kò jní-là tsibí'ño-ne jngoò kjoa xitse xi mìkì kjoehet'aà nita kjé-ne,

²¹ kàtasíkixiyandaà-nò ngats'iì kjoa xi ndaà tjin, mé-ne nga kàtitanè-ne koni s'in mejèn-là Nainá; it'aà ts'e Jesucristo, k'oas'in kàtasíko-ná koni s'in sasén-là Nainá. Jeya kàtjna Cristo nita mé nachrjein-ne! K'oaá s'in kàtama.

²² Bìtsi'bà-nò ndí 'ndsè, ndaà chjoétjò 'én xi tikjiì-nò koni s'in tìbìnè-nò nga ta chiba 'én tikjiì-nò.

²³ Kàtasijiìn-nò jè 'ndseé Timoteo jye tijnandeí-ne xi kjoa ts'e kjo'in; tsà kjoíì niton, kjiìko-ná k'e nga kjián katsejèn-nò.

²⁴ Tixat'aà yije jña xita xi jncha ítjòn-nò kò ngats'iì xita-là Cristo. Jña xi Italia ts'e nchisíhixat'aà-nò.

²⁵ Ngats'ioò, jè kàtijnako-nò kjondaà-là Nainá.

Xojon carta xi kiskiù Santiago

Kó tsò Santiago nga síhixat'aà xita

¹ An, Santiago, xi chù'nda-la Nainá ma, kò ts'e Na'èn-ná Jesucristo, tishixat'aà-nò, jñò, xi ya inchrobàt'aà-nò xi tejò tje-la naxandá Israel xi xkì xi ján nangui títsajnaà nga tíjtsa isò'nde.

Nga'ñó xi sakó-ná k'e nga mé kjoa xi otojñaá

² Jñò, xi 'ndsè chibá it'aà ts'e Cristo, nguì tsja t'è-là inima-nò k'e nga nita mé kjoa xi komat'ioòn.

³ Ya-nò k'e nga tsà mé kjoa xi komat'ioòn nga chít'aà-nò koni s'ín mokjeiín-nò, jñà kjoa xi kotojñoò, yaá sakò-nò nga'ñó nga kichikjoako-nò nita mé kjoa xi kotojñoò.

⁴ K'oaá ma-ne jè nga'ñó xi sakò-nò, ndaà kàtasíxájin inima-nò mé-ne nga ndaà kojchínga-ne kò tíjngoò-ne kjohítsjeèn-la inima-nò nga nímé síhijat'aà-la.

⁵ Tsà tjin i'nga xita xi chijat'aà-la kjohítsjeèn, tijét'aà-là Nainá; jè tsjá-nò. Nga jè Nainá nguì koo inima-la nga tsjá kò mìtsà ch'o tsò-la xita k'e nga síjé.

⁶ Tanga nguì ndaà kàtakjeiín-nò k'e nga síjé. Kì jò 'beé-la takòn. Jè xita xi jò 'beé-la ikon, k'oaá s'ín ngaya-la koni ndáchikon k'e nga 'ba tjo, fijen fikjako.

⁷ Jè xita xi jò 'beé-la ikon, kì k'oaá s'ín síkítsjeèn nga tjin xi tjoé-la it'aà ts'e Na'èn-ná,

⁸ nga mìkiù tíjngoò ikon. Nàchrjein i'ndeì kj'eì s'ín tísíkítsjeèn, nchijòn-lè tìkooá kj'eì kjohítsjeèn tjin-la. Mìtsà nguì jngoò ndiyá kjoé.

⁹ Jñà xita xi 'ndsè chibá it'aà ts'e Cristo xi ima títsajna, tsja kàtas'e-la nga 'nga títsajna nga nguixkon Nainá.

¹⁰ Tanga jñà xita nchiná, tsja kàtas'e-la nga nangui kítsajna ya nguixkon Nainá, nga jè xita nchiná, k'oaá s'ín komat'in koni jngoò naxó xi mìkiù fìchrjein-la.

¹¹ K'e nga 'ño matsjè ndobá, jñà ijñá, xi-né, ikjoàn bixòjen jè naxó-la; chija isén-la nga ndaà kjoàn. K'oaá tís'ín komat'in jñà xita nchiná, k'e nga 'ño nchisíxako xá xi tjin-la, ta nitoón kiyá.

¹² Mé ta ndaà-la jè xita xi chikjoako-la k'e nga chít'aà, mé-ne k'e nga jye síkijne, tjoé-la kjoabinachon koni s'ín kitsjaà-la 'én Nainá, ngats'ii xita xi jè matsjakeè. Tjoé-la kjoabinachon k'oaá ngaya-la koni jngoò corona si'a sko xita xi síkijne k'e nga síská.

¹³ Jñò, k'e nga chít'aà-nò nga mejèn-nò nga ch'o s'een, kì k'oaá s'ín nìkítsjeèn nga jè Nainá tìkot'aà-nò. Nga jè Nainá mì yá xi koma-la skót'aà nga ch'o kàtas'ín Nainá. Tìkooá jè Nainá mì kì kot'aà xita nga ch'o kàtas'ín.

¹⁴ Jngoò xita, k'e nga chít'aà, tijña-ne kjoa ch'o-la xi matsjakeè bínga nga tsobà'ño.

¹⁵ Kò jè kjoa ch'o xi matsjakeè, k'e nga jye bitasòn, yaá sakó jé. K'e nga jye bitasòn kjoa ts'e jé, ikjoàn f'ii kjoa biyaa.

¹⁶ Jñò ndí 'ndsè xi matsjake-nò, kì yijo-nò chonachan-la.

¹⁷ Ngats'ii kjondaà kò kjotjò xi tjoé-ná, it'aà ts'e Nainá xi tina ngajmiù nchrobá-ne, jè xi tsibíndaà ngats'ii tsojmì xi 'ya-la ngajmiù, jñà xi síhiseèn. Nainá, mì k'oaá s'ín fatjìya-la koni ma jñà tsojmì xi síhiseèn ngajmiù nga fatjìya-la koni ma 'nguién.

¹⁸ Nainá, k'oaá s'ín kjòmejen-la nga kisisíkítsajnakon xitse jngoò k'a-ná xi kjoa ts'e 'én kixi-la, mé-ne nga jñà s'ingatsjaá yijo-ná Nainá koni tsojmì xi majchá ítjòn xi jè tsibíndaà.

Mochjeén-né nga síkitasoán k'e nga jye na'yá 'én-la Nainá

¹⁹ Jñò, ndí 'ndsè xi matsjake-nò, tìkítsjeèn ngats'ioò, isa ndaà títsajnandaà nga k'ina'ya-la xita xinguiáá xi kj'eì, chiba chiba tìnókjoaa, kò kì taxki majti-nò.

²⁰ Jngoò xita xi jti takòn, mìkiù kixi síkitasòn koni s'ín mejèn-la Nainá.

²¹ Chjaàxìn-là yijo-nò ngats'ìi kjoa tjé kjoa ch'o xi xkì xi ján tjín, mé-ne nga indaàjìin chjoé-nò jñà 'én ndaà-là Nainá xi jye kina'yà, jñà 'én koi xi koma kochrjekàjìin-nò kjo'in.

²² Tikitasòn koni tsò 'én-là Nainá. Kì tà na'yà-jèn. Tsà mìkìi sikitason, tì yijo-nò titsachonachan-là.

²³ Nita yá xita-ne xi 'nchré 'én-là Nainá, tsà mìkìi sikitason, k'oaá ngaya-là koni jngoò xita xi chitsín tikotsejèn-ya.

²⁴ K'e nga jye beè isén-là kó kji, ikjoàn fi, yaá jchàajìin-là kó kji isén-là.

²⁵ Tanga jè xi nguì ndaà kotsejèn-là kjotíxoma kixi xi síkijnandeí-ná, nga koií 'én síkítsejèn kjit'aà koni tsò kjotíxoma, kò mìkìi síjchàajìin 'én xi 'nchré nga ndaà sikitason, xita jè, yaá sakó-là kjoa machikon-t'in k'e nga k'oas'ín tís'ín.

²⁶ Tsà jngoò xita xi tsò: “Beèxkón-ná Nainá”, kò tsà mìkìi bíchjoà-là nijen-là nga chja ngats'ìi 'én xi ch'o tsò, yijo-laá tikonachan-là; nimé chjí-là nga tsò: “Beèxkón-ná Nainá.”

²⁷ K'e nga nguì kixi kjoa nga Nainá xi Na'èn-ná yaxkoán, koni s'ín mejèn-là, jé-né nga sichját'aà-lá xi ixti jchan, kò íchjín ka'àn xi jye k'en x'in-là, jñà xi kjo'in tjín-là, tikoá mì kì k'inde-lá yijo-ná nga kjoa ch'o jchìnìjñáá xi tjín isò'nde.

2

Mì kù mochjeén nga chjaàjñáá xita xinguiáá nga ndaà sis'in-lá

¹ Jñò, ndí 'ndsè, koni s'ín mokjeiín-nò it'aà ts'e Na'èn-ná Jesucristo xi jeya tíjna, kì chjaàjñoò xita xinguiò.

²⁻³ Tsà jngoò xita kijchò ya i'nde ñánda bixoña, xi tangò oro tíkjá najnó tsja, tikoá 'ñó ndaà kjoàn nikje chjí xi kikjá. Jñò, tsà 'ñó ndaà sis'in-là, k'oín-la: “Tijni ijndé ñánda ndaà choòn.” Tsà tikoá kijchò jngoò xita ima xi kixajndàjno kixajndat'aà nikje-là, tsà k'oín-la: “Taxki tisijni ya, kò tsà majìn, taxki tijnat'eii ya nangui.”

⁴ Jñò, k'e nga kos'ín s'een, xinguiò titsanachrjekànguioè nga chjaàjñoò xita xinguiò koni s'ín xitaxá xi ch'o tjín kjohítsjeèn-là.

⁵ Jñò ndí 'ndsè xi 'ñó matsjake-nò, tiná'ya: Nainá xó k'oaá s'ín jaàjìin-ne jñà xi xita ima xi tjín i isò'nde, mé-ne nga jñà kítsajna ítjòn-ne koni s'ín mokjeiín-là tikoá tjoé kjotjò-là ngats'ìi kjondaà xi Nainá tsjá-là jñà xita xi jè otíxoma-là nga jyeé k'oas'ín kitsjaà 'én-là nga tsjá-là xita xi matsjakeè.

⁶ Tanga jñò, ta saá nachrjekànguioè jñà xita ima. ¿A mìtsà jñà xita nchiná xi jñò beètoòn-nò nga fikò-nò nguixkon xitaxá nga óngui-nò?

⁷ ¿A mìtsà jñà xita nchiná xi chjajno-là it'aà ts'e 'ín-là Cristo, xi jè otíxoma-nò?

⁸ Jñò, ndaà 'nè-nò tsà kixi kjoa nga nikitason jè kjotíxoma-là Cristo xi otíxoma koni s'ín tíchja Xojon-là Nainá nga tsò: “Titsjachi xita xinguii xi i'nga koni tsà tì yijo tsiji-ne.”

⁹ Tanga tsà chjaàjñoò xita xinguiò, tjín xi ndaà nìs'in-là kò tjín xi mìkìi ndaà nìs'in-là, jé binchaàtsji-là yijo-nò, nga nìkatonè-là kjotíxoma; tijè-ne kjotíxoma tìbínè-nò jé.

¹⁰ Nga tsà jngoò xita xi ndaà sikitason yije kjotíxoma tanga tsà tà jngoò kjoa síkatonè-là, jye kisakò jé yije-là it'aà ts'e kjotíxoma-là Nainá.

¹¹ Nga k'oaá tsò Nainá: “Kì kjoa chijngui 'nè.” Tanga tikoáá tít'aà ñánda tsò: “Kì xita nìk'eèn.” Jñò, tsà mì kjoa chijngui 'nè, tanga tsà xita nìk'eèn, jye kisakò jé-nò it'aà ts'e kjotíxoma.

¹² Jñò, k'oaá s'ín tinókjoaa kò k'oaá s'ín t'een koni xita xi Nainá kiindaàjìin-là tsà k'oas'ín tìbitason-là koni tsò kjotíxoma xi síkítajndeí xita.

¹³ Jñà xita xi tsjìn-là kjohimatakòn it'aà ts'e xita xi kjeíí, tikoáá mìkìi s'e-là kjohimatakòn k'e nga sinè-là kjo'in. Tanga jñà xi tjín-là kjohimatakòn, mì kjo'in sinè-là k'e nga sindaàjìin-là.

Kjondaà xi 'né k'e nga mokjeiín-ná

14 Ndí 'ndsè, nìmé chjí-là tsà jngoò xítà xi tsò: “An, mokjeiín-na it'aà ts'e Nainá”, tsà mìkì tí'ya-là kjondaà-là. Xítà jè, xi ta jè kjoa mokjeiín-là, mìkì koma kitjokàjìn kjo'in.

15 Tsà jngoò 'ndsé kò tsà jngoò tichjaá xi tsjìn-là nikje xi ókjá kò tsà tsjìn-là tsojmì xi kine;

16 jñò, tsà k'oín-laà: “T'in-là ndaà-ne, ndaà chikjeí nikje-lè, ndaà chinii tsojmì xi mejèn-lè.” Kò tsà mìkì sichját'aà-là mé xi mochjeén-là, nìmé chjí-là.

17 K'oaá tìs'ín ma kjoa xi mokjeiín-ná, tsà mìkì tí'ya-là kjondaà-ná, nìmé chjí-là kjoa xi mokjeiín-ná.

18 Tjín i'nga xítà xi kjònangui, tsò: “¿A mokjeiín-lè it'aà ts'e Cristo?” 'An, xan-là: “Tí'yaá-là kjondaà-na. ¿A komaá kókó-ná nga mokjeiín-lè it'aà ts'e Cristo tsà nìmé kjondaà tì'nì? Tanga 'an tìs'ín-ná kjondaà, k'oaá ma-ne kokoò-lè nga kixí kjoa nga mokjeiín-na.”

19 Ngaji ndaá tjín nga mokjeiín-lè nga jngoò ma Nainá. Tanga tikoáá jñà inima ch'o-la neí mokjeiín-là nga tjín Nainá, skanda otsé-né nga tsakjón-là.

20 Jñò, xítà xi tsjìn-nò kjohítsjeèn, ¿a mì fiya-nò nga nìmé chjí-là kjoa xi mokjeiín-nò tsà mìkì tí'ya-là kjondaà-nò?

21 Nà'èn jchán kjìn-ná Abraham, ¿mé-ne xítà kixi kitsò-là Nainá? Koií kjoa-là nga ndaà kisikitasòn koni s'ín kitsò-là k'e nga kitsjaà kjotjò Isaac xi ki'ndí-là ma nga tjín-ne nga sikk'en.

22 ¿A mì 'ya-jèn nga jè Abraham koni s'ín nga kòkjeiín-là, k'oaá tìs'ín kisikitasòn? Koni s'ín kisikitasòn, yaá kjòjngoò kjoa mokjeiín-là nga nìmé kisichját'aà-là.

23 K'oaá s'ín tsitasòn koni s'ín tichja Xojon-là Nainá nga tsò: “Abraham kòkjeiín-là it'aà ts'e Nainá; k'oaá s'ín komà-ne nga Nainá kiskoétjò nga xítà kixi kitsò-là.” Amigo-là Nainá ki'mì Abraham.

24 Yaá 'yaà, nga Nainá kjoétjò xítà kjoa ts'e kjondaà xi síkitasòn, mìtsà tà koi kjoa-là nga mokjeiín-là.

25 K'oaá tìs'ín tjín ts'e chjoón chijngui xi 'mì Rahab; Nainá kiskoétjò nga xítà kixi kitsò-là koií kjoa-là kjondaà xi kis'ín nga kitsjaà'nde-là jñà xítà xi ijchò katsejèn-'ma, ikjoàn kisichját'aà-là nga xìn ndiyá kisikasén-ne xítà koi.

26 K'oaá tìs'ín tjín jè yijo-ná, nìmé chjí-là, tjína k'en-né tsà tsjìn inima-ná. K'oaá tìs'ín ma kjoa xi mokjeiín-ná, tsà mìkì tí'ya-là kjondaà-ná, nìmé chjí-là.

3

Kjoa ts'e nijen-ná nga nokjoá

1 Jñò ndí 'ndsè, it'aà tsajòn, kì kjìn ma-ne xi maestro ma. Jyeé 'ya nga ngajen xi okoòya-jen, tsà mé kjoa xi ch'o 'nè-jen, isaá tse kjo'in sinè-najen.

2 Ngats'ii-ná, kjìn skaya kjoach'o xi 'né, tanga jngoò xítà xi mì ch'o tsò 'én xi chja, jè-né xi nguì xítà kixi, xi komà-là kotixoma yije-là yijo-là.

3 K'oaá ngaya-là koni kohòyo xi si'a freno tso'ba mé-ne nga sikkitasòn-ne koni s'ín mejèn-ná nga kjoí, k'oaá s'ín ma'nchré yije yijo-là.

4 K'oaá tìs'ín tjín koni s'ín síxá jñà chitso, nas'ín takó i'í kjoàn, kò nas'ín takó 'ñó 'ba tjo xi fàhitjen, jè xítà xi síxáko nas'ín jtobá kji yá xi 'mì timón xi síxáko, maá fàhitjen nga fiko nità kós'ín mejèn-là nga kjiko.

5 K'oaá tìs'ín ma xi kjoa ts'e nijen-ná. Tà yijo jtobá kji, tanga 'ñó 'nga chja nità mé kjoa-ne. K'oaá ngaya-là koni jngoò ni'ín xi itsé kji, komaá kókangui ijñá nas'ín takó tse ma.

6 Nijèn-ná k'oaá ngaya-là koni jngoò ni'ín, yaá tjí'a yije ngats'ii 'én ch'o xi tjín isò'nde xi ma-là síkits'ón yije yijo-ná. Jè ni'ín xi tjín ya i'nde ts'e kjo'in ñánda 'mì inferno, jè bít'a'í-là nijèn-ná nga chja 'én xi ch'o tsò xi koma-là kókà-ná koni tjín nàchrjein kitsajnakoaán.

⁷ Ngats'ì cho xi t́ín i isò'nde ma ma'nchré, koni jńà cho xi t́ín jjiìn ijńá, ko xi t́ímajiìn isén, ko jńà cho xi nangui bífejno yijo-la ko jńà xi t́ín jjiìn ndáchikon, jńà xítà ma-la sí'nchré.

⁸ Tanga nijngoò xítà xi ma-la sí'nchré nijen-la. Nga jè nijen-ná jngoò kjoa ch'o t́ín-la xi mìkìi tsjá'nde nga ma'nchré. Yaá t́í'a koni xán kjan-la ye xi ma-la sík'en-ná.

⁹ Tjè-ne nijen-ná jeya síkíjna Nainá xi Nà'èn-ná, ko tjè-ne nokjoà'on-koáá xítà xi kos'ín kisindaà koni kji Nainá.

¹⁰ Tjè-ne ndsobaá bitjo-ne 'én xi jeya síkíjna Nainá ko tjè bitjo-ne xi nokjoà'on-koáá xítà. Ndí 'ndsè, mìkìi ndaà t́ín kjoa koi.

¹¹ Jngoò ngajo ñánda t́íbitjo nandá, mìkìi koma kítjo nandá jnchra koa kítjo nandá ndaà.

¹² Jńà yá toò iko, ¿a komaá koja-la toò xi 'mì aceituna? Jè yá uva, ¿a komaá koja-la toò iko? Jńò ndí 'ndsè k'oaá t́is'ín t́ín kjoa ts'e nandá, jngoò ngajo mìkìi koma kítjo nandá jnchra ko kítjo nandá ndaà.

Kós'ín t́ín kjoachjine xi nchrobá-ne ján ngajmii

¹³ Jńà xítà xinguioo, tsà t́ín i'nga xi t́ín-la kjoa chjine ko xi ndaà fiya-la, kàtakó kjoachjine-la nga indaà ikon t́ísjchá yijo-la.

¹⁴ Jńò, tsà biì'nde-laà yijo-nò nga kjoaxítakòn sjiìn inima-nò nga mejèn-nò nga jńò kítsajna ítjòn-là xinguioo, kì k'oaá s'ín nokjoà nga ndaà títsa'nè; kì 'én ndiso nokjoà nga kondra onguí-là kjoa kixi-la Nainá.

¹⁵ Kjoa chjine jè, mìtsà it'aà ts'e Nainá nchrobá-ne. Kjoa chjine ts'e isò'nde-né. Kjohítsjeèn ts'e xítà-né, ko t́i ts'eé-ne xítà nejí.

¹⁶ K'e nga maxítakòn-chaá xinguiáá ko nga mejèn-ná nga jńá kítsajna ítjòn-laà, yaá sakó-ná kjoasiì, ngats'ì kjoa ch'o xi t́ín isò'nde.

¹⁷ Tanga jńà xítà xi t́ín-la kjoa chjine xi it'aà ts'e Nainá nchrobá-ne, tsjeè síjchá yijo-la, kjoa'nchán ótsji, t́ín-la kjondaà, xítà 'nchré-né, t́ín-la kjohimatakòn, ndaà t́ín xá xi s'ín, mì jò fi-ne, ko 'én kixií chja.

¹⁸ Jè xítà xi mejèn-la nga s'e kjoa'nchán, 'nchán bijnako xítà xi i'nga mé-ne nga ma iskan sakò-la kjondaà xi kixi t́ín.

4

Jè xi matsjakeè kjoa ts'e isò'nde, kondra ts'eé Nainá

¹ ¿Ñánda nchrobá-ne kjoachán nga bixkàn-koo xinguioo? Yaá nchrobá-ne kjoach'o xi kjit'aà nchrjein síjé inima-nò nga bixkàn-koo kjohítsjeèn ch'o-nò.

² Mejèn-nò tsojmì xi tsjìn-nò tanga mìkìi sakó-nò, k'oaá ma-ne nga nìk'eèn xítà koa maxítakòn-chaà xítà, tanga mìkìi sakó-nò tsojmì xi mejèn-nò. K'oaá ma-ne nga sakó-nò kjoachán nga bixkàn-koo xinguioo. Mìkìi sakó-nò tsojmì xi mejèn-nò koií kjoa-la nga mìkìi nìjé-là Nainá.

³ K'e nga nìjé-laà Nainá, mìkìi tsjá-nò nga mìkìi ndaà nìjé-laà. Nga jè xi mejèn-nò nga ya sichjeén it'aà ts'e kjotsja xi ch'o síjé yijo-nò.

⁴ Jńò xi mìtsà xítà kixi 'mì-nò, ¿a mìtsà 'ya nga jè xi matsjakeè kjoa ts'e isò'nde, kondra ts'eé Nainá? Nítà yá-ne xi mejèn-la kotsjakeè kjoa ts'e isò'nde, kondra-la Nainá ma.

⁵ Koií k'oa tsò-ne Xojon-la Nainá nga tsò: “Jè Inima Tsjeè xi Nainá kitsjaà-ná, skanda machini-né nga 'ńó matsjakeè-ná.”

⁶ Tanga Nainá, nga ko kjondaà-la ndaà síhját'aà-ná. K'oaá tsò Xojon-la nga tsò: “Nainá kondraá t́jna-la jńà xítà xi 'nga ikon, tanga koó kjondaà-la ndaà síko jńà xi xítà ima kjoa.”

⁷ Tjii'nde nga Nainá kàtatixoma-nò, ko 'ńó tájaajìin títsajna-laà xítà nejí mé-ne nga kosit'aàxìn-nò.

⁸ Tìchrañàt'aà-laà Nainá mé-ne jè Nainá sùchrañat'aà-nò. Jñò xi jé binchaàtsjioè, kì tì jé binchaàtsji-nò, tìtsjeè ndsaa. Tìtsjeèya kjohìtsjeèn-la inìma-nò, jñò xi jò kjohìtsjeèn tjin-nò nga okji matsjacha Nainá ko okji matsjacha isò'nde.

⁹ Tikájnoè jé-nò, ba tìtsajna ko chihindáyaà. Jè kjoa bijnò-nò, kjoa ts'e ndáxkoón kátama. Ko jè kjotsja-nò, kjoaba kátama.

¹⁰ Nangui titsajna-la Nainá mé-ne jè Nainá 'nga sùkítsajna-nò.

¹¹ Ndí 'ndsè, kì nokjoàjno-la xinguioo. Jè xi chjajno-la 'ndse nga tsò: “Mìkii ndaà tís'in”, jè kjotixoma tìchjajno-la nga tsò nga mìkii ndaà tjin kjotixoma. Ko tsà k'oaá s'in si nga mìkii ndaà tjin kjotixoma, mìkii tinìkitasòn koni tsò kjotixoma. K'oaá ngaya-la koni tsà xitaxá tijni nga jì tibindaàjìn.

¹² Tà jngoò ma-ne xi tsjá kjotixoma, tije-ne xi xitaxá tjina nga bíndaàjìn-la xita. Ko tije-ne xi ma-la kochrjekàjìn-ná kjo'in, tìkjoa tije-ne xi ma-la tsjá-ná kjo'in. ¿Yá-ne ngaji nga jé bìne-laà xinguii?

Xita xi chja 'én 'nga ikon

¹³ Jñò, ndaà tiná'yaà koni xán-nò. Jñò bixón-nò: “Nachrjein i'ndeji, o nchijòn-lè, xìn naxandá kjaán, jngoò nó kìtsajnaà nga sixá mé-ne tse ton sikijneé.”

¹⁴ Tanga jñò, mìkii tjiìn-nò mé xi komat'ioòn nchijòn-lè nga titsajnakon. Jñò, k'oaá s'in ngaya-la koni ifi. Jngoò tjò fahaya, ikjoàn nitoón fiya-ne.

¹⁵ Jñò, kii s'in tinókjoaa: “Tsà Nainá mejèn-la nga sùkítsajnakon-ná, komaá s'eén xá koi, o s'eén xá xi kjejí.”

¹⁶ Tanga jñò, 'ño 'nga 'én nokjoà nas'in mìkii tjiìn-nò mé xi koma nga tífi-isa nachrjein. Ngats'ì 'én 'nga xi nokjoà, jé-né.

¹⁷ Jè xi tjiìn-la kjoa xi ndaà tjin ko mìkii sikitason, jé tíhotsji-la yijo-la.

5

Kjo'in xi sùkjeín xita nchiná

¹ Jñò xi xita nchiná 'mì-nò, tiná'yaà 'én xi xán-nò. Chihindáyaà ba ba it'aà ts'e kjo'in xi sikjioón.

² Kjoa nchiná-nò, nímé chjí-la, tíbi'ndo-né. Nikje xi kichíkjá, jye nchisíjke cho kixo.

³ Ton oro-nò ko ton plata-nò jyeé tímachi. Jè nachrjein k'e nga sindaàjìn, jña chì-la kochjeén xi kondra tsajòn. Koó ni'in kòkà yije yijo-nò. Nga jñò, titsabincháxkó ton nas'in jye tífehet'aà nachrjein.

⁴ Jña xita chì'nda xi kisixá nangui-nò, nchikjindáya nga ótsjiya chjí-la nga jñò kichonachan-la. Nainá xi ts'e yije nga'ño xi tjin, jyeé kii'nchré-la koni s'in nchikjindáya.

⁵ Jñò, nga jì titsajnaà it'aà nangui, ndaà titsajnaà nga nímé chija-nò, 'bi-la kjotsja yijo-nò. Titsanisiín-la inìma-nò nga 'bi-la kjotsja xi síjé k'oaá ngaya-la koni cho xi mìkii tjiìn-la tsà jye ijchò nachrjein-la nga kiyá.

⁶ Jñò, tsohònè-la jé koa kinik'eèn jña xi xita kixi xi mì jé tjin-la. Jña xita koi, mì kì komà tsasìko yijo-la.

Mé kjoa xi s'eén nga titsachiñá-lá nga kjoí i'ngoò k'a Cristo

⁷ Jñò ndí 'ndsè, chíñakjoaa kóni skanda k'e nga kjoí i'ngoò k'a Na'èn-ná. K'oaá s'in chíña koni s'in xita xi síxako nangui nga koñakjoa-la jé jtsí xi 'ba itjòn ko xi iskan 'ba nga síxako jña tsojmì tjè mé-ne nga koma koiixkó-ne tsojmì tjè-la xi majchá nga 'ño chjí-la.

⁸ Jñò, k'oaá tís'in chíñakjoaa, 'ño t'è-la takòn nga jyeé nchrobá machraña nga kjoí i'ngoò k'a Na'èn-ná.

⁹ Ndí 'ndsè, kì xki xi ján tsajét'aà-la xinguioo, mé-ne nga mì kjo'in sìnè-nò. Nga jè Na'èn-ná jyeé tijnandaà nga kjoí mé-ne koiindaàjìn-la xita.

¹⁰ Ndí 'ndsè, jñò, k'oaá s'in t'een koni s'in kis'iìn jña xita xi kùichja ngajo-la Nainá nga kichìkjoako-la nga kisìkjeín kjo'in koií kjoa-la nga 'én-la Nainá kùichjaya.

¹¹ K'oaá s'ín 'ya-la nga jñà xita xi chikjoako-la kjo'in, s'ee-la kjondaà. Jyeé tíjìn-nò nga jè Job k'oaá tìs'ín kichikjoako-la kjo'in. Kò jyeé 'yaà mé xi kitsjaà-la Na'èn-ná k'e nga jyehet'aà-ne kjoa. Na'èn-ná 'ñó ndaà xita, tjin-la kjohimatakòn.

¹² Jñò ndí 'ndsè, k'e nga 'bioò 'én-nò, kì yá xi nikítsajna ítjòn. Kì jè ngajmì kò nangui, o xi kj'eij tsojmì nìkjeén. Tà k'oaá s'ín tixón: “Jon”, o xi “Majìn”, mé-ne nga mì kjo'in sinè-nò tsà mìkì kítasòn.

Kjoa bìtsi'ba

¹³ Tsà tjin i'nga xita xinguiòo xi ba tjin-la, kàtitsi'ba-la Nainá. Tsà tjin i'nga xi tsja tjin-la, kàtaseè-la Nainá nga jeya kàtasíkijna.

¹⁴ Tsà tjin i'nga xita xinguiòo xi xk'én, kàtakinikjaá xita jchínga xi tjin-la xá ya jjin naxandá-la Cristo mé-ne nga kàtitsi'batji-ne kò it'aà ts'e nga'ñó-la Na'èn-ná kàtasíkajno-la asiti.

¹⁵ K'e nga bìtsi'batjiò xita, tsà ndaà mokjeiín-nò, jè xita xi xk'én kondaà-ne. Jè Na'èn-ná sìindaà-ne nga kòma kòsítjen-ne. Tsà jé tjin-la jchat'aà-la jé-la.

¹⁶ Chjahatakòn-la xita xinguiòo jé-nò. Tikoá titsi'batjiò xinguiòo mé-ne nga kondaà-nò. K'e nga jngoò xita kixi bìtsi'ba, tjin-la nga'ñó nga kítasòn.

¹⁷ Jè xita xi kichja ngajo-la Nainá xi ki'mì Elías, k'oaá tìs'ín xita koni jñá. 'Ñó kisijét'aà-la Nainá nga mì tì jtsí k'oa-ne; kò ján nó osen mì tì kù ts'a-ne jtsí.

¹⁸ Jngoò k'a tsibìtsi'ba-la Nainá nga kàt'a jtsí. Ts'aá jngoò k'a-ne jtsí kò jè nangui kòjchá tsojmì tjè.

¹⁹ Ndí 'ndsè, tsà tjin i'nga xinguiòo xi chinchat'aàxìn-la xi kjoa kixi, koa tsà jngoò xita kichja-la nga kàtjanchrobát'aà jngoò k'a-la Nainá,

²⁰ jè xita xi kichja-la nga keènojímí-la nga ch'o tjin ndiyá xi tsó'baya, k'oas'ín kàtasijìn-nò nga jngoò xita tíhochrjekàjìn kjo'in xi ts'e kjoabiyaà. 'Ñó kjìn jé jchat'aà-la.

Xojon carta xi kiskiù ítjòn San Pedro

Kó tsò Pedro nga síhixat'aà xíta

¹ 'An xi 'mì-nà Pedro, nga 'an tsibíxáya-na Jesucristo, síhixat'aà-nò ngats'ioò xi xó jaàjiin-nò Nainá nga mì tì nangui-nò titsajna-nò nga xkì xi ján naxandá kitsjohoya ya nangui Ponto, Galacia, Capadocia, Asia kò Bitinia;

² jñò xi xó kitjaàjiin-nò, koni s'ín jye tjíndaà-là xi kjohítsjeèn-là Nainá xi Na'èn-ná ma, nga jè Inìma Tsjeè-là k'oaá s'ín kisikò-nò nga ngui xíta-là Nainá ma, mé-ne nga síkitasòn-là Jesucristo kò mé-ne ma xíxteèn-jno-nò jní-là nga matsjeèya inìma-nò kjoa ts'e jé-nò. Tsee kjondaà kò kjoa'nchán kàtas'e-là inìma-nò.

Kjotjò xi chiñàkjoa-lá xi tijnatjò-là Nainá ján ngajmii

³ Jeya kàtijna Nainá xi Na'èn-là Jesucristo xi otíxoma-ná. 'Nó tse kjoahimatakòn tjin-là: koni s'ín jaáya-là Jesucristo kjoa ts'e kjoabiyaà, k'oaá kisikò-ná Nainá nga kits'in xitse ijngòò k'aá mé-ne nga kjit'aà nachrjein chíñakjoá

⁴ nga tsjá-ná kjotjò xi jè tijnatjò-là ján ngajmii, kjotjò xi mìkii bits'on nita kjé-ne, mìkii bi'ndo kò mìkii bixòña. Kjotjò jè, jñá tjoé-ná.

⁵ Ta ngatji-là nga mokjeiin-ná it'aà ts'e Nainá, jè nga'nó-là síkinda-ná skanda k'e nga kitjokajñaá kjo'in koni s'ín tjíndaà-là Nainá k'e nga jye kjoehet'aà nachrjein.

⁶ Koií kjoa-là, jñò, 'nó tsja tjin-nò, nas'ín tjin i'nga nachrjein nga makájno-nò nga kjin skaya kjo'in nikjioón.

⁷ K'oaá ma-ne nga kjo'in nikjioón nga ma chít'aà-nò tsà ndaà mokjeiin-nò. K'oaá ngaya-là koni jè oro, mochjeén-né nga kò ni'ín kotsjeèya-ne. Kò jè kjoa nga mokjeiin-nò isaá 'nó chjí-là mì k'oaá-ne koni jè oro xi bits'ón-ya. Jñò, k'e nga jye chít'aà-nò koni s'ín mokjeiin-nò, jeyaá kitsajnaà, 'ngaá kitsajnaà kò jchaxkón-nò k'e nga kjoíí ijngòò k'a Jesucristo.

⁸ Jñò, matsjacha-nò Jesucristo, nas'ín mìkii kiyaxkoòn. Mokjeiin-nò it'aà ts'e, nas'ín mìkii títsa'yaà. 'Nó tsja ma-nò skanda tsjin 'én xi ma s'enojmí nga 'nó tjin-nò kjotsja.

⁹ Koií kjoa-là nga matsja-nò nga jye titsabitjokajñòò kjo'in ta ngatji-là nga mokjeiin-nò it'aà ts'e Cristo.

¹⁰ Jè kjoa nga bitjokajñòò kjo'in, jñà xíta xi kiichja ngajo-là Nainá kjòtsee, kiskoòta'yàkò-né tikoaá kiskònanguiya-né, ikjoàn kiichjaya jè kjondaà xi tsjá-nò Nainá.

¹¹ Jñà xíta koi, jè Inìma-là Cristo kisikichiya ítjòn-là mé kjo'in xi siikjeiin Cristo kò kjoa jeya xi s'e-là k'e nga koma iskan. Kiskònanguiya-né mé nachrjein-ne nga k'oas'ín komat'in koa kós'ín koma.

¹² Tanga jè Nainá kisikichiya-là nga mìtsà kjondaà ts'e nga kos'ín kis'enojmí-là 'én koi; kjondaà tsajòn-nò. Kò jñà 'én koi, tijña-ne 'én ndaà-là Nainá xi kjoa ts'e Cristo xi tís'enojmí-nò nachrjein i'ndeí. Nga tijé-ne Inìma Tsjeè-là Nainá xi ngajmii nchrobá-ne tsjá-là nga'nó jñà xíta xi bénojmí-nò. Skanda jñà àkjale, mejèn-là skoe kjoa koi.

Mochjeén-né nga tsjeè sijchá yijo-ná

¹³ Koií kjoa-là jñò, titsajnandaà, ndaà tikítsjeèn, ngui ndaà chíñakjoa-là kjondaà xi tjoé-nò k'e nga kjoíí ijngòò k'a Jesucristo.

¹⁴ K'oas'ín ndaà tijchá yijo-nò koni ixti xi ndaà 'nchréñijon. Kì k'oa tís'ín 'nè-nò koni s'ín ki'nè nga sa ítjòn nga ch'o tjin kjoa xi kisijé yijo-nò k'e nga tikj'eè ndaà yaxkoòn Nainá.

¹⁵ Ta saá tsjeè tijchá yijo-nò ngats'iì kjoa xi 'nè, nga jè Nainá xi xó kiichja-nò, xíta tsjeè-né.

¹⁶ Nga jè Xojon-là Nainá, k'oaá s'ín tíchja nga tsò: “Jñò, xíta tsjeè kàtama, nga 'an, xíta tsjeè-ná.”

¹⁷ Jñò, tsà Na'èn 'mì-là Nainá xi ta ngásòn tífiko ngats'ìi xità k'e nga bìndaàjiìn-là nità mé kjoa xi s'ín, mochjeén-né nga kjit'aà nàchrjein ndaà jchaxkón nga ì títsajnaà isò'nde nga mìtsà ì nangui-nò.

¹⁸ Jñò, jyeé ndaà tíjiìn-nò nga mìtsà tsojmì xi ma-là bits'on kjòchjítjì-nò nga ma títsajnadejí-nò ngats'ìi kjoa ch'o xi nímé chjí-là koni s'ín tsakó-nò xità jchínga-nò. Mìtsà ton oro kò ton plata kjòchjítjì-nò.

¹⁹ Jè jní-là Cristo xi 'ñó tse chjí-là kjòchjítjì-nò. Cristo kitsjaà kjotjò yijo-là nga k'en-t'aà krò koni jngoò orrè xi tsjeè kji, xi nímé ch'ín tjít'aà yijo-là.

²⁰ Tik'e-ne nga tikj'eè sindaà isò'nde, Cristo, k'oaá s'ín kisinè-là kjoa xi sùikitasòn. Tanga jè nàchrjein xi títsajnaà ì'nde ì ki'ya-là nga j'ìi Cristo nga kisikitasòn kjoa xi kisinè-là xi kjondaà tsajòn.

²¹ Xi ìt'aà ts'e Cristo, jñò mokjeiìn-nò ìt'aà ts'e Nainá; nga jè kisikjaáya-là ìt'aà ts'e kjoabiyaà, tìkoà kitsjaà-là kjoa jeya; k'oaá ma-ne nga mokjeiìn-nò kò chiñà nga sùikitasòn Nainá koni s'ín kitsjaà-nò tso'ba.

²² Jè inìma-nò, jyeé kjòtsjeè, koiì kjoa-là nga nìkitasòn koni tsò 'én kixi-là Nainá mé-ne nga kixi sítjòchaà xinguioo. K'oaá ma-ne nga mochjeén-né nga 'ñó ndaà tìtsjacha xinguioo nga tsjeè tjín inìma-nò.

²³ Jñò, ìjngoò k'a kits'iìn xitse ìjngoò k'a-nò. Tanga mìtsà tje-là xità xi biyaà kits'iìn-nò, jè tje-là Nainá xi mìkiì biyaà kits'iìn-nò. Nga jè 'én-là Nainá xi tíjnakon kò xi mìkiì fehet'aà nità kjé-ne kits'iìn ìjngoò k'a-nò.

²⁴ Nga k'oaá s'ín tíchja Xojon-là Nainá nga tsò:
Ngats'ìi xità, k'oaá s'ín ngaya-là koni xka ijñá;
kjoajeya-là xità, k'oaá s'ín ngaya-là koni naxó-là xka ijñá;
jñà xka ijñá, xì-né, ikjoàn bixòjen naxó-là.

²⁵ Tanga jè 'én-là Nainá tíjna-né nità kjé-ne.

'Én jè, jè 'én ndaà-là Nainá xi kjoa ts'e Cristo xi jye kis'enojmi-nò.

2

Naxandá xitse-là Nainá

¹ Chjàxìn-là yijo-nò xi kjoa ts'en, kjoa chonachan, kjoa ts'e xità xi jò isén tjín-là, kjoaxitakòn, ngats'ìi 'én ndiso.

² Kos'ín t'een koni s'ín ndí ixti xi sa kits'iìn nga 'ñó síjé tsjín nga mejèn-là koki. K'oaá tìs'ín 'ñó tìnchátsjiod jè 'én-là Nainá xi ngui 'én tsjeè mé-ne nga jè kojchá-nò kò kochrjekàjiìn-nò kjo'in Nainá,

³ nga jyeé ki'yaà jñò nga jè Na'èn-ná, 'ñó ndaà xità.

Jè ndajo xi tíjnakon

⁴ Jè Jesucristo, jè ngaya-là jngoò ndajo xi tíjnakon, jè xi ochrjekàngui jñà xità, tanga Nainá xó k'oaá s'ín jaàjiìn-ne nga 'ñó tse chjí-là. Jñò, k'e nga binchat'aà chrañà-là Cristo,

⁵ tìkoá k'oaá s'ín ngaya-nò koni ndajo xi títsajnakon. Nainá tísikjeén-nò koni ndajo nga tìbìndaà ni'ya tsjeè-là mé-ne jñò, no'miì tsjeè koma nga ya sixá nga ìt'aà ts'e Jesucristo k'oi-là kjotjò Nainá xi jè ndaà sasén-là koni s'ín okóya Inìma Tsjeè-là.

⁶ K'oaá s'ín tíchja Xojon-là Nainá nga tsò:
Chítsejèn-là, 'an síkijna jngoàà ndajo nga 'ñó-là chrjangui-là ni'ya ján naxandá Sión,
xi xó 'an jaàjiìn-na,
xi 'ñó ndaà kji kò 'ñó tse chjí-là.

Jè xi kòkjeiìn-là ìt'aà ts'e, mìkiì kosobà-là.

⁷ Jñò, xi mokjeiìn-nò ìt'aà ts'e ndajo jè, bixón-nò: 'ñó tse chjí-là. Tanga jñà xità xi mìkiì mokjeiìn-là, bitasòn-né koni s'ín tíchja Xojon-là Nainá nga tsò:

Jè ndajo xi tsachrjekàngui chjinechrjó,

jè xi ndajo sko-la koma ts'e chrjangui-la ni'ya.

⁸ Ìjngoò k'a tjit'aà Xojon-la Nainá ñánda tsò:

Ndajo jè, kjin xita satíngui ko kjin xita kixangui.

Jña xita koi, k'oaá s'in mat'in nga mìkìl síkitasòn koni tsò 'én-la Nainá; koií kos'in mat'in-ne nga k'oaá s'in ok'in-la.

Jè naxandá-la Nainá

⁹ Tanga jñò, xita naxandá xi xó kitjaàjìn-nò. Jñò, no'mii xi nixá-la Cristo, jè xi xitaxá ítjòn tíjna. Jñò, xi naxandá tsjeè-la Nainá 'mì-nò, jngoò naxandá xi ya nokjoà-nò it'aà ts'e Nainá mé-ne nga koma kinókjoaya-nò kjondaà-la Nainá xi tsachrjekàjìn-nò kjoa ts'e jé ñánda jñò choòn koa yaá kisikítsajna-nò ñánda iseèn choòn.

¹⁰ Jñò, nga sa kjòtseé skanda mìtsà xita naxandá 'mì-nò; tanga i'ndeì naxandá-la Nainá 'mì-nò. Nga sa kjòtseé Nainá mìkìl mahimakeè-nò; tanga i'ndeì, jyeé mahimakeè-nò.

¹¹ Jñò ndí 'ndsè xi 'ñó matsjacha-nò, bítsi'ba-nò koni xita xi mì tì nangui-nò titsajna-nò xi ta titsabitjaàjtoò i isò'nde, kì kii bìi'nde-la yijo-nò kjoa ts'e jé xi síjé yijo-nò xi kjaán-ko inima-nò.

¹² Ndaà tanguíkoo yijo-nò ya jjiin-la xita xi mìkìl mokjeiín-la it'aà ts'e Cristo. Jña xita koi, nas'in chajno-nò i'ndeì, tanga k'e nga kjoí ìjngoò k'a Cristo tsjá-la kjondaà Nainá koií kjoa-la nga skoexkon-nò nga ndaà titsa'nè.

Jchaxkón xitaxá

¹³ Nga jeya kína-ne Na'èn-ná, tikitason-là ngats'ii xita isò'nde xi kjotíxoma tíjya tsja, jña xi 'ñó 'nga xá tjin-la, xi xita sko-la títsajna;

¹⁴ tikoá tikitason-là jña xi gobernador títsajna nga jè xitaxá ítjòn síkasén nga tsjá-la kjo'in xita xi kjoa ótsji; koa jña xi ndaà s'in, ndaà síkítsajna.

¹⁵ Nainá k'oaá s'in mejèn-la nga jñò, ndaà s'een, mé-ne jña xita xi mìkìl machiya-la jyò kítsajna-ne, nímé 'én kichja xi kondra tsajòn.

¹⁶ Jñò, k'oaá s'in tijchá yijo-nò nga titsajnandeí-nò, tanga kì k'oaá s'in nìkítseèn nga tíj'nde-nò nga ch'o s'een. K'oaá s'in tijchá yijo-nò nga ch'inda-la Nainá maà.

¹⁷ Jchaxkón yije xita. Títsjacha xi 'ndsè chibà. Tískón-chaà Nainá. Jchaxkón jè xi xitaxá ítjòn tíjna.

Kjoa xi tjinè-la nga sìkitasòn xi ch'inda 'mì

¹⁸ Jñò xi xita ch'inda 'mì-nò, jchaxkón koa tikitason-là nei-nò. Mìtsà ta jña nei-nò xi ndaà síko-nò ko xi beètjò-nò, tikoá tikitason-là jña xi ch'o síko-nò.

¹⁹ Ndaà bìtsajna nga nguixkon Nainá jña xita xi kjo'in síkjeiín nas'in mì jé tjin-la ta jé ngatjì-la nga machiya-la kó tsò Nainá.

²⁰ Jñò, tsà kjo'in tsjá-nò xita nga jé binchaàtsjioò, ¿mé xi ndaà kítsajna-nò? Tanga tsà kjo'in titsanikjioón nga ndaà 'nè, ndaà sìkítsajna-nò Nainá.

²¹ Nga koií xá kichja-nò Nainá nga jè Cristo kisikjeiín kjo'in xi kjoa tsajòn. Tsibíjna jngoò-nò chibà nga k'oas'in síkitasòn koni s'in kisikitasòn jè.

²² Cristo, nijngoò jé tsohótsji, ko nijngoò 'én ndiso kichja.

²³ K'e nga kichjajno-la xita, mìkìl tsà kichjajno ngajo-la. K'e nga kisikjeiín kjo'in, mìkìl tsà koa tìs'in kis'iin ngajo-ne. Ta Nainá tsibíjya tsja, nga jè xi bíndaàjìn kjoakixi.

²⁴ Jè sobà Cristo tsakajen jé-ná k'e nga kisitjòt'aà yijo-la ya krò, mé-ne jña kítsajnakon-ná nga nikitasoán xi kjoa kixi nga jyeé titsajnat'aaxìn-lá kjoa ts'e jé koni tsà jye k'én. Jè Cristo, koni s'in kisikjeiín kjo'in nga kitsi'on, jñò kjondaà-nò.

²⁵ Jñò, nga sa kjòtseé, k'oaá s'in tsitjaà koni orrè xi kisijchàaxkon ndiyá-la, tanga i'ndeì, jyeé inchrobàt'aà-là Cristo koni jngoò paxtò xi síkinda inima-nò.

3

Kós'ín sùjchá yijo-la jè x'in ko chjoón

¹ K'oaá tìs'ín t́ín it'aà tsajòn xi íchjín 'mì-nò, nangui titsajna-là x'in-nò, mé-ne jñà xita x'in-nò tsà t́ín i'nga xi mìkìì mokjeiín-la 'én-la Nainá, kòkjeiín-la, nas'ín mìkìì kinókjoakoo kjoa ts'e Nainá. K'e nga skoexkon-nò nga ndaà titsanjchá yijo-nò tikoáá sùkijatjìyaá-la yijo-la.

² Skótsejèn-nò nga tsjeè titsanjchá yijo-nò nga ndaà yaxkón Nainá.

³ Kò kì tà isò'nga-la yijo-nò 'ñó ndaà bíndaà, nga 'ñó ndaà bí'ñó tsja skoò, nga ndátòn chjì nìkjeén xi nguì oro, nga jñà nikje x'ió-nò 'ñó xkón kjoàn.

⁴ Majìn, jè xi nchrobájiìn inìma-nò xi ndaà síkatsejèn-nò, jè-né xi mìkìì bits'on, jè inìma xi indaàkjoa kò xi 'nchán t́jna. Jè xi 'ñó tse chjì-la nga nguixkon Nainá.

⁵ Nga sà kjòtseé, jñà íchjín xi ndaà kijtseèxkón Nainá nga kiskoòñà-la, k'oaá s'ín ndaà tsatsejèn nga nangui tsibìtsajna-la x'in-la.

⁶ K'oaá s'ín kis'iìn Sara nga kisikitasòn-la Abraham. K'oaá ma-ne nga ndaà kijtseèxkón nga jè xi Na'èn t́jna. Jñò, tsà ndaà 'nè kò tsà nímé kjoxxkón t́ín-nò, tje-la Saraá ma.

⁷ Jñò xi x'in 'mì-nò, ndaà títajnakoo jñà íchjín-nò nga ndaà kàtachiya-nò nga isáá indaàkjoa. Ndaà jchaxkón íchjín-nò nga ngàsòn tjoé-nò jè kjondaà-la Nainá, jè kjoabinachon xi jè Nainá jye t́indaà-la nga tsjá-nò. K'oaá s'ín t'een mé-ne k'e nga nokjoàt'aà-là Nainá, nímé sùjti-nò.

Kós'ín sùjchá yijo-la ngats'ù xita-la Nainá

⁸ Nga yije kjoa koi, ngats'ioò, ta jngoò kjohítsjeèn kàtas'e-nò; t́jetakòn xinguiò; tjàcha t'een xinguiò nga 'ndsè chiba; chahìmaa xinguiò; imà kjoa t'een.

⁹ Tsà yá xi ch'o síko-nò, kì k'oaá tìs'ín 'nè ngajo-nò. Tsà yá xi 'on chjajno-nò, kì k'oaá tìs'ín nokjoàjno ngajo-là. Jñò, tã saá t́jèt'aà-là Nainá nga kàtasíchikon-t'in; nga jyeé 'yaà nga koií xá kinokjoá-nò nga Nainá sùichikon-t'in-nò.

¹⁰ Nga:

Jè xi mejèn-la nga tsja s'e-la nga t́jnakon,
nga mejèn-la skoe nàchrjein xi ndaà,
kàtasíkìnda nìjen-la nga mì ch'o kichja;
kò kàtasíkìnda tso'ba, nga mì 'én ndiso kichja.

¹¹ T́nchat'aàxìn-là kjoa xi ch'o t́ín; ndaà t'een.

'Nchán titsajnakoo xinguiò nita mé kjoa xi t́ín-nò.

¹² Nga jè Na'èn-ná tísík'aá xkon nga tísíkìnda xi xita kixi,
t́binchá líká-la nga tí'nchré-la k'e nga chjat'aà-la,
tanga jñà xita xi ch'o s'ín bí'maá-la isén-la nga kondra ts'e-né.

¹³ Jñò, tsà kjit'aà nàchrjein nga ndaà títas'è, mì yá xita xi ch'o síko-nò.

¹⁴ Tanga mé ta ndaà-nò tsà kjo'in titsanjkióón ta koi kjoa-la nga kixi 'nè. Tanga nì jngoò xita tsakjoòn-là, kì binchaxkón-là yijo-nò.

¹⁵ Jè t́kìjna ítjòn Cristo nga jè kàtatixoma-nò ya jjiìn inìma-nò. Títajnandaà nga kjit'aà nàchrjein mé-ne nga koma kénójmíya-là jñà xita xi skonanguiya-nò it'aà ts'e kjoa xi títaschiñá-là it'aà ts'e Cristo.

¹⁶ K'e nga kinókjoaa, indaàkjoa t'een. Chaxkón jñà xi kénójmíya-là, tsjeè kàtìjna kjohítsjeèn-nò, mé-ne jñà xita xi ch'o chjajno-nò nga ndaà 'nè nga mokjeiín-nò it'aà ts'e Cristo, kosobà-la nga jñò chjajno-nò.

¹⁷ Isáá ndaà t́ín tsà kos'ín mejèn-la Nainá nga kjo'in síkjioón k'e nga ndaà 'nè, mì k'oa-ne tsà k'e nga ch'o 'nè.

¹⁸ Nga skanda jè Cristo, jngoò k'aá kisìkjeiín kjo'in k'e nga k'en xi kjoa ts'e jé-ná. Cristo, mìtsà jé tsohótsji; xita kixi-né; kisìkjeiín kjo'in it'aà ts'e xita xi jé t́ín-la mé-ne nga koma

kjiko-ná nguixkon Nainá. Yijo-la, jñà xita kisik'en, tanga it'aà ts'e Inima-la jaáya ìjngoò k'a-la.

¹⁹ Kò jè Inima-la Cristo kii ì'nde ñánda títsajna inima xi títsajnaya ndayá nga kiihjayajin-la.

²⁰ Inima koi, ts'eé xita xi mikii kii'nchréñijon-la Nainá naxhrjein ts'e Noé. Nainá tsee kiskoòña kjoa k'e nga Noé tsibíndaà chitso je. Ya iya chitso, tà jiiin ma-ne xita xi itjokàjiiin kjo'in nga mikii k'en k'e nga ts'a jtsí xkón.

²¹ Kò jè nandá ts'e jtsí xkón, jè ngaya-la nandá xi ma-ná bautizar naxhrjein ì'nde ì nga bitjokàjñaá kjo'in. Tanga nga maá bautizar, mìtsà yijo-ná matsjeè-ne, jè-né nga nijét'aà-lá Nainá nga tsjeè kátas'e kjohítsjeèn-ná. Kò bitjokàjñaá kjo'in, koií kjoa-la nga jaáya-la Cristo,

²² kò kii mijin ján ngajmii nga ya tíjnat'aà chrja kixi-la Nainá. Jé tíhotíxoma-la àkjale kò inima xi tjín-la kjotíxoma kò ngats'ii xi tjín-la nga ñó.

4

¹ Cristo, koni s'ín kisikjeiin kjo'in yijo-la, jñò, tikoáá mochjeén-né nga kitsajnandaà nga sikjioón kjo'in. Nga jè xi jye kisikjeiin kjo'in, yaá jyehet'aà jé-la,

² mé-ne jñà naxhrjein xi kína isa isò'nde, k'oaá s'ín kàtjna koni s'ín mejèn-la Nainá, mìtsà k'oas'ín kína koni s'ín mejèn-la yijo-la.

³ Jyeé 'ñó kjin naxhrjein kinikato nga ch'o ki'nè koni s'ín xita xi mikii beèxkon Nainá. K'oaá s'ín kinikòò yijo-nò kjoa xi ch'o tjín koni kjoa chijngui, kjoa ch'o xi síjé yijo-nò, kò kjoa ch'i, kjoa ts'e s'eí xi ch'o tjín, kò nga ta xán ki'yò kjit'aà, kò nga xkósòn kiyaxkón nga mìtsà kixi kjoa nga Nainá.

⁴ Ì'nde ì jñà xita koi, ta maxkón-la it'aà tsajòn nga mì tì kii ya tsjahijtako-nò kjoa xi ch'o tjín; bijnòkèè-nò; ch'oó chjajno-nò.

⁵ Tanga jñà xita koi, tjínè-la nga tsjá-la kindá Nainá; jè Nainá xi tíjnandaà nga koiindaajiiin-la xita xi títsajnakon kò xi jye k'en.

⁶ Koií kjoa-la nga k'oa tis'ín kis'enojmí-la 'én ndaà-la Nainá xi kjoa ts'e Cristo jñà xita xi jye k'en, mé-ne nas'ín jñà yijo-la kisikjeiin kjo'in koni s'ín bindaajiiin xita isò'nde, tanga jñà inima-la títsajnakon-né nita kjé-ne koni s'ín tíjnakon kjit'aà Nainá.

⁷ Jyeé tímachraña nga kjoehet'aà isò'nde, koií kjoa-la jñò, ndaà titsajnakoo kjohítsjeèn-nò; kjit'aà naxhrjein títsi'ba-là Nainá.

⁸ Jè xi tjina ítjòn, jè-né nga 'ñó tjòcha t'een xinguioo. Tsà tjín-nò kjoatjòcha, komaá sijcháat'aà-là jé-la xinguioo.

⁹ Chjoétjò xita xinguioo k'e nga bijchókon-nò tsà mejèn-la nga sikkáya ya ni'ya-nò. Tsja t'è-la inima-nò; kì ch'o chibàya-nò.

¹⁰ Nga jngoò ìjngoò, koni s'ín tjín kjondaà xi kitsjaà-nò Nainá, k'oas'ín tisikòò xinguioo nga ndaà tichjeén, nga kjin skoya tjín-ne kjondaà xi kitjoé-nò.

¹¹ Jè xita xi k'oas'ín kits'ii-la nga 'én-la Nainá kichjaya, k'oaá s'ín kàtichjaya koni tsò 'én-la Nainá. Kò jè xita xi k'oas'ín kits'ii-la nga sikká, k'oaá s'ín kátasíxá koni tjín nga 'ñó xi tsjá-la Nainá. Nita mé xi s'een, k'oaá s'ín t'een mé-ne nga it'aà ts'e Jesucristo jeya kína-ne Nainá. Nga ts'eé Cristo jè kjoajeya kò ngats'ii nga ñó xi tjín skanda nita kjé-ne. K'oas'ín kátama.

Sikjiaán kjo'in nga xita-la Cristo 'mì-ná

¹² Jñò ndí 'ndsè xi matsjake-nò, kì maxkón-nò nga 'ñó 'in tjín kjoa xi nchrobánè-nò nga tíchit'aà-nò.

¹³ Ta saá kátas'e-nò kjotsja nga tíhoko chiba-nò kjo'in ts'e Cristo, mé-ne nga tikoá s'e-nò kjotsja k'e nga jcha-la kjoajeya-la Cristo.

¹⁴ Jñò, mé ta ndaà-nò k'e nga tsà xita kotít'aà-nò xi kjoa ts'e Cristo nga jè kjoajeya-la Inima Tsjeè-la Nainá yaá tíjnakò-nò.

15 Tsà kjo'in tìtsanìkjioón, chítsejèn-là yijo-nò, a koií kjoa-la nga ch'o 'nè, nga xìta nìk'eèn, nga chijé 'nè, nga chingájìin chingá'a kjoa. Kì k'oaá tjín jé xi binchaàtsjioò.

16 Tanga tsà kjo'in tìtsanìkjioón nga xìta-la Cristo maá, kì masobà-nò; ta saá jeya tìkìjna Nainá nga xìta-la tsò-nò.

17 Jyeé ijchò nachrjein nga kots'ia nga sindaàjìin-la xìta naxandá-la Nainá. Tsà jñá tìmats'ia ítjòn kò-ná, ¿mé xi komat'in jñà xìta xi mìkìi síkitasòn 'én ndaà-la Nainá?

18 Jè xi xìta kixì, chjá koma-la nga kìtjokàjìin kjo'in.

¿Kòs'in komat'in jñà xìta xi mìkìi beèxkón Nainá kò xi jé ótsji?

19 K'oaá ma-ne, jñà xìta xi kjo'in síkjeiín nga kòs'in mejèn-la Nainá, kì bíkjoàn-la nga ndaà s'in. Jè Nainá kàta'ñót'aà takòn nga jè kàtasíkinda, nga jè tsibíndaà jñà xìta kò jè síkitasòn-né koni s'in tsjá tso'ba.

5

Jñà xìta jchínga xi xá ítjòn tjín-la ya naxandá-la Nainá

1 Sìjét'aà-la jñà xìta jchínga xi xá ítjòn tjín-la nga ya síxájìin-nò ya naxandá-la Nainá. Tìkooá 'an, xìta jchínga-ná nga xá ítjòn tjín-na koni jñà xìta koi; kìtseè-ná kjo'in xi kis'e-la Cristo; tìkooá s'eé-na kjoajeya xi ìskan jcha-la.

2 Tìkindaa jñà xìta-la Nainá xi jñò kjòngatsja koni tsà orrè; kì kjo'ñó 'nè-là yijo-nò; kooó kjondaà-nò nga tìkindaa koni s'in mejèn-la Nainá. Mìtsà koií kjoa nga tse tòn síkijneè. Tà kooó kjotsja-nò nga k'oa t'een.

3 Kì yatoòn-jèn jñà xìta xi jñò mangatsja koni tsà nei-la ma. Jñò tìncha ítjòn-là, takó-la ndiyá-la Nainá mé-ne koma skíngui-nò.

4 Mé-ne k'e nga kjoíi ìjngòò k'a jè Paxtò ítjòn, tjoé-nò kjoajeya-la Nainá koni jngòò corona xi mìkìi fehejno ote-la nìta kjé-ne.

5 Tìkoa jñò xi ìxti xongó 'mì-nò, tìkitasòn-là jñà xìta jchínga xi otíxoma ya ìjìin naxandá-la Nainá. Ngats'ioò, indaàkjoa tanguíkoo xinguiòo, nga:

Jè Nainá kondraá tìjna-la jñà xìta xi 'nga ikon;

koa jñà xìta xi indaàkjoa tjín inìma-la, tsjá-la kjondaà.

6 Nangui tìtsajna-là Nainá nga tse nga'ñó tjín-la koni s'in síkò-nò, mé-ne k'e nga kìjchò nachrjein jè Nainá 'nga sìkìtsajna-nò.

7 Tsja Nainá tìkìtsajnaya ngats'ìi kjoa xi makájno-nò nga jè tísíkinda-nò.

8 Tìkindaa yijo-nò, kjit'aà nachrjein tìtsajnandaà, nga jè xìta nejí xi kondra-nò, k'oaá s'in tsóbandiì-nò k'oaá ngaya-la koni jngòò xa xi tìkjindáya nga 'ñó ijò-la, nga tìhótsji yá xi skìne.

9 Nga ndaà mokjeiín-nò, 'ñó tìncha-là xìta nejí. Nga jyeé tìjìin-nò nga jñà xìta xinguiòo xi tìtsajna nga tìtsa ìsò'nde, tìkooá k'oaá tjín kjo'in xi nchisíkjeiín.

10 K'e nga jye koto chiba nachrjein nga tìtsanìkjioón kjo'in, jè sobà Nainá sìindaàya-nò, sìikìjnandaà-nò, tsjá-nò nga'ñó, kò kixì sìkìtsajna-nò. Tìjé-ne Nainá xi kò kjoatjòcha-la kìichja-ná nga s'e-ná kjoajeya-la nìta kjé-ne nga Jesucristo tìtsajnakoá.

11 Ts'eé Nainá ngats'ìi nga'ñó xi tjín skanda nìta kjé-ne. K'oaas'in kàtama.

Xi fehet'aà-ne, Pedro síhixat'aà xìta

12 Silvano, xi 'ndsè xan-la, nga kixì tjín xá-la, jè kìsìchját'aà-na nga kiskìi-nò xojon carta jè. K'oaá s'in tìbìnè-nò kò tìsìkixiya-nò nga ngats'ìi 'én xi tìsìkasén-nò, nguì k'oaá s'in tjín kjondaà-la Nainá. Kixì tìtsajnakoo kjondaà koi.

13 Nchisìhixat'aà-nò jñà xìta naxandá-la Cristo xi ì tìtsajna Babilonia xi xó taña kitjaajìin-nò. Kò jè Marcos xi kì'ndí-na xan-la ít'aà ts'e Cristo, tìkooá tìsìhixat'aà-nò.

14 Tìixot'aà xinguiòo nga nguì kò inìma-nò.

Kàtas'e-la kjoa'nchán ìjìin inìma-nò ngats'ioò xi ya nokjoà-nò ít'aà ts'e Cristo. K'oaas'in kàtama.

Xojon carta xi ma-ne jò xi kiskiì San Pedro

Kó tsò Pedro nga síhixat'aà xità

¹ 'An, xi Simón Pedro 'mì-na, nga 'an xi chí'nda-la Jesucristo ma, kò nga tìkoa 'an tsibíxáya-na, tìsikasén-nò xojon jè, jñò xi ngàsòn 'ñó ndaà mokjeiín-nò koni s'ín mokjeiín-najen; nga xità kixi-né jè Jesucristo xi Nainá ma kò xi ochrjekàjiin-ná kjo'in.

² Koni s'ín nga ìsa ndaà titsayaxkon Nainá kò jè Jesucristo xi otíxoma-ná, k'oaá s'ín ìsa ndaà kàtasakó-nò kjondaà kò kjoa'nchán ya jjiin inima-nò.

Mé xi mochjeén nga s'eén nga ndaà jchaxkoán Nainá

³ Jè nga'ño-la Nainá tsjá yije-ná xi mochjeén-ná nga titsajnakoaán kò nga ndaà yaxkoaán Nainá. Koií kjoa-la nga tsjá-ná ngats'ì kjondaà koi nga yaxkoaán jè xi kò kjoajeya-la kò nga'ño tsjeè-la kiichja-ná.

⁴ It'aà ts'e kjoa koi, kitsjaà-ná kjoa xi 'ño ndaà tjín kò xi 'ño tse chjí-la koni s'ín kitsjaà tso'ba Nainá, mé-ne nga tìkoa kokot'aà-ná nga k'oas'ín s'eén koni s'ín s'ín Nainá nga jye chinchat'aaxìn-là kjoa xi ch'o síjé yijo-ná jì isò'nde xi ta síkíts'ón-ná.

⁵ K'oaá ma-ne, 'ño tìnè-là yijo-nò jñà kjoa koi. Koni s'ín nga mokjeiín-nò it'aà ts'e Cristo, k'oaá tìs'ín mochjeén-né nga ndaà xità kàtama jñò. Nga jye ndaà xità ma, tìkoa mochjeén-né nga kàtas'e-nò xi kjoa chjine.

⁶ Nga jye tjín-nò kjoa chjine, tìkoaá mochjeén-né nga kixi tatixoma-là yijo-nò. Kò nga jye kixi otíxoma-là yijo-nò tìkoa mochjeén-né nga s'e-nò kjoatsejta. Kò nga jye tjín-nò kjoatsejta, tìkoaá mochjeén-né nga nguì ndaà chaxkón Nainá.

⁷ Nga jye ndaà yaxkón Nainá, tìkoa mochjeén-né nga ndaà tìtsjacha xinguioo. Kò nga jye ndaà matsjacha xinguioo, tìkoaá mochjeén-né nga nguì ndaà tìtsjacha ngats'ì xità xi kj'eíí.

⁸ Jñò, tsà tjín-nò kjondaà koi, kò tsà kjit'aà nachrjein tìk'aasòn-nò, mì jyò kitsajnaà; nguì ndaà kochjeén-nò nga ìsaá ndaà jchaxkoón Jesucristo xi otíxoma-ná.

⁹ Tanga tsà tjín i'nga xi tsjìn-la kjondaà koi, k'oaá ngaya-la koni xità xkan xi mìkiì ndaà tsejèn-la; jyeé kijchàajiin-la nga Nainá jye kisijchàat'aà-la jé xi kis'e-la nga sa ítjòn.

¹⁰ K'oaá ma-ne, jñò, ndí 'ndsè, ìsa 'ño tjii-là nga'ño yijo-nò nga tìkixiyaa kjoa nga Nainá xó k'oaá s'ín kiichja-nò kò jaajiin-nò. Tsà k'oas'ín s'een kjit'aà, nímé jé skajñò.

¹¹ Nga k'oaá s'ín koma nga táx'a'nde-nò nga kitjás'een ñánda tíhotíxoma nità kjé-ne jè Jesucristo xi ochrjekàjiin-ná kjo'in kò xi otíxoma-ná.

¹² Koií kjoa-la kjit'aà nachrjein síkítsjeèn yije-nò kjoa koi, nas'ín jye ma-nò kò jye kixi titsajnakoo jè kjoakixi-la Nainá koni s'ín mokjeiín-nò nachrjein i'ndeí.

¹³ K'e nga tákó tjinaakon-ìsa jì isò'nde jè, mochjeén-né nga síkítsjeèn-nò nga kos'ín tijchá yijo-nò.

¹⁴ Jè Jesucristo xi otíxoma-ná jyeé k'oas'ín kitsò-na nga jyeé kjòchrañat'aà nga kjoehet'aà nachrjein-na.

¹⁵ Tìkoaá 'an tìbìnè-la yijo-na nga tìsíkítsjeèn-nò mé-ne k'e nga 'an xi jye kiyá, nga nachrjein nchijòn k'oaá s'ín tìkítsjeèn kjoa koi.

Ñánda j'ì-ne 'én xi jtít'aà Xojon-la Nainá

¹⁶ Nga mìtsà ta cuento xi ta xità kisíkítsjeèn koni s'ín tsibenojmí-nòjen kó kji nga'ño kis'e-la Na'èn-ná Jesucristo kò nga kjoíí lñgoò k'a. Nga xkoón ki'ya-najen kjoajeya-la nga 'ño tse nga'ño tjín-la.

¹⁷ Ki'ya-nájen k'e jè Nainá xi Na'èn-ná nga jeya kò 'nga kisíkijna Jesucristo. Kina'yà-la ya jjiin isén ñánda 'ño ote kji 'én xi kitsò: “Jè jèe xi ki'ndí-na xi 'ño matsjake nga xó 'an jaajiin-na.”

18 Ngajen sobà kina'ya-lajen jñà 'én xi ngajmiì inchrobà-ne k'e nga titsajnakò-jen Jesucristo ya isò'nga nindoò tsjeè-la.

19 Nga yije kjoa koi, k'oaá s'ín isa ndaà makixiya koni s'ín kiichja jñà xita xi kiichja ngajo-la Nainá. 'Nó ndaà 'nè nga na'ya-la 'én koi. K'oaá s'ín ngaya-la koni jngoò ni'ín xi síhiseèn ya i'nde ñánda jñò choòn skanda k'e nga s'e isén, ikjoàn síhiseèn-jìin inima-ná koni jè ni'ño tse.

20 Itjòn k'oa s'ín ndaà kàtasijìin-nò, jñà 'én xi tjt'aa Xojon-la Nainá, mìtsà ta jngoò xita kitsjaà kjohítsjeèn-la nga kitjei.

21 Nga jñà xita xi kiichja ngajo-la Nainá, nijngoò 'én xi ta kjohítsjeèn ts'e nga kiichjaya. Jé Inima Tsjeè-la Nainá kisikichiya-la kjohítsjeèn-la xita koi nga komà kiichjaya 'én-la Nainá.

2

Xita ndiso xi okóya 'én xi mìtsà kixi kjoa (Judas 4-13)

1 Ya jìin naxandá Israel kis'e xita ndiso xi kitsò nga 'én-la Nainá kiichjaya, tanga mìtsà kixi kjoa. It'aa tsajòn, k'oaá tis'ín s'e xita ndiso xi kokóya'ma kjohítsjeèn xi síkíts'ón-jìin-la xita naxandá-la Nainá, skanda kochrjengui jè Na'èn-ná xi tsibíhjtì-ná. K'oaá ma-ne nga jñà xita koi, tijnà nchihótsji-la kjoabiyaà yijo-la nga ta nitoón jchija.

2 'Nó kjin xita kjitjingui-la nga k'oas'ín s'iin kjoa xi 'ño ch'o tjin. Koi kjoa-la xita ndiso koi, nga ch'o kiná'ya-la kjoa ts'e ndiyá kixi.

3 Jñà xita ndiso koi, ta toón tse mejèn-la; kochrjekájno-nò ton nga skónachan-nò nga kokóya-nò 'én ndiso. Nainá, jyeé kjõtseé tjindaà-la nga tsjá-la kjo'in kò mikiì kojno-la kjo'in xi s'e-la.

4 Nga Nainá mikiì kisijchàat'aà-la jñà àkjale xi tsohótsji jé. Ján kiskinjìin i'nde kjo'in ñánda títi ni'ín. Na'ño kicha cadena tsibít'aà'ño. Yaá kisikítsajna ngajo ñánda jñò choòn, skanda jè nachrjein k'e nga sindaàjìin.

5 Nainá, tikoáá mikiì kisijchàat'aà-la isò'nde xi kisijna kjõtseé; kisikasén jtsí xkón xi kisikjehesòn yije xita xi kis'e nachrjein koi. Tà jè Noé kisijchàat'aà-la, koi kjoa-la nga 'én kixi kiichjayajìin-la xita, kò itoò xita xíkjín tsiningui-ne.

6 Nainá tikoáá kisikjehesòn yije xita ts'e naxandá Sodoma kò Gomorra. Jngoò k'aa tsaká, ta chijo kisinchaà. K'oaá s'ín tsibíjna jngoò-la chiba nga k'oaá tis'ín komat'in jñà xita xi kondra títsajna-la Nainá.

7 Tanga jè Lot nga xita kixi, itjokàjìin kjo'in. 'Nó ch'o komà-la kjoa ts'e jé xi nchis'ín jñà xita naxandá koi.

8 Xita jè nga xita kixi-né, nga ya tijnajìin-la jñà xita koi nga ch'o nchis'ín, kjo'ín tísikjeín nga 'on ma-la inima-la nga nachrjein nchijòn beè koa 'nchré-la kjoa xi ch'o nchis'ín xita koi.

9 Yaá tí'ya-la nga jè Na'èn-ná osìko-né jñà xita xi beèxkón nga síkítsajnadeíí mé kjoa xi tjin-la, tikoá síkítsajna'ño-né jñà xita xi ch'o s'ín nga tsjá-la kjo'in jè nachrjein k'e nga sindaàjìin.

10 Jñà títsajna itjòn nga s'e-la kjo'in jñà xita xi 'ño fitjingui-la kjoa ch'o xi síjé yijo-la kò jñà xi ochrjekàngui kjotíxoma-la Nainá.

Jñà xita ndiso koi, xita tájaàjìin nga 'ño 'nga ikon. Mikiì tsakjón nga chjajno-la jñà nga'ño xi mikiì tsejèn.

11 Jñà àkjale, nas'ín isa tse nga'ño tjin-la koa tjin-la kjotíxoma, mì k'oaá s'ín chjajno-la nga'ño xi mikiì tsejèn nga nguixkon Na'èn-ná.

12 Jñà xita koi, chjajnoó-la kjoa xi mikiì fiya-la. K'oaá s'ín ngaya-la koni cho xi mikiì síkítsjeèn nga tà xó k'oaá s'ín kits'iin-ne nga kindoba'ño ikjoàn sík'en. Xita koi, yaá kiyajìin kjoa ts'e jé-la.

¹³ Koií kjo'in tjoé ngajo-la koni tjín kjo'in xi kitsjaà-la xita xi kjeíí. Jñà xita koi, nas'ín nachrjein, tsjaá ma-la nga s'ín kjoa xi 'ñó ch'o tjín. K'e nga jñà xita koi, báhihtako-nò tsà s'eí tjín-nò, síkíts'ón-jüin-né nga sísobà-nò nga ch'o tjín kjoa xi s'ín.

¹⁴ K'e nga beèxkon jngoò chjoón, nitoón fahajün-la ko mìkiì ma síkijna kjoa ts'e jé. Konachan-la xita xi mì kixíí tjín kjo'hítsjeèn-la. Inima-la, kjit'aà nachrjein tjín mé xi mejèn-la. Xita koi, tjínè-la nga kjo'in tjoé-la.

¹⁵ Jyeé kisikijna ndiyá kixi. Jè fitjngui-la ndiyá xi ch'o tjín, jè ndiyá ts'e Balaam, ki'ndí-la Beor, jè xi 'ñó kjòtsjakeè ton nga mejèn-la s'üin kjoa xi mìtsà kixi tjín.

¹⁶ Tanga tsaká-la kjoa ts'e jé-la. Jngoò búrró chjoón xi mìkiì ma-la chja, kiichja-la koni tsà xita; mìkiì kitsjá'nde-la nga kiìko-isa kjoaská-la.

¹⁷ Jñà xita ndiso koi, k'oaá s'ín ngaya-la koni ngajo nandá xi tsjün-la nandá, koni ifi xi nímé jtsí fikò, nitoón fikò tjo. K'oaá s'ín tjínè-la nga ya kítsajnajün i'nde jñò ts'e kjo'in nita mé nachrjein-ne.

¹⁸ Nguì 'én 'ngaá chja xi nímé chjí-la. 'Ñó 'nga ikon nga síchjeén kjoach'o xi sasén-la yijo-la nga konachan-la jñà xita xi sa nchibinchat'aaxìn-la jñà xita xi ch'o nchisíjchá yijo-la.

¹⁹ K'oaá tsò-la jñà xita nga kítsajnandejí, tanga tijñà-ne tikoáá yaá títsajnajün'ñó kjoach'o-la. K'e nga jngoò xita xi bíjnajün'ñó jngoò kjoa, jè kjoa jè tjín-la nga'ñó nga jè otíxoma-la.

²⁰ Jñà xita xi jye kijtseèxkon Jesucristo xi otíxoma-ná, nga jè tsachrjekàjün kjo'in, nga jye chinchat'aaxìn-la kjoa ch'o-la isò'nde, tsà ijngoò k'a k'oas'ín s'üin, tsà sükijne ijngoò k'a-la kjoa xi ch'o tjín, nga koma iskan, isaá ch'o komat'in mì k'oa-ne k'e nga sa ítjòn.

²¹ Isaá-la ndaà tjín tsà mìkiì kijtseèxkon ndiyá kixi-la Cristo, mì k'oa-ne nga jye chinchat'aaxìn-la kjotíxoma tsjeè-la Nainá xi jye kitjoé-la.

²² Xita koi, k'oaá s'ín kis'üin koni tsò 'én xi tíjna-la xita xi tjín-la kjoachjine nga tsò: “Nañá, tijè kine ijngoò k'a-ne ndábisò-la” koa: “Jè chinga k'e nga jye ongáya, ijngoò k'a ongáyajün-ne ndási.”

3

K'e nga kjoíí ijngoò k'a Na'èn-ná Jesucristo

¹ Ndí 'ndsè xi 'ñó matsjake-nò, xojon jè, jè xi ma-ne jò nga tikjì-nò. Ingajò xojon koi, k'oaá s'ín binè-nò nga síkítsjeèn kjoa xi nguì kixi tjín;

² mé-ne nga síkítsjeèn-nò jñà 'én xi kjòtseé tsakóya xita tsjeè-la Nainá xi kiichja ngajo-la. Tikoá síkítsjeèn kjotíxoma-la Na'èn-ná Jesucristo xi tsachrjekàjün-ná kjo'in koni s'ín tsakóya-nò jñà xita xi tsibíxáya-la.

³ Jè xi 'ñó mochjeén nga ndaà kátasijün-nò, jñà nachrjein xi sa nchrobá nga jyeé tífehè'taà nachrjein, kjoíí xita xi sísobà-nò ts'e kjoa kixi; yaá kojchájün kjoach'o xi síjé yijo-la.

⁴ Skonangui, kitso-nò: “Nachrjein i'nde, ¿mé-ne mì tíbitasòn-ne 'én xi tíjna xi tsò nga kjoíí ijngoò k'a Cristo? Jyeé kjòtseé k'en xita jchínga-ná, tákó k'oaá choòn skanda kóni nga kisindaà isò'nde.”

⁵ Jñà xita xi k'oa tsò, xó k'oaá s'ín-ne nga síjchàajün nga jñà 'én xi kiichja Nainá nachrjein kjòtseé, jñà kisindaà-ne ngajmü ko nangui. Tijè-ne nandá inchrobà'taà-ne ko tijè tíjnakon-ne.

⁶ Xi komà iskan, tijè-ne 'én-la Nainá ko nandá kisikje-ne isò'nde jchínga k'e nga tsangasòn nandá.

⁷ Tjé-ne 'én xi kitsjaà Nainá k'oaá s'ín tíchja nga jè ngajmü ko nangui ñánda títsajnasóan nachrjein i'nde, títsajnandaà-la mé-ne nga kitjé-ne jè nachrjein k'e nga síndaajün-la xita tikoá kjoehesòn jñà xita xi mìkiì beèxkón Nainá.

⁸ Jñò ndí 'ndsè xi matsjake-nò kì nìchàajìin-jèn kjoa koi: xi it'aà ts'e Nainá, jngò nàchrjein k'oaá ngayala-la koni tsà jngò jmiù nó tjin-ne, koa jngò jmiù nó, Nainá, jngò nàchrjein tsò-la.

⁹ Na'èn-ná mìtsà tísíkichrjein nga sùkitasòn 'én-la koni tsò i'nga xita; tíkoña kjoaá-nò Nainá; jè xi mejèn-la nga nijngò xita jchija, nga kàtasíkájno jé-la nga mì tì jé kohótsji-ne.

¹⁰ Tanga jè nàchrjein-la Nainá, k'oaá s'ín kjoí koni s'ín f'ì xita chijé. Ngajmiù, jngò k'aá jchija k'e nga kiná'ya-la nga ch'o jchán kjone. Jè ts'oi, sá kò ni'ño kiti-ne. Jè nangui kò nita mé xi tjin i it'aà nangui, jngò k'aá kiti.

¹¹ Koni s'ín koma nga jchija ngats'ì tsojmi xi tjin, 'ño mochjeén nga tsjeè sijchá yijo-nò koni s'ín síjé Nainá,

¹² kò nga chíñakjoa-la jè nàchrjein k'e nga kjoí Nainá. Tixátíya-la nàchrjein jè. Kò ngats'ì tsojmi xi tjin isò'nde kò ngajmiù, jngò k'aá kongandá nga kiti.

¹³ Tanga it'aà tsaján, jè titsachiñá-lá ngajmiù xitse kò nangui xitse koni s'ín kitsjaà tso'ba Nainá, ya ñánda s'e kjoa kixi kò kjondaà.

¹⁴ Koi kjoa-la jñò ndí 'ndsè xi matsjake-nò, nga k'oa tjin kjoa xi titsachiñá-la, tjiù-la nga'ño yijo-nò, mé-ne k'e nga kjoí jngò k'a Jesucristo, k'oaá s'ín sakòt'aà-nò nga 'nchán kitsajnaà nga tsjeè titsanìchá yijo-nò kò nimé jé tjin-nò.

¹⁵ K'oaá s'ín kàtasijìin-nò, jè kjoatsejta-la Nainá nga tse titsachiñá, jè-né nga kitjokàjìin kjo'in jña xita. Jè 'ndsè Pablo xita xinguiáá xi 'ño matsjachaá, tikoáá jye isa kiskii-nò koni s'ín tjin kjoachjine xi kitsjaà-la Nainá.

¹⁶ Nga jngò jngò xojon carta xi kiskii Pablo, k'oaá s'ín tíchja kjoa koi. Tanga tjin i'nga xi 'ño 'in chja, mìkii ndaà machiya-ná kó tsòya-ne. K'oaá ma-ne jña xita xi mìkii ndaà fíya-la kò xi mì kixi tjin kjohítsjeèn-la, síkjatjía-la 'én. K'oaá tì síko jña Xojon-la Nainá xi kiskii xi k'ejí xita. K'oaá ma-ne jña xita xi koasíko 'én-la Nainá, tijnà nchihótsji-la kjo'in yijo-la.

'Én xi fehet'aà-ne

¹⁷ K'oaá ma-ne, jñò ndí 'ndsè xi matsjake-nò, nga jye ndaà tjiùin-nò kjoa koi, tikindaa yijo-nò, mé-ne nga mì skónachan-nò jña xita xi ch'o s'ín nga xìn ndiyá kùko-nò xi mì kixi tjin kò yaá jchija nga kixi titsajnakoo Nainá.

¹⁸ Isáá ndaà kàtasakó-isa-nò kjondaà-la kò kjohítsjeèn-la Jesucristo xi otíxoma-ná nga jè ochrjekàjìin-ná kjo'in. Jeya kàtijna i'ndeì kò nita mé nàchrjein-ne. K'oaá s'ín kàtama.

Xojon carta xi kiskiì ítjòn San Juan

Jesús, jè 'Én xi síkíjnakon iníma-ná

¹ Jè Jesús, jè 'Én xi síkíjnakon-ná xi tíjna skanda tisa tàts'en-la kjoa. Tanga i'ndeí, jyeé kina'yà-lajen, kò xkoón ki'ya-najen, kichítsejèn-lajen kó kji, tikoáá ndsaá kinìkò-najen.

² Jè 'Én jè, ki'ya tsejeén-la. Kò ki'ya-najen. Kò nguì kjoa kixi-né xi bènojmi-jen xi it'aà ts'e. Kò tikoáá bènojmiya-nòjen jè 'Én xi síkíjnakon iníma-ná nita kjé-ne. Jè 'Én jè, k'e nga tisa ítjòn, yaá tíjnat'aà-la Nainá. Tanga i'ndeí, jyeé tsatsejèn-najen.

³ Bènojmi-najen kjoa xi ki'ya-jen kò xi kina'yà-jen, mé-ne jñá, k'oa tís'in ngásòn kitsajnaakoáá, koni s'in ndaà titsajnaakoáá Nainá xi Na'én-ná ma, kò Ki'ndí-la xi Jesucristo.

⁴ Koií xá titsachjiì-nòjen Xojon jè mé-ne nga nguì kò kjotsja kàtasakó kjit'aà-la iníma-ná.

Jè Nainá kjoa iseèn-né

⁵ K'oaá s'in tíjn jñá 'én xi tsakóya-najen Jesucristo, kò koií-né xi nokjoàyajììn-nòjen: Jè Nainá, kjoa iseèn-né. Xi it'aà ts'e, tsjìn xi kjoa jñò.

⁶ Tsà kixoán nga ndaà titsajnaakoáá Nainá, tanga tsà yaá titsanjichá yijo-ná ya ñánda jñò choòn, ñánda tíjn kjoach'o, 'én ndisoó titsanokjoá; mìtsà kjoa kixi xi tisa'né.

⁷ Tanga tsà ya titsajnaá ñánda iseèn choòn, koni jè Nainá yaá tíjna ñánda iseèn choòn, ndaà titsajnaakoáá xinguiáá, kò jè jní-la Jesucristo xi Ki'ndí-la Nainá ma, sítsjeé yijeé jñá jé xi tíjn-ná.

⁸ Tsà kixoán: “Tsjìn-na jé”, tíjñá titsachonachan-lá yijo-ná; mìtsà kjoa kixi xi titsanokjoá.

⁹ Tanga tsà kénojmi yije-lá Nainá jñá jé xi tíjn-ná, komaá jè kjót'aàtakoán nga sijnchàat'aà-ná jé-ná tikoáá sìtsjeèya-ná ngats'ìi kjoa xi ch'o 'né. Nga jè Nainá síkitasòn 'én-la, kò nguì kjoa kixi xi s'in.

¹⁰ Tanga tsà kixoán: “Kj'eè tsà jé otsjià”, jè Nainá ndisoó titsanachrjekànguiaá, kò mìtsà kixi kjoa nga mokjeíìn-ná jè 'én-la.

2

Yá xita xi chjatjì-ná ya nguixkon Nainá

¹ Jñò xi koni tsà ndí ixti-na xan-nò, koií xá tikjiì-nò Xojon jè, mé-ne nga mì tí jé kinchàtsji-lá yijo-nò. Tanga tsà tíjn jngoò xita xi tíhótsji jé-la yijo-la, jè Nainá sijnchàat'aà-la, nga tíjna jngoò-ná xita xi chjatjì-ná ya nguixkon Nainá, jè xi 'mì Jesucristo xi nguì xita kixi.

² Jesucristo kitsjaà kjotjò yijo-la nga k'en ngajo-ná, mé-ne koma sijnchàat'aà-ná jñá jé-ná, tanga mìtsà tà jñá xi sijnchàat'aà-ná; tikoáá sijnchàat'aà yijeé-la ngats'ìi xita xi tíjn nga tíjtsa isò'nde.

³ Tsà ndaà síkitasoán kjotixoma-la, maá kíjngoò-lá takoán nga jyeé ndaá yaxkoaán.

⁴ Tsà tíjn xita xi tsò: “An, jyeé ndaà bexkoan Nainá”, tanga tsà mìkiì ndaà síkitasòn kjotixoma-la, xita ndiso-né; tsjìn-la kjoa kixi.

⁵ Tanga tsà ndaà nikitasoán koni tsò 'én-la, jyeé 'ñó ndaà tíjn-ná kjotsjacha-la Nainá kò k'oaá s'in ma-ne nga 'ya-la nga kixi kjoa nga jè Cristo titsajnaakoáá.

⁶ Jè xita xi tsò nga ya tíjnako Cristo, mochjeén-né nga k'oa's'in kàtasíjchá yijo-la koni s'in kis'ìin Jesucristo.

Kjotixoma xitse

⁷ Jñò ndí 'ndsè, jè kjotíxoma xi tìkjiì-nò, mìtsà nguì kjotíxoma xitse; tije-ne kjotíxoma xi kits'iì-nò k'e nga sa ítjòn k'e nga tisa kòkjeiín-nò. Jè kjotíxoma jchínga jè, tije-ne 'én xi kina'ya jñò nga tisa ítjòn.

⁸ Tanga ì'ndeì k'oaá s'ín tìkjiì-nò koni tsà jngoò kjotíxoma xitse. Nga ìt'aà ts'e Cristo ki'ya-la nga xitse-né kò tìkoaá tí'yaá-la xi ìt'aà tsajòn. Nga jyeé tífahato kjoa xi jñò choòn, kò jyeé tí'ya-la xi nguì kjoa iseèn-la Nainá.

⁹ Tsà jngoò xita k'oas'ín títso nga k'oaá s'ín tísíjchá yijo-la koni s'ín tjin kjoa iseèn-la Nainá, tanga tsà majtikeè xíkjin xi tìkoa ìt'aà ts'e Cristo mokjeiín-la, mìtsà kixi kjoa nga iseèn tísíjchá yijo-la, takó yaá tijnajìin ñánda jñò choòn.

¹⁰ Jè xita xi matsjakeè xita xíkjin xi tìkoa ìt'aà ts'e Cristo mokjeiín-la, k'oaá s'ín tísíjchá yijo-la koni s'ín tjin kjoa iseèn-la Nainá. Jè xita jè, mìtsà tì mé tjin-ne xi ma kohótsji jé-la.

¹¹ Tanga jè xita xi majtikeè xita xíkjin xi tìkoa ìt'aà ts'e Cristo mokjeiín-la, yaá tjna, kò yaá tsó'baya ya ndiyá ñánda jñò choòn. Mikiì beè ñánda tífi, nga jè kjoa jñò, bíchjoà xkon.

¹² Jñò xi ndí ixti 'mì-nò, tìkjiì-nò Xojon jè, nga ìt'aà ts'e Cristo-né nga jye kisiýchàat'aà-nò Nainá jña jé xi tjin-nò.

¹³ Jñò xi xita jchínga 'mì-nò, tìkjiì-nò Xojon jè, nga jyeé kiyaxkoòn jè Jesucristo xi tjna skanda tisa tàts'en-la kjoa. Jñò ixti xi sa títanìjchá yijo-nò, tìkjiì-nò Xojon jè, nga jyeé kinikijne-la jè xita neíí. Jñò xi ndí ixti 'mì-nò, jyeé kiskii-nò Xojon jè nga jye kiyaxkoòn Nainá xi Na'èn 'mì-laà.

¹⁴ Jyeé kiskii-nò xojon, jñò xi xita jchínga 'mì-nò, koií kjoa-la nga jyeé kiyaxkoòn Jesucristo xi tjna skanda tisa tàts'en-la kjoa. Tìkoaá jyeé kiskii-nò jñò ixti xi sa títanìjchá yijo-nò, koií kjoa-la nga tjin-nò nga'ño kò jyeé ya tijnajìin inima-nò jè 'én-la Nainá kò jyeé kinikijne-la jè xita neíí.

¹⁵ Kì jña matsjacha jña kjoa xi tjin isò'nde. Tsà yá xita xi matsjakeè jña kjoa xi tjin isò'nde, mìtsà kixi kjoa nga matsjakeè Nainá xi Na'èn 'mì-laà.

¹⁶ Ngats'iì kjoa ch'o xi jè isò'nde bí't'aà-ná, mìtsà ya nchrobá-ne ìt'aà ts'e Nainá xi Na'èn 'mì-laà. Tíyaá tísindaà-ne ì isò'nde. Jña kjoa ch'o koi, xi tjin isò'nde: jña-né kjoa ch'o xi síjé yijo-ná, kjoa xi tsejèn-la xkoaán nga mején-ná tsaján koma, kò kjoa 'nga takòn xi ts'e kjoa nchiná.

¹⁷ Ngats'iì kjoa ch'o xi tjin isò'nde, kò kjoa xi ya fahajìin-ná, jyeé tífehèt'aà, tanga jè xita xi síkitasòn koni s'ín mejèn-la Nainá, kíjnakon-né nita kjé-ne.

Jè xi kjoa kixi kò kjoa ndiso

¹⁸ Jñò xi ndí ixti xan-nò, jyeé tífehèt'aà nachrjein. Jyeé tjiin-nò nga kjoíí jngoò xita xi nguì kondra tjna-la Cristo. Kò nachrjein ì'ndeì jyeé 'ño kjin ma-ne xi kondra nchifi-la Cristo. K'oaá ma-ne nga k'oas'ín machiya-ná nga jyeé tífehèt'aà nachrjein.

¹⁹ Jña xita koi, tì íí itjokàjìin-ná, tanga xi kjoa kixi, mìtsà nguì xita tsaján ma; tsà kixi kjoa nga xita tsaján, íí-là títajnakò-ná. Tanga koií k'oas'ín itjokàjìin-ná jña xita koi mé-ne nga ndaà kàta'ya-la nga ngats'iì xita xi k'oas'ín kondra fi-la Cristo, mìtsà nguì xita tsaján.

²⁰ Jè Jesucristo, xi xita tsjeè, jyeé kitsjaà-nò jè Inima Tsjeè-la Nainá; k'oaá ma-ne nga ngats'ioò jyeé ndaà tjiin-nò kós'ín tjin xi kjoa kixi.

²¹ K'oaá ma-ne nga k'oas'ín tìkjiì-nò xojon jè, nga jyeé ndaà tjiin-nò xi kjoa kixi; mìtsà koi-ne nga kj'eè tjiin-nò. Kò jyeé ndaà tjiin-nò nga nijngoò 'én ndiso xi ya nchrobát'aà-ne ìt'aà ts'e kjoa kixi.

²² ¿Yá-ne xi xita ndiso? Jè-né xi bí'ma nga tsò: “Jè Jesús mìtsà jè xi Cristo, [mìtsà Nainá kisikasén].” Jè xita jè xi kondra fi-la Cristo nga jngoò k'a mìkii mokjeiín-la ìt'aà ts'e Nainá xi Na'èn-ná ma kò ìt'aà ts'e Jesucristo xi Kí'ndí-la Nainá ma.

²³ Ngats'iì xita xi jngoò k'a mìkii mokjeiín-la ìt'aà ts'e Kí'ndí-la Nainá, mìtsà Nainá xi Na'èn-ná ma tijnako. Tanga jè xita xi mokjeiín-la tìkoa tsjá 'én-la nga jè Jesús, jè xi Kí'ndí-la Nainá, yaá tijnako Nainá xi Na'èn-ná ma.

²⁴ Koií k'oas'ín xan-nò, ndaá kàtasijìin inìma-nò jè 'én xi it'aà ts'e Cristo xi jye kina'yà nga tisa tàts'en-là kjoa. Tsà k'oas'ín ndaà sijìin inìma-nò, tìkoáá ndaá kìtsajnakoo Nainá xi Na'èn-ná ma kò Ki'ndí-là.

²⁵ Jesucristo k'oaá s'ín kitsjaà 'én-là nga tsjá-ná kjoabinachon xi mìkiì fehet'aà nita kjé-ne.

²⁶ Koií xá tikjìl-nò xojon jè mé-ne nga ma jchaxkon-nò jñà xi mejèn-là konachan-nò.

²⁷ Tanga jñò, jyeé tíjìin inìma-nò jè Inìma Tsjeè-là Nainá xi kitsjaà-nò Jesucristo. Mì tì kii mochjeén-ne tsà yá xi kòkòya-nò. Nga tíjè-ne Inìma Tsjeè-là Nainá keènojmiya-nò kós'ín tíjìn ngats'ìi kjoa xi ndaà tíjìn. Koni s'ín kòkòya-nò, 'én kixi-né, mìtsà 'én ndiso. K'oaá s'ín ndaà titsajnakoo kjit'aà Jesucristo, koni s'ín síkíchiya-nò Inìma Tsjeè-là Nainá.

²⁸ Jñò xi ndí ixti xan-nò, k'oaá s'ín ndaà titsajnakoo Cristo, mé-ne nga 'ñó tíjìn-ne takoán kò mìkiì kosobà-ná k'e nga jè xi kítjojen ìjngòò k'a-ne ngajmii.

²⁹ Koni s'ín jye tíjìin-nò nga jè Cristo, xita kixi-né nga nguixkon Nainá, k'oaá tìs'ín ndaà kàtasijìin-nò, nga ngats'ìi xita xi kjoa kixi s'ín nga nguixkon Nainá, ki'ndí-là Nainá-né.

3

Ixti-là Nainá

¹ Ndaà kàtasijìin-nò, 'ñó ndaà matsjakeè-ná Nainá xi Na'èn-ná ma, k'oaá ma-ne nga ixti-là tsò-ná. Kò nguì kixi kjoa nga ixti-là Nainá 'mì-ná. K'oaá ma-ne nga jñà xita isò'nde, mìkiì mokjeiín-là tsà ixti-là Nainá 'mì-ná, koií kjoa-là nga jñà xita koi, mìkiì mokjeiín-là it'aà ts'e Nainá.

² Jñò ndí 'ndsè xi matsjake-nò, j'ndeì jyeé ki'ndí-là Nainá 'mì-ná. Tanga kj'eè tsà ndaà okó-ná Nainá kó kjoàn komaá nga koma iskan. Tanga jyeé tíjìin-ná nga k'oa tì kjoàn komaá koni kji jè Jesucristo k'e nga kijchò nachrjein nga jè xi kjoí ìjngòò k'a-ne; nga k'oaá s'ín jchaxkoaán koni kji jè.

³ Ngats'ìi xita xi k'oas'ín nchikoña nga k'oaá s'ín kjoàn koma koni kji jè Jesucristo, nachrjein nchijòn-né nga tsjeè nchisíjchá yijo-là koni s'ín nga xita tsjeè jè Jesucristo.

⁴ Ngats'ìi xita xi ótsji jé, kondraá fì-là kjoatíxoma-là Nainá. K'e nga jé binchaàtsjiaá, jé kjoatíxoma-là Nainá tìnáchrjenguaá.

⁵ Jñò, jyeé tíjìin-nò nga jè Jesucristo koií xá j'ìi-ne nga jè faáxìn-ná jñà jé xi tíjìn-ná. Kò 'ya-nò nga jè Jesucristo, nímé jé tshótsji.

⁶ Ngats'ìi xita xi Cristo títsajnakoo, mìtsà jé ótsji; tanga jñà xita xi ótsji jé, kj'eè kii beèxkon kò tìkoá mìkiì tíjìin-là yá-né xi 'mì Jesucristo.

⁷ Jñò, xi ndí ixti-na xan-nò, kii kii bìl'nde tsà yá xi skónachan-nò. Jè xita xi kjoa kixi s'ín nga nguixkon Nainá, xita kixi-né, koni xita kixi jè Cristo.

⁸ Tanga jè xita xi kjit'aà nachrjein tíhótsji jé, ts'e xita neií-né. Nga jè xita neií, k'oaá s'ín tíhótsji jé skanda tisa tàts'en-là kjoa. Kò koií xá j'ìi-ne Jesucristo xi Ki'ndí-là Nainá nga jè sikixòña jñà kjoa ch'o xi s'ín jè xita neií.

⁹ Ngats'ìi xita xi jye Nainá kisìkijatjìya-là nga ki'ndí-là Nainá ma, mìtsà tìya títsajnajìin-ne jé. Nga jyeé ya tíjnajìin inìma-là jè Inìma Tsjeè-là Nainá. Kò mì tì kii ma kòhótsji-jé-isa, nga jyeé ki'ndí-là Nainá-né.

¹⁰ K'oaá s'ín ma-ne nga yaxkon-là yá-né xi ixti-là Nainá kò yá-né xi ixti-là xita neií; ngats'ìi xita xi mìkiì síkítasòn kjoa kixi-là Nainá, tìkoá mìkiì tsjakeè beè xita xíkjín xi tìkoá it'aà ts'e Cristo mokjeiín-là, mìtsà ki'ndí-là Nainá ma.

Ngàsòn ngáya tsjacha s'eén xinguiáá

¹¹ Nga k'oaá s'ín tíchja jè 'én xi jye kina'yà k'e nga tisa kòkjeiín-nò nga sa ítjòn nga tsò: Ngàsòn ngáya tsjacha s'eén xinguiáá.

¹² Mìkìi k'oas'ín s'eén koni kis'iin jè xita xi ki'mì Caín nga jè xita neíi kiit'aà-la nga kisik'en 'ndse. ¿Mé-ne kisik'en-ne 'ndse? Tà koií kjoa-la nga jè 'ndse, xita kixi-né nga nguixkon Nainá ko jè Caín ch'oo tjin kjoa xi s'ín.

¹³ K'oaá ma-ne k'oas'ín tixan-nò jñò ndí 'ndsè, kì maxkón-nò tsà sijnikeè-nò xita isò'nde xi mìkìi mokjeiin-la 'én-la Nainá.

¹⁴ Jñá jyeé tjiin-ná nga jyeé itjokajñaá ya ndiyá kjoabiyaá xi ya tjaáyaá kjotseé ko jyeé tjin-ná kjoabinachon xi mìkìi fehet'aà nita kjé-ne. Nga jyeé k'oas'ín ndaà matsjachaá jña xita xinguiáá xi tikoá it'aà ts'e Cristo mokjeiin-la. Jè xita xi mìkìi matsjakeè xikjín, ndiyá kjoabiyaá tsóhoya jè inima-la.

¹⁵ Ngats'ii xita xi majtikeè xita xikjín, k'oaá s'ín ngaya-la koni tsà xita sík'en. Jñò, ndaá tjiin-nò, jè xita xi xita sík'en, mìtsà kjoabinachon xi mìkìi fehet'aà tísichájiin yijo-la.

¹⁶ Jñá, k'oaá s'ín 'ya-ná mé xi 'mì kjotsjacha k'e nga jè Jesucristo kitsjaá kjotjò yijo-la nga k'en ngajo-ná. Jñá k'oaá tis'ín mochjeén nga s'eén it'aà ts'e xita xinguiáá koni kis'iin jè Cristo.

¹⁷ Tsà tjin jngoò xita xi tjin-la tsojmì xi tímochjeén kjit'aà-la, tsà skoe jngoò xita xikjín xi tikoá it'aà ts'e Cristo mokjeiin-la nga tsjin-la tsojmì xi mochjeén-la, tsà mìkìi ma-la nga kosiko jè xita xikjín xi it'aà ts'e tsojmì xi tsjin-la, mìtsà kixi kjoa nga kjotsjacha-la Nainá tijnajiin inima-la.

¹⁸ Jñò xi ndí ixti-na xan-nò, titsjacha xinguióo, kì tà 'én nokjoà; ngui ndaá kàta'ya-la kós'ín matsjacha xinguióo nga tísikòò mé tsojmì xi mochjeén-la mé-ne nga kàta'ya-la nga kixi kjoa nga ndaà matsjacha xinguióo.

Nó tjin takoán nga nguixkon Nainá

¹⁹ K'e nga k'oas'ín titsa'né, k'eé jcha-ná nga kixi kjoa nga k'oaá s'ín titsanjchá yijo-ná koni s'ín tjin kjoa kixi-la Nainá ko 'nchán nikjinaá inima-ná nga nguixkon Nainá.

²⁰ Nas'ín jè inima-ná jè tibínè-ná, tanga jè Nainá, isaá ndaà tjiin-la mì k'oa-ne koni jè inima-ná. Nga jè Nainá isaá ndaà tsejèn yije-la ngats'ii kjoa xi titsa'né.

²¹ Jñò ndí 'ndsè xi matsjake-nò, tsà jè inima-ná mìtsà tì mé kjoa ch'o tibínè-ná, 'ñó tjin takoán nga nguixkon Nainá.

²² Tsà mé xi sijé-lá Nainá, maá-la tsjá yije-ná nita mé kjondaà-ne; nga nikitasoán kjotixoma-la, ko k'oaá s'ín 'né koni s'ín sasén-la Nainá.

²³ Jè kjotixoma-la Nainá, jé-né nga ndaà kàtakjeiin-ná it'aà ts'e Jesucristo xi Ki'ndí-la ma, tikoá ngásòn ngáya kotsjachaá xinguiáá koni s'ín jye tsatixoma-ná Cristo.

²⁴ Jè xita xi síkitasòn kjotixoma-la Nainá, yaá tijnako Nainá, ko jè Nainá yaá tijnajiin inima-la xita jè. K'oaá ma-ne nga 'yaá nga Nainá ya tijnako-ná, koi kjoa-la nga jye kitsjaá-ná jè Inima Tsjeè-la.

4

Jña xita xi kondra fi-la Cristo

¹ Jñò ndí 'ndsè xi 'ñó matsjake-nò, kì taxki mokjeiin-nò it'aà ts'e ngats'ii xita xi tsò nga jè Inima Tsjeè-la Nainá síkichiya-la 'én xi chjaya. Ítjòn chít'aà, a kixi kjoa nga jè Inima Tsjeè-la Nainá tísichiya-la 'én xi chja, a xi majin-né. Nga jña nachrjein xi titsajnaá i'ndeí, tjin jchán xita ndiso xi tjimasòn ya isò'nde xi tsò nga jè Nainá tsjá-la 'én xi nchibénojmíya.

² Jè xita xi bénojmí nga jè Jesucristo, íi kits'iin it'aà nangui, ko xitaá komà koni jña, jè xita xi k'oas'ín bénojmí, jé-né xi tjin-la Inima Tsjeè-la Nainá. K'oaá s'ín 'ya-nò yá xita-ne xi jè Inima Tsjeè-la Nainá tísichiya-la 'én xi tíchjaya.

³ Tanga jè xita xi mìkìi k'oas'ín keénojmí nga jè Jesucristo íi kits'iin it'aà nangui, ko xitaá komà koni jña, jè xita xi k'oas'ín tsò, tsjin-la Inima Tsjeè-la Nainá. Xita jè, jè tísikjeén kjohítsjeèn-la xita xi tjina ítjòn nga kondra fi-la Cristo. Jñò, jyeé kina'ya nga kjoíí-né jè xi kondra fi-la Cristo, ko nachrjein xi titsajnaá i'ndeí jyeé k'oas'ín tísixá kjohítsjeèn-la.

⁴ Jñò xi ndí ixti-na xan-nò, jyeé xita-la Nainá 'mì-nò; jñò, jyeé kinikijne-là jñà xita xi k'oas'ín 'én ndiso chjaya; mì tì kiì koma-ne nga jñà skónachan-nò, nga jè Inima Tsjeè-la Nainá xi tijnajin inima-nò, isaá ts'e nga'ño tjin-la mì k'oaà-ne koni jè kjohitsjeèn ts'e xita neí xi síxajin inima-la xita xi mikì mokjeín-la it'aà ts'e Cristo.

⁵ Jñà xita koi, tà jñá títajnakon-ne kjohitsjeèn xi tjin ya isò'nde; k'oaá ma-ne nga k'oas'ín chja ko jñà 'nchré-la xita xi tikoá kjohitsjeèn ts'e isò'nde síkjeén.

⁶ Tanga ngajen, xita-la Nainá-nájen. K'oaá ma-ne nga jñà 'nchré-najen jñà xita xi mokjeín-la 'én-la Nainá. Tanga jñà xi mìtsà xita-la Nainá ma, mìtsà ngajen sí's'in-najen. K'oaá ma-ne nga 'ya-la yá-né xi nguì jè Inima Tsjeè-la Nainá tísíkichiya-la nga nguì kjoa kixi ko yá-né xi inima ndiso-la neí tikonachan-la.

Nainá, 'ño tjin-la kjotsjacha

⁷ Jñò ndí 'ndsè xi 'ño matsjake-nò, mochjeén-né nga ngàsòn ngáya tsjacha jchaá xinguiáá, nga jè xi kjotsjacha, it'aà ts'e Nainá nchrobá-ne. Ngats'ii xita xi tjin-la kjotsjacha, ki'ndí-la Nainá-né ko tikoáá beè-né yá-né xi Nainá.

⁸ Jè xita xi mikì matsjakeè xita xíkjin, kj'eè kì beè yá-né xi Nainá, nga jè Nainá kjotsjacha-né.

⁹ K'oaá s'ín tsakó-ná Nainá kjotsjacha xi tjin-la xi it'aà tsaján nga kisikasén ki'ndí-la i isò'nde, jè ki'ndí-la xi ta jè ta jngoò ma-ne, mé-ne nga it'aà ts'e ndaà kitsajnakoaán.

¹⁰ K'oaá s'ín tjin kjotsjacha xi tsakó Nainá xi it'aà tsaján: Mìtsà koi-ne nga jñà ndaà matsjachaá Nainá. Jè Nainá xi 'ño ndaà matsjakeè-ná. K'oaá ma-ne nga kisikasén ki'ndí-la nga k'en ngajo-ná, mé-ne sijnchàat'aà-ná jé-ná.

¹¹ Jñò ndí 'ndsè xi matsjake-nó, tsà jè Nainá k'oas'ín 'ño ndaà matsjakeè-ná, mochjeén-né nga k'oa tís'ín kotsjachaá xinguiáá nga ìjngoò jngoá.

¹² Nì saá jngoò xita xi xkon beè-ne Nainá, tanga tsà ndaà kotsjachaá xinguiáá nga ìjngoò jngoá, jè Nainá yaá tijnajin kjit'aà inima-ná ko it'aà tsaján-ná nga ndaà títitasòn yije kjotsjacha-la Nainá.

¹³ Nainá jyeé kitsjaà-ná Inima Tsjeè-la. K'oaá ma-ne nga jye 'yaá nga kjit'aà nachrjein ya títajnakoaá Nainá ko tikoáá ya tijnako-ná Nainá nga tijnajin inima-ná.

¹⁴ Ngajen sobá ki'ya-jen ko 'bí-nájen 'én-najen nga jè Nainá xi Nà'én 'mì-laà kisikasén Ki'ndí-la nga jè kochrekajin kjo'in xi kjoa ts'e jé-la ngats'ii xita isò'nde.

¹⁵ Ngats'ii xita xi nguì ko inima-la tsjá 'én-la nga jè Jesús xi Ki'ndí-la Nainá, kjit'aà nachrjein ya tijnako Nainá ko jè Nainá yaá tijnajin inima-la.

¹⁶ Jyeé k'oas'ín ndaà 'yaá, ko tikoá mokjeín-ná, nga jè Nainá tjin-la kjotsjacha xi it'aà tsaján. Nga jè Nainá kjotsjacha-né. Ko jè xita xi kjotsjacha tijnajin kjit'aà ya inima-la, yaá tijnako Nainá ko jè Nainá yaá tijnajin inima-la xita jè.

¹⁷ K'e nga it'aà tsaján k'oas'ín ndaà títitasòn yije kjotsjacha-la Nainá, 'ño tjin takoán nga mìtsà tì mé tsakjoòn-ná jè nachrjein k'e nga sindaàjin-la xita xi kjoa ts'e jé-la. Nga jñá, k'oaá s'ín ndaà títasá'né i isò'nde koni s'ín kis'ìin jè Jesucristo.

¹⁸ Ya ñánda nga tjin xi kjotsjacha, mìtsà tì mé kjoskon tjin-ne. Nga jè xi nguì kjotsjacha, faáxin-né ngats'ii xi kjoskon 'mì. Jè xita xi tsakjón, kjo'in-né xi tsakjón-la. Ko jè xita xi táko kjoskon tjin inima-la, koií-né nga kj'eè tsà ndaà tijn inima-la jè kjotsjacha-la Nainá.

¹⁹ Koií k'oas'ín matsjacha-ná Nainá, koií kjoa-la nga jè kjòtsjakeè ítjòn-ná.

²⁰ Tsà tjin xita xi tsò: "An, matsjake-ná Nainá." Tanga tsà majtikeè xita xíkjin xi tikoá it'aà ts'e Cristo mokjeín-la, jè xita jè, xita ndiso-né. Tsà mì kì matsjakeè xita xíkjin xi xkon tíbeè-ne, ¿kós'ín ma-ne kotsjakeè Nainá xi kj'eè tsà xkon beè-ne?

²¹ Jè kjotíxoma xi kitsjaà-ná Jesucristo, k'oaá tsò: Jè xi matsjakeè Nainá, mochjeén-né nga tikoá kàtamatsjakeè xita xíkjin xi tikoá it'aà ts'e Cristo mokjeín-la.

5

Kós'ín koma sikijne-lá kjoa ts'e isò'nde

¹ Jyeé ixti-lá Nainá-né ngats'iì xità xi nguì kò inìma-lá mokjeiín-lá nga jè Jesús, [jè-né xi Nainá kisikasén], jè-né xi Cristo. Kò ngats'iì xità xi tsjakeè xi na'èn tíjna-lá, tíjnè-lá nga tìkoá kotsjakeè ngats'iì ixti-lá na'èn-lá.

² K'e nga matsjachaá Nainá, kò tìkoá nìkitasoán kjotíxoma-lá, 'ya-ná nga tìkoá matsjachaá jñà xi ixti-lá Nainá ma.

³ K'oaá s'ín tíjn tsà kixi kjoa nga matsjachaá Nainá, jè-né nga ndaà sikitasoán kjotíxoma-lá. Kò jè kjotíxoma-lá, mìtsà 'ñó 'in bitasòn.

⁴ Nga ngats'iì xità xi ixti-lá Nainá ma, sikijneé-lá ngats'iì kjoa ch'o xi tíjn isò'nde. Koií ma nìkijne-lá kjoa xi tíjn isò'nde nga mokjeiín-ná it'aà ts'e Cristo.

⁵ Niyá xi ma sikijne-lá jè kjoa ch'o xi tíjn isò'nde, tajngoò-né jè xità xi mokjeiín-lá it'aà ts'e Jesús, nga jè-né xi Ki'ndí-lá Nainá ma. Jè-né xi chíkjoa-lá nga sùikijne.

Jè xi tsjá kixi 'én it'aà ts'e Ki'ndí-lá Nainá

⁶ Jè-né Jesucristo xi j'ì i isò'nde. Kò k'e nga j'ì, jè nandá kò jní xi ndaà tsakó. Kò mìtsà tà jè nandá xi tsakó, tìkoáá jè jní. Kò jè Inìma Tsjeè-lá Nainá xi bénojmi kixi yá-ne xi jè. Nga jè Inìma Tsjeè-lá Nainá, nguì kjoa kixi-né.

⁷ Jàn ma-ne xi nguì tsjá kixi 'én-lá xi it'aà ts'e kjoa koi:

⁸ jè Inìma Tsjeè-lá Nainá, jè nandá, kò jè jní. Kò ngajàn koi, ngásòn tsò.

⁹ Tsà mokjeiín-ná jñà 'én xi tsjá xità isò'nde, mochjeén-né nga isa ndaà kokjeiín-ná jè 'én xi jè sobà Nainá títsjá. Nga jè 'én xi títsjá, jè tìbénojmi, yá-ne xi Ki'ndí-lá Nainá.

¹⁰ Jè xi nguì kò inìma-lá mokjeiín-lá it'aà ts'e Ki'ndí-lá Nainá, yaá tíjìn inìma-lá nga kixi kjoa jè 'én xi tsjá Nainá. Tanga jè xi mìkì mokjeiín-lá it'aà ts'e Nainá, jè Nainá, ndiso tíhochrjengui, koií kjoa-lá nga mìkì mokjeiín-lá 'én xi tsjá Nainá xi it'aà ts'e Ki'ndí-lá.

¹¹ Jè 'én xi kitsjaà Nainá, jè-né nga jè Nainá tsjá-ná kjoabinachon xi mì fehet'aà nita kjé-ne. Kò jè kjoabinachon jè, yaá sakó-ná it'aà ts'e Ki'ndí-lá.

¹² Jè xità xi Ki'ndí-lá Nainá tíjnajiìn inìma-lá, tíjn-lá kjoabinachon xi mìkì fehet'aà nita kjé-ne; tanga jè xità xi mìtsà Ki'ndí-lá Nainá tíjnajiìn inìma-lá, tsjìn-lá kjoabinachon.

'Én xi fehet'aà-ne

¹³ Jñò xi mokjeiín-nò it'aà ts'e Ki'ndí-lá Nainá, koií xá tìkjù-nò Xojon jè mé-ne nga ndaà kàtasijiìn-nò nga jyeé tíjn-nò kjoabinachon xi mìkì fehet'aà nita kjé-ne.

¹⁴ K'oaá ma-ne nga 'ñó tíjn takoán k'e nga nokjoát'aà-lá Nainá. K'oaá s'ín ndaà kji'nchré-ná tsà k'oas'ín sijét'aà-lá koni s'ín sasén-lá jè.

¹⁵ Tsà jye k'oas'ín tíjìn-ná nga Nainá 'nchré-ná k'e nga tsà mé xi nìjé-laá, tìkoáá jyeé 'yaá nga tìk'éé-ne nga nìjé-laá tsjá-ná mé xi nìjé-laá.

¹⁶ Tsà yá xità xi skoe jngoò xità xíkjin xi tìkoá it'aà ts'e Cristo mokjeiín-lá nga ya tìkàjìn jñà jè xi mìtsà kjoabiyaá fikó-ná, maá katítsi'batjì, kò jè Nainá tsjá-lá kjoabinachon jè xità xi tíhótsji jè. Tanga tà jñá-né xi koxan-lá nga ma sìtsi'batjì jñà xità xi mìtsà nguì kjoabiyaá kjit'aà-lá jñà jè xi nchihótsji. Nga tíjn jè xi kjoabiyaá fikó-ná, kò k'oaá xan nga mìtsà mochjeén nga sìtsi'batjì jè xità xi kotjín jè xi tíhótsji.

¹⁷ Tanga ngats'iì kjoa ch'o xi s'ín xità, nguì jè-né nga nguixkon Nainá. Tanga tíjn-né jñà jè xi mìtsà kjoabiyaá fikó-ná.

¹⁸ Jyeé tíjìn-ná nga jñà xi ixti-lá Nainá ma, mìtsà tíya títsajnajìin-ne jè, nga jè Jesús xi Ki'ndí-lá Nainá ma, tís'ín kindá, kò jè xità neií, mì tì kù mé xi ch'o síko-ne.

¹⁹ Jyeé 'ya-ná nga ixti-lá Nainá 'mì-ná; tanga jñà xità xi mìkì mokjeiín-lá it'aà ts'e Cristo xi tíjn nga tíjtsa isò'nde, jè xità neií tíhotíxoma-lá.

²⁰ Tìkoáá 'ya-ná nga koií xá j'ì-ne jè Ki'ndí-lá Nainá i it'aà nangui nga jè ndaà kisikichiya-ná mé-ne nga ma yaxkooán xi nguì jè sobà Nainá. Kò yaá titsajnaakoaá jè

xi nguì jè sobà Nainá koií kjoa-la nga ya titsajna^oá Jesucristo xi Ki'ndí-la ma, xi tijè sobà-ne Nainá kò xi ma-la tsjá-ná kjoabinachon xi mìkìì fehet'aà nìta kjé-ne.

²¹ Jñò xi ndíixti-na xan-nò, kì jñà onguítjìngui-là jñà nainá xi beèxkón xìta xi mìtsà kixì kjoa nga Nainá.

Xojon carta xi ma-ne jò xi kiskiì San Juan

Kjoa tsjacha ko kjoa kixi

¹ Ji ndí chjoón xi xó jaàjìin-lè Nainá, ko jñà ixti-lè, tikjiì-nò Xojon jè 'an xi xita jchínga 'mì-na ya ingo. Nguì okixi-né nga matsjake-nò; mìtsà ta 'an xi matsjake-nò, tikoáá matsjakeè-nò ngats'ìi jñà xita xi jye beè kós'ín tjín xi kjoakixi.

² Koií k'oas'ín matsjake-nò, nga jyeé ndaà tíjìin ya inima-ná jè xi nguì kjoa kixi, ko yaá kíjnajìin kjit'aà skanda nita mé nachrjein-ne.

³ Nainá xi Na'èn 'mì-laà ko Na'èn-ná Jesucristo xi Ki'ndí-la Nainá ma, kàtatsjá-nò kjondaà, kàtahimakeè-nò, 'nchán kàtasíkijna jjiin inima-nò, xi nguì ko kjoakixi ko kjotsjacha-la.

⁴ Nò kjòtsja-na k'e nga kijtseè xkoaàn i'nga ixti-lè, nga k'oáá s'ín nchisíjchá yijo-la koni s'ín tjín kjoa kixi ts'e Nainá, koni s'ín jye tsatixoma-ná jè Nainá xi Na'èn 'mì-laà.

⁵ K'oáá s'ín tìbitsi'bà-nò j'ndeì jñò ndí 'ndse xi 'ñó matsjake-nò, nga mochjeén-né nga 'ñó kòtsjachaá xinguiáá nga jngó íjngoá. Ko mìtsà kjotixoma xitse xi tikjiì-nò, tijé-ne jè kjotixoma xi kitjoé-ná skanda tisa tàts'en-la kjoa.

⁶ K'oáá s'ín tjín xi it'aà ts'e kjòtsjacha, jé-né nga k'oas'ín sikitasoán koni s'ín tjín kjotixoma-la Nainá; jyeé kina'ya nga tisa 'ñó kjòtseé kós'ín tichja kjotixoma nga 'ñó mochjeén nga kòtsjachaá xinguiáá nga jngó íjngoá.

Xita xi konachan

⁷ Nga kjin ma-ne xita xi tjímasòn nga tíjngoò isò'nde xi nchikonachan-la xita, nga tsò: "Mìtsà 'én kixi nga k'oas'ín kits'iin Jesucristo nga xita komà koni jñà." Jè xita xi kòtsò, ta tikonachan-né ko jè-né xi tjina ítjòn nga kondra fi-la Cristo.

⁸ Ndaà t'een kinda yijo-nò, mé-ne nga mìkiì sichjaà-nò jè kjotjò xi tjoé-nò it'aà ts'e xá xi tisa'nè. Nga mochjeén-né nga kàtatjoé yije-nò jè chjí-la xá xi tisa'nè.

⁹ Ngats'ìi xita xi otonè-la koni s'ín tjín 'én xi tsakóya jè Cristo nga xìn ndiyá kjoé, mìtsà Nainá tíjnako; tanga jè xi kixi tjina nga k'oas'ín tís'ín koni s'ín tsakóya Cristo, yaá tíjnako Nainá xi Na'èn 'mì-laà ko jè xi Ki'ndí-la ma.

¹⁰ Tsà k'e jngoò xita kijchòkon-nò xi mejèn-la nga 'én-la Nainá keènojmi-nò tanga tsà mì k'oas'ín okóya koni tsò 'én-la Cristo, kì kiì bì'nde-laà nga ni'ya-nò fahas'en ko kì 'mì-laà: "Tikjáyi."

¹¹ Nga jè xi tsjá'nde-la nga sikkas'en ni'ya-la, tikoáá yaá tísíngàsòn-ko kjohítsjeèn-la jñà xita xi ta kjoa ndiso nchihokóya.

'Én xi fehet'aà-ne

¹² Tjín jchán-isa mé 'én xi mejèn-na nga koxán-nò, tanga majìn-na nga tà Xojon kit'aà-nò. Jè xi mejèn-na nga kjikon xatí-nò. K'ée isa ndaà jchibá mé-ne nga ngats'iaá ngàsòn ngáya kàtas'e-la kjòtsja inima-ná.

¹³ Jñà ixti-la chjoón tichji xi tikoá xó jaàjìin-ne Nainá nchisíkasén-lè 'én nga síhixat'aà-lè. K'oas'ín kàtama.

Xojon carta xi ma-ne jàn xi kiskiì San Juan

Mé kjoa-ne nga ndaá chja Juan it'aà ts'e xita xi 'mì Gayo

¹ Ji ndí 'ndsè xi 'mì-lè Gayo xi 'ñó ndaà chibá ko xi ngui ko inima-na nga matsjake-lè, tikji-lè Xojon jè 'an xi xita jchinga 'mì-na ya ingo.

² Ji ndí 'ndsè, 'an, k'oaá s'ín tísíjé-la Nainá, nga ndaà kàtitjo yije njita mé kjoa xi s'iin ji, koni s'ín ndaà tímachikon-t'in inima-lè xi it'aà ts'e Nainá, k'oaá tís'ín ndaà kàtjna jè yijo-lè nga nímé ch'in kàtas'e-la.

³ Taxki 'ñó kjòtsja-na k'e nga j'ii i'nga jña 'ndsé xi tsibénojmi-na nga k'oaá s'ín tìnìjchí yijo-lè koni s'ín tjín kjoa kixi it'aà ts'e Cristo.

⁴ Ni ti mé kjoa tjín-ne xi k'oas'ín 'ñó matsja-la inima-na, ta jè-ne k'e nga 'nchrè nga jña xi ndí ixti-na xan-la nga k'oaá s'ín nchisíjchá yijo-la koni s'ín tjín xi kjoakixi.

⁵ Ngaji ndí 'ndsè xi 'ñó matsjake-lè, 'ñó kixi tìnìjchí yijo-lè, k'e nga k'oas'ín ndaà nìs'in-la ya ni'ya-lè jña xita xinguiáá xi bijchókon-lè xi tikoá 'én-la Nainá mokjeiín-la; ko isaá ta ndaà tjín-isa k'e nga tikoá ndaà nìs'in-la jña xita xinguiáá xi xìn i'nde f'ii-ne.

⁶ Jña xita xinguiáá k'oaá s'ín tsibénojmi kixi ya nguixkon xita naxandá-la Cristo, nga ngaji 'ñó matsjachi ngats'ii xita xinguiáá koi. K'oas'ín ndaà tísiko-isi k'e nga kijchòkon-lè; tjii-la mé xi mochjeén-la k'e nga tjimaya ya iya ndiyá. K'oaá s'ín tikoji koni s'ín sasén-la Nainá.

⁷ Nga it'aà ts'e Cristo-né nga k'oas'ín jye tsibínè-la yijo-la jña xita xinguiáá koi, nga k'oaá s'ín nchisíxá-la Jesucristo, ko majìn-la nga jña kiskoé tsojmi xi tsjá-la xita xi mìtsà it'aà ts'e Cristo mokjeiín-la.

⁸ Koi mochjeén-ne nga jña oko-ná nga kisiakoá jña xita xinguiáá koi. Tsà k'oas'ín kisiakoá, tsò-ne kjoa nga ngàsòn titsanika'bisoán jè 'én kixi xi ndaà tsò.

Kjoa ch'o xi s'ín jè xita xi 'mì Diótrfes

⁹ An jyeé kiskiaà jngò Xojon nga kisikasén-la jña xita naxandá-la Cristo, tanga jè Diótrfes mìkì sasén-la koni s'ín ki'mì-lajen, nga jè, koi xi mejèn-la nga ta jè kotixoma.

¹⁰ K'e nga kijchoa, k'ée koxán kixi-la it'aà ts'e ngats'ii kjoa ch'o xi tís'ín, nga 'ñó ch'o tsò 'én ndiso xi tìbínè-najen. Ko mìtsà ta ya majngò ikon, tikoáá mìkì ma-la nga sís'in-la jña xita xinguiáá xi bijchókon ya ni'ya-la. Ko jña 'ndseé xi mejèn-la nga s'is'in-la xita xinguiáá, jé bíhjoà ikon-la, ko tikoáá ochrjekàjìn-né ya naxandá-la Cristo jña 'ndsé xi k'oas'ín síkitasòn kjondaà koi.

¹¹ Ji ndí 'ndsè xi 'ñó matsjake-lè, kì jña chjinguì-la jña kjoa xi ch'o tjín; ji, jña chjinguì-la jña kjoa xi ndaà tjín. Nga jè xita xi ndaà s'ín, xita ts'e Nainá-né; tanga jè xita xi ch'o s'ín, kj'eè kì beè yá-ne xi Nainá.

Kjondaà xi s'ín jè xita xi 'mì Demetrio

¹² It'aà ts'e Demetrio, ngats'ii xita k'oaá tsò nga 'ñó ndaà tjín koni s'ín tís'ín, skanda jè xi kjoa kixi, k'oaá s'ín okó nga jè Demetrio, ndaà tjín koni s'ín tís'ín; k'oaá tís'ín bixón-jen nga ndaà tjín koni s'ín tís'ín, ko ndaá 'yi nga 'én kixi-né koni s'ín bixón-jen.

'Én-la Juan xi fehet'aà-ne

¹³ Tjín-isa-na mé 'én xi mejèn-na nga koxán-lè, tanga majìn-na nga tà Xojon síikasén-lè;

¹⁴ jè xi mejèn-na nga k'íkon xátí-lè; k'ée isa ndaà jchibanojmiá k'e nga kijchokon-lè.

¹⁵ K'oas'ín 'nchán kàtjna kjit'aà inima-lè. Jña xita xi ndaà oko-ná xi i'nde-la tísíhixat'aà-lè. Kot'in-la jña xita xi ndaà oko-ná xi ya títsajnakò-lè, Nainá kàtasíchikon-t'in nga jngò ò jngò.

Xojon carta xi kiskiì San Judas

¹ 'An, Judas xi chi'nda-la Jesucristo ma, ko 'ndsè ma Jacobo, tikjiì-nò jñò xi xó kinokjoà-nò nga tjòkeè-nò Nainá xi Na'èn-ná ma, ko nga jè Jesucristo síkinda-nò.

² Tse kjoħimatakòn ko kjoa'nchán ko kjoatjòcha kàtatsjá-nò Nainá.

*Kjo'in xi tjoé-la jñà xita xi jahas'en-jiìn'ma naxandá-la Nainá nga 'én ndiso okóya
(2 Pedro 2:1-17)*

³ Ndí 'ndsè xi 'ñó matsjake-nò, kjòtseé tjín-ne nga mejèn-na skii-nò koni s'ín ngásòn kisikò-ná Nainá nga tsachrjekàjiìn-ná kjo'in kjoa ts'e jé-ná. Tanga i'ndeì mochjeén-né nga tikjiì-nò mé-ne nga ma bítsi'ba-nò nga 'ñó tixkàtjiò jè kjotíxoma koni s'ín mokjeiìn-nò xi xó k'oas'ín jngoò k'a kis'enojmí-la xita tsjeè-la Nainá.

⁴ Tjín i'nga xita xi jahas'en-jiìn'ma-nò. Jñà xita koi, kjòtseé k'oas'ín tjínè-la nga kjo'in s'e-la koni tsò Xojon-la Nainá. Jñà xita koi, ch'oo s'ín; mìkiì beèxkón Nainá. Síkatjìyaá-la kjondaà-la Nainá; koií síkitasòn kjoa ch'o xi síjé yijo-la. Ochrjenguií Jesucristo xi ta jè tajngoò otíxoma-ná.

⁵ Jñò, nas'ín jye tíjiìn-nò kjoa koi, tanga i'ngoò k'a tìsikítsjeèn-nò, jè Nainá tsachrjekàjiìn xita naxandá Israel ján Egipto, tanga xi jye komà iskan, i'ngoò k'a kisikjehesòn jñà xita xi mìkiì kòkjeiìn-la it'aà ts'e.

⁶ K'oaá tì komàt'in jñà àkjale xi mìkiì ndaà tsibìtsajnajiìn xá xi kjòngatsja, ta saá kitsjeiìn takòn i'nde xi kitjoé-la. Tjèn-ne nàchrjein jè, skanda i'ndeì, Nainá, na'ñó kichá cadena tjit'aà'ñó-la nita mé nàchrjein-ne, ya ñánda i'ndeì jñò choòn, skanda jè nàchrjein k'e nga sindaàjiìn.

⁷ K'oaá tìs'ín komàt'in jñà naxandá Sodoma ko Gomorra ko naxandá xi ya chrañàt'aà-la kjiyijò nga kjoachijnguií kis'iìn nga nguì ta kjoach'o ts'e yijo-la kiitjingui-la. Naxandá koi, ngats'iì xita xi tjín, ni'ín kisikjehesòn. Nainá k'oaá s'ín tsibíjna jngoò-ná chiba ni'ín xi ts'e kjo'in xi mìkiì bits'o nita kjé-ne.

⁸ Jñà xita xi jahas'en-jiìn'ma-nò, k'oaá tìs'ín tà nijñá tí'biì-la, nchihótsji jé-la yijo-la, ochrjengui kjotíxoma-la Na'èn-ná, chjajno-la jñà nga'ñó xi mìkiì tsejèn.

⁹ Jè Miguel xi àkjale ítòn, mìtsà 'én 'ngaá kiichjako jè xita neií k'e nga kiskaàn-ya-ne yijo-la Moisés; mìtsà kó kitsò-la mé kjo'in xi tjoé-la; ta kitsò-la: "Nainá kàtatsjá-lè kjo'in."

¹⁰ Tanga jñà xita koi, chja kondraá-la kjoa xi mìkiì tíjiìn-la. Ko jñà kjoa xi tíjiìn-la, k'oaá s'ín síchjeén koni cho xi tsjìn-la kjoħítsjeèn nga ti yijo ts'e síkìts'ón-ne.

¹¹ ¡Ima xó-ne xita koi, nga jè ndiyá-la Caín kiitjingui-la! K'oaá tì tjín jé xi tsohótsji koni kis'iìn Balaam ta jè kjoa-la nga ton síkijne. K'oaá s'ín kiyá koni s'ín k'en Coré koií kjoa-la nga kondra kiì-la Nainá.

¹² Jñà xita koi k'e nga ya báhihtako-nò nga s'eí-la Na'èn-ná tjín-nò, síkìts'ón-jiìn-nò, mìkiì masobà-la k'e nga kjèn-ko-nò. Ta yijo-laá sís'in-la. K'oaá ngaya-la koni ifi xi mìtsà jtsí tjiko, xki xi ján fiko tjo; koni yá xi bixòjen xka-la nga mì toò ojà-la ikjoàn tjanè ko ima-la, jngoó k'a biyaà.

¹³ Jñà xita koi, k'oaá ngaya-la koni xó-la ndáchikon nga bíxteèn tjé-la ya indiì-la nga okó kjoasobà-la; koni ni'ño xi kisichja ndiyá-la, ko k'oaá s'ín tjínè-la nga ya kítsajna ñánda i'nde jñò choòn nita mé nàchrjein-ne.

¹⁴ Jè Enoc xi ma-ne itoò tje-la Adán xi ya inchrobàt'aà-ne; k'oaá tìs'ín tsibíjna 'én it'aà ts'e xita koi k'e nga kitsò: "Chítsejèn-là Na'èn-ná nga tinchrobá, kjìn jchán jmiì ma àkjale-la xi tjiko,

¹⁵ nga koiindaàjiìn-la ngats'iì xita mé-ne nga tsjá-la kjo'in ngats'iì xita xi jé tjín-la koni tjín kjoa ch'o xi kis'iìn, jñà xi mìkiì beèxkón Nainá nga ch'o tsò 'én xi chjajno-la."

¹⁶ Jñà x̄ita koi, kjit'aà n̄achrjein nchihojé, chjajno-là ngats'iì kjoa. Ta koi ótsji kjoa xi mochjeén-là yijo-là. K'e nga chjako x̄ita, ndaà síkítsajna yijo-là, ta 'én sin 'én ndaà chja; ta jè xi mejèn-là nga s̄iikijne mé xi mejèn-là.

Kjoa kixi xi sinè-la x̄ita

¹⁷ Tanga jñò ndí 'ndsè xi matsjake-nò, t̄ikítsjeèn koni s'ín jye kiichjako ítjòn-nò jñà x̄ita xi tsibíxáya-là Na'èn-ná Jesucristo,

¹⁸ nga kitsò-nò: “K'e nga jye kjoehet'aà n̄achrjein, s'eé x̄ita xi tà kijnokeè xi kjoa kixi. K'oaá s'ín kojchájìin kjoach'o xi síjé yijo-là nga mìkì beèkkón Nainá.”

¹⁹ X̄ita koi, x̄ita naxandá-là Nainá síjòya. Kjo'hítsjeèn-là isò'nde tjín-là nga tsjìn-là Inima Tsjeè-là Nainá.

²⁰ Tanga jñò ndí 'ndsè xi matsjake-nò, 'ñó kixi t̄inchakoo jè kjoa tsjeè-là Nainá xi mokjeiín-nò. T̄itsi'ba-là Nainá nga jè Inima Tsjeè-là k̄atasíchiya-nò.

²¹ T̄ikinda yijo-nò nga kjit'aà n̄achrjein k̄atas'e-nò kjoatjòcha-là Nainá. Chíña-la kjoa ima takòn-là Na'èn-ná Jesucristo, mé-ne nga tsjá-nò kjoabinachon xi mìkì fehet'aà n̄ita kjé-ne.

²² Jcha ima takòn nga t̄isikoo jñà x̄ita xi jò beè-là ikon.

²³ Kò jñà x̄ita xi i'nga, n̄itoón t̄ináchrjekàjñò jñà kjoa ch'o xi s'ín nga jyeé kjomeè ya bixòjìin ni'ín ts'e kjo'in. Jcha ima takòn i'nga tanga t'een kindá yijo-nò tsà t̄ikoa ya skajñoò jé-là. T̄inachrjekànguioò kjoa ts'e jé-là. Skanda jñà nikje tjé-là t̄inachrjenguioò.

Jeya kàtìjna Nainá

²⁴ Jè Nainá xi ma-là síkinda-nò mé-ne nga mìkì kixonguioò. Tsjeè síkítsajna-nò ya nguixkon kjoa jeya-là nga n̄imé jé sakò-nò kò 'ñó s'e-nò kjotsja.

²⁵ Jè Nainá xi ta jè tajngoò ma-ne nga ochrjekàjìin-ná kjo'in xi it'aà ts'e Na'èn-ná Jesucristo, ta jè tajngoò xi jeya kàtìjna, 'nga kàtìjna; k̄atas'e-là kjotixoma; k̄atas'e-là nga ñó; skanda kjõtseé, kò n̄achrjein ì'ndeì, kò skanda n̄ita kjé-ne. K'oa's'ín k̄atama.

Xojoṇ-la San Juan kjoa xi tsakó-la Jesucristo

Kjoa xi kijtseè ko 'én xi kii'nchré San Juan

¹ Jñà kjoa koi xi kitjoé-la Jesucristo nga Nainá kitsjaà-la mé-ne nga kòkò-la xita chi'nda-la jñà kjoa xi ta nitoón okoma. Jesucristo kisikasén àkjale-la nga tsakó-la kjoa koi Juan xi chi'nda-la ma.

² Ko jè Juan tíchja kixi-né [k'e nga kiskii] ngats'ii kjoa xi kijtseè ko xi kii'nchré koni s'ín nga jè Jesucristo kiichja kixi-la jñà 'én xi kitsjaà-la Nainá.

³ Mé tà ndaà-la jè xita xi bíxkejiin xojoṇ koa jñà xi 'nchré 'én-la Nainá xi tjit'aà xojoṇ jè, jñà kjoa xi sa kítasòn; tikoáá mé ta ndaà-la jè xita xi síkitasòn koni tsò xojoṇ jè, nga jè nachrjein, jyeé nchrobá machraña.

Kó tsò Juan nga shixat'aà nga itoò naxandá-la Cristo xi títsajna ján i'nde Asia

⁴ 'An xi 'mì-na Juan, tishixat'aà-nò, jñò xi naxandá-la Cristo maà xi itoò i'nde titsajnaà ján nangui Asia. Jè kàtatsjá-nò kjondaà ko kjoa'nchán jè Nainá xi tíjna, jè xi tsibijna ko jè xi kjoii òjngòò k'a-ne; k'oa tís'ín kàtatsjá-nò kjondaà ko kjoa'nchán jñà inima xi itoò ma-ne xi títsajna nguixkon jè xi tíjnasòn íxile nga tíhotíxoma;

⁵ ko jè Jesucristo k'oa tís'ín kàtatsjá-nò kjondaà ko kjoa'nchán. Jè Cristo, jè xi ngui 'én kixi tsjá, xi ki'ndí tjòn xi jaáya-la it'aà ts'e kjoa biyaà ko jè xi otíxoma-la jñà xita sko-la xi tjin i it'aà nangui. Cristo matsjakeè-ná nga kisítsjeè jé-ná it'aà ts'e jni-la xi tsibixteèn.

⁶ Cristo k'oaá s'ín kisikítsajna-ná nga xita ítjòn komaá ko no'mii komaá nga jñá sixá-lá Nainá xi Na'èn-la ma Jesucristo. Jeya kàtijna; jè kàtatíxoma kjit'aà, nita mé nachrjein-ne, nita mé nó-ne. K'oas'ín kàtama.

⁷ Chítsejèn-là! Jè Cristo jyeé kjomeé f'ii nga tíchrobájiin ifi. Ngats'ii xita, xkoón skoe-ne. Jñà xita xi kisik'en Cristo tikoáá skoe-ne. Ngats'ii xita naxandá xi tjin i it'aà nangui skindáyakeè-né nga 'on koma-la it'aà ts'e. Jon, k'oaá s'ín koma.

⁸ "An-ná xi tíjna ítjoàn skanda tàts'en-la kjoa ko nga skanda fehet'aà-ne; 'an-ná xi tíjnaa, xi tsibijnaa, ko xi kjoii òjngòò k'a; tajngoo-ná xi tse nga'ño tjin-na", tsò Na'èn-ná xi Nainá.

Kjoa xi tsakó-la Nainá Juan it'aà ts'e Cristo

⁹ 'An-ná xi mì-na Juan, xi 'ndsé xan-nò it'aà ts'e Cristo. Nga yaá titsajnaakoaá Cristo ngàsòn titsanikjiaán kjo'in, ko ngàsòn ya nokjoà-ná ñánda tíhotíxoma Nainá ko ngàsòn tíchíkjoako-ná ngats'ii kjoa. 'An nga 'én-la Nainá tíchjaya ko tibenojmí kixi-la xita it'aà ts'e Cristo, k'oaá komà-ne ján kinikasén-na ya nangui jiin-nda ñánda 'mì Patmos.

¹⁰ Jngòò nachrjein-la Nainá, 'an, nga ya tíjnaakoa Inima Tsjeè-la, ya ijton índsiàn ki'nchré jngòò-la 'én xi 'ño kiichja koni jngòò chrjo xi 'ño jane,

¹¹ kitsò-na:

—'An-ná xi tíjna ítjoàn ko xi fehet'aà-ne. Chjoí jngòò xojoṇ, tít'eii kjoa xi t'yi; ikjoàn tikasén-la naxandá-na xi itoò i'nde títsajna ján nangui Asia, jñà naxandá xi 'mì Éfeso, Esmirna, Pérgamo, Tiatira, Sardis, Filadelfia ko Laodicea.

¹² K'eé kisikátjifaya nga mejèn-na skoeè yá xita xi tíchja-na; kijtseè itoò candelero xi ngui kicha oro xi ma tiya asiti.

¹³ Ya jngòò osen-la ñánda jncha candelero xi itoò ma-ne síjnajiin xi okji koni kji ki'ndí-la xita. Jngòò nikje kinakjá xi ndojò kji. Bijchó skanda ítjòn ndsoko. Tíkjá jngòò na'ño payo ya isòn inima-la xi ngui oro.

¹⁴ Tsja sko, k'oaá kjoàn koni kjoàn tsja chroba-la orrè, koni kjoàn 'nchán kjoàn. Xkon, k'oaá s'ín tsejèn koni tsà títi ni'ín.

¹⁵ Ndsoko k'oaá kjoàn koni kicha sinè xi 'ño ndaà ote k'e nga jye sijiin ni'ín. Jè jta-la, k'oaá s'ín na'ya-la koni ñánda 'ño je nandá tibixòjen-tjòn.

16 Jè tsja kixi, itoò ni'ño tjiya. Jè tso'ba jngoò kicha ndojò bitjo xi 'ño yijò kji ingajò ngobà. Isén-la k'oaá kji koni kji ts'oi k'e nga 'ño matsjè ndobá, 'ño ote kji.

17 K'e nga kijtseè, kiskaànguia ingui ndsoko koni jngoò mik'en. Ikjoàn jè tsakájasòn-na tsja kixi, kitsò-na:

—Kì tsakjoòn-jèn, 'an-ná xi tijná ítjoàn kò xi fehet'aà-ne,

18 kò tijnakon-ná. Tsakátijna k'en-ná tanga i'ndeij tijnakon-ná nita mé nachrjein, nita mé nó-ne. 'An tjiya ndsaa ibi ts'e kjoabiyaà ya i'nde-la mik'en. [Tji'ndeé-na nga skix'aa kò kichjoà nga sijkjaáya-la.]

19 Chjí jñà kjoa xi jye kà'yi kò kjoa xi tíma nachrjein i'ndeij kò kjoa xi koma nga koma iskan.

20 Kíí tsò-ne jè kjoa'ma xi kà'yi ts'e ni'ño xi itoò ma-ne xi tjiya ndsaa kixi kò xi itoò candelero xi nguì kicha oro. Jñà ni'ño xi itoò ma, jñà àkjale-la naxandá-na xi itoò i'nde títsajna; kò jñà candelero xi itoò ma-ne, jñà-né xi naxandá-na xi itoò i'nde títsajna.

2

Kjoa xi kisinè-la naxandá-la Cristo ján Éfeso

1 'Chjí jngoò-la xojon jè àkjale-la naxandá-na xi tijná ján Éfeso: “Kíí tsò jè xi itoò ni'ño tjiya tsja kixi, jè xi tsóhojiin osen-la jñà candelero xi itoò ma-ne xi nguì kicha oro, tsò-né:

2 Tibe-ná xá-nò, 'ño títsanixá kò nga mìkii bijta-nò. Tikoáá tibe-ná nga mì tì kii chíkjoako-nò jñà xita xi ch'o s'in. Tikoáá tibe-ná nga jyeé kichit'aà jñà xita xi tsò-la yijo-la nga Cristo tsibíxáya-la, tanga mìtsà kixi kjoa. Jyeé ki'yaà nga xita ndiso-né.

3 Kjit'aà nachrjein 'ño tse kjo'in títsanikjioón, kò 'ño títsanixá xi kjoa ts'an. Mìkii bijta-nò.

4 Tanga tjín jngoò-nò kjoa xi ch'o tjín xi mìkii sasén-na nga mì tì k'oaá s'in tjín-nò kjojtjòcha koni nga sa ítjòn.

5 Jñò, tikítsjeèn kó ki'nè nga sa ítjòn k'e nga kj'eè jé bixòjñò. Tikájno jé-nò. Ijngoò k'a Nainá tanguít'aà-là. K'oaá s'in t'een koni ki'nè nga sa ítjòn. Tsà majin-nò, 'an kjián nga tsjaà-nò kjo'in kò kjoááxin-nò ni'in candelero-nò ya i'nde ñánda síjna.

6 Tanga tjín kjoa xi ndaà títsa'nè nga majticha kjoa xi s'in jñà xita nicolaítas. 'An, tikoáá majtike-ná.

7 Ndaà tiná'yaà koni tsò Inima Tsjeè-la Nainá nga tíchja-la naxandá-na. Jñà xi sijkijne, 'aán tsjaà-la nga skine jñà toò-la jè yá xi síkijnakon-ná xi síjna ya i'nde-la Nainá ñánda 'ño ndaà choòn.”

Kjoa xi kisinè-la naxandá-la Cristo ján Esmirna

8 'Chjí jngoò-la xojon jè àkjale-la naxandá-na xi tijná ján Esmirna: “Kíí tsò jè xi tsibijna ítjòn kò xi fehet'aà-ne, jè xi k'en kò jaáya-la, tsò-né:

9 'An be-ná xá-nò kò kjo'in xi títsanikjioón kò nga xita ima 'mì-nò (tanga it'aà ts'e Nainá, xita nchiná-nó jñò). Be-ná nga ch'oó chjajno-nò jñà xita xi tsò nga xita judío-né tanga mìtsà kixi kjoa nga xita judío. Jñà xita koi, yaá chja-ne ya ni'ya ñánda maxkóya xita-la xita neíí.

10 Kì tsakjoòn-jèn jè kjo'in xi sijkjioón, jè xita neíí skinis'en-nò ndayá mé-ne nga skót'aà-nò kjoa xi mokjeiin-nò; te nachrjein s'e-nò kjo'in. 'Ñó t'è-là takòn kóni skanda k'e nga kiyá. Kò 'aán tsjaà-nò jè kjoabinachon xi mìkii fehet'aà koni jngoò corona.

11 Ndaà tiná'yaà koni tsò Inima Tsjeè-la Nainá nga tíchja-la naxandá-na. Jñà xi sijkijne, nímé kjoa xi komat'in it'aà ts'e kjoabiyaà xi ma-ne jò k'a.”

Kjoa xi kisinè-la naxandá-la Cristo ján Pérgamo

12 'Chjí jngoò-la xojon jè àkjale-la naxandá-na xi tijná ján Pérgamo: “Kíí tsò jè xi tjín-la kicha ndojò xi yijò kji nga ingajò ngobà, tsò-né:

13 'An tibe-ná xá-nò, tibe-ná nga yaá titsajnaà ñánda tíhotíxoma xítà nejí. Tanga be-ná nga kixí titsajnaà; mìkiì ñìchàajioòn ìt'aà ts'an. Tìkoà be-ná nga mìkiì bì'ma koni s'ín mokjeiín-nò ìt'aà ts'an, ñas'ín k'e nga k'en Antipas, xítà xi kixí bénojímí xi ìt'aà ts'an; nga yaá k'en jjiìn ñaxandá-nò ya ñánda síxá xítà nejí.

14 Tanga tjin i'nga kjoa xi mìkiì sasén-na nga ch'o titsa'nè, nga yaá titsajnajjiìn-nò xítà xi mokjeiín-là koni s'ín tsakóya Balaam kjòtseé nga chinchá'a Balac nga mejèn-là kohótsji jé jña xítà Israel nga kàtakine tsojmì xi xkósòn kisinchaàt'aà-là; tìkoà kàtas'ín kjoachijngui.

15 Tìkoáá titsajnajjiìn i'nga-nò xítà xi mokjeiín-là koni s'ín okóya jña xítà nicolaítas. Jña xítà koi, 'an majtike-ná.

16 K'oaá ma-ne tikájno jé-nò, kì tì jé binchaàtsji-nò. Tsà mì k'oa s'een, ñitoón kjián nga skaàn-koaa xítà koi. Jè sikjeén kichà ndojò xi bitjo-ne ndsoba.

17 Ndaà tjiná'yaà koni tsò Inima Tsjeè-là Nainá nga tíchja-là ñaxandá-na. Jña xi sikkijne, 'aán tsjaà-là tsojmì xi skine xi 'mì maná xi 'an tji'ma-na; tìkoà tsjaà jngoò-là ndí ndajo jtobá xi chroba kji; yaá tjit'aà 'ín xitse xi mì yá beèxkon; tà jé skoexkon xi tjoé-là.”

Kjoa xi kisinè-là ñaxandá-là Cristo ján Tiatira

18 'Chjí jngoò-là xojon jé àkjale-là ñaxandá-na xi tjna ján Tiatira: “Kíí tsò jé Kí'ndí-là Nainá xi kòkjoàn xkon koni ni'ín, kò jña ndsokò, k'oaá kjoàn koni kichà sinè xi 'mì bronce xi 'ño ndaà kjòchrja'i:

19 'An, be-ná xá-nò kò kjoatjòcha-nò, kò kós'ín nga mokjeiín-nò koà kós'ín titsanìxá nga tíchíkjoakò-nò xá xi titsa'nè. Be-ná nga jé nachrjein i'ndeì isaá ndaà titsanìxá mì k'oa-ne koni nga sa ítjòn.

20 Tanga tjin i'nga kjoa xi mìkiì sasén-na nga ch'o titsa'nè, nga bìi'nde-là jé chjoón Jezabel xi tsò-là yijo-là nga ma-là bénojmiya mé kjoa xi iskan koma nga konachan kò okóya-là xítà ch'i'nda-na mé-ne nga kjoachijngui kàtas'ín-ne tìkoà kàtakine tsojmì xi xkósòn sinchát'aà-là.

21 'Aán tìtsja isa-là nachrjein nga kàtasíkájno jé-là nga mì tì jé kohótsji-ne, tanga majìn-là tsjeiìn takòn kjoachijngui xi s'ín.

22 Tanga 'aán tsja-là ch'in nga 'ño tse kjo'in sikkjeiín kò jña xítà xi ngàsòn s'ín kjoachijngui, tsà majìn-là nga sikkájno jé-là nga mì tì jé kohótsji-ne.

23 Jña xítà xi ya fit'aà-là, jngoò k'aá sikk'en. Kò ngats'ì xítà ñaxandá-là Cristo skoe-né nga 'an-ná xi be kó tsò kjohítsjeèn-là kò inima-là jña xítà. Jño, nga jngoò ìjngoò, k'oaá s'ín tsja-nò kjo'in koni tjin kjoa xi titsa'nè.

24 Tanga jño kò xítà xi i'nga xi titsajna Tiatira xi mìkiì kota'yà kjohítsjeèn xi mìkiì ndaà tjin, tìkoà kj'eè kiì beè jé xi tsò-là jña xítà koi kjoatji'ma-là xítà nejí. Jño, k'oaá xan-nò mìtsà tì mé kjoa sikké-isa-nò.

25 Tanga jño, koni s'ín tjin jé kjohítsjeèn ndaà xi titsa'nè, k'oaá s'ín t'een skanda k'e nga 'an kjoiaa ìjngoò k'a.

26 Jña xi sikkijne-là kjoa ts'e jé tìkoà sikkitasòn xá-na koni s'ín mejèn-na skanda k'e nga kjoehet'aà nachrjein, 'aán tsjaà-là xá nga jña kotìxoma-là ngats'ì ñaxandá xi tjin isò'nde.

27 Jña xítà xi kotìxoma, nguì kò kichà kotìxoma-ne. K'oaá s'ín sikkkoaya koni tji ni'nde.

28 Jé kjotìxoma jé, tije-ne xi kitsjaà-na Na'èn-na. 'An tìkoáá tsjaà-là jé ni'ño tse xi bitjokàtji k'e nga tajñoa.

29 Ndaà tjiná'yaà koni tsò Inima Tsjeè-là Nainá nga tíchja-là ñaxandá-na.”

3

Kjoa xi kisinè-là ñaxandá-là Cristo ján Sardis

1 'Chjí jngoò-là xojon jé àkjale-là ñaxandá-na xi tjna ján Sardis: “Kíí tsò jé xi itoò inima-là Nainá tjin-là, kò itoò ma ni'ño-là: 'An be-ná kjoa xi titsa'nè; k'oaá s'ín 'ya-nò nga titsajnakon-nó tanga xi nguì kixí kjoa, titsajnak'en-nó.

² Tíkjaáya-là yijo-nò, tjiì-là nga'ńó kjoa xi jye mejèn tíchija. 'An, kj'eè kii be tsà ndaà títsa'nè nga nguixkõn Nainá.

³ Tíkítsjeèn kjohítsjeèn xi kitjoé-nò kò xi jye ndaà kina'yà; k'oaás'ín tikitason. Tíkájno jé-nò, kì tì jé binchaàtsji-nò. Tsà mikiì sikhindaá yijo-nò k'oaá s'ín kjoikjaá-nò koni s'ín xitá chijé k'e nga mikiì títsajnaandaà mé hora-ne nga kjoíí.

⁴ Tanga tjin chiba-nò xitá ya Sardis xi kj'eè mé jé ótsji, yaá taña kinchimako-na nga chroba kjoàn nikje xi kókjá nga k'oaá s'ín ok'in-la.

⁵ Jñà xitá xi sikhijne-la kjoa ts'e jé, nikje chrobaá kjoàn xi kókjá; mikiì sikhàaya 'ín-la ya it'aà xojon ts'e kjoabinachon. Kò k'oaá xán nga nguixkõn Nainá xi Na'èn-na ma kò nguixkõn àkjale-la nga xitá ts'an-ná.

⁶ Ndaà tiná'yaà koni tsò Inima Tsjeè-la Nainá nga tíchja-la naxandá-na.”

Kjoa xi kisinè-la naxandá-la Cristo ján Filadelfia

⁷ Chjí jngoò-la xojon jé àkjale-la naxandá-na xi tjna ján Filadelfia: “K'oaá tsò jé xi ngui xitá tsjeè kò xi ngui jé sobà xi xitá kixi, jé xi tjin-la ibi-la xitaxá ítòn xi ki'mì David, jé xi ma-la kix'a xòhotjoa-la ngajmii kò njjngoò-isa xi tji'nde-la nga kichjoàjto; kò k'e nga jé kichjoàjto, njjngoò-isa xi tji'nde-la nga skix'ajto:

⁸ 'An be yije-ná xá-nò; chítsejèn-là, kisikijna osen jngoò-nò xotjoa xi tix'á, xi njjngoò tji'nde-la nga kichjoàjto. Nga nas'ín tà chiba nga'ńó tjin-nò tanga títsanikitasòn-nó koni tsò 'én-na; mikiì bitsajna'ma it'aà ts'an.

⁹ Tjin jngoò jtín xitá xi ya chja-ne ya ni'ya ñanda maxkóya xitá-la xitá neíí; xitá ndiso-né nga tsò nga xitá judío, tanga mitsà kixi kjoa. Xitá koi, 'aán kichjà-la nga kàtjanchrobá mé-ne nga kincha-xkó'nchit'aà-nò; k'oaá s'ín skoe-ne nga 'an, 'ńó matsjake-nò.

¹⁰ Koií kjoa-la nga títsanikitasòn koni tsò 'én xi kitsjaà-nò nga kichikjoakò kjit'aà-nò nita mé kjoa-ne, k'oaá ma-ne, 'aán kósiko-nò jé nachrjein xi jye nchrobá machraña nga s'e-la kjo'in nga títsa isò'nde k'e nga chít'aà yije xitá xi títsajna it'aà nangui.

¹¹ Kjoíí nitoón ijngoò k'a. Ndaà tikindaá ngats'ii kjondaá xi tjin-nò koni s'ín mokjeiin-nò mé-ne nga mì yá xi kjoaá'an-nò xi jñò jye kinikhijne.

¹² Jñà xi sikhijne-la ngats'ii kjoa ch'o xi tjin isò'nde, 'aán tsja jngoò-la j'nde ñanda kítsajna nga kjit'aà nachrjein k'oaá ngaya-la koni jngoò chrjó xi kosingui'ńó-la ya ni'ya tsjeè-la Nainá nga skijnoa 'ín-la xi Nainá xan-la kò 'ín-la naxandá-la Nainá, xi Jerusalén xitse 'mì xi kjinchrobà-ne ngajmii ñanda tjna Nainá, tikoá skijnoa 'ín xitse xi ts'an.

¹³ Ndaà tiná'yaà koni tsò Inima Tsjeè-la Nainá nga tíchja-la naxandá-na.”

Kjoa xi kisinè-la naxandá-la Cristo ján Laodicea

¹⁴ Chjí jngoò-la xojon jé àkjale-la naxandá-na xi tjna ján Laodicea: “Kíí tsò jé xi síjngoò yije 'én-la Nainá, jé xi ngui 'én kixi tsjá, jé xi ngui jé sobà kjoakixi, jé xi tsibits'ia ngats'ii xi tsibindaá Nainá. K'oaá tsò:

¹⁵ 'An, be-ná mé kjoa xi títsa'nè; mitsà 'nchán títsajnaà ni mitsà tsjè títsajnaà nga mitsà kondra títsajna-ná kò mitsà ndaà onguít'aà-ná. Ndaà-là tjin tsà ngui ndaà onguít'aà-ná kò tsà majin tsà ngui kondra títsajna-ná.

¹⁶ Tanga jñò, nga isò-nò, mitsà 'nchán títsajnaà ni mitsà tsjè títsajnaà, k'oaá ma-ne nga ndsoba skihisò-na.

¹⁷ Jñò k'oaá bixón: Xitá nchiná-nájen; ndaà títsajna-jen; nimé chijat'aà-najen. Tanga mikiì 'ya nga 'iín títsajnaà; nimé xi tjin-nò; xitá ima-nó; mikiì tsejèn-nò; laká títsjoò.

¹⁸ 'An, k'oaá xan-nò, 'aán tindát'aà-ná ton oro xi ni'ín kjòtsjeè-ne mé-ne nga xitá nchiná koma-nò. Tikoá 'aán tindát'aà-ná nikje tsjeè xi chroba kjoàn mé-ne nga mì kosobà-nò nga títsajna laká yijo-nò. Tikoá tinguioò xkiì colirio jñà xkoòn mé-ne nga ndaà kotsejèn-nò.

¹⁹ Ngats'ii xitá xi 'an matsjake, otiko-ná tikoá tsjaà-la kjo'in. Mochjeén-né nga tjiì-là nga'ńó yijo-nò; tíkájno jé-nò, kì tì jé binchaàtsji-nò.

²⁰ 'An, yaá tijnajtoa xotjoa ni'ya nga tìchjà; tsà tjin i'nga xi kji'nchré-na, koa tsà skíx'a xotjoa ni'ya-la, komaá kjoahas'en nga kókjen-koa, tìkoa jè, kòkjen-ko-na.

²¹ Jñà xi sikkijne tsjaà'nde-la nga ya kítsajnat'aà-na ñánda tjna íxile ts'e kjotíxoma-na koni s'ín 'an jye kisikijne nga yaá tijnat'aà-la Na'èn-na ñánda tjna íxile ts'e kjotíxoma-la.

²² Ndaà tina'yaá koni tsò Inima Tsjeè-la Nainá nga tìchja-la naxandá-na.”

4

Kós'ín yaxkón Nainá ján ngajmù

¹ Xi jye komà iskan, kiskoòtsejèn ján i'ngaá; kijtseè ngajmù nga tix'á jngoò xotjoa ko jè jta xi ki'nchrè ítjòn-la xi koa tsò koni chrjo trompeta, kitsò-na:

—Nchrobá mijin ijndé; kokoò-lè kjoa xi koma k'e nga jye komà yije kjoa xi tíma i'ndeji.

² Tà nitoón j'ii kanè ijngoò k'a-na jè nga'ño-la Inima Tsjeè-la Nainá; kijtseè jngoaa íxile xi tjna ngajmù ñánda tísatíxoma. Jé íxile jè, tjna jngoò xi ya tijnasòn.

³ Jè xi tijnasòn íxile nga tíhotíxoma, k'oaá kji ote tsejèn koni kji ndajo chjí xi 'mì jaspe, o koni kji ndajo chjí xi 'mì cornalina. Ya indii-la íxile sijnandi jngoò-la ijñe xi okji ote tsejèn koni kji ndajo chjí xi 'mì esmeralda.

⁴ Tiyaa-ne nga jngoò itjandi-la ñánda tjna xi tijnasòn íxile nga tíhotíxoma, kaàn ñijòn íxile 'ncha isa ñánda tísatíxoma, tìkoa kaàn ñijòn xita jchínga títsajnasòn xi nguì chroba kjoàn nikje xi kikjá; saà corona kicha oro tji'a skò.

⁵ Ya ñánda tjna xi tijnasòn íxile nga tíhotíxoma, bitjo ni'ín ch'on, ko ts'iin ch'on, tìkoa na'yà-la jta xi chja; itoò ni'ín xi síhiseèn títi ya nguixkon íxile; jñà ni'ín, jñà inima tsjeè-la Nainá xi itoò ma-ne.

⁶ Ya nguixkon jè xi tijnasòn íxile nga tíhotíxoma, kjiina jngoò ndáchikon xi koni kji chitsín kji xi 'ño ote.

Ya it'aà íxile ko ya indii-la, ñijòn ma xi títsajnakon; kóhokji ijton íts'in ko ya indso'ba, xki xi ján tjt'aà xkon.

⁷ Jè xi tjna ítjòn jñà xi títsajnakon, k'oaá kji koni kjoàn xa. Xi ma-ne jò, koni kji nchraja ki'ndí kji. Xi ma-ne jàn, isén-la xitaá tjin-la. Xi ma-ne ñijòn, k'oaá kji koni kji ja xi tsó'bajin isén.

⁸ Jñà xi ñijòn ma-ne xi títsajnakon nga jngoò ijngoò, joòn jngaá tjin-la. 'Nó kjin ma-ne xkon xi tjin nga jngoò itjandi-la ko iya-la. Mikiì síkjáya ko nachrjein ko nitjen nga tsò:

Tsjeè-né, tsjeè-né, tsjeè-né jè Na'èn-ná xi Nainá,

xi ta jè tajngoó xi 'ño tse nga'ño tjin-la,

jè xi tsibijna, jè xi tjna ko jè xi kjoí ijngoò k'a-ne.

⁹ Jñà xi títsajnakon nchitsjá-la kjoajeya, nchitsjá-la kjondaà, ko nchibeèxkón jè xi tijnasòn íxile jè xi tijnakon nita kjé-ne. K'e k'oa nchis'ín,

¹⁰ jñà xita jchínga xi kaàn ñijòn ma-ne bincha-xkó'nchi-ñiat'aà-la jè xi tijnasòn íxile tìkoa beèxkón-né jè xi tijnakon nita mé nachrjein-ne. Síksjoò corona-la ya nguixkon jè xi tijnasòn íxile nga tsò:

¹¹ Na'èn, ok'ín-lè nga ji tjoé-lè kjoajeya, nga jchaxkón-lè,

nga tsiji yije-né nga'ño xi tjin,

nga ji tsibindi ngats'ii tsojmì xi tjin,

nga k'oaá s'ín kjomejèn-lè nga tjin yije tsojmì

ko nga kisindaà kóhotjin xi tjin.

5

Xojon xi maxkóya ko jè Orrè

¹ 'An, kijtseè jè xi tijnasòn íxile nga tíhotíxoma, kjinaya tsja kixi jngoò xojon xi kjixkóya xi kitjeijno iya-la ko ngatsejèn-la ko itoò k'a tji'ño ñánda jncha-la sello nga jngoò ijngoò k'a.

² Kijtseè jngoàà àkjale xi tse nga'ño tjin-la, xi 'ño kiichja nga kitsò:

—Yá xi ok'in-la nga skix'a jè xojon koa komà-la kjoaáxin jña sello xi jncha-la.

³ Tanga niyá kisakò xi komà-la nga kiskix'a jè xojon, ni mìkii ma kotsejèn-la nga kot'aà kó tsò 'én xi tjit'aà; nijngoò kisakò ján ngajmii, nijngoò kisakò it'aà nangui, koa nijngoò kisakò ingui nangui.

⁴ An, 'ño kiskindàya nga ko ndáxkoaàn k'e nga kijtseè nga nijngoò kjòtsji xi ok'in-la nga kiskix'a jè xojon nga ma kot'aà kó tsò 'én xi tjit'aà.

⁵ Jña xita jchínga xi kaàn ñijòn ma-ne, jngoò xi kitsò-na:

—Ki chihindáya-jèn. Tjna xi 'mì: Xa-la xita naxandá Judá, xi tikoá 'mì: Tje-la xitaxá ítjòn David, nga jè xi jye kisikijne-la kondra-la. Jè xi ok'in-la nga skíndaya jè xojon koa koma kjoaáxin sello-la xi itoò ma-ne.

⁶ K'ée kijtseè jngoò Orrè nga síjna ya jngoò osen-la ñánda tjna xi tijnasòn íxile nga tíhotíxoma, ko ñánda títsajna jña xi ñijòn ma-ne xi títsajnakon, ko ñánda títsajna xita jchínga xi kaàn ñijòn ma-ne. Jè Orrè, k'oaá kji koni tsá jye k'en; itoò ma nchrajá-la tikoá itoò ma xkon; jña xkon, jña inima-la Nainá xi itoò ma-ne xi kinikasén nga títsa isò'nde.

⁷ Jè Orrè, kiskoé jè xojon xi kjinaya tsja kixi jè xi tijnasòn íxile nga tíhotíxoma.

⁸ Jè Orrè, k'e nga jye kiskoé xojon jè, jña xi ñijòn ma-ne xi títsajnakon ko jña xita jchínga xi kaàn ñijòn ma-ne chincha-xkó'nchi-ñiat'aà-la nga nguixkon Orrè. Ngats'ii saà ní'ño arpaá 'ya ko chitsín xi nguì oro xi tjíya chrjongó-la nainá. Jè chrjongó-la nainá jña xi kjoa bítsi'ba-la jña xita-la Nainá.

⁹ Kiseè jngoò sò xitse xi tsò:

Ok'in-lè nga ngaji chjoí jè xojon, chjaàxin sello-la nga ji kinik'en-lè, nga ko jni-lè tsibíchjítjì xita xi ya ítjokàjìin-ne ngats'ii tje-la xita xi tjin isò'nde, ngats'ii 'én xi tjin isò'nde, ngats'ii naxandá xi tjin, ko ngats'ii nangui xi tjin isò'nde mé-ne nga ya kichja-ne it'aà ts'e Nainá.

¹⁰ Ko xitaxá ítjòn ki'nì ko no'mii ki'nì nga ma silitasòn-la Nainá, koa jña kotixoma i it'aà nangui.

¹¹ K'e nga kiskoótsejèn, ki'nchrè jta-la jña àkjale xi kjiin jchán millón ma-ne xi nchiseè ya indiì-la ñánda tjna xi tijnasòn íxile nga tíhotíxoma ko ya ñánda títsajna jña xi títsajnakon ko jña xita jchínga.

¹² 'Ñó jchán nchichja nga tsò:

Jè Orrè xi kinik'en, ok'in-la nga jchaxkón nga ts'e yije-né nga'ño xi tjin, ko kjoa nchiná ko kjoa chjine, ko jè tsjá nga'ño, ndaà kàtayaxkón, jeya kàtìjna ko 'nga kàtìjna.

¹³ Ngats'ii xi xó kisindaà-ne xi tjin ngajmii, xi tjin i it'aà nangui ko ya ingui nangui, ko xi tjin jjiin ndáchikon, ki'nchrè-la nga tsò: Jè xi tijnasòn íxile ko Orrè, 'nga kàtìtsajna; kàtayaxkón, jeya kàtìtsajna, kàtas'e-la nga'ño nita mé nachrjein-ne.

¹⁴ Jña xi ñijòn ma-ne xi títsajnakon, kitsò:

—iK'oas'in kàtama!

Jña xita jchínga xi kaàn ñijòn ma-ne chincha-xkó'nchi-ñiat'aà-la nga jeya kisikijna jè xi tijnakon nita mé nachrjein-ne.

6

Sello xi itoò ma-ne

¹ K'ée kijtseè jè Orrè nga jaàxìn ítjòn jngoò sello. Ikjoàn ki'nchrè jngoò-la jñà xi ñijòn ma-ne xi títsajnakon nga kiichja. K'oaá kitsò koni ma ch'on nga one, kitsò:

—Nchroboí.

² Kiskoòtsejèn, k'ée kijtseè jngoò kohòyo xi chroba kji; jè xi tíjnakjá-la kohòyo, kjinaya tsja jngoò arco xi mochjeén k'e nga tjín kjojchán; ikjoàn kitjoé jngoò-la corona xi si'a sko xita k'e nga síkijne; kiì nga jye kisikijne mé-ne nga sùikijne isa-ne.

³ Jè Orrè, k'e nga jaàxìn sello xi ma-ne jò, ki'nchrè-la jè xi ma-ne jò xi títsajnakon nga kitsò:

—Nchroboí!

⁴ Kò ijngoò kohòyo itjo xi inì kji; jè xi tíjnakjá-la, kitjoé jngoò-la kichà ndojò xi 'ño je kji, tikoá kitjoé-la nga'ño nga kàtjaàxìn kjoa'nchán xi tjín ít'aà nangui mé-ne nga kàtasík'en-ne xíkjin jñà xita.

⁵ Jè Orrè, k'e nga jaàxìn sello xi ma-ne jàn, ki'nchrè-la jè xi ma-ne jàn xi títsajnakon nga kitsò:

—Nchroboí!

K'e nga kiskoòtsejèn, kijtseè ijngoò kohòyo xi jmà kji; jè xi tíjnakjá-la kohòyo, jngoò libra tjíya tsja jè xi machibaya-ne tsojmi.

⁶ Ki'nchrè jngoò-la jta ya jngoò osen-la jñà xi ñijòn ma-ne xi títsajnakon nga kitsò:

—Nga jngoò nisoò trigo, jngoò nachrjein chjí-la ch'nda tjín-ne. Kò nga jàn nisoò cebada, tikoá jngoò nachrjein chjí-la ch'nda tjín-ne. Kì tà nìkìts'ón-jen jè asitì kò vino.

⁷ Jè Orrè, k'e nga jaàxìn sello xi ma-ne ñijòn, ki'nchrè jta-la jè xi ma-ne ñijòn xi títsajnakon nga kitsò:

—Nchroboí!

⁸ Kiskoòtsejèn, kijtseè jngoàà kohòyo xi sinè kji. Jè xi tíjnakjá-la, Kjoabiyaà 'mì 'ín-la; ijngoò tjingui-la xi I'nde ts'e Mik'en 'mì. Kitjoé-la kjoatixoma nga ngats'ì xita xi tjín isò'nde, xi ñijòn xita, jngoò kiyá xi kjoa ts'e kjojchán, kjoa ts'e kjinchrá, kjoa ts'e ch'in kò kjoa ts'e cho ts'en xi tjín ijìn ijñá sùik'en.

⁹ Jè Orrè, k'e nga jaàxìn sello xi ma-ne 'òn, 'an kijtseè ya ingui ímixa tsjeè-la Nainá títsajna jñà xita xi kinik'en nga koií kjoa-la 'én-la Nainá, tikoá koií kjoa-la nga kixi kitsjaà 'én-la Nainá.

¹⁰ 'Ñó nchichja nga tsò:

—Nà'èn xi jì sabà tíhotixomai, jì xi nguì tsjeè tjini kò nguì kjokixi, skanda mé nachrjein kíndaajìn-la nga k'oi-la kjo'in jñà xita xi tjín ján isò'nde, jñà xi kisik'en-najen.

¹¹ K'ée kits'ì-la nikje xi chroba kjoàn, ki'mì-la nga kàtasíkjáya chiba nachrjein isa skanda k'e nga kojngoò jñà xi 'ndse joó ít'aà ts'e Cristo xi tikoá ngàsòn xá-la Nainá kiyajìn-ne.

¹² Jè Orrè, k'e nga jaàxìn sello xi ma-ne joòn, kiskoòtsejèn nga j'ì jngoò ch'ón xi 'ño ts'a. Jè ts'oi, jmà kji komà koni nikje jmà, kò jè sá, inì kji komà koni jní.

¹³ Jñà ni'ño xi tjín ngajmii, chixòt'aà nangui koni ma jñà toò ikò xkoén nga bixòngui k'e nga 'ño 'ba tjo.

¹⁴ Jè ngajmii, k'oaá s'ín kichijà koni jngoò xojon xi ma maxkóya; ngats'ì jñà nindoò kò nangui jìn-ndá xi tjín ijìn ndáchikon, jahatjìya-la ya j'nde ñánda títsajna.

¹⁵ Jñà xitaxá ítjòn xi tjín isò'nde, kò xita xi 'ño ndaà yaxkon-la, kò xita nchiná, kò xita sko-la soldado, kò xita xi tse nga'ño tjín-la, kò xita ch'nda, kò xita xi títsajnandeíí nga mitsà nei tjín-la, yaá tsibítsajna'ma ñánda tjín nguìjo kò naxi xi tjín-la nindoò.

¹⁶ Kitsò-la jñà nindoò kò jñà naxi:

—Tíkatsjònè-nájen yijo-nò, tijtsa'ma-nájen mé-ne nga mìkiì skoe-najen jè xi tíjnasòn íxile nga tíhotixoma kò tikoá kitsajna'ma-lajen kjoajti-la kò kjo'in xi tsjá jè Orrè.

17 Nga jye ijchò nachrjein-la Nainá kò Orrè nga kò kjojtì-la, 'ńó tse kjo'in tsjá. ¿Yá xi koma kichìkjoako-la?

7

Jñà chì'nda-la Nainá xi tjt'aa chiba-la

1 Xi jye komà iskan kjoa koi, 'an kijtseè ñijòn àkjale xi jncha kixi nga ñijòn chrjangui-la isò'nde xi nchibíchoàhikon-la tjo mé-ne nga mì tì kiì k'oa-ne ya isòn isò'nde kò isòn ndáchikon, tikoá nijngoò yá sùnyá-la.

2 Tikoá kijtseè ijngoà àkjale xi tinchrobá-ne ñánda bitjokàtji-ne ts'oi xi 'ya jngoò kicha ts'e Nainá xi tijnakon xi ma sit'aa chiba-la xita. 'Nó kiichja-la jñà àkjale xi ñijòn ma-ne xi jye kitjoé-la nga'ńó nga tsjá ch'in-la isò'nde kò ndáchikon.

3 Kitsò-la:

—Kì tà chja ch'in 'bì-lá isò'nde kò ndáchikon kò yá, skanda k'e-né nga jye sit'aa chiba-la ya tjen-la jñà xi chì'nda-la Nainá.

4 Kì'nchrè-la kótjín ma-ne jñà xita xi kisit'aa chiba-la, jngoò sìndo kò ichán ñijòn jmiì ma-ne, ngats'ì tje-la xita Israel.

5 Jñà ngats'ì tje-la xita koi xi kisit'aa chiba-la: jñà tje-la Judá, tejo jmiì ma-ne. Jñà tje-la Rubén, tejo jmiì ma-ne. Jñà tje-la Gad, tejo jmiì ma-ne.

6 Jñà tje-la Aser, tejo jmiì ma-ne. Jñà tje-la Neftalí, tejo jmiì ma-ne. Jñà tje-la Manasés, tejo jmiì ma-ne.

7 Jñà tje-la Simeón, tejo jmiì ma-ne. Jñà tje-la Leví, tejo jmiì ma-ne. Jñà tje-la Isacar, tejo jmiì ma-ne.

8 Jñà tje-la Zabulón, tejo jmiì ma-ne. Jñà tje-la José, tejo jmiì ma-ne. Jñà tje-la Benjamín, tejo jmiì ma-ne.

Xita xi kjín jchán ma-ne xi chroba kjoàn nikje xi íkjá

9 Xi jye komà, k'e nga kiskoòtsejèn, kjín jchán xita kijtseè; niyá xi maxkeya-la. Yaá títsajna xita xi ya inchrobàjìin-ne ngats'ì nangui xi tjin isò'nde, kò ngats'ì tje-la xita xi tjin isò'nde, kò títsajna xita xi chja ngats'ì 'én xi tjin, kò xita xi ya nchrobá-ne ngats'ì naxandá xi tjin. Jñà xita koi, 'ncha kixi-né nga nguixkòn xi tijnasòn íxile nga tíhotíxoma tikoá nga nguixkòn jè Orrè. Saà nikje chrobaá íkjá kò saà xkajén kjiya tsja.

10 Ngats'ì xita koi, 'ńó jchán nchichja nga tsò:

Jè Na'èn-ná xi Nainá xi tijnasòn íxile ñánda nga tíhotíxoma kò jè Orrè,

tsachrjekàjìin-ná kjo'in.

11 Ngats'ì jñà àkjale 'ncha kixi-né ya indii-la ñánda tíjna xi tijnasòn íxile nga tíhotíxoma kò ya ñánda títsajna jñà xita jchínga xi kaàn ñijòn ma-ne, kò jñà xi ñijòn ma-ne xi títsajnakon. Chíncha-xkó'nchi-ñiat'aa-la skanda it'aa nangui nga kijtseèxkón Nainá.

12 Kitsò:

K'oaá s'ín kàtama.

Nainá 'ńó tjin-la kjoa machikon-t'in, kò kjoa jeya, kò kjoa chjine,

tjin-la kjondaà, 'ńó 'nga tíjna, tse nga'ńó tjin-la,

kò tjin-la kjotíxoma.

K'oas'ín kàtama nita mé nachrjein-ne.

13 K'eé kiichja jngoò-na jñà xita jchínga, kitsò:

—Jñà xita xi chroba kjoàn nikje xi íkjá, ¿yá xita-ne, ñánda kòf'ì-ne?

14 An, kixan-la:

—Ngají tjiin-lè na'èn.

Jè kitsò-na:

—Jñà xita koi xi tsatojìin kjo'in jè nachrjein k'e nga 'ńó tse kjo'in kis'e. Kisìtsjeè nikje-la nga kò jní-la Orrè-la Nainá kisìchroba-ne.

¹⁵ Koií kjoa-la nga ya títsajna-ne nguixkɔn jè xi tíjnasòn íxile nga tíhotíxoma kɔ nachrjein kɔ nítjen sí's'in-la ya ingo-la. Jè xi tíjnasòn íxile yaá kíjnajiin osen kjit'aà-la nga síkinda.

¹⁶ Mì tì kiì kjinchrá síkjeiín-ne kɔ mì tì kiì koxínda-la. Kɔ mì tì kiì kɔkà-ne yijo-la jè ndobá-la ts'oi k'e nga 'ñó matsjè.

¹⁷ Nga jè Orrè xi tíjna jngoò osen-la ñánda tíjna xi tíjnasòn íxile nga tíhotíxoma, jè síkinda koni sí'n makinda orrè; jè kjoiko ñánda tíbitjo nandá xi tíjnakon. Nainá síxìjno yije ndáxkɔn jñà xítà koi.

8

Xi ma-ne itoò sello

¹ Jè Orrè, k'e nga jaàxìn jè sello xi ma-ne itoò, osen-la hora jñá kis'e ján ngajmii.

² Ikjoàn kítseè jñà àkjale xi itoò ma-ne xi 'ncha kixi nguixkɔn Nainá, jngoò chrjo trompeta kits'i-la nga jngoò lingoò.

³ K'é j'ii lingoò àkjale xi 'ya jngoò kicha xi nguì oro jè xi tjíya chrjongó-la Nainá. Tsasíjna kixi ya it'aà imixa tsjeè-la Nainá, ikjoàn tse chrjongó-la Nainá kits'i-la mé-ne nga ya kisijngoòko-ne jè kjoa bitsi'ba-la jñà xítà-la Nainá. Yaá tsaká ya isòn imixa tsjeè xi nguì oro xi tíjna ya nguixkɔn jè xi tíjnasòn íxile ñánda tíhotíxoma.

⁴ Jè ni'ndi-la chrjongó-la nainá kɔ kjoa bitsi'ba-la xítà-la Nainá tsijin-né ya tsja jè àkjale ya nguixkɔn Nainá.

⁵ Jè àkjale kiskoé jè kicha xi tíya chrjongó-la Nainá, chinchá-isa xá'í xi títisòn ya it'aà imixa tsjeè-la Nainá. Ikjoàn kisikatjen-sòn isò'nde; 'ñó kits'iin ch'on, kina'yà-la jta, ki'ya-la ni'in ch'on, kɔ ts'a ch'on.

Jñà chrjo trompeta

⁶ Jñà àkjale xi itoò ma-ne kɔ itoò chrjo trompeta tjíma'ya tsibítsajnandaà nga síkíndáya.

⁷ Jè àkjale xi síjna ítjòn kisikjindáya chrjo-la. Ikjoàn ts'a jtsi ndajo kɔ ni'in xi tsjájin jní; ján kisikasén it'aà nangui. Jè xi ma-ne jàn-ya-la isò'nde, jngoòya kitì; k'oa tì tjín kitì jñà yá; kitì yije xka xkoén.

⁸ Jè xi ma-ne jò àkjale kisikjindáya chrjo-la. Kɔ jngoò xi okji koni jngoò nindoò xi je kji xi títi, yaá kinikatjen-jíin ndáchikon. Nga jàn-ya-la ndáchikon, jngoòya, jní komà.

⁹ Jñà cho xi tjín-ngui ndáchikon, jngoòya k'en xi ma-ne jàn-ya cho. K'oaá tís'in komà jñà chitso, jngoòya chixoña xi ma-ne jàn-ya chitso.

¹⁰ Jè xi ma-ne jàn àkjale kisikjindáya chrjo-la. Jngoò ni'ño xi 'ñó je kji xi títjnga, kiskaàngui-ne ngajmii. Jè ni'ño jè, jngoòya xajngá nandá kiskaàjin xi ma-ne jàn-ya xajngá nandá kɔ ya ñánda títjo nandá.

¹¹ Jè 'ín-la ni'ño jè, xka tsja 'mì. Kɔ jè nandá, jngoòya kjòtsja, jè xi ma-ne jàn-ya nandá. Kjin jchán xítà k'en nga kjòtsja nandá.

¹² Jè xi ma-ne ñijòn àkjale kisikjindáya chrjo-la. Ikjoàn jngoòya kitsi'on jè ts'oi xi ma-ne jàn-ya yijo-la; kɔ k'oaá tís'in komà jè sá kɔ ni'ño. Ikjoàn kòjñò jngoòya jè ts'oi kɔ sá kɔ ni'ño. Koa jngoòya kòjñò jè nachrjein xi jàn-ya tjín-ne; kɔ k'oaá tís'in komà k'e nga nítjen; mì tì kiì kjòhiseèn-ne.

¹³ K'e nga kiskoòtsejèn, ki'nchrè jngoò-la ja xi kitoòtjen ján jjiin isén. 'Ñó kiichja nga kitsò:

—Ima xó-ne, ima xó-ne, ima xó-ne jñà xítà xi tjín ján isò'nde, taxki 'oón komat'in k'e nga skíndáya chrjo-la jñà àkjale xi nguì jàn chija-isa.

9

Chrjo trompeta xi ma-ne 'òn

¹ Jè xi ma-ne 'òn àkjale kisikjindáya chrjo-la; 'an kítseè jngoà ni'ño xi kiskaàngui-ne ngajmii skanda it'aà nangui. Ikjoàn kjòngatsja jè ibi ts'e nítjan.

² Kiskíx'a jè ñitjan. K'oaá s'ín itjo ñi'ndi koni tsà ts'e ngajá xi 'ño ìi kjoàn. Jè ñi'ndi xi itjo, kisijño jè ts'oi ko ijìin isén.

³ Jè ñi'ndi, yaá itjojìn cho langosta xi tsangason isò'nde; kits'i-là nga'ño nga ma-la k'oe-là xita koni cho na'yá xi tjín isò'nde.

⁴ K'oaá s'ín kisatiixoma-là nga mìkiì tsjá ch'in-là ngats'ìi xka ijña xi tjín isò'nde, ko nijngoò yá; tà jña xi koma tsjá ch'in-là jña xita xi tsjin-là chiba-là Nainá ya itjòn tjen-là.

⁵ Mikiì kitsjaà'nde-là nga sikk'en xita; tà kjo'ín 'òn sá tsjá-là; jè kjo'in xi tsjá, k'oaá ngayá-là koni k'e nga 'bé-là cho na'yá xita nga ijò 'beé.

⁶ Nachrjein koi, jña xita mejèn-là nga kiyá, tanga mìkiì sakò-là kós'ín sikk'en yijo-là. 'Ñó komejèn-là nga sikk'en yijo-là tanga mìkiì koma kiyá.

⁷ Jña cho langosta k'oaá kjoàn isén-là koni kjoàn kohoyo xi binchandaà-là kjojchán. Tjísòn sko koni corona xi nguì oro; isén-là xitaá tjín-là.

⁸ Tsja sko k'oaá kjoàn koni kjoàn ts'e íchjín; ñi'ño, k'oaá kjoàn koni ts'e xa.

⁹ Ya isòn inima-là k'oaá kjoàn xi kijtsa koni kicha tájaà xi síkjeén xita kjojchán; jña jngaá-là k'oaá s'ín na'yà-là nga one koni tsà 'ño kjin ma carreta xi bíndofe kohoyo nga ongachikon nga fi kjojchán.

¹⁰ Tjín nditsin koni cho na'yá ko tjín-là na'yá. Jña nditsin tjín-là nga'ño nga 'òn sá siki'on xita.

¹¹ Jè xi síjna sko-là cho langosta, jè àkjale ts'e ñitjan. Jè 'ín-là àkjale jè, xi 'én hebreo, Abadón 'mì, koa xi 'én griego, Apolión 'mì. [Jña 'ín koi, tsòyaá-ne: jè xi síkíts'óna.]

¹² Jyeé tsato kjo'in xi tjina itjòn xi taxki 'oon komàt'in xita; tanga nguì jò chija xi sa nchrobá.

Chrjo trompeta xi ma-ne joòn

¹³ Jè xi ma-ne joòn àkjale kisikjindáya chrjo-là; k'eé ki'nchrè jngoò-là jta xi ya itjojìn-ne nga ñijòn nchrajá-là jè imixa tsjeé xi nguì oro jè xi síjna nguixkon Nainá

¹⁴ nga kitsò-là jè àkjale xi ma-ne joòn, xi kjiya chrjo tsja:

—Chjìjnda'ño jña àkjale xi ñijòn ma-ne xi tjít'aà'ño ya chraña-là jè nandá xajngá je Éufrates.

¹⁵ K'eé kitjájnda'ño jña àkjale xi ñijòn ma-ne xi jye k'oas'ín títsajnaandaà jè hora, jè nachrjein, jè sá ko jè nó, mé-ne nga jngoòya sikk'en-ne xita xi ma-ne jàn-ya ngats'ìi xita xi tjín.

¹⁶ 'An, ki'nchrè-là kótjín ma-ne jña xita kjojchán xi kohoyo títsajnakjá-là; jò sìndo millón ma-ne.

¹⁷ K'oaá s'ín tsatsejèn-na jña kohoyo ko xita xi títsajnakjá-là nga kicha tájaà kijtsa inima-là xi inì kjoàn koni ni'ín, xi azul kjoàn koni zafiro, ko xi sinè kjoàn koni azufre. Jña sko kohoyo, k'oaá kjoàn koni sko xa; ko ya tso'ba, ni'ín bitjo, ñi'ndi bitjo, ko azufre bitjo.

¹⁸ Jè kjoa-là nga ingajàn kjo'in koi, jngoò ya k'en xita xi jàn ya ngats'ìi xita xi tjín. Jè kisik'en jè ni'ín, ñi'ndi ko azufre xi bitjo-ne tso'ba kohoyo.

¹⁹ Nga'ño xi tjín-là kohoyo, yaá tjí'a tso'ba ko itjòn nditsin, nga jña nditsin k'oaá kjoàn koni kjoàn ye; koa jña sko síki'on-ne jña xita.

²⁰ Jña xita xi tsiningui-ne xi mìkiì k'en k'e nga jye tsato yije kjo'in koi, mìkiì kisikájno jé-là nga mì tì jé kohótsji-ne; takó jña kijtseèxkón inima ch'o-là neíi, ko jña isén xi Nainá tsò-là xi kicha oro, plata, bronce, ndajo ko yá, jña xi mìkiì tsejèn-là ko xi mìkiì 'nchré ko xi mìkiì ma fi.

²¹ Jña xita koi, mìkiì kisikájno jé-là nga mì tì jé kohótsji-ne nga xita sík'en, nga ma-la bíndaà, ko nga kjoa chijngui s'ín, ko kjoa chijé.

10

Àkjale xi kjiya tsja jngoò xojon libro jtobá

¹ Ìjngoò àkjale kijtseè-isa xi tjin-la nga'ño xi tinchrobájen-ne ngajmii nga ifi tsátijno; jè sko kijnasòn jngoò ijñe; isén-la k'oaá kji koni ts'oi; jña ndsoko k'oaá s'in tsejèn koni tsà ni'in xi ncha kixi nga títi.

² Kjinaya tsja jngoò xojon xi jtobá kji xi jye kitjájndaya. Jè ndsoko kixi tsasíjnajiin ya ndáchikon ko jè ndsoko ngaskón tsasíjnasòn nangui.

³ K'oaá s'in 'ño kiichja koni tsò xa k'e nga kjindáya; k'e nga jye kiichja, itoò ch'on kina'ya jta-la nga tikoá kiichja.

⁴ K'e nga jye jane ch'on xi itoò kits'iin, 'an tijnandaà-ná nga mejèn-na sküjno jngoàà xojon, tanga ki'nchrè jngoò-la jta xi ngajmii inchrobà-ne xi kitsò-na:

—Jña 'én xi kàchja ch'on xi itoò kats'iin, 'maá tikíjni; kì xojoón bìt'iì.

⁵ Jè àkjale xi 'an kijtseè nga ya síjnajiin jngoò ndsoko ndáchikon ko xi jngoò ndsoko ya síjnasòn nangui, kiskímii'nga tsja kixi ján ngajmii,

⁶ kitsjaà 'én-la it'aà ts'e Nainá xi tijnakon nita mé nachrjein-ne, jè xi tsibíndaà ngajmii, nangui ko ndáchikon, ngats'iì tsojmì xi ya tjin, kitsò:

—Mì tì kii s'e isa-ne nachrjein.

⁷ K'e nga kichóya nachrjein-la nga koit's'ia jè àkjale xi ma-ne itoò nga sikkindáya chrjo-la, jè kjoa'ma-la Nainá kitasòn-né koni s'in kitsò jña xita chi'nda-la xi kiichja ngajo-la.

⁸ Jè jta xi ki'nchrè itjòn-la xi ngajmii inchrobà-ne, jngoò k'a kiichja-na kitsò:

—T'in, chjoí jè xojon xi jtobá kji xi jye kitjájndaya nga kjinaya tsja jè àkjale xi síjnaxixi isòn ndáchikon ko isòn nangui.

⁹ Kiikoaan jè àkjale, kixan-la:

—Tjiì-ná jè xojon jtobá xi kjinaya ndseji.

Kitsò-na:

—Chjoí, ikjoàn chinji; ján iya indso'boi kotsjaya-né, tanga ya i'a ndso'boi, ixii koma-lè koni tsà tsjén.

¹⁰ Kiskoé jè xojon xi kjiya tsja jè àkjale. K'e nga kiskínee, kisihixi'á ndsoba koni tsà tsjén; tanga ján iya indso'bà kjòtsja-né.

¹¹ Ki'mi-na:

—Mochjeén-né nga jngoò k'a kinókjoaya ngajo-la Nainá mé kjoa xi komat'in jña xita xi kjin naxandá nchróbà-ne ko xi kjin nangui chja-ne ko xi kjin skoya 'én chja, ko mé kjoa xi komat'in xitaxá itjòn xi tjin isò'nde.

11

Jò ma xita xi tsjá 'én it'aà ts'e Cristo

¹ K'ée kits'iì jngoò-na ya xi ma machibaya-ne, xi k'oa kji koni kjoàn yá nise. Ki'mi-na:

—Tisítjiin, tichibayi jè ingo itjòn-la Nainá ko jè imixa tsjeè-la. Tixkeyi kótjín ma-ne jña xita xi ya beèxkón Nainá.

² Jè nditsin xi kijnat'aà-la ingo, kì kii nìchibayi nga jña kitjoé-la xi taxki xita xi mìtsà xita judío. Jña xita koi, ichán jò sá kotixoma ya Jerusalén xi i'nde tsjeè-la Nainá.

³ Aán sikkasén ingajò xita-na xi tsjá 'én it'aà ts'an nga kichjaya jngoò jmii ko jò sindo ko jàn-kaàn nachrjein; ko jña nikje xi kokjá, nikje jmà kjoàn xi ts'e kjoaba.

⁴ Jña ingajò xita xi tsjá 'én, jña-né ingajò yá olivo ko ingajò kichá candelero xi jncha kixi nguixkon Nainá xi otixoma-la isò'nde.

⁵ Tsà yá xi mejèn-la siki'on xita koi; ni'in kochrje tso'ba xi jngoò k'a koka jña xi kondra-la. K'oaá s'in kiyá yije, nita yá-ne xi mejèn-la siki'on.

⁶ Jña xita koi tjin-la nga'ño nga ma-la kiichjoà-la ngajmii mé-ne mì tì kii k'oa-ne jtsí jña nachrjein k'e nga kichjaya. Tikoáá tjin-la nga'ño it'aà ts'e nandá nga ma-la nga jni s'iin; ko komaá-la kjin skoya kjo'in tsjá-la xita isò'nde; komaá-la nga kos'in s'iin nita kótjín k'a mejèn-la nga s'iin.

⁷ Ingajò x̄ita koi, k'e nga jye tsjá 'én-la, jè cho je xi ch'o kji xi bitjomijìn-ne ya nitjan jñò, skaàn-ko-né, ko s̄ikijne-la, ikjoàn kiyá ingajò x̄ita koi.

⁸ Jñà yijo-la x̄ita koi, yaá siyijò osen nditsin-la naxandá ítjòn, ñánda kisit'aà krò Nà'én-ná. Jè 'ín-la naxandá ítjòn xi okji, k'oaá s'ín ngaya-la koni Sodoma, o Egipto.

⁹ X̄ita xi ya inchrobàjiìn-ne naxandá xi tjín isò'nde, ko ngats'ì tje-la x̄ita xi tjín isò'nde, ko x̄ita xi chja ngats'ì 'én xi tjín, ko x̄ita xi ya nchrobá-ne ngats'ì nangui xi tjín isò'nde, ján nchrjein osen skótsejèn-jno yijo-la mik'en; ko mìkiì tsjá'nde nga s̄ijjìn jñà x̄ita koi xi jò ma-ne.

¹⁰ Jñà x̄ita xi tjín isò'nde kotsjaá-la nga jye k'en x̄ita koi; tsjá kjotjò-la tsojmì x̄ita xíkjin. Koi k'oas'ín s'iin-ne nga jñà ingajò x̄ita xi chja ngajo-la Nainá, tsee kjo'in tsjá-la jñà x̄ita isò'nde.

¹¹ K'e nga jye tsato xi jàn nchrjein osen, jè Nainá kisikítsajnakon ìjngoò k'a-ne nga jaáya-la; ikjoàn chinchá kixi ìjngoò k'a-ne; ko ngats'ì x̄ita xi kijtsee, 'ñó jchán kitsakjòn.

¹² Ingajò x̄ita koi kii'nchré jngoò-la jta xi 'ñó kii'chja xi ngajmii inchrobà-ne, kitsò-la:
—Nchrobá-mijìn-jno ijndé.

Ikjoàn kii'mijìn-jjìn ifi ján ngajmii. Ngats'ì jñà x̄ita kondra-la kijtsee-né.

¹³ Tik'eé-ne j'ì jngoò ch'ón xi 'ñó jchán ts'a; jngoò ya naxandá chixoña xi ma-ne te ya kóhokji naxandá; ko jè kjoa-la ch'ón, itoò jmii x̄ita k'en. Jñà x̄ita xi tsiningui-ne, ndaa jchán kitsakjòn. Ikjoàn kii'chjat'aà-la Nainá xi tjina ngajmii nga jeya kisikijna.

¹⁴ Jyee tsato kjo'in xi ma-ne jò xi taxki 'oón komát'in x̄ita; tanga nchrobá nitoón xi ma-ne jàn k'a.

Chrjo trompeta xi ma-ne itoò

¹⁵ Jè xi ma-ne itoò àkjale kisikjindáya chrjo-la; kjín jchán jta kina'ya-la ngajmii xi 'ñó kii'chja nga kitsò:

Jñà kjotixoma xi tjín isò'nde,

jyee ts'e Nà'én-ná xi otixoma-ná ko jè Cristo xi xó kinikasén-ne.

Jè kotixoma n̄ita mé nchrjein-ne.

¹⁶ Jñà x̄ita jchínga xi kaàn ñijòn ma-ne, xi títsajnanè íxile nga nguixkon Nainá, chinchá-xkó'nchi-ñiat'aà-la nga kijtsee'xkón Nainá.

¹⁷ Kitsò:

Nà'én xi Nainá 'mì-lè.

Ndaà chjí-lè nga ta ji ta jngoò-né xi 'ñó tse nga'ñó tjín-lè,

ngaji xi tijni i'ndeji,

ko xi tijni skanda kjòtsee,

[ko xi sa kjoji ìjngoò k'a-ne].

Ti'biì-lèjen kjondaà nga jyee kachjoi nga'ñó xi tjín-lè;

ko jyee kòbíts'ji nga ji tìhotixomai.

¹⁸ Jñà x̄ita xi taxki x̄ita xi mìtsà x̄ita judío jyee kòjti-la;

tanga jyee ijchò nchrjein-la kjojti-lè k'e nga ji k'oi-la kjo'in x̄ita koi,

jè nchrjein k'e nga ji kíndaàjiìn-la jñà x̄ita xi jye k'en

ko k'oi-la kjotjò xi ok'in-la nga tjoé-la x̄ita ch'inda-lè xi kii'chja ngajo-lè

ko jñà x̄ita-la Nainá ko ngats'ì xi beèxkón-lè,

jñà xi jtobá kjoàn ko x̄ita jchínga.

Sikjehesoìn jñà x̄ita xi ma-la sikjehesoìn x̄ita naxandá isò'nde.

¹⁹ Ján ngajmii kitáx'a i'nde tsjeè-la Nainá; ya iya i'nde tsjeè-la ki'ya-la jè kaxa ts'e kjoa xi tsibíndaàjiìn Nainá ko jñà x̄ita. Ikjoàn jate ni'ín ch'ón, kina'ya-la jta, kits'iin ch'ón, ts'a ch'ón, ts'a jtsí ndajo xi 'ñó tsiaàn kjoàn.

12

Jè chjoón ko jè ye

¹ Ján ngajmiì tsatsejèn jngoò kjojkón. Jngoò chjoón ki'ya-la; jè ts'oi xi ma nikje-la. Jè sá yaá tíjna ingui ndsoko, kò jngoò corona tji'a sko xi tejò ni'ño tjit'aà.

² Jè chjoón, ki'ndí 'ya. 'Ñó jchán kjindáya nga jye machraña nga jts'in ki'ndí-la; tseé kjo'in tísikjeiín nga jye ijchò chiba-la nga jts'in ki'ndí-la.

³ Ján ngajmiì jngoò kjojkón tsatsejèn. Jngoò ye xi 'ño je kji tsatsejèn. Inì kji, itoò ma sko, kò jngoò corona itsé tji'a nga jngoò jngoò sko. Tikoáá te ma nchrajá-la.

⁴ Jè nditsin ye, jngoò ya ni'ño tsibíndofe xi ma-ne jàn ya ngats'iì ni'ño xi tjin ngajmiì, ikjoàn tsibítsjot'aà nangui. Jè ye je, tsasijnat'aà-la jè chjoón xi tí'beé ki'ndí mé-ne nga skine-ne ki'ndí-la k'e nga jye jts'in.

⁵ Jè chjoón, tsi'beé jngoò ki'ndí x'in nga jè kotixoma-la ngats'iì naxandá xi tjin isò'nde koni jngoò xita xi yá kicha kjiya tsja nga kinè-la kjo'in xita xi mikì 'nchréñijon-la. Tanga jè ki'ndí-la chjoón, kitjá'an-la; yaá kiìko ñánda tíjna Nainá nga tíhotixoma.

⁶ Jè chjoón, tsanga-né. Ján kiì i'nde it'aà xìn ñánda nangui kixì choòn, ñánda nga Nainá tsibijnandaà jngoò-la i'nde nga ya katjiì-la tsojmi xi skine. Jngoò jmiì kò jò sindo kò jàn-kaàn nachrjein kijná.

⁷ Xi jye komà iskan, ján ngajmiì kis'e kjojchán. Jè àkjale Miguel kò àkjale-la kiskaàn-kjoòkò jè ye je. Kò jè ye je, kò àkjale-la nas'in 'ño kiskaàn-kjoò,

⁸ tanga mikì kisikijne-la, kò mì tì mé i'nde kis'e-la ján ngajmiì.

⁹ K'oaá s'in komà nga itjokàjìin ngajmiì jè ye jchinga xi 'mì Xita Neí kò xi 'mì Satanás xi konachan-la ngats'iì xita isò'nde. Kinìkatjengui ya it'aà nangui kò àkjale-la.

¹⁰ Ki'nchrè jngoò-la jta ján ngajmiì xi 'ño kiichja xi tsò:

—I'nde jyeé ijchò nachrjein nga kitjokàjìin kjo'in xita xinguiáá nga kò nga'ño-la Nainá nga jè kotixoma kò kjotixoma xi tjin-la Cristo [xi Nainá xó kisikasén-ne], koií kjoa-la nga jye kànikatjengui jè xi kò nachrjein kò nitjen tsját'in 'én ndiso xita xinguiáá nga nguixkon Nainá.

¹¹ Jña xita xinguiáá, nga nguì koó nga'ño xi tjin-la jní xi tsibíxteèn jè Orrè kisikijne-la kò nguì koó jña 'én xi kitsjaà it'aà ts'e Nainá. Mikì kitsakjòn-la nas'in kinik'en.

¹² Tsja kàtas'e-la ngajmiì kò jña xi ya títsajna. Tanga ima xó-nò jño xi ya titsajnaà it'aà nangui kò xi titsajnaà ya jjiin ndáchikon nga jè xita neí jyeé ijchòjen-tjingui-nò kò 'ño jti tjin-la nga jyeé tíjiin-la nga ta chiba nachrjein kijná-isa.

¹³ Jè ye xi 'ño je kji, k'e nga kinìkatjengui it'aà nangui, tsangatjingui-la jè chjoón xi tsi'beé ki'ndí x'in.

¹⁴ Tanga jè chjoón, jò jngaá ts'e ja kits'iì-la xi 'ño iì kjoàn mé-ne koma tótjen-ne nga konga-la jè ye xi je kji. Ján kiì kijná ya i'nde it'aà xìn ñánda nangui kixì choòn. Jàn nó osen kijná nga kòkinda nga tjoé-la tsojmi xi skine.

¹⁵ Jè ye xi je kji, tsachrje nandá tso'ba nga ndána koma mé-ne nga koma kichrjoako-ne jè chjoón.

¹⁶ Tanga jè nangui kisichját'aà-la jè chjoón; kitáx'a, kits'iì ndána xi jè ye tsachrje tso'ba.

¹⁷ Jè ye isaá 'ño kjòjtikeé jè chjoón. Kiì tjingui kondra-la jña xita tje-la chjoón nga kiìkjaán-kò jña xi síkitasòn kjotixoma-la Nainá kò jña xi ndaà tsjá 'én it'aà ts'e Cristo.

¹⁸ Jè ye, yaá tsibijnajìin tsojmi xi 'ncha iindii ndáchikon.

13

Jò cho iì xi ch'o kjoàn

¹ Kijtseè jngoàà cho je xi ch'o kji xi itjo-mijìin-jìin-ne ndáchikon xi itoò ma sko; te ma nchrajá-la; jngoò corona itsé tji'a nga jngoò jngoò nchrajá-la; jña sko tjit'aà 'ín xi Nainá chajno-la.

² Jè cho je xi ch'o kji xi 'an kijtseè, k'oaá kji koni kjoàn xa indo; k'oaá kjoàn ndsoko koni ts'e cho oso; k'oaá kji tso'ba koni tso'ba xa. Jè nga'ño xi tjin-la jè ye, kò jè i'nde-la ñánda tíhotixoma, kò jè kjotixoma-la xi 'ño tjin, jè cho ts'en kjòngatsja.

³ Ñó tse kitii jngoò skò jè cho je xi ch'o kji; k'oaá kji komà koni tsà jye kiyá; tanga jè skò xi ñó tse kitii, kjòndaà-ne. Ngats'ii xita xi tjín nga tíjtsa isò'nde, tà kjòxkón-la kjoa xi komà, kò yaá kiitjinguí-la jè cho ts'en.

⁴ Ngats'ii xita kijtseèxkón jè ye, nga jè ye kitsjaà-la kjotíxoma xi tísíkjeén jè cho ts'en. Jñà xita tikoaá kijtseèxkón jè cho je xi ch'o kji. Ikjoàn kitsò:

—Tsjín ìjngoò isa koni jè cho je xi ch'o kji; mì yá tjín xi kichikjoa-la nga skaàn-kò.

⁵ Jè cho ts'en kitjò'ndeé-la nga kiichja 'én xi 'nga síkíjna yijo-la nga chjajno-la Nainá. Tikoaá kits'ii'nde-la nga ichán jò sá kotíxoma.

⁶ K'oaá s'ín kis'iin; kiichjajno-la Nainá, kiichjajno-la 'ín-la Nainá kò Ni'ya Tsjeè-la, kò kiichjajno-la jñà xita xi títsajna ngajmii.

⁷ Tikoa kitjò'ndeé-la nga kiskaàn-kò xita-la Nainá skanda kó nga kisikijne-la. Ikjoàn kits'ii-la kjotíxoma it'aà ts'e ngats'ii tje-la xita, kò it'aà ts'e ngats'ii naxandá xi tjín, kò it'aà ts'e ngats'ii xita xi chja ngats'ii 'én xi tjín, kò it'aà ts'e xita xi tjín nga ìjngoò ìjngoò nangui xi tjín isò'nde.

⁸ Ngats'ii xita xi tjín nga tíjtsa isò'nde, jè cho ts'en skoexkón, jñà ngats'ii xita xi mìkii tíjt'aà 'ín-la nga tisa tàts'en-la kjoa, jè xojon xi ts'e kjoabinachon xi ts'e Orrè-la Nainá xi k'en ngajo-la xita.

⁹ Ndaà tiná'yaà koni xan-nò.

¹⁰ Jè xi ndayá kjis'en, k'oaá s'ín tjínè-la nga ndayá kjoí. Jè xi kicha ndojò kiyá-ne, k'oaá s'ín tjínè-la nga kicha ndojò kiyá-ne. Íí mochjeén nga kixi kítsajna kjit'aà kò nga kichikjoako-la kjo'in jñà xita-la Nainá.

¹¹ Xi komà iskan kijtseè ìjngoàà cho je xi ch'o kji xi itjo mijín-ne jjiin nangui. Jò ma nchrajá-la xi k'oa kjoàn koni nchrajá-la orrè. K'oaá s'ín chja koni jngoò ye xi ñó je kji.

¹² K'oaá s'ín tjín-la kjotíxoma koni jè cho je xi ch'o kji xi tjína ítjòn nga ya síjna nguixkón. Bínè-la xita xi tjín isò'nde nga kàteèxkón jè cho je xi ch'o kji xi tjína ítjòn, jè xi kjòndaà-ne ñánda 'ñó tse kitii jngoò skò.

¹³ Tikoaá maá-la kis'iin kjoxkón xi 'in tjín. Skanda maá-la kisikjinchrobà-jen ni'ín xi ngajmii nchrobá-ne skanda it'aà nangui nga nguixkón xita.

¹⁴ Kiskoònachan-la xita xi tjín isò'nde, koií kjoa-la jñà kjoxkón xi kits'ii'nde-la nga kis'iin nguixkón cho je xi ch'o kji xi tjína ítjòn. Tsibít'in-la xita nga kátíndaà jngoò xkósòn-la jè cho xi tjína ítjòn xi kicha ndojò kitii-ne skò tanga jaáya-la.

¹⁵ Jè cho xi ma-ne jò kits'ii-la nga ñó nga kisikíjnakon jè xkósòn-la cho xi kisindaà, mé-ne nga koma kichja-ne kò ngats'ii xita xi mìkii skoexkón sùk'en-ne.

¹⁶ K'oaá s'ín tsibínè-la nga kàtasit'aà chiba-la jñà xi xita ixti, jñà xita jchínga, jñà xita nchiná kò jñà xita ima, jñà xita xi títsajnandejí kò xi chí'nda títsajna'ñó. Yaá kàtasit'aà chiba-la ya tsja kixi kò tsà ya ítjòn tjen-la.

¹⁷ Nijngoò xita xi ma kotse tsojmì, nijngoò xi ma kotíjna tsà mìkii tíjt'aà chiba-la kò tsà jè 'ín-la cho mìkii tíjt'aà-la kò tsà mìkii tíjt'aà-la número ts'e 'ín-la cho.

¹⁸ Ijndé mochjeén kjoachjine-la xita; jè xi ndaà machiya-la, kátíxkeya número-la cho je xi ch'o kji; ts'e xita-né. Jè número: joòn sìndo kò jàn kaàn kò joòn.

14

Jè Orrè-la Nainá kò jñà xita xi jngoò sìndo kò ichán ñijòn jmii ma-ne

¹ Xi komà iskan, kiskoòtsejèn, kijtseè jè Orrè, nga síjnaxixi isòn nindoò Sión kò xita xi jngoò sìndo kò ichán ñijòn jmii ma-ne xi tíjt'aà ítjòn tjen-la 'ín-la Orrè kò ts'e Na'èn-la.

² Ki'nchrè jngoò-la jta xi ngajmii nchrobá-ne xi 'ñó tíhone koni ma nandá k'e nga 'ñó maje, koni ma nga faáya-la ch'on k'e nga jye ts'iin; k'oaá s'ín ki'nchrè-la koni tsà kjín ma xita xi síkjane ní'ñó arpa.

³ Tína'ya jngoò-la sò xitse nga tíjnda nguixkón jè xi tíjnasòn íxile nga tíhotíxoma, kò ya nguixkón xi ñijòn ma-ne xi títsajnakon kò ya nguixkón jñà xita jchínga. Niyá xi ma-la seè

jè sò xi tǐjnda, ta jǎà-né xi jngoò sìndo kò ichán ñijòn jmiì ma-ne, jǎà xi jye itjokàjiìn kjo'in ya isò'nde.

⁴ Jǎà xǐta koi, mìtsà íchjín tsibìtsajnakò, nguì tsjeè kisìjchá yijo-la. Jǎà-né xi fi tǐngui-la Orrè nǐta ñánda-ne nga fi. Jǎà-né xi itjokàjiìn ítjòn kjo'in ngats'ìi it'aà ts'e xǐta xi tǐjín isò'nde, mé-ne nga koma kongatsja ítjòn-ne Nainá kò Orrè.

⁵ Nìmé 'én ndiso kiìchja, kò nìmé jé tǐjín-la nga nguixkòn Nainá.

Àkjale xi jàn ma-ne

⁶ Kǐtseè ìjngoàà àkjale xi tsó'bajiìn isén nga tífiko 'én ndaà-la Nainá xi tǐjín nǐta mé nachrjein-ne nga keènojmi-la jǎà xǐta xi tǐtsajna isò'nde, ngats'ìi xǐta xi tǐjín nga ìjngoò ìjngoò nangui, ngats'ìi tje-la xǐta, ngats'ìi xǐta xi chja ngats'ìi 'én xi tǐjín, kò ngats'ìi xǐta xi tǐjín nga ngats'ìi naxandá xi tǐjín isò'nde.

⁷ 'Nó chja kitsò:

—Jchaxkón Nainá, jeya tǐkǐjna; jye ijchò nachrjein-la nga kojindaàjiìn. Jchaxkón jè xi tsibíndaà ngajmiì, xi tsibíndaà nangui, xi tsibíndaà ndáchikon kò ñánda tíbitjo nandá.

⁸ Ìjngoò àkjale kiìchja xi kitsò:

—Jyeé kakaàngui, jyeé kakaàngui Babilonia, naxandá xi 'ño je kji, jè xi bít'in-la naxandá xi tǐjín isò'nde nga [kj'eíi nainá fit'aà-la] koni s'ín xǐta k'e nga kjoachijngui s'ín. Koni s'ín kis'ìin, k'oaá ngaya-la koni tsà kisìch'i yije xǐta isò'nde jè xán ts'e kjoachijngui-la xi tǐjiko kjojtì-la Nainá.

⁹ Ìjngoò àkjale tsatsejèn xi ma-ne jàn xi 'ño chja nga kitsò:

—Tsà yá xi skoexkón jè cho je xi ch'o kji kò isén xkósòn-la, tsà tǐkoa sít'aà chǐba-la ítjòn tǐjén-la, o tsà tsja,

¹⁰ Nainá tsjá-la kjo'in, k'oaá ngaya-la koni tsà vino skoí xi tǐjiko kjoajti-la Nainá. Nga jè sobà Nainá jyeé tsibíndaà jngoò chǐtsín vino xi 'ño kjaán mé-ne nga kòkò-ne kjoajti-la nga s'e-la kjo'in jjiìn ni'ín azufre xi 'ño tsjè títi. Tíkotsejèn àkjale tsjeè kò Orrè.

¹¹ Jè nǐ'ndí-la ts'e kjo'in-la, kjit'aá nachrjein nǐta kjé-ne nga kǐtjomijìn. Mikìi sǐikjáya kò nachrjein kò nǐtjén jǎà xǐta xi jè cho ts'en kò isén xkósòn-la beèxkón, jǎà xi tǐkoa tǐjít'aà chǐba-la kò 'ín-la jè cho je xi ch'o kji.

¹² Íjndé nga mochjeén nga kàtachíkjoa-la nǐta mé kjoa-ne jǎà xǐta-la Nainá xi síkitasòn kǐotixoma-la kò xi ndaà mokjeíin-la ít'aà ts'e Jesús.

¹³ Kì'nchrè ìjngoàà 'én xi ngajmiì inchrobà-ne xi kitsò-na:

—Chjí, tít'eìi xojoñ: “Jǎà nachrjein xi fi-isa, mé tà ndaà-la jǎà xǐta xi kǐyá nga mokjeíin-la ít'aà ts'e Na'èn-ná.” K'oaá tsò Inìma Tsjeè-la Nainá: “Kixíi kjoa, jǎà xǐta koi sǐikjáya-né kjoa ts'e xá-la; ján ngajmiì, jchaá-la ngats'ìi kjoa xi ndaà kis'ìin.”

K'e nga maxkó tsojmì xi jye kòjchá ya ít'aà nangui

¹⁴ K'e nga kiskoòtsejèn, kǐtseè jngoàà ifi xi chroba kji, ya isò'nga ifi tǐjna jngoò xi k'oa kji koni kǐ'ndí-la xǐta. Jngoò corona xi nguì oro tǐj'a sko, kò jngoò kǐchǎ libá kjiya tsja xi 'ño yijò kji.

¹⁵ Ìjngoò àkjale itjo ya ì'nde tsjeè-la Nainá xi 'ño chja, kitsò-la jè xi tǐjnasòn ifi:

—Tǐts'ii nga tǐxákoi kǐchǎ libá-lè; tǐchásòin, kò tǐkoi kóhotjín tsojmì tjè xi tǐjín ít'aà nangui nga jye kòjchá yije; kò jyeé ijchò nachrjein-la nga sincháxkó.

¹⁶ Jè xi tǐjnasòn ifi, tsibíts'iaako kǐchǎ libá-la ya isòn nangui nga tsatesòn tsojmì tjè-la isò'nde, ìkjoàn chincháxkó.

¹⁷ Ìjngoò àkjale itjo ya ì'nde tsjeè-la Nainá xi kǐjna ngajmiì xi tǐkoa kǐchǎ libá kjiya tsja xi 'ño yijò kji.

¹⁸ Ìjngoò àkjale itjo-ne ít'aà ímìxa tsjeè-la Nainá, jè xi síkinda ni'ín. 'Nó kiìchja-la jè àkjale xi kǐchǎ libá kjiya tsja; kitsò-la:

—Tits'ii nga tixákoji kicha libá-lè xi 'ńó yijò kji; tichát'eì 'én-la jǎa toò uva xi tǐn it'aà nangui, nga jǎa toò-la jye kichji.

¹⁹ Jè àkjale tsibíts'iāko kicha libá-la nga tsatet'aà toò-la jǎa yá uva; ikjoàn kisikatsjōya ya ñánda nga ma binchanè toò uva. Kjoa koi, jè okó kjoajti-la Nainá.

²⁰ Mítsà ya ijìin naxandá kisinè jǎa toò uva; ján indiì naxandá kisinè; k'e nga jye kisinè, jní itjo ñánda nga kisinè; 'ńó tse jní itjo skanda ijchò kangui-la kó kji 'nga tǐna freno xi tǐ'a tso'ba kohòyo ko jàn sìndò kilómetro tsangasòn.

15

Itoò ma àkjale xi itoò kjo'in j'iīko

¹ Ijngoò kjōxkón kǐtseè ján ngajmì xi 'ńó xkón kji ko 'ńó jeya ki'ya-la. Itoò ma àkjale xi itoò kjo'in j'iīko jǎa kjo'in xi fehet'aà-ne nga yaá fehet'aà-ne kjoajti-la Nainá.

² Tikōa kǐtseè jngoàà ndáchikon xi chǐtsín kji; tsjájìin ko ni'ín. Ya ncha kixi isòn ndáchikon xi chǐtsín kji, jǎa xita xi jye kisikijne it'aà ts'e cho je xi ch'o kji ko isén xkósòn-la, jǎa xi mìkì kitsjá'nde nga kisi't'aà chiba-la, ko número ts'e 'ín-la. Xita koi kjiya tsja ní'ńó arpa xi Nainá kitsjaà-la.

³ Nchiseè sò-la Moisés xi chì'nda-la Nainá ko sò-la Orrè, nchitsò: Na'èn xi Nainá 'mì-lè, xi ta jì ta jngoò-né xi 'ńó tse nga'ńó tǐn-lè, 'ńó jeya ko 'ńó xkón tǐn ngats'iī kjoa xi 'nì. Xita kixi-né; kixi tǐn ndiyá-lè.

Jí-né xi Xitaxá Ítjòn tǐna-la ngats'iī naxandá xi tǐn isò'nde.

⁴ ¿Yá xi mìkì tsakjón-lè Na'èn?

¿Yá xi mìkì skoexkón-lè?

Tajngoò ngaji xi xita tsjì,

koi k'oas'ín kjoì-ne ngats'iī naxandá-la isò'nde nga skoexkón-lè nga jye tí'ya-la kjoa kixi-lè.

⁵ K'e nga jye kǐtseè kjoa koi, kiskoòtsejèn nga kitáx'a ján ngajmì jè i'nde tsjeè-la Nainá xi tǐnaya iya Ni'ya Nikje xi okó nga ya tǐna Nainá.

⁶ Itjo ya i'nde tsjeè-la Nainá jǎa àkjale xi itoò ma-ne xi j'iīko itoò kjo'in. Íkjá nikje lino chroba xi 'ńó ote kjoàn; tǐkjá ndáyá-la na'ńó payo xi ngui oro.

⁷ Jǎa xi ñijòn ma-ne xi tǐtsajnakon, jngoò itjoiin xi kisìngatsja nga íjngó íjngó àkjale xi itoò ma-ne; kitsjaà íjngó íjngó-la chǐtsín xi ngui oro xi ya tǐya kjo'in ts'e kjoajti-la Nainá xi tǐnakon nita mé nachrjein-ne.

⁸ Ya iya i'nde tsjeè-la Nainá, kitseè ni'ndi xi ya inchrobà-ne it'aà ts'e kjoajeya-la Nainá ko nga'ńó xi tǐn-la. Niyá xi kitjò'nde-la nga jahas'en ya i'nde tsjeè-la Nainá skanda k'e nga jye tsitasòn yije jǎa kjo'in xi itoò ma-ne xi j'iīko jǎa àkjale xi itoò ma-ne.

16

Chǐtsín xi itoò ma-ne

¹ Ki'nchrè jngoàà 'én xi ya itjo-ne i'nde tsjeè-la Nainá nga kitsò-la jǎa àkjale xi itoò ma-ne:

—Tanguió, tíxteèn-sòn isò'nde jǎa xi tǐya chǐtsín xi itoò ma-ne, kjo'in xi tǐko kjoajti-la Nainá.

² Kiī jè àkjale xi tsako ítjòn-la. Tsibíxteèn-sòn isò'nde xi tǐya chǐtsín-la. Ngats'iī xita xi tǐn-la chiba-la cho ts'en ko xi beèxkón jè isén xkósòn-la jè cho je xi ch'o kji, tsako-la ch'in xajtsé xi 'ńó ch'o kjoàn ko ijò jchán ma.

³ Jè àkjale xi ma-ne jò tsibíxteèn-jìin ndáchikon xi tǐya chǐtsín-la. Ko jè ndáchikon, ngui jní komá, koni tsá ya k'en-jìin xita. Ngats'iī xi tǐtsajnakon ya ijìin ndáchikon jngoò k'aá k'en.

⁴ Jè àkjalẹ xi ma-ne jàn, tsibíxteèn-jìin ya xajngá nandá kọ ñánda tíbitjo nandá, jè xi tjíya chĩtsín-là. Saà ní komà.

⁵ Ikjoàn ki'nchrè-là jè àkjalẹ xi ts'e nandá, kitsò:

—Ngaji Na'èn, t́jín-lè kjoakixi, nga k'oaá s'ín kits'ì-là kjo'in j́nà xitá it'aà ts'e kjoa koi, nga jíí xi xitá tsjeè 'mì-lè, jíí xi tijni skanda kjòtseé, tijni skanda i'ndeí.

⁶ Nga j́nà xitá koi tsibíxteèn j́n-là xitá-lè nga j́nà kisik'en, kọ xitá xi kùichja-ngajo-lè. I'ndeí ngaji k'oaá tís'ín tì'biì ngajo-là j́n-là nga nchi'biì; yaá chiba-là.

⁷ Tíkoo ki'nchrè jngoò-là 'én xi ya it'aà ímixa tsjeè-là Nainá chja, nga tsò:

—Ji Na'èn xi Nainá 'mì-lè, xi ta jí tã jngoò-né xi 'ńó tse nga'ńó t́jín-lè, kixíí kjoa, j́nà kjo'in xi tí'biì-là xitá koi, ndaá t́jín kọ nguì kixíí t́jín.

⁸ Jè àkjalẹ xi ma-ne ñjòn, tsibíxteèn xi tjíya chĩtsín-là ya isòn ts'oi. Jè ts'oi kitjò'nde-là nga jè ndobá-là kisichjàn yijo-là xitá.

⁹ Jè ndobá-là ts'oi 'ńó kisichjàn-là ngats'ì xitá tanga j́nà xitá koi mìkìì kisikájno jé-là ní mìkìì jeya kisikájna Nainá; ta saá kùichjajno-là Nainá nga jè xi t́jín-là nga'ńó it'aà ts'e kjo'in koi.

¹⁰ Jè àkjalẹ xi ma-ne 'òn, tsibíxteèn-sòn jè xi tjíya chĩtsín-là ya ñánda tíhotíxoma jè cho ts'en. Kọ jè i'nde ñánda tíhotíxoma jè cho je xi ch'o kji, kòjńò-né. J́nà xitá xi beèxkón jè cho ts'en kiskinetjòn nijen-là nga 'ńó ijò komà-là.

¹¹ Tanga mìkìì kisikájno jé-là; tà saá isa ndaá kùichjajno-là Nainá xi ts'e ngajmì, koií kjoa-là nga ijò komà yijo-là nga xajtsé t́jín-là.

¹² Jè àkjalẹ xi ma-ne joòn tsibíxteèn-jìin xi tjíya chĩtsín-là ya xajngá nandá-je Éufrates. Jè nandá-là xajngá, kixiya-né, mé-ne nga koma kjoahato-ne j́nà xitaxá ítjòn xi nchrobá-ne ñánda bitjokàtji-ne ts'oi.

¹³ Kijtseè-ná nga jè ye xi 'ńó je kji, kọ jè cho je xi ch'o kji, kọ jè xitá xi kùichjaya 'én ndiso nga itjo-ne tso'ba jàn inima ch'o xi cho xke kjoàn.

¹⁴ J́nà-né inima ch'o-là neíí xi s'ín kjo'xkón; bitjo nga bíxkóya xitaxá ítjòn xi t́jín nga tíjtsa isò'nde nga kjinchrobà kjo'chán jè nachrjein xi jye t́jindaà-là Nainá xi ta jè tajngoó xi 'ńó tse nga'ńó t́jín-là.

¹⁵ “Tíná'yaà, 'an, k'oaá s'ín kjoiaa koni s'ín f'ìi xitá chijé. Mé ta ndaà-là jè xitá xi t́jnandaà k'e nga 'an xi kjoiaa; kji'jndaà nikje-là nga kókjá; mé-ne nga mìkìì kosobà-là nga t́jna laká.”

¹⁶ J́nà inima cho-là neíí tsibíxkóya xitaxá ítjòn-là isò'nde ya i'nde ñánda 'mì Armagedón xi 'én hebreo.

¹⁷ Jè àkjalẹ xi ma-ne itoò, tsibíxteèn ijìin isén xi tjíya chĩtsín-là. Kìi'nchré-là 'én xi 'ńó kùichja xi ya inchrobà-ne i'nde tsjeè-là Nainá xi t́jna ngajmì ñánda t́jna jè xi t́jnasòn íxile nga tíhotíxoma; kitsò:

—Jyeé tsitasòn yije.

¹⁸ Ikjoàn jate ní'ín ch'on, kina'ya-là jta, kits'ìin ch'on, ts'a ch'ón xi 'ńó jchán ts'a; ní saà jngoò k'a k'oas'ín 'ba kóni nga tisa tsatsejèn xitá isò'nde.

¹⁹ Jè naxandá je xi 'ńó ndaà yaxkon-là, jàn ya komà. Kọ j́nà naxandá xi chja-ne nga ijngoò ijngoò nangui xi t́jín isò'nde, jngoò k'aá kichijà. Kọ jè naxandá je xi 'mì Babilonia xi 'ńó ndaà yaxkon-là, mìkìì kisìjchàajìin Nainá nga kitsjaà-là kjo'in, k'oaá ngaya-là koni kisik'ìi jngoò chĩtsín xi tjíya vino xi nguì kjoajti-là Nainá xi jè jye t́jnandaà-là.

²⁰ Ngats'ìi nangui xi t́jín ijìin ndáchikon kọ j́nà nindoò, jngoó k'aá kichijà, mì tì kii ki'ya-là.

²¹ J́nà xitá tsanè jtsí ndajo xi 'ńó tsiaàn kjoàn, t́jín-là tsà ichán kilo nga jngoò ijngoò. J́nà xitá, 'on kùichjajno-là Nainá, koií kjoa-là nga tse kjo'in kis'e-là kjoa ts'e jtsí ndajo.

17

Kós'ín s'e-là kjo'in jè chjoón chijngui

1 J'ìi jngoò jǎà àkjale xi itoò ma-ne xi itoò chĩtsín tjíya tsja, kiichja, kitsò-na:

—Nchroboí, kokoò-lè kjo'in xi tjoé-la jè chjoón chijngui xi 'ńó ndaà yaxkon-la xi tijnandi ñanda nga jìn xajngá nandá fahato.

2 Jǎà xitaxá ítjòn xi tǐn isò'nde, yaá tsafáhijtakò chjoón jè nga kj'eíí nainá kijtseèxkón k'oaá ngaya-la tsà kjoa chijngui kisìkò jè chjoón. Kò ngats'ìi xitá xi tǐn isò'nde, k'oaá tì kis'ìin nga kj'eíí nainá kiitjĩngui-la k'oaá ngaya-la koni tsà xán ts'e kjoachijngui-la chjoón kjòch'i-ne.

3 It'aà ts'e Inima Tsjeè-la Nainá, jè àkjale kiikò inima-na jngoò i'nde it'aà xìn ñanda nangui kixì choón. Kijtseè jngoàà chjoón xi tǐnakjá-la cho je xi ch'o kji xi inì kji. Yijàjno yije yijo-la 'én xi kondra ts'e Nainá nga chjajno-la. Itoò ma skò kò te ma nchrajá-la.

4 Jè chjoón, nikje skò nikje inì kjoàn xi íkjá. Yijàjno xi nguì oro kò ndajo ote xi 'ńó ts'e chjí-la, kò ndátòn fangui xi 'ńó chjí-la xi 'mì perla. Tjíya tsja jngoò chĩtsín xi nguì oro; jè chĩtsín kitseé kjoa ch'o-la kò kjoa tjé xi ts'e kjoa chijngui-la.

5 Ya ítjòn tjen-la, tǐt'aà 'én 'ma xi tsò: “Babilonia xi 'ńó je kji nga ndaà yaxkon-la, jè nea-la íchjín chijngui kò ngats'ìi kjoa ch'o xi tǐn isò'nde.”

6 K'e nga kiskoò'an chjoón jè, kijtseè xkoaàn nga ch'i-né nga jní-la xitá-la Nainá kits'ìi kò ts'e xitá xi kinìk'en nga 'én-la Jesús kiichjaya. K'e nga kijtseè tà kjòxkón-na.

7 Kitsò-na jè àkjale:

—¿Mé-ne maxkón-lè? 'Aán, kènojmi-lè kó tsòya-ne kjoa 'ma-la chjoón jè, kò it'aà ts'e cho je xi ch'o kji xi tǐnakjá-la xi itoò ma skò koa te ma nchrajá-la.

8 Jè cho xi kà'yi, tsibijnakon-né, tanga i'ndeí tǐnak'en-né; yaá kjinchrobà mijìn-ne nitjan jǎò mé-ne nga jngoò k'a chija-ne. Jǎà xitá xi tǐn isò'nde, xi mìkì tǐt'aà 'ín-la xojòn ts'e kjoabinachon kóni nga tisa kisindaà isò'nde, tà kòxkón-la k'e nga skoexkon jè cho xi tsibijnakon, kò i'ndeí tǐnak'en-né, tanga kotsején ìjngoò k'a-ne.

9 'Íjndé mochjeén kjohĩtsjeèn xi tǐn-la kjoa chjine. Jǎà skò cho xi itoò ma-ne, jǎà ngaya-la jǎà nindoò xi itoò ma-ne ñanda tijnanè jè chjoón. Tikoáá jǎà ngaya-la xi itoò ma-ne xitaxá ítjòn.

10 'Òn ma-ne xi jye k'en, jngoò ma xi tíhotixoma-isa, kò jè xi ìjngoò, kj'eè kù f'ìi. Tanga k'e nga kjoíí, tà chibaá nachrjein kotixoma.

11 Jè cho je xi ch'o kji xi tsibijnakon tanga i'ndeí tǐnak'en-né, jè xi ma-ne jìn xitaxá ítjòn. Yaá tǐnajìn-la xi itoò ma-ne, kò yaá tífi ñanda nga jngoò k'a chija.

12 Jǎà nchrajá xi te ma-ne xi kà'yi, jǎà ngaya-la xitaxá ítjòn xi te ma-ne xi kj'eè kù tjoé-la kjotixoma. Tanga k'e nga tjoé-la kjotixoma ta jngoò hora kotixomakjoò kò jè cho je xi ch'o kji.

13 Jǎà xitaxá ítjòn xi te ma-ne, tajngoó kjohĩtsjeèn tǐn-la nga jè cho je xi ch'o kji sìngatsja nga'ńó-la kò kjotixoma-la.

14 Ikjoàn skaàn-kò jè Orrè, tanga jè Orrè sìikijne-né. Nga jè-né xi otixoma-la jǎà xitá xi otixoma, kò Xitaxá ítjòn-laá ma jǎà xi xitaxá ítjòn títsajna. Jǎà xitá xi títsajnakò, xó kinokjoà-la, xó kitjaajìn-ne, kò kixíí síkitasòn-la.

15 Jè àkjale k'oaá ti kitsò-na:

—Jè nandá xi kà'yi, ñanda tijnandi chjoón chijngui, naxandá-né, xitá kjín-né, jǎá-né xitá xi tǐn nga ìjngoò ìjngoò nangui xi tǐn isò'nde, koa jǎá-né xitá xi chja ngats'ìi 'én xi tǐn isò'nde.

16 Jǎà nchrajá xi te ma-ne xi kà'yi, kò jè cho je xi ch'o kji xi kà'yi, sìjtikeè-né jè chjoón chijngui, kjoá'an yije-la skanda jǎà nikje-la, sìikájna laká-né. Yijo-la skine-né. Ikjoàn yaá kokájin ni'ín.

17 Nainá k'oaá s'ín tsibijìn kjohĩtsjeèn-la jǎà xitá koi nga k'oas'ín sìkitasòn koni s'ín mejèn-la Nainá. Jè kjotixoma xi tǐn-la xitá koi tǐjngoò ikon nga jè cho ts'en kongatsja, skanda k'e nga kitasòn yije 'én xi kiichja Nainá.

18 Jè chjoón xi kà'yi, jè-né naxandá je xi otixoma-la jǎà xitaxá ítjòn xi tǐn isò'nde.

18

Kós'ín kiskaàngui jè naxandá Babilonia

¹ Xi jye komà iskan, ijngò òkjale kijtsee xi tínchrobájen-ne ngajmì, xi 'ńó tse nga'ńó tjin-la. Jè kjoa jeya-la xi 'ńó ote kji, kishiseèn-sòn nangui.

² 'Nó kiichja, kitsò:

—Jye kiskaàngui, jye kiskaàngui naxandá je Babilonia. Jyeé ta i'nde-la inima ch'o-la neií komà, ya ñánda kitsee yije inima tje xi ch'o kjoàn. Kò ya títsajna nise xi ch'o kjoàn xi mikì ma chine.

³ Ngats'ìi xita isò'nde, k'oaá ti kis'ìin koni s'ín xita naxandá jè nga kjeíí nainá kiitjingui-la, k'oaá ngaya-la koni tsà kjòch'i-ne jña kjoachijngui xi kis'ìin. Jña xitaxá ítjòn-la xi tjin nga títsa isò'nde, k'oaá ti kis'ìin. Kò jña xita isò'nde xi tsojmì otseya nga s'ín kjòhima, kjònchiná-né xi kjoa ts'e kjòtsja-la yijo-la koni s'ín jña xita xi tjin naxandá jè.

⁴ Jngò 'én ki'nchrè xi ngajmì inchrobà-ne, xi kitsò:

—Jño xi naxandá ts'an xan-nò, títjokàjñoò naxandá jè, mé-ne nga mì ya kòkòt'aà-nò jé-la, tikoá mikì kòkòt'aà-nò kjo'in xi s'e-la.

⁵ Jña jé-la, jyeé tímakjìn, jyeé j'ìi skanda i ngajmì. Nainá, mikì siìjchàajìn [nga tsjá-la kjo'in] xi kjoa ts'e jé-la.

⁶ K'oaá tis'ín kàtamát'in ngajo-ne koni s'ín kis'ìin jè. Jò k'a k'oa tis'ín kàtamát'in ngajo-ne koni tjin kjoa xi kis'ìin. Jè chitsín xi kisikáyajìn vino, kòkji tikájin ngajo-la nga jò k'a isa jchá kàtama, [jò k'a okji kjo'in kàtako-la].

⁷ Jè kjoa-la nga jeya kisikájna yijo-la kò nga 'ńó kis'e-la kjòtsja, k'oa tis'ín tjiì ngajo-la kjo'in nga kàtakjindáya. Nga k'oaá tsò inima-la: “An, k'oaá s'ín tijná nga chjoón sko-la 'mì-na. An mìtsà chjoón ka'an 'mì-na, tikoáá mikì siìkjiaán kjo'in nita kjé-ne.”

⁸ Koií kjoa-la nga tajngò nachrjein kitjojenè-la kjo'in: Kiyá xita-la. Tikoáá skindáyane. S'eé-la kjoa ts'e kjinchrá. Ni'ín kitì-ne nga kjoehesòn. Nga 'ńó tse nga'ńó tjin-la jè Nainá xi otíxoma nga k'oaá s'ín jye kiskoòsòn-la nga tsjá-la kjo'in.

⁹ Jña xitaxá ítjòn-la isò'nde 'ńó skindáyakeè kò 'ńó 'on koma-la k'e nga skoe nga tíbitjo ni'ndi-la nga títi jè naxandá jè ya ñánda kiitjingui-la xi kjeíí nainá k'oaá ngaya-la koni tsà jngòò chjoón chijngui kiitjingui-la nga kisitsjako yijo-la.

¹⁰ Kjiín kìncha-ne nga skótsejèn-la, nga tsakjón-la kjo'in-la. 'Nó kichja, kitsò:

—Ima xó-ne, ima xó-ne naxandá je Babilonia xi 'ńó kis'e-la nga'ńó; tajngòò tjò kòf'ìi-la kjo'in.

¹¹ Jña xita xi otijnaya tsojmì xi tjin isò'nde, tikoáá skindáyakeè-né nga 'on koma-la inima-la nga mì tì yá xi kòtse-ne tsojmì xi otijnaya,

¹² tsojmì xi ts'e ton oro, plata, ndajo chjí xi 'ńó ndaà kjoàn, ndátòn chjí xi 'ńó ndaà kjoàn; nikje lino xi 'ńó chjí, kò nikje seda, nikje sko kò xi inì kjoàn; ngats'ìi yá xi 'ńó ndaà jne, tsojmì chjí xi nindaà ni'ño cho kisindaà-ne, ngats'ìi tsojmì xi yá xi 'ńó chjí xi yá ikon, kò kichá bronze, kò kichá xi 'mì hierro, kò ndajo marmol,

¹³ kò chrjoayá canela, ngats'ìi tsojmì xi ndaà jne, chrjongó-la Nainá, kò xkiì jne xi 'mì mirra, kò chrjongó ts'e yá olivo, kò vino kò asiti. Trigo kò skoan inchrajín, kò cho ch'á, orrè, kohoyo, carreta, kò xita chi'nda nga kisatíjna.

¹⁴ Kitsò-la jè naxandá:

—Ngats'ìi kjoa xi ndaà kisaseèn-la inima-lè, jyeé kitjaàxìn yije-lè. Kjoa nchiná-lè jyeé kichijà. Kò kjoa xi ndaà kòtsjachi, mì ti kiì sakò-lè nita kjé-ne.

¹⁵ Jña xita xi otijnaya tsojmì xi ya kjònchiná ts'e naxandá jè, kjiín kìnchat'aaxìn nga tsakjón-la kjo'in. Skindáyakeè koa 'ńó 'on koma-la inima-la.

¹⁶ K'oaá kitsò:

—Ima xó-ne naxandá xi 'ñó je kji, xi nikje lino chjí tsakakjá ko nikje xi sko kjoàn ko xi inì kjoàn. Yijàjno yijo-la oro, ndátòn chjí xi 'mì perla ko ndajò chjí xi 'ñó ndaà kjoàn.

¹⁷ Tajngoò tjò kachija yije kjoa nchiná xi tjín-la.

Ngats'iì xita xi síxáko chitso, ko ngats'iì xita xi ya chitso títsaya nga nchifi, jña xi ya iya chitso síxá ko ngats'iì xi síxájin ndáchikon, kjiín tsibítsajna

¹⁸ k'e nga kijtseè n'ndi-la naxandá nga títi; 'ñó kiichja, kitsò:

—Ni saá jngoò naxandá tjín xi mangásòn-kjoò koni kji naxandá jè, nga 'ñó ndaà kiyaxkon-la.

¹⁹ Ikjoàn tsibíxteèn-jno chijo sko, 'ñó kiskindàyakeè nga 'on komà-la inima-la; kitsò:

—Ima xó-ne naxandá xi 'ñó je kji; jè kjoa nchiná-la, ndaà kjònchiná-ne jña xita xi tjín-la chitso ya jjiin ndáchikon. Ko i'nde, ta jngoò tjò kachija yije kjoa nchiná-la.

²⁰ Ngats'ioò jño xi titsajnaà ngajmù, tsjaà t'è-là takòn. Jño xi xita-la Nainá maà, jño xi tsibíxáya-nò Cristo, ko jño xi Nainá nokjoà ngajo-là, tsja t'è-là inima-nò. Nainá jyeé kàtsjá-la kjo'in naxandá jè koií kjoa-la nga ch'o kisikò-nò.

²¹ Jngoò àkjale xi 'ñó tse nga'ñó tjín-la kiskoé jngoò ndajò xi koni kji ndajò natsí kji, kisikatjen-jiin ndáchikon, kitsò:

—Jè naxandá Babilonia, xi 'ñó je kji, k'oaá s'ín skajiin-ndá; jngoó k'aá chija nita kjé-ne, mì ti yá xi skoexkon-ne.

²² Mì ti kiì kiná'ya-la inchò calle-la jña música xi síkjane arpa, jña xi síkjindáya xobí, ko xi síkjane chrjo trompeta. Mì ti kiì s'e-la xita xi síxá nita mé xá-ne. Tikoá mì ti kiì koxáko-ne molino ts'e ncheé.

²³ Ni'ín ts'e lámpara, mì ti kiì silihiseèn-ne; mì ti kiì s'e-ne s'eí nga kixan xita; koií kjoa-la kos'ín komat'in-ne nga jña xita-la xi otseya ko otíjnaya tsojmi, 'ñó xita nchiná komà i isò'nde; tikoá kiskoònachan yije-la naxandá xi tjín isò'nde nga komà-la kis'iin kjoatj'e.

²⁴ Naxandá jè, Nainá kitsjaà-la kjo'in nga jé ts'e-né nga kinik'en xita-la Nainá ko xita xi kiichjaya ngajo-la Nainá ko ngats'iì xita xi kinik'en nga tíjtsa isò'nde.

19

Xita xi tsjá-la kjondaà Nainá ján ngajmù

¹ Xi jye komà iskan, ki'nchrè-la ján ngajmù 'én koni kjín jchán ma xita xi chja nga tsò: ¡Aleluya! ¡Nga tikíjna Nainá!

Nga jè ochrjekàjiin-ná kjo'in kjoa ts'e jé-ná,
ko ta jè tajngoò xi tjín-la kjoajeya
ko xi tse nga'ñó tjín-la.

² Nga jè Nainá, ndaà s'ín ko kixí s'ín

k'e nga tsjá-la kjo'in xita;
nga jyeé kitsjaà-la kjo'in jè naxandá je Babilonia
xi kisikits'ón-jiin isò'nde nga tsakó-la xita isò'nde
nga kjeí nainá kijtseèxkón

k'oaá ngaya-la koni jngoò chjoón xi kjoa chijngui s'ín.

Koií jé xi komà-la nga jè kisik'en xita ch'inda-la Nainá xi kiichja ngajo-la.

³ Jngoò k'a k'oa kitsò:

—¡Aleluya! ¡Nga tikíjna Nainá! Jè n'ndi-la jè naxandá nga títi, k'oaá s'ín kitjomijin nita mé nachrjein-ne.

⁴ Jña xita jchínga xi kaàn ñijòn ma-ne ko xi ñijòn ma-ne xi títsajnakon, chinha-xkó'nchi-ñiat'aà-la nga kijtseèxkón Nainá xi tíjnasòn íxile ñánda tíhotíxoma. Kitsò:

—¡K'oas'ín kátama! 'Nga tikíjna Nainá. ¡Aleluya!

⁵ Ya íxile-la ñánda tíhotíxoma, kina'yà-la 'én xi kitsò:
Tji-là kjondaà Nainá ngats'ioò jño xi ch'inda maà,
jño xi ixti maà ko xita jchínga,

ngats'ioò xi tsakjoòn-chaà Nainá.

⁶ Ki'nchrè-la 'én koni tsà k'jín jchán ma xitá xi chja, koni s'ín na'yà-la nandá k'e nga one, koni s'ín na'yà-la k'e nga one ch'on, xi kitsò:

¡Aleluya!

¡'Nga t'ikíjna Nainá xi ta jè tajngoó xi 'ñó tse nga'ñó t'jín-la!

Nga jyeé jè tíhotíxoma.

⁷ Tsja k'oe-lá iníma-ná, s'itsja-chaá takoán, jeya s'ikíjnaá Nainá, nga jyeé j'ii kjoa bixan-la Orrè;

chjoón-la jyeé t'jinnandaà.

⁸ Jè chjoón, jye ko'biì-la nikje lino xi 'ñó chjí,

xi 'ñó tsjeé kjoàn t'ikoa 'ñó ote nga kónakjá.

Jè nikje lino xi 'ñó chjí, jè ngaya-la kjoakixi xi s'ín xitá-la Nainá.

⁹ Jè àkjale kitsò-na:

—Chjí kjoa koi: “Mé ta ndaà-la j'ña xitá xi xó kinokjoà-la kjoa bixan-la Orrè nga jè kokjen-ko.”

Kitsò isa:

—J'ña 'én koi, nguì 'én kixi-la Nainá-né.

¹⁰ Tsohósijna xkó'nchiña it'aà ndsoko jè àkjale nga mejèn-na skoexkoán. Tanga jè àkjale kitsò-na:

—Kì k'oaá 'ni; 'an, t'ikoaá ch'nda-la Nainá ma koni ngaji ko j'ña 'ndsì xi ndaà fi t'jngui-la j'ña 'én kixi xi kiichja Jesús. Jè Nainá chaxkoín.

J'ña 'én kixi xi kiichja Jesús, t'ij'ña-ne xi s'ikítsjeèn-ya-la xitá xi chja ngajo-la Nainá.

Jè xi t'jnasòn-la kohòyo chroba

¹¹ Kijtseè ngajmì nga t'ix'á; tsatsejèn jngoò kohòyo xi chroba kji. Jè xitá xi t'jnakjá-la, k'oaá s'ín yaxkon-la nga kixi s'ikitasòn ko kixi t'jna, koi kjoa-la nga nguì ko kjoakixi-la bíndaajìin ko nga kjaán-kjoò.

¹² J'ña xkon, k'oaá kjoàn koni ni'ín. Ya sko, k'jín corona jtobá t'j'a ko jngoò 'ín-la t'jít'aà xi mìkì yá xi machiya-la kó tsòya-ne; tajngoò jè machiya-la kó tsòya-ne.

¹³ Jè nikje xi kinakjá, jní yijàjno. Jè 'ín-la, 'Én-la Nainá 'mì.

¹⁴ Yaá t'jngui-la j'ña soldado ts'e ngajmì nga t'itsajnakjá-la kohòyo chroba; saà nikje lino chrobaá íkjá xi 'ñó chjí ko tsjeé kjoàn.

¹⁵ Jè tso'ba bitjo jngoò k'ichá ndojò xi 'ñó yijò kji, jè xi s'iki'on-ne ngats'ì naxandá. Nga jè kotixoma-la xitá naxandá. Jè yá nise s'ikjeén xi nguì k'ichá tájaà. Jè sobá kosinè j'ña toò uva ya iya chitso nga kochrje vino xi okó kjoajti-la Nainá xi ta jè tajngoó xi 'ñó tse nga'ñó t'jín-la.

¹⁶ Jè nikje-la ko chrjomí-la t'jít'aà 'ín xi tsò: “Xitaxá Ítjòn-la ngats'ì j'ña xi xitaxá Ítjòn t'itsajna ko jè-né xi otixoma-la ngats'ì j'ña xitá xi otixoma.”

¹⁷ Kijtseè jngoàà àkjale xi ya s'jnasòn-la ts'oi; 'ñó chja-la ngats'ì cho xi t'jímajìin isén xi yijo kine. Tsò:

—Nchrobá, tixkóyaà xinguiò mé-ne nga chjinee yijo xi Nainá tsjá-nò,

¹⁸ nga chjinee yijo-la xitaxá Ítjòn, ko yijo-la xitá sko-la soldado, yijo-la xitá ts'en, yijo-la kohòyo ko yijo-la xitá xi t'itsakjá-la kohòyo, yijo-la ngats'ì xitá xi t'itsajnandejí ko xitá ch'nda ko xi ixti ko xitá jchínga.

¹⁹ Kijtseè jè cho je xi ch'o kji ko j'ña xitaxá Ítjòn ts'e isò'nde ko xitá soldado-la; jyeé t'itsajnandaà nga skaàn-ko jè xi t'jnakjá-la kohòyo chroba ko j'ña soldado-la.

²⁰ Jè cho je xi ch'o kji kindobà'ñó; t'ikoa kindobà'ñó jè xi 'én ndiso kiichja xi kis'iin kjojkón nga nguixkon jè cho. K'oaá s'ín komà-ne nga kiskoònachan-la j'ña xitá xi kiskoé chiba-la t'ikoa kijtseèxkón isén xkósòn-la jè cho. Ingajò kinikatsjoèjìin t'ikón ijìin ni'ín xi t'it'jnga ñanda títi ko azufre.

21 Jǎ̀nà x̄it̄a xi i'nga, jè kisik'en-ne jè k̄ich̄a ndojò xi bitjo tso'ba jè xi t̄ijnakj̄a-l̄a kohòyò. Ngats'ù chò xi t̄ijnaj̄in isén, jǎ̀nà kjòsk̄i-ne nga kiskine yijo-l̄a x̄it̄a xi jye k'en.

20

Jè xi jngòò jmù nò

¹ Kijtseè jngoaá àkjale xi t̄inchrobájen-ne ngajmù. 'Ya ib̄i ts'e n̄itjan j̄nò. Kjiya tsja jngòò na'ñó k̄ich̄a cadena xi 'ñó je kji.

² Jè àkjale kitsobà'ñó jè ye jchínga xi t̄ijè-ne xi 'mì X̄it̄a Neí kò xi Satanás. Jngòò jmù nò tsibít'aà'ñó.

³ Kisikatjen-s'en ya n̄itjan j̄nò; tsibíchjoà'ñó-l̄a jè xotjoa; ikjoàn tsasíjna-l̄a sello mé-ne nga mì yá skíx'a-ne jè xotjoa n̄itjan. Yaá tsasíjnahiya mé-ne nga mì t̄i k̄i koma skónachan-l̄a x̄it̄a isò'nde, skanda k'e nga kjoehet'aà xi jngòò jmù nò. Xi koma iskan t̄ájnda'ñó ijngòò k'a-ne nga koma kojmeendeí chiba nachrjein isa.

⁴ Kijtseè íxile ts'e kjotíxoma; t̄itsajnasòn jǎ̀nà x̄it̄a xi kitjoé-l̄a kjotíxoma nga jǎ̀nà koìndaàj̄in. T̄ikoa kijtseè inima-l̄a jǎ̀nà x̄it̄a xi kitiís'ìn, nga koi kjoa-l̄a 'én kixi xi kitsjaà it'aà ts'e Jesús kò nga 'én-l̄a Nainá k̄ichjaya. Jǎ̀nà x̄it̄a koi, mìk̄i kijtseèxkón jè chò je xi ch'o kji kò isén xkòsòn-l̄a; t̄ikoa mìk̄i kisit'aà chiba-l̄a it̄jòn t̄jen-l̄a kò tsja. X̄it̄a koi, ijngòò k'a tsibítsajnakon; jngòò jmù nò tsatíxoma kò Cristo.

⁵ Jǎ̀nà x̄it̄a koi xi jaáya ítjòn-l̄a. Tanga jǎ̀nà mik'en xi i'nga, skanda k'eé jaáya-l̄a nga ijchò jngòò jmù nò.

⁶ Mé ta ndaà-l̄a jǎ̀nà xi kòkò-l̄a nga kjoaáya ítjòn-l̄a; x̄it̄a koi, jyeé x̄it̄a-l̄a Nainá koma; jè kjoa biyaà xi ma-ne jò, n̄imé nga'ñó t̄jín-l̄a it'aà ts'e x̄it̄a koi; mì t̄i mé ma s̄iikò-ne. Tà saá no'mi-l̄a Nainá koma kò ts'e Cristo. Jngòò jmù nò kotixomako.

⁷ K'e nga kjoehet'aà xi jngòò jmù nò, t̄ájnda'ñó ijngòò k'a-ne jè Satanás ya ñanda t̄ijnahiya n̄itjan j̄nò.

⁸ Kitjondeí-ne nga skónachan-l̄a x̄it̄a naxandá xi t̄jín nga t̄jtsa isò'nde, jè Gog kò Magog. Koìxkóya x̄it̄a mé-ne nga koìts'ia-ne kjojchán. K̄jín jchán koma x̄it̄a, k'oaá ngaya-l̄a koni tsomì xi jncha indì ndáchikon.

⁹ Chinchimasòn kóhok̄i isò'nde; chinchandi-l̄a nga jngòò itjandi ñanda t̄itsajna x̄it̄a-l̄a Nainá kò naxandá xi tsjakeè. Ikjoàn kisikasén ni'ín Nainá xi inchrobà-ne ngajmù. Jngòò k'a tsaká kóhotjín.

¹⁰ Jè x̄it̄a neí xi kiskoðnachan-l̄a x̄it̄a, kinikatjen-j̄in ya i'nde ñanda t̄it̄jnga ni'ín kò azufre. Jyeé ya t̄itsajna jè chò je xi ch'o kji kò xi k̄ichjaya 'én ndiso. Yaá s̄iikjeín kjo'in kò nachrjein kò n̄itjen n̄it̄a kjé-ne.

Jè íxile ts'e kjotíxoma xi chroba kji

¹¹ Kijtseè jngòò íxile xi chroba kji kò 'ñó je kji nga ya t̄jnasòn jngòò xi t̄ihotíxoma. Nga nguixkòn jè xi t̄jnasòn íxile, jngòò k'a kichijà nangui kò ngajmù. N̄it̄a ñanda-ne, mì t̄i k̄i k̄i'ya-l̄a.

¹² Kijtseè mik'en xi ixti kjoàn kò xi x̄it̄a jchínga kjoàn, 'ncha kixi nguixkòn Nainá. Ikjoàn kitáx'a jǎ̀nà libro [ñanda t̄jít'aà mé xi kis'ìn nga jngó jngó x̄it̄a]; koa ijngòò libro kitáx'a ñanda t̄jít'aà ts'e kjoabinachon. Jǎ̀nà mik'en, k'oaá s'ín kisindaàj̄in-l̄a koni s'ín t̄jít'aà xojon ts'e libro, mé kjoa xi kis'ìn.

¹³ Jè ndáchikon kitsjaà jǎ̀nà mik'en xi ya k'en-j̄in. Jè kjoabiyaà kò i'nde kjo'in t̄ikoaá kitsjaà mik'en xi ya t̄itsajna. K'oaá s'ín kisindaàj̄in-l̄a nga jngòò ijngòò x̄it̄a koni t̄jín kjoa xi kis'ìn.

¹⁴⁻¹⁵ Jè kjoabiyaà kò i'nde kjo'in kinikatsjoòj̄in ñanda t̄it̄i ni'ín jnga. Kò jǎ̀nà mik'en xi mìk̄i t̄jít'aà 'ín-l̄a jè libro ts'e kjoabinachon, t̄ikoaá yaá kinikatsjoòj̄in ñanda t̄it̄i ni'ín jnga. Jè xi ma-ne jò kjoabiyaà.

21

Ngajmii xitse ko nangui xitse

¹ Kijtsee jngoaa ngajmii xitse ko nangui xitse. Je ngajmii xi kisijna itjon ko nangui xi kisijna itjon, jyeé kichija; tikoaa kichija je ndachikon.

² Tikoá kijtsee je naxandá tsjeé xi Jerusalén xitse 'mì, nga tinchrobájen ngajmii nga nguixkon Nainá. K'oaá s'in tijnandaá koni jngoò chjoón xi ndaá bíndaá yijo-la nga jye kixan-ko x'in-la.

³ Ki'nchrè-la 'én xi 'ño chá, xi ngajmii inchrobà-ne, xi tsò:

—Chítsejèn-là Ni'ya Tsjeè-la Nainá, jyeé kòbitjojen; Nainá yaá kíjnakò jña xita; xita naxandá-laá koma, nga je sobà xi Nainá kitsò-la.

⁴ Je sobà Nainá siixijno yije ndáxkon; mì tì kiì s'e-ne kjoabiyaà; mì tì kiì s'e-ne kjoaba; mì tì kiì yá skìndàya-ne; mì tì kiì s'e-ne xi ijòjno ijòt'aà yijo-la, koi kjoa-la nga jye tsato kjoa jchínga.

⁵ Je xi tijnasòn íxile ts'e kjotíxoma, kitsò:

—Chítsejèn-la, 'aán siixitseya yije tsojmì xi tjin.

Ikjoàn kitsò-na:

—Chjí, xojon tít'eì jña 'én koi; nga nguì k'oaá s'in tjin nga kitasòn; nguì 'én kixi-né.

⁶ Ikjoàn kitsò-na:

—Jyeé tsitasòn yije. 'An-ná xi tjna itjoàn skanda tàts'en-la kjoa kó nga skanda fehet'aà-ne. 'An-ná xi tsibìts'iaa ko xi sikjehet'aà-na kjoa. Ngats'ì xi xínda-la, 'aán tsjaà kjotjò-la nandá xi títbitjo ya i'nde ñánda mìkiì xiya nandá mé-ne koma kíjnakon-ne inima-la nitá kjé-ne.

⁷ Jña xi siikijne, jña skoé kjotjò ngats'ì kjondaá koi. 'Aán kótijnakoaa nga Nainá kitsò-na ko jña, ixti-naá koma.

⁸ Tanga jña xita xi tsakjón, jña xi mìkiì mokjeiín-la, jña xi 'ño ch'o s'in, jña xi xita sík'en, jña xi kjoa chijngui s'in, jña xi xita tje, jña xi xkósòn beèxkón, ngats'ì xi 'én ndiso chá, ján kixojin ñánda títi ni'in jnga ko azufre; je xi ma-ne jò kjoabiyaà.

Naxandá xitse xi 'mì Jerusalén

⁹ J'ìkon jngoò-na àkjale jña xi itoò ma-ne, xi tikoá itoò chitsín tjin-la, xi jncha kitsee xi itoò kjo'in xi fehet'aà-ne. Kitsò-na:

—Nchroboí, kokoò-lè je xi koma chjoón-la Orrè.

¹⁰ It'aà ts'e Inima Tsjeè-la Nainá, je àkjale kiìko inima-na jngoò nindoò xi je kji ko 'nga kji. Tsakó-na je naxandá xi je kji, naxandá tsjeé Jerusalén nga tinchrobájen-ne ngajmii nga nguixkon Nainá.

¹¹ Je naxandá tsjeé Jerusalén, oteé tsejèn xi kjoa ts'e kjoajeya-la Nainá. K'oaá s'in ote kji koni ndajo chí xi 'ño ndaá kjoàn, koni ndajo xi jaspe 'mì nga ote kji koni chitsín.

¹² Nga jngoò itjandiì, je naxandá, chrjó ndajo tjíndiì-la xi 'ño je kji ko 'ño 'nga kji. Tejò xotjoa tjin-la. Nga jngoò lingoò xotjoa, jngoò àkjale síjnajto. Tikoá ya jtít'aà 'ín-la nga tejò naxandá xi ya inchrobàt'aà-ne ixti-la Israel.

¹³ Ya kixi-la ñánda bitjokàjìin-ne ts'oi, jàn xotjoa tjin-la, ya kixi-la ñánda kahatji-ne ts'oi, jàn xotjoa tjin-la. Ya norte, tikoá jàn xotjoa tjin-la, ya sur, tikoá jàn xotjoa tjin-la.

¹⁴ Je chrjó ndajo xi tjíndiì-la naxandá, tejò chrjó ndajo xi ya jtít'aà nga tejò 'ín-la xita xi tejò ma-ne xi it'aà ts'e Orrè kisixáya-la.

¹⁵ Je àkjale xi tíhjakò-na, jngoò kicha kjinaya tsja xi nguì oro xi koni kji yá xi ma machiba-ne. Je kisikjeén nga ma kisichiba naxandá ko xotjoa-la ko chrjó ndajo-la.

¹⁶ Je naxandá k'oaá s'in kijna nga ñijòn chrjangui tjin-la. Koni kji ndojò, k'oaá tì kji tiyà-ne. Je àkjale, k'e nga kisichiba, jò jmii ko jò sìndo kilómetro tjin-la. Ngásòn chiba tjin-la nga ndojò ko nga tiyà ko nga 'nga.

¹⁷ Ikjoàn kisichiba jè chrjó ndajo. Jngoò sìndo kò ichán ñijòn xkó tsja tjín-la xi chiba-la xita xi tísíkjeén jè àkjale, [jè xi ichán nanga tjín-ne].

¹⁸ Jè chrjó ndajo xi tjíndi-la naxandá, koií tjíndaà-ne ndajo chjí xi 'mì jaspe. Kò jè naxandá, nguì oro sobà-né. K'oaá s'ín ote kji koni chitsín tsjeè.

¹⁹ Jñà tàts'en chrjó xi tjíndaà-ne nga tíchjoàndi-la naxandá, nguì ndajo chjí yijàjno xi 'ño ndaà kjoàn. Jè xi itjòn, jè ndajo xi 'mì jaspe; xi ma-ne jò, ndajo xi 'mì zafiro; xi ma-ne jàn, ndajo xi 'mì ágata; xi ma-ne ñijòn, ndajo xi 'mì esmeralda;

²⁰ xi ma-ne 'òn, ndajo xi 'mì ónice; xi ma-ne joòn, ndajo xi 'mì cornalina; xi ma-ne itoò, ndajo xi 'mì crisólito; xi ma-ne jìin, ndajo xi 'mì berilo; xi ma-ne ñijaàn, ndajo xi 'mì topacio; xi ma-ne te, ndajo xi 'mì crisoprasa; xi ma-ne tejngoò, ndajo xi 'mì jacinto; xi ma-ne tejò, ndajo xi 'mì amatista.

²¹ Jñà xotjoa xi tejò ma-ne, tejò ndajo perla tjíndaà-ne. Nga jngoò ijngoò xotjoa jngoò perla tjíndaà-ne. Ndiyá teè-la naxandá, nguì oro sobà-né koni chitsín xi ma chítsejèn-ya.

²² Ya jjiin naxandá, nijngoò ingo kijtseè; nga jè sobà xi ma ingo-la naxandá, jè Nainá xi tjina itjòn nga ta jè tajngoò-né xi 'ño tse nga'ño tjín-la kò jè Orrè.

²³ Jè naxandá, mìkiì mochjeén-la jè ts'oi kò sá nga sìhiseèn-la. Nga jè sobà kjoa isén-la Nainá síhiseèn-la; kò jè Orrè ma ni'ín-la.

²⁴ Ngats'ì jñà xita naxandá ts'e isò'nde kinchima iseèn-né it'aà ts'e ni'ín-la. Kò jñà xitaxá itjòn xi tjín isò'nde, kjiko kjoanchiná-la nga ya sìngatsja.

²⁵ Jñà xotjoa-la naxandá, mìkiì sìchjoajto nga kjit'aà nachrjein; nga ya naxandá, mìkiì kojño.

²⁶ Ngats'ì naxandá kjoiko ngats'ì kjoa nchiná-la kò ngats'ì tsojmì xi 'ño chjí-la nga ya sìngatsja.

²⁷ Ya i'nde jè nímé kjoahas'en xi tjé kjoàn xi ch'o s'ín kò xi kjoa ndiso. Tà jñà kjoahas'en xi tjit'aà 'ín-la jè xojon-la Orrè xi ts'e kjoabinachon.

22

¹ Jè àkjale tsakó jngoò-na xajngá nandá xi kijna tsjeè tsjeè, jè nandá xi bítsajnakon-ná nita mé nachrjein-ne. K'oas'ín tsjeè kji koni chitsín. Yaá tíbitjo ñánda síjna íxile-la Nainá nga tíhotixoma kò yaá tíbitjo ñánda tjina jè Orrè.

² Ya jngoò osen ndiyá-la naxandá tifa nandá. Kò ya ngobà ngobà xajngá nandá, yaá síjna jè yá xi tsjá kjoabinachon nita mé nachrjein-ne. Tejò k'a oja-la toò nga jngoò nó. Jngoò jngoò k'a oja-la toò nga ijngoò ijngoò sá. Jñà xka-la, k'oaá s'ín mochjeén nga maxkiì-la naxandá ts'e isò'nde.

³ Mì tì mé kjoa ch'o s'e-ne xi mìkiì sasén-la Nainá. Yaá sasíjna jè íxile-la Nainá kò ts'e Orrè nga kotixoma. Kò ngats'ì xita ch'índa-la, yaá sìxá-la.

⁴ Ngats'ì xi xita-la ma, skoexkon-né kó kji isén-la Nainá; kò jè 'ín-la Nainá yaá sít'aà itjòn tjen-la.

⁵ Ya i'nde jè, mì ti kojño-ne. Jñà xita xi ya títsajna, mì tì ni'ín kochjeén-la xi sìhiseèn-la, tikoáá mì tì ts'oi kochjeén-la; nga jè sobá Na'èn-ná xi Nainá sìhiseèn-la. Jñà xita kotixoma nita mé nachrjein-ne.

Jyeé nchrobá machraña nga kjoí ijngoò k'a Cristo

⁶ Jè àkjale kitsò-na:

—Én koi, nguì k'oaá s'ín tjín nga kitasòn; nguì 'én kixi-né. Jè Na'èn-ná xi Nainá xi síkichiya-la jñà xita xi chja ngajo-la, koií xá kisikasén-ne àkjale-la nga kokò-la xi ch'índa-la ma jñà kjoa xi ta nitoón okoma.

⁷ —Tiná'ya-ná. 'An, kjoí nitoón ijngoò k'a.

Mé tà ndaà-la jñà xi síkitasòn jñà 'én xi kitsjaà Nainá koni s'ín tíchja xojon jè.

⁸ 'An-ná xi 'mì-na Juan, 'aán ki'nchrè koa kijtseè kjoa koi. K'e nga jye ki'nchrè koa jye kijtseè, tsohósijna-xkó'nchi-niñiat'aà-là jè àkjale xi tihokó-na kjoa koi, nga mejèn-na skoexkoán.

⁹ Tanga jè àkjale kitsò-na:

—Kì k'oaá 'ni. Jè Nainá jchaxkoín. 'An, tikoáa chí'nda-là Nainá ma, koni ngaji, kò xita xingui xi chja ngajo-là Nainá, kò ngats'iì xita xi síkitasòn 'én xi tjít'aà xojon jè.

¹⁰ K'oaá tìs'ín kitsò-na:

—Kì bijná'ma jñà 'én xi Nainá kitsjaà xi tjít'aà xojon jè, nga jyeé nchrobá machraña nachrjein nga kítasòn.

¹¹ Jñà xita xi mìtsà kixi títasajna nguixkon Nainá nga ch'o s'ín, ta k'oaá s'ín kàtitsajna. Kò jñà xi tjín-là kjoakixi kò tsjeè títasajna nga nguixkon Nainá, k'oaá tìs'ín kàtasíkitasòn xi kjoakixi kò kjoatsjeè.

¹² —Tíná'ya, 'an, kjoíi nitoón ìjngò k'a. Yá kjoijkoaa chí-là xi tsjaà-là xita koni s'ín kis'iìn nga ìjngò ìjngò.

¹³ 'An-ná xi tìjna ítjoàn skanda tàts'en-là kjoa kò skanda fehet'aà-ne. 'An-ná xi tsibìts'iaa kò xi sikjehet'aà-na kjoa. 'An-ná xi tìjna ítjoàn kò xi fehet'aà-ne.

¹⁴ Mé ta ndaà-là jñà xita xi [jní-là Orrè] sítsjeè-ne nikje-là mé-ne nga tjò'nde-là nga skine toò-là yá xi tsjá kjoabinachon, tikoá koma kjoahas'en xotjoa-là jè naxandá.

¹⁵ Tanga nditsiaán kítasajna, ngats'iì jñà xita xi ch'o s'ín, kò jñà xi xita tje, kò jñà xi kjoa chijngui s'ín, kò jñà xi xita sík'en, kò jñà xi xkósòn beèxkón kò ngats'iì xi tsjakeè kjoa ndiso nga 'én ndiso chja.

¹⁶ —'An xi 'mì-na Jesús, 'aán kisikasén-nò àkjale-na nga tsjá-nò 'én it'aà ts'e kjoa koi, jñò xi xita naxandá-na ma. 'An-ná jè jts'én xi itjot'aà-ne tje-là xitaxá ítjòn xi ki'mì David. 'An-ná ni'ño tse xi 'ñó ote kji xi bitjokàtji k'e nga tajñòya.

¹⁷ Jè Iníma Tsjeè-là Nainá kò chjoón-là Orrè, tsò-né:

—Nchroboí [Nà'èn Jesús].

Jñà xi nchi'nchré, k'oaá tì kàtatsò:

—Nchroboí [Nà'èn Jesús].

Jñà xi xíndá-là kò xi mejèn-là nandá, kàtjanchrobá, kàt'iì kjotjò nandá xi tsjá kjoabinachon.

¹⁸ 'An, k'oaá xan-nò, ngats'ioò xi na'yà-là jñà 'én xi kitsjaà Nainá xi tjít'aà xojon jè: Tsà yá xi kít'aàsòn kjoa xi tjít'aà xojon jè, Nainá k'oaá tìs'ín tsjásòn-là kjo'in koni s'ín tjít'aà xojon jè.

¹⁹ Tsà yá xi kjoáxìn jngò-là 'én xi kitsjaà Nainá xi tjít'aà xojon jè, Nainá, tikoáa kjoáxìn kjondaà xi tjí'nde-là nga skine toò-là yá xi tsjá kjoabinachon kò mìkì tsjá'nde-là nga ya kítasajna naxandá tsjeè-là Nainá koni s'ín tjít'aà xojon jè.

²⁰ Jè xi bénojmi kjoa koi, k'oaá tsò:

—Jon, kjoii nitoón ìjngò k'a.

K'oaá s'ín kàtama. ¡Nchroboí Nà'èn Jesús!

²¹ Kjondaà-là Nà'èn-ná Jesucristo kàtijnako-nó ngats'ioò. K'oaá s'ín kàtama.